


Esuquidistu Chuiquin  
Tantiamete



New Testament in Matsés (PE:mcf:Matsés)

**Esuquidistu Chuiquin Tantiamente**  
**New Testament in Matsés (PE:mcf:Matsés)**

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

**Copyright Information**

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Matsés

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

## Contents

Mateyon Dada uaid . . . . .	1
Madcosèn Dada uaid . . . . .	75
Ducasèn Dada uaid . . . . .	118
Uanèn Dada uaid . . . . .	189
Esus Chuibenequidon Naid . . . . .	243
Doma yacnocquidon Iste . . . . .	307
Codinto yacnocquidon Iste 1 . . . . .	341
Codinto yacnocquidon Iste 2 . . . . .	370
Cadasia yacnocquidon Iste . . . . .	387
Epeso yacnocquidon Iste . . . . .	400
Pidipos yacnocquidon Iste . . . . .	411
Codosas yacnocquidon Iste . . . . .	419
Tesadonica yacnocquidon Iste 1 . . . . .	427
Tesadonica yacnocquidon Iste 2 . . . . .	434
Timoteyon Iste 1 . . . . .	438
Timoteyon Iste 2 . . . . .	447
Titon Iste . . . . .	454
Pidemonèn Iste . . . . .	459
Ebedeyon Isadaidbon Iste . . . . .	461
Santiacon Dada uaid . . . . .	482
Petedon Dada uaid 1 . . . . .	490
Petedon Dada uaid 2 . . . . .	500
Uanèn Dada uaidèmpi 1 . . . . .	505
Uanèn Dada uaidèmpi 2 . . . . .	513
Uanèn Dada uaidèmpi 3 . . . . .	514
Udasèn Dada uaid . . . . .	516
Esusèn Uan Ismiaid . . . . .	519

## MATEYON DADA UAID

### *Esuquidistun tsusedpabotedi chiaid (Duc 3.23-38)*

<sup>1</sup> Esuquidistu chuiquin dada uanu. Aidën tsusedpa Abadauan nec. Aidën tsusedpabidi Abadauanën tsyuecquid Dabid nec. Abadauanën tsyuecquido chuiquinc aidën tsyuecquid Dabidën tsyuecquido chuiquinc caquin Esusën tsusedpabotedi chuinu. Tantia.

<sup>2</sup> Abadauanquiobi bedanquin chuinu. Abadauanën mado Isac cuëmëdpampic. Isaquën madobic Acobo cuëmëdquid. Acobon mado dadpen icpampic. Abentsëc Uda cuëmëdnuc aton buchiado utsi-utsiec cuëmëdpampic.

<sup>3</sup> Adnubien Acobon mado Uda caidën Tamad caid abentsen chudpampic. Aden chudaqui bacuë daëd usundoshon abi ushëmbi aton mado daëdpambo tishpampic. Abentsëc Pades cuëntanquin utsi Sada cuëmpampic. Padesën mado Eston cuëmëdpampic. Estonën madobic Adan cuëmëdquid. <sup>4</sup> Adanën madobic Aminidad cuëmëdquid. Aminidadën madobic Nason cuëmëdquid. Nasonën madobic Sadmon cuëmëdquid icpampic. <sup>5</sup> Adshumbic Sadmonën aton chido Daba bedshun aton mado Bos tishmepampic. Adoac canishumbi Bosën aton chido Dud bedshun aton mado Obed tishmepampic. Obedën mado Isai cuëmëdquid icpampic. <sup>6</sup> Adshumbic Isain aton mado Dabid isadaidbo chuiquid dapambo tishmepampic. Adoac canishumbic Dabidën dada utsi Udias caid cunesunetanquin aton chido bedshun aton mado Sadomon tishmepampic.

<sup>7</sup> Sadomonën mado Doboan nepampic. Doboanën madobic Abias cuëmëdquid. Abiasën madobic Asa cuëmëdquid. <sup>8</sup> Asan madobic Osapad cuëmëdquid. Osapadën madobic Odan cuëmëdquid. Odanën madobic Usias cuëmëdquid. <sup>9</sup> Usiasën madobic Otan cuëmëdquid. Otanën madobic Acas cuëmëdquid. Acasën madobic Esequias cuëmëdquid. <sup>10</sup> Esequiasën madobic Manases cuëmëdquid. Manasesën madobic Amon cuëmëdquid. Amonën madobic Osias cuëmëdquid. <sup>11</sup> Osiasën madobic Econias cuëmëdquid. Aid Econias caid aton matsesadobëdtabi yuanuen Babidonia yacnocquidon aton nidaidën buampampic.

<sup>12</sup> Buanac shubu dadpen icquid Babidonia caid yacnoshon Econiasën aton mado Sadatied tishmepampic. Sadatiedën mado Sodobabed cuëmëdpampic.

<sup>13</sup> Sodobabedën madobic Abiud cuëmëdquid. Abiudën madobic Ediaquin cuëmëdquid. Ediaquinën madobic Asod cuëmëdquid. <sup>14</sup> Asodën madobic Sadoc cuëmëdquid. Sadoquën madobic Aquin cuëmëdquid. Aquinën madobic Ediud cuëmëdquid. <sup>15</sup> Ediudën madobic Ediasad cuëmëdquid. Ediasadën madobic Matan cuëmëdquid. Matanën madobic Acobo cuëmëdquid. <sup>16</sup> Acobon madobic Ose cuëmëdpac caondash. Aidquio Madian bënë nepac caondash. Aidën inabi Madian Esus usundoshon tishpac caondash. Esus Nuquin Papan chomiaid yec matses bëdambo icmequidquio nec. Isadaidbon cainaidquio nec.

<sup>17</sup> Aidtedi Esusën tsusedpabo icpampic. Abadauamba bedanquin aton matses 14tedi chuiquin Dabid ënquin chiombi. Adoshombic Dabid ënquin chuiboed chuioaquin padpiden bedanquin aidën matses 14tedbidi chuiquin Econias aton matsesbëdta buanaid ënquin chiombi. Adoshombic Econias ënquin chuiboed chuioaquin padpiden bedanquin aton matses 14tedbidi chuiquin Esusquiobi ënquin chiombi.

*Esuquidistu tishaid*  
(Duc 2.1-7)

<sup>18</sup> Nēbi aid tishaidquio chuinu. Esus tishabi yec aton tita Madia icpac caondash. Abi inuequidēn Osen bedabi icshobi Nuquin Papan Mayanēn bacuē usundomepac caondash. <sup>19</sup> Usundoacsho isun abi inuequidēn Osen dada utsin chudaid danec: —“Nēbi mibi bedtiapimbo iquebi,” quequin bedenquio icnuen dada uashun Madia menenu —queuidpac caondash. Nuquin Papan chiacpadquio bēdambo icquid icquin naden chiambo icpac caondash. —Bedabi bacuē usundoaque. Cuidquimbien ictiad —quequin aton matses chienquio yequi: —Bedenquio icnuen dada uaid menenu —queuidpac caondash.

<sup>20</sup> Adnubien Nuquin Papan abi yacnoshon uaidēn mayan bēdan Ose ushquin ismepac caondash. —Dabid yampidēn tsyuecquid icsho mibi chuinu, Ose. Tantia. Chudenquio icquin Nuquin Papan Mayanēn Madia bacuē usundomiaye. Dacuēdenda. Dacuēdenquio icquin Madia min shubuno buanta. <sup>21</sup> Adoshombic dada bacuē tishacsho Esus cuēnta. “Matses icsaid bedshunquin Nuquin Papa aton matses cuidmenquio iquendac,” quequin Esus cuēnta —quequin mayan bēdan Ose ushquin ismepac caondash.

<sup>22</sup> Aden mayan bēdan Esus tishte chiacpadomboen Nuquin Papan ambi chiaid naden dada uamepampic.

<sup>23</sup> “Dadan inacmaidēmbi bacuē usundoshon dada bacuē tishendac. Aidi Imanued cuēnendac.

‘Nuquin Papapadquidquibidi matsesbēd tabadnuec choash nec,’ quequin Imanued cuēnendac,” quequin Esus tishte Nuquin Papan dada uamepampic.

<sup>24</sup> Aden mayan bēdan chiac isucunshumbien aidēn chiacpadomboen Osen aton shubuno Madia buampac caondash. <sup>25</sup> Buanshun Osen chudenquio icnubi dada bacuē tishpac caondash. Tishacsho Esus cuēmpac caondash.

## 2

*Uispa isquido Esus isec choaid*

<sup>1</sup> Nidaid Udeya caid yacno tabadquin shubu daēdpactsēcquid Beden caid yacnoshon Esus tishpac caondash. Adnubien shubu dadpen icquid Edusaden caid yacno isadaidbo matses ancaquid Edodes cuēmēdquid icpac caondash. Aid icnubi matses utsibo uispa isquido Esus isnuec ushē choacmiuēsh chopac caondash. Edusaden yacno choquin <sup>2</sup> anocquido chuituidpac caondash. —Min matses isadaidbo chuiquid dapa ictequidquio nēbi tishtsaidēmpi ¿midambo ictseque? Isnu. Aid tishaid tantiamete uispa isombique. ¿Mitsimbo ictseque? Isnu. “Chuiquid dapa bēdamboshē ictequid nec,” quiash aid isnuec chopobi —quetuidpac caondash.

<sup>3</sup> Adsho tantiash dacuēdcuededpac caondash abitedimbo. —Padtec. ¿Midadpadquid bacuē nependabac? —quecuededpac caondash Edodes isadaidbo ancaquid ambi ancaidobēdi. <sup>4</sup> Adshumbien Edodesēn abi yacno tsusiobo cho-chomepac caondash. —¿Mitsicquid caique? Tantuanu —queshun abi yacno Moisesēn dada uampid chuibanquido abi chuiquid dapabobēdta cho-chomeshumbic: —¿Mitsishunquio Nuquin Papan chomiaid min matses chuiquid dapa ictequid tishpash? ¿Ada Nuquin Papan chiaid isbanquin tantio? —caquien: <sup>5</sup> —Ai, tantiembi. “Nidaid Udeya caid yacno tabadquin shubu daēdpactsēcquid Beden caid yacnoshon aid bacuē tishendac,” quiampicpadembi tantiembi. Nuquin Papan ambi chiaid nuquin tsusedpa dada uamepampic naden. <sup>6</sup> Shubu daēdpactsēcquid Beden caid yacnocquido chiec:

“Beden yacno tabadec nidaid Udeya caidën tabadquido mibi nec.  
 ‘Chuiquid dapa nibëdnuc icsambo iquendac,’ quedenedi mibi yacnoshon  
 chuiquid dapa ictequid tishendac.

Aidëmbi isadaidbo matses chuiquid dapa icquin bëdamboen tabadmendac,”  
 —quequin Nuquin Papan Esus tishte chiaid chuipac caondash tsusiobon  
 Edodes caid chuiquin.

<sup>7</sup> Adoaquien Edodesën ambi ancaido isadaidbo ismenquio icquin matses  
 utsibo uispa isquido chomeshun chuimepac caondash. —¿Nëbida tishaid  
 tantiamete uispa isquin tauao? ¿Nëid inchëshën ushëmbida isbeno? ¿Ëndenda  
 isbenonda? En chui. Tantanu —cac chuisho <sup>8</sup> tantiashun: —Beden yacno  
 istan. Ano nidshun mimbi chiapadquid bacuë istan. Aid bacuë istanec  
 cuenquin ëbi chuibenta. Ëmbitsen istanu. “Nuquin Papan chomiaid chuiquid  
 dapa ictequid bëdambo iquec,” quequin ëmbitsen istanu —capac caondash  
 Edodesën muaquimbi. —Cuesunenu —quequimbi adopac caondash.

<sup>9</sup> Adoaquien ushë choacmiuësh bed-bedquesho ambi isbëquin  
 tsibambëboedi uispa tsibanec Beden yacno nidpac caondash. Adec  
 nidnubien uispa shubu ismec nidtuidpac caondash: —Bacuë ictsaid  
 shubu nëid iquec —quec. <sup>10</sup> Adsho isashien cuishonquepac caondash  
 uispa isquido. <sup>11</sup> Adash shubun puduedshun isquien aton tita Madiabëd  
 bacuë ictsec. Aid isashic: —Matses chuiquid dapa ictequid nec. Matses  
 bëdambo icmetequid nec —quequin aton matsesën nacpadomboen ismequin  
 danëshën sebudpac caondash. Adshumbic ambi bëboed aton na bëdambo  
 icquid chicshun menepac caondash nëidtedi. Nëidic shocosh piu. Nëidic  
 bëdambo nuadnuc tauitequid. Nëidic bëdambo noadec danoshquete. Aidtedi  
 menepac caondash. Adoash ushtopac caondash. <sup>12</sup> Adec ushtoacsho  
 Nuquin Papan ushquin ismepac caondash. —Isadaidbo ancaquid Edodes  
 chuibidanenda —quequin ushquin ismiac isucunanec abi choboedën  
 nidenquio yec podqued utsin nidpac caondash aton shubuno nidec.

### *Equipito yacno Osen buanaid*

<sup>13</sup> Esus isuanquido nidambien Nuquin Papan abi yacnoshon uaidën  
 mayan bëdan Ose ushquin ismepac caondash. —Isucunanec cuenta.  
 Bacuëmpi aton titabëdta buanec nidaid utsi Equipito caid yacno cuenta. Ëmbi  
 chiabi choenda. Anobi tabadta. Edodesën: “Bacuëmpibo cuesun siatanta,”  
 cac cho-choeque. Cuenta —quequin Ose ushquin ismepac caondash mayan  
 bëdan.

<sup>14</sup> Aden ushquin ismiac isucuntantsequi inchëshëmbi puduanec aton bacuë  
 anibëdta buanec nidaid utsi Equipito caid yacno Ose nidpac caondash.  
<sup>15</sup> Equipito yacno nidash ambobi tabadpac caondash. Isadaidbo ancaquid  
 Edodes unësabi icnuc Equipito yacno tabadpac caondash. Esus tishabi icnubi  
 ëndenquimboshë Nuquin Papan tantiamiac ambi chiaid chuibanquidën Esus  
 Equipito yacno buante chuiquin dada uapampic naden chuiquin. “Equipito  
 yacno nidash tabadsho: ‘Auëshquio cho, Mado, caindami,’ quiosh Nuquin  
 Papa,” quequin Nuquin Papan chiaid dada uapampic.

### *Bacuëbo dadpen cuesun siatanaid*

<sup>16</sup> Adnubien isadaidbo ancaquid Edodes: —Uispa isquidon cacuidposhi  
 —quiash comapenec nëishun aton yuabo sondado chuipac caondash. —  
 Uispa isquidon chuibocpadtsëcquid comapenec onquecuenabi ictsëcquidotedi  
 dada bacuëmpibotedi cuesun siatan. Beden yacnocquidon bacuëbobëdtabi

uano pauequidon bacuëbotsen cuesun siatan —cac cuesun siatampac caondash. <sup>17</sup> Aden cuesun siatanambo icnubi Nuquin Papan adote chiaid ëndenquimboshë Edemias cuëmëdquidën dada uapampic naden chuiquin.

<sup>18</sup> “Abi yacnuësh aton bacuëbo nibëdansho isash isadaidbon chidobo sedenquecuededendac.

Unësaid tantiec baded ënëdenquio yec sedenquebudnendac,”

quequin chiampicpadomboen aton bacuëbo nibëdamepac caondash.

<sup>19</sup> Yuecquio ictaniashic isadaidbo ancaquid Edodes caid unëspac caondash. Adambic nidaid utsi Equipito caid yacno tabadsho Nuquin Papan abi yacnoshon uaidën mayan bëdan Ose ushquin ismepac caondash. <sup>20</sup> —“Bacuëbo cuesun siatan,” quiondaid unësaccoshe. Min chido min bacuëbëdta buanec min nidaid Isadaid caidën nidoata —caquien <sup>21</sup> isucunanec aidën chuibocno buanuec nidpac caondash.

<sup>22</sup> Aton nidaidën nidshun aton matsesën chiaid tantiapac caondash. —¿Ada tantio? Udeya yacnocquido ancadened unësaidën mado Adquedayo caid ancanquidquibidien nechitec —quesho tantiashien dacuëdtampac caondash Ose. Adshobien Nuquin Papan Ose ushquin ismeopac caondash. —Cuesunenushë. Min nidaid Udeya caidën nidenda —quequin ushquin ismiac isucunanec aid nidaid Isadaid caidëmbidi nidec aid nidaid cuëshë utsi Cadidia caidën nidpac caondash. Udeya caidën nidenquio yec uquëmbo nidpac caondash. <sup>23</sup> Uquëmbo nidec shubu dadpen icquid Nasaded caid yacno choash ambo tabadtuidpac caondash. “Nasaded yacnocquid nendac,” quequin Nuquin Papan chiaid dada uampicpadec anobi tabadpac caondash. Auëshquio canipac caondash Esus.

### 3

#### *Uan acten mentoanquidën chuibeniaid*

*(Mad 1.1-8; Duc 3.1-9, 15-17; Uan 1.19-28)*

<sup>1</sup> Adash yuecquio ictaniashien Uan caid Nuquin Papa tantiabenquido acten mentoquid icpac caondash. Nidaid Udeya caid yacno shubu nibëdacno capucuenequin Nuquin Papan chiaid chuibenequid nepac caondash. <sup>2</sup> Adquid icquin Esus chote chuibampac caondash naden. —Mibi icsaid ënash bëdamboec tabadta. Nuquin Icbombo choeque —quequin chuipac caondash. <sup>3</sup> Aden Uanën chuite chuiquin Nuquin Papan isadaidbo tsusedpa Isayas cuëmëdquid dada uamepampic naden.

“Masiuidpambo yacno shubu nibëdacno capuquin ëcac matses chosho chuibenendac.

‘Chuiquid dapa choeque. Podqued andëdbanshunta,’ quiacbimboen:

‘Nuquin Icbombo choeque.

Icsaid ënash bëdamboec tabadta,’ quequin chuibenendac,”

quequin Isayasën Uanën chuite chuipampic.

<sup>4</sup> Nadquid Uan icpondash. Aton dashcute nëish yua dapa cameyo caidën bu daëdcaid dasiuidpondash. Tsipantebic nidaidën capuquid yua bitsi nacenaid tsiupondash. Aton pete bacumbëd shioshbimboecquid icpondash.

<sup>5</sup> Aidën Nuquin Papan chiaid chuibenesho tantianuec nëidtedi matses cho-chopac caondash. Nëidic shubu dadpen icquid Edusaden caid yacnocquido. Nëidic nidaid Udeya caid yacnocquido. Nëidic acte Odan caid cuëman tabadquido. Aidtedi cho-chopac caondash. <sup>6</sup> Cho-choshon Uanën chuisho tantiash: —Nuquin Papan chiaid niac-niaquec icsapobi. Icsaboedi aid tantiec bëdamboec tabadtiadquio iquebi —quesho: —“Nëid Nuquin Papa tantianu,” quequid nec —quequin acte Odan caidën mentopac caondash Uanën.

<sup>7</sup> Adnubien padiseyobobëd saduseyobo Uan isec cho-chopac caondash. Padiseyobo isadaidbo tsusedpabon chiaid namequido nec. Saduseyobobic: —Matses unësaid uincuenenquo iquendac —quequido nec. Aido cho-chosho isun Uanën: —Nisibimboecquido mibi nec. Adquidën icsa uacbimboen matses icsa uaquido mibi nec. Bëdambo icquid damianquiec mibi iquec. “Nuquin Papan mibi cuidnushe. Tantiatan,” quequin ¿tsuntsin chiac cho?  
<sup>8</sup> Mentomete bunec Nuquin Papan chiaid niac-niacboedi ënash bëdamboec tabadta. <sup>9</sup> “Ëbipadquid Abadauanën tsyuecquidoudtsëqui Nuquin Papan bëdamboen isec,” quequin tantienda. ¿Adquidta Nuquin Papan bëdamboen ispec? Abadauampadquid abi tantiaquidien Nuquin Papan bëdamboen isec. Mimbi bëdamboen tantiatiapimbo icscho isun nëid cuënotebi matses uashun Nuquin Papan Abadauampadquid abi tantiaquidombo icmetsiash icnushe. Nuquin Papambo tantiata. <sup>10</sup> “Icsambo icquid nec,” queshun ambi nitsinaid cuëte bacuëesa dëdshun nëdëncacimboen ambi chiacpadomboen naisa Nuquin Papan cuidendac —quepac caondash Uan padiseyobo saduseyobobëdta chiec.

<sup>11</sup> Adshumbic padpiden chuiquin Esusën nate chuipac caondash. —Nuquin Papa tantianuequid acten mentobanquin chuibanquid nebi. Padnuen con tsyuecquid choshon aidëntsen chuibanendac. Ëbi bëdiactsëc tantiaquid ictsëcnuc aidquien comapenen tantiaquidquo yec bëdamboshë iquendac. “Aidquid bëdamboshë icquid icnuc ¿atotsieshun icsaquidquobi: ‘Aid choec,’ quequin chuiquidquo Nuquin Papan ëbi icmeposh?” quec tsadebi. Ëmbi chuiboed choshon: “Ëbi tantiaquid nec,” queshun aton Mayan menequin bëdamboec tabadte mibi tantiamendac. Abi tantiesaboen cuidendac. <sup>12</sup> Piacbo choeshashun putu bushcaquin secacimboen abi tantiesabo chian anëdënquiacno nësecaindac. Adshumbic abi tantiaquido abëdi tabadmendac —quepac caondash Uan acten mentoanquid.

#### *Uanën Esus mentoaid*

*(Mad 1.9-11; Duc 3.21-22; Uan 1.32-34)*

<sup>13</sup> Acte Odan caidën matses mentoec adpac caondash Uan. Adnubien Uan yacno Esusquid chopac caondash. Aton nidaid Cadidia caid yacnuësh tauamboen matses ismenuc choec: —Ëbitsen mento —quetuidpac caondash. <sup>14</sup> Adshobien Uanën: —Padenquo iquembi. Nuquin Papan chomiaid icquin mimbibi ëbi naquien bëdambo ictsiash. ¿Atotsieshun ëbi aden chie? Padi —queshobien: <sup>15</sup> —En na. Bëdambo iquec. Ëbi mentoquin mimbi Nuquin Papan chiacpadomboen natsiaque. Ëbi acten mento —quesho tantiasun Esus acten mentopac caondash Uanën.

<sup>16</sup> Adoac Esus pudundonobien canchedacimboec abu shëcuë yampac caondash. Adsho isaquien aid shëcuë yacnuëshquid dëbimbimboec budec Nuquin Papan Mayan Esusquid matsadtopac caondash abëd icnuec.

<sup>17</sup> Adnubien abucuëshquid Nuquin Papa onquiampac caondash. —Nëid ëmbi tantiaidquid con Mado nec. Ëmbi chiacpadomboen nasho isash bëdambo iquebi —quepac caondash Esus caic.

## 4

### *Satanasën Esus icsamenuequin tanuidaid*

*(Mad 1.12-13; Duc 4.1-13)*

<sup>1</sup> Uanën acten mentobocshobien Nuquin Papan Mayanën masiuidpambo yacno matses nibëdacno Esus nidmepac caondash. —Ma Nuquin Papa chieshënquid Satanäsën Esus icsamenuequin ma tanu —quequin ambo nidmepac caondash.



<sup>2</sup> Adoaquien buna mëmunquin penquo yec Esus tsadpac caondash. Inchëshën ushë abentsëc nidmiash utsi tashquecuntsëcnuc 40tedec ushquin penquo yec comapenec bumpac caondash. <sup>3</sup> Bunec tsadshobien Satanasën istuidpac caondash. Istuidtanquimbien: —¿Nuquin Papan Madombobida mibi neque? Aidën Madombo icquin nëid cuënote cain: “Pete icta,” cata —caquien <sup>4</sup> Esus: —Padi. Nuquin Papan chiaid dada uapampid nad iquec. “¿Peteuidi tantiecta matses bëdamboec tabadpec? Nuquin Papan chiacpadomboenuidi naiquien matses bëdamboec tabadtsiash,” quequin dada uapampid iquec —quepac caondash Esus.

<sup>5</sup> Adsho tantiashumbien shubu dadpen icquid Edusaden caid yacno buanshun Nuquin Papa tabadte shubu uashunaid macano Satanasën Esus manidtomepac caondash abucquo. <sup>6</sup> Adotanguimbien padpiden chuiquoquin: —¿Nuquin Papa caidën Madombobida mibi neque? Aidën Mado yec nëuëshquio pudunta. Nuquin Papan mibi paëdmenquo ictsiash. Nadentsen Nuquin Papan chiaid dada uapampic.

“ ‘Uidën uata,’ quequin ambi abi yacnoshon uaido mayan bëdabo Nuquin Papan chiac mibi uidën uaindac paëdenquo icnuc.

‘Cuënoten tadquëdnushe,’ qeshun adoendac,”

quequin Nuquin Papan chiaid dada uapampique. Pudunta —caquien <sup>7</sup> Esus: —Padi. Nuquin Papan chiaid dada uapampid nad iquec. “ ‘¿Icsamboen tantiaquin ëmbembi nashodabi Nuquin Papan cuidpatsiashe? Tanu,’ quenda,” quequin dada uapampique. Padi —quepac caondash Esus.

<sup>8</sup> Adoaquien Satanasën padpiden buanquin macuësh dapa abucquiocquid manidtomeshun nidaid abichobi Esus ismepac caondash. Chuiquid dapabotedi ismequinc aidobëd icquido ismequinc aidon dayun uaidtedi ismequinc capac caondash. <sup>9</sup> Adoshombic: —Nëidtedi mibi menetsiambique. Èbi con icbo cata. Èbi aden chuiquin ismenuen danëshën sebudta. Adsho isun ëmbi ismiactedi mibi menembi. Aidën icbo mibi icmembi —caquien <sup>10</sup> Esusën: —Padi. Baded cuenta. Nuquin Papan chiaidquo chuiquin naden dada uapampique. “Nuquin Papa abentsëcquiobi mimbi tantiaiduidtsëqui min Icbombo neque. Aidën namiaidquo icta,” quequin dada uapampique. Cuenta —capac caondash Esusën. <sup>11</sup> Adoaquien Satanas cuempac caondash. Cuenubien Nuquin Papan abi yacnoshon uaido mayan bëdabo choshon abëdi tabadquin Esus bëdambo icmepac caondash.

*Cadidia yacnoshon Esusën chuibeniaid*  
(Mad 1.14-15; Duc 4.14-15)

<sup>12</sup> Adashic aton nidaid Cadidia caidën Esus nidpac caondash. —Mibi acten mentondaaid Uan bedshun quënën nauedac caosh —quesho tantiash nidpac caondash. <sup>13</sup> Nidashic shubu dadpen icquid Nasaded caid yacno tabadash nidec chian dapa cuëman shubu dadpen icquid Capednaun caid yacno nidash anotsen tabadoapac caondash. Aid nidaid Netadi capampic. Aid anoentsëqui icquid nidaid utsi con tsusedpabon Sabudon capampic. <sup>14</sup> Esus ambo tabadte chuiquin Nuquin Papan con tsusedpa Isayas cuëmëdquid dada uamiampicpadec ambo tabadpac caondash Esus. Naden dada uapampic.

<sup>15</sup> “Nuquin Papa tantiamequidën chuisho nëidtedishun tantiendac.

Nëidic nidaid cuëshë utsi Netadi caidën tabadquidon.

Nëidic nidaid cuëshë utsi Sabudon caidën tabadquidon.

Nëidic chian dapambo anoentsëqui tabadquidon.

Nëidic acte dapa Odan caid cuëman tabadquidon.

Nëidic isadaidpembo dadpen tabadacno Cadidia caidën tabadquidon.

<sup>16</sup> Aitedishun Nuquin Papan chomiaid tantiendac.

Pabiate cuënédacimboec icsamboec tabadquin Nuquin Papa tantienquo  
icboedombi tantiabenendac.

Nuquin Papa tantiamenuen chuibansho tantiashun matsesën  
paposhquiabimboen Nuquin Papa tantiabenendac.

Abi tantienquo icsho Nuquin Papan cuidtsenaidombi Nuquin Papa tan-  
tiabenendac ushash isucunacimboen,”

quequin Isayas Esus choash tabadte dada uamepampic Nuquin Papan.

<sup>17</sup> Ashunquiobi Nuquin Papan chiaid chuiquin tauamboen Esusën matses  
abitedimbo chuibenepac caondash. —Icsaid ënash Nuquin Papa tantiec  
ambi chiacpadec bédamboec tabadta. Nēbi Nuquin Papan abēd tabadtequido  
icmequin matses bédamboen tabadmendac —quepac caondash Esus ambibi  
naid chiequi.

*Nuëcquid bedquido Esusën: Cho, caid*  
(*Mad 1.16-20; Duc 5.1-11*)

<sup>18</sup> Aden chuibenec chian dapa Cadidia caid cuëman nidquin isquien dadan  
aton utsibëdtambi nēshaid dapambo acte nēnepec. Aid Simombidi Petedo  
capec. Aton utsi Andedes nec. Aid daëdshun nuëcquid bedquidombo icquin  
aton nēshaid acte nēnesho istuidpac caondash Esusën. <sup>19</sup> Adshumbien Esusën:  
—Nuquibi icnu. Cho. Nuëcquid bedquid icboedi nēbi ëbi chuibanquid  
mibi icmenu <sup>20</sup> —caquien aton nēshaid nianec nidquimbi Esus tsibanampac  
caondash.

<sup>21</sup> Uditsëc nidquin isquien dada daëd cano antabëdpec. Acobo aton utsi  
Uambëd icpac caondash. Aton papa Sebedeyo caidbëdi cano antabëdquin  
nuëcquid bednun aton nēshaid dapa nacnempac caondash. Adsho istuidshun  
Esusën: —Nuquibi icnu. Cho —caquien <sup>22</sup> aton papabëdta cano nianec  
Esusbëd icnuec nidpac caondash.

*Matses dadpen Esusën chuibeniaid*  
(*Duc 6.17-19*)

<sup>23</sup> Adashic aton nidaid Cadidia caid yacnobi capucuenec Nuquin Papan  
chiaid chuibante shubun-shubunquiec puduedcuenequin Esusën Nuquin  
Papan chiaid chuibenepac caondash. Abi yacno tabadmenun Nuquin Pa-  
pan bédamboen iste matses chuibeniac caondash. Adshumbic daicsaidotedi  
bédamebampac caondash. <sup>24</sup> Adosho istanquin: —Bédamequidquido nec —  
quequin isboedon Esusën naid chuibenepac caondash. Ënapen nidec nidaid  
utsi Sidia caidën nidshun chuibeniac caondash. Aden chiac daicsaidotedi bē-  
bëpac caondash. Dada paëmboshë icquido yec podobitsi icsa dapuduedaido  
yec unësanquido yec dada shëquëquenquo icquido yec quenuc bē-bëacsho  
aidtedi bédamepac caondash Esusën. <sup>25</sup> Aden: —Bëdamiosh —quequin chiac  
isec cho-choash dadpenquo tsucus-tsucustsëcquido yec tsidadash niquian-  
quin Esus tsibanampac caondash. Nëidtedshun tsibananac caondash. Nëidic  
nidaid Cadidia caidën tabadquidon. Nëidic shubu dadpen icquid Decapodis  
caid yacno tabadquidon. Nëidic shubu dadpen icquid Edusaden caid yacnoc-  
quidon. Nëidic nidaid Udeya caidën tabadquidon. Nëidic acte Odan caid uquë  
cuëma utsiuc tabadquidon. Aidtedshun Esus tsibanampac caondash.

## 5

*Nadquido bédambo iquendac, quequin Esusën chiaid*  
(*Duc 6.20-23*)

<sup>1</sup> Matses dadpenshun tsibananac macuësh dapa cuëte nibëdpamboecquid  
pudundoec poctsebi Esus tsadtuidpondash. Abi tsibananash matses dad-  
pen abi datsidadnubien abēd icquido Esusën dayunquo tabadpondash.

<sup>2</sup> Adshobien Nuquin Papan matses bēdamboen isquin bēdambo icmete Esusēn matses abitedi chuibampondash.

<sup>3</sup> —¿Mitsipadquid Nuquin Papan bēdambo icmepec? Nadquid caimbique. Tantia. Mibitedi chuinu. “Ēbemi bēdamboec tabadtiapimbo iquebi. Bēdapenquio iquebi. Nuquin Papan bēdamboen tabadmiaquini bēdamboec tabadtsiac,” quequid Nuquin Papan: “Ēbēd tabadtequid nec,” quequin bēdambo icmendac.

<sup>4</sup> “Matses abitedi icsamboec tabadnuc ēbitsen icsamboec tabadquid nebi,” quec shubiquimbi abi tantiasho Nuquin Papan bēdamboen isquin bēdambo icmendac.

<sup>5</sup> Aton nauidi tantienquio icquin Nuquin Papa tantiaquin utsibotsen tantiaquid Nuquin Papan bēdambo icmendac. Yuecshun ambi nidaid chuca uaidēn tabadmendac.

<sup>6</sup> Pete bunacimboec ambi chiacpadec bēdamboec tabadte bunquid Nuquin Papan bēdamboen tabadmendac.

<sup>7</sup> Abi chieshēnquidi chieshēnenuio icquin bēdamboen isquid Nuquin Papan bēdamboen isendac.

<sup>8</sup> Ambi chiacpadomboenuidi nate bunquid Nuquin Papan bēdambo icmequin abibi bēismendac.

<sup>9</sup> Aton matses chieshēnansho isash: “Padi. Chēn. Bēdamboequien tabadtiad,” quequid Nuquin Papan bēdambo icmequin con mado caindac. Adquidbidi adembidi con champi caindac.

<sup>10</sup> Nuquin Papa tantiec bēdamboec tabadsho utsin chieshēnaid Nuquin Papan bēdambo icmequin unēsacsho abēdi tabadmendac. <sup>11</sup> “Esus tantiaquid nec,” queshun utsin mibi chieshēnquin chiacsho Nuquin Papan abēd tabadmenuen mibi bēdambo icmendac. Mibi cueso adembidi mibi bēdambo icmendac. Adembidi mibi muauasho Nuquin Papan mibi bēdambo icmendac. <sup>12</sup> Aden utsibon: “Esus tantiaquid nec,” queshun chieshēnaqui cuishtonqueta. “Ēnden tsusedpabon Nuquin Papan chiaid chuisho chieshēnquin cuesunepampic. Adoacsho Nuquin Papan bēdamboen isquin abēdi tabadmec. Adembidi utsibon chieshēnacsho ēbi bēdamboen isquin unēsacsho abēdi tabadmendac,” quiash cuishtonqueta —quequin chuipondash Esusēn.

*Abi tantiaquido bēdamboec tabadte chiaid  
(Mad 9.50; Duc 14.34-35)*

<sup>13</sup> Abi macuēsh dapa poctse tsadquin Esusēn chuibampondash. —“Ma utsibontsen Nuquin Papa tantianu,” quec sa pambid casecac batambo yec petiadquio yacimboec icta. Aden Nuquin Papan chiacpadec bēdamboec tabadquin mimbi utsibo bēdamboec tabadte bumetsiac. Sa batambo icquid bēdambo iquec. Sa batambo icboedi batapenquio yec icsasho ¿mitsipadentsi batambo icmeoapec? Adotiapimbo iquec. Sa icsambo yanacsho penquio icquin secatequid nec. Adembidi matsēs bēdamboec tabadenquio yec icsambo icsho Nuquin Papan chian anēdēnquiacno nēsecatequid nendac —quepondash Esus.

<sup>14</sup> Adashic padpidec onquec: —Nuquin Papan chiacpadec bēdamboec tabadte utsibo tantiamequido mibi neque. Aden tantiamenuec bēdamboec tabadta. ¿Nuntanshunda ēapadic? Padenquio. Umanucshumbien ma tantianueshun ēaquid. Adembidi: “Ma Nuquin Papan chiacpadec tabadte tantianu,” quiash ēnēdenquio yec bēdamboec tabadquin ismeta. Adsho isash: “Nuquin Papa tantiec bēdamboec tabadquid nec,” quetsiash utsibo. <sup>15</sup> ¿Utsibo chuinuecta abentsēqui uano icpadic? Padenquio. “Ma nēidēn tantianu,” quec aidbēdi bēdamboec tabadquin chuibanquid. <sup>16</sup> Adembidi ēbi tantiesabobēd tabadquin: “Ma Nuquin Papa tantianu,” quequin ēnenquio icquin Nuquin

Papan chiapadomboen nata. “‘Nuquin Papa bēdambo iquec,’ ma utsibotsen quenu,” qeshun adota —quequin Esusēn chuipondash.

### *Nuquin Papan Moises chuimiaid chiaid*

<sup>17</sup> Nadentsen Esusēn chuipondash. —Ēmbi chuibansho tantiashun: “Nuquin Papan chiaidquio chienquio iquec,” quequin tantienda. “Nuquin Papan Moises dada uamiampidbēdta con tsusedpabo utsibo dada uamiampid chienquio icquin utsi uapēc,” mimbi ēbi capec. Mambi utsi uainquio yoc. Nuquin Papan chiaid utsi uainquio icquin ambi chiactedimbo namenuc nebique. <sup>18</sup> Abimbo chuinu. Tantia. Abubēdta nidaid nibēdamiabi icnuc Nuquin Papan chiaid bēnudtiapimbo iquendac. Ambi chiactedimbo naquin Nuquin Papan nainendac.

<sup>19</sup> Padnubic Nuquin Papan: “Nadomboen nata,” quequin chiaid abentsēqui niacquin aid chiaidbidi adomboembidi niacmequid Nuquin Papan: “Bēdambo icquid nec,” catiapimbo iquec. Utsibic Nuquin Papan chiapadec tabadec: “Nuquitsen bēdamboec tabadnuna,” quequid abi yacno nidacsho Nuquin Papan: “Bēdamboshē icquid nec,” caindac. <sup>20</sup> Moisesēn dada uampid chuibanquido padiseyobobēd Nuquin Papa yacno puduedtequidoen mimbi dampec. Aido bēdambo icquid damianashi ompodash icsaic. Adashic Nuquin Papa yacno puduedtiapimbo iquendac. Adembidi Nuquin Papan chiaid niac-niaquec adecbidi Nuquin Papa yacno mibi puduedtiapimbo iquendac. Nuquin Papa tantiec bēdamboec tabadquidien puduedtsiash —quequin chuipondash Esusēn.

### *Chieshēmēnquido nēish bēdante chiaid (Duc 12.57-59)*

<sup>21</sup> Adshumbic Esusēn padpiden chuoapondash. —Nuquin Papan chiaid chuiquin isadaidbo tsusedpabon: “Cuesunenda. Cuesunianquid Nuquin Papan chiapadomboen matses cuidte chuiquidēn cuesunemequin cuidquid,” quequin chuipampid mimbi tantiec. <sup>22</sup> “Nadquidotsen cuidtequido nec,” quequin chuinu. Tantia. Aton matses nēishēnash aton nēish bēdanenquio icsho Nuquin Papan cuidtequido nendac. Utsibic chieshēmēnec icsamboec cuēmēnquido isadaidbo tsusiobon cuidacsho isun: “Bēdamboen naic,” catsiambi. Nēidic aton matses chieshēnquin shēpiaquid Nuquin Papan icsano nēsecaquin cuidtequido nendac. <sup>23</sup> “Chieshēmēnquid Nuquin Papan cuidtequid nendac,” quequin ēmbi chuisho tantiashun bēdamboen nata. Nuquin Papa tabadte shubu uashunaidēn puduedash: “Ambi chiapadomboen musuc menenu,” mibi quepec. Aden musuc menenumbi mimbi naid tantiata. “¿Ada ēbi chieshēnquid icpec? ¿Ēmbi chieshēmeboedta icpec?” quequin tantiata. <sup>24</sup> Adshun: “Ai, ēmbi chieshēmeboed iquec,” qeshun Nuquin Papa tantiaquin mimbi bēboed meniabi mibēd chieshēnamboed yacno nidash aidbēd bēdamboec onqueta. Adec bēdamboec onquiash padpidec choashun Nuquin Papa tantiaquin meneta. Adec mibēd chieshēnamboedbēdi bēdamboec onqueta.

<sup>25</sup> Mibēd chieshēnamboed utsimbic: “Nēid cuidmenuen cuidte chuiquid yacno buanchitimbimbi iquec,” qeshun: “Baded nid,” cac podquedēn nidec aidbēd bēdamboec onquenidta: “Ma nēish bēdanu,” quiash. “Matses cuidte chuiquidēn cuidchitoshe,” quiash badedquio mibēd chieshēnamboedbēd bēdamboec isnanta. Abi yacno buanacsho cuidte chuiquidēn: “Icsambo iqueque. Quēnēn nauedta. Ēmbi chiacted piucquid ēmbi bedabi icnuc ma tsadpanu,” mibi catsiash. Quēnēn nauedshun <sup>26</sup> ambi chiacted piucquid nibēdnuc mibi cuemenquio ictsiashe. Mibēd

chieshënamboedbëdi bëdamboec onqueta. “Nuquin Papan adembidi cuidnushe,” quiash adta —quequin Esusën chuipondash.

### *Icsaquin chudaïd chiaïd*

<sup>27</sup> Adshumbic naden Esusën chuipondash. —Chiaïd utsitsen mimbi tantiec. “Min chidopenquio chudenda. Min bënëpenquio chudmenda. Aben uequid chudenda. Aben uequidën dada chudmenda,” quequin Nuquin Papan chiaïd nuquin tsusedpan dada uapampic. <sup>28</sup> Aden chiaïd niacniaquec icsambo icquid icnubi nadquid icsambo icoaic. Aton chidopenquio isec: “Aidquio chudtiadquio icchitebi,” quequin otacquo tantiequi matses icsapec. <sup>29</sup> Èshën isec mibi min chidopenquio bunec icsaic. Èshë chicshuniacbimboec icsainquio yec ënëdash mibi bëdambo ictsiac. Icsaid ënenquio icquid Nuquin Papan chian anëdënquiacno nësecaquin cuidendac. <sup>30</sup> Min chidopenquio chudte bunquin mëismec mibi icsaic. Mëteshuniac bedtiapimbo yacimboen mibi icsaid ënta. Ènenquio icquid Nuquin Papan cuidendac —quequin Esusën chuipondash.

### *Aton chidobëd cuëshëdte chiaïd* (*Mat 19.3-9; Mad 10.11-12; Duc 16.18*)

<sup>31</sup> Nadentsen Esusën chuipondash. —Nuquin Papan Moises chuimiïd utsitsen mimbi tantiec. “Aton chido bunenquio icquin naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesën dada uapampic. <sup>32</sup> Utsitsen chuïnu. Aton chidon bënëpenquio chudmesho istuidshun Moisesën chiacpadomboen nac bëdambo ictsiash. Aton chido dada utsi chudmesa icshobi dadan ambembi dada uaid menequin nidmiac icsambo ictsiash. Aden nidmequin chido icsametsiash. Chido nidmiacsho bedquidtsen icsatsiash —quepondash Esus.

### *Abimbo chiacbimboen chienda, quequin Esusën chiaïd*

<sup>33</sup> Adshumbic Esusën padpiden chuipondash. —Naden Nuquin Papan ambi chiaïd nuquin tsusedpa Moises dada uamepampic. “ ‘Nuquin Papa utsi uatiapimbo yacimboen abimbo caïmbi,’ quequin chiaïd niactemaid nec. Niacsho Nuquin Papan cuidendac,” quequin Moisesën chuipampic. <sup>34-36</sup> Aidën chiacpadec muainquio ictiadquidi mimbi abimbo chiacbimboen utsi uain icsamboen chiec. “Abi cuëmëdquid cuënec muasho ëbi cuidtsiash. Nuquin Papa cuëmëdquid cuënenquio yec muasho Nuquin Papan ëbi cuidenquio ictsiash,” qeshun mimbi utsi chiec. “Abu utsi uatiapimbo yacimboen ëmbi chiacpadomboen naimbi. Muainquio iquebi,” mibi quepec. Adecbidi: “Nidaïd utsi uatiapimbo yacimboen ëmbi chiacpadomboen naimbi,” mibi queoapec. Adembidi chiec mibi Edusaden queoapec. Adembidi con mapi quequin mimbi chieque. Aden abimbo chiacbimboen chienda. “Nuquin Papa cuëmëdquid cuënenquio iccombi,” mibi quenubi abu abi tabadaïd icnuc ashunquio Nuquin Papan abitedi namendac. Nidaïdic Nuquin Papan tincate nec. Edusaden yacnoshombic Nuquin Papan chomiïdën bëdamboen namendac yuecshun. ¿Min mapin icboda mibi nedi? Padenquio. ¿Mimbida min mapi masedcamedi? Padenquio. Aton Icbombien Nuquin Papan naïque. Abimbo chiacbimboen icsamboen chienda. <sup>37</sup> Adec muainquio icquin abimbo chuita. “Ai, adembi naimbi,” quequin mimbi chiacpadomboen nata muainquio icquin. Adembidi: “Padi. Natiapimbo iquebi,” qeshun mimbi chiacpadomboen nainda. Utsi uaic matses icsamequidën Satanasën tantiamiacpadec mibi muapeque. Adenda —quepondash Esus.

*Chieshēnec cuidnanenda, quiaid*  
(Duc 6.29-30)

<sup>38</sup> Adashic padpidec Esus onquec: —Nuquin Papan Moises chuiquin dada uamiampid mimbi tantiaboed nad iquec. “Chieshēnquin ēshē ansiac adecbidi cuidnanec ēshē ansenanquid. Chieshēnquin sēcsiac adecbidi cuidnanec sēcsenanquid,” quequin chiaid icnuc <sup>39</sup> utsitsen chuinu. Tantia. Mibi cuesquid cuidenda. Chieshēnaqui cuidnanenquio icquin adembi bēdamboen ista. <sup>40</sup> Min matses: “Ēbi cuidquin mimbi ēbi meniambo iqueque. Min dashcute beccho,” qesho mimbi menenquio icsho isun: “Cuidte chuiquid yacno buanshun dashcute dachicmechitomane,” qesho aid dashcute meneshumbic min dashcute utsitsen chicshun meneta. Adec bēdamboec tabadta. <sup>41</sup> Utsibic: “Nēbi nidtuidquin con na buanec nid,” quequin ancabudac nēbi nidtuidenquio icquin udimbo buanshunta. <sup>42</sup> Aton na nibēdquid: “Mitsana beccho,” qesho meneta. Utsibic: “Mitsana buanshun bēuaindambi,” qesho: “Padi,” cainda. Meneta. Aden bēdamboen nata — quepondash Esus.

*Chieshēnquidobi bēdamboen iste chiaid*  
(Duc 6.27-28, 32-36)

<sup>43</sup> Adshumbic abi macuēsh dapa poctse tsadquin bēdamboec tabadte Esusēn chuipondash. Nuquin Papan Moises chuiquin dada uamiampid mimbi tantiaboed nad iquec. “Mibi tantiaquidombo tantiaquin mibi chieshēnquido chieshēnta,” quequin chuipampic. <sup>44</sup> Utsi mibi chuinu. Tantia. Mibi chieshēnquidobi bēdamboen isquin tantiaata. Chieshēnaqui: “Ēbi chieshēnquid bēdamboen ista, Papa,” quequin Nuquin Papa chianeta. <sup>45</sup> Aden chianec Nuquin Papabimboec mibi ictsiac. Mibi utsibo bēdamboen nashunquid ictsiac. ¿Bēdambo icquido yacnoudida Nuquin Papan ushē chēncamepadic? Padenquio. Icsaido yacnotsen ushē chēncamec. ¿Bēdambo icquido yacnoudida ue chomepadic? Padenquio. Icsaido yacnotsen ue chomec. Bēdambo icquidobēdtabi icsambo icquido Nuquin Papan bēdamboen nashunec. <sup>46</sup> ¿Mibēd tantiananquido min shubun icquidouidi mimbi bēdamboen nashunsho isunda Nuquin Papan mibi: “Bēdambo iquec,” capec? Padenquio. Mimbi icsambo iquec caidontsen ambi tantiaido nashuntsiash. Aidombien piucquid bedshumēnquido icquimbi aton shubun icquidouidi nashuntsiashe. Aden nainda. Utsibotsen bēdamboen nashunta. <sup>47</sup> ¿Min shubun icquidobēduidida mibi onquec tabadpe? Nuquin Papa tantiesaboen adpec. Utsibotsen bēdamboen ista. <sup>48</sup> Nuquin Papabimboec icta. Bēdambo icquid icta. Bēdambo icquidobēdta icsambo icquidobi Nuquin Papan bēdamboen tantiacpadomben utsibotsen bēdamboen tantiaata — quepondash Esus.

## 6

*Utsibo bēdamboen nashunte chiaid*

<sup>1</sup> Adshumbic abi macuēsh dapa poctse tsadquin Esusēn chuipondash. — Nadquid icsambo iquec. Nuquin Papa tantienquio icquimbi aton matses ismenuenuidi naic icsambo iquec. Adquid Nuquin Papan bēdamboen istiapiambo iqueque. “Utsibo nashunu,” quequin utsibo ismenquio icquin nata. <sup>2</sup> “Aton na nibēdquido menenu,” qeshun utsibo ismequin menenda. Ismenquio icquin meniac bēdambo ictsiash. “Nuquin Papa tantiaquid nebi,” quec muaquidēn nacpaden nainda. Nuquin Papa tantiaquid damenuembien muaquidēn matses dadpen yacnoshonuidi menedenepec. Adosho isun aton matsesēnuidi bēdamboen isnubi Nuquin Papan bēdamboen istiapiambo iquec. <sup>3</sup> Aton na nibēdquido menequin utsibo ismenda. Meneshun:

“Menebanombi,” quequin utsibo chienda. <sup>4</sup> Adsho isun mimbi utsibo ismenquio icquin naid tantiaquid icquin Nuquin Papan bēdamboen isquin abēdi mibi tabadmendac —quequin Esusēn chuipondash.

*Nuquin Papa chianete Esusēn chiaid*

*(Duc 11.2-4)*

<sup>5</sup> Adshumbic Nuquin Papa chianetetsen Esusēn chuipondash naden. — Bēdambo icquid damianquidēn nacpaden nainda. Aidon Nuquin Papan chiaid chuibante shubun puduedshun utsibo tantiamenuenuidi nidtoshon comapenec onquequin Nuquin Papa chianepec. Adash umanuc puduen-shun matses dadpen ismenuenuidi padpiden adembidi chianec. Adquid aton matsesēn: “Bēdambo iquec,” canubi Nuquin Papan padenquio iquec. Bēdamboen istiapimbo iquendac. <sup>6</sup> Mibi adenda. Utsibo ismenuenuidi nainquio icquin matsesēn isacmaidquio Nuquin Papambo tantiaquioquin chianeta. Aden chianequid mibi icsho Nuquin Papan mimbi utsibo ismenquio icquin naidtedi tantiaquid icquin mibi bēdamboen isquin abēdi tabadmendac.

<sup>7</sup> Nuquin Papa chuiquin bēdamboen chianeta. Nuquin Papa tantiesabon ambi tantiaid chuibudacimboen Nuquin Papa chuibudenda. “Yuenquio chuibudac nuqui tantiaboedēn nuqui nashuntsiash. Padenquio icac nuqui nashunenquio ictsiash,” queshun Nuquin Papa tantiesabon yuen chuibudacimboen nainda. <sup>8</sup> Adoenquio icquin Nuquin Papa chianeta. Mimbi chiabi: “Adopashuni. Aid nibēdnuc unēsebi. Ūtsi icnuc bēdambo ictsiabi,” quequin mimbi otacquo tantiaid Nuquin Papan tantieque. <sup>9</sup> Naden Nuquin Papa chuita.

“Bēdamboshē icquid icsho matses abitedishunquio mibi tantiapashun, Papa. <sup>10</sup> Matses abitedishunquio mibi con Icho capashun. Mibi yacnoshon mimbi uaido mayan bēdabon mimbi chiacpadomboenuidi naic.

Adomboembidi mimbi chiacpadomboen matses abitedishunquio napashun.

<sup>11</sup> Bumianenda, Papa. Badiadquidēn badiadquidēnquien con pete icmeta.

<sup>12</sup> Utsibon chieshēnaqui ēbi cuidnanenquio icsho isun ēbi icsashobi cuidenquio icquin ēbi bēdamboen ista, Papa.

<sup>13</sup> Mimbi chiaid ēbi niacmenda, Papa.

‘Icsamenushe,’ queshun Satanas ēbi yuamenda, Papa.

Abitedishun Icombo yec abitedimbo namequidquio mibi nec, Papa.

Ēmbi mibi chuisho tantiata, Papa.

Ēnenquio icquin abitedishunquio: ‘Bēdambo iquec,’ mibi capashun. Padi,” quequin Nuquin Papa chianeta —quequin Esusēn chuipondash.

<sup>14</sup> Adashic nadpondash: —Utsibo bēdamboen ista. Cuidnanec chieshēnanenda. Cuidnanec chieshēnanenquio icsho isun Nuquin Papan mibi cuidenquio icquin bēdamboen istsiash. <sup>15</sup> Cuidnanec chieshēnansho isun Nuquin Papan mibi bēdamboen istiapimbo ictsiash —uequin Esusēn chuipondash.

*Buna mēmunte chiaid*

<sup>16</sup> Adshumbic utsibo ismenquio icte utsi Esusēn naden chuipondash. —Tantia. Nuquin Papauidi tantianuequin buna mēmunquid chuinu. Muaquidēn nacbimboen ismenda. Muaquido: “Buna mēmunquid nec,” aton matses camenuec abibi maniumēdash nēnquidbitsēcquieq mamēnenquio iquec. Adec buna mēmunquid tanec muaic. Adsho isun matsesēn bēdambo icquid danubi Nuquin Papan: “Icsambo icquid nec,” queshun bēdamboen istiapimbo iquec. <sup>17</sup> “Nuquin Papauidi tantiaquin nēidtedec ushquin buna mēmunu,” queshun Nuquin Papambo tantiaquin nata. “Utsibon tantianushe,” queshun bēdamboen min manēdaid shueshcata. Adash

bëdamboec mamënta. Aden utsibo ismenuenuidi nainda. <sup>18</sup> Aden bëdamboen manëdaid shueshaicid isun: “Buna mëmunec nec,” cainquo ictsiash utsibon mibi chuiquin. Nuquin Papambien: “Ëbiuidtsëqui tantianuen naic,” quequin tantiatsiash. Adshun mimbi utsibo ismenquo icquin naidtedi tantiaquid icquin abëdi mibi tabadmendac —quequin chuipondash Esusën.

*Nuquin Papa yacno tabadte bunta, quiaid*  
(Duc 12.34)

<sup>19</sup> Adshumbic padpiden Esusën chuipondash. —Ëmbi chuiboedquo tantiashun mimbi dayun uatequiduidi tantienda. Dayun uatequid nadquo iquec. Chodquetequid yec shocosh chiuidtequid yec matsesën ampeshuntequid yec quec icsabudtequid nec. Adquiduidi tantienda. <sup>20</sup> Icsabudesambo tantiata. Nuquin Papambo tantiec aibdëd tabadte bunquin ambi chiapadomboen nata. Chodquetiapimbo icquid yec shëniбудtiapimbo icquid yec ampeshuntiapimbo icquid yec quec Nuquin Papa yacno iqueque. Aidquo tantiata. <sup>21</sup> Mibi bunaidquo ënenquo icquin tantiec mibi tabadtsiac. Nuquin Papabëd tabadte bunquin aid tantiata —quepondash Esus.

*Pabiate shëcuë cuembo icquid chiaid*  
(Duc 11.34-36)

<sup>22</sup> Adshumbic abi macuësh dapa poctse tsadquin utsitsen Esusën chuipondash. —Pabiate shëcuë cuembo icquin Nuquin Papa tantiaquiec mitsanauidi tantienquo yec mibi bëdamboec tabadtsiac. <sup>23</sup> Pabiate cuënëdacbimboec yec Nuquin Papa tantienquo yec mitsanauidi tantiec ¿bëdamboecta tabadtsia? Padenquo. Adec mibi icsamboec tabadtsiaque. Adenda —quequin chuipondash Esusën.

*Bedteuidi tantienda, quiaid*  
(Duc 16.13)

<sup>24</sup> Adshumbic naden Esusën chuipondash. —Mitsanauidi tantiec mibi icsamboec tabadtsiac. ¿“Naic cho,” quequin daëdshun chiacta aid daëdi mimbi nashumpatsia? Padenquo mimbi ictsiac. Abentsëc nashunquin utsin chiaid mimbi natiapimbo ictsiac. Aden mitsana bedtequiduidi tantiaquin aid bednuenuidi mimbi natsiac. Aden naquin Nuquin Papan chiapadomboen mimbi natiapimbo ictsiaque. Mitsana bedteuidi tantienda. Nuquin Papauidtsëqui tantiata —quequin Esusën chuipondash.

*Nuquin Papan abi tantiaquido dayun uaid*  
(Duc 12.22-31)

<sup>25</sup> Adshumbic Esusën padpiden chuipondash. —Ëmbi aden chuisho tantish dacuëndenda. “¿Atotsimbi pepe? ¿Atotsimbi acpe? ¿Atotsibi dasiuidpe?” quec dacuëndenda. Nuquin Papan nac unësabi mibi tabadeque. Aidëmbien petebëdta dasiuidte icmeque. “Con na nibëdtsiash,” quiash dacuëdec tabadenda. <sup>26</sup> ¿Uicchunënda ambibi cuëte ëshë siac bacuëacsho chepadic? Padenquo. Adecbidi ambi pete dayun uatequid shubumpi nibëdec. Adquid icsho Nuquin Papan aton pete bedmec. Uicchun abipadquidpenquo icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic? Nuquin Papan mibi nashunquin min pete icmeque. Dacuëndenda. <sup>27</sup> ¿“Unëstiapimbo iquebi. Dacuëdebi,” quequidta unësenquo icpadic? Adequi dacuëdquid unëstiashe. Unësteuidi dacuëdënenda.

<sup>28</sup> “¿Atotsibi dasiuidpeba?” ¿quecta mibi dacuëdec tabadpe? Tantia. Chuinu. “Cuëte bacuëec bëdamboshë isadtsec,” quepec nuquin matses. ¿Aton sedquidi shoyontsëcshun abi dasiuidte daëdcash dasiuidtsashta bëdamboshë isadpadic? Padenquo. Nuquin Papan uacpadquibi iquec. <sup>29</sup> ¿Cuëte



bacuëec bēdamboshē isadquidbimboecta nuquin tsusedpa chuiquid dapa Sadomon cuēmēdquidēn dashcute icpampic? Padenquo. Adpenquien icpampic. <sup>30</sup> Cuēte bacuëec bēdamboshē isadboed abadiadtsēcshumbi isac ēnden chodquiac. Aid badedquo chodquequid nec. Ad icnuc ꝥabipadquid Nuquin Papan uaido mibi icsho mibi dasiuidte bedmenquioda icpadic? Padenquo. Mibi dasiuidte icmeque. Dacuēdenda. Mitsana nibēdquo icte dacuēdēnquimbi mimbi Nuquin Papa bēdiactsēc tantiatseque. <sup>31</sup> Dacuēdec tabadenda. “ꝥAtotsimbi pepe? ꝥAtotsimbi acpe? ꝥAtotsibi dasiuidpe?” quec dacuēdenda. <sup>32</sup> Nuquin Papa tantiesaboen adquid bedteuidi bunquieque. Adenda. Mitsana nibēdsho isun Nuquin Papan mitsana icmetsiashe. Abi tantiaquido yec dacuēdec tabadenda. <sup>33</sup> Adenquo yec: “Con Icbo mibi nec, Papa,” quequin ambi tantiacpadec bēdamboec tabadte bunta. Adec tabadec: “Aid nibēdnuc unēsebi,” quequin mimbi tantiaidtedi Nuquin Papan mitsana icmetsiashe. <sup>34</sup> Ēbi adsho tantiashe badiad utsi caic: “Aid badiadēn ꝥatotsimbi nape?” quec dacuēdenda. Aid badiadēn Nuquin Papan ambi tantiacpadomboen mibi nametsiashe. Nēid ushēmbi: “Naden naimbi,” quequin tantiec tabadnuna dacuēdenquo yec —quequin chuipondash Esusēn.

## 7

### *Utsibo icsaid chienda, quiaid* (Duc 6.37-38, 41-42)

<sup>1</sup> Naden Esusēn Nuquin Papan chiacpadec tabadte chuipondash. —Mibi icsaid ucuḍambobi utsibo icsaiduidi chienda. Adembidi Nuquin Papan: “Icsambo iquec,” mibi canushe. <sup>2</sup> “Icsambo aid iquec,” mimbi cac adembidi aidontsen mibi adoatsiashe. Adembidi Nuquin Papantsen: “Mibi icsambo iquec,” canushe. Utsibo icsaiduidi chienda. <sup>3-4</sup> ꝥAbi bētsiadaid bēchish nua bēuequid bēbedadabi icquidēnda: “Mibi bētsiadaque. Bēbednu,” capatsiashe utsi chuiquin? Padenquo. <sup>5</sup> Abi bētsiadaid abia bēbedadashien: “Mibitsen bēbednu,” quetsiashe. Adembidi mimbia mibi icsaid ēnshun: “Icsaid ēnash bēdamboequien tabadtiad,” quequin utsibo bēdamboen chuita. Bēdambo icquid damianquidēn abi icsaid ēnabi: “Aid icsambo iquec,” quequin utsibo icsaid chuibanec. Adquid tanenda. <sup>6</sup> Mimbi bēdamboen chiaqui tantienquo icsho chuidonenda. Nuquin Papan chiaid chuibudaqui tantiatiapimbo icquin niac-niacsho isun adenuidi chuidonenda. Opa icsan abi pemequid piacbimboen mibi chieshēntiashe. Chanchon icbon dashcute nebudshun bēchish uaquin tin-tincacbimboen Nuquin Papan chiaid niac-niactsiashe. Adquid chuidonenda —quepondash Esus.

### *Ēnenquo icquin Nuquin Papa chianete chiaid* (Duc 11.9-13)

<sup>7-8</sup> Nadembidi Esusēn chuipondash. —Nuquin Papa ēnenquo icquin chuidoneta. Bacuēbon: “En na,” cadoniacbimboen chuidoniac Nuquin Papan mibi tantiasiashe. Adembidi: “Ēbi bēdamboen name, Papa,” mimbi cacpadomboen bēdamboen mibi nametsiashe. Adembidi: “Ēbi nashunquin ēbi bēdambo icmeta, Papa,” quequin chuidoniac Nuquin Papan mibi bēdambo icmendac.

<sup>9</sup> ꝥIcsambo icquidta Nuquin Papa icpadic? Padenquo. Bēdambo icquidquo nec. Bacuēmpi: “Bundobique. Penu. Beccho, papa,” ꝥqueshoda amēn cudasēnquin cuēnotebi menepadic? Padenquo. <sup>10</sup> ꝥAdembidi aton bacuēn: “Nuēcquid chenu. Beccho, papa,” cacta cudasquin nisimbo menepadic? Padenquo. <sup>11</sup> Matses yec icsaquido icquimbi min bacuēbo abimbo mimbi

menenubien Nuquin Papan ambi uaido matses: “Ëbi nashunta, Papa,” quesheo tantiashun bēdamboen nashuntsiashe. Nuquin Papa chianeta.

*(Duc 6.31)*

<sup>12</sup> Nuquin Papan tantiaido icquin utsibo bēdamboen isquin bēdamboen nashunta. Utsibo caic: “Aidon nashumpashuni,” quequin mimbi otacquo tantiacpadomboembidi utsibotsen nashunta. Aden Nuquin Papan chiaid Moisesbēdtan nuquin tsusedpabo utsibon dada uaqun chiampicpadomboen mimbi natsiaque. Aden utsibo nashunta —quequin chuipondash Esusēn.

*Daēdpactsēcshun Esus tantiabente chiaid*

*(Duc 13.24)*

<sup>13-14</sup> Adshumbic Esusēn naden chuipondash. —Nuquin Papabēd tabadnuec aid tantiec bēdamboec tabadta. Shēcūē aniambo icquidēn matses abentse-abentsec puduedac bimboec abentse-abentsec Nuquin Papa yacno puduednuec aid tantiec bēdamboec tabadec. Padnuen antied dapan abi maisi nidac bimboec matses dadpenquo abi tantiesabo yec Nuquin Papan icsaido nēsecacno nidendac —quepondash Esus.

*Icsambo icquid nec, quequin tantiate chiaid*

*(Duc 6.43-44)*

<sup>15</sup> Abi macuēsh dapa poctse tsadquin naden Esusēn chuipondash. —Utsibo: “Nuquin Papan chiaidquo chuiquid nebi,” quec bēdambo icquid damianquid iquendac. Adquid choshon Nuquin Papan chiaid niac-niacmequin icsamendac. Bēdi dapa nēish yua pete bunquiac bimboec mibi icsamete bunquieque. Adquidēn chuisho tantienda. <sup>16</sup> “¿Mitsipadembimbi muaquid tantiapatsia?” ¿quecta ique? Ambi naid isun mua quequin mimbi tantiatsiac. Adembidi Nuquin Papan chiaidquo chienquo icsho tantiashun: “Utsi uain chiec,” mimbi catsiac. Chetequid isun cuēte dada matsesēn tantiec. Aden tantiec nisanquidēn bacuē bēsho isash: “Dadainēn bacuē nec,” quesa matses nec. Adecbidi echo bacuē bēsho isash: “Bata nec,” quesa matses neoaic. <sup>17</sup> Cuēte bēdan bacuē adquiobidi bacuēec. Cuēte icsan bacuē adquiobidi bacuēoaic. <sup>18</sup> ¿Cuēte bēdan bacuē chetemaidda nepec? Padenquo. ¿Cuēte icsan bacuē chetequidta icpec? Padenquo. <sup>19-20</sup> Chetemaidd bimboec muaquid bēdambo ictiapimbo iquec. Nuquin Papan chiaid niac-niaquec icsamboec tabadsho isun: “Muaquid nec,” quequin mimbi tantiatsiac. Adembidi Nuquin Papan chiaidquo chienquo icsho: “Muaquid nec,” quequimbidi mimbi tantiatsiaque. Adquidēn chuisho tantienda. Cuēte bacuēesa dēdshun nēdēncac bimboen: “Nuquin Papan chiaid chiemi,” quec muaquid Nuquin Papan icsaido cuidacno nēsecaindac —quepondash Esus.

*Nuquin Papa yacno puduednu, queuidte chiaid*

*(Duc 13.25-27)*

<sup>21</sup> Utsitsen Esusēn chuipondash. —Ëbi caic: “Con Icbo mibi nec. Mibi tantiembique. Mibi yacno ëbi puduedme,” ¿quequidtedida Nuquin Papa yacno puduedpatsiash? Padenquo. Nuquin Papan chiacpadomboen naquidquien abi yacno puduedtsiash. <sup>22</sup> Nuquin Papa yacno ëmbi yuedte ushēn matses dadpenhun ëbi chuiuidendac. “Con Icbo mibi nec. Mibi caic: ‘Aidēn nami-aidquo nebi,’ quequin dadpen naombi. Nuquin Papan chiaid chuiquinc, podobitsi icsabo matses dapuduedaido cuemequinc comapenen tantiaquin ismequinc caombique. Nuquin Papa yacno ëbi puduedme,” <sup>23</sup> quesheo ëbimbo tantiec Nuquin Papan chiacpadec bēdamboec tabadabi icsho: “Ëmbi tantiacmaidquo mibi neque. Baded cuenta. Icsamboec tabadquid mibi

neque,” caindami. Ēbi adsho tantiash muainquo yec bēdamboec tabadta — quepondash Esus.

*Shubu uaquidbimboecquid chiaid*  
(Duc 6.47-49)

<sup>24</sup> Adshumbic Esusēn padpiden chuipondash naden chuiquin. —Ēmbi chiacpadomboen nata. Aden mimbi bēdamboen natsiaque. Shubu uaquin bēdamboen tantiaquidbimboec mibi ictsiaque. Tantia. Chuinu. Bēdamboen tantiaquidēn mananēnquo shubu uaquin buintad nitsinquo. <sup>25</sup> Aden shubu uan ue dapa conquequidbēdi chonoc shubu chimeshadenquo icquid. Shubu nuntan anchiuidenquo icquid. <sup>26</sup> Aden ěmbi chiacpadomboen naquid icnubi utsibo ěbi tantiesa iquendac. Aido shubu uaquin tantienquo icquidbimboec iquec. Tantienquo icquidēn nadoquid. Acte cuidi cuēmanquiobi shubu uaquin badedi unēstsēcquidquo cuate nitsinquo. <sup>27</sup> Adquid nitsinaid ue dapabēd conquequid choquin shubu chimeshquid. Adecbidi acte cubudtoquidēn shubu nuntan mauanquid. Aden tantesa uatsēcquidbimboec ěbi tantiesa iquec. Adquid Nuquin Papan cuidtequido neque. Ēbi tantiata — quequin chuipondash Esusēn.

(Mad 1.22)

<sup>28-29</sup> Adsho tantiash: —Ma comapenen tantiaquidquo Esus neyoc. Nuquin matses tsusiobon Moisesēn chiampid bēdiactsēc tantiatsēcquin chuitsēcosh. Padnuen Esusēnquo comapenen tantiaquin chuiposh —quecuededpondash matses dadpenquo.

## 8

*Esusēn daicsaid bēdamiaid*  
(Mad 1.40-45; Duc 5.12-16)

<sup>1</sup> Ambobi macuēsh poctse tsadquin ēnquin chuitanequien Esus macuēsh budpondash. Adec budanec nidsho isumbien matses dadpenshun tsibanampondash.

<sup>2</sup> Adnubien dada ushumbo yec daicsaidquo choshon Esus ismenuen danēshēn sebudpondash. —Ēbi bēdamete bunquin mimbi ěbi bēdametsiaque. Ēbi bēdame, Icbo —caquien Esus: <sup>3</sup> —Ai, mibi bēdamete bunebi. Mibi bēdanendac —quequin mishtemaidquiobi mishnubi badedquo bēdampondash daicsaid nibēdquiec. <sup>4</sup> Adsho Esusēn: —Utsibo chienquo yec nēish yua abided unēs uaquido ismenuec nidta. Mibi isash: “Bēdamiaid nec,” quequin ma aidon tantianu. Moisesēn chuipampicpadomboen nanuen: “Nuquin Papan bēdamioshi,” quequin Nuquin Papa menetquid buanquin ismec nidta —quequin Esusēn chuipondash. Adtanec shubu dadpen icquid Capednaun caid yacno chopondash Esus.

*Sondado chuiquid dapan yua Esusēn bēdamiaid*  
(Duc 7.1-10)

<sup>5</sup> Capednaun yacno choash Esus tabadpondash. Adnubien Doma yacnoquido sondado 100ted chuiquid dapan Esus chuituidpondash. <sup>6</sup> —Tantia. Chuinu, Icbo. Con shubun icquid con yua shēquēquenquo iccosh. Natiambo yec unēstiadsēcquo iccoshe. Bēdameta <sup>7</sup> —quesho tantiashun: —Ai, bēdamec nidnu. Nid —caquien: <sup>8</sup> —Padi. Mibi bēdamboshē icquidquo nec. Ēbibi icsactsēcquid icquin mibi con shubun puduedmetiapimbo iquebique. Nēshunquiobi bēdameta. Nidenquo icquin nēshunquiobi mimbi: “Bēdanta,” cac con yua bēdantsiashe. Mimbi tantiacpadomboen namequidquo mibi nec. <sup>9</sup> Ēbibilic chuiquid dapan namiac sondado utsibo namequid nebi. Ēmbi: “Nid,”

cac badedi nidec. Ĕmbi: “Baded cho,” cac badedquio choec. Con yuan Ĕmbi: “Nata,” cac Ĕmbi chiacpadomboen naic. Mibi adquidquiobidi neque. Con yua bĕdameta —quepondash sondado chuiquid dapa.

<sup>10</sup> Adsho tantiaashun Esusĕn abi tsibambĕquido chuipondash. —Bĕdamboen nĕidĕn chuipec. “Comapenen tantiaquin chuiquinuidi con yua bĕdametsiash,” quequin ĕbi bĕdamboen tantiaquid nec. Isadaidbo adquid nibĕdec. Isadaidbon ĕbi bĕdiactsĕc tantiabededtsec. <sup>11</sup> Tantia. Chuinu. Matses utsi icquimbi sondado chuiquid dapan ĕbi bĕdamboen tantiec. Adec nidaid utsi-utsiec yacnocquido isadaidpembo ĕbi tantiaquido yanash Nuquin Papa yacno puduedendac. Ambo puduedash isadaidbo tsusedpabobĕd tabadendac. Abadauan caid yec Acobo caid yec Isac caid yec quequidobĕd tabadendac. <sup>12</sup> Padnuen Nuquin Papan con matses caido isadaidbo dadpenquio Nuquin Papa yacno puduedenquio iquendac. Abi tantiesabo icsho Nuquin Papan cacumequin icsaido nĕsecacno mibi nidmendac. Adoac mibi tĕnquebudquiendac —quequin abi tsibambĕquido isadaidbo chuipondash Esusĕn. <sup>13</sup> Adshumbic sondado chuiquid dapa chuiquin: —Nidec nid. Mimbi tantiacpadece min yua bĕdaneque —cac nidshun isquien bĕdanac Esusĕn chuibocpadequi.

*Petedon nachi Esusĕn bĕdamiaid*  
(Mad 1.29-31; Duc 4.38-39)

<sup>14</sup> Adash yuec-yuecpactsĕc ictanec Esus Petedon shubun puduedpondash. Puduedshun isquien Petedon nachi chumbo yec ueten uepec. <sup>15</sup> Uesho istuidshun mĕdinquin Esusĕn bĕdamepondash. Aden bĕdamiac Esus pemepondash.

*Esusĕn matses dadpen bĕdamiaid*  
(Mad 1.32-34; Duc 4.40-41)

<sup>16</sup> Petedon nachi bĕdamiaid inchĕshbudtsĕqui Esus ismenuequin matses daicsaido dadpen bĕ-bĕpondash. Bĕ-bĕshobien podobitsi icsa dapuduedaido comapenec cuĕdquin cuemeshumbic daicsaidotsen Esusĕn bĕdamebampondash. <sup>17</sup> “Nuqui icsaid ucquin nuqui daicsaidobi bĕdamiac,” quequin ĕndenquio Nuquin Papan Esusĕn nate Isayas dada uamepampicpadomboen nanuen adopondash Esusĕn.

*Abĕd icte bunquido Esusĕn chiaid*  
(Duc 9.57-62)

<sup>18</sup> Adashic abi isnuec matses dadpenquio datsidadsho isash abĕd icquido chiec: —Chian potec nidnu. Nid —quianec chian yacno nidec puduampondash Esus. <sup>19</sup> Puduanec nidaneshobien Moisesĕn dada uampid chuibanquidĕn Esus chinuntuidpondash. —Con Icbo mibi caindambi. Mibĕd nidendabi —caquien: <sup>20</sup> —Ĕbĕdta nide? Tantia. Mibi chuinu. Bĕdi chĕshĕ shĕcuĕn ushquid. Uicchun shubu uash abuc ushquid. Padnueni con shubu nibĕdnuc Nuquin Papan matsesmiaid yec quenenenquio yec capucuenendac. ĔAda mibi adpatsia? —capondash Esusĕn Moisesĕn chiampid chuibanquid chuiquin.

<sup>21</sup> Adnubien abĕd capucuneboed utsin: —Chiata, Icbo. Con pa unĕsoshe. Chococatambono —caquien: <sup>22</sup> —Padi. Cho. Ma unĕsaidĕn tantienquio yacnimboen ĕbi tantienquio icquidon ma papa chococanu. Ĕbĕdtan bĕdamboen naic cho —capondash Esusĕn amĕ unĕsaid chuiquin. Adobidanec nidanepondash chian yacno.

*Natiambo cunquenuc acte tĕccuasquiaid Esusĕn ĕnĕdmiaid*  
(Mad 4.35-41; Duc 8.22-25)

<sup>23</sup> Chian budash Esus chedo cano antabĕdtopondash. Adashic potenuc puduampondash. <sup>24</sup> Aden potenubi nĕnantanquio icnuc cunquetuidpondash.

Adnubien acte comapenec tēccuasquiampondash. Adec acte tēccuasquenec cano acte ancushad-ancushadquiec yampondash cano mentoadtiadtsēcquio yec. Adsho isun abēd icquidon: —Dacuēdampambo iquec —quetanquin isquien Esus ushpec.

<sup>25</sup> Adshobien tinquin: —Nuqui mentoadequē. Isucun, Icbo. Baded ēbi nashun —caquien: <sup>26</sup> —¿Atotsi quiash dacuēde? Ēbi bēdiactsēc tantiatsec dacuēdquidquio mibi neque. Istac —quetanec nidtoshon actebēdtabi cunquequid chuipondash. —Padi. Ēnēdta —caquien natiambo cunqueboedi badedquio ēnēdpondash cano mentoadtsenquionobi. Actetsen tēccuasquenquio yampondash. <sup>27</sup> Adsho isashien: —¿Mitsipadquidēnquio actebēdta cunquequid ēnēdmepashba? —quecuededpondash Esusbēd icquido.

*Dada daēd dapuduedaido podobitsi icsabo Esusēn cuemiaid*  
(Mad 5.1-20; Duc 8.26-39)

<sup>28</sup> Aden chian potiash pudundonobien Cadada yacnocquid podobitsi icsa dadpen dapuduedaid dada daēd choshon Esus chuituidpondash. Aid daēd unēsaido chococaid shēcuēmbi tabadpondash. Matses cuesunete bunquiec dacuēdampambo icsho isash aid yacno matses nidenquio icpondash. <sup>29</sup> Aidon podobitsi icsabon oncamiacpadomboen comapenec cuēdquin Esus chuituidpondash. —¿Nuquin Papa caidēn Madombo icquin ēbi natiamequin cuidnucta cho? ¿Nuquin Papan cuidte ushē choabi icnubida ēbi cuide? —capondash dada daēdshun abi oncamequidēn chiaid chuiquin.

<sup>30</sup> Uano chancho dadpenhun natiacquin udquin pebededpondash. <sup>31</sup> Adnubien podobitsi icsabon aid dada daēd oncameoac: —Ēbitedi cuemiac chancho icbo-icboec dapuededtsiabi —quecuededpondash podobitsi icsabo. <sup>32</sup> Adsho tantiashun Esusēn: —Ai, mimbi tantiacpadec nid —cac nidash chancho icbo-icboec dapuedednubi chancho abitedi macuēsh budec acte nēsebudec mentoadbudnepondash nibēdquiec yec. Adec podobitsi icsabo dapuduenanec nidnubi dada daēd bēdambo yampondash.

<sup>33</sup> Adsho istanequien chancho pemequido aton matses chiec niqianec shubu dadpen yacno nidanepondash. Chancho mentoadbudneboedbēdta podobitsi icsabo dapuduemeboed uesquin chuituidpac caondash. —Nuqui dacuēdēmbodobi bēdambo yanosh —quequin <sup>34</sup> chuituidaquien anocquido abitedi Esus isec cho-chopondash. Adec cho-choshombien: —Dacuēdampambo mibi iqueque. Ēbi yacno choenda. Nidec nid —cabededpondash. Adoac Esus nidpondash.

## 9

*Shēquēquenquio icquid Esusēn bēdamiaid*  
(Mad 2.1-12; Duc 5.17-26)

<sup>1</sup> —Nid —cac nidanec chian budash cano antabēdtoshon chian potiash abi iccondacnobidi Esus choapondash. <sup>2</sup> Adnubien utsibon dada shēquēquenquio icquid Esus ismenuen aton uetechobi bēpondash. Bēsho isumbien Esusēn: —Ēbi caic: “Aidēn bēdametsiash,” queshun bēac —quequin daicsaid chuipondash naden. —Dacuēdenda, madosio. Ambi chiaid niac-niaquec icsaboedi cuidmenquio icquin Nuquin Papa mibi bēdamboen ismembique —capondash Esusēn.

<sup>3</sup> Adsho tantiash aid datsidadash tabadquido Moisesēn dada uampid chuibanquido: —¿Adpecta matses icquid? “Nuquin Papapadquidquibini nec,” quepequien iquec. Icsamboen chiec —quecuededpac caondash Esus caic.

<sup>4</sup> Uanuësh adsho ambembi tantiashumbien Esusën aido chuipondash. —¿Atotsi quequin mimbi ëbi chieshëmpe? <sup>5</sup> Ambi namiaid icquin ëmbi: “Nuquin Papa cuidmenquoio icquin mibi bëdamboen ismembie” cac Nuquin Papan nëid cuidenquoio iquendac. Adembidi ambi namiaid icquin ëmbi: “Caputa,” cac nëid capuendac. <sup>6</sup> Istac. Mibi ismembique. “ ‘Nuquin Papan chomiaid nec. Icsaidobi Nuquin Papa bëdamboen ismequid nec,’ mabi canu,” queshun naimbique. Istac —quetanquin dada shëquëquenquoio icquid chuiquin: —Caputa —capondash Esusën. <sup>7</sup> Adoac bëdanash aton shubuno nidpondash. <sup>8</sup> Adsho isashien: —Adquidshenda nepec. Nuquin Papan namiaid icquimbien adochitec. Abi namequid Nuquin Papa bëdambo iquec —quecuededpondash isquido.

*Ëbëd iquec cho, quequin Esusën Mateyo chiaid  
(Mad 2.13-17; Duc 5.27-32)*

<sup>9</sup> Adnubini con matses aton piucquid bedshunuec podqued cuëman tsadquid shubumpin tsadpondac. Con matses yuaquid ancaquid dapan: —Min matsesën na ëmbi chiacledi piucquid bedshun ëbi meneta —cac niondabi. Ambo tsadshobini Esusën istuidpondash. Istuidshumbini Esusën: —Nuquibi icnu. Cho —capondash. Adoac badedi tsibananec <sup>10</sup> nidequi con shubun Esusbëd puduedpondabi.

Adec puduedsho isashien matses dadpen pudued-puduedpondash. Esusbëd pec tabadnuec ëbëdtan piucquid bedshunquidobëdi con matsesën: “Icsaido nec,” caidombo pudued-puduedpondash. <sup>11</sup> Adsho isumbien Esus chieshënquido Padiseyobo caidon Esusbëd icquido chuituidpondash. —¿Atotsi quiash mibi chuiquid Esus caid icsaquidobëdi pec tabadpec? Icsambo iquec —capondash Esus chieshënquidon.

<sup>12</sup> Adsho tantiash Esus nadpondash. —¿Bëdambo icquidta dauëchoquidën dauë menepadic? Padenquoio. Ma daicsaidi dauëchoquidën menepaid yoc. Adembidi icsaidobi abi icsaid ucquin bëdambo icmenuc nebi. <sup>13</sup> Nuquin Papan naden dada uamiampid pausudshun bëdamboen naic nid. “Ëmbi chiacpadomboen abentse-abentsen mimbi naic. Adoquimbi ëmbi chiaid utsi niaquec mimbi icsaido caido mimbi bëdamboen istiapimbo iquec. Adsho isun: ‘Mibi bëdambo iquec,’ catiapimbo iquebi” quequin Nuquin Papan dada uamiampid pausudta. Ëbibi matses bëdamboen ismequid nebi. Muaquido: “Bëdambo icquid nebi,” quesho bëdambo icmetiapimbo iquebi. Icsaquidobi: “Nuquin Papan chiaid niac-niaquec icsapobi,” quesho: “Icsainquoio yec ënëdta,” canuec nebi —quepondash Esus abi chieshënquido chiec.

*Esusën buna mëmunquido chiaid  
(Mad 2.18-22; Duc 5.33-39)*

<sup>14</sup> Adnubien Uan acten mentoanquidbëd icquidon choshon Esus chuituidpondash. —Nuquin tsusedpabon nacpadomboen Nuquin Papauidi tantianuen buna mëmunquidquoio nebi. Padiseyobo adembidi naquidquoio nec. ¿Atotsieshun mibëd icquidon aden nainquoio icpec? ¿Natiapimboda iquec? —caquien <sup>15</sup> Esus nadpondash. —¿Icbon: “Pec cho,” cacta aid tantiec sedenquecuededquin buna mëmumpadic? Padenquoio. Adquidbëdtan pec cuishonquec tabadquid. Icbo nibëdanen sedenquecuededquin buna mëmunquid. Ëbi nibëdanen ëbëd icquidon ëbiuidi tantianuen buna mëmunendac —quepondash Esus.

<sup>16</sup> Adshumbic Esusën naden chuipondash. —Dashcute chuca cuëshun dashcute shëni nedesquiaidbëdta tuscaisa. Aden tuscashun panac shëni badedquoio nedesquequid. <sup>17</sup> —¿“Machi sandono,” queshun tsitsan shënimbida

sandopadic? Padenquoio. “Machi sebudnushe,” queshun tsitsan shēnin sandoenquoio icquid. Tsitsan chuca daëdcashumbien machi sandoquid — quepondash Esus. —Adembidi tsusedpabon: “Naden nata,” quequin chiaid chienquoio icquin ambi bēdamboen iste chuiquin Nuquin Papan chiaid utsi chiec nebi —quequin tantiec adpondash Esus Uan acten mentoanquidbēd icquido chiec.

*Champi uincuemiaidbēdta chido bēdamiaid*  
(Mad 5.21-43; Duc 8.40-56)

<sup>18</sup> Aden chuishobien Nuquin Papan chiaid chuibante shubun tabadsho isquid dapan chuituidpondash. —Con champi unēstiadtsēcquoio iccoshe. Mishec cho. Mimbi mishac bēdantsiashe —capondash. —Mibi con Icho canu —quequin danēshēn sebudquin ismepondash. <sup>19</sup> Adoaquien Esus aidbēdi nidpondash.

<sup>20-21</sup> Nidnubien chido intac budted-budtedec seta 12tedi matamec bēdanenquoio yec nacchoadbudquidēn Esusēn cachoctsēqui choquin: —Bēdamianquidēn dashcute mishec bēdampatsiashe icmanendac —queshun ismenquoio icquin dashcute cuēmano mishtsac caondash. <sup>22</sup> Adoaquien bidiadquin isun Esusēn chuipondash. —Dacuēdenda. Mibi: “Aidēn nac bēdantsiabi,” quiacpadec mibi bēdanendac —Esus quenubi bēdampondash.

<sup>23</sup> Aid bēdamebidanec nidequi chuibante shubun tabadsho isquidēn shubun puduedshun isquien matses dadpen tabadec. Champi unēsacsho isash sedenquecuededec tabadec. Nēidic matses unēsān con matsesēn nacpadomboen shoncate shoncaquido. Nēidic comapenec sedenquecuededquido dadpen. Aidtedi icpondash. <sup>24</sup> Adshobien Esusēn abitedi chuiquin: —Baded umanuc niecun. Champi unēsabi iqueque —capondash. Adoac: —“Champi unēsabi iquec,” quepequien iquec —queshun Esus mamēnshumbededpondash. <sup>25</sup> Niecunan Esusēn champi uiacno quēnēn puduedtanquin mēdinac champi uincuenash bēdambo yec capupondash. <sup>26</sup> Adsho isun champi unēsaid uincuemiaid chuibenepac caondash shubu utsin-utsinquien. Anocquido Capednaun caid yacno pauequidotedishun tantianuc chuibeniac caondash.

*Bēshuaid daēd Esusēn bēdamiaid*  
(Duc 18.35-43)

<sup>27</sup> Auēshquoio puduanec nidshobien bēshuaid daēdshun chinunshun comapenec cuēdquin Esus chuituidpondash. —Dabidēn tsyuecquid Nuquin Papan chomiaid icquin bēdamboen isquin ēbi bēdame —quebud-quebudpondash. <sup>28</sup> Shubu utsin puduedash abēdi tabadshobien Esusēn: —“Ēbi bēdametsiashe,” ¿caindabi ique? —caquien: —Ai, adebi —quepondash.

<sup>29</sup> Adshobien aid daēdi bēmishquin: —Mimbi tantiacpadec bēdanta —cac <sup>30</sup> bēdampondash. Adsho isun Esusēn: —“Bēdamioshi,” quequin utsibo chienda —capondash. <sup>31</sup> Adoboqui anocquidotedi chuiben-chuibempac caondash.

*Esusēn onquesa bēdamiaid*

<sup>32</sup> Bēshuaid bēdamiaid puduenubien podobitsi icsa dapuduedaid onquesa dada Esus ismenuen bēpondash. <sup>33</sup> Bēacsho isun Esusēn podobitsi icsa dapuduemiāc bēdanash onquiampondash. Aden bēdamesho isash: —Nuquin nidaid Isadaid caidēnshun adoen ictenec —quecuededpondash isquido.

<sup>34</sup> Adnubien Esus chieshēnquido Padiseyobo: —Podobitsi icsan icbon nami-aid icquin podobitsi icsa cuemequidien nechitec —quecuededpondash Esus caic.

*Esusēn matses tantiaquiaid*

<sup>35</sup> Aden onquesa bēdamianec nidash capucuen-capucuenquin shubu dadpen icquid yacno Nuquin Papan chiaid chuibante shubun puduedshun Nuquin Papan matses icsaido bēdamboen iste chuipondash. Adshumbic anocquido daicsaidotedi bēdamebampondash. Adenuidi shubu dadpen yacno-yacnomboen chuibanquimbi matses bēdamebampondash. <sup>36</sup> Abi tantienquo icquido dadpen cho-chosho isash unēsquo icnuc shubiantiadquo icpondash Esus. —Abi isquid nibēdnuc bacuēbo icsamboec tabadac bimboec icsambo iquec. Nuquin Papa bēdamboen ismete chiabi yac tantienquo yec natia chieshēmēnec bēdamboec tabadtiapimbo iquec —quiash shubiantiadquo icpondash Esus.

<sup>37</sup> Adshumbic abēd icquido chuipondash. —Pete dadpen nitsinaid caniacsho bedtanenquo icnuc sinash chodquebudnequid. Adecbidi Nuquin Papan chiaid chuibanquid nibēdnuc matses icsamboec tabadec. Aden chuibanquid nuquipadquid daēdpactsēcquo iqueque. <sup>38</sup> Nuquin Papa chianeta. “Matses dadpenhunquo mimbi bēdamboen iste tantiabi iqueque. Mimbi chiaid chuibanquid dadpen icmeta, Papa,” quequin Nuquin Papa chianeta —quequin chuipondash Esusēn abēd icquido chuiquin.

## 10

### *Esusbēd icquido 12tedi chiaid (Mad 3.13-19; Duc 6.12-16)*

<sup>1</sup> Adshumbic Esusēn abēd icquido 12tedi chuipondash. —Ēmbi naid chuibeneta. Ēmbi namiaid icquin Ēmbi nabocpadomboen podobitsi icsa matses dapuduedaid mimbi cuemendac. Adembidi daicsaido abitedi mimbi bēdamendac —quequin chuipondashi nēidtedi. <sup>2</sup> Nēidic Petedo caidbidi Simon cuēmēdquid. Nēidic abēdta tishaid Andedes cuēmēdquid. Nēidic Sebedeyon mado abi daēdi. Abentsēc Acobo icnuc utsi Uan icpondash. <sup>3</sup> Nēidic Uedipe. Nēidic Badtodome cuēmēdquid. Nēidic Tomas. Nēidic ēbibi Mateyo con matses piucquid bedshundenedi. Nēidic Acobo cuēmēdquid utsi Adpeon mado. Nēidic Debeyo caidbidi Tadeyo cuēmēdquid. <sup>4</sup> Nēidic Simon cuēmēdquid utsi con matses yuaquido cuemete bunquid. Nēidic Iscadiote caidbidi Udas cuēmēdquid abi chieshēnquido Esus bedmequid. Aidtedi abēd icquido icsho chuipondashi.

### *Abēd icquido: Chuibeneta, caid (Mad 6.7-13; Duc 9.1-6)*

<sup>5</sup> Adshumbic: —Ēmbi chiacpadomboen chuibenenuc nidshun isadaid-pembo chienda. Aido yacno nidenda. Nidaid cuēshē Samadia caid yacnocquidon shubu datambidanta. <sup>6</sup> Nuquin matses isadaidboudi chuibeneta. Bēnudshun podqued tantienquo yac bimboen nuquin matsesēn Nuquin Papambo tantienquo iqueque. <sup>7</sup> “Mibi icsaid ēnash bēdamboec tabadta. Nēbi abēd tabadtequido icmequin Nuquin Papan matses bēdamboen tabadmendac,” quequin chuibeneta. <sup>8</sup> Adembidi daicsaido bēdamequinc unēsaido uincuemequinc dada ushumbo yec daicsaido bēdamequinc podobitsi icsa dapuduedaido cuemeshunquinc cabeneta. Adoshon: “Piucquid beccho,” cainda. Ēmbi nabocpadomboembidi mibi namembique. “Piucquid beccho,” quequin nainquo iccombique. Adembidi nashumbanta. <sup>9</sup> Aden chuibenec nidquin min piucquid buanenda. <sup>10</sup> Adembidi pete sandoaid buanenda. Dashcute utsibēdta tapucudte utsi sandoshon buanenda. Mibi tidinquete cuate abentsēqui buanta. Adec mēdadaidquo chosho isun mimbi bēdamiaidon: “Mibi bēdambo iquec. Ēbi yacno ushec cho,” mibi cac bēdambo



ictsiash. Adembidi: “Mitsana nibēdsho isun mibi menenu,” mibi cac bēdambo ictsiash.

<sup>11</sup> Aden chuibenec shubu dadpen icquid yacno nidshun bēdambo icquid istuidta. Istuidshun: “Min shubu yacno ushec nidnu,” mimbi cac: “Ai,” qesho tantiash aidēn shubun ushta. Auēshquio nidabi yec aidēn shubunuidi ushta. <sup>12</sup> Aidēn shubun puduedshun: “Mibi isnuec chopobi,” cata. Adoshombic: “Nēid shubun icquido Nuquin Papan bēdambo icmepashun,” quequin aido bēdamboen ista. <sup>13</sup> Adoac anocquidon mibi bēdamboen iso: “Nuquin Papan bēdambo icmepashun,” mimbi canubi Nuquin Papan aido bēdambo icmendac. Anocquidon mibi chieshēnsho Nuquin Papan aido bēdamboen istiapimbo iquēc. <sup>14</sup> Shubu dadpen icquid utsi yacno mibi nidacsho anocquidon cuemiac naden ismeta. Auēshquio puduanec nidnun: “Nuquin Papa tantiesabo yec Nuquin Papan cuidtequidombo mibi nec. Icsaidombo mibi nec,” quequin ismec nidaid putu tasequeta. <sup>15</sup> Mimbi adosho isun matses cuidte ushēmbi Nuquin Papan aido comapenen cuidendac. Ēndenquimbo shubu dadpen yacnocquidotedi cuidquin Nuquin Papan uesquin unēs uapampic. Aid shubu dadpen icquid abentsēc Sodoma canubi shubu dadpen icquid utsi Comoda capampic. Aid daēd yacnocquido bēdiactsēc cuidshun mimbi chiaid tantienquo icquido comapenen cuidendac —quepondash Esus abēd icquido chiec.

### *Esus tantiaquido chieshēnte chiaid*

<sup>16</sup> Adashic padpiden chuioaic: —Ēmbi naid chuibenequido icsho utsin-utsinquien mibi chieshēnendac. Bēdi nēish yua acte bunacimboec chieshēmēnquido mibi cueste bunendac. Aidobēd chieshēnanenda. “¿Mitsipadomboen chiac Nuquin Papan chiaid tantiabempatsiash?” qeshun bēdamboen tantiaquin bēdamboen chuita. <sup>17</sup> Mibi chieshēnquin cuesunetiadquo iquendac. Mibi bedshun: “Cuesmenu,” qeshun abi chuiquido mibi cuidmenuen Nuquin Papan chiaid chuibante shubuno mibi buanendac. Ashunquo mibi cueshcaten cueshcaindac. <sup>18</sup> Utsibombic adembidi cuesmenuen chuiquid dapa cobenadod yacno mibi buanendac. Adembidi chuiquid dapa utsi yacnotsen mibi buanendac. “Ma ēbi chuiquidon chuiquid dapabēdta isadaidpembo ēmbi naid chuibanu,” ēbi quenuc mibi aden buanendac. <sup>19</sup> Adoac dacuēdenda. “Chuiquid dapa yacnoshon ¿atotsimbi chuipatsiaba? ¿Adambi bēdamboen chuipatsiaba?” quec dacuēdenda. Chuiquid dapa mimbi bēisnubi Nuquin Papan ambi tantiacpadomboen mibi oncamendac. <sup>20</sup> Aden aton Mayanēn ambi tantiacpadomboen mibi oncamendac —quepondash Esus.

<sup>21</sup> Adashic padpidec onquec: —Ēbi chieshēnquidon ēbi tantiaquidotsen comapenen chieshēnendac. “Esus tantiaquid nec,” qeshun aton buchimbi aton utsi cuesunemendac. Amēmbi ambi tishmiaid cuesunemendac. Aton bacuēbombi chieshtoshon anibēdta amē cuesunemendac. <sup>22</sup> “Esus tantiaquid nec,” qeshun matses dadpenshun aden chieshēnaqui chieshtoenquo icquin ēbi tantiasho Nuquin Papan abi yacno mibi puduedmendac. <sup>23</sup> Shubu dadpen yacno nidacsho chieshēnac shubu dadpen icquid utsi yacno cuenta. Anoshontsen ēmbi naid chuisho chieshēnoac shubu dadpen icquid utsi yacnotsen cuenoata. Adeuidi cuendeneta. Nēid nidaid Isadaid caidēn shubu dadpen icquid abitedi yacno nidabi icnubi choaindabi. Nuquin matses isadaidbo abitedi chiabi icnubi Nuquin Papa yacnuēsh choaindabi.

<sup>24</sup> Mibi tantiamequid nebi. Ēmbi tantiamiaido icsho ēbi icbocpadomboembidi mibi chieshēnendac. Abi chuiquid dapa chieshēnacpadembidi ambi namiaidotsen chieshēnquid. Icho chieshēnquimbi yuabotsen chieshēnquid.

<sup>25</sup> Adembidi ëmbi chiapadomboen natiadquio icsho mibitsen chieshënendac. Nuquin Papa yacno puduedmianquid icsho: “Ma podobitsi icsan icbo Bet-sibu caid neyoc,” ¿cainquiodabi ictiosh? Adembidi mibi Nuquin Papa yacno puduedtequido icsho mibitsen chieshënendac —quequin chuipondash Esusën abëd icquido chuiquin.

*Dacuëdenquio icquin chui, quequin chiaid*  
(Duc 12.2-7)

<sup>26</sup> Adshumbic padpiden chuiquin: —Mibi chieshënquido dacuëdënenda. Aidon ompodshon icsamboen naid Nuquin Papan utsibo ismendac. Adembidi aidon shoshquetsëcquin chiaid Nuquin Papan utsibo tantiamendac. Adembidi mimbi bëdamboen naidtedi Nuquin Papan utsibo tantiamendac. <sup>27</sup> Nëbi ëmbi mibitedictsëqui chuiboed dacuëdenquio icquin utsibo chuibeneta. <sup>28</sup> Chuibenesho min dadauidtsëqui cuesunetequid dacuëdënenda. Min tantiate unëstiapimbo icquid icsho nibëdametiapimbo iquec. Min dada unësan min tantiate abi icsho cuidnuequin chian anëdënquequid nësecanquid tantiatia. Adquid Nuquin Papa icsho dacuëdënta.

<sup>29</sup> Utsibon chieshënaqui dacuëdenda. Nuquin Papan mibi tantieque. ¿Padichucu cuesaid isashta unësquio icti? Padenquio. Padnuen ambi tantiapadomboembi padichucu dadpen icquid abentsëc cuesac paëdsho Nuquin Papan tantiec. <sup>30</sup> Adembidi min manëdaid Nuquin Papan tambanaidquio nec. Aden min manëdaid abentsëc paëdsho aidën tantiec. <sup>31</sup> Aden min manëdaid tambanquid icquin padichucu bëdiactsëc tantiatsëcquin mibien comapenen tantieque. Mibi chieshënquido dacuëdënenda —quequin chuipondashi Esusën.

*Esus con Icho nec, quequido chiaid*  
(Duc 12.8-9)

<sup>32</sup> Adshumbic padpiden chuiquin: —Utsibo chuiquin: “Con Icho Esus nec. Nuquin Papa yacno ëbi puduedmequid nec,” quequin chianequid Nuquin Papa yacno chosho isun: “Nëid ëbi tantiaquid neque. Puduedmeta, Papa,” quequin Nuquin Papambo chiendambi. <sup>33</sup> Padnuen utsibo chieshec: “Con icbo Esus catiapimbo iquebi. Tantiatiapimbo iquebi,” quequid bëdamboen istiapimbo iquebi. “Nuquin Papa yacno puduednu,” qesho: “Padi. Èbi tantiaquidpenquio neque. Puduedmenda,” quequin Nuquin Papa chiendambi —quequin Esusën chuipondashi.

*Esus tantiaquidobëdi cuëshëdte chiaid*  
(Duc 12.51-53; 14.26-27)

<sup>34</sup> Adshumbic padpiden chuiquin: —Èmbi chuiboed tantiashun: “Nuquin Papa yacnuësh choquid icquin abitedimbo bëdamboen tabadmetsiash,” ¿caquindabi ique? Padenquio ictsiambi. Èbi tantiaquidobëd ëbi tantiesabo cuëshëdenquio icte danenda. Èbi tantiaquidobëdi ëbi tantiesabo cuëshëdendac. <sup>35</sup> Amëbëd aton mado cuëshëdendac. Adecbidi anibëd aton champi cuëshëdendac. Adecbidi aton chayabëd aton babanën cuëshëdendac. <sup>36</sup> Aden aton shubun icquidombi ëbi tantiaquid chieshënendac.

<sup>37</sup> Padnubic aton masesuidi tantiaquidën ëbi bëdiactsëc tantiatsëctsiash. Aton tita tantiaquinc aton papa tantiaquinc cain aidën chiapadomboenuidtsëqui naquidën ëbi bëdiactsëc tantiatsëcquin ëmbi chiapadomboen natiapimbo ictsiash. Adembidi aton mado tantiaquinc aton champi tantiaquinc cain aid bëdambo icmeteuidtsëqui bunquin ëbi bëdiactsëc tantiatsëcquin ëmbi chiapadomboen natiapimbo ictsiash. Adquido bëdamboen

istiapimbo iquebi. Ēbi tantiesabo nec. <sup>38</sup> Utsibon chieshēnac ēbi tantiatsēchoedi badedi chieshtoshon ěmbi chiacpadomboen natiapimbo yantsiash. Adquidotsen ēbi tantiaquidpenquo iquendac. <sup>39</sup> Matses ambi naiduidi naquid Nuquin Papa yacno puduedtiapimbo iquendac. Padnuen ēbi tantiaquin ěmbi chiacpadomboen naquid Nuquin Papa yacno puduedendac. Adquid chieshēnaqui chieshtoenquo ictsiaš —quequin Esusēn chuipondashi.

*Nuquin Papan bēdambo icmete chiaid*  
(*Mad 9.41*)

<sup>40</sup> Adshumbic Esusēn ēbi chedo padpiden chuipondash. —Mibi chieshēnquido icnubi mibi bēdamboen isquid iquendac. Ěmbi naid mimbi chuisho tantiash: “Ai, abimbo caic,” qeshun ēbi tantiabenquin ēbi chomequidtsen tantiabenendac. <sup>41</sup> “Naden naindami,” quequin ambi chiaid chuibenequid Nuquin Papan bēdamboen isaido nec. Adquid shubu utsi yacno nidacsho isash: “Nuquin Papan chiaid chuibenequid choeque. Bēdamboen chuisho tantianu,” quequid icsho Nuquin Papan bēdamboen isendac. Adembidi abi tantiec ambi chiacpadec bēdamboec tabadquid Nuquin Papan bēdamboen isaidobidi nec. Adquid shubu utsi yacno nidacsho isun: “Nuquin Papan chiacpadec tabadquid nec,” qeshun bēdamboen isquidotsen Nuquin Papan bēdamboen isendac. <sup>42</sup> Adembidi ēbi tantiaquid yec acte bundoacsho acte menequid Nuquin Papan cuidnanquin bēdambo icmendac. Adembidi utsibon Esus tantiaquido bēdamboen nashunsho Nuquin Papan bēdambo icmendac —quequin Esusēn chuipondashi. Adshun: —Chuibenetan —cac nidshumbimbi chuibenepondac.

## 11

*Uan acten mentoanquidēn chuimiaid*  
(*Duc 7.18-23*)

<sup>1</sup> Esusēn: —Chuibenetan —cac abēd icquido nidanenubi auēshquiobi puduanec nidquin shubu dadpen icquid shubu dadpen icquidquien Esusēn Nuquin Papan chiaid chuibeniac caondash. Aid nidaid cuēshē Cadidia caidēn capucuenequin adoac caondash. Adnubini yuec-yuecpambo ictanec Esusbēd icoaic cho-chopondac.

<sup>2</sup> Adnubien Uanēn Esus acten mentondaidēmbi quēnēn nauedaid icquin Esusēn naid tantiapac caondash. Adshumbic abēd icquido chuiquin: —¿Nuquin Papan chomiaid nuqui cainaidta nepec? Esus chuitan —cac choshon Uambēd icquidon Esus chuituidpondash. <sup>3</sup> —Uanēn: “Chuitan,” cac chobi. ¿Ěmbi cainaid Nuquin Papan chomiaidquioda mibi nepe? Mibi adquidpenquo icnuc ¿ada utsi chopatsiaš? —caquien <sup>4</sup> Esusēn: —Ěmbi nadatiambo icquin nabamboedbēdta ěmbi chuiboed Uan chiec nid. <sup>5</sup> “Bēshuacboedēn isbenosh. Canite icsaidi capucuenosh. Daushumbo icquid nami mishadenquo icquid bēdanosh. Pashuacboedēn tantiabenosh. Adoshombic unēsaidi uincuemiosh. Adoshombic Nuquin Papa tantienquo icquido Nuquin Papan bēdamboen iste chuiposh,” quequin Uan chiec nid. Aden chiac Uanēn: “Nuquin tsusedpan chiampicpadquid Nuquin Papan chomiaidquio nec,” quequin ēbi tantiendac. <sup>6</sup> Adshumbic nadentsen chuita. “‘Muambo nec, ēbi cainquo icquin: Ambi chiacpadquid Nuquin Papan chomiaidien nec, quequin ēbi tantiaquid Nuquin Papan bēdambo icmendac,’ quiosh,” quequin chiec nid —cac nidanepondash Uambēd icquido.

*Uan acten mentoanquid chiaid*  
(Duc 7.24-35)

<sup>7</sup> Aido nidanebon Esusën Uan acten mentoanquid chuiquin abi datsidadquido naden chuipondash. —Matses nibëdacno ¿atotsi quenuc nidonda? ¿Cunquequidën ishacunaid isnueta niduntionda? Padenquio. <sup>8</sup> ¿Dashcute bëdaidquio dasiuidaid isnueta niduntionda? Padenquio. Icsactsëcquid Uan dasiuidpondash. Dashcute bëdamboshë icquid dasiuidquido ancanquidën shubu dapan tabadquido nec. <sup>9</sup> Ad icnuc ¿atotsi quenuc nidonda? “Naden naindambi,” quequin Nuquin Papan chiaid chuibenecquid chuisho tantianuec ma mibi nidondac. Adec Nuquin Papan oncamiaidquio Uan nec. <sup>10</sup> Uanën abia choshon chuite chuiquin Nuquin Papan naden dada uamepampic.

“Mibi chote chuiquidba chomembi, Mado.

Aid: ‘Bëdambo icquid choeque. Icsainquio yec ënëdta,’ quequin mibi chote chiendac, Mado,”

quequin Nuquin Papan ambi chiaid dada uamepampic. <sup>11</sup> “Nuquin Papan chomiaidquio choec,” quequin chuiquid Uanpadquid utsi nibëdec. Adquid yequi: “Abi choec,” quequin ambi chuiboedën ëmbi nabansho isabi yequi bëdapabi Uan ictsec. Padnuen ëmbi Nuquin Papan chiacpadomboen nabansho isash ëbi tantiaquido bëdamboshë iquendac. <sup>12</sup> Uanën chuisho Nuquin Papa tantiabenacpadomboen ëmbitsen Nuquin Papan bëdamboen iste chuisho tantiashun adembidi abi icsaid ënshun icsaboedon dadpenshun Nuquin Papa tantiendac. <sup>13</sup> Nëbi Uanën: “Nuquin Papan abi yacnoshon bëdambo icquid chomendac,” quequin chuipondash. ¿Ambiada adopondash? Padenquio. Èdenquimboshë tauamboen nuquin tsusedpa Moisesën chuibempampic. Adshumbic utsintsen. Adshumbic utsintsen. Aden Nuquin Papan ambi bëdambo icquid chomete chuiquin dada uamianepampic. <sup>14</sup> Adembidi Uan chote chuiquin dada uamepampic. “Nuquin Papan ambi tantiacpadomboen oncamiaidquio Edias cuëmëdquid choendac,” quequin Ediasbimboecquid Uan chote chuipampic. Bëdamboen tantiaquin: “Nuquin tsusedpa Ediasbimboecquid Uan nec,” mimbi catsiac. <sup>15</sup> Bëdamboen tantiaquidën adembidi tantiatsiash —quepondash Esus abi datsidadquido chiec.

<sup>16</sup> Aden chuisho tantiash chieshtoshobien Esusën chuipondash naden. —Nuquin Papan chiaid tantienquio icquido yec nëmbo icquido ¿midapadquidoen nec? Bacuëbo nëishnanacbietsëcquieci mibi iquec. Bacuëbo: “Èmbi chiacpadomboen nanuna,” queuidash ambi chiacpadomboen aton utsibon nainquio icsho isash nëishash chushcananquid. <sup>17</sup> “‘Cuëdënuna,’ queuidbosh ëbi cuëdënubi ma mibi cuëdënenquio icboc. ‘Sedenquenuna,’ queuidbosh ëbi sedenquenubi ma mibi sedenquenquio icboc,” quetsash bacuëbo nëishnanacbietsëcquieci ma mibi iqueyoc. Adec nëishëmënnquido yec icsambo ma mibi iqueyoc. <sup>18</sup> Uan pete utsi-utsien pesa iccosh. Adecbidi acte paëmbo icquid aquesambo niash. Adquid icsho isash nëishash: “Èmbi nacpadomboen naisa nec. Podobitsi icsa dapuduedashien nechitec,” mibi quepondac. <sup>19</sup> Èbien nuquin matsesën piachimboen pequid nec. Adembidi actequid acquid nebi. Adsho isash nëishun ëbitsen icsamboen chuishunquin: “Peteuidi tantiaquin nua pequid nec. Tantiadenuen acte paëmbo icquid acquid nec. Adecbidi nuquin matses piucquid bedshunquidobëd onquec icsambo icquid caidobëd onquec quequid ma aidobëdi icsambo icquid nepayoc,” mimbi ëbi capec. Padnuen bëdamboen tantiaquidën Nuquin Papan chiacpadomboen nasho isun Uambëdta ëbi: “Bëdambo iquec,” caïndac —quepondash Esus abi chieshënnquido chiec.

*Shubu dadpen icquidën tabadquido cuidte chiaid*  
(Duc 10.13-15)

<sup>20</sup> Adshumbic Esusën padpiden chuipondash. —Nëbi shubu dadpen icquid shubu dadpen icquidquien comapenen tantiaquid icquin dadpen nabanquin ismebeniombi. Aden ismiac: “Icsaboedi bédamboec tabadtiadquio iquebi,” quetiadquidi chieshec adenquio iquec —queshun Esusën naden chushcapondash. <sup>21</sup> —Shubu dadpen icquid Codasin caid yacnocquidobëdi shubu dadpen icquid utsi Betsaida caid yacnocquido Nuquin Papan cuidtequido nec. Ëmbi aido ismebocpadomboen ismiac isadaidpembo cuidadenquio ictsempampic. Aden ismiaqui: “Ai, icsapobi,” quiash shubibudequi icsainquio yec ënëdtsempampic. Shubu dadpen icquid Tido caid yacnocquidobëdi shubu dadpen icquid utsi Sidon caid yacnocquido adtsempampic. <sup>22</sup> Nuquin Papan matses abitedi cuidte ushën: “Nadatiambo icquin nabanquin ismiacmaido nec,” queshun Tido caid yacnocquido Sidon caid yacnocquidobëdta bëdiactsëc cuidendac. Adoshombic: “Comapenen tantiaquin ismiaqui tantienquio icquido nec,” queshun Codasin caid yacnocquidobëdta Betsaida caid yacnocquido comapenec sidquenuc cuidendac. <sup>23</sup> Adembidi nëmbo icquido Capednaun caid yacnocquido mibitsen Nuquin Papan cuidendac. “Nuquin Papa yacno tabadtequido nuquitedi nec,” ¿quecta ique? Adquidpenquio yec Nuquin Papa chieshënquido cuidacno nidmetequido ma mibi nepayoc. Ëndenquimboshë yampido shubu dadpen icquid Sodoma caid yacnocquido cuidquin Nuquin Papan nibëdamepampic. Ëmbi mibi ismebocpadomboen ismiac aidon abi icsaid ëntsempampic. Abi icsaid ënsho Nuquin Papan cuidenquio ictsempampic. Cuidenquio yac nëbi aton matses abi ictsiash. <sup>24</sup> Nuquin Papan matses abitedi cuidte ushën: “Comapenen tantiaquin ismiacmaido nec,” queshun Sodoma caid yacnocquido bëdiactsëc cuidendac. Nuquin Papan chomiaid icquin ëmbi ismeboedo Capednaun caid yacnocquidoen comapenec sidquenuc cuidendac —quequin abi tantiesabo Esusën chushcapondash.

*Esusën dayacquiobimboecnuc icmete chiaid*  
(Duc 10.21-22)

<sup>25</sup> Adshumbic Esusën Nuquin Papa chuipondash. —Mibi bédamboshë iquec, Papa. Mibi yacnocquidotedishun Icbombo yec nidaidën tabadquidotedishun Icbobidi mibi nec. Mimbi tantiamiabi: “Dadpen tantiaquid nebi,” quequidombi ëbi tantiabi iquec. Mimbi tantiamiac nëidon ëbi tantiec. Aden mimbi bédamboen naic. <sup>26</sup> Mimbi tantiacpadomboen mimbi bédamboen naic. Mibi bédamboshë iquec, Papa —quequin Esusën Nuquin Papa chuipondash.

<sup>27</sup> Adshumbic abi datsidadquido chuipondash. —Nuquin Papan ambi tantiaidtedi ëbi chuimec. Ëmbi naboedbëdta ëmbi nate abitedi con Pan ambentsëqui tantiec utsibon tantienquio icnuc. Adembidi Nuquin Papan natebëdta ambi naboed abitedi ëmbentsëqui tantiembi. Aden Nuquin Papa tantiaquin: “Nëidtedi matses bédamboen tantiamembi,” queshun: “Nuquin Papa nadquio iquec,” quequin tantiamembi. <sup>28</sup> Ëbi tantiata. Dayacquio yacimboecnuc mibi bédambo icmembique. “¿Mitsipadequibi Nuquin Papa yacno puduedpe?” quec ¿uimambo yacimboecta mibi icpe? Adquidën ëbi tantiasho Nuquin Papa yacno puduedtequid mibi icmembique. Ëbi tantiata. <sup>29</sup> Con Icho ëbi cata. Con yuambo icquin ëmbi chiacpadomboen nasho mibi bédamboen isquin dayacquio yacimboecnuc mibi bédambo icmembique. Ancanesambo yec bédambo icquidini neque. Con Icho ëbi cata. Adsho mibi bédambo icmembique. <sup>30</sup> Mibi ancainquio icquin dayacquio yacimboecnuc

bëdamboen mibi tabadmembique. Con Icho ëbi cata —quequin chuipondash Esusën.

## 12

*Esusbëd icquidon petsëcsho istuidshun chushcaid*  
(Mad 2.23-28; Duc 6.1-5)

<sup>1</sup> Adshumbic chonoadtemaid ushën Esusbëd capucuenequin tied matanquin bundotsëcshun tiedën caniquid ëshchicshun petempi petsëccondambi. <sup>2</sup> Pesho istuidshumbini con tsusedpabon chiampid namequido padiseyobon: —Is. Mibëd icquido chonoadtemaid ushëmbi chonoadeque —capondash Esus chuiquin.

<sup>3</sup> Adoaquien Esus: —Ma icsapenquio icpayoc. ¿Nuquin tsusedpa Dabidën bundoshon ambi petemaidquio pepampid chuiquin dada uapampid isamboda ictio? <sup>4</sup> Aidën Nuquin Papa tabadte shubu uashunaid abi puduedtemaidën puduedshun ambi petemaid pan sanaid istuidpampic. Aid panëmpi nëish yua abided unës uaquidon petequid nepampic. Aid panëmpi bedshun abëd icquidobëdtan Dabidën pepampic. Aden nuqui bëdambo icquid caidën ambi natemaidi napampic. <sup>5</sup> Adembidi chonoadtemaid ushën natemaid chiaid niacquimbi nëish yua abided unës uaquidon aid ushëmbi Nuquin Papa tabadte shubu uashunaidën puduedshun nacnendenepec. Nuquin Papan chiacpadomboen naiqui icsainquio icpec. <sup>6</sup> Nuquin Papa tabadte shubu uashunaid tantiaquin adopec. Aid shubu bëdapabi icnuc bëdamboshë icquid nebi. <sup>7</sup> Nuquin Papan naden chiaid mimbi bëdamboen tantienquio iquec.

“Ëmbi chiacpadomboen abentse-abentsen mimbi naic.

Adoquimbi ëmbi chiaid utsi niaquec mimbi icsaido caido mimbi bëdamboen istiapiambo iquec.

Adsho isun: ‘Mibi bëdambo iquec,’ catiapimbo iquebi.”

quequin Nuquin Papan chiaid bëdamboen tantiashun ëbëd icquidon bëdamboen nasho mimbi chushcainquio ictsenoc. <sup>8</sup> Tantia. Nuquin Papan chomiaid icquin chonoadtemaid ushë ëmbibi chiampid icnuc ëmbi tantiacpadomboen aid ushëmbi ëbi tantiaquido namembique —quepondash Esus ëmbi petsëcsho istuidquido chiec.

*Mëicsatsaid bëdamiaid*  
(Mad 3.1-6; Duc 6.6-11)

<sup>9</sup> Adanec nidec Nuquin Papan chiaid chuibante shubun puduedshun <sup>10</sup> isaquien mëicsatsaid icpondash. Adnubien padiseyobon: —Chonoadtemaid ushëmbi bëdamequid Nuquin Papan chiaid niacquidien nechitec. Nuquin Papan chiaid Esus niacmenuna. Aden niacmeshun: “Icsambo mibi iquec,” canuna —queshun Esus chuituidpondash. —¿Nadquid chonoadtemaid ushëmbi matses bëdamequinda Nuquin Papan chiaid niacpec? —caquien <sup>11</sup> Esusën: —¿Ada min nëish yua obeca caid icpec? Adquid chonoadtemaid ushën shëcuë uquëduc ampaëdacsho istuidshun ¿chiquenquioda mimbi icpatsia? Ai, mimbi chictsiac. Chonoadtemaid ushëmbi mimbi chonoadquin chicpatsiac. <sup>12</sup> Aden min obeca bëdiactsëc tantiec mibi bëdapabi icnuc matses tantiaquioquin nashunquid bëdamboshë ictsiash. Nadquid chonoadtemaid ushëmbi matses aden bëdamboen nashunquidën Nuquin Papan chiaid niaquenquio ictsiash —quequin Esusën abi icsamenu caquido chuipondash.

<sup>13</sup> Adotanquimbien Esusën mëicsatsaid chuiquin: —Mëcueta —cac mëcuc bëdampondash aton mëdante abiuc daëdi bëdambo yec. <sup>14</sup> Adsho isashien

abi chieshënquido padiseyobo nëishquiopac caondash. Adec nëishanec nidash aton matses utsibobëd: —Cuesunequimbien Esus ictiad —quecuededpac caondash.

*Esusën nate ëndenquimboshë chiampid*

<sup>15</sup> Adnubien Esus: —Ëbi cuesunetiadquo iquec —quianec auëshquiobi puduanec nidpondash. Nidsho isumbien matses dadpenshun tsibanampondash. Adshumbic aidon bëaid daicsaidotedi bëdamebampondash.

<sup>16</sup> Adshumbic ambi bëdamiaido chuiquin: —“Bëdamioshi,” quenda —quequin chuipondash Esusën: —Ëbi abi chuiquid dapa icmenushe —quiash adpondash Esus. <sup>17</sup> Aden Esusën nate chuiquin Nuquin Papan isadaidbo tsusedpa Isayas dada uamepampic naden chuiquin.

<sup>18</sup> “Ëmbi chomiaid ëmbi chiacpadomboen naquidquo nec.

Aid tantiaquiec bëdambo iquebi.

Con Mayan bëdambo icquid abëdi tabadmemb.

Adoac ëmbi bëdamboen iste isadaidbobëdta matses utsibo abitedi bëdamboen chiendac.

<sup>19</sup> Chushcanante bunenquo yec ancanenquo iquendac.

Chuiquid dapa ictiapimbo iquendac.

<sup>20</sup> Icsambo icquido yec shubiquido yec natiaic tabadquido yec daicsaido yec quequidon abi bëdiactsëc tantiabentsëcsho bëdamboen isquin bëdamboen tantiamendac.

Nuquin Papan chiacpadec cuidte ushë choabi icnuc adoendac.

<sup>21</sup> ‘Nuquin Papan tantiacpadomboen matses bëdamboen namendac,’ queshun nidaid utsi-utsiec yacnocquidon matses dadpenshun aidi tantierendac,”

quequin Esusën bëdamboen nate chuipampic Isayasën.

*Podobitsi icsan namiaidi Esus nec, quiaid*

*(Mad 3.20-30; Duc 11.14-23; 12.10)*

<sup>22</sup> Adnubien Esus ismenuen daicsaid bëpondash. Dapuduedshun podobitsi icsan bëshu uain eme uaidi onquesa nepondash. Isenquo yec onquenquo icshobien Esusën bëdamepondash. Adoac isbenequi onquiampondash.

<sup>23</sup> Adsho isashien Esus datsidadquido: —Is. Comapenen tantiaquin nabanquidquo nëid neque. ¿Nuquin tsusedpa Dabidën tsyuecquidta nepec? Adquid yec nuqui cainaidquo Nuquin Papan chomiaidien nechitec —quecuededpondash.

<sup>24</sup> Adsho tantiash Esus chieshënquido padiseyobo: —¿Aidta nedic? Ma aidpenquo neyoc. Betsibu caidën podobitsi icsan icbon namiaid icquimbien Esusën podobitsi icsa cuemehitec —quequin otacquo tantiapandash.

<sup>25</sup> Adshobien Esusën aidon otacquo tantiaid ambembi tantiashun naden chuipondash. —¿Adquidënda aton yuabi cuemepatsiash? Padenquo. Chuiquid dapan aton yuabo nëishtanquin chushcac cuësh-cuëshëdec aton yuabo uesadec nietsiash. Aido nibëdnuc chuiquid dapa ictiapimbo ictsiash. Adecbidi shubu dadpen icquidën tabadquido chushcananash cuësh-cuëshëdec niquian shubu dadpen icboedi daëdpactsëc yanec. <sup>26</sup> “Betsibu caidbidi Satanas caidëmbi namiaquien podobitsi icsa cuemehitec,” mimbi ëbi capoc. ¿Ambi naid nashobida Satanasën aton yuabo podobitsi icsabo cuemepatsiash? Padenquo ictsiash. Satanasën cuemiac aibdëdi aton yuabo cuësh-cuëshëdtsiash. Adnuc Satanas aton icbopenquo yantsiash. <sup>27</sup> Mibëd icquidon podobitsi icsa dapuduedaid cuemiac caosh. ¿Cuemesho isun mimbi ëbi chiacpadomboen: “Betsibu caidën namiaquien nachitec,” cainda ictio? Ma mimbi padenquo icpaboc. Mimbi adoac: “Mimbi icsamboen

chiec,” quetsenosh podobitsi icsa dapuedaid cuemequido mibéd icquido. <sup>28</sup> Nuquin Papan Mayanèn namiaquimbi podobitsi icsa cuemioc. Èmbi adosho isash: “Nèbi matsesbéd icquin Nuquin Papan namiaidèn naosh,” quetiadquidi mibi nec —quepondash Esus.

<sup>29</sup> Adashic abi onquec: —Tantia. Mibi chuinu. Ampenuesho icbon istuidac ampequidèn icbo uidèn uabi ampeshuntiapimbo iquec. Icbo uidènquo icquid bucun cataneshun ampeshunquid. Adecbidi Satanas bèdiactsèc tantiaquid icnuc èbien comapenen tantiaquidquido nec. Uidèn uacbimboen nadatiambo icquin nabanquin aton yua cuemepombi. <sup>30</sup> Èbi con icbo cainquo icquido Satanasèn yuabo nec. Adquid icquin èbi chieshènquin èbi tantiatsècquido cuèshèdmendac. Adquidbidi mibi nec —quequin Esusèn abi chieshènquido chuipondash.

<sup>31</sup> Adshumbic nadentsen chuipondash. —Nuquin Papan chiaid niacniacboedèmbi ènacsho Nuquin Papan bédamboen isec. Nuquin Papan icsamboen chuishunquidèmbi abi icsaid ènacsho Nuquin Papan bédamboen isec. Aton Mayanèn namiacsho isash: “Icsambo iquec,” quequin bédamboen tantienquo icsho Nuquin Papan bédamboen istiapimbo iquec. <sup>32</sup> Èbi chieshènquin icsamboen chuishunquidèmbi ènacsho Nuquin Papan bédamboen isec. Aton Mayanèn namiacsho isash: “Icsambo iquec,” quequin icsamboen tantiasho Nuquin Papan bédamboen istiapimbo iquec. Aden ènenquo icquin icsamboen tantiasho adembidi ènenquo icquin bédamboen istiapimbo iquendac —quequin abi chieshènquido Esusèn chuipondash.

*Bédambo icquid nec, quequin tantiate chiaid*  
(*Mat 7.15-20; Duc 6.43-45*)

<sup>33</sup> Adshumbic naden bédamboec tabadte Esusèn chuipondash. —Cuète bédan bacuè bédambo iquec. Cuète icsan bacuè icsambo iquec. Chetequid isun cuète dada matsesèn tantiec. Adembidi matses bédambo icquid bédamboec onquec bédamboec tabadsho isun: “Aid bédambo icquid nec,” quequin matsesèn tantiatsiash. <sup>34</sup> Ma mibi adquidpenquo neyoc. Nisibimboec icsa uanquido mibi nec. ¿Icsambo icquinda mimbi bédamboen chuidio?. Ma mimbi padenquo icboc. Mimbi icsamboen tantiaid ma mimbi utsibo icsamboen chuiboc. <sup>35</sup> Bédambo icquidèn ambi bédamboen tantiaid bédamboen chuitsiash. Icsambo icquidèmbien ambi icsamboen tantiaid icsamboen chuitsiash. Aden mimbi icsamboen chuipoc. <sup>36</sup> Ambi cuidte ushèn Nuquin Papan: “¿Ada bédamboen tantiaquin chuidenio?” quequin matses abitedi chuimendac. <sup>37</sup> Adoac abimbo chiec: “Ai, bédamboen nadeniombi,” qesho icsano nidmenquo iquec. Padnuen utsi: “Padenquo. Icsamboembimbi chuidenechitoc,” qesho icsano nidmequin cuideque. Icsamboec onqueboedi ènèdta —quequin Esusèn abi chieshènquido chuipondash.

*Padiseyobon: Èbi isme, quequin Esus chiaid*  
(*Mad 8.12; Duc 11.29-32*)

<sup>38</sup> Aden chuisho tantiashumbien abi chieshènquido utsibon Esus chuituidpondash. —“Nuquin Papan chomiaidini nec,” quequin èbi ismequin nadatiambo icquin nabanta. Isnu —quepondash padiseyobo Moisesèn dada uapampid chuibanquidobèdi.

<sup>39</sup> Adoquien Esus: —Padi. Nuquin Papan chiaid niacniaquec mibi icsamboshè iquec. Èbi tantiate bunenquo icquimbi mimbi: “Èbi isme,” èbi capec. Adsho nèbi mibi ismenquo iquembi. Yuecshumbimbi mibi ismendac. ¿Ada nuquin tsusedpa Onas caidèn nampid tantie? Aid yampicpaden naindambi. <sup>40</sup> Chishcambiecquid dapan chebudac aidèn pucun uec daèdec



ushacsho ucbudac Onas padpidec nidpampic. Adecbidi unēsacsho chococac Onas yampicpadec daēdec ushash uincuenendabi. Aden ismendambi. <sup>41</sup> Ēbi tantienquo yec mibi icsambo iquec. Padnuen Nuquin Papan chiaid Onasēn chuibanac shubu dadpenquo icquid Ninibe caid yacnocquido badedi icsainquo yec ēnēdpampic. Nuquin Papan chiaid chuibanquid Onas bēdambo icpampic. Ēbien bēdamboshē icquidquo nec. Adquid icquin nadatiambo icquin dadpen ismiaqui mimbi ēbi tantienquo iquec. Aden ēbi tantienquo icquido icscho Nuquin Papan matses abitedi cuidte ushēn Ninibe caid yacnocquidon: “Icsambo iquec,” mibi caindac. <sup>42</sup> Adquid cuidte ushēmbi matses utsi Sud yacnocquido ancaquidēn nuquin tsusedpa Sadomonēn chuisho tantiec chopampidēntsen: “Icsambo mibi iquec,” mibi caindac. Aid ancaquid chido nepampic. “Isadaidbo ancaquid Sadomon cuēmēdquid dadpen tantiaquid nec,” quequin chuituidac Sadomonēn chuisho tantianuec nidshun aid chidon tantiatuidpampic. Adash: “Nuquin Papan tantiamiaidēnquo Sadomonēn bēdamboen chuipec,” quepampic. Ēmbien abitedi tantiaquid icquin nadatiambo icquin ismeuidpoc. Adoqui mimbi tantienquo icpec — quepondash Esus abi chieshēnquido chiec.

*Abi nianaid podobitsi icsa dapuedoaid  
(Duc 11.24-26)*

<sup>43</sup> Adshumbic naden Esusēn chuipondash. —Icsaquido mibi nec. Podobitsi icsa dapuedaiddimboecquid mibi nec. Tantia. Mibi chuinu. Abi dapuedaid matses nianashi podobitsi icsa abi dapuedtequid nibēdacno yuec capucuen-capucuenec. Adtanequi: “Ēbi icbocnobi dapuedoaid nidebi,” quianec choec. <sup>44</sup> Chonobi ambi niamboed matses: “Ēbi dapuedaid podobitsi icsa nibēdnuc bēdambo iquebi. Adquid chomeoatiapimbo iquebi. Ēmbimbo naic bēdamboec tabadquidquo nebi,” queuidpec. Adshobien ambi niamboed podobitsi icsan istuidoapēc. Istuidoashic: “Dapuedtequidquo nēid nec,” quianec <sup>45</sup> abipadquid utsi bedec nidoaic. Nidshumbic 7tedi icsamboshē icquido istuidshun bēash aidobēdi dapuedec. Adnuc podobitsi icsa abentsēc dapuedaid yec ēnden icsambo icboedi aido dadpen dapuedaid yec buēdanquiec aid matses icsamboshē yanec. Adquo mibi iquec. “Bēdambo iquebi,” queboedi nēbi mibi icsamboshē yanec — quequin Esusēn chuipondash.

*Anibēdi Esusēn utsibo choaid  
(Mad 3.31-35; Duc 8.19-21)*

<sup>46</sup> Adanec shubun puduedshun Esusēn abēd puduedquido dadpen chuinubi aton utsibo aton titabēdi Esus isnuēc chopac caondash. Umanuc tabadnubi <sup>47</sup> utsin puduedshun Esus chuituidpondash. —Mibi isec tita min utsibobēdi choaccosh. Umanuc tabadec —caquien badedi nidenquo yec <sup>48</sup> Esus: —Utsitsen con ta caimbi. Adembidi utsitsen con utsi caimbi —quetanquin <sup>49</sup> abēd icquido mēdquin ismepondash. —Nēid ēbēd icquido con utsibo caimbi. <sup>50</sup> Nuquin Papan chiapadomboen naquidquo icscho con matses caimbi. Con utsi caquinc con chibi caquinc con ta caquinc caimbi —quepondash Esus.

## 13

*Piacbo ēshē siaid chiaid  
(Mad 4.1-9; Duc 8.4-8)*

<sup>1</sup> Adtanec nidec chian budash cuëmano tabadtuidpondash. <sup>2</sup> Tabadtuidsho isash matses dadpenquo cho-choash tsucus-tsucustsëcquo yec Esus datsi-dadpondash. Adsho istanec cano dapa antabëdtoash cuëma anoentsëc canon nuadquin Esusën chuipondash cuëmano tabadquidon tantianubi.

<sup>3</sup> Adshumbic abi tantiate chuinen naden ompoacbimboen chuipondash. —Piacbo ëshë siaid utsi-utsiec bëdamboec caniec. Utsi-utsiec padenquo. <sup>4</sup> “Abitedi ansecanu,” caidi utsi-utsiec shëcuë nibëdacno paëdec. Paëdacsho paëdaid uicchunën chequid. <sup>5</sup> Èshë utsibic nidaid tsasimbo yacno siac badedi dëyucuidash <sup>6</sup> aton tapun nidaidën puduedenquo icnuc ushë chënquequidën badedi unësquid. <sup>7</sup> Èshë utsibic nisanquid diadacno siaid dëyucash canidouidsëcsho nisanquidën dayunac unësquid. <sup>8</sup> Padnuen ëshë utsi-utsiec nidaid bëdanquo siac dëyucash caniasht dadpenquo ëshëquid. Utsi-utsiec 100ted ëshëquid icnubi utsi-utsiec 60ted ëshëquid icnuc utsi-utsiec 30ted ëshëquid —quepondash Esus.

<sup>9</sup> Adashic: —¿Min pabiate shëcuë nibëdquiecta iquec? Èmbi chuiboed bëdamboec pausudta —quepondash Esus.

*Ompoacbimboen chiec nebi, quiaid*

*(Mad 4.10-12; Duc 8.9-10)*

<sup>10</sup> Adsho tantiashtun abëd icquidon Esus chuipondash. —¿Atotsieshtun ompoacbimboen nëid matses dadpen chie? —caquien <sup>11</sup> Esus nadpondash. —Utsibo tantiamenquo icquin Nuquin Papabëd tabadte chuiquin nëbi mibiuidtsëqui tantiamembi. <sup>12</sup> Nuquin Papa tantiatiadquo icquidën ëbi tantiasht bëdamboen tantiamendambi. Nuquin Papa tantiauidtsëcquidën ëbi tantienquo icsho ëmbi ompoacbimboen chiac tantienquo ictsiash. <sup>13</sup> Ompoacbimboen aido dadpen chuibanembi. Èmbi naid isun ëbi tantienquo iquec. Èmbi chuisho pamumëdacbimboen tantienquo iquec. Adsho aidon tantiatiapimbo icnuc chiembi. <sup>14</sup> Nëidon tantienquo icte chuiquin Nuquin Papan nuquin tsusedpa Isayas caid naden dada uamepampic.

“Chiac tantiaboshombi tantienquo iquendac.

Ismiac isquioboshombi: ‘Ai, aidi nec,’ cainquo iquendac.

<sup>15</sup> Ai, ëmbi chiaid tantiatiapimbo iquec.

Ushacbimboen tantienquo yec pamumëdacbimboec chieshëmënquidombo iquec.

Èbi tantiate bunenquo iquec.

Èmbi chiaid tantiaquidombien paposhquiacbimboen bëdamboen tantiabentsiash.

Pausunacbimboen tantiashtun ëmbi chiacpadomboen natiadquo yansho aton chiesh bëdametsiambi. Aton chiesh bëdamete bunenquo iquec,”

quequin Nuquin Papan dada uamepampic —quepondash Esus abëd icquido chiec. <sup>16</sup> Adashic aidobidi chiec: —Isayasën chiacpadomboen utsibon ëbi tantienquo icnubi mimbien ëbi tantiec. Èbi isec mibi tabadec. Èmbi

chuibansho tantiasht: “Ai, abimbo caic,” quec mibi bëdambo iquec. <sup>17</sup> Èbi chote chuipampidobëdtan bëdamboec tabadquido dadpenshtun mimbi ëbi isacpadomboen ëbi iste bunequi ëbi isambobi unëspampic. Mimbi ëmbi

chuisho tantiacpadomboen tantiatiadquo yequi tantiambobi unëspampic —

quepondash Esus.

*Piacbo siaid sebadënquo chiaid*

*(Mad 4.13-20; Duc 8.11-15)*

<sup>18</sup> Adashic abi onquec: —Tantia. Èmbi piacbo ëshë siaid quequin chuiboed sebadënquo mibi chuinu. <sup>19</sup> Nuquin Papabëd tabadte chiaid piacbo ëshë

siaidbimboecquid nec. Nuquin Papan chiaid chiaqui tantiadenquoio icsho Satanasën nac badedi bëshumpec. Uicchunën piacbo ëshë paëdaid badedi chiachimboen adopec. <sup>20</sup>Utsibic Nuquin Papan chiaid chiaqui bëdiactsëc tantiauidtsash: “Bëdambo iquec,” quec cuishonqueuidtsec. <sup>21</sup>Adsho: “Nuquin Papan chiaid tantiaquid nec,” queshun utsibon chieshënac badedi chieshtoshon tantienquoio yanendac. Piacbo ëshë tapunuidtsash unësacimboen adoendac. <sup>22</sup>Utsibic Nuquin Papan chiaid tantiatsashi ambi dacuëdquin tantiauidi tantiequi chieshtopec. Utsibic tantiauidtsash ambi bedtequiduidi tantiequi chieshtopec. Nuquin Papan chiaid tantienquoio icpec. Isitodon dayunac unësacimboen adoendac. <sup>23</sup>Padnuen utsibon tantiate nidaid bëdan siaidbimboecquid nec. Nuquin Papan chiaid chuisho tantiaquioshon ambi tantiaid bënuainquoio icquin tantiabudec bëdamboec tabadec. Adshun aidën chiac utsi dadpenquioshë ëbi tantiaquid yanendac. Utsin chiac dadpen adecbidi ëbi tantiaquid yanendac. Utsin chiac daëdpactsëc adquidbidi yanendac —quequin abi tantiate chuipondash Esusën.

### *Ëshë icsambo icquid seuanaid chiaid*

<sup>24</sup>Adshumbic Esusën naden chuipondash. —Tantia. Nuquin Papan namiaid tantiamenuen utsi chiachimboen chuinu. Tiedën caniquid pete adosbiecquid icbon siac caondash. <sup>25</sup>Adanec nidambic inchëshëmbi choshon chieshëmënquidën ëshë icsambo icquidtsen daëd uain seuanac caondash. <sup>26</sup>Adoac adosbiecquid canidotsëcnubi abëdi tancandaëdpamboec icsambo icquid canidotsac caondash. <sup>27</sup>Adsho istanquin yuabon aton icbo chuituidpac caondash. “¿Pete ëshëda sio?” cac: “Ai,” qesho tantiash: “Icsambo icquidbëd tancandaëdec canidopacmoc. ¿Mitsipaden sio?” quequin yuabon icbo chuipac caondash. <sup>28</sup>Adoquien: “Chieshëmënquidëmbien seuanchitash,” cac: “¿Chicshunetanquindambi icpe?” yua qesho: <sup>29</sup>“Padi. Petebëdi chiquidtsiash. <sup>30</sup>Aidbëdi ma canipanuna. Ëshëacsho tacuesquimbi teshun sianun nanuna. Adoshombic icsambo icquid tsindobanshun nëdëncanun nanuna. Icsambo icquid nëdëncatanquimbic pete bedshun sandoshon shubun dectandonon nanuna,” quepac caondash tied icbo —quequin Esusën chuipondash.

### *Esus tantiaquido dadpen yante chiaid* (*Mad 4.30-32; Duc 13.18-19*)

<sup>31</sup>Adshumbic abi tantiaquido dadpen yante tantiamenuen Esusën naden chuipondash. —Cuëte bacuë ëshëmpi <sup>32</sup>pistsëcquidi nuamboshë caniec. Aid cuëte cuidin uicchun dadpen tabadtonec. Adecbidi ëbi tantiaquid abentsëcshun bëdamboec tabadquin ismiac ëbi tantiaquid dadpenquoio yanendac —quepondash Esus.

### *Abi bëdamboen tantiate Esusën chiaid* (*Mad 4.33-34; Duc 13.20-21*)

<sup>33</sup>Adshumbic Esusën abi bëdamboen tantiate chuipondash. —¿Mitsipad nami uaid icpec? Aniaactsëc nami uashun utsibëdta daëd uain cabiunac abichobi batambo yanec. Adembidi ëbi bëdiactsëc tantiatsëcboedi ëmbi chiaid tantiash ëbi bëdamboen tantiaquid yanendac <sup>34</sup>—quequin Esusën chuipondash. Sebadënquoio chienquoio icquin ompoachimboenuidi Esusën chuipondash. <sup>35</sup>Aden Esusën chuite chuiquin Nuquin Papan dada uamepampicpadomboen nanuen adopondash. Nuquin Papan dada uamepampid nad iquec.

“Sebadënquoio chienquoio icquin ompoachimboenuidi chuibanendambi.

Ëndenquimboshë matses uaboshombi Nuquin Papan ambi tantiaidi ambi uaido chiambo iquec. Adembidi aidon tsyuecquidotedi chiambobidi iquec.

Nëbimbi chuibanendac,”

quequin nuquin tsusedpan Esusën chuite dada uapampic.

*Ëshë icsambo icquid seuanaid sebadënquio chiaid*

<sup>36</sup> Adashic matses dadpen tabadacnuësh nidec Esus shubun puduedondash. Puduedshobien abëd icquidon chuipondash. — “Chieshëmëncquidën ëshë icsambo icquid siaid nec,” quequin mimbi chuiboed en sebadënquio chui, Icho. Tantuanu. ¿Atotsi chuitiadquio icquin aden chio? <sup>37</sup> —caquien Esusën chuipondash naden. —Tantia. Mibi chuinu. Pete ëshë bëdambo icquid sequidbimboecquid nebi. Nuquin Papan chiaidquio tantiamequin matses bëdambo icmequid nebi. <sup>38</sup> Padnuc tied dapabimboecquid nidaidën tabadquidtedi nec. Padnuc pete ëshëbimboecquid ëbi tantiaquid nec. Nidaid utsi-utsiec yacno tabadquido utsi-utsien ëbi tantiaquid icmendambi. Padnuc ëbi chieshënquid Satanasën yuaido icsambo icquid siaidbimboecquid nec. <sup>39</sup> Padnuc ëshë icsambo icquid sequidbimboecquid Satanas nec. Aidën yuaido matses icsambo icquidon ëbi tantiaquidobëd tabadquin icsametiadquio iquec. Adsho badedi cuidenquio icquin Nuquin Papan cuidte ushë choabi icnuc matses icsambo icquidobëd bëdambo icquido tabadmendambi. Padnuc ambi chiacpadën Nuquin Papan abi yacnoshon uaido mayan bëdabon ëmbi chiacpadomboen naindac. <sup>40</sup> Icsambo icquid tsindoshon nëdëncacnimboen Nuquin Papan cuidte ushëmbi icsambo icquido cuidendac. <sup>41</sup> Ëmbimboen mayan bëdabo namendac. “Icsamianquidobëdta icsaidotedi bedshun chian anëdënquiacno nëseca,” quequin ëmbi chiac <sup>42</sup> bedshun chian anëdënquiacno nësecaindac. Adoac natiaic mëyadbudec sidquequiendac. <sup>43</sup> Padnuc ambi tantiec bëdamboec tabadquido Nuquin Papa yacno nidash icsatiapimbo icquid iquendac. Ëmbi aden chuiboed tantishun ëmbi chiacpadomboen nata —quepondash Esus.

*Nuquin Papabëd tabadte bunquiota, quiaid*

<sup>44</sup> Adshumbic padpiden Esusën chuipondash. —Tantia. Matses ambi istuidaid bedte comapenec bunquiaid mibi chuinu. Utsin tied nantan nidshun dadan ëndenquimbo ompoampid piucquid dadpenquio icquid istuidpac caondash. Istuidash aid bedte comapenec bunquiopac caondash. Adshun aton na abitedimbo menequin piucquid bedshun tied icbo aid piucquid meneshun: “Nëbi con tied nec,” queshun piucquid ompoampid bedpac caondash. Adomboen matsesën Nuquin Papabëd tabadte bunquin aton nauidi nainquio icquin Nuquin Papan chiacpadomboenuidi nac bëdambo ictsiash.

<sup>45</sup> Tantia. Casëdu bëdaidquio bunaidtsen mibi chuinu. Dadan casëdu bëdaidquio bunquin bednuc nibëbenepac caondash. <sup>46</sup> Adshun bëdaidquio istuidash: “Nadquid utsi nibëdec,” quish comapenec bunquiac caondash. Adshun aton na abitedimbo menequin piucquid bedshun casëdu icbo menequin aid casëdu bedac caondash. Adomboen Nuquin Papabëd tabadte bunquin matsesën ëbi tantiaquiac bëdambo ictsiash —quepondash Esus.

*Nuquin Papan cuidte ushë Esusën chiaid*

<sup>47</sup> Adshumbic Esusën naden chuipondash. —Tantia. Mibi chuinu. Nuëcquid nibedacnimboen naindambi. Isadaidbon nuëcquid dadpenquio bedte nëshaid dapa acte nënequin <sup>48</sup> nëshaid cubu-cubuctsëcquio icnuc nuëcquid bedshun acte cuëman tabadquin nuëcquid nibedquid. Nuacquid

sandobanquin pistsēcquid acte nēsecaquid. Aden Isadaidbon nuēcquid bedquid. <sup>49</sup> Adomboembidi namendambi. Nuquin Papan cuidte ushē chonoc ambi abi yacnoshon uaido mayan bēdabo namendambi. Adoac choshon nibedacbimboen matses bēdambo icquido Nuquin Papa yacno nidmequimbi <sup>50</sup> icsambo icquido chian anēdēnquiagno nēsecaindac. Adoac natiaic shubiquiendac —quequin Esusēn Nuquin Papan cuidte chuipondash.

<sup>51</sup> Adshumbic: —¿Ada ěmbi chuiboedtedi tantie? —caquini: —Ai, tantiembi —quepondac. <sup>52</sup> Adsho tantiashun Esusēn chuipondashi. —Nuquin Papan chiaid chuibanquid mibi iquendac. Matsesēn aton na ěndenquimbo dayun uanēdaidbēdta aton na chuca ismequin chiacbimboen mimbi naindac. Nuquin Papan chiaid ěndenquimbo dada uampidbēdtabi Nuquin Papan chiaid utsi ěmbi chuiboedquio mimbi chiendac —quepondash Esus.

### *Nasaded yacno Esus nidaid*

(*Mad 6.1-6; Duc 4.16-30; Uan 4.44*)

<sup>53</sup> Adanec auēshquiobi nidequi <sup>54</sup> abi caninēdacno shubu dadpen icquid Nasaded caid yacno chopondash. Ambo choshombic Nuquin Papan chiaid chuibante shubun puduedshun aton matses chuipondash. Adoquien: —¿Mitsipaden comapenen tantiabempash neba? ¿Mitsipadec comapenen tantiaquin bēdamequid yampash? <sup>55</sup> ¿Nuqui isacmaidta nedic? Ma aton papa cuēte nacnenquid nepaboc. Ma aton tita Madia nepayoc. Aton utsibo nēidtedi iccosh. Nēidic Acobo. Nēidic Ose. Nēidic Simon. Nēidic Udas. Aidtedi aton utsibo iccosh. <sup>56</sup> Aido nēmbo tabadosh. Aton chibichedotsen nēmbo tabadosh. ¿Comapenen tantiaquidta nedic? Ma adquidpenquio neyoc —quequin <sup>57</sup> Esus chieshēnquin tantienquio icpondash.

Adsho tantiashun Esusēn nadopondash: —Nuquin Papan: “Ěmbi tantiami-acpaden chuibanta,” caidēn chiac utsibon tantiaquid. Adquidēn abi caniacnoshon chuibansho tantienquio icquid —quepondash Esus. <sup>58</sup> Adshun nadatiambo icquin nabanquin daēdpactsēc ismetsēccondash: —“Nuquin Papan chomiaidquio nec,” quetiapimbo iquec —queshun.

## 14

### *Uan acten mentoanquid*

#### *unēs uaid*

(*Mad 6.14-29; Duc 9.7-9*)

<sup>1</sup> Adnubien ancaquidēn Edodes caidēn Esusēn comapenen tantiaquin nabanaid chuisho tantiapac caondash. <sup>2</sup> Adshumbic aton yuabo chuipac caondash. —Uan pado acten mentoandened nepash icnui. Ěmbi mapi butemiondaidi uincuempash icnui. Adquid icquin comapenen tantiaquin nabampash icnui —quepac caondash Edodes.

<sup>3-4</sup> Edodesēn Uan cuesuniac caondaic chuinu. Tantia. Uanēn: —Mimbi bedaīd Edodias caid min chidopenquio nec. Min utsi Uedipec caidēn chido bedshun Nuquin Papan chiaid mimbi niaquec —cadoniaquien Edodesēn chieshtoshon uidēn uameshun Uan quēnēn nauedmepac caondash.

<sup>5</sup> Adshumbic Uan cuesunetiadquio icquimbi aton matses: —Nuquin Papan chiaid chuibanquidquio nec —quesho tantiashun aido dacuēdēnquin Uan badedi cuesunenquio icpac caondash.

<sup>6</sup> Adshumbic Edodesēn: —Ěbi tishaid ushē nec —queshun matses dadpen aton shubun puduedmeshun pemepac caondash. Adnubien ambi inaidēn champin Edodesēn pemiaido baidaquin ismepac caondash. Adsho isumbic Edodesēn: —Bēdamboenshē mimbi naic —queshun <sup>7</sup> naden chuipac caondash. —Tantia, champi. ¿Atotsi buneque? Mibi bunaidquio mibi menenu.

“Nuquin Papan cuidnushe,” quia sh muatiapimbo iquebique. En ëbi chui — capac caondash Edodesën.<sup>8</sup> Adoaquien champin aton tita chuitampac caondash. Chuitanec choshon anin chiaid chuituidpac caondash. —Uan acten mentoanquidën mapi butetanquin pada-padaid dapan ananshun baded ëbi mene —capac caondash champin Edodes chuiquin. Uanën —Min bënë nianshun utsi bedmec mibi icsaic —cac champin tita Uan cuesunemete bumpac caondash.

<sup>9</sup> Adoaquien Edodesën: —¿Atotsi quepequini ado? ¿Adoenquo ictiadtsimbi icpoba? —quequin ambi chuiboed niactiadquo icpac caondash. —Ëbi isedquidon: “Mibi muambo nec,” canushe —quetanquin champin chiacpadomboen aton yuabo: —Uan mapi butetan —capac caondash.

<sup>10</sup> Adoac quënën tsadacnobi Uan mapi buteshun <sup>11</sup> mapi pada-padaid ananshun buanshun champi menepac caondash yuabon. Adoaquien champin ani menenun buampac caondash.

<sup>12</sup> Adnubien Uanbëd ictenedon Uan mapi butiacsho dada bedanquin buanshun chococatampac caondash. Adotanec Esus chiec nidpac caondash.

*Comapenen tantiaquin 5000tedi pemiaid*  
(*Mad 6.30-44; Duc 9.10-17; Uan 6.1-14*)

<sup>13</sup> Nidshumbic: —Mibi acten mentondaid mapi butiaccosh —catuidpondash. Adsho tantianec cano antabëdtoshon chian potiash pudundoanec matses nibëdacnombo Esus nidanepondash. Aden chian potesho isash: —Nuquitsen nidnu. Nid —quianec matses dadpen chian dëquiadec podqued nidquidën nidanepac caondash.

<sup>14</sup> Adnubien Esus matses nibëdacno istanec chian yacno choapondash. Choashun isquien abi cainec matses dadpen tabadec. Adsho isun aido tantiaquidquo icquin daicsaidotedi bëdamebampondash.

<sup>15</sup> Ushë budambi Esusbëd icquidon: —Inchësheque. Pete nibëdacno nuqui tabadeque. Nidaneme, Icbo. Shubu dadpen icquid utsi-utsiec yacno nidshun ma piucquid menequin ma pete bednu —caquien <sup>16</sup> Esusën: —Padi. Ma tabadnu. Mimbibi peme —capondashi.

<sup>17</sup> Adoaquini: —Ma panëmpi 5tedpactsëc icpayoc. Nuëcquidëmpi daëdquiobi ictsec —quepondac. <sup>18</sup> Adsho: —Aidtedtsëqui beccho —cac meniondambi.

<sup>19</sup> Adoaquien Esusën abi datsidadquido chuiquin: —Uasinën tabadbud —capondash. Adoac tabadbudnubi abuc isquin Nuquin Papa chuipondash. —Mimbi uaid pete bëdambo iquec, Papa —quetanquin panëmpi cuësh-cuëshun abëd icquido menebanac aidontsen matses abitedi menebampondash. Adembidi nuëcquidëmpi bushtebantsëcshun menebampondash.

<sup>20</sup> Adoaquien nua cubudcuededquin pebededpondash abitedishumbi. Picsho isun napi uaid bedtanequin tsitsan dapan sandotanquin isquien tsitsan dapa <sup>12</sup>tedi cubu-cubuctsëcquo iquec pete cuësh-cuëshaid napi uaid. <sup>21</sup> Aden matses dadpenquo pemebampondash. Aido dadatedi tambanac 5000tedi icpondash. Aton chido aton bacuëbobëdta tambanambo iccondambi.

*Acte bëntse Esus choaid*  
(*Mad 6.45-52; Uan 6.16-21*)

<sup>22</sup> Adshumbic Esusën abëd icquido chuiquin: —Chian potec nidta —capondash. Adoac cano antabëdtoanec potec nidnubi Esusën abi datsidadquidotsen: —Nidanec nid —cac nidanepac caondash. <sup>23</sup> Adec nidanebon Nuquin Papa chuinuec macuësh dectatoash abentsëqui Esus inchëshpac caondash.

<sup>24</sup> Adnubien chian dapa potequi abëd icquidotsen inchëshpondash. Chian nënantanquio yanubi cunquetuidpondash. Adnuc acte comapenec tëccuasquiampondash uncadenquio yec. Comapenec acte ishcudnuc cano mentoadtiadpambo icpondash.

<sup>25</sup> Adnubien badiadte anoentsëqui acte bëntse Esus chopondash. <sup>26</sup> Acte bëntse chosho isashini: —Podobitsi nec —quiash dacuëdtanec sidquecuededpondac. <sup>27</sup> Adshobini Esusën: —Ëbien neque. Dacuëndenda —capondash. <sup>28</sup> Adoaguien Petedon: —¿Con Icbombobida ne? Con Icbo icquin: “Acte bëntse cho,” ëbi ca —capondash.

<sup>29</sup> Adsho tantiashun Esusën: —En cho —caquien Petedo canonoësh budanec acte bëntse Esus bëquedbanec niduidtsëcondash. <sup>30</sup> Esusuidi isec bëdamboec niduidtsequi acte comapenec tëccuasquesho isash dacuëdtanec acte bëntse niduidtsëchoedi mentoadtsempondash. —Ëbi bed, Icbo. Mentoadebique —caquien <sup>31</sup> Esusën badedquio bedtanquin indopondash. Aden indoequi: —“Con icbon ëbi bëdamboen nametsiash,” queboedi ¿atotsi quiash dacuëdtano? Ëbi bëdiactsëc tantiatsëcquid mibi nec —quepondash Esus Petedo caic.

<sup>32</sup> Adtanec Petedobëdi cano antsadtonobien cunqueboedi cunquequio yampondash. Actetsen tëccuasquenquio yanondash. <sup>33</sup> Adsho isun cano antabëdquidon: —Mibi bëdamboshë iquec. Comapenen tantiaquidquio yec Nuquin Papan Madombo mibi nec —quequin Esus tantiabededpondash.

*Quenesaded yacnoshon Esusën bëdamiaid*  
(Mad 6.53-56)

<sup>34</sup> Adashic chian potiaish Quenesaded yacno pudundopondash. <sup>35</sup> Pudundosho isun anocquidon: —Esus chosh —quequin uanocquido abitedi chuibeniac daicsaido abitedi bë-bëpondash. <sup>36</sup> Bë-bëshumbic: —Dashcuteuidtsëqui mishashi bëdantsiash —queshun Esus chuituidquin: —Min dashcute cuëmano daicsaido mishme —cac mishmiaqui bëdampondash abitedi.

## 15

*Padiseyobo icsaid Esusën chiaid*  
(Mad 7.1-13)

<sup>1</sup> Adnubien padiseyobo Moisesën dada uampid chuibanquidobëdi shubu dadpen icquid Edusaden caid yacnuësh cho-choquin Esus istuidpondash.

<sup>2</sup> Istuidashic: —¿Atotsieshun mibëd icquidon nuquin tsusedpabon chiaid niac-niacposh? Penush mëpamëdenquio icquin nuquin tsusedpabon chiaid ma niac-niacpaboc —quepondash Esus chieshënquido.

<sup>3</sup> Adsho tantiashun Esusën: —Ma mimbi. ¿Atotsieshun Nuquin Papan chiaidquio niac-niaque? Nuquin tsusedpabon chiapadomboen naquin ma mimbi Nuquin Papan chiaidquio niac-niacpayoc. <sup>4</sup> Tantia. Mibi chuinu. “Titabëdta papa chieshënenquio icquin bëdamboen tantiata,” quequin Nuquin Papan chiampidquio ma mimbi niacpaboc. Adembidi: “‘Con pa unëshashun,’ quec chieshëmënuquid icsho unës uaquid. Adembidi ani icsamboen chuishunsho unës uaquid,” quequin Nuquin Papan chiampid utsi mimbi niacpec. <sup>5</sup> Aid niacquin nuquin tsusedpabon ambembi chiaidien mimbi chiec. “Anibëdta amë naden cudasënac bëdambo ictsiash,” mibi quepec. “‘Nuquin Papa menetequid nëidted con piucquid iquec. Mitsana nibëdsho menetiadquidi mibi menenquio iquembi. Nuquin Papa menetequid nec,’ quequidën <sup>6</sup> cudasënac bëdambo ictsiash,” mibi quepec. Aden nuquin matsesën chiaid naquin Nuquin Papan chiaidquio ma mimbi

niac-niacpayoc. <sup>7</sup> “Nuquin Papa tantiaquidquo nebi,” quec muaquid mibi nec. Ęndenquimboshē Nuquin Papan chuimiāc nuquin tsusedpa Isayas caidēn mimbi icsamboen tantiate chuīquin dada uapampic naden.

<sup>8</sup> “Isadaidbo: ‘Nuquin Papambo tantiēmbi,’ quepec.

Adboedēmbi ēmbi chiaid niacquin ēbi tantienquīo iquec.

<sup>9</sup> “Ma Nuquin Papan ēbi bēdamboen isnu,” queboedēmbi ēbi bēdamboen tantienquīo iquec.

Ęmbi chiaidquīo namenquīo icquin aton matsesēn chiaiduidi namepec,” quequin Isayasēn Nuquin Papan chiaid dada uapampic —quequin Esusēn abi chieshēnquīdo chushcapondash.

*Ana shēcūēnuēsh choaid chiaid*  
(Mad 7.14-23)

<sup>10</sup> Adshumbic abi isec datsidadquīdo ompoacbimboen chuipondash. —Tantia. Mibitedi chuīnu. <sup>11</sup> Ana shēcūēn puduedaidēn matses icsaten mimbi dampec. ¿Adquidēnda matses icsapec? Padenquīo. Ana shēcūēnuēsh choaidēmbien matses icsatsiash —quequin Esusēn chuipondash.

<sup>12</sup> Adnubien abēd icquīdon: —Mimbi aden chuiboed tantiashun padiseyobon mibi chieshēnosh, Icbo —caquien: <sup>13</sup> —Dacuēdenda. Icsa bescatanquin tsindoshon nēdēncacimbōen ambī tantiamiabi yaido ambembi chuīquīdo Nuquin Papan cuideque. <sup>14</sup> Dacuēdenda. Padiseyobo bēshuaidbimboec icquīdo neque. Bēshuaidēn aton matses bēshuaid utsi bēdamboen buantiapimbo iquec. Buanuec abi shēcūē ampaēdtsiash. Adembidi Nuquin Papan chiaidpenquīo namequin aton matses bēdamboen tantiametiapimbo iquec —quepondash Esus abēd icquīdo chiec.

<sup>15</sup> Adshobien Petedon: —Mimbi ana shēcūēnuēsh choaid quequin chuiboed tantiambo iccombique. Aid sebadēnquīo chui. Tantianu, Icbo —caquien:

<sup>16</sup> —¿Tantiamboda icco? <sup>17</sup> Chuīnu. Tantia. Ana shēcūēn puduedaid mimbi peboed min pucun uedoash chimute shēcūēnuēsh choec. Adquidēn Nuquin Papan chiaid niacmenquīo iquec. <sup>18</sup> Matses onquiaidimbi ana shēcūēnuēsh choaid caoc. Abibi uquēducuēsh onquec: “Adoēmbi,” quequin otacquīo tantiaquin naic matses icsatsiash. <sup>19</sup> Icsambo icquīdo yec: “Ai, adoēmbi,” quequin otacquīo tantiashun Nuquin Papan chiaid niactsiash nadquidēn. Nēidic unēs uanquīd. Nēidic aton chidopenquīo chudquīd. Nēidic aton bēnēpenquīo chudmequīd. Nēidic aben uequīd. Nēidic ampequīd. Nēidic muaquīd. Nēidic icsamboec chuīshumēnquīd. <sup>20</sup> Adquīdtedi: “Ai, adote bunēbi” quequin otacquīo tantiash icsaquīd nec. Padnuen penush mēpamēdenquīo icquin Nuquin Papan chiaid nīaquenquīo ictsīash —quepondash Esus abēd icquīdo chiec.

*Isadaidpembo chidon Esus tantiaid*  
(Mad 7.24-30)

<sup>21</sup> Adanec auēshquiobi Esus nidpondash. Shubu dadpen icquīd Tido caid anoentsēqui datambidanec choec shubu dadpen icquīd utsi Sidon caid anoentsēqui chopondash.

<sup>22</sup> Adnubien anocquīd cananeyabo chidon Esus cuēntuidpondash. —Tsusedpa Daidēn tsyuecquīd Nuquin Papan namiaid icquin ēbi bēdamboen ista. Con champi podobitsi icsa dapuduedaid yec natiambo iqueque. Con champi bēdameta —caquien <sup>23</sup> Esusēn ēcbedenquīo icpondash. Ęcbedenquīo yaquī chidon tsibanbanquin cuēnbampondash. Adsho tantiashun Esusbēd icquīdon: —Chieshanquīec cuēdpeque. Cuemepa —caquien <sup>24</sup> Esusēn cuemenquīo icquīmbi aid chuīquin: —Nuquin Papan chiacpaden Isadaidbo matsesba Nuquin Papa bēdamboen ismete tantiamenuēc nebi.



Bënudac bimboec icquin Nuquin Papa tantienquo icscho aidoba tantiamenuec nebi —quepondash Esus.

<sup>25</sup> Adsho tantiash nidenquo yec chido cuëdboed Esus ismequin danëshën sebudtsec: —Ëbi nashunta, Icbo. Con champi bëdameta —queshobien Esusën: <sup>26</sup> —¿Aton bacuëbo pemenquo icquimbi aton opa pemiacta bëdambo icpatsiash? Padenquo. Adembidi Nuquin Papan con matses caidotedi tantamiabi utsibo ëmbi nashunac icsambo ictsiash. Isadaidboba tantiamenuec nebi —quepondash Esus.

<sup>27</sup> Adsho tantiashun chidon: —Ai, abimbo mimbi caic. Padnuen bacuëbon pequin paëdmiaid opashëmpin petsëcquid. Adembidi mimbi comapenen tantiaquin nabanaqui isadaidbo dadpen bëdanubi isadaidpembo abentsëc tantiaquid icscho ëbi nashunquin con champi bëdameta <sup>28</sup> —caquien Esusën: —Ai. Ëbi tantiaquidquo mibi nec. Mimbi chiacpadec min champi bëdanendac —quesho tantianec aton shubuno nidshun isquien aton champi bëdanac Esusën chuinubi.

### *Daicsaido dadpen Esusën bëdamiaid*

<sup>29</sup> Adanec auëshquiobi nidec chian dapa Cadidia caid cuëman nidquid podquedën nidanepondash. Adashic macuësh dapa dectatoec poctsebi tabadtuidpondash.

<sup>30</sup> Tabadtuidsho isun matses dadpenquo cho-choquin daicsaido dadpen Esus ismenuen bë-bëpondash. Tidinquequido yec bëshuaido yec shëquëquenquo icquido yec onquesabo yec daicsaido utsibotedi yec quenuc bë-bëpondash. Adsho Esusën bëdamebampondash. <sup>31</sup> Bëdamiac onquenquo icboedi onquianondash. Bëshuacboedëmbi isbenondash. Capuenquo icboedi capucuenondash. Daicsaido utsibo adecbidi bëdanondash. Adsho isquido nadpondash. —¿Adquidta ictenec? Nuquin matses isadaidbon tantiaidën Nuquin Papan namiaid icquin bëdamepash icnui. Nuquin Papa bëdambo iquec —quepondash Esusën bëdamiaid tantiash.

### *Matses 4000tedi pemiaid (Mad 8.1-10)*

<sup>32</sup> Adec tabadsho isashien Esus: —Nëido tantiac unësquo iquec. Ëmbi nabansho isnuec choash 3tedec ushquin piac ambi bëboed pete naimëdaccosh. Ëmbi: “Nid,” cac nidnuequi bunambi padishtiash. Pemiabi nidmetiapimbo iquebi —quepondash. <sup>33</sup> Adsho tantiashun abëd icquidon: —¿Midambo pete bedtiapimbo iquec? Pemetiapimbo matses dadpen iquec —capondash.

<sup>34</sup> Adoaquien Esusën: —¿Tedtsi panëmpi iquec? —cac: —Sieteted ictsec. Nuëcquidëmpi daëdpactsëc ictsec —quesho <sup>35</sup> tantiashumbien abi datsidadquido chuiquin: —Nëmbo tabadbud —capondash. Adoac tabadbudpondash abitedi.

<sup>36</sup> Adshumbic panëmpibëdta nuëcquidëmpi bedshun Nuquin Papa chuipondash. —Nëid mimbi uaid bëdambo iquec, Papa —queshun pete cuëshcuëshbantsëcshun abëd icquido menëbampondash: —Pemban —quequin. Adoac abitedimbo pemëbampondash. <sup>37</sup> Aden pemiact abitedimbo nua cubudcuededpondash. Piacsho isun pequin napi uaid bedbanquin tsitsan 7ted icnuc cubu-cubuctsëcquid icnuc sandobampondambi. <sup>38</sup> Esusën pemiaido dadpenquo icpondash. Tambanac 4000tedi dada icpondash. Chido bacuëbobëdta tambanambo iccondambi. <sup>39</sup> Adashic: —Nidanec nid —quepondash Esus ambi pemëboedo caic. Aido nidanenubi chian budash cano antabëdtoshon Esusën chian potepondash. Chian potiash nidaid Mac-tada caid yacno pudundopondash.

## 16

### *Saduseyobon: Ēbi isme, quiaid* (*Mad 8.11-13; Duc 12.54-56*)

<sup>1</sup> Pudundoanec nidshobi anocquidon abi chieshēnquidon Esus chuituid-pondash. —“Nuquin Papan chomiaid nebi,” quequin comapenen tantiaquin nabanquin ēbi isme —cabededpondash padiseyobobēdtan saduseyobon.

<sup>2</sup> Adshobien Esusēn: —Nuquin matsesēn chiaid mimbi tantiec. “Inchēshbudtsēqui abu piumbo icsho isash: ‘Tanunquio badiadec,’ quequid. <sup>3</sup> Badiadnubi abu inchēshpambo icsho isash: ‘Ue dapa choec,’ quequid,” quequin nuquin matsesēn chiaid mimbi tantiec. Aden chiaid tantiacbimboen bēdamboen tantiatiaquidi Nuquin Papan nēbimbobi naid mimbi tantienquio iquec. <sup>4</sup> Icsambo icquid icquimbi mimbi: “Ēbi isme,” cadednepec. Nēbi mibi ismenquio iquemi. Nuquin Papan nuquin tsusedpa Onas chishcambiecquid dapan chebudacsho daēdec ushun ucbudmiacbimboec unēs uacsho chococac daēdec ushash uincuenendabi. Aden ēbi tantiesabo ismendambi —quianec nidpondash Esus.

### *Padiseyobon chiaid tantienda, quiaid* (*Mad 8.14-21*)

<sup>5</sup> Adanec nidec chian budash cano antabēdtoshon chian poteoapon-dash. Chian potequien Esusbēd icquido: —Pete nianchitombi. Bētiadquidi nepobi —quepondash. <sup>6</sup> Adshobien Esusēn abēd icquido chuiquin: —Padiseyobēdtan saduseyobon naid pan bidiscametebimboecquid iqueque. Ista —caquien <sup>7</sup> tantienquio yec abēd icquido nadec onquecuededpondash. —Nuqui niamboed pete chiequi nepanui —quepondash. <sup>8</sup> Adsho ambembi tantiaish Esus: —Ēbi bēdiactsēc tantiatsēcquid mibi nec. ¿Mimbi pete niamboed chiectabi nedi? Padenquio. <sup>9</sup> ¿Bēshunashta mibi nepe? Pete 5tedtsēchoedi ěmbi 5000tedi pemiaidēn napi uaid dadpen iccondaid ¿tantienquioda yano? <sup>10</sup> ¿Adembidi pete 7tedi ictsēchoedi ěmbi 4000tedi pemiaidēn napi uaid dadpen tsitsanēn sandoboed tantienquioda yano? <sup>11</sup> ¿Aden comapenen tantiaquid icquimbidambi pete niamboed chuipadi? Padenquio. Pan bidiscamete pictsēc cabiunac pan abichobi nua bidisquiacbimboecquid padiseyobobēdtan saduseyobon chiaid iquec —quepondash Esus.

<sup>12</sup> Aden chuisho tantiaish abēd icquido nadpondash. —Pan chienquio icquimbi nuquin matses tsusiobon chiaidshenda capec. Aido caic: “Icsamenda,” quepecshenda niosh. “Padiseyobon chiaidbēdta saduseyobon chiaid tantienda,” quepecshenda niosh —quepondash Esusbēd icquido.

### *Nuquin Papan Mado mibi nec, quiaid* (*Mad 8.27-30; Duc 9.18-21*)

<sup>13</sup> Adash yuectaniash puduanec nidequien Esus nidaid utsi Sesadeya Uedipo caidēn nidanepondash. Adshumbic abēd icquido chuimepondash. —Utsibon ¿tsutsi ēbi caosh? —caquien: <sup>14</sup> —“Uan pado acten mentoanondaidien nec,” mibi caosh. Utsimbic: “Edias cuēmēdquid Nuquin Papan ambi tantiaid oncamiampid nepanui,” mibi caosh. Utsimbic: “Edemias cuēmēdquid Nuquin Papan oncamepampid nepanui,” mibi caosh. Utsimbic: “Nuquin Papan oncamiampid utsi nepanui,” mibi caosh —capondash abēd icquidon. <sup>15</sup> Adsho tantiaishun Esusēn: —Ma mimbibi. ¿tsutsi ēbi mimbi cao? —caquien <sup>16</sup> Petedo Simon caidēn: —“Quidistu caid Nuquin Papan chomiaidquio nec,” caombi mibi. Aton Madombo mibi nec —capondash.

<sup>17</sup> Adsho tantiaishun Esusēn: —Nuquin Papan aden tantiamiac mimbi bēdamboen chioc, Petedo. Onasēn mado Simon caid yec matsesien mibi

nec. Adquid icquimbi matsesën tantiaid chienquo icquin Nuquin Papan tantiamiaidquo mimbi abimbo chioc. <sup>18</sup> Tantia. Ĕmbitsen mibi chuinu. “Cuēnotebimboecquid nec,” quequin mibi Petedo cuēnondambi. “Cuēnote dapa utsi ictiapimbo yacimboec chieshtoenquo icquid iquendac,” queshun mibia ěbi tantiaquido chuiquid dapambo icmendambi. Adec mimbi nami-aido ěbi tantiaquido iquendac. Satanasën aidō: “Nēid yuanu. Utsibic chieshtomenu. Utsibic unēs uamenu,” caqui abi ěbi tantiaquido iquendac. <sup>19</sup> Padnuc Nuquin Papan chiacpadomboen ěbi tantiaquidon nate mimbi chiendac. Adembidi ěbi tantiaquidon natemaidtsen mimbi chiendac — quepondash Esus Petedo chiec.

<sup>20</sup> Adashic abēd icquido abitedi chuioaic: —“Nuquin Papan chomiaidquo nec,” quequin utsibo ěbi chienda — quepondash Esus.

*Abi unēs uate Esusën chiaid  
(Mad 8.31–9.1; Duc 9.22–27)*

<sup>21</sup> Adshumbic tauaquin abi unēs uate chuidondash. —Shubu dadpen icquid Edusaden caid yacno nidendabi. Anoshon nuquin matsesën ěbi chieshēnquiendac nēidtedshun. Nēidic tsusiobon. Nēidic nēish yua abided unēs uaquido chuiquid dapabon. Nēidic Moisesën dada uampid chuibanquidon. Aidtedishun mēyanquoquin ěbi unēs uamendac. Adoacsho chococac daēdec ushash uincuenendabi —quequin chuisho <sup>22</sup> tantiashun Petedon uano-tantsēcquin tsadumbudshun Esus chuipondash. —Unēsquo icnuc mimbi chieque. Aden chienda. Ma mibi unēs uatiapimbo icpayoc —capondash Petedon. <sup>23</sup> Adoacsho Esusën: —Satanasën oncamiac Petedo adec onquec —queshun Petedo isquin Satanas chushcapondash naden. —Cuen, Satanas. Nuquin Papan chiaid mimbi ěbi niacmetiadquo iqueque. Cuen —quetanec Petedobi chiec: —Matsesën tantiaid chuiquimbi Nuquin Papan tantiaidquo mimbi chienquo iccoc —capondash.

<sup>24</sup> Adashic abēd icquidotedi chuioaic: —Ĕbi tantiaquidon aton nauidi nainquo icquin ěmbi chiacpadomboen natsiash. Adsho chieshēmēnquidon: “Unēs uachitomane,” cac chieshtoenquo icquin ěbi tantiatsiash. Adquid ěbi tantiaquidquo nec. <sup>25</sup> Padnuen ěbi tantiatsēcquid: “Esus tantiasho unēs uachitoshe,” quiash ěbi tantienquo yanec unēsash Nuquin Papan cuidaidobēd nidendac. Padnuen chieshtoenquo icquin ěbi tantiaquid Nuquin Papa yacno tabadendac. <sup>26</sup> ¿Nuquin Papa tantienquo yec tabadecta matses bēdambo icpatsiash? Abi bunaidtedi bedquin Nuquin Papa tantienquo yec unēsash ¿mitsimbo tabadpatsiash? Nuquin Papabēd tabadte bunquin ¿atotsi menepatsiash? ¿Piucquid meniashta Nuquin Papa yacno tabadpatsiash? Padenquo. Adotiapimbo iquec. ¿Atoda meniantiapimbo iquec? <sup>27</sup> Ĕmbien matses cuidte chiendac. Nuquin Papa yacnuēsh ambi abi yacnoshon uaido mayan bēdabobēd cho-choshon Nuquin Papan abitedishun icbo icmiaid icquin matses cuidte chiendambi. Nuquin Papa tantiec bēdamboec tabadquid Nuquin Papabēd tabadmequin Nuquin Papa tantienquo yec icsaquido ic-sano nidmendambi. <sup>28</sup> Tantia. Chuinu. Utsi-utsiec unēsabi icquin ěbi tantiaquido dadpen yansho mimbi isendac —quepondash Esus.

## 17

*Esus bēchamauanquiecsho isaid  
(Mad 9.2–13; Duc 9.28–36)*

<sup>1</sup> Aden chiash 6tedec ushanec nidquimbi Esusën abēd icquido 3tedtsēqui buampondash. Petedo yec Acobo yec Acobon buchi Uan yec quetsēcnu buanash macuēsh dapa dectatoash mananēnquo tabadtuidpac caondash.

<sup>2</sup> Tabadtuidshun isquien Esus utsiacimboec isadpec. Aton dashcutebēdi aton bētantete ushēbimboec bēchamauanquieic yanac caondash.

<sup>3</sup> Esus bēchamauanquieic icnubien dada utsi daēd isadcuenash Esusbēd onquiampac caondash. Abentsēc Moises yampid icnubi utsi Edias Nuquin Papan ambi tantiaid oncamiampid icpac caondash. <sup>4</sup> Adsho isashien Petedo: —Mibi adec tabadsho isash bēdambo iquebi. Mibi nēmbobi tabadmenun abentsēc chotsecnuc shubumpi uatsēcunna, Icbo. Mitsana natsēcquinc Moisesēn na natsēcquinc Ediasēn na natsēcquinc canuna. ¿Ada bēda icpec? —quenubi <sup>5</sup> abu ushu bēchamauanquieic icquidēn isadenquoio icnuc bētimpac caondash. Adnubien abu ushu nēnantanuēshquoio Nuquin Papa onquiampac caondash. —Nēid con Madombo nec. Ēmbi tantiaidquoio yec ēmbi bēdamboen isaidquoio neque. Nēidquoio tantiaata —quec dacuēdampamboec onquenubien <sup>6</sup> uinte paēdtampamboec dacuēdtanec uebudcuededpac caondash Petedo chedo.

<sup>7</sup> Adshobien Esusēn camishquin: —Dacuēdenda. Nidto —cac <sup>8</sup> nidtoquin isquien Esus abentsēqui iquec.

<sup>9</sup> Adtanec macuēsh budequi Esus: —Mimbi isboed nēbi utsibo chienda. Unēs uac ēbi uincuenacsho isun chianta —quepac caondash abēd icquido chiec.

<sup>10</sup> Adsho tantiaish Petedo chedo: —“Nuquin Papan chomiaidquoio nec,” quequin nēbi mibi tantiembi. Mibi adquid icnuc ¿mitsipadquid nuquin matses tsusiobon chuiposh? Nuquin Papan chiaid isash: “Nuquin Papan chomiaid choabi icnuc Edias yampidba choendac,” quepequien iccosh —queshobien <sup>11</sup> Esusēn: —Abimbo chiosh. “Edias yampid bēyuc choshon: ‘Nuquin Papan chomiac bēdambo icquid choequie. Bēdamboec tabadta,’ quequin chiendac,” quequin abimbo chiosh. <sup>12</sup> Adquid Ediasbimboecquid chondash. Choacsho tantienquoio icquin matsesēn abi bunacpaden unēs uapac caondash. Adembidi Nuquin Papan chomiaid icsho ēbitsen chieshēnquin unēs uaindac —quesho tantiaishien: <sup>13</sup> —“Ediasbimboecquid nec,” quequinshenda chuiposh. Uan pado acten mentoandened caquinshenda Edias capec —quepac caondash Petedo chedo.

*Madompi dapuduedaid podobitsi icsa cuemiaid*  
(*Mad 9.14-29; Duc 9.37-43*)

<sup>14</sup> Bēchamauanquieic ictanec choequi abēd icquido utsibo yacno choquin matses dadpen aido datsidadacsho Esusēn istuidpondash. Adec Esus chosho isumbien unēsanetsēcquidēn papan Esus ismequin danēshēn sebudshun chuipondash. <sup>15</sup> —Con mado bēdamboen isquin bēdameta, Icbo. Badedbadedquieic unēsanec cuēten pichiquianec. Adecbidi unēsanec acten mentoadtsenaccosh. <sup>16</sup> Mibēd icquidon bēdamete danquin bēuidombi. “Nē bēdame,” cac bēdamenuen tanuidosh. Bēdamenquoio iccoshe. Mimbimbo bēdameta —caquien <sup>17</sup> Esusēn ambo icquidotedi chuipondash. —Ēmbi nadatiambo icquin nabanquin ismiaqui mimbi ēbi tantienquoio iquec. Adsho isash chieshtoash cuentiadquoio icchitebi. Adtiadquoio yequi padenquoio iquec nebique. Min mado beccho —cac <sup>18</sup> bēsho istanquin Esusēn podobitsi icsa chushcapondash. —Padi. Daicsa uainda —cac podobitsi icsa cuenubi madompi bēdampondash.

<sup>19</sup> Adsho isun abēd icquidon Esus chuipondash utsibo tantiamenquoio icquin. —Ēmbi: “Cuemenu,” cac ¿atotsi quiash podobitsi icsa cuenenquoio icposh? —caquien: <sup>20</sup> —Nuquin Papa bēdamboen tantiaquin mimbi bēdamboen natsenoc. Mimbi bēdiactsēc tantiatsec. Pete ēshēmpi mostasa caid pistsēcquidi siac nua yec canitsiash. Adecbidi Nuquin Papa tantiatsecboedi: “Ambi

natiapimbo ictequid nibëdec,” quequin abimbo tantiaquidquio yanshun comapenen tantiaquidbimboec mibi ictsiac. Adquidën nëid macuëshquiobi cain: “Uquë manëd,” cac manëdtsiash. Aden mimbi: “Ëbi bëdamboen nameta, Papa,” quequin Nuquin Papa chianiac aidëmbi mimbi: “Ëmbi natiapimbo ictequid nec,” caid mibi bëdamboen nametsiash. <sup>21</sup>Nëbi ëmbi cuemeboed abembi cuentiapimbo icquid nec. Nuquin Papauidi tantianuen buna mëmunquin Nuquin Papa chianeshun adquid cuemequid —quequin Esusën chuipondashi.

*Abi unëste Esusën chuioaid  
(Mad 9.30-32; Duc 9.43-45)*

<sup>22</sup> Adanec aton nidaid Cadidia yacnobi capucuenequimbi Esusën abëd icquido chuipondash. —Ëbëd icquid abentsëcshun ëbi chieshënquido ëbi bedmendac. <sup>23</sup> Bedshun ëbi unës uamendac. Aden unës uamiacsho chococaquini daëdec ushash uincuenendac —quesho tantiatanequien abëd icquido: —Unësquio icnuc chiec —quiash shubiantiadtsëcquio icpondash.

*Chuiquid dapa menetequid piucquid Petedon istuidaid*

<sup>24</sup> Aden chianec nidequi shubu dadpen icquid Capednaun caid yacno Esus chopondash. Adnubien Nuquin Papa tabadte shubu uashunaid nacnemenuquin piucquid bedquidon Petedo chuituidpac caondash. —Nuquin Papa tabadte shubu uashunaid nacnemenuen ¿ada min icbon dos dada uatsaid piucquid shocoshëmpi abentsëc menepatsiash? —cac <sup>25</sup> Petedo: —Ai, menetsiash —quepac caondash. Adanec nidec shubun puduedshobien Esusën ambia Petedo chuipondash. —¿Atotsi mimbi chie, Simon? Aton matsesën na nacnemenuen ¿tsutsi chuiquid dapabon piucquid bedshumpec? ¿Ada aton matses piucquid bedshumpec? Aido bedshunenquio icquin ¿ada ambi bedaido aton yuabo piucquid bedshumpec? —caquien <sup>26</sup> Petedo: —Ma aton yuabo bedshumpaid yoc. Aton matses piucquid bedshunenquio iquec —quesho tantiashien: —Adembidi aton Mado icsho aton shubu nacnemenuen Nuquin Papan ëbi bedshuntiapimbo iquec. <sup>27</sup> Aden tantiaquimbi: “Nëishnushe,” qeshun menenun nanuna. Chianën ansemetan. Tauaquin ansemiaidi ancanshun anisquin 4 dada uatsaid piucquid shocoshëmpi abentsëc mimbi istuidendac. Aid bedshun piucquid bedshumënquido menetanta. “Në con icbon nabëdi con na nec,” quequin menetanta —capondash Esusën. Adoac Petedon Esusën chiacpadomboen menetampac caondash.

## 18

*¿Mitsicquid chuiquid dapa mimbi icmepatsia?*

*quequin chiaid  
(Mad 9.33-37; Duc 9.46-48)*

<sup>1</sup> Adshumbic abëd icquidon Esus chuipondash. —Abitedishun Icbo icquin matses mimbi namendac. Ëbi chedo caic ¿mitsicquid mibëdtan chuiquid dapa mimbi icmepatsia? —quesho <sup>2</sup> tantiashun abi tabadacno nënantanquio bacuë tsaduntsëcshun Esusën chuipondash. <sup>3</sup> —Tantia. Mibi chuinu. Mitsanauidi tantiec Nuquin Papan namiaid mibi ictiapimbo iquec. Mitsanauidi tantiaboedi nadquid bacuën amën chiacpadomboen nacbimboen ëbi tantiaquiota. Adash ambi namiaid yanash Nuquin Papa yacno mibi puduedendac. <sup>4</sup> Aden ëmbi chiacpadomboen naquidquio icsho mibi Nuquin Papan: “Bëdamboshë iquec,” caindac. <sup>5</sup> Nadquid bacuëbëdta ëbi tantiabentsëcquid bëdamboen tantiaquidën ëbitsen bëdamboen tantiendac —quepondash Esus.

*Tantiabentsëcquido icsamete chiaid*  
(Mad 9.42-48; Duc 17.1-2)

<sup>6</sup> Adshumbic padpiden chiec: —Ëbi tantiabentsëcquid caic: “Nuquibi Nuquin Papan chiaid niac-niacquieic icsaquionona,” quequid Nuquin Papan cuidendac. Icsamiabi yec unësacsho isun: “Bëdambo iquec,” catsiambi. “Cuënote yuëmboshë icquid tëdectanshun acte nënepatecnëdan,” caimbi icsamiante bunquidquio. <sup>7</sup> Aden ëbi tantiatsëcquid utsibon icsamendac. Adec icsamianquid Nuquin Papan cuidendac.

<sup>8</sup> Aden Nuquin Papan cuidte chuisho tantiequi icsainda. Mëdanten naic mibi icsaic. Mëteshuniac bedtiapimbo yachimboec icsainquio yec ënëdta. Taën capuec mibi icsaic. Tateshuniac caputiapimbo yachimboec icsainquio yec ënëdta. Ënëdenquio icsho Nuquin Papan mibi cuidendac. <sup>9</sup> Adecbidi ëshën isec mibi icsate bunquieic. Ëshë chicshuniacbimboec icsainquio yec ënëdacsho: “Bëdambo iquec,” catsiambi. Ënëdenquio icsho Nuquin Papan chian anëdënquiacno nësecaindac —quequin Esusën chuipondash.

*Matses ëbi tantiamete Nuquin Papa bunaid*  
(Duc 15.3-7)

<sup>10</sup> Adashic padpidec: —Nadquid bacuëmpin ëbi tantiatsëcsho isun: “¿Adtsëcquidëmpinquiobida bëdamboen tantiapec?” cainda. Nuquin Papan abi yacnoshon uaid mayan bëda aid bacuëbo dayun uaquid icquin Nuquin Papa yacno puduedshun mimbi mamënshumboed Nuquin Papa chuinushe. Adtsëcquidëmpi mamënshunenda. Ëbi tantiabentsëcquido con Pan tantiaquieque. <sup>11</sup> Ëmbitsen aido tantiemi. “Bënudaid istuidacbimboen ëbi tantienquio icquidobi ëbi tantiaquido icmenu,” quiash matsesondabi —quepondash Esus.

<sup>12</sup> Adashic padpidec: —¿Mitsipadquio nuquin matses icpec? Nëish yua obeca dadpen 100ted dayun uaquidën aton yua tambanac abentsëc nibëdsho istanquin utsitedi nianshun aid abentsëc nibënbenequin istuidquid. <sup>13</sup> Aden istuidash comapenec cuishonquequid: “Con yua nibëdantsenquiac,” quiash. Aton yua utsi yacno bëash abi icboctedi icsho isash bëdambo icquid. Adecbidi matsesën ëbi tantiabensho isash Nuquin Papabëd cuishonquebi bënudaid istuidacbimboec. <sup>14</sup> Icsaido cuidacno matses nidmete Nuquin Papa bunenquio iquec. Matses bëdamboen isquin abëd tabadmete Nuquin Papa bunquieic —quepondash Esus.

*Chieshënquidobëdi onquete chiaid*  
(Duc 17.3)

<sup>15</sup> Adashic padpidec: —¿Ada ëbi tantiaquid utsin mibi icsa uaosh? “Ai, icsa uaoshi. Chieshëmiantiadquio icchitosh,” qeshun nadoac bëdambo ictsiash. Aid abentsëqui chuiquin aidbëd bëdamboec onquequin: “Ëbi icsa uaquin Nuquin Papan chiaid mimbi niac-niaccoc. Adec icsainquio yec ënëdta,” mimbi cac: “Ai, adebi,” quiash mibëdi bëdamboec tabadtsiash Nuquin Papa tantiesabimboec icuidboedi. <sup>16</sup> Mimbi: “Icsainquio yec ënëdta,” caqui: “Padi. Adequi icsaibi,” qesho tantiaashun ëbi tantiaquid utsi beduanshun aidbëdtan chuitanta. “Nuquin Papan chiaid niac-niacsho isun daëdshun chiaid abimbo chiaid nec,” quequin chiaid tantiaquin adota. <sup>17</sup> Mimbi buanaidëntsen: “Adec icsainda,” caqui: “Adequi icsaibi,” qesho tantiatanec choashun mibëdtan ëbi tantieic iccuededquido chuiquido chuituidta. “Mimbitsen chuitanta,” cac aidontsen chiaqui tantienquio icsho isun: “Nuquin Papan chiaid niac-niacquid yec Esus tantiesabimboecquid nec,” qeshun

ëbi tantiaquido cuëdënacno chomenda. <sup>18</sup> Aden mimbi: “Esus tantiesabimboecquid neque. Cuëdënacno chomenquio ictiad,” casho Nuquin Papan: “Bëdamboen naic,” mibi catsiash. Adembidi mimbi: “Adec icsaboedi icsainquio yec ënëdsho isun cuëdënacno chomeoanuna,” qeshun chomeoasho Nuquin Papan: “Bëdamboen naic,” catsiash.

<sup>19</sup> Padpiden chuinu. Tantia. Mimbi: “Nuquin Papa chuinuna,” cac: “Ai, adonona,” qesho tantiashun aidbëdtan mimbi Nuquin Papa chianiac mimbi chiacpadomboen Nuquin Papan natsiash. <sup>20</sup> Ëbi tantiec daëd tabadnuc aidbëd con Mayan yec ëbëd yacbimboec tantiadendac. Adec tabadsho isun: “Con Mado tantiaquido nec,” qeshun aidon chianiaid Nuquin Papan tantiendac.

*Yuan bëdamboen istiapimbo yaid*

<sup>21</sup> Adec: —Icsa uanec chieshtomiantiadquio iquec —Esus qesho tantiashumbien Petedon Esus chuipondash. —¿Icsa uanec chieshtomianquid tedentsimbi chieshenquio icquin bëdamboen ispe? Chieshënquin padpiden icsa uac ¿padpidendambi bëdamboen isoape? ¿Mëdante utsiuc daëd tauadoquin sietetedembi nashun padpiden bëdamboen isenquio icquin ënacta bëdambo icpatsiash? —caquien <sup>22</sup> Esusën: —“Mëdante utsiuc daëd tauadoec sietetedi” quequin daëdpactsëcquio mimbi chuipec. <sup>70</sup> por <sup>7</sup> caid ¿tedtsi icpec? Aidteden <sup>490</sup>tedembi ënenquio icquin bëdamboen isoadoniac bëdambo ictsiash —quepondash Esus.

<sup>23</sup> Adashic abi onquec: —Nuquin Papan chiacpadomboen matses bëdamboen iste mibi chuinu. Tantia. Tsusion yuabo dadpen icpac caondash. “Ma bënu,” quequin ambi meniactedi piucquid bednuen aton yuabo aton shubuno chomepac caondash. <sup>24</sup> Abia chomiaidën piucquid dadpenquioshë bedshun aton icbo meniambo icpac caondash. <sup>25</sup> Adsho icbon: “Mimbi bedactedi beccho,” cac: “Nibëdec,” quepac caondash yua. Adshobien icbon: “Aidtedi piucquid bednuen matses utsibo mibi yuamenu. Min chido min bacuëbobëdtabi cuësh-cuëshëdmeshun aidtedi piucquid bednu. Mibi icsambo iqueque,” cac <sup>26</sup> yua abi yuaquid ismequin danëshën sebudash: “Padi. Ëbi yuamenuen cuësh-cuëshëdmenda. Chiata. Yuecshun aidtedi bedshun mibi menenun nanu,” capac caondash. <sup>27</sup> Adoaquien icbon bëdamboen isquin: “Padi. Ëbi menenda. Mibi utsibo yuamenquio iquembique. Dacuëdenda. Nidec nid,” quequin icbon aton yua bëdamboen nidmepac caondash.

<sup>28</sup> Adoac nidquimbien aid yuan icbon bëdamboen isboedën ambi: “Ma bënu,” quequin piucquid daëdpactsëc meniaid yua utsi istuidpac caondash. Istuidshumbic bedtanquin tëtëdinquin: “Mimbi bedactedi piucquid beccho. Unës uachitomane,” caquien <sup>29</sup> aidtsen ambi piucquid bedshunonaid ismenuen danëshën sebudtsec: “Chiata. Ëbi unës uainda. Yuecshun bedshun mibi menenun nanu. Chiata,” quepac caondash yua utsi. <sup>30</sup> Adsho tantiashun icbon bëdamboen isboedëmbi chieshënquin: “Padi. Mibi cuidmembi,” qeshun quënën nauedmepac caondash. “Piucquid aidtedi abi menianenquio yapadequi ma quënënuësh mëyadbudchitono,” qeshun nauedmiac caondash.

<sup>31</sup> Aden chieshënquin quënën nauedmiacsho isumbien yua utsibon: “Chieshanquiec,” qeshun icbo chuituidpac caondash. “Mimbi bëdamboen isboedëmbi min yua utsi quënën nauedmiac: ‘Piucquid menianenquio iquec,’ qeshun,” quequin icbo chuipac caondash. <sup>32</sup> Adsho tantiashun icbon ambi cuidenquio icquin bëdamboen isboed chomeshun chushcapac caondash. “Icsambo icquidquio mibi nec. ‘Chiata. Mibi menenun nanu,’ mibi qesho: ‘Padi. Ëbi menenda,’ quequin mibi bëdamboen isombi. <sup>33</sup> ¿Ëmbi

mibi adobocpadomboen utsi bēdamboen istiapimboda icco? ‘Ma bēnu,’ queshun mimbi meniactedi bēabi icsho bēdamboen isec mibitsen bēdambo ictsenac. Mibi yacpadec nēishun mibi cuidembi,” quepac caondash icbo. <sup>34</sup> Adshun quēnēn nauedmepac caondash. “Ambi bedactedi piucquid dadpenquo meniash ma puduempānu,” queshun quēnēn nauedmiac caondash. <sup>35</sup> Aden matses yuan icbon nacpadomboen Nuquin Papan naindac. Utsibon chieshēnaqui chieshēnansho Nuquin Papan mibi bēdamboen istiapimbo iqueque. Chieshēnanenda. Mibi chieshēnquidobi bēdamboen ista —quepondash Esus.

## 19

### *Chidobēd cuēshēdte Esusēn chiaid (Mad 10.1-12; Duc 16.18)*

<sup>1</sup> Adanec nidaid cuēshē Cadidia caid yacnuēsh puduanec nidec nidaid cuēshē utsi Udeya caidēn nidquin acte Odan caid potebidanec Esus nidpondash. <sup>2</sup> Adec nidshobien matses dadpenshun tsibanampondash. Abi tsibanansho isun nidtuidshun daicsaidtedi Esusēn bēdamepondash.

<sup>3</sup> Adnubien tsusedpabon chiampid namequido padiseyobon chieshēnquin: —Nuquin Papan chiaid niacmenu —quequin Esus chuituidpondash. —¿Atotsi mimbi chuipe? Dada uashun aton chidobi nidmete ¿mitsipaden mimbi chuipe? En chui. Tiantianu —capondash.

<sup>4</sup> Adoquien Esus: —¿Nuquin Papan chiaid isamboda ictio? “Nuquin Papan dadaba uashun aton chido uapampic,” quequin dada uaid ma mimbi ispaboc. <sup>5</sup> Adembidi: “Dadan canite chido uaid icsho dadan aton chido bedquid. Amē chedobēd icboedi aton chido bedash aid nianenquo yec aidbēd tantiananquiec dada aton chidobēd abentsēc yachimboec tabadquid,” quequin dada uaid ma mimbi ispaboc. <sup>6</sup> Aden Nuquin Papan tantiacpadomboen aton chido nianenquo yec aidbēdi tantiananquiec abentsēc yachimboec tabadac bēdambo ictsiash. Padnuen aton chido nianec aidbēdi cuēshēdquin Nuquin Papan chiaid niactsiash. Adecbidi chido aton bēnē nianec icsaquid —Esus quesho <sup>7</sup> tantiashumbien abi chieshēnquidon: —¿Abimboda mimbi capadi? Nuquin Papan chiaid dada uaquin ¿atotsieshun Moisesēn naden chuipampic? “Aton chido bunenquo yanshun dadan naden dada uashun menequid. ‘Mibi intiapimbo yanobi,’ quequin dada uashun aton chidobi menequin nidmequid,” quequin Moisesēn dada uapampid ma icpayoc —quequin chuipondash Esus chieshēnquidon.

<sup>8</sup> Adsho tantiashun Esusēn chuipondash. —Ai, Nuquin Papan chiapadec aton chidobēd bēdamboec tabadtiapimbo icsho isun Nuquin Papan Moises aden dada uamepampic. Tauamboen matses uaquin Nuquin Papan aden chiambo icpampic. <sup>9</sup> Tantia. Mibi chuinu. Aton chidobēd cuēshēdshun chido utsi bedquin Nuquin Papan chiaid niactsiash. Padnuen aton chidon bēnēpenquo chudmesho istuidash aidbēd cuēshēdquin Nuquin Papan chiaid niaquenquo ictsiash —quepondash Esus.

<sup>10</sup> Adnubien abēd icquidon: —Adotiapimbo icte mimbi chuipec. Aton chidobēd cuēshēdenquo icte mimbi chuisho tantiashun: “Aton chido bedesambo dada bēdambo ictsiash,” caimbi —quepondash abēd icquido. <sup>11</sup> Adsho tantiash Esus: —Ai, utsi-utsiec pabiate shēcūē nibēdacbimboen ěmbi chiaid tantiatiapimbo iquec. Utsiboen aton chido bedash Nuquin Papan chiapadec bēdamboec tabadquid nec. <sup>12</sup> Utsibic mimbi chiapadquid chido bedesa iquec. Nēidtedi chido bedesa iquec. Nēidic aton padibi impadishtsaid. Nēidic matsesēn inicsa uaid. Nēidic: “Nuquin Papan yuambo icquin aidēn



chiacpadomboenuidi naquin chido bedtiapimbo iquebi,” queshun chido bedesa. Adquidtedi chido bedesa nec. Ĕmbi chuiboed tantiashun Ĕmbi chiacpadomboen nac bĕdambo ictsiash —quepondash Esus.

*Esusĕn bacuĕbo chiaid*  
(*Mad 10.13-16; Duc 18.15-17*)

<sup>13</sup> Adnubien Esus ismenuen bacuĕbo bĕ-bĕpondash. —Mamishquin ma Nuquin Papa Esusĕn chuinu —quequin bĕ-bĕsho isumbimbi: —Padi. Bĕenda —cauidpondac. <sup>14</sup> Adshobini Esusĕn: —Chĕn. Ma bĕnu. Cuemenda. Bacuĕbimboecquid Nuquin Papa yacno puduedtequid nec. Amĕn chuisho tantiash bacuĕ badedi: “Abimbo caic,” quiacbimboen ĕbi tantiaquid Nuquin Papa yacno puduedtequid nec. Bacuĕbo bĕdambo iqueque. Beccho —cac bĕ-bĕpondash. <sup>15</sup> Adshobien mamishbanquin Nuquin Papa chuipondash. Adobidanec nidondash Esus.

*Cania aton na dadpenquio dayun uaquid Esusbĕd onquiaid*  
(*Mad 10.17-31; Duc 18.18-30*)

<sup>16</sup> Adnubien dada caniampinquo Esus chuituidpondash. —Mibi bĕdambo iquec. Bĕdamboen chuiquidquo mibi neque. Ĕbi chui. Padpidec unĕstiapimbo icquid icmenun bĕdambo icquid Nuquin Papan abi yacno puduedmetsiash. Ĥatotsi nasho Nuquin Papan ĕbi bĕdambo capatsiash? —caquien <sup>17</sup> Esusĕn: —Ĥmitsipadquid bĕdambo icquid cai? Nuquin Papauidtsĕqui bĕdambo icquid nec. Aidbĕd tabadnuen ambi Moises dada uamiampictedi nata —capondash. <sup>18</sup> Adoaquien cania: —Nuquin Papan chiaid Ĥmitsipadquid cai? —quesho tantiashumbien: —Naden chiaid caimbi. “Cuesunenda. Min chidopenquo chudenda. Min bĕnĕpenquo chudmenda. Ampenda. Muainda. <sup>19</sup> Titabĕdta papa chieshĕnenquo icquin bĕdamboen tantiata. Adembidi mibibi datantiadacimboen matses utsi abitedi tantiaquiota,” quequin chiaid caimbi —capondash Esusĕn. <sup>20</sup> Adsho tantiash cania: —Aidtedi niaquenquo icquin nabanquidquo nebi. Bacuĕctsĕc icquimbi tauaondambi. “Nuquin Papabĕd tabadnuen Ĥatotsimbi utsi nape?” caimbi —quepondash.

<sup>21</sup> Adsho tantiashumbien Esusĕn: —Nuquin Papan chiaid niaquesambo ictiadquo icquin mimbi dayun uaidtedi uesquin menequin piucquid bedta. Piucquid bedshun piucquid nibĕdquido min piucquid uesquin menebanta. Adsho abĕd tabadmenun Nuquin Papan mibi bĕdamboen istsiashe. Adota. Adotanequic ĕbĕd iquec cho —caquien <sup>22</sup> cania: —Con na dadpenquo icsho uesquin menetiapimbo iquebi —quiash shubiantiadtsĕcquo ictanec nidpondash Esusĕn chiacpadomboen natiapimbo yec.

<sup>23</sup> Adsho isun Esusĕn abĕd icquido chuipondash. —Chuinu. Tantia. Aton na dadpen dayun uaquid aton na tantiequi: “Nuquin Papa yacno tabadte bunebi,” queboedĕmbi ĕbi tantiatiapimbo iquec. Aton nauidtsĕqui tantiec. <sup>24</sup> ĤAda nĕishamĕn pinchuc chichte ancumpadic? Padenquo. Adecbidi aton na dadpenquo dayun uaquidĕn aton nauidtsĕqui tantiaquin ĕmbi chiacpadomboen natiapimbo yec Nuquin Papa yacno tabadtiapimbo iquendac —quequin Esusĕn chuipondash.

<sup>25</sup> Adec: —ĤAda nĕishamĕn pinchuc chichte ancumpadic? —quesho tantiashien abĕd icquido nadpondash. —ĤTsudain Nuquin Papa yacno puduedtequid icchitotsiash? Nibĕdchitequien iquec —quesho tantiashumbien <sup>26</sup> Esusĕn abĕd icquido bĕisquin naden chuipondash. —Matses namiantiapimbo icnuc Nuquin Papain namianquidquo nec. Ambi natiapimbo ictequid nibĕdec —quepondash.

<sup>27</sup> Adsho tantiashun Petedon: —Mimbi: “Nuquibi icnu. Cho,” cac con na abitedi nianec mibĕd icnuec chopondabi. ĤMitsimbo tabadtequidini

nepe? ¿Atotsimbi nape? —caquien <sup>28</sup> Esusën: —Tantia. Mibi chuinu. Nuquin Papan ambi uaid abitedi chuca uabocnoëshquio ëbëdtan chuiquid mibitedi iquendac ëmbi abitedi namiacnuëshquio. Èbëd icquido icsho isun Nuquin Papan mibi chuiquid icmendac. Nuquin tsusedpa Acobon mado ¿tedtsi icpampic? Aidedi 12tedshun tsyuecquidon shubu 12tedi shubunshubunquiech chuiquid dapabo mibitedi iquendac. <sup>29</sup> Utsibontsen ëbi tantien-dac. Aton shubu nianquinc abëdta tishaido nianquinc aton tita nianquinc aton papa nianquinc aton bacuëbo nianquinc aton tied nianquinc caïn ëbi tantiaquin ëmbi chiacpadomboen naquid iquendac. Adsho nëbi unësabi icsho ambi nianaidobëd tabadacbimboecnuc bëdambo icmendambi. Adoshombic unësacsho Nuquin Papa yacno tabadmendambi padpidec unësenquio icnuc. <sup>30</sup> Nidaidënuësh chuiquid dapambo icboedi Nuquin Papa yacnuësh utsi-utsiec chuiquidpenquio iquendac. Utsibic nëuëshquio chuiquidpenquio icboedi Nuquin Papa yacnoshon: “Bëdambo icquid nec,” quequin chuiquid dapa icmendac —quepondash Esus.

## 20

### *Chonoadquido chiaid*

<sup>1</sup> Adshumbic abëd icquido Esusën ompoacbimboen chuipondash. — Tantia. Èbi tantiaquido Nuquin Papa yacnoshon namete mibi chuinu. Badiadnubi tied icbon piucquid menequin aton tied neshcamenuen matses istuidpac caondash. <sup>2</sup> Istuidshumbic: “Badiadnubi tauashun ushë budtsambi mimbi ënacsho nëidtedi piucquid mibi menenu. Naic cho,” cac chonoadec cho-chopac caondash. <sup>3</sup> Ushë abucquio yanubi tied icbon pete meniacno nidshun utsibo nainquio yec samëdsho istuidpac caondash. <sup>4</sup> Adoshombic aidotsen chuiquin: “Con tied neshcaic cho. Mibi bëdamboen cuidquin menenu,” cac <sup>5</sup> tied neshcaic nidpac caondash. Ushë cuembo icnubi tied icbon padpidec pete meniacno nidoashun utsitsen istuidshun adembidi aton tied neshcamepac caondash. Ushë budambic padpiden utsitsen. <sup>6</sup> Inchëshbudtsëqui nidoaquin utsibo nainquio yec samëdsho istuidoashun: “¿Atotsi quiash samëduidequi ique?” cac <sup>7</sup> samëdquido: “Chonoa uanquid nibëdosh,” quesho tantiashun tied icbon: “Mimbitsen con tied neshcaic cho. Mibi menenu,” cac tied neshcaic nidaneoapac caondash inchëshbudtsëqui neshcaquin tauaic.

<sup>8</sup> Inchështsëcnubi tied icbon ambi chonoa uaido isquid chuipac caondash. “Chonoadquido piucquid meneban. Tsyuec choboedba menequin tauatanquin ushë budambi choboedotsen meneta. Adoshombic ushë cuembo icnuc choboedotsen. Adoshombic ushë abuctoan choboedotsen. Adoshombic badiadnubi abia choboedo ënquimbi meneta,” cac menequin tauapac caondash. <sup>9</sup> Inchëshbudtsëqui chonoadec choboedoba menequin badiadnuc chonoadec taëboed tied icbon: “Menenu,” cactedquio piucquid menepac caondash.

<sup>10</sup> Adosho isashien badiadnubi choboedo: “Aido aden meneshun nuqui chonoadquioboed yuapambo nuqui menec,” queshobi aidedtsëcbidi piucquid menepac caondash. <sup>11</sup> Aidedtsëcbidi meniaquien tied icbo chushcapac caondash. <sup>12</sup> “Tsyuec chonoadboed meniactedtsëcbidi menioishi. Icsambo iquec. Inchëshbudtsëqui chotsash daëdpactsëc chonoadtsëcquid meniactedtsëc yuec chonoadquid piucquid meniac icsambo iquec. Chun mëyadec yuecquio chonoadobi. Aidedtsëc menianec mibi chieshanquiech iquec. Èbi dadpen meniac bëdambo ictsiash,” quequin chushcapac caondash.

<sup>13</sup> Adoaquien tied icbon: “¿Chieshanquiectabi ique? Èmbi: ‘Nëidted piucquid menenu. Naic cho,’ cac ma mibi: ‘Ai,’ quepaboc. Mambi mibi aidedquid

menepaboc. <sup>14</sup> Mimbi bedboed buanec nid. Ëbi bunacpaden tsyuec choash chonoadquid mibi meniactedquiobi meniombi. ¿Icsamboda iquec? <sup>15</sup> ¿Icbon ambi tantiacpadomboen aton na dadpen meniac ada aid icsambo icpec? ¿Utsibotsen menesho isunda mimbi ëbi nëishëmpe? Aden nëishënac ¿ada bëdambo iquec?” quequin tied icbon chuipac caondash —quequin ompoacbimboen chuipondash Esusën. <sup>16</sup> Adashic: —Adembidi abi yacnoshon ambi tantiacpadomboen Nuquin Papan naindac. Utsi-utsien chuiquid dapa icmequin utsi-utsien padenquo icmendac —quequin chuipondash Esusën.

*Abi unëste Esusën padpiden chuioaid  
(Mad 10.32-34; Duc 18.31-34)*

<sup>17</sup> Adanec: —Edusaden yacno nidnu. Nid —quianec Esus nidpondash. Adec nidquimbi utsibo tantiamenquo icquin abëd icquido 12tedi icquid chuinen uanotantsëcquin buampondashi. <sup>18</sup> Buanshun chuipondashi naden: —Edusaden yacno nidacsho Nuquin Papan matsesmiaid icsho ëbi chieshënquido ëbi bedmendac. Nëish yua abided unës uaquido chuiquid dapabobëdtan Moisesën dada uampid chuibanquidon ëbi bedshun: “Ma unës uamenu,” qeshun <sup>19</sup> matses utsibo isadaidpembo ëbi bedmendac. Aden bedmiac matses utsibon mamënshunquin ëbi cueshcaten comapenen cueshcaindac. Adshumbic ëbi unës uanuen cuesten dectanendac. Aden unës uaqüi daëdec ushash uincuenendabi —quequin Esusën abi unës uate padpiden chuioapondashi.

*Uanën titan chiaid  
(Mad 10.35-45)*

<sup>20</sup> Adnubien Sebedeyon chido Uanën titan Esus chuituidpondash. Uambëdta Acobo aton mado daëdi bëshun ismequin danëshën sebudtanquin chuipondash. —Ëmbi chiacpadomboen ëbi nashunta, Icho —caquien: <sup>21</sup> —¿Atotsi cai? —capondash Esusën. Adoaquien: —Nëid con mado daëdi nec. Abitedishun icbo icquin mibëdtan chuiquid dapa con mado abi daëdi icmeta. Chuiquid dapa icmequin min dayun tsadmeta. Opioc utsi tsadunquin abiuc utsi tsadunta —caquien Esusën: <sup>22</sup> —Ëmbi naid tantienquo icquin mimbi chuipac —quequin ani chuishumbic Uanbëdta Acobo Esusën chuipondash. —¿Ada ëbi mëyadacpadquiecbidi mëyadtsia? ¿Ada chieshtoenquo icpatsia? —caquien Uan: —Ai, chieshtoenquo ictsiabi. Mibëd mëyadtsiabi —quepondash.

<sup>23</sup> Adsho tantiashien: —Ai, ëbi tantiaquid yec mibi mëyadendac. Padnuembi ëbëdtan chuiquid dapa icmequin mibi ëbi datsadmetiapimbo iquec. Nuquin Papambien ambi tantiacpadomboen ëbëdtan chuiquid dapa icmendac —quequin Esusën chuipondash.

<sup>24</sup> Adnubimbi: —Chuiquid dapa ëbi icme —Esus casho tantiashun Uan chedo nëishëmpondac. <sup>25</sup> Adsho Esusën ëbitedi chuipondash. —¿Mitsipadquid matses utsibo isadaidpembo chuiquid dapa icpec? Abi chuiquid dapan baded-badedquien ancabudac dacuëdquin aton yuabon badedi naic. <sup>26</sup> Ëbi tantiaquido icquin mimbi adoenuquo iquendac. “Bëdambo mibi iquec,” Nuquin Papa cametiadquo icquin utsibo tantiaquin mimbi utsibo nashuntsiac. <sup>27</sup> Bëdambo icquid ictiadquo icquin yuan aton icbo nashunacimboen mimbi utsibo nashuntsiac. <sup>28</sup> Adembidi Nuquin Papan matsesmiaid icquin matses nashunquid nebi. Ancainquo icquin matses tantiaquin Nuquin Papa icsaquidobi cuidmenquo icnuec ëbided cuidadec unësendabi —quequin Esusën abëd icquido chuipondash.

*Bëshuaid daëd Esusën bëdamiaid  
(Mad 10.46-52; Duc 18.35-43)*

<sup>29</sup> Adashic yuecquio ictanec shubu dadpen icquid Edico caid yacno tabadash auëshquiobi Esus nidpondash. Adsho isanec nidquin matses dadpenshun Esus tsibanampondash. <sup>30</sup> Adnubien aid podqued cuëman bëshuaid dada daëd tsadpondash. —Esus cuenec —quesho tantiashien aid daëdi comapenec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —quepondash Esus caic.

<sup>31</sup> Adsho tantiashun matses dadpenshun chushcapondash. —Padi. Chën. Adec cuëdec chieshanquiec mibi iqueque —caquien abi niacbidanec buëdanquiec cuëdpondash. —Tsusedpa Dabidën tsyuecquid Nuquin Papan namiaidquio icquin ëbi bëdamboen ista, Icbo —queoapondash.

<sup>32</sup> Adoaquien Esusën nidtuidshun ëcbedpondash. —¿Atotsi chuinuec ne? —caquien: <sup>33</sup> —Isbente bunquiebi, Icbo —quepondash. <sup>34</sup> Adsho tantiash: —Unësquio iquec —quetanquin Esusën bëshuaid daëdi bëmishpondash. Adoac abi daëdi bëdampondash. Bëdانشun aidëntsen Esus tsibanampondash bëshuacboedëmbi.

*Edusaden yacnoshon chuiquid dapabimboecnuc Esus bëdamboen isaid*

## 21

*Edusaden yacnoshon chuiquid dapabimboecnuc Esus bëdamboen isaid  
(Mad 11.1-11; Duc 19.28-40; Uan 12.12-19)*

<sup>1</sup> Adanec nidequi shubu dadpen icquid Edusaden caid anoentsëqui macuësh dapa Odibos caid poctse shubu daëdpactsëcquid Bedpaque caid yacno Esus nidpondash. Adshumbic anoentsëqui choshon abëd icquido daëd chuipondash. <sup>2</sup>—Nëid podquedën nidquin shubu daëdpactsëc yacno nidshun cabayobitsecquid aton bacuë caniatsebëdta mimbi badedquio istuidendac. Istuidshun tënëshaid tēdiadsho tēchicta. <sup>3</sup> Mimbi tēchicsho isquidën: —¿Atotsi acnun nai? —cac: —Nuquin Icbo: “ ‘Bedtan,’ quiosh,” mimbi cac: “Ai, buantan,” quendac —quequin Esusën chuipondash. <sup>4</sup> Ambi Esusën nate chiaid Nuquin Papan con tsusedpa dada uamiampicpadomboen nanuen Esusën adopondash. Naden dada uapampic.

<sup>5</sup> “Shubu dadpen icquid Sion caidën tabadquido chui. Edusaden cain Sion capec.

‘Is. Mibi chuiquid dapa cabayobitsecquidën bacuë caniatsec catsadtoash choeque. Ancanenquio yec bëdamboshë icquidquio neque. Is,’ quequin chui,”

quequin dada uapampic. <sup>6</sup> Aden dada uampicpadomboen ambi: —Bedtan —caidon bedtampondash.

<sup>7</sup> Adotanquin cabayobitsecquid anibëdta caniatsec bëacshobimbi con dashcute bëntse dasiuidboed chictanquin casanondac. Aden ëmbi cabayobitsecquid casansho isash caniatsequën Esus catsadtopondash.

<sup>8</sup> Adanec nidsho istanquin matses dadpenshun aton dashcute abi dasiuidaid bëntse icquid chictanquin Esus nidte podqued ansambampondash. Adnubien utsibon niste podobiecquid tetanequin podqued ansambampondash: —Chuiquid dapa Esus nec —queshun. <sup>9</sup> Matses dadpen bëyuc nidnubi aidtedbidi tsyuec nidpondash. Abitedi cuëdënidpondash.

“Adeduya. Nuquin tsusedpa Dabidën tsyuecquid Nuquin Papan namiaid yec mibi bëdamboshë iquec.

Nuquin Papan chomiaid yec mibi bëdamboshë iquec.

Mibi chomequid Nuquin Papatsen bëdamboshë iquec. Adeduya,”

quec cuëdëncuededpondash.

<sup>10</sup> Adec Edusaden yacno matses dadpenquo cuëdënidec nidsho isashien Edusaden yacnoquido: —¿Tsutsi tantiec cuëdëncuededpec? —quepondash.

<sup>11</sup> Adsho tantiashun Esusbëd nidquido: —Esusquo tantiec nec. Nuquin nidaid cuëshë Cadidia caidën shubu dadpen icquid Nasaded caid yacnuësh caniondaid Nuquin Papan chiaidquo chuiquid Esus tantiec nec —quepondash.

*Esusën chushcaquin cuemiaid*  
(*Mad 11.15-19; Duc 19.45-48; Uan 2.13-22*)

<sup>12</sup> Edusaden yacno choash Nuquin Papa tabadte shubu uashunaid umanuc daquënë uabenaidën Esus puduedpondash nuntanquo puduedenquo yec. Adshun isquien piucquid bednuequido dadpen tabadpec. Utsi-utsiec nidaid utsin icquido piucquid dadpen bedshunquimbi muaquin piucquid utsi daëdpactsëc menequid icnubi utsi-utsiec: —Nëid bedquidën: “Ma Nuquin Papan ëbi bëdamboen isnu,” queshun pichicametsiash —quequin aton nëish yua menequin piucquid dadpenquo bedquid nepondash. Adsho istanquin Esusën cuemepondash. Ambi tabëcaid bidiacbanquin aton yua dëbimbitsecquido cuemequin piucquid bednuequidotedi cuemepondash naden chuiquin. <sup>13</sup> —¿Adenda mimbi Nuquin Papan chiaid bëdamboen nape? Naden Nuquin Papan chiaid dada uapampic.

“Ëbi tabadte shubu uashunaid ëbi chianete shububidi nec,” quequin Nuquin Papan chiacpadomboen aton shubun puduedshun aid chianetiadquidi mimbi adoenuo iquec. Mitsana bedteuidi bunec ampec tabadte shubu mimbi icmiaye. Cuen —quequin cuemepondash.

<sup>14</sup> Adnubien Nuquin Papa tabadte shubu uashunaid yacno bëshuaid yec daicsaid yec quenuc bë-bëpondash. Aden bë-bëshobien Esusën bëdamepondash.

<sup>15</sup> Adsho isashien Esus chieshënuquido nëishpondash. Adec nëish yua abided unës uaquido chuiquid dapabobëd Moisesën dada uampid chuibanquido nëishpondash. Adec comapenen tantiaquin Esusën nabansho isash nëishboedi bacuëbotsen: —Nuquin tsusedpa Dabidën tsyuecquid Nuquin Papan nami-aid yec mibi bëdamboshë iquec —quec Esus caic cuëdëncuededsho tantiash nëishquiopondash. <sup>16</sup> Adshumbic: —Icsambo iquec —queshun Esus chuitu-idec: —¿Ada bacuëbo cuëdënsho tantio? —caquien: —Ai, tantiombi. ¿Nuquin Papan chiaid isabida ictio? Naden bacuëbo cuëdënte chuipampic.

“Nuquin Papan oncamiac bacuëmpin aton bacuë utsibëdtan:

‘Nuquin Papa bëdambo iquec,’ caindac.”

quequin chuipampic —quepondash Esus. <sup>17</sup> Adanec nidec shubu dadpen icquid Betania yacno nidash ushtuidpondash.

*Esusën cuëte unës uaid*  
(*Mad 11.12-14, 20-26*)

<sup>18</sup> Badiadnubi ënden aubidi nidoaic Edusaden yacnobidi nidoapondash. Piabi nidec bundoshon <sup>19</sup> podqued cuëman nidquid cuëtempic icueda caid istuidash: —¿Ada bacuëaye? Chenun isbono —quepondash Esus. Adshun isquien bacuë nibëdec. Podouidquo icpec. Adsho isumbien Esusën: —Adequi bacuësambo yec unësta —capondash. Adoac badedquo unëspondash.

<sup>20</sup> Adosho isun abëd icquidon: —¿Atotsi quiash badedquo unësposh? —caquien <sup>21</sup> Esusën: —Tantia. Mibi chuinu. Adembidi mimbi natsiac. “Nuquin Papan ambi chiaid nainquien icchitec,” quenquo icquin: “Nuquin Papan ambi chiacpadomboen naquidquo nec,” queshun mimbi Nuquin Papa chianesho aidëmbi mimbi: “Natiapimbo iquec,” caidi mibi nametsiash. Aden tantiaquin mimbi nëid macuësh cain: “Mananuc tabadboedi adquiecbidi

acte nantan tabadoata,” mimbi cac nēid macuēsh acte nantan tabadoatsiash.  
<sup>22</sup> “Ambi chiacpadomboen naquidquo Nuquin Papa nec,” qeshun mimbi aid chianiac mimbi chiaid Nuquin Papan mibi nashuntsiash —quequin Esusēn abēd icquido chuipondash.

*¿Tsuntsin: Naic nid, cac nai? quequin Esus chuimiaid  
 (Mad 11.27-33; Duc 20.1-8)*

<sup>23</sup> Adcuidanec Edusaden yacno padpidec nidshun Nuquin Papa tabadte shubu uashunaid daquēnē uaidēn puduedshun Esusēn Nuquin Papan chiaid chuipondash. Adsho tantiashun con matses tsusiobon Esus chieshēnquidon chuituidpondash. —¿Tsuntsin: “Naic nid,” cac nai? En chui. Tiantianu —caquien <sup>24</sup> Esusēn: —En mimbia chui. Ēmbia tiantianu. Mimbi chuisho tantiashun ēbi namequidtsen chuinu. <sup>25</sup> ¿Tsuntsin namiac Uan padon acten mentopadenec? ¿Ambembida napadenec? —capondash Esusēn. Adoaquien badedquo chienquo yec uanotantsec tabadec onquecuededpondash Esus chieshēnquido. —¿Atotsi nuqui chuipeba? “Nuquin Papan namiaidquo Uan pado nepadenec,” cac Esusēn: “¿Atotsieshun aidēn chiacpadomboen nainquo ique?” canushe. Aden chienquien ictiad. <sup>26</sup> Nuqui: “Ambembi napondash,” qesho tantiashun nēmbō icquidon nēishēnushe: “Nuquin Papan namiaid Uan pado niondash,” qeshun. Aden chienquien ictiad —quepac caondash Esus chieshēnquido. Isadaidbo tsusiobobēdi nēish abided unēs uaquido chuiquid dapabo adpac caondash. <sup>27</sup> Adashien Esus padpiden chuioaic: —Tsauidi. ¿Tsundan chiaquien nachitondash? —qeshobien: —Mimbi chienquo icscho tantiashun ēmbitsen ēbi namequid chienquo iquembi —capondash Esusēn abi chieshēnquido cuidquin chuiquin.

*Mado daēdshun nacbimboecquido chiaid*

<sup>28</sup> Adshumbic Esusēn padpiden chuipondash. —Tantia. Mibi chuinu. Ēmbi chiaid tantiashun ¿mitsicquid: “Bēdambo iquec,” catsia? Dada aton mado daēdpambo icquid icpac caondash. Abentsēc chuiquin: “Neshcaic nid, mado,” cac: <sup>29</sup> “Padi,” quec chieshuidboedi yuec-yuecpectsēctanec: “Tiedimbi neshcatanchitec,” quiash neshcaic nidac caondash.

<sup>30</sup> Adshumbic amēn aton mado utsi chuiquin: “Neshcaic nid, mado,” cac badedi: “Ai, adonona,” queboedi neshcaic nidenquo icpac caondash. <sup>31</sup> ¿Mitsicquidēn aton papan chiacpadomboen napac caondash? En chui. Tiantianu —caquien Esus chieshēnquido: —Abia chiac chieshuidboedēn —qesho tantiashumbien Esusēn: —Adquidpenquien mibi nec. Mibi tantia-tiapimbo yec tabadnubi mimbi icsambo caido Nuquin Papa yacno puduedendac. Chieshuidacbimboecquid aido nec. Aton matses piucquid bedshundenedo yec aton piucquid bednuen dada chudmeboedo chido yec quequin Nuquin Papa tantiabenash abēd tabadtequido yanendac. Mibien padenquo iquec. <sup>32</sup> Uan pado acten mentoandenedēn Nuquin Papan chiaid chuiquin bēdamboec tabadte chuipadenec. Adsho mimbi tantienquo icnubi mimbi icsambo caidombi Nuquin Papa tantiabempondash. Adsho isun Uan padon chiacpadomboen mibi icsaid ēntiadquidi mimbi ēnenquo iccondac. Aton papan chiaid niacquidbimboecquid mibi nec —quepondash Esus abi chieshēnquido chiec.

*Abi chieshēnquido icsaid Esusēn chuioaid  
 (Mad 12.1-12; Duc 20.9-19)*

<sup>33</sup> Adshumbic Esusēn abi chieshēnquido ompoacbimboen chuipondash naden. —Tied ichon chetequid nidtsinac caondash. Adoshombic aid tied daquēnē uatanquimbic chetequid chintetsen nacenmpac caondash.

Adoshombic: “Ampequid chosho isnu,” qeshun shubu abucquio icnuc shubu uapac caondash. Adoshombic: “Nëid tiedën caniquid chetequid iquec. Aid chequin ëbi neshcashunta,” utsibo canec ënapen nidpac caondash. <sup>34</sup> Adash yuectaneshumbien abëd nidondaïdo aton yuabo chuiquin: “Nëen chetequid sinashe. Bedtan,” cac aton yuabo nidanepac caondash. <sup>35</sup> Adec aton icbon tiedno nidaniacshobien neshcaquidon cudasënquin chieshëmpac caondash. Abentsëc cuesunetanquin utsi cuënoten seshunequiopac caondash. Utsibic cuesquin cuemepac caondash. <sup>36</sup> Aden cuemiaid choshon chuituidaquien icbon nidboedtedpenquio dadpenquio aton yua utsibo chuipac caondash. “Bedtan,” cac nidanec tiedno choacsho isun adembidi cuesun siapac caondash.

<sup>37</sup> Adoacsho tantiash aton madombo caic: “Bedtan,” quepac caondash. “Con mado cuesunenquio icquin ëmbi chetequid menetsiash,” qeshun aton madotsen nidmepac caondash <sup>38</sup> Adoac nidec aton papan tiedno choacsho chetequid cudasquidon: “Tied icbo unësan aidën natedi aton madon bedtsiash. Nëbien aton mado cuesunetiad. Aid nibëdnuc icbo unësan aidën natedi nuquin nabi ictsiash,” qeshun <sup>39</sup> tied tsitsuno buanshun cuesunepac caondash —quequin Esusën chuipondash.

<sup>40</sup> Adshumbic ambi chuiboedquio abi datsidadquido chuimenuen chuipondash. —Ëmbi chuiboed tantiash ¿atotsi mibi quepatsia? “Min mado cuesuniaccosh,” cac ¿atotsi tied icbon napatsiash? —quesho <sup>41</sup> tantiash datsidadquido: —Aido icsamboshë icsho comapenen cuidtsiash. Adshumbic ambi chetequid sinacsho abi cudasënesambo utsibo aton tied neshcametsiash —quecuededpondash datsidadquido.

<sup>42</sup> Adsho tantiashun Esusën: —Ai, abimbo caic. Adembidi ambi chomiaid chieshësho Nuquin Papan mibi cuidendac. ¿Nuquin Papan chiaid isabida ictio? Naden chiampid ma mimbi ispacoc.

“Buintad bëdambo icquid istuidashi: ‘Nëidquio shubu uanun nitsinëmbi,’ quetiadquidi isuidacbimboen Nuquin Papan namiaid chieshënac.

Aden buintad isuidaïd utsin bedshun shubu uanun nitsinacbimboen Nuquin Papan tantiamiacpadomboen utsibon ambi namiaid tantiosh.

Adsho isun: ‘Nuquin Papan namiaid bëdambo iquec,’ caimbi,”

quequin dada uapampic. <sup>43</sup> Aden ambi namiaid ëbi chieshësho isash mibi caic Nuquin Papa nadpec. “Ëmbi con matses caïd isadaïdbo ëbi bëdamboen tantiametiadquidi chuiquid dapabon namenquio icsho isun utsibotsen: ‘Ëbi chuiquid icta,’ caindambi,” quepec Nuquin Papa. Aden ambi chiacpadquidën bëdamboen chuibanac abi tantiaquido dadpen yanendac.

<sup>44</sup> Mibien Nuquin Papan cuidtequido nec. Cuëte uebudquin catashac canite uesadec podquëd-podquëdadbimboecnuc mibi comapenen cuidendac —quepondash Esus abi chieshënquido chiec.

<sup>45</sup> Adsho tantiashun padiseyobobëdtan nëish abided unës uaquido chuiquid dapabon: —Nuquien cachitec —quequin tantiabempanëdash.

<sup>46</sup> Adshumbic Esus cuesunemenuen bedtiadquio icquimbi bedenquio icpanëdash. —Abi datsidadquidon: “Nuquin Papan chiaid chuibanquidquio Esus nec,” qeshun Esus bedsho isun nuqui cuesnushe —qeshun aton matses dacuëdënquin bedenquio icpanëdash.

## 22

*Cacuidanaïd chiaïd  
(Duc 14.15-24)*

<sup>1</sup> Adshumbic Esusën padpiden ompoacbimboembidi chuipondash naden.  
<sup>2</sup> —Tantia. Isadaidbon nacpadomboen aton mado chido bednuesho tantiashun amën matses dadpen: “Pec cho,” cauidaid mibi chuinu. <sup>3</sup> Chuiquid dapan aton yuabo chuiquin: “ ‘Con icbon madon chido bedequé. Aidbéd cuishonquenuen pec cho,’ quequin ëmbi tantiaidotedi chuitan,” cac yuabon chuitanaqui choenquio icpac caondash.

<sup>4</sup> Adsho isumbien chuiquid dapan aton yua utsibo chuiquin: “Nëish nua bëchichoquidquio dadpen codoquiacoshe. Padpiden chuitan,” cac chuitanoaqui <sup>5</sup> choenquibidi icpac caondash. Adec cacuidanquiec abentsëc aton tied nantan nidnubi utsi piucquid bednuequin ambi aton na menebante shubuno nidpac caondash. <sup>6</sup> Utsimbic abi: “Pec cho,” cashobi yuabo mëyanquin cuesun secapac caondash.

<sup>7</sup> Adoshobien chuiquid dapan nëishtanquin shëpiapac caondash. “Uesquin cuesun siatan,” cac aton sondado chedon aton yuabo cuesun siaquido uesquin cuesun secatanquin aton shubutsen uesquin nëdëncapac caondash. <sup>8</sup> Adomeboshombic chuiquid dapan: “Abi pete codocaid dadpen iqueque. ‘Pec cho,’ cac cacuidanoshe. Utsibo chuitan. <sup>9</sup> Ëmbi: ‘Pec cho,’ cacmaidobi chuibenetan. Podquedën nidquin mimbi istuidaidtedi: ‘Pec cho,’ cabenetan,” cac nidshun <sup>10</sup> ambi istuidaidtedi chuibenetanac matses dadpenquio pec cho-chopac caondash. Icsambo icquidobëdi bëdambo icquido cho-choash chuiquid dapan shubun puduedash pec tabadte quënë dapan tabadcuededpac caondash tsucus-tsucustsëcquio yec.

<sup>11</sup> Adshun chuiquid dapantsen puduedshun isquien dashcute bëdaidquio dasiuidabi icquid abentsëc tsadtsec. <sup>12</sup> Adshobien chuiquid dapan: “¿Atotsi quiash dashcute bëdaidquio dasiuidambobi cho, buchi?” caqui ëcbedenquio yec tsadec. <sup>13</sup> Adshobien chuiquid dapan: “ ‘Chido bedacno isnuéc dashcute bëdaidquio dasiuidquid,’ quepadenec. Mibi icsambo iqueque. Mibi cuidnu,” qeshun aton yuabo chiec: “Shëbunshun buanshun icsano netan,” capac caondash. Adoac taneshun netanac mëyadquiec natiaic shubiquiopac caondash.

<sup>14</sup> Adembidi Nuquin Papan ambi matses bëdamboen iste dadpen tantiamiaqui utsin-utsinquien tantienquio iquendac. “Abi yacno puduednu,” queuidboedi bëdambo icte bunenquio yec abi tantiatiapimbo icscho Nuquin Papan comapenen cuidendac. Utsi daëdpactsëquien Nuquin Papan tantiacpadec abëd tabadtequid iquendac —quequin Esusën chuipondash.

*Chuiquid dapa piucquid menete chiaid  
 (Mad 12.13-17; Duc 20.20-26)*

<sup>15</sup> Adsho tantianec nidash abi chieshënquido padiseyobo: —Esus icsamboen chuimenuna. Icsamboen chuisho tantiashun bedshun unës uamechitono —qeshun ambi chuibanquin tantiamiaido chuipac caondash. <sup>16</sup> —Icsamboen chuimetan —caquien chuiquid dapa Edodes caid tantiaquidobëdtan icsamboen chuimenuéc cho-choshon chuituidpondash. —Bëdamboen chuiquid mibi neque. En ëbi chui. Tantianu. Muesambo icquin Nuquin Papan chiapadec bëdamboec tabadte mimbi abimbo chuipoc. Matses dacuëdënenquio icquin Nuquin Papan chiaidquio mimbi chuipoc. <sup>17</sup> Adquid icquin ¿atotsi mimbi chuipe? Tantianu. Chui. Nuquin matses yuaquid chuiquid dapa Sesad caidën: “Piucquid shocoshëmpi dadpen beccho,” cac nuqui meniac ¿ada bëdambo icpatsiash? —capondash. <sup>18</sup> Adoquien Esusën ambembi tantiashun: —Bëdambo icquid damianquiec mibi muambo nec. ¿Atotsieshun ëbi icsamboen chuimetiadquio ique? —quetanquin: <sup>19</sup> —Chuiquid dapa menetequid piucquid shocoshëmpi beccho —ambi cac



<sup>20</sup> bësho bedshun Esusën chuipondash. —¿Në tsutsibimboecnuc dada uaid në iquec? ¿Tsutsi cuëmédquidbédta dada uac? En chui. Tantianu —caquien: <sup>21</sup> — Ma nuqui yuaquid chuiquid dapambo Sesad neyoc —quepondash. Adsho tantiashumbien Esusën: —Abibimboecnuc dada uaid abi cuëmédquid dada uaid bedtequid shocosh icnuc Sesadën na neque. Icbon: “Beccho,” cac meneta. Adecbidi Nuquin Papa nuquin Icbombo neque. Aidën chiacpadomboen nabanta —quequin Esusën bédamboen chuipondash. <sup>22</sup> Adsho tantiash icsamboen chuimetiadquio icboedi: —Bédamboen chuipec —quetanec nidanepondash.

*Matses uincuemete chiaid*  
(*Mad 12.18-27; Duc 20.27-40*)

<sup>23</sup> Adnubien aid ushëmbi Saduseyubo: —Matses unësaid uincuenesambo nec —quequidotsen: —Esus icsamboen chuimenu —quec cho-chopondash. <sup>24</sup> —Bédamboen chuiquidquio mibi neque. Mimbi chuisho tantianu. ¿Mitsipaden mimbi chuipatsia? Nuquin tsusedpa Moisesën naden chuiquin dada uapampic. “Aton chido bedash bacuë tishmiabi unësacsho aton utsin aid chido bedshun: ‘Con buchin bacuëbo nibèdeque. Con buchin madobimboecnuc tishmenu,’ quequin tishmequid,” quequin Moisesën dada uapampic. <sup>25</sup> Aid tantiaquin chuinu. Dada aton utsibobéd tabadpac caondash. Aton utsibo seistedi icpac caondash. Bëyucquid aton chido bedashi bacuë tishmiabi unëspac caondash. Adsho isun abi tsibanquidën aidën chido bedash <sup>26</sup> bacuë tishmiambobidi unësoapac caondash. Adsho isun aid tsibanquidën aid chidobidi bedoashic bacuë tishmiambobidi unësoapac caondash. Adenuidi abi tsibanquidën abi tsibanquidënnuquin aton buchi unësan-unësanquien aid chidouidi beduid-beduidpac caondash. Bacuë tishmiabi-tishmiabiec abitedi unësbudnepac caondash. <sup>27</sup> Adashic bacuë tishambobi aid chidotsen unëspac caondash. <sup>28</sup> Aid abitedi uincuemiac ¿mitsicquidën chido icpatsiash? —caquien <sup>29</sup> Esusën: —Nuquin Papan chiaidquio tantienquio icquin Nuquin Papan nadatiambo icquin nabanquin uincuemete mimbi tantienquio iqueque. Chuinu. Tantia.

<sup>30</sup> Uincuemiac dadan aton chido bedesa. Adembidi amën aton champi menesa. Nuquin Papan abi yacnoshon uaido mayan bédabobimboec matses uincuemiaido iquendac. Aden uincuemiaidën chido bedesa —quepondash Esus. <sup>31</sup> Adshumbic padpiden chuipondash. —Ambi unësaid uincuemete chuiquin Nuquin Papan dada uamepampid ¿isbanabida ictio? Ma mimbi aid isbampaboc. <sup>32</sup> Naden dada uapampic. “Abadauan caid yec Acobo caid yec Isac caid yec quequidtedishun ëbi Papa capec,” quepampic Nuquin Papa ënden unësampid chiequi. Unësun matses tantienquien mimbi danec. Unësash aton dada chodquiambic aton tantiate unësambo icnuc abi Nuquin Papa tantiatsiash —quepondash Esus. <sup>33</sup> Adsho tantiash abi datsidadquido: —¿Mitsipadquid nepc? Bédamboenshëen chuipec —quepondash.

*Moisesën dada uampid chiaid*  
(*Mad 12.28-34*)

<sup>34</sup> Aden unësaid uincuemete chuisho tantiashumbien Saduseyobon padpiden: —En chui —cainquio icpondash. Adsho isashien Esus chieshënnquid utsibo Padiseyobo: —Nuquin Papan chiaid Esus icsamboen chuimenu. Nid —quianec Esus chuimec cho-chopondash. <sup>35</sup> Cho-choquin abentsëcshun Nuquin Papan Moises dada uamiampid tantiaquidquio icquin chuimetuidpondash. <sup>36</sup> —Chuiquidquio mibi neque. En ëbi chui. Tantianu. Nuquin tsusedpa Moisesën dada uaquin dadpen chiampic. ¿Mitsicquid abentsëc ëmbi nasho Nuquin Papan: “Bédamboshë iquec,” capatsiash? —caquien <sup>37</sup> Esus:

—“Nuquin Papa tantiaquiec ambi chiacpadec tabadte bunquiota,” quequin<sup>38</sup> chiampidba naic Nuquin Papan chiacpadec mibi bēdamboec tabadtsiandac.<sup>39</sup> Adembidi Moisesēn chiampid utsitsen naic matses bēdamboec tabadtsiash. “Min dada mibibi datantiadacimboen utsibotsen tantiaquiota,” quequin chiampicpadomboen nasho Nuquin Papan bēdambo catsiash.<sup>40</sup> Aden matses bēdamboen namenuen Nuquin Papan ambi chiaid utsi abitedi Moisesba chuishun nuquin tsusedpa utsibo chuiquin dada uamepampic — quequin Esusēn bēdamboen chuipondash abi chieshēnquido chuiquin.

*Nuquin Papan chomiaidquio chiaid*

(*Mad 12.35-37; Duc 20.41-44*)

<sup>41</sup> Adshumbic Esusēnsen abi icsamboen chuimete bunquido Padiseyobo chuipondash.<sup>42</sup> —Ēmbitsen mibi chuimenu. Tantia. Nuquin Papan chomiaid ĵmitsipadquid nec? ĵMatsesēn madoudida nepec? —capondash Esusēn abibi cadquimbi. Adoquien badedi: —Nuquin tsusedpa yampid Dabidēn tsyuecquid icsho Dabidēn mado caimbi —quepondash Padiseyobo.

<sup>43</sup> Adsho tantiashumbien Esusēn: —ĵBēdamboenda chuidio? Mimbi chiacpadquid aton mado icsho ĵatotsieshun Nuquin Papan Mayanēn tantiamiacpadomboen Dabidēn con Icbo capampic? Naden Dabidēn dada uapampic.

<sup>44</sup> “Nuquin Papan con Icbo naden chiendac.

‘Con abiuc tsadash abitedishun Icbombo icnush nēmo cho.

Mibi chieshēnquidobi con Icbo mibi camenu,’ quequin Nuquin Papan con Icbo chiendac,”

quequin Dabidēn dada uapampic.<sup>45</sup> Con mado cainquio icquin con Icbo capampic Dabidēn. ĵAtotsieshun mimbi: “Dabidēn mado nec,” quequin tantiape? —caquien<sup>46</sup> ěbedenquio yec otacquio tabadpondash. Esusēn bēdamboen chuisho tantiash: —Icsamboen chienquien icchitec. Ēmbi padpiden: “Icsamboen chuimenu,” cac bēdamboembidi chuioatsiash —queshun abi chieshēnquido abitedishun Esus padpiden chuimenquio icquin ěnaccondash.

## 23

*Bēdambo icquid damianquido tanenda, quiaid*

(*Mad 12.38-39; Duc 11.43, 46; 20.46*)

<sup>1</sup> Adshumbic Esusēn abēd icquidobēdta abi datsidadquido tantiamequin chuipondash.<sup>2</sup> —Tantia. Moisesēn dada uampid chuibanquidobēdta tsusedpabon chiampid namequido Padiseyobon naid mibi chuinu. Aidon: “Moisesēn chiampicpadomboen nata,” quequin nuquin matses isadaidbo chuidenepec.<sup>3</sup> Aden Moisesēn dada uampid abimbo chiac adenuidi mimbi nac bēdambo ictsiash. Aden naquin padiseyobon nacpadomboen nainda. Aidon Moisesēn chiampid chuiquimbi ambibi aidēn chiaid niac-niaquec.<sup>4</sup> Chieshēmēnquido nec. Nuquin Papan chiaid nametiadquidēmbi tsusedpabon ambembi chiaid dadpenquio namepec chushcanquin. “Matsesēn aitedi natiapimbo iquec. Padi icnuna. Nuquin matsesēn chiampidtedi nainda,” catiadquidi adoenuio iquec.

<sup>5</sup> Aden padiseyobon Nuquin Papa tantiaquidquio damequin matses ismenuenuidi naic. Nuquin Papan chiaid dada uaidēmpi sauedtsash bēdectamēdec abiuc daēdi pēdectamēdec quesun matses ismenuenuidi naic. Adembidi aton dashcute tēdiadte nacnenuquin: “ ‘Nuquin Papa chianequidquio nec,’ ma ěbi canu,” quesun sedquid shoyonaid ěnapenpactsēcnuc cuididicash matses ismenuec matses tabadacno capucuenepc. Adec Nuquin Papa chianequid damianquiec.<sup>6</sup> “Chuiquid dapa nec,” cameteuidi bunec. Isedec puduedash: “Chuiquid dapa icsho

icbon abëdi tsadmequid,” quiaish icbobëdi tsadte bunifuic. Nuquin Papan chiaid chuibante shubun puduedash: “Tsiusio dapambo nec,” camenuiec utsibobëd tabadenquio yec tsusiobobëduidi tabadquid nec. <sup>7</sup> “Chuiquidquio yec mibi bëdambo iquec,” camete bunifuic matses dadpen tabadacno nidtenepec.

<sup>8</sup> Mibitsen adenda. Utsibo: “Mibiuidtsëqui bëdambo iquec, Icho,” camenuiec adenda. Min Icho abentsëcquiobi ëbi iquec. Ëbi abentsëqui con Icho cata. Con yuabo yec con utsibo mibi neque. Bëdamboec isnanta. <sup>9</sup> Adembidi mibi chuibanquid chuiquimbi: “Mibiuidtsëqui bëdambo iquec, Papa,” cainda. Nuquin Papauidtsëqui aden chuita. <sup>10</sup> Adembidi: “Chuiquid dapa yec mibiuidtsëqui bëdambo iquec,” utsibo camenuenuidi nainda. Ëbiuidtsëqui mibi chuiquid dapa nec. Nuquin Papa yacnuëshquio choquid ëbipadquidquio utsi nibëdec.

<sup>11</sup> Padnuen ambi chiacpadomboen utsibo nashunquidquio utsibo dëniacte bunenquio icquid Nuquin Papan bëdamboshë catsiash. <sup>12</sup> Utsien abibi cadequi: “Ëbiuidtsëqui bëdambo iquec,” quequin utsibo ismenuenuidi naquido Nuquin Papan icsambo catsiash. Utsibic Nuquin Papan chiacpadomboen naquid utsibo nashunquid yec utsibo ismeteuidi bunenquio icsho Nuquin Papan bëdambo caindac —quepondash Esus abi datsidadaïdo chiec.

*Abi chieshëquido Esusën chushcaid*  
(*Mad 12.40; Duc 11.39-45, 52; 20.47*)

<sup>13</sup> Adshumbic abi chieshëquidotsen chuipondash. —Tantia. Moisesën chiampid chuibanquidobëdta Padiseyobo mibi chuinu. Nuquin Papan cuidtequidombo mibi nec. Bëdambo icquid damianquiec mibi icsambo iquec. Nuquin matses: “Nuquin Papabëd tabadte tantianu,” queshobi mimbi bëdamboen chienquio iquec. Ëmibi Nuquin Papabëd tabadte bëdamboen chuisho mimbi tantienquio iquec. Aden tantienquio icquin: “Aidën chiaid tantienda,” quequin mimbi utsibotsen Nuquin Papabëd tabadte tantiameti-apimbo iquec.

<sup>14</sup> Nuquin Papan cuidtequido mibi nec. Muaquin unësboedën niante piucquid bedshunquido mibi nec. Nuquin Papa tantiaquidquio damenuen utsibo tantiamequinuidi buëdpambo cuëdquin Nuquin Papa chiacbimboen mimbi chianepec. Aid abimbo mimbi chienquio iquec. Adec chieshanquiecsho isun Nuquin Papan mibi comapenen cuidendac.

<sup>15</sup> Nuquin Papan cuidtequido mibi nec. Mimbi tantiacpadomboenuidi tantiamenuen mimbi matses utsibo chuiben-chuibenec. Nidaid utsi-utsiec yacno nidshun mimbi chuibenesho tantiaquido mimbi tantiacpadquio yanash Satanasën yuambo yanec Nuquin Papan cuidtequidombo iquendac.

<sup>16</sup> Nuquin Papan cuidtequido mibi nec. Isadaidbo chuiquid icquin bëdamboen tantiamenquien mimbi icchitec. “ ‘Nuquin Papa utsi uatiapimbo yacpaden abimbo caimbi,’ quequid muaisa nec. Muaquidën Nuquin Papan chiaid niacquid,” quetiadquidi mibi adenquio iccoc. “ ‘Nuquin Papa tabadte shubu uashunaid utsi uatiapimbo yacpaden abimbo chiombi,’ quequid muesa nec,” quetiadquidi mibi adenquio iccoc. Padenquio yec: “ ‘Nuquin Papa tabadte shubu uashunaid dapan icquid shocosh piu nacenaidquio utsi uatiapimbo yacpaden abimbo chiombi,’ quequid muesa nec,” quechitequien mibi iquec. <sup>17</sup> Aden tantienquio icquin mimbi icsamboen chiec. Nuquin Papa tabadte shubu uashunaid Nuquin Papa tabadtequid yec ¿bëdapenquioda icpec? “Aid bëdamboshë icnubi aid nuntan icquid bëdiactsëc bëdambo iquec,” caimbi. Mimbien icsamboen tantiec. <sup>18</sup> Nadentsen mimbi

icsamboen chiec. “ ‘Nuquin Papa tabadte shubu uashunaid dapa yacnoshon: Mabi Nuquin Papan bēdamboen isnu, quequin nēish pichicate nacnenaaid dapa utsi uatiapimbo yacpaden abimbo caimbi,’ quequid muesa nec,” quetiadquidi mibi adenquo iccoc. “ ‘Nuquin Papa mabi bēdamboen isnuequin pichicatequid nēish utsi uatiapimbo yacpaden abimbo caimbi,’ quequid muesa nec,” mibi quepec. <sup>19</sup> ¿Adenda mimbi bēdamboen chuipe? Pashuacximboen mimbi bēdamboen tantienquo iquec. ¿Mitsicquid bēdambo iquec? “Mabi Nuquin Papan bēdamboen isnu,” quequin nēish pichicate nacnenaaid dapa bēdambo icnuc aidēn pichicatequidi nēishquo bēdapabi ictsec. Nuquin Papamboen bēdamboshē iquec. <sup>20</sup> Nēish pichicate nacnenaaid caic: “Aid utsi uatiapimbo yacpaden abimbo caimbi,” quequin aid nantequid nēish abitedi chiaidbidi nec. Adembidi ambi: “Mabi bēdamboen isnu,” caid Nuquin Papatsen chuipec. <sup>21</sup> Adembidi Nuquin Papa tabadte shubu uashunaid caic: “Aid utsi uatiapimbo yacpaden abimbo caimbi,” quequin ambo tabadquid Nuquin Papatsen mimbi chiec. <sup>22</sup> Adembidi abu caic: “Abu utsi uatiapimbo yacpaden abimbo caimbi,” quequin Nuquin Papa tsadaidtsen chiec. Nuquin Papa tsadaid cain Nuquin Papambo chiec. Aidēn chiaidquo tantiec: “Abimbo cacximboen chuiquid icsaquid nec,” quetiadquidi mibi adenquo iccoc.

<sup>23</sup> Bēdambo icquid damianquid yec Nuquin Papan cuidtequido mibi nec. Nuquin Papan chiaid abentsēqui tantiatsēcquin min tiedēn canitsēcquid musuquēmpi bedshun Nuquin Papa mimbi menepec. Aden menequid icquimbi mimbi Nuquin Papan chiaid utsi dadpen niac-niacpec. Chieshēmianquid icboedi: “Ēbi bēdamboen ista,” qesho bēdamboen istiapimbo mibi iquec. Adembidi bēdambo icquidi muauaquin mimbi tsusio icsamboen cuidmec. Adembidi mimbi Nuquin Papa abimbo tantienquo iquec. Aden mimbi Nuquin Papan chiaid niac-niacpec. Ambi chiacpadomboen Nuquin Papa menequid icquimbi ambi chiaid utsi abitedi natiadquidi ma mimbi nainquo icpaboc. <sup>24</sup> Tantesa uatsēcquimbi mimbi utsibo icsamboen chiec. Manuampi nibedbantsēcquimbi utsi nuacquid nibedquiabi abi nēsamedpanumbobi acacximboembien mimbi nachitec. “Nuquin Papa meneta,” quequin chiaiduidtsēqui natsēcshun adenuidtsēqui mimbi utsibo namepec. Adenuidtsēqui namequimbi Nuquin Papan chiaid utsien mimbi niac-niacchitec.

<sup>25</sup> Nuquin Papan cuidtequido mibi nec. Padiseyobo yec Moisesēn dada uapampid chuibanquido yec quequimbi mimbi icsamboen naic. Pada-padaidbēdta dēshote chieshquin cachocuidtsēqui dapanshun anauc ampanambo icquidi ampanaid damianacximboec mibi bēdamboec tabadquid damianquiec. Nuquin Papan chiaid dadpen nainquo icquin mitsanauidi bednuen mibi bunaiduidi mimbi napec. <sup>26</sup> Pamumēdacximboec tantiatiapimbo mibi iquec. Dēshote abichobi bēdamboen ampanacximboec icsaid ucu dash bēdambo icta. Adec icsainquo yec ēnēdash Nuquin Papan chiacpadece mibi bēdamboec tabadtsiac.

<sup>27</sup> Bēdamboec tabadquido mimbi damesho isun Nuquin Papan mibi cuidendac. Unēsaid chococacno bēdamboen nacnenac bēdambo isadec ēnden pisenambi. <sup>28</sup> Adembidi bēdamboec tabadquid mimbi damec. Matses ismec bēdamboec tabadshumbic omposhon Nuquin Papan chiaid niac-niacquin mimbi natemaidien mimbi nachitec.

*Padiseyobo chedo cuidte chiaid  
(Duc 11.47-51)*

<sup>29</sup> Nuquin Papan cuidtequidombo mibi nec. Nuquin Papan oncamiadobēdta bēdamboec tabadquido nuquin tsusedpabon unēs uampido tantiaquin aido chococampicno shubu uaquin mimbi nacnempec. <sup>30</sup> Adoshombic: “Nēmbo con tsusedpabon chieshēnquin unēs uampid chococac. Aidbēd tabadquin ěmbi unēs uainquio ictsenēdac. Ęmbien bēdamboen istsenēdac,” queshun mimbi aido chococacno nacnempec. <sup>31</sup> Adoboedēmbi nuquin tsusedpabon bēdambo icquid unēs uampicpadomboen adoante bunquin mimbisen chieshtoshon adoaindac. <sup>32</sup> Ai, nuquin tsusedpabon Nuquin Papan oncamiampid unēs uacpadombota —quepondash Esus abi unēs uate chiec.

<sup>33</sup> Adashic abi padiseyobo chiec: —Nisibimboec icsa uanquido mibi nec. Adquido icsho Nuquin Papan icsano nēsecaquin mibi cuidendac. <sup>34</sup> Icsaido icsho isun: “Ma Nuquin Papan bēdamboen iste tantiamenu,” queshun Nuquin Papan chiaid chuibanquido utsi-utsien mibi yacno nidmendambi. Adquid mibi yacno cho-choacsho mimbi dadpen unēs uaindac. Utsi-utsien cuesten dectanquin utsi-utsien Nuquin Papan chiaid chuibante shubunoshon cueshcaten mimbi cueshcaindac. Utsi-utsien cuesnuequin nadancatanequin shubu utsin shubu utsinquien mimbi cuemetanendac. <sup>35</sup> Adosho isun Nuquin Papan mibi cuidendac. Nuquin Papan chiacpadec bēdamboec tabadsho tsusedpan chieshēnquin tauamboen cuesuniampid Abed nepampic. Adoshombic adecbidi bēdamboec tabadsho tsusedpa utsibon utsi-utsien unēs uapampic. Adoshombic ěnquin Bedequias caidēn mado Sacadias caid unēs uapampic. Aidi Nuquin Papa tabadte shubu uashunaid dayunshunquio cuesunepampic. Aidtedi unēs uampido tantiaquin aido unēs uaquido cuidacimboen Nuquin Papan mibitsen cuidquiendac. <sup>36</sup> “Yuecshun min tsyuecquido cuidendac,” quec nenquio iquebi. Nēbi caimbi —capondash Esusēn abi chieshēnquido chuiquin.

*Edusaden yacnocquido Esusēn shubi uaid  
(Duc 13.34-35)*

<sup>37</sup> Adshumbic Esusēn chuioapondash. —Tantia, Edusaden yacnocquido. Mibitsen chuinu. Mibi tantiac unēsquio iquec. Mibi yacnobidi tabadquin Nuquin Papan oncamiaidon chuisho nuquin tsusedpabon unēs uapampic. Adembidi Nuquin Papan: “Isadaidbo chiec nid,” caido chosho utsi-utsien cuēnoten seshunequiopampic. Adembidi mimbi nēbi naindac. Adquidombo icsho mibi tantiaquiembī. ¿Mitsipadec cachina aton bacuē cudaspec? “Penushe,” quiash aton bacuēmpi nua shoccoshon madadec cudasquid. Adecbidi: “Satanasēn yanushe,” quiash cudasquiec mibi Nuquin Papa bēdamboen ismete tantiametiadquio iccobi. “Tantiamenu,” cac tantiate bunenquio mibi icchitoc. <sup>38</sup> Ębi nidambic ěbi tantiatipimbo icsho Nuquin Papan namiac min shububēdtabi mibi nibēdamendac. <sup>39</sup> Nēbi mimbi ěbi isenquio yanendac. Padnuen min matsesēn yuecash chosho ěbi isendac. Aden isash: “Nuquin Papa yacnuēsh choquid bēdambo iquec,” min matses quendac —quequin Edusaden yacnocquido Esusēn chuipondash.

## 24

*Nuquin Papa tabadte shubu uashunaid nibēdante chiaid  
(Mad 13.1-2; Duc 21.5-6)*

<sup>1</sup> Adash Nuquin Papa tabadte shubu uashunaid daquēnē uacno tabadanec nidequi Esusbēd icquido Nuquin Papa tabadte shubu uashunaid caic: —En is, Icho. Nēid shubu bēdamboen nacnenaidquio neque —quepondash. <sup>2</sup> Adsho

tantiashun Esusën: —Mimbi isboedquoio cuënote bédamboen nacnenaid mat-ses utsibon cuënote chic-chiquendac nibédquiecnuc —capondash.

*Nuquin Papan cuidte ushë chiaid*  
(Mad 13.3-13; Duc 21.7-19)

<sup>3</sup> Adanec nidequi macuësh dapa Odibos caidën pudundoec poctsebi tabad-tuidshun abëd icquidon utsibo tantiamenquoio icquin Esus chuipondash. — En mibi chote chui. Tantuanu. “Nëbi choec,” quequin mibi chote ¿mitsipadembimbi tantiape? Adecbidi ¿atotsi isashini: “Nuquin Papan cuidte nëbi nec,” quepe? —capondash abëd icquidon. <sup>4</sup> Adoaquien Esusën naden chuipondash: —Tantia. Mibi chuinu. Muaquidoba choendac. Aidon chuisho tantiash: “Abimboen chuichitec,” quenda. <sup>5</sup> Adquido choshon: “Nuquin Papan chomiaidquoio Quidistu caid nebi,” quequin muaquin chiaqui dadpen-shun: “Ai, abimboen mimbi caic,” capendac.

<sup>6</sup> Èbi choabi icnuc: “Matses dadpenquoio cuesnan-cuesnanac caosh,” que-cuededendac. Adsho tantiash dacuëdenda. Nuquin Papan matses abitedi cuidte ushë choabi icnuc ambi tantiacpadec matses adonanendac. <sup>7</sup> Adec matses utsi dadpen icquido matses utsibobëd cuesnanendac. Nidaid utsi-utsiec yacno pete nibédquiecnuc icted-ictedendac. Nidaid utsi-utsiec yacno nidaidquiobi comapenec uëdëquedenendac. <sup>8</sup> Adsho isash chido bacuë nëncuenacsho isun: “Nëbien tishchitec,” quequin tantiacbimboen tantiata. “Nuquin Papan abitedi cuidte nëbi nec,” quequin tantiata —quepondash Esus.

<sup>9</sup> Adashic abi onquec: —Èmbi chiacpadquoio icnuc chieshëmënquidon ëbi tantiaquido bedshun chieshënquin utsi-utsien cuesendac. Utsi-utsien unës uaindac. Aden nidaid utsi-utsiec yacno tabadquidon dadpen-shun ëbi tantiaquido chieshënquiendac. <sup>10</sup> Adoac ëbi tantiatsechoedëmbi chieshtoshon ëbi tantienquoio yanendac. Aidëmbi ëbi tantiaquid ompodacsho istuidmeshun mëyamendac. Adashic abipadquid utsibobëd chieshënanendac.

<sup>11</sup> Padnuen muaquido: “Nuquin Papan chuiboedquoio chuinu. Tantia,” quependac dadpen. Adsho tantiashun dadpen-shun: “Ai, abimboen mimbi chiec,” caindac. <sup>12</sup> Matses dadpenquoio icsamboecshë tabadsho isun ëbi tantiatsechoedëmbi ëbi tantienquoio yanendac. <sup>13</sup> Padnuembi ëbi choabi icshobi ënenquoio icquin ëbi tantiaquido Nuquin Papa yacno tabadmendac.

<sup>14</sup> Èbi choabi icnuc: “Ma matses abitedishun Nuquin Papabëd tabadte tantianu,” queshun ëbi tantiaquidon nidaid utsi-utsiec yacno nidshun chuiben-chuibenendac. Matses abitedi chuibenequin nainambi choaindabi —quepondash Esus.

*Matses icsamboshë icquid chote chiaid*  
(Mad 13.14-20; Duc 21.20-24; 17.22-24)

<sup>15</sup> Adashic abi onquec: —Èbi chote ushë nëbi yanuc matses icsamboshë icquid Nuquin Papa tabadte shubu uashunaid dapa icsa uanuec pudued-shun: “Mimbi Nuquin Papa caid tantienda. Èmbi chiacpadomboenuidi nata,” quequin Nuquin Papa chieshënquin chiendac. Èndenquimbo nuquin tsusedpa Danied caidën aden icsa uate chuiquin Nuquin Papan chiaid dada uapampic. Aidën dada uampid mimbi isaidquoio nec. <sup>16</sup> Aden: “Nuquin Papa tabadte shubu uashunaid dapa icsa uanuec puduedosh,” quesho tantiash Udeya yacnocquido macuësh dapa yacno ompodec cuenac bédambo ictsiash.

<sup>17</sup> Adec cuenec shubu dayun icquido puduedenquoio yec: “Con na bednu,” quenquoio yec umanucuëshi cuenac bédambo ictsiash. <sup>18</sup> Adecbidi bad-edquoio cuenuen tied nantan icquidon aton dashcute utsi aton shubuno

beduanenquoio yac bēdambo ictsiash. <sup>19</sup> Nidequi bacuē usunquid yec bacuē chishmequid yec quec badedquoio cuentiapimbo yec mēyadquiendac. <sup>20</sup> Adec cuente tantiec: “Ue sequenumbo cuemenquoio icpashuni,” queta. “Pete bedmianenquoio icnushe,” quiash “Chonoadenquoio icte ushēnquoio cuemenquoio icpashuni,” queoata. <sup>21</sup> Aden Nuquin Papa tabadte shubu uashunaid dapa icsa uate bunquid icsamboshē icquid choan matses dadpenquoio natiambo chieshēmēnquieci tabadendac. Nuquin Papan tauamboen matses uac adec tabadenquoio ictenec. Nēbi adec tabadenquoio iquec. Aido icsamboecshē tabadquido nibēdanambic utsibo adquidpenquoio yanoaindac. <sup>22</sup> Adec icsamboecshē tabadte tantiaquin Nuquin Papan: “Ēmbi Esus tantiaquid icmiaido uesquin cuesun sianushe. Matses abitedi nibēdanushe,” qeshun yuenquoio icsamboen tabadmenquoio icquin ēnēdmendac —quepondash Esus.

<sup>23</sup> Nuquin Papan aden ēnēdmiabi yac icsamboecshē tabadec utsibo: “Is. Nēid Nuquin Papan chomiaidquoio Quidistu neque,” quependac. Utsibic: “Is. Nēidquien Nuquin Papan chomiaidquoio Quidistu caid neque,” quequin icsamboen chuioaindac. Adsho tantiashun: “Nuquin Icho Esus choashien nec,” cainda.

<sup>24</sup> Adec muaquidoba choendac. “Nuquin Papan chomiaidquoio nebique. Is,” quequin comapenen tantiaquin nabanquin ismendac. Utsibontsen: “Nuquin Papan oncamiaid nebique. Is,” quequin nadatiambo icquin nabanquin ismendac. Adsho isun dadpenshun: “Ai, abimbo caic,” caindac. Padnuen Nuquin Papan: “Muambo nec,” quequin tantiamiabi yac ēbi tantiaquidontsen: “Ai, abimbo caic,” catsempendac. Nuquin Papan bēdamboen tantiamiaido yec adtiapimbo iquendac. <sup>25</sup> “ ‘Chieshēmēnquido iquendac,’ quequin tantienquoio icquidēn ēbi tantienquoio yanushe,” qeshun: “Aden ēbi tantiaquido chieshēnquiendac,” quequin chiombi —quepondash Esus.

<sup>26</sup> Adashic padpidec onquec: —Ēmbi aden chuiboed tantiashun utsibo muasho tantienda. Ēbi caic: “Utsibo ismenquoio yec matses nibēdacno choac caoshe. Isnu. Nid,” cac istanenda. Adembidi: “Choash nēid shubun puduedac caoshe. Isnu. Nid,” cac adembidi istanenda. Muambo neque.

<sup>27</sup> Ēbimbo padpidec choquimbimbi abitedimbo ismendac. Abu ushēmbi yec bed-bedquetanesho ¿ada matsesēn abitedishunquoio isenquoio icpadic? Ai, isec. Adembidi ēbi choasho matses abitedishunquoio isendac. <sup>28</sup> Adec choendabi. ¿Ada edeste pisen chec budenquoio icpadic? Ai, budec. Adecbidi Nuquin Papan cuidte ushē chonoc choendabi —quepondash Esus.

*Abi chote Esusēn chiaid  
(Mad 13.24-37; Duc 21.25-33)*

<sup>29</sup> Adashic padpiden chiec: —Aden matses icsamboshē icquidon ēbi tantiaquido natiamenubi ushē chēnquenquoio yanendac. Inchēshēn ushētsen chēnquenquoio yanendac. Uispa chedo paēdbudnendac. Uispabimboecquid abitedimbo uēdēquendac. <sup>30</sup> Adnubini abitedishun Icho yec dacuēdampambo yec abucuēsh choendac. Ēbi nadatiambo icquin nabanquidquoio yec chosho isash cuidadtequido abitedimbo dacuēdec natiaic shubiquiendac. <sup>31</sup> Adnuc nua shoncanubimbi Nuquin Papan abi yacnoshon uaido mayan bēdabo: “Bedtan,” caindac. Adoac nidaid utsi-utsiec yacno nidshun ēbi tantiaquido abitedimbo bedtanendac.

<sup>32</sup> Ēmbi chuibocpadquieci yansho isun: “Esus chote nēbi nec,” quequin tantiata. ¿Mitsipaden: “Seta taēc,” quequin tantiapec? Suc seccuduquiaid isun: “Nēbi seta taēc,” quequin tantiaquid. <sup>33</sup> Adembidi ēmbi chuiboed isun: “Nēbimbobi Esus choec,” quequin tantiata. <sup>34</sup> ¿Muectabi nedi? Ēmbi chuibocpadquoio iquendac. Ēmbi chiacpadec yanabi matses abitedi

nibédantiapimbo iquendac. <sup>35</sup> Abimbo caimbi. Abu nibédanendac. Nidaidtsen nibédanendac. Padnuen ëmbi chuiboedquo nibédantiapimbo iquendac. Bënuenquo iquendac. Ucuttiapimbo iquendac. Ëmbi chuibocpadquo iquendac —quepondash Esus abéd icquido chiec.

*Esus chote ushë tantienquo icte chiaid*  
(*Mad 13.32-33; Duc 17.26-35*)

<sup>36</sup> Adashic abi onquec Esus: —Ëbi chote tantienquo iquembi. “Aid ushënquo choendabi,” quetiapimbo iquebi. Adembidi mayan bédabon tantienquo iquec. Ëmbibi Nuquin Papan Madonquiobi tantienquo iquembi. Nuquin Papanuidtsëquien tantiec. <sup>37</sup> Matses ëbi caic: “Nëbi choec,” quetiapimbo icnuc choendabi. Noen cano nacnenubi ¿mitsipaden aton matses icsambo icquidon tantiapampic? <sup>38</sup> Nidaid abichobi mauanabi icnuc: “Nuquin Papan nuqui cuidendac,” quequin tantienquo icquin peshun acquin aton chido bedquinc aton champi bedmequinc capampic. Adnubien Noe Nuquin Papan chiacpadomboen cano dapa anshubu uaqin nacnesh puduedpampic. <sup>39</sup> Aton matses: “Nëbimbobini Nuquin Papan cuidchitec,” quenquo icnubi ue dapambo choec mauanquidën matses abitedimbo unësbudnepampic Noe ambi cano anshubu uaidën nuadtonobi. Adecbidi Nuquin Papan cuidtequido ëbi caic: “Choec,” quenquo icnubini choendac.

<sup>40</sup> Choquin Nuquin Papa yacno tabadmenuen beduamendambi. Ëmbi: “Bedtan,” cac tied nantan dada daéd icsho istuidshun ëbi tantiaquid abentsëc icsho beduanendac. Utsibic ëbi tantiesa icsho nianendac. <sup>41</sup> Adembidi Nuquin Papa yacno tabadmenuen chido daédshun macueso istuidshun abentsëc ëbi tantiaquid icsho aid abentsëc beduanendac. Chido utsibic ëbi tantiesa icsho nianendac.

<sup>42</sup> Aden ëmbi chuiboed tantiashun: “¿Nëbida con Icho chopeba?” quequin ënenquo icquin tantiata. Ëbi chote mimbi tantienquo iquec. <sup>43</sup> ¿“Nëbi ampequidën ampec,” quequinda tantiapadic? Padenquo. Tantiaquidënquien aid ushënquo aton na bédamboen isquin ampemenquo ictsiash. Aden tantienquo icquin: “Ampesho isnu,” quequin ënenquo icquin isquid. <sup>44</sup> Adembidi ëbi chote ushë mimbi tantienquo ye. ¿“Nëbida nuquin Icho chopeba?” quec Nuquin Papabéd tabadte bunec bédamboec tabadta. Matses dadpen: “Nëbien chochitec,” quenquo icnubini choendac —quepondash Esus abéd icquido chiec.

*Esus bédamboen cainte chiaid*  
(*Duc 12.41-48*)

<sup>45</sup> Adshumbic abi bédamboen cainte Esusën chuipondash. —Tantia. Aton icbo tantiaquin yua bédambo icquidën naid mibi chuinu. Icbon: “Ëbi nidan mibédta yuaido pete sandoaid musucshun ëmbi chiacpadën ëmbi chiacpadënquien menianeta,” cac yua bédambo icquidën adotsiash. <sup>46</sup> Adnubien icbon choshon ambi chiacpadomboen yuan nasho isun bédamboen istsiash. <sup>47</sup> Adshumbic aton yua chuitsiash. “Bédamboen tantiaquid mibi neque. Con yua utsibo namequin con natedi dayun uata,” catsiash icbon yua bédambo icquid caquin. <sup>48</sup> Padnuen yua icsambo icquid: “Ëndenquimbo con icbo nidondash. Choenuien icchitec. Con nauidi nanu,” <sup>49</sup> quiampatsiash. Adshumbic chieshtoshon abédta yuaido cuesanetsiash. Adashic icsambo icquidobëdi icsamboec tabadtsiash. <sup>50</sup> Adec: “¿Nëbida con icbo chopeba?” quenquo icnubien aton icbo chotsiash. <sup>51</sup> Choshon ambi chiacpadomboen nainquo icsho istuidshumbic: “Icsambo iquec,” queshun comapenen cuesquin cuesunetsiash. Adembidi Nuquin Papan icsambo icquido cuidendac. Bédambo



icquid damianquido cuidacno icsamboshë yacno nidmendac. Adoac natiaic shubiquiendac —quequin abi bëdamboen cainte Esusën chuipondash.

## 25

### *Chido 10tedshun cainaid*

#### *chiaid*

<sup>1</sup> Adshumbic Esusën ompoacbimboen chuiquin abi chote ushë tantienquio icte chuipondash. —Tantia. Mibi chuinu. Nuquin matses isadaidbon nacpadomboen chido bednuequid aton chido bedtanec inchëshëmbi chosho aton matsesën bëquedtanquid. Bëquedtanec choec shubun puduedash cuis-honquec aibdëd pec tabadquid. Adquido icpac caondash. Chido 10tedishun: “Champi bedtanec choquid bëquedtanu,” qeshun aton tabote bëchin taboadquid icbo-icboen buanuen sanambededpac caondash. <sup>2</sup> Aid chido 5tedi tantienquio icquido icnubi 5tedbidi bëdamboen tantiaquido icpac caondash. <sup>3</sup> Tantienquio icquidon: “Tabote bëchi naimëdsho cushtonon buanu,” quenquio icquin bëchi uesadbudtsaid taboteuidtsëqui sananquin caimpac caondash. <sup>4</sup> Padnuen bëdamboen tantiaquidon naimëdsho cushtonoequin tabotebëdta sedunten cushtoaid bëchi sananquin caimpac caondash. <sup>5</sup> Aden cainaqi: “Chido bedtanu,” quianec nidboed choenquio icsho isash abitedi ushcastoash ushcuededpac caondash. <sup>6</sup> Inchësh poctsemboen: “Choeque. Bëquednu. Nid,” cac <sup>7</sup> isucunshun chidobon tabonoen tabote dëbedpac caondash. Adoshon bëdamboen tantiaquidon ambi bëboed bëchi cushtonobien <sup>8</sup> icsamboen tantiaquidon: “Bëchi beccho. Con na naimëdeque,” caquien bëchi bëboedën <sup>9</sup> bëdamboen tantiaquidon: “Padi. Mibi meniac con na uesadtsiash. Aid uesadan shubun puduedabi nuquitedi inchështsiac. Piucquid menequin bëchi cushtoquid baded cushtometan,” capac caondash. <sup>10</sup> Adoac bëchi bedec nidnubien chido bedtanec dada chopac caondash. Chosho bëdamboen tantiaquidon aton tabote taboshon chido bedtanec choquid bëquedtampac caondash. Adtanec abëdi choash puduedshun bëtashte puduedtiapimbo icnuc bëdamboen bëtashpac caondash. <sup>11</sup> Adnubien bëdamboen tantienquio icquido bëchi bedtanec chopac caondash. Choshon shëcuë bëtashacsho isun: “Shëcuë shëcne, buchi. Èbitsen puduednu,” <sup>12</sup> caquien chido bedquid: “Padi. Èmbi tantiacmaido mibi nec,” quepac caondash.

<sup>13</sup> Èmbi chuiboed tantiasshun chido icsamboen tantiaquido tanenda. Bëdamboen nabi icsho: “Èmbi tantiacmaid mibi neque. Puduedenda,” aido cacbimboen èmbitsen Nuquin Papa yacno puduedmenquio icquin cacumechitomane. Èbi chote ushë tantiadenquio icnuc: “¿Nëbida con Icho chopeba?” quequin èbi bëdamboen tantiec èmbi chiacpadec bëdamboec tabadta —quepondash Esus abëd icquido chiec.

#### *Icbon piucquid daëd uaid chiaid*

##### *(Duc 19.11-27)*

<sup>14</sup> Adshumbic abi tantiaquidon ambi chiacpadomboen nate Esusën ompoacbimboen chuioapondash. Ènapen nidnun aton piucquid dadpen dayun uaquidën aton yuabo: “Èbi piucquid daëd uashunta,” quequin chuipac caondash. <sup>15</sup> “Nëidën bëdamboen tantiaquidquio icquin con piucquid èbi daëd uashuntsiash,” qeshun aton yua piucquid 5tedi meniac caondash. Adshumbic: “Nëidëntsen bëdamboen tantiaquin adembidi con piucquid èbi daëd uashuntsiash,” qeshun utsitsen 2tedi menepac caondash. Adshumbic: “Nëidëntsen bëdiactsëc tantiatsëcquin adembidi èbi con piucquid

daëd uashuntsëctsiash,” queshun utsitsen piucquid abentsëcquiobi menet-sac caondash. Adanec nidpac caondash icbo. <sup>16</sup> Adnubien piucquid 5tedi bedboedën aton matsesën nacpadomboen piucquid daëd uanuen ut-sibo menequin yuecshun ambi meneboed udictsëc dëniacquin bedoapac caondash. Sincoted icboedi 5tedbidi bedoapac caondash 10ted icnuc. <sup>17</sup> Adembidi piucquid 2ted meneboedën 2bidi daëd uapac caondash 4tedi icnuc. <sup>18</sup> Padnuen abentsëc meneboedën chieshquin aid daëd uainquo icquin ambi uëdëshcaboed shëcuë anantsëcquin piucquid abentsëqui ompopac caondash.

<sup>19</sup> Yuecquio ictaneshumbien icbon choshon ambi piucquid meniondaido chuituidpac caondash. “¿Atotsi nao?” cac <sup>20</sup> sincoted meniondaidën: “Is, icbo. Mimbi ëbi meniondaidtedbidi daëd uaombi. Nëbi mitsana 10tedi iquec,” caquien <sup>21</sup> icbon: “Ai, con na daëdpactsëc icboedi daëd uaquin mimbi bëdamboen nac. Nëbi ëbëdtan chuiquid dapa icta. Èbëd cuishonquec tabadec cho,” capac caondash. <sup>22</sup> Adnubien piucquid 2tedi meniondaidën: “Is, icbo. Mimbi meniondaid 2ted icboedi daëd uaondambique. Nëbi mitsana 4tedi iquec,” caquien <sup>23</sup> icbon: “Ai, ëmbi chiacpadomboen mimbi con na daëd uac. Nëbi ëbëdtan chuiquid icta. Mibitsen ëbëd cuishonquec tabadec cho,” capac caondash.

<sup>24</sup> Adnubien piucquid abentsëcquiobi meniondaidën chieshquidëntsen: “Mimbi ancaidon nidtsinaid peteuidi bedquid mibi nec, icbo. Mimbi chiacpadomboen nainquo icsho isash chushcanquidquio mibi nec. <sup>25</sup> Adec dacuëdampambo icquid icsho mibi dacuëdënquin mimbi meniondaid piucquid ompoquin chococaondambi. Në mimbi meniondaiduidtsëqui ictsec,” caquien <sup>26</sup> icbon: “Chieshquieci mibi icsac. Èmbi chiacpadomboen nambo mimbi iquec. Èbi caic: ‘Ancanquid icquin ëbi chushcanushe,’ queshun <sup>27</sup> nuquin matsesën nacpadomboen utsibo meneshun piucquid daëd uaquin mimbi bedtsempac. Adoacsho aid daëd uaquin bedtsenombi. Chieshquin mimbi icsamboen nac,” <sup>28</sup> quepac caondash. Adshun aton yua utsi caic: “Chieshquidën na bedshunshun piucquid 10ted dayun uatsëcboed mene,” cac meniac 10ted icboedi 11ted yanac caondash. Adshumbic chieshquid comapenen cuidpac caondash. <sup>29</sup> Adembidi naindambi. Èbi tantiaquin ëmbi chiacpadomboen naquid adembidi namequin bëdamboen tantiamendambi. Èbi tantiesabo ëmbi chiaid niacquid bëdamboen tantiamenquio iquendambi. <sup>30</sup> Aid yua icsambo icquid cuidacimboen Nuquin Papan ëbi tantiesabo cuidquiendac. Ambi icsaïdo cuidquiacno nësecac natiaic shubiquiendac — quepondash Esus abëd icquido chiec.

### *Matses nashunesa cuidte chiaid*

<sup>31</sup> Adshumbic Esusën padpiden chuipondash. —Nuquin Papan abi yacnoshon uaido mayan bëdabobëd choec: “Abitedishun Icbomboeni nec,” quiash bëchamauampamboec dacuëdampamboec choequi chuiquid dapan tsadten tsadtoquin abitedi ismendambi. <sup>32</sup> Adshumbic matses abitedimbo cho-chomequin tsidadmendambi. Adshumbic icbon aton nauidquio tsinacacimboen ëbi tantiaquido naden chiendambi. <sup>33</sup> “Èbëd tabadtequido mibi neque. Nëmbo con abiuc tabadec cho,” caindambi. Adshumbic ëbi tantiesabo chuiquin: “Èbi tantiesabo cuidadtequido mibi neque. Con copioc tabadec cho,” caindambi. <sup>34</sup> Adshumbic ëbi tantiaquido padpiden chuoaindambi. “Èbëdi tabadec cho. Matses uaquin tauabi ëndenquimboshë mibi caic: ‘Aido ëbi tantiaquido icmeshun ëbëdi tabadmendambi,’ quequin Nuquin Papan tantiaïdombo yec ëbëdi bëdamboec tabadec cho. <sup>35</sup> Mimbi ëbi nashundenec. Bundoacsho mimbi ëbi pemedene. Acte bundoacsho

adembidi mimbi ëbi acmedenec. Mimbi isacmaidquio icsho mimbi ëbi yuedtenec. <sup>36</sup> Con dashcute nibëdsho mimbi ëbi dashcute menedenec. Daicsabudtsash unëstiadtsëcquio icsho ëbi tantiec mibi datsadtenec. Quënën nauedacsho mimbi ëbi isuan-isuandenec,” caindambi. <sup>37</sup> Adoquien bëdamboec tabadquido: “Tantiadenquio icnuc mimbi chuipec, icbo. ¿Bundoacshodambi mibi pemedionda? Mambi mibi pemiambo yoc. Mambi mibi acte bundoacsho acmiambo yoc. <sup>38</sup> ¿Ëmbi isacmaidquio icshodambi mibi yuedtionda? Mambi padambo yoc. ¿Dashcute nibëdshodambi mibi dashcute menepacti? Mambi padambo yoc. <sup>39</sup> Mibi daicsacsho datsadambo iquebi. Quënën nauedacsho mibi istaniambo iquemi. Mimbi tantiadenquio icnuc chuipec,” ëbi caindac. <sup>40</sup> Adoac naden chiendambi. “Tantia. Mibi chuinu. Ëmbi chiacpadomboen ëbi tantiaquido utsibo bëdamboen isquin mimbi nashundenec. Aden ëbibi nashunacimboen mimbi utsibo nashundeneque. Èbëdi tabadec cho,” caindambi.

<sup>41</sup> Adoshombic ëbi tantiesabotsen chiendambi. “Nuquin Papan cuidtequido mibi neque. Mibi icsaid ënte bunenquio icquid mibi neque. Nuquin Papan Satanas aton yuabo podobitsi icsabobëdta ënenquio icquin cuidacno nid. <sup>42</sup> Ëmbi chiacpadomboen ëbi tantiaquido nashunesambo mibi icteneque. Bundoacsho mimbi ëbi pemenquio ictenec. Acte bundoacsho mimbi ëbi acmenquio ictenec. <sup>43</sup> Mimbi isacmaid icsho mimbi ëbi cacumedenec. Dashcute nibëdsho mimbi ëbi menenquio ictenec. Daicsacsho isash mibi ëbi datsadenquio ictenec. Quënën nauedacsho mimbi ëbi istanenquio ictenec,” caindambi. <sup>44</sup> Aden chiaquien: “Tantiadenquio icnuc mimbi chiec. ‘Pete bundopash,’ quequin tantienquio iccondambi. ‘Acte bundopash,’ quequin tantienquio iccondambi. Ëmbi isacmaid icsho mambi mibi isambo yoc. ¿Min dashcute nibëdshodambi mibi istionda? Mambi padambo yoc. Mambi mibi daicsacsho isambo yoc. Mibi quënën nauedaid tantiambo iccondambi. Tantiadenquio icnuc mimbi chuipec,” caindabi ëmbi chiacpadomboen naisabon. <sup>45</sup> Adoac naden chiendambi. “Èbi tantiaquido nashunenquio icquin ëbibi nashunenquio yachimboen ëmbi chiacpadomboen naisabo mibi neque. Nuquin Papan cuidacno nid,” caindambi. <sup>46</sup> Adoac icsamboec tabadquido ënenquio icquin cuidacnombo nidnubi bëdamboec tabadquido Nuquin Papa yacno ënëdenquio yec tabadendac —quequin Esusën chuipondash.

## 26

### *Esus bedshun unës uanuequin chiaid (Mad 14.1-2; Duc 22.1-2; Uan 11.45-53)*

<sup>1</sup> Aden abi chote ënquin chuitanquimbic abi unës uatetsen abëd icquido Esusën chuipondash. <sup>2</sup> —Daëdec ushun nuquin matsesën obeca bacuë unës uaindac. Tsusedpabon: “Ma con mado unës uainquio icnu,” qeshun obeca bacuë abided unës uampid tantiaquin badiadshun penun obeca bacuë unës uaindac. Aid ushëmbi ëbi bedshun cuesten dectamendac —quepondash Esus.

<sup>3</sup> Adnubien tsusiobobëdi con matses chuiquid dapa dadpen abi chuiquid dapambo Caipas cuëmëdquidën shubun pudued-puduedpac caondash.

<sup>4</sup> Adashic: —Nëbien Esus unës uametiad utsibo ismenquio icquin bedshun.

<sup>5</sup> Nuquin matses obeca pec tabadnuc bedenquien ictiad. “Esus bëdambo icquidi cuesunec,” qeshun obeca penuec cho-choquidon nuqui cuesnushe —quepac caondash.

*Chidon Esus machiuinaid*  
(*Mad 14.3-9; Uan 12.1-8*)

<sup>6</sup> Adnubien Esus shubu dadpen icquid Betania caid yacno choash ambi daushumbo yec daicsaid bēdamiondaid Simon caidēn shubun puduedpondash. <sup>7</sup> Puduedshun pec samēdshobien chidon puduedshun ambi piucquid dadpenquo menequin bedaid tēchumpin icquid bēdambo nuadquid Esus machiuimpondash: —Esus bēdamboshē icquid nec —queshun. <sup>8</sup> Adsho isumbien Esusbēd icquidon: —¿Adenda bēdamboen nai? Ma icsambo yoc. <sup>9</sup> Utsibo menequin dadpen piucquid bedshun piucquid nibēdquido aid piucquid menetiadquidi mibi nec —quequin chido chushcapondash.

<sup>10</sup> Adsho tantiashumbien Esusēn: —¿Atotsieshun chido chushcai? Ēbi bēdamboen tantiaquin ēbi ismequin bēdamboen nashunebique. Chushcainda. <sup>11</sup> Mimbi chuiboed piucquid nibēdquido ēnēdenquo yec mibēdi tabadendac. Ēbien mibēdi tabadenquo yanendac. <sup>12</sup> Ēbi unēs uashun chococate tantiacimboen machiuinoshibique. Chushcainda. <sup>13</sup> Ēmbi chiaid chuibeniacnoshon nēid chidon ēbi machiuimboed chiendac —quepondash Esus abēd icquido chiec.

*Udasēn Esus bedmenun piucquid bedaid*  
(*Mad 14.10-11; Duc 22.3-6*)

<sup>14</sup> Adnubien Udas Iscadiote caid Esusbēd icboedi Esus chieshēnquido chuiquid dapabo chiec nidpac caondash. <sup>15</sup> Nidshumbic chuituidpac caondash. —Utsibo ismenquo icquin mibiuidtsēqui Esus bedmenu. ¿Tetsi piucquid ēbi menetsia? —caquien badedi pudunquin piucquid shocoshēmpi 30ted icnuc tambantanquin menepac caondash: —Baded ēbi bedme —quequin. <sup>16</sup> Meniac bedanec nidec: —¿Mitsishunquiemi utsibo ismenquo icquin Esus bedmepeba? —quepanēdash Udas. Adashic Esusbēdi tabadoaic chopondash.

*Unēsnuh abēd icquidobēd Esus pec tabadaid*  
(*1Cod 11.23-26*)

<sup>17</sup> Adnubien Esusbēd icquidon: —Equipito yacnuēsh cuenun pan bidiscamiabi yampid 7tedec ushquin tantiaquin tauaid ushē nēid nec —queshun Esus chuipondash. —Nuquin Papan nuquin tsusedpabo unēs uamenquo icquin matamiampid inchēsh tantiaquin obeca bacuē penuen ¿mitsishunquiemi mibi codocashumpe? —caquien Esusēn: <sup>18</sup> —Edusaden yacno nidshun ēmbi tantiaid dada chiec nid. “Nuquin Icbon: ‘Chiec nid,’ cac chobi. ‘Nēbi Nuquin Papan chiacpadomboen uesquin nabanembi,’ quiosh. Min shubumbo caic: ‘Aidēn shubun puduedshun Nuquin Papan nampid tantiaquin obeca bacuē pec tabadcuedednu,’ quiosh,” quequin chiec nid <sup>19</sup> —cac nidquimbi shubu icbo chuituidac caondash. Adoac: —Ai, ma chobono —quesho tantiashumbien abia nidboedon aidēn shubun puduedshun penuen nēish yua obeca codocapaccondash. Adnubien Esus chedo puduedpondash.

<sup>20</sup> Inchēshēmbi abēd icquido 12tedbēd samēdquin Esusēn pepondash. <sup>21</sup> Pec samēdquin Esusēn chuipondash. —Tantia. Mibi chuinu. Ēbi chieshēnquido ēbi bedmequid abentsēc nēmbobi iquec —quesho tantiashun <sup>22</sup> unēsquo yanshun abentsēcshun abentsēcshunquien Esus chuipondash abēd icquidon. —¿Ēbida cai, Icbo? —quequin abi chuishobien <sup>23</sup> Esusēn: —Ēbēdtan pete codocaid ēnē punquid ēbi bedmequid nendac. <sup>24</sup> Ēbi Nuquin Papan chiaid dada uamepampicpadquid matsesmiaid yec unēsendabi. Padnuen ēbi bedmequid comapenen cuidtequidquo nec. Anin aid tishenquo icpatecnēdan. Cuidac natiaquiendac —quepondash Udas caic.

<sup>25</sup> Adoaquien Udasën abi bedmequidënquo: —¿Ëbida cai, Icho? —caquien: —Ai, mibibimbi caic —capondash. Adoac Udas puduenanec nidpondash.

<sup>26</sup> Adshumbic Esusën Pete sananquin: —Mimbi Pete uaid nëid nec. Mibi bëdambo iquec, Papa —quequin Nuquin Papa chuitanquin cuësh-cuëshbanshun abëd icquido menebampondash. —Nëid cuësh-cuëshquin nibëdamiacimboen ëbi mëyanquin unës uaindac. Ëbi unës uate tantiaquin nëid peta —cac pebededtsëccondambi. <sup>27</sup> Adshumbien Esusën dëshoten actequid cushtoshon sananquin: —Mimbi uaid nëid nec. Mibi bëdambo iquec, Papa —quequin Nuquin Papa chuishun: —Nëid abitedishun acbeded —cac dëshoten abentsen cushtoaid pictsë-pictsen acbampondambi. <sup>28</sup> Aid actequid acshobien Esusën: —Nuquin Papan chiaid nuquin tsusedpan dada uapampicpadec ëbided cuidadec unësendabi. Nëid acquin: “Esused Nuquin Papan cuidac aton intac siebudpamboec unësposh. Aton Madoded cuidshun Nuquin Papan ëbi padenquo iquec,” quequin nëid acquin tantiata —capondashi.

<sup>29</sup> Adashic: —Nadquid actequid padpiden aquec cuishonquec mibëd tabadenquo iquendabi. Nuquin Papan abitedishun Icbombo icmiac abi yacnombo mibëdi cuishonquec tabadendabi —quepondash Esus ëbi chedo chiec. <sup>30</sup> Adashic cuëdënten abentsec cuëdëdash macuësh dapa Odibos caid pudundonoec nidanepondash Esus Udas Esus chieshënquido chiec nidbon.

*Petedo chieshuidte Esusën chiaid  
(Mad 14.26-31; Duc 22.31-34; Uan 13.36-38)*

<sup>31</sup> Macuësh dapa Odibos caid yacno nidquimbi Esusën chuipondashi. —Nëid inchëshëmbi Nuquin Papan chiapadec ëbi nianec mibitedi niquendac. Nuquin Papan naden chuipampic. “‘Icho cuesnu,’ canubi aton yuabo niquendac,” quequin Nuquin Papan dada uamepampicpadec mibitedi adec niquendac. <sup>32</sup> Padnueni unësash uincuenendac. Adanec mibi cainuec nidaid cuëshë utsi Cadidia caid yacno ëbia nidendabi —quepondash Esus abëd icquido chiec.

<sup>33</sup> Adoaquien Petedo: —Mibi cuesnuec cho-chosho isash utsibo dacuëdec niquenuec ëbimboen cuenenquimbo ictsiandac —queshobien <sup>34</sup> Esusën: —Tantia. Mibi chuinu. Nëid inchëshëmbi cachina bënë cuëdanabi icnuc: “Ëmbi isacmaidquo aidi nec,” mimbi ëbi caindac. Cachina bënë cuëdanabi icnuc 3tedec mibi adendac —caquien <sup>35</sup> Petedo: —Pada. Adtiapimboeni iquec. Chieshëmënquidon: “Esusbëd icquid mibi neque. Mibi cuesunenu,” caqui: “Ëmbi isacmaid neque. Padi,” quenquo iquendabi. Mibëdquiobi unëstsiandabi —Petedo quenubini: —Ai, ëbibic adecbidi ictsiac —quecuededpondabi Esusbëd icquidotedi.

*Quetsemani caid yacnoshon Esusën Nuquin Papa chiaid  
(Mad 14.32-42; Duc 22.39-46)*

<sup>36</sup> Adanec nidequi cuëte dadpen nitsinacno Quetsemani yacno nidpondash. Auëshquo Esus nadpondash. —Ambobi tabadta. Udicsëc nidshun Nuquin Papa chuitanu —quepondash.

<sup>37</sup> Adashic Petedobëdta Sebedeyon mado daëd buanec nidpondash. Udicsëc nidequi unësquo yanec shubiantiadtsëcquo yampac caondash. <sup>38</sup> Adshumbic Petedo chiec: —“Matsestedi icsaid ëmbi bedshunsho isun Nuquin Papan ëbi istiapimbo yanendac,” quiash unësquo iquebi. Ëbi yapadec ushenquo yec nëmbobi isec tabadta —quianec <sup>39</sup> udicsëc nidash nidaidën uebudshun Nuquin Papa chuipac caondash. —¿Ada mimbi ëbi unës uamenquo icpatsia, Papa? Mimbi: “Ai, mibi unës uamenquo iquembi,” cac bëdambo ictsiabi. Mimbi: “Nëbi mibi unës uamenu,” cac

mimbi tantiacpadequi unësendabi —quepac caondash Esus Nuquin Papa chiec.

<sup>40</sup> Adtanec choshon isquien Petedo chedo ushpec: —Ushenquio yec isequi tabadta —caboqui. —¿Yuec-yuecpactsec ushenquio icquin istiapimboda icco? <sup>41</sup> “Satanasën icsamenushe,” qeshun ushenquio icquin Nuquin Papa chuita. “Ushenquio iquebi,” queboedobi ushcas mëmunenquio yec mibi ushpec —capac caondash Esusën Petedo chedo chuiquin.

<sup>42</sup> Adtanec padpidec nidoashun Nuquin Papa chuioaic: —Ëbi unës uame-tiadquio icquin ëbi unës uameta, Papa. Ëbi unës uametiapimbo icquin mimbi ëbi unës uamenquio ictsiac. Mimbi tantiacpadomboen nata, Papa —quetanec <sup>43</sup> choaquin isquien Petedo chedo ushoaic ushcas mëmuntiapimbo yec.

<sup>44</sup> Adsho istanec nidoashun ambi chuibocpadomboembidi Esusën Nuquin Papa chuitanepac caondash tedesteden.

<sup>45</sup> Adtanec choaquin ushash uesho istuidoashun: —¿Ushecta ue? Nëbimbobi ëbi unës uamenuen ëbëd icboedëmbi icsambo icquido ëbi bedmeque. <sup>46</sup> Nidnu nid. Is. Ëbi bedmenuec ëbi bedmequid choeque —quepondash Esus Udas chosho isash.

*Abi chieshënkuidon Esus bedaid*  
(*Mad 14.43-50; Duc 22.47-53; Uan 18.2-11*)

<sup>47</sup> Adnubien Udasën Esusbëd icboedën bedtanac matses dadpen cuesan-tiadpambo yec chështebëdta cuate sanambededtsëcquiec cho-chopondash. Nëish yua abided unës uaquido chuiquid dapabobëdta con matses tsu-siobon: —Bedtan —cac cho-chopondash. <sup>48</sup> Ambi bedtanaidobëd cho-choquimbien Udasën: —“Nëid Èsus nec,” quequin adoendambi —abi quiacpadembi <sup>49</sup> Esus tansudcatuidpondash: —Chobi, Icho —quequin. <sup>50</sup> Adoaquien Esusën: —Ëmbi tantiaboedquio mibi nec. Ëmbi adoboedënquiobi mimbi tantiacpadomboen nata —qeshobien cho-choquidon Esus bedtuid-pondash. Aden bedshun: —Cuidmenun chuiquid dapa yacno mibi buanu —capondash.

<sup>51</sup> Aden Esus bedshobien abëd icquidën abi tsiusudaic chështe chictanquin chuiquid dapan yua pateshunepondash. <sup>52</sup> Adoshobien Esusën: —Padi. Chën. Min chështe tsiusudoata. Cuesanquid icsho adembidi cuidnushe. <sup>53</sup> ¿Tantienquioda ique? Ëmbi chiac con Pan ambi abi yacnoshon uaido mayan bëdabo dadpenquioshë ëbi cudasmenuen chometsiash. <sup>54</sup> Nuquin Papan aden ëbi cudasmic bedadtiapimbo icsho ¿mitsipaden Nuquin Papan chuiquin dada uamiampicpadomboen ëbi naden bedpatsiash? —capondash pateshunanquid chuiquin.

<sup>55</sup> Adashic abi bedquido chiec: —¿Atotsi quenuc chështebëdta cuate sanambededtsëcquiec ëbi bednuec cho? ¿Nuqui chuiquid dapan chiaid niac-niacquin matses cuesanquido chuiquid dapadabi nedi? Mabi mimbi is-boedquiobi neyoc. Badiadquidën badiadquidënquien Nuquin Papa tabadte shubu uashunaid daquënë uaidën puduedshun chuideneshobi ma mimbi ëbi bedenquio icboc. <sup>56</sup> Padenquio icboedombi Nuquin Papan tantiac-padënquiobi mimbi ëbi bedec. Ëbi bedte chuiquin Nuquin Papan nuquin tsusedpa dada uamiampicpadomboen mimbi ëbi bedec —quequin Esusën chuinubini niquepondac: —Cuenenquio ictsiabi —queboedi.

*Caipas caid yacno Esus buanaid*  
(*Mad 14.53-65; Duc 22.54-55, 63-71; Uan 18.12-14, 19-24*)

<sup>57</sup> Adnubien chuiquid dapambo Caipas cuëmédquid yacno Moisesën dada uampid chuibanquidobëdi tsusio utsibo cho-chopac caondash. Adnubien ambobi Esus bëpac caondash. <sup>58</sup> Adnubien Petedo uanoshon isbëec tsyuec chopac caondash. Choash chuiquid dapabo tabadacno daquënë uaidën puduedpac caondash. Adashic Esus mëyansho isnuec puduedash chuiquid dapan namiaido sondadobëdi tsadtuidpac caondash Petedo.

<sup>59</sup> Adnubien cho-choboedo tsusio dapabo: —Esus unës uamenuen: “Esus icsasho isombi,” quequin muaquidon chuisho tantianuna —queshun chomiatic muaquido dadpeshun: —Esusën icsamboen nasho isombi —quequin chuipac caondash. <sup>60</sup> Aden Esusën naid muaquin chuiquin Esus unës uatiadquio icquid chiambo icpac caondash. Adnubien muaquid daëdshun chuituidpac caondash. <sup>61</sup> —Nuquin Papa tabadte shubu uashunaid caic: “Uesquin chic-chictanquin padpiden nacnenoaquin daëdec ushquin nainendambi,” ma Esus quepondac —quepac caondash.

<sup>62</sup> Adshobien chuiquid dapabo chuiquidën Esus chuiquin: —¿Atotsi quenuc ado? ¿Atotsi nëidën chiec? —caquien <sup>63</sup> Esusën ëcbedenquio icpac caondash. Adshobien chuiquid dapan: —Abimbo chuita. “Nuquin Papan cuidchitoshe,” queshun abimbo cata. ¿Nuquin Papan chomiaidquio aton Madombobida mibi nepe? —caquien <sup>64</sup> Esusën: —Ai, mimbi chiaidquio nebi. Tantia. Mibitedi chuinu. Nuquin Papan abitedishun Icbombo icmiacshobini mimbi isendac. Adecbidi Nuquin Papa yacnuësh padpidec choec abu ushu yacnuësh choshobini mimbi isendac —quepac caondash Esus.

<sup>65</sup> Adsho tantiash chuiquid dapambo chieshtotanquin aton dashcute bëntse icquid dached-dachedquepac caondash. —¿Ada tantio? “Nuquin Papan Madombobi nebi,” quequin Nuquin Papambo icsamboen chiec mua-posh. Ambi icsamboen naid utsi chuisho tantiatiapimbo iquebi. Ambibi Nuquin Papa muauasho tantiashun <sup>66</sup> ¿Atotsi natiadquio ique? —caquien abëdtan chuiquid utsibo: —Adquid cuidquid quedeneque. Ünës uamequimbien ictiad —quecuededpac caondash.

<sup>67</sup> Adshumbien Esus chieshënquin bëcuishtuabudnetanquin mëshëbudtanquin mëdanten bëse-bësepac caondash. Bëse-bësesho istanquin utsibontsen isti-apimbo icnuc Esus dashcuten bëpuctanquin mëdanten bëcues-bëcuespac caondash. <sup>68</sup> Bëcuestanquin: —“Nuquin Papan madombobien nec,” canu. En chui. Tantanu. ¿Tсандan mibi naoshe? —cabededtsëcquien mamënshumpac caondash Esus.

*Esus caic: Ëmbi isacmaid nec, quequin Petedon chiaid*

*(Mad 14.66-72; Duc 22.56-62; Uan 18.15-18, 25-27)*

<sup>69</sup> Adnubien Petedo tabadacno choshon chido yuan chuituidpac caondash. —Caidia yacnocquid Esus caidbëd ma mibi icpaboc —caquien: <sup>70</sup> —Tantiadenquio icnuc mimbi chiec. Ëmbi isacmaidquio mimbi chiec —quec Petedo muaic taëpac caondash.

<sup>71</sup> Adanec daquënë uaidën puduedte shëcuë dayun nidash nidtuidpac caondash.

Adshobien chido yua utsin: —Nasaded yacnocquid Esusbëd ma nëid icpaboc —caquien <sup>72</sup> Petedo: —Ma ëmbi isacmaidquio Esus neyoc. Abimbo caimbi. Nuquin Papan cuidchitoshe muasho —queoapac caondash muequi.

<sup>73</sup> Adash yuec-yuecpactsëcshumbien ambo tabadquidontsen Petedo chuipac caondash. —Aidbëd icquidien mibi nec. Caidia yacnocquid onquiacbimboec ma mibi onquepayoc —quesho tantiash <sup>74</sup> Petedo: —Comapenen Nuquin Papan cuidchitoshe muasho. Abimbo caimbi. Ma ëmbi isacmaidquio neyoc —queoapac caondash.

Adec 3tedec Petedo muanubien cachina bënë cuëdampac caondash. <sup>75</sup> Adsho tantiashun Petedon Esusën chuiboedquoio tantiactampac caondash. —Cachina bënë cuëdanabi icnuc mimbi ëbi caic: “Ëmbi isacmaid nec,” capendac tedesteden —quequin Esusën chuiboedquoio tantiactanec umanuc puduenanec nidec Esus muauabosh natiaic shubinidpac caondash.

## 27

### *Pidato caid yacno*

#### *Esus buanaid*

(*Mad 15.1; Duc 23.1-2; Uan 18.28-32*)

<sup>1</sup> Adnubien chuiquid dapabo aton tsusio utsibobëdi Esus isec ushenquoio badiadpondash. Badiadshun Esus chieshënquin: —Nuqui yuaquid ancanquid Esus unës uamec nidnu. Nid —queshun <sup>2</sup> podo cataneshun ancanquid Pidato cuëmëdquid ismenuen Esus buampac caondash.

#### *Esus bedmequid Udas têtaniadaid*

<sup>3</sup> Adnubien Udas Esus bedmeboed: —Unës uamechitembien iquec. Unës uametiapimbo iquebi. Ëmbi bedboed piucquid shocoshëmpi 30ted meneoatanu —quianec abi meneboed tsusiobo menenuc nidpac caondash.

<sup>4</sup> Nidshun tsusiobo chuituidpac caondash. —Icsachitobi. Unës uanuequido bëdambo icquidi bedmechitombi. Nëid mimbi meneboed mibi menenuc chobi. Në bed —caquien tsusiobo: —Padi. ¿Atotsieshun nai? Ma mimbi bedmepaboc —quepac caondash Udas caic. <sup>5</sup> Adoquien Nuquin Papa tabadte shubu uashunaid shëcuën ambi bedboed shocoshëmpi piucquid ansecanec nidash uano cuenash têtaniadpac caondash Udas.

<sup>6</sup> Aden piucquid shocoshëmpi ansecacsho bedashien tsusio dapabo: —Nuqui dayun uaid shocosh utsibëdta dayun uatiapimbo iquec. Unës uanuen meniaid shocoshëmpi dayun uatemaïd quedeneque. <sup>7</sup> Matsu nacnenquidën tied bedquin nëid menenuna. Nuquin matsespenquoio isedquido unësacsho ambo chococanun aid tied bednuna —queshun piucquid meniac caondash. <sup>8</sup> Aidon bedacsho isun nëbi aid tied cuënquin nadopec. —Unës uamequidën bedaid tied nec —capec. <sup>9</sup> Aden Udasën shocoshëmpi 30ted menete nuquin tsusedpa Edemias caidën dada uapampicpaden napac caondash. Naden dada uapampic. “ ‘Aid bednuen Isadaïdbon piucquid shocoshëmpi 30ted meneuidaid bedoashun <sup>10</sup> matsu nacnenquidën tied bedquin meneoapondash,’ quequin Nuquin Papan chiaïd dada uaombi,” quepampic Edemias.

#### *Pidato caidën Esus chuimiaid*

(*Mad 15.2-5; Duc 23.3-5; Uan 18.33-38*)

<sup>11</sup> Adnubien isadaïdbo yuaquid ancanquid Pidaton Esus bëacsho chuipac caondash. —¿Min matses isadaïdbo chuiquid dapamboda mibi nepe? —caquien Esusën: —Ai, aid nebi —capac caondash. <sup>12</sup> Adnubien abi chieshënquidon muaquin Esusën naid Pidato chuipac caondash. Adsho tantiashun Esusën ëcbedenquoio icpac caondash.

<sup>13</sup> Adshobien Pidaton Esus padpiden chuioaquin: —Mibi icsaid dadpen chuipac. ¿Tantienquioda ique? ¿Ëcbedantiapimboda ique? —caquien <sup>14</sup> ëcbedenquoio icpac caondash Esusën. —Nëidon muauac nebi —quequin chienquoio icsho tantiash: —Adquid tantiambo iquembi —quepac caondash Pidato.

#### *Esus unës ua, quequin chiaïd*

(*Mad 15.6-15; Duc 23.13-25; Uan 18.38-19.16*)



<sup>15</sup> Nuquin Papan isadaidbo unës uainquo icquin matamiampid tantiate ushëmbi seta utsin-utsinquien Pidaton quënën nauedaid isadaidbo abentsëc cuemedene. Pidaton: —¿Tsutsi abentsëquimbi cuemepe? —cac isadaidbon chiacpadquid abentsëc cuemedene. <sup>16</sup> Esus bëabi icnuc uimanëmënquidquo Badabas cuëmédquid nauedpac caondash.

<sup>17</sup> Adnubien Esus cuidte chuisho tantianuec cho-choash dadpenquo tabadpondash. Adsho isumbien Pidaton: —¿Tsutsi abentsëquimbi cuemepe? ¿Badabastambi cuemepe? ¿Nëbi mimbi bëboed Esus Quidistu caidtambi cuemepe? —capondash. <sup>18</sup> —Esus chieshënquidon: “Nuqui padenquo yanuc nuqui dëniaquec Esus chuiquid dapa yanushe,” queshun Esus bëaccosh. Nëmbo tabadquidon: “Esusquo cueme,” capashuni —quequin tantiaquin aden chuipanëdash Pidaton.

<sup>19</sup> Adashic matses icsaido cuidte chuinuec tsadte dapan abucquo tsadto-pondash Pidato. Adshobien yuan chuituidpondash. —Min chidon: “Chuitan,” cac chobi. Esus caic: “‘Aid dada bëdambo icquid neque. Unës uamenda. Dacuëdampambo icsho ushquin isombique. Unës uamenda, quiosh’ quequin chuitan,” min chidon cac chobi mibi chiec —quequin aton yuan chuituidpac caondash.

<sup>20</sup> Adnubien Esus chieshënquido tsusiobon ambo tabadquido chuibudpondash. —Pidaton: “¿Mitsicquidimbi cuemepe?” cac: “Badabas cuemequin Esus unës ua,” cado-cadota —cac: —Ai, adoendambi —quecuededpondash.

<sup>21</sup> Adnubien Pidaton padpiden: —¿Mitsicquidimbi cuemepe? —caquien ambo tabadquidon: —Badabas cuemeta —cadonepondash. <sup>22</sup> Adoaquien Pidaton: —Ma Esus Quidistu caid. ¿Mitsipadopembimbi aid ique? —caquien: —Unës ua. Cuesten dectanquin unës ua —quecuededpondash.

<sup>23</sup> Adoaquien Pidaton: —¿Atotsieshun mimbi adope? ¿Atotsi icsa uasho mimbi adope? —caquien buëdanquiec cuëdec: —Cuesten dectanquin unës ua —quecuededpondash.

<sup>24</sup> Adsho —Padi icnuna —caqui niacbidanquiec adequi unës uate bunquiec cuesantiadpambo yansho isash: —Acte beccho —quepondash Pidato. Bëacsho tasun dapan cushtotanec mëpamédquin abitedi ismepondash. Adashic Esus caic: —Nëid unës uametiapimbo iquebi. Nëid unës uamete bunec mibien ciudadtequidombo nendac. Embien adotiapimbo iquec. Mëpamëdec bëchish ucuadacimboec mimbi icsamiaid ucudebi —quiash mëpamédquin ismepondash Pidaton. <sup>25</sup> Adsho tantiashien: —Con nabobëdtsëqui adequi ciudadtequidombo icnuna —quecuededpondash abitedimbo.

<sup>26</sup> Adsho tantiashun Badabas caid cuemequin Esus cueshcaten cueshcamepac caondash. Adshumbic: —Cuesten dectanquin unës uatan —quequin sondado buamepac caondash Pidaton.

*Esus mamëshunaid*  
(*Mad 15.16-20; Uan 19.2-3*)

<sup>27</sup> Adoaquien sondadon Pidaton shubun Esus yuedshun: —Isec cho —cac aton sondado utsibo dadpen cho-chopac caondash. Cho-choshon Esus mamëshumbedepac caondash unës uanumbi. <sup>28</sup> Abi dasiuidaid ënapen icquid chicshun: —¿Chuiquid dapada nedi? —quequin dashcute piumbo icquid dasiuintanquin <sup>29</sup> mauete pinchuc-pinchucpambo icnuc nacenaid mauemepac caondash. Adshumbic aton matses chuiquid dapan sananacimboen sananuc abiucshun cuate sanamepac caondash. Adshumbic aton matses chuiquid dapa ismiacimboen mamëshunquin: —Is. Isadaidbo chuiquid dapambo neque —queshun danëshën seabudquin

Esus ismepac caondash. <sup>30</sup> Adshumbic dacuishtucatanquin ambi cuate sanameboed bedshuntanquin aidëmbi matombudnepac caondash. <sup>31</sup> Aden mamënsuntanquin ambi dasiuimboed chictanquin aton dashcutebidi dasiunoapac caondash. Adoshon: —Ma unësnuequin cuesten dectanec nidnu. Nid —quequin Esus buampac caondash.

*Esus cuesten dectanaid*

(*Mad 15.21-32; Duc 23.26-43; Uan 19.17-27*)

<sup>32</sup> Buanquin Esus abi dectante cuate yuëmemebanquimbi dada nidaid Sidene caid yacnuësh choquid Simon cuëmëdquid Esusën yuëmiaid sondadon chiadtomebidampondash. <sup>33</sup> Adobidanec nidec macuësh dapa yacno matses mapi canitebimboec isadquid Codocota caid yacno chopondash.

<sup>34</sup> Choshombien sondadon uba chinaid actequid paëmbo dauë nēcushaid Esus meneuidpondash. —Në. Ac —cac pictsäc tantanec: —Padi —quepondash aquenquo yec. <sup>35</sup> Adshobien cuate napotiaid bëboedën dectampondash. Dectanshumbic ambi chicshumboed Esusën dashcute bednuequin sondadobon abi cuëmëdquidtedi dada uabanshun tēchun sandoshon cadotanequin dada uatempi puduemaid isbanquin Esusën dashcute bedbampondash. <sup>36</sup> Adash: —Esus unëso isnu —quec sondado tabadcuededpondash.

<sup>37</sup> Adshumbic: —“Nadquid icsho cuidquin unës uac,” quequin ma isquidon tantianu —qeshun cuate cuëshën naden dada uapaccondash. —Nëidquo Esus nec. Isadaidbo chuiquid dapambo nec —quequin dada uaid Esusën mapino dectampondash. <sup>38</sup> Ampequid daëd cuesten ëquë dectambudcuenquin dectantanquin nënantanquio Esus dectampondash.

<sup>39</sup> Adshobien podqued cuëmanquo Esus diadsho isbidanequin chieshënquin chuipondash. <sup>40</sup> —“Nuquin Papa tabadte shubu uashunaid chic-chictanquin daëdec ushquin nacnenquin nainendambi,” quiondaid yec bud. Nuquin Papan madombo yec unësenquo yec auëshquiobi bud —cabidanepondash. <sup>41</sup> Adecbidi chuiquid dapabo yec Moisesën dada uampid chuibanquido yec tsusiobo yec quequido Esus icsamboen mamënsunec nadpondash. <sup>42</sup> —Utsibo ismenuembien comapenen tantiaquin matses bēdamechitosh. Adembidi comapenen tantiaquin nacnenash budsho isnuqui. “Isadaidbo matses chuiquid dapambo nebi,” quequid neque. Ma budnu. Dectamboedi abibi budsho isash: “Nuquin Papan chomiaid yec Nuquin Papan Madombo nec,” quetsiabi. <sup>43</sup> “Nuquin Papa tantiaquid yec Nuquin Papan madombo nebi,” quequid icsho: “Ai, con madombo nec,” quequin ma Nuquin Papan budmenu. Unësenquo icsho isnu —quepondash tsusiobo. <sup>44</sup> Adnubien abēdta cuesten dectamboedon ampequidontsen Esus mamënsunpondash.

*Esus unësaid*

(*Mad 15.33-41; Duc 23.44-49; Uan 19.28-30*)

<sup>45</sup> Adnubien ushë cuembo icnuc inchëshbocpadquiec inchëshpondash. Ushë cuembo icnuc inchështanec ushë budambi ushëmbo yanoapondash. <sup>46</sup> Ushëmbo yanubien Esus comapenec cuëdec nadpondash. —Eloi, Eloi, lama sabactani —quec con onqueten cuëdpondash. —¿Atotsieshun ëbi bēdamboen isenquo yano, Papa Edoen? —quec adondash.

<sup>47</sup> Adec cuëdsho tantiaish isquido nadpondash. —Edias yampid cuëchitequien nec —quiampondash. <sup>48</sup> Adnubien Esus isec tabadquid abentsäc titinuanec nidshun shapu-shapupactsäcquid bedtampondash. Bedtanshumbic actequid mucacquid anidtsäcquidën shapu-shapupactsäcquid punshun cuate dēdectanshun abuc sananec: —Chishmenu

—queuidpondash. <sup>49</sup> Adnubien abi isquido: —Padi. Nuquin tsusedpa Edias yampid choshon budmesho isnu —quepondash.

<sup>50</sup> Adnubien padpidec buëdanquiecuëdtanec Esus unëspondash. <sup>51</sup> Esus unësnubi Nuquin Papa tabadte shubu uashunaid yacnuësh: —“Quënë uquëducquidën Nuquin Papa tabadtembo nec,” caidën utsi puduednushe —queshun dashcute ënapen icquid dectanaid abucuësh canchedbudcuenac caondash abitiombi. Nuquin Papan ambi bëdamboen iste tantiamenuen nanëdash. Adnubien nidaid uëdëquequidën cuënote dapa dadpen cuëshëdbudnepac caondash. <sup>52</sup> Adec unësaid nauedaid shëcuë bëtashte cuënote dapambo cuëshëdnubien Nuquin Papa tantiaquido ënden unësaido abentse-abentsec uincuenanec chopac caondash. <sup>53</sup> Esus uincuenan adec uincuenaidon shubu dadpen icquid Edusaden caid yacno nidshun matses dadpen ismepac caondash.

<sup>54</sup> Nidaid uëdëquenec dacuëdampambo icsho isashien: —Esus unëso isnu —quiash tabadquido sondado chedo abi chuiquidbëdi dacuëdtanec: —Ma Nuquin Papan Madombobi nepayoc —quepac caondash.

<sup>55</sup> Adnubien chidobo Cadidia yacnuësh Esusbëd choquin abi codocashumboedo Esus unëso isnu ec ancuenshun isec tabadpac caondash. <sup>56</sup> Nëidted icpac caondash. Nëidic Madia Mactada yacnuësh choquid. Nëidic Madia utsi Acobon tita. Aid Ose cuëmëdquidën titabidi niosh. Nëidic Sebedeyon chido Uanën tita. Aid Acobo cuëmëdquidën titabidi niosh. Aidtedi uanoshon isbededec tabadpac caondash.

### *Esus chococaid*

*(Mad 15.42-47; Duc 23.50-56; Uan 19.38-42)*

<sup>57</sup> Adnubien inchëshbudtsëqui aton na dadpen dayun uaquid shubu dadpen icquid Adimateya caid yacnocquid Ose caid: —Esus tantiaquid nebi —quianec Esus bedec chopac caondash. <sup>58</sup> Choshombic chuiquid dapa Pidato caid chuituidpac caondash. —Esus bednuec chobi —cac aton yua chuiquin: —Ma buanu. Bedmetan —capac caondash Pidaton. <sup>59</sup> Aden bedtanshun Osen Esus dashcute bëchish nibëdquidënquio nuamboshë icnuc datanedonepac caondash. <sup>60</sup> Adotanquimbic nidaid cuënoteuidpambo icquid macuësh tsimpiduc shëcuë uaboed ambi: —Ëbi unësacsho nauedte nendac —caidëmbi Esus nauedpac caondash Osen. Adotanquimbic cuënote dapabidi bëtashte uaid bincumbëshun bëtimpac caondash. Adotanec nidpac caondash Ose. <sup>61</sup> Adnubien Madia utsibëd Mactada yacnuësh choquid Osen Esus nauedsho isbosh ambobi tsadpac caondash.

### *Esus nauedaid isec sondado tabadaid*

<sup>62</sup> Isadaidbon obeca bacuë unës uacpadën Esus unës uamiash abentsec ushashi chonoadtemaid ushëmbi Esus chieshënquido Pidato caid chiec nidpac caondash. Padiseyobobëdi nidshun chuiquid dapabon Pidato chuituidpac caondash. <sup>63</sup> —Esus nadpadenec. “Unësash daëdec ushash uincuenendabi,” quec muapadeneque. <sup>64</sup> Daëdec ushquin min sondado Esus nauedaid cudasmata. Esusbëd icboedon chicshun buanushe. Aden buanash: “Uincuenaccosh,” quec muanushe. Unësabi yec abi: “Nuquin Papan madombo nebi,” quec muaic icsambo iccosh. Adembidi: “Uincuenaccosh,” quequin muauac icsamboshë ictiashe. Min sondado: “Cudasta,” quequin chuita —capac caondash Esus chieshënquidon. <sup>65</sup> Adoaquien Pidaton: —Ai, con sondado buantan. Aden buanshun: “Unësaid nauedaid cudasec databëdta,” cata —capac caondash. <sup>66</sup> Adoaquien isadaidbo tsusiobon sondado buanshun cuënote dapa bëtashaid bucun bëbitaccapac caondash. —Bëbitaccaid isash: “Chuiquid dapan bëbitaccamiaid nec. Cuidnushe. Esus chictiapimbo

iquebi,” ma quenu —qeshun bucun bëbitaccapac caondash. Adoshon: — Beduanushe. Isquieci tabadta —capac caondash sondado chedo chuiquin.

## 28

### *Esus uincuenaid*

(*Mad 16.1-8; Duc 24.1-12; Uan 20.1-10*)

<sup>1</sup> Esus unësbon abentsec ushash abi chonoadtemaidëntsen abentsecbidi ushash dominco badiadnuc chidobo Esus nauedshun bëtimboed isec tabadnuec padpidec choapac caondash. Mactada yacnuësh choquid Madia ut-sibëd isec choapac caondash. <sup>2</sup> Choash isec tabadnubi nidaid uëdëquiampac caondash. Adnubien Nuquin Papan abi yacnoshon uaid mayan bëda abucüësh budtanquin cuënote dapa bëtashaid shëcbempac caondash. Adtanec cuënoten tsadtopac caondash. <sup>3</sup> Mayan bëda yec abu bed-bedquiabimboec ushëmboshë bëchamauanquieci icpac caondash. Aton dashcute adquiobidi bëchish nibëdquieci ushumboshë icpac caondash. <sup>4</sup> Adec dacuëdampambo icsho isashien unësaid cudasquido sondado dacuëdtanec uëdëquec tantiadem-pambo yec padishbudnepac caondash abitedi.

<sup>5</sup> Adnubien mayan bëdan Madia chedo chuipac caondash. —Dacuëdenda. Cuesten dectanquin unës uaboed Esus isnuec mibi tabadec. <sup>6</sup> Nibëdec. Nidosh. Ambi chuibocpadequi uincuenash nidosh. Abi uebocno en isec cho —cac chidobon anisnubien padpidec onquequin chuioapac caondash. <sup>7</sup> —Mimbi isboed Esusbëd icboedo chieci nid. Badedquio nidshun naden chuita. “Unësboedi uincuenash Cadidia yacno abia nidshun mibi cainendac. Anoshon mimbi Esus isendac,” quequin chieci nid —caquien <sup>8</sup> auëshquiobi chidobo dacuëdboedi cuishonquec titinquier nec nidanepac caondash.

<sup>9</sup> Titinquier nec nidaneshobien Esusënquiotsen bëquedpac caondash. Adash: —Mibi isnuec nebi —quepac caondash. Adshobien chidobon: —Con Icbo nec —quequin ismenuen danëshën sebudquin taë uidën uapac caondash.

<sup>10</sup> Adoquien Esusën: —Dacuëdenda. Con utsibo ëbëd icboedo chieci nid. “Cadidia yacno nideci nid. Anoshon mimbi Esus isendac,” quequin chieci nid —caquien chieci chopondash Madia.

### *Esus uincuensho isun sondadon muauaid*

<sup>11</sup> Madia nidnubien Esus nauedaid isquido sondado abi chomeboedo isadaidbo chuiquido chieci chopac caondash. Mayan bëda chonoc Esus uincuemboed chuituidpac caondash.

<sup>12</sup> Adoquien isadaidbo chuiquidon aton chuiquid utsibobëd onqeshun aid sondado chedo chuipac caondash. —Mimbi chuiboed utsibo chienda. Mibi piucquid dadpen menenu —qeshun piucquid dadpenquio menepac caondash. <sup>13</sup> —Mimbi isboedquio chienquio icquin naden chuita. “Ëbi chedo ushtoan abëd icboedon Esus ampequin beduanaccosh,” quequin utsibo chuita. <sup>14</sup> Mibi caic: “Sondado ushtoac caosh,” quequin chiac mibi chuiquid dapa Pidaton chushcaquin mibi cuidnushe. Aid: “Chushcaquin cuidenda,” quequin chiendambi —qeshun <sup>15</sup> piucquid meniac bedanec nideci isadaidbo chuiquidon chiapadec muapac caondash sondado. Adem-bidi nëbi isadaidbo dadpenshun: “Esus ampiac,” quequin chuioaic.

### *Ëbi chuibeneta, quequin Esusën chiaid*

(*Mad 16.14-18; Duc 24.36-49; Uan 20.19-23*)

<sup>16</sup> Adnubini Esusbëd icboedo 11tedi yec Esusën chiacnombo Cadidia yacno nideci macuësh dapa yacno nidanepandac. <sup>17</sup> Macuësh dapa yacno nidquimbi Esus istuidpondambi. Istuidshumbic: —Con Icbo neque. Ismenu —qeshun

danëshën sebudpondambi. Utsibombien: —¿Con Icbombobida nepeba? — capondash.

<sup>18</sup> Adsho isun Esusën anoentsëqui choquin chuituidpondash. —Ëbipadquid utsi nibëdec. Nuquin Papan uaido abitedi con na nec. Abitedishun Icbombo icquin abitedimbo namequidquo nebique. Mibitsen namenu. <sup>19</sup> Nidaid utsi-utsiec yacno nidshun ëbi tantiaquido icmenuen matses abitedi ëmbi chiaid chuibeneta. Adoac ëbi tantiabensho utsibo ismequin acten mentobeneta. “Esus tantiabenshun Nuquin Papatsen tantiaquid nec. Nëidbëd Nuquin Papan Mayan tabadeque. Utsibo ismenu,” quetanquin aden acten mentobeneta. <sup>20</sup> Mimbi mentoaido chuiban. “Nuquin Icbon chiacpadece bëdamboec tabadnuna,” quequin ëmbi chuiboedtedi chuiban. Mimbi adosho isash mibëd iquendabi. Nidaid abitedi nibëdanabi icnuc mibi chedo nianenquo iquendambi. Adembidi ëbi tantiaquidotedi niantiapimbo iquebi — quepondash Esus ënquimbi chiec.

## MADCOSEN DADA UAID

*Bëyuc choshon Uanën Esus chote chiaid*

*(Mat 3.1-12; Duc 3.1-18; Uan 1.19-28)*

<sup>1</sup> Madcos nebi. Nuquin Papan tantiampicpadquiec aton madombo Esus abi yacno matses yuedquid chote tauamboen chiaid bëda chuinu. Tantia.

<sup>2</sup> Abi aton mado Esus chiec onquiaid Nuquin Papan Isayas dada uamiampid nad iquec:

“Naden naimbique. Tantia, mado. Mibi chotequid chuibanquidba chomen-dambi. Aidën chuibanac ambi tantiaid icsa ënshun mibi cainquidombo iquendac, mado.

<sup>3</sup> Shubu nibëdacnoshon comapenec onquequin mibi chotequid aidën chuibanendac naden:

Nuquin Icbo choeque.

Aid tantianu quequin mibi icsaid ëmbanta quequin mibi bëyuc chuiquidën mibi chotequid chuibanendac, mado,”

quequin aton mado chiec onquiaid Nuquin Papan Isayas dada uamiampid nec.

<sup>4</sup> Aden chiampicpadquiequi Esus bëyuc chuitequid Uan chopondash. Shubu nibëdacno tabadquin comapenec onquequin chuibampondash. Mibi icsaid ënshun Nuquin Papan chiaid tantiaquin nabanta. Aden tantiaquidquo icsho mibi cuidenquo yec mibi icsaid Nuquin Papa bëpiscudendac quequin chuibampondash. Aden chuibanquimbi ambi chiapadomboen naquid acten mentobampondash Uanën. <sup>5</sup> Aden Uanën chuibanubien matses dadpen tantianu quec choded-chodedpondash. Nidaid Udeya caid yacnoësh chopondash. Edusaden caid yacnoëshbidi cho-choapondash. Cho-choash tabadquin tantiashien, Icsapobi, quec abi icsaid chiec utsi-utsiec onquecuededpondash. Aden abi icsaid chuibanquidtedictsëqui Uanën acte Odan caidën mentobampondash. <sup>6</sup> Ambo iquec Uan nidaidën capuquid cameyo bu daëdcaid dasiuidquid niondash. Nidaidën capuquid yua bitsi nacnenaïd tsiuquid niondash. Shioshbimboecquid shuishun pequid niondash. Bacun chequid niondash. <sup>7</sup> Aidëmbi naden chuibampondash: —Con tsyuecquid choendac. Aidi nadatiambocquin naquidquo nendac. Aidi bëdamboshëcquid icnuc ëbi icsaquid icsho çatotsieshun aid choec quequin chuiquidquo Nuquin Papan icmiosi? quec tsadebi. <sup>8</sup> Mibi acten mentoquid nebi; aidien abipadquiocquid aton Mayan menianquidquo nendac —quepondash Uan.

*Esus acten mentoaid*

*(Mat 3.13-17; Duc 3.21-22)*

<sup>9</sup> Adnubien ambi chian-chianaidquo Esus chopondash. Nidaid Cadidia caid shubu dadpen icquid Nasaded caid yacnoësh chopondash. Adshobien Uanën Esus acten mentopondash. <sup>10</sup> Aden acten mentoac Esus pudundonobi abu bëcadoacnoëshquo dëbimbimboec isadquid abipadquiocquid aton Mayan bede-bedequemboec Esusbëd icnuec budpondash. <sup>11</sup> Aden budmetanec ambi bëcadoacnoëshi: —Mibentsëcquiobi icsho ëmbi tantiaidquo mibi nec, mado. Eëmbi bëdamboen isaidquo mibi nec —quepondash aton Papa Esus chiec.

*Esus Nuquin Papan chiaid niacmenuequin Satanasën tanaid*

*(Mat 4.1-11; Duc 4.1-13)*

<sup>12</sup> Aden chuibon budmeboed Mayanën: —Shubu nibëdacno nid —cac nidash Esus tsadpondash abentsëcquiobi. <sup>13</sup> Ambo tsadquimbi ushë abentsëc nidmec utsi choaid abutometsëcquieci tabadpondash. Ambo tabadshobi Nuquin Papan chiaid niacmenuequin tanu quianec mayan icsan icbo Satanas caid chopondash. Aden tanaqui niaquesambo yec tsadpondash. Adec tsadnubi nidpondash Satanas. Ambobi bëdi nibëdquid deon caid chedo icpondash. Ambo tsadshobi ambi uaido mayan bëdabon cho-choshon nashumbedepondash.

*Cadidia yacnoshon tauamboen chuibanaid*  
(Mat 4.12-17; Duc 4.14-15)

<sup>14</sup> Ambo yuec tabadash Esus choambien isadaidpembo ancaquidën acten mentoanquid Uan bedmeshun quënën nauedmepondash. Uan nauedmiambi nidaid Cadidia caid yacno nidshun Nuquin Papa yacno shubu abentsëquën tabadte iquec quequin Esusën chuibampondash. <sup>15</sup> —Nuquin Papan chiampidpadquid abi yacno yuedanquid nëmbobi iqueque. Mibi ic-said ënshun ëmbi chiaid bëda tantiata —quepondash Esus comapenec onquec.

*Ëbëd iquec cho Esusën abia caido*  
(Mat 4.18-22; Duc 5.8-11)

<sup>16</sup> Aden chuibanashic chian Cadidia caid cuëman capupondash. Ambo capuquin Petedo Simombëdtan aton utsin Andedesën nëshaid acte nënebansho istuidpondash. Aid daëdi nuëcquid bedquid niondash. <sup>17</sup> Aden nuëcquid bednuen nëshaid nënesho isec: —Nëshaidën nuëcquid bedquid icboedi nëbi Nuquin Papa yacno yuedanquid iquec quequin chuitequid mibi icmembique. Ëbëd iquec cho —quepondash Esus. <sup>18</sup> Adsho tantiash nëshaid abëd icquid menianec abi chuiquidbëd nidanepondash.

<sup>19</sup> Adanec udictsëc nidanequin Sebedeyon mado daëd Acobobëdta Uan Esusën istuidpondash. Aidon aton nëshaid nacnempondash cano antabëdquin. <sup>20</sup> Aden nacnensho isun Esusën ambi utsi chuibocpadomboen chiaquien aid daëdshuntsen aton papabëd aton yua cano antabëdsho nianec Esusbëd nidanepondash.

*Mayan icsa Esusën dapuduemiaid*  
(Duc 4.33-37)

<sup>21</sup> Adashic chian Cadidia caid yacnoësh nidequi shubu dadpen icquid Capednaun caid yacno Esusbëd icquido chopondash. Choash chonoadtemaid ushë icnuc ënapen capuenguio yec Nuquin Papan chiaid chuibante shubun puduedpondash. Puduedshun iccuededquido Nuquin Papan chiaid Esusën chuipondash. <sup>22</sup> Aden chuisho tantiashun: —Ambia tantiaquidën chiacpadomboen Esusën chuibanec. Utsimbien adomboen chienquio iccosh —quec onquec tabadcuededpondash. <sup>23</sup> Aden Esusën chuisho tantianubien mayan icsa dapuduedaid tsadacnoëshquiobi comapenec onquiampondash: <sup>24</sup> —Esus Nasaded yacnoësh choquid mibëd icquidpenquio nebique. Nidec nid. ¿Chian anëdënquiacno ëbitedi nidmenuecta cho? Nuquin Papan Madombo icsaisa nec quequin ëmbi tantiaid mibi nec —quec mayan icsa dapuduedtsaid onquepondash. <sup>25</sup> Adoquien: —Otaquio tabad —quetanquin: —Dapuduen —capondash Esusën. <sup>26</sup> Adoac comapenec abi dapuduedaid uëdëquenec sidquianec dapuduempondash.

<sup>27</sup> Adsho isash: —¿Abimbodambi ispo? ¿Mitsipadquidquio nepec? Ambi tantiamiaid utsien nechitec. Chuiquidën nacpadomboen naid nec. Dapuduen, ambi cac ambi chiacpadomboen mayan icsan naic —quec onquecuededpondash Esusën naid chiec. <sup>28</sup> Adec onquecuededash auëshquio nidaneshun

ambi isboed, Esusën naid, chuibampondash. Aden chuibansho nidaid Cadidia caid yacnocquidtedishuntsen tantiabededpondash.

*Simonën nachi bēdamiaid*  
(Mat 8.14-15; Duc 4.38-39)

<sup>29</sup> Ambi chuisho tantiaboedo nidanenubien Petedo Simon caidën shubu yacno Esus Acobo Uan aitedi nidpondash. Aidën shubun icquidbidi aton utsi Andedes icpondash. <sup>30</sup> Aidën shubun icquidbidi Simonën nachi icpondash. Ambo Simonën nachi chumbo yec uepondash. Ambobi Esus chosho isun utsin chuipondash chumbo iquec quequin. <sup>31</sup> Aden chiaquien Simonën nachi yacnombo choshon Esusën mëdinquin uëtsëndoac abi chumbo yaid badedquoio bēdampondash. Adec bēdanash nidtoshon codocashun abi choquidtedi pemebampondash Simonën nachin.

*Esusën dadpen bēdamiaid*  
(Mat 8.16-17; Duc 4.40-41)

<sup>32</sup> Adnubien inchëshbudtsëqui Capednaun caid yacnocquidën daicsaidtedi bē-bēpondash. Adembidi mayan icsa dapuduedaidtedi bē-bēpondash. <sup>33</sup> Bē-bēash Simonën shubu shëcuë cuëmano puduedabi tabadcuededpondash. <sup>34</sup> Adsho isun daicsaidtedi Esusën bēdamebampondash. Adembidi mayan icsa dapuduedaid dapuduemebampondash oncamenquiocquin. Nuquin Papan Madombo abi yacno yuedmianquid abentsëcquiobi mibi nec quequin chuinushe qeshun oncamenquiocpondash.

*Shubu nibēdacno Nuquin Papabēd onque Esus onquiaid*  
(Duc 4.43-44)

<sup>35</sup> Adashic badiadte anoentsëqui yanubi isucunanec puduanec shubu nibēdacno Esus nidpondash. Nidec tabadtuidshun Nuquin Papabēd onquequin chuibampondash. <sup>36</sup> Esus nidacshobi isucunshun Petedo Simombēd icquidën nibēnampondash. <sup>37</sup> Aden nibënquin istuidashi: —Mibi isec chochoquidtedishun mibi nibēmbededec —quepondash Esus caic.

<sup>38</sup> Adoquien Esus: —Capucuenequin utsibotsen Nuquin Papan shubu abentsëquën yuedanquid iquec quequin chuibenec chobique. Shubu utsi-utsiec dadpen yacno nidnu. Nid —quepondash. <sup>39</sup> Aden chuibidanec nidaid Cadidia caid yacno capuequi shubu dadpen yacno choshon Nuquin Papan chiaid chuibante shubun puduedshun Nuquin Papa yacno shubu abentsëquën yuedanquid iquec quequin chuibampondash. Adembidi shubu dadpen icquid utsi-utsiec yacno choash puduedshun adomboembidi chuoapondash. Adembidi mayan icsa dapuduemeoapondash.

*Nami mishac tantiadenquiocquid bēdamiaid*  
(Mat 8.2-4; Duc 5.12-13)

<sup>40</sup> Aden Esusën chuibanubien daushacbimboecquid nami mishac tantiadenquiocquid chopondash. Esus yacno choash: —Dada icsambo iquebique. Mibi adquid tantiaquid icquin ëbi bēdame —quequin Esus chiec comapenec cuēdpondash.

<sup>41</sup> Adec cuēdshobi nēid isash unësquoio iquebi quequin ëquëducshun tantiaguin mishec Esus: —Mibi bēdamembique. Bēdambo icta <sup>42</sup> —quenubi daicsaid nibēdquoio yec bēdampondash.

<sup>43</sup> Aden bēdametanquin nidmepondash: —Nidec nid. <sup>44</sup> Nidquimbi, Esusën bēdamioshi quequin chuituidenda. Naden nata. Edusaden yacno nidash Nuquin Papa tabadte shubu uashunaid yacno nidec puduedta. Ambo puduedshun min dada bēdambo icquin anocquid, Nuquin Papa matses chiec



onquianequid, isme. Adoshon dëbimbiēcquid daëd meneta Moisesën chi-acpadomboen ma anocquidën napanueshun. Aden meniac abentsęc cuesuneshun utsi cuesunenu quenquiocquin cuesuniaidën intac puntanequin intac mibi daseccashun dëbimbiēcquid utsi cuemeshun naden aidën mibi chuipec. Nuquin Papan mibi bëdamboen istiapimbochoedi nëbi bëdamboen mibi isendac. Aden chuiquin mibi bëdamiaid Nuquin Papan naid nec quequin tantiatsiash —quepondash Esus ambi bëdameboed chiec. <sup>45</sup> Adsho tantiaboshombi niacbidanquin Esusën bëdamioshi quequin chuibenepondash. Aden chuibanac Esus yacno matses dadpen cho-chopondash. Adec cho-chosho isash shubu dadpen icquid yacno Esus tabadtiapimbo yec shubu nibëdacno capupondash. Adnubien Esus nibë nec nidaid utsi-utsiec yacnoësh dadpen cho-chopondash.

## 2

### *Cuembo yec uishquiaid Esusën bëdamiaid* (*Mat 9.2-8; Duc 5.18-26*)

<sup>1</sup> Adashic Capednaun yacno nidoash shubun puduedpondash Esus. Adnubien, Esus chosh quesho tantiash padpidec dadpen cho-choapondash. <sup>2</sup> Dadpen cho-choash puduedash tsucus-tsucustsęcquoio yec tabadnubi adecbidi shëcuë cuëmano tabadpondash. Adec tabadsho isun Esusën Nuquin Papa yacno shubu abentsëquën tabadte iquec quequin chuibampondash. <sup>3</sup> Adnubien cuembo yec uishquiaid bëc dada daëd-daëdquiec 4ted cho-chopondash. <sup>4</sup> Cho-choshon matses tsucus-tsucustsęcquoio yec tabadsho isun dectatoshon macano nacnenaid chic-chictanquin Esusën dayunquio uishquiaid imbudpondash. <sup>5</sup> Aton dayunquio imbudsho isun Esusën bëdamec quequin abi imbudboedën tantiec quequin ambibi tantiapondash Esusën. Adashic: —Mado, mibi cuidenquio yec mibi icsaid bëpiscudobi —quepondash Esus.

<sup>6</sup> Adnubien isadaidbo tsusedpabon nadomboen nata quequin chiaid tantiamequidon ambobi tabadquin naden onquenquiocquin icsamboen tantiapondash. <sup>7</sup> ¿Atotsi quiash adec Esus onquepeque? Tantuanu. Nuquin Papa icsamboen chuiquidien aid nechitec. Nuquin Papauidi matses cuidenquio yec abi icsaid bëpiscudquid nec, quetsęcquiec tabadpondash.

<sup>8</sup> Aidon tantiaid tantiec nadpondash Esus: —¿Atotsieshun aden mimbi icsamboen tantiape? <sup>9</sup> ¿Mibi cuidenquio yec mibi icsaid bëpiscudobi quequin ëmbi chiaidquio bëdantequidpenda nedic? Adecbidi, ¿Mibi icsambochoedi mibi bëdanoque. Nidtoшон mibi imbudboed chiadtoshon buanec nid quequin ëmbi chiaid bëdantequidpembidida neoadic? <sup>10</sup> Ai, adquidquibidi nec. Mibi cuidenquio yec mibi icsaid bëpiscudobi queboed chidon tishac matses yanaid yequi chuiquidquio Esus nec quequin tantiesabo mibi nepec. Adquid icsho ëbi tantiamenuequin <sup>11</sup> cuembo yec uishquiaid naden chiembique Tantia. Mibi icsambochoedi mibi bëdamiombique. Nidtoшон mibi imbudboed chiadtoshon buanec nid —capondash Esusën. <sup>12</sup> Adoquien nidtoшон abi imbudboed chiadtoanquin buampondash. Aden buansho isash: —Nideque. Is. Adomboen nasho isamboccondambi —quetsęcquiec onquiash Nuquin Papan naid nec quec cuëdëncuededpondash.

### *Ëbëd iquec cho Esusën Debi caid* (*Mat 9.9-13; Duc 5.27-32*)

<sup>13</sup> Adashic padpidec chian Cadidia caid cuëmano nidoapondash Esus. Ambobi tabadnubien aidën chiaid tantianuec matses dadpen cho-choapondash. Cho-choasho isun Nuquin Papan chiaid chuibanoapondash Esusën. <sup>14</sup> Aden

chuibanec nidquimbi Debi, Adpeon madombo, tsadsho istuidpondash. Aidi Mateyobidi cuënondash. Nidaid utsi yacno aton na utsibon buan-buansho isun piucquid bedshunquid Debi nepondash. Adembidi nidaid utsi yacnoshon aton na bë-bësho isun piucquid bedshunoaquid Debi nepondash. Isadaidpembo ancaquidën, Con matsespembon piucquid bedshunta, cac bedshunoaquid Debi nepondash. Adshobien: —Ëbéd iquec cho —Esusën cac: —Ai, mibéd nidnu. Nid —quianec badedi Esus tsibananec Debi nidpondash.

<sup>15</sup> Adshumbic Debin shubuno nidshun Esusbéd icquidon pepondash. Ashunquiobidi aton na buansho isun piucquid bedshunquid Debipadquidën utsin-utsinquien pepondash. Ashunquiobidi isadaidbo tsusedpabon nadomboen nata quequin chiaid naisan utsin-utsinquien pepondash. Debin shubuno Esus tsibanec choquid dadpen icpondash. <sup>16</sup> Aden adquidbëdtan Esusën pesho isun isadaidbon nadomboen nata quequin chiaid tantiamequid padiseyobo caid: —¿Atotsieshun piucquid bedshunquidbëdtambi isadaidbon nadomboen nata quequin chiaid naisabëdtambi mibi chuiquidën pepec? Tantuanu. Ëbi chui —quepondash padiseyobo Esusbéd icquido chiec.

<sup>17</sup> Adsho tantiashien Esus: —¿Dada bédambocquidta dauëchoquidën bédametequid nedic? Padenquio. Daicsaidien dauëchoquidën bédamec. Adquiecbidi, icsaisa nebi quequin ambibi tantiaquid icsho mibi icsaid ënta. Aden ënash ëbéd icquid mibi iquendac quequin chiesa nebi. Icsaquid nebi queshun mibi icsaid ënta. Aden ënash, ëbéd icquid mibi iquendac quequin chuiquid nebi —quepondash Esus.

*¿Atotsi quiash mibéd icquid buna mëmunesa nec? quiaid (Mat 9.14-17; Duc 5.33-39)*

<sup>18</sup> Adnubien abi chuiquid quënën nauedan aid tantiec unësquiocquin Uan acten mentoanquidbéd icquidën buna mëmunubi padiseyobobéd icquidon unësaid tantiec unësquiocquin buna mëmunoapondash. Aden buna mëmunsho isanec nidequi Esus yacno nidash Esusbéd icquidon buna mëmunenquio icsho isash utsibo: —¿Atotsieshun Uambéd icquidon adembidi padiseyobobéd icquidon buna mëmunubi mibéd icquidon buna mëmunenquio icpec? Tantuanu. Chui —quepondash.

<sup>19-20</sup> Adoquien Esus: —Aton chido bednun pambid meniac chidon codocacsho abi inquidën abéd icquido menec. Aden meniac isuidesa abéd icquido nec. Adecbidi ëbi abi chuiquid icnuc ëbéd icquidon buna mëmunenquiocquin isuidenquio iquec. Yuecash chido inquid nibëdanan abéd icboedo unësquiocquin buna mëmunquin isuidpec. Adecbidi ëbi nibëdanan ëbéd icboedo unësquio yampec.

<sup>21</sup> “Adembidi dashcute shënibédta chucambocquid bëtuscaisa matses nec. Shënibédta chucambocquid bëtuscatsaid amëec canchedoaic. Adecbidi abi icsaid ënesa tantiaid bëda pausudtiapimbo yec icsabudec. <sup>22</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic. Chodo shënin icsa sandoshon nequid bëenquiocquin. Adecbidi Nuquin Papan tantiacpadec pausudnu queshun mibi icsaid ënacsho isun Nuquin Papan pausunendac —quepondash Esus.

*Chonoadtemaid ushë icbo nebi quiaid (Mat 12.1-8; Duc 6.1-5)*

<sup>23</sup> Adnubien chonoadtemaid ushë utsi icnuc ënapen capuenuiocquin tied matanquin adosbiecquid trico caid ëshë bedshun Esusbëd icquidon pepondash. <sup>24</sup> Adshobien: —Mibëd icquido is. Chonoadtemaid ushën chonoad-eque. Abi chuiquid mibi iquec ¿atotsi quiash, Padi. Chën, quenuio ique? —quepondash padiseyobo Esus caic.

<sup>25</sup> Adoaquien Esus: —¿Chuiquid Dabidbëd icquidon natia bunquin ambi petemaid pepondash quequin dada uapampid tantiamboda icconda?

<sup>26</sup> Nad icpampic. Abëd icquidobëd yuec capuash Dabid comapenec bundopampic. Bundoash Nuquin Papa tabadte shubu uashunaid yacno choash puduedtemaid quënën puduedshun Nuquin Papa tantianuequin pan meniac sanaid bedshun ambi petemaid abëd icquidobëdtambi abi chuiquidën Dabidën pepampic. Puduedtemaid quënën puduedquid, Nuquin Papa matses chiec onquianequid, Abiatad abentsëqui icnubi aid quënën puduedshun bedshun Dabidën pepampic. Abiatadpadquidën peteuidtsëqui nec quenuiocquin abëd icquido tantiaquin pan bedshun aidobëdtambi pepampic chuiquid dapa Dabidën —quepondash Esus padiseyobo caic.

<sup>27</sup> Aden chuishumbic naden padiseyobo Esusën chuioapondash: —Nabanash tiboedte matses bumpec quequin tantiaquin abitedi uabanquin ënashini con pabëdi tiboquepampic. Adashic yuecash, Chonoadtemaid ushë nec, quepadenebi con pabëdi. Aden chiequi matses tiboedte ushë aton icbo ictiapimbo iquec. <sup>28</sup> Aid ushë icbo icquin ëbëd icquidon bunquin pebededsho isash, Padi. Chonoadtemaid ushë neque. Aden penda, quenuiocobi —quepondash Esus abi chieshënuquido padiseyobo chiec.

### 3

#### *Mëuesadaid Esusën bëdamiaid (Mat 12.9-14; Duc 6.6-11)*

<sup>1</sup> Adashic padpidec Nuquin Papan chiaid chuibante shubun Esus pudued-pondash. Ambo dada mëuesadaid tsadnubi <sup>2</sup> Esus chieshënuquid padiseyobo dadpen tabadpondash. Adec tabadec, Nëbi chonoadtemaid ushë icnuda Esusën mëuesadaid bëdamepeque. Nëid badiadën bëdamesho isun bedmeshun quënën nauedmenu quetsëcquiec padiseyobo tabadcuededpon-dash. <sup>3</sup> Aden tantiec padiseyobo tabadnubien mëuesadaid chuiquin Esusën: —Nënantanquio nidto —capondash.

<sup>4</sup> Adoac nënantanquio nidtoash mëuesadaid nidnubi iccuededquido chiec Esus onquepondash: —¿Chonoadtemaid ushën matses tantiaquindambi nape? ¿Adoenquiocquin matses icsa uapendambi ique? ¿Nëid ushëndambi matses bëdamepe? ¿Bëdamenuiocquindambi cuesunepe? —quepondash. Aden chiec Esus onquenubien onquenquio yec tabadpondash padiseyobo.

<sup>5</sup> Adoaquien nëishtanquimbi abi chieshënuquido bëisbanec Esus, Nuquin Pa-pan chiaid tantiabanquin naisa yec pausudtiapimbo icquido nec, abibi quiashic, Unësquio iquebi, quec tsadpondash. Adec tsadquin mëuesadaid chuiquin Esusën: —Ëbi mëd —cac mëdequi bëdampondash. <sup>6</sup> Adosho isash puduenanec nidquin edodesbo padiseyobon badedquio istuidpondash. Aido istuidash: —Esus cuesunete mibi bunacpadquiec bunebi. ¿Mitsi-padentsimbi cuesunemenuen bedmepeba? —quecuededpondash padisey-obo.

#### *Esus yacno matses dadpen choaid*

<sup>7</sup> Adnubien Esusbëd 12ted icquido chian Cadidia caid yacno nidoapondash. Adnubien nidaid Cadidia caid yacnoësh utsibo dadpen cho-choapondash. <sup>8</sup> Adnubien Esusën nabansho isboedon chiac nidaid Udeya

caid yacnocquido dadpen cho-chonobi adecbidi Edusaden yacnocquido cho-chonobi adecbidi Idumeya yacnocquido cho-chonobi adecbidi acte Odan caid uquë cuëma utsiucquido cho-chonobi adecbidi shubu dadpen icquid Tido caid yacnocquido cho-chonobi adecbidi shubu dadpen icquid Sidon caid yacnocquido cho-chopondash. Esus yacno ambi nabanaid utsibon chuisho tantiash cho-chopondash. <sup>9</sup> Adec cho-choash tsucus-tsucustsëcquio yec tabadquin tsicatiac nënantanquio tsadacnoëshi catashnushe quiash Esus: —Cano bec cho —quiampondash abëd icquidquio caic. <sup>10</sup> Dadpen bëdamiosh cadoshe. Èbitsen bëdanu quequin ambibi tantiaquin Esus mishbededpondash. <sup>11</sup> Adembidi tantiaquin mishnuec mayan icsa dapuduedaid choquin Esus istuidequi uebudec comapenec sidquianec: —Nuquin Papan madombobi mibi nec —quec comapenec cuëdpondash. <sup>12</sup> Adoaquien: —Padi. Aden ëbi chienda —quepondash Esus.

*Abëd 12ted icquid Esusën tantiamenu caid*  
(*Mat 10.1-4; Duc 6.12-16*)

<sup>13</sup> Adashic macuësh dapa yacno nidnushi abëd 12ted icquido chome-shun nadopondash: <sup>14</sup> Èmbi tantiacpadomboen mibitedi tantiamembi. Adquid icquin ëbëd tabadquin ëmbi chiacpadomboen mimbi tantiabenendac. Aden tantiabenacsho isun ëmbi chiacpadomboen chuimenuen mibitsen nidmembi. <sup>15</sup> Adembidi mayan icsa dapuduedaid dapuduemequidbidi mibi icmembi quequin abëd icquido Esusën chuipondash. <sup>16</sup> Ambi tantiamenu caid nëidtedi icpondash: Simon cashumbic Esusën Petedo capondash, <sup>17</sup> utsibic Sebedeyon mado daëd, Acobobëd Uan. Aid daëdi, abu cuëdtequidën mado nec quequin oncain Buanedquis quequin Esusën cuëmpondash. <sup>18</sup> Utsibic Andedes, utsibic Uedipe, utsibic Badtodome, utsibic Mateyo cuënshumbic Debi cuëmpondash. Utsibic Tomas, utsibic Acobo, aidi Adpeon mado nepondash. Utsibic Tadeyo, utsibic Simon, aidi cananistabo caidbidi nepondash. <sup>19</sup> Utsibic Udas Iscadiote, aidi abi chieshënkuido Esus bedmenush Esusbëd capuquid nepondash. Aidtedi Esusën tantiamequin chuiquin ismiaido niondash.

*Bedtsibu caidën dausunaid Esus nec quiaid*  
(*Mat 12.22-32; Duc 11.14-23; 12.10*)

<sup>20</sup> Aidtedi chianec nidequi Esusbëd icquido shubun puduedpondash. Shubun puduednubien matses dadpen cho-choapondash. Adshobien Esusën Nuquin Papan chiaid chuibanubi Esusbëd icquidon penquio icpondash. <sup>21</sup> Aden penquiocsho isanec nidshun Esus yuedquid yacno choshon chuituidpondash. Aden chuituidac anocquidtsen Esus bednuec chopondash. Icsabudashien nec quianec chopondash.

<sup>22</sup> Adomboembidi Esus icsabudec quequin icsamboen chuiquid utsibo icpondash. Isadaidbo tsusedpabon nadomboen nata quequin chiaid tantiamequid chuiquid dapabo niondash. Aido Edusaden caid yacnoësh choquido niondash. Aido mayan icsa Esusën dapuduemesho isboed Esus chieshënkuid yec nadpondash: —Mayan icsan icbo Satanas cashumbic Bedtsibu caidën tantiamiaid Esus nec. Adquid icquin mayan icsa matses dapuduedaid dapuduemec —quepondash.

<sup>23</sup> Adoaquien Esus: —Mimbi icsamboen tantieque. Mibi chuibanu. Tantiec tabadta. ¿Mayan icsan icbo ambi dapuduedmiaid dapuduemequidta nepadic? Padenquio. <sup>24</sup> Adquiecbidi shubu icbo abëd icquido cuëshëdmesha nec. <sup>25</sup> Icbon abëd icquido cuëshëdmiaish shubu abentsëquën tabadtiapimbo iquendac. <sup>26</sup> Adembidi ambi dapuduedmiaid dapuduemiash adquidën icbo

ictiapimbo Satanases iquec. Icho icnuequid abëd icquid puduemesa nec.  
<sup>27</sup> Dadpenshun ichto Satanases nec. Adquid icquin ambi matses dapuduedmi-  
aid dëniacanquidënuidquio nadatiambocquin nabanquin cuemepec. Adquid  
icquin ëmbi nac mayan icsa dapuduedaid Satanasesën yua icboedi icbombo  
tantiec bëdambo yanec ëbëd iquendac. <sup>28</sup> Abimbo chiembique. Tantiata.  
Matses cuidenquiocquin abi icsaid bëpiscudquin paucquid Nuquin Papa nen-  
dac. Adecbidi Nuquin Papa icsamboen chuiboedi, Icsaobi, Papa, queshe  
tantiashun Nuquin Papan aid pauquendac. <sup>29</sup> Utsien Nuquin Papan Mayan  
abipadquidën tantiamiac nasho isun Satanasesën naid nec queshe pauquen-  
quio iquendac. Adquid ënëdenquio yec icsaquid nendac —quepondash Esus  
<sup>30</sup> Satanasesën tantiamiac mayan icsa dapudemequid Esus nec abi caquido  
chiec.

*Esus yacno aton utsibo anibëd choaid*  
(Mat 12.46-50; Duc 8.19-21)

<sup>31</sup> Adashic Esus yacno aton utsibo anibëd chopondash. Aido choshon  
matses dadpen nuntan tabadsho istuidash: —Ëbi choaid con mado chuita  
—quepondash utsi chiec. <sup>32</sup> Adoac puduedshun Esus nënantan tsadsho isun:  
—Titabëd min utsibo choshon umanucshun mibi isnuen cainec —quequin  
chuituidpondash. <sup>33</sup> Adoquien Esus: —Adquid utsi chuinu. Tantiata. <sup>34</sup> Në  
tabadquido ëbëd icquido neque. Is —quepondash Esus abëd iccuededquido  
chiec. <sup>35</sup> Adashic: —Nuquin Papan chiapadomboen nabanquid ëbëd icquid  
nec. Adquid buchi caindambi. Adquid chido chuchu caindambi. Adquid utsi  
tita caindambi —quepondash Esus.

## 4

*Tantiamequin pete ëshë nësecain chiaid*  
(Mat 13.1-9, 18-23; Duc 8.4-15)

<sup>1</sup> Adashic padpidec chian cuëmano nidshun Esusën tantiamequin  
chuibanoapondash. Aden chuibanuc cho-choquid dadpen ichto isash cano  
antabëdtopondash cho-choquid acte cuëmano tabadnubi. <sup>2</sup> Adec tabadshobi,  
matses nadquio iquec quequin tantiaquin tiedën caniquid ëshë Esusën  
tantiamequin naden chuibampondash: <sup>3</sup> —Tied ichto pete ëshë nësecanuec  
aton tied yacno nidquid. <sup>4</sup> Adec nësecanuec nidshun pete ëshë nësecac maisec  
pudun-pudunaid uicchunën chequid. <sup>5</sup> Adnubien nidaid cuënote dadpen  
samëdacno utsi-utsiec paëdash badedquio dëyucuidtsash <sup>6</sup> tapunenquio iquec  
ushën shoedec. <sup>7</sup> Adnubien pete ëshë utsi-utsiec nisanquid dëyucacno paëdash  
dëyucash canidouidsacsho nisanquidën bëtinac podo sinash bacuëtiapimbo  
iquec. <sup>8</sup> Adnubien nidaid bëdambo yacno paëdaid dëyucaid canish dadpen  
pete ëshë icquid. Utsi-utsiec 30ted icnuc, utsi-utsiec 60ted icnuc, utsi-utsiec  
100ted iquec —quepondash Esus.

<sup>9</sup> Aden chish: —Ëmbi chuiboed tantianu quiash bëdamboen tantiec  
papuduedta —quepondash Esus.

<sup>10</sup> Aden chuibanash udictsëc Esusbëdi nidshun utsibo choenquiocsho isun  
databëdtuidquin abëd icquidon: —Mimbi chuibanboed tantianu. Ëbi chui —  
capondash Esus chuiquin.

<sup>11</sup> Adoquien: —Nuquin Papan shubun tabadquid tantiamendambi utsi-  
boembi, Mibi nadquido iquec, quenquiocquin chuibanoc. <sup>12</sup> Aden chiac:  
“Nuquin Papan nabamboed isto-istoboedi ma padenquio tabadteneyoc.  
Adembidi tantiado-tantiadoneboedi ma padenquio tabadteneyoc.  
Aidon abimbo tantiaquin abi icsaid ëntsiandac. Aden abi icsaid ënsho isun  
cuidenquio yec Nuquin Papa abi icsaid bëpiscudtsiandac”

—quepondash Esus abëd icquido caic.

<sup>13</sup> Aden chiashic: —¿Mimbítsen ëmbi chuiboed tantienquioda ique? Aidi tantienquiocquin ¿mitsipadentsi adomboembidi chuibansho mimbi tantiape? Ëmbi chuiboed nad iqueque. Tántia. Chuinu. <sup>14</sup> Pete ëshë sequidbimboecquid Nuquin Papan chiaid chuibanquidquio nec. Ëshë ambi siaidbimboecquid Nuquin Papan chiaid nec. Abi paëdacno nidaidbimboecquid matsesën tantiate nec. <sup>15</sup> Nidaidën paëdash pete ëshë dëyuctiapimbocsho uicchunën chiaidbimboec matses utsi-utsiec iquec. Adquid Nuquin Papan chiaid tantiaash papuedednu qesho Satanasën bëpiscudmiac tantienquio yanec Nuquin Papa yacno puduedtiapimbo iquec. <sup>16-17</sup> Nidaid cuënote dadpen samëdacno pete ëshë paëdash badedquio dëyucuidtsash tapunenquio yec ushën shoedaidbimboec matses utsi-utsiec iquec. Adquid Nuquin Papan chiaid tantiauidash bëdambo iquec queboedi ¿Esus tantiaquid nebi quecta icco? quequin utsibon mamënsnunac badedquio tantiesa nebi quendac. <sup>18-19</sup> Nisanquid dëyucacno pete ëshë paëdash dëyucash canidouidtsacsho nisanquidën bëtinac podo sinash bacuësabimboec matses utsi-utsiec iquec. Adquid Nuquin Papan chiaid tantiauidash abi bunaid, abi nënaid, abi icsaid aidtedi tantiaquin Nuquin Papan chiaid tantiesa yanshun bëdamboec tabadaid ismesa yanec. Adquidën Nuquin Papan chiaid tantiaquid utsi icmetiapimbo iquec. <sup>20</sup> Ëshë utsibic nidaid bëdambocquidën paëdash dëyucash caniaash dadpen bacuë icquidbimboec matses utsi-utsiec iquendac. Adquid Nuquin Papan chiaid tantiadonec bëdamboec tabadquin utsi ismequid nec. Aden ismiac Nuquin Papan chiaid tantiaquid daëdpactsëc yanubi utsin ismiac Nuquin Papan chiaid tantiaquid dadpen yanubi utsin ismiac Nuquin Papan chiaid tantiaquid dadpenquioshë yanendac —quepondash Esus abëd icquido tantiamenuec.

*Tabote nënantan nanac chënquiacbimboec ictiad quiaid  
(Duc 8.16-18)*

<sup>21</sup> Aden chuishumbic abëd icquido naden Esusën chuipondash: —¿Tabote icbon ambi dayun uaboed taboshon tsadte tédion nanshun isaidta nedic? Adembidi ¿Tabote matsun bëtashun isaidta neoadic? Padenquio. Nënantan tabote nanac chënquiacbimboec ismenu quec ictiad. <sup>22</sup> Adquiobidi abi yacno yuedanquid ambi dayun uapampidi nëbi Nuquin Papan dayun uainquiocquin ëbi chomeshun ismec. Adembidi con mado chuiban quenquiochoedëmbi nëbi ëbi ismec ma con mado chuibanu quequid con Pa nec. <sup>23</sup> Ambi chiaid tantianu qeshun tantiaquiec papuededa —quepondash Esus.

<sup>24</sup> Aden chiash Esus: —Chiaid bëda tantiatequidquio iquec qeshun tantiaquiec papuededquid icta. Aden chiaiduidi tantiec papuededquid abipadquid bëdambocquid ambia tantiaquidën Nuquin Papan mibi icmendac. <sup>25</sup> Adquid ambi tantiaidoniaidquio iquendac. Aden tantienquioctsëcquidën tantiaid bëda uesadendac nibëdquiec —quepondash.

*Ambi siaboed icbon isenquiocnoc bacuëec quiaid*

<sup>26</sup> Adec onquequin abëd icquidquio chuishumbic cho-choquidtsen naden Esusën chuipondash: —Nuquin Papan shubu abentsëquën tabadec caidaidquio chuibanu. Tántia. Nidaid bëdan tiedën caniquid pete ëshë siash <sup>27</sup> tabadquin cainquidquio icbo nec. Dadpen ushquin ambi seboed isenquio yec icbo tabadnubi <sup>28</sup> ambi seboed dëyucash caniec taitanec bacuëec. <sup>29</sup> Ambi siaid isenquiocnoc canitanec bacuëacsho badedquio bedquid icbo nec. Adquiecbidi Nuquin Papan chiaid chuiban- chuibanubi papudedquid utsi-utsiec yanec chuibanquidën isenquiocnobi.

Papuduedquioshon tantiabenec. Adquid isash con shubun puduedquido neque. Bednu quependac Nuquin Papa —quepondash Esus.

*Mostasa caid ëshë chiaid*  
(*Mat 13.31-35; Duc 13.18-19*)

<sup>30-32</sup> Adec onquequin chuibanashic Esus: —Nadquio Nuquin Papan shubun icquido iqueque. Chuinu. Tantia. Mostasa caid pistsec ëshëmpi ictsëcquid nësecaid dëyucash nuamboshë caniec cuidi-cuidipambo iquec shubu-shubupambo yec podoc. Ambo uicchunën shubu uaic. Adomboembidi aton shubun abi tantiaquid dadpen dayun uaquid Nuquin Papa nec —quepondash.

<sup>33</sup> Aden chuibanshumbic adomboembidi Esusën chuibampondash. Aden chuibanash, aitedquio tantiapec abibi queshumbic aden chiaid chuiquin ëmpondash Esusën. <sup>34</sup> Aden abited chuibanshumbic abëd icquidouditsëqui bëdamboen tantiamequin chuipondash.

*Acte tēccoasquiaid ënëd cac ënëdaid*  
(*Mat 8.23-27; Duc 8.22-25*)

<sup>35</sup> Adashic abi ushëmbi inchëshbudtsëc cano antabëdtoanec Esus: —Chian uquë cuëma utsiuc nuquiuidtsëqui nidnu. Nid —quiampondash abëd icquido caic. <sup>36</sup> Aden chiac chian cuëman tabadcuededquido niananec badedquio nidquin canon Esus buampondash. Abëd icquidon potenubien cano antabëdtoanquin utsin-utsinquien potepondash. <sup>37</sup> Aden potenubien cunquequid dapan acte tēccoasquequin cano acte uemiaidën mentoadtsempondash Esus tēotadec ushnubi. <sup>38</sup> Adec uec usho: —Cunquequid dapan acte tēccoascaidën nuqui mentoeque. Isucunta, icbo —quequin Esus timpondash.

<sup>39</sup> Aden tinac uëtsëdtoshon Esusën: —Mibi comapenec cunqueque. Ënëd —cac badedquio ënëdpondash. Adembidi: —Mibi comapenec tēccoasqueque. Ënëd —cac badedquio ënëdoapondash acte.

<sup>40</sup> Aden ënëdmetanec Esus: —¿Atotsi quiash ëbi tantienquio yec dacuëdcuedede? Ëbi tantiesa mibi nepec —quepondash abëd icquido caic. <sup>41</sup> Adec Esus cuënubi badedquio cunquequid dapa ënëdposh. Adecbidi acte tēccoasquequid ënëdoaposh. ¿Mitsipadquidën napeba? Ënëd cacpadequi ënëdposh —quec abibi onquecuededequi uëdëquianquiopondash abëd icquido.

## 5

*Mayan icsa dadpen dapuduedaid bëdamiaid*  
(*Mat 8.28-34; Duc 8.26-39*)

<sup>1</sup> Adshumbic acte tēccoasquec ënëdmebon nidquimbi cuëma utsiuc potiasht nidaid Cadada cashumbic Quedasa caid yacno choapondash. <sup>2</sup> Ambobi choash pudundosho mayan icsa dapuduedaidën Esus bëquedpondash. Cuënote dapa macuësh dapaten icquid yacnoësh choquin bëquedpondash. <sup>3</sup> Aidi unësaid chococate cuënote dapa shëcuë uaidën tabadquid icpac caondash. Aidi shocosh bucun mëdantebëdta taë taniaid icboedi nadatiambo yanshobi mëtanetiapimbo yampac caondash. <sup>4</sup> Abi mëtaniaid shocosh bucu seccuatuatinquin tēs-tëstenepac caondash. Adosho isac abi tanebocpadquid utsi nibëdpac caondash. <sup>5</sup> Aidi inchëshën capucuenequi mëyanacbimboec sidquecuenepac caondash. Adec capuequi cuënoten abibi dasiadcuenepac caondash. Adec siadcuenequi dastidquebudnepac caondash.

<sup>6</sup> Aidi abi yacno Esus canon chosho isanec titinquianec choash: —¿Tsusio, ada cho? —quiashic: <sup>7</sup> —¿Mibëd icquidtabi nedi? Mimbi namiaidpenquio nebi. Abia Yampidën madombo mibi icquin naden ëbi chuita. Mibi chian anëdënquiacno nësecainquio iquembi. Abimbo chiembi quequin ëbi chuita

—quepondash mayan icsa dapuduedaid Esus chiec. <sup>8</sup> Adec mayan icsa dapuduedaid abi onqueshobien Esusën: —Dapuduen —cashic: <sup>9</sup> —¿Tsutsi cuëmédquid mibi ne? —quepondash Esus.

Adoaquien: —Dadpenquioshë. Cuëte podotedi dapuduedondaid nebi —quepondash mayan icsa dapuduedaid abentsëc yacbimboec onquec.

<sup>10</sup> Adashic: —Mibi nadatiambocquid cadoque. Ëbitedi chian anëdënquiacno nidmenquiocnuequin ¿nëid nidaidën adabi tabadmetsia? —quepondash mayan icsatedi.

<sup>11</sup> Adnubien macuësh potseshun chancho dadpenshun pec tabadpondash.

<sup>12</sup> Aden pec tabadsho isashien: —¿Ada mimbi ëbitedi chancho dapuduedmet-sia? —quepondash mayan icsa Esus caic.

<sup>13</sup> Adoaquien: —Dada dapuduencuededash chancho dapuduedcuededta —Esusën cac dapuduencuededash acte dapa quiusudacnombo comapenec niquec pudun-pudunec mentoadbudnepondash chancho nibëdquiec.

<sup>14</sup> Adsho isash chancho pemequin isquido chiec nidanepondash. Adec nidquimbi shubu dadpen icquid uano-uanoec tabadquido chuituidac aidot-sen isec cho-chopondash. <sup>15</sup> Esus yacno cho-choshon mayan icsa dapuduedaid bëdamiosh quequin chuituidac mayan icsa dapuduedaid icboed naden isbededpondash. Dashcute dasiuidesa icboedi dasiuidash tsadsho abimbo iquec quequin isbededpondash. Aidën tantienquiochoedi tantiec tsadsho adembidi isbededoapondash. Adec tsadsho comapenen isbededequi nadatiambocquin naid nepec quetsëcquiec tabadcuededpon-dash. <sup>16</sup> Adec tabadsho isun mayan icsa dapuduedaid bëdamequin chancho dapuduedmesho isboedon cho-choquido tantiamenuen chuibampondash.

<sup>17</sup> Aden chuisho tantiaashun cho-choboedon: —Nëmbo tabadenquio yec nidec nid. Mibëd tabadtiapimbo iquebique —capondash comapenen Esus chush-caquin.

<sup>18</sup> Adsho tantiaash cano yacno nidequi cano Esus antabëdtonobien mayan icsa dadpen dapuduemoed choash: —Mibëd icte bunebi. ¿Adabi buane? —quepondash. <sup>19</sup> Adoaquien: —Padi. Min shubuno nidtan. Ambo nidshun mibi bëdamequin mayan icsa dadpen dapuduemeboed Nuquin Papa tantiaquin chuiban. Nuquin Papan ëbi ad icsho unësquiocquin dapuduemiac quequin chuiban —quepondash Esus. <sup>20</sup> Aden Esusën chiaquien nidpon-dash. Nidequi shubu dadpen icquid yacno-yacnomboec nidanec nidaid Decapodis caid yacno choshon Esusën naid chuiban-chuibampondash. Aden chuiban-chuibansho tantiaquidtedi, Adopenshenda Esusën bëdamiash, quec abibi onquec tabadcuededpondash.

*Nua intac budaid bëdameshun champi unësaid bëdamiaid  
(Mat 9.18-26; Duc 8.40-56)*

<sup>21</sup> Adshumbic canon Esusbëd icquidon padpiden abi chobocmibidi chian poteoapondash. Adec chosho isash matses dadpen chian cuëmano pad-pidec cho-choashun mananuc Esus pudundotsëcshobi badedquio tsucus-tsucustsëcquio yec datsidadpondash. <sup>22</sup> Adnubien Nuquin Papan chiaid chuibante shubun tabadquido isquid, Aido cuëmédquid, chopondash. Adec choquimbi Esus istuidash mibi bëdambocquid nec quequin ismenuec Esus tauebudshun: <sup>23</sup> —Con champi unëseque. Aid mishquin bëdamec cho —cac <sup>24</sup> Aidobëdi Esus nidpondash.

Adec nidshobi matses dadpenshun tsibanampondash. Tsucus-tsucustsëcquio yec nidquin Esus tsibanampondash. <sup>25</sup> Esus tsibanquidquio chido utsi icpondash. Aid chido seta 12ted matamec intac budash bëdanenquiocquid icpac caondash. <sup>26</sup> Dauë meniaqui bëdanenquio icpac



caondash. Dauëchoquid utsi-utsien piucquid menequin dauë bedshun chequi bēdanenquio yec intac nuambo yampac caondash aton piucquid naimēdnubi. <sup>27</sup> Adec intac icnubi capuquin Esusën nabanaid chuisho tantianec nidquimbi matses dadpeshun tsibananubi aidēntsen tsibanampondash. Aden matses dadpeshun tsibananubi ismenquiocquin cachoc choshon Esusën dashcute mishpac caondash. <sup>28</sup> Aden aton dashcuteuidtsēqui mishec bēdampatsiash icmane qeshun mishtsequi bēdampac caondash. <sup>29</sup> Intac bēdanenquiocquid Esus mishec bēdampac caondash. Ēmbi tantiacpadquiequi bēdanobi quequin ambibi tantiapondash.

<sup>30</sup> Adec chido bēdanubien ěmbi nadatiambocquin naoc quequin tantiec amibidi bidiadquin isec Esus: —¿Tsuntsimbini mishposh? —quepondash.

<sup>31</sup> Aden chuisho tantiashun abēd icquidēnquio: —Tsucus-tsucustsēcquio matses dadpen iquec, ¿tsuntsimbini mishosh, quecta ique? —capondash.

<sup>32</sup> Adec abēd icquid cuēdnubi onquenquiocquin, ¿Midaquidēnquio mishoshibique? Isnū, abibi quequin matses utsi-utsien bēispondash Esusën. <sup>33</sup> Aden bēisbanubi, ěmbi mishoc quenquio yec bēdamboed uēdēquec choequi mibi nadatiambocquin naquid nec quequin tantiequi Esusën taēno uebudshun abi mishec bēdanaid chuibampondash. <sup>34</sup> Adoquien Esusën: —Champi, mimbi tantiacpadquiequi mibi bēdanoc. Dada icsambo icboedi nēbi dada bēdambo mibi iqueque. Bēdambo yec nid —capondash chido chuiquin.

<sup>35</sup> Aden nidmenubien Aidon shubun icquid cho-choshon: —Min champi unēsoshe. Tsusio chomenda —capondash Aido chuiquin.

<sup>36</sup> Adnubien Aido Nuquin Papan chiaid chuibante shubun tabadquido isquid caic: —Dacuēdenquiocquin ěbi tantiata —quepondash Esus.

<sup>37</sup> Aden Aido chuishun Esusën: —Cho-choenda —capondash abi tsibanuequido chuiquin. Aden chianec Petedobēdta Acobo Uan, Acobon utsimbo aidtedi buanec Esus nidpondash. <sup>38</sup> Adec nidequi Aidon shubuno choquin comapenec shubicuededsho tantiatuidpondash. <sup>39</sup> Aden tantiequi puduedash Esus: —¿Atotsi quec comapenec shubicuedede? Champi unēsenquio yec ushac bimboec uec nec —quepondash.

<sup>40</sup> Adshobien tantiesa icquin mamēnshumbededpondash. Adoquien aidtedi puduemiash champin tita aton papa chedo abēd icquidbēd champi yacno Esus puduedpondash. <sup>41</sup> Ambo choshon mēdante mēdintanquin Esusën: —Talita, cumi —capondash. Aton onqueten, Champi, isucunash nidto, quequin adopondash. <sup>42</sup> Adoac badedquio isucunash nidtoash capupondash. Champi sēta 12ted icquid niondash. Aidi bēdansho isun abitedishun, Adopenshenda iquec quequin isbededpondash. <sup>43</sup> Aden champi bēdameshun Esusën: —Ēmbi naboed utsi chienda. Abimbo caimbi. Abentsēcquiobi chienda —capondash. Aden chuitanequi: —Champi peme —quepondash Esus.

## 6

### *Abi icnēdacnoshon Esus chieshēnquido* (Mat 13.53-58)

<sup>1</sup> Auēshquio puduanec nidequi abi icnēdacno Nasaded caid yacno Esus choapondash. Abēdi abēd icquido chopondash. <sup>2</sup> Ambo tabadashic chonoadtemaid ushēn Nuquin Papan chiaid chuibante shubun puduedshun Nuquin Papan chiaid chuibanquin tauapondash Esusën. Aden chuibansho tantienquiocquid abentsēc: —¿Mitsishun chuibansho tantiashun adomboen Esusën chuibampec? —quepondash.

Adnubien utsi: —¿Mitsicquidēn ismiac Esusën nadatiambocquin nabampec? —queoapondash.

<sup>3</sup> Adnubien utsi: —Nëmbocquid, cuëte nacnenquid, Osen mado nec — queoapondash.

Adnubien utsi: —Ani Madia nec. Aton utsibo nëidtedi nëmbo tabadquid nec. Nëidic Acobo, utsibic Ose, utsibic Udas, utsibic Simon. Nëmbobidi aton chibi chedo tabadoaic —quetsëcquieq tabadec onquecuededec chieshcueded-pondash.

<sup>4</sup> Aden chieshënaqui Esus nadpondash: —Utsi yacno nidshun Nuquin Papan chiaid chuibansho tantiaquid dadpen icnubi abi yacno chuibansho chieshënquid aton matses iquendac. Aton shubun icquido adecbidi iquendac —quepondash Nasaded yacnoquido chiec. <sup>5</sup> Aido abi chieshënquid icsho isun nadatiambocquin nabantiapimbo icpondash. Èbi bédamepec quequin tantiaquidquo daëdpactsëc icsho mishquïn bédamepondash. <sup>6</sup> ¿Atotsi quiash ëmbi chiaid tantiatipimbo icpec? Adembidi nadatiambocquin nasho isti- apimbo icpec quepondash Esus abibi onquec.

*Abëd icquido Esusën nidmiaid  
(Mat 10.5-42; Duc 9.1-6)*

Adashic auëshquiobi puduanec nidaniash shubu daëdpactsëc yacno puduedcuenequin Nuquin Papan chiaid Esusën chuibenepondash.

<sup>7</sup> Adec cuenadquin chuibanequi abëd icquido caic: —Cho —quetanec tabadtuidpondash. Adec tabadtuidash Esus: —Nëbi mibi daëdshun- daëdshunquien chuibanec nid. Chuibanquimbi mayan icsa dapuduedaid dapuduemeta. <sup>8</sup> Nidquin dadpen mitsana sauedshun buanenda.

<sup>9</sup> Tapucudte sandadia caiduidtsëqui tapucudash nidaneta. Adecbidi utsi bedenquio yec mibi dasiuidaiduidtsëqui dasiuidec nidaneta. <sup>10</sup> Shubu dadpen yacno nidash mibi yuedaid shubun puduedash ambouidi tabadquin chuibanta. Auëshquio puduanec nidequi shubu dadpen yacnobidi nidshun adqueiecbidi tabadquin chuibanooata. Adenuidi naquin chuibanta. <sup>11</sup> Mibi yuedquid nibëdsho isash nidaneta. Auëshquio nidash shubu ënëdacno choash, Nëmbo icquido tantiate icsachoquid yec abibi cuidadtequido nec, Papa. Adquid icsho isun abi capuaid nidaid pututedi tasequequin Nuquin Papan chiacpadomboen ismeta —capondash Esusën abëd icquido chuiquin.

<sup>12</sup> Aden Esusën chiaquien nidanepondash. Adec nidshumbic, mibi ic- said ënshun padpiden tantianu quenquiocquin Nuquin Papan chiacpadom- boen nabanta quequin chuibampondash Esusën nidmiaidon. <sup>13</sup> Adembidi mayan icsa dapuduedaid dadpen dapuduemepondash aidëmbidi. Adembidi nënquid dadpen daicsaid chedo cuëte bacuë bëchichoquid ënë dachinquin bédameoapondash Esusën nidmiaidon.

*Uan acten mentoanquid mapi butiaid  
(Mat 14.1-12; Duc 9.7-9)*

<sup>14</sup> Adnubien, Chuibanquimbi Esusën nadatiambocquin nabanosh, que- quin isboedon ancanquid Edodes chuipondash. Aden chuiban-chuibanac dadpenshun Esusën nabanaid tantiapondash. Aden tantiaash: —Uan acten mentoanondaaid mapi butemeboed uincuempash icnui. Adec uincuenshun nadatiambocquin nabanec nepanui —quecuededpondash tantiaquido.

<sup>15</sup> Adnubien utsibo: —Ediasien nechitec. Nuquin Papan chiampic- padquieq choashien nec —quecuededpondash.

Adnubien utsibo: —Nuquin Papan chiaid chuipampidien Esus yanchitash —quecuededpondash.

<sup>16</sup> Adnubien Edodes: —Èmbi mapi butemiondaaid, Uan pado, uincuempash icnui —quepac caondash.

<sup>17</sup> Ēnden aidëmbi Uan bedmeshun tanemeshun quënën nauedmepac caondash. Aidëmbi aton utsin chido, Edodias caid, bedacsho isash: <sup>18</sup> —Min utsin chido mimbi bedaid natemaid niosh —qeshun Nuquin Papan Moises dada uamepampicpaden Uanën Edodes chuipac caondash. Adoac, Uanën chuisho dadpeshun tantianushe qeshun Uan bedmeshun quënën nauedmepac caondash Edodesën. <sup>19</sup> Adoaquien Uan Edodiasën chieshënquin: —Uan cuesunemetiadquidi mibi nec —quepac caondash aton bënë Edodes caic. <sup>20</sup> Uan bédambocquid Nuquin Papan chomiaidbidi nec qeshun Edodesën Uan cuesunemetiapimbo iquec cudaspac caondash con chidon cuesunemenushe quiash. Aden tantiaquin Edodesën abi tsadacno Uan chuibamenuen chomedenepac caondash. Uanën chuibansho tantiash: ¿Atotsimbi nëid napeba? Ambi chuibanaid bédambo iquec. Aidën chuisho tantiash bédambo iquebi, abibi qeshumbic Edodesën chomedednepac caondash chuisho tantianuen.

<sup>21</sup> Adnubien aton chido bunacpadomboen Uan cuesunemete ushë chonobi naden napac caondash: Aton bënë abi tishte ushë tantiaquin abipadquid dadpen pemenuen chomepac caondash. Adembidi sondado tsusio dadpembidi chomeoapac caondash Edodesën. Cadidia yacnocquido chuiquid dapabobidi chomeoapac caondash. <sup>22</sup> Aden aitedi cho-chomiash tabadnubien aton chidon champi puduedpac caondash. Puduedacsho: —Baidata —cac baidapac caondash. Adsho isash: —Bédamboen mimbi naoc —quecuededpac caondash Edodesën chomiaido champi caic.

Adec onquesho tantiashien Edodes aton chidon champi caic: —Mibi bunaid mibi menenu. Ēbi chui. <sup>23</sup> Abimbo caimbi. Mibi bunaid ëbi chuita. Mitsanatedi bunebi ëbi casho tantiashun dadpen mibi menembi —quepondash.

<sup>24</sup> Aden Edodesën chuisho tantiash: —¿Atotsibi bumpeba? —quetanec aton tita yacno puduedshun: —“Mibi bunaid mibi menenu. Ēbi chui,” Edodesën caoshi. ¿Atotsimbi chuipe, tita? —quepac caondash ani chiec.

Adsho tantiashun anin: —Uanën mapi bunebi quequin chuita —capac caondash aton champi chuiquin.

<sup>25</sup> Aden chiaquien badedquio Edodes yacno titinquec choec puduedshun champin: —Nëbimbobi Uan acten mentoanquidën mapi maspanën nandoshon ëbi mene —capac caondash anin chuibocpadomboen chuituidquin.

<sup>26</sup> Adsho tantiash Uan tantiec unësquio icpac caondash Edodes. Adec unësquiocquin ambi champi chiacpadomboen natiapimbo iquec ëmbi chomiaido quenushe qeshun adoembi abibi qeshun: <sup>27</sup> —Uanën mapi bec cho —capac caondash Edodesën ambi cuesuneta caid chuiquin. Aden chiac Uan quënën nauedacno nidshun mapi butanquin <sup>28</sup> maspanën nandoshon bëshun champi meniac bedshun champin aton tita menetuidpac caondash.

<sup>29</sup> Adnubien, Uan mapi butiac, qesho tantiash Uambëd icquido nidshun Uanën dada bedshun buanshun chococapac caondash.

### *Dada 5000ted Esusën pemiaid*

*(Mat 14.13-21; Duc 9.10-17; Uan 6.1-14)*

<sup>30</sup> Adambic Esusbëd icquido ambi nidmeboedo Esus yacno cho-choshon ambi nabamboedbëdtabi ambi chuibamboed chuibampondash. <sup>31</sup> Aden chuibanash tabadnubi matses dadpen cho-chonobi utsi dadpen nidanepondash. Adec cho-chonobi penquio iccuededpondash Esusbëd icquidon. Adnubien Esus: —Matses nibëdacno tabadec nidnu. Nid —quepondash abëd icquido caic.

<sup>32</sup> Aden chiashic cano antabëdtoanec matses nibëdacno nidpondash aidtedsëqui. <sup>33</sup> Adec nidsho isash matses dadpen abi nidte yacno tantiec: —U

nidanec —quiash titinque choec abia cho-chopondash. Abia titinquequid cuensho isash utsi-utsiec dadpen titinquec cho-choapondash. <sup>34</sup> Adec aidtedi abia cho-choambien Esusbëd icquido choapondash. Pudundoquimbi matses dadpeshun abi cainec tabadsho isashien Esus, Abi tantamequin Nuquin Papan chiaid chuiquid nibëdabimboecnuc matses cho-choec quequin tantiec unësquio iquebi qeshun tauain chuibampondash Esusën. Yuen chuibampondash.

<sup>35</sup> Yuen Esusën chuibanubi ushë budpondash. Ushë budsho isun abëd icquidon: —Icho, ushë budaque. Nëmbo tiedën caniquid nibëdec; adecbidi yuedanquid nibëdec. Matses nidme. <sup>36</sup> Nidmiac shubu yacno nidshun piucquid menequin ma aton pete bedpanuna penun —capondash Esus chuiquin.

<sup>37</sup> Adoaquien Esusën: —Mimbibi nëidtedi pemeban —capondash.

Adsho tantiashien: —¿Adambi nidshun piucquid menequin panëmpi bedpe? Ma matses dadpenquio yoc —quepondash abëd icquido Esus caic.

<sup>38</sup> Adoaquien: —¿Panëmpi penun bëaid iccuededquidon na tedtsi iqueque? Ista —capondash Esusën.

Aden chiac ashunquiobi matsesën bëaid isbanash abëd icquido: —Panëmpi sincoted icnubi nuëcquid dosted iquec —quepondash.

<sup>39</sup> Aden bësho isun: —Uasinën tabadbud mibëd icquid 50ted icnuc, utsibëd icquid 100ted icnuc quec tabadbud —capondash Esusën iccuededquido chuiquin. <sup>40</sup> Adoac ambi chiatedtedquiec tabadbudpondash. <sup>41</sup> Adec tabadbudsho isun panëmpibëdta nuëcquid bedshun sananquin abuc isec: —Mimbi meniaid nec Papa. Nëbi mimbi nadatiambocquin naid ismembu —qeshun cuësh-cuëshun: —Meneban —Esusën cac abëd icquidon menebampondash. <sup>42</sup> Menebanac piash: —Padi. Piombi —quecuededpondash pequido. <sup>43</sup> Aden piambien abëd icquidon napi uaid bedbampondash. Napi uaid sandobanaid tsitsan 12ted icpondash. <sup>44</sup> Peboedo dada caniaid tambanac 5000ted icpondash. Aton chidon aton bacuëbobëdtambi pepondash. Aido tambanenquiocquin dadatedictsëqui tambampondash 5000ted iquec quequin.

*Acte bëntse Esus choaid  
(Mat 14.22-27, 34-36; Uan 6.16-21)*

<sup>45</sup> Aden iccuededquido pemiashic: —Cano antabëdtoanec mibia shubu dadpen icquid Betsaida caid yacno potec nid. Mibi nidnubi matsestedi nidmembu —quepondash Esus abëd icquido caic. <sup>46</sup> Adoac canon potenubi matsestedi nidmianec matses nibëdacno macuësh yacno Nuquin Papa chuinec Esus nidpondash. <sup>47</sup> Adnubien inchëshbudtsëqui abëd icquido acte nënantanquio canon noadpondash. Ambobi noadnubi Esus abentsëqui mananuc tsadpondash. <sup>48</sup> Ashunquio Esusën isaquien abëd icquido bëdiactsëcquio nidquimbi comapenen cano uncapondash cunquequid dapan bëded-bëdednubi. Adnubien cachina cuëdanabi badiadiapimboenoc acte bëntse choquin abëd icquido Esusën ismetuidpondash. <sup>49</sup> Datantsensho isash, Mayambien nechitec, quequin ambibi tantiec sidquecuededec <sup>50</sup> dacuëdcuededpondash.

Adsho isumbien: —Ëbibi nebique. Dacuëdenquio yec tabadta —capondash Esusën. <sup>51</sup> Aden chuitanec cano antsadtonobi comapenec cunqueboedi ënëdpondash. Aid ënëdsho isash: —Adquidshenda nepec —quepondash abëd icquido. <sup>52</sup> Panëmpi daëdpactsëc ictsëcquid matses dadpen menebamboedën

naid nec quequin tantienquiocpondash. Adembidi Esus acte bëntse capusho isun, Nadatiambocquin naquidën naidbidi nec, quequin tantienquio icoapondash pamunacbimboecquin.

<sup>53</sup> Ashunquio chian potiashic nidaid Quenesaded caid yacno choshon cano nëshpondash. <sup>54</sup> Aden nëshash mananuc pudundosho isec anocquido, Aidi bëdamianquid nec, quequin ambibi tantiaquimbi <sup>55</sup> daicsaid aton ueten nandoshon Esus yacno bë-bëpondash. <sup>56</sup> Adecbidi shubu dadpen yacno-yacnomboec Esus puduedcuenesho isun adembidi anocquidon, Bëdamequid nec, qeshun daicsaido bë-bëpondash. Adoac —Min dashcute ëbi mishme —capondash bë-bëaidon. Aden ambi tantiacpaden Esusën dashcute mishash bëdancuededpondash.

## 7

### *Nuquin Papan paucaid* (Mat 15.1-20)

<sup>1</sup> Adashien Edusaden caid yacnoësh padiseyobobëdi isadaidbo tsusedpabon chiaid tantiaquin chuiquido Esus yacno choshon, <sup>2</sup> Ëmbi mishboed mishtemaid ictsiash, quesa iquec tsusedpabon chuinëdacpadquiec mëpanudabi Esusbëd icquidon pesho ispondash. <sup>3</sup> Padiseyobo isadaidbobidi yec tsusedpabon chuinëdacpadquiec penush mëpanudanequid nec. <sup>4</sup> Tiedën caniquid ambi piucquid menequin bedacnoësh choec adecbidi penush tsusedpabon chuinëdacpadquiec mëpanudanequido isadaidbo nec. Isadaidbo tsusedpabon naden nata quequin ambibi chuinëdaid utsi-utsiec dadpen iquec. Ambi chuinëdacpadomboen dëshotetsen cachonouidi dapanquidquibidi nec. Adembidi matsu nacnenaid cachonouidi dapanoquidquibidi nec. Shocosh matsu cachonouidi dapanoquidquibidi neoaic. Tsusedpabon chuinëdacpadomboen naquidquio nec.

<sup>5</sup> Aden nabanquidquio padiseyobo nec. Adquiobidi abipadquid utsibo isadaidbo tsusedpabon naden nata quequin chuinëdaid tantiaquid neoaic. Adec tsusedpabon chuinëdacpadquiec Esusbëd icquido mëpanudenquiocsho isash padiseyobo: —Atotsieshun mibëd icquidon tsusedpabon chuinëdacpadomboen nainquiocquin mëpanudabi pepec —quepondash Esus caic.

<sup>6</sup> Adoquien Esus: —Isayasën ëndenquio dada uaqin mibitedi bëdamboen chiampidpadquid mibi nec. Ambi dada uampid nad iqueque. Tantia: “Nuquin Papa bëdambocquid nec quequin chiacpadomboen tantiesa isadaidbo nec.

<sup>7</sup> Abia Yampidënquio Nuquin Papan nadomboen nata quequin chiaid tantiesa icquin tsusedpabon nadomboen nata quequin chuinëdaid tantiaquidquio nec.”

<sup>8</sup> Aden tsusedpabon chuinëdacpadomboen nabanquin Abia Yampidënquio chiaid niacquid mibi nec —quepondash Esus isadaidbo tsusiobo caic Nuquin Papan Isayas dada uamepampid tantiamenuc.

<sup>9</sup> Aden chuishumbic adomboembidi chuioaic: —Badedquio Nuquin Papan chiaid chieshënquin tsusedpabon nadomboen nata quequin chuinëdacpadomboen nabanquidquio mibi nec. ¿Aden naquinda Nuquin Papan chiacpadomboen mimbi nape? <sup>10</sup> Nuquin Papan chiacpadomboen Moisesën dada uampid nad iquec: “Titan papabëdtan chiaid chieshenquiocquin naban.” Adquidën chiaid utsi nad iqueque. Tantia: “Aton papa icsamboen chuiquid unës ua. Adembidi aton tita icsamboen chuiquid unës uaoa,” quequin Nuquin Papan chiac Moisesën dada uampid nec. <sup>11</sup> Mibien tsusedpabon chuinëdaid tantiaquin adoesa

nec. Papan na naimëdacsho isun naden mimbi chiec. Mibi nashunquin menetiapimbo iquebi, papa. Mibi menenquiocquin Nuquin Papa Abia Yampid nashunquin menenun ëmbi dayun uaid nec, papa, quequin mimbi chiec. Adembidi titatsen mimbi chuioaic. Aden chuiquin papabëdta tita tantiaquin nashunenquiocquin Nuquin Papan chiaid niacquid mibi nec. <sup>12</sup> Aden mimbi nashunenquiocquin ismiacpadec, Papa, mibi nashunquin menetiapimbo iquebi, queoaic utsibo. Adecbidi, Tita, mibi nashunquin menetiapimbo iquebi, queoaic. <sup>13</sup> Aden chuiquimbi titabëdta papa tantiaquin nashunta quequin Nuquin Papan chiacpadomboen nainquiocquin tsusedpabon chuinëdacpadomboenuidi nata quequin chuiquidien mibi nechitec. Adembidi Nuquin Papan chiaid utsi-utsien naisa mibipadquid utsibo icmequin tsusedpabon chuinëdaid nata quequin mimbi chiec —quepondash Esus isadaidbo tsusiobo caic.

<sup>14</sup> Aden Nuquin Papan chiacpadomboen niacquido chiashic: —Utsibo, tantiec cho. Mibi bëdamboen chuinu. Bëdamboec papuduedta. <sup>15</sup> Tsusedpabon chuinëdacpadquiec mëpanudabi mimbi piaid min tantiate icsabudtemaid nendac. Icsamboen tantiec mibi icsaic. <sup>16</sup> Ëmbi chiaid tantiaquin utsi chuibanta —quepondash Esus.

<sup>17</sup> Aden chiash iccuededquido abi tabadnubi shubun puduedash tabadpondash Esus. Tabadsho isash: —Mimbi chuiboed ëbitedi tantieme —quepondash abëd icquido. <sup>18</sup> Adoquien: —Utsitedishun tantienquio icbocpadquido mibitedi neque. Tanta. Mimbi piaidën mimbi tantiaid icsabudtiapimbo iquec. <sup>19</sup> ¿Min tantiate yacnoda mimbi piaid nidpec? Padenquio. Mimbi piaid min pucu yacno bud-budec auëshquio chimu nëncuenash puduenec —quepondash abëd icquido caic.

<sup>20</sup> Aden chiec onquiashic: —Mimbi tantiacpadquiequi mibi icsabudec. <sup>21</sup> Chido mimbi inacmaid isash chudtiadquio iquec quequin mimbi tantiacpadomboen chido isuidtiapimbocquin mimbi chudted-chudtedec. Utsin na bedtiadquio iquebi quequin mimbi tantiacpadomboen mimbi ampec. Cuesunetiadquio iquebi quequin mimbi tantiacpadomboen mimbi cuesunepec. Utsin chido chudtiadquio iquec quequin mimbi tantiacpadomboen aidi mimbi chudpec. Dada utsin ëbi bëdaidquiocsho ispec quequin mimbi tantiacpadomboen min bënëpenquio chudmequid mibi nec. <sup>22</sup> Utsin bedactedi bednu quequin mimbi tantiacpadomboen bedquid mibi nendac. Adecbidi utsin bedaid isash adomboembidi bednu qeshun isuidesa iquec adomboen bedbanquidquio mibi yampec. Mibibi icsambocquid nec quiash chieshëmëquid mibi nendac. Adquid abimbo chiacbimboen chuiquid mibi nendac. Icsauidi bunquin adenuidi nabanec. Mibi icsaquin ompoenquiocquin nabanquid mibi yanec. Utsi bëdambo icsho isash chieshënquid mibi icpec. Utsi icsamboen chuiquid mibi nendac. Utsin chuisho, Ëbentsëqui tantiaquidquio nebi, quequin mamëshunquid mibi nendac. Adembidi nasho mamëshunoaquidbidi mibi nendac. Ëmbia tantiaquid nebi, quequin mimbibi nabanaid icsa isash bëdambo iquec quec mibi mamë nec tsadec. <sup>23</sup> Ëmbi chuiboedtedi icsaquidën naid nec. Aden tantiaquid icsabudte nec —quepondash Esus.

*Sidopenisia caid yacnoësh chido ambi tantiacpadquiec bëdanaid  
(Mat 15.21-28)*

<sup>24</sup> Aden chiashic isadaidbo yacnoësh puduanec nidequi isadaidpembo yacno nidpondash. Shubu dadpen icquid Tido caid anoentsëqui yacno choash shubun puduedash: —Nëmbo ëbi choaid chienda —quepondash Esus. Ambi chiacpadpenquiocnoc chuisho tantiapondash anocquidon.

<sup>25</sup> Adoac: —Esus chosh —quesho tantiashien mayan icsa dapuduedaidën tita Esus tabadacno nidpondash. Adec nidec puduedequi Esus taebudpondash chuiquid dapa nec quequin tantiec. <sup>26</sup> Isadaidpembon chido nidaid Sidopenisia caid yacnocquid niondash. Aidi Esus taebudash: —Con champi mayan icsa dapuduedaid dapudueme, tsusio, —quepondash comapenen chiec.

<sup>27</sup> Adoquien Esus: —Mabi con matses isadaidboba bëdamenuc choboc. ¿Bacuëbo cubudabicnubi opashëmpida pete menequin anin bënëpadic? Padenquio. Adembidi, ¿isadaidbotedi bëdamiabidambi matses utsibo, isadaidpembon, bëdamepadi? —quepondash Esus.

<sup>28</sup> Adsho tantiashien chido: —Icho, mimbi bëdamboen chiec. Padnuen anin meniac bacuëbon pete sananaid cuëshëmpi paëdtsacsho opashëmpin ambibi bedshun pec. Adembidi mimbi nadatiambocquin nabanac isadaidbo dadpen bëdanubi isadaidpembon abentsëc tantiaquid yec bëdanoapec —quepondash chido.

<sup>29</sup> Aden chidon chuishobien: —Bëdamboen mimbi chiec. Aden tantiaquid mibi neque. Nidec nid shubuno. Mayan icsa dapuduedaid dapuduenaque. Isec nid —capondash Esusën isadaidpembon chido chuiquin.

<sup>30</sup> Adsho tantianec choec shubun puduedquin isaquien aton champi uebocno ënden mayan icsa niqúan bëdanash abi ushaidëmbi uec.

#### *Pashu buëd onquenquiocquid Esusën bëdamiaid*

<sup>31</sup> Adashien Tido caid anoentsëcuësh nidequi Sidon caid matambidanec chian Cadidia caid yacno choapondash Esus. Nidaid Decapodis caid shubu dadpen yacno-yacnomboec capucueniash choapondash. <sup>32</sup> Ambo choash tsadnubien dada icsa, pashu buëd onquenquiocquid, Esus yacno bëash tsadquin: —Nëid mishquin bëdame —capondash.

<sup>33</sup> Adsho tantiashun iccuededquido ismenquiocnuen udictsëc dada icsa buanshun aton mëdante bushbi pashun pabiate pausuntanquin chicpondash Esusën. Adshun, min anatsen mishnu quetanquin ismequin uicchun mëpidadtanquin pashun ana mishpondash. <sup>34</sup> Aden amishec abuc isec: —Epata —quepondash. Paucud, quec adpondash Esus. <sup>35</sup> Adec Esus cuëdnubi pashu buëd onquenquiochoedi tantiadcuenash onquiampondash.

<sup>36</sup> Aden pashuaid bëdamiash: —Esusën naid nec quequin chienda —quepondash Esus. Adoboqui niacbidanquin chuibampondash. <sup>37</sup> Aden chuisho tantiash: —Adquidshenda Esus nepec. Ambi naidtedi bëdambo iquec. Pashu paucquid nec. Adembidi ana onquesa oncamequid nec —quec onquecuededpondash.

## 8

### *4000ted matses Esusën pemiaid*

#### *(Mat 15.32-39)*

<sup>1</sup> Adashic Esus yacno matses dadpen padpidec cho-choash yuec tabadec bundocuededpondash. Adsho isun abëd icquido chomiash Esus nadpondash: <sup>2</sup> —Matses bunec tabadsho isash unësquio iquebi. Daëdec ushec ëbëd tabadquin aton pete uesquin piac. <sup>3</sup> Aton pete nibëdsho isash, Pec nid, quetiapimbo iquebi padishnushe quiash. Ënapenuësh dadpen cho-choash nec —quepondash Esus abëd icquido chiec.

<sup>4</sup> Adoquien: —Pete nibëdacno nuqui tabadec. Pemenun ¿Mitsimbo nidshumbimbi pete bedpatsia? —quepondash abëd icquido.

<sup>5</sup> Adsho tantiashien: —¿Tedtsi panëmpi mitsana iquec? —quepondash Esus. Adoquien: —Siete iquec —quepondash abëd icquido.

<sup>6</sup> Adnubien: —Tabadbud —quetanquin Esusën panëmpi sieteted bedshun sananquin Nuquin Papa ambi pete icmiaid chuishun panëmpi cuësh-cuëshun: —Nëid meneban —cac abëd icquidon iccuededquido menebampondash. <sup>7</sup> Adembidi nuëcquid dëmishaid daëdpactsëcbidi bedshun: —Mimbi meniaid nec quequin tantiemi, Papa —queshun: —Nëidtsen meneban —Esusën cac menebanoapondash. <sup>8</sup> Aden menebanac piash: —Padi. Piombi —quecuededpondash. Aden piambien napi uaid tsitsanën sandoquin abëd icquidon bedaid tsitsan sieteted icpondash. <sup>9</sup> Peboedo dada caniaid dadpen 4000ted icpondash. Chidon aton bacuëbobëdtambi pepondash. <sup>10</sup> Aden pemeshun peboedotedi nidmiash Esus abëd icquidobëd cano antabëdtoanec nidquin Dadmanuta caid yacno potepondash.

*Nadatiambocquin nata. Isnu, padiseyobo quiaid  
(Mat 16.1-4; Duc 12.54-56)*

<sup>11</sup> Aden potiash tabadnubien cho-choshon padiseyobon: —¿Nuquin Papan chomiaid nebi quepecta mibi icco? Aidën chomiaid icquin nadatiambocquin nata. Isnu —capondash Esus chuiquin.

<sup>12</sup> Adsho tantiash, Èbi tantiesa nec, quec unësquio yec tsadequi —Èmbi naid dadpen mimbi ispaboc. ¿Adosho isboshida, Èbi isme, queoape? Nada-tiambocquin nabanquin èbi isme caqui ismenquio iquemi. Abimbo caimbi —quepondash Esus. <sup>13</sup> Aden chianec nidec cano antabëdtoanquin uquë cuëma utsiuc poteapondash.

*Nuquin Papan chiaidbëdta ambi chiaid daëd uaquin chuiquid padiseyobo  
(Mat 16.5-12)*

<sup>14</sup> Badedquio Esus nidnuesho tantiash cano antabëdtopondash abëd icquido. Panëmpi bedabi puduampondash panëmpi abentsëqui tsitsanën anuetsëcnuc. <sup>15</sup> Aden potequimbi Esusën nadopondash: —Pan uanuequidën trico caid putubëdta bidiscamete acte pistsëc cacushaqui nua yec bidisquic. Adembidi padiseyobon Nuquin Papan chiaidbëdtabi ambibi tantiaquin chiaid daëd uaquin chuibanec. Aden chuiquidbidi Edodesbëd icquido nec quequin tantiata. Aden tantiaquin padiseyobopadquid adecbidi Edodesbopadquid icmane quesahun ambi tantiacpadomboen nabanenda —capondash Esusën abëd icquido chuiquin.

<sup>16</sup> Adsho Esusën chuiboed icsamboen tantiec abëd icquido: —¿Èmbi panëmpi bëambo yaidta icbon chuipec? —quec onquecuededpondash.

<sup>17</sup> Aden chiec onquecuedednubien tantiaquidquio icquin Esusën nadopondash: —¿Atotsi quiash ¿ada panëmpi bëambo yaid con Icbon chuipec? quepe, mibi? ¿Èmbi nabamboed isenquio yec bëshu tsadacbimboecta tsadpo?

<sup>18</sup> Adecbidi ¿Èmbi chuibanaid tantienquio yec pashuacbimboecta tsadoapo?

<sup>19</sup> ¿Panëmpi 5ted bedshun cuësh-cuëshun menebanaqui napi uaid tsitsanën sandoaid tedtsi iccoshe? Chui —capondash Esusën.

Adoaquien: —Dosedet iccosh —quepondash abëd icquido.

<sup>20</sup> Adoaquien: —Adembidi, ¿nëbi siete panëmpi bedshun matsesën piaid napi uaid tedtsi tsitsanën sandoaid icposh? Chui —caoapondash Esusën.

Adoaquien: —Siete iccosh —quepondash abëd icquido.

<sup>21</sup> Adoaquien Esus: —¿Nadatiambocquid Esus nec quequin èbi tantienquioda mimbi icpe? —quepondash abëd icquido caic.

*Betsaida caid yacnoshon bëshu bëdamiaid*

<sup>22</sup> Adshumbic Betsaida caid yacno poteapondash Esusbëdtambidi. Aden potiash chosho isun bëshuaid bëpondash anocquidon. Aden bëshun ismequin:



—Nëid bëshumbo neque. Mibi bëdamianquidquo icquin mishquin bëdame — capondash Esus chuiquin. <sup>23</sup> Adsho Esusën bëshu mëdianquin Betsaida caid anoentsëqui buanshun uicchun bëcuishtuatanquin bëmishec: —¿Ada mimbi isequè? Èbi chui —capondash Esusën.

<sup>24</sup> Adsho tantiash Esus isquin: —Bëdamboen isenquiocquin cuète podo inchëshquio yac bimboecnuc mibi isembi —capondash bëshuaidën. <sup>25</sup> Aden chuishobi Esusën bëshuaid padpiden bëmishoaquien bëucudquiopondash bëdamboen isec. <sup>26</sup> Aden bëdamboen iso isun: —Nëbi min shubuno nid. Shubu dadpen icquid Betsaida caid datambidanec nid —quequin Esusën nidmepondash.

*Quidistu mibimbo neyoc, Petedo quiaid*

*(Mat 16.13-20; Duc 9.18-21)*

<sup>27</sup> Aden nidmiashic ancanquid Uedipo caid tabadaid nidaid Sesadeya caid yacno nidequi: —¿Atotsi Matsesën ëbi capec? —quepondash Esus abëd icquido chiec.

<sup>28</sup> Adoaquien: —Utsi-utsiec, Acten mentoamboed, Uan Esus nec, quenubic; utsi-utsiec, Edias, Nuquin Papan chiapadomboen chomiaidien Esus nechitec, quenubic; utsi-utsiec, Nuquin Papan chiaid ëndenquimbo chiampidpadquidien Esus nechitec, quec —quepondash abëd icquido Esus caic.

<sup>29</sup> Adsho tantiashun: —Ma mibitedishun ¿atotsibi cai? —capondash Esusën. Adoaquien: —Quidistu, Nuquin Papan ambi tantiampicpaden abi yacnoshon chomiaidquio mibi neyoc —quepondash Petedo abëd icquid utsibo onquiac bimboen chuioaic.

<sup>30</sup> Adsho: —Mimbi chuiboed utsi chienda. Abentsëcquiobi chienda —capondash Esusën abëd icquido comapenen chuiquin.

*Abi unës uate Esusën chiaid*

*(Mat 16.21-28; Duc 9.22-27)*

<sup>31</sup> Aden chuishun abi unës uate tantiamequin abëd icquido Esusën chuipondash. Nuquin Papan chomiaid yec matsesacsho isadaidbo tsusiobon chieshënquin ëbi mëyanendac. Aden mëyanquin unës uaqui daëdec ushash uincuenoaindabi, quequin Esusën chuipondash. <sup>32</sup> Abi unës uatequid chuipeshenda niondash. Aden Esusën chiaquien aidbëdtsëqui uano nidshun Petedon: —Aden tantiaquin chienda —capac caondash.

<sup>33</sup> Aden Petedon chuisho tantiash auchidi bidiadquin abëd icquid utsibo isec Esus nadpondash: —Nidec nid, Satanas. Nuquin Papan tantiacpadpenquiocnoc ëbi niacmenuequin icsamboen chuiquid mibi neque. Satanasën mua uac matsesën tantiacpaden mimbi tantiec —quepondash Esus Petedo comapenen chushcaic. Petedo Satanas bimboecquid nec quequin Satanas capondash Esusën Petedo chuiquin.

<sup>34</sup> Aden Petedo chuibanashic abëd icnuec cho-choquid utsibo caic: —Cho —quepondash Esus. Chosho isash: —Esuspadquid icnu qeshun mibi bunaid nainquiocquin ëmbi chiaid tantiaquin nabanta. Èbi mëyanacpadembidi mibi mëyante icnuc niaquenda. <sup>35</sup> Esus tantiaquin ambi chiapadomboen nanu queboedi unësmene quequin naisa Nuquin Papa yacno puduedtiapimbo iquendac. Esus tantiaquid nebi quequin tantiec mëyante icnuc unësmene quenquiocquin ëbi chuibanec tabadquid Nuquin Papa yacno tabadendac. <sup>36</sup> Aden aton na dadpen bedbanashic Esus tantiesa yec unësash Nuquin Papa yacno puduedtiapimbo iquendac. ¿Adquidta bëdambo icpadic?

<sup>37</sup> ¿Nuquin Papa mitsana menecta abi yacno puduedpatsia? Padenquio.

<sup>38</sup> Utsi icnubi dacuëdec Esus tantiaquid nebi quesa chido aton bënë bunenquio yec dada utsibëd tabadquid bimboecquid nec. Adquid chuiquin, Con

utsi nec, caisa nendabi. Adembidi ëmbi chiaid chiesa caic, Con utsi nec, quequin Nuquin Papa chienquoio iquendambi. Chuiquid dapa abipadquidquoio con pan ëbi icmiac ëmbi abucshun uaido mayan bédabobëdi nidaidën choindabi. Adec aidobëdi choashun ëbi chieshënquid isec, Con utsi nec, queoatiapimbo iquendabi —quepondash Esus cho-choquido caic.

## 9

<sup>1</sup> Aden chiashic Esus: —Nëbimbobi tabadquid ëbi tantiaquid utsi-utsiec unësabicquin nidaidën tabadquin Nuquin Papan nadatiambocquin nabanaqui Nuquin Papan shubun icquid abi tantiaquid utsi dadpen yansho isendac —quepondash.

*Esus bédaidquoio icmiaid  
(Mat 17.1-13; Duc 9.28-36)*

<sup>2</sup> Aden chuibanashic 5ted ushash: —Nidnu. Nid —quianec Esusbëd Petedo, Acobo, Uan, aitedi ambi chiactedi macuësh dapa yacno nidpondash. Ambo nidash tabadquimbi abi bédambo isadaid aidon ispac caondash. <sup>3</sup> Abi dasiuidaid dashcute ichoedi nac-nacquio yampac caondash. <sup>4</sup> Edias, Moises, aid daëd ënden yampidi Esusbëd onquesho ispac caondash Esusbëd choboedon. <sup>5</sup> Aden isequi: —Chuiquid Dapa, nuquibi nëmbo choash tabadquin mibi isec bédambo iquebi. Min shubumpi 3ted icnuc shubu uanuna mitsana, Moisesën na, Ediasën na, aited icnuc —quepac caondash Petedo. <sup>6</sup> ¿Atotsimbi chuipe? quetiapimbo yec dacuëdcuededquin aden chuipac caondash Petedon.

<sup>7</sup> Adec tabadshobien abu ushu choquidën ambo tabadquidtedi bëtimpac caondash. Aden bëtinacnoëshquiobi Esus chiec onquiampac caondash: —Esus, con madombo con dayunquiocquid nec. Adquid icquin chuibansho bédamboen tantiata —capac caondash Nuquin Papan.

<sup>8</sup> Adsho isbanquin isaquien Esusbëd choboeduidi icoapac caondash.

<sup>9</sup> Adanec macuësh yacnoësh budtanequi: —Mimbi isboed nëbi chienda. Ëbi Nuquin Papan mado matsesacsho unësmiac ëbi uincuenan mimbi isboed chuita —capac caondash Esusën. <sup>10</sup> Adsho tantiash utsi chienquoio yec abi uincuemete ¿mitsipadquoio icpec? quec abibi onquecuededpac caondash Esusbëd choboedo.

<sup>11</sup> Adec onquecuededash: —Nuquin Papan chomiaidquoio choabicnuc Ediasba choendac quequin tsusedpabon nadomboen nata quequin chiaid tantiaquidon chuibanec. Ma Edias ëndenquimboshë chopampic —quepondash abëd icquido Esus caic.

<sup>12</sup> Adoaquien: —Ai, Ediasën matses bédamboen tabadmenuen chiampidpadquidba choendac quequin Nuquin Papan chiaid nendac. Adembidi Nuquin Papan chomiaidquoio yec matsesash nëbi tabadsho matsesën chieshënquin mëyanendac quequin chuipampid nec. <sup>13</sup> Ediasën chiampicpadquiec Uan acten mentoanquid chopondash. Aidi choacsho abi bunacpadomboen abi chieshënquidën mëyanac. Ëndenquimboshë Edias chiec onquequin dada uampicpadomboen Ediaspadquid chomiaid Uan choshon, Mibi icsaid ënta, quequin chuisho abi chieshënquidën mëyanondash —quepondash Esus abëd icquido chiec.

*Mayan icsan buëd onquetiapimbo icmiaid Esusën bédamiaid  
(Mat 17.14-21; Duc 9.37-43)*

<sup>14</sup> Adec onquetanec choquin isquien matses dadpenshun abëd icquid utsibo Esusën niamboed tsusedpabon nadomboen nata quequin chiaid tantiamquidon comapenec onquecuededquin bëtimpandash. <sup>15</sup> Adnubien Esus

chosho isash iccuededquido, Bëdamaianquid choec. ¿Atotsi aidën napatsiashe? Isnu, quetanec titinque choec: —¿Ada cho? —quepondash.

<sup>16</sup> Adoaquien: —¿Atotsi quec ëbëd icquidbëd comapenec onquecuedede? —quepondash Esus.

<sup>17</sup> Adshobien: —Chuiquid Dapa, mibi ismenuen con mado bëombi. Mayan icsan buëd oncamenquio yaid nec. <sup>18</sup> Aid Mayan icsan comapenen nebudteniac ëcbacush-ëcbacushpambo yec uedeniosh. Adecbidi, uebudash unësanec shëta chëquëdëshcaic uiosh. Adquio yanesho, Bëombique. Bëdame, cauidombi mibëd icquido chuiquin. Adoaqui bëdamenquio iccosh —quepondash mayan icsan buëd onquetiapimbo icmiaidën papa.

<sup>19</sup> Aden chuisho tantiash abëd icquido caic: —Esus nadatiambocquid nec quequin ëbi tantiesa mibi nepec. ¿Tedectsi icshun ëmbi chiapaden mimbi tantiabempe? Mibi tantiesa icsho ¿mitsipadembimbi tantiampe? —queshumbic: —Madompi bec cho —capondash Esusën.

<sup>20</sup> Adsho tantiashun bëpondash. Bëshobi Esus istanquin mayan icsan abi dapuduedaid comapenen cuididicamiampondash. Aden nac madompi uebudec ëcbacush-ëcbacushpambo yec cuididiquepondash.

<sup>21</sup> Adsho isash: —¿Tedtsi seta matamec ad iccondashe? Chui. Tantuanu —quepondash Esus madompin papa chiec.

Adoaquien: —Bacuë ictsequi ad iccondash. <sup>22</sup> Cuëte dëtsiadaoid nënedeniosh abi dapuduedaidën. Actetsen nënedeniosh unësmenuequin. Mibi bëdamequidquio icquin ëbëdta tantiaquin ëbi con mado bëdameshun —quepondash madompin papa Esus caic.

<sup>23</sup> Adoaquien: —¿Mibi bëdamequidquio icquin ëbi con mado bëdameshun quecta ique? Nuquin Papa nadatiambocquin naquid nec quequin tantiacquidën tantiapadomboen Nuquin Papan naindac —quepondash Esus.

<sup>24</sup> Adsho tantiash: —Tantiembi. Ëmbi abimbo tantienquiocsho isun ëbi tantiampe, Icho —quepondash madompin papa Esus caic.

<sup>25</sup> Adsho tantiashun matses dadpen titinquec chosho isun mayan icsa chuiquin: —Matses buëd oncamenquiocquid mibi nec. Adembidi tantiametiapimbo icmequidbidi mibi neque. Ambo tabadenquio yec dapuduen —capondash Esusën.

<sup>26</sup> Aden chiaquien sidquec madompi cuididiquenubi dapuduempondash. Adnubien unësacimboec madompi uesho isash: —Unësosh —quepondash isquido. <sup>27</sup> Adnubien madompi mëdintanquin Esusën uëtsëndopondash. Adoac abembi nidtopondash.

<sup>28</sup> Adnubien shubun puduedacsho: —¿Atotsieshumbimbi mayan icsa dapuduemetiapimbo icpo? —quepondash abëd icquido Esus caic utsibon tantienquiocnobi.

<sup>29</sup> Adoaquien Esus: —Dapuduen quequinuidi chuibudaqui adquidquio dapuduenesa nec. Ma Nuquin Papan nadatiambocquin napanuna quequin Nuquin Papa chuideneshun mayan icsa dapuduen cac dapuduenendac —quepondash.

*Abi unës uate chuioaid  
(Mat 17.22-23; Duc 9.43-45)*

<sup>30-31</sup> Aden chianec nidaid Cadidia caid matanec nidpondash. Nidquimbi, Ëbëd icquid 12tedtsëqui chuibanu, quec utsibo ismenuen yec nidpondash Esus. Aden chuibanec nidequi: —Nuquin Papan Madombo matsesacsho bedendac. Aden bedshun meniac cuesuniac uincuempendac —quepondash Esus. Abi uincuentequid chiecshenda adec Esus onquepondash. <sup>32</sup> Aden

chuisho bēdamboen tantienquo yequi dacuēdec ēbi bēdamboen tantiamequin chui quetiapimbo icpondash abēd icquido.

*¿Mitsicquid chuiquid dapa icpec? quequin chiaid  
(Mat 18.1-5; Duc 9.46-48)*

<sup>33</sup> Adanec shubu dadpen icquid Capednaun caid yacno Esus choapondash. Adec choash shubun puduedshun: —¿Podquedēn choec atotsi chiec onquecuededo? —capondash Esusēn abēd icquido chuiquin. <sup>34</sup> Adsho tantiaish cuēdenquiocondash abēd icquido. ¿Esusbēd icquid mitsicquid chuiquid dapa icpeque? Tantianu, quec onquequin ambi chiaid chienquo yec tabadpondash. <sup>35</sup> Adec tabadnubi abi tsadacnoēshi: —Cho —quiampondash Esus abēd icquido caic. Aido choacsho isash: —Chuiquid dapa ēbentsēqui icnu quequid utsi nashunquidbidi ictiad —quepondash Esus.

<sup>36</sup> Adec onqueshumbic bacuēmpi abentsēc mēdintanquin abēd icquid tabadacno nēnantanquo tsadumbudpondash. Aden tsadumbudshun bacuē icuquequi: <sup>37</sup> —Esus tantiaquid nebi quequin ismequin bacuē yuedquin nashunquid ēbi yuedquin nashunacimboecquid nendac. Ēbi yuedquin nashunquid ēbi chomiondaid Nuquin Papa yacno yuedquin nashunoacimboecquid neoaindac —quepondash Esus abēd icquido chiec.

*Nuqui chieshēnesa nuqui bēdamboen chuibanquid nec quiaid  
(Mat 10.42; Duc 9.49-50)*

<sup>38</sup> Adnubien utsin naid chiec Uan onquedopondash: —Icho, mimbi chiacpadomboen utsin chuisho tantiapombi. Aidēn: “Esus nadatiambocquin naquidquo nec, quequin tantiembi. Aden tantiaquin aidēn chiacpadomboen mibi chiembique. Dapuduen,” cac mayan icsa dapuduemposh. Adosho isun, Esusbēd icquidpenquo mibi neque. Adenda quequin chuipombi —quepondash Uan.

<sup>39</sup> Adoquien Esus: —Padicnuna. Nadatiambocquin naquidquo Esus nec quequin abimbo tantiaquin ēmbi nacpadomboen nabanquidēn ēbi icsamboen chuitiapimbo iquec. <sup>40</sup> Nuqui chieshēnesa nuqui bēdamboen chuibanquid adquid nec. <sup>41</sup> Abimbo chiembique. Tantia. Esus tantiaquid nec quequin mibi nashunquid Nuquin Papan cuidnanquin bēdamboen naoaindac —quepondash Esus.

*Icsa uanquin tantiabenabicquid ismequid cuidendac quiaid  
(Mat 18.6-9; Duc 17.1-2)*

<sup>42</sup> Abi Esusēn onquequin chuibanec: —Adembidi abi icsacpadomboen bēdamboen tantiabenabicquid ismequid Nuquin Papan comapenen cuidendac. Adquid abi icsacpadomboen ismiabicsho cuēnote yuēmbocquidbēdta tētaneshun acte dapa nēnepatecnēdan. <sup>43-44</sup> Adembidi mimbi icsamboen tantiaquin mishaid ėntiapimbocquin ismedeniad adomboembidi utsin tantiec. Bednu quenquo yec mētaniacimboec tsad ėnēdenquo yec chian anēdēnquiacno nidmane quiash. <sup>45-46</sup> Adecbidi capuquin mibi icsaid mimbi ismebeneque. Capunu quequin tantienquo yec tateshuniacimboec tsadta ėnēdenquo yec chian anēdēnquiacno nidmane quiash. Adec mibi tsadnuc adquiecbidi mimbi ismiaid tantiec tsadendac. <sup>47</sup> Adecbidi ėshēn isec mibi icsaid ėntiapimbocquin mimbi ismedoniad adomboembidi utsin tantiec. Ēshē chicshuniacimboec tsad ėnēdenquo yec chian anēdēnquiacno nidmane quiash ma mibi tsadacpadec mimbi ismiaid tsadoapanu. <sup>48</sup> Icsa uadenequin ėnenquo yash unēsash chian anēdēnquiacno nidash unēsēnquiocshobi chodquiaid pequid macun mibi pendac. Ēnēdenquo yec chian anēdēnquiacno mibi tabadendac. Icsadenequin ėnenquiocquid

comapenen cuidtequid nendac. <sup>49</sup> Sa casecac pambid batambo yac bimboec Esuspadquid icnu quiash mibi icsaid ënëdnuen mëmunec mibi bëdambo yampec. <sup>50</sup> Sa batambocquid bëdambo iquec. Sa batambochoedi batapenquio yec icsasho ¿mitsipadentsi batambo icmeoapec? Sa batambocquid casecac daëdash batambo yacpadec utsibëd bëdamboec tabadta —quepondash Esus.

## 10

### *Aton chido bedshun nidmequid* (*Mat 19.1-12; Duc 16.18*)

<sup>1</sup> Aden abëd icquido chuiquin nainashic Esus aidobëdi nidaid Cadidia caid yacnoësh nidquin nidaid Udeya caid yacno matambidanec nidquin acte Odan caid potepondash. Ambo choash tabadsho isash padpidec matses dadpen cho-choapondash. Adec cho-chosho isun Nuquin Papan chiaid chuïbanoapondash Esusën.

<sup>2</sup> Adecbidi cho-choquid padiseyobon Esus Nuquin Papan chiaid icsamboen chuïnu queshun: —Aton chido bedash bunenquio yanshun cuemec. ¿Aden naicta bëdambo iqueque? Tantianu. Chui —capondash Esus chuiquin.

<sup>3</sup> Adoaquien: —¿Atotsi quequin Moisesën chuipampic? —queoapondash Esus.

<sup>4</sup> Adoaquien: —Aton chido bedash bunenquio yanshun, Con chido icsambocquid nec, quequin ambi tantiacpaden aton bënën dada uashun nidmiacsho isash, Padi, quenquiocpampic Moises —quepondash padiseyobo.

<sup>5</sup> Adoaquien Esus: —Nuquin Papan chiaid tantiesa tsusedpabo yansho isash, Padi. Adenda, quenquio Moises icpampic. <sup>6</sup> Nadomboen Nuquin Papan tauapampic. Dada abentsëc uashumbic chido abentsëcbidi uashun dada menepampic. <sup>7</sup> Adomboembidi nanuec dada aton tita aton papabëd tabadenquio yec aton chido bedash abëdi ambi quënë uaidëmbi tabadec. <sup>8</sup> Aden aton chido bedash tabadequi matses abentsëc icboedi daëdec. Matses daëd icboedi abentsëc yac bimboec tabadec. <sup>9</sup> Aden dada aton chidobëdta Nuquin Papan daëd uacsho ma cuëshëdmenquio icpanuna —quepondash Esus.

<sup>10</sup> Aden chiash shubun puduedacsho: —Mimbi chuïboed ëbitedi tantiamë —capondash abëd icquidon.

<sup>11</sup> Adoaquien: —Aton chido bedshun chudshun nidmeshun chido utsi bedquid Nuquin Papan menepampid niacquin tantiesa nec. <sup>12</sup> Adembidi chido aton bënën bedac aton bënë nianshun dada utsi bedmequid Nuquin Papan menepampid niacquin tantiesa neoaic —quepondash Esus.

### *Esus yacno bacuëbo bë-beaid* (*Mat 19.13-15; Duc 18.15-17*)

<sup>13</sup> Adnubien: Con bacuë mishquin Esusën bëdambo icmetsiash, quequin Esus yacno aton bacuëbo anin bë-bëpondash. Aden bë-bësho isun: —Padi. Esusën naid utsi neque. Bacuëbo buantan —capondash Esusbëd icquidon.

<sup>14</sup> Aden nidmesho isash nëishash: —Bacuëbo nidmenda. Ma cho-chono. Anin chiapadomboen tantiaquidquio bacuëbo neque. Adomboembidi badedquio Nuquin Papan chiaid tantiendac. Nuquin Papan shubu abentsëquën tabadquid aido nec. <sup>15</sup> Abimbo chiembique. Tantia. Nuquin Papan chiaid bacuëbon badedquio tantiacpaden tantiesa Nuquin Papa yacno puduedtiapimbo iquendac —quepondash Esus. <sup>16</sup> Aden chuitanquin bacuëbo dayumbanquin mamishec, Nëid bacuë bëdambo icme, Papa, quequin Nuquin Papa chuïpondash Esusën.

*Na dadpen icquid chiaid*  
(*Mat 19.16-30; Duc 18.18-30*)

<sup>17</sup> Aden bacuëbo chianec auëshquio puduanec nidshobien dada abentsëc titinquec choquin bëquedtanec danëshën sebudash tsadec: —Chuibanquin tantiamanquid, bédambocquid mibi neque. ¿Nuquin Papan shubu abentsëquën tabadnuequin atotsimbi napeba? —quepondash choboed Esus chiec.

<sup>18</sup> Adoaquien Esus: —¿Nuquin Papabëdtabidabi mibi bédambocquid nec, ëbi cape mimbi? Nuquin Papauidtsëqui bédambocquidquo nec <sup>19</sup> —quequin chiec abi onquec: —¿Nuquin Papan nadomboen nata quequin dada uamiampidtedi nabanquidta ne? Aidtedi mimbi tantiapec. Nad iqueque. Tantia: “cuesunianenda; adembidi min chidouidi chudquid icta; adembidi, ampenda; adecbidi, utsi chiec muainda; adecbidi, utsin na bedesabimboec muainda; adembidi papabëdtan titan chiaid chieshënenda.” ¿Aidtedi Nuquin Papan dada uamiampid nabanquidta ne? —quepondash Esus choboed caic.

<sup>20</sup> Adoaquien: —Abimbo chiembique. Tantia, Icho. Aidtedi nabanquidquo nebi. Bacuëtsëc icquimbi adquid nabanondambi ënenquiocquin —quepondash choboed.

<sup>21</sup> Adsho tantiaash, Aidbëd icte bunebi, quequin ambibi tantiec Esus nadpondash: —Nuquin Papan chuiquin dada uamiaid nabanec mibi nec. Ambi dada uacmaid iquec. Aidi mimbi nabi iquec. Nadquid iqueque. Tantia. Min shubuno nidshun mitsana mimbi tantiaidquo menebanquin piucquid bedshun aton na nibëdquid meneban. Aden menebanash Nuquin Papan chiaid tantiaquidquo mibi iquendac. Adec Nuquin Papa tantiaquidquo yec ëbëd iquec cho —quepondash Esus.

<sup>22</sup> Adsho tantiaash choboed mamënenquo yec unësquo yec nidpondash con na menebantiapimbo iquebi quiash.

<sup>23</sup> Adec nidsho isun abitedi bëisbanec Esus: —Aton na dadpen icquidën, Con na tantiequi Nuquin Papan shubu abentsëquën tabadnu, quequin tantiauidtsec. Adquid Nuquin Papan shubun puduedesa nec —quepondash abëd icquido chiec.

<sup>24</sup> Aden Esusën chuisho tantiaash, ¿Abimboda capec? quequin ambibi tantiec abëd icquido otacquo tabadsho isec Esus: —Abuido, Nuquin Papan shubu abentsëquën matses badedquo puduedtiapimbo iquec. <sup>25</sup> Adembidi shëcuën puduedte nidaidën capuquid dapan badedquo tantiatiapimbo iquec. Puduedquin ismiac puduedec. Adembidi Nuquin Papan shubu abentsëquën puduedmianquid matsesën badedquo tantiatiapimbo iquec. Ambi tantiacpadequi puduedte bunec —quepondash Esus.

<sup>26</sup> Adsho tantiaash abëd icquido, ¿Abimbobida capec? quetsëcquiec onquecuededpondash. Adec tabadequi: —Ambi tantiacpadequi puduedtiapimbocnoc ¿tsutsi puduedquid icpeba? —quepondash abëd icquido Esus chiec.

<sup>27</sup> Adoaquien comapenen bëisec Esus nadpondash: —Ambibi tantiaquin naquid Nuquin Papan shubu abentsëquën puduedtiapimbo iquec. Matses abibi puduedtiapimbocnoc Nuquin Papambien abi yacno yuedanquid mibi tantiamendac —quepondash Esus.

<sup>28</sup> Aden chiaquien Petedo nadpondash: —Chuinu. Tantia, Icho. Mibëd icnu, quequin abitedi nianondambi. Adembidi mibëd icquid utsibon abitedimbo nianondash. ¿Atotsi ëbitedi menetsia? —quepondash Petedo Esus chiec.

<sup>29</sup> Adoaquien: —Abimbo chiembique. Tantia. Esusbëd icnu queshun Nuquin Papan shubu abentsëquën tabadte iquec quequin chuinuequidën aton shububëdta nianquin aton shubun icquid aton tied chedobëdta nianendac. Adquid ambi nianëdaidtedimbocsho <sup>30</sup> daëd uaquin Nuquin Papan

menendac. Nëbi shubu utsin-utsinquec mibi puduedcuenec. Adecbidi Nuquin Papan shubu abentsëquën tabadquid abi tantiaquido mibëd icquid dadpen iquec. Adquid icnuc mibi chieshënquidbidi iquendac. Yucash ënëdenquio yec Nuquin Papan shubun mibi tabadendac mibi chieshënquid nibëdacno. <sup>31</sup> Nidaidënsnun chuiquid icboedi Nuquin Papa yacno tabadquin utsi nashunquid mibi iquendac. Adecbidi nidaidën tabadquin nashunquid icboedi Nuquin Papa yacno tabadquin chuiquid iquendac. Nashunesa yec chuiquid icboedi Nuquin Papan shubun puduedash utsi nashunquid adquid iquendac —quepondash Esus.

*Ëbi unës uaindac quequin Esusën chiaid*  
(Mat 20.17-19; Duc 18.31-34)

<sup>32</sup> Aden chianec Edusaden caid yacno podquedën nidec Esus bëyucanec nidpondash. Edusaden yacno padpidec choacshobini bedshun unës uaic quequin chiashi, ¿Dacuëdenquioda ambo Esus nidoapec? quetsëcquec abëd icquido tsyuec nidanepondash. Adnubien abi tsibanquid utsibo dacuëdecbidi nidanepondash. Adnubien: —Ëbëd icquidouditsëqui padpiden chuiuanu —quiash Esus niduntshun cho-chosho isquin naden abi mëyante chuiquin tauapondash: <sup>33</sup> —Chuinu. Bëdamboen tantia. Nuquibi Edusaden yacno nidec. Ambo nidacsho ëbi bedshun ëbi matsesaid Nuquin Papan madombo isadaidbo tsusiobo menendac. Aden meniac icsaquidbimboecnuc ëbi icsamboen chuibanec onquecuededash, Icsambocquid Esus nec. Unës uamequimbien ictiad, quendac ëbi caic. Adec onqueshun ëbi buanshun isadaidpembo ancaquid ëbi meneoaindac. <sup>34</sup> Aden meniac bedshun aidon ëbi oncain mamënsnumbedequimbi dacuishtuashumbi cuestanquin buanshun ëbi unës uaindac. Aden unës uac daëdec ushash uincuenoaindabi —quepondash Esus abi uincuenta ambibi chiec.

*Ëbi daëdi nashunta Acobo Uambëd quiaid*  
(Mat 20.20-28)

<sup>35</sup> Aden chiaquien Acobo Uambëd Esusën dayuntsëqui choash: —Mibi chuinu. Tantia. ¿Ëbi daëdshun chiacpadomboen ëbi daëdi nashunenquioda mimbi icpe? —quepondash.

<sup>36</sup> Adoaquien: —¿Atotsimbi mibi nashuneque? Ëbi chui. Tantuanu —capondash Esusën.

<sup>37</sup> Adoaquien: —Abuc nidoash chuiquid dapambo mibi icquin utsi ismequin min dayunquio ëquë tsadumbudcuenquin ëbi daëdi tsadunta —capondash Uanën Acobobëdtan Esus chuiquin.

<sup>38</sup> Aden aid daëdshun chiaquien: —Tantienquiocquin mimbi chioc. Icsaquid matsestedi nec, quequin Nuquin Papan aido cuidenquiocquin ëbi aton madombo bëdambocquidded cuidendac. ¿Ada ëbipadquid mibi icpatsia? —capondash Esusën.

<sup>39</sup> Adoaquien: —Ai, adquid tantiembi —quepondash.

Adoaquien: —Ai, adomboembidi mimbisen tantiendac —quepondash Esus. <sup>40</sup> Aden chiec abi onquec: —Abuc nidash chuiquidquio iquec con dayunquio ëquë tsadbudcuenec tsadec cho, quetiapimbo iquebi. Nuquin Papambien ambi tantiaidquio aden chiendac. Ëmbi padenquio iquec —quepondash Esus Uambëdta Acobo chiec.

<sup>41</sup> Aden Esusën chiaqui abëd icquidquio utsitedi Acobobëdtan Uanën chui-boed tantiash nëishcuededpondash. <sup>42</sup> Adec nëishash tabadsho isash: —Cho —quepondash Esus. Aden chomish: —Utsi namequid isadaidpembo nec quequin mimbi tantiec. Aidon matses utsi yuaquin mëyanquin namebanec.

<sup>43</sup> Aden namesa mibi nec. Chuiquid dapa icnu quiash utsi nashunquid icta. <sup>44</sup> Adechidi tsusio icnu quiash yuabimboe yec utsin namiaid icta. <sup>45</sup> Adquid icnuec Nuquin Papan madombo matsesash nidaidën tabadobi. Ancanquid iquenquo yec nashumënquidquo nebi. Adquid yec matses icsaid bedshunash ëbided cuidadec unësendabi —quepondash Esus.

*Bëshuaid, Badtimeyo cuëmëdquid bëdamiaid*  
(*Mat 20.29-34; Duc 18.35-43*)

<sup>46</sup> Aden chiashic Edico caid yacno chonobi abi tsibanquid utsibo dadpen cho-chopondash. Ambo tabadash abitedi puduampondash. Pudianash nidquin isaquien bëshuaid, Timeyon mado, Badtimeyo cuëmëdquid podqued cuëman tsadpondash. Piucquid bednu quequin cainec podqued cuëman tsadpondash. <sup>47</sup> Ambo tsadquimbi, Esus Nasaded caid yacnocquid choec, quequin utsin chiac: —Esus, Chuiquid Dapa, Dabidën madon, ëbi tantiaquin nashun —quequin chiec cuëdpondash bëshuaid.

<sup>48</sup> Adec cuëdsho tantiaishun: —Esus cuënenquo yec otacquo tsad —cabededpondash utsibon.

Adnubien: —Chuiquid Dapa, Dabidën madon ëbi nashun —quepondash bëshuaid comapenec cuëdoaic.

<sup>49</sup> Adoac nidtuidshun Esusën: —Cuënquid chome —capondash.

Adoquien: —“Chome,” queque. Nidtoash nid —capondash utsibon.

<sup>50</sup> Adsho tantiaish bëshuaid aton dashcute bëntsecquid chicanec badedquo nidtoanec Esus yacno chopondash. <sup>51</sup> Adec chosho isun: —¿Atotsimbi mibi nashumpeba? —capondash Esusën.

Adoquien: —Iste bunebi, Icho —quepondash bëshuaid.

<sup>52</sup> Adoquien: —Esusën ëbi bëshuaid bëuquec quequin mimbi tantiacpadquiec mibi bëdanoque. Nidec nid —Esus quenubi isbenquiopondash bëshuaidën. Adec bëdanshun Esus nidsho isun tsibampondash.

## 11

*Chuiquid dapabimboec yec Edusaden yacno Esus choaid*  
(*Mat 21.1-11; Duc 19.28-40; Uan 12.12-19*)

<sup>1</sup> Adec nidequi Edusaden anoentsëqui Esus chopondash. Edusaden anoentsëqui Bedpaque caid icpondash. Edusaden anoentsëcbidi Betania caid icoapondash. Aidtedi macuësh Odibos caid potsembo icpondash. Ambo choash ëbëd icquid daëd shubuno nidmenu quequin tantiec nadpondash Esus: <sup>2</sup> —Në shubu dadpen yacno nidec nid. Ambo nidshun cabayobiecquidën bacuë caniabictsëcquid tënëshac tsadsho mimbi istuidendac. Aidi matses catsadabicquid neque. Aidi istuidshun tënëshaid tëchicshun sananquin bëta. <sup>3</sup> Aden bedsho isun, ¿Atotsi canun aid bede? cac, Bëoaimbi. Nëid nuquin icbo bunaid nec, cata. Mimbi aden chiac, Buanec nid, quendac —quepondash Esus abëd icquid daëd chiec.

<sup>4</sup> Aden Esusën chiaquien abi daëdi nidpondash. Adec nidanequimbi cabayobiecquid caniabictsëcquid shubu shëcuë cuëmano tënëshac tsadsho istuidshun tënëshaid tëchicpondash. <sup>5</sup> Aden tënëshaid tëchicsho isun: —¿Mitsipaden tantiaquin ëmbi tënëshaid mimbi tëchiqueque? Tantianu. Chui —capondash anocquidën.

<sup>6</sup> Adoquien: —Tënëshaid tëchicshun bëta, con icbo quebocpaden naimbi —capondash tëchicquidën.

Adoquien: —Buanec nid —queoapondash.

<sup>7</sup> Adoac Esus yacno buampondash. Aden bëshun aton dashcute bëntsecquid chicshun cabayobiecquid capucpondash ma chuiquid



aidën catsadtonoeshun. Adoaidën Esus catsadtopondash. <sup>8</sup> Adembidi chuiquid Esus nec quequin ismequin utsibontsen aton dashcute bëntsecquid chichededshun podqued ansambampondash ma chuiquid dapa bédambocquid capunueshun. Adembidi tantiaquin utsibon budëdbiecquid podo tebededshun podqued ansambanoapondash. <sup>9</sup> Aden ansambanash matses dadpen bëyucanec nidanenubi Esus nënantanquio nidnuc aitedebidi tsyuec choquin tsibambëpondash. Adec abitedi nidanec Esus tantiec naded cuëdëncuededpondash: —¡Adeduya! Nuquin Papan bédambo icmiaid ambi tantiacpadomboen chuitanta quequin chomiaid nec. Tsusedpa chuiquid dapa, Dabid cuëmëdquidën tsyuecquid, shubu abentsëqui tabadquido chuiquid dapambo choec nec. <sup>10</sup> Èbi chuiquid dapa Nuquin Papan abuc tabadquidën chomiaid Esus nec. Nuquin Papa bédamboshë iquec. ¡Adeduya! —quec cuëdëncuededpondash Esusbëd nidquido.

<sup>11</sup> Adec cuëdëncuededequi Edusaden yacno cho-chopondash. Choashic Nuquin Papa tabadte shubu uashunaid quënë dadpen yacno nidash Esus puduedpondash. Adec puduedshun abitedi isbanash ushë budtsambi Betania caid yacno nidaneopondash Esus.

*Cuëte bacuëesa chiaid*  
(Mat 21.18-19)

<sup>12</sup> Abadiadtsashi Betania yacnoësh nidanec Esus bundopondash. <sup>13</sup> Adec bundoshombi cuëte icueda caid podo buntac-buntacpambo ancuenquio nidsho istuidec Esus: —Icueda podo buntac-buntacpambo podoash nideque. Isbono. ¿Bacuëashida neque? —quianec nidpondash. Adec nidquimbi icueda podouidquio icsho ispondash. Ushë utsin bacuëtiadquidi bacuëabi podopac. <sup>14</sup> Ad icsho isun Esusën: —Adequi bacuëesa icsho ma matsesën chenquio icpanuna —capondash. Aden chuisho tantiapondash abëd icquidon.

*Nuquin Papa tabadte shubu uashunaid yacnoshon cuemiaid*  
(Mat 21.12-17; Duc 19.45-48; Uan 2.12-22)

<sup>15</sup> Aden cuëte chuibëtsenec choequi Edusaden yacno choapondash. Ambo choashic Nuquin Papa tabadte shubu uashunaidën puduedoapondash. Adec puduedshun piucquid bedquin piucquid sanaid cuestetedi bidiacbanquin piucquid bednun nidaidën capuquidbëdta podochoquid chedo menebanquidën tsadtetsen nebudquin icbotedi puduemebampondash. <sup>16</sup> Aden puduemeshun Nuquin Papa tabadte shubu uashunaid nasiadquin aton na buansho isun: —Nuquin Papa tabadte shubu uashunaid neque. Adec nasiadec capuenda —capondash Esusën chushcaquin. <sup>17</sup> Aden chushcashic: —¿Èbi tabadte shubu uashunaid matsesën ëbi onquianete shubu iquendac, quenquioda Nuquin Papa icpampic? Aden Nuquin Papan chiaid tantiesabimboecquin muaquin piucquid bedte shubu mimbi icmiayoc —quepondash Esus. <sup>18</sup> Aden Esusën chuisho tantiash, Icsambocquid Esus neque. Unës uatiad, quequin ambibi tantiabededec isadaidbo tsusiobo tabadcuëdedpondash. Utsiboen: —Chuiquid dapan chiacpadomboen Esusën chiec —quepondash. Adsho tantiash, Esus bednu, quetiapimbo yec dacuëdcuededec tabadpondash isadaidbo tsusiobo. <sup>19</sup> Adnubien inchëshbudtsëqui Edusaden yacnoësh nidoapondash Esus.

*Cuëte bidiquiaid*  
(Mat 21.20-22)

<sup>20</sup> Abadiadtsashi Edusaden yacno nidoaquimbi cuëte icueda caid bidiquiacsho istuidpondash. <sup>21</sup> Aden istuidash Esusën icueda bacuëesa

chiaid tantiec Petedo: —Cuëte bacuëabicsho mimbi chuiboed bidiquiaye. Is, Icbo —quepondash.

<sup>22</sup> Adoaquien Esus: —Nuquin Papa nadatiambocquin nabanquid nec, quequin tantiaquiota. <sup>23</sup> Abimbo chiembique. Nuquin Papa nadatiambocquin nabanquidquo nec, quequin abimbo tantiasho isun mimbi chiacpadomboembidi naindac. Aden tantiaquin mimbi nëid macuësh cain, Mananuc tabadboedi adquiecbidi acte nantan tabadoata, mimbi cac nëid macuësh acte nantan tabadoaindac. <sup>24</sup> Embi chiacpadomboen Nuquin Papan naindac, quequin abimbo tantiaquin mimbi chuisho tantiashun Nuquin Papan adomboembidi naindac. <sup>25</sup> Aden Nuquin Papa chuinish mibi utsin icsambocquin naid tantienquo yec bëpiscudta. Adsho abucshun isash Nuquin Papan mimbi icsa uanquin naid tantienquo yec bëpiscudendac. <sup>26</sup> Adenquo mibi icsho isun Nuquin Papan mibi icsa uanaid bëpiscudenquiocquin mimbi chiaid tantiatiapimbo iquendac —quepondash Esus abëd icquido caic.

*¿Mitsicquidën chuibanta caid mibi ne? quiaid  
(Mat 21.23-27; Duc 20.1-8)*

<sup>27</sup> Adashic padpidec Edusaden yacno choapondash Esus. Adec choash Nuquin Papa tabadte shubu uashunaidën puduedash capusho isash isadaidbo tsusiobo: <sup>28</sup> —¿Mitsicquidën chuibanta cac chuiquid dapabimboecquin mimbi chieque? Tantianu. Chui —capondash.

<sup>29-30</sup> Adoaquien: —Adembidi ¿Atotsi tantiaquin mimbi chuipe? Chui. Tantianu. ¿Matses mentondaidën, Uan padon Nuquin Papan chuimiapadomboen nabanquinda nadiendash? Padenquo, quequin, ¿Ambibi tantiacpadomboen Uan padon naondash, quequinda mimbi tantiapeque? En chui. Tantianu. Aden mimbi chiac ëmbitsen mibi chiemi —capondash Esusën tsusiobo chuiquin.

<sup>31</sup> Aden Esusën chuisho tantiash udictsëc nidash isadaidbo tsusiobo onquec nadcuededpondash: —Nuquin Papan tantiamiacpadomboen Uan padon naondash, nuqui qesho tantiash, ¿Atotsieshun aidën chiaid tantienquo icconda? quetsiash Esus. <sup>32</sup> Naden Uan padon ambi tantiacpadomboen naondash, nuqui qesho tantiashun, ¿atotsi napatsiash Uanën chuisho tantiondaidon? Aidon, Nuquin Papan chuimiaid Uan pado niondash, quequin tantiabededquin nuqui cuënoten seshunetsiash —quecuededpondash. <sup>33</sup> Aden chiec onquecuededashic —¿Tsuntsin tantiamiacpadomboen Uan padon nabampondash? quequin tantienquo iquembi —quepondash isadaidbo tsusiobo Esus chiec.

Adoaquien: —¿Tsuntsin tantiamiacpadomboen Uan padon nabampondashba? quequin mimbi chienquo yacpadembi ëbi chuiquin tantiamequid mibi chienquo icoaimbi —quepondash Esus abi chieshënquido isadaidbo tsusiobo chiec.

## 12

*Tied icbo nashunta quequin chiaid  
(Mat 21.33-46; Duc 20.9-19)*

<sup>1</sup> Aden chiashic, isadaidbo tsusiobon nacpadomboen naid nec quequin tantiec utsi chiacbimboec Esus nadpondash: —Chuinu. Tania. Icbon aton tiedën uba caiduidquo nitsinshun cuate bënitsinaidën otadnidec cuidiancuidianec dadpen bacuëec. Sinash didiesho icbon bedec. Aid nitsinshun icbon daquënë uaic. Aden daquënë uashun yuecshun uba ënë chinun tsuc-tsucte nacnemposh. Aden nacnenshun uba ampensushe qeshun isec

tabadte shubutsen shubu uaposh. Aden aid shubu uash nidnuequin abi tied nashunquid, Ista, quequin chianec nidposh icbo.

<sup>2</sup> “Adec nidequi nidaid utsi yacno choash yuec tabadash, Uba sinashe. Con uba bedtan, cac, aton yua nidposh. <sup>3</sup> Adec nidboed tied yacno chosho isun tied icbo nashunquidon bedshun cuestanquin menenquiocquin aton icbo yacno nidmeoaposh. <sup>4</sup> Adoacsho isboshic, Uba bedtan, cac yua utsitsen nidoaposh. Tied yacno chosho bedshun cuestanquin aidtsen aton icbo yacno nidmeoaposh tied icbo nashunquidon.

<sup>5</sup> “Adosho isash, Padi, quenquiocquimbidi, Con uba bedtan, cac yua utsitsen nidoaposh. Aidi tied icbo nashunquidon cuesuneposh. Adembidi, tied icbon nidmiaid utsi-utsien abi tied nashunquidon cuesosh. Aden nabanquimbi utsi-utsien cuesuneposh.

<sup>6</sup> “Adsho isash tied icbo nadposh: Nëid, con madombo abentsëqui nec. Ëbi cudasaid nec. Aidi tsyuec con tied yacno nidmembi. Aidi chosho isun, Tied icbon madombo nec, qeshun bëdamboen istsiash, qeshun aton madombo nidmeposh.

<sup>7</sup> “Aden nidmiac ancuenquio chosho isash, Tied icbon madombo choeque. Is. Aton papa unësan aton papa yacpadec icbo icoanushe qeshun tied icbo nuqui icnun aidi cuesunenuna, quecuededposh tied icbo nashunquido.

<sup>8</sup> “Adec onquetanquin aton icbon madombotsen bedshun cuesuneshun daquënë uaid mabudacquin nebudposh. <sup>9</sup> Adoacsho tantiashun ¿atotsi tied icbon napec? Naden naindac. Utsibëd aton tied yacno nidshun abi nashunuidboed cuesuneshun utsibo abi nashunquido icmendac — quepondash Esus.

<sup>10</sup> Aden chuishumbic Esusën: —¿Adomboembidi chuiquin Nuquin Papan dada uamiampid tantienquioda icco? Nad iqueque. Tantia.

“Shubu uanuequidën buintad isuidaiddi utsin abia nitsinaid icoaposh.

Adquiobidi Nuquin Papan chuimiaid matsesën tantiauidaiddi iquendac.

<sup>11</sup> Nuquin Papan naid bëdambo iquec.

Ambi Chomiaid abi yacno yuedquid icmequin Nuquin Papan nadatiambocquin naid nec quequin abi tantiaquidënquio tantiec”

—quepondash Esus Nuquin Papan chiampidquio chiec. Nuquin Papain shubu abentsëquën abi tantiaquido yuedanquid nendac, quequin utsi chiacimboec abibi chiadquin Esusën chuibampondash.

<sup>12</sup> Adsho tantiash, Ëbitedishun isuidaiddimboecnuc chuibanec quequin tantiec isadaidbo tsusiobo Esus bedtiadquio icpondash. Adnubien Esus onquesho dadpenshun tantiabededpondash. Dadpen icsho isash dacuëdcuededec Esus bednu quenquio yec nidanepondash chieshëmënquido isadaidbo tsusiobo.

*Bec cho quequin bedshunquid nec, quequin chiaid*

*(Mat 22.15-22; Duc 20.20-26)*

<sup>13</sup> Isadaidbo tsusiobo nidshun padiseyobo edodesbobëdta istuidshun: — Nëidon Esus icsamboen chuimetsiash —qeshun aido Esus yacno nidmepondash. <sup>14</sup> Aden nidmiac Esus yacno chosshon abentsëcshun Esus nadopondash: —Ambia tantiaquid, matsesën tantiamiacpadpenquiocquid mibi yec Nuquin Papan tantiacpadomboen chuibanquidien mibi nec. Adquid icquin ëbi chui. Tantanu. Shocosh piucquid bec cho quequin bedshunquid, isadaidpembo ancaquid, Sesad cuëmëdquid nec. ¿Aden meniaid bëdambo iquec, quequin Nuquin Papan chiaidta nepec? <sup>15</sup> ¿Adambi menepeba? — quepondash padiseyobobëd edodesbo Esus caic.

Adoaquien, Ëbi icsamboen chuimenuec adec onquec, quequin ambibi tantiec: —Shocosh piucquid bec cho ma isnu —quepondash Esus.

<sup>16</sup> Adsho tantiashun bēpondash. Adoaquien: —Sananquin isme. ¿Tsutsibim-boecnuc dada uaid iqueque? Chui. Tantianu —capondash Esusën.

Adoaquien: —Isadaidpembo ancaquid, Sesadbimboecnuc dada uaid nec —quepondash.

<sup>17</sup> Adoaquien: —Ai, aidën na nec. Aid bec cho, queshe meneta. Adembidi Nuquin Papa Nuquin Icbo icquin, Nata, cacpadomboen naban —capondash Esusën.

Aden bēdamboen chuisho tantiash, Bēdamboenshenda tantiapec, quequin ambibi tantiec Esus chieshënquido tabadcuededpondash.

*Abuc tabadequi, ¿mitsicquidën chido neque? chui quiaid  
(Mat 22.23-33; Duc 20.27-40)*

<sup>18</sup> Adnubien saduseyobotsen Esus yacno cho-chopondash. Unēsaid uincuientiapimbo iquec quequin tantiaquido aido nepondash. Aido cho-choash nadpondash: <sup>19</sup> —Moisesën dada uapampid nad iqueque. Tanta. chuinu. Chidochoquid bacuë tishmiabi yec unēsan unēsboedën chido aton utsin bedtequid nec. Aden bedshun ma bacuë tishmepanuna. Aden tishmiac unēsaidën tishmiaidbimboec ma icpanuna, quequin chuipampid nec —quepondash saduseyobo. <sup>20</sup> Aden chuishumbic: —Aden nata quequin Nuquin Papan chiaid icnuc, aton mado 7ted tishpondash. Abia tishaid canishun aton chido bedshun bacuë tishmiabi yec unēspondash. <sup>21</sup> Adsho isun abi tsibanquidën aid chidobidi bedshun bacuë tishmiambo yec unēsopondash. Adembidi abi tsibanquidën <sup>22</sup> aton utsi unēsan aid chidobidi bedshun tishmiambo yec unēsopondash bacuë nibēdquio yec. Adecbidi dadatedi unēsbudnepondash. Adecbidi chidotsen unēsopondash. <sup>23</sup> Adec unēsash abuc tabadequi, ¿Mitsicquidën chido aid icpatsiashe? Chui. Tantianu —capondash saduseyobon Esus chuiquin.

<sup>24</sup> Adoaquien Esus: —Nuquin Papan chiaid mimbi icsamboen tantiec. Adembidi ambi nadatiambocquin naid mimbi icsamboen tantiaoaic. <sup>25</sup> Nad iqueque. Tanta. Unēsaid uincuenash abuc tabadquin chido bedesa nendac. Adecbidi aton champi bedmesa aton papa nendac. Nuquin Papan uaido mayan bēda unēsasa yacpadquiec matses uincuenash unēsasa iquec caidesa nendac. <sup>26</sup> Adembidi unēsash uincuenaid tantianu quesheun ¿Moisesën dada uaid isenquioda ictionda? Aidën cuētempi abibi nēdënquesheo istanec niduntquin naded Nuquin Papa onquesheo tantiapampic: “Min tsusedpabon Papa nebi. Abadauanën Papa nebi. Adecbidi Isaquën Papa nebi. Adecbidi Acobon Papa nebi,” quequin Nuquin Papan chuisho tantiampic Moisesën. <sup>27</sup> Nuquin Papan chiacpadpenquiocquin Moisesën dada uapampid nec quequin mimbibi muaquin chienda. Chuinu. Tanta. Unēsaidën Papa nebi quesa Nuquin Papa nec. Nami chodquiaid icquin Nuquin Papa tantiatiapimbo iquec. Aton nami chodquenubi aton tantiate icsho ambi uincuen uatequido Nuquin Papan tantiendac —quepondash Esus matses uincuenta iquec quequin saduseyobo tantiamenuec.

*Naden nata quequin chiaid ¿mitsicquid adquidpadquid utsi nibēdpec? quiaid  
(Mat 22.34-40)*

<sup>28</sup> Adec Esusbēd saduseyobo onquecuedednubien tsusedpabon nadomboen nata quequin chiaid tantiamequid abentsēc chopondash. Bēdamboen Esusën saduseyobo chuisho tantiash Esus icsamboen chuimenuec aidtsen: —Ëmbitsen tantianu. Chui. Nadomboen nata quequin chiaid Nuquin Papan

dada uamepampid dadpen iquec. Dadpen icnuc, ¿mitsicquid aidpadquid utsi nibëdpec? —quepondash.

<sup>29</sup> Adoaquien Esus nadpondash: —Nëid chiaidpadquid utsi nibëdeque. Chuinu. Tantia. “Nuquin Icbo Nuquin Papa nec. Nuquin Icbo Abentsëcquiobi iquec. <sup>30</sup> Adquid icsho ëbi tantiaquid isash bëdambo iquebi camequin Nuquin Papa tantiadoneta. Adecbidi ëbi yacpadecuidi icnu quenquio yec Nuquin Papa bunacpadquiec icnu quec bëdamboec tabadta. Adembidi ambi tantiacpaden tantianu quequin adombota. Adembidi aid tantiaquin bëdamboen nabanquiota. <sup>31</sup> Aden nabanquin Nuquin Papa bëdambo icmequin utsibo adembidi bëdambo icmequin nabanta. Ëbi tantiaquin utsibon ëbi nashuntiadquidi nec, mimbi cacpaden utsibo tantiaquin nashunta.” Aden nata quequin Nuquin Papan dada uamepampid nec. Aidpadquid utsi nibëdec —quepondash Esus.

<sup>32</sup> Adoaquien Esus icsamboen chuimenuc choboed nadpondash: —Mimbi chuibod abimbo iquec. Nuquin Papa abentsëcquiobi iquec. Aidpadquid utsi nibëdec. <sup>33</sup> Adembidi, ëbi tantiaquid isash bëdambo iquebi Nuquin Papa camequin tantiadoneta. Adecbidi mimbi tantiacpadomboen nainquio yec Nuquin Papan tantiacpadquiec icnu quec bëdamboec tabadta. Adquid icquin ambi tantiacpaden tantianu quequin adombota. Adembidi abi tantiaquin bëdamboen nabanquiota quequin chuitequidpadquid utsi nibëdec. Aden Nuquin Papa bëdambo icmequimbi utsibo adembidi bëdambo icmequin nabanta. Ëbi nashuntiadquidi nec, mimbi cacpaden utsibo tantiaquin nashunta, quequin chuitequidpadquid utsi nibëdec. Aden naquid Nuquin Papan bëdamboen isendac. Aden naisa, Con na Nuquin Papa menenu, qesho Nuquin Papan bëdamboen istiapimbo iquendac —queoapondash choboed.

<sup>34</sup> Aden choboedën bëdamboen chuioasho tantiash: —Nuquin Papan shubu abentsëquën tabadaid mimbi bëdamboen tantiatsempoc —quepondash Esus.

Adoac Esus icsamboen chuimenuc quetiapimbo icpondash utsibo.

*¿Tsuntsin mado Quidistu nepec? quiaid  
(Mat 22.42-46; Duc 20.41-44)*

<sup>35</sup> Abi icsamboen chuimenucquid utsi nibëdnuc Nuquin Papa tabadte shubu uashunaidën tabadquimbi Esusën Nuquin Papan dada uamiampid chuibanquin nadopondash: —Nuquin Papan chomiaidquio tsusedpa Dabidën mado nendac, quequin tsusedpabon chiaid tantiamequidon chiec. ¿Atotsi chuiquin naden chieque? Tantia. Chuinu. <sup>36</sup> Naden Nuquin Papan Mayanën Dabid chuimiampic:

“Icbo utsi icsho mibi chiembique. Tantia, mado, quequin chiec Icbo Dapa nadpampic:

Ëquë con dayun abiucquio cainec tsadec cho ma mibi chieshënquidtedi mimbi namiaid ma icpanu,”

quequin chuiampic. <sup>37</sup> Aden Nuquin Papa icbo dapanquio aton dayunquio chomiaid chiec Dabid pado, Con icbo nec, quiashic, ¿mitsipadquiec, Con mado nec, queopampic? Nuquin Papan chometequid, aton mado, Dabidën icbo yec ¿mitsipadectsi Dabidën tsyuecquid icoapec? —quepondash Esus abibi chiadequi.

Aden chiec onquesho tantiash badedquio tantiatiadquio yampondash utsibo. Bëdamboen chiec, quequin comapenen tantiapondash.

*Nuquin Papan chiaid tantiamequidon chuisho tantienda quiaid  
(Mat 23.1-36; Duc 11.37-54; 20.45-47)*

<sup>38</sup> Aden tantiamequimbi Esusën nadopondash: —Tsusedpabon nadomboen nata quequin chiaid tantiamequidën chuibansho tantienda. Aido nadquid iqueque. Tantia. Tsusiobimboec isadnu quiash abi dasiuidaid ënapen icquid dasiuidtenequid aido nec. Adecbidi tantiaquidquo yec tsusiobimboec isadnu quiash aton matses dadpen yacno capuquid nec. <sup>39</sup> Adomboembidi ëbi isoanu quiash Nuquin Papan chiaid chuibante shubun puduedash tsusiobëd tsadec. Adomboembidi ismenu quiash isedquido dadpen yacno choash shubu icbon dayunquio tsadoaic. <sup>40</sup> Aido bëdamboen nashumbimboen nianten na ampequid nec. Adembidi bëdambocquid nec camenuen yuen Nuquin Papa chiec. Adquid comapenen cuidtequid nendac —quepondash Esus.

*Nuquin Papa tantiaquin nianten meniaid  
(Duc 21.1-4)*

<sup>41</sup> Aden chiashic aton na bedtequid sandote tabëcaid tabadacno choash isec Esus uano tsadpondash. Nuquin Papa tabadte shubu uashunaid tantiaquin nashunquidën nacnentsiash quequin aton na bedtequid bë-bëquin sandobansho isec tsadpondash. Adec tsadquin isquimbi aton na dadpen icquidën aton na bedtequid sando-sandonobi <sup>42</sup> aton na daëdpactsëcquidquo nianten choquimbi aton shocosh piucquid daëdquiobictsëcquid sandopondash aton na utsi nibëdquiocnoc.

<sup>43</sup> Adosho isun abëd icquido chomeshun Esusën nadopondash: —Abimbo chiembique. Tantia. Nianten aton na bedtequid dayun uanu quenquioctsëcquin Nuquin Papa tantiaquioquin sandoquidquo nec utsibon aden sandoenquiocnobi. <sup>44</sup> Utsibon aton na bedtequid dadpen uesenquiocquin sandobededposh. Aido daëdpactsëc icquid sandoacbimboen sandoquido nec quequin tantiembi. Adquidpenquio nianten nec. ¿Bednun tedtsimbi dayunoape? quenquiocquin aton na daëdquiobictsëcquidi nibëdquiocnoc sandoposh nianten. Dadpen icquid sandoacbimboen sandosho aid isembi —quepondash Esus.

## 13

*Nuquin Papa tabadte shubu uashunaid chic-chicte chiaid  
(Mat 24.1-2; Duc 21.5-6)*

<sup>1</sup> Aden chianec Nuquin Papa tabadte shubu uashunaidën puduenubien: —Nuquin Papan shubu cuënote nacnenaaid bëdaidquo iqueque. Is, Icbo —quepondash abëd icquid abentsëc Esus caic.

<sup>2</sup> Adoaquien: —¿Nëid shubu dapa isecta ne? Shubu uaquin cuënote dapa tsindonëdaid mimbi nëbi isaid chic-chicac nibëdquiendac —quepondash Esus.

*Abitedi naimbudte tauanun ismete chiaid  
(Mat 24.3-28; Duc 21.7-24; 17.22-24)*

<sup>3</sup> Aden chiashic auëshquio nidanec macuësh Odibos caid yacno tabadtu-idpondash Nuquin Papa tabadte shubu uashunaid uano tsadnuc. Ambo tabadec abëd icquid 4ted icpondash. Petedo, Acobo, Uan, Andedes aided icpondash. Utsibon tantienquiocnoc aidon: <sup>4</sup> —Cuënote nacnenaaid nebudte mimbi chuiboed ¿mitsipadën nebudte icpeque? Tantianu. Èbi chui. Adembidi aidi tauanun ismete ¿atotsi icoapeque? Tantianu. Aid chuioa —capondash.

<sup>5</sup> Adoaquien Esusën nadopondash: —Muaquin chiaid tantiamane queshun Nuquin Papan chiaid isban-isbanquiota. <sup>6</sup> Nuquin Papan chomiaid nebi quec muaquid cho-choendac. Aid chosh, quequin chiac utsin-utsinquien, Abimbo caic, quequin tantiabededendac. <sup>7</sup> Adecbidi cuesnancuededec quendac. Adembidi cuesnancuededosh, quequin

chuituidsho tantiaoaindac. Aden chuituidsho tantiash dacuëndenda. Ad icnuc abitedi naimbudte ushë choabi iquendac. <sup>8</sup> Ai, adquoio iquendac. Adashic abëd tabadquidobëdi cuesnancuededendac. Adecbidi abi ancaquid dapan, Cuestan, quequin nidmiac nidaid utsin icquidobëdi cuesnancuededoaindac. Adecbidi utsi-utsiec yacno nidaid ishcludendac canchednuec. Adecbidi bunquiotte iquendac. Aidtedi icsamboshëcquid taëyendac.

<sup>9</sup> “Adquid yanubi Nuquin Papan chiapadomboen nabanec tabadta. Mibi bedshun, Icsambocquid neque. Cuidta, quequin tsusio utsibo menenun mibi buanendac. Adembidi bedshun Nuquin Papan chiaid chuibante shubuno buanacsho nuqui tsusiobon cuesendac. Adembidi bedshun isadaidpembo ancaquid dapabo yacno buanaqui mimbi tantiaid Nuquin Papan chiaid mimbi chuibanendac. <sup>10</sup> Nuquin Papa yacno yuedanquid iquec quequin mimbi chiendac. Nidaidtedi yacnoshon aden Nuquin Papa tantiaquidën chuitiad. Aden chiabicnuc abitedi naimbudtiapimbo iquec. <sup>11</sup> Adembidi, Icsamboen naquid nec, quequin muaquin bedshun icsaquid cuidnuequid yacno mibi buanaqui ¿atotsimbi cape? quequin mimbibi tantiec tsadenda. Nuquin Papan Mayanën mibi tantiamiacpadomboen mimbi chuibanendac.

<sup>12</sup> “Adembidi Nuquin Papan chiaid tantiesan aton utsimbo Nuquin Papan chiaid tantiaquid bedmec, Nëid cuesuneta, quendac. Adembidi aton papan aton bacuë cuesuneta, caindac. Adembidi aton bacuëbo tantiesa icquin aton papan chiaid niacquin adembidi aton titan chiaid niacoaquin cuesunemendac. <sup>13</sup> Esus tantiaquid chieshënquid dadpen iquendac. Adquidën mëyanaqui Esus tantiaquid nebi quec niaquesa icta. Aden niaquenquio yec unësash Nuquin Papa yacno nidacsho bëdambo icmiaid mibi iquendac.

<sup>14</sup> “Adnubien Nuquin Papa chieshënte ushë choendac. Aid chonoc Edu-saden yacno abi chieshënquid dapa choash, Nuquin Papa caid nebi, quiash Nuquin Papa tabadte shubu uashunaidën tsadendac. Adsho isash cuesunenushë quiash anoentsëqui icquido cuenenquiocboedi ma cuempanuna. Abimbo chiembique. Bëdamboen tantiaata caimbi. <sup>15</sup> Adecbidi shubu macano pada-padapambo yacno tabadquido yec umanuc dectatote uaid dectandoidën budanec con na bednu quenquio yec cuenta. <sup>16</sup> Adecbidi aton tied nantan tabadquid yec aton dashcute bëntsecquid chicshun dectanaid bednuec bidadenquio yec badedquio cuenta. <sup>17</sup> Bacuë usunquid adecbidi bacuë chishmequin buanquid badedquio cuentiapimbocsho mëyampec. Adquid tantiec utsibo unësquio icchitec. Nuquin Papa chieshënte ushë icsamboshë iquendac. Adnuc badedquio cuenta. <sup>18</sup> Nuquin Papa chieshënte ushë icnuc ma ue dapa sequenquiocpanuna, quequin Nuquin Papa chuided-chuidedta. Adoac ma badedquio cuempanu. <sup>19</sup> Comapenen Nuquin Papa chieshënquin abi tantiaquido icsa uaquin mëyanendac. Yuen naindac. Adoaidpadquid ënden nibëdondash. Adecbidi adoaidpadquid nibëdendac. <sup>20</sup> Nuquin Papa ëmenuen chuideneta. Nuquin Papa chuiquin, Chën, Papa, mimbi cainquiocnoc matsestedi nibëdtsiandac. Èbi tantiaquid ambi cuënaido tantiec, Chën, quequin Nuquin Papan ëmendac. <sup>21</sup> Nuquin Papa chieshënte ushë icnuc, Nëid, Quidistu, Nuquin Papan chomiaid neque. Isec cho, qesho tantienquio icta. <sup>22</sup> Aid ushë icnuc, Nuquin Papan chomiaid nebi, quec muaquid dadpen cho-choendac. Adecbidi, Nuquin Papan chuimiaid nebi, quec muaquid dadpembidi iquendac. Nuquin Papan cuënaido ëbi tantiaquid icmenu quequin abi chieshënquidombidi nadatiambocquin nabanendac. Adosho isun ëbi tantiaquidëmbi utsin-utsinquien tantiauidtsendac adquid. Nuquin Papapenquio aid nec, quequin Nuquin Papambo tantiaata. <sup>23</sup> Ad iquendac quequin chiombique. Ad icnuc chieshenquiocquin Nuquin Papan chiaid tantiaquiota

—capondash Esusën.

*Nuquin Papan madombo choaid*  
(*Mat 24.29-35, 42-44; Duc 21.25-36*)

<sup>24</sup> Aden chiash abi onquec: —Adnubien Nuquin Papa chieshënte ushë nidan inchëshquio yanendac. Badiadën ushëbëdtabi inchëshën chënquequid nibëdquiocnoc unës uaindac. <sup>25</sup> Adecbidi uispa paëdted-paëdtedendac. Adecbidi abuc tabëcaid nibëdnuc ambo icquido Satanasbëd icquido ¿mitsimbo nuqui cuempeba? quendac.

<sup>26</sup> “Adnubien Nuquin Papan madombo matsesaid ëbi choasho matsesën isendac. Abu ushun nadatiambo yec ushumbo yec bëdaidquio iquequi ëbi choasho isendac matsesën. <sup>27</sup> Adnubien Nuquin Papan uaido mayan bëdabo, Ëmbi nidtan, cac nidanendac. Nuquin Papan cuënaido bednuec nidaidtedi yacno nidaneshun bedbanash ëbi tsadacno choec, Bëombi, quetuidendac bedtanec choquido —quepondash Esus.

<sup>28</sup> Aden chiashic: —Abi chiembique. Tantia. Suc seccuduquiac nëbi cunquecuenec, quequin matsesën tantiec. <sup>29</sup> Adomboembidi ëmbi chuibamboed tauadosho isash Nuquin Papa chieshënte ushë choeque. Ista, quec chuinanta. <sup>30</sup> Abimbo chiembique. Tantiata. Ëmbi chuibamboed naimbudabicnuc ëmbi chuibamboed tantiaquidën tsyuecquido naimëdbudenquio iquendac. <sup>31</sup> Aden matsesën isnubien nidaidbëdi abu ënëdendac. Ëmbi chiaidtedi abimbo yec adquiouidi iquendac.

*Nëid ushënquio tauadoendac, quetiapimbo matses iquec quiaid*

<sup>32</sup> “Adnuc nëid ushënquio Nuquin Papa chieshënquin tauaindac quetiapimbo matses iquec. Ambi uaido mayan bëdabo adecbidi quetiapimbo icoaic. Aton madombo yec adtiapimbo iquebi. Nuquin Papa abentsëcquobien adquid tantiaquid nec. <sup>33</sup> Aid tauadote ushë choaid tantiatiapimbocquin Nuquin Papan chiaid niacmane qeshun isbanquin nabanta. <sup>34</sup> Nad iqueque. Tantia. Chuinu. Utsibo yacno nidnun abëd tabadquido naden chuiposh. Min utsibo chieshënenquiocquin shubu isquid icta quequin chianec nidposh. <sup>35</sup> Adec icbo nidan abi choate ushë mimbti tantienquio iqueque. Bëshunenquiocquin tantiaquiota. Inchëshbudtsëqui choapatsiash, quequin tantiata. Adembidi inchëshpotsembo chopatsiash qeshun adembidi tantiaquiota. Adembidi, cachina cuëdanubi chopatsiash, qeshun isucunshun tantiadenequiota <sup>36</sup> ëmbi tantienquiocnoc con icbo chochitondac, qeshun. <sup>37</sup> Adquiecbidi bëdamboec tabadquin Nuquin Papan chiaid istedistedta Nuquin Papa chieshënquidën niacmenushe qeshun —quepondash Esus.

## 14

*Esus cuesunete bunaid chiaid*  
(*Mat 26.1-5; Duc 22.1-2; Uan 11.45-53*)

<sup>1</sup> Adashic, bëyuc tishaid unësmenuequid aton shubu datamenuequin Isadaidbo tsusedpabon nidaidën capuquid yuaded cuesunepampic. Aid tantiaid ushëbëdtabi pan bidisquesa tantiaid ushë Pascuas caid daëdec ushash choendac. Aid chonoshe qeshun isadaidbo tsusiobon Esus nibëmbededpondash. <sup>2</sup> Aden nibë nec: —Pascuas ushë tantiec Edusaden yacno matses dadpen cho-choec. Matses dadpen choabicnuc ismenquiocquin Esus bedtiad. Bedsho isash, Padi. Bedenda, queuidash nëishun comapenen nuqui cuestasiashe —quepondash isadaidbo tsusiobo.



*Esus unësec qeshun nachimboen noadte machiuinte chiaid*  
(*Mat 26.6-13; Uan 12.1-8*)

<sup>3</sup> Adnubien Betania caid yacno tabadquin Esusën Simonën shubun puduedshun pepondash. Simon daushac bimboecquid, nami mishac tantiadenquiocquid icsho Esusën bédamiaid nepondash. Adec puduedshun pec tabadnubi comapenec noadquid bëec chido puduedpondash. Piuquid dadpen menequin comapenec noadquid bedquid chido nec. Ambi bedaid sedunte postichoquid dëusunaid dëchictanquin Esus chidon machiuimpondash.

<sup>4</sup> Aden machiuinte isash utsibo nëishun: —¿Atotsieshun machiuinte? <sup>5</sup> Noadte menequin piuquid dadpen bedshun aton na nibëdquid dadpen menetsiandac —quec onquecuededpanëdash Esus machiuimboed chido chushcaic. <sup>6</sup> Aden chushcasha tantiashien Esus onquec nadpondash: —Chushcainda. ¿Mitsanada nediosh? Ambi noadte machiuimboed bédaidquid nec. <sup>7</sup> Badiadquidën-badiadquidënquiec ënëdenquid yec aton na nibëdquid ënabi iquec. Aidi menenu qeshun mimbi menepec. Èbien nashuntiapimbo iquendac. <sup>8</sup> Èbi unësabicnuc nëid chidon tantiaquin chococanuequin nachimboen noadte machiuimpaboc. <sup>9</sup> Abimbo chiembique. Tantia. Nuquin Papan shubu abentsëquën tabadaid chuiquimbi ëbi machiuimboedën naidtsen tantiaquidon chuiben-chuibenendac —quepondash Esus.

*Esus bedmembro, Udas quiaid*  
(*Mat 26.14-16; Duc 22.3-6*)

<sup>10</sup> Adnubien Udas Iscariote, Esusbëd icquid abentsëc, Esus bedmenu, quianec isadaidbo tsusiobo yacno nidpondash. <sup>11</sup> Adec nidequi isadaidbo tsusiobo yacno choshon Esus mibi bedmembro quequin chuituidac bédambo icpac caondash aido. Adembidi: —Esus ëbi bedmesho isun piuquid mibi menembro —quecuededpac caondash. Adsho tantiash nidanec, ¿Mitsipadentsimbi bedmepe? quec tabadquin caimpac caondash Udasën.

*Nidaidën capuquidded cuesuniaid abëd icquidobëdtan piaid*  
(*Mat 26.17-29; Duc 22.7-23; Uan 13.21-30; 1Cod 11.23-26*)

<sup>12</sup> Adashien penun isadaidbo utsibon nidaidën capuquid cuesunenubien: —Cuesuniaid pambid penu qeshun, ¿mitsishunquiembi nacenpatsia? —quepondash Esusbëd icquido.

<sup>13</sup> Adsho tantiash Esus abëd icquid daëd chiec nadpondash: —Edusaden yacno nidquimbi dadan acte bësho istuidash tsibananec aidbëdi nidta. <sup>14</sup> Aden aid tsibanec puduedash, ¿Èbi tabadte quënë mitsimbo iquec? ëbëd icquidobëdtan penu, quiosh chuiquid, quequin shubu icbo chuita. <sup>15</sup> Aden chiac buanshun dectatomeshun abuc quënë dapa mibi ismendac. Ambo pete sante cuate iquendac. Ashunquid penun nacenata —quepondash Esus ambi daëd chuimiaid caic.

<sup>16</sup> Aden chiac abëd icquid daëd Edusaden yacno nidquin Esusën chiac padomboen bëquedshun tsibananash puduedshun penun nacenpondash.

<sup>17</sup> Adnubien inchëshbudtsëqui aid daëdtsëqui yacno Esusbëd icquid utsibo chopondash. <sup>18</sup> Adec choash pec tabadnubien: —Abimbo chiembique. Tantia. Èbëdtan pequid abentsëcshun isadaidbo tsusiobo ëbi bedmendac —quepondash Esus.

<sup>19</sup> Adsho tantiash, Icsambo iquec, quequin tantiec: —¿Èbida chienquid ique? —quepondash abëd icquidtedi.

<sup>20</sup> Adoquien: —Mibëd icquid nebi, quec mibitedi. Padnuen abentsëcshun ëbëdtambi pete cuëshën ënë punshun pequidën ëbi chieshënquid bedmendac.

<sup>21</sup> Nuquin Papan chuimiapadomboen aton madombo chidon tishac mat-sesaid ëbi unës uate anoentsëqui yanec. Ëbi bedmequid icsamboshë iquendac. Abi cuidte icsamboshë icnushe queshun aidi tishenquiocpatecnëdan — quepondash Esus.

<sup>22</sup> Adashic pebededquin pete bedshun Nuquin Papa chiec onquetanquin pete cuësh-cuëshun abëd icquido menebanquin: —Nëid pete cuëshë ëmbi piäid con dadabëd daëdacpadquieci Esus unësash abi tantiaquid ëbi icnuc Esus ëbëdi iquec quequin tantiata —capondash Esusën.

<sup>23</sup> Adembidi dëshote bedshun uba caid actequid icnuc Nuquin Papa padpiden chuishun abëd icquido menebanac acpondash.

<sup>24</sup> —Nëid acquin Esusded Nuquin Papan cuidac aton intac siebudpamboec unësposh. Aton madoded cuidshun Nuquin Papan ëbi padenquio iquec quequin nëid acquin tantiata. <sup>25</sup> Uba caid ënë nidaidëshun padpiden aquenquiocquimbi Nuquin Papan shubunshun actequid chuca mibëdtambi aquendambi —quepondash Esus abëd icquido caic.

<sup>26</sup> Aden chiash Nuquin Papan naid chiec cuëdënanec macuësh Odibos caid yacno nidoapondash.

*Esus tantiesa nebi quequin Petedon chuite chiaid*

*(Mat 26.30-35; Duc 22.31-34; Uan 13.36-38)*

<sup>27</sup> Adshumbic Esusën: —Esus tantiaquid nebi quesa mibitedi nendac. Nuquin Papan chiampidpadquid mibitedi nad iqueque. Chuinu. Tantia, mibi.

“Abi tantiaquid bëyucanquin yuedquid unës uaimbi. Adosho isash abëd icquido cuenec cuëshëd-cuëshëdendac,” quequin Nuquin Papan chuipampid nec. <sup>28</sup> Unës uac uincuenash Cadidia yacno ëbia nidoaindabi. Mibitsen ambo nidta —capondash Esusën abëd icquido chuiquin.

<sup>29</sup> Adoaquien: —Esus tantiaquid nebi quenquio utsitedi icnuc ëbien padenquio iquec —quepondash Petedo.

<sup>30</sup> Aden Petedon chuisho tantiash: —Abimbo chiembique. Tantia. Nëid inchëshëmbi cachina bënë daëdec cuëdanabicnuc Esus tantiesa nebi, quequin mimbi tedesteden chiendac —quepondash Esus Petedo caic.

<sup>31</sup> Adsho tantiash: —Esus tantiaquid mibi icsho mibi aidbëdta unës uaimbi, cac, Esus tantiesa nebi, quenquio iquendabi —quepondash Petedo comapenec onquec. Adecbidi Esusbëd icquidtedi onquepondash.

*Quetsemani caid yacno choash tabadaid chiaid*

*(Mat 26.36-46; Duc 22.39-46)*

<sup>32</sup> Adashic cuëte odibo caid dadpen icsho Quetsemani quequin cuënacno choash nidtuidash: —Nuquin Papa chuinuec udi nidebique. Nëmbobi tabad —quepac caondash Esus abëd icquido caic.

<sup>33</sup> Aden chianec Petedo, Acobo, Uan nëidted cho quianec bëyucanec nidec Esus, Matsestedidi icsaid cuidtequid ëmbi bedshunsho isun Nuquin Papan ëbi istiapimbo iquec, quequin tantiec unësquioshë yampondash. <sup>34</sup> Adquio iquec: —Ëbibi unësquioshë yec udictsëc nidebi. Chieshtomane queshun nëmbobi tabadquin Nuquin Papa chuiban —quepac caondash Esus ambi nëid 3ted, Cho, caboed chiec. <sup>35</sup> Aden chianec udictsëc nidash Nuquin Papa chuinuec nidaidën uebudash uec onquec: —¿Adabi adquid icmenquioctsia? Papa —quepac caondash Esus Nuquin Papa chiec. <sup>36</sup> Aden chuishumbic: —Papa, mimbi natiapimbo ictequid nibëdec. Adquid icquin matses cuidtequid

bedshunquid con mado icmenquio iquembi queshun mimbi adoenquioct-siandac, Papa. Ēbi bunacpaden nainquiocquin mibi bunacpadomboen nata, Papa —capac caondash Esusën Nuquin Papa chuiquin.

<sup>37</sup> Aden chiash choquin abēd choboed 3ted icquid usho istuidec Petedo caic: —Simon, ¿ushecta ne? ¿Ēbibi chieshmane quiash yuecpectsēc iquec ushenquio yec tabadtiapimboda icco? <sup>38</sup> Chieshmane queshun Nuquin Papa chuita Nuquin Papan chiaid niacmenuequidēn Satanas caidēn chiaid tantiamane queshun. Chieshenquio iquebi quiash dacuēdash badedquio mibi chieshendac —quepac caondash Esus.

<sup>39</sup> Aden chiash ambi Nuquin Papa chuibocno nidoashun ambi chuibocpadembi Nuquin Papa Esusën chuoapac caondash. <sup>40</sup> Adtanec choashumbic abēd choboedo adecbidi ushacsho istuidoapac caondash. Ushcasquiec tabadec, Ushenquioccobi, quequin chuitiapimbo yec otacquo tabadpac caondash.

<sup>41</sup> Adnubien padpidec nidoashun Nuquin Papa chuoatanec choec: —¿Uimabudashta tiboquec ushec ne? Padi. Ushenquio yec isucun. Nuquin Papan madombo chidon tishac matsesaid ēbi icsho nēbimbobi ēbi chieshēnquidon bedmeque. <sup>42</sup> Nidtoash ēbēdi nid. Ēnden choaye. Is —quetuidpac caondash Esus abi bednuec choquido isec.

*Esus bedshun buante chiaid*  
(*Mat 26.47-56; Duc 22.47-53; Uan 18.2-11*)

<sup>43</sup> Aden chuinubien Esusbēd icboedquiobi Udasbēd matses dadpen chochopondash. Cho-choquid utsi-utsiec chēshte sanampamboec chonobi utsi cueste sanampamboec chopondash. Aided Udasën chiac isadaidbo tsusiobon chomiaido nepondash.

<sup>44</sup> Esus bednuequid tantiamenuen ambiabi Udasën: —Ēmbi tanchoccaid mimbi bedtequid nendac. Aidquiobi bedshun buanta. Cuenushe queshun bēdamboen ista —capac caondash. <sup>45</sup> Aden chiashic aidobēdi choquimbi: —Icbo —quequin Udasën Esus tanchoccatuidpondash.

<sup>46</sup> Aden Udasën tanchoccasho isun Esus bedpondash. <sup>47</sup> Adnubien anocquid abentsēcshun chēshte sananquin isadaidbo tsusio dapan ancaidēn pabiate auc abentsēc pateshunepondash.

<sup>48</sup> Adnubien: —¿Cuesanquid Esus nec, queshun utsin cueste sananubi utsibon chēshte sananec ēbi bedecta cho-choec ne? <sup>49</sup> Badiadquidēn-badiadquidēnquiec Nuquin Papa tabadte shubu uashunaid umanuc daquēnē uaidēn tabadquin matses tantiamenuen chuibanioniombi mibitedi tabadnubi. Ambo icshobi ¿atotsieshumbini mimbi bedenquiocpo? Nuquin Papan chiacpadomboen nēbi mimbi ēbi bedec, —quepondash Esus abi bedquido caic. <sup>50</sup> Adec onquesho tantiashun cuenquin abēd icquidtedishun Esus niampondash.

<sup>51</sup> Adec cuenubini nēbi caniquid yequi Esus tsibananec nidpondac. Dashcute isad-isadquid dasiuidanec nidquin Esus tsibampondambi. Aden tsibanashobi Esus chieshēnquidon bedpondashi. <sup>52</sup> Aden bedac dasiuidte bēdaidquio nianec dadauidquio cuempondabi.

*Isadaidbo tsusiobo iccuededacno Esus buante chiaid*  
(*Mat 26.57-68; Duc 22.54-55, 63-71; Uan 18.12-14, 19-24*)

<sup>53</sup> Adnubien, isadaidbo tsusio dapa, matses tantiec Nuquin Papa chiec onquequido yacno Esus buampondash. Aden buanec puduednu quiacnombobi isadaidbo tsusiobo utsibo iccuededec tabadpondash. <sup>54</sup> Aden Esus buanubi tsyuec choquin Petedo cuemboedēn tsibananec isadaidbo tsusio dapan shubu umanuc daquēnē uaidēn puduedpondash. Adec puduedash Esus

cuenushe quequin isquido tabadacno ambotsen cuëte cuëc tsadpondash Petedo. <sup>55</sup> Adec Petedo tsadnubien Esus unës uate bunquin Esus icsambocquid nec quequin chuiquid ¿Ada icpec? quequin nibënquin adquid tsusiobon istuidabicpondash. <sup>56</sup> Abimbo chiacbimboen dadpeshun chuibededpondash. Aden chuiquin abentsëcshun chiacpadomboen chienquiocquin utsin chuiopondash.

<sup>57</sup> Adnubien, Chuinu. Tantia, qeshun Esusën chiacbimboen utsi uain chuipondash utsibon. <sup>58</sup> Aden chuinubien utsi onquec: —Naden Esusën chuisho tantiombique. Tantia. Chuinu. “Nëid, Nuquin Papa tabadte shubu uashunaid chicbanendambi. Aden chicbanshumbic daëdec ushquin matesën naidpenquio isadnuc ëmbibi naindambi,” quequin Esusën chuipondash —quepondash utsi. <sup>59</sup> Aden abentsëcshun chuinubi utsin aden chienquiocquin chuipondash.

<sup>60</sup> Aden chuisho tantiash isadaidbo tsusio dapa nënantanquio nidtoash nidquin: —¿Mimbi chiacpadomboen chiecta nec? ¿Abimbo chuiquidta nëidtedi neque? Chui. Tiantianu —capondash isadaidbo tsusio dapan Esus chuiquin.

<sup>61</sup> Adsho tantiash ëcbedenquio yec otacquio nidsho isash: —¿Nuquin Papan chomiaidquio, Quidistu caid, Bëdambocquidën mado nebi, quecta mibi ique? —queopondash isadaidbo tsusio dapa Esus caic.

<sup>62</sup> Adoquien Esus: —Ai, aidi nebi. Nuquin Papan madombo matesaid abuc nidoashic Nadatiambocquidën dayun abiucquio tsadash abu ushun ëbi chosho matesën isendac —quepondash Esus.

<sup>63</sup> Adsho tantiash, Icsamboen chiec, quec abi daëd dasiuidaid bëntsecquid dached-dachedquiash: —¿Atotsieshun Esusën icsamboen naosh, quequin chuimenuen utsi nibëmpe nuqui? <sup>64</sup> Nuquin Papa icsamboen Esusën chuisho mimbi tantioc. ¿Midapaden mimbi chieque? Tiantianu. Chui —capondash isadaidbo tsusio dapan tsusio utsibo chuiquin.

Adoquien: —Icsambo iqueque. Unës uametiad —quecuededpondash.

<sup>65</sup> Adsho tantiashun Esus dacuishtuaquin utsibon tauapondash. Adotankin dashcuten bëpucshun ambibi cuestanequi: —¿Tsuntsin mibi cuesposh? Comapenen tantiaquidquio mibi neque. Èbi chui. Tiantianu —capondash Esus chuiquin.

Adnubien cuenushe quequin Esus bedshun sondadon comapenen cuesbededpondash.

*Esus ëmbi tantiacmaidquio nec quiaid*

*(Mat 26.69-75; Duc 22.56-62; Uan 18.15-18, 25-29)*

<sup>66</sup> Adnubien Petedo umanuc daquënë uaidën tsadnubi isadaidbo tsusio dapan yua chido chopondash. <sup>67</sup> Choshon Petedo cuëte cuëc tsadsho isun: —Nasaded caid yacnocquid Esusbëd icquid mibi nec —capondash.

<sup>68</sup> Adoquien, Esusbëd icquid nebi, quetiapimbo yec Petedo: —¿Atotsi mibi quepe? Tantienuquio yec tsadebi —quepondash.

Adtanec puduedte shëcuë anoentsëqui nidtuidash tsadnuc cachina bënë cuëdpondash.

<sup>69</sup> Adec Petedo ambo tsadsho chido yuaidën istuidtanquin padpiden: —Esusbëd icquidquio nëid nec —quequin anocquido chuiopondash.

<sup>70</sup> Adoquien: —¿Aidbëd icquidtabi nedi? —quepondash Petedo.

Adnubien yuecpactsëc yash: —Aidbëdi Cadidia yacnocquid mibi nec —quepondash ambobidi tabadquido.

<sup>71</sup> Adoaquien: —Ëmbi tantiacmaidquio nec quequin abimbo chiembi. Ëmbi abimbo chienquio icsho ma ëbi chian anëdënquiacno Nuquin Papan nënepanuna —quepondash Petedo comapenen chiec.

<sup>72</sup> Adnubien cachina padpidec cuëdpondash. Adsho tantiashun, “Cachina daëdec cuëdabicnuc ëmbi tantiacmaidquio Esus nec, quequin mimbi chiendac tedestedec onquequin,” quequin Esusën chioshi quequin tantiec unësquio yanec shubianquiopondash Petedo.

## 15

### *Pidato yacno nidshun Esus meniaid*

*(Mat 27.1-2, 15-31; Duc 23.1-5, 13-25; Uan 18.28-19.16)*

<sup>1</sup> Badiadnuc isadaidbo tsusiobo iccuededpondash. Nëidted icpondash: isadaidbo tsusio dapabo, tsusio utsibo, tsusedpabon nadomboen nata quequin chiaid tantiamequido. Adec iccuededash onqueshun Esus mëtaneshun buanshun isadaidpembo ancaquid Pidato caid menepondash. <sup>2</sup> Aden meniac Pidato: —¿Isadaidbo ancaquidta mibi neque? Ëbi chui. Tantianu —capondash Pidaton Esus chuiquin.

Adoaquien: —Mimbibi aden chuipayoc —quepondash Esus.

<sup>3</sup> Adnubien, Esus icsaded-icsadedosh, quequin chiec isadaidbo tsusiobo onquecuedednuc cuëdenquio yec Esus tsadpondash. <sup>4</sup> Adec tsadsho isun: —¿Ëcbedanenquio yec otacquioda tsade? Mibi icsaid dadpen nëidon chuibanec —Pidaton caqui <sup>5</sup> adquiecbidi Esus tsadpondash. Adec tsadsho isash ¿Mitsipadquidquio Esus nepec? Utsimbien, Icsapenquiocquid nebi, quequin chuipec, Aden chienquio Esusën iquec, quequin ambibi tantiec Pidato tsadpondash.

<sup>6</sup> Adashic, isadaidbon nidaidën capuquidded cuesunepampid tantiaid Pascuas caid ushë choaidën-choaidënquien, Quënën nauedmiaid abentsëc nidmenu. ¿Mitsiquidimbi nidmepeque? Chui. Tantianu, quequin isadaidbo Pidaton chuided-chuidedpadenec. Adoaquien ismequin, Nëid nidme, cac nidmedenepadenec. <sup>7</sup> Aden chuidenequin ambi quënën nauedmiaid Badabas cuëmëdquid nepondash. Aidëmbi utsibobëdtan Domanobo bunenquiocquin cuesquin tauasho isun bedmeshun quënën nauedmepac caondash. <sup>8</sup> Adnubien Pidaton seta utsin quënën nauedmiaid abentsëc ambi nidmiondacpaden nëbi adquid utsi nidmepatsiash icnui quequin tantiec Pidato yacno chopondash isadaidbo iccuededquido. Aden tantiec choash: —Quënën nauedmiaid abentsëcta mimbi nidmepatsia —quecuededpondash aido Pidato caic.

<sup>9</sup> Adec onquesho tantiash Esus nidmetiadquiocquin Pidaton: —Mibi ancaquid caid, Esus, nidmependambi iqueque. Isadaidbon, ëbi chui. Tantianu —capondash. <sup>10</sup> Esusbidi tsusio icpec matses quenushe quiash isadaidbo tsusiobo Esus unës uate bumpec quequin tantiaquin Pidaton aden chuipondash. <sup>11</sup> Aden tantiec, ¿Adambi Esus nidme? quequin Pidaton chiac, Padi. Badabas nidmeta, quequin isadaidbo iccuededquin chuipondash aton tsusiobon chiacpadomboen. <sup>12</sup> Aden chuibededaquien: —Badabas nidmequimbi mibi ancaquid caid Esus ¿atotsimbi napeque? Chui. Tantianu —capondash Pidaton.

<sup>13</sup> Adoaquien: —Cueste nitsinshun dectan —quec comapenec cuëdcuededpondash isadaidbo.

<sup>14</sup> Adoaquien: —¿Atotsi icsa uaosh? —quepondash Pidato.

Adoaquien: —Cueste nitsinshun dectan —queoaic comapenec cuëdcuededpondash.

<sup>15</sup> Adsho tantiash Esus ëmbi nidmesho isun, Pidato icsambocquid nec, quequin ëbi chuiquid dapa isadaidbo tsusiobon chuinushe queshun Badabas nidmepondash. Adshumbic: —Cueshcaten Esus comapenen cuesmebededshun cuesten dectanun buanec nid —capondash Pidaton sondado chuiquid chuiquin.

*Sondadon Esus mamënshumbededaid chiaid*

<sup>16</sup> Adoac Esus bedshun Pidaton shubu umanuc daquënë uaid yacno sondadon buampondash. Aden buanshumbien sondado utsibo 600ted icnuc chomepondash. <sup>17</sup> Choshon dashcute abichobicquid bēdaidquio bedshun ancanquid dasiuidacbimboecnuc dasiuiunshun pinchuc-pinchucquid mauete uashun Esus matoncashun <sup>18</sup> ancanquid cuēnacpaden cuēnec: —Mibi isash bēdambo iquebi. Isadaidbo ancaquid dapa caid mibi neyoc —quequin Esus oncaic onquecuededpondash sondado. <sup>19</sup> Adoquimbi ancanquidēn sanante cuate bēdaidquiobimboecnuc sananquin sondadon abentsēcshun-abentsēcshunquien Esus macuestanquin dacuishtucabudniash Esusēn taēno danēshēn sebudash uepondash. <sup>20</sup> Aden mamënshumbededquin mēyanshun dashcute bēdambocquid ambi dasiuiamboed dachicshun aton dashcutebi dasiuiunshun cuesten dectanuequin Esus buampondash.

*Esus cuesten dectante chiaid*

*(Mat 27.32-44; Duc 23.26-43; Uan 19.17-27)*

<sup>21</sup> Aden abi dectante cuate Esusēn buantiapimboecnoc nidquimbi abi datanquid cuate chiadtometanquin buamepondash sondadon. Abi datanquid Sidene caid yacnocquid nēbi Edusaden caid dēuequiacnoēsh choquid nepondash. Adecandedo, Dupo chedon papa Simon cuēmēdquid niondash. <sup>22</sup> Aden cuate Simonēn buanubi macuēsh Codocota caid yacno abitedi chopondash. Macuēsh mapi canitebimboecsho Codocota quequin isadaidbon aton onqueten cuēmpondash. <sup>23</sup> Ambo choshon uba sicaid paēacsho paēmboquid dauē cacushtanquin meniac aquenquiocondash Esusēn. <sup>24</sup> Aden isuidsho isun cuesten dectampondash. Aden dectanshun aton dashcute bednu quequin sondadon abi cuēmēdquidtedi dada uabanshun tēchun sandoshon cadotanquin dada uatsaidēmpi puduemaiid isbanquin Esusēn dashcute bedbampondash.

<sup>25</sup> Ushē dectatoec 9 yanuc Esus cuesten dectampondash. <sup>26</sup> Esus dectanaid mapino dada uaid cuate podectanaid diadpondash. Isadaidbo ancaquid nec quequin dada uaid nepondash. Esusēn naden chiosh quequin isadaidbo tsusiobon chiacpaden dada uaid nepondash. <sup>27</sup> Cuesunetanquin ampequid daēd ēquē dectambudcuenshun nēnantanquio Esus dectampondash. <sup>28</sup> “Dectanquin icsaquidbēdta dectanendac,” quequin Nuquin Papan chuimiampicpadembi napondash. <sup>29</sup> Aden Esus dectanaid mapino abuc: “Isadaidbo ancaquid nec” quequin dada uaid podectanaid diadsho isash, Adquidshenda diadpec, quequin tantiaquin datanquin mamënshumbededpondash. Adec cuenquin mamënshunquin: —Nuquin Papa tabadte shubu uashunaid chicbanshun daēdec ushquin chuca uaimbi, quequin chiec mibi onquiondaque. <sup>30</sup> Abimbo chuiquid yec unēstiapimboquid nebi quianec mibibi budta —cabidanepondash.

<sup>31</sup> Aden cuenquidēn chuinubi adembidi isadaidbo tsusio dapabotedi tsusedpabon nadomboen nata quequin chiaid tantiamequid chedo onquecuededec: —Utsi-utsien bēdamequimbi utsi unēsacsho uincuemeboed yec mētoccaid abembi chiquidtiapimboquid nec —quepondash isadaidbo tsusiobo Esus caic. <sup>32</sup> —Quidistu, Nuquin Papan chomiaid, isadaidbo ancaquid

nebi queboed mibibi bud. Mibi budaid isash, Quidistu nec, quequin tantien-dambi —quepondash. Aden cuenquidën mamënshunubi abëdta dectanaidën adembidi chuioapondash.

*Esus unës uate chiaid*

(*Mat 27.45-56; Duc 23.44-49; Uan 19.28-30*)

<sup>33</sup> Adnubien ushë cuembocnoc 12 yanan inchëshquio icboedi ushë budec 3 yanuc uëshëmbo yanoapondash. <sup>34</sup> Ushë 3 yanuc: —Eloi, Eloi, ¿lama sabactani? —quequin aton papa chiec Esus comapenec cuëdpondash. Aton onqueten: Papa Edoen, ¿atotsieshumbini bidiaquin isenquio ique? quec adpondash Esus.

<sup>35</sup> Aden Nuquin Papa Esusën chuisho tantiaquido, Nuquin Papa cuënec, quenquio yec: —Edias cuëneque. Tantia —quepondash.

<sup>36</sup> Aden tantianubi badedi titinqueshun sicaid mucambocquid nëcushtanquin puntanquin cuate dëdectanshun acmenuequin ëccuëscadonequi: —Chiata. Edias Esus bedec chonoshe caimbono —quepondash.

<sup>37</sup> Adnubien comapenec cuëdec Esus unësbudpondash.

<sup>38</sup> Esus unësbudnubi abi inchëshacimboecnubi Nuquin Papa tabadte shubu uashunaid quënë uaid nuntan dectanaid dashcute bitsipambocquid tsincabudquin dectanac diadquid canchedbudcuempac caondash tembi daëdquio yec. <sup>39</sup> Adec Esus cuëdbud-cuëdbudec unëso isash: —Abimbo chuiquid niosh. Nuquin Papan madombo nëid nec —quepondash sondado chuiquid uquë tsadbudec.

<sup>40</sup> Adnubien ancuenquio isec chidobo nëidtedi tabadpondash: Madia Mactada caid yacnocquid; Madia utsi, Acobo bushcuctsëcquidën tita, aidi Osen tita nepondash. Utsibic Sadome nepondash. Aidon Esus ancuenquio diadsho isbededpondash. <sup>41</sup> Aidon Esus Cadidia caid yacno capusho isun abi nashumboedo nepondash. Aidobëdtan isquido chido utsibo Edusaden yacno choshon Esus buansho isun tsibanquido icpondash.

*Esus chococate chiaid*

(*Mat 27.57-61; Duc 23.50-56; Uan 19.38-42*)

<sup>42</sup> Adashic biednes ushë budtsambi: —Inchëshbudtsëqui seis icnuc chonoadtemaid ushë chonoshe Esus unësoshe chococatanu —quianec Esus tantiaquid utsi nidpondash. <sup>43</sup> Aidi, Ose Adimateya caid yacnoshon tishaid Pidato yacno nidpondash. <sup>44</sup> Adec nidshun: —Esusën dada bedshun chococatiadquio iquebique. ¿Ada buantan mibi quepe? —caquien, ¿Ëndenda unësaccosh? quequin tantiesa icquin sondado chuiquid Pidaton chomeshun: —¿Ada Esus unësosh? —capondash.

<sup>45</sup> Adoac: —Ai —quesho tantiashun: —Ai, bedshun buanta —capondash Pidaton Ose chuiquin.

<sup>46</sup> Adoac nidshun unësaid dabidiate bedshun Esusën dada imbudshun dataneshun macuësh dapa cuënote shëcuë uaquin ambi nacnenaidën nauedshun cuënote dapan bëtashpondash. <sup>47</sup> Aden Osen Esus chococasho Madia Mactada caid yacnocquidbëdtambi Madia, Ose utsin titan ispondash.

## 16

*Esus uincuenta chiaid*

(*Mat 28.1-10; Duc 24.1-12; Uan 20.1-10*)

<sup>1</sup> Aden isashic sabado chonoadtemaid ushë inchëshbudtsëqui seis icnuc naimëdnubi Madia Mactada yacnocquid; Madia, Acobon tita; Sadome aidtedi nidshun aton na bedtequid menequin comapenec noadte dadpen bedpondash Esus danoshcanuequin. <sup>2</sup> Bedtsash badiadtsëcnubi dominco ushë

caidën Esus chococacno nidanequi: <sup>3</sup>—¿Tsuntsin cuënote shëcnepeba? —quec onquecuededpac caondash.

<sup>4</sup> Adec onquequin ancuenquo isquien cuënote ënden shëcniac. Cuënote dapa yuëmbocquid nepondash. <sup>5</sup> Aden isequi nidash chococaid shëcuën puduedquin isaquien dada nëbi caniaid dashcute ushumbocquid dasiuidash abiucquo tsadpondash. Aidi isash dacuëdcuededec tabadpac caondash chidobo.

<sup>6</sup> Adec dacuëdec tabadsho isun: —Dacuëdenquo yec tabad. Esus cuesten dectanaid mimbi nibënaid tantiembi. Uincuenash nidac. Nëmboi nanac ueuidoshe. Is. <sup>7</sup> Nadoshi: “Cadidia caid yacno ëbia nidebi. Ambo nidshun ëmbi chiacpadomboen mimbi ëbi isendac, quiosh quequin nëmbo choacsho isun chuita,” Esusën caoshi. Nëbi ëmbi chiacpaden Petedo Esusbëd icquidquo utsibobëdta chuituidec nid —quepondash nëbi caniquid chidobo chiec.

<sup>8</sup> Aden chuisho tantiaash uëdëquequi chococaid shëcuënuësh puduenanec titinquec dacuëdec onquenquo yec nidanepac caondash chidobo.

*Esus abuc indote chiaid*

*(Mat 28.16-20; Duc 24.13-53; Uan 20.11-23)*

<sup>9</sup> Adnubien abi nibëmboed uincuenshun Madia Matcada caid yacnoquidba Esusën ismetuidpondash. Ambi mayan icsa 7ted dapuduemiaid Madia Mactada yacnoquid nepondash. <sup>10</sup> Aden ismiac Esusbëd icboedo yacno nidash puduedshun aido shubisho Esusën abi ismiaid Madian chuituidpondash. <sup>11</sup> Esus uincuenash capusho isombi, Madia qesho tantiaash, Aidquo mimbi isambo iquec, quec tantienquo yec tabadcuededpondash.

<sup>12</sup> Adashic tantienquo yec tabadboed dada daëd Edusaden yacnoësh podquedën nidsho Esusën chinumpondash. Chinunanec aidobëd nidanec puduedshun ismebempac caondash Esusën. <sup>13</sup> Aden ismiac aid daëdi aucbidi Edusaden yacno nidshun ambi isboed chuioapondash. Adembidi tantienquo icoapondash utsibon.

<sup>14</sup> Adashic, abëd icquidquo 11ted pete sante cuesten tabadnubi Esus chopondash. Adec choshon: —Uincuenac quequin ëbi isquidon chiaid tantienquo mimbi icpoc. Chobique. Is —capondash Esusën.

<sup>15</sup> Adashic: —Nëbi nidaidtedi yacno nidaneta. Adec nidshun Nuquin Papan shubu abentsëquën tabadtequid iquec, quequin matsestedi mimbit-sen chuiban. <sup>16</sup> Aden chuisho tantiaquid, Èbi cuidenquiocquin Esused Nuquin Papan cuidpanëdash. Adoac ëbi icsaid ënu, quequin ismenuequin acten mentomiaid abi yacno Nuquin Papan puduedmendac. Tantiesain Nuquin Papan cuidendac abi yacno puduedtiapimboenoc. <sup>17</sup> Abi tantiaquid utsi-utsien Nuquin Papan nadatiambocquin nabanquid icmendac. Adquid icmiaidën ëmbi nacpaden mayan icsa dapuduemendac. Adembidi, utsi onquiaid tantienquiochoedëmbi tantiaquin ëbi chuibanendac. <sup>18</sup> Adecbidi, nisinquio piaqui bidisquenuquo iquendac. Adecbidi, unësmenuequin acmiaqui unësenquo iquendac. Adembidi, utsi unëstsensho mishac bëdanendac. Nuquin Papan nadatiambocquin namiaidënquo adobanendac —quepondash Esus.

<sup>19</sup> Aden chuiquin ënacsho Esus abuc buanaqui Nuquin Papan dayun abiucquo Esus tsadtuidpondash. <sup>20</sup> Ambo tsadquimbi nadatiambocquin namiac nidaidën tabadquimbi abëd icquido nidaid utsi-utsiec yacno capuquin Nuquin Papan shubu abentsëquën tabadaid chuibenepondash nadatiambocquin nabanquimbi.

Èmbi abimbo chuiboedquo mimbi isec aidquo tantianeta. Padi. Aidtedi dada uaombi.



## DU CASËN DADA UAID

Mibi ismenuequin dada uaquid Ducas nebi.

<sup>1</sup> Utsin-utsinquien ambi naidbëdtabi Esuquidistu chuibanquin dada uaid dadpen iquec. <sup>2</sup> Aidon Esuquidistun tauain naidbëdtabi ambi naid utsitedi isted-istedquin chuibanquin chiacpaden dada uaidtedi nec. <sup>3</sup> Esuquidistu chuibanquin dada uaid isbanquimbi Esuquidistu isnëdaidon chuibanaid tantiashun aidtedi mibi chuibanquin dada uaimbi, chuiquid dapa, Teyopido. <sup>4</sup> Abimbo iquec quequin ëmbi dada uaid ma tantiapanueshun mibi chuiquin dada uaimbique. Isec onqueta.

*Uan, acten mentoanquid tishte chiaid*

<sup>5</sup> Nidaid Udeya caid yacno Edodes cuëmëdquid ancanquid icnubien Nuquin Papan namiaidquio Sacadias cuëmëdquid icpanëdash. Aidi, Abiasën tsyuecquid Adonën tsyuecquidbidi nepanëdash. Aidi, Nuquin Papa tabadte shubu uashunaid nuntanshun nashunquid icpanëdash. Aidën chido Adonën tsyuecquidbidi icpanëdash. <sup>6</sup> Aton bënëbëdi Nuquin Papan chiaid tantiaquin naquidquio icpanëdash. Adquid icsho Nuquin Papan bëdamboen isaidquio aid daëdi icpanëdash. <sup>7</sup> Edisabed bacuë tishesa icpanëdash. Adquid yequi aton bënëbëdi tsusio budpanëdash.

<sup>8</sup> Adashic, Nuquin Papa tabadte shubu uashunaid nuntanshun nabanuec padpidemboec Sacadias puduedpanëdash. <sup>9</sup> Ambi noadte bëda tauite ushë chonoc Sacadias aid shubun puduedpanëdash. Ënden abipadquid utsibobëdtan abi cuëmëdquid-cuëmëdquidquien dada uashun dada uatempi tëchun sandoshon cadotaniac ambi dada uatsaidëmpi abia puduenacsho isacpader Sacadias puduedpanëdash. <sup>10</sup> Noadte bëda tauinuec utsi puduedtemaid quënë yacno puduedpanëdash. Ambo Sacadias puduedash icnubi Nuquin Papa tabadte shubu uashunaid puduedte quënë yacno utsibo dadpen Nuquin Papa chiec onquecuededpanëdash.

<sup>11</sup> Adnubien utsi puduedtemaid quënë yacno Sacadias icnubi ambobi Nuquin Icbon chomiaid, ambi uaid mayan bëda, chopanëdash. Noadte tauinun sanaid dayun abiucquio tabadpanëdash. <sup>12</sup> Adec tabadsho isash dacuëdampambo iquec, quetanec Sacadias uëdëquiampanëdash. <sup>13</sup> Adsho isash Nuquin Papan uaid mayan bëda nadpanëdash: —Bacuë bunquin mimbi chian-chiamboed Nuquin Papan tantiaidquio neque. Dacuëndenda, Sacadias. Min chido Edisabedën min mado tishendac. Min mado tishacsho Uan cuënta. <sup>14</sup> Min chidon tishaid isash mibi bëdambo iquendac. Aidi mibi bëdambo icmequid iquendac. Aidën chuibanaid tantiash matses dadpen bëdambo iquendac. <sup>15</sup> Aidi Nuquin Papan bëdamboen isaidquio iquendac. Paëmbocquid min madon isuidendac. Abi tishaid ushën abëd icmenuequin Nuquin Papan aton Mayan meniaidquio min mado iquendac. <sup>16</sup> Nuquin Papan chiaid tantiaquidquio icquin aidën chiac isadaidbo dadpen Nuquin Papan chiaid niacquid icboedi, Con Icho Nuquin Papa nec, queoaindac. <sup>17</sup> Min mado Nuquin Icho bëyucanec choendac. Tsusedpa Ediasën chiampicpadquiequi dacuëdenquio icquin cuembo chuibanquidquio min mado iquendac. Aden chuibanquid Nuquin Icho bëyucanec choendac. Tsusedpabon tishmiaidën tsyuecquid dadpen tantiesabo icboedi min madon chiac tsusedpabopadquid tantiaquidquio nëbi tabadquido iquendac. Aido Nuquin Papan chiaid niacboedi min madon chiac Nuquin Papan chiaid naquidquio

iquendac. Nuquin Icbon matses aido icmenuen min madon chuibanendac —quepanëdash Nuquin Papan uaid mayan bëda.

<sup>18</sup> Aden Nuquin Papan uaid mayan bëdan chiaquien Sacadiasën: —¿Mitsipadentsimbi mimbi chuiboed tantiape? Con chidobëdi tsusio budpobi —capanëdash.

<sup>19</sup> Adoaquien: —Ëbibi, Cabaded nebi. Nuquin Papan abëd tabadquin namiaidquio nebi. Nuquin Papan ambi chiacpadomboen mibi chuimenuen chomiaid nebique. <sup>20</sup> Tantia. Chuinu. Min chidon bacuë tishendac, quequin Nuquin Papan chiaid ëmbi chuiboed tantienquio icsho mibi eme uaindac. Min chidon bacuë tishan padpidec mibi onquianoaindac —quepanëdash Nuquin Papan uaid mayan bëda Sacadias caic.

<sup>21</sup> Adnubien noadte bëda tauite quënënuësh Sacadias baded puduenenquiocsho isash, Baded puduenenquiocpec, quequin cainec tabadpanëdash utsibo. <sup>22</sup> Aden yuen caimbudnubien puduenash onquenequi buëd cuëdenquiocpanëdash Sacadias. Adsho isun: —Ushquin isachimboen isbenac —cabededpanëdash. Adnubien Sacadiasën iccuededquido nidmenuen mëdante uic-uicapanëdash.

<sup>23</sup> Adashic, Nuquin Papa tabadte shubu uashunaid nuntanshun nashunte ushëted nainash aton shubuno Sacadias nidoapanëdash. <sup>24</sup> Ambo choash yuec tabadnubien aton chidon bacuë usundopanëdash. Aden usundoash mëdante auc abentsëcted ushë nidmec aton shubu nuntan icpanëdash. <sup>25</sup> Adec tabadec Nuquin Papan naid chiec nadec Edisabed onquepanëdash: —Bacuë usundoenquiocpec, cabededboedëmbi nëbi macho budshumbi ëmbi bacuë usundoacsho utsibon ëbi isec. Ëbi tantiaquin Nuquin Papan usundomiaid nebi —quepanëdash Edisabed.

### *Esus tishendac, quequin chiaid*

<sup>26</sup> Adashic, Edisabedën bacuë usundoan ushë 6ted nidan nidaid Cadidia caid yacno shubu dadpen icquid Nasaded caid yacno Nuquin Papan Cabaded chomeoapanëdash. <sup>27</sup> Ambo aton chido bedabicquid, tsusedpa Dabidën tsyuecquid Ose cuëmëdquid icpanëdash. Aidi ambo tabadnubien uano aton chido Madia cuëmëdquid tsadacno Cabaded chopanëdash. <sup>28</sup> Adec choshon: —Mibi tantiaquin Nuquin Papan bëdamboen icmiaidquio mibi nec. Nuquin Icho mibëdi tabadendac —capanëdash Cabadedën.

<sup>29</sup> Adoaquien Madia, ¿Atotsi quepeba? quequin otacquio tantiec tsadpanëdash. <sup>30</sup> Adec tsadsho isun Cabadedën: —Dacuëdenda. Mibi bëdamboen tantiaquin Nuquin Papan naden nanu quequin chiaid nad iqueque. <sup>31</sup> Chuinu. Tantiata. Bacuë usundoshon min mado mimbi tishendac. Tishun, Ëmbi tishaid Nuquin Papa yacno yuedanquidquio nec, quequin Esus cuënta. <sup>32</sup> Mimbi tishaid chuiquid dapa iquendac. Aden mimbi tishaid isec, Nadatiambocquidën madombo nec, quecuedependac utsibo. Tsusedpa Dabid chuiquid dapa Nuquin Papan icmiacpadomboembidi chuiquid dapa min Mado Esus icmeoaindac. Adoac Chuiquid Dapa Abentsëcquiobi aid iquendac. <sup>33</sup> Adec tsusedpa Acobon tsyuecquido ënenquiocquin chuiquid dapa min mado Esus iquendac —quepanëdash Cabaded Madia chiec.

<sup>34</sup> Adoaquien: —¿Mitsipadentsimbi bacuë usundoshon bacuë tishpe? Chudabicquid nebi —quepanëdash Madia.

<sup>35</sup> Adoaquien: —Nuquin Papan Mayan mibëdi tabadnuc mimbi tishendac. Aden Nadatiambocquin naidënquio Madia usundomiaid, icsa nibëdquid, Nuquin Papan madombobi nec, utsibon cabededendac. <sup>36</sup> Min utsi Edisabed macho icquin bacuë usundoenquiocboedëmbi nëbi bacuë usundoac.

Usundoenquiocquid nec, cabededboedëmbi nëbi ushë 6ted nidan usundoac. <sup>37</sup> Utsin natiapimbo yaid Nuquin Papan naidquio nec —quepanëdash Cabaded.

<sup>38</sup> Adoaquien Madia: —Ai, con Icbon namiaidquio nebi. Ma mimbi chiacpadquio icpanuna —quepanëdash. Aden chiaquien Cabaded nidpanëdash.

*Madia Edisabed isedec nidaid*

<sup>39</sup> Adashic, aton na nacnenanec Madia tsusedpa Udan tsyuecquidon nidaid macuësh yacno badedi nidpanëdash. <sup>40</sup> Adec nidashic Sacadias oncamenquio yaidën shubu yacno choec puduedshun Sacadiasën chido, Edisabed istuidash: —Mibi isnuec chobi —Madia quepanëdash. <sup>41</sup> Adsho Edisabedën tantianubi aton bacuë comapenec cuididiquiampanëdash. Adec aton bacuë cuididiquenubi Nuquin Papan Mayanën tantiamiac Edisabed <sup>42</sup> Madia chiec nadec comapenec onquepanëdash: —Nuquin Papan bëdamboshë icmiaidquio mibi nec. Mimbi usundoaid adembidi bëdamboshë icmiaidquio nec. <sup>43</sup> Nuquin Icbon tita mibi yec ¿atotsi quiash ëbi isnuec cho? <sup>44</sup> Mibi isec chobi, mibi qesho ëmbi tantianubi, Cuishon, quiacbimboec con bacuë cuididiquianosh. <sup>45</sup> Nuquin Icbon tantiacpadomboen chuisho tantiaquid mibi iquec mibi bëdambo icted-ictedendac —quepanëdash Edisabed Madia chiec.

*Nuquin Papan naid chiec Madia cuëdënaid*

<sup>46</sup> Adnubien Madia nadec onquec cuëdëmpañdash: “Nuquin Papan naid chuibanu. Tantia.

<sup>47</sup> Ëbi usundomiaid Nuquin Papa yacno Yuedanquid nec, quequin tantiec bëdambo iquebi.

<sup>48-49</sup> Ëbi ambi namiaid icsho bëdamboen isquin Nuquin Papan naosh. Adoacsho, Nuquin Papan bëdamboshë icmiaid Madia nec, quequin abitedishunquio tantiabededendac.

Adembidi aton tsyuecquidon tantiabededoac.

Nuquin Papa icsaisa iquec. Icsatiapimbo iquec.

<sup>50</sup> Ambi chiaid tantiaquin naquid icsho,

Mimbi naid icsa cuidnu, quenquiocquin abëdi shubu abentsëquën tabadacbimboecnuc adquid tabadmendac.

Adenuidi tantiaquin nampidquio abi iquec.

<sup>51</sup> Nadatiambocquin naded-nadedquidquio Nuquin Papa nec.

Ëmbibi tantiacpadomboen naimbi, quequid icsho isun Nuquin Papan cacumiac uano tabadendac.

<sup>52</sup> Ancanquid dapa icboedi utsin namiaidquio adquid iquendac.

Utsin namiaid icboedi chuiquid Nuquin Papan icmendac.

<sup>53</sup> Ambi chiaid tantiec bëdamboec tabadte comapenec bunquiacpaden naquidquio Nuquin Papan icmendac.

Con na ëmbi bedaiduidi tantiec bëdamboec tabadebi quequid unësacsho cacumiac uano tabadendac.

<sup>54</sup> Chuiquid Dapa Abentsëcquiobi chidon usundoendac, quequin ambi tsusedpabo chuimiampicpadomboen Nuquin Papan ëbi usundomiac.

<sup>55</sup> Tsusedpa Abadauambëdta aton tsyuecquidtedi ambi tantiampicpadomboen Nuquin Papan ëbi usundomiac.

Mimbi usundoaid ëbi yacno yuedanquid nec, quequin Nuquin Papan ambi tantiampicpadembi ëbi isec,”

quec comapenec cuëdëdash Madia ënëdpanëdash. <sup>56</sup> Adec ënëdash Edisabedbëd ushë daëd nidmec tabadashic ushë utsi nidbudtsëcnubi aton shubuno nidoapanëdash.

*Uan tishaid*

<sup>57</sup> Adnubien Edisabedën bacuë tishte ushë chonoc dada bacuë tishpanëdash. <sup>58</sup> Bacuë tishenquiocboedëmbi nëbi aton bacuë tishosh, qesho tantiash aton matses ado shubu utsinguidotedi Edisabedbëd bëdambo icpanëdash.

<sup>59</sup> Adashic, 8tedec ushtanquin Edisabedën madon shui dëbid dëteshunu qesho tantiash utsibo cho-chopanëdash. Choash puduedash bacuëmpi aton papa cuëmëdquid cuënu quenubi <sup>60</sup> Edisabed: —Padenquio. Abi cuëmëdquid Uan nec —quepanëdash.

<sup>61</sup> Adoaquien utsibo: —Min matses utsi Uan cuëmëdquid nibëdec —queshun <sup>62</sup> Sacadias ismenuequin mëdante uic-uiccaquin: —Abi cuëmëdquid chui. Tantiash —capanëdash utsibon.

<sup>63</sup> Adoaquien dada uate bedshun, Abi cuëmëdquid Uan nec, quequin dada uaquin Sacadiasën ismepanëdash.

Adoaquien: —¿Abimboda mimbi cape? —quecuededpanëdash utsibo.

<sup>64</sup> Adnubien Nuquin Papan oncameoac Nuquin Papan naid Sacadiasën chuibanpanëdash. <sup>65</sup> Aden chuibancho tantiash: —Dacuëdampambo iquec. ¿Atotsiepashun onquenquiocboedëmbi nëbi onquequin Nuquin Papan naid chuibanpec? —quecuededpanëdash utsibo.

Aden tantianec aton shubuno nidaneshun ambi isboedbëdtabi ambi tantiaboed utsibon chuipanëdash. <sup>66</sup> Adoac: —¿Mitsipadquidquio aton mado nepec? —quecuededpanëdash Sacadiasën mado Nuquin Papan tantiami-aidquio isbededec.

*Sacadias oncamiaid*

<sup>67</sup> Adnubien Uanën papa Sacadias Nuquin Papan Mayanën oncamiac nadec Esus chiec onquepanëdash:

<sup>68</sup> “Nuquin Papa isadaidbon Icho nec, quequin chuibanuna. Aidën isadaidbo icsaquid icsho cuidnushe quiash abided cuidadquid chomiac mayan icsan yuaid icboedi aidën mënchictequidquio isadaidbo iquendac.

<sup>69</sup> Abi mënchicquid nadatiamboquid nendac. Tsusedpa Dabidën tsyuecquidquio aid nendac.

<sup>70</sup> Ambi chuimaidon chiampicpadembi Nuquin Papan adquidquio icmianac.

<sup>71-73</sup> Nuquin tsusedpa Abadauan tantiaquin Nuquin Papan ambi chiampicpadembi nuquin tsusedpabo aton tsyuecquidbëdtabi abi chieshënquido nidtiapimbo yacnombo abi yacno yuedanquid Nuquin Icho Abentsëcquiobi nec.

<sup>74</sup> Abi cudasquin mënchicaid yec dacuëdenquio yec Nuquin Papan namiaidombo iquendac.

<sup>75</sup> Adquid yec icsaisa abipadquio bëdamboec tabadquid icsho nuqui aidën isendac ënenquiocquin.”

Adec Esus chiec onquiashic nadec aton mado chiec Sacadias onqueopanëdash:

<sup>76</sup> “Adnubien nëbi Nuquin Papan chomiaid chuibanquidquio mibi nec, quequin utsibon mibi cuënendac, mado. Nuquin Icho choec, quequin utsibon tantiabicnuc bëyuc tantiashun abi chuiquidquio mibi iquendac.

<sup>77</sup> Adquid icquin mibi icsaquid icsho cuidnushe quiash abided cuidadquid tantiasho isash Nuquin Papa mibi icsaid tantienquio yec bëpiscudendac,

quequin chuibanquid mibi iquendac, mado.

<sup>78</sup> Nuquin Papan matses tantiaquin naquidquio icquin abipadquidquio icsaisa abi yacnoshon chomiaidquio iquendac.

<sup>79</sup> Aidën tantiamiac unësash abi iquendac.

Adquid shubu abentsëquën tabadacpadec tabadendac, quequin mimbi chiendac, mado,”

quec Uanën papa Sacadias Nuquin Papan Mayanën oncamiac onquepanëdash.

*Matses nibëdacno Uan tabadcueniaid*

<sup>80</sup> Adashic, Sacadiasën bacuë Uan caniacsho Nuquin Papan tantiamiaid yequi matses nibëdacno tabadcuenepanëdash ambi Esus chuibante ushë choabicnuc.

## 2

*Esus tishaid*  
(*Mat 1.18-25*)

<sup>1</sup> Adnubien, Doma yacno tabadquid, isadaidbo ancaquid dapambo, empedadod caid, Aucusto cuëmëdquid icpanëdash. Aucuston, ¿Ëmbi ancaido isadaidbo aton nabëdta tedtsi iqueque? Isquin tantiata, quequin Sidenio cuëmëdquid chuipanëdash. <sup>2</sup> Sidenio nidaid Sidia caid yacnocquido chuiquid, cobednadod caid icpanëdash.

<sup>3</sup> Min tsusedpa tishampid yacnoshon mibi cuëmëdquid mitsanabëdtabi dada uanuec nidtan, cac abëd icquido buanec isadaidbo nidanepanëdash.

<sup>4</sup> Adec utsibo nidnubien Ose aton chido Madiabëdi nidaid Cadidia caid shubu dadpen icquid Nasaded caid yacnoësh puduanec nidequi aton tsusedpa Dabid caid tishampidnombobi nidaid Udeya caid yacno shubu dadpen icquid Beden caid yacno chopanëdash. <sup>5</sup> Aton chido Madia bacuë nua usunquidbëdi Ose abi cuëmëdquid aton nabëdtabi dada uanuec Beden yacno chopanëdash. <sup>6</sup> Ambo choquin aton bacuë nuambo usumpanëdash. <sup>7</sup> Ambo matses dadpen cho-choash shubu abitedi puduedash tsucus-tsucustsëcquio tabadnuc nidaidën capuquid tabadacno puduedshun ambi bëyuc usundoaid Madian tishpanëdash. Tishun dashcute cuësh-cuëshun dapucshun nidaidën capuquidën pete sanaid cuesten ambi bëyuc tishaid dada bacuë Madian nampanëdash.

*Obeca pemebanquin buanquido Nuquin Papan uaidon chiaid*

<sup>8</sup> Aden Beden yacnoshon Esus tishnubien shubu nibëdacno obeca dadpen pemebanquin buanquido inchëshbudtsëqui choec tabadtuidpanëdash.

<sup>9</sup> Inchëshbudtsëqui choash tabadnubien inchëshnuc Nuquin Papan chomiac ambi uaid mayan bëda abuc chopanëdash. Aid uëshëmbo chënquenuc obeca pemebanquin buanquido dacuëdcuededpanëdash. <sup>10</sup> Dacuëdsho isash: —

Chiaid bëda chuinuec chobique. Dacuëdenquiocquin tantiata. Chuinu. Ëmbi chuitequid bëda mibi, Cuishon, quetequid nendac. <sup>11</sup> Nëbimbobi tsusedpa Dabid tishampid yacnoshon Beden caid yacnoshon mibi Nuquin Papa yacno yuedquid, Quidistu, Nuquin Papan Chomiaid tishosh. <sup>12</sup> Abi tishacno nidshun naden mimbi aidi ispec. Dashcute cuësh-cuëshun dapucaid nidaidën capuquidën pete santen uesho mimbi istuidendac. Bacuëmpi adquiec uesho istuidash, Nuquin Papan chomiaid Quidistu nec, mibi quependac. <sup>13</sup> Aden chiec Nuquin Papan uaid mayan bëda onquenubien abëdi abipadquid utsi dadpen choash Nuquin Papan naid chiec nadec cuëdëncuededpanëdash:

<sup>14</sup> “Nuquin Papa abucquio tabadquid abitedi uaquidquio bëdamboshë iquec. Nuquin Papan bëdamboen isaïdo ma abëdi tabadpanuna,”

quec cuëdëmpañëdash. <sup>15</sup> Adec cuëdënash Nuquin Papan uaido mayan bédabo abuc nidoapanëdash. Adec nidan obeca pemebanquin buanquido Nuquin Icbon chiaid nanuec: —Nuquin Papan nuqui tantiameboed bacuëmpi isnuec Beden yacno nidnu. Nid —quianec nidpanëdash. <sup>16</sup> Adec nidshun nidaidën capuquidën pete santen bacuë nanacsho istuidpanëdash. <sup>17</sup> Isanec nidquimbi ambi isboedbëdta ambi tantiaboed chiac <sup>18</sup> tantiaquidtedi: —¿Midapadquidien capec? —quecuededpanëdash. <sup>19</sup> Aden obeca pemebanquin buanquidon chiaid tantiash bëpiscudenquio yec Esusën tita, Madia, ¿Mitsipadquid con bacuë nepec? quequin bëpiscudenquiocquin tantiadenepañëdash.

<sup>20</sup> Adnubien Nuquin Papan chiaid chuibocpadquiocsho isash obeca yacno choash obeca pemebanquin buanquido: —Ëmbi isboed ëmbi tantiaboed Nuquin Papan naidquio nec —quequin chiec onquecuededpanëdash.

### *Nuquin Papa tabadte shubu uashunaid yacno Esus buanaid*

<sup>21</sup> Adnubien 7tedec ushtanquin aton madon shui dëbid dëtemiacsho isun, Nuquin Papan uaid mayan bédan chiapadomboen cuënaid Esus nec, quequin Madian aton mado cuëmpañëdash.

<sup>22</sup> Adshumbic, bacuë tishun aid bacuën shui dëbid dëtemeshun ushë abentsëc nidan utsi chotsëcnuc Moises Nuquin Papan dada uamiapaden nanuen Madiabëdtan Osen Esus Edusaden yacno buampanëdash. Edusaden yacno choash Nuquin Papa tabadte shubu uashunaid yacno choshon, Con bacuë Nuquin Papan namiaidquio nec, quequin ismepañëdash. <sup>23</sup> Nuquin Papan naden nata quequin chiaid nad iquec: Bëyuc tishaid dada bacuë ëmbi namiaidquio con na nec. <sup>24</sup> Mimbi bëyuc tishaid bedte bunquin ëbi tabadte shubu uashunaid yacno mimbi buanaid min mado cuidtequidoain dëbin daëd cuesunemeta. Dëbin nibëdnuc masën bédambocquid daëd cuesunemeta. Aden nanuec Edusaden yacno choash aton mado niantiapimbo yec Madiabëd Ose Nuquin Papan chiapadomboen nanuec aton madobëdi puduedpanëdash.

<sup>25</sup> Adnubien Edusaden yacnombo tabadquid Simeyon cuëmëdquid Nuquin Papan naden nata quequin chiaid tantiaquin naquidquio icpañëdash. Aidi isadaidbo chuiquid dapa abentsëcquiobi cainquidquio icpañëdash. Aidi Nuquin Papan aton Mayan meniaidquio icpañëdash. <sup>26</sup> Aidi Nuquin Papan Mayanën tantiamiac, Chuiquid Dapa Abentsëcquiobi Nuquin Papan bédamboen isaidquio choacsho unësabiquin isendambi, quequin tantiapañëdash. <sup>27</sup> Adembidi Nuquin Papan Mayanën nidmiac Nuquin Papa tabadte shubu uashunaid yacno nidequi Simeyon puduedpanëdash. Ambo puduedash capunubi Nuquin Papan naden nata quequin chiaidquio nanuen aton bënëbëdtambi Madian Esus bëpañëdash. <sup>28</sup> Esus bësho isun Simeyonën Esus bedshun icucquin Nuquin Papan naid naden chuibanpañëdash:

<sup>29-30</sup> “Abitedishun Icho icquin mimbi ëndenquio chiampid nëbi nëid isembi.

Nëid isash unësmanc quenquio yec, Cuishon, quec unësebi, Papa.

<sup>31</sup> Mibi yacno yuedanquid nëbi isembi.

Nëid mimbi chomiaid icsho ma abitedishunquio ispanuna.

<sup>32</sup> Nëidëmbi mimbi tantiacpaden chuibanquin isadaidbo bédambo icmendac,” quepañëdash Simeyon.

<sup>33</sup> Aden chuibanubi, ¿Midapadquidquien con mado capec? quequin Madian aton bënëbëdtambi tantiapañëdash. <sup>34</sup> Esus chuibanquin naimbudshun Osebëdta Madia chiec Simeyon: —Bédambo icmiaid mibi daëdi nec —quepañëdash. Aden chuishumbic Madiuidtsëqui naden Simeyonën chuioapanëdash: —Chuinu. Tantiata. Nëid bacuë tantiesa isadaidbo utsi-utsiec

icsho Nuquin Papan uquë nësecaindac. Min mado tantiaquid utsi-utsiec icsho Nuquin Papan abi yacno puduedmiaid iquec bēdambo iquendac. Min bacuë, Esus, Nuquin Papa yacno puduedmianquid nec, qesho tantiaquid matses dadpeshun icsamboen chuided-chuidedendac. <sup>35</sup> Adsho ambi ompoquin naid icsabēdta ambi tantiaid icsa tantiamequid min mado iquendac. Adobanquin ismiac unēs uasho isash mibibi unēsquio yec, Con madon nati-ambo iquebi, mibi quendac —quepanēdash Simeyon Madia chiec.

<sup>36</sup> Aden Simeyonën chuinubi Nuquin Papan naden nanu quequin chiquid chido Ana cuēmēdquid icpanēdash. Aidën papa Panued icpanēdash. Aidën tsusedpa Ashed icpampic. Aid aton bēnēn bedac abēdi seta 7ted matamiash tabadnubi <sup>37</sup> aton bēnē unēsapanēdash. Aton bēnē unēsapanēdash Nuquin Papa tabadte shubu uashunaid yacno nidshun Anan tabadec nidenuiocquin Nuquin Papauidi tantiaquin buna mēmumbudnequin Nuquin Papa chuidenapanēdash. <sup>38</sup> Ambo icnubi Esus bēsho isun Anan Nuquin Papan naden nanu quequin chiampicpaden chuipanēdash: —Isadaidbo icsaquid icsho cuidnu caid mēnchictequid nēid nec —quepanēdash Ana Esus chiec utsibon tantianubi.

<sup>39</sup> Adashic, Nuquin Papan naden nata quequin chiacpaden nainash Osebēd Madia nidaid Cadidia caid yacno nidoash Nasaded caid yacno abi tabadacno choapanēdash. <sup>40</sup> Ambo tabadnubi aton bacuë Esus dada bēdambo yec canicuepanēdash. Aidi comapenen tantiaquidquio Nuquin Papan bēdamboen isaïdquio icpanēdash.

### *Canicuenash Nuquin Papa tabadte shubu uashunaidën Esus tabadaid*

<sup>41</sup> Adashic, Ęmbi bēyuc tishaid unēs uamenushe qeshun intaquën aton shubu shēcuë ēcnoshcacsho isun aidon bēyuc tishaid unēsmenquiocquin Nuquin Papan uaid mayan bēdan matampampid tantiate ushē yanuc Madia Osebēd Edusaden yacno nidoapanēdash. Nuquin Papan chiacpadequi setan-setanquie nidenapanēdash. <sup>42</sup> Adecbidi, Esus abi tishaid seta 12ted yanash canicuenash anibēd Edusaden yacno nidpanēdash. <sup>43</sup> Adec ambo nidashic nami uabicquid petequid tantiaid ushētedi tantiec tabadtenapanēdash. <sup>44</sup> Adec ambo tabadquin nainash Esus ambobi icnubi tantienquio yec Madia Osebēd auēshquio nidoapanēdash. Adec nidash inchēshbudtsēqui abēd chobedo yacno capuquin Esus nibēmbenapanēdash. <sup>45</sup> Aden nibēnquin istuidabi yec Edusaden yacno padpidec nidoapanēdash. <sup>46</sup> Daēdec ushquin nibēnshun Nuquin Papa tabadte shubu uashunaid yacno puduedshun Esus tsadsho istuidpanēdash. Ambo tsadec Nuquin Papan chiaid tantiamequin chuibanquidbēd onquecuededsho istuidpanēdash. <sup>47</sup> Adec onquec tsadsho isquin, Bēdamboen tantiaquin chuibanquidquio nēid nec, quequin utsibon tantiabededpanēdash. <sup>48</sup> Adnubien, ¿Mitsipadquid con mado nepec? quequin otacquio Madian tantiaapanēdash. Aden tantiequi: —¿Atotsi quiash ēbi daēdi tantienquio yec nēmbō choash mibi tabade, mado? Unēsquiocquin papabēdtambi mibi nibēmbeniombi —capanēdash anin.

<sup>49</sup> Adoquien Esus: —¿Atotsieshun ēbi nibēno? Con Pa shubu uashunaidën tabadnuec chobosh nebi. ¿Tantienquioda mimbi icpe? <sup>50</sup> Aden Esusën chuisho anibēdtan Osen tantienquiocpanēdash.

<sup>51</sup> Adashien: —Nidnu. Nid, mado —anin cac cacuidenquio yec Nasaded yacno anibēdi choash tabadquin Madian chiaïdbēdta Osen chiaïd tantiaquin Esusën nadenapanēdash. Adec tabadnubi aton titan ambi isboedbēdta ambi tantienquio yaïd bēpiscudenquiocquin tantiaidenapanēdash.

<sup>52</sup> Adnubien comapenen tantiec bédamboec canidopanédash. Adquid icsho Esus Nuquin Papan bédamboen isacpadomboen adomboembidi matsesën isbededpanédash.

### 3

*Esus choec, quequin Uan mentoanquidën chiaid  
(Mat 3.1-12; Mad 1.1-8; Uan 1.19-28)*

<sup>1</sup> Adashic, seta 15ted matamec Tibedio Sesad cuëmédquid, Doma yacno tabadequi abitedi ancaquid dapa, empedadod caid icpanédash. Aidi Doma yacnocquido ancaquid dapa icnubien Ponsio Pidato cuëmédquid, nidaid Udeya caid yacnocquido ancaquid, cobednadod caid icpanédash. Aid daéd ancanquid icnubien Edodes cuëmédquid, nidaid Cadidia caid yacnocquido ancaquid, cobednadod caidbidi icpanédash. Ancanquid aidtedi icnubien Edodesën utsi, Uedipe cuëmédquid nidaid Itudeya caid yacnocquidobëdi nidaid Tëdaconite caid yacnocquido ancaquid, cobednadod caidbidi icpanédash. Ancanquid aidtedi icnubien Disanias cuëmédquid nidaid Abidinia caid yacnocquido ancanquid cobednadod caid icpanédash. <sup>2</sup> Ancanquid aidtedi icnubien Anashëdi Caipas isadaidbo tsusio dapabo icpanédash. Aid daëdi isadaidbo tsusio icnubien Uan, Sacadiasën mado matses nibëdacnombo tabadshobi Nuquin Papan, Ëmbi chiaid chuibanta, capanédash. <sup>3</sup> Adoac acte Odan caid cuëmano capuquimbi naden chuibampanédash. Mimbi tantiaid icsa ënta. Aden ënsho isun mimbi icsambocquin naboed tantienquio yacimboen Nuquin Papan mibi bédamboen isendac. Ëmbi tantiaid icsa nainquiocquin ënu, mibi qesho tantiashtun mibi acten mentono, quequin cho-choquid cho-choquidquien Uanën chuidednapanédash.

<sup>4</sup> Ëndenquimbo Nuquin Papan tantiamiac Isayasën Uan chuiquin dada uampicpadequi Uan icpanédash. Naden Isayasën Uan chuiquin dada uapampic:

“Matses nibëdacnombo tabadquidën ëcauanshun naden chiendac: Nuquin Icbombo choeque. Aid tantianu, quequin mimbi tantiaid icsa ëmbanta.

<sup>5</sup> Umbo ancuenquio chosho isnu quequin cuembocnoc andëdshun ambescabanachimboen abimbo chuiquidënu chiaid tantianu, quequin mimbi tantiaid icsa ëmbanta.

<sup>6</sup> Aden ënshun Nuquin Papa yacno puduedmianquid chuiquid dapa abentsëcquiobi cuembocnoc mimbi tantiabenendac,” quequin Isayasën Uan tishabicnuc chuiquin dada uapampid nec.

<sup>7</sup> Aden ënden chiampicpadequi Esus bëyucanequin acten mentomenuec cho-choquid dadpen icsho Uanën nadopanédash: —Nisin bacuë anipadquid nec. Aidbimboecquid icsambocquid mibi neyoc. Mibi adquid icsho isun ¿tsuntsin Nuquin Papan cuidnushe qeshun ambi mënchictequid icta, quequin mibi chiosh? ¿Aidën chiaid tantiashta acten mentomenuec cho? <sup>8</sup> Mentomete bunquin mimbi tantiaid icsa ënshun bédamboec tabadquin utsibo ismebanta. Nuquin tsusedpa Abadauan Nuquin Papan bédamboen isaidquio icpampic. Ambi tishmiaidën tishmiaid caidaid ëbi icsho Nuquin Papan bédamboen isaidquio nebi, quequin tantienda. Abadauampadquid ambi chiaid tantiaquid bunquin, Matses icta, Nuquin Papan cac cuënotebi matses iquendac —quepanédash Uan. <sup>9</sup> Adequi onquebudec: —Cuëte icsatedi matenu, quequin cuëte bacuësa dëdshun mateshun icbon nëdëncaquin tauiec. Adquiecbidi tantiaid icsambocquid cuëshëdmenu, qeshun bédamboec tabadaid ismesa cuëshëdmeshun chian anëdënquequid Nuquin Papan nënendac —quepanédash Uan.



<sup>10</sup> Adoaquien: —Chian anëdënquequid Nuquin Papan nësiate ictiapimbocquin ¿atotsimbi napeba? —quepanëdash iccuededquido.

<sup>11</sup> Adoaquien: —Mibi dasiuidaid daëd icsho dashcute nibëdquid isun mitsana abentsëc meneta. Adembidi pete nibëdquid icsho isun meneta —capanëdash Uanën.

<sup>12</sup> Adecbidi ancanquid dapan matses utsin na bedtequid nëidted bedta caidotsen acten mentomenuec cho-chopanëdash. Choshon Uanën chuiban-sho tantiash: —Chian anëdënquequid nësiate ictiapimbocquin ¿atotsimbi napeba? —quepanëdash.

<sup>13</sup> Adoaquien: —Ancanquid dapan chiactedtsëqui bedta. Muaquin mitsana daëd uanuequin bedenda —capanëdash Uanën aido chuiquin.

<sup>14</sup> Adashic, adecbidi sondado cho-choash: —¿Atotsimbi napeba? —quepanëdash Uan caic.

Adoaquien: —Mitsana bedtequid bunquin icsamboen bedenda. Utsin naid tantiashun mua uaqin chienda. Mibi chuiquidën, Nëidtedi menenu, cac, Utsi bec cho, quenda —capanëdash Uanën sondado chuiquin.

<sup>15</sup> Aden Uanën chuiban-sho tantiash: —¿Tsutsi nepec? ¿Nuquin Papan chomiaidta nepec? —quecuededpanëdash cho-choquido.

<sup>16</sup> Adsho tantiash: —Mibi acten mentoquidquio nebi. Padnuen ëbipadquidpenquio nadatiambocquid choendac. Aidi bëdamboshëcquid nendac. Adquid icnuc ëbi icsaquid icsho ¿atotsieshun aid choec quequin chuiquidquio Nuquin Papan icmioshi? Aid choshon aton Mayan abi tantiaquidombo aidëmbi menendac. Aden meniac Esus tantiaquidombo ambi tantiaid icsa ënte bunquidquio icmendac aton Mayanën. Adoac ënsho isun pauquendac —quepanëdash Uan. <sup>17</sup> Aden chuibanec nadpanëdash: —Piacbo ëshë uashun bitsi secatanquin nëdëncashun ëshë icbon dayun uacpadomboen abi tantiesa cuëshëdmeshun chian anëdënquequid nësiashun abi tantiaquidtedi abi yacno puduedmendac aidën. <sup>18</sup> Aden Nuquin Papan chiaid dadpen chuibanquin: —Adomboen tantiaquin nabanta —capanëdash Uanën.

<sup>19</sup> Adshumbic, ancanquid Edodesën tantiaid icsatsen Uanën chuibanpanëdash: —Min utsin chido, mimbi bedaid, mimbi tantiaid icsa neque. Mimbi tantiaid icsa ënta —capanëdash. Aden chuiboshombic adomboembidi padpiden abibidi Edodesën tantiaid utsibotsen chuiopanëdash. <sup>20</sup> Aden ambi tantiaid icsa chuiban-sho tantiashun Edodesën Uan bedmeshun quënën nauedmepanëdash abitedishun tantianushe qeshun.

*Esus acten mentoaid  
(Mat 3.13-17; Mad 1.9-11)*

<sup>21</sup> Quënën nauedabicquin matses dadpen acten mentobampanëdash Uanën. Utsiboba mentoshombic Esustsen mentopanëdash. Adoaquien mentoacnoëshquiobi Esus Nuquin Papa chiec onquepanëdash. Adec onquenubien abu shëcuë nibëdboedi shëcnianec <sup>22</sup> dëbimbimboec cuembo budec Nuquin Papan Mayan Esusën mapino tsadtoec budpanëdash. Aid budnubien abucuësh Esus chiec nadec aton Papa onquepanëdash: —Mibentsëquiobi icsho ëmbi tantiaidquio mibi nec, mado. Adembidi ëmbi bëdamboen isaidquio mibi nec —quepanëdash aton Papa.

*Esuquidistun tsusedpabo chiaidtedi  
(Mat 1.1-17)*

<sup>23</sup> Adashic, abi tishaid seta 30ted icquimbi Nuquin Papan chiapaden naquin tauapanëdash Esusën. Aden tauaquin chuiban-sho tantiash aton matses nadpanëdash. Osen mado nec, quiash, Nuquin Papan mado nec, quenquio yec matses onquepanëdash. Esusën papapenquio Ose icnëdash.

Madia aton tita icbo icnuc Esusën tsusedpabo nëidtedi iquec: aton buchido Edi cuëmédquid icpanédash. <sup>24</sup> Aidën papabic Matic cuëmédquid, aidën papabic Debi cuëmédquid, aidën papabic Ana cuëmédquid, aidën papabic Ose cuëmédquid, <sup>25</sup> aidën papabic Matatias cuëmédquid, aidën papabic Amos cuëmédquid, aidën papabic Naun cuëmédquid, aidën papabic Esdi cuëmédquid, aidën papabic Nacai cuëmédquid, <sup>26</sup> aidën papabic Mac cuëmédquid, aidën papabic Matatias cuëmédquid, aidën papabic Semei cuëmédquid, aidën papabic Ose cuëmédquid, aidën papabic Uda cuëmédquid, <sup>27</sup> aidën papabic Uana cuëmédquid, aidën papabic Desa cuëmédquid, aidën papabic Sodobabed cuëmédquid, aidën papabic Sadatied cuëmédquid, aidën papabic Nedi cuëmédquid, <sup>28</sup> aidën papabic Medqui cuëmédquid, aidën papabic Adi cuëmédquid, aidën papabic Cosan cuëmédquid, aidën papabic Edmodan cuëmédquid, aidën papabic Ed cuëmédquid, <sup>29</sup> aidën papabic Osue cuëmédquid, aidën papabic Ediesed cuëmédquid, aidën papabic Odin cuëmédquid, aidën papabic Matic cuëmédquid, <sup>30</sup> aidën papabic Debi cuëmédquid, aidën papabic Simeyon cuëmédquid, aidën papabic Uda cuëmédquid, aidën papabic Ose cuëmédquid, aidën papabic Onan cuëmédquid, aidën papabic Ediaquin cuëmédquid, <sup>31</sup> aidën papabic Medeya cuëmédquid, aidën papabic Menan cuëmédquid, aidën papabic Matata cuëmédquid, aidën papabic Natan cuëmédquid, <sup>32</sup> aidën papabic Dabid cuëmédquid, aidën papabic Isai cuëmédquid, aidën papabic Obed cuëmédquid, aidën papabic Bos cuëmédquid, aidën papabic Sadomon cuëmédquid, aidën papabic Nason cuëmédquid, <sup>33</sup> aidën papabic Aminidad cuëmédquid, aidën papabic Adan cuëmédquid, aidën papabic Eston cuëmédquid, aidën papabic Pades cuëmédquid, aidën papabic Uda cuëmédquid, <sup>34</sup> aidën papabic Acobo cuëmédquid, aidën papabic Isac cuëmédquid, aidën papabic Abadauan cuëmédquid, aidën papabic Tade cuëmédquid, aidën papabic Nacod cuëmédquid, <sup>35</sup> aidën papabic Seduc cuëmédquid, aidën papabic Dacau cuëmédquid, aidën papabic Pedec cuëmédquid, aidën papabic Ebed cuëmédquid, aidën papabic Sada cuëmédquid, <sup>36</sup> aidën papabic Cainan cuëmédquid, aidën papabic Adpashad cuëmédquid, aidën papabic Sen cuëmédquid, aidën papabic Noe cuëmédquid, aidën papabic Damec cuëmédquid, <sup>37</sup> aidën papabic Matusaden cuëmédquid, aidën papabic Enoc cuëmédquid, aidën papabic Aded cuëmédquid, aidën papabic Macadaded cuëmédquid, aidën papabic Cainan cuëmédquid, <sup>38</sup> aidën papabic Enos cuëmédquid, aidën papabic Sed cuëmédquid, aidën papa abia uampid Adan cuëmédquid, aidën papambo Nuquin Papa abia yanampidquio nec. Abi tabadec. Aidtedi Esusën tsusedpabo nec.

## 4

### *Satanas Esus icsamete bunaid* (*Mat 4.1-11; Mad 1.12-13*)

<sup>1</sup> Adshumbic, Matses nebi, quequin Nuquin Papan chiacpaden nanuen acten mentomepanédash Esusën. Aden Uanën acten mentoquien Nuquin Papan Mayanën chiacpadec acte Odan caid yacnoësh puduanec matses nibédacnombo nidash tsadpanédash. <sup>2</sup> Ushë utsi nidash utsi choaid abuc-totsécquiecnuc ambobi tsadpanédash. Aidtedi ushquin penquio yash Esus bundopanédash.

<sup>3</sup> Bundoacsho isash Nuquin Papa chieshënquid choash Satanás nadpanédash: —Nuquin Papan madombo icquin penun cuënotebi pete icta cata —capanédash Satanásën Esus chuiquin.

<sup>4</sup> Adoaquien: —Padi: “Peteuidi pec bēdamboec tabadtemaid nec,” quequin dada uapampic —quepanēdash Esus Satanas caic.

<sup>5</sup> Adoshombic, macuësh dapa abucquio yacno Esus buanshun Satanasën badedquio nidaidtedi ismebampanēdash. <sup>6</sup> Ismiash: —Nidaidën icquidtedishun icbo icmiaidquio nebi. Abitedi con na nec. Ĕmbi menenu cac aidtedi mitsana iguendac. Nidaidën tabadquidtedi chuiquid dapa mibi icmete bunebi. Adquid mibi icnuc mibi buntequid nibēdendac. <sup>7</sup> Nidaidën tabadquidtedi chuiquid dapa icnu quequin, Con icbo mibi nec, ěbi casho adquid mibi icmembi —quepanēdash Satanas Esus caic.

<sup>8</sup> Adoaquien: —Padi. Nuquin Papan chiaid dada uapampid nad iquec: “Nuquin Papa abentsēcquiobi mimbi tantiaiduidtsēqui min icbombo neque. Aidën namiaidquio icta” —quepanēdash Esus Satanas caic.

<sup>9</sup> Adoshombic Edusaden yacno Esus buanshun Satanasën Nuquin Papa tabadte shubu uashunaid macano abucquio tsadumpanēdash. Aden tsadunshun: —Mibi Nuquin Papan madombo yec nēuëshquio dacuēdenquio yec pudunta. <sup>10</sup> Naden dada uapampid iqueque. Tantia. Chuinu.

“Mibi pudunsho isun, Tsicatequin bēdamboen budmeta, quequin Nuquin Papan ambi uaido mayan bēdabo chiendac.

<sup>11</sup> Aidombi min taën tsasimbocquid tincanushe qeshun uidën uaquin mibi bēdamboen budmendac.”

Aden min Papan chiaid icnuc dacuēdenquio yec pudunta —capanēdash Satanasën Esus chuiquin.

<sup>12</sup> Adoaquien: —Chuinu. Tantiata: “Nuquin Icbon ambi chiacpadembida natsiashe, Isnu, quequin tanenda,” quequin Nuquin Papan chiaid chiampid utsi iquec —quepanēdash Esus Satanas caic.

<sup>13</sup> Aden chiaquien Satanasën Esus icsamboen namenuen tanquin naimbudpanēdash. Aden naimbudequi, Padpidemboen ěmbi chiaid namenuequin Esus tanun nanuna, quequin ambibi tantianec Esus nianec Satanas nidpanēdash.

*Nasaded yacnocquido Esus bunesabo  
(Mat 4.12-17; 13.53-58; Mad 1.14-15; 6.1-6)*

<sup>14</sup> Adashic, Nuquin Papan Mayanën tantiamiaidquio iquequi matses nibēdacnoësh Cadidia yacno Esus choapanēdash. Choacsho isun, Nuquin Papan Mayanën tantiamiaidquio nec, quequin abi isquidon chiac dēuequidon tantiapanēdash. <sup>15</sup> Adnubic, Nuquin Papan chiaid chuibante shubu utsin-utsinquieq puduedcuenequin Nuquin Papan chiaid Esusën chuibampanēdash. Aden chuisho tantiaish, Nuquin Papan chiaid tantiaquidquio Esus nec, quec cuēdēncuededpanēdash.

<sup>16</sup> Adashic, Nasaded yacno abi caninēdacno Esus nidoapanēdash. Ambo choash chonoadtemaid ushën Nuquin Papan chiaid chuibante shubu yacno nidash abi puduedteniacpadequi puduedash Nuquin Papan chiaid isec onquenush nidtopanēdash. <sup>17</sup> Nidtosho isun Nuquin Papan chiaid Isayas cuēmēdquidën dada uapampid anocquidën Esus menepanēdash. Aden aid meniac sananquin seccudoabanquin isbanec nadec Esus onquepanēdash:

<sup>18</sup> “Nuquin Icbon Mayanën namiaidquio nebi. Aidën Nuquin Papan chiaid tantiambo yaid chuibanta caid nebi.

Quënën nauedaido ambi tantiaid icsa ěmenuen chuibanta caidquio nebi. Aidēmbidi Satanasën yuaid Nuquin Papan bacuë icmenuequin chuibanta caidquio nebi.

<sup>19</sup> Aidën Nuquin Icbon bēdamboen iste chuibanta caidquio nebi.”

<sup>20</sup> Adec isec onquequin nainshun dada uaid bidicashun meniash tsadpanëdash Esus. Adec tsadsho shubu nuntan icquidtedishun bëisbededpanëdash. <sup>21</sup> Adoac: —Nuquin Papan chiaid mimi tantiaboed nëbimbobi tauadoec —quepanëdash Esus abibi chiadequi.

<sup>22</sup> Adoquien: —Bëdamboen chuipec. ¿Mitsipaden tantiaid ambi chiaid nepeba? —quecuededpanëdash. Adec onqueboedobi: —¿Osen mado Esus nenquioda ictic? —queoapanëdash.

<sup>23</sup> Adoquien: —Bëdamequid yequi abibi daicsambo yanash bëdamiadacsho isash, Bëdamequidquio nec, quequin matsesën tantiapec, quequin chuipampid nec. Èmbi Capednaun yacnoshon nabambocpadomboen nëshuntsen nabansho isun, Nadatiambocquin nabanquid nec, quequin mibitedishun tantiapec. <sup>24</sup> Abimbo chiembique. Tantiata —quiash Esus abi onquec: —Nuquin Papan èmbi tantiamiacpaden chuibanta caidën abi caniacnoshon chuibansho tantienquiocquid icpec. <sup>25</sup> Èndenquimboshë adomboembidi Nuquin Papan èmbi tantiamiacpaden chuibanta caid Edias cuëmëdquidën chuibansho tantiesa icpampic. Aidi icnubien isadaidbon bënuua chidobo dadpen icpampic. Aido adquid icnubien seta abentsëc chotsëcnuc matamec aton pete nibëdquiec yanubi isadaidbon bënuabo bunec tabadpampic. <sup>26</sup> Adec bunec tabadsho isun, Isadaidbon bënuua yacno nidta, quenquiocquin isadaidpembon bënuua yacno pemenuc nidta cac Edias nidshun ambi chiapadomboen isadaidpembon bënuuan nanuc aton pete uesadenquiocpampic. Aid chido shubu dadpen icquid Sadecta caid yacno tabadpampic. Sadecta shubu dadpen icquid Sidon caid anoentsëqui icpampic. <sup>27</sup> Adashic, adecbidi isadaidbo abi daushumbo yacno mishac mishadenquio yacnimboecquido dadpen icpampic. Adquido icnubien Nuquin Papan namiaidquio utsi Ediseyo icpampic. Aidëmbi isadaidbo daushumbocquido bëdamenquiocquin isadaidpembon abentsëc Naman cuëmëdquid Ediseyon bëdamepampic. Èbi bëdamepec, quequin tantiec aton nidaid Sidia caid yacnoësh choacsho Ediseyon Naman bëdamepampic —quepanëdash Esus.

<sup>28</sup> Aden Esusën isadaidpembon nashumpampid chuisho tantiash iccuededquido isadaidbo comapenec nëishpanëdash. Isadaidpembobëd isadaidbo ictiapimbo iquec, quec iccuededquido nëishpanëdash. <sup>29</sup> Adec nëishash nidanec nuntanuësh puduenanec shubu ènëdacno nidshun acte dapa quiusudacnombo nebudnuequin Esus buampanëdash. <sup>30</sup> Aden nidmiaquien matses dadpen icquid natsusash Esus nidpanëdash.

*Mayan icsa dapuduedaid cuemetete*  
(Mad 1.21-28)

<sup>31</sup> Adec abi caniacnoësh Nasaded caid yacno nidtanashi nidaid Cadidia yacno nidequi Capednaun caid yacno Esus choapanëdash. Ambo choash chonoadtemaid ushë icnuc Nuquin Papan chiaid chuibante shubun puduedishun Nuquin Papan chiaid chuibanpanëdash. <sup>32</sup> Aden chuibansho tantiash: —Ambia tantiaquidën chiapaden chuibanquidien Esus nechitec —quecuededpanëdash anocquido.

<sup>33</sup> Aden Esusën chuibanubien Nuquin Papan chiaid chuibante shubu nuntan mayan icsa dapuduedaid icpanëdash. Aidi comapenec sidquetanec onquec: <sup>34</sup> —¿Nasaded yacnocquid Esus caid atotsi quec mibi cho? ¿Èbipadquidtedi naimbudmenuecta cho? Èmbi isaid mibi nec. Nuquin Papan bëdamboen isaidquio, icsapenquiocquidquio mibi nec —mayan icsan caquien: <sup>35</sup> —Otacquio tabad. Adec tabadec dapuduenta —Esusën cac

mayan icsan abi dapuduedaid tacpanën nebudec icsa uainquo yec dapuduempanëdash.

<sup>36</sup> Adosho isash tantiadempambo iquequi: —¿Chuiquid dapan chuitequidta neque? Tantiabono. Nadatiambocquin chuibanac mayan icsabo dapuduenchitequien nec —quepanëdash Capednaun yacnocquido. <sup>37</sup> Aden tantiaquin Esusën mayan icsa dapuduemiosh, quequin isquidon chuiban-chuibanac Capednaun yacno dëuequidtedishuntsen tantiapanëdash.

*Daicsambocquid dadpen Esusën bëdamiaid  
(Mat 8.14-17; Mad 1.29-34)*

<sup>38</sup> Mayan icsa dapuduemiashic Nuquin Papan chiaid chuibante shubu yacnoësh puduenanec Simonën shubu yacno Esus nidpanëdash. Ambo puduedacsho isun: —Simonën nachi chumboshë iqueque. ¿Ada aid bëdametsia? —caquien:

<sup>39</sup> Simonën nachi yacno choash dayunquo nidtuidec: —Chumbocquid dauebudta —Esus quenubi badedquo dauebudpanëdash. Adec dauebudash nidtoshon codocashun Esusbëd icquido pemepanëdash Simonën nachin.

<sup>40</sup> Adshumbic, inchëshbudtsëqui daicsaid utsi-utsien bë-bëpanëdash. Aden bë-bësho isun damishquin Esusën bëdamepanëdash. <sup>41</sup> Adembidi mayan icsa utsi-utsien dapuduemepanëdash. Adoac, Nuquin Papan madombobi mibi nec, quec sidquesho tantishun: —Nuquin Papan chomiaid nec, quequin ëbi chiec adec onquenda —Esusën cac mayan icsa ënëdpanëdash.

<sup>42</sup> Adashic, badiadnuc matses nibëdacno Esus nidpanëdash. Esus nidacsho isun matses dadpenshun nibënquin istuidshun: —Nidenquo yec ëbëdi tabadta —capanëdash istuidquidon.

<sup>43</sup> Adoquien: —Shubu dadpen icquid utsi-utsiec yacno nidshun Nuquin Papa yacno tabadaid iquec, quequin anocquidotsen tantiamenuec nidendabi. Nuquin Papan chomiaid icquin chuibanun nabono —quepanëdash Esus abi nibënquin istuidquido chiec.

<sup>44</sup> Aden chiashic Nuquin Papan chiaid chuibante shubu utsin-utsinquec puduedcuenequin Nuquin Papa yacno tabadte iquec quequin chuibampanëdash. Nidaid Udeya caid yacno shubu dadpen icquid utsi-utsiec yacno choshon aden Esusën chuibampanëdash.

## 5

*Abëd tabadmenuen chomiaid  
(Mat 4.18-22; Mad 1.16-20)*

<sup>1</sup> Adashic chian Quenesaded caid cuëmambi tabadquin Esusën Nuquin Papan chiaid chuibansho tantiec iccuededquido dadpen tabadpanëdash.

<sup>2</sup> Adnubien masi yacno aton cano daëd nëshun icbon aton nëshaidtedi pam-bampanëdash. <sup>3</sup> Adsho isanec nidash Simonën cano antsadtoshon, Udicsëc ëbi buan, Esusën cac Simonën udicsëc buampanëdash. Aden buanac chian cuëman iccuededec tabadshobi cano antsadquin Esusën chuibampanëdash.

<sup>4</sup> Aden chuibanquin nainshun: —Shodombo yacno nuëcquid bednuequin nëshaid nënebanta, Simon —capanëdash Esusën.

<sup>5</sup> Adoquien: —Icbo, inchëshëmbi nuëcquid bednuen nëshaid nënebenequin ëbitedishun bedamboccombi. Mimbi nëshaid nënetan cac nënetanembi —quepanëdash Simon.

<sup>6</sup> Adash shodombo yacno nidshun nëshaid nënetanquin nuëcquid dadpenquioshë bedac nëshaid tësëdec taëpanëdash. <sup>7</sup> Adsho isun abëdtan nuëcquid beduidboedo cuënquin, Cadoec cho, quequin ismiac aido cano utsin choshon

cano cubu-cubutsëcquiocnoc nuëcquid sandoac cano daëd mentoadtsempanëdash.

<sup>8</sup> Adoanec Esus yacno choequi danëshën sebudec shuebudash Simon Petedon: —Icbo, ëbëd iquenquio yec nidaneta. Icsambocquid nebique —capanëdash Esus chuiquin. <sup>9</sup> Abëd icquidobëdtan nuëcquid dadpen bedboed tantiadempambo iquec, Esus nadatiambocquid nec, quequin tantiec onquepanëdash Petedo. <sup>10</sup> Acobo Uan chedo tantiadempambo yec tabadoapanëdash. Aid daëdi Sebedeyon mado icpanëdash.

Adec Petedo shuebudash onquesho tantiatanec Esus nadpanëdash: —Dacuëndenda. Mimbi nuëcquid penun acten bedbocpaden nëbi tauain ëbi tantiaquid icmenuen nidaidën capucuenequin abuc tabadaid mimbi chuiban-chuibanendac —quepanëdash Esus Petedo caic. <sup>11</sup> Aden chiaquien aton cano acte cuëman nëshanec aton natedi nianec, Esusën chiacpaden tantianuna, quianec abëdtan nuëcquid bedboedobëdtan Petedon Esus nidsho tsibanampanëdash.

*Daushumbocquid bëdamiaid*  
(*Mat 8.1-4; Mad 1.40-45*)

<sup>12</sup> Adashic, shubu dadpen yacno Esus icnubien daushumbocquid nami mishac paëpenquiocquid chopanëdash. Aidi choash Esusën taëno shuebudec nadpanëdash: —Ëbi bëdamete bunquin ëbi mimbi bëdamepec —quepanëdash daushumbocquid.

<sup>13</sup> Adsho tantiashun adquid daushumbocquid mishtemaid nec, quenquiocquin damishec Esus: —Mibi bëdamete bunebique. Mibi bëdamenu —quenubi badedquio bëdampanëdash.

<sup>14</sup> Aden bëdametanec Esus: —Ëmbi naid utsibo chienda. Adenquiocquin isadaidbo tsusiobo ismetanta ma bëdamiaid Nuquin Papan naid nec quequin ma aidon tantiapanu. Aido ismeshun Nuquin Papan ambi chiaid Moises dada uamiampicpadembi bëdambo icmiaid cuidtequidquio meneta —capanëdash Esusën ambi bëdameboed chuiquin.

<sup>15</sup> Adnubien Esusën bëdamesho isquidon Esusën bëdamiaid chuibanac mases dadpen Esusën chiaid tantianuec cho-chopanëdash. Adecbidi, daicsambocquido bëdanuec cho-choacsho Esusën bëdamepanëdash. <sup>16</sup> Adashien mases nibëdacnombo nidash Nuquin Papa chiec onquepanëdash.

*Dada shëquëquenquiocquid bëdamiaid*  
(*Mat 9.1-8; Mad 2.1-12*)

<sup>17</sup> Adashic, ushë utsin Esusën chuibanuc padiseyobobëdi Nuquin Papan naden nata quequin chiaid tantiamequid dadpen tabadpanëdash. Utsi-utsiec nidaid Cadidia yacnoësh cho-chonobi utsi-utsiec nidaid Udeya caid yacnoësh cho-chonobi utsi-utsiec Edusaden caid shubu dadpenquioshë yacnoësh cho-chopanëdash. Adec aido cho-choash tabadnubien Nuquin Papan nadatiambocquin naquid icmiac mases bëdamenuec Esus icpanëdash.

<sup>18</sup> Aid icnubien dada shëquëquenquiocquid aton din nandoshon aton ut-sibon bëpanëdash. Aden bëquin shubu nuntan nënantanquio Esus icnubi <sup>19</sup> mases tsucus-tsucustsëcquiocsho isash puduedtiapimbo yec macano padapambo yacno dada shëquëquenquiocquid buanec dectatoshon macano chic-chicshun dada shëquëquenquiocquid abi bëquidon imbudpanëdash.

<sup>20</sup> Dada shëquëquenquiocquid ëmbi bëaid Esusën bëdamec, quequin tantiaquin bëquidon ambi bëaid imbudsho isash dada shëquëquenquiocquid caic: —Mimbi tantiaid icsa cuidenquio yec bëpiscudtequidquio mibi nendac —quepanëdash Esus.

<sup>21</sup> Aden chuisho tantiash padiseyobobëd Nuquin Papan naden nata quequin chiaid tantiamequid: —¿Nuquin Papanuidi chuitequidquioda chuibamposh? ¿Tsutsi aden chuibanquid nepec? Nuquin Papauidi tantiaid icsa cuidenquio yec bēpiscudquidquio nec —quepanēdash ambibi tantiacpadeconquec.

<sup>22</sup> Aidon tantiaid tantiec Esus: —¿Atotsi quiash mimbibi icsamboen tantiec onquepe? <sup>23</sup> ¿Mimbi tantiaid icsa cuidenquio yec bēpiscudtequidquio nendac ěmbi chiaidquio bēdantequidpenda nedic? Adecbidi, ¿Mibi icsambochoedi mibi bēdanoque. Nidtoash nidta, quequin chiaid bēdantequidpenda nedic? <sup>24</sup> Nuquin Papan chomiaid icquimbi mimbi tantiaid icsa cuidenquio yec bēpiscudtequidquio nendac ěmbi cac ad iquendac. Nuquin Papan chuimaidquio nec mibitedi camenuen dada shēquēquenquiocquid naden chiembique Tantia. Nidtoash nidquin min di buanec nid —capanēdash Esusën dada shēquēquenquiocquid chuiquin. <sup>25</sup> Adoac nidtoshon aton di bedanec Nuquin Papan naboed chuibanequi aton shubuno nidpanēdash.

<sup>26</sup> Adsho isash tantiadempambo yec Nuquin Papan naid chiec onquecuededec tabadpanēdash: —Aden bēdamiaid isenquiocboeděmbi nēbimbobi aid isbempombi —quecuededpanēdash.

*Debi, ěbi tsibanec cho, quequin Esusën chiaid  
(Mat 9.9-13; Mad 2.13-17)*

<sup>27</sup> Adashic, capucuenequin Debi cuēmēdquid Esusën istuidpanēdash. Debi nec queshumbi Mateyo cuēmpañdash. Ancanquid dapan utsibon na bedtequid bedshumbanta caid Debi icpañdash. Ancanquiděn chiacpaden Debin utsibon na bedtequid bedbansho isun: —Ěmbi chiaid tantianush ěbi tsibanec cho —Esusën cac <sup>28</sup> Debi nidtoanec aton natedi nianec Esus tsibananec nidpanēdash.

<sup>29</sup> Adshun aton shubuno Esus buanshun Debin pemepañdash. Ancanquiděn utsibon na bedtequid bedbanta caido abipadquido dadpembēdtabi Esus Debin pemepañdash. <sup>30</sup> Aden adquidobēdtan Esusën pesho isash padiseyobo: —¿Atotsieshun mibi chuiquidbēdtan mibitedishun icsambocquidbēdtan pepeba? —quepanēdash Esusbēd icquido caic.

<sup>31</sup> Aden chuisho tantiash Esus nadpañdash: —Ěbi bēdamec cho, quenquio bēdambocquid iquec. Daicsambocquidien, Ěbi bēdamec cho, quendac. <sup>32</sup> Adecbidi, Nuquin Papan bēdamboen isaidquio icsho, Mimbi tantiaid icsa ěnta, quequin chuinuec choenquio iccondabi. Nuquin Papan icsamboen isaidquio icsho, Mimbi tantiaid icsa ěnta, quequin chuinuec chondabi —quepanēdash Esus padiseyobo caic.

*Buna mēmunaid  
(Mat 9.14-17; Mad 2.18-22)*

<sup>33</sup> Aden Esusën chuibansho tantiashun naden padiseyobon Esus chuipañdash: —Uambēd icquido buna mēmunecc Nuquin Papa chiec onquedenec. Adquiecbidi ěbēd icquido buna mēmunecc Nuquin Papa chiec onquedenec. Adenquio mibēd icquido iquec. Aidon buna mēmunenquiocquin peshun sicaid actenec —quepanēdash padiseyobo Esus chiec.

<sup>34</sup> Adoquien: —Aton chido bednun pambid meniac chidon codocacsho abi inquiděn abēd icquido menec. Aden meniac isuidesa abēd icquido nec. Adecbidi ěbi abi chuiquid icnuc ěbēd icquidon buna mēmunenquiocquin isuidenquio iquec. <sup>35</sup> Yuecash chido inquid nibēdanan abēd icboedo unēsquiocquin buna mēmunquin isuidpec. Adecbidi ěbi nibēdanan ěbēd icboedo unēsquio yampec —quepanēdash Esus padiseyobo caic.

<sup>36</sup> Aden chuibanequi abi Esus onquec: —Dashcute chuca cuëshun dashcute shënbédta nacnenquin bëtuscaisa matses nec. Cuëshquin dashcute chuca icsa uaic. Adecbidi shëni tuscaid bëtësëdec. <sup>37</sup> Adembidi dadpen icquid chodo uashun sandoec. Adotanquimbic istuidshun chuca uain chodo uashun sandoaic chodo shënin icsa sandoshon nequid bëenquiocquin. <sup>38</sup> Adembidi, ëmbi ënden tantiaiduidi tantianu, quequin Nuquin Papan nëbi chiaid pausudtequid bëda tantiauidquid yanec icsabudendac. Mibi adquid iquec, quequin tantiaquin utsi chiacbimboen Esusën padiseyobo chuipanëdash. <sup>39</sup> Adashic ambi ënden chiaid tantienquiochoedi nëbi Nuquin Papan chiaid utsi chuibanac tantiaquidquio iquendac —quepanëdash Esus.

## 6

### *Chonoadtemaid ushë tantiaquid (Mat 12.1-8; Mad 2.23-28)*

<sup>1</sup> Adashic, chonoadtemaid ushë icnuc Esusbëdtan abëd icquidon tied matanquin tiedën caniquid ëshchicshun abëd icquidon bitsi tsucucashun pebededpanëdash. <sup>2</sup> Aden pesho isquin padiseyobon: —¿Atotsieshun chonoadtemaid ushën chonoadpeque? Tantianu. Èbi chui —capanëdash Esusbëd icquido chuiquin.

<sup>3</sup> Adoaquien: —¿Tsusedpa Dabid caidbëd icquidon piasquin pepampid tantiamboda ique? <sup>4</sup> Naden chuipampid neque. Tantia. Abëd icquidobëd Nuquin Papa tabadte shubu uashunaid puduedtemaid quënën puduedshun Nuquin Papa tantiaquin pan meniac nanaid chuiquid dapan bedshun abëd icquido menebanshun aidobëdtambi pepampic. Aid pan Nuquin Papan namiaidënuidtsëqui petequid nepampic —quequin padiseyobo chuishun Esusën nadopanëdash: <sup>5</sup> —Èbia: Tiboquenu, quiash tsadacpadec matses: Nëid chonoadtemaid ushë nec, quequin tantiec. Adnubini aid ushë icbo yec tiedën caniquid ëshchicshun bitsi tsucucasho isash: Mimbi icsamboen naic, quetiapimbo iquebi.

### *Mëuesadaid bëdamiaid (Mat 12.9-14; Mad 3.1-6)*

<sup>6</sup> Adashic, chonoadtemaid ushë utsin Nuquin Papan chiaid chuibante shubun puduedshun Esusën chuibanubien abiucquio mëuesadaid dada icpanëdash. <sup>7</sup> Ambobidi tabadquimbi Esus chieshënquidon, Chonoadtemaid ushën Esusën bëdamenushe. Isnu, quequin padiseyobon caimbededpanëdash. <sup>8</sup> Aden cainubien abi chieshënquidon tantiaid tantiaquin mëuesadaid isquin: —Nënantanquio nidto —Esusën cac mëuesadaid nënantanquio nidtoash nidpanëdash.

<sup>9</sup> Adsho isashien: —Tantianu. Chui. ¿Chonoadtemaid ushën matses tantiaquindambi bëdamboen nape? ¿Adoenquiocquindambi bëdametemaid ushë nëid neque? ¿Mibi nëbi bëdametiapimbo iquebi, quequindambi chuipe? ¿Adoac daicsaid utsi-utsiec unëspec? —quepanëdash Esus.

<sup>10</sup> Aden chuishumbic iccuededquido isbanquin: —Èbi mëd —cac Esus mëdequi mëuesadaid bëdampanëdash.

<sup>11</sup> Adec mëuesadaid bëdansho isashien comapenec nëishash: —¿Mitsipadentsimbi Esus acpe? —quec onquecuededpanëdash abi chieshënquido.

### *Esusën, Èbi chuibeneta, caido (Mat 10.1-4; Mad 3.13-19)*



<sup>12</sup> Adashic, ushë utsin macuësh yacno matses nibëdacno Nuquin Papa chiec onquenuc nidash inchëshën ushenquo yec Nuquin Papa chiec Esus onquepanëdash. <sup>13</sup> Badiadshun abëd icquido dadpen chomeshun, Èbi chuibeneta, quequin 12tedictsëqui chuipanëdash. <sup>14</sup> Nëidic, Simon, Esusën Petedo caid; utsibic, Andedes, Simonën utsibi; utsibic, Acobo; utsibic, Uan; utsibic, Uedipe; utsibic, Badtodome; <sup>15</sup> utsibic, Debi cashumbic Mateyo caid; utsibic, Tomas; utsibic, Acobo, Adpeon mado; utsibic Simon, ancانquid isadaidpembo bunesa; <sup>16</sup> utsibic, Udas, Acobon mado; utsibic, Udas Isca-diote, yuecshun Esus chieshënquido Esus bedmequid. Aidtedi, Esusën, Èbi chuibeneta, caido icpanëdash.

*Nuquin Papan bëdamboen isaïdo icnuc ambi icsamboen isaïdo  
(Mat 4.23-25; 5.1-12)*

<sup>17</sup> Adashic macuësh yacnoësh abëd 12ted icquido pada-padambo yacno budash abi tsibanquido dadpen icsho isash Esus nidtuidpanëdash. Nëidted icpanëdash: Nëidic, Edusaden yacnoësh choquido; utsibic, Acte Dapa cuëman shubu dadpen icquid Tido caid yacnoësh choquido; utsibic, Sidon caid yacnoësh choquido. Aïdo Esusën chuïbansho tantianuec cho-choash tabad-nubi, Èbi bëdamepec, quequin tantiec utsibo choash tabadpanëdash. <sup>18</sup> Adec choquido mayan icsa dapuduedaid icsho isun Esusën dapuduemepanëdash. <sup>19</sup> Adsho isun nadatiambocquid Esus neque. Mishnu, qeshun mishequi bëdancuededpanëdash.

<sup>20</sup> Adshumbic abëd icquidombo isbanquin naden Esusën chuïbampanëdash:

—Nëmbo mibi icnuc mitsana nibëdtenesho isun Nuquin Papan bëdamboen isaïdo iquec abuc nidan con natedi mitsana nendac.

<sup>21</sup> “Nëuëshquo bundodenesho isun Nuquin Papan bëdamboen isaïdo yec abuc ëbëd tabadec bundoesa iquendac.

“Nëuëshquo matses Nuquin Papan chiaïd tantiesa icsho isash unësquo yec shubidednequid Nuquin Papan bëdamboen isaïd yec abuc nidash ëbëd tabadec bëdambo iquebi quependac adquido.

<sup>22</sup> “Esus tantiaquid icsho chieshënquin pudued cainquo yaid adembidi mua uaqin chuïshunaid Nuquin Papan bëdamboen isaïdquo nec.

<sup>23</sup> “Adomboembidi ëmbi ëndenquimbo chuïmiaïd aton matsesën icsamboen chuïshundeniampic. Adomboembidi mibi min matsesën icsamboen chuïshundenetsiash. Nïdaïdënsnun adoaid iquec Nuquin Papa yacno choacsho ambi bëdambo icmiaïd mibi iquendac. Adquid iquendabi quequin tantiec mibi icsamboen chuïshunaqui, Cuïshon, queta.

<sup>24</sup> “Padnuen, con na dadpen iquec, quequin tantiec bëdamboec tabadebi, qesho Nuquin Papan icsamboen isaïdo mibi nec. Nïdaïdënsnun mimbi bedteniaïduidi tantiec Nuquin Papa yacno puduedtiapimbocquid mibi iquendac. Nïdaïdën bëdamboec tabadquin ënden bedondaidi mibi nec.

<sup>25</sup> “Nïdaïdënsnun abi bunaidtedi bedquido Nuquin Papan icsamboen isaïdo nec. Abi bunaidduidi tantiaquin Nuquin Papan chiaïd tantianu qeshun tantiatiapimbo iquendac.

“Mitsanauidi tantiec, Bëdambo iquebi, quec mamë nec tabadquido icsho Nuquin Papan icsamboen isaïdo mibi nec. Adquido Nuquin Papa yacno puduedte bunsho, Padi, cac shubiquiendac.

<sup>26</sup> “Bëdamboecquid nec, quequin mibi dadpenshun chuïsho tantienda. Adomboembidi mua uain Nuquin Papan ëndenquimbo chuïmiaïdpembon chuïpampic. Aidon chiaïd tantiashun tsusedpabon Nuquin Papan chiaïd

tantienquo yanampic. Adquido Nuquin Papan icsamboen isaido nec — quepanëdash Esus.

*Mibi uimanëquido tantiaquin nabanta, quiaid*  
(Mat 5.38-48; 7.12)

<sup>27</sup> Aden chiashic abi Esus onquec: —Ëmbi chiaid tantiaquidquo nad iqueque. Chuinu. Tantiata. Mibi chieshëquido bëdamboen tantiaquin nabanta. <sup>28</sup> Adembidi mibi icsamboen chuiquid bëdamboen chuita. Adembidi, ëbi icsamboen naquido bëdamboen tantiaquin cuidenda, Papa, quequin Nuquin Papa chuita. <sup>29</sup> Adembidi mibi cuesquid cuidenda. Adembidi mibi icsamboen nadenesho cuidenquiocquin adembi bëdamboen nabanta. Adembidi ampequin min dashcute bedanec nidsho isun, Chiata. Dadamicquidtsen buan, cata. <sup>30</sup> Utsibic, aton na nibëdquid, Bec cho, quesho meneta. Adembidi utsin mitsana ampesho isun cuidenquiocquin bëdamboen naoata. <sup>31</sup> Adembidi ëbi bëdamboen nashuntiadquidi nepec quequin mimbi tantiacpadomboen utsi tantiaquin nashunta.

<sup>32</sup> “Ëbëd tantiananquiduidi tantianu, quec ¿bëdamboda mibi icpe? Padenquo. Adembidi Esus tantiesan abipadquiocquido tantiec. <sup>33</sup> Adecbidi, Ëbi bëdamboen tantiaquin nashunquiduidi tantiaquin nashunoanu quec ¿bëdamboda mibi icpe? Padenquo. Esus tantiesan adembidi nashunquidquo nec. <sup>34</sup> Adecbidi, Ëbi menequiduidi menenu, quec ¿bëdamboda mibi icpe? Padenquo. Esus tantiesan adenuidi menec. <sup>35</sup> Naden nata, quequin chuinu. Tantiata. Mibi chieshëquid icsho aid tantiaquin bëdamboen nabanta. Adembidi mibi meniantiapimbocquid, Bec cho, quesho, Yucash cuidnannun nanuna, quenquiocquin meneta. Mimbi adosho isun Nuquin Papan mibi bëdamboen isendac. Adobanec bëdambo iquebi quec mibi tabadendac. Adomboen nabanquido Nuquin Papan nacpadomboen nabanquid nendac. Adquido aton mado iquendac. <sup>36</sup> Nuquin Papan abi chieshëquido nashundeniacpadomboen mibi chieshëquido nashundeneta —quepanëdash Esus.

*Icsambocquid nec, quequin chienda, quiaid*  
(Mat 7.1-5)

<sup>37</sup> Aden chuibanashic Esus abi onquec: —Ëmbi tantiacpadomboen naisa icsambocquid nec, quenda. Adesa abi yacno choacsho Bëdamboquid neque. Puduedme, Nuquin Papan caindac. Adecbidi, Icsambocquid iquec. Aid cuidtiadquidi Nuquin Papa nec, quenda. Adenquo icsho Nuquin Papan cuidenquioctequid mibi iquendac. Mibi icsamboen tantiaquin utsin nasho isash cuidnanenquo yec bëpiscudta. Adquid, Cuidnu, quenquo yec mimbi icsamboen tantiaquin naid Nuquin Papa bëpiscudendac. <sup>38</sup> Aton na nibëdquid bëdamboen tantiaquin meneta. Adembidi, mibi tantiaquin abi utsibëd bëdamboec tabadtequid Nuquin Papan mibi menendac. Utsi tantiaquin mimbi meniacpadomboen mibi tantiaquin bëdamboen tabadmetequid daëd uashun Nuquin Papan mibi meneoaindac —quepanëdash Esus.

<sup>39</sup> Aden chuishumbic utsin tantienquo ictequid abëd icquido naden Esusën chuipanëdash: —¿Podquedën nidnu quec bëshuaid utsi bëyucampecta nidtic? Nidnu, quianec nidec abi daëdi nidaid shëcuë ampaëdpatsiash. <sup>40</sup> Adembidi tantianuequidën abi tantiamequid dëniactiapimbo iquec. Tantiamic abi tantiamequidpadquid iquendac —quepanëdash Esus.

<sup>41</sup> Adoshombic adembi tantiamequin naden Esusën chuipanëdash: —¿Atotsi quiash utsi bëtsiadaid pistsëcquid isequi mibi bëtsiadaid dapa isadtiapimbo icpec? ¿Mibibi bëtsiadaid dapa bëbedadabicquin mitsipadentsi mimbi utsi bëtsiadaid pistsëcquid bedshunuen ispe? <sup>42</sup> Adembidi, utsin tantiaid icsa

abentsëc icnubien mimbi tantiaid icsa utsi-utsiec icnuc ¿atotsieshun, Mimbi tantiaid icsa ënta, quequin utsi chuipe? Mimbi tantiaid icsa nibëdadbimboen mimbi chuipeque. Adoenda. Mimbi tantiaid icsa ënshun utsin tantiaid icsa icsho isun ëmenuequin chui —capanëdash Esusën.

*Cuëte abipadquid aton bacuë nec, quequin chiaid*  
(Mat 7.17-20; 12.34-35)

<sup>43</sup> Adoshombic, adembidi Esusën chuipanëdash: —Cuëte bëdan bacuë adquiobidi bacuëec. Cuëte icsan bacuë adquiobidi bacuëoaic. <sup>44</sup> Chetequid isun cuëte dada matsesën tantiec. Aden tantiec nisanquidën bacuë isash, Dadain bacuë nec, quenquio matses iquec. Adecbidi, echo bacuë isash, Bata nec, quenquio matses icoaic. <sup>45</sup> Adembidi bëdamboen tantiaquidën ambi tantiacpadomboen utsi bëdamboen tantiaquin nabanendac. Adecbidi ambi tantiacpadec bëdamboec onquec. Adembidi icsamboen tantiaquidën ambi tantiacpadomboen utsi icsamboen tantiaquin nabanec. Adecbidi ambi tantiacpadec icsamboec onquec —quepanëdash Esus.

*Tantiaquidquio icnuc tantiaquidquid nec, quequin chiaid*  
(Mat 7.24-27)

<sup>46</sup> Adoshombic: —¿Atotsieshun, Con Icbo mibi nec, queshumbi ëmbi chiacpadomboen naisa mibi ne? <sup>47</sup> Èbi yacno choshon ëmbi chuibansho tantiaquiash nidshun nadomboen naquidquio iqueque. Chuinu. Tantiata. <sup>48</sup> Cunquequid dapan chimeshnushe queshun shubu uaquidën shëcuë ëquëduc uëdëshcashun buintad nitsinquid. Adembidi, natiamianquiec came-tequid yanabicnuc tantesa uainquiocnuen ëbi tantiaquidquio icquin ëmbi chiaid papuduedshun adomboembidi nabanquid nec. Adquidën tantesa uainquio iquendac. <sup>49</sup> Utsibic nad iqueque. Tantia. Èquëduc uëdëshcabi nitsinaid cunquequid dapan chimeshunendac. Adecbidi, ëmbi chiaid papudueduidtsacpadomboen nabanenquio yec natiamianquid chonoc abi papudueduidtsaid bëpiscudendac. Adquid uquë nësecatequid nendac —quepanëdash Esus.

## 7

*Sondado chuiquidën tantiaid*  
(Mat 8.5-13)

<sup>1</sup> Aden iccuededquido chuiquin nainash Capednaun caid yacno Esus nidoapanëdash. <sup>2</sup> Capednaun caid yacno choash Esus tabadnubien isadaidpembon sondado chuiquidën yua abi cudasaid unëstiadsëcquio icpanëdash. <sup>3</sup> Aton yua unëstiadsëcquio icnubien, Nënquid bëdamequid Esus nëmbobi iquec, quequin utsibon chiac:

—Aidën con yua bëdametsiash —quianec isadaidbo tsusiobo yacno nidshun istuidash: —¿Con yua chiec Esus yacno ada mibi nidpatsia? —quepanëdash sondado chuiquid.

<sup>4-5</sup> Adoaquien: —Ai —quianec Esus yacno isadaidbo tsusiobo nidshun chuituidec: —Sondado chuiquidën chuitan caido nebi. Con yua unëstiadsëcquio iqueque. Esus bëdamequid neque. Chuitan, cac mibi chiec chobi. Sondado chuiquid bëdambocquid nec. Nuquin Papan chiaid chuibante shubu uamiondaidquio nioshe. Ambi chiacpadomboen aton yua bëdametiadquidi mibi nec —quepanëdash isadaidbo tsusiobo Esus caic.

Adoac aidobëdi Esus nidpanëdash. <sup>6</sup> Adec aidobëd Esus nidshobi sondado chuiquidën chomiaid utsibo choquin bëquedtuïdash nadpanëdash: —Sondado chuiquidën chomiaid nebi. Aidën chiaid chuinuec chopobi. Naden chuita, caposhi: “Padicnuna, Icbo. Icsambocquid nebique. Mibi bëdambocquid iquec

con shubun puduedenquiocquidi mibi nec. <sup>7</sup> Ēbi icsambocquid iquec mibi bēquedec nidenquiocobi. Mibi bēdamequid yec con shubun puduedenquiocquin mibi yacnoshombi, Bēdanta, mimbi cac con yua bēdampec. <sup>8</sup> Ēbien sondado chuiquid nec. Ēmbi nidta cacpadquiequi sondado nidec. Adecbidi, Cho, ěmbi cacpadquiecbidi choaic. Adembidi, Nadota, cacpadomboembidi con yuan nabanec,” quequin chuitan sondado chuiquidēn cabocpadembi mibi chuipombi —quepanēdash sondado chuiquidēn chuitan caido Esus caic.

<sup>9</sup> Adoaquien: —¿Abimbobida cai? —queshun ambi chiaid tantiamenuquin iccuededquido Esusēn bēisbanquin nadopanēdash: —Chuinu. Tantiata. Sondado chuiquid isadaidpembo ěbi tantiaquidpadquid isadaidbo nibēdec —quepanēdash Esus. <sup>10</sup> Aden chiaquien sondado chuiquidēn chuitan caido auctibi nidoash shubun puduedshun sondado chuiquidēn yua bēdamiaid istuidpanēdash.

### *Nianten mado uincuen uaid*

<sup>11</sup> Adashic, ushē utsin shubu dadpen icquid Nain caid yacno Esus nidpanēdash. Aidbēdi abēd icquido nidpanēdash. Adecbidi matses utsibo dadpen nidpanēdash. <sup>12</sup> Adec nidequi Nain tsasi uaid quēnē shēcuē anoentsēqui choquimbi unēsaid bēquido bēqueduidpanēdash. Unēsaid epa icnubi ani niantē icpanēdash. Niantebēd Nain yacnocquido dadpen cho-chopanēdash. <sup>13</sup> Adec cho-choec niantē shubisho isash Esus unēsquo yec: —Shubienquo yec ēnēd —quepanēdash. <sup>14</sup> Adec, Ēnēd, quetanec udictsēc nidshun unēsaid nanaid Esusēn mishnubi abi bēquido nidtuidpanēdash. Nidtuidsho isun: —Abuido, uētsēdtota —cac <sup>15</sup> uēdtsēdtoash tsadec unēsboed onquepanēdash. Adsho isash ani caic: —Nē, unēsboedi min mado uincuenoshe. Abēdi nidec nid —capanēdash Esusēn.

<sup>16</sup> Aden unēsaid uincuemesho isash cho-choquido: —Adopenshenda uincuemec —queshun Nuquin Papan naid chuibampanēdash. Aden chuibanec: —Nuquin Papan matses bēdamboen isnuen ambi chomiaidquo nuquibēd icmiosh —quec isquido onquecuededpanēdash.

<sup>17</sup> Aden isash nidshun unēsaid uincuemiaid isquidon chuibansho isadaidbon nidaid Udeya caid yacnocquidon tantiabempanēdash. Adembidi chiac dēuequidontsen tantiapanēdash.

### *Ēbitedishun cainaid mibi nec, quequin Uanēn chiaid (Mat 11.2-19)*

<sup>18</sup> Adnubien, acten mentoanondaid Uan cuēmēdquid quēnēn nauedaid icsho abēd icquidon Esusēn nabanaid chuibampanēdash. Adoaquien abēd icquido daēd chomeshun Uanēn nadopanēdash: <sup>19</sup> —Esus yacno nidshun nadota. ¿Ēbitedishun cainaid Nuquin Papan chomiaid abentsēcquiobi mibida ne? ¿Aidtabi nedi? mibi quenuc, ¿Adambi utsi caimpe? quequin chuita —Uanēn cac aid daēdi Esus yacno nidpanēdash.

<sup>20</sup> Adec Esus yacno choash: —Acten mentoanondaidēmbi Uanēn chomiaido nebi. Uan nadosh: “¿Ēbitedishun cainaid Nuquin Papan chomiaid abentsēcquiobi mibida ne? cac ¿Aidtabi nedi? mibi quenuc ¿Adambi utsi caimpe?” quiosh Uan —quepanēdash Uanēn chomiaido Esus caic.

<sup>21</sup> Aden chiaquien icsambocquid bēdamequinc, mayan icsa dapuduedaid dapuduemequinc, bēshuaid bēdamequinc caquin Esusēn ismebampanēdash. <sup>22</sup> Aden nabanquin nainashic: —Mibi chuiquid Uan caid yacno nidshun ěmbi nabamboedtedi mimbi isboed naden chuitanta. Bēshun isbenosh. Adecbidi canite icsaidi capuanosh. Adecbidi daushumbocquidon nami bēdanosh. Adembidi pashun tantiabenosh. Adembidi unēsaid uincuemiosh. Adembidi

aton na nibëdquido tantiamenuen Nuquin Papan chiaid Esusën chuibanosh, quequin Uan chuitanta. <sup>23</sup> Ęmbi aden nabansho isun tantesa uainquiocquin Nuquin Papan bëdamboen isaidquio nendac, Esus quiosh quequin Uan chuitanta —quepanëdash Esus Uanën chomiaid daëd chiec.

<sup>24</sup> Adashic, Uanën chomiaido nidambi iccuededquido tantiamebanuec Uan chiec Esus nadpanëdash: —¿Atotsi isnuec matses nibëdacno nidonda? ¿Cunquequidën ishacunaid isnuecta nidtionda? <sup>25</sup> ¿Aid isnuec nidenquio yec atotsi isnuec nidonda? ¿Dashcute ushumbocquid dasiuidquid isnuecta nidtionda? Padenquio. Dashcute ushumbocquid dasiuidquido aton na dadpenquio icquido ancanquid dapan shubun tabadquido nec. <sup>26</sup> Ad icnuc, ¿atotsi isnuec matses nibëdacno nidonda? ¿Nuquin Papan ambi chiaid chuimiaid isnuec nidenquioda ictionda? Ai, matses nibëdacno Nuquin Papan chuimiaid isnuec mibi nidondac. Uanën ëbi chuiquidëmbi ispondashi. Ębi ëndenquimbo chuiquido ëbi isesabo icpampic. <sup>27</sup> Ębi cain naden Uan Nuquin Papan chuimiampid nec:

“Mibi choec quequin chuibanquidba chomembi.

Mibi choec quequin chuibanac ambi tantiaid icsa ënshun mibi cainquidombo iquendac.”

Aden ëbi cain Uan chuiquin dada uapampid nec.

<sup>28</sup> “Adembi Uan chuibanu. Tantiata. Nuquin Papan chuimiaid Uampadquid matsesën tishaid utsi nibëdec. Aidën ëbi chotequid chuibanac choshon ëmbi nabansho isenquio icposh. Isash, Nëid Nuquin Papan chomiaid nec, quetsemposh Uan. Aidi quënën nauedac ëmbi nabanaid istiapimbo yec tsadec, Nuquin Papan chomiaid, ëbitedishun cainaid mibida ne, quepec —quepanëdash Esus.

<sup>29</sup> Aden Esusën chuibansho tantiash: —Nuquin Papan naid bëdambo iquec —quepanëdash Uanën mentobanondaido. <sup>30</sup> Utsiboen ambi tantiaid icsa ënenquio icquin Uan Esusën chuisho tantiash, Nuquin Papan naid bëdambo iquec, quetiapimbo aido icpanëdash. Aido padiseyobobëd matsesën naden nata quequin chiaid tantiamequido icpanëdash.

<sup>31</sup> Aden Uan chiash Esus: —¿Nuquin Papan chiaid nëbi chuisho tantiesa mitsipadquid nepeque? <sup>32</sup> Adquid chuinu. Tantia. Ambi tantiacpaden naisa icsho isash bacuëbo yac bimboec nëishun mimbi icsamboen tantiec. Adembidi ambi tantiacpaden naisa icsho isun Nuquin Papan chiaid tantienquio iquec. Adquidën Nuquin Papan chuimiaidën nabansho icsamboen ispec. <sup>33</sup> Nua cubudquin pesa Uan icsho isash, Mayan icsa dapuduedaid nec, queposh Uanën chuisho tantiesa. <sup>34</sup> Ęmbi peshun acsho isec, Nua peshun tantienquiocquin acquid nepec. Aidbidi icsambocquidobëd icquid nec, ëbi caposh. <sup>35</sup> Aden tantienquiocquid, Bëdamboen tantianu, queshun bëdamboen tantiaquidënquio chuibansho tantiash abi tantiamequidpadquid iquendac —quepanëdash Esus.

### *Chidon Esus tanoshcaid*

<sup>36</sup> Adashic, Ębi yacno pec cho, padiseyobo abentsëcshun cac aibëd nidash shubun puduedash pete santen cuëshnudash Esus uepanëdash. <sup>37</sup> Adec Esus puduedash uesho isquidon chiac utsin, Icsambocquid nec, caid chido choquin noadte bëda danoshquete aton shubumpichobi bëpanëdash. <sup>38</sup> Aden bëequi Esus yuedacno choash puduedashun abi bëdamequid Esus istuidash, Ębi bëdamequid bëdambo iquec, quequin ambibi tantiec shubiec Esusën taëno tsadbudshun aton bëunën tapascapanëdash. Aden tapascac taë chucusho isun aton manëdaidën taucshun taë tachocabanshun noadte bëdan chidon

tanoshcapanëdash. Chidon aton na bedtequid dadpen menequin comapenec noadte bëda bedshun Esusën taë tanoshcapanëdash chidon.

<sup>39</sup> Chidon adosho isash Esus yuedquid, Simon caid, abibi onquec: “Ëmbi yuedaid Nuquin Papan chuimiaid iquec, Ëbi mishquid icsambocquid nec,” quequin chido mishmenquio icpec, quepanëdash Simon.

<sup>40</sup> Adoaquien, tantiaquidquio icquin Esusën: —Mibi tantiamequin chuinu. Tantiata, Simon —capanëdash.

Adoaquien: —Aden chuiban. Tantanu —quepanëdash Simon.

<sup>41</sup> Aden tantiaashun Esusën Simon ambi tantiaid icsa tantiamenuen utsi chuiquin nadopanëdash: —Bec cho. Yuecshun menenun nanuna, quepondash daëd. Abentsëcshun dadpen bedshunubi utsin daëdpactsëc bedshumpondash. <sup>42</sup> Aden bedshunshun yuecshun ambi bedshunacted abi daëdi meniantiapimbo icpondash. Adsho isun: “Padi. Mimbi bedondaid ëbi cuidenda,” quequin abi bedshunëdaidën abi daëdi chuipondash. Adoacsho, ¿Mitsiquid abi bedshunëdaid ënenquiocquin tantiec bëpiscudenquio icpec? —quepanëdash Esus Simon caic.

<sup>43</sup> Adoaquien: —Ambi dadpen meneshun cuidenda caidien nechitec —quepanëdash Simon.

Aden chiaquien: —Ai, bëdamboen tantiaquin mimbi chioc —quiash

<sup>44</sup> Simon ismenuc Esus chido yacmi bidiadshun naden chuipanëdash: —Min shubun puduedacsho mimbi taë pante ëbi menenquioccoc. ¿Nëid chido isquindactio? Aidëmbien aton bëunën taë chucu uashun aton manëdaidën con taë bëchishaid ucposh. <sup>45</sup> Min shubun ëbi puduedsho isun tanchoccanesa mibi nec. Padnueni ëbi puduedacsho isun nëid chidon ëbi tantiaquioquin yuen con taë tachoccaniosh. <sup>46</sup> Bëchin manoshcanesa mibi iccoc. Padnueni nëid chidombi noadte bëdan tanoshcaniosh. <sup>47</sup> Adembidi mibi chiembique. Tantiata. Mayan icsa dadpenshun tantiamiaid icsho nëid chido bëdamepombi. Aden bëdamiashic abi icsaid tantienquio yec bëpiscudpobi. Ëmbi aden nac ëbi comapenen tantiaquioquin ëbi nashunquidquio nëid chido nec. Padnuen utsi icsaid daëdpactsëc mibi icsaidtedtsëcbidi icpec. Adquid icsaid bëpiscudebi ëbi quenuc ëbi bëdiactsëc tantiatsec mibi nashumë nec —quepanëdash Esus Simon caic.

<sup>48</sup> Aden Simon chiashic chido caic: —Icsaquid nec, quenquiocquin icsainquio yachimboecquid mibi isembi —quepanëdash Esus chido chuioaic.

<sup>49</sup> Adsho tantiaash: —Icsainquio yachimboecquid mibi isembi, quec ¿mitsipadquid Esus nepec? —quepanëdash iccuededquido. <sup>50</sup> Aden iccuededquidon tantianubi chido caic Esus: —Ëbi tantiaquid yec Nuquin Papa yacno puduedquid mibi neyoc. Bëdamboec tabadaid tantiamiaid mibi iqueque. Dacuëdenquio yec nidta —quepanëdash chido caic.

## 8

### *Chidobo abi nashunquido*

<sup>1</sup> Adshumbic, Esusën shubu dadpen yacno-yacnomboen chuibanquin Nuquin Papa yacno shubu abentsëqui yachimboec nidaidën tabadaid chuibenepanëdash. Abi bëdamequid tsibananec chidobo nidpanëdash.

<sup>2</sup> Ambi mayan icsa dapuduemiaidobëdtan ambi bëdamiadon Esus tsibanampanëdash. Madia, Macada yacnoshon tishaid chedon Esus tsibampanëdash. Mayan icsa 7ted dapuduemiaid Madia icpanëdash.

<sup>3</sup> Abëd nidquid utsi Uana icpanëdash. Aidën bënë Chusa cuëmëdquid, ancanquid dapa Edodesën shubu nuntan nacnemequid icpanëdash. Abëd nidquid utsibic, Susana icpanëdash. Chido utsibo dadpen Esusbëd

capucuenepanëdash. Aidon aton na dadpen icnuc Esusbëd icquidon aton na nibëdsho isun menebampanëdash.

*Pete ëshë sequid*

*(Mat 13.1-23; Mad 4.1-20)*

<sup>4</sup> Aden chuibenias tabadtuidtsëcnubi ambi chuiquin tantameboedo chochoquin tsibanampanëdash. Cho-chosho isun, Mibibimboecnuc chiemi, quenquiocquin Esusën nadopanëdash: <sup>5</sup>—Tiedën caniquid pete ëshë sianuec aton tied yacno nidquid icbo. Adec nidshun tiedën caniquid pete ëshë se-cabanac maisec utsi-utsiec podqued nantan paëdacsho matsesën manenubi utsi-utsien uicchunën chec. <sup>6</sup> Utsibic, cuënote dadpen samëdacno secac badedquio dëyucuidtsash nidaid ëquëduc tapun nidenquio iquec bidiquequid. <sup>7</sup> Utsibic, nisanquid dëyucacno secac aidbëdi dëyucash canidoudtsacsho nisanquidën bëtinac unësquid. <sup>8</sup> Utsibic, nidaid bëdan secac dëyucash canias dadpen ëshëendac —quepanëdash Esus.

Aden chuibanashic: —Tantiate bëdambocquidën ëmbi chuiboed tantiapec —quepanëdash.

<sup>9</sup> Adoaquien: —¿Mitsipadquid tantiaid mimbi chuiboed icpec? Èbitedi tantamequin chuioa —capanëdash abëd icquidon.

<sup>10</sup> Adoaquien: —¿Mitsipadequini Nuquin Papa yacno tabadpe? queboedëmbi nëbi mimbi tantiabene. Padnuen utsibon tantienquio yaid aid iquec. Aden chiac:

“Èshë bëdambocquid icquimbi tantiesa icquin ma Nuquin Papa yacno isenquiocpanuna.

Adembidi tantiate bëdambocquid icquimbi tantiesa icquin ma abimbo chiaid tantienquiocpanuna”

—quepanëdash Esus.

<sup>11</sup> Aden chiashic: —Èmbi chuiboed nad iqueque. Tantia. Chuinu. Tiedën caniquid pete ëshë icbon siaidbimboecquid Nuquin Papan chiaid nec. Èshë siacno nidaidbimboecquid matsesën tantiate nec. <sup>12</sup> Podquedën nidaid tsasimbocquidbimboecquid nad iquec. Nuquin Papan chiaid tantias papuedtiapimboesho Satansën bëpiscudmiaid adquid nec. <sup>13</sup> Cuënote dadpen samëdacno nidaidbimboecquid nadquid iquendac. Nuquin Papan chiaid tantias, Bëdambo iquebi, quiashic natiamianquiec cametequid icnuc aid tantiec Nuquin Papan chiaid papueduidquid iquendac. <sup>14</sup> Nisanquid dëyucaid dadpen yacno nidaidbimboecquid nad iquec. Nuquin Papan chiaid tantias abi bunaid, abi nënaid, ambi natequid adquid tantiaquin Nuquin Papan chiaid bëtashacimboec icnuc bëdamboec tabadaid ismesa yampec. Aden bëdamboec tabadaid ismesa yanuc utsin Nuquin Papan chiaid tantiatiapimbo iquendac. <sup>15</sup> Nidaid bëdabimboecquidien nad iquec. Nuquin Papan chiaid tantiadonec bëdamboec tabadquin utsi ismequidquio nec. Adquid natiamianquid chonoc tantesa uainquiocquin ënenquiocquin ismendac. Aden ismiac Esus tantiaquid utsi dadpen yampec —quepanëdash Esus ambi chuiboed abëd icquido tantiamenuec.

*Tabote nënantan nanac chënquiacbimboecquid*

*(Mad 4.21-25)*

<sup>16</sup> Aden chuishumbic naden Esusën chuioapanëdash: —Tabote taboshon matsun bëtashesa. Adembidi tsadte tédion tabote nanesa icbo nec. Ma ëmbi yuedaidon isnueshun nënantan tabote nanquid. <sup>17</sup> Adomboembidi mimbi ompoquin chuibanaid Nuquin Papan ompoenquiocquin chuibanendac. Adomboembidi mimbi tantiamenquio yaid aidëmbi chuibanendac. <sup>18</sup> Ad icnuc ëmbi chiaid bëdamboen tantiaquiota. Nuquin Papan chiaid tantianuequin

ambi chiaid dadpen tantiaquid. Adquid ambi tantiacpadec tabadquid. Adec tabadquin ompoenquiocquin utsi ismequid. Nuquin Papan chiaid tantiauid-boed, Bëdamboen tantiembi, qeshun papuduedmenquiocquin bëdamboen ismesa nec. Aden ambi tantiauidaid uesadendac —quepanëdash Esus.

*Aton utsibo aton titabëd choaid*  
(*Mat 12.46-50; Mad 3.31-35*)

<sup>19</sup> Adashic, Esus isec aton utsibobëd aton tita chopanëdash. Cho-choshon matses dadpen nuntan tabadsho isun, Ëbi choaid chuita, cac <sup>20</sup> shubun puduedshun: —Titabëd min utsibo choshon umanucshun mibi cainec mibëd onquete bunquin —capanëdash Esus chuiquin.

<sup>21</sup> Adoquien: —Adquid chuinu. Tantia. Nuquin Papan chiaid tantiashun nabanquido ëbëd icquid nec. Adquid buchi caindambi. Adquid utsi chido chuchu caindambi. Utsibic tita caindambi —quepanëdash Esus.

*Acte tëccoasquesho ënëdmiaid*  
(*Mat 8.23-27; Mad 4.35-41*)

<sup>22</sup> Adashic: —Chian cuëma utsiuc nidnu. Nid —quianec abëd icquidobëd cano antsadtoanec nidpanëdash. <sup>23</sup> Adec nidec cano anuequi Esus ush-topanëdash. Adec ush nubien cunquequid dapa comapenec cunquenubi acte tëccoasquequidën acte uemiac cano mentoadtsempanëdash. Adsho isash dacuëdec <sup>24</sup> Esus ushacno nidshun tinec abëd icquido: —Nuqui mentoad-eque. Isucun, Icbo —quec comapenec cuëdpanëdash abëd icquido. Adsho tantiash isucunash nidtoshon: —Mibi comapenec cunqueque. Ënëd —Esusën cac cunquequid badedquio ënëdpanëdash. Adembidi: —Mibi comapenec tëccoasqueque. Ënëd —Esusën cac badedquio acte tëccoasquequid ënëdoapanëdash. <sup>25</sup> Aden ënëdmetanec: —¿Atotsi quiash ëbi tantienquio yec dacuëdcuedede? —Esusën caquien abëd icquido dacuëdcuededquiequi, ¿Mitsipadquid nepec? Cunquequidbëdtabi acte tëccoasquequid ënëd cacpadequi ënëdchitosh, quec abëd icquido abibi onquecuededpanëdash.

*Mayan icsa dapuduedaid dapuduemequin bëdamiaid*  
(*Mat 8.28-34; Mad 5.1-20*)

<sup>26</sup> Adshumbic, acte tëccoasquec ënëdan nidaid Cadidia yacno chian cuëma utsiuc Esusbëd icquidon poteoic nidaidëmpi Cadada caid yacno aido nidpanëdash. <sup>27</sup> Ambo nidequi canon choash dectatosho isash mayan icsa dapuduedaid dada Esus bëquedec chopanëdash. Aidi shubu dadpen yacno tabadboedi nëbi uano unësaid chococate macuësh cuënote yacno tabadpanëdash. <sup>28</sup> Aidi Esus bëquedec choash sidquianec Esusën taëno uebudash: —¿Atotsienuec ëbi isec cho? Nuquin Papan madombo mibi cadoque. Ëbi mëyanenda —quec onquenubien <sup>29</sup> mayan icsa chuiquin: —Dapuduenta —capanëdash Esusën. Mayan icsa dapuduedaid nad icpanëdash. Shocosh bucun abi mëtaniaidbëdtabi abi tataniaid chictenesho isun, Mëtanenu, cainquio yampanëdash. Adoac mayan icsan matses nibëdacno nidmiaid icpanëdash.

<sup>30</sup> Adquid nec, quequin tantiaquin Esusën: —¿Tsutsi cuëmëdquid mibi ne? —capanëdash.

Adoquien: —Sinco midted dapuduedondaid nebi —quepanëdash mayan icsa dapuduedaid onquec. <sup>31</sup> Aden chiashic: —Mibi bëdambocquid cadoque. Ënenquiocquin mëyanacno cuidnuequin ëbitedi nidmenda —quiashic <sup>32</sup> chanco dadpenshun pec tabadsho isash: —Ëbitedi chanchotedi dapuduedtiadquio iquebi. ¿Ada bëdambo icpec? —quepanëdash mayan icsa dapuduedaid.



Adoaquien: —Aido dapuduedtan —Esusën cac <sup>33</sup> dapuduenequi chanco mayan icsa dadpen dapuduedash acte quiusudacno chanco comapenec niquec chian pudun-pudunec mentoadbudnec nibëdquiec unësbunepanëdash.

<sup>34</sup> Adsho isash chanco pemequin isquido titinquianec shubu dadpen yacno choshon ambi isboed chuituidac <sup>35</sup> anocquido istanu quianec Esus yacno cho-chopanëdash. Adec choshon mayan icsa dapuduemequin bëdamiaid dashcute dasiuidash bëdamboen tantiec Esusën taëno tsadsho istuidpanëdash. Adec aid onquesho isash anocquido, Uinsadpambo iquec, quiash dacuëdcuededpanëdash. <sup>36</sup> Dacuëdsho isun mayan icsa dapuduemequin bëdamiaid isquidon ambi isboed dacuëdquido chuiapanëdash. <sup>37</sup> Aden chiac: —Nëuëshquio nidenquio icpec —quepanëdash dacuëdquido Esus chiec. Adoac Esusbëd icquido canon antabëdtopanëdash.

<sup>38</sup> Adsho isun: —Mibëd nidtiadquio iquebi —quepanëdash ambi mayan icsa dapuduemequin bëdamiaid Esus chiec.

<sup>39</sup> Adoaquien: —Padi. Min shubuno nid. Ambo tabadquin Nuquin Papan naid mayan icsa mibi dapuduedaid dapuduemiaid anocquido chuibanta —quianec Esus canon nidpanëdash. Aid nidnubien mayan icsa dapuduemequin bëdamiaid nidanec aton shubu yacno choshon anocquidtedi Esusën naid abi mayan icsa dapuduemequin bëdamiaid chuibanoapanëdash.

*Chido intac budaid bëdanaid icnuc champi uincuemiaid  
(Mat 9.18-26; Mad 5.21-43)*

<sup>40</sup> Adashic chian potiash cuëma utsiuc Cadidia yacno Esus padpidec chosho isash: —Mibi isec bëdambo iquebi —quepanëdash iccuededquido abi cainquido. <sup>41</sup> Adnubien, Nuquin Papan chiaid chuibante shubun tabadquid isquid Aido cuëmëdquid choash Esusën taëno uebudash: <sup>42</sup> —Con champi abentsëc tishaid unësanequidquio iccosh. Aton seta 12ted icquid niosh. Èbi cudasaid nec. ¿Aidi isnuec con shubuno ada nidtsia? —quepanëdash Aido.

Aden chiac Esus nidnubien cho-choquido dadpen tsucus-tsucustsëcquio yec Esus datsidadpanëdash. <sup>43</sup> Adnubien, chido seta 12ted matamec intac budaid chopanëdash. Aidi dauëchoquid dadpenshun bëdametiapimbo icpanëdash. <sup>44</sup> Adoac bëdanabi yec, Bëdamequidën ëbi bëdamepec, abibi quianec Esusën cachoc choshon ismenquiocquin Esusën dashcute cuëmano mishnubi aton intac badedquio bëdampanëdash.

<sup>45</sup> Aden mishac: —¿Tsuntsimbini mishosh? —quepanëdash Esus. Aden chuisho tantiasch abi datsidash capuquido mishambo yec otacquio tabadcuuededpanëdash. Adec tabadnubien: —Mates dadpenshun tsucus-tsucustsëcquiocquin mibi cuëscabedec —capanëdash Petedon.

<sup>46</sup> Adoaquien: —Mates abentsëcshun ëbi mishosh. Èmbi nadatiambocquin natequid bëuesadtsac —quepanëdash Esus.

<sup>47</sup> Adec Esus onquesho tantiasch chido, Ambi tantiacpadamboen ëbi isec, quec abibi onquequi dacuëdec uëdëquequi Esusën taëno uebudtuidpanëdash. Adec uebudec datsidadquid tantianubi: —Intac bëdanuequin min dashcute cuëscatsequi bëdanobi —quepanëdash chido Esus caic.

<sup>48</sup> Adoaquien: —Mimbi tantiacpadquiec mibi bëdanaye. Dacuëdenquio yec bëdamboec tabadec nid, champi —capanëdash Esusën.

<sup>49</sup> Aden Esusën chuinubien Aidon shubun icquid utsibo Esus yacno cho-chopanëdash. Choash: —Min champi unësoshe. Chuibanquin tantiamequid min shubuno nidnunda —capanëdash abi yacnoësh choquidon Aido chuiquin.

<sup>50</sup> Aden chuisho tantiasch: —Dacuëdenda. Aden tantiequi nid. Mimbi tantiacpadquiec min champi bëdaneque —quepanëdash Esus Aido caic.

<sup>51</sup> Aden chianec Aidon shubuno nidash cho-choquidotedi, Èbèd puduedenda, quequin chianec Petedo, Uan, Acobo aided buanec Aido cuëmédquidèn champi yacno Esus puduedpanédash. <sup>52</sup> Ambo puduedshun anocquido unèsquio yec shubisho tantiashun: —Mibi shubieque. Ènèdta. Champi unèsenquio yec usheque —capanédash Esusèn.

<sup>53</sup> Adsho tantiashun, Champi unèsacsho isombi, quequin Esus tantienquiocquin shubiquidon mamènshumbededpanédash. <sup>54</sup> Mamènshumbedednubi Esusèn Aido cuëmédquidèn champin mèdeante mēdinquin: —Nidto, champi —comapenen cac <sup>55</sup> aton tiboedte unèsabi yec champi badedquio nidtopanédash. Champi nidtosho isash: —Peme —quepanédash Esus. <sup>56</sup> Aton champi nidtosho isash: —Adopenshenda iquec —quepanédash ani amèbèdi.

Adoaquien: —Mimbi isboed chuibanenda —quepanédash Esus.

## 9

### *Esusèn èbi chuibeneta, quequin ambi nidmiaido* (*Mat 10.5-15; 14.1-12; Mad 6.7-29*)

<sup>1</sup> Adashic ambi èbi chuibeneta caido 12tedtsèqui chometanquin Esusèn nadopanédash: —Èmbi nadatiambocquin nabanacpaden mibitedishun nabanendac. Mayan icsa dapuduequinc daicsaido bédamequinc cain mibi capucueniacnoshon mimbi ismebenendac. <sup>2</sup> Nèbi mibi nideque. Adec capucuenequin chuibenequimbi bédamebeneta. <sup>3</sup> Nidquin cuate uidèn nidte buanenda. Shictoadte buanenda. Petequid buanenda. Mitsana bedtequid buanenda. Dashcute utsi buanenda. Buanenquio yec dadauidquio nidtan. <sup>4</sup> Adec nidash mibi yuedquidèn shubun puduedshun èmbi chiacpadomboen nabanec anouidi tabadta. <sup>5</sup> Mibi nidacno mibi yuedquid nibèdsho isun naden nata. Mimbi tantiaid icsa mibibi cuidadte nec, quequin nidaid putu tasequequin ismeta —capanédash Esusèn abèd icquido chuiquin.

<sup>6</sup> Aden chiac nidash abèd icquido abi yuedacno puduedash tabadquin Esusèn chiacpadomboen Nuquin Papabèd tabadaid chuibanquimbi daicsaido bédamebenepanédash.

<sup>7</sup> Adnubien Esusèn nabansho isquidon Edodes chuibanpanédash. Edodes Cadidia yacnoquido ancaquid icpanédash. Aden Esusèn nabanaid chuisho tantiashun, ¿Tsudain nepec? Edodesèn caquien,

Acten mentoanondaïd, Uan cuëmédquid uincuempash icnui, quenubien;

<sup>8</sup> Edias Nuquin Papan ambi chiaïd chuimiampid padpidec choapash icnui, utsi-utsiec quenubien, Nuquin Papan chuimiampid utsi uincuenoapash icnui, utsi-utsiec quecuededpanédash, quequin chuipanédash Esusèn nabansho isun chuiquidon Edodes tantiamequin.

<sup>9</sup> Adoaquien: —Mambi uincuentiapimbocnoc Uan mapi budtemiondac. ¿Tsudain èmbi tantiacmaidquio adobanquid icpec? —quiashic Esus iste bumpanédash Edodes.

### *Matses dadpen pemiaïd* (*Mat 14.13-21; Mad 6.30-44; Uan 6.1-14*)

<sup>10</sup> Adashic ambi nidmeboedo Esus yacno padpidec choapanédash. Choashumbic ambi nabamboedtedi chuibanpanédash. Aden chuibanansho tantiash Esus abèd icquido bëyucanec shubu dadpen icquid Betsaida caïd anoentsèqui nidpanédash. <sup>11</sup> Aido nidsho isun cho-choquidon tsibanampanédash. Adsho isun Esusèn Nuquin Papa yacno tabadaid chuibanquimbi daicsaido bédamepanédash.

<sup>12</sup> Adashic ushë budtsan Esusbëd icquidombo Esusën dayunquio choshon: —Nëmbo shubu nibëdeque. Shubu utsi-utsiec yacno nidshun pete bedshun pec tabadta, quequin cho-choquido chuita —capanëdash Esus chuiquin.

<sup>13</sup> Adoaquien: —Padi. Mimbibi aido pemeban —capanëdash Esusën.

Aden chiaquien: —¿Ma nëmbobi panëmpi mëdante auc abentsëcted icnubi nuëcquid daëd iquec. Aidedtsëqui icsho isunda cho-choquidtedi pemenuquin ëbitedi bedtan, cai? —quecuededpanëdash abëd icquido.

<sup>14</sup> Ambobi tabadsho chido bacuëbobëdtabi tambanenquio icquimbi dadauidquio, 5000ted icnuc tambampanëdash.

Adoaquien: —Nëidtedi uano 50ted-50tedquien tabadme —Esusën cac <sup>15</sup> ambi chiacpadomboen tabadmepanëdash. <sup>16</sup> Aden tabadmesho isun panëmpi 5tedbëdta nuëcquid daëd sananquin abuc isec: —Mibi bëdamboquid icquin mimbi meniaid nëid pete nec, Papa —quec onqueshun pete cuësh-cuëshun: —Meneban —Esusën caquien abëd icquidon menebampanëdash.

<sup>17</sup> Aden menebanac piash cubudambic napi uaid sandobanquin tsitsan 12ted icnuc Esusbëd icquidon bedbampanëdash.

### *Chuiquid dapa abentsëcquiobi iquec, quiaid*

*(Mat 16.13-19; Mad 8.27-29)*

<sup>18</sup> Adashic, matses nibëdacno abëd icquido icnubi Nuquin Papa chiec Esus onquepanëdash. Adec onqueshumbic: —¿Tsutsi ëbi tsibanquidon ëbi capec? —capanëdash Esusën.

<sup>19</sup> Adoaquien: —Acten mentoanondaid, Uan padoen Esus nechitec, quenubien, Edias Nuquin Papan ambi chiaid chuimepampidien Esus nechitec, utsibo quenubien, Nuquin Papan chiaid chuimepampid uincuenoaidien Esus nechitec, utsibo queoaposh —quepanëdash abëd icquido.

<sup>20</sup> Adoaquien: —¿Ma, mimbi, tsutsi ëbi cape? —capanëdash Esusën.

Adoaquien Petedo: —Chuiquid dapa abentsëcquiobi, Nuquin Papan chomaidquio yec Quidistu caid ma mibi neyoc —quepanëdash.

### *Abi unëste chiaid*

*(Mat 16.20-28; Mad 8.30-9.1)*

<sup>21</sup> Adoaquien: —Mimbi ëbi tantiaid nëbi utsi chienda —quepanëdash Esus comapenen chiec. <sup>22</sup> Aden comapenen chiashic Esus: —Ëbi matsesaid icsho natiambocquin mëyantequid iquendabi. Ëbi chieshënquido dadpen iquendac. Nuquin matses tsusio dapabo yec tsusio utsibo yec Nuquin Papan naden nata quequin chiaid chuibanquin tantiamequido yec quec aidedi ëbi chieshënquido nec. Aidon naden chiendac: ¿Esus chuiquid dapa abentsëcquiobi Nuquin Papan chomiaidta nedic? Aidpenquio nec, quequin ëbi cuesunemependac aidombi. Adoaquini daëdec ushacsho uincuen uaindac —quepanëdash Esus abi uincuen uate chiec.

<sup>23</sup> Aden chiashic: —Ëbi tantiaquid icnuequin ambibi tantiacpadomboen nainquiocquin ëmbi chiacpadomboen nabantiadquidi nec. Ëbi mëyanacpaden mëyanuc unësmene quenquiocquin tantesa uainquiocquid. Ëbi tantiaquidquio iquendac adquid. Nidaidën tabadaiduidi tantiaquid iquec Nuquin Papa yacno nidenquio iquendac. <sup>24</sup> Cuesunenu cac unësmene quiash Esus tantiaquid nebi queboedi Esus tantiesa nebi quequid unësash Nuquin Papa yacno tabadenguio iquendac. Utsibo, Esus tantiaquid nebi, quiashic abi cuesunenuquid icnuc adecbidi Esus tantiaquid nebi, queoapec. Adquid unësash Nuquin Papa yacno tabadendac. <sup>25</sup> ¿Atotsieshun Nuquin Papa yacno tabadaid tantienquio yec nidaidën bëdamboec tabadnuequin bedtedbedtede? Mimbi bedaidënquio Nuquin Papa yacno puduedtiapimbo mibi

iquec. <sup>26</sup> Esusbëdtabi ambi chiaid tantiaquid nebi nidaidënuësh queti-apimbocquid icsho adquidi ëmbi tantiaid nec, queoatiapimbo iquendabi con pa yacnocquidtedishun tantianubi. <sup>27</sup> Nad iquendac. Tantiapiota. Chuinu. Èbi tantiaquid dadpen yansho ënabicquid utsin-utsinuien isendac —quepanëdash Esus.

*Esus bed-bedquesho istiapimbo yaid  
(Mat 17.1-8; Mad 9.2-8)*

<sup>28</sup> Aden chiashic Esus mëdante utsiuc tauadoec ushash Nuquin Papa chiec onquenuc macuësh yacno nidoapanëdash. Petedo, Uan, Acobo aided buanec macuësh yacno Esus nidpanëdash. <sup>29</sup> Adec macuësh yacno nidash Nuquin Papa chiec Esus onquenubi aton bësbed aton dashcutebëdi nacnacquo ushë chënquiacbimboec icpanëdash. <sup>30</sup> Adsho isnubien badedquo dada utsi daëd choash adquiobidi Esusbëd nidec. Nëidic, Moises, Nuquin Papan ambi naden nata quequin chiaid dada uamiampid; utsibic, Edias, Nuquin Papan ambi chiaid chuimiampid. <sup>31</sup> Aid daëdi Esusbëd tabadquin Nuquin Papan tantiampicpadec Edusaden yacnoshon Esus unës uate ushë chiec onquecuededpanëdash. <sup>32</sup> Adnubien Esusbëd chobedo abëd icquido 3ted ushcasmash tabadtuidquin Esusbëd utsi daëd nac-nacquiocquid dasiuidacimboec bed-bedquesho isbededpanëdash. <sup>33</sup> Esusbëd daëd nidtuidsho isash Petedo nadpanëdash: —Nëmbobi iquec bëdambo iquebique. Nëmbobi mibi tabadmenun abentsëc chotsëcnuc shubumpi uanuna, Icbo. Abentsëc mitsana, utsibic Moisesën na, utsibic Ediasën na, quequin shubu uanuna —quepanëdash Petedo.

<sup>34</sup> Adec Petedo onquenubien abu ushun isadenquiocnoc abitedi bëtimpanëdash. Adsho isash Esusbëd chobedo dacuëdpanëdash.

<sup>35</sup> Adnubien abu ushunuësh onquec: —Nëidic ëbëd icte bunquidquo, con madombo, ëmbi bëdamboen isaidquo neque. Aidën chiaidquo tantiata —quepanëdash Nuquin Papa Esusbëd icquido tedestedshun isenquiocnobi.

<sup>36</sup> Adec onquiash ënëdambi Esusuidtsëqui nidsho abëd icquidon ispanëdash. Adoshombic Esusbëd icquidon ambi isboed utsibo chienquiocpanëdash.

*Mayan icsa dapuduedaid madompi  
(Mat 17.14-21; Mad 9.14-29)*

<sup>37</sup> Adashic badiadash macuësh dapa yacnoësh Esus budsho isash bëquedec matses dadpen cho-chopanëdash. <sup>38-39</sup> Cho-choash abentsëc nadpanëdash: —Con mado abentsëc icquid mayan icsa dapuduedash icsambo iccoshe. Isec chota. Aidën bedto-bedtoac badedquo sidquianesho aidëmbidi bedshun bëcunedeniac con mado ëcbacushaniosh. Dapuduenenquo icquin con mado aidën uimambo icmedeniosh. <sup>40</sup> Adsho isash choshon mibëd icquido chuiquin, Dapuduemeta, cauidombi. Adoac mayan icsa dapuduemenuquin aidon tanac dapuduenenquo iccosh —quepanëdash dada abentsëc Esus caic.

<sup>41</sup> Adoquien ambi nianaido caic Esus nadpanëdash: —Nadatiambocquid Nuquin Papa nec, quequin tantiesa mibitedi neque. ¿Tedectsi icshun ëmbi chiacpaden mimbi tantiabempe? ¿Mimbi tantienquiocsho isash tedectsiashini chieshtope? —quetanquin: —Min mado bec cho —Esusën cac aton mado aton papan bëpanëdash. <sup>42</sup> Aden bënubi mayan icsan bëcuniac madompi uëdëquiampanëdash.

Adsho isun: —Padi. Chën —capanëdash mayan icsa chuiquin. Aden madompi bëdametanquin aton papa Esusën meneoapanëdash.

<sup>43</sup> Adsho isash: —Nuquin Papan nadatiambocquin naid uinsadpambo iquec —quecuededpanëdash isquido.

*Abi unëste chuioaid*  
(*Mat 17.22-23; Mad 9.30-32*)

<sup>44</sup> Adoaquien: —Chuinu. Bëpiscudenquiocquin tantiaquiota. Matsesacsho nëbi bedmendabi —quepanëdash Esus abi unës uate chiec.

<sup>45</sup> Aden chuisho abëd icquidon tantienquiocpanëdash. Aden tantienquio yec, Mimbi chiaid tantienquio iquembi, quetiapimbo yec otacquo tabad-cuededpanëdash abëd icquido.

*¿Tsutsi chuiquid dapa icpec? quequin chiaid*  
(*Mat 18.1-5; Mad 9.33-37*)

<sup>46</sup> Adashic: —¿Nuquin Papa yacno nidash chuiquid dapa mitsiquid icpec? —quec Esusbëd icquido onquecuededpanëdash. ¿Ëbida chuiquid dapa icpe? quec ambibi tantiequi adpanëdash.

<sup>47</sup> Adoaquien Esus tantiaquidquo icquin bacuëmpi chomeshun aton dayunquio tabëcash: <sup>48</sup> —Chuiquid dapa icnu, quesa icta. Ëbi tantiaquid icquin nëid bacuëmpi bëdamboen nashunquid iquec ëbi nashunoaquid iquendac. Nuquin Papan chiacpadomboen nabanquid Esus nec, quequin tantiaquidquo iquec ëbi chomiondaid, Nuquin Papa tantiaquidquo icoaindac. Nïdaidënuësh utsi nashunquidquo icboedi aidquiobi Nuquin Papan chuiquid dapa icta caindac —quepanëdash Esus abëd icquido caic.

*Abimbo tantiaquid ëbëd icquid nec quiaid*  
(*Mad 9.38-40*)

<sup>49</sup> Adashic, Uan Esusbëd icquid abentsëc nadpanëdash: —Mayan icsa dapuduemebanquid ispombi. Aidi mayan icsa dapuduemenuc nadposh: “Esus, nadatiambocquin naquidquo mibi cadoque. Mayan icsa dapuduemeta,” cac mayan icsa dapuduemposh. Aidi ëbëd icquidpenquio icsho isun: “Padicnuna,” cauidpombi. ¿Adambi bëdamboen chuipo? —quepanëdash Uan Esus caic.

<sup>50</sup> Adoaquien: —Adquid, Padicnuna, cainda. Nadatiambocquin naquidquo Esus nec quequin abimbo tantiaquin ëmbi nacpadomboen nabanquid icnuc mibipadquid ëbëd icquid neque —quepanëdash Esus Uan caic.

*Esus bunesabo, Samadia yacnocquido*

<sup>51</sup> Adashic Esus abi abuc indote ushë chote anoentsëqui yanan, Unësmene quenquio yec nidebi, quequin ambibi tantianec Edusaden yacmi Esus nidoapanëdash. <sup>52</sup> Adec nidnun ambi bëyucmiaido Esusën abia nidmiac nidaid Samadia caid yacno shubu daëdpactsëc yacno Esusbëd icquido chopanëdash. Choash: —Edusaden yacno Esus nideque. ¿Aidbëd icquido ada mimbi yuedpatsia? —caquien <sup>53</sup> Esus isadaidbo nec, quequin yuedenquiocpanëdash Samadia yacnocquidon.

<sup>54</sup> Adoaquien, Acobobëd Uan nadpanëdash: —¿Ënabicquido unësmenue mimbi nëdëncatequid chome, Papa, quequindambi Nuquin Papa chuipe, Icbo? —quepanëdash.

<sup>55</sup> Adoaquien: —Padicnuna. ¿Matses unësmenuectabi chodio? —quianec

<sup>56</sup> shubu daëdpactsëc yacno nidoapanëdash abëd icquidobëd.

*Esus tsibante bunquidën natequid*  
(*Mat 8.19-22*)

<sup>57</sup> Adec podquedën Esus nidsho abi databëdquid abentsëcshun nadopanëdash: —Mimbi chuibeniacnombobi mibi tsibananec nidendabi —quepanëdash Esus databëdquid abentsëc.

<sup>58</sup> Adoaquien: —Bëdi chëshë aton shëcuën uec. Podochoquidën aton shubu uaic. Aden shubu uainquiocquin Nuquin Papa yacno tabadaid chuibenec nebi —quepanëdash Esus.

<sup>59</sup> Adoshombic: —Ëbi tsibanta —Esusën caquien utsi:  
—Con pa unësacsho chococashun mibi tsibanec nidendabi, Icbo —quepanëdash.

<sup>60</sup> Adoaquien: —Nuquin Papa yacno tabadnu quequin unësaid choco-caquidëmbi ma chococapanuna. Mimbi Nuquin Papa yacno tabadnuequin abi yacno tabadaid tantiaquin mimbi chuibeneta —capanëdash Esusën.

<sup>61</sup> Adashic, utsi nadpanëdash: —Mibipadquid icnuequin mibi tsibanendambi. Con matses nidnu quiacnoba ëbi nidme, Icbo —caquien:

<sup>62</sup> —Mibi tsibanu queboedi utsiba tantiec ëbipadquid ictiapimbo mibi icpec —quepanëdash Esus.

## 10

### *Abi bëyucanec nidquid 72ted icquido (Mat 11.20-27; 13.16-17)*

<sup>1</sup> Adshumbic ambi bëyucmiaido dadpen, 72tedi, Esusën nidmepanëdash. Daëd-daëdec shubu utsi-utsiec yacno nidshun chuibeneta, quequin nidmepanëdash. <sup>2</sup> Nidmenun aid 72ted icquid Esusën nadopanëdash: —Mimbi ëbi chiac ëbi tantianuequid dadpen icpec. Adquido icnuc aido tantiamenuen ëbi chuibanquid daëdpactsëc iqueque. Naden Nuquin Papa chui: Icbombo, mibi cadoque. Mibi tantiamenuen chuibanquid dadpen nidmeta, Papa, quequin chui. <sup>3</sup> Aden mimbi chiacpaden mibi nidmembique. Ëbi chuibenec nidanetan. Mimbi nidshun chuibenenubi mibi chieshënquido dadpen iquendac. <sup>4</sup> Ëbi chuibenec nidanequin mitsana buanenda. Mitsana bedtequidbëdta shictoate buanenda. Tapucudte tapucudenquio yec nidanetan. Adec nidanequin utsi bëquedash tabadenquiocquin datambidanec shubun puduedec nidta. <sup>5</sup> Shubun puduedshun naden shubu icbo chuita: Nuquin Papabëd abi yacnocquido bëdamboec tabadacpadquiec ma nëid shubun icquido tabadpanuna. <sup>6</sup> Aden chiac shubu icbo bëdamboec tabadnuequid icsho Nuquin Papan abi bëdamboec tabadte aid shubun icquido menendac. Shubu utsi icbo ëbi chieshënquid ictsiash. Adquid yec mimbi chiaid tantianu quesa aid shubu icbo icpec. Adquid icsho Nuquin Papan abi bëdamboec tabadte aid shubun icquido menenquio iquendac. <sup>7</sup> Mibi yuedacnouidtsëqui tabadta. Adembidi, mibi yuedquidën meniaid peshun acta. Mimbi chuibanaid cuidquin aidëmbi mibi menendac. Adoac anouidi tabadta.

<sup>8</sup> “Shubu dadpen yacno mibi choacsho yuedshun pete meniac isuidec, Utsitsen bec cho, quenda. <sup>9</sup> Ambobi tabadquin daicsaid bëdameshun naden chuita: Nuquin Papan Chomiaid abi yacno yuedanquid neque. Aid tantiaata, quequin chuita. <sup>10</sup> Shubu dadpen yacno choshon mibi yuedquid nibëdsho isun aton podquedën nidquin naden chuita: <sup>11</sup> Nuquin Papan chomiaid mibi chuinuec chobi. Ëbi daëdi yuedenquiocsho mibi chuitiapimbo iquebi. Adoac abi yacno ambi chomiaidën mibitedi yuedtiapimbo iquendac. Nuquin Papan chomiaid tantiate bunesa mibi icsho isash mibi yacno capuec ëbi tabitacquiaid tabesquenu. Is, quequin ismequin adota —capanëdash Esusën ambi nidmetequid 72ted icquido chuiquin. <sup>12</sup> Aden chiashic aido chiec abi Esus onquec: —Naid icsabëdtabi naid bëda chuibante ushë chonoc mibi yuedesa Nuquin Papan comapenen cuidendac. Ëbi choabicnuc Sodoma

yacnoquido icpampic. Ëbi choabicnuc aidon ëbi tantiatiapimbo icpampic. Adquido Nuquin Papan bëdiactsëc cuidendac —quepanëdash Esus.

<sup>13</sup> Aden ambi nidmetequid 72ted icquido chuibanshumbic utsibo isacimboen Esusën nadopanëdash: —Nëbi icquido, shubu dadpen icquid tantiec unësqiocoquin mibi chiembique. Tantiata. Shubu dadpen icquid Codasin caid yacnoshon ëmbi nadatiambocquin nabansho mibitedishun isted-istedshumbi Nuquin Papan chomiaid nec quequin tantienquo mimbi iccuededpec. Adembidi nadatiambocquin nabansho isted-istedboedi Betsaida yacnoquido mibi nec. Aden ëmbi nasho isash ëbi tantiesa mibi icoapec. Ënden yampido isadaidpembon ëmbi nadatiambocquin nabansho isun, Icsaquid nebi, qeshun unësqiocnoc shubiquin abi icsaid ëntsempampic.

<sup>14</sup> Aden Tido yacnoquidobëdtan Sidon yacnoquidon tantiashun abi icsaid ëntsempampic. Adquido Nuquin Papan bëdiactsëc cuidendac. Isadaidbo Codasin yacnoquidobëd Betsaida yacnoquido ëbi isquido mibitedi nec. Ëbi tantiesa icsho Nuquin Papan mibi comapenen cuidendac. <sup>15</sup> Adecbidi, nëbi icquido, Capednaun yacnoquido mibi unësash ¿Nuquin Papa yacnoda mibi nidpe? Padenquo. Ëmbi nadatiambocquin nabansho isun tantiesa yec chian anëdënquiacno mibi nidendac —quepanëdash Esus abi tantiesabo chiacimboec onquec.

<sup>16</sup> Aden chiashic, ambi nidmenu caido 72ted icquido tantiamenuen chuibudec: —Mibitedishun ëbi chiac ëbi tantiaquido utsibo iquendac. Adquiobidi mimbi ëbi chiac ëbi tantiesabo icoaindac. Adomboembidi ëbi chuibansho tantienquo yash ëbi chomiondaid tantiesambo nendac —quepanëdash Esus. Aden chiac ambi nidmenu caido nidanepanëdash.

<sup>17</sup> Adec nidanequin Esusën chiacpaden nabeniashic, Bëdambo iquebi, quecuededec Esus yacno cho-choapanëdash. Adec cho-choash: —Mimbi chiacpaden nabanombi. Aden nabanquimbic, Esusën nadatiambocquin naidënquo dapuduenta ëmbi caidtedi mayan icsa dapuduemposh, Icho —quecuededpanëdash ambi nidmiaido 72ted icquido ambi naboed Esus chuibanec.

<sup>18</sup> Adoaquien: —Ëmbi nadatiambocquin nabanquin tantiamiac mibitedishun mayan icsa dadpen dapuduemebedednubi abi dëniacacimboecnuc bedquetanacimboec Satanas abucuësh badedquo paëdsho isec niobi.

<sup>19</sup> Ëmbi nadatiambocquin nabanacpadquid mibitedi icmebanombi. Aden mibitedi adquid icmiacsho mibi chieshënquidon mibi icsa uatiapimbo iquendac. Mibi chieshënquin icsa uanuequido nisibimboecquido nec. Aidobidi icsa uanuequid yec chichumbimboecquido neoaic. Adquid nisi icsho catashac mibi petiapimbo iquec. Adomboembidi catashac chichunën mibi setiapimbo icoaic. Adquidbimboec mibi chieshënquid icsho ëmbi chiacpadomboen nabanac mibi icsa uatiapimbo iquendac. <sup>20</sup> Aden nabanac mibi icsa uatiapimbo icsho isash, Bëdambo iquebi, quenda. Nuquin Papan abi yacno chomenuquin ëbi cuëmëdquid ënden dada uaid iquec abi yacno ëbi puduedte iquec, quequin tantiec, Bëdambo iquebi, quianta —capanëdash Esusën ambi nidmiaido chuiquin.

<sup>21</sup> Aden chuibanshumbic ambi nidmiaidon chiaid tantiash, Bëdambo iquebi, quequin Nuquin Papa Esusën nadopanëdash: —Abu icbo nidaid icbobidi mibi nec, Papa. Adquid icquin ëmbi nidmiaido mimbi tantiamiacpadomboen nadatiambocquin aidon nabededosh. Aden nabededshun chuisho tantiash bëdambo iquebi. Dadpen tantiaquido mimbi nadatiambocquin naid tantiamenquiocquimbi, ëmbi namiaido, daëdpactsëc tantiaquidobien

mimbi tantiamioc, Papa. Mimbi tantiacpaden tantiamiac ëmbi nidmiaidon nabededosh, Papa —quepanëdash Esus Nuquin Papa chiec.

<sup>22</sup> Aden Nuquin Papa chiec onquequin nainec: —Con pa abia yampid icquin abitedi tantiaquidquio nec. Aidën abipadquid icmiaid nebi. Aid abentsëcquiobi ëbi bëdamboen tantiaquidquio con pa nec. Adecbidi abëd abia yampid icquin con pa bëdamboen tantiaquidquio nebi. Adquid icquin, Con pa nad iquec, quequin ëbi tantiaquido tantiamendambi —quepanëdash Esus abi tantiec choash iccuededquido caic.

<sup>23</sup> Aden iccuededquido chuibanshumbic naden ambi 72ted icquido nidmian choboedouidsëqui Esusën chuioapanëdash: —Ëbi tantiaquido icquin ëmbi tantiamiacpaden mimbi nabansho isun Nuquin Papan bëdambo iquebi camiaido mibitedi nec. <sup>24</sup> Nuquin Papan chiaid chiampidobëd ancanquid icampido mimbi nadatiambocquin nabamboed iste bunquin aidon isti-apimbo icpampic. Adembidi, ambi chiaid Nuquin Papan chomiaid abi yacno puduedmianquid chosho iste bunquin aidon ëbi istiapimbo icoapampic —quepanëdash Esus.

### *Utsi tantiaquin bëdamboen naquidquio*

<sup>25</sup> Adashic, ¿Tantiaquidquioda Esus neque? Tantiabono, abibi quequin dada utsin: —¿Nuquin Papa yacno tabadnuen atotsimbi napeba? chuibanquin tantiamequidën ëbi chui —capanëdash.

<sup>26</sup> Adoaquien: —Ambi Nuquin Papan naden nata quequin chiaid Moises dada uamiampid ¿mitsipaden chuipec? ¿Aid isquin atotsi mimbi tantiape? —quepanëdash Esus abi chuimequid caic.

<sup>27</sup> Adoaquien: —Nuquin Papan chiaid nad iquec: “Nuquin Papa tantiadoneta.” Ambi chiaid utsibic: “Mibi icnëdacadpenquio yec Nuquin Papa bunacpadquiec tabadnuec adquiota.” Ambi chiaid utsibic, “Nuquin Papa tantiaquid nebi quequin bëdamboen nadeneta.” Utsibic, “Nuquin Papa tantiaquid nebi quequin ambi chiacpadomboen tantiaquiota. Aden nabanquimbi utsibo adembidi bëdambo icmequin naban. Ëbi tantiaquin nashuntiadquidi utsibo nec, mimbi cacpaden utsibo tantiaquin nashunta,” quequin Nuquin Papan chiaidquio nec —quepanëdash Esus chuimeboed Esus caic.

<sup>28</sup> Adoaquien: —Bëdamboen mimbi chioque. Nuquin Papan chiacpadomboen nabanec Nuquin Papa yacno mibi tabadendac —quepanëdash Esus.

<sup>29</sup> Aden Esusën chiac ëbi otacquo icsho isash Nuquin Papan chiacpadpenquiocquid nepec, quequin iccuededquid utsibon ëbi chuitsiash quequin tantishun Esusën chuimeboed: —¿Mitsicquid con utsi nepec? —quepanëdash.

<sup>30</sup> Adoaquien Esus: —Utsi chuinu. Tantiata. Edusaden yacnoësh shubu dadpen icquid Edico caid yacno nidsho isun ampequidon bedshun ambi aton na bedtequid aton dashcutebëdtabi chicshun icsa uabudtsëcquien cuestanquin niamposh. <sup>31</sup> Adoambi, cuestanquin nianaid uiacno podquedën choquin isadaidbo tsusion, Con matses nenushe. Isnu, quenquiocquin uano datamposh. <sup>32</sup> Utsibic, Nuquin Papa tabadte shubu uashunaid nuntan nashunquid choquin, Con matses nenushe. Isnu, quenquiocquin adembidi uano datanoaposh. <sup>33</sup> Utsibic, Samadia yacnoësh choquid aid podquedëmbi choquin cuestanquin nianaid istuidash unësquiocquin <sup>34</sup> aton dayun tsadbudshun cuestanquin nia-naidën chiuëtedi aton dauëmbi bënoshcashun bëtaneshumposh. Aden bëtaneshunshun cuestanquin nianaid aton cabayo canandoash aton cabayobëdi nidequi capuquido puduedmete shubu yacno choash abëdi tabadquin bëdamboen isquin nashumposh. <sup>35</sup> Adec tabadashic badiadshun capuquido puduedmete shubu icbo cuidquin aton na bedtequid meneposh. Aden menequin nadoposh: “Nidebique. Ëmbi bëboed



ampequidon cuestanquin nianaid bēdamboen isquin nashunta. Mimbi aid nashunacsho isun mimbi meneboed cuidquin mibi menendambi,” quequin chianec ampequidon cuestanquin nianaid istuidshun nashumboed nidposh —quepanēdash Esus. <sup>36</sup> Aden chuishumbic: —Ēmbi chuiboed utsi-utsiec icposh. ¿Mitsicquid ampequidon cuestanquin nianaidēn utsibimboecquid icposh? —capanēdash Esusēn.

<sup>37</sup> Adoaquien: —Ampequidon cuestanquin nianaid istuidash unēsquio yanquin abi nashumboedien con utsi nec, capendac —quepanēdash Esus chuimequid.

Adoaquien: —Adembidi mimbembi ēmbi chuiboedbimboecnuc utsibo tantiaquin nashunoata —quepanēdash Esus.

### *Madtan nabanubi Madian tantiaid*

<sup>38</sup> Adashic, Esusbēd nidequi abēd icquido shubu daēdpactsēc yacno chosho isun anocquid chidon Madta caidēmbi Esusbēdta abēd icquido aton shubun yuedpanēdash. <sup>39</sup> Adoac ambo puduedash tsadquin Esusēn chuibansho Madian Madtan chibinquo datsadbudshun tantiapanēdash. <sup>40</sup> Adec tsadquin Madian tantianubi Madtan ambi natiadquio yaidtedi tantiaquin nabampañēdash. Aden nabanequi Esus yacno choshon: —¿Con chibin ēbēdtambi nainquiocsho isenquioda mimbi ique? Min utsibēdtan nabanta, cata, Icho —capanēdash Madtan Esus chuiquin.

<sup>41</sup> Adoaquien: —Mimbi natiadquio yaid dadpen tantiaquidquio mibi iqueque. <sup>42</sup> Ēbi tantiaquidquio icta. Adquid min utsimbo Madia icsho, Padicnuna. Min utsibēdtan nabanta, catiapimbo iquebi —quepanēdash Esus Madta caic.

## 11

### *Nuquin Papa chiec onquianete (Mat 6.9-15; 7.7-11)*

<sup>1</sup> Adashic ushē utsin Nuquin Papa chiec Esus onquepanēdash. Aden Nuquin Papa chiec onquequin nainacsho isun abēd icquidon nadopanēdash: —Nuquin Papa chiec onquianeta quequin Uan padon abēd icquido tantiamepanēdash. Adembidi Nuquin Papa chiec onqueta quequin ēbitedi tantiamequin chuioa, Icho —capanēdash.

<sup>2</sup> Adoaquien: —Nuquin Papabēd onquequin naden chuita:

“Bēdamboquidquio mibi nec, Papa.

Adquid mibi icsho matsestedishun mibi con icbo capashun, Papa.

Mibi yacnoshon mimbi uaido mayan bēdabon mimbi chiacpadomboenuidi naic.

Adomboembidi matses abitedishunquo napashun, Papa.

<sup>3</sup> Tantiacquidquio, mibi cadoque. Bumianenquiocquin badiadquidēn-badiadquidēnquien con pete ēbi bedmedene, Papa.

<sup>4</sup> Adecbidi utsin ēbi chieshēnsho cuidenquo yec ēbi abi icsaid bēpiscudacpadquiequi ēbi icsasho cuidenquo yec bēpiscudoata, Papa.

Adembidi, Satanasēn icsa uanushe queshun ēbi cudasquin dayun uata, Papa, quequin chuita”

—quepanēdash Esus.

<sup>5</sup> Adtaneguc Esus nadpanēdash: —Mibēd nashunanquid iquec. ¿Adquid icnuda inchēshpotsembo abi yacno nidshun pete mimbi bedshumpatsia?

<sup>6</sup> Inchēshpotsembo pete bedshunuec mibēd nashunanquid yacno nidash: ‘Ēbi yacno utsi chosho pete nibēdnubi yuedombi. Con pete nibēdsho isash

pemenun bedec chobi. Mimbi meniaid cuidquin adquidi mibi meneoaimbi,' quepatsiac mibi mibëd nashunanquid caic.

<sup>7</sup> “Adoquien, nuntanuëshi: ‘Padi. Shëcnandombi. Con bacuë ishcunec din ictoshon mibi menetiapimbo iquebi,’ quequin mibëd nashunanquidën mibi chuitsiash.

<sup>8</sup> “Aden aidën chiaqui min pete nibëdnuc chuidonetsiac mimbi. Aden chuidoniac mibi menetsiash. ¿Abëd nashunanquid icshoda mibi menepadic? Padenquio. Mimbi nidenquiocquin chuidonesho tantiashun mimbi chui-boedtedi mibi menepatsiash —quepanëdash Esus.

<sup>9-10</sup> Aden chiec abi onquec: —Adomboembidi Nuquin Papa chuidonesho mimbi bedtiadquio yaid aidëmbi mibi bedmendac. Adembidi, Nuquin Papa tantianu quequin abi chuidonesho mibi tantiamendac. Adembidi, abi chuidonesho Nuquin Papan aton Mayan mibëd tabadmiac aidën Nuquin Papa mibi tantiamendac.

<sup>11</sup> “Adembidi chuinu. Tantia. ¿Min mado, Nuëcquid bec cho, queshoda mimbi nisimbo menedi? <sup>12</sup> Adembidi, ¿Cachinan bacuë bec cho, queshoda mimbi chichun menedi? <sup>13</sup> Padenquio. ¿Aden icsaquid icquin min bacuë tantiaquin bëdamboen menequid mibi icnuc Nuquin Papa icsaisa icquin mibi, Min Mayan ëbi mene, qesho tantiashun menenquioda mibi ictic? —quepanëdash Esus.

*Bedtsibun namiaid Esus nec, quequin chiaid  
(Mat 12.22-30; Mad 3.19-27)*

<sup>14</sup> Adashic, mayan icsa dapuduedquin eme uaid icsho Esusën istanquin: —Dapuduen —cac mayan icsa dapuduempanëdash. Adec dapuduenan ambi eme uaid onquepanëdash. Adsho isash tantiadempambo yec iccuededquid dadpen tabadcuededpanëdash. <sup>15</sup> Utsiboen: —Mayan icsan icbo Bedtsibu caidën tantiamiac mayan icsa Esusën dapuduemepash icnui —quepanëdash Esus chieshënquido.

<sup>16</sup> Adnubien iccuededquid utsibo: —Nuquin Papan chomiaidquio icquin Nuquin Papa mimbi chiac aidëmbi abucshun naquin ëbi isambo yaid nada-tiambocquin ismepatsiashi. Aden mimbi Nuquin Papa chiac aidën nada-tiambocquin nasho isash, Nuquin Papan chomiaid nebi quequin abimbo chuiquid mibi nec, mibi catsiambi —quepanëdash iccuededquid utsibo Esus caic.

<sup>17</sup> Aden chuisho tantiash tantiaquidquio yec abi icsamboen chuimenuquido chiec Esus nadpanëdash: —Chuiquid dapa nëishquin abëd icquido comapenen chushcac, Abëd ictiapibi, quianec cuëshëd-cuëshëdec nidanepec. Adec nidaniash chuiquid dapa ictiapimbo aid iquendac. <sup>18</sup> Adembidi, Bedtsibu cashumbic Satanas caid mayan icsatedi chuiquid dapa nec. ¿Mayan icsa icquinda abëd icquido dapuduemequid ëbi icmepadic? Adembidi, ¿ambi mayan icsa dapuduemiac abëd icquido nibëdenquioda ictic? <sup>19</sup> Bedtsibun tantiamiaid nec, mimbi ëbi capec. Adembidi mibëd icquidon mayan icsa dapuduemec. ¿Tsuntsin tantiamiac aidon mayan icsa dapuduemepash? Nuquin Papan tantiamiaido nebi, aido qesho tantiash, Abimbo caic, mibi quepec. Adomboembidi Nuquin Papan tantiamiaid nebi, quequin ëmbi chuisho ¿atotsi quiash, Abimbo chiec, quenquio mibi icpe? <sup>20</sup> ¿Nuquin Papan tantiamiac mayan icsa dapuduemequid ëbi yec ambi chomiaidquio matses chuiquid dapa mibi yacno ënden choabida ictio? —quepanëdash Esus abi chuimequido chiec.

<sup>21</sup> Aden chiashic abi onquec: —Mibitedi tantiamenuen utsi chuinu. Bëdamboen tantiata. Chuiquid dapa icquin abëd icquido cuëshëdnu quenquiocquin bëdamboen chuiquin namepec. <sup>22</sup> Aden namiac tabadnubi chuiquid dapa icnuequid utsi chopec. Nëbi choquidën abia chuiquid dapan yuabo nameshun nua meniac aidën yuabo yanoapec —quepanëdash Esus.

<sup>23</sup> Aden chiashic: —Ëbëd icquido ëbi chieshënesa nec. Matses ëbëd icquido icmenu quequid nebi. Matses Esusbëd icmenu quesa cuëshëdmianquid nec —quepanëdash Esus.

*Abibi dapuduemboed mayan icsa dapuduedoaid*  
(Mat 12.43-45)

<sup>24</sup> Aden chiashic abi onquec: —Abi dapuduedaid mayan icsa abibi dapuduenanec abipadquid tabadacno icsano matses nibëdacno nidash capuquin abi dapuduedbocpadquid istuidenquio icposh. Adquid istuidambo yec, Abibidi dapuduedoanu, quianec anobidi nidoaposh. <sup>25</sup> Adec nidshun abi dapuduemboed naden istuidposh. Mayan icsa nidan, Ëbibi bëdambo iquec. Adash bëdambo tabadnu, abibi quiashic, Nuquin Papa tantianu, quenquiocposh. Aden chienquiocsho aton Mayan Nuquin Papan aid menetiapimbo icnuc abi dapuduemboed choshon aid abentsëcquio <sup>26</sup> istuidashic nidoashun abipadquid chuituidac utsi 7ted abëdi choash abitedi dapuduedcuededac dada icsamboshë yamposh —quepanëdash Esus.

<sup>27</sup> Aden Esusën chiambien iccuededquid chido: —Mibi tishacsho shuma chishmiondaid Nuquin Papan bëdamboen isaid icpec —quepanëdash Esus caic.

<sup>28</sup> Adoaquien: —Aden nasho padenquio. Nuquin Papan chiaid tantiashun nabansho Nuquin Papan bëdamboen isaidquio nec —quepanëdash Esus chido caic.

*Onasën ismiampicpaden ismiaid*  
(Mat 12.38-42; Mad 8.12)

<sup>29</sup> Adnubien abi yacno cho-choash utsi dadpen iccuededsho isun Esusën nadopanëdash: —Nëbi nidaidën tabadquido icsanuequido yec Nuquin Papan abucshun nadatiambocquin naid iste mibi bunacpaden mimbi isenquio iquendac. Nuquin Papan Onas ismiampicpaden ismiaid mimbi isendac. <sup>30</sup> Ninibe yacno nidshun ambocquido icsaid cuidte Nuquin Papan chuimiapaden Onasën comapenen chuisho tantiash, Abimbo chuiquid nec, qeshun abi icsaid Ninibe yacnocquidon ëmbededpampic. <sup>31</sup> Utsibic, Nuquin Papan dadpen tantiamiaid, Sadomon iquec qesho tantiash chuiquid dapa chido Sadomonën chiaid tantianuec ënapenuësh choshon tantiash, Abimbo iquec, quepampic. Nuquin Papan matsesën naid icsa ambi naid bëdabëdta chuibante ushë chonoc aid chidon tantiampicpadomboen Nuquin Papan chiaid abimbo iquec quequin mibitedishun tantienquiocsho Nuquin Papan mibi isendac. Nuquin Papan bëdamboen tantiaquin chuiquid dapa Sadomon icmepampic. Abitedi tantiampidquio nëmbobi iqueque. Ëmbi chiaid tantiata. <sup>32</sup> Adembidi, matses icsaidbëdta ambi bëdamboen naid Nuquin Papan chuibante ushë chonoc Ninibe yacnocquidon Onasën chiaid tantiapadomboen Nuquin Papan chiaid abimbo iquec, quequin tantienquio icsho Nuquin Papan mibitedi isendac. Nuquin Papan chuimiapaden Onasën chuisho Ninibe yacnocquidon tantiabededpampic. Onas Nuquin Papan matses icsaid cuidte chuimiaidquio icpampic. Padnuen mibi icsaid bedshunash abided cuidadtequid nëmbobi iqueque. Ëmbi chiaid tantiata —quepanëdash Esus abibi chiadequi.

*Tabote taboshon bêtashenquo yac bimboec abi bédamboec tabadaid ismequid  
(Mat 5.15; 6.22-23)*

<sup>33</sup> Aden chuishumbic Esusën abi chuibanec: —Tabote taboshon ompoesa. Adembidi matsun bêtashesambo icbo nec. Ma ëmbi yuedaidon isnueshun tabote nënantan nanquid. <sup>34</sup> Adoaidbimboec min tantiate iquec. Min tantiate bédambocquid icquin bédamboec tabadquin ismequid mibi nendac. Bêtashac bimboec min tantiate icnuc icsamboen ismequid mibi nendac. <sup>35</sup> Con icbo ëbi bednuec choec qeshun bēpiscudenquiocquin isted-istedta. <sup>36</sup> Min tantiate icsaisa icsho Nuquin Papan chiacpadomboen tantiaquidquo aidi nec, quequin utsibon mibi isendac —quepanēdash Esus.

*Nuquin Papan icsamboen isaidquo  
(Mat 23.1-26; Mad 12.28-40; Duc 20.45-47)*

<sup>37</sup> Aden Esusën chuibanshobien padiseyobo abentsēcshun: —¿Ada ëbi yacno pec nidtsia? —capanēdash. Adoac aidbēdi nidash pete sanaid cuate dayunquo Esus tsadbudpanēdash. <sup>38</sup> Adec Esus tsadsho isash, ¿Adpecshenda iquec. Penush mëpamēdenquo Esus icpec? quec abibi onquequin padiseyobon Esus yuedquidëmbi tantiapanēdash.

<sup>39</sup> Adoaquien, tantiaquidquo iquec Esus nadpanēdash: —Ëndenquimbo padiseyobon peshun acnun dēshote cachocbēdtabi pada-padaid cachoc bédamboen dapanta quequin chuinëdacpaden mimbi naoaic. Aden dapanshun mimbi codocaidbēdtabi mimbi actequid nitsinaid anauc ampanenquo mimbi icpec. Mibitedi adquo iquec. Nesquin bēchish uquec dapanudquin mimbi tantiaid icsa ënenquo mimbi icpec. Adecbidi, mibi bunaid bednuen icsamboen naquin ampequid mibi nec. <sup>40</sup> Nuquin Papan chiaid tantiesabimboecquid mibitedi nec. Nuquin Papan matses uaquin dadabēdtabi tantiate uainquioda icpampic. <sup>41</sup> Ai. Adquid icnuc aton na nibēdquid tantiaquin mimbi pada-padaidën nitsinaidpadquid menebanta. Aden mimbi nadenesho isun Nuquin Papan min tantiatebēdta min dada bédamboen isendac —quepanēdash Esus.

<sup>42</sup> Aden chiashic padiseyobo caic Esus nadpanēdash: —Uno bedanquin dies yacno ënquin min tiedën caniquid ëshē tambanshun, Nuquin Papan chiacpaden con na 9ted icnubi abentsēc Nuquin Papan na nec, quequin aid abentsēc menenuquin mimbi dayun uaic penquiocquin. Aden nabanquin Nuquin Papan ambi matses bédamboen tantiaquin nabanacpaden naisabo mibi nec. Min tiedën caniquid dies yacno cuëscaquin tambanshun Nuquin Papan chiacpaden abentsēc menebanshun utsibo bédamboen tantiaquin nabantiadquidi mibi neyoc. Adesa icsho Nuquin Papan icsamboen isaidquo mibi nec, padiseyobo. <sup>43</sup> Adembidi, tsusio dapabimboecsho bédamboen ispashuni, quequin tantiec Nuquin Papan chiaid tantiate shubun puduedash tsusiobo tsadacno mibi tsadtenec. Adomboembidi tantiec matses iccuededacno nidequi, Ëbi bëquedquidon ëbi tsusio dapabimboecsho isash onquequin chuipashuni quec mibi capuec. Aden tantiaquid Nuquin Papan icsamboen isaidquo mibi nec. <sup>44</sup> Adembidi, matses unësaid chococate manenushe qeshun ismequin mabiunu, quenquo yacpadomboen ëbi icsaid tantianushe quequin ompoquid mibi nec —quepanēdash Esus padiseyobo chiec.

<sup>45</sup> Adoaquien, Nuquin Papan naden nata quequin chiaid tantiembi, quiash utsibo tantiamequid abentsēc: —Padiseyobo chuiquin ëbipadquido mimbi chuoapec —quepanēdash.

<sup>46</sup> Adoaquien: —Nuquin Papan ëndenquimbo naden nata quequin chiaid dadpen chuibanquin matses

mimbi namec. Adoac aiteded matsesën natiapimbo icpec. Adsho isash, Mimbi natequid dadpen iqueque. Mibi nashunu, quesa icsho Nuquin Papan icsamboen isaid mibi nec.

<sup>47</sup> “Adembidi, Nuquin Papan chuimiai dadpen min tsusedpabon cunesunepampic. Tsusedpabon cunesuniampido ënenquiocquin tantianu quiacimboen mimbi shubumpi uabanec. Ëmbi shubumpi uaido isun utsibon bëdamboen ispashuni, quequin aden mimbi nabanec. <sup>48</sup> Aden naquin tantiec, Nuquin Papan chuimiai do cunesunequin bëdamboen tsusedpabon napampic, quiacimboen tantiaquid mibi icnuc ambi chuimiampido cunesuniampidobimboecsho Nuquin Papan mibi isec. Nuquin Papan icsamboen isaidquo mibi nec. <sup>49</sup> Ëmbi chiacpaden chuibanta, cabicquin naden Nuquin Papan chuipampic. Ëmbi chuimiai do utsi-utsien aton matsesën mëyampec. Utsi-utsien mëyanshun cunesuneppec, quec Nuquin Papa abitedi tantiaquidquo adpampic. <sup>50</sup> Aden min tsusedpabo Nuquin Papan chuimiai do chuisho tantiesa icquin aido mëyampampic. Min tsusedpabopadquid nëbi icquido icquin Nuquin Papan chuimiai do tantiesambo mibi nec. Adquido iquec ënden mëyanampidpadquido mibi neoaic. Aido cunesuniampidpadquido mibi neoaic. <sup>51</sup> Tsusedpan abia abed cunesunepampid icnubi ambi tsyuec Sacdias cunesunepampic. Aid Nuquin Papa tabadte shubu uashunaid dayunquiobi aidon cunesunepampic. Ai, Nuquin Papan chiaid tantiesatedi ambi chuimiai do cunesuniampidpadquido nëbi icquid neoaic.

<sup>52</sup> “Nuquin Papan naden nata quequin chiaid tantiembi, queshun utsibo tantiamenquiocsho Nuquin Papan icsamboen isaido mibi nec. Nuquin Papan chiaid tantienquiocquin abi yacno yuedanquid tantiesa mibi nec. Adquid iquec mibi abi yacno puduedtiapimbo iquec. Adquid mibi icquin naden nata quequin chiaiduidi mimbi chiac utsibotsen abi yacno puduedmiantequid tantiesabo yec abi yacno puduedtiapimbo icoaic —quepanëdash Esus Nuquin Papan naden nata quequin chiaiduidi tantiaquido chiec.

<sup>53</sup> Aden chiashic, Ëbëdtambi pec cho, queboedën shubunuësh puduenanec Esus nidpanëdash. Adec Esus nidambien abi comapenen chieshënkuidombo padiseyobo: —Esus icsamboen chuimenu —quiampanëdash. <sup>54</sup> Adquid icquin Esusën chuibanacno nidaneshun chuimeoanuequin naden padiseyobon tantiapänëdash: Ëbitedishun chuimiac Nuquin Papan chiaid icsamboen Esusën chuitsiash. Aden icsamboen chuisho tantiash, Nuquin Papan chomi-aid nec, quec mibi muasho tantiashun, Unës uametiadquo iquebi, quequin Esus chiembi, quequin tantiaquin Esus chuimepanëdash padiseyobon.

## 12

### *Natiamiantequidbëdtabi dayacmetequid* (Mat 10.28-31)

<sup>1</sup> Aden padiseyobon: Esus icsamboen chuimeoanembi, quequin tantianubien matses dadpenquioshë Esus yacno cho-choash tsucus-tsucustsëcquio yec tabadpanëdash. Aido tsucus-tsucustsëcquio yec tabadnubien abëd icquido Esusën nadopanëdash: —Sicaid nami uaid cabiunac amëec bidisque-  
doec matsesën isenquiocnobi. Adembidi padiseyobon Nuquin Papan naden nata quequin chiaidbëdta ambibi tantiacpaden naden nata quequin dadpen chuioaic. Aden padiseyobon ambibi tantiacpaden naden nata quequin chuisho, Nuquin Papan naden nata quequin chiaidta nec, quequin Nuquin Papan chiaid bëdamboen ista. <sup>2</sup> Matsesën ompoquin naid Nuquin Papan

abitedi ismendac. Matsesën ompoquin chienquo yaidbidi abitedi tantiamendac. <sup>3</sup> Inchëshën min nuntanuësh mibi icsamboec onquiaid Nuquin Papan matsestedi tantiamequin chuibanendac. Nuntanuësh shoshquequin mimbi chiaid Nuquin Papan matsestedi tantiamenuen chuioaindac.

<sup>4</sup> “Adembidi chuinu. Tantiata. Mibi cuesunenuequid dacuëdënenda. Adquidën mibi cuesunequin mibi nibëdametiapimbo iquendac. <sup>5</sup> Nuquin Papauidtsëqui dacuëdënta. Icsadednequid icsho aidën mibi cuesunemeshun chian anëdënquequid nësecaindac. Adoanquiduidtsëqui dacuëdënta. <sup>6</sup> Nuquin Papa tantiaquid yec dacuëdenda. Nuquin Papan ambi uaidtedi tantiec. Padichucu dadpen icquid abentsëc cueso isun aid Nuquin Papan tantiapec. ¿Adquid tantiaquinda Nuquin Papan mibi tantienquo ictic. <sup>7</sup> Ai, mibi tantiaquiec. Min manëdaidtedi ambi tambanaid nec. Aid pistsëcquidtedi tantiaquin Nuquin Papan mibi tantienquioda ictic? Mibi comapenen tantiec.

*Esus tantiaquid nebi, quequin utsibon tantianubi chiaid  
(Mat 10.32-33; 12.32; 10.19-20)*

<sup>8</sup> “Abi chiembique. Tantiapiota. Utsibo icnubi Esus tantiaquid nebi, quequin abimbo chuiquid Nuquin Papa yacno chosho isun, Nëid ëbi tantiaquid neque. Puduedme, quequin chiendambi. <sup>9</sup> Adecbidi, utsibo icnubi, Esus tantiaquid nebi, quetiapimbocquid Nuquin Papa yacno chosho isun, Nëid ëbi tantiesa neque. Puduedmenda, quequin Nuquin Papan uaido mayan bëdabo chiendambi. <sup>10</sup> Ëbi matsesacsho matsesën icsamboen chuipec. Aden icsamboen chuiboshombic, Icsamboen chiombique. Ëmbi mibi icsamboen chienquo yacbimboec bëpiscudta, Papa, qesho tantiaash aidën icsamboen chienquo yacbimboec Nuquin Papa bëpiscudendac. Nuquin Papan Mayanën tantiamiac nasho isash, Satanasën tantiamiaid nec, quequid icpec. Aidën chiaid bëpiscudenquiocquin Nuquin Papan abi yacno adquid yuedenquo iquendac.

<sup>11</sup> “Adembidi chuinu. Tantiapiota. Mibi chieshënquido iquendac. Adquid icquin chuiquid dapa yacno Esus tantiaquido ëmbi buanacsho aidën mëyantsiash, quequin mibi bedshun aid yacno buampec. Aden nanu, quequin buanaqui ¿Atotsimbi chuiquid dapa chuipe? quequin tantienda. <sup>12</sup> Nuquin Papan Mayanën mimbi chuibante mibi tantiamequi —quepanëdash Esus abëd icquido caic.

*Aton na dadpen icquidën tantiaid icsa*

<sup>13</sup> Adashic, abi datsidadquid abentsëcshun: —Con pa unësan con pan na dadpen con buchibedbanosh. Mimbi dadpen bedbamboed musuctanquin min utsi meneta, quequin con buchi chuita —capanëdash Esus chuiquin.

<sup>14</sup> Adoaquien: —¿Buchibëdta mibi chuiquidtabi nepe? —quepanëdash Esus abi chuita caquid caic. <sup>15</sup> Aden aid chuishumbic utsibo chuiquin nadopanëdash: —Con na dadpen bednu, quesa icta. Mimbi bedaidënquo mibi Nuquin Papa yacno puduedtiapimbo iquendac.

<sup>16</sup> “Aidpadquid chuinu. Bëdamboen tantiata. Aton na dadpen icnubi aton tiedën caniquid bacuëash dadpen icsho isash icbo nadposh: <sup>17</sup> ‘Con tiedën caniquid bacuë dadpen iqueque. ¿Atotsimbimbi aidtedi dayun uapeba? <sup>18</sup> Naden naimbi. Tiedën caniquid ëshë dayun uate shubu shënitëdi chichan-shun aidtedi nuamboshëcnuc shubu uabanuna. Aden nuamboshëcnuc shubu uashun aidënquo con tiedën caniquid bacuëtedi sandoshon dayun uanuna. <sup>19</sup> Aden dayun uashumbic nadopembi: Con na dadpen iquec yuecash naimëdenquo iquec. Ad icnuc nainquo yec tabadquin peshun aquendambi. Aden naic, Bëdambo iquebi,’ quec aton na dadpen icquid abibi onqueposh.

<sup>20</sup> “Adec abibi onquesho tantiashun, ‘Mimbi icsamboen tantiec. Nëid inchëshëmbi mibi unësec. Adec mibi unësan ¿mimbi dadpen dayun uaid tsuntsin bedpatsiash?’ quequin Nuquin Papan aton na dadpen icquid chuiposh —quepanëdash Esus.

<sup>21</sup> Aden chiashic: —Aton na dadpenuidi tantiaquin Nuquin Papan chiacpaden naisa yec aton na nianec unësash Nuquin Papa yacno tabadtiapimbo iquec —quepanëdash Esus.

*¿Atotsimbi napeba? quesa icta, quequin chiaid  
(Mat 6.25-34)*

<sup>22</sup> Aden iccuededquido chuishumbic Esusën abëd icquido nadopanëdash: —Aton na dadpen icquidën tantiacpaden tantienda. ¿Con na nibëdnuc atotsimbi pepeba? quec dacuëndenda. Adecbidi, ¿Atotsibi dasiuidpeba? quec dacuëndenda. <sup>23</sup> Bëdamboec tabadnuequin mibi piasteuidi tantienda. Adembidi, Con dada bëdambo icmenuequin, Dashcute bedteuidi tantienda. <sup>24</sup> ¿Uicchunënda ambibi cuëte ëshë siac bacuëacsho chepadic? Padenquio. Adecbidi, ambi dayun uatequid shubu nibëdnubi aton na nibëdec. Adquid icsho Nuquin Papan aton pete bedmec. Uicchun Nuquin Papapadquidpenquio icshobi aton pete Nuquin Papan bedmec. ¿Ad icnuc ambi abipadquid uaidobi matses icsho aton pete bedmenquioda icpadic Nuquin Papan? <sup>25</sup> Adecbidi, ¿mibi unëste ushë abimbo chonoc, Padi, quepecta mibi icti? Padenquio. <sup>26</sup> Adec mibi unëste chonoc, Padi, quetiapimbo mibi iquec ¿atotsi quiash ¿atotsimbi pepeba? quepe mibi?

<sup>27</sup> “Adembidi, cuëtempi chuinu. Tantia. ¿Cuëtempinda aton bacuë ictequid daëdcapec? Padenquio. Adoenquio yaid aton bacuë ictequid bëdaidquio iquec. Cuëtempi bacuë ictequid bëdaidquio yacpadquid chuiquid dapa Sadomonën dashcute adquio ictiapimbo icpampic. <sup>28</sup> Padnuen cuëte bacuë ictequid bëdaidquio icboedi badedquio sequiash chodquiacsho tauiquid. Ad icnuc ¿Abipadquid Nuquin Papan uaido mibi icsho mibi dasiuidte bedmenquioda icpadic? Èbi bedmenquio ictsiash quequin Nuquin Papa bëdiactsëc tantienda. <sup>29</sup> Aden tantienquio yec ¿Atotsimbi peshun aque? quec dacuëndenda. <sup>30</sup> Nuquin Papa tantiesan abi bunaiduidi tantianubi Nuquin Papa tantiaquidquio icquin pete actequidbëdta ëbi bedmedonec, quequin tantiec tabadta. <sup>31</sup> Adembidi, Nuquin Papabëd tabadnu quequin tantiec tabadta. Aden tantiaquin mimbi bedtiadquio yaid mimbi bedendac.

*Abi yacno choacsho meniaid  
(Mat 6.19-21)*

<sup>32</sup> “Nuquin Papan abi yacno mibi chomeque. Dacuëndenda, ëbi tantiaquido caimbi. <sup>33</sup> Ambo nidabi icquin mitsana menebanquin mitsana bedtequid bedshun aton na nibëdquid menebanta. Aden utsi tantiaquin mimbi nabanuc Nuquin Papa yacnoshon menetequid mitsana chodquetemaid iquendac. Ampequidën bedtemaidquio iquendac. Capishton petemaidquio aid iquendac. <sup>34</sup> Mimbi tantiaidquio mimbi dayun uaid mibi cudasaid nec. Nuquin Papa yacno nidnu quequin mimbi tantiaid icnuc mibi bëdamboec tabadte cudasquin mimbi dayun uaid iquendac —quepanëdash Esus.

*Chieshenquiocquin caintequid  
(Mat 24.45-51)*

<sup>35-36</sup> Aden chuishumbic Esusën nadopanëdash: —Aton icbo u isec nidan con icbo chonoshe quiash dasiuidacchobi ushenquiocquin tabote dëbedtonequin, Con icbo chosho puduedmeshun nashunu, quequin aton yuabon caimpec. <sup>37</sup> Aden abi cainquido aton icbon bëdambo icmequin nadopec: “Èmbimbo

mibi pemenu. Nëmbo tabadec cho,” queshun ambi yuaido icbonquio pemequin bēdambo icmendac. <sup>38</sup> Adembidi, icbo inchēshpotsambo choshon abi nashunuequin cainquido icsho icbon bēdambo icmiaido iquendac. Adembidi, cachina cuēdanabi badiadabicnuc choshon abi cainquido icbon bēdambo icmiaido iquendac. <sup>39</sup> Adquidpenquio icbo utsi chuinu. Tantia. Aidi abi cainquid nibēdnubi aton na icnuc isedtanec choshon isac ampequid ēnden nidac. Adsho isash, Ampequid choec, quequin tantiaquid yec nidenquio ictsenobi, quependac icbo. <sup>40</sup> Adquiecbidi ampequid choacbinboec Nuquin Icbo choeque. Ad icnuc, Chosho ěmbibi tantienquiocchitomane queshun chieshenquiocquin ěbi cainta —capanēdash Esusën.

<sup>41</sup> Aden Esusën chuisho tantiaash Petedo: —¿Utsi chuiquin mibēd icquidoudi tantiamenuenda chio? ¿Abitedi tantiamenuenda chio? Tantuan. ěbi chui —quepanēdash Esus caic.

<sup>42</sup> Adoaquien: —¿Icbon chiac mitsipadquiocquin ambi namiaido bēdamboen napeba? Adquid chuinu: Pete tambanshun musucshun ěmbi namiaid utsitedi bēdamboen menebanta, quequin ambi namiaid utsi abentsēc chianec icbo nidac. <sup>43</sup> Adec nidashic choshon ambi chiacpaden ambi namiaidēn chieshenquiocquin nabanacsho isun icbon bēdambo icmiaid nendac. Adquid naden chuipec: ěbi nidan chieshenquiocquin mimbi nabanogue. <sup>44</sup> ěmbi namiaid utsibotedi ěbipadquiocquin chuiquid icta. Adquid icquin con natedi dayun uata, quequin chiendac icbon. <sup>45</sup> Adquid icnubi adomboen naisa icbo utsin namiaid icpec. Aton icbo yuec choenquiocsho isun aton icbon namiaid utsibo chieshēnquin cuesbanshun ambentsēqui nua peshun tantienquio yanquin aquec. <sup>46</sup> Aden nabanquin tantienquiocnoc aton icbo choshon ambi namiaidēn icsamboen cuesbanaido isun icbon comapenen cuesquin abi tantiesa utsibo ambi nidmiacnombo aidi nidmeoaindac.

<sup>47</sup> “Adembidi, ambi chiacpaden nabanesa icsho isun, Comapenen cuesta, icbon cac cuesendac. <sup>48</sup> Aton icbo bunaid tantiabicquidēn cuesmetiadquiocquin nabansho aton icbon bēdiactsēc cuesmendac. Adembidi, Nuquin Papan dadpen tantiamiaido ambi chiacpaden nashuntiadquio iquendac. Adembidi, icbon dadpen meniaidon dadpen meneoatiadquidi nendac —quepanēdash Esus.

*Utsibēd bēdamboec tabadnu quesa icquin cuēshēdmequid  
(Mat 10.34-36)*

<sup>49</sup> Aden chiashic abi onquec: —ěbi tantiaquid icnuc ěbi tantiesa yec cuēshēdendac. Aido ēnden cuēshēdondan ěbi tantiaquidombo bēdamboec tabadtsiandac, quec tsadebi. <sup>50</sup> Adecbidi, Yuecshun ěbi unēs uanun mēyantequid iquendac, quequin tantiec, ěnden mēyanondaid iquec abuc Nuquin Papabēd tabadtsiandabi, quec tsadebi. <sup>51</sup> ¿Nidaidēnshun abitedi bēdamboen tabadmenu quectabi chodionda? Padenquio. ěmbi chiaid tantiesa ěbi tantiaquidbēd icboedi cuēshēdtsiash quianec chopondabi. <sup>52</sup> Nad iquendac: Min shubun icquid sincoted icboedi Esus tantiaquid utsi-utsiec yanubien utsi padenquio yec cuēshēdec adquid. <sup>53</sup> Nadec cuēshēdtsiash: aton papa ěbi tantiaquid icnuc con papadquid icnu quesa aton mado cuēshēdendac. Shubu utsin aton mado ěbi tantiaquid icnuc aton papa adquid icnu quenquio yec cuēshēdendac. Adecbidi aton tita ěbi tantiaquid icnuc con tapadquid icnu quenquio yec aton champi cuēshēdendac. Shubu utsin, aton champi ěbi tantiaquid icnuc aton tita padenquio yec cuēshēdendac. Shubu utsin aton chaya ěbi tantiaquid icnuc aton babanēn padenquio yec



cuëshëndadac. Shubu utsin, aton babanën ëbi tantiaquid icnuc aton chaya padenquio yec cuëshëndadac —quepanëdash Esus. Abi tantiesa cuëshëdtequid chuibanec.

*Nuquin Papan ismianta isun nad iquendac, quequin tantiaid*  
(*Mat 16.1-4; Mad 8.11-13*)

<sup>54</sup> Aden abëd icquidombo chuishumbic Esusën naden iccuededquido chuoapanëdash: —Inchësh chosho isec, Ue choec, quiacpadec choec. <sup>55</sup> Adecbidi, ushë chënquec chosho isash, Chumbo yampec quiacpadec iquec. <sup>56</sup> Aden isquin mimbi ëmbi nidaidëshun ismiaidbëdta abucshun ismiaid mimbi tantiec. Aden abucshun ismiaid isquin tantiaquidquio icquin ¿atotsieshun abucshun Nuquin Papan chomiaid isumbi tantienquiocquin mibi icsaid ënenquio ique? —quepanëdash Esus iccuededquido caic.

*Utsibëd chushcananquid*  
(*Mat 5.25-26*)

<sup>57</sup> Aden chiashic: —Utsibëd chushcananquido mibi nec. Adec tabadec ¿atotsi quiash, Naden natiadquidi nebi, quequin tantiashun mibi icsaid ënenquio ique? <sup>58</sup> Utsi icsambocquin mimbi nadenec. Adsho isun matses cuidte chuiquid yacno aidëmbi mibi buanshobi nëish bëdamenuen, Mimbi chiacpadomboen mibi nashunu, quequin bëdamboen chuita. Mibi adenquio icsho matses cuidte chuiquid yacno buanshun mibi icsaid chiac matses cuidte chuiquidën, Quënën nauedmenuen buanta, cac buanshun quënën nauedmequidën mibi quënën nauedmepec. <sup>59</sup> Aden nauedaqui mimbi icsamboen naboed cuidnante meniabicnuc quënë yacnoësh mibi puduenti-apimbo iquendac —quepanëdash Esus.

## 13

*Utsibo unësmiacpadec unësmemane quequin mibi icsaid ënta caid*

<sup>1</sup> Aden Esusën chuibanubien iccuededquid utsibon, Esus chuimenu, quequin caimpanëdash. Aden cainequi Esusën chuibanquin nainsho tantiashun iccuededquid utsibo: —Chuinu. Tantia. Cadidia yacnocquidon Nuquin Papan chiacpadomboen nidaidën capuquido cuesunesho Pidaton aido cuesunemiosh, quiosh. Aden cuesuniac aidon intac ambi nidaidën capuquido cuesuniaidën intacbëd daëdash chididiquiosh, quequin chuipanëdash. Aid chiaid tantiashun. ¿Atotsi icsamboen nasho aido cuesunemepashba? caimbi mibi —quecuededpanëdash Esus chiec.

<sup>2</sup> Adoquien: —¿Cadidia yacnocquido utsitedi icsaid daëdpactsëc icnuc cuesunemiado icsaid dadpen icsho aido cuesunemiash, quequinda mimbi tantiape? <sup>3</sup> Icsamboen mimbi tantieque. Mibitedishun mibi icsaid ënta utsibo unësmiacpaden unësmenushe qeshun. <sup>4</sup> Chuinu. Tantiata. Shubu dadpen icquid Edusaden caid ënëdacno Sidoe yacno tabadquidon ambi abucshun nacnenaïd uebudquin abëd icquido 18ted cuesac unësosh, quiosh. ¿Edu-saden yacnocquid utsibo icsaid daëdpactsëc icnuc Sidoe yacnocquido icsaid dadpen icquid unësosh, quequinda mimbi tantiape? <sup>5</sup> Mimbi icsamboen tantieque. Utsibo unësacpadec unësmemane quequin mibitedishun mibi icsaid ënta —capanëdash Esusën abi chuimeboedo chuiquin.

<sup>6</sup> Aden chuishumbic utsitsen chiec: —Icbon cuëte icnuc nadpec: ‘¿Con cuëte ada bacuëashe? Istanu,’ quianec icbo nidpec. Adec nidshun isquien bacuë nibëdec. <sup>7</sup> Adsho isun icbon abi neshcashunquid chuiquin nadopec: ‘Seta tedested matamiash cuëte bacuë cuësnuac choidobi. Bacuëambo iqueque. ¿Bacuëenquiocquididambi dayun uape? Utsi nitsinun dëdshuneta,’ quequin abi neshcashunquid aton icbon chiosh.

<sup>8</sup> “Adoaquien: ‘Cuëte bacuëesa ëbi dëdshunemenda. Naden ëbi nameta, icbo. Cuëte bacuëesa tacheshtatanquin seta abentsëc matamequin nidaid chëshë chodquiaid ëbi bëdamboen tasiamenta. Adoac bacuëtsiash. <sup>9</sup> Aden seta abentsëc matamiash choquin bacuëacsho isash bëdambo mibi icpec. Padnuen bacuë nibëdsho isun, Dëdshuneta, ëbi caoata,’ abi neshcashunquid quiosh — quepanëdash Esus. Ëmbi tantiacpadec tabadenquiochoedi bëdamboen chiac bëdamboec tabadsho isash ëbi tantiaquid dadpen yanendac, quequin tantiec adpanëdash Esus.

*Cashuebudaid bëdamiaid*

<sup>10</sup> Adashic, chonoadtemaid ushën Nuquin Papan chiaid chuibante shubun puduedshun Nuquin Papan chiaid Esusën tantiamenubien <sup>11</sup> seta dadpen 18tedi matamequin mayan icsan shuabudaid icpanëdash. <sup>12</sup> Adquid icsho isun Esusën: —Shuabudaid icboedi nëbi cacueoaid mibi iquendac, chido —cashun <sup>13</sup> mishac cacuiash, Nuquin Papan nadatiambocquin naid nec, quequin chiec chido onquepanëdash.

<sup>14</sup> Aden chonoadtemaid ushën Esusën chido bëdamesho isun Nuquin Papan chiaid chuibante shubu isquidon: —Nëid ushë chonoadtemaid ushë neque. Bëdamenu quequin nëid ushënquio bëdamenda. Chonoadtequid ushënquio bëdameta —capanëdash iccuededquido chuiquin.

<sup>15</sup> Adoaquien Esus: —Mimbi chiacpaden naisa mibi neyoc. ¿Chonoadtemaid ushë icnuc, Con yua acte acmebono qeshun mimbi yuaid tënëshacchobi acte yacno buanenquioda mimbi icpe? <sup>16</sup> ¿Aden chonoadtemaid ushën mimbi min yua acmenuc nëid ushëmbidi chido, min matses Abadauanën tsyuecquid, dadpen seta matamequin Satanasën yuaid icsho mënchiquenquiodambi icpe? —quepanëdash Esus nëid ushën bëdamenda quequido tantiamequin chiec.

<sup>17</sup> Aden Esusën chuisho tantiash, Adenda, quequin bëdamboen chiombi, quetiapimbo yec otacquo tabadcuedednubi utsibotedi, Esusën nadatiambocquin naidtedi bëdambo iquec, quec bëdambo yec tabadpanëdash.

*Cuëte ëshëmpi chiaid*

*(Mat 13.31-32; Mad 4.30-32)*

<sup>18</sup> Adashic: —¿Nuquin Papan shubun icquido mitsipadquidquio icpec? <sup>19</sup> Nadquidquio iqueque. Chuinu. Tantia. Icbon cuëte ëshë pistsëcquiocquid mostasa caid nësecaid dëyucash nuamboshë caniec. Aid cuëte caniaidën cuidin podochoquidën shubu uabededec. Adquiecbidi, Nuquin Papan chiaid chuisho tantiatsëcquidën tantiabenash bëdambocquid icsho isash matses utsibo ëbi tantiaquid Nuquin Papan shubun icquido dadpen yanec — quepanëdash Esus.

*Sicaid nami uaidpadquid*

*(Mat 13.31-33)*

<sup>20</sup> Aden chuishumbic utsitsen chuioaic: —¿Nuquin Papan shubun icquido mitsipadquidquio icpec? <sup>21</sup> Nadquid iqueque. Tantia. Sicanun nami uatepadquid nec. Sicaid chidon nami uashun cabiunac amëec bidisquedoec. Adomboembidi ëmbi chiaid ëbi tantiaquidën chuibanac ëbi tantiaquid dadpen yanec utsibon isenquiocnobi —quepanëdash Esus.

*Pudued-puduedtequid shëcuë pistsëcquio chiaid*

*(Mat 7.13-14, 21-23)*

<sup>22</sup> Adashic, Edusaden yacmi nidoaquin shubu dadpen icquid utsisec yacno isbidanquin shubu daëdpactsëcquid utsi-utsisec yacnotsen isbidanoaquin anocquidotsen tantiamenuen chuibenenu, quec Esus

nidpanëdash. <sup>23</sup> Adec nidsho isun iccuededquid abentsëcshun nadopanëdash: —¿Nuquin Papa yacno matses daëdpactsëcta nidpec? Tantaranu. Ëbi chui.

Adoaquien Esusën nadopanëdash: <sup>24</sup> —Nuquin Papa yacno pudued-puduedtequid shëcuë pistsëcquio iquendac. Esusquio tantiec aidëmpinquo mibi puduedendac. Mimbi tantiaid utsi icnuc tsucusec puduedtiapimbo mibi iquendac. Adquid dadpen icnuc, <sup>25</sup> Nuquin Icbon, Ëbi yacno puduedte ushë naimbudosh, caqui cho-choshon, Ëbi puduedme, quequin comapenen cuëmbededpec.

“Adoaquien: ‘Ëbëd icquidpenquo mibi neque. Mibi puduedmetiapimbo iquebique. Mibëd icquido yacno nidtan,’ caindac Nuquin Icbon adquid.

<sup>26</sup> “Adoaquien: ‘Mibëdtambi peshun acbededombi. Ëbi yacnoshon mimbi tantiamequin chuibansho tantiombi,’ quequin abi tantiesan Nuquin Icho chuipec.

<sup>27</sup> “Adoaquien: ‘Icsaquido mibi neque. Nëmbo puduedenda,’ quepec Icho. <sup>28</sup> Aden chiaqui Abadauan yec Isac yec Acobo yec quec Nuquin Papan chuimiado aidtedi Nuquin Icho yacno tabadsho isash abi tantiesa adtiapimbo yec chian anëdënquiacno tabadec shubiquiec, Nuquin Papa icsambo iquec, quec nëishpec. <sup>29</sup> Nuquin Papa yacno abi tantiesa puduedtiapimbocnobien nidaidtedi yacnoësh utsibo dadpen cho-choshon Nuquin Papan abia yuedaidobëdtan tsyuec choquidon peshun aquendac. <sup>30</sup> Abi yacno choquido utsin namiaid icboedi utsi-utsiec chuiquid iquendac. Choquid utsi chuiquid dapa icboedi utsi-utsiec utsin namiaido icoaindac —quepanëdash Esus.

*Edusaden isash anocquido Esus unësqiotequid  
(Mat 23.37-39)*

<sup>31</sup> Aden Esusën chuibanquin naimbudnubien padiseyobo utsi-utsiec cho-choshon: —Ancanquid Edodes mibi cuesunemete buneque. Nëuëshquio nidec nid —capanëdash Esus chuiquin.

<sup>32</sup> Adoaquien: —Edodes cuesunemenuecbimboec onquequidquo nec. Aid yacno nidshun naden chuita. Nëbi mayan icsa dapuduemequin ut-sibo bëdamembi. Badiadshun adomboembidi nabanoaimbi. Abadiadshun adomboembidi nabanoaimbi. Ushë utsin-utsinquien adomboembidi nabanoaimbi. Adobanquimbi naimbudembi. <sup>33</sup> Adobanequi nëbi capuebi. Adobanequi badiadash capuoai. Adobanequi abadiadash capuoai. Adobanequi Edusaden yacno capuoai. Adec capuec ¿Edusaden yacno choabidabi unës uapec? quiosh, Esus quequin Edodes chuita —capanëdash Esusën.

<sup>34</sup> Adashic choequi macuësh yacno tabadtuidash shubu dadpen icquid Edusaden caid uano icsho isec Edusaden yacnocquido chiacbimboec Esus nadpanëdash: —Nuquin Papan chuimiado cuesunequido mibi nec. Adem-bidi, Nuquin Papan mibi yacno chomiaido cuënoten se-sequido mibi neoaic. Ëbi tantiaquid icmenu, quequin chuideniombi. Cachinan, Con bacuë chieshënquid choec, queshun nua shoccotsëcshun aton bacuë cudasquin mabësec aton podon. Adem-bidi: Mibi chieshënquid choec, queshun mibi cudasquin chuibanombi. Aden chuisho tantiatiapimbo yec mibi tabadpoc. <sup>35</sup> Adquido yec nëbi min shubun icquido cudasquid ëbipadquid nibëdec. Nad iqueque. Tantia. Mibi chieshë nec cuesunenuequido choabicnuc ëbi nidacsho yuen ëbi isenquo mimbi iquendac. Yuecash abucuësh choasho isash, Ambi chomiaid Nuquin Papan bëdamboen isaidquo nec, quequin tantienquicboedëmbi tantiendac —quepanëdash Esus Edusaden uano icnuc Edusaden yacnocquido tantiamequin chiacbimboec onquec.

## 14

### *Padiseyobon shubun Esus puduedash tabadaid*

<sup>1</sup> Adashic, chonoadtemaid ushë utsin padiseyobo tsusio dapa isedec Esus puduedsho isun, Nëid ushën natemaid icnuc Esusën bēdamenushe queshun is-nuequin padiseyobo utsibo tabadquin caimbededpanēdash. <sup>2</sup> Aden caimbedednubien podo nidte chedo bidisquiaid uano tsadsho isun Esusën: <sup>3</sup> —¿Chonoadtemaid ushën daicsambocquid bēdamenquiocte ushë nec, quequina mimbi tantiapē? —caquien <sup>4</sup> abi caimbededquido otacquo tabadcuededpanēdash. Adec aido otacquo tabadcuedednubien podo nidte chedo bidisquiaid dada Esusën bedshun bēdameshun: —Niddec nid —cac bēdambo yec nidpanēdash.

<sup>5</sup> Aden aid nidmeshun abi bēdamenushe quequin caimbededquido caic: —¿Chonoadtemaid ushën nua uēdēshcaidēn min baca ampaēdacsho isun badedquo bedtanquin indoenquioda mimbi ictsia? —quepanēdash Esus. <sup>6</sup> Aden chuisho tantiash adquiobidi otacquo tabadcuededpanēdash.

<sup>7</sup> Adashic, tsusiobon dayunquo tsadsho isash, Chuiquid dapa nec, utsibo quetsiash, quec padiseyobo cho-choec, quequin tantiashun Esusën nadopanēdash: <sup>8</sup> —Pec cho, cac choshon tsadte bētinenda. Tsadte mimbi bētinambien shubu icbon ambi pec cho caid utsi mibi chuiquid tsusio chosho <sup>9</sup> isun: “Chuiquid dapa choeque. Uano tabadad,” icbon cac icsamboen naombi quiash natiaic uano tsadpec mibi. <sup>10</sup> Naden nata. Pec cho, cac choash utsiuc tsadbudta. Adsho isun: “Uano mibi tsadeque. Nēmbō, chuiquidbēd tsadec cho,” capec mibi shubu icbon. <sup>11</sup> Chuiquidbimboecsho ispashuni, quequid Nuquin Papa yacno choacsho adquid ambi namiaid Nuquin Papan icmendac. Nashunquid icboedi Nuquin Papa yacno choacsho chuiquid Nuquin Papan mibi icmendac —quepanēdash Esus abēdta yuedaido caic.

<sup>12</sup> Aden aido chuishumbic abi yuedquid Esus nadpanēdash: —Pemenu, quequin mibēd icquid min utsibo aton na dadpen icquidoudi pec cho cainda. Aido pemiac, mibi pec cho caoac. <sup>13</sup> Pemenu, quequin aton na nibēdquido, daicsaidobēdta bēshuaido pec cho cata. <sup>14</sup> Adquido mibi cuidquin pemetiapimbo iquec. Adquido pemias, Bēdambo iquebi, mibi quepec. Nuquin Papa yacno nidash puduedsho ambi bēdambo icmiaid mibi iquendac —quepanēdash Esus abi yuedquid caic.

### *Nuquin Papa yacnoshon pequido*

<sup>15</sup> Aden Esusën chuisho tantiash abēdtan pec tsadquid abentsēc: —Nuquin Papa yacno nidshun abēdtambi pec bēdambo iquebi —quepanēdash.

<sup>16</sup> Adoquien aidi tantiamenuen utsi chiacbimboec Esus nadpanēdash: —Yuednu, quequin nadēnquo pec chota, quequin ambi yuedtequid dadpen chuiposh. <sup>17</sup> Ambī chiacpadēn ushë chonoc: ‘Ēmbi chuiboedtedi pec cho quequin chuitanta,’ cac aton yua nidposh. <sup>18</sup> Adec nidshun chuituidaquien: ‘Nidtiapimbo iquebi,’ queposh abitedi. Abia chuituidaid abentsēc nadposh: ‘Ēmbi sēuēmbōed dēdabi nidtiapimbo iquebi,’ queposh.

<sup>19</sup> “Utsibic: ‘Baca bedshun, Bēdamboen nimbanquina buaneque. Isnu,’ queshun isedtanenquiocquin ambi bedboed nimbameposh.

<sup>20</sup> “Utsibic: ‘Con chido bedombique. Nidenquo iquebi,’ queposh.

<sup>21</sup> “Aden chuisho tantiash nidshun aidon chiacpaden aton yuan icbo chuiaposh. Adsho tantiash nēishun icbon: ‘Ēmbi isedacmaido yacno nidshun, Pec cho, cata. Aton na nibēdquidbēdta daicsaid, bēshuaid chedo chuitan,’ cac aton yua nidposh.

<sup>22</sup> “Nidshun chuitanec aidobëdi choshon, ‘Mimbi chuiboedo bëombi. Aido icnubi abi tabadte iquec,’ queposh yua.

<sup>23</sup> “Adoaquien: ‘Shubu ënëdacno nidshun ëmbi chuibocpadquido isun bëoata ma con shubun tsucus-tsucustsëcquio yec ma adquido tabadpanuna.

<sup>24</sup> Abia ëmbi pec cho caidon ëbëdtambi petiapimbo iquendac,’ queposh icbo —quepanëdash Esus.

### *Esuspadquio ictequidquio*

<sup>25</sup> Adashic, nidsho matses dadpenshun tsibanac abi choacmi bidiadshun isec Esus nadpanëdash: <sup>26</sup> —Ëbipadquio icnuequid aton papabëduidi icquid iquec ëbipadquio ictiapimbo iquec. Adecbidi, aton titabëduidi icquid iquec ëbipadquio ictiapimbo icoaic. Adecbidi, aton chidobëduidi icquid iquec ëbipadquio ictiapimbo icoaic. Adecbidi aton bacuëbobëduidi icquid iquec ëbipadquio ictiapimbo icoaic. Adecbidi, aton utsibobëduidi icquid iquec ëbipadquio ictiapimbo icoaic. <sup>27</sup> Unësmanc quiash mëyanac dayactiapimbocquid ëbipadquio ictiapimbo icoaindac —quepanëdash Esus.

<sup>28</sup> Aden chiec Esus abi onquec: —¿Shubu uanu, qeshun abia shubu uaid isec, Nëidtenquio nanu, qeshun aidtedquiobidi bëshun toccashun shubu uainquioda icpec? <sup>29</sup> Aden tantienquiocquidën abentse-abentsen bëbëtsëcquin baded naintiapimbo iquec. <sup>30</sup> Adsho isun utsibon mamëns humpec. Bëdamboen isun shubu uaquidpadquid, Esuspadquio icnu, qeshun ëmbi chiaid bëdamboen tantiabenash adquiobidi icpec. Ëbi tantiauidtsëcquid ëbipadquio ictiapimbo iquec.

<sup>31</sup> “Adembi chuinu. Tantiata: ‘Mibëd icquidobëd cuesnanuec chuiquid utsi nëmbo cho-choec,’ qesho tantiashun nëmbobi icquido chuiquidën naden tantiapec: ‘Ëbëd icquido daëdpactsëc iquec. Aidtedtsëqui iquec dayacquiocquid icquin chuiquid utsi abëd icquido cuemepec, qeshun ma chobono,’ quequin caimpec. <sup>32</sup> Padnuen, abëd icquido dayactiapimbo icsho isun chuiquidën: Chuiquid utsi bëqued tanta. Bëquedshun, Mibëdi ictsiabi. Ëbëd icquido chuiquid icta, ëbi chuiquid quiosh, quequin chuita, quequin chuiposh. <sup>33</sup> Adembidi ëbipadquio icnuequidon bëdamboen tantiata. ¿Ëbi chuiquid Esus nec, quequin ambi chiacpadendambi nabampeba? Ai, adonona, qeshun adota. Adoesa, Esuspadquiocquid nebi, quenda —quepanëdash Esus abi tsibananquido chiec.

### *Sa batapentsëcquiocquid*

(*Mat 5.13; Mad 9.50*)

<sup>34</sup> Aden chiashic Esus nadpanëdash: —Sa batambo iquec. Casecac utsibëd daëdash batambo iquec. ¿Sa batapentsëcquiocquid casecac batamboda icpadic? <sup>35</sup> Padenquio. Secatequid adquid nendac. Adecbidi Esuspadquio icnu quiash ëbipadquio yanasa chian anëdënquequid nësiatequid nendac. Adquid ictiapimbo iquebi, quequin, Tantienu, qeshun tantiacpadomboen nabanta —quepanëdash Esus.

## 15

### *Obeca abentsëc bënudtequid*

(*Mat 18.10-14*)

<sup>1</sup> Adashic, icsaquid utsibobëd ancanquidën matsesën aton na buansho isun aton na bedtequid nëidtedi bedta caido, Tantienu, quiash Esus datsidadpanëdash. <sup>2</sup> Adsho isash padiseyobo Esus tantiamenquio yec chushquiachimboec, Abi datsidadquido icsambocquid icsho cacumenquiocquin aidobëdtambi peshun Esusën aquec, quec abibi onquecuededpanëdash.

<sup>3</sup> Adoaquien, tantiaquidquio iquec Esus: <sup>4</sup> —¿Min obeca dadpen 100ted icboedi abentsëc bënudacsho isun, Nibënu, quequin min obeca utsi dadpen 99ted nianec nibënec nidenquioda mibi icpe? <sup>5</sup> Aidi nibënquin istuidash, Con obeca istuidbosh bëdambo iquebi, qeshun chiadquin buanec icbo nidec. <sup>6</sup> Shubuno choshon abëd icquido ambi yuedaidobëdta chomeshun: “Con obeca bënudaid istuidshun bëbosh bëdambo iquebique. Nuquibi penuna,” quequin icbon chuipec. <sup>7</sup> Adecbidi Nuquin Papa tantiaquid dadpen icnuc matses icsaquid abentsëcshun abi icsaid ënsho isash abuc Nuquin Papabëd tabadquido bëdamboshë iquebi, quecuedependac —quepanëdash Esus.

#### *Aton na bedtequid bënudtequid*

<sup>8</sup> Aden icbon aton yua bënudaid chuishumbic utsi chiec Esus nadpanëdash: —¿Aton na bedtequid shocoshëmpi 10ted icboedi abentsëc nibëdsho isun tabote taboshon bescaquin chidon nibënenquioda icpec? <sup>9</sup> Ai. Aden nibënquin istuidshun abëd icquido chomeshun: ‘Con shocoshëmpi abentsëc niadacboedi nibënquin istuidash bëdambo iquebi,’ quepec chido.

<sup>10</sup> “Adecbidi matses abentsëcshun abi icsaid ënsho isash abi yacnocquido ambi uaido mayan bëdabobëdi Nuquin Papa bëdambo iquebi, quecuededec —quepanëdash Esus.

#### *Aton mado cuëshëdquid*

<sup>11</sup> Aden chido chiashe utsi chiacbimboec Esus nadpanëdash: —Aton mado daëd icnubi <sup>12</sup> tsyuec tishaid aton papa caic: ‘Tsusio budquin mimbi chiondacpaden nëbi ëbi aited meneta, papa,’ quepondash. Adoac aton na musucshun aton mado abi daëdi menebampondash.

<sup>13</sup> “Aden meniac daëdpactsëc ushash aton mado tsyuecquid aton natedi sandoshon buanec nidaid utsi yacno nidash icsamboen nabanec tabadnuc aton natedi naimëdpondash. <sup>14</sup> Aden aton natedi naimëdambic tiedën caniquid unësbunian abi nidacnocquidon pete naimëdan tsusion mado chedo comapenec bundocuededpondash. <sup>15</sup> Adec bundoquiec abi nidacnocquid abentsëc yacno nidshun: ‘Mimbi namiaid ictiadquio iquebi,’ caquien: ‘Con chancho pemebanta,’ qeshun aton chancho yacno tsusion mado nidmepondash. <sup>16</sup> Aden nidmiac nidquin chancho pemebanequi ambi chancho pemiaid petiadquio yec tabadshobi anocquidon menenquio icpondash.

<sup>17</sup> “Adec natiambo bunec tabadquin aton papa ambi nianondaidbëdta abi icsaid utsitedi tantiec abibi onquec nadpondash: ‘Con pan namiaidon pete dadpen icnubi con na nibëdnuc unëspebi. <sup>18</sup> Nëbi con pa yacno nidshun naden con pa chiembi: Nuquin Papan chiacpaden nainquiocquin mibi tantienquio yec nidshun icsamboen nabanombique. <sup>19</sup> Adquid icsho con mado nec, ëbi cainda, papa. Nëbi min yuapadquid ëbi icme,’ quequin chiembi, <sup>20</sup> abibi quianec aton papa yacno nidoapondash. Adec nidec ancuenquio yacno aton mado nidondaïd casenash chosho isash unësquiocnoc aton mado bëquedquin dayumbudshun shubi uatanquin aton papan tanchoccapondash. <sup>21</sup> Adoac ambibi tantiabocpaden aton papa chuiquin: ‘Nuquin Papan chiacpaden nainquiocquin mibi tantienquio yec nidshun icsamboen nabanec tabadteniobi. Aden naquid con mado ëbi cainda, papa. Min yuapadquid ëbi icme,’ capondash aton madon.

<sup>22</sup> “Aden chiaquien bëdambo yanshun ambi namiaidombo naden aton papan chuipondash: ‘Con mado ënden nidondaïd choashe. Dasiuidte bëdaïdquio bëshun con mado dasiuinta. Adoshombic mëusudtetsen mëusunta. Adoshombic tapucudtetsen tasiuinta. <sup>23</sup> Adoshombic, bacan bacuë nuacquid dapa bedshun cuesuneta nuquitedi bëdamboec tabadquin penun. <sup>24</sup> Con

mado unësacimboeçoedi nēbi ëbēdi tabadoaic. Aidi bēnudacimboeçoedi nēbi istuidacimboec choash iquec,’ cac bacan bacuë cunesuneshun codocacsho pebededpondash.

<sup>25</sup> “Adnubien bëyuc tishaid tied nantan icpondash. Auëshquio nidec shubu anoentsëqui choquin tentencate cuëdëmec matses cuëdënsho tantiatuidpondash. <sup>26</sup> Aden tantiatuidashien aton papan namiaid istuidash: ‘¿Atotsi naic nec?’ quepondash bëyuc tishaid.

<sup>27</sup> “Adoaquien: ‘Min utsi ënden nidondaic choaposh. Aidi chosho isash unësquicoquin nuquitedi bēdamboec tabadquin pemenuequin aton bacan bacuë nuacquid dapa papan cunesunemiosh,’ cac <sup>28</sup> bëyuc tishaid nēishash shubun puduedenquio icpondash.

“Adsho isash, Puduedenquio iccosh, quequin chiac bëyuc tishaid yacno nidshun: ‘Min utsibobēd bēdambo icnuec cho, mado,’ capondash aton papan. <sup>29</sup> Adoaquien: ‘Seta dadpen matamequin mimbi chiacpadomboen nabante-niombi. Adquid icsho ëbēd capuquidobēdta ëbi pemenuen yua utsin bacuë mimbi cunesunemenquiocpaboc. <sup>30</sup> Nēbi mimbi meniaidtedi naimbudquinc, chido dada dadpen chudmequid chudquinc caic min mado choacsho isun bacan bacuë nuacquid mimbi cunesunemepaboc,’ quequin bëyuc tishaidën aton papa chushcapondash.

<sup>31</sup> “Adoaquien: ‘Mado, ëbēd icquid mibi nec. Adquid icnuc con natedi mitsana neyoc. <sup>32</sup> Min utsi unësacimboeçoedi nēbi choash tabadoaic. Aidi bēnudacimboeçoedi nēbi istuidaid nec,’ quequin aton papan choaedën buchi chuipondash —quepanēdash Esus.

## 16

### *Icbon na icsamboen isquid*

<sup>1</sup> Adshumbic, abēd icquido Esusën naden chuipanēdash: —Icbon, Con na dadpen isquid icta, caid icnubi: Mimbi con na ista caidën mitsana uesbudec, quequin utsibon chuiposh. <sup>2</sup> Adoac, ambi con na ista caid chomiash icbo nadposh: ‘Mimbi con na ista caidën mitsana uesbudec, quequin chioshi. Adoac, con na isquid mibi ictiapimbo iquec, caimbi. Nēbi ¿Ëmbi tambamboed abitedida iqueque? Con na daēd uata quequin ëmbi meniac mimbi daēd uabanquin dada uaid bec cho. Isnu,’ queposh icbo.

<sup>3</sup> “Aden chiac icbon na isquid otacquo onquec: ‘¿Icbon na isquid ictiapimbo yec mitsimbobi tabadpeba? Neshcashunquid ictiapimbo iquebi. Adecbidi, Con na nibēdeque. Bec cho, quetiapimbo icoaibi. <sup>4</sup> Naden natsiambi. Con icbon na meniondaic abitedi cuidmenquio yac ëbi yuedtsiash,’ queposh.

<sup>5</sup> “Aden tantishun ambi icbon na meniondaic abentse-abentsen chomiac bëyuc choquid chuiquin: ‘¿Tedtsi ëmbi con icbon na meniaqui mimbi cuiden-quiocpaccoc?’ caquien:

<sup>6</sup> “ ‘Bëchi shocosh nuacquid dapan cushtoaid 15tedi bedshun cuidamboc-combi,’ queposh.

“Adoaquien: ‘Mimbi 15ted bedombi, quequin dada uaid secashun dada uatempi bedshun shocosh dapa bëchi cushtoaid 7ted bedshun cuidembi, quequin dada uata.’

<sup>7</sup> “Aden bëyuc choquid chuishumbic utsi chosho isun: ‘¿Con icbon na tedtsi bedshun cuidenquio mimbi icpo?’ caquien:

“ ‘Tsitsan dapa dadpen 1000ted tiedën caniquid ëshë bedombi,’ queposh.

“Adoaquien: ‘Mimbi aited bedombi quequin dada uaid secashun dada uatempi utsin tsitsan dapa dadpen 800ted tiedën caniquid ëshë bedshun

cuidembi, quequin dada uata,' quequin icbon na isquidën chuiposh. Adoac ambi chiacpaden ambi bedaid cuidambocquidën dada uaposh.

<sup>8-9</sup> “Aden dada uabansho isun dada uatempitedi bedshun icbo yacno nidshun meniac isbanec icbo tantiaquidquio iquec nadposh: ‘Muaquin mimbi dada uamebanquin mibi yuedmetequid con na mimbi aido menioque. Nidec nid,’ caposh icbon —quequin Esusën chuipanëdash. Aden chuishun ambi chuiboed tantiamenuen abi chuibudec: —Nuquin Papa yacno mitsana buantiapimbo icquin nidaidën tabadquin mitsana meniac mimbi meniaidot-sen ëbi tantiaquid yanash unësash Nuquin Papa yacno nidshun mibi tsyuec chosho isun ëbëdtambi aidon mibi yuedendac —quepanëdash Esus.

<sup>10</sup> Aden chuishumbic adomboembidi chuiquin Esusën nadopanëdash: —Icbon na daëdpactsëc bëdamboen isbanquin nashunquid icquin adembidi icbon na dadpen isbanquin bëdamboen nashunendac. Padnuen, icbon na daëdpactsëc isbanquin icsamboen nashunquid iquin adomboembidi aton na dadpen icsamboen isbanoaindac. <sup>11</sup> Adembidi mimbi nidaidënsnun bedquin mimbi icsamboen nabansho isun, ¿Ëbi tantiaquid bëdamboen ista, quequina Nuquin Papan mibi chuipeba? Padenquio iquec. <sup>12</sup> Adembidi, ¿utsin na isquin bëdamboen nashunquio icsho isun abi yacno chosho isun mibi menependa ictic? Padenquio.

<sup>13</sup> “Adecbidi, chuiquid daëd icnuc aid daëdshun namiaidquio ictiapimbo mibi iquec. Abentsëcshun chiaiduidi tantiaquin utsin chiaid mimbi chieshë nec. Adquiobidi Nuquin Papa mimbi tantiaidquio icquimbi mitsana bedtequid mimbi tantiaidquio ictiapimbo iquec —quepanëdash Esus.

<sup>14</sup> Aden chuibanubi aton na bedtequid ambi tantiaidquio icnuc chieshec padiseyobo tabadcuededpanëdash. <sup>15</sup> Adec tabadsho isun Esusën: —Bëdamboen nashumbimboen ismequido mibitedi icsho mimbi ompoquin naidtedi Nuquin Papan isquin tantiec. Adembidi, Bëdamboen naquidbimboecsho matsesën ispashuni, quequin tantiaquin nasho Nuquin Papan bëdamboen istiapimbo iquec.

<sup>16</sup> “Adembidi, acten mentoanquid Uan pado tishabicnuc Nuquin Papan naden nata quequin chiaid Moisesën dada uampidbëdta Nuquin Papan chuimiaid utsibon dada uampid mimbi ënden tantiondaid nec. Nuquin Papa yacno puduedmianquid iquec, quequin nëbi chiaid utsi nec. Ad icnuc Nuquin Papa yacno puduedmianquid tantianu, quenquio yec ambibi tantiacpadec puduedte bunec. <sup>17</sup> Abubëd nidaid ënëdtequid icnuc Nuquin Papan naden nata quequin chiaid ënëdtiapimbo iquendac.

*Aton chido nianquid  
(Mat 19.1-12; Mad 10.1-12)*

<sup>18</sup> “Ad icnuc, aton chido bunenquiocquin aid nianshun chido utsi bedquin Nuquin Papan chiaid niacquid nec. Adembidi aton bënë niamboed chido bedquid Nuquin Papan chiaid niacquid neoaic —quepanëdash Esus.

*Aton na dadpen icquid icnubien aton na nibëdquid*

<sup>19</sup> Adequi onquequimbi utsi chiacbimboen Esusën naden chuipanëdash: —Dada, aton na dadpen icquid bëdaidquio dasiuidquidën badiadquidën-badiadquidënsnuien nua peshun acposh. <sup>20</sup> Adnubien aton na dadpen icquidën shubu dayun bëshun tsadunac aton na nibëdquid, Dasado cuëmëdquid, chiuë dadpen icquid tsadposh. <sup>21</sup> Bunquiec ambo tsadec aton na dadpen icquidën peshun secaid bedshun penuec tsadtsëcsho menenquiocposh. Aden menenquiocnoc tsadshobi opa choquin aton chiuë bëtashuntuidposh.



<sup>22</sup> “Adnubien, aton na nibëdquid Dasado unëso isun Nuquin Papan uaido mayan bédabon abuc buanshun Abadauanën dayunquio tsadumposh. Adoambic, aton na dadpen icquidtsen unësashi <sup>23</sup> chian anëdënquiacnoshon mëyanaid icquin abucquio isquien aton na nibëdquid unësboedi Dasado Abadauanën dayunquio tsadpec. <sup>24</sup> Adec aid daëdi tsadsho isun aton na dadpen icboedën Abadauan chuiquin: ‘Ëbi antauideque. Con ana dauebu-doaquin ëbi ëcpanun Dasado acte bëme, papa,’ caposh.

<sup>25</sup> “Adoaquien: ‘Chuinu. Tantia, abuido. Ënden nidaidën tabadquin mitsana dadpen bedbanec bédambo mibi tabadnubien Dasado comapenec bunquiec tsadposh. Nëbi aidi ënabi bédamboec tabadnubien anchumbo yec mibi tënquebudec. <sup>26</sup> Adboedi, uquëmbo mibi iquec cuëma utsiuc potetemaid icnuc nëuëshquio nidtiapimbo iquec. Adquibidi mibi yacnocquido nëmbo chotiapimbo ícoaic,’ quequin Abadauanën aton na dadpen icboed chuiposh.

<sup>27</sup> “Adoaquien: ‘Ëbi yacno potetemaid icnuc con pan shubu yacno Dasado nidme. <sup>28</sup> Con buchi ado mëdante auc abentsëc 5tedi unësabi yec nidaidëmbi tabadeque. Con buchi ado nëmbo mëyanacno chonoshe qeshun Dasado aido chuimetanta, papa,’ queposh aton na dadpen icboed.

<sup>29</sup> “Adoaquien: ‘Nuquin Papan chiaid, Moisesën dada uampidbëdta dada uaid utsi isec tsusiobo onquepayoc. Aden chiaid ma min buchi adon tanti-aquiopanuna,’ quequin Abadauanën chuiposh.

<sup>30</sup> “Adoaquien: ‘Aid tantienquioctsiash, papa. Unësboed nidshun chiac aidon tantiapatsiash,’ quequin aton na dadpen icboedën chuiposh.

<sup>31</sup> “Adoaquien: ‘Padicnuna. Nuquin Papa tantiesa icquin uincuemaidën chiaid min utsibon tantienquio icpatsiash,’ caposh Abadauanën aton na dadpen icboed chuiquin —quepanëdash Esus.

## 17

*Matses icsaid chiaid, ambi Esus tantiaid chiaid, ambi natequid chiaid (Mat 18.6-7, 21-22; Mad 9.42)*

<sup>1</sup> Aden chuishumbic abëd icquido Esusën nadopanëdash: —Icsa uanquid iquendac. Adquid Nuquin Papan comapenen cuidendac. <sup>2</sup> Adquid ëbi tantiabenabicquid icsa uanabicsho cuënote yuëmbocquid têtanetanquin acte shodomboshë yacno nënepatecnëdan. <sup>3</sup> Aid tantiec aidpadquid icmane quequin bédamboec tabadquin ismedeneta.

“Utsi icsasho isun: ‘Mibi icsaique. Mibi icsaid ënta,’ mimbi cac: ‘Ai, icsaobique. Ënëdnuna,’ qesho tantiash aidi icsainquio yacbimboec bëpiscudta. <sup>4</sup> Mibi icsamboen nash choec: ‘Icsaobique. Ënëdnuna,’ quenuc mibi icsamboen nacmaidbimboec yec bëpiscudta. Mibi padpiden icsamboen nash choaic: ‘Icsaobique. Ënëdnuna,’ queoanuc mibi icsamboen nacmaidbimboec yec bëpiscudoata. Mibi padpiden icsamboen nash padpidec choec: ‘Icsaobique. Ënu,’ queoanuc aidtedebidi aidi icsambo yenquio yacbimboec bëpiscudoata —capanëdash Esusën abëd icquido chuiquin.

<sup>5</sup> Adoaquien: —Nuquin Papa nadatiambocquin nabanquidquio nec, quequin tantiaquidquio ictiadquio iquebique. Adquid ëbi icme, icbo —capanëdash abëd icquidon Esus chuiquin.

<sup>6</sup> Adoaquien: —Cuëtëmpi ëshë mostasa caid pistsëcquio iquec. Siac dëyucash nua yanec. Adecbidi Nuquin Papa nadatiambocquin nabanquid iquec quequin mimbi bëdiactsëc tantiapec. Aden bëdiactsëc tantiaquin Nuquin Papan nadatiambocquin naban-nabansho isun, Nuquin Papa nadatiambocquin nabanquidquio iquec, quequin tantiabenshun nëid cuëtëmpi caic,

Cuëte mananuc tabadboedi adquiecbidi acte nantan tabadoata, quequin mimbi chiacpadec acte nantantsen abi tabadacpadebidi tabadoaindac — quepanëdash Esus.

<sup>7</sup> Aden chiashic Esus abi onquec: —¿Min yua mimbi neshcata cac nidshun neshcaquin nainash shubunō chosho isun: “Nëmbo tsadquin pec cho,” caquina mimbi icpe? <sup>8</sup> Padenquio. “Con pete codocashun ëbi pemeshun acte menetanquin mimbitsen peshun acta,” mimbi caic. <sup>9</sup> Aden mimbi chiac mimbi chuibodtedictsëqui nabanquin mimbi yuaidën naimbudec. Aden naimbudsho isash: “¿Bëdamboen mimbi naoc,” quecta mibi icpe? <sup>10</sup> Padenquio. Ambembi nainquio iccosh. Mimbi chiacpaden min yuan nabanosh. Adembidi Nuquin Papan chuibodtedtsëqui nabanash Nuquin Icbo caic: “Mimbi chuibodtedi nabampombi. Mimbi namiaid icquin ëmbi naboed ëmbi natequiduidi napombi,” quequin mimbi chuite nendac — quepanëdash Esus.

### *Daushumbocquido bëdamiaid*

<sup>11</sup> Adashic, Edusaden yacno nidequi nidaid Cadidia caid ënëdacno nidaid Samadia caid yacno datambëtsenec <sup>12</sup> shubu daëdpactsëc yacno Esus chopanëdash. Ambo choshobien daushumbocquidon 10tedishun Esus bëquetuidpanëdash. <sup>13</sup> Adquido yec uano tabadquin: —Ëbitedi bëdamboen tantiaquin nadatiambocquin naban, icbo —cabededpanëdash comapenen cuëquin.

<sup>14</sup> Adsho tantiashun Esusën: —Isadaidbo tsusiobo yacno nidshun ismetanta —capanëdash. Adoac nidanequi abitedi bëdambudnepanëdash.

<sup>15</sup> Adoac bëdamboed abentsëc dëbidiadanec Nuquin Papan naid chiec onquec choaic <sup>16</sup> Esusën taëno tsadbudash: —Mimbi bëdameboc bëdambo iquebi — quepanëdash Esus caic. Aidi Samadia yacnocquid isadaidpembo nepanëdash.

<sup>17</sup> Adoaquien: —¿Diestedidambi bëdamepo? —quepanëdash Esus dëbidiadanec choaed caic. <sup>18</sup> Aden chiashic iccuededquidtedi caic: —Nëidi isadaidpembo yequi dëbidiadanec choash Nuquin Papan naid chiec onquenubi ambi chiacpadomboen bëdameboed utsibo isadaidbo icquimbi Nuquin Papan naid chienquio icpec —quepanëdash Esus. <sup>19</sup> Aden chuishumbic: —Mimbi tantiacpadequi mibi bëdanoque. Nidtoanec nid —capanëdash Esusën daushumbo icboedi chuiquin.

### *Chuiquid dapabëd bëdamboec tabadte chote ushë* (Mat 24.23-28, 36-41)

<sup>20</sup> Adshumbic: —¿Chuiquid dapa abentsëcbëd bëdamboec tabadte ushë choaid mitsipadënquio nuqui ispeque? Tantuanu. Ëbi chui —capanëdash padiseyobon Esus chuiquin.

Adoaquien: —Chuiquid dapabëd bëdamboec tabadte ushë chote ismete nibëdendac. <sup>21</sup> Adecbidi, nëmbobi chuiquid dapa abentsëc choeque. Is, quetiapimbo matses icpec. Adecbidi, Umbo choeque. Is, quetiapimbo matses icoaic. Chuiquid dapa abentsëcbëd tabadte nëmbobi iquec caimbi — quepanëdash Esus padiseyobo abi chuimeboedo caic.

<sup>22</sup> Aden padiseyobo chuishumbic abëd icquido Esusën nadopanëdash: —Yuecash natiamiantequid icnuc abuc Esusbëd tabadte ushë chopashun, quec ëbi iste mibi bunquimbi ëbi isenquio mimbi iquendac. <sup>23</sup> Adec ëbi iste bunubien: “Bëdamboec tabadte chuiquid ambo choshe. Istan,” cac abëdi nidenda. Adembidi: “Nëmbobi choshe. Isnu. Cho,” cac istanenda. <sup>24</sup> Nuquin Papa yacno bëdamboec tabadte ushë chonoc abu bedquetaniachimboec uëshëmbo chënquec ëbi chosho abitedishun isbededendac. <sup>25</sup> Aid ushë

choabicnuc ëbi natiametequid iquendac. Adembidi, chuiquid dapa nec cainquiocquin ëbi isadaidbon chieshëmbededec —quepanëdash Esus.

<sup>26</sup> Aden chiec Esus abi onquec: —Ëndenquimboshë Noe tabadnuc matsesën icsamboen tantiaded-tantiadednëdacpadomboen ëbi choate ushë icnuc adem-bidi matsesën tantiadenepec. <sup>27</sup> Nadec tabadpampic: Nuquin Papan chiaid tantiesa cuidte ushë choec, quenquiocquin abi bunaiduidtsëqui tantiaquin nua peshun nua acbededpampic. Adembidi tantiaquin aton chido bed-pampic. Adembidi tantiaquin aton champi menepampic. Aden tantiaquin nabanubien Noebëd icquido cano dapan puduedambic nua mauantequid ue dapambo sequenuc cubudquin Nuquin Papan chiaid tantiesabotedi acte mauanquin mabocac abitedi unësbunepampic —quepanëdash Esus.

<sup>28</sup> Adec Noe tabadnuc icsamboen tantiec matses tabadaid chiashic, Esus nadpanëdash: —Adecbidi Dod caid icnuc icsamboen tantiec matses tabad-pampic. Nuquin Papan chiaid tantiesa iquec abi bunaiduidtsëqui tantiaquid icoapampic. Nidaidën tabadaiduidquio tantiaquin nua peshun nua actenepampic. Adembidi tantiaquin aton na dadpen bedtenepampic. Adembidi tantiaquin aton tied nitsindenequinc, shubu uadenequinc, caquin napampic. <sup>29</sup> Aden nabanquin Nuquin Papan chiaid tantienquio icnubi shubu dadpen icquid Sodoma caid yacnoshon Nuquin Papan abi tantiaquid Dod cuemepampic. Adnubien tabote dëpesh pasquiacimboecquid nëdënquetequid ue sequiacimboec sequequidën Sodoma yacnocquidtedi Nuquin Papan chiaid tantiesabo unës uabunepampic —quepanëdash Esus.

<sup>30</sup> Aden chiashic: —Ëbi choate ushë icnuc ëmbi chuibocpadquiec Nuquin Papan chiaid tantiesa yec abi bunaiduidtsëqui tantiaquid iquendac. <sup>31</sup> Shubu macano yacno dectatoash mibi tsadnuc ëbi choate ushë chosho isash budanec mitsana bednu quec shubuno puduedenquio yec cuenta. Adecbidi, tied nantan mibi icnuc aid ushë chosho isash shubu yacno mitsana bednuec nidenquio yec badedquio cuenta. <sup>32</sup> Mibi yacnocquidtedi unës uanushe bidadshun isenquio yec cuenta, cac Dod cuenubien aton na tantiec aton chido aucbidi bidadsho unës uampidpadquid iquenda. <sup>33</sup> Unësmane queshun ambi tantiacpadec tabadquid unësash mëyanacno tabadnubien unësmane quenquiocquin Nuquin Papa yacno tabadte tantiaquin chuiquido unësash Nuquin Papa yacnombo tabadendac. <sup>34</sup> Ëbi choate ushë icnuc nad iquendac: Inchëshën daëd usho Nuquin Papa yacno yuednuen abi tantiaquid bedquin abi tantiesa nianendac. <sup>35</sup> Adembidi, chido daëdshun macueso Nuquin Papa yacno yuednuen abi tantiaquid bedquin abi tantiesa nianoaindac. <sup>36</sup> Adembidi, dada daëd aton tied nantan icsho Nuquin Papa yacno yuednuen abi tantiaquid bedquin abi tantiesa nianoaindac —quepanëdash Esus.

<sup>37</sup> Aden chuisho bëdamboen tantienquiocquin abëd icquidon: —¿Mitsimbo budpec, icbo? —capanëdash.

Adoaquien: —Unësaid yacno edeste bud-budec. Adquiecbidi Nuquin Papan chiaid tantiesa abi bunaiduidtsëqui tantiaquid yacno abi cuidtequid budendac —quepanëdash Esus abëd icquido caic.

## 18

### *Cadonequidquio chido chiaid*

<sup>1</sup> Adashic, Eëbëd icquido chieshenquio yec Nuquin Papa chiec onquian-onquianquidquio ma icpanu quec aido tantiamenu quec Esus nadpanëdash: <sup>2</sup>—Shubu dadpen yacno icsambocquid cuidte chuiquid icposh. Aidi Nuquin Papan chiaidbëdta utsibo tantiesa icposh. <sup>3</sup> Adnubien uano tabadquid niante chido icposh. Aidi icsambocquid cuidte chuiquid yacno nidshun:

‘Ëbi icsamboen naquid ma cuidnu chuiquiota,’ quequin chuiposh. Aden chiaqui padenquiocsho isash choded-chodedquin adomboenuidi chuided-chuidedposh.

<sup>4</sup> “Aden chuidoniaqui abi icsambocquin naquid cuidte chienquiochoedëmbi chido ënëdenquio yec <sup>5</sup> choded-chodedquin adomboembidi chuoasho tantiashun: ‘Nuquin Papabëdta matses tantiesa nebi, quequimbi niantë ënëdenquio yec chodednesho isun uimabudmane queshun abi icsamboen naquid cuidte chuiquiono,’ queshun cuidte chuiquidën chuiquiosh.

<sup>6</sup> Aden chiashic Esus: —Choded-chodedquin chidon chuoasho tantiash: “Mibi icsamboen naquid cuidte chuinu,” queposh icsambocquid cuidte chuiquid. <sup>7</sup> ¿Adomboembidi ambi cuënaidon, Ëbi chieshënquid cuidta, quequin chuidoniac, Cuidnu, quenquioda Nuquin Papa icpec? Ai, adendac. ¿Nëbimbobida cuidpeba? <sup>8</sup> Abitedi padenquioctsiash. Utsi nëbimbobi cuidenquiocquin choshon cuidendac. Badedquio cuidenquiocsho isash choquin ¿tedectsishumbimbi ëbi tantiaquin caimbudnequido istuidpendac? —quepanëdash Esus.

*Padiseyobo abentsëc icnuc ancanquidën utsin na bedtequid bedmianiaid chiaid*

<sup>9</sup> Adashic, bëdambocquid nebi, quiash utsitedi icsambo iquec, quequido tantiamenuen adquidën tantiaid icsa chuiquin Esusën nadopanëdash: <sup>10</sup> —Nuquin Papa tabadte shubu uashunaid yacno Nuquin Papa chiec onquenuec nidnuequid daëd icposh. Abentsëc padiseyobo icnubi ancanquidën utsin na bedmianiaid utsi icposh. <sup>11</sup> Nuquin Papa tabadte shubu uashunaid yacno abi daëdi choash puduedash uano nidtuidshun padiseyobon ambi tantiacpaden naden Nuquin Papa chuiposh: Bëdambocquid nebi, Papa. Ampequido utsibo icnubi icsamboen nabanquido utsibo icnubi aton chidopen chudquido utsibo nec. Adoesambo nebi. Adecbidi, choboed, ancanquidën utsin na bedtequid bedmianiaidpadquidpenquio nebi, Papa. <sup>12</sup> Adembidi, chonoadtemaid ushë yambi chonoadtemaid ushë utsi choabicnuc daëdec ushquin mibi tantiaquin buna mëmundenembi. Adembidi, uno bedanquin dies yacno cuëscaquin con na tambanshun 9ted dayun uaquin abentsëc mibi menedenembi, Papa, quequin padiseyobon chuiposh.

<sup>13</sup> “Aden padiseyobon uanoshon chuinubien ancanquidën utsin na bedtequid bedmianiaid puduedash nidtuidash: ‘Icsambocquid nebi, Papa.’ Adquid nebi quequin ismec shuebudacchobi abuc Nuquin Papa yacno isenquio yec abi onquec: ‘Icsambocquin nabanquid nebique. Ëbi tantiaquin pauc, Papa,’ queposh —quepanëdash Esus.

<sup>14</sup> Aden chiashic: —Chuinu. Tantia. Ancanquidën utsin na bedtequid bedmianiaid Nuquin Papan bëdamboen isaidquio icnubien padiseyobo ambi icsamboen isaidquio icposh. Icsaisa yacbimboec, Bëdambocquid nebi, quequid yuecshun Nuquin Papan aidën icsamboen tantiaid ismequin chiendac. Padnuen, icsambocquid nebi, quequin tantiaquid yuecshun ambi bëdamboen naid Nuquin Papan ismequin chuoaindac —quepanëdash Esus.

*Bacuëbo Esus yacno bë-bëaid*

*(Mat 19.13-14; Mad 10.13-16)*

<sup>15</sup> Adshumbic, aton bacuëbo Esus mishmenuequin utsin-utsinquien bëbësho isun: —Bacuëbo bë-bëenda. Esusën nabanaid utsi iqueque. Nidanec nid —capanëdash Esusbëd icquidon.

<sup>16</sup> Aden chuisho tantiash Esus nadpanëdash: —Bacuëbo nidmenquiocquin con dayunquio cho-chome. Chiac, Abimbo caic, quequin tantiaquidquid

bacuëbo nec. <sup>17</sup> Adomboembidi, Nuquin Papa yacno tabadte iquec, quequin chiac bacuëbon badedquio tantiacpadomboen tantiec Nuquin Papa yacno puduedtequid iquendac. Aden tantiesa ambo puduedtemaid iquendac — quepanëdash Esus.

*Nëbi caniquid chuiquidën chiaid  
(Mat 19.16-30; Mad 10.17-31)*

<sup>18</sup> Adshumbic, nëbi chuiquid caniquidën: —Nuquin Papa yacno nidnuequin ¿atotsimbi nape? Bëdamboen tantiaquidquio icquin ëbi chui. Tantianu —capanëdash Esus chuiquin.

<sup>19</sup> Adoaquien: —¿Mitsipaden tantiec bëdambocquid nec, quepe mibi? Nuquin Papauidtsëqui bëdambocquid nec. <sup>20</sup> Abi yacno nidnuequin ambi naden nata quequin chiaid naden mimbi tantiapec: “Mimbi inacmaid chudenda; ambi chiaid utsibic, cuesunianenda; utsibic, utsi mua uaquin chienda; utsibic, papan chiaidbëdta titan chiaid tantiaquin nabanta,” quequin chiampid mimbi tantiapec —capanëdash Esusën nëbi chuiquid caniquid chuiquin.

<sup>21</sup> Adoaquien: —Canidotsëcquimbi aden nadeniondambi —quepanëdash nëbi caniquid.

<sup>22</sup> Aden chuisho tantiapec: —Abentsëc mimbi nabicquid iqueque. Mitsanatedi menequin bedtequid bedbanshun aton na nibëdquid menebanta. Aden mimbi menebanac ëbi tantiaquid dadpen yanash Nuquin Papa yacno nidendac. Aden meniash ëbëd iquec chota —quepanëdash Esus.

<sup>23</sup> Aden Esusën chuisho tantiapec aton na dadpen tantiec unësquio yanshun Esusën chiapaden natiapimbo icpanëdash. <sup>24</sup> Adsho isun: —Aton na dadpen tantiaquin Nuquin Papa badedquio tantiatiapimbo adquidën iquec. Nuquin Papa tantienquio yec abi yacno puduedtiapimbocquid iquendac. <sup>25</sup> Adquiechidi shëcuë pistsëcquid puduedte nidaidën capuquid dapan badedquio tantiatiapimbo iquec. Tantiamiac puduedec. Adembidi Nuquin Papan shubu abentsëquën puduedmianquid icsho aton na dadpen icquidën badedquio tantiatiapimbo icoaic. Aden aid tantiatiapimbocquid ambibi tantiacpadequid puduedte bunec —quepanëdash Esus.

<sup>26</sup> Aden chuisho tantiapec iccuededquido nadpanëdash: —¿Tsutsi Nuquin Papa yacno puduedquid icpec? —quepanëdash Esus caic.

<sup>27</sup> Adoaquien: —Matses ambibi tantiacpadequid puduedtiapimbocnoc Nuquin Papambien abi yacno yuedanquid matses tantiamendac — quepanëdash Esus.

<sup>28</sup> Adoaquien Petedo: —Mibëd icnu, quequin ëbëd icquidbëdta con natedi nianondambi, icbo —quepanëdash Esus caic.

<sup>29</sup> Adoaquien: —Abimbo mimbi chioque. Tantiata. Chuinu. Nuquin Papabëd shubu abentsëquën tabadaid chuibanuequin aton shubu icnuc aton chidobëdta aton bacuëbo nianacsho <sup>30</sup> ambi nianaidtedimbo tambanquin daëd uabanquin Nuquin Papan nëbi bëdambo icmeshumbi abi yacno nidacsho bëdamboshë icmiaid mibi iquendac —quepanëdash Esus Petedo chiec.

*Ëbi unës uaindac, quequin Esusën chiaid  
(Mat 20.17-19; Mad 10.32-34)*

<sup>31</sup> Adashic, abëd icquido uano buanash: —Edusaden yacno nuquibi nidoaic. Ambo choacsho Nuquin Papan ëbi chuiquin dada uamiampicpaden icsambocquid ëbi nabanendac. <sup>32</sup> Anoshon bedshun buanshun isadaidbon isadaidpembo ëbi menendac. Aden meniac bedshun ëbi mamënsumbededquimbi, icsamboen chuibededquimbi, dacuishtuabededquimbi, dacuesbededtsëcquien mëyanshun ëbi cuesten

dectanquin unës uaindac. <sup>33</sup> Adoaqui daëdec ushtanec uincuenendabi — quepanëdash Esus abëd icquido chiec.

<sup>34</sup> Aden abi unëste Esusën chuisho abëd icquidon bëdamboen tantienquoio yec tabadpanëdash.

*Bëshuaid bëdamiaid  
(Mat 20.29-34; Mad 10.46-52)*

<sup>35</sup> Adashic, Edusaden yacmi nidequi Edico caid shubu dadpen yacno anoentsëqui Esus chonobien podqued cuëmambi bëshuaid tsadpanëdash. Matses cuensho tantiash: “Mitsana bedtequid bec cho,” quepanëdash bëshuaid.

<sup>36</sup> Adec tsadquimbi matses dadpen cuen-cuensho tantiashun: —¿Atotsi quec cuen-cuene? —capanëdash. <sup>37</sup> Adoaquien choquid abentsëc: —Nasaded yacnoësh choquid Esus cuenec nec —quepanëdash.

<sup>38</sup> Adsho tantiashun bëshuaidën: —Dabid, tsusedpan mado mibi icquin ëbi tantiaquin nata —capanëdash Esus cuënquin.

<sup>39</sup> Adshobien: —Adec cuëdenquoio yec tsad —capanëdash choquidon.

Adoaquien bëdiactsëc cuëmboedëmbi comapenquien: —Tsusedpa Dabidën mado mibi icquin ëbi tantiaquin nashunta —caoapanëdash bëshuaidën.

<sup>40</sup> Adoac nidtuidshun Esusën: —Aidi bec cho —cac abi yacno bësho isun:

<sup>41</sup> —¿Atotsimbi mibi nashumpeba? —capanëdash Esusën bëshuaid chuiquin.

Adoaquien: —Bëshuaid nebique. Èbi bëucshune, Icbo —capanëdash.

<sup>42</sup> Adoaquien: —Mimbi tantiacpadomboen padpidemboen is —cac

<sup>43</sup> badedquoio isbenshun bëshuacboedën Esus tsibanquimbi Nuquin Papan naid chuibanquin isbanec onquec nidpanëdash. Aid bëdansho isun Esusbëd nidanequidotedishuntsen Nuquin Papan naid chuibededpanëdash.

## 19

*Saqueyo, ancanquidën utsin na bedtequid bedmianiaid dapa*

<sup>1</sup> Adec nidequi Edico caid yacno datambidanec Esus nidpanëdash. <sup>2</sup> Edico yacnocquid Saqueyo cuëmëdquid icpanëdash. Aidi ancanquidën utsin na bedtequid bedmianiaid dapa iquec aton na dadpen icquid icpanëdash.

<sup>3</sup> Adoaid icquimbi utsi, Esus cuenec, quesheo tantiash, ¿Mitsipadquidquoio Esus neque? Isnu, abibi quianec nidquimbi matses ënapen icquid dadpen Esus datsidadacsho bushcuactsëcquid icquin Esus Saqueyon isenquoio icpanëdash.

<sup>4</sup> Adash, Nëid podquedën Esus choec, quianec podqued cuëman nidquidën cuëte dapan dectatoash isec cuidin tsadpanëdash.

<sup>5</sup> Adec tsadnubien aid podquedënquoio choec nidtuidshun Saqueyo bushcuactsëcquid istuidshun Esusën: —Nëbi mibi yacno nuquibi tabadec nidnu. Baded bud —cac <sup>6</sup> Saqueyo badedi budpanëdash. Budanec nidquin Esus buanec aton shubuno choshon: —Mibi ëbëd icte bunsho isash bëdambo iquebique. Pudued —Saqueyon cac Esus puduedpanëdash.

<sup>7</sup> Adec puduedsho isash Esus tsibananquido: —Icsaquidën shubun Esus puduedosh —quecuededpanëdash.

<sup>8</sup> Adnubien, aton shubu nuntanuësh nidtoash Saqueyo: —Chuinu. Tania, Icbo. Nëbi con na mais uaquin aton na nibëdquid menenun nabono. Adoshombic, con matses: “Con na mimbi ampioc,” quesheo tantiashun ëmbi ampiaidbëdta daëd-daëdquiecnuc daëd uaquin menebanembi —quepanëdash Esus chiec.

<sup>9</sup> Adoaquien: —Chian anëdënquequid nësiatsemboedi aton tsusedpa Abadauan yanampicpaden tantiaquid Saqueyo yanacsho nëbi mënchicaid iquec. <sup>10</sup> Icsambocquid Saqueyo icbocpadquid nibënquin istuidshun

nësecanushe qeshun mënchicnuec chopobi —quepanëdash Esus Saqueyobëd icquido caic.

*Aton na bedtequid 10ted icquid meniaid*

<sup>11</sup> Aden Esusën chuisho tantiashun Edusaden yacno choash chuiquid dapa Esus yantsiash, quequin utsibon icsamboen tantiapanëdash. <sup>12</sup> Aden tantianubi tantiaquidquio icquin utsi chiacbimboen aido tantiamenuen Esusën nadopanëdash: —Chuiquid dapan mado: ‘Ënden caniaid iquebique. Nëbi ëbitsen chuiquid icnuec chuiquid dapa yacno nidaid utsi yacno nidendabi. Anoshon chuiquid icmiac nëmbo choaindabi,’ <sup>13</sup> qeshun ambi namiaido 10ted icquido chomeshun aton na bedtequid abentse-abentsen menebamposh. Aden menebanash: ‘Ëbi nidan ëmbi meneboed bëdamboen nabanquin daëd uata ma choshon dadpen bedoapanuna,’ quianec chuiquid ictiadquiocquid abi chuiquid dapa yacno nidposh.

<sup>14</sup> “Adec aid nidambic abi yacnocquidon abi chieshënquido nadposh: ‘Aidi ëbitedi chuiquid icmenushe qeshun chuiquid dapa yacno chuitanta,’ qeshun abëd icquido chuimenuen chuiquid dapa yacno nidmeposh.

<sup>15</sup> “Adoaqui, Chuiquid icnu, quianec nidboed chuiquid icmeposh. Aden chuiquid icmiac aton shubuno choash, Con na bedtequid ¿tedtsi daëd uapashba? abibi qeshun ambi meneboedo chomeposh.

<sup>16</sup> “Adoac bëyuc choquid: ‘Mitsana bedtequid abentsëc icboedi utsi 10ted icnuc daëd uaombi, icbo,’ queposh.

<sup>17</sup> “Adoaquien: ‘Ëmbi meneboed abentsëc bedshun bëdamboen mimbi daëd uaque. Nëbi mimbi daëd uaidtedquiobi shubu dadpen icquid 10ted uano-uanoecquido chuiquid icta,’ caposh abi chuiquidën.

<sup>18</sup> “Adnubien utsi: ‘Mitsana bedtequid abentsëc icboedi utsi 5ted daëd uapombi,’ queposh.

<sup>19</sup> “Adoaquien: ‘Mimbi daëd uaidtedquiobi shubu dadpen icquid 5ted uano-uanoecquido chuiquid icta,’ caposh abi chuiquidën.

<sup>20</sup> “Adnubien utsitsen: ‘Mimbi abentsëc menetsëcboed ëmbi dashcute cuëshaidën dayun uaboed në iquec, icbo. <sup>21</sup> Mitsana bedtequid mimbi tantiactedimbo daëd uatiapimbo ictsiabi, qeshun dayun uaombi. Utsin na utsin nitsinaidbidi bedbanquid mibi icsho isash chushcanushe quiash dacuëdec tsadteniobi,’ queposh.

<sup>22</sup> “Adoaquien: ‘Ëmbi chiaid niacquid mibi neyoc. Mimbi mua uaquin chiaidtedimbocsho mibi cuidtequid iquendac. ¿Utsin na utsin nitsinaidbidi bedbanquid mibi icsho isombi, ëbi chiec quecta icco? <sup>23</sup> ¿Aden tantiaquin atotsieshun ëmbi chiaid nanuequin ëmbi meneboed daëd uamequin utsi menenquio icco? Aden meniac daëd uashun bedtsenombi,’ queposh abi chuiquid.

<sup>24</sup> “Aden aton na daëd uaisa chuishumbic iccuededquido chuiquin: ‘Ëbi chieshënquin con na daëd uainquiocquin ambi dayun uaboed bedshun ëmbi abentsëc meniaid 10ted icnuc daëd uaboed meneta,’ caposh abi chuiquidën.

<sup>25</sup> “Adoaquien: ‘Aton na dadpen iqueque. Aid menenda, chuiquid,’ queposh iccuededquido.

<sup>26</sup> “Adoaquien: ‘Chuinu. Tantia. Ëmbi chiacpaden nabanquin daëd uacsho isun ëmbi meneboed daëd uaquin menembi. Ëmbi chiacpaden chieshquin daëd uainquiocsho isun ëmbi meneboed bedshunembi. <sup>27</sup> Adembidi ëbi chieshënec abi chuiquid dapa ëbi icmete bunesabo nëmbo bec cho. Bëshun ëmbi isnubi abitedi cuesuneta,’ caposh abi chuiquidën —quepanëdash Esus.

*Chuiquid dapabimboec yec Edusaden yacno Esus choaid  
(Mat 21.1-11; Mad 11.1-11; Uan 12.12-19)*

<sup>28</sup> Aden chuibanashic Esus Edusaden yacmi nidequi anoentsëqui choash nidtuidpanëdash. <sup>29</sup> Uano macuësh Odibos caid potsembo shubu daëdpactsëc icquid Bedpaque caid icnubi shubu daëdpactsëc icquid utsi Betania caid icpanëdash. Adec nidtuidash abëd icquid daëd caic: <sup>30</sup> —Nëid podquedën nidquimbi shubu daëdpactsëc yacno choshon cabayobitsecquidën bacuë caniaid catsadabicquid tënëshaid mimbi istuidendac. Aid istuidshun tënëshaid tëchicshun nëmbo bëta. <sup>31</sup> Aden chicsho isash: “¿Atotsi canun mimbi aid chicpe?” quepec. Adsho tantiashun: “Con Icbo bunaid nec,” quequin chuita —quepanëdash Esus.

<sup>32</sup> Adoac nidshun istuidtanquin <sup>33</sup> cabayobitsecquidëmpi tënëshaid tëchicsho isash: —¿Atotsi canuen aid tëchique? —capanëdash icbon.

<sup>34</sup> Adoaquien: —Con Icbo bunaid nec —queshun Esus yacno nimbanquin abi tënëshaidën buampanëdash Esusbëd icquidon.

<sup>35</sup> Aden bëshun, Chuiquid dapa Esus nepanui, quec onqueshun Esusbëd icquidon aton dashcute bëntsecquid chictanquin cabayobitsecquid capucshun Esus catsadumpanëdash. <sup>36</sup> Aden Esus catsadunash nidnubien iccuededquidontsen aton dashcute bëntsecquid chictanquin podqued ansambanec nidanepanëdash. Chuiquid dapa Esus nepanui, queshun aidontsen adopanëdash.

<sup>37</sup> Adec nidanec macuësh Odibos caid budtuidequi iccuededquidtedimbo bëdambo iquec comapenen Nuquin Papan nadatiambocquin naid ambi isboed naden chiec comapenec onquecuededpanëdash:

<sup>38</sup> —Nuquin Papan chomiaid ambi chuiquid dapa icmiaid ambi bëdambo icmiaidquiobidi nec. Nuquin Papa yacno abëdi bëdamboec tabadequi ic-saisatedi iquendac —quepanëdash iccuededquido comapenec cuëdcuededec.

<sup>39</sup> Adec cuëdcuededsho tantiashun padiseyobon: —Adec onquenda, quequin mibëd icquido chuita —capanëdash Esus chuiquin.

<sup>40</sup> Adoaquien: —Ëmbi naid chiec aidtedi cuëdcuededenquiocnoc cuënote podqued cuëman samëdquido onquianendac —quepanëdash Esus padiseyobo chiec.

<sup>41</sup> Adashic, adanec nidequi Edusaden anoentsëqui choquin anocquido abi tantiesabo tantiec shubiec Esus nadpanëdash: <sup>42</sup> —Ëbi bëdambo icmequid Esus nec, quec nëbi ëbi tantiaquid mibi ictsiandac. Tantiesa icquin mibi chuiquid mimbi nibënacpadquid mimbi istuidtiapimbo iquendac. <sup>43</sup> Yuecash choquin uimanëmënquidon mibi cuentiapimbocnoc tsicatebudcuenendac. <sup>44</sup> Aden mibi tsicatebudcuenshun min bacuëbobëdtabi nimbudquin mibi unës uashun nendac. Min shubutedi nibëdquiendac. Nuquin Papan chomiaid ëbi tantiesa icsho cuidtequido mibi nendac —quepanëdash Esus. Edusaden uano icnuc abi tantiesabo tantiec unësquio icnuc anocquido chiacbimboec adpanëdash.

*Nuquin Papa tabadte shubu uashunaid yacnoshon cuemiaid*

<sup>45</sup> Adashic, Edusaden yacno choash Nuquin Papa tabadte shubu uashunaidën puduedshun nuntanshunquio aton na bedtequid bednun menebanquido Esusën cuemepanëdash. <sup>46</sup> Cuemec: —Nuquin Papan chuipampid nad iqueque. Tantia: “Ëbi tabadte shubu uashunaid ëbi chiec onquianete shubu iquendac,” quepampic. Aden Nuquin Papan chuipampid icnubi ampequido tabadte shubu Nuquin Papa tabadte shubu uashunaid mibitedishun icmebededayoc —quepanëdash Esus aidtedi cuemec.



<sup>47</sup> Adoshombic, badiadquidën-badiadquidënquiec Nuquin Papa tabadte shubu uashunaidën puduedtenequin Nuquin Papan chiaid tantiamenuen Esusën chuibampanëdash. Anoshon chuibansho isun isadaidbo tsusiobon: ¿Mitsipadentsimbi Esus cunesunepaba? quequin caimbededpanëdash. <sup>48</sup> Aden caimbededquimbi Esusën chiaid tantianu quec dadpen Esus datsidadacsho isun ashunquo isadaidbon Esus cunesunemenuen bedtiapimbo icpanëdash.

## 20

*¿Tsundan chuibanta caid mibi ne?*

*(Mat 21.23-27; Mad 11.27-33)*

<sup>1</sup> Adashic, Nuquin Papa tabadte shubu uashunaidën puduedshun, Nuquin Papa yacno yuedanquid iquiec, quequin Esusën chuibanubien isadaidbo tsusiobo cho-chopanëdash. <sup>2</sup> Cho-choshon: —¿Tsundan chuibanta caid mibi neque? Tantianu. Èbitedi chui —capanëdash.

<sup>3</sup> Adoaquien: —Èmbia tantianu. Èbi chui. <sup>4</sup> ¿Nuquin Papan èmbi chiaid chuibanshun mentobanta caidta Uan icpondash? Padenquo mibi quenuc, ¿Matsesën nata caidta nepondash, quequina mimbi tantie? —quepanëdash Esus isadaidbo tsusiobo caic.

<sup>5</sup> Aden chiac isadaidbo tsusiobo onquecuededec nadpanëdash: —Nuquin Papan nata caid Uan pado nepondash, èbitedi qesho tantias Esus nadpendac. ¿Atotsieshun Uanën chuisho mibitedishun tantienquo icponda?

<sup>6</sup> Matsesën nata caid Uan pado niondash, èbitedi qesho tantias Esus iccuededquidon cuënoten nuquitedi se-sependac. Nuquin Papan chuimiaid, Uan icpondash, quequin iccuededquidon tantiec —quepanëdash isadaidbo tsusiobo.

<sup>7</sup> Adec onquecuededash: —¿Tsuntsin nata caid Uan pado icpondash? quequin tantiambo iccombi —quepanëdash tsusiobo.

<sup>8</sup> Adoaquien: —Mimbi chienquo yacpadembi èmbitsen èbi chuita caquid mibi chienquo icoaimbi —quepanëdash Esus.

*Neshcashunquidon icsambocquin naid*

*(Mat 21.33-44; Mad 12.1-11)*

<sup>9</sup> Aden isadaidbo tsusiobo chuishumbic, Utsi chuinu, quiacbimboen Esusën nadopanëdash: —Tied icbon aton tied nitsinshun aton tied cuësh-cuëshquin ambi èbi neshcashunta caidtedi istuidash tied icbo nidposh. Nidaid utsin yuec tabadshumbic: <sup>10</sup> ‘Tiedën caniquid ènden bacuëpash. Èbi neshcashunquidën musucaid con na bedmenu,’ qeshun ambi namiaid aton tied yacno icbon nidmeposh. Nidmiac ambi bedtan caid tied yacno chosho isun cuestanquin tiedën caniquid bacuë ambi musucaid menenquiocquin abi neshcashunquidon icbon chomiaid nidmeoaposh. <sup>11</sup> Adoshombic, icbon aton tied yacno ambi namiaid utsi nidmeoaposh. Aid chosho isun adembidi cuestanquin icsamboen nashun ambi musucaid menenquiocquin icbo neshcashunquidon aidtsen nidmeoaposh. <sup>12</sup> Adoshombic, ambi namiaid utsitsen icbon nidmeoaposh. Aidi chosho isun chiuë-chiuëpambocnoc cuestanquin tied tsitsuno icbo neshcashunquidon aidi netamposh.

<sup>13</sup> “Netamboedi nidtoanec icbo yacno choacsho isash: ‘¿Mitsipadentsimbi napeba? Con madombobi èbi cudasaid con tied yacno nidmembi. Aidi con tied yacno chosho bëdamboen ispec,’ quequin aton mado nidmeposh.

<sup>14</sup> “Aden nidmiac aton mado aton papan tied yacno chosho isash icbo neshcashunquido nadposh: ‘Tied icbo unësan aton natedi bedquid aton mado nepec. Aden bednushe aidi cunesunenuna. <sup>15</sup> Aden cunesunian icbo unësan

aton natedi nuquin na ictsiandac, quecuededshun tied tsitsuno icbon mado buanshun icbo neshcashunquidon cuesuneposh —quequin chiashic Esus:

“ ‘Min mado cuesuniosh,’ quequin utsin chiac ¿atotsi tied icbon napec? <sup>16</sup> Naden napec. Abibi aton tied yacno nidshun abi neshcashunquido cuesuneshun aton tied ambi cuësh-cuëshaid abi neshcashunquid utsibo aton tied yacno tabadmendac —quepanëdash Esus.

Adsho tantiash: —Adoenquo icpashun —quepanëdash iccuededquido. <sup>17</sup> Adoaquien iccuededquido bëisequi Esus nadpanëdash: —¿Nuquin Papan dada uamiaidën naden chienquioda icpampic? Ai, aidën chuipampid nad iquec: “Shubu uanuequidën isuidaid buintad utsin ambia nitsinaid icposh.” <sup>18</sup> Buintad sec uebudec podquëd-podquëdendac. Adembidi buintad uebudquin matses tish-tishendac. Adembidi, abi yacno puduedmianquid tantiauidquid Nuquin Papan cuëshëdmiac comapenen cuidte yacno tabadendac —quepanëdash Esus.

<sup>19</sup> Aden Esusën chuisho tantiash: —Nuqui naid chiacimboen chiec Esus niosh —quiash isadaidbo tsusiobo Esus bedte buncuededquin iccuededquid dadpen icnuc Esus bedtiapimbo icpanëdash.

*Sesadën shocoshëmpi neque. Mene, quequin chiaid*  
(*Mat 21.45-46; 22.15-22; Mad 12.12-17*)

<sup>20</sup> Adec Esus bedte bunquin isadaidbo tsusiobon ambi Esus ista caido Esus yacno nidmepanëdash. Ambi ista caido, Bëdambocquid nebi, quequin ismiacimboecquid icsho Esusën chuibanacno tsusiobon nidmepanëdash. Esus yacno nidshun ëmbi ista caidon chuimiac Esusën icsamboen chuitsiash. Aden chuisho isadaidpembo ancaquidën Esus bedpashun, quequin tantiakin nidmepanëdash. <sup>21</sup> Aden nidmiac choash Esus ista caid abentsëc: —Mimbi tantiamequin chuibanaid bëdambo iquec, quequin tantiembi, Abitedi Nuquin Papan chiaid abimbo chuibanquid mibi nec. <sup>22</sup> Adquid mibi icquin ëbi chui. Tantanu. ¿Ancanquid Sesad cuëmëdquid isadaidpembo icquin ambi piucquid shocoshëmpi bec cho caid isadaidbon menetiadquidida nepec? —quepanëdash isadaidbo tsusiobon ista caid Esus caic.

<sup>23</sup> Aden chuisho tantiashun choboedën icsamboen tantiaid tantiaquin Esusën nadopanëdash: <sup>24</sup> —Piucquid shocoshëmpi ancanquidën bec cho caid sananquin abuc cadota —cac sananquin abuc cadosho isash: —¿Tsuntsin podo bitsi dada uaid aidën icpec? —quepanëdash Esus.

<sup>25</sup> Adoaquien: —Ancanquid Sesadën na nec —quepanëdash tsusiobon ista quequin chomiaid.

Adoaquien: —Ancanquid, Bec cho, qesho meneta. Nuquin Papan naden nata cac adobanta —capanëdash Esusën. <sup>26</sup> Aden chiac, Bëdamboen tantiaquidbimboec onquec, quequin tantiaquin icsamboen chuimetiapimbo yec tsusiobon chomiaid otacquo tabadcuededpanëdash.

*Uincuen uaid chido bedesa nec, quequin chiaid*  
(*Mat 22.23-33; Mad 12.18-27*)

<sup>27</sup> Adashic, saduseyobo caido yec <sup>28</sup> unësaid uincuen uate nibëdec quequin chuiquido Esus yacno chopanëdash. Aido choash: —Unësaidën chido bedshun aidën tishmiaid unësaidën bacuëbobimboecquid iquendac, quequin Moisesën dada uapampic. <sup>29</sup> Aden Moisesën dada uaid icnuc dada 7ted iccuededposh. Aided dada icnuc bëyuc tishaidën aton chido bedshun bacuë tishmiabi yec unësposh. <sup>30</sup> Aton buchi unësan aidën chido bedash adecbidi bacuë tishmiabi yec unësoaposh aton utsi. <sup>31</sup> Adembidi, bëyuc tishaid tsibanquidën-tsibanquidënquien chido abentsëqui bedto-bedtoec bacuë tishmiabi yec unësbuneposh. <sup>32</sup> Yucash chidotsen unësoaposh. <sup>33</sup> Adec

chido abentsëcshun bënë dadpen icboedi uincuen uate ushë icnuc ¿mitsicquid chidon bënë icpeque? Ēbi chui. Tantuanu —quepanëdash saduseyobo Esus caic.

<sup>34</sup> Adoaquien: —Nidaidënshun dadan aton chido bedec. Adecbidi, Min bënëbëd nidta, quequin aton papan chiac aton champi aton bënëbëd nidec.

<sup>35</sup> Uincuen uate ushë choan Nuquin Papan bëdamboen isaïdo abëdi tabadquin chido bedenquio iquendac. Adembidi, aton champi menenquio aton papan iquendac.

<sup>36</sup> Adecbidi, Nuquin Papan uaido mayan bëdabo unësesa yacpadquiequi Nuquin Papan uincuen uatequid unësenquio iquendac. Nuquin Papan uincuen uatequido aton bacuëbo nendac.

<sup>37</sup> Adembidi chuïnu. Tantia. Cuëtempi nëdënquiacbimboecquid isun Moisesën dada uapampid nec. Cuëte nëdënquiacbimboecsho isun Nuquin Papa chuïquin nadopampic: “Tsusedpa Abadauanën papa cain cuënaïd mibi nec. Adecbidi tsusedpa Isaquën papa cain cuënaïd mibi neoaic. Adecbidi tsusedpa Acobon papa cain cuënaïd mibi nec,” quequin Moisesën chuïpampic.

<sup>38</sup> Moisesën tsusedpabo ambi chuïboed ënden unësampidën nami chodquïaidën papa cain Nuquin Papa cuëntiapimbo iquec. Aton nami chodquïash abi tantiaquidquio icquin tantiec tsadquïdën papa cain Nuquin Papa cuënec —quepanëdash Esus saduseyobo chiec.

<sup>39</sup> Aden Esusën chuïsho tantïash Nuquin Papan naden nata quequin chïaid tantïamequid padiseyobo utsi-utsiec nadpanëdash: —Bëdamboen mimbi chuïbanoc —quepanëdash Esus chiec.

<sup>40</sup> Aden Esusën chuïsho tantïashun Esus chuïmetiapimbo utsibo icpanëdash.

*¿Tsuntsin mado Quidistu nepec? quïaid*

*(Mat 22.41-46; Mad 12.35-37)*

<sup>41</sup> Aden utsibon abi icsamboen chuïmetiapimbo icsho isun Esusën nadopanëdash: —Ēbi abia yampid icsho ¿mitsipadentsi tantiaquin tsusedpa, Dabidën mado Quidistu caïd nec, quequin matsesën chuïpec?

<sup>42</sup> Dabidën ambibi Sadmo caïd dada uaquin naden chuïpampic: “Icbo utsi yec con mado mibi chiembique. Tantia, quequin chiec icbo dapa nadpampic:

‘Ēquë con dayun abiucquio cainec tsadec cho

<sup>43</sup> ma mibi chïeshëñquïdtedi mimbi namïaid ma icpanu,’ ” quequin Nuquin Papan Esus chïaid Moisesën dada uapampid nec.

<sup>44</sup> Aden Dabid padon dada uaquin ¿mitsipadomboentsibi con icbo cashumbi con mado ëbi caoapampic Dabidën? —quepanëdash Esus abi chïeshëñquïdo caic.

*Naden nata quequin chïaid tantïamequidpadquïd iquenda, quequin chïaid*

*(Mat 23.1-36; Mad 12.38-40; Duc 11.37-54)*

<sup>45</sup> Aden chuïshun iccuededquïdon tantïanubi abëd icquïdo Esusën nadopanëdash: <sup>46</sup> —Nuquin Papan naden nata quequin chïaid tantïamequidpadquïd iquenda. Aïdo ancanquïdbimboecsho utsibon ispashuni quequin nabanesa dasiuidacpadec dashcute ënapen icquïd dasiuidcuededpec. Adomboembidi tantiec matses dadpen iccuededacno nidash capuequi, Ēbi bëquedquïdon ëbi chuïquïd dapabimboecsho isash onquequin chuïpashuni quec tabadec. Adomboembidi tantiec Nuquin Papan chïaid chuïbante shubun puduedash, Tsusio dapabimboecsho ispashuni, quec tsusiobo tsadacno tsadtenec. Adomboembidi tantiec, Pec cho cac chosho isash chuïquïd dapabimboecsho ispashuni, quec tsusiobo tsadacno tsadtenec. Adquïdpadquïd iquenda.

<sup>47</sup> Aïdon bëdamboen nabanachimboen nïanten natedi bedbanec. Aïdombidi Nuquin Papa abimbo tantïacbimboec yuen chiec onquec. Aden bëdamboen

nabanacimboecquido Nuquin Papan comapenen cuidendac. Adoesa bëdiactsëc cuidendac —quepanëdash Esus abëd icquido chiec.

## 21

*Nianten piucquid shocoshëmpi meniaid*  
(*Mad 12.41-44*)

<sup>1</sup> Adashic, Nuquin Papa tabadte shubu uashunaid yacno tabadtuidash tsadquin Esusën isbampanëdash. Ambi isaido Nuquin Papa tabadte shubu nacnemetec cuidnu, quequin menequin aid shubun shocosh tabëcaidën aton na bedtequid utsin-utsinquien sandobededpanëdash. Aton na bedtequid dadpen icquidon dadpen sandobededsho isquimbi <sup>2</sup> nianten aton na nibëdquidëmbi aton na bedtequid shocosh daëd ictsëcquid sandosho ispanëdash. <sup>3-4</sup> Adosho isash: —Chuinu. Tantia. Nianten aton na bedtequid abitedimbo sandoposh. Adosho, Dadpen menequid nec, quequin Nuquin Papan niantec isec. Utsibon aton na dadpen abi icnubi dadpen menesho, Daëdpactsëc menequido nec, quequin Nuquin Papan aido isoaic —quepanëdash Esus.

*Abitedi naimbudte ushë choec quequin chuite*  
(*Mat 24.1-35, 42-44; Mad 13.1-37*)

<sup>5</sup> Adashic, Nuquin Papa tabadte shubu uashunaidbëdtabi matsesën dectanaid didiquesho isec: —Nuquin Papa tabadte shubu bëdaidquio iquec —quepanëdash utsibo.

<sup>6</sup> Adoaquien: —Mimbi nëbi isaid yuecash nidbëdquiendac. Matses utsibon nëid shubutedi chic-chicbudendac —quepanëdash Esus.

<sup>7</sup> Adoaquien: —¿Mitsipadën Nuquin Papa tabadte shubu uashunaid chic-chicquin tauapec? ¿Aid ushë anoentsëqui yanuc mitsipadquid ismiantec icpeque? Tantianu. Chui —quepanëdash utsibo.

<sup>8</sup> Adoaquien: —Cho-choshon muaquin chuisho tantienquiocta. Adquid cho-choash: “Nuquin Papan Chomiaid Quidistu nebique. Èbëd iquec cho,” queded-quededendac. Aden chuiquid tsibanenda. <sup>9</sup> Adecbidi: “Cuesnancuededec,” qesho tantiashe dacuëndenda. Nuquin Papan chiampicpadequi cuesnancuededteba iquendac. Aid icnubi abitedi naimbudte ushë badedquio choenquio iquendac —quepanëdash Esus.

<sup>10</sup> Aden chiequi abi onquebudec: —Adecbidi, abi ancaquid dapan nidmiac nidaid utsin icquidobëd cuesnancuededendac. <sup>11</sup> Adecbidi, nidaid utsi-utsiec yacno canchednuec ishucud-ishcudendac. Adecbidi, utsi-utsiec yacno bunquioyte iquendac. Adecbidi, utsi-utsiec yacno daicsabudnete iquendac. Adecbidi, mibi dacuëdmetequid iquendac. Adecbidi, mimbi isacmaid abucueësh natiambo icsho mimbi isbededendac.

<sup>12</sup> “Aidtedi choabicnuc ëbi tantiaquid utsi-utsien bedshun mëyanendac. Adobanshumbic, Icsamboen naquid nec, quequin muaquin icsaquid cuidnuequid yacno mibi buanendac. Utsi-utsien ancanquid yacno buanac <sup>13</sup> aidotsen tantiaquid yantsiashe qeshun ëbi chuibanta. <sup>14</sup> Aden buanaqui, çatotsimbi ancanquid cape? quequin tantiec tsadenda. <sup>15</sup> Nuquin Papan Mayanën tantiamiacpadomboen mimbi chuibanendac. Adoac, Icsambocquid mibi nec, quetiapimbo mibi chieshënquido iquendac. <sup>16</sup> Adembidi, Nuquin Papan chiaid tantiesan min shubun icquidën mibi bedshun cuidnuequid yacno buanash: ‘Cuidquin cuesuneta,’ quependac. Aton papambi adotsiashe. Animbi aton mado adembidi adotsiashe. Utsi aton buchimbi adoatsiashe. Utsi aton chuchumbi adoatsiashe. Utsin abëdtan isedquidëmbi adoatsiashe. <sup>17</sup> Èbi tantiaquid chieshënquid dadpen iquendac. <sup>18-19</sup> Aden

nabanquin mihi cuesunemenu, cac chieshenquo yec, Esus tantiaquid nebi, quequid icta. Adquid iquec unēsash ēnēdenquo yec Nuquin Papabēd mihi tabadendac.

<sup>20</sup> “Adecbidi shubu dadpen icquid Edusaden caid yacno cuesanquid dadpen cho-choshon tsicatebudsho isash, Edusaden yacno naimbudte ushē choec, quequin mimbi tantierendac. <sup>21</sup> Aden tantiec ma Cadidia yacnocquido macuēsh dapa yacno cuempanuna. Adecbidi, Edusaden yanocquido ma auēshquo cuempanuna. Adecbidi, dēuequido Edusaden yacno ma nidenquiocpanuna. <sup>22</sup> Aid ushē icnuc Nuquin Papan chiacpadomboen cuidtequid iquendac. <sup>23</sup> Aid ushē chonoc matses utsibon Edusaden yacno tsicatebudac pete naimbudnuc bacuē usunquidobēd bacuē chishmequido mēyadec natiaquiendac. Edusaden yacnocquido abi tantiesabo icsho Nuquin Papan natiambocquin cuidte iquendac. <sup>24</sup> Edusaden yacnocquid utsi-utsien chēshten cuesendac. Utsi-utsien bedshun nidaid utsi yacno buanshun matses utsibon yuatequido iquendac. Isadaidpembo Edusaden yacno tsicateboedo Edusaden yacno tabadendac. Nuquin Papa, Chēn, quenquiocnoc adec tabadendac. Chēn, quenuc nidendac.

<sup>25</sup> “Adec Nuquin Papa, Chēn, quian badiadēn ushē, inchēshten ushē uispa chedo aidtedi ambi nadatiambocquin naid ismiantequid iquendac. Aid ismiente icsho isash, Uinsadpambo iquec, quec comapenec dacuēdec matsestedi tabadcuededendac. Acte natiambo chēuēdsho isash adquiecbidi comapenec dacuēdec matsestedi tabadcuededoaindac. <sup>26</sup> Adecbidi, uispa utsi-utsiec paēdted-paēdtednubi utsi-utsiec tididiquendac. Adsho isash matses dacuēdec padishendac. <sup>27</sup> Adnubini Nuquin Papan chomiaid matsesaid ēbi dasiuidaid bēchomauanquiec ushē chēnquiacbimboec uēshēmbō yec nadatiambocquin nabanquidquo abu ushun ēbi budsho matsestedishun isbedendac. <sup>28</sup> Natiambocquin naid tauadoacsho isun, Nuquin Papa yacno ēbi yuedte ushē chote anoentsēqui yanec, quequin bēdamocquin abuc isteneta —quepanēdash Esus.

<sup>29</sup> Aden chuishumbic ambi chuiboed ushē chote tantiamenuen nadopanēdash: <sup>30</sup> —Cuētempi bacuēacsho isash, Ēnden suc seccuduquiac nēbi seta taēc, quequin matsesēn tantiec. <sup>31</sup> Adembidi ěmbi chuiboed icsho isun, Nuquin Papabēd tabadte ushē choec, quequin mimbi tantiec. <sup>32</sup> Abimbo chiembique. Tantia. ěmbi chuibamboed naimbudabicnuc con tan matses isadaidbō naimēdbudenquo iquendac. <sup>33</sup> Abubēdta naimbudtequid nidaid nendac. ěmbi chiaid abimbo iquendac.

<sup>34-35</sup> “Adembidi chuinu. Tantiata. Nidaidēn capuquidēn, Nēbi ēbi sec, quequin tantienquo yec capusho badedquo siac cuentiapimbo iquec. Adembidi, Natiante ushē choec, quequin tantienquo yec chieshquin badiadquidēn-badiadquidēnquien paēmbocquid actenepec. Adecbidi aton na bednuec abi buntequiduidi tantiec tabadpec. Adobanubien aid ushē choendac. ¿Matses-  
tedi cuidte ushē choenda ictic? Ai, aid ushē choendac, quequin caimbudec bēdamboec tabadta. <sup>36</sup> Ēnenquiocquin aid ushē chote caimbunec tabadquin Nuquin Papa naden chuidoneta. Chieshmane mihi tantiaquidquo ēbi icme, Papa. Adembidi natiambocquin cuidte ushē chonoshe queshun ēbi mēnchicta, Papa. Aid ushē chonoc ēbi bedshun mimbi chomiac matsesaidēn dayun tsadquidquo ēbi icmeta, Papa, quec onquedeneta —capanēdash Esusēn.

<sup>37</sup> Aden chuishumbic, badiadquidēn-badiadquidēnquien Nuquin Papa tabadte shubu uashunaid yacno nidshun matses tantiamenuen Esusēn chuided-chuidedpanēdash. Adecbidi inchēshtequidēn-inchēshtequidēnquiec

macuësh Odibos caid yacno nidash tabadtenepanëdash. <sup>38</sup> Adembidi, badiadquidën-badiadquidënquien Esusën chuibansho tantianuequido Nuquin Papa tabadte shubu uashunaid yacno choded-chodedpanëdash.

## 22

### *Esus bedmenu, quequidquio Udas*

*(Mat 26.1-5, 14-16; Mad 14.1-2, 10-11; Uan 11.45-53)*

<sup>1</sup> Adashic, nami uabicquid pete tantiate ushë, Pascuas caid, anoentsëqui yampanëdash. <sup>2</sup> Aid ushë choabicnuc isadaidbo tsusiobobëd Nuquin Papan naden nata quequin chiaid utsibo tantiamequido iccuededtenequin, ¿Mitsipaden Esus bedshun cuesuneeque? Isnu, quequin isted-istedpanëdash. Aden isted-istedtanquin Esus tantiec datsidquido dadpen icsho isash dacuëdquin Esus bedenquio icpanëdash. <sup>3</sup> Adnubien Udas cashumbic Iscadiote caid Esusbëd icquid dapuedeshun Satanasën tantiamiac <sup>4</sup> Esus chieshëquid yampanëdash. Adquid yanash padiseyobo tsusiobo yec isadaidbo tsusio utsibo yec Nuquin Papa tabadte shubu uashunaid isquido yec quec Esus chieshëquid utsibo iquec quianec aido yacno Udas choash, Esus bedmete bunebi, quequin chuipanëdash. <sup>5</sup> Aden chiac isadaidbo tsusiobo bëdambo iquebi quetanquin: —Esus bedmiacsho mibi piucquid menenu —capanëdash Udas chuiquin. <sup>6</sup> Adoquien: —Adonuna —quianec Esus yacno nidoash abëd capuquimbi Esus tantiec datsidquido nibëdacnoshon abi chieshëquido, isadaidbo tsusiobo, Esus bedmembi, quequin isted-istedpanëdash Udasën.

### *Ënquin nidaidëshun Esusën pebanaid*

*(Mat 26.17-29; Mad 14.12-25; Uan 13.21-30; 1Cod 11.23-26)*

<sup>7</sup> Adnubien, nami uabicquid pete tantiate ushë chopanëdash. Aid ushën isadaidbon bëyuc tishaid bacuë unës uanushe qeshun obeca bacuëded cuesuneshun shubu shëcuë ëcnoshcaid isun unës uainquiocquin Nuquin Papan uaido mayan bëdabon matanampid tantiate ushë icpanëdash. <sup>8</sup> Aid ushë chonoc Uambëdta Petedo chuiquin: —Matante ushë tantianuequin obeca bacuë cuesuniaid penun nacnenta —capanëdash Esusën.

<sup>9</sup> Adoquien: —¿Mitsishumbimbi aid nacnempe? —quepanëdash Uambëd Petedo.

<sup>10</sup> Adoquien: —Nëbi shubu daëdpactsëc yacno nidshun matsun acte bëquid dada mimbi bëquedendac. Aid bëquedshun tsibananec shubun aid puduedacno nidshun <sup>11</sup> shubun puduedabi naden shubu icbo chuita: ¿Mitsishumbimbi matante ushë tantiaquin ëbëd icquidobëdtan pepe? quiosh Esus, quequin chuita. <sup>12</sup> Aden chiac abuc dectatoshon abuc quënëcquid mibi aidëmbi ismendac. Ashunquio penun nacnenta —capanëdash Esusën.

<sup>13</sup> Aden Esusën chiac nidaneshun Esusën chiacpadomboen istuidshun matamepamid ushë tantiaquin penun Uambëdtambi Petedon nacnempañdash.

<sup>14</sup> Adashic, inchëshën choash abëd icquidobëd pete sante cuate dayun uequi Esus: <sup>15</sup> —Ëbi mëyante yanabicnuc bëyuc tishaid cuesunianquidën cuesunenquiocquin matanampid tantiaquin pec mibëdi tabadiadquio yanobi. <sup>16</sup> Matanampid tantiaquin obeca cuesuneshun nuqui pebocpadomboen mibëdtambi nidaidëshun padpiden penquio iquendambi. Matses icsaquid icsho cuidnushe qeshun obecaded cuesuniaidpadquiocquid yanshun Nuquin Papa yacno choash tabadquidobëdtambi ashunquio pendambi —quepanëdash Esus.

<sup>17</sup> Adoshombic dëshote sananec Nuquin Papa chiec onqueshun actanquin abëdicquido menec: —Në, aniactse-aniactsen acban mibitedishun. <sup>18</sup> Tiedën caniquid ënë nidaidënsun padpiden aquenquio iquendambi. Nuquin Papa yacno choash tabadquidobëdtambi ashunquio aquendambi —quepanëdash Esus.

<sup>19</sup> Adoshombic, pete bedshun Nuquin Papa chiec onqueshun cuësh-cuështanquin menebanquin: —Mibi icsaid bedshunacsho ëbided cuidquin mëyanquin cunesuniaid tantiaquin pebeded —capanëdash Esusën.

<sup>20</sup> Adoshombic pete utsi petanquin dëshoten sicaid cushtoshon menec: —Ënden, Icsambocquin naombi, qeshun obecaded cunesunemenuen isadaidbon menedeniac. Aden cunesuniaidën intac siquec unëso isun, Obeca cunesuneboed ëbi icsaquid icsho cuidnushe qeshun cuidtequid nec, quiampicpaden abi chiec. Padnuen nëbi unës uashun siac aton intac siquec matses icsaid bedshunash Esused cuidadac, quequin tantiatequidquio nendac. <sup>21</sup> Ëbi chieshëncquido ëbi bedmenuequin chuiquid pete sante dayun ëbëdi uec. <sup>22</sup> Nuquin Papan chiampicpaden ëbi matsesacsho unës uaid iquendac. Ëbi chieshëncquido bedmenuequin chuiquid comapenen cuidte iquendac —quepanëdash Esus.

<sup>23</sup> Aden Esusën chuisho tantiash abëdicquido: —¿Midacquidien capec? —quecuededpanëdash.

<sup>24</sup> Adashic: —Doseded nuqui iquec. ¿Tsudain chuiquid icpec? quequin utsibon ispec —quepanëdash Esusbëdicquido.

Aden chuitanec, Chuiquid nec, quequin utsibon ëbi ispec, Esusbëdic abitedi nëishash comapenec chushcanampanëdash. <sup>25</sup> Adec chushcanansho tantiash Esus nadpanëdash: —Isadaidpembo ancaquidën comapenen aton matses namebanquin daëdpactsëc menebanec. Aden meneshun, Ëmbi nami-aido bëdambo icmequid nebi, quequin muaquin chiec. <sup>26</sup> Mibitedi adquid iquenda. Nadquidquio icta. Chuiquid nebi, quec tsyuec caniquidbimboecquid icta. Chuiquid icquin utsi namiacpaden nabanta. <sup>27</sup> Abi pemequid abi nashunquid nec. Adembidi pec tsadquid utsibo chuiquid nec, quequin utsibon ispec. Aden tantienda. Nëbi mibëdi pec tsadequi mibi nashunquid nebi. <sup>28</sup> Ëbi chieshëncquido icnuc ëbi nianesa <sup>29</sup> icsho con Pan ëbi chuiquid icmiacpadquid chuiquid mibitedi icmendambi. <sup>30</sup> Aden chuiquid icmiac ëbëdicquid icquin ëbëdtambi peshun aquec mibitedi tabadendac. Chuiquid icquin abuc tsadte icquidën tsadquin isadaidbon naid bëdabëdta ambi naid icsa cuidte ëbëdtambi mimbi chuibanendac —quepanëdash Esus abëdicquido caic.

*Esus ëmbi isacmaid nec, quequin Petedon chiaid  
(Mat 26.31-35; Mad 14.27-31; Uan 13.36-38)*

<sup>31</sup> Aden chuishumbic Esusën nadopanëdash: —Mibi chuinu. Bëdamboen tantia, Simon. Mibitedi Satanasën yuatiadquio iquec. Aden yuanuequin piacbo macuesquin nainshun bitsi secacimboen mëyanttanquin ëbëdicboedi mibi cuëshëdmetiadquio iquec. <sup>32</sup> Aden mibi Satanasën yuatiadquio iquec, quequin tantiaquin Nuquin Papa naden chiombi. Simon ëbëdicquidquio iqueque. Yuadnushe qeshun Satanasën niac-niacmete chiaid Petedo tantienquio icmeta, Papa, quequin chiombi. Adec ëbëdicboedi cuëshëdtsembosh choashun comapenen ëbi tantiaquin ëbëdicquid utsibo adomboembidi comapenen ëbi tantiameta, Simon —capanëdash Esusën Petedo chuiquin.

<sup>33</sup> Adoaquien: —Mibi caic, Quënën nauednu, quenuc mibëdi nauedadebi. Adecbidi mibi caic, Unës uanu, quenuc adecbidi mibëdi unës uadebi, Icbo — quepanëdash Petedo Esus caic.

<sup>34</sup> Adoaquien: —Chuinu. Tantiata, Petedo. Cachina bënë cuëdanabicnuc nëid inchëshëmbi, Esus ëmbi isacmaid nec, mibi queded-quededendac — quepanëdash Esus.

*Buanenda, queboedëmbi, Buanta, quequin chiaid*

<sup>35</sup> Aden Petedo chuishumbic abëd icquidtedi chuiquin: —Mitsana bedtequid buanenquio yec shictoachte buanenquio yec dashcute utsi buanenquio yec quec nidaneta, ëmbi cac nidash ¿mibitedi bunecta tabado? —capanëdash Esusën.

Adoaquien: —Padenquio —quepanëdash abëd icquido.

<sup>36</sup> Adoaquien: —Ënden adquid buanenda, queboedi, Ëbi nibëdnuc mitsana bedtequid shictoachtebëdtabi buanta. Chështe bednu, queshun mitsana bedtequid nibëdnuc min dashcute abentsëc menequin chështe bedshun adembidi buanta, caimbi nëbi. <sup>37</sup> Nuquin Papan ëbi chuiquin dada uamiampid nad iqueque. Tantia. Chuinu: “Icsambocquidbëdta unës uaindac,” quepampic. Aden Nuquin Papan ëbi chuiquin dada uamiampicpadomboembi nëbimbobi naimbudembi —quepanëdash Esus.

<sup>38</sup> Adoaquien Esusën chuiboed tantienquio yec abëd icquido: —Në, chështe daëd iqueque. Is, Icbo —quepanëdash.

Aden abëd icquidon tantienquiocsho isash: —Ai, padi —quepanëdash Esus.

*Macuësh Odibos caid yacnoesh Esusën Nuquin Papa chiaid  
(Mat 26.36-46; Mad 14.32-42)*

<sup>39</sup> Adashic, Edusaden caid yacnoësh macuësh Odibos caid yacno abi nidteniacpadën nidnuc abëd icquidon tsibanampanëdash. <sup>40</sup> Adec nidequi abi tabadteniacno choshon Esusën: —Chieshëmënnquidën ëbi namete bunacpaden natiapimbocquid ëbi icme, Papa, quequin Nuquin Papa chuideneta —capanëdash abëd icquido chuiquin. <sup>41</sup> Aden chiashic abiuiddtsëqui uano nidash danëshën nidaidën sebudash Nuquin Papa chiec nadec yuec Esus onquetan-onquetampanëdash: <sup>42</sup> —Mëyanquin mibi unës uanu, ëbi chieshënquidon casho tantiash bunenquio yec, Adoenda, quepatsiac mibi Papa. Adoshombic mibi bunacpadomboen nameta, Papa —capanëdash Esusën Nuquin Papa chuiquin. <sup>43</sup> Aden Esusën badedbadedquien chuishobi Nuquin Papan uaid mayan bëda choshon Esus chieshtomenquio icpanëdash. <sup>44</sup> Aden uidën uaqui adec uëshquec Nuquin Papa chuiquiequi ichacbëd intacash nidaidën siquepanëdash.

<sup>45</sup> Aden Nuquin Papa chiashic nidtoash abëd icquido yacno choaquimbi ambi chuisho tantiaboed tantiec uimabudash ushec uesho istuidshun: <sup>46</sup> —¿Atotsi quiash ushe? Nidtoashon ëbi chieshënquidën nametiadquio yacpaden natiapimbocquid ëbi icmeta, Papa, quequin adenuidi Nuquin Papa chuideneta —capanëdash Esusën abëd icquido chuiquin.

*Esus bedaid  
(Mat 26.47-56; Mad 14.43-50; Uan 18.2-11)*

<sup>47</sup> Adec Esus onquenubien Esusbëd icboedi, Esus bedmenu, quec bëyucanec matses dadpen bëec Udas chopanëdash. Adec choquimbi abi tanchoccanuesho isash: <sup>48</sup> —¿Ëbi matsesaid icsho bedmenuen tanchoccaquinda ëbi chieshënquido isme, Udas? —quepanëdash Esus.



<sup>49</sup> Aden Udasën nac Esus bednuesho isash Esusbëd icquido: —¿Chochoquido nuquida cuesten cuespe? —quec <sup>50</sup> onquetanquin abentsëcshun isadaidbo tsusio dapan yuan pabiate opioc pateshunepanëdash.

<sup>51</sup> Adosho isash: —Padi. Chën. Adoenda—quetanquin Esusën tsusio dapan yuan pabiate patiacno mishquin bëdamepanëdash.

<sup>52</sup> Adoshombic, isadaidbo tsusio dapabo Nuquin Papa tabadte shubu uashunaid isquido tsusiobobëdta tsusio utsibo caic: —¿Matses cuëshëdmequid nec, queshunda utsin-utsinquien chështe sananubi utsin-utsinquien cueste sananec cho-chopec? <sup>53</sup> Badiadquidën-badiadquidënquiec Nuquin Papa tabadte shubu uashunaid yacno icsho ëbi bedenquio mimbi icpoc. Mimbi ëbi bedte ushë nëidquiobi nendac. Satanasën tantiamiacpaden utsibo ismenquiocquin inchëshëmbi mimbi icsa uanuen ëbi bedendac—quepanëdash Esus.

*Ëmbi isacmaid nec, Petedo quiaid*

*(Mat 26.57-58, 69-75; Mad 14.53-54, 66-72; Uan 18.12-18, 25-27)*

<sup>54</sup> Aden mimbi icsa uanuen naindac, quequin Esusën chiacsho bedanquin isadaidbo tsusio dapan shubu yacno Esus buanubi Petedo uano tsyuec chopanëdash. <sup>55</sup> Adec choec umanuc cuëte dëtsiadaoaid cuëc utsibo tabadacno Petedo cuëte cuëc tsadpanëdash. <sup>56</sup> Ambo Petedo tsadsho isash tsusion yuaid chido anoentsëqui choshon bëdamboen isec: —Nëid bëboedbëd icboedi nec—quepanëdash.

<sup>57</sup> Adoaquien: —Bëboed ëmbi isacmaidquio nec—quepanëdash Petedo.

<sup>58</sup> Adashic, yuecpactsëcshun Petedo isec utsitsen: —Ma mibi bëboedbëd icquid neyoc—quepanëdash.

Adoaquien: —Aidbëd iquenquio iccobi—quepanëdash Petedo.

<sup>59</sup> Adashic yuec-yuecpactsëc ictanec utsitsen: —Nëid Cadidia yacnoshon tishaid iquec. Ma bëboedbëd icquidi neyoc—queoapanëdash.

<sup>60</sup> Adoaquien: —Mimbi chiaidbëd icquidpenquio nebi—quepanëdash Petedo. Aden chuinubien cachina bënë cuëdampanëdash. <sup>61</sup> Adec cuëdanubi aton Icbon bidiadshun Petedo bëspanëdash. Adosho isun: “Nëbi, cachina bënë cuëdanabicnuc, ëmbi isacmaid nec, quequin tedesteden mimbi chiendac,” quequin aton Icbon chuiboed tantias <sup>62</sup> unësquio yec umanuc nidash Petedo shubiquiopanëdash.

*Esus sondadon mamënshunaid*

*(Mat 26.67-68; Mad 14.65)*

<sup>63</sup> Adshumbic Esus cuenushe qeshun abi isquidon, sondadon, Esus mamënshumbedequin cuesbededpanëdash. <sup>64</sup> Adoshombic, dashcute cuëshaidën bëpucshun cuestanquin Esus sondadon nadopanëdash: —Mibi tantiaquidquio icquin ¿midaquidën mibi nëbi cueseque. Tantianu. Chui—capanëdash Esus chuiquin. <sup>65</sup> Aden cuesbededquin Esus icsamboen chuipanëdash.

*Isadaidbo tsusiobo yacno Esus buanaid*

*(Mat 26.59-66; Mad 14.55-64; Uan 18.19-24)*

<sup>66</sup> Adshumbic badiadnubi isadaidbo tsusiobo iccuededacno Esus buan-shun <sup>67</sup> nënantanquio nidtomesho isash: —Nuquin Papan chomiaid, Quidistu caid, nebi, quecta ique? Tantianu. Chui—quepanëdash isadaidbo tsusiobo Esus caic.

Adoaquien: —Ëmbi abimbo chuisho mibitedishun tantienquio iquendac.

<sup>68</sup> Adembidi, ¿Mitsipadquidquio Nuquin Papan chomiaid neque? Tantianu. Ëbi chui, cac ëbedenquio mimbi iquendac. <sup>69</sup> Nad iqueque. Chuinu. Tantia. Matsesash nidaidën tabadboedi ambi nadatiambocquin naidënquio Nuquin

Papan dayunquoio tsadendabi —quepanëdash Esus isadaidbo tsusiobo tantiamequin chiec.

<sup>70</sup> Adoaquien: —¿Nuquin Papan madombobi nebi, quequinda chio? —quepanëdash isadaidbo tsusiobo Esus caic.

Adoaquien: —“Esus Nuquin Papan madombobi nec,” quequin abimbo chuiquid mibi nec —quepanëdash Esus isadaidbo tsusiobo caic.

<sup>71</sup> Adoaquien: —Nuquin Papan madombobi nebi, quequin ambibi chiec Esus muc nec. Aden chuisho icsambo iqueque. Unës uatiad, quequin tantiashun, Esus icsaosh, quequin chuitiadquiocquin chuita, cainquoio iquembi utsibo chuiquin. Adquid iquec, quequin nuqui tantiec —quepanëdash isadaidbo tsusiobo.

## 23

### *Pidato yacno Esus buanaid*

(*Mat 27.1-2, 11-14; Mad 15.1-5; Uan 18.28-38*)

<sup>1</sup> Aden ambibi chiec Esus muc nec, isadaidbo tsusio abentsëc quesho tantiash isadaidbo tsusiobotedi nidtoshon Esus bedshun Pidato yacno buampänëdash. <sup>2</sup> Aden Pidato yacno Esus bëec choash: —Esusën chuibansho tantiash, Cuëshëdmianquid nec, quequin mibi yacno bëombi. Nëid ancanquid dapa Sesadën, Shocoshëmpi bec cho, cac menenda quiosh. Aidbidi, isadaidbo chuiquid dapa nebi, quiosh —quepanëdash isadaidbo tsusiobo Pidato chiec.

<sup>3</sup> Adoaquien Pidato: —¿Isadaidbo chuiquid dapada ne? —quepanëdash Esus caic.

Adoaquien: —Mimbi chiaidquio abimbo iquec —quepanëdash Esus.

<sup>4</sup> Adsho tantiash: —¿Atotsi nashoembi cuidpe? Ambi icsamboen naid nibëdec —quepanëdash Pidato isadaidbo tsusiobo chiec.

<sup>5</sup> Adoaquien: —Ambi tantiamiaidënquoio Cadidia yacnocquido nëishmiac comapenec cuëdcuededosh. Anoshon tantiameshumbic Edusaden yacno choshon adomboembidi tantiaméoaposh —quepanëdash isadaidbo tsusiobo Pidato caic.

### *Edodes yacno Esus buanaid*

<sup>6</sup> Aden chuisho tantiash: —¿Nidaid Cadidia yacnoësh choquidta Esus nec? —quepanëdash Pidato.

<sup>7</sup> Adoaquien: —Ai. Cadidia yacnoësh choquid Esus nec —quepanëdash. Aden chiac Esus ancaquid Edodes nec, quequin Pidaton Edodes yacno Esus buamepanëdash Edusaden yacno Edodes choash tabadec, quesho tantiashun.

<sup>8</sup> Aden Edusaden yacno abi yacno bëacsho isash Edodes, Yuen Esus iste bunec nëbi bëdambo iquebi, quequin ëquëducshun tantiapanëdash. Nadatiambocquin nabanquidquio nec, quequin isquidon chiac Edodes Esus isec, Nadatiambocquin napashun. Isnu, quequin ambibi tantiec <sup>9</sup> Esus chuimenu quec Edodes onquepanëdash. Adoaqui Esusën ëcbedenquoio icpanëdash. <sup>10</sup> Adnubien isadaidbo tsusiobo: —Esus icsambocquid nec —quepanëdash comapenec onquec Edodes chiec. <sup>11</sup> Adoac Edodesbëd sondado Esus icsamboen chuiquin mamëshumbededshumbi chuiquid dapan dashcutebimboecquid abichobicquid Esus dasiunshun Pidato yacno buameoapanëdash. <sup>12</sup> Mimbi tantiacpaden Esus cuidta, quequin Pidato chuita, quequin Edodesën chuitanquin Pidato yacno Esus padpiden buamepanëdash. Adoac Edodesbëd Pidato bëdambo yampanëdash.

### *Esus cuesten dectameta quiaid*

(*Mat 27.15-26; Mad 15.6-15; Uan 18.39-19.16*)

<sup>13</sup> Adashic, isadaidbo tsusiobobëdta isadaidbo utsibo chomeshun <sup>14</sup> Esus ismetanquin Pidaton nadopanëdash: —Nëid dada bëash: “Cuëshëdmianquid nec,” quequin mimbi ëbi chioc. Adoac aidbëdi onquiash, ¿Cuëshëmianquidta nedic? quendabi. <sup>15</sup> Aden ëmbi tantiacpadomboen tantiaquin Edodesën ëbi yacno chomeoaposh. Esus unës uainquioctiadquidi nec. <sup>16</sup> Aden tantiaquin mëyanshun aidi nidmenuna —quepanëdash isadaidbo tsusiobo caic.

<sup>17</sup> Aden chiac naden isadaidbon tantiapanëdash. Setan-setanquien icsambocquid con matses quënën nauedaid abentsëc ambi nidmiacpaden nëbi adquid utsi Pidaton nidmetsiash, quequin tantiec isadaidbo naded cuëdcuededquin: <sup>18</sup> —Nëid Esus caid unës uatiadquidi nec. Mimbi quënën nauednëdaid Badabas cuëmëdquid puduemeta —capanëdash comapenec cuëdcuededquin isadaidbon. <sup>19</sup> Ancanquid bunenquiocquin utsibo cuëdcuededmiondaid utsi cuesuniondaidbidi Badabas icsho quënën nauedmepanëdash.

<sup>20</sup> Adec isadaidbo cuëdcuededsho tantiash Esus nidmetiadquio iquec: —Esus cuidenquioctiadquidi nec —quepanëdash Pidato isadaidbo caic.

<sup>21</sup> Adnubien: —Cuesten dectame —capanëdash isadaidbon yuec comapenec cuëdcuededquin.

<sup>22</sup> Adec cuëdcuededsho tantiash: —¿Atotsi canun, Cuesten dectame, cai? ¿Atotsi icsamboen nasho isun mimbi chieque? Chui. Tantuanu. Ma unës uainquioctiadquidi neyoc. Aden tantiaquin mëyameshun Esus nidmembi —quepanëdash Pidato.

<sup>23</sup> Adoaquien: —Cuesten dectame —quepanëdash cuëdcuededoic isadaidbo Pidato, Ai, camenuc.

<sup>24</sup> Adoac iccuededquidon chiapaden namenuc <sup>25</sup> Pidaton: —Utsi cuesuniondaid Badabas puduemeshun Esus cuesten dectameta —capanëdash Pidaton cuesten dectamënquido chuiquin.

### *Esus mëyanaid*

*(Mat 27.32-44; Mad 15.21-32; Uan 19.17-27)*

<sup>26</sup> Pidaton, Esus cuesten dectameta, cac sondadon abi dectante cueste Esus buamequimbi Simon, Sidene yacnoshon tishaid, chosho bëquedtuiddanquin Esus dectante cueste Simon buamiac Esus tsibambëpanëdash. <sup>27</sup> Adec Esus nidsho isun matses dadpenshun shubiquin tsibanampanëdash. Ademibidi abi tsibanquid chidobo icpanëdash. <sup>28</sup> Adec chidobo abi tsibanec shubisho tantiash bidiadshun isec Esus: —Ëbi tantiec shubienda, Edusaden yacnocquidon chidobo. Mibibi tantiadec min bacuëbobëdta tantiec shubicuededta.

<sup>29</sup> Yuecash mëyantequid ushë choendac. Aid ushë chonoc bacuë tishtiapimbocquid caic utsibo nadendac: “Bacuëbo nibëdquid icquin min bacuëbo natiasho isenquio mimbi iquec. Adquid yec bëdamboshë mibitedi iquec.”

<sup>30</sup> Mëyantequid ushë chonoc matses utsibon natiambocquid mëyanaqui naden mimbi Nuquin Papa chiendac:

“Natiambocquid. Acte quiusudquid macuësh dapa catashmetabi, Papa, mibi quendac.

Adecbidi, Acte quiusudquid macuësh masiametabi, Papa, utsi queoaindac.”

<sup>31</sup> Ëbi buansho isec shubiequi, Ëbi mëyantequid ushë choec, quequin tantiesha mibi icpec. Nëdënquenquioctiadquidi achuëshquiocquid nëdëncasho isash: “¿Tanunquiocquid badedquio nëdënquenquio icpec,” quecta mibi icti? Ademibidi: “Cuidenquioctiadquidi nec,” queboedëmbi ëbi icsaisa unës uasho isash: “¿Ëbitedi icsambocquid comapenen cuidenquio icpec,” queoaspecta mibi ique? Ai, quequin tantiatiad —quepanëdash Esus.

<sup>32</sup> Adnubien Esusbëdta icsambocquid dada daëd nidmequimbi <sup>33</sup> macuësh mapi canite caid yacno choshombi ëquë daëd dectambudcuentanquin nënantanquio Esus dectampanëdash. <sup>34</sup> Dectanac diadequi Esus Nuquin Papa caic: —Ëbi unës uanuequidon tantienquiocquin unës uainquioctiadquidi cuesten dectanoshibique. Aidon icsamboen nambo yacbimboec bëpiscudta, Papa —quepanëdash. Adnubic Esusën dashcute bednuequin sondadon dada uashun tëchun sandoshon cadotanequin dada uatempï puduemebanquin isquin Esusën dashcute bedbampänëdash.

<sup>35</sup> Adnubien matses dadpeshun isnubi Isadaidbo tsusiobo isec tabadquin mamënshumbedec: —¿Utsi-utsien Nuquin Papa yacno yuedanquidta nec? Aidi matses mënchictequid Nuquin Papan chomiaidquio iquec abibi budtiadquidi diadpec. ¿Ada budeque? Isnu —quec onquecuededpanëdash.

<sup>36</sup> Adembidi sondadon mamënshumbedequin paëmbocquid mucambocquid sananquin Esus ismequimbi: <sup>37</sup> —Isadaidbo chuiquid dapa iquec unësenquio iquebi, quiash nëid bednush bud —capanëdash sondadon.

<sup>38</sup> Adnubic, abi dectanaid cuesten mapino abuc matoccaid Pidaton Esus chuiquin dada uamiaid nad icpanëdash: “Nëid, isadaidbo chuiquid dapa nec,” quequin dada uashun Esusën mapino dectamepanëdash.

<sup>39</sup> Adnubien, Esus icsamboen chiec icsambocquid Esusbëdta dectamboed abentsëc: —¿Nuquin Papan chomiaid, Quidistuda ne? Adquid icquin mimbi budmiac ëbi daëdi mibëd budebi —quepanëdash abëd diadquid.

<sup>40</sup> Adec Esusbëdta dectamboed abentsëc onquesho tantiash aidbëdta dectamboed utsi: —¿Aidi unës uatequid yacpadquid mibi yec, Nuquin Papan ëbi cuidendac, quec dacuëdënenquioda mimbi icpe? <sup>41</sup> Icsamboen nabanacsho cuidaid ëbi daëdi nec. Aidi bëdambocquin nabanquid icsho cuidenquioctiadquidi nec —quepanëdash.

<sup>42</sup> Aden chiashic Esus caic: —Mibi yacno choash chuiquid dapa icquin ëbi bëdamboen tantiaquin nata —quepanëdash Esusbëdta dectamboed utsi.

<sup>43</sup> Adoquien: —Abimbo chuinu. Tantia. Nëid ushëmbi abuc ëbi bëdamboec tabadacno ëbëdi mibi iquendac —quepanëdash Esus abëdta dectamboed abentsëc chiec.

#### *Esus unësaid*

*(Mat 27.45-56; Mad 15.33-41; Uan 19.28-30)*

<sup>44</sup> Adec onquenubi ushë cuembo yanuc bëtinacimboec inchëshquio yashic ushë budtsan chënquedoapanëdash. <sup>45</sup> Inchëshquio icnubi Nuquin Papa tabadte shubu uashunaid yacno puduedtemaid quënën dashcute bitsipambocquid tsincabudquin dectanëdaid tembi daëdquio yec canchedbudcuempanëdash. <sup>46</sup> Adnubien unësbudec comapenec cuëdec: —Mibi yacno ëbi yuedta, Papa —quiash Esus unësbudpanëdash.

<sup>47</sup> Adec Esus unëso isequi ambi isboedtedi tantiaquin Nuquin Papan naid chiec sondado chuiquid: —Abimbo chiosh. Cuesten dectanaid Esus caid bëdambocquid niosh. Aidi unësenquioctiadquidi unës uaposh —quepanëdash.

<sup>48</sup> Ambo tabadquin isquid utsibo Esus unëso isash unësquio yec aton shubuno nidanepänëdash. <sup>49</sup> Aido nidnubien nidaid Cadidia yacnoësh choshon chidobon Esus tsibanamboedon dadabëdtambi uano tabadquin isbedepänëdash.

#### *Esus nauedaid*

*(Mat 27.57-61; Mad 15.42, 47; Uan 19.38-42)*

<sup>50</sup> Adnubic, ambobi dada, Ose cuëmëdquid, isadaidbo tsusio utsibobëd iccuededquid abentsëc bëdambocquid icpanëdash. <sup>51</sup> Isadaidbo tsusio utsibo, Esus unës uatiadquidi nec, quenubi, Padi. Unës uainda, quepanëdash Ose.

Aidi nidaid Udeya caid shubu dadpen icquid Adimateya caid yacnoshon tishaid icpanëdash. Aidi Nuquin Papan chomiaid chuiquid dapa iste bunquin cainquidquo icpanëdash. <sup>52</sup> Aidi Esus unëso isash Esusën dada nauedtiadquo yec Pidato yacno nidshun ambi tantiacpaden Osen chuipanëdash. <sup>53</sup> Aden chiaquien Pidaton: —Adotan —cac nidshun Esusën dada imbudshun dashcute ushumbocquidën dataneshun buanshumbic ambi macuësh cuënote shëcuë nacnenaïd chucanquo Esus Osen badedquo nauedpanëdash. <sup>54</sup> Inchëshbudtsëqui seis yanuc chonoadtemaid ushë nec, qeshun Esusën dada Osen nauedpanëdash.

<sup>55</sup> Adnubien: Nauednu, quequin Osen buansho isun Cadidia yacnoësh Esusbëd choboedon chidobon tsibanshun shëcuën Esusën dada Osen nauedsho aidon isbededpanëdash. <sup>56</sup> Aden isash aton shubuno nidaneshun noadte bëda Esusën dada danoshcanu qeshun danoshquete chidobon nacnempanëdash. Nacnenash inchëshbudtsëqui seis icnuc Nuquin Papan chiacpadec chonoadtemaid ushë nec, quïash Esus nauedacno nidenquo yec tabadpanëdash. Nuquin Papan chiacpadec tabadpanëdash.

## 24

### *Esus uincuenta*

(*Mat 28.1-10; Mad 16.1-8; Uan 20.1-10*)

<sup>1</sup> Adashic, sabado inchëshbudtsëqui seis yanuc chonoadtemaid ushë naimëdan badiadnuc danoshcanun ambi nacnemboed buanec Esus nauedbocno isec chidobo nidpanëdash. <sup>2</sup> Ambo choshon Esus nauedshun bëtashaid cuënote shëcniacsho isashi <sup>3</sup> shëcuën puduedash aton Icho Esusën dada nibëdsho isec tabadpanëdash. <sup>4</sup> Adec tabadnubien dada daëd dashcute dasiuidac bimboec dasiuidash chënquec chopanëdash. <sup>5</sup> Aid isash dacuëdcuededequi isenquo yec chidobo tabadpanëdash. Adsho isash dada daëd: —¿Atotsi canuen unësacsho nauedac uincuemiaïd nibëne? <sup>6</sup> Nëmbo nauedboedi nibëdec. Aidi uincuenaccosh. ¿Aidi Cadidia yacno mibëdi tabadquin chuïsho tantienquïoda icco? <sup>7</sup> Naden Esusën mibitedi chiondash: “Matsesaid ëbi icsho bedshun icsambocquid ëbi menendac. Aden meniac cuesten dectanac daëdec ushtanec uincuenoaïbi,” quequin Esusën chiondash —quepanëdash dada daëd chidobo caic. <sup>8</sup> Aden chiac chidobon Esusën chiaïd abi bëpiscudaïd padpiden tantiapanëdash.

<sup>9</sup> Aden tantiash Esus nauedaid shëcuë yacnoësh puduenanec Esus tantiquid dadpen tabadacno choec puduedshun ambi isboedbëdtabi ambi tantiaboed chidobon chuïbampanëdash. <sup>10</sup> Madia shubu dadpen icquid Mactada caid yacnoshon tishaid yec Uana yec Madia utsi Uambëdtan Acobon tita yec chido utsibo yec quec choshon Esusën Èbi chuïbeneta caïdo chuipanëdash. <sup>11</sup> Aden chuïsho tantiash: —Mimbi chiaïd tantiatiapimbo iquebi —quecuededpanëdash iccuededquïdo. <sup>12</sup> Adnubien Petedo nidtoanec titinquec nauedaid shëcuë yacno choash shuebudquin shëcuë anisquin dataniaïd dashcuteuïdi uesho ispanëdash. Aden isanec nidequi: —¿Atodain nechitec? —quepanëdash Petedo tantienquo yec.

### *Emaus yacmi nidte*

(*Mad 16.12-13*)

<sup>13</sup> Adashic abi ushëmbi Edusaden yacnoësh utsibobëd iccuededboed dada daëd shubu daëdpactsëc icquid Emaus caid yacno nidpanëdash. <sup>14</sup> Adec nidequi ambi Edusaden yacnoshon isboedbëdta ambi tantiaboed chiec onquepanëdash. <sup>15</sup> Aden chiec onquec nidshobi Esusën aid daëdi chinunash

aidobëd nidpanëdash. <sup>16</sup> Aden abi chinuntuidsho isac utsibimboec Esus isadpanëdash.

<sup>17</sup> Adec nidequi Esus: —¿Atotsi chuibanec onquec nide? —quepanëdash. Adsho tantiash unësquio yec mamënenquio yec nidtuidpanëdash.

<sup>18</sup> Adec nidtuidash Quëdeyopas cuëmëdquid: —¿Edusaden yacno tabadtu-idquin anoshon naboed mimbiuidtsëqui tantiamboda icco? —quepanëdash Esus caic.

<sup>19</sup> Adoaquien: —¿Atotsi naid chiec ne? —quepanëdash Esus.

Adoaquien: —Esus Nasaded yacnoësh choquid chiec nebi. Aidi Nuquin Papan ambi chiaid chuimiai icquin ambi chuibaniaid ambi nabanaidbidi Nuquin Papabëdtan matses dadpeshun bëdamboen isaid icposh. <sup>20</sup> Nuquin tsusio dapabobëdtan nuqui chuiquid utsibon Esus bedshun: “Unës uata,” quequin isadaidpembo chuiquid meniac cuesten dectanquin unës uaposh. <sup>21</sup> Nëbi chuiquid dapa isadaidpembo iquenquiocpashun, quequin Esus isadaidbo yec isadaidbo chuiquid dapa ictsiash quequin ëbitedishun tantiapombi. Ëmbi caboedi unës uaposh. Aidi unës uan daëdec ushobi. <sup>22</sup> Adec daëdec ushun dacuëdanquiecnuc chidobon naden chuibededposh: “Esusën dada nauedbocono badiadnuc nidshun isac <sup>23</sup> nibëdosh. Ambobi icnubi Nuquin Papan uaido mayan bëdabo daëd icsho isac, ‘Mimbi nibënaid nibëdec. Uincuenac,’ quiosh,” quequin chidobon chuiposh. <sup>24</sup> Aden chidobon chuisho tantienquio yec ëbëd icquido Esusën dada nauedbocono nidshun chidobon chuibocpadembi unës uaboed nibëdsho isposh —quepanëdash ambi chinunaido Esus chiec.

<sup>25</sup> Adoaquien: —Ma bëdiactsëc tantiaquid mibi daëdi neyoc. Nuquin Papan ambi chiaid chuimiai don dada uampid bëdiactsëc tantiatsec tantiesabidi ma mibi neyoc. <sup>26</sup> ¿Bëdamboec tabadacno chuiquid dapa icnuec Esus mëyanaidba iquendactiosh? —quepanëdash Esus. <sup>27</sup> Aden chuibanquin Moisesën dada uampidbëdtabi Nuquin Papan ambi yuecshun nanun chiaid chuimiai don dada uampid tantiamequin Esusën chuibanpanëdash.

<sup>28</sup> Aden chuibanec shubu daëdpactsëc icquid Emaus caid yacno anoentsëqui choshon datanshobimboecnuc Esus isun: <sup>29</sup> —Inchësheque. Nëmbo ëbi yacno tabadec cho —abi daëdshun cac nidash aidobëd tabadpanëdash.

<sup>30</sup> Adashic, shubu nuntan pete sante dayun abëdi uequin pete bedshun Nuquin Papa chuishun cuësh-cuëshun Esusën menebampanëdash. <sup>31</sup> Aden nasho isun badedi, Esus nec, quequin tantianubi Esus nibëdquio yampanëdash. <sup>32</sup> Adsho isash: —¿Podquedën choquin Nuquin Papan chiaid dada uampid chuisho tantiash, Bëdambo yanobi, quenquiodabi ëbi daëdi ictio? —quepanëdash Esus yuedquido.

<sup>33</sup> Aden chuitanequi Emaus yacno choboed daëd badedi Edusaden yacno nidoapanëdash. Edusaden yacno choash Esusbëd icquido 11tedbëdi ut-sibo iccuededacno puduedacsho isash: <sup>34</sup> —Abimbo iquec. Nuquin Icho uincuempaccosh. Uincuenanec choquin aidëmbi Simon ismetuidposh —quepanëdash iccuededquido. <sup>35</sup> Aden iccuededquidon chuisho tantiashun Emaus yacnoësh choaboed daëdshun Esusën abi chinunshun chiaidbëdta ambi pete bedshun Esusën cuësh-cuëshbamboed chuipanëdash.

*Abëd icboedo yacno Esus chote*

*(Mat 28.16-20; Mad 16.14-18; Uan 20.19-23)*

<sup>36</sup> Adec onquecuedednubi nënantanquio choshon Esusën: —Nuquin Papan bëdamboen isaïdo yec dacuëdenquio yec tabad —capanëdash.

<sup>37</sup> Adec aid chosho isash: Podo bitsi nec, quec dacuëdequi abëd icquido tabadpanëdash. <sup>38</sup> Adsho isashien Esus: —¿Atotsi quiash, ¿Esusida nepec? mibitedi quepe? <sup>39</sup> Con mëdantebëdta con taë is. Èbibi nebique. ¿Mëtoccaid taëbëd chiuë nibëdecta ye? Mishec cho. Èbi yacpadquid canitebëd nami icquid podobitsi nibëdec —quepanëdash Esus abëd icquido chiec.

<sup>40</sup> Aden chuitanquin abi bëchun shuin mëtoccaid chiuë aton mëdantebëdta aton taë Esusën ismepanëdash. <sup>41</sup> Aden ismiac, Aidquiobi nec, quenquo yec abëd icquido mamëncuededquin isec bëdambo yanec, Adec uíncuentequidshenda dectampaccosh, quequin tantiec tabadpanëdash. Adec tabadsho isun: —¿Ada pete iquec? —Èsusën caquien <sup>42</sup> nuëcquid shëaid cuëshë menepanëdash. <sup>43</sup> Aden meniac bedshun Esusën pepanëdash abëd icquidon isnubi.

<sup>44</sup> Aden piash: —Mibëd icquimbi naden chuipombi: “Nuquin Papan ëbi chuiquin ambi naden nata quequin Moises dada uamiampidbëdta ambi yuecshun nanun chiaid dada uamiampid naimbudtenendac,” quequin chuibanombi —quepanëdash abëd icquido tantiamenuc. <sup>45</sup> Aden chuishumbic abëd icquido tantiamequioquin: <sup>46</sup> —Nuquin Papan dada uamiampid nad iquec: “Nuquin Papan chomiaid, Quidistu caid, matsesën mëyanquin unës uaqui daëdec ushash uincuenendac. <sup>47</sup> Aid tantiashun mibi icsaid mimbi ënsho isash, Icsaquid nec, quenquo yec mibi icsaid Nuquin Papa bëpiscudendac, quequin Edusaden yacnocquidoba ëbi tantiaquidon chuibanendac. Aden Edusaden yacnocquido chuishumbic nidaid utsi-utsiec yacno nidshun adomboembidi chuibanoindac. <sup>48</sup> Mëyanquin unës uaqui ëbi uincuenacsho mibitedishun ispoc. <sup>49</sup> Aden isun tantiaquido mibitedi icsho Nuquin Papan ambi mibitedi menenu caid aton Mayan chomendambi. Aidi Nuquin Papan nadatiambocquin natequid iquec. Aid mibitedi meniabicnuc Edusaden yacnoshon aidi caimbudta,” —capanëdash Esusën.

*Esus abuc indote*  
(*Mad 16.19-20*)

<sup>50</sup> Adashic, bëyucanec nidequi Betania yacno anoentsëqui choash nidtuidshun aton mëdante abuc sananquin ismec: —Nëidtedi bëdamboen ista, Papa —quepanëdash Esus. <sup>51</sup> Aden chiacsho abëd capucuenequido niamequin Esus aton Papan abuc indopanëdash. <sup>52</sup> Aden indosho isash, Èbitedishun icbo nec, quequin ismec shuebudash: —Bëdambo iquebi —quianec Edusaden yacno nidanepanëdash. <sup>53</sup> Adec Edusaden yacno nidoash tabadec Nuquin Papa tabadte shubu uashunaid yacno badiadquidën-badiadquidënquiec nittednidtedquin Nuquin Papan naid chuidenepanëdash.

Padi. Aidedtëdäda uaombi, Teyopido.

## UANËN DADA UAID

### *Nuquin Papa tantiamianquid chiaid*

<sup>1</sup> Ëndenquimboshë matses uabi yec abitedimbo uabi yequi Nuquin Papabëd Esus icpampic. Nuquin Papapadquidquiobidi yec: —Nadquio Nuquin Papa iquec —quec tantiamianquidquio nec. <sup>2</sup> Aidëmbi Nuquin Papabëd icquin <sup>3</sup> abitedimbo uapampic. Abubëdta nidaid uashun aidën icquidtedi uapampic. Ambi uacmaid utsi nibëdec. <sup>4</sup> Aidquio Nuquin Papa yacno tabadmianquid nec. Nuquin Papapadquidquiobidi yec: —Nadquio Nuquin Papa iquec —quequin paposhquiabimboecnuc tantiamianquidbidi Esus nec. <sup>5</sup> Adembidi matses ambi icsamboen naid tantiamequid nec. Adquid icquin: —Con Pamboen bëdamboshë icquidquio nendac. Aidën chiaid niacniaquec mibi icsamboec tabadec —quequin chuisho tantiatiapimbo icquin matsesën Esus chieshëmpondash.

<sup>6</sup> Aden Esusën chuibeniyabi icnuc con shënision acten mentoanquidëmba Nuquin Papan chiacpadomboen ambi chiaid chuibampondash. <sup>7</sup> —“Nuquin Papa yacnuësh abi tantiamequidquio choendac,” quequin Uanën chuiban-sho tantiashun ma dadpenschun ambi chuiboed tantianu —quequin Nuquin Papan con shënisio abi chuibanquid icmepanëdash. <sup>8</sup> Nuquin Papa yacnuësh choacmaidëmbi con shënision: —Nuquin Papan chomiaid Esus nec —quequin chuibampondash. <sup>9</sup> Aden ambi chuiboedquio Nuquin Papa tantiamenuc matsespanëdash Esus.

<sup>10</sup> Adash matsesbëd tabadsho ambi matses uaidombi tantienquio icquin chieshëmpondash. <sup>11</sup> Aden con matses isadaidbon Esus tantienquio iccondash. —Isadaidbo con matses nec —Nuquin Papa quenëdacpadquiec: —Isadaidbo con matses nec —queoapondash Esus. Adsho ambi con matses caidonquiobi dadpenschun Esus tantienquio icpondash. <sup>12</sup> Utsibombien daëdpactsëcshun: —Nuquin Papan Madombo Esus nec —quequin tantiasho Nuquin Papan: —Con mado nec. Con champi nec —cabempanëdash. <sup>13</sup> —Con matsesuidien Nuquin Papan: “Con mado nec. Con champi nec,” capec —¿quequidta adopanëdash? Padenquio. —Nuquin Papan mado nebi —quequin ¿ambembi chuiquidta con mado capanëdash? Padenquio. Nuquin Papan Mayanën tantiamiacpadomboen aton Madombo Esus tantiasho dada con mado caquin chido con champi capanëdash. Adembidi Esus tantiasho adoendac.

<sup>14</sup> Adec Nuquin Papa tantiamequidquio Esus matsespanëdash. Nuquin Papan Mado abentsëqui yec bëdamboshë icpondash. Ëbëd tabadquin nadatiambo icquin nabanquin matses bëdamboen nashumbampondash. Aden Nuquin Papambo tantiamepondash Esusën. <sup>15</sup> Aid con shënision chuipondash. —Ëmbi chuiboedquio nec. “Ëbi icsaquid icnuc bëdamboshë icquidquio choec,” ëmbi caboedquio nec. “Ëmbia Nuquin Papan chiaid chuibambon aidëntsen tsyuec choshon chuibanendac. Ëbi bëyuc tishaidi tishabi icnubi aid ënden icpampic,” ëmbi caboedquiobi Esus nec —quepondash con shënisio.

<sup>16</sup> Con shënision chiacpadquidquio icquin abi tantiaquido Nuquin Papan bëdamboen isaido icmeshun adenuidi Nuquin Papa nuqui bëdamboen ismec. <sup>17</sup> Ëndenquimboshë Nuquin Papan chiaid dada uaquin Moisesën Nuquin Papan matses icsaido cuidte tantiamepampic. Padnuen Esuquidistun Nuquin Papan bëdamboen iste tantiamequin: —Nadquio Nuquin Papa iquec —quequin matses bëdamboen tantiamepondash. <sup>18</sup> Ambi isacmaidquio icsho



matsesën Nuquin Papa bédamboen tantiatiapimbo iquec. Padnuen aton Mado abentsécshunquio aton dayun tsadquidënquiobi matsesun Nuquin Papa bédamboen tantiampondash. Aidquio chuinu. Tantia.

*Tsusiobon chuimiac Uan acten mentoanquidën chiaid  
(Mat 3.11-12; Mad 1.7-8; Duc 3.15-17)*

<sup>19</sup> Con shënisio Nuquin Papa tantiabenquid acten mentobenequid niondash. Aden acten mentobenesho isash Moisesën chiampid namequido aid chuimenuc cho-chopondash. Edusaden yacnocquido isadaidbo tsusiobon: —Chuimetan —cac cho-choquin con shënisio chuituidpondash. <sup>20</sup> —¿Tsumtsin chiac nai? ¿Mimbembida nai? “Bédamboshë icquidquio Nuquin Papan chome ndac,” quequin nuquin tsusedpan ¿dada uapampidta ne? —catuidpondash. Adoquien: —Padenquio. Aidpenquio nebi —quepondash. <sup>21</sup> Adshobien: —¿Tsumintsi ne? ¿“Naden naindambi,” quequin Nuquin Papan chiaid chuibanquidquio unëspampid Edias uincuenaidta ne? —caquien: —Padenquio. Aidpenquio nebi —queoapondash. Adshobien padpiden: ¿Tsumintsimbo ne? “Moisespadquidquio choendac,” ¿capampidta ne? —caquien: —Padenquio. Aidpenquio nebi —queoapondash con shënisio.

<sup>22</sup> Adshobien padpidemboen: —¿Tsumintsimbo ne? ¿Mimbenquiobienda nao? Èbi: “Chuimetan,” caboed chiec nidnu. Baded èbi chui —caquien: <sup>23</sup> —Nuquin Papan tantiamiac nuquin tsusedpa Isayasën naden chuipampid nebi.

“Nuquin Papan bédamboshë icquid chomiabi icnuc aid bëyuec utsiba choendac. Aidën shubu nibédacno capucuenequin chuibanendac naden.

‘Chuiquid dapambo choeque. Podqued andëdbanshunta,’

quiacbimboen chuiquin: ‘Nuquin Icho choeque. Icsaid ënash bédamboec tabadta,’

quequin chiendac bëyuc choshon,”

quequin chuipampid nebi —quepondash con shënisio.

<sup>24</sup> Adnubien con tsusedpabon chiampid namequidon padiseyobo caidontsen aton chuiquid dapan chiacpadomboen con shënisio chuituidpondash. <sup>25</sup> —Ütsibon: “¿Adquidta ne?” cac: “Adquidpenquio nebi,” queuidequi mibi iccoc. “¿Mitsipadquidquio icquin acten mentobano?” mibi caimbi —caquien: <sup>26</sup> —Nuquin Papan chiacpadomboen abi tantiabenquido acten mentobenec nebi. Èmbi aden bédamboen nanuc utsimbien bédamboenshë naindac. Aidi mibëdi tabadshobi ma mimbi tantienquio icboc. <sup>27</sup> Èmbia Nuquin Papan chiaid chuibanombi. Aidëntsen tsyuec choshon comapenen tantiaquin Nuquin Papan chiaidquio chuiquin Nuquin Papambo tantiamendac. “Aidi bédamboshë icquid icnuc èbi icsaquid icsho ¿atotsieshun: ‘Aid choec,’ quequin chuiquidquio Nuquin Papan icmioshi?” quec tsadebi —quepondash con shënisio padiseyobo chiec.

<sup>28</sup> Acte Odan caid uquë cuëmatsiucuehsh shubu dadpen icquid Betania caid yacnuësh adpondash.

*Abided cuidadtequid nendac, Esus caid*

<sup>29</sup> Badiadshun padpiden con shënisio matses acten mentobanoapondash. Aden mentobanubien Esus chopondash. Chosho isashien: —Is. Nuquin Papan namiaidquio obeca bacuëbimboecquid choeque. Aidi isadaidbon obeca bacuëded cuidquin unës uacbimboec matses icsaid bedshunec abided cuidadec unësendac. <sup>30</sup> Èmbi chianeboedquio nec. “Èbi bëyuc tishaidi tishabi

icnubi aidi ënden icpampic,” quiaash: “Ëbi bēdapabi icnuc bēdamboshē icquidquio choendac,” quepobi. <sup>31</sup> Aid chosho con matses isadaidbo tantiamenuen Nuquin Papan acten mentobenequid icmiondashi. Adonaidēmbi ëmbibi badedquio tantienquio iccombi. “Nuquin Papan chomiaid nec,” quequin tantienquio iccombi —quepondash con shēnisio.

*Esus mentoaid*

(*Mat 3.16-17; Mad 1.9-11; Duc 3.21-22*)

<sup>32</sup> Adashic abi onquec: —Nuquin Papan naden ismiac tantiabenombi. Aton Mayan aton dada nibēdquiec dēbimbimboec budec: “Matsadtoendac,” quebocpadequi Esus matsadtocho ispombi. <sup>33</sup> Adsho isash: “Adquidshenda caposh Nuquin Papan: ‘Acten mentoanquid icta,’ ëbi caboedēn. ‘Con Mayan dēbimbimboec budec matsadtoedēn abi tantiaquidobēd con Mayan tabadmendac,’ Nuquin Papan caboedshenda nepec,” quiobi Esus caic. Ëmbembi tantienquio ictsenombi. <sup>34</sup> Aden ismiac: “Nuquin Papan Madombo Esus nec,” quequin tantiombi. Aden tantiashun: “Nuqui caimboed Nuquin Papan chomiaidquio Esus nec,” quequin mibi chiec nebi —quepondash con shēnisio.

*Nēid dada uaquid Uan Esusbēd yanaid*

<sup>35</sup> Adashic badiadash ambi acten mentobambocno con shēnisio nidoapondash. Aid tsibanequi nidoapondabi. <sup>36</sup> Adec nidquin isquien Esus cuempec. Cuensho isashien con shēnisio: —Is. “Nuquin Papan namiaidquio obeca bacuëbimboecquid nec,” ëmbi caboed cueneque —quepondash.

<sup>37</sup> Adsho tantiatanequini con shēnisiobēd iccondaid utsibēd Esus chinunec nidpondac. <sup>38</sup> Nidquin chinunac bidiaquin istanequien: —¿Atotsi quec ne? —quepondash Esus. Adshobimbi: —Mibi isec nebi, Dabi. ¿Mitsimbo mibi ushaque? Isnu —capondambi. —Chuiquidquio nec —quequin con onquetembi Dabi caondambi. <sup>39</sup> Adoac: —En isec cho —cac abi ushacno isec nidondabi. Ushē abucquio icnuc puduedash yuec tabadec onquetaniash inchēshtsēcnubi chondabi.

<sup>40</sup> Ëbēdtan Esus chinunondaaid Andedes niondash. Shubu dadpen icquid Betsaida caid yacnuēsh caniquid niondash. Aton buchi Petedo niondash. Petedobidi Simon capondash. <sup>41</sup> Adnubien Andedes aton buchi chiec nidpondash. Adec nidquin Petedo istuidash: —Nuquin tsusedpabon chuipampid Nuquin Papa yacnuēsh choquid Mesias caid istuidombique. En isec cho, buchi —capac caondash. Nuquin Papa yacnuēsh choquid Quidistu cashumbic con onqueten Mesias caic.

<sup>42</sup> Aden chiaquien aton buchi Esus isec chopondash. Chosho isash Esus: —Uanën mado mibi nec. Mibi Simon nec. “Nidaid moco utsi uatiapimbo yacimboec mibi chieshtoenquio icquid yanendac,” quequin mibi nidaid moco cuēnendambi —quepondash Esus Petedo caic. Con onqueten nidaid moco cain Sepas capondash Esusēn. Quidieco matsesēn onqueten Petedo capondash.

*Esusēn Uedipebēdta Natanaid istuidaid*

<sup>43</sup> Badiadash: —Con nidaid Cadidia caid yacno nidnu —quianec nidpondash Esus. Adec nidquimbi Uedipe istuidpondash. Istuidshun: —Nuquibi icnu. Cho —caquien Uedipe chopondash. <sup>44</sup> Betsaida yacnuēsh caniquidbidi nepondash aid. <sup>45</sup> Esusbēd icquid yanashic dada utsitsen Natanaid caid chiec nidpondash Uedipe. Adec nidquin istuidshumbien: —Isec cho. Moisesēn chiampicpadomboen chuiquin nuquin tsusedpabo utsibon: “Bēdamboshē icquid choendac,” quequin dada uapampicpadequi choshe. En isec cho.

Shubu dadpen icquid Nasaded caid yacnuësh caniquid neque. Osen mado nec —quepac caondash. <sup>46</sup> Adsho tantiash: —¿Nasaded yacnuështa dada bédambo icquid chopatsiash? Auëshquio dada bédambo icquid chotiapimbo iquendac —quepac caondash Natanaid. Adsho tantiash: —En isquiec cho —quepac caondash Uedipe.

<sup>47</sup> Adoac choshobien Esusën: —Is. Isadaidbombo neque. Muesambo nec —caquien <sup>48</sup> Natanaidën: —¿Mitsipaden ëbi tantie? Mabi mimbi isacmaid-quo nepayoc —capondash. Adoquien: —Uedipen bedtanabi icnubi mibi cuête icueda caid tayun tsadsho tantiombi —capondash Esusën. <sup>49</sup> Adsho tantiashumbien: —Nuquin Papan Madombobien mibi nec. Comapenen tantiaquid yec nuquin matses isadaidbo chuiquid dapambo mibi nendac —capondash Natanaidën: —Istiapimbo yacno chiosh —quequin tantiashun. <sup>50</sup> Adoquien Esusën: —“Cuête icueda caid tayun tsadsho mibi tantiombi,” ëbi qesho ¿tantiashta: “Nuquin Papan Madombobien nec,” badedquio que? Padpiden comapenen tantiaquin nabansho isun mimbi ëbi tantiaquiotsiandac. <sup>51</sup> Tanta. Mibi chuinu. Isadaidbo tsusedpa Acobon Nuquin Papan abi yacnoshon uaido mayan bédabo Nuquin Papa yacno dectatonesho isash: “Aidbéd tabadte Nuquin Papan ëbi tantiametiadquio iquec,” quequin tantiapampicpadomboen mimbi ëbi tantiendac. “Matsesun Nuquin Papan Madon matses abéd tabadte tantiamec,” quequin mimbi ëbi tantiendac —quepondash Esus abéd icquido chiec.

## 2

### *Esusën ambembi actequid uaid*

<sup>1</sup> Aden Natanaid chiash aton nidaid Cadidia caid yacnobi Esus tabadpondash. Ambo tabadec daëdec ushtsambi shubu dadpen icquid Cana caid yacnocquidën isadaidbon aton chido bedquin ismequin pemenuen aton shubuno matses dadpen cho-chomepondash. Adoac cho-chomiaidobéd Esusën tita puduedpondash. <sup>2</sup> Esustsen puduedpondash. <sup>3</sup> Adec puduedash tabadquin uba chinaid actequid uesquin acbededpondash. Adsho isumbien anin Esus chuipondash. —Actequid naimédoshe. Comapenen tantiaquid icquin mimbi tantiacpadomboen nata, mado —capondash. <sup>4</sup> Adoquien: —¿Atotsi quequin mimbi ëbi chuipe, tita? Chiata. Con Pan tantiacpadënquio naimbique —quepondash Esus. <sup>5</sup> Adsho tantiatanquin anin yuabo actequid cushtobanquido chuipondash. —Con madon chiacpadomboen nata —capondash.

<sup>6</sup> Ambobi tēchu dapa 6tedi tabēcaid icpondash. Mēpamēdtembo acte nua 120 ditedos cactembi anidboedi acte naimēdaid icpondash. <sup>7</sup> Adnubien Esusën: —Nē tabadquidën acte cushtoban —cac cubu-cubuctsēcquio icnuc acte cushtobampondash yuabon. <sup>8</sup> Cushtobanacsho isun Esusën: —Ueshun buanshun mibi ancaquid acmetan —cac acmetampondash.

<sup>9</sup> Adoac acquin tanaquien actequid bédamboshë icquid icpac caondash acte icboedi. —Nibēda damboedquio ¿mitsimbo bedpash? —quepac caondash yuabo ancaquid. Adsho tantiashun yuabon: —Esusënquobien naccosh —quequin tantiapac caondash. Adnubien yuabo ancaquidën chido bednuequid chuipondash: —Aidën actequid bēpash —qeshun. <sup>10</sup> —Nuquin matsesën actequid bédambo icquidba isedanquido acmequid nendac. Adquid acmiac matses nua cubudacsho isash: “Actequid icsactsēcquidtsen acmenu,” quequid yendac. Aden mimbi nambo. Bédambo icquidquio ma mimbi nēbi acmianeyoc —quepondash yuabo ancaquid chido bednuequid chiec. Adnubien yuabon actequid bédamboshë icquid abitedi acmebampondash.

<sup>11</sup> Aden comapenen tantiaquid icquin ambembi actequid uaqin Esusën tauamboen ismebempodash. —Nuquin Papa yacnuësh choquid yec comapenen tantiaquidquio nebi —quequin aden tauamboen ismebenondash nidaid Cadidia caid yacnoshon shubu dadpen icquid Cana caid yacnoshonquio. Adosho isun: —Con matsesën chiampid Nuquin Papan chomaidien nec —quequin tantiabenondambi.

*Esusën chushcaquin cuemiaid*

*(Mat 21.12-13; Mad 11.15-18; Duc 19.45-46)*

<sup>12</sup> Aden ambembi actequid uatanec nidec shubu dadpen icquid Capednaun caid yacno Esus nidondash. Aton tita yec aton buchi yec abëd icquido yec ëbi yec quec Esusbëd nidaniondabi. Ambo daëdpactsec ushec tabadondash. <sup>13</sup> Ambo ushcuidanec nidequi shubu dadpen icquid Edusaden yacnotsen Esus nidaniondash. —Nuquin matses tsusedpabo unës uainquio icquin Nuquin Papan matamiampid inchësh tantiaquin obeca bacuë pec nëbi tabadegue. Isec nidnu. Nid —quianec nidanepondash. <sup>14</sup> Nidashic Nuquin Papa tabadte shubu uashunaid dapa daquënë uaidën puduedondash nuntanquio puduedabi. Puduedshun isquien matses dadpen nëish yua chedobëd tabadpec. Baca bënë yec obeca yec dëbimbimboecquid quënëmpin sauedaid yec quec tabadpondash. Aton yua menequin piucquid bednuec utsibo tabadnubi utsibo ambi tabëcaid dayun tabadpondash. Aido nidaid utsi yacnuësh choquido aton piucquid dadpen bedshun ampeshunquin daëdpactsëc menequido niondash. <sup>15</sup> Adec tabadsho istanquimbien Esusën cueshcate badedquio nacentanquin cuesquin niacumpondash umanuc abitedimbo. Aden umanuc niacuntanquin tabëcaidtsen bidiacbanquin piucquid siabudshumbampodash. <sup>16</sup> Adotanquimbic dëbimbimboecquid yuaquidotsen chushcapondash. —Baded mitsana buanec nid. ¿Piucquid bednuen shubu uaidta nedic? Ma con Pa tantiate shubu neyoc —quequin chushcapondash.

<sup>17</sup> Adsho isun naden tantiondambi. —Adquidshenda Nuquin Papan chiaid chuiquin con tsusedpan dada uapampic. “Aton Papan shubu cudasquidquio nendac,” quequin Esusën nate chuiquin dada uapampic —quequin tantiondambi.

<sup>18</sup> Aden nicacsho isumbien con matses chuiquidon: —¿Tsuntsin chiac nao? “Nuquin Papan chomiaid icquin naombi,” quequin comapenen tantiaquin nabanquin ëbi isme —caquien <sup>19</sup> ismenquio icquin ompoac bimboen Esusën chuipondash. Abibi cadequi: —Mimbi nëid shubu icsa uabocsho padpiden nacnenoaindambi bëdambo icnuc. Daëdec ushquin nacnenquin nainendambi —quepondash Esus. <sup>20</sup> Adsho tantiash Nuquin Papa tabadte shubu uashunaid dapa ca danec: —¿Badedquioda nacnempatsia? Nëid nacnenquin seta dadpenquioshë 46tedquiobi matamiac cadenec —quepondash con matses chuiquido.

<sup>21-22</sup> Yuecquio ictaneshun Esusën aden chiaid tantiondambi. Unës uacsho chococac daëdec ushash Esus uincuenaccondash. Uincuenacsho isash: —Abibi cadecshenda Esus nepondash. Abibi cadec: “Daëdec ushquin nacnenquin nainendambi,” quecshenda nepondash. Aden chuiquinshenda con tsusedpabon dada uapampic —quequin tantiondambi.

*Dadpeshun Esus tantiauidaid*

<sup>23</sup> Nuquin Papa tabadte shubu uashunaid daquënë uacnoshon cuemeshumbic Edusaden yacnoshontsen comapenen tantiaquin nabanquin Esusën ismepondash. Adsho isun matses dadpeshun: —Nuquin tsusedpabon chiampid Nuquin Papan chomiaidien Esus nechitec —qeshun

Esus bëdiactsëc tantiatsëccondash. <sup>24</sup> Aden tantiatsëcsho ambembi tantiash: —Ai, ëbi tantiaquidquo nec —quenquo icquin: —Ëbi bëdiactsëc tantiatsec —quequin tantiapanëdash. <sup>25</sup> Utsin chiambobi ambembi tantianëdash. Aden matses abitedishun otacquo tantiaid ambembi tantiaquidquo Esus niondash.

### 3

#### *Esusën Nicodemo caid chiaid*

<sup>1</sup> Adnubien Edusaden yacnobi Nicodemo caid icpondash. Tsusedpabon chiampid namequido padiseyobo chuiquid dapa niondash. Tsusio utsibobëdtan aton matses namequid niondash. <sup>2</sup> Inchëshën Esusbëd onquenuec chopondash. Choshombic aidëmbi: —“Nuquin Papan icmiacpadquid chuiquidquo mibi nec,” quequin tantiembi. Mimbi comapenen tantiaquin naban-sho isun: “Nuquin Papan namiaidënuidtsëquien adotsiash,” mibi caombi —quepondash.

<sup>3</sup> Adsho tantiashun: —Ai, adquid nebi —quenquo icquin Esusën ompoacbimboen chuipondash naden. —Tantia. Mibi bëdamboen chuinu. Chuca uac Nuquin Papa yacno tabadtequid mibi ictsiandac. Chuca uabi yec mibi padenquo ictsiac <sup>4</sup> —quesho tantiashien: —¿Mitsipaden tsusiobi chuca uapatsiash? Chidon padpiden usundoshon tishtiapiamboen iquec —quepondash Nicodemo. <sup>5</sup> Adsho tantiashun Esusën: —Nuquin Papan Mayanën tantiamiac: “Nuquin Papa tantiaquin ëbi icsaid ëntiadquo iquebi,” quiash bëdamboec tabadquid Nuquin Papabëd tabadtequid nendac. Adquid chuca uaid caimbi. Chuca uabi icquid Nuquin Papa yacno tabadtiapimbo iquendac. <sup>6</sup> Chidon tishaiduidtsëqui yec Nuquin Papabëd tabadtiapimbo iquendac. Nuquin Papan Mayanën chuca uaid Nuquin Papabëd tabadendac. <sup>7</sup> “Chuca uaiduidtsëqui Nuquin Papabëd tabadendac,” ëbi quesho tantiash: “¿Midapaden chie?” quepequien mibi iquec. <sup>8</sup> Tantia. Mibi chuinu. Cunquequid isadenquo icquid nec. Isadenquo icquimbi cuncac cuëte ishcuisho isash: “Abi cunquec,” mibi quepec. Adquiobidi isadenquo Nuquin Papan Mayan iquec. Isadenquo icquimbi aidën chuca uaid bëdamboec tabadsho isun: “Nuquin Papan Mayanën nac,” quequin mimbi tantiatsiac. “Nëid utsitsen natsiash,” quequin mimbi tantienquo icnubi Nuquin Papan tantiacpadomboen aton Mayanën utsitsen chuca uatsiandac —quepondash Esus.

<sup>9</sup> Adsho tantiash: —¿Midapadec? —quepondash Nicodemo. <sup>10</sup> Adoquien: —¿Tantienquioda ique? Ma isadaidbo Nuquin Papan chiaid chuibanquid mibi neyoc. <sup>11</sup> Ènden ushë utsin mibi chedo chiombi. Èmbi isonaidquid chuiquinc ëmbi tantionaidquid chuiquinc caombi. Adsho tantiash: “Tantiadenquo iquec,” ma mibi quebec. <sup>12</sup> ¿Èmbi chuiboed tantiadenquo icnubi padpiden chuiquin ëmbi Nuquin Papan abi yacnoshon naid chuishomenda tantiatsia? <sup>13</sup> Nuquin Papa yacno matses nidtanambo iquec. “Istanombi. Nadquo iquec,” quequin chuitiapimbo matses iquec. Èmbien Nuquin Papa yacnuësh chonaidënuquo: “Nadquo iquec,” quequin Nuquin Papa tantiamendac. <sup>14</sup> ¿Atotsi canuen nuquin tsusedpa Moisesën nisibimboecnuc shocosh nacnenaidec dectampampic? “Nuquin Papan chiapadec ma aid isec nisin piad bëdanu,” quequin cuesten dectampampic. Adomboembidi matses cuidmenquo icnuec cuesten dectamëdendabi ëbided cuidadec unësec. <sup>15</sup> Èbi tantiaquido unësacsho cuidenquo icquin Nuquin Papa yacno ëbëd tabadmenuc adendabi —quepondash Esus Nicodemo chiec.

#### *Nuquin Papan matses abitedi tantiaquin naid*

<sup>16</sup> Aden Esusën abided ciudadec unëste chuipondash. Nuquin Papan: —Ma adec abided ciudadec unësnu —quequin Esus chomepanëdash. —Unësquio iquec —quequin matses abitedi tantiaquidquio icquin Nuquin Papan cudasenquio icquin matsesmeshun aton Mado abentsëcquiobi abided cuidpanëdash. —Ëmbi adoaid con Mado tantiaquid unësacsho icsaido cuidacno nidmenquio icquin ëbëdi tabadmendambi —quequin aton Madoded cuidpanëdash. <sup>17</sup> ¿Matses cuidnuenda Nuquin Papan Esus matsesmepanëdash? Padenquio. Matses cuidenquio icnuen napanëdash.

<sup>18</sup> Aden aton Mado Esus tantiaquido cuidenquio icquin Esus tantiesabo cuidendac: —Con Mado chieshëmpec —queshun. <sup>19</sup> Nuquin Papan matsesmiadën Esusën abi icsaid chuisho matses icsambo icquidon tantiatiapimbo iquec. Ambi icsamboen naid ëntiapimbo icquin Esus tantiatiapimbo iquec. <sup>20</sup> Adquidon: —Ëbi icsaid Esusën utsibo tantiamenushe. “Icsambo iquec,” ëbi canushe —queshun Esus chieshëmpec. <sup>21</sup> Nuquin Papan chiapadec tabadquidombien Esus chieshënenquio iquec. —Nuquin Papan namiapadec tabadquid nebique. Ma Esusën ëmbi bëdamboen naid chuibampanuna —quiash Esus tantiate bumpec.

#### *Uan acten mentoanquidën Esus chuioaid*

<sup>22</sup> Adec Nicodemobëd onqueboshien Esus nidpondash. Edusaden yacnuësh nidec aid nidaidëmbi Udeya caidën capucueniondash. Abëd nidshobini Nuquin Papan chiaid Esusën chuibampondash. Adec nidshun Nuquin Papa tantiabenquido acten mentobeniondambi. <sup>23</sup> Adnubien adomboembidi con shënisionsen acten mentobeniac caondash. Enon caid yacnoshon Sadin caid anoentsëqui chunquen diadacnoshon matses dadpen acten mentoac caondash con shënision. <sup>24</sup> Chieshëmënquidon quënën nauedabi adoac caondash.

<sup>25</sup> Adnubien con shënisioabëd icquido con matses utsibëd: —Mimbi icsamboen chiec —quec chushcananac caondash. Con shënisioabëd icquido: —Uanën Nuquin Papa tantiabenquido bëdamboen acten mentobamposh —quesho tantiash: —Padenquio. Esusëmbien bëdamboen acten mentobaniosh —quepac caondash. <sup>26</sup> Adshumbien con shënisioabëd icquidon: —Nuqui chuiquid chiec nidnu. Nid —quianec nidquin con shënisio chuituidpac caondash. —Acte Odan caid uquë cuëmatsiucshun ¿mitsicquid: “Nuquin Papan chomiaid nec,” mimbi cadio? Aidën mimbi naid dëniacquin matses dadpenquio acten mentobeniac caosh. ¿Ada bëda icpec? —caquien: <sup>27</sup> —“Nuquin Papan chiapadomboen Esusën nash. Adomboembimbi naic,” quesahun Esus chieshëntiapimbo iquendabi. <sup>28</sup> “Nuquin Papan chomiaidpenquieni nec,” quequin mibi chiondambi. “ ‘Nuquin Papan chomiac bëdamboshë icquid choendac,’ quequin bëyuc choshon aid chiec nebi,” quiondabi mibi chiec. <sup>29</sup> “Ëmbi chuibod nec,” quiash Esus chosho istanec cuishonquepobi. “Con matses aton chido bedmiombi,” quiash cuishonquiacbimboec cuishonquepobi. ¿Aden chido bedmequidën: “Min bënëbëd nidenda,” caquinda ictiosh? Padenquio. Bënëbëd nidmiash bëdambo yacbimboec Esusbëd nidanesho isash bëdambo iquebi. <sup>30</sup> Ëmbibi Nuquin Papan chiapadomboen Esus tantiamequin ënquin chuibanuc ëmbi acten mentoaido daëdpactsëc yanendac. Ëmbi chuibodquio Esus tantiaquidoen dadpenquio yanendac. Aidquio bëdamboshë iquec —quepac caondash con shënisio abëd icquido chiec.

#### *Nuquin Papa yacnuësh choquid chiaid*

<sup>31</sup> Adshumbic con shënision naden chuipac caondash. —Esusquio bëdamboshë iquec. Nuquin Papa yacnuësh choquid abipadquid utsi nibëdec.

Padnueni matses yec: “Nuquin Papa isondambi. Nadquio iccondash” quequin chuitiapimbo iquebi. Esusëmbien <sup>32</sup> ambi isondaidbëdta ambi tantiondaidquio chuipec. Aden chiaqui matses dadpen: “Abimbo caic,” quenquio icpec. <sup>33</sup> Esus tantiaquidon: “Nuquin Papa muesambo nec. Ambi: ‘Bëdamboshë icquid choendac,’ quequin dada uamepampidquio Esus nec,” capec. <sup>34</sup> Nuquin Papan chomiaidquio icquin Nuquin Papan chiaidquio Esusën chuibanec. Nuquin Papan aton Mayan abëd tabadmiaid icquin comapenen tantiaquin ismebanquin chuibanec. <sup>35</sup> Ambi tantiaidquio icsho aton Papan abitedishun Icbombo icmiac. <sup>36</sup> Adnuc: “Abitedishun Icbombo Esus nec,” quequin aton Mado tantiaquido unësacsho Nuquin Papan abëdi tabadmendac padpidec unësenquio icnuc. Esus chieshënkuido en Nuquin Papa yacno isenquio yec icsaido cuidquiacno nidendac —quequin con shënision chuipac caondash.

## 4

### *Acte uequid chido Esusën chiaid*

<sup>1</sup> Esusbëd icquin Nuquin Papa tantiabenquido acten mentobanondambi. Adnubien con matses chuiquido padiseyo caidon: —“Uan acten mentoanquidën naid dëniacquin Esusën matses dadpenquio acten mentobanosh,” quiosh —qeshun Esus chieshëmpac caondash. <sup>2</sup> Esusën nainquio icnuc ëmbimbo nasho isun chiaqui aden Esus chieshënac caondash. <sup>3</sup> —Mibi adosh —cac: —Con nidaidën nidnu —quianec nidondash Esus. Aid nidaid Udeya caid yacnuësh nidec aton nidaid Cadidia caid yacno nidondash.

<sup>4</sup> Aid podquedën nidequi nidaid utsi yacno Samadia caid yacno nidpondash. <sup>5-6</sup> Adëc nidquin ushë cuembo icnuc shubu dadpen icquid Sicad caid yacno istuidpondash. Aid anoentsëqui con tsusedpa Acobon tied uampid icpondash. Aid tied caic: —Ëbi unësan nëid tied: “Con na nec,” cata, mado —quequin aton mado Ose chiampid tied niondash. Ambo aidën uëdëshcampid acte uete icpondash. Aid dayunquiobi: —Tiboquenu —quec Esus tsadtuidpondash. <sup>7-8</sup> Adëc tsadtuidnubini: —Pete bedtanu —quianec shubuno nidanepondac. Esus abentsëqui nianec nidaniondabi. Adëc nidan Samadia yacnocquid chido acte uec choquin Esus tsadsho istuidpaccondash. Choshobien Esusën: —Acte beccho. Acnu, champi —caquien: <sup>9</sup> —“Acte beccho,” ¿caquindabi ique? Ma isadaidbo mibi nepayoc. ¿Isadaidbo icquindabi: “Acte beccho,” cai? capac caondash acte uequid chidon. —Samadia yacnocquidbëd onquesambo isadaidbo nec —quequin tantiec adac caondash.

<sup>10</sup> Adshobien Esusën badedquio cuembo chienquio icquin chuipac caondash. —Nuquin Papan bëdamboen isquin naidbëdta ëbi tantiaquin: “Acte beccho,” mimbi ëbi catsiac. Adsho acte bëdambo icmianquid mibi acmetsi-ambi —quepac caondash Esus. <sup>11</sup> Adoaquien acte uequid chidon actembo ca danquin: —¿Mitsipaden acte ueshun ëbi menetsia? Ma min tëchu nibëdpayoc. ¿Midapaden mimbi uetiapimboen acte uquëducquio iquec? ¿Mitsimbo acte bëdambo icmianquid ueshun ëbi acmetsia? <sup>12</sup> Nëid acte nuquin tsusedpa Acobon uëdëshcapampid nec. Aton yuabobëdtan aton bacuëbon acpampid nec. Nuquin tsusedpa bëdambo icquin nampid icnuc ¿mitsipadquidquio icquin nai? ¿Bëdamboshë icquid icquinda mimbi acte bëdamboshë icquid ëbi acmepatsia? —capondash acte uequid chidon. <sup>13</sup> Adoaquien: —Nëid acash mibi bundoaic. <sup>14</sup> Ëmbi acmiac mibi bundoenquio ictsiac. Acte bëdambo icmianquid acmiac ënëdenquio yec tabadquid mibi yantsiac —quepac caondash Esus badedi cuembo chienquio yec. —Ëbi tantiaquidobëd con Mayan tabadmiac bëdambo yanec unësacsho ëbëdi tabadmendambi —quequin tantiec adac caondash.

<sup>15</sup> Adsho tantiashun padpiden acte ca danquin: —Adquidquoio ëbi acme. Bundoenquoio yec nëmbo acte uec choenquoio ictsiabique —caquien: <sup>16</sup> —Min bënë bedtan —capac caondash Esusën. —Nuquin Papan chomiaidquoio yec comapenen tantiaquid mibi nec —camenuen adoac caondash. <sup>17</sup> —Min bënë bedtan —caquien acte uequid chido: —Con bënë nibëdec —quepac caondash. Adshobien Esusën: —Abimbo mimbi caic. Min bënë nibëdec. <sup>18</sup> Dada mëdante auc abentsëctedquiobi min bënë icpadenec. Aidon mibi niambudnian nëbi mibëd icquid min bënëpenquoio nec. Abimbo mimbi caic —quepac caondash Esus.

<sup>19</sup> Adsho tantiash: —Isambobi comapenen tantiaquidien mibi nechitec. Mibipadquidquoio chiec: “Nuquin Papan chomiaidquoio nendac,” quepec con matses. Adquid icquin en ëbi chui. ¿Mitsishunquiemi Nuquin Papa bëdamboen tantiape? <sup>20</sup> Con matses: “Nëmboen Nuquin Papa iquec. Nëid macuësh dapanshunuidtsëqui Nuquin Papa tantiac bëdambo ictsiash,” quepec. Min matsesien: “Edusaden yacnoshonuidtsëqui Nuquin Papa tantiac bëdambo ictsiash,” quepec —quepac caondash acte uequid chido. <sup>21</sup> Adsho tantiashun Esusën: —Tantia. Mibi bëdamboen chuinu. Nëbi nëid macuësh dapanshunuidtsëqui Nuquin Papa tantienquoio icquin Edusaden yacnoshonuidtsëqui tantienquoio icquin nidaid utsi-utsiec yacnoshon adembidi Nuquin Papa tantiabededendac. <sup>22</sup> Min matsesën Nuquin Papan chiaid daëdpactsëc tantiatsëcshun Nuquin Papa bëdiactsëc tantiatsec. Con matses isadaidbombien Nuquin Papan chiaid dadpen tantiashun: “Nuquin Papan chomiaid nuquin matses bëdambo icmianquid nuquin matsesën tishendac,” quequin bëdamboen tantiec. <sup>23</sup> Nëbien utsin-utsinquien muainquoio icquin: “Con Icbo nec,” quequin Nuquin Papa tantiendac. Ambi chiacpadec bëdamboec tabadsho isash: “Adquid ëbi tantiaquidquoio nec,” quetsiash Nuquin Papa. <sup>24</sup> “Nuquin Papa tantiaquid ictiadquoio iquebi,” quequidën Nuquin Papan Mayanën tantiamiacpadomboen abi tantiaquin ambi chiacpadomboen naquid nendac —quepac caondash Esus acte uequid chido chiec.

<sup>25</sup> Adsho tantiash chido: —“Nuquin Papan matses bëdambo icmequid chuiquid dapa chomendac,” quequin chuisho tantiondambi. Aid mesias caidi utsibon quidistu caposh. Aidëmbi nuqui tantienquoio yaidtedi tantiametsiash. Aidbimboecquidien mibi nechitec —caquien: <sup>26</sup> —Mimbi chiaidquiobini nec —quepac caondash Esus chido chiec.

### *Esus Samadia yacnocquido chiec tabadaid*

<sup>27</sup> Adnubini pete bedtanec chopondac. Adshun isquien chidobëd onquepec. Adsho isash: —¿Atotsi chiec chidobëd onquepec? —quepondabi utsibëd otacquoio onquec. —¿Atotsi chiec chidobëd onquoio? —cainquoio iccondambi Esus. <sup>28</sup> Adec ëbi chonobi tëchu nianec acte uec choquid chido nidpondash aton matses chiec shubuno nidec. <sup>29</sup> —Isec cho. Ëmbi isacmaid dadan ëmbi naid abitedi chioshi. ¿Nuquin Papa yacnuësh choquid Quidistu caidta nioshe? En isec cho —catuidac: <sup>30</sup> —En isnu. Nid. Aidien nechitashe. Isnu —quianec matses dadpen cho-chopondash.

<sup>31</sup> Aido choabi icnubi: —Në pete, Icbo —ëmbi caquien: <sup>32</sup> —Padi. Mimbi tantienquoio yaid con na utsi iquec —quepondash Esus petepenquoio chiequi. <sup>33</sup> Adsho tantiashini pete ca danec: —¿Utsibonda pete bëshumpash? —quecuededpondac ëbitedi. <sup>34</sup> Adsho tantiash Esus: —Ëbi cuishoncamete utsi iquec. Ëbi chomiondaid Nuquin Papan chiacpadomboen naic bëdambo iquebi pete piachimboec. Ambi chiaidtedi nainuec dayacquio iquebi —quepondash. <sup>35</sup> Adashic padpidec: —“Ushë daëd-daëdquiecnuc nidmeshun



nadquid adosbiecquid ëshëacsho bedembi,” quepec nuquin matses. Adosbiecquid ëshëacpaden ¿yuecshunda nëmbo icquidon ëbi tantiabempec? Padenquio. “Nëidon Esus tantiendac,” mimbi cacmaidobi cho-choeque. Is. <sup>36</sup> Acte uequid chido ëmbi chuiboedën chiac matses dadpen cho-choeque. Chuibanuna. Ëbi tantiash Nuquin Papabëd tabadtequid yanendac. Adsho isash nuqui cuishonquendac piucquid bedashbimboec. <sup>37</sup> Tied icbon: “Con na peta,” cac ambi nidtsinacmaid matsesën bedec. <sup>38</sup> Aden ambi nitsinacmaid bedacbimboen mimbi naic. Utsibomba Nuquin Papan chiaid chuibanëdaido nëmbo icquido mimbitsen chuibanec. Adoac nëmbo icquidon Nuquin Papabëdta ëbi tantiabenec. Cho-choeque. Is. En chuiban —capondash Esusën abëd icquido chuiquin.

<sup>39</sup> Adnubien Esusbëd onqueboed chidon chuitanaido cho-chopondash. —“Comapenen tantiaquin ëmbi naid abitedi chioshi,” quioshe. Nuquin Papa yacnuësh choquidien nechitashe. Isnu. Nid —quianec cho-chopac caondash. <sup>40</sup> Cho-choquimbi badedi: —Ëbi yacno ushquin chiec cho —quequin beduanac Samadia yacno tabadquin chuibampondash Esusën. Aid matses chiec ambo daëdec ushpondash. <sup>41</sup> Aden Esusën chuisho tantiashien: —Nuquin Papa yacnuësh choquid Esus nec —quiampondash anocquido dadpen. <sup>42</sup> Adashic acte uequid chido chiec: —Mimbi chuishouidi tantiaboedëmbi nëmbo aidënquio chuisho bëdamboen tantiaquioc. “Nuquin Papa matses bëdamboen ismequid nec,” quequin tantiembi —quiampondash Samadia yacnocquido dadpen.

### *Chuiquid dapan mado Esusën bëdamiad*

<sup>43</sup> Daëdec ushanec Samadia yacnuësh Esus nidondash. Abi caniondacno nidaid Cadidia caid yacno nidpondash. <sup>44</sup> —Ëmbi chiacpaden abi caniondacnoshon Nuquin Papan chiaid chuibanquidën chuisho aton matsesën tantienquio iquec. Con nidaidën nidsho con matsesën abi chuiquid dapa icmetiapimbo icpebi —quianec aton nidaidën chopondash. <sup>45</sup> Adsho isun: —Tantiesa nendac —Esusën caboedombi abi bëdiactsëc tantiatsëccondash. —¿Choecta icco? Nuquin Papan nuquin tsusedpabo unës uainquio icquin matamiampid inchësh tantianuec Edusaden yacno nidshun mimbi nadatiambo icquin nabansho isondambi —quepondash abi bëdiactsëc tantiatsëcquido Esus chiec.

<sup>46</sup> Adec aton nidaidën nidequi ambi actequid uaondacno Cana yacno nidpondash Esus. Adnubien shubu dadpen icquid utsi Capednaun caid yacno con matses chuiquid dapa icpac caondash. Aidën mado unës-tiadtsëcquio yampac caondash. <sup>47</sup> Adashic: —Esus Udeya yacnuësh choac caoshe. Istanu —quianec chopac caondash unëstiadtsëcquio icquidën papa. Adec Esus yacno choshombien: —Con mado unëstiadtsëcquio iccoshe. Bëdamec cho —caqui <sup>48</sup> nidenquio yec abi datsidadquido chiec: —Ëbimbo mimbi tantienquio iquec. Ëmbi bëdameteuidtsëqui mimbi tantiec. Ëmbi comapenen tantiaquin nabansho isunuidtsëqui: “Nuquin Papan chomiaidien nechitec,” quequin mimbi tantiec —quepondash Esus.

<sup>49</sup> Adec onqueshobien abi niacbidanquin padpiden: —Baded cho. Con mado unëstiadtsëcquio iccoshe —capondash. <sup>50</sup> Adoquien Esus: —Padi. Min mado unësenquio ye. Nidec nid —quesho tantiash: —Abimbo caic —quianec nidpondash. <sup>51</sup> Adec nidquimbi abi chuinuec cho-chosho aton yuabo bëquedac caondash. Aden bëquedaqui yuan: —Min mado bëdanosh —quesho tantiashun: <sup>52</sup> —¿Mitsimbo ushë icnuc con mado bëdanosh? —cac: —Ënden ushë yaquëduidtsëcnubi da una yantsëcnubi bëdanosh —quepac caondash

aton yuabo. <sup>53</sup> Adsho tantiash: —Adënquioshendabi: “Min mado unësenquoio ye. Nidec nid,” caposh Esusën —quepac caondash unëstsemboedën papa. Adshun: —Nuquin Papan chomiaidquoio yec comapenen tantiaquin nabanquidquoio Esus nec —quequin aton shubun icquidobëdtambi Esus tantiapac caondash. <sup>54</sup> Adec Udeya yacnuësh choash Cadidia yacnobidi ambi uba chinaid actequid uaquin ismequin tauaondacnobidi tabadquin bédamequintsen Esusën ismepondash.

## 5

### *Esusën dada icsatsaid bédamiaid*

<sup>1</sup> Yuecquoio ictanec Esus: —Edusaden yacno cuëdënuec nuquin matses chochoeque. Nuquitsen nidnu. Nid —quianec nidanepondash. <sup>2</sup> Shubu dadpen icquid Edusaden caid dacuenadquin daquënë uaid puduedte shëcuë dadpen icnuc abentsëc obeca puduedte caid icpondash. Aid anoentsëqui acte tiquidimbo icquid icpondash. Aid con onqueten Betesada capondash. Ambobi daicsaido tabadte shubumpi mëdantetedi icpondash. <sup>3</sup> Acte nënantanquoio icnuc dacuenadquiec shubumpi tabadquidën matses dadpen tabadpondash daicsaidouidquoio. Bëshuaido yec capuenquoio icquido yec canite tsasiaido yec quec tabadpondash. <sup>4</sup> —“Nuquin Papan abi yacnoshon uaid mayan bédan tēccuascaid acten abia mentoadquid bédanquid,” quedeneque. Tēccuascaic ma chobono —quiash cainec tabadpondash.

<sup>5</sup> Adnubien Esusën ënden caniaidquoio ambobi uesho istuidpondash. Èndenquimboshë aton dada icsabudash seta dadpen 38tedquiobi matamec capuenquoio yec icsabudtsaidquoio nepondash. <sup>6</sup> Adsho istuidshun: —Èdenquoio daicsabudaid nec —quequin tantiashun: —¿Bëdanteda bune? —catuidpondash Esusën. <sup>7</sup> Adoaquien: —Ai ¿mitsipadequini bédampe? Èbi bëdiactsëcquoio nidnuc utsiba badedquoio mentoadteniosh. Èbi buanquin mentoquid nibëdec —quepondash daicsatsaid. <sup>8</sup> Adshobien Esusën: —Min ushte nacentanquin buanec nid —cac <sup>9</sup> badedquoio aton dada bédantanquin aton ushte buanec nidpondash. Aid ushë chonoadenquoio icte ushë niondash.

<sup>10</sup> Aden buanshobien con matses chuiquidon: —¿Chonoadenquoio icte ushënda ushte buampaid? Chonoadte ushëmbien ushte buanquid. Tsusedpabon dada uapampid ma mimbi niacpayoc —quequin chushcapac caondash. <sup>11</sup> Adoaquien: —Èbi bédameboedën: “Buanec nid,” cac mambi naiyoc —quepac caondash Esusën bédameboed. <sup>12</sup> Adsho tantiashun: —¿Tsuntsin naosh? —caquien: <sup>13</sup> —Tsaudi. Èmbi isacmaid èmbi isquiambobi badedquoio nidaccosh matses dadpen icnuc —quepac caondash bédameboed.

<sup>14</sup> Adshumbic Nuquin Papa tabadte shubu uashunaid daquënë uacno puduedshun ambi bédameboed daicsacboed Esusën istuidpondash. Istuidshumbien: —Tantia. Mibi chuinu. Èmbi bédameboedquoio mibi neque. Mimbi icsamboen naid ënash bédambo icta. “Nuquin Papan cuidquiac bédanenquoio yec daicsabudquoiochitomane,” quiash adta —capondash Esusën.

<sup>15</sup> Adoaquien bédameboed abi: “¿Tsuntsin naosh?” caboedo chiec nidpac caondash. Nidshumbic: —Èbi bédameboed Esus niosh —quequin chuituidpac caondash. <sup>16</sup> Aden chuisho tantiatanequien: —Chonoadenquoio icte ushënuidi bédamepac caosh. Icsambo iquec —quequin con matses chuiquidon Esus chieshëmpac caondash. <sup>17</sup> Adnubien: —Mibi adosh —quesho tantiashun abi chieshënuquido istuidshun Esusën naden chuipondash. —Mimbi Nuquin Papa caid con Pa ënenquoio icquin matses nashunquidquoio nec. Adecbidi ënenquoio icquin matses nashunquidquoio nebi. Chonoadenquoio

icte ushëmbidi con Pabëdtan adoquid nebi —quepondash Esus. <sup>18</sup> Adsho tantiatanequien: —“Chonoadenquio icte ushën naquid icsambo iquec,” nuqui caboedquio: “Nuquin Papambo con pa nec,” quiosh. Adquid icsamboshë iquec. “Nuquin Papapadquidquio nebi,” quechitequien nioshe. Cuesunequimbien ictiad —quepac caondash con matses chuiquido.

*Nuquin Papan Mado nebi, quiaid*

<sup>19</sup> Adec abi chieshënquido abi cuesunete bunshobien padpiden istuidshun chuipondash Esusën. —¿Ëmbimbo naidtambi nadio? Padenquio. Con Pan nasho isun aidën nacpadomboen mambi naboc. Adomboembidi Con Pan nacpadomboen naimbi. Ëmbentsëqui natiapimbo iquebi. <sup>20</sup> Ëbi tantiaquin Con Pan ambi naidtedimbo ëbi tantiamec. Ambentsëqui nainquio iquec. Aidën tantiamiacpadomboen bëdiactsëc naquin nëid capuenquio icquid bëdamiombi. Adembidi ambi tantiamiacpadomboen naquin dacuëdampamboecnuc naindambi ma isquionoeshun. <sup>21</sup> Con Papadquidquio yec unësaid uincuemequidquio nebi. Matses ëmbi tantiaidotedi ëbëdi tabadmenuen uincuemendambi. <sup>22</sup> ¿Ëbi tantiesabo cuidnuen ambiuidtsëqui chuiquidta con Pa nedic? Padenquio. Ëmbien ambi chiacpadomboen naden chiendac. “Nëid nuqui tantiaquid neque. Nuquibëdi tabadmenuna. Nëid ëbi tantiesasa icsambo icsho cuidnuna,” caindambi con Pa. <sup>23</sup> Aidëmbi: “Ëbi tantiacpaden ma con Madotsen bëdamboen tantianu,” qeshun aden matses cuidte chuiquid icmiondashi. Ëbi adquid icmiondaid icsho ëbi tantiatiapimbo icquidon ëbi chomiondaid Nuquin Papatsen tantienquio iquec. <sup>24</sup> ¿Muectabi nedi? Abimbo chuinu. Tantia. Ëbi chomiondaid con Pabëdtan ëbi tantiaquid unësacsho cuidenquio icquin ëbëdi tabadmendambi. Cuidtequid icboedi ëbi tantiaash ëbëdi tabadtequid yanendac —quepondash Esus.

<sup>25</sup> Adashic padpidec onquec: —Tantia. Mibi padpiden chuinu. Unësaidën tantienquio yacbimboen ëbi tantienquio icboedombi ëbi tantiabensho bëdamboen tantiamequin bëdamboec tabadquid icmendambi. Adshun aido unësacsho uincuemeshun ëbëdi tabadmendambi. <sup>26</sup> Con Pan icmiacpadequi unësaid uincuemequid nebi. Abibi unëstiapimbo icquid icquin unësaid uincuemequidquio con Pa nec. Ambi icmiacpadquequi abi yacpadquidquio iquebi. <sup>27</sup> Adec unëstiapimbo iccondaiddi matsesash icsaisambo icsho Con Pan matses icsaido cuidquid icmiondashi. <sup>28</sup> Ëbi adsho tantiaashun: “¿Abimbobida capeba? Muequien nechitec,” ëbi cainda. ¿Muectabi nedi? Padenquio. Con Pan tantiacpadënquio ëmbi cuënac unësaidotedi uincuenendac. <sup>29</sup> Adec uincuenacsho ëbi tantiaquido ëbëdi tabadmequin ëbi tantiesabo icsaido cuidacno nidmendambi. <sup>30</sup> Ëmbentsëqui nainquio iquembi. Con Pan chiacpadomboen naquin matses cuidte chiendambi. Matsesën naidtedi tantiaquid icquin adoendambi. Ëmbi naid nainquio icquin Con Pa bëdambo icmenuen aidën chiacpadomboen naimbi —quepondash Esus abi chieshënquido chiec.

*Utsintsen ëbi chiec, quequin Esusën chiaid*

<sup>31</sup> Adshumbic Esusën abi chieshënquido chuiopondash. —Nuquin matsesën naden chiec. “Abentsëcshun chiaid icsambo iquec. Daëdshun chiaid abimbo iquec,” quequin chiec. Aden chiaid tantiec ëbiuidtsëqui: “Nuquin Papan Mado nebi,” qesho tantiaashun: “Abimbo mimbi caic,” mimbi ëbi catiapimbo iquec. <sup>32</sup> Ëbi tantiaquin abimbo chuiquid ma utsi iqueyoc. Nuquin Papambini: “Con Madombo nec,” caindac. <sup>33</sup> Aden ëbi chuiquid utsi acten mentoanquid Uan pado icpadenec. Aidëmbi ëbi abimbo capadenec.

“¿Nuquin Papa yacnuësh choquidta ne?” quequin mimbi chuitanac: “Padenquio. Esusuidi Nuquin Papa yacnuësh choquid nec,” quepadenec Uan pado. <sup>34-35</sup> Aden chieshtoenquio icquin bédamboen chuipadenec. Chuisho tantiatsash mibi bédambo icuidtsëcondac. “Èmbi Uan padon naid chuisho tantiashun: ‘Abimbo mimbi caic,’ èbi capashun. Èbi adosho bédamboen istsiambi,” quequin mimbi tantiondaid Uan caombi. Matses icquimbi Uanën èbi bēdiactsëc tantiamequin chuipadenec. ¿Adquid matsesënuidtsëquidabi abimbo chuipec? <sup>36</sup> Con Pambien: “Con Mado neque. Matses ismenu,” queshun comapenen tantiaquidquio icmepondashi. Ambi adomiaid icquin comapenen tantiaquin nabanquin èmbi ismesho isash: “Ai, adquid nec,” quetiadquidi mibi nec. <sup>37</sup> Èbi chiecbidi onquequin Nuquin Papan nuquin tsusedpabo dada uamepampic. Adecbidi Nuquin Papa onquesho ¿ada mimbi tantiapadio? ¿Nuquin Papada istio? Padambo mimbi iquec. <sup>38</sup> Adembidi ambi dada uamequin chiampidquio ma mimbi bédamboen tantienquio yoc. Aid bédamboen tantiashumbien Nuquin Papan chomiondaid èbitsen mimbi tantiatsiac. <sup>39</sup> Mibi nadpec. “Nuquin Papan chiaid nuquin tsusedpabon dada uampid tantiaquidquio nebi. Aid isbanquid yec Nuquin Papabéd tabadtequid nebi,” mibi quepec. Ma èbimbo chuiquin Nuquin Papan dada uamepampid neyoc. <sup>40</sup> Aden dada uamepampid isbanquidombi mimbi èbi tantienquio iquec. Èbi tantiashoembi mibi Nuquin Papa yacno èbéd tabad-metsiandac. <sup>41</sup> “Èbi adsho tantiashun ma matsesën èbi: ‘Bédambo mibi iquec,’ canu,” ¿quectabi ique? Padenquio. Con Pan chiacpadomboen nanuembimbi aden chioc. <sup>42</sup> Èbi tantienquio icsho isun: “Nuquin Papa tantiesabo nec,” quequin mibi tantiembi. <sup>43</sup> Èmbien Nuquin Papan chiacpadomboen naic. Aden nasho mimbi èbi tantienquio iquec. Utsi: “Nuquin Papa yacnuësh choquid nebi,” quec muaquidien mimbi badedi tantiatsiac. <sup>44</sup> Mibibi tantiadec: “Mibi bédambo iquec,” cananteuidi bunquin mimbi Nuquin Papa tantiatiapimbo iquec. Aden mimbi Nuquin Papa: “Mibi bédambo iquec,” cametiapiambo iquec —quepondash Esus abi chieshënuquido chiec.

<sup>45</sup> Adashic padpidec: —¿Èmbentsëquidambi: “Èbi tantiesabo neque. Cuidnuna,” quequin mimbi naid Nuquin Papa chuipe? Padenquio. Mimbi tantiaidënuquio Moisesëntsen: “Nëido icsambo iquec,” mibi caindac. <sup>46</sup> Aidën chiampid bédamboen tantiaquimbien mimbi èbi tantiatsiac. Aidën chiampidi mabi neyoc. <sup>47</sup> Aden Moisesën chiampid tantienquio icquin èmbi chuiboedtsen mimbi tantiatiapimbo iquec —quequin Esusën abi chieshënuquido chuipondash: —Moisesën chiampid tantiaquidquio nebi —quequido chuiquin.

## 6

*Esusën pete uatanquin 5000tedi pemiaid  
(Mat 14.13-21; Mad 6.30-44; Duc 9.10-17)*

<sup>1</sup> Yuecquio ictaniash Edusaden yacnuësh nidec Cadidia yacnobidi Esus nidpondash. Ambo nidash chian dapa Cadidia caidbidi budash cano antabédtoшон potiacpondash. Aid chiambidi matses utsibon Tibedias capondash. <sup>2-3</sup> Poteshun nandoash pudundoanec macuësh dapa dectatoash macuësh poctsebi tabadtuidpondash. Ambo tabadquin èbi chedo chuipondash. Adnubien Esusën matses dadpen bédamesho isboedo Esus isnuec chochopondash. <sup>4</sup> Nuquin Papan isadaidbo unës uainquio icquin matamiampid inchësh tantianuec pec tabadte ushë nèbi yanuc niondash.

<sup>5</sup> Aido cho-chosho istanequien Esus: —Uedipe, piucquid buanshun ¿mitsimbo pete bedtane nëido pemenun? —quepondash Uedipe chiec. <sup>6</sup> —¿Atoda queque? Tantaranu —quiash adpondash Esus. —Pete bedabi icnuc ëmbibi pete uanu —quequin otacquo tantiequi adondash. <sup>7</sup> Adoaquien Uedipe: —Ma aidtedquo pemetiapimbo yoc. Inchëshën ushë 8tedquiobi nidmec chonoadshun bedaidtedimbo piucquid menequin pete bedshun: “Pemenu,” cac aidtedquo pemiadenquo ictsiash —quepondash Uedipe.

<sup>8</sup> Adnubien Andedesën Petedon utsin: <sup>9</sup> —Ma në madompin panëmpi 5tedtsëc icpayoc, Icbo. Nuëcquidëmpi daëdquiobi ictsec. Matses dadpenquo iquec. Aidtedtsëcquid pemetiapimbo iquec —caquien <sup>10</sup> Esusën: —Padi. Aidi bëdambo iquec. Abitedi: “Nëmbo tabad,” caban —cac: —Nëmbo tabad —cabanac sebad-sebadpambo icquidën uasinën matses dadpenquioshë tabadbudpondash. Dadauidtsëqui tambanac 5000ted icpondash. Chido bacuëbobëdta tambanambo icpondambi.

<sup>11</sup> Adshumbien Esusën madompin pete pamba bedtanquin Nuquin Papa chuipondash. —Pete uaquid yec mibi bëdamboshë iquec. Mimbi uaid nëid pete bëdambo iquec, Papa —quec onquetanquin: —Meneban —cac abëd icquidon tabadquido abitedi menebampondash. Adotanguimbic nuëcquidëmpitsen bedtanquin adembidi Nuquin Papa chuitanquin menebanoapondash. Adoac utsibon ambi piactembî pebedednubi utsibon ambi piactembidi pebededpondash. <sup>12</sup> Aden ambi piactembî pebededacshobien Esusën: —Napi uaid secainda. Sandoshon dayun ua —cac <sup>13</sup> tsitsan dapan napiuaid sandoshon dayun uapondambi tsitsan 12tedquiobi sandoid icnuc.

<sup>14</sup> Aden pemiaquien pemiaido: —Comapenen tantiaquin Esusën pete dadpenquo icmiac. Moisesën chuipampidshenda nepec. “Nuquin Papan bëdamboshë icquid chomendac,” capampidshenda nepec. Aidien nuqui chuiquid dapa icmetiad —quepac caondash Esus tantiamenquo yec. <sup>15</sup> Adsho ambembî tantiashien: —Abi chuiquid icmenuen ëbi “Bednu,” caique. Nëbi abi chuiquid ictiapimbo iquebique. Cuenu —quianec abentsëqui cuempac caondash Esus macuësh dapa dectatoec nidec.

*Esus acte bëntse choaid*  
(*Mat 14.22-27; Mad 6.45-52*)

<sup>16</sup> Esus cuembon inchëshbudtsëqui chian budondabi ëbitedi. <sup>17</sup> —Capednaun yacno nidnu —quec cano antabëdtoshon potenubi inchëshpondash Esus acte bëntse chopanushta. <sup>18</sup> Adnubien cunquequid dapa cunquetuidpondash. Acte comapenec tēccuasquenuc <sup>19</sup> uncadenquo yampondash. Ënapen nidabi nëbi 6 quidometedos cactiontsëqui nidshun isquien matsesbimboec acte bëntse chopec. Adsho istanec dacuëdquiondabi. <sup>20</sup> Adshobini: —Ëbi neque. Dacuëdenda —capondash. <sup>21</sup> Adoac: —Esus nec —quetanquin badedi antsadtomiondambi. Aid antsadtometanquin badedquo potepondambi. Nandoash ambobi ushondabi Capednaun yacno.

*Pemiaidon Esus istuidoaid*

<sup>22</sup> Adnubien abi pemebocnobi matses ushpac caondash. Badiadnuc isucunshun isaquien Esus nibëdec. Nibëdsho isashien: —Ma cano abentsëcquidëmbî abëd icquidon potepaboc. Ma aidbëd nidenquo icpaboc. ¿Mitsimbo nidpash? —quepac caondash pemiaido. <sup>23</sup> Adnubien shubu dadpen icquid Tibedias caid yacnocquidon cano dadpen bē-bēpac caondash. Pete pemebocno anoentsëqui nando-nandosho isash: <sup>24</sup> —Potequimbien Esusën yashe. Nëid canobi antabëdtoshon potenuna —quetanec antabëdtoshon potiac-potiacpac caondash.

Potiac-potiacash Capednaun yacno pudundoshon <sup>25</sup> Nuquin Papan chiaid chuibante shubun abitedi puduedshun Esus istuidpondash. Istuidshun: —¿Mitsipaden potio, tsusio? —caquien: —Naden —quenquo yec: <sup>26</sup> —Tantia. Mibitedi chuinu. ¿Ëbimbo tantianuecta chodio? Padenquo. Ëmbi pete uasho isash: “Nuquin Papan namiaidën naoshe. Istanu,” ¿quecta ictio? Peteuidtsëqui tantiaquin ma mimbi ëbi nibëneyoc. <sup>27</sup> Peteuidtsëqui tantiaquin pete bednuen naquidquo ma mibi neyoc. Aidquo chodquetequid nendac. Chodquetiapimbo icquid tantiaquin bëdamboen nata. Aden nash ëmbi icmiacpadquiec Nuquin Papabëd tabadtequid mibi yanendac. Nuquin Papan: “Con Mado neque. Ismenu,” quequin namiacpadomboen comapenen tantiaquid icquin mibi adquid icmetsiambi —quepondash Esus. <sup>28</sup> Adsho tantiash: —“Nuquin Papan chiacpadomboen nata,” quepequien mibi iquec. Adomboen natiadquo icquin ¿atotsimbi nape? —caquien: <sup>29</sup> —Nuquin Papan chiacpadomboen natiadquo icquin ambi chomiondaidquo tantiata —quepondash Esus ambi pemiaido chiec.

<sup>30</sup> Adoaquien: —¿Mimbi aden chuishouididambi: “Adquid nec,” quequin tantiape? ¿Atotsi utsi comapenen tantiaquin mimbi ëbi ismepatsia? <sup>31</sup> “Ëndenquimboshë pete nibëdacnoshon Moisesën con tsusedpabo nibëdbëdi sequiaid pete pemianepampic,” quequin dada uapampid isombique. Adquid nacnenquin ëbi isme —quepondash pemiaido peteuidtsëqui tantiec. <sup>32</sup> Adoaquien Esus: —Nuquin tsusedpa Moisesën nainquien icpampic. Con Pambien aden pemepampic. Nëbi ambi chomiondaid petebimboecquid utsien Nuquin Papan mibi tantiametiadquo iquec. <sup>33</sup> Aid petebimboecquidën matses bëdambo icmetsiash pete piacbimboecnuc —quepondash Esus abibi cadequi.

<sup>34</sup> Adsho tantiash petembo ca danec: —Ënenquo icquin adquid ëbi pemeta —quepondash pemiaido ambi peboeuidtsëqui tantiec. <sup>35</sup> Adshobien Esusën: —“Ëbiuidtsëqui petebimboecquid icquin matses bëdambo icmequid nebi,” caimbi. Ëbi tantiaquid ënenquo icquin bëdambo icmendambi petebëdi acte bundoenquo yacbimboecnuc. <sup>36</sup> Ëmbi chuibocpadomboen ma mimbi ëbi tantienquo icboc. Ëmbi comapenen tantiaquin nabansho isumbi ma mimbi ëbi tantienquo icboc. <sup>37</sup> Utsibombien ëbi tantiendac. Nuquin Papan tantiamiaidtedishun ëbi tantiasho bëdamboen isquin cacumenquo iquendambi. <sup>38</sup> ¿Ëmbi tantiacpadomboen naquidtabi nedi? Padenquo. Nuquin Papan chiacpadomboen nanuec mabi abi yacnuësh chondac. <sup>39</sup> Aden aidën chiacpadomboen nanuen ëbi tantiaquido unësacsho uincuemeshun cuidenquo icquin ëbëdi tabadmendambi. Unësaid abitedi uincuemete ushën adoendambi. <sup>40</sup> Nuquin Papa bunacpaden ëbi tantiaquido uincuemeshun Nuquin Papa yacno ëbi tabadacnombo tabadmendambi —quepondash Esus ambi pemeboedo chiec.

<sup>41</sup> Adec: —Nuquin Papa yacnuësh chonaid yec petebimboecquid nebi —quesho tantiashien con matses chuiquido: <sup>42</sup> —¿Adquidida nepec? Ma icsamboen chuipayoc. ¿Nuquin Papa yacnuësh choaidta nedic? ¿Nuqui isacmaidta nedic? Ma Esus cuëmëdquid neyoc. Ma Osen mado neyoc. Anitsen tantiembi. Matsesën tishaid Nuquin Papa yacnuësh choquid ictiapimbo iquec —quecuededpondash.

<sup>43</sup> Adshobien Esusën: —Shoshquetsëcquin ëbi icsamboen chienda. Abimboembi caoc. <sup>44</sup> Ëbi chomiondaidën Nuquin Papan tantiamiabi yaido icquin mimbi ëbi tantiatiapimbo iquendac. Nuquin Papan tantiamiaid icquin mimbi ëbi tantiatsiac. Aden Nuquin Papan ëbi tantiamiaido unësacsho

unësaid uincuemetete ushën uincuemendambi. <sup>45</sup> Aden Nuquin Papan tantiamete chuiquin nuquin tsusedpan dada uapampic. “Nuquin Papambien ambi bédamboen iste matses tantiamendac,” quequin chuipampic. Aden Nuquin Papan tantiamiaido ëbi tantiaquido yantsiash. <sup>46</sup> “Ambi tantiamiaidën matsesën Nuquin Papa isplash,” quenquo iquebi. Ëmbiuidtsëqui abëd icquin Nuquin Papa isondambi. Aden abëd icquin abi isondaidi matsesondabi —quepondash Esus: —Matsesi nec —abi caquido chiec.

<sup>47</sup> Adashic padpidec: —Abimbo caombi. Ëbi tantiaquido Nuquin Papa yacnombo ëbëdi tabadmendambi. <sup>48</sup> Petebimboecquid icquin aden tabadmendambi. Adecbidi bédamboec tabadmianquid nebi. <sup>49</sup> Nuquin tsusedpabon pete utsi nibëdacnoshon mana caid pepampic. Aid pequidi tsusiobudash unëspampic unëstiapimbo icquid yanabi. <sup>50</sup> Petebimboecquid utsien Nuquin Papa yacnuësh chondaïd nëmbobi iquec. Aid piash ëmbi chiacpadquiec padpidec unësenquo yec Nuquin Papabëd tabadtequid yanendac. <sup>51</sup> Adquidquo nebi. Con nami piash matses unëstiapimbo icquid yanendac. Adquidquo matses icmenuc ëbided cuidadquin con nami menendambi —quepondash Esus ompoacbimboen chiec. —Ëbi tantiaquido nëbi bédamboen tabadmeshun unësacsho Nuquin Papa yacno ëbëdi tabadmendambi padpidec unëstiapimbo icnuc —quequin tantiec: —Petebimboecquid icsho ëbi piash matses unëstiapimbo icquid yanendac —quepondash Esus. —Ëbi tantiaquido cuidmenquo icnuc ëbided cuidadec unësendabi —quequin tantiec: —Con nami menendambi —quepondash Esus.

<sup>52</sup> Adec: —Con nami piash matses unëstiapimbo icquid yanendac —quesho tantiasien namimbo ca danec con matses chuiquido onquecuededpondash. Utsi-utsiec: —¿Mitsipaden Esusën aton nami nuqui pemepatsiash? Aidquo tantiatiapimbo iquebi —quecuedednubi utsi-utsiec: —¿Atotsi chuitiadquo yec niosh? Chuisho tantianu —quecuededpondash. <sup>53-54</sup> Adsho tantiashun Esusën ambi chiacpadomboembidi chuioapondash. —Tantia. Mibi chuinu. Matses tantiaquidquo nebi. Aden tantiaquiec ëbided cuidadec unësendabi. Ëbi adec unëso isun con nami pequinc con intac acquinc cash nidaidënuësh bédamboec tabadquid yanash Nuquin Papabëd tabadtequid mibi yanendac. Adquid icsho unësaido uincuemetete ushënquo uincuemendambi ëbëdi tabadmenuc. Ëmbi chiacpadomboen nainquo yash Nuquin Papabëd tabadtiapimbo mibi iquendac. <sup>55</sup> Ai, con nami petebimboecquid nec. Con intac actebimboecquid nec. ¿Petebëdi acte naimëdanda mibi bédambo icpatsia? Adecbidi con intac chididiquec con nami icsabudec ëbided cuidadec unësaid tantienquo yec mibi bédamboec tabadtiapimbo iquendac. <sup>56</sup> Aden ëmbi namibëdta intac chuisho bédamboen tantiashun ëmbi chiacpadomboen matsesën natiadquo yanendac. Adsho isun aidbëd tëshnanenquo icquin bédamboec tabadquid icmendambi. <sup>57</sup> Nuquin Papa unëstiapimbo icquid yec matses uincuemequidquo nec. Aidën chomiac ambi namiacpadomboenuidi naquin ëbi tantiec tabadquid unësacsho uincuemequin unëstiapimbo icquid icmendambi. <sup>58</sup> Aden ëmbi naid tantiamenuc: “Nuquin Papa yacnuësh chondaïd petebimboecquid utsi iquec,” quiobi. Ëbi adquid icsho isash ëbi tantiaquid Nuquin Papabëd tabadtequid yantsiash. Nuquin tsusedpabon pepampidpadquidpenquo nebi. Adquid pequidi tsusiobudash unëspampic. Ëbi tantiaquidien padpidec unëstiapimbo icquid yanendac <sup>59</sup> —quepondash Esus Nuquin Papan chiaïd chuibante shubunuësh Capednaun yacnuësh.

*Abi tantiauidquidon Esus nianondaid*

<sup>60</sup> Adec: —Con nami pequinc con intac acquinc cash mibi bēdambo ictsiac —Esus qesho tantiashien abēd icquido utsi-utsiec: —Aidēn chiacpadom-boen natiapimbo iquebi. Icsamboen chiec —quepondash Esus tantiamen-quo yec. <sup>61</sup> Adec onqesho ambembi tantiash Esus onqueoapondash. —¿Ēmbi chuiboed tantiash chieshtotiadquioda ique? <sup>62</sup> Nuquin Papan mat-sesmiaid yequi unēsash ēbi iccondacno ēbi nidacsho isash ¿atoda mibi quen-dac? Abimbo caombi. Nuquin Papa yacnuēsh chondaidini nec. <sup>63</sup> Namimbo intacquiobēdta ca danequien mibi nec. ¿Namimbo pequinc intacquo ac-quinc cashta mibi bēdambo icpatsia? Padenquo. Nuquin Papan Mayanēn ēmbi chuiboedbēdta ēbi tantiamequin matses bēdamboec tabadquid icmetsi-ash. Adoaid unēsash Nuquin Papa yacno ēbēdi tabadtsiash —quepondash Esus cuembo chiec. <sup>64</sup> Adashic padpidec: —Ēmbi aden bēdamboen chiaqui utsin-utsinquien mimbi ēbi tantienquo yanendac —quepondash abi tanti-aidquido chiec. Aido tauamboec abēdi nidnuc: —Nēidēn ēbi tantienquo yanendac. Nēid utsin ēbi chieshēnquido ēbi bedmendac —quequin ambembi Esusēn tantiapanēdash.

<sup>65</sup> Adashic padpidec: —Ēbi tantiauidquido tantiaquin naden chiombi. “Nuquin Papan tantiamiabi yaidēn ēbi tantiatiapimbo iquendac. Nuquin Papan tantiamiaidēnquien ēbi tantiatsiash,” quequin chiombi —quepondash Esus. <sup>66</sup> Adsho tantiashun dadpenshun Esus nianondash. <sup>67</sup> Aden ni-anaquien Esusēn abēd icquido 12ted icquid chuipondash. —¿Mimbisendabi niampe? —caquien <sup>68</sup> Petedo: —Padenquo. ¿Tsudabēd icnuendambi mibi nianuc? Mibipadquid utsi nibēdec. Mimbuiidtsēquien: “Ēbi tantiaquid bēdamboen isquin unēsacsho uincuemeshun ēbēdi tabadmendambi,” quequin chuipoc. <sup>69</sup> “Abimboen caosh,” quequin mibi tantiemi. “Nuquin Papa yacnuēsh chonēdaid yec bēdamboshē icquidquien nec,” caombi mibi. Mibi niantiapimbo iquebi —quepondash Petedo Esus caic. <sup>70</sup> Adoquien Esus: —Ai, mibi adquid icnuc utsien icsambo iquec. Mibitedi: “Nuquibi icnu. Cho,” cabampondambi. Ēmbi adondaaid abentsēc Satanasēn namiaidquo yec icsamboshē iquendac —quepondash Esus. <sup>71</sup> —Simon Iscadioten mado Udasēn ēbi chieshēnquido ēbi bedmendac —quequin ambembi tantiash adon-dash Esus.

## 7

### *Aton utsibon Esus tantienquo yaid*

<sup>1</sup> Abi tantiauidquidon nianac Cadidia yacnouidi yuec Esus capucuenepon-dash. —Nidaid Udeya caid yacnocquido con matses chuiquidon ēbi cue-sunetiadquo iquec —quiash Udeya yacno nidenquo icpondash. <sup>2</sup> Adnubien con matses abitedi: —Edusaden yacnuēsh cuēdēntanu —quiampondash. Adanec nidaid utsi Udeya caidēn nidec 7tedec ushec cuēdēnuec matses dad-pen nidacno Edusaden yacno nidanepondash. Cuēdēnuec Esus nidenquo icpondash. <sup>3</sup> Adec nidenquo icsho isumbien aton utsibon: —Edusaden yacno nidec nid. Mibēd ictiadquo icquid ano icnushe. Comapenen tanti-aquin nabanquin aido ismec nid. <sup>4</sup> ¿“Ma matses dadpenshun ēbi tantianu,” quequina matses daēdpactsēc yacnoshonuidi napec? Matses dadpen yacno nidshun comapenen tantiaquin nabanquin ismec nid —capondash aton utsibon. <sup>5</sup> —Nuquin Papan chomenēdaidquo nec —quequin tantienquo icquimbi adopondash aton utsibon.

<sup>6</sup> Adoquien Esus: —Matses dadpen nidnuc nidtiadquo yec mibia nidta. Abitedishun isnuc nēbi nidtiapimbo iquebique. <sup>7</sup> Mibien anocquidon chieshēntiapimbo ye. Mibia nidta. “Nuquin Papan chiaid niac-niaquec



mibi icsaic,” ëmbi cac chieshënondashibique. <sup>8</sup> “Cuesunenushe,” quiash nëbi nidtiapimbo iquebique. Mibia nidta. Nuquin Papan tantiacpadec nidendabi <sup>9</sup>—quiash anobi Cadidia yacno Esus tabadpondash.

*Esustsen Edusaden yacnuësh cuëdënuec nidaid*

<sup>10</sup> Aden aton utsibo nidanemiash yuec-yuecpactsëc ictanec abitsen Esus nidpondash Edusaden yacnuësh cuëdënuec nidec. Abitedi ismenquio yec tsyuec Esus nidpondash. <sup>11</sup> Adnubien con matses cuëdëncuededacnoshon abi chieshënquidon Esus nibëmpac caondash. —¿Mitsimbo icpec? ¿Ada nëmbo chosh? —quequin chuibenepac caondash. <sup>12-13</sup> Adsho tantiash con matses Esus chieshënquido dacuëdënuec utsibo tantiamenquio yec shoshquetsëcquiec onquepac caondash. Utsi-utsiec: —Esus bëdambohë icquid nec —quenubien utsi-utsiec: —Ma icsambo icquid neyoc. “Nuquin Papa yacnuësh chonaidini nec,” quec ma muequi neyoc —quec onquecuedepac caondash.

<sup>14</sup> Adnubien con matses cuëdënuec taëbon abentsëc choec ushash Nuquin Papa tabadte shubu uashunaid daquënë uaidën Esus puduedpondash. Puduedshumbic Nuquin Papan chiaid chuibampondash. <sup>15</sup> Adsho tantiash: —¿Mitsipaden tantiashun chuipen naic? Nuquibëdtan Nuquin Papan chiaid isbanambo aidën iquec —quepondash con matses chuiquido. <sup>16</sup> Adsho tantiash Esus: —Ëmbembi chienquio icquin ëbi chomiondaidën chiaidquio chiec nebi. <sup>17</sup> Nuquin Papan chiacpadomboen natiadquio icquidën bëdamboen tantiatsiash. Ëmbi Nuquin Papan chiaid chuisho tantiash: “Nuquin Papan chiaidquio chiec nec,” quequin tantiatsiash. Ëmbembi chuisho tantiash: “Ambembi chiaid nec. Nuquin Papan chiaidpenquien nec,” quequin tantiatsiash Nuquin Papa tantiaquidën. <sup>18</sup> Ambembi chuiquidën: “Mabi matsesën bëdambo canu,” quequinuidtsëqui chuibantsiash. Adquidpenquieni nec. Ëmbien: “Ëbi chomiondaidquio ma matsesën tantianu,” quequin ambi chiaidquio chiendac. <sup>19</sup> Mimbien adoenuo iquec. Mimbi tantiaid nuquin tsusedpa Moisesën: “Cuesunenda,” quequin Nuquin Papan chiaidquio dada uapampic. Ëbi: “Cuesunenu,” caquin aidën chiaid ma mimbi niac-niaqueyoc —quepondash Esus abi chieshënquido chiec.

<sup>20</sup> —Mimbi ëbi: “Cuesunenu,” caoc —Esus quesho tantiashumbien ano tabadquidon: —Podobitsi icsa dapuduedash mibi tantiadenquio yec onquepec. ¿Tsuntsin mibi cuesunepatsiash? —capondash. <sup>21</sup> Adoquien Esus: —Nëidën ëbi cuesunetsiash —quequin chienquio yec: —Chonoadenquio icte ushën comapenen tantiaquin dada bëdamepondambi. Aden bëdamicsho isash: “Adopenshenda naic. Chonoadenquio icte ushën daicsatsaid bëdamequin Nuquin Papan chiaid niac-niacposh,” ma mibi quepondac. <sup>22</sup> ¿Ëmbentsëquidambi chonoadenquio icte ushën nadi? Ma min matsesën adoapaboc. Mimbi tantiaid Moisesën chiaid tantiaquin dada bacuë tishacsho 7tedec ushun shui dëbid dëteshunequid mibi nec. Moisesën aden tauambo iquec. Moises tishabi icnubien Nuquin Papan chiacpadomboen naquin: “Nuquin Papan yuambo nebique. Ismenu,” queshun Abadauanëmbien shui dëbid dëteshunequin tauapampic. Yuecquio ictaneshun adembidi Moisesëntsen adopampic. Nëbi adembidi naic chonoadenquio icte ushëmbi chonoadquimbi ma mimbi shui dëbid dëteshuneyoc. <sup>23</sup> Aden Moisesën chiampid niaquenquio icquin shui nacnenquin mimbi bëdamboen naic. Ëmbitsen daicsatsaid dada abichobi bëdamequin mambi bëdamboen naondac. ¿Atotsi quequin ëbi chushcai? <sup>24</sup> Chonoadenquio icte ushën dada bëdamequid

icsho: “Icsambo mibi iquec,” mimbi ëbi capec. Aden ëbi bédamboen tantienquo icquin mimbi icsamboen chiec. Ëbi bédamboen tantiaquioshon ëmbi naboed bédamboen chui —quepondash Esus abi chieshënquido chiec.

*Esus bedshun cunesunetiad, cauidaid*

<sup>25</sup> Adec Esus: —Chonoadenquo icte ushën naondambi —quesho tantishien anocquido Edusaden yacnocquido nader onquecuededpac caondash. —Nuqui chuiquidon: “Cunesunetiad,” caboedien nëid nechitec. <sup>26</sup> En is. Abi chieshënquidobëdi tabadquin chieque. Chuisho ma chuiquidon chushcainquo icboc. “Nuquin Papa yacnuësh choquid Quidistu caid Esus nec,” quequin tantishumbien nachitec —quetanequien <sup>27</sup> aidobidi: —Nuquin Papa yacnuësh choquid ictiapimboen aid iquec. Abi caniacno tantiembi. Nuquin Papa yacnuësh choquid abi caniacno tantiadenquo ictsiash —quepondash ano tabadquido.

<sup>28</sup> Adsho tantishun Esusën Nuquin Papa tabadte shubu uashunaid daquënë uacnoshon chuibanquin abitedi tantiamenuen naden chuipondash. —“Ëmbi isonaid nec. Aton nidaid Cadidia caid yacnuësh caniquid nec,” ¿quequindabi bédamboen tantiapadi? Ma mimbi padenquo yoc. Ëbemi chondaidpenquo nebi. Ëbi chomionaid abi iquec. Ma mimbi aidquiobi tantienquo yoc. <sup>29</sup> Ëmbien aidquo tantiendac. Aidbëd tabadondaidquo nebi. Adsho aidën: “Nid,” cac chondaid nebi —caquien <sup>30</sup> —“Con pa Nuquin Papambo nec,” quechitequien nec —queshun abi chieshënquidon: —Cunesunemenuembien bedtiad —quetanquin: —Bednu —caqui bedadenquo icpondash. —Nëbi ma Esus unës uainquo icnu —Nuquin Papa quenuc bedmenquo icquin Esusën mëtampanëdash. <sup>31</sup> Esus cunesunetiadquo icnubien utsibon dadpenhun Esus tantiabempondash. —Nëidpadquid utsi nibëdtsiandac. Nuquin Papan chiaid chuiquin nuquin tsusedpabon dada uapampicpadomboen comapenen tantiaquin Esusën matses bédamebamposh. Nuquin Papa yacnuësh choaid Quidistu caid Esus nec —quequin dadpenhun Esus tantiabempondash.

*Ëbi istuidenquo iquendac, quequin chiaid*

<sup>32</sup> Aden Esus chiec sho-shoshquetsëcquiec onqueshobien Esus chieshënquidon padiseyo caidon tantiapac caondash. Adshun abëdtan chuiquid utsibo chuipac caondash. —Ëmbi chuibocpaden Esusien bedtiad. Icsamboec onquioshe —cac: —Ai, adembien ictiad —quepac caondash. Adshumbic abëd icquido sondado chuiquin: —Baded bedtan —capac caondash. <sup>33</sup> Adoac nidanequin tantiatuidaquien nader Esus onquepondash. —Yuec-yuecpactsec mibëd icashic ëbi chomiondaibëdtsen tabadoaic nidendabi. <sup>34</sup> Ëbi nibënquin ëbi istuidenquo mimbi iquendac. Ëbi nidacno mibi nidtiapimbo iquec —quepondash Esus.

<sup>35</sup> Adsho tantish abi chieshënquido: —Nuqui istuidmenquo icnuec ¿mitsimbo nidpanuec nec? Matses utsi yacno tabadnuec con matses utsi-utsiec nidequi nidaniondacno nidshun ¿anocquidoda chuipatsiash? <sup>36</sup> Tantiadenquo yec onquepec. ¿Atotsi quepec? “Ëbi nibënquin mimbi ëbi istuidenquo iquendac. Ëbi nidacno mibi nidtiapimbo iquec,” quepequien iccosh. ¿Atotsi quepash niosh? —quepac caondash Esus chieshënquido.

*Aton Mayan abi tantiaquidbëd tabadmete chiaid*

<sup>37</sup> Adnubien cuëdë nec ënëdte ushënquiobi con matses abitedimbo cuëdë nuec cho-chopondash. Cho-choash tabadbudnubien nidtoash comapenec onquequin Esusën chuipondash. —Acte natia bunacimboec Nuquin Papa tantiate

bunquin ëbi bédamboen tantiata. <sup>38</sup> Adsho Nuquin Papan chuiquin dada uamepampicpadomboen naindambi. Nuquin Papa tantiamequid utsi ëbi tantiaquidobéd tabadmendambi. Adoac mibéd tabadquin mibi bédamboen tabadmequin utsibotsen Nuquin Papa tantiante bumetsiash —quepondash Esus. <sup>39</sup> —Nuquin Papabëdta ëbi tantiamequidquo Nuquin Papan Mayan nec —quequin tantiec adondash. Adquid abi tantiaquidobéd tabadmequin chomiabi aden chuipondash Esusën. Nuquin Papa yacno nidambien abi tantiaquidobéd Nuquin Papan Mayan tabadcuenondash.

*¿Nuquin Papan chomiaidta nepeba? Esus caid*

<sup>40</sup> —Nuquin Papa tantiante bunquin ëbi tantiata —Esus qesho tantiashien Esus chiec ano tabadquido onquecuededpac caondash. Utsi-utsiec: —“Nuquin Papan chiaid chuiquidquo choendac,” quequin nuquin tsusedpa Moisesën chiampidien Esus nechitec —quenubien <sup>41</sup> utsi-utsiec: —Nuquin Papa yacnuësh choquid Quidistu caidien Esus nechitec —quenubien utsi-utsiec: —¿Cadidia yacnuështa Nuquin Papa yacnuësh choquid chopadic? <sup>42</sup> Padenquio. Nuquin Papan chiaidquo naden dada uapampic. “Nuquin Papan chomiaid nuquin tsusedpa Dabidën tsyuecquid nendac. Dabid caniampicnoshon shubu daëdpactsëcquid Beden caid yacnoshon aidi tishendac,” quequin chuipampic. Ma Esus muequi neyoc. Beden yacnoshon tishaidpenquo nec —quepac caondash. <sup>43</sup> Adec dadpen: —Bédambo icquid nec —quenubi aidtedbidi: —Icsambo iquec —quepac caondash. <sup>44</sup> Adnubien: —Icsambo iqueque. Cuesunemenuembien bedtiad —queuidpac caondash. Adshun Esus bedabi icpondash.

*Isadaidbo chuiquid dapabon Esus chieshënaid*

<sup>45</sup> Adnubien: —Esus bedtan —caboedo sondado bedabi Esus chieshënquido chiec chopac caondash. Chosho: —¿Atotsi quiash bedabi cho? —caquien: <sup>46</sup> —Ma bédamboenshë chuiboc. “Adomboen chuibanquid utsi nibëdec,” qeshun bedtiapimbo iccobi —qesho <sup>47</sup> tantiashien: —Aid muasho tantiashun: “Abimbo caic,” ¿cainda icco? <sup>48</sup> ¿Adambi Esus muasho tantiadio? ¿Ada tsusiobon tantiadiosh? Padenquio iccosh. <sup>49</sup> Utsibombien tantiash. Adquidon ëmbi bédamboen tantiapadomboen Nuquin Papan chiampid tantienquido iquec. Icsambo aido iquec. Aido cuidchitoshon. Esus icsambo iquec —quepac caondash con matses chuiquido padiseyobo Esus chieshë nec.

<sup>50</sup> Adnubien inchëshën puduedash Esusbéd onquiondaid Nicodemo caid abitsen chuiquid yec nadpac caondash. <sup>51</sup> —¿Abibi chuimiabida cuidpec? Nuquin Papan chuipampid nad iquec. “‘Icsambo iquec,’ caidi abibi chuimequin: ‘¿Atotsi nao?’ cac chuisho tantiashun cuidquid yendac,” quepampic. Adoac bédambo ictsiash. Chuimiabi cuidac icsambo ictsiash —quepac caondash Nicodemo abëdtan chuiquid utsibo chiec. <sup>52</sup> Adoaquien chuiquido: —Esus yacpadec Cadidia yacnuësh caniquid mibi nepanui. Aid tantiaquidien mibi nec. Nuquin Papan chiampid isbanta. Aid isbanshun: “Cadidia yacnuësh Nuquin Papan chiaid chuibanquidquo choenquido iquendac,” quequin mimbi tantiatsiac. Ma Esus muequi neyoc —quepac caondash chuiquido Nicodemo chushcaic. <sup>53</sup> —¿Chuimiabida cuidpec? —quetsëcsho aden Nicodemo chushcanec abitedi nidaniac caondash aton shubuno ushec nidec.

## 8

*Bënëpenquio chudmequid cuënoten seshunetsenaid*

<sup>1</sup> Nicodemo chushcabon Esus macuësh dapa Odibos caid yacno ushec nidondash. <sup>2</sup> Adtanec choashic Nuquin Papa tabadte shubu uashunaid

daquënë uaidën puduedpondash. Puduedsho isash matses dadpen chochoec abi datsidadsho Esusën chuipondash.

<sup>3</sup> Aden chuinubien con matses tsusiobon aton bënëpenquoio chudmesho istuidshun chido bēpondash. Moisesën dada uampid chuibanquidobēdtan tsusedpabon chiampid namequido padiseyobon Esus yacno bēshun chido nēnantanquoio nitsimpondash. <sup>4</sup> Adshumbien Esus chuipondash. —Aton bënëpenquoio chudmesho istuidshun nēid bēombi. <sup>5</sup> Nuquin Papan chiaid Moisesën naden dada uapampic. “Aton bënëpenquoio chudmesho istuidshun cuēnoten seshunequin unēs uaquid,” quepampic. ¿Adembidida mimbi tantie? —quepondash chido bēquido. <sup>6</sup> —¿Atotsi Esus quepatsiash? Nuquin Papan chiampidquoio chienquoio icsho: “Mimbi icsamboen chiec,” catiad —quiash adondash. —¿Adembidida mimbi tantie? —caquien Esusën ëcbedenquoio icquin shuebudshun mēdanten nidaid dada uapondash. <sup>7</sup> Adshobien padpiden: —¿Adembidida tantie? —cado-cadoac niddotanec: —Nuquin Papan chiaid niaquesambo icquin en mimbria cuēnoten se —quetanec <sup>8</sup> padpidec shuebudshun mēdanten nidaid dada uapondash.

<sup>9</sup> Adnubien: —Nuquin Papan chiaid niaquesambo icquin en mimbria cuēnoten se —cac: —Nuquin Papan chiaid niaquesamboen nibēdchitec. Setiapimbo iquec —quetanec nidanepondash. Tsusioboba nidanebon caniabotsen tsyuec nidanepondash chidouidtsēqui Esusbēd icnuc. <sup>10</sup> Adec nidanian Esusën nidtoquin isquien nibēdec. Nidaniac. Abi bēboedo nidaniacsho istanquin: —¿Mitsimbo nidosh, champi? ¿Mibi cuēnoten sequidta nibēdosh? —Esusën cac: <sup>11</sup> —Ai, nibēdosh —quesho tantiashien: —Ëmbimbo mibi cuēnoten senquoio iquembique. Mibi icsaid ënash bēdamboec tabadec nid, champi —capondash Esusën. Adoac chido nidondash.

### *Pabiate cuembo icnuc tantiamequid*

<sup>12</sup> Yuec ictaniash Nuquin Papa tabadte shubu uashunaid daquënë uaidën Esus padpidec puduedoapondash. Puduedshumbien abi chieshēnquido tantiamequin padpiden chuioapondash. —Pabiate cuembo icnuc con Pan bēdamboen iste matses tantiamequidquoio nebi. Ëmbi tantiamicac ëbi tantiacquido icsateuidi bunenquoio yanec bēdamboec tabadte buncuenendac. Adec ëbēd tabadtequid yanendac —quepondash Esus.

<sup>13</sup> Adsho tantiash abi chieshēnquido: —Mibentsēqui: “Adquid nebi,” quesho tantiatiapimbo iquebi. Muequien mibi nechitec. Matses daēdshun chiac bēdambo ictsiash —quepondash. <sup>14</sup> Adsho tantiash Esus: —Ëbibi abimbo cadebi. “Con Pa yacnuēsh chondash anobidi nidendabi,” quec muainquoio iquebi. “Aton papa yacnuēsh choash anobidi Esus nidoaindac,” quequin ma mimbi ëbi tantienquoio icboc. <sup>15</sup> Cadidia yacnuēsh choquid matsesuidien mimbi ëbi danec. Adquid danquin mimbi icsamboen chiec. Ëmbien abimbo chiec. Abimbo chuiquid icquin: “Nēid icsambo iqueque. Cuidnuna. Nēid bēdambo iqueque. Cuidenquoio icnuna,” quequin nēbi chienquoio iquembi. <sup>16</sup> Aden chuiquin abimbo chuitsiambi. Ëmbentsēqui chienquoio icquin ëbi chomiondaid Nuquin Papabēdtambi chuiquin abimboshē chuitsiambi. <sup>17</sup> Nuquin Papan chiaidquoio Moisesën naden dada uapampic. “‘Ic-saosh,’ quequin daēdshun chuisho tantiash: ‘Abimbo chiec,’ quequid yendac. Adecbidi: ‘Bēdambo iquec,’ quequin daēdshumbidi chuisho tantiash: ‘Abimbo chiec,’ quequid yendac. Abentsēcshun chuishoen mua caquid yendac,” quequin Nuquin Papan chiaidquoio Moisesën dada uapampic. <sup>18</sup> Aden Moisesën dada uampid tantiashun ëmbentsēqui chienquoio iquembi. Ëbi chomiondaid con Pabēdtantsēqui chiembi —quepondash Esus.

<sup>19</sup> Adsho tantiashun abi chieshënquidon: —¿Mitsimbo papa icpec? — capondash. Adoaquien: —Con Pa ëbëdta ma mimbi tantienquio icboc. Ëbi tantiaquimbien mimbi con Patsen tantiatsiac —quepondash Esus abi chieshënquido chiec. <sup>20</sup> Abi chieshënquido onquecuededec quënën tabadnubi aid quënë cachoctsëqui Nuquin Papa tantiaquin piucquid menequin nauedte tabëcacoshon Esusën chuipondash. Adec Esus anoentsëqui tabadsho abi chieshënquidon bedabi icpondash. Nuquin Papa: —Ma ëmbi tantiacpadënquio matsesën unës uanu —quenuc Esus bedabi icpondash.

### *Utsibon Esus tantiauidaid*

<sup>21</sup> Adnubien Esusën abi chieshënquido padpiden chuioapondash. — Nidendabi. Ëbi nidan ëbi nibënquin mimbi ëbi istuidenquio iquendac. Ambi chiaid niac-niacquido icsho Nuquin Papan bëdamboen isambobi mibi unësendac. Adash ëbi nidacno mibi nidtiapimbo iquendac —quequin chuipondash Esusën. <sup>22</sup> Adsho tantiash Esus chieshënquido: —¿Abibida Esus cuesuniadpec? Abibi cuesuniadash Nuquin Papan icsaido cuidacno nidtsiash. Ambo nuqui nidtiapimbo iquec. ¿Aden chiecta: “Ëbi nidacno mibi nidtiapimbo iquec,” quepec? —quepondash abi chieshënquido. <sup>23</sup> Adsho tantiash Esus: —Mibi matses nec. Ëbien con Pa yacnuësh chondaidquio nec. <sup>24</sup> “Adquid icsho ëbi tantienquio icquid unësacsho Nuquin Papan ambi icsaido cuidacno nidmendac,” quequin tantiaquin: “Nuquin Papan bëdamboen isabi mibi unësendac,” mibi caombi —quepondash Esus.

<sup>25</sup> Adsho tantiash abi chieshënquido: —¿Mitsipadquid icquin ëbi aden chie? —quepondash Esus caic. Adoaquien: —Ëmbi chianeboedquiobi mabi neyoc —queoapondash Esus. <sup>26</sup> Adashic padpidec: —Mimbi naid dadpen chuiquin mibi cuidte chiendambi. Ëmbembi chienquio icquin ëbi chomiondaid muesanquio chiaidquio chiendambi. Aidën chiaiduidi matses abitedi chiendambi —quenubien <sup>27</sup> Esus chieshënquidon: —Abi chomiondaid Nuquin Papambo nec —quequin tantienquio icpondash. <sup>28</sup> Aden tantienquio icsho isun Esusën padpiden chuioapondash. —Matsesmiaidquio icshobi ëbi cuesten dectanshumbic mimbi ëbi tantiabenendac. “Ambi chiacpadquidshenda nepadenec. Ambembi chiaid chienquio icquin aton Papan chiaidquio chuiquin aidën chiacpadomboenshenda napadenec,” quequin ëbimbo mimbi tantiendac —quepondash Esus. <sup>29</sup> Adashic padpidec: —Nëbi ëbi chomiondaid ëbëd iquec. Aid bëdambo icmienen ambi chiacpadomboen nasho isun ëbi nianenquio iquec —quepondash Esus.

<sup>30</sup> Adsho tantiashun: —Abimboen Esusën caic. Nuquin Papa yacnuësh choquidien nec —qeshun Esus tantiauidtsëcondash dadpenshun.

### *Satanasën yuabo nec, quequin Esusën chiaid*

<sup>31</sup> Adsho isumbien Esusën abi bëdiactsëc tantiauidtsëchoedo chuipondash. —Ëbi tantiaquidën ëmbi chiacpadomboen natiadquio iquendac. <sup>32</sup> Nuquin Papabëdta ëbi aden tantiasho icsamianquidën yua icboedi aidën yuapenquio mibi icmetsiambi —quepondash Esus abi tantiauidtsëchoedo chiec. <sup>33</sup> Adec Esus: —Yua —quesho tantiashien: —Abadauan yampidën tsyuecquido yec utsin yuacmaido nebi. Tantienquio icquin mimbi icsamboen chiec. ¿Atotsieshun: “Mibi yuapenquio icmetsiambi,” quequin ëbi chio? —capondash abi tantiauidtsëchoedon Esus chuiquin.

<sup>34</sup> Adoaquien: —Tantia. Mibi abimbo chuinu. Uidën uacbimboen icsambo icquidën ambembi abi icsaid ëntiapimbo iquec. Abembi bëdambo ictiapimbo iquec. <sup>35</sup> ¿Mitsipadquid nuquin matsesën yuaid icpec? Aton madopen yec icsambo icsho icbon cuemequid. Aton madombo bëdamboen isquid. <sup>36</sup> Aden

con Pan aton Madombo icsho ëbi bēdamboen isquin ëbi tantiaquidotsen bēdamboen isendac. Aden ëbi tantiaquido bēdamboen isquin bēdamboec tabadte bumequin abi yacno ëbēd tabadtequido icmendac —quepondash Esus.

### *Satanasën madobimboecquido chiaid*

<sup>37</sup> Adshumbic Esusën abi chieshēnquido chuioapondash. —“Con tsusedpa Abadauan icpampic,” quequin mimbi abimbo chioc. Adboedēmbi ëbi cuesunetiadquio mibi iquec. Ēmbi abimbo chuisho tantiate bunenquio icquin ëbi cuesunetiadquio mibi icpec. <sup>38</sup> “Con Pabēd tabadquin isondambi,” quequin ëmbi bēdamboen chuisho tantienquio icquin min papabimboecquidēn chiapadomboen mimbi naindac —quepondash Esus abi chieshēnquido chiec. <sup>39</sup> —Min papabimboecquidēn chiapadomboen mimbi naindac —queshobien: —Con tsusedpa Abadauanën nacpadomboen mambi napaboc —capondash Esus chieshēnquidon. Adoaquien Esus: —Ma mimbi adoenuo yoc. Abadauanën nacpadomboen naquin mimbi bēdamboen natsiac. <sup>40</sup> Bēdamboen natiapimbo icquin mimbi ëbi cuesunetiadquio iquec. Nuquin Papan chiaidquio abimbo chuisho mimbi adotiadquio iquec. Nuquin Papan chiaid tantiec ma Abadauan cuesuniantiapimbo icpampiyoc. <sup>41</sup> Min papabimboecquidēn namiapadomboen naquidien mibi nec —capondash Esusën abi chieshēnquido chuiquin. Adoaquien: —Mambi Nuquin Papauidsēqui tantieyoc. Utsi tantiatiapimbo icquin Nuquin Papauidsēqui con pa caimbi —quepondash Esus chieshēnquido.

<sup>42</sup> Adsho tantiashien Esus: —Nuquin Papambo tantiaquimbien mimbi ëbitsen tantiatsiac. Ēbemi choenquio iccondabi. Nuquin Papan: “Matsesbēd tabadec nid,” caquini chondac. Adoaid icsho Nuquin Papa tantiaquidēn ëbitsen tantiatsiash. <sup>43</sup> ¿Mitsipadquid yec ëmbi chiaid tantiash: “Tantiadenquien icpec,” quepe mibi? Ēmbi abimbo chuisho tantiate bunenquio yec pamumēdabimboec mibi iquec. <sup>44</sup> Min papabimboecquid Satanas nec. Aid bunacpadenuidi mimbi natiadquio iquec. Ēndenquimboshē Nuquin Papan tauamboen matses uanubi min papabimboecquid cuesunianquidquio nepampic. Aton padibi nec. Nuquin Papan chiapadomboen namenquio yec chieshēnec muaquidquio nec. Aton padibi icquid yec matses muamequidquio nec. Aidēn madobimboecquin mimbi ëbi tantiatiapimbo icpec. <sup>45</sup> Ēmbi Nuquin Papan chiaidquio abimbo chuisho mimbi tantiatiapimbo iquec. Icsambo icquidēn ambembi chuisho mimbi tantienquio yaquien bēdambo ictsias. Mabi icsambo icquidpenquio neyoc. <sup>46</sup> ¿Tsuntsimbini: “Mibi icsaoc,” capatsiash? Mabi adotiapimbo yoc. Icsaisambo nebi. Adquid icquin Nuquin Papan chiaid ëmbi abimbo chuisho ¿atotsi quequin tantienquio mimbi icpe? <sup>47</sup> Nuquin Papa tantianuequidēn Nuquin Papan chiaidquio chuisho tantiatsiash. Nuquin Papa tantiesabombo ma mibi neyoc. Adquid icquin Nuquin Papan chiaid abimbo chuisho mimbi tantiatiapimbo iquec —quepondash Esus abi chieshēnquido chushcaic.

### *Esus chieshēnquido cuēnoten siantiapambo yanaid*

<sup>48</sup> —Nuquin Papa tantiesabombo ma mibi neyoc —Esus quesheo tantiashien abi chieshēnquido: —Ma mibi podobitsi icsa dapuduedash neyoc. Tantiadenquio yec mibi onquec. Samadia yacnocquidobimboec icsamboshē ma mibi iqueyoc —caquien <sup>49</sup> Esus: —Mabi podobitsi icsa dapuduedambo yoc. “Ma matsesën con Pa tantianu,” quequin mambi abimbo chuiboc. Adshobi: “Nuquin Papan chiaidquio abimbo mimbi chiec,” catiadquidi

mimbi ëbi: “Muec nec,” capec. <sup>50</sup> “Mabi: ‘Bëdambo iquec,’ canu,” quenquio iccobi. Con Pambien: “Ma matsesën con Mado: ‘Bëdambo iquec,’ canu,” ëbi caindac. “Bëdambo iquec,” canesabotedi aidëmbi cuidendac. <sup>51</sup> Tantia. Mibi bëdamboen chuinu. Ëmbi chiacpadomboen naquidquio unësenquio ictsiash —quepondash Esus ompoacbimboen chiec. —Ëbi tantiaguio unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc —quequin tantiec adondash.

<sup>52</sup> —Unësenquio ictsiash —quesho tantiash Esus chieshënquido: —Ma mimbi tantiadenquio icnuc chuipayoc. Adsho: “Mayan icsa dapuduedashien nec,” mibi caombi. “Ëmbi chiacpadomboen naquidquio unësenquio ictsiash,” quepequien mibi iquec. Nuquin tsusedpa Abadauan yec Nuquin Papan chiaid chuibanquido yec quequido Nuquin Papan bëdamboen isaidombo abitedi unëspampic. <sup>53</sup> ¿Aido Nuquin Papan namiampidombo icnuc Nuquin Papan namequiaidquioda ne? ¿Mitsipadquid mibi nepe? Muequien mibi nechitec —quepondash.

<sup>54</sup> Adoaquien Esus: —Ëmbembi: “Mabi: ‘Bëdambo iquec,’ canu,” quequin ëmbi nac icsambo ictsiash. Mimbi: “Aiduidtsëqui tantiembi,” caboedëmbini: “Nëid con Mado Esus bëdambo iquec,” quequin ëbi comapenen tantiaquin namec. <sup>55</sup> “Tantiembi,” mimbi caboed Nuquin Papa ma mimbi tantienquio yoc. Ëmbien Nuquin Papa tantiaquiec. “Aid tantienquio iquembi,” quec mibi yacpadec muatsiabi. Mambi con Pa tantiaquin ambi chiacpadomboen nayoc. <sup>56</sup> Mimbi: “Con tsusedpan nacpadomboen naimbi,” caboed Abadauan: “Nuquin Papa yacnuësh choash bëdambo icmianquidquio matsesbëdi tabadendac,” quequin tantiec cuishonquepadenec. Nuquin Papan tantiamiac ëbi aden tantiapadenec —quepondash Esus. <sup>57</sup> Adsho tantiashun Esus chieshënquidon: —Ma mimbi min seta 50tedi matamiambo yoc. Adash ma mibi tsusiobudabi iqueyoc. Abadauanën mibi tantiatiapimbo icpampic —caquien <sup>58</sup> Esus: —Abimbo caimbique. Tantiata. Abadauan tishabi icnubi ëndenquimboshë ictenebi. Nuquin Papapadquidquio nebi —quepondash Esus. <sup>59</sup> Adsho tantiash nëishtanequien: —¿Icsamboenda chuipec? ¿Nuquin Papada muauapebac? —quetanquin cuënote dapa bedtanequin: —Seshunenu —cac siadenquio yec ompodanec cuempondash Esus.

## 9

### *Esusën bëshuaid bëdamiaid*

<sup>1</sup> Yuecquio ictaniash chonoadenquio icte ushën capucuenequin Esusën dada bëshuaid istuidpondash. Anin bëshuacshobi tishnëdaid niondash. <sup>2-3</sup> Aid istuidshumbimbi: —En chui, Icho. Tantanu. ¿Atotsieshun Nuquin Papan bëshu uapanëdash? ¿Aton papabëd ani icsasho isun Nuquin Papan cuidquin bëshu uanëdaidta nepec? —caquien: —Padenquio. Utsi icsasho isun Nuquin Papan nambo icpanëdash —quepondash Esus. Adsho tantiashun padpiden: —¿Tishabi icnubi: “Abibi icsaindac,” quequin tantiashun Nuquin Papan bëshu uanëdaidta nepec? —caondambi. Adoaquien: —Padenquio. “Abibi icsaindac,” quequin tantiashun Nuquin Papan bëshu uambo icpanëdash. “Ma con Madon comapenen tantiaquin ismenu,” quequin ambi tantiacpaden Nuquin Papan bëshu uapanëdash. Adoacsho anin tishnëdaid nec. <sup>4</sup> Nëbi ambi chiacpadomboen nanuna. “Nainabi inchëshmane,” quiash comapenec chonoadnuna. Inchëshën matses chonoadesa —quepondash Esus. —“Con Pan tantiaidtedi nainabi unësmane,” queshun unësabi icquin con Pan chiaidtedi nainendambi —quequin tantiec: —“Nainabi inchëshmane,” quiash comapenec chonoadnuna —quiondash Esus. <sup>5</sup> Adashic: —Matsesbëd icquin

Nuquin Papa bēdamboen tantiamequidquo nebique. Nēidtsen tantiamenu<sup>6</sup> —quetanquin nidaidēn uicchun cuishtucatanquin nidaidbēdta uicchun cabiuntsēcshun bēshuaid bēbitaccapondash.

<sup>7</sup> Adotanquimbic: —Acte tiquidimbo icquid Sidoe caidēn bēpamēdec nid —cac nidash bēpamēdtanec bēdamboen isec aton shubuno nidpac caondash. Aid acte con onqueten Sidoe quequin buanaid caic. <sup>8</sup> Aton shubuno nidshobi aton shubu anoentsēcquidon bēshuacboed istuidpac caondash. Adembidi utsibon: —Bēshuaid nebique. Piucquid beccho —quedonetsec tsadtsēcsho isboedontsen istuidpac caondash. Istuidshun: —¿Nuqui isboedquiobida nepec? “Beccho,” ¿quedoneboedquiobida nepec? —cabededpac caondash. <sup>9</sup> Utsi-utsiec: —Ai, aidquiobi nec —quenubi utsibo: —Padenquio. Aid-bimboecquidien nec —quesho tantiash: —Aidi nebi —quepac caondash bēshuacboed. <sup>10</sup> Adsho tantiashun: —¿Mitsipadec bēdano? —caquien: <sup>11</sup> —Esus caidēn bēdamioshi. Nidaidēn uicchun cuishtucashun nidaidbēdta uicchun cabiunshun bēbitaccashun: “Acte tiquidimbo icquid Sidoe caidēn bēpamēdec nid,” cac nidash bēpamēdec bēdanobi. Nēbi bēdamboen isembi —quepac caondash bēshuacboed. <sup>12</sup> Adsho tantiashun: —Mibi bēdamequid ¿mitsimbo iquec? —cac: —Tsaudi —quepac caondash bēshuacboed.

### *Bēshuaid bēdameboed chuimiai*

<sup>13</sup> —Bēdamioshi —quesho tantiashun: —¿Abimboda capec? Ma con chuiquidon chuimenu —quequin padiseyobo yacno bēshuacboed buampac caondash. <sup>14</sup> Buanacshobien padiseyobon: —Chonoadenquio icte ushēn nac caosh —quequin tantiaquin: <sup>15</sup> —¿Mitsipadec bēdano? —caquien: —Esusēn nidaidbēdta uicchun cabiunshun bēbitaccac bēpamēdec bēdanshun nēbi bēdamboen isembi —quepac caondash bēshuacboed.

<sup>16</sup> —Bēpamēdec bēdanobi —quesho tantiashien chuiquido onquecuededpac caondash. Utsi-utsiec: —Nuquin Papa tantiaquid icquin Nuquin Papan chiaid niac-niaquenquio ictsiash. Chonoadenquio icte ushēn nēid bēdamequin ma Nuquin Papan chiaid niac-niacpayoc —quenubien utsibo: —¿Nuquin Papa tantiesanda aden bēdamepatsiash? Ma comapenen tantiaquin nacnem-paboc —quepac caondash. Adshumbic abitedishun: —Esus icsambo iquec —cainquio icquin <sup>17</sup> bēshuacboed chuipac caondash. —Mibi bēdamequid ¿tsutsi mimbi cape? —caquien: —Nuquin Papan: “‘Yuecshun naden naindambi,’ quequin chiaidquio chuiquidien nec,” caimbi —quetanec bēshuacboed nidpac caondash.

<sup>18</sup> Aid nidnubien Esus chieshēnquido: —Bēshupenquien niash. Muequien ni-ashe. Anibēdta amē chuimenun chomenuna —quetanquin <sup>19-20</sup> chomeshun bēshuacboed cain: —¿Min madoda niosh? —capac caondash. Adoac: —Ai, con mado niosh —queshobien: —¿Bēshuacshobida tishonda? —capac caondash. Adoaquien: —Ai, bēshuacshobi tishonaid nec —ani queshobien: —Bēshuaid ¿mitsipadec bēdanosh? —capac caondash. <sup>21</sup> Adoaquien: —Tsaudi. Bēdansho isambo iccombi. ¿Tsundambien bēdamechitash? Dada ēnden caniaid neque. Aidi chuime —quepac caondash bēshuacboedēn tita amēbēdi. <sup>22</sup> —“Nuquin Papa yacnuēsh choquid Esus nec,” quequido Nuquin Papan chiaid chuibante shubun puduedmenquien ictiad —quequin chuiquidon chiaid tantiash dacuēdec: <sup>23</sup> —Dada ēnden caniaid neque. Aidi chuime —quepac caondash.

<sup>24</sup> Adoac padpiden bēshuacboed chomeoapac caondash padiseyobon. Chomiash: —“Nuquin Papan bēdamioshi. Nuquin Papa bēdambo iquec,” ¿quecta



icco? Ma Esus Nuquin Papan chiaid niac-niacquid neyoc. Ma icsamboshë icquid neyoc —quepac caondash. <sup>25</sup> Adsho tantiash bëshuacboed: —Icsamboshë icquidien Esus nechitec. Aden tantienquo iquembi. Mabi bédameboc. Isenquo icboedëmbi mambi nëbi bédamboen iseyoc. Adenuidtsëqui tantiemi —quepac caondash. <sup>26</sup> Adsho tantiashun: —¿Mitsipaden mibi bédamiosh? —caquien: <sup>27</sup> —Mambi mibi chuipaboc. Ma mimbimbobi tantienquo icboc. ¿Atotsi quequin padpiden: “Èbi chui,” cai? ¿Esus tantiatiadquioda icti? —capac caondash bëshuacboedën.

<sup>28</sup> Adsho tantiash nëishtanquin chushcapac caondash. —Mibi Esus tantiaquidquo nec. Mibi icsambo iquec. Èbien nuquin tsusedpa Moises tantiaquidquo nec. <sup>29</sup> “Moisesien Nuquin Papan chuiquin namepampic,” quequin tantiemi. ¿Tsuntsin chiac mibi bédamequidën napash? Ma mibi bédamequid ëmbi tantiacmaidquo neyoc —quepac caondash chuquido. <sup>30</sup> Adoaquien bëshuacboed: —¿Abida cai? “Dadpenquo tantiemi,” ma mibi quepaboc. Adboedi: “Èmbi tantiacmaidquo nec,” ¿queceta ique? Mimbi tantiacmaidëmbini bédamiosh. Ma bédambo yoc. <sup>31</sup> Abi icsaid ënabi icquidën chianesho Nuquin Papan tantienquo ictsiash. Abi tantiaquin ambi chiacpadomboen naquidën chianiac tantiashun Nuquin Papan nashuntsiash. <sup>32</sup> Anin bëshuacshobi tishaid bédamenquo ictenec. Adquid bédamequid nibëdpadenec. <sup>33</sup> Nuquin Papa tantienquo icquin Esusën ëbi bédamenquo ictsenosh. Nuquin Papa tantiaquimbini bédamiosh. Ma Esus bédambo icquid neyoc —quepac caondash bëshuacboed. <sup>34</sup> Adsho tantiash nëishquioshon: —Bëshuacsho tishaid yec mibi icsamboshë iquec. Icsactsëcquidën chuitiapimbo iquebique. Baded nidec nid. Nëmbo padpidec puduedenda —quequin cuemepac caondash. Aden Esus chieshëncquidon bëshuacboed Nuquin Papan chiaid chuibante shubun padpiden puduedmenquo icpac caondash.

### *Ambi bédameboed istuidoashun Esusën chiaid*

<sup>35</sup> Adnubien: —Mimbi bédameboed cuemiac caosh —quesho tantiashun Esusën ambi bédameboed istuidpondash. Istuidshumbic: —Nuquin Papan matsesmiadquo caic: “Nuquin Papa yacnuësh choquid nec,” ¿quequinda mimbi tantiapè? —capondash Esusën ambi bëshuaid bédameboed chuiquin. <sup>36</sup> Adoaquien: —¿Tsutsi neque? Isnu —cac: <sup>37</sup> —Èbi nec. Mibi bédameboedi nebi —caquien: <sup>38</sup> —Ai, Nuquin Papa yacnuësh choquid Quidistu caidien mibi nec. Comapenen tantiaquin nabanquidquo yec mibi bédamboshë iquec —quetanec ismenuc danëshën tinquebudpondash.

<sup>39</sup> Adsho isumbic Esusën matses abi datsidadsho chuipondash. —Nuquin Papa matses bédamboen ismequid nebi —quiash matsesbéd tabadec Nuquin Papa yacnuësh chondabi. Èmbi bëshuaid bédamiac tantiesa icboedëmbi ëbi tantiasho Nuquin Papan bédamboen isec. Utsibo: “Nuquin Papa tantiaquiemi,” quec muaquidon ëbi tantiatiapimbo icquin Nuquin Papa tantienquo iquec —quepondash Esus. <sup>40</sup> Adsho tantiash nëishtanec: —¿Nuquin Papa tantiesabodabi nedi? —quepondash Padiseyobo. <sup>41</sup> Adsho tantiashien: —Nuquin Papa tantiesambo icsho ëmbi tantiamiac Nuquin Papabëdta ëbi tantiasho Nuquin Papan mibi bédamboen istsiash. “Nuquin Papa tantiaquiemi,” quec muaquin ambi chiaid bédamboen tantienquo icsho Nuquin Papan mibi bédamboen istiapimbo iquec —quepondash Esus abi chieshëncquido chiec.

## 10

### *Obecabimboecquido chiaid*

1-2 Adshumbic abi chieshënquido Esusën padpiden chuoapondash ompoacbimboen chuiquin. —Tantia. Mibitedi chuinu. ¿Mitsipaden nuquin masesën aton yua obeca dadpen dayun uaqin napec? Obeca daquënë uaidën puduedte shëcuënquio obeca icbo puduedquid. Daquënë uaid mayadec puduedquidien ampequid nendac. <sup>3</sup> Obeca icbon: “Puduednu. Shëcne,” cac ambi: “Con yua ista,” caidën shëcnequid. Adshumbic puduedtanquin ambi aton yua cuëmbanacpaden cuëmbanquin: “Cho,” caquid icbon. Adoac icbo tsibanquid obecan. <sup>4</sup> Adshobic icbon daquënë uaidën tabadquid abitedi niecumeshun abi buanec bëyuc nidsho aton yuan tsibanquid. “Con icbon ëbi cuëmbocpadomboen cuënec. Con icbo nec,” quequin icbo tsibanquid obecan. <sup>5</sup> Utsibon cuënaquien tsibanenquio yec dacuëdec cuenquid obeca. Icbouidtsëqui tsibanquid obeca nec —Esus quesho tantiashien: <sup>6</sup> —Tantiadenquio yec mibi onquec —quepondash Esus chieshënquido.

<sup>7</sup> Adsho tantiashun Esusën chuipondash. —Tantia. Mibi bëdamboen chuinu. Obeca daquënë uaid puduedte shëcuëbimboecquid nebi. <sup>8-10</sup> Shëcuënuidi obeca puduedquid. Adecbidi ëbiuidtsëqui tantiash Nuquin Papa yacno mases puduedtsiash. Ëbi tantiesain Nuquin Papa yacno puduedtiapimbo iquendac. Ëbi tantiaquido cain obeca caombi. Aido bëdamboen dayun uaqin bëdamboec tabadquid icmendambi. Aido unësacsho uincuemeshun Nuquin Papa yacno ëbëdi tabadmendambi. Adec ëbi bëdambo icnuc ampebimboecquid abi iquec. Ëbi tantiaquido icsamete bunquido aido nendac. Ma adquido mibi neyoc. Nuquin Papan chiaid ma mimbi icsamboen chieyoc. Adoac mimbi chiaid tantiaquidon Nuquin Papa tantienquio iquec. Aido Nuquin Papan cuidtequidombo nendac. Padnuen ëbi tantiaquidon mimbi chiaid tantienquio icquimbi ëmbi chiaiduidtsëqui tantiendac —quepondash Esus abi chieshënquido chiec.

### *Ëbi tantiaquido dayun uaimbi, quequin chiaid*

<sup>11</sup> Adashic Esus padpidec onqueoapondash. —Obeca icbobimboecquid nebi. Icbo cudasacbimboec ëbi tantiaquido cudasnuec ëbided cuidadec unësendabi. <sup>12-13</sup> Utsiboen adenquio ictsias. Piucquid bednuen obeca isquidbimboec iquec. ¿Mitsipadopaïd obeca isquidën? Bëdi dapa chosho isun: “Con napenquio nec,” quetanquin badedi obeca nianquid. Obeca nianacsho bëdin acshun siaquid. Aden utsi acsho isash acshun secabi icquid niquequid obeca. Obeca isquidën icbonpenquio nianacbimboen ma mimbi icsamboen napayoc. Nuquin Papa tantiate bunquido ma mimbi Nuquin Papambo tantiamenquio iqueyoc —quepondash Esus abi chieshënquido chiec.

<sup>14-15</sup> Adashic abi onquec: —Ëmbien mases bëdamboen tantiamequin ëbi tantiaquido dayun uaindac. Nuquin Papabëd ëbi tantiananacpadquiec ëbi tantiaquidobëdtsen tantiananquiebi. Aden ëbi tantiaquido tantiec Nuquin Papa cuidmenquio icnuec ëbided cuidadec unësendabi. <sup>16</sup> ¿Nëid mases isadaidboudtsëqui tantiectabi adec unëspadi? Padenquio. Mates utsibontsen Nuquin Papan tantiamiaido icquin ëbi tantiendac. Aidobëdta nëid mases con mases caquin abitedi bëdamboen dayun uaindami. <sup>17</sup> Con Pan tantiamiacpadec ëbided cuidadec unësendabi. Aden ambi chiacpadomboen ëmbi nasho con Pan ëbi tantiaquiec. Unësash ëbembu uincuenendabi. <sup>18</sup> Matesën ambembi ëbi unës uatiapimbo ictsias. Ëmbi tantiacpadquiequi masesën unës uadendabi. Adecbidi uincuentiadquio yec ëbembu uincuenendabi. Aden con Pan namiacpadomboen naindami —quepondash Esus.

<sup>19</sup> Adsho tantiash con mases chuiquido nadec onquecuededpac caondash.  
<sup>20</sup> Esus chieshënquido: —Podobitsi icsa dapuduedash tantiadempambo yec

onquepec. ¿Atotsi quequin aid tantie? Aidquio tantiatipimbo iquendabi — quenubien <sup>21</sup> utsibo: —Podobitsi icsa dapuduedashta ¿adec onquepatsiash? Bëdamboequien onquiosh. ¿Podobitsi icsa dapuduedaidënda aden bëshuaid bëdamepatsiash? Bëdambo icquidëmbien adotsiash —quepac caondash.

*¿Quidistu caidta ne? quequin chiaid*

<sup>22</sup> Yuec ictanec con matses cuëdënuec Edusaden yacno cho-chopondash. “Nuquin Papa tabadte shubu uashunaidnoshon tsusedpabon icsa uaquido cuemenëdaid ushë tantiec cuëdëntanu,” quianec cho-chopondash. Ambo iquenuampamboec icpondash aton padibi. <sup>23</sup> Iquenuampamboec icnubien Esus Nuquin Papa tabadte shubu uashunaid daquënë uaidën puduedash shubunquio puduedabi quënë cachoqui capupondash. Aid quënë cachoc: “Sadomonën nacnenaïd nec,” caondash. <sup>24</sup> Ambo Esus capusho isashien con matses chuiquido Esus natia datsidadshun: —En sebadënquio chui. Tantiënquio yec tsadtiapimbo iquebique. Mimbi cuembo chuisho tantiatiaidquio iquebi. ¿Nuquin Papan chomiaïd Quidistu caidta ne? —capondash con matses chuiquidon. <sup>25</sup> Adoquien Esus: —Mambi mibi chuipaboc. Ma mimbimbobi ëbi tantienquio icboc. Con Pan: “Adota,” cac comapenen tantiaquin nabandeniombi. Mibi bëdamboen tantiamenuen adodeniombi. <sup>26</sup> Adosho isash mibi: “Ai, Nuquin Papa yacnuësh choquidien nec,” queti-adquidëmbi mimbi ëbi tantienquio iccoc. Nuquin Papan tantiamiabi yaido icquin mimbi ëbi tantiatipimbo iquec. <sup>27</sup> Con Pan tantiamiïdien ëbi tantiaquid yanendac. Adshun obecan aton icbo tsibanac bimboen ëmbi chiacpadomboen natiadquio yanendac. <sup>28</sup> Aido unësacsho uincuemeshun Nuquin Papa yacno ëbëdi tabadmendambi padpidec unëstiapimbo icnuc. Unësabi icsho: “Con na nec,” queshun bëdamboen dayun uaindambi. Embi adoacsho bedshunac bimboen icsambo icquidën yuaquin Nuquin Papan cuidtequido icmeoatiapimbo iquendac. <sup>29</sup> Con Patsen ëbi tantiaquido dayun uaindac. Abipadquid utsi nibëdquiecnuc con Pan ëbi tantiaquido dayun uasho adem-bidi mënchictiapimbo iquendac. <sup>30</sup> Aden ëbi bedshuntiapimbo icquin con Patsen bedshuntiapimbo iquendac. Con Papadquidquio nebi —quepondash Esus.

*Cuënoten seshunetiadpambo yanoaid*

<sup>31</sup> —Nuquin Papapadquidquio nebi —Esus quesho tantiasht nëishtanquin cuënote dapa bedshun abi chieshënquidon Esus seshunetiadquio icoapondash. <sup>32</sup> Adsho isash: —Sianenda. Con Pan namiacpadomboen comapenen tantiaquin nabanombi. ¿Embï adobansho isboedëmbidabi seshunepe? —quepondash Esus. <sup>33</sup> Adoquien: —¿Bëdamboen nabanshodambi: “Mibi seshunenu,” cadï? Padenquio. “Con Papadquidquio nebi,” quequin Nuquin Papa muauasho mambi mibi nayoc. Matses icquin mimbi aden icsamboen chuisho tantiashtumbimbi mibi seshunec —quepondash abi chieshënquido.

<sup>34</sup> Adshobien Esusën: —Nuquin Papan chiaidquio nuquin tsusedpan naden dada uapampic. “Nuquin Papa nadeç onquec: ‘Min matsesën ëmbi chiacpadomboen nasho: Ëbipadquid nec, caombi,’ queposht Nuquin Papa,” quequin dada uapampic. <sup>35</sup> Matses caic: “Ëbipadquid mibi nec,” quequin Nuquin Papan chuipampid isun mimbi: “Nuquin Papan icsamboen chiac,” quequin chiambo iquec. “Muesambo icquin Nuquin Papan icsamboen chuitiapimbo iquec,” queshun mimbi chushcambo iquec. Nuquin Papa adoambobi ¿ëbida chushcai? <sup>36</sup> Nuquin Papan namiacpadec abi yacnuësh chondaïd nebi. Adquid yec: “Nuquin Papan Madombo nebi,” quiobi. Ëbi

adsho tantiashun ¿atotsi quequin ëbi chushcai? ¿Nuquin Papadambi muauadio? Mambi abimbo caboc. <sup>37</sup> Ëmbi chiaidquio tantiatiapimbo icquimbi ëmbi naidquio tantiata. Ëmbi Nuquin Papan namiacpadomboen comapenen tantiaquin nabanenquio icsho isun mimbi ëbi mua catsiac. <sup>38</sup> Con Pan namiacpadomboen nasho isun: “Ai, ambi chuibocpadquidshenda nepec,” ëbi cata. Ëmbi chiaiduidtsëqui tantiatiapimbo icquin adota. Adshun: “Ai, Nuquin Papapadquidquibidien Esus nec,” quequin mimbi tantiabentsiac —quepondash Esus.

<sup>39</sup> Adsho tantiash padpidec nëishtanquin abi chieshënquidon: —Bedchitono —caqui bedadenquio icpondash. <sup>40</sup> Adashic acte Odan caid potiash con shënision tauaquin matses acten mentodenecono Esus nidoapondash. Ambo ëbi chedobëdi tabadpondash. <sup>41</sup> Adshumbic Esusën comapenen tantiaquin ismequin ambo icquido chuibampondash. Adsho tantiashun: —Uan padon chuidenedshenda nëid nepec. Ambibi comapenen tantiaquin ismiambobi comapenen tantiaquin nabanquid chuipadenec. Esusën adobansho isun: “Nëid chuiquinshenda Uan padon abimbo capadenec,” caimbi —cabededpondash anocquidon. <sup>42</sup> Adshumbic: —Nuquin Papa yacnuësh choquidien Esus nec —quequin Esus tantiabempondash.

## 11

### *Dasado caid unësaid*

<sup>1</sup> Udeya yacnuësh Esus cuembon Dasado Esusën utsibimboecquid unëstiadtsëcquio yanac caondash. Shubu dadpen icquid Betania caid yacnocquid niondash. Aidbëd icquid aton chuchu daëd icpondash. Abentsëc Madta icnuc utsi Madia icpondash. <sup>2</sup> Madian aton manëdaidën ucbanquin Esus tanoshcabi icnuc adec aton utsi unëstiadtsëcquio yanac caondash. <sup>3</sup> Adnubien aton chuchun: —Esus chuitan —cac aton matsesën Esus chuituidpondash. —Mimbi con utsi caidquio unëstiadtsëcquio yanoshe. En isec cho —catuidpondash. <sup>4</sup> Adoaquien Esus: —Chiata. ¿Unësash chodquequionoshida Dasado nepadiash? Padenquien iquec. “Ma matses: ‘Nuquin Papa bëdambo iquec. Ambi chomiondaid aton Madombotsen bëdambo iquec,’ quenu,” queshun naindambi —quepondash. <sup>5</sup> Adbosh Dasado aton chuchubëdta tantiaquidquio yequi <sup>6</sup> badedquio nidenquio yec anobi daëdec ushpondash Esus.

<sup>7</sup> Daëdec ushumbic Esusën: —Nuqui icbocno Udeya caidën padpidec nidnu. Nid —capondashi. <sup>8</sup> Adoaquimbi: —Icho, ma mibi anoshon cuënoten seshunetsempondac. ¿Anobidida nidtiad? ¿Ada: “Seshunequionoshe,” cadec? —capondambi. <sup>9-10</sup> Adoaquien cuembo chienquio icquimbi: —Badiadën capuec tocoshquetanec uebudesa. Inchëshëmbien tocoshquetanec uebudquid —quequin Esusën chuipondashi. —Nëbi ëbi unës uatiapimbo iquec. Badiadën nidacimboen con Pan tantiaidtedi nainabi icsho ëbi unës uatiapimbo iquec. Inchëshën uebudacimboen ambi tantiaidtedi nainshobini ambi tantiacpadënquiobi matsesën ëbi unës uaindac —quequin tantiec adondash Esus.

<sup>11</sup> Adshumbic Esusën padpiden ompoachimboen chuioapondash. — Ëmbi con utsi caid Dasado ushtoaccoshe. Isucumec nidnu. Nid —quesho <sup>12</sup> tantiashini: —Ma ushnu. Ushash isucunquid —quepondac. <sup>13</sup> Esusën Dasado unësaid chuinubi Dasado ushe dantsëccondambi. <sup>14</sup> Adnubien Esusën sebadënquio chuipondash. —Dasado unësaccosh. <sup>15</sup> “Bëdamec nidtiadquidi niobi” ¿quepectabi ique? Padenquio. Mibi caic: “Ma nëidon ëbi bëdamboen

tantianu,” qeshun Dasado unëso istanambo iccombique. Nëbi mibi is-mec nidnu. Nid <sup>16</sup> —caquien: —Ai, abëdquiobi unësec nidnu. Nid —quiampondash Tomas anin abi ushëmbi daëdpambo tishaid. Adanec abitedi nidondash.

### *Unësaid uincuemequidquo nebi, quiaid*

<sup>17</sup> Adashic unësacno anoentsëqui Esus chopondash. Choshon: —Unësacsho chococash daëd-daëdquieq ushobi —quetsëcquieq onquecuededsho tantiatu-idpondash. <sup>18-19</sup> Esus choabi icnuc con matses chuiquido Dasado unësacnuësh sedenquenuec Edusaden yacnuësh cho-chopac caondash. Unësaid nëbi ictsenuc tedes quidometedos tiontsëcquidën badedquio cho-chopac caondash. Cho-choash unësaidën chuchubëd sedenquec tabadpac caondash. <sup>20</sup> Adnubien: —Esus choec —quesho tantiash Madta bëquedec chopondash aton chibi Madia shubuno sedenquec tsadnubi. <sup>21</sup> Choequien Esus bëquedec: —Mibi icnuc con utsi unësenquio ictsenosh, Icbo. Con utsi unësosh. <sup>22</sup> Mimbi chiacpadomboen Nuquin Papan nëbi natsiash —quepondash Madta: —¿Ada con utsi uincuemetsia? —quequin chuitiadquio yequi. <sup>23</sup> Adoaquien Esusën: —Min utsi uincuenendac —capondash. <sup>24</sup> Adsho tantiash: —“Ai, yuecash unësaido abitedimbo uincuemete ushën con utsi uincuenendac,” quequin tantiembi —quepondash Madta. <sup>25</sup> Adsho tantiashun Esusën: —Ëbibi matses unësaid uincuemequidquo nebi. Ëmbi tantiacpadënquio uincuenendac. Aden ëbi tantiaquido unësacsho uincuemendambi. <sup>26</sup> Ëmbi adoac Nuquin Papa yacno ëbëdi tabadendac padpidec unëstiapimbo yec. Ëmbi aden chuisho tantiash: “Ai, abimbo mimbi caindac,” ¿quequina tantie? —capondash Esusën. <sup>27</sup> Adoaquien Madta: —Ai, adembi tantiembi. “Nuquin Papa yacnuësh choquid Quidistu caidien mibi nec. Nuquin Papan Madombo mibi nec. Con tsusedpabon dada uaquin chuipampidquien nec,” mibi caombi —quetanec <sup>28</sup> nidpondash aton chibi chiec. Nidshun: —Nëmbo cho, chibi. Chuinu —cac aton chibi choshobien: —Esus chosh. Mibi iste bunoshe. En isec cho, chibi —caquien <sup>29</sup> Esus bëquednuec badedi choquin istuidpondash. <sup>30</sup> Shubu dadpen yacnombo choabi icsho Madtan bëquedacnobi Esus tabadsho Madiantsen istuidpondash. <sup>31</sup> Adec Madia nidsho isun chococacnobi sedencaic nide danquin abëd sedenquenuequidon tsibanampac caondash. <sup>32</sup> Adnubien Madia Esus istuidtanec dayumbudec sedenquiampondash aton utsi tantiec. Adec shubitanec ënëdash: —Mibi unësquio iccoc, Icbo. Bëdambo icquid mibi nec. Mibi icnuc con utsi unësenquio ictsenosh —quepondash Madia Esus caic.

<sup>33</sup> Adnubien Madia tsibanec cho-choec con matses chuiquido sedenquetuidpondash. Madiabëd sedenquecuededsho istanec: —Ai, unësquio icnuc nec —quiash Esus abitsen shubiantiadtsëcquio icpondash. <sup>34</sup> Adec shubiantiadtsëcquio tsadacnuëshien Esus: —¿Mitsimbo mimbi chococaye? En isnu. Nid —quepondash. Adoac: —En isec cho —quianec nidnubien <sup>35</sup> shubinidequi nidpondash Esus. <sup>36</sup> Adec shubinidsho isumbien: —Ma Dasado unësquio icnuc shubieyoc —cabampondash con matses chuiquidon. <sup>37</sup> Adnubien utsibo: —¿Atotsieshun bëshuaid bëdamiondaidëmbi Dasado unëso bëdamenquio icposh? —quepondash.

### *Esusën Dasado uincuemiaid*

<sup>38</sup> Nidquimbi chococacno istuidequi Esus shubiantiadtsëcquio yanoapondash. Nidaid cuënoteuidpambo icquid macuësh tsimpiduc shëcuë uaidën

unësaid nauedshun cuënote dapan bëtinacnuësh shubiantiadtsëcquio iccondash. <sup>39</sup> Adashien Esus: —Cuënote bidiacquin shëcuë shëcne —quepondash. Adsho tantiash unësaidën chuchu Madta: —Padi. Ènden pisenashe. Chococash mabi daëd-daëdquieq ushboc —quepondash. <sup>40</sup> Adoaquien Esus: —Dacuëndenda. Mambi mibi chuiboc. Mimbi: “Nuquin Papan Madombobien mibi nec,” ëbi casho: “Èmbi comapenen tantiaquin nabansho mimbi isendac,” mambi mibi capaboc. En na. Baded bëcune —cac <sup>41</sup> cuënote shëcuë bëtinaid shëcnequin bëcunepondash.

Adsho istanquimbien Esusën abuc isquin Nuquin Papa chuipondash comapenec onquequin. —Papa, ëmbi nëbi chuisho mimbi tantiec. Èmbi chuibocpadomboen mimbi naindac. Mibi bëdambo iquec, Papa. <sup>42</sup> Èmbi otacquio chianiaid mimbi tantioc. Èbi datsidadaido tantiamenuen nëbi comapenec onquequin mibi chiemi. “Mibi chuitanquin ëmbi comapenen tantiaquin nabansho isun: ‘Nuquin Papan chomiaidien nec,’ quequin ma nëidon ëbi tantianu,” qeshun comapenec onquequin mibi chiemi, Papa. Padi, aiddtsëqui mibi chiemi, Papa —quepondash Esus. <sup>43</sup> Adtanquimbien comapenen cuëquin: —Dasado, puduenec cho —capondash. <sup>44</sup> Adoaquien Dasado badedquio puduenanec chopondash abi dashcute dataniacchobi. Unësacsho uesquin dashcuten datanetanquin dashcuten abi bëpucacchobi chopondash. Adec chosho istanquin: —Baded dashcute dachic. Ma nidnu —capondash Esusën.

*Nëbien Esus unës uametiad, quiaid*

*(Mat 26.1-5; Mad 14.1-2; Duc 22.1-2)*

<sup>45</sup> Aden Esusën ènden unësaidquiobi uincuemesho isashien Madia tsibanec sedenquec cho-chobedo abentse-abentsec: —Nuquin Papan chomiaidien Esus nec —quiampondash. <sup>46</sup> Adnubien utsin Edusaden yacno nidshun Esus chieshënquido padiseyobo chuituidpac caondash. —Esusën unësaid uincuemiosh —quepondash. <sup>47</sup> Adsho tantiatanquimbien chuiquid dapan abëdtan chuiquid utsibo cho-chomepac caondash padiseyobo yec tsusio dapabo yec quenuc. Aden cho-chomiash tabadec onquepac caondash. —¿Mitsipadotiad? Nuquin matses ismequin comapenen tantiaquin dadpen nabampac caosh. <sup>48</sup> Aden Esusën nabansho isun nuqui ëmiabi icsho nuquin matsesën abitedishun abi chuiquid dapa Esus icmetsiash. Adnubien nuqui yuaquido Doma yacnocquidon ambi chuiquid icmiacmaidquio chuiquid yansho isun nëishun nuqui acshun siatsiash. Nuquitedi acshun siatanquin Nuquin Papa tabadte shubu uashunaid dapatsen uesquin chic-chictsiash. ¿Mitsipadotiad Esus? —quepac caondash chieshëmënquido.

<sup>49</sup> Adnubien abëdtan chuiquido chuiquid dapambo aid setan icquin Caipas caidëntsen chuipac caondash. —¿Midapadotsëcquien mimbi chiendac? Tantiadentsëcquio icnuc ma mimbi chuipaboc. <sup>50</sup> Tantia. Mibi bëdamboen chuinu. ¿Atotsi quec: “Abitedi unës uaindac,” mibi quepe? Ma nuquin matses abitedi unës uainquio icnueshun Esused unës uamenuna —quepac caondash chuiquid dapambo abëdtan chuiquido chiec. <sup>51</sup> Aden chuiquin ambemi chiambo Nuquin Papan oncamiac Nuquin Papan chiaidquio aden chuipac caondash. —Nëid setan abëdtan chuiquido chuiquid dapambo nec —qeshun Nuquin Papan aden oncamiacqui Caipas onquepanëdash. —Matses cuidmenquio icnuec con Madoded cuidadec unësendac —qeshun Nuquin Papan Caipas aden oncamepanëdash. <sup>52</sup> Aden Caipasën chuinëdaid tantiaquin ëmbitsen chuinu. Tantia. ¿Isadaidbouidtsëqui cuidmenquio icnuecta Esus abided cuidadec unëstiondash? Padenquio. —Matses utsitsen abi tantiaquid yansho isun abëdi tabadmenuec Esused cuidadec unëspondash —quequin

tantiemi. Nēbi Caipasēn chuisho tantiashun tsusiobon chiaid chuinu. <sup>53</sup> Aden Caipasēn Esus unēs uamete chuisho tantiashien Esus chieshēnquido: —Nēbimbobien Esus unēs uametiad —quecuededpac caondash.

<sup>54</sup> —Tsusiobon mibi adosh —quesho tantiatanequien chieshēmēnquido ismenquio yec Esus cuempondash. Cuenequi nidaid utsin nidash masi dapa yacno anoentsēqui shubu dadpen icquid Epadain caid yacno nidpondash. Ambo tabadquin ēbi chedo Esusēn chuibampondash. <sup>55</sup> Epadain caid yacno tabadnubien Nuquin Papan con tsusedpabo unēs uainquio icquin matamiampid inchēsh tantiec cuēdēnec Edusaden yacno con matses nidanepac caondash. Cuēdēnec taēabi icnuc mishtemaid mishquidoba Edusaden yacno nidanepac caondash. —Mabi tsusion nesmenu. “Mishtemaid mishquid tsusion nesmiabi icquid cuēdēntemaid,” quedeneque —quianec nidanepac caondash. <sup>56-57</sup> Adshumbien Edusaden yacnoshon Nuquin Papa tabadte shubu uashunaid daquēnē uaidēn puduedtanquin Esus iste bunquin nibēntuidpac caondash mishtemaid mishquidon. Nibēntuidshobien: —Nuqui chuquido nadpac caosh. “Esus istuidshun ēbi chuita. Bedshun unēs uamechitono,” quepac caosh —quesho tantiashien: —¿Ada Esus chopeba? “Unēs uamenushe,” quiaish choenquien icchitec —quecuededpac caondash.

## 12

### *Madia Dasadon chuchun Esus tanoshcaid* (*Mat 26.6-13; Mad 14.3-9*)

<sup>1</sup> Aden mishtemaid mishquidon abi nibēnubien Edusaden anoentsēqui ambi Dasado uincuemiondacno Betania yacno Esus chopondash. Seistedec ushash Nuquin Papan matamiampid inchēsh tantiec cuēdēnec taēnushi niondash. <sup>2</sup> Ambo chosho isash: —Esus bēdambo iqueque. Pemenu —queshun: —Pec cho —cac puduedash tabadpondash nēidtedi. Nēidic Esus. Nēidic Dasado. Nēidic shubu icbo. Nēidic Esusbēd icquid ēbi chedobi. Nēidic Dasadon chuchu daēd. Aidtedi icpondash. Adec penuec tabadsho Madtan pete menebampondash. <sup>3</sup> Adnubien Madian: —Esus bēdamboshē iquec. Ismenu —quetanquin bēdamboshē nuadquidēn Esus tanoshcapondash. Tanoshcatanquin aton manēdaidēn taupondash. Aden tanoshcaid shubu anuestsēcquiec comapenec nuadpondash. Piucquid dadpenquio menequin bedaid niondash. Sedunten cushtoaid bēdambo nuadquid nado caid niondash. <sup>4</sup> Adsho isun Esus bedmequidēn Udasēn Madia chushcapondash. <sup>5</sup> —Padi. Mimbi uesqueque. Utsi uain nata. Nēid danoshcate meneshun piucquid dadpenquio seta abentsēc matamec chonoadaidtedquiobien bedtiad. Adoshombien piucquid nibēdquido aid piucquid menetiad —capondash Udasēn. <sup>6</sup> Adomboen chuisho tantiashun Udas bēdambo icquidquido danondambi. Esusbēd icquido ēbitedishun piucquid bedshun sauedten sauedshun dayun uaquidquiemi danondac. Piucquid bēdamboec dayun uashumēnenquio yequi abibi ampeshumēnashi adondash Udas. Aden ambi ampiaid tantiequi: —Piucquid nibēdquidoen menetiad —quequin muaquin Madia chushcapondash. <sup>7</sup> Adshobien Esusēn: —Padi. Chushcainda. Ma nanu. Ma nuquin matsesēn unēsaid bēdambo nuadnuc danoshcapaid yoc. “Nēbi con Mado unēsēndac,” quequin Nuquin Papan tantiamicapadomboen ēbi unēsō chococate tantiaquin Madian ēbi tanoshcaquin naic. <sup>8</sup> Piucquid nibēdquido dadpen iquec. Nibēdenquio iquendac. Ēbien mibēd icboedi nēbi nibēdquido yanendac. Ēbi tantiec Madia bēdambo iquec —quepondash Esus Udas chiec aidi: —Abi chieshēnquido Esus bedmenu —quepanuda.

*Dasadotsen cuesunetiadquio yaid*

<sup>9</sup> Adnubien: —Betania yacno Esus choaccosh —cac Edusaden yacnuësh matses dadpen Esus isec cho-chopondash. Ambobidi Dasado Esusën uincuemiondaid icsho aidtsen isnuec cho-chopondash. <sup>10-11</sup> Chochoshon Dasado uincuemiondaid isumbien abentsëcshun abentsëcshunquien: —Comapenen tantiaquin nabanquidquio yec Nuquin Papapadquidquibidien Esus nec. Nuquin Papan chomiaidien nec —quequin Esus tantiabempondash. Esus tantiabenshumbic abi chuiquidon chiaid tantienquio yampondash. Adsho isash nëishtanequien chuiquid dapabo: —“Uincuemiaid Dasado isun Esus tantiabenosh,” quioshe. Dasadotsembien unës uatiad —quianac caondash chieshëmënuquie.

*Chuiquid dapa ismiacimboen Esus ismiaid  
(Mat 21.1-11; Mad 11.1-11; Duc 19.28-40)*

<sup>12</sup> Madian tanoshcaboc ushash Esus Edusaden yacno puduanec nidondash. Nidshobien Edusaden yacnuësh cuëdënuec cho-choboedon: —Esus choec —quesho tantiatanquin <sup>13</sup> niste podobiecquid bedbëtsenec Esus bëquedec cho-chopondash. Esus bëquedshumbien: —Chuiquid dapa nec —quequin ismequin ambi bedbëtsemboed uic-uiccabededpondash. Aden uic-uiccaiqui:

“Mibi bëdamboshë iqueque. Èbi bëdamboen ista.

Nuquin Papan chomiaid yec mibi bëdamboshë iquec.

Con matses isadaidbo chuiquid dapambo mibi nendac,”

quecuededpondash Esus caic. <sup>14</sup> Ambi podquedën choquin bedbëtsemboed cabayobitsecquidëmpi catsadtoanec Esus chosho isash adcuededpondash.

Adec aid catsadte Nuquin Papan tantiamiacpadomboen con tsusedpan dada uaquin naden chuipampic. <sup>15</sup> “Edusaden yacnocquido chiec:

‘Dacuëdenda, Edusaden yacnocquido.

Is. Cabayobitsecquidëmpi catsadtoanec mibi chuiquid dapambo choeque,’ quepec,”

quequin Nuquin Papan chiaid dada uapampic. <sup>16</sup> Adec Esus catsadtoanec chosho isun aden chuipampid tantienquio iccondambi. Esus abuc nidambimbi ëbitedishun tantiabenondac. —Esus chuiquinshenda nuquin tsusedpan dada uapampic. Aidën chiacpadomboen niste podo uic-uiccaquin: “Bëdambo iquec,” quequin nuquin matsesën Esus ismebededpondash —quequin tantiabenondambi.

<sup>17</sup> Esus cabayobitsecquidëmpi catsadtoanec choabi icnuc Esusën Dasado uincuemesho isboedon: —Uincuemesho isombi —quequin matses dadpen chuibenepanëdash. <sup>18</sup> Adsho tantiashun: —Unësaid uincuemequid Nuquin Papan chomiaidien neque. Istanu —quianec Esus bëquedec cho-

choshon aden niste podo uic-uiccaquin ismepondash. <sup>19</sup> —Esus bëdamboshë iquec. Nuqui chuiquid dapa nendac —quecuededsho tantiashien Esus chieshënquido padiseyobo: —¿Midapadoendac nuqui? Tantia. Abitedishun: “Nuqui chuiquid dapa nendac,” cabededpeque. ¿Mitsipaden Esus cuesunetiad? —quepac caondash.

*Matses utsibo: Esus isnu, quiaid*

<sup>20</sup> Edusaden yacno cuëdënech cho-choboedo matses utsibo isadaidpembotsen icpondash. <sup>21</sup> Adnubien adquido matses utsibon Esus iste bunquin shubu dadpen icquid Betsaida caid yacnuësh caniquid Esusbëd icquid Uedipe chuituidpac caondash. —Esus istiadquio iquebi —quesho tantiashien: —Chiata. Chuitambono —quianec nidshun <sup>22</sup> Esusbëd icquid



utsi Andedesba chuibëtsenec Andedesbëd choequi Uedipe Esus chiec cho-pondash. —Matses utsibon mibi istiadquoio iquec —caquien <sup>23</sup> aid matses utsibo isadaidpembo tantiamenuc Esus comapenec onquepondash. —Nuquin Papan matsesmiondaidquoio icquin nëbimbobimbi ambi chiaidtedi nainendac. Ëmbi adoacsho Nuquin Papan: “Mibi bëdambo iquec,” ëbi caindac —quepondash Esus abi unës uate chiequi. <sup>24</sup> Adshumbien ompoacbimboen chuipondash. —Tantia. Mibi chuinu. ¿Mitsipadquoio pete ëshë chococaid icpec? Chococac canias bacuëec bëdambo icpaid yoc. Chococabi bëdambo ictiapimbo iquec. Adoacbimboen chococabi yac matses bëdambo icmetiapimbo iquendabi. Unësacsho chococac matses bëdambo icmequid nendabi —quepondash Esus. <sup>25</sup> Adashic padpidec: —Ambi naiduidi naquin ëmbi chiaid niacquido Nuquin Papan cuidtequido nendac. Ambi naiduidi nainquoio icquin ëmbi chiacpadomboen naquido ëbëdi tabadtequido yanendac. <sup>26</sup> Adquid ëmbi chiacpadomboen natiadquoio yec ëbi yacpadec chieshtoenquoio ictsiash. Adquidquoio unësash uincuenash ëbëdi tabadsho Nuquin Papan: “Nëid con Mado tantiaquid bëdambo iquec,” capendac —quepondash Esus.

### *Esusën abi unës uate chiaid*

<sup>27</sup> Adashic abi unës uate tantiec Esus nadpondash. —Unësquioshë yanuc: “Mimbi tantiacpadomboen natiapimbo iquebi, Papa,” ¿quectabi icti? Mabi con Pan chiacpadomboen nanuec chondac. Aden nanuec nebi —quepondash Esus. <sup>28</sup> Adtanequien Nuquin Papa chiec: —Nuqui tantiacpadomboen nëbi nainembi, Papa. Ëmbi aden nainacsho: “Nuquin Papa bëdambo iquec,” matses cameta, Papa —quenubien abucuëshquoio Nuquin Papa comapenec onquepondash. —Ai, ëmbi namiaid mibi icsho: “Nuquin Papan namiaid nec. Nuquin Papa bëdambo iquec,” matses camepombi. Nëbi padpiden adomeoaindami —quepondash Nuquin Papa.

<sup>29</sup> Abucuësh onquesho bëdamboen tantiabi yec utsibo: —Abu cuëdtoec nec —quenubien utsibo: —Nuquin Papan abi yacnoshon uaid mayan bëdan Esus chuipash —quecuededpondash. <sup>30</sup> Adsho tantiash Esus: —¿Ëbi tantiamenuc onquediosh? Padenquoio. Mibi tantiamenucquien niosh. Aden tantiashun ëmbi bëdamboen chuisho tantiata. <sup>31</sup> Nuquin Papa chieshëquid Satanasën yuaido matses dadpenquioshë iquec. Nëbi Nuquin Papan tantiacpadomboen aido utsi-utsien Satanas bedshunendambi: “Chën. Con na neque,” quequin. <sup>32</sup> Ëbi abuc dectanac aden matses ëbi tantiaquid icmendambi —quepondash Esus. <sup>33</sup> —Ëbi cuesten dectanquin unës uaindac —quequin tantiec: —Ëbi abuc dectanendac —quepondash Esus.

<sup>34</sup> Adsho tantiash abi datsidadquido: —“Ëbi dectanendac,” quiosh. “Unësebi,” quepequien iccosh —quiashien Esus chiec: —“Nuquin Papa yacnuësh choquid Quidistu caid unësesambo nendac,” quequin Nuquin Papan chiaid nuquin matsesën chuinubi: “Unësebi,” ¿quecta icco? “Unësebi,” quequid Nuquin Papa yacnuësh choquid ictiapimbo mibi iquec. “Nuquin Papan matsesmiaid nebi,” quequid ¿tsutsi mibi nepe? —quepondash Esus datsidadquido. <sup>35</sup> Adoquien Esusën: —Nadquid nebi —quenquoio icquin ompoacbimboen naden chuipondash. —Mibi bëdamboen tantiamequid nëbi isadenquoio iquendac. Aid nibëdnuc bëdamboen mimbi tantienquoio iquendac. Nidabi aidën chuisho bëdamboen tantiata. <sup>36</sup> Nuquin Papan bëdamboen iste tantiamequid tantiata. Adsho bëdambo icmequin Nuquin Papan cuidtiapimbo icquid mibi icmendac —quepondash Esus abibi cadequi. Adtanec nidpondash aidon istiapimbo icnuc.

*Isadaidbon Esus tantienquo yaid*

<sup>37</sup> Ĕmbi dadpen chuiquin dada uabanacpadomboembi Esusën comapenen tantiaquin dadpen nabansho isun con matses isadaidbon Esus tantiatiadquidi Esus tantienquo icpondash. <sup>38</sup> Aden Esus tantienquo icte con tsusedpa Isayasën Nuquin Papan tantiamiacpadomboen chuiquin dada uapampic.

“Nuquin Papa yacnuësh choash nadec onquendac.

‘Mimbi chiaidquo chuibansho tantiashun: Muequien mibi nec, ěbi caindac, Papa.

Mimbi namiacpadomboen comapenen tantiaquin dadpen nabansho isash: Nuquin Papa yacnuësh choquidien nec, quetiadquidi adenquo iquendac, Papa,’ quependac,”

quequin Esusën chuite Isayasën dada uapampic.

<sup>39</sup> Nuquin Papan pamumědadbimboecnuc icmiac con matsesën Esus tantienquo icpondash. Aden chuiquin Isayasën padpiden dada uapampic.

<sup>40</sup> “Isadaidbon ěbi tantiatiapimbo icsho isun

‘Ma adembi tantienquo icpanuna,’ caimbi.

Ma adequi pabiate shěcuě nibědadbimboec icchitono.

Ĕbi tantiasho abi icsaid běpiscudquin bědamboen ismane,”

quequin Nuquin Papan ambi con matses caido něishěnshun chushcaid Isayasën dada uapampic. <sup>41</sup> Nuquin Papambo Esusběd uinsadpambo yec tabadsho isondaid icquin Isayasën aden Esus tantienquo icte chuiquampic.

<sup>42</sup> Con matses dadpenshun Esus tantienquo icnubi con matses chuiquidon abentsěcshun abentsěcshunquien Esus tantiauidpac caondash. Adoboedi: — “Nuquin Papan chiaid chuibante shubun puduedenda,” canushe — quiash dacuědquin: — Esus tantiaquid nebi — quequin chuitiadquidi utsibo chienquo icpac caondash. <sup>43</sup> — Ma con matsesěmbi ěbi bědamboen isnu — quequiditsěqui tantiaquin aton matses chuitiapimbo icpac caondash. — Ma Nuquin Papan ěbi bědamboen isnu. Aton Mado tantiaquid nebique — quetiadquidi adenquo yac caondash.

*Cuidenquo icte chiec nebi, quiaid*

<sup>44</sup> Abi tantiauidboedo Nuquin Papan chiaid isbanquido cho-choash abi datsidadacsho chuinuec Esus padpidec comapenec onquepondash. — Ĕbi tantianuequiděn ěbiuidtsěquida tantiapadic? Padenquo. Ĕbi tantiaquiděn ěbi chomiondaidsen tantiatsiash. <sup>45</sup> Adembidi con Papadquiobidi ěbi icsho isun: “Ai, adquiobidien Nuquin Papa iquec,” quequin tantiatsiash.

<sup>46</sup> Nuquin Papan matses bědamboen iste tantiamenuc matsesběd tabadec chondabi. Adec matsesash: “Ĕbi tantiaquido ma Nuquin Papan bědamboen isquin bědamboen tabadmenu,” quiash nebi. <sup>47</sup> “Ĕmbi aden chuisho tantiatiapimbo icquido něbi cuidnu,” ěquectabi icti? Padenquo. Něbi Nuquin Papan bědamboen isquin cuidenquo icte chuinuequini nec. <sup>48</sup> Nuquin Papan cuidte ushěmbien ěbi tantiesabon: “Nuquin Papan chiaidshenda chuipadenec. Aid tantienquo yec icsabudquiopobi,” quequin ambibi tantiendac. Adsho Nuquin Papan cuidendac. <sup>49</sup> ěĔmbembi chuiquindambi nadi? Padenquo. Ĕbi chomiondaid con Pan chiaidquo chiequini nec. <sup>50</sup> “Ĕbi tantiaquid ěbědi tabadendac padpidec uněsenquo yec,” queshun Nuquin Papan chiauidtsěqui chiequini nec — quepondash Esus.

<sup>1-2</sup> Esusën comapenen tantiaquin nabanaid chuiquin aitedi chiombi. Nēbi abi tantiaquido tantiaquiec abided cuidadec unēsaid chuiquin unēsash abi uincuenaidtsen chuinu. Tantia. Nuquin Papan con tsusedpabo unēs uainquio icquin matamiampid inchēsh tantiaquin pec tabadte ushē nēbi yanuc inchēshēn Esusbēd pec bēdamboec tabadondabi. Padnuen Udas Simon Isca dioten mado Satanasēn tantiamiacpadomboen Esus bedmete tantiec tsadpanēdash. Adnubien Esus: —Nēbi con Pa yacno nidebi nēido nianec. <sup>3</sup> Con Pabēd tabadec ambi tantiacpadec abēdi abitedishun Icbombo iccondaidi nēbi anobidi nidoash adquiobidi icoaindabi. Adquid icquin nēido bēdamboec tantianante ismenu —quequin tantiaquin <sup>4</sup> yuan nacbimboen nadopondash. Uequin peboedi nidtotanec dashcute bēntse icquid dachiquidtanec daucudte tsibidiquepondash. <sup>5</sup> Tsibidiquetanquin pada-padaid dapan acte cushtotanquin abēd icquido tapambampondash. Daucudten tauchanquin tapambanondash.

<sup>6</sup> Aden tapambanquimbi: —Mibitsen tapanu —cac Petedon: —¿Icbonda yua tapampaid? Ēbi tapanenda, Icho. Padi —capondash. <sup>7</sup> Adoaquien Esusēn: —Ēmbi nasho nēbi mimbi tantienquio iquec. Yuecshun mimbi tantiendac. En tapanu —caquien: <sup>8</sup> —Padi. Mibi bēdamboshē icquid nec. Ēbien icsaquid nec. Yua namiacbimboen mibi tapametiapimbo iquebique. Padi —caoapondash Petedon. Adoaquien: —Ēmbi tapanabi yac con yuambo mibi ictiapimbo ictsiac —capondash Esusēn. <sup>9</sup> Adsho tantiashun Petedon: —En na, Icho. Tapantanquimbi mapinobēdtabi ēbi mēpanta —caquien: <sup>10</sup> —Padi. Nesboed mibi nec. Taēnouidtsēqui bēchishacsho tapanembi. Ēmbi bēchish ucac mibi bēdambo iquec. Abentsēc icsambo iquec —quepondash Esus. —Bēchish ucacbimboen ěmbi nasho Nuquin Papan mibi bēdamboen isendac icsaid ucudacbimboecnuc —quequin tantiec: —Ēmbi bēchish ucac mibi bēdambo iquec —quepondash Esus. <sup>11</sup> —Udasēn ēbi unēs uamenuen bedmendac —quequin tantiec: —Abentsēc icsambo iquec —quepondash Esus.

<sup>12</sup> Aden tapambanash dasiuidash samēdquin pebededquin abēd icquido Esusēn chuipondash. —Ēmbi naboed ¿ada tantie? Tantia. Mibi chuinu. <sup>13</sup> “Ēbi chuiquidquio mibi nec,” mimbi ēbi capec. Adembidi: “Con Icho mibi nec,” mimbi ēbi capec. Bēdamboen mimbi chiec. Adquid nebique. <sup>14</sup> Ēmbi nabocpadomboen mimbitsen nata. “Ēbēd icquid tantiaquioquin tapanquin nashunu,” qeshun naombique. Adecbidi nashunanta. Naden tantiashun nata. “Esus tantiaquido tantiaquiembi. Con buchibimboecnuc nashunu,” quiash nashunanta. <sup>15</sup> Ēmbi nabocpadomboen namenuen adombique. Mimbitsen nata. <sup>16</sup> En chuinu. Tantia. ¿Icbon chiacna chieshpadic? ¿“Nid,” cacta nidenquio icpadic? Icbon chiacpadomboen yuan naquid yendac. Adomboen tantiaquin ěmbi chiacpadomboen nata. <sup>17</sup> Ēmbi aden chuisho tantiashun ěmbi chiacpadomboen naic mibi bēdambo iquendac —quepondash Esus.

<sup>18</sup> Adashic padpidec: —Mibitedi caic: “Bēdambo iquec,” quetiapimbo iquendabi. Tauamboen: “Nuquibi icnu. Cho,” ěmbi caondaido con yuabotedi tantiembi. Abentsēc icsambo iquec. “Aid con yuapenquio nec,” quequin ěmbi tantiaidi nec. Nuquin Papan tantiamiac aidēn icsamboen nate chuiquin nuquin tsusedpan dada uapampic naden. “Ēbēdtan planeboedēmbi ēbi unēs uamenuen bedmendac,” quequin dada uapampic. <sup>19</sup> “‘Abi unēs uametebi chiohi. Nuquin Papapadquidquobi icquimbien naosh,’ quequin ma tantianu,” qeshun mibi chiombi. <sup>20</sup> Mibipadquidēn nate mibi chuinu. Tantia.

Mibipadquidën ëbi chuibansho tantiash: “Ai, abimbo caic,” qushun utsibon ëbi tantiatsiash. Adembidi ëbi tantiashun ëbi chomiondaid Nuquin Papatsen tantiatsiash —quepondash Esus.

*Abi bedmequid Esusën chiaid*

(*Mat 26.20-25; Mad 14.17-21; Duc 22.21-23*)

<sup>21</sup> Adshumbien abi bedmequid Udas tantiac unësquio icnuc Esusën chuipondash. —Tantia. Mibitedi chuinu. Ëbëd icquidëmbi ëbi chieshënquido ëbi bedmendac —quesho <sup>22</sup> tantiash abëd icquidobëd bëisanec: —¿Tsutsi capec? Nëidien cachitec —quecuededpondabi otacquo tantiec.

<sup>23</sup> Ëbi tantiaquidquo yec con cachoctsëqui Esus uepondash. <sup>24</sup> Adec Esusën dayuntsëqui ueshobini: —“¿Tsutsi cai?” ca —capondash Petedon mëdquin onquenquo icquin. <sup>25</sup> Adoaquimbi cachoc isquin: —¿Tsutsi cai, Icbo? —capondac. <sup>26</sup> Adoaquien Esus: —En istac. Pete cuëshën ënë puntanquin menequin mibi ismenu —quetanquin pete cuëshën ënë puntanquin Udas Simon Iscadioten mado menepondash. <sup>27</sup> Adoac penubi Satanasquio Udas dapuduedquiopanëdash ambi tantiaidquo namenuc. Adshobien Esusën: —Mimbi tantiacpadomboen baded nëbimbobi naic nid, Udas —capondash.

<sup>28</sup> Adsho tantiashini ëbitedi: —Tantiadenquo yec onquepec. ¿Atotsi quiash: “Baded naic nid,” quepec? —quepondac. <sup>29</sup> Utsi: —Udas nuqui piucquid dayun uashunquid nec. “Piucquid buanshun pete bedtan,” quepequien iccosh —quenubien utsi: —“Piucquid nibëdquido piucquid menetan,” quepequien iccosh —quecuededpondash. <sup>30</sup> Pete cuëshëmpi pesho: —Nëbimbobi baded naic nid —caquien Udas nidpondash. Inchëshëmbi nidpondash Esus bedmenuen chiec nidec.

*Tantiananquiota, quequin chiaid*

<sup>31</sup> Abi bedmenuen chiec Udas nidbombien Esus: —Nuquin Papan mat-sesmiqidquo icquin ambi tantiaidtedi nëbimbobimbi nainendac. Ëmbi nainsho isash con Pa bëdambo iquendac. <sup>32</sup> Ëbitsen bëdambo icmenuen con Pan comapenen tantiaquin ismendac. ¿Yuecshun quectabi icti? Nëbimbobimbi caindac —quepondash Esus. Abi unës uatebëdta abi unësash uincuenash Nuquin Papa yacno nidte chiec adpondash. <sup>33</sup> Adashic ëbi chedo padpiden chiec: —Nëbimbobi nidebique. Chuiquid dapabo ëmbi chiondacadomboen mibi chuioanu. Tantia, mado. Ëbi nidacsho mimbi ëbi istuidenquo iquendac. Ëbi nidacno mibi nidtiapimbo iquendac. <sup>34</sup> Aden tantiaquin Nuquin Papan chiaid utsi mibi chuinu. Ëbi nidan ëmbi chiacpadomboen nata. Ëmbi mibi tantiaquiacpadquiec tantiananquiota. <sup>35</sup> Ëbi tantiaquido tantianansho isun: “Adec tantiananquido Esus tantiaquidombo nec,” quequin utsibon tantiatsiash —quepondash Esus.

*Petedo: Ëmbi isacmaid nec, quete chiaid*

(*Mat 26.31-35; Mad 14.27-31; Duc 22.31-34*)

<sup>36</sup> Adec —Nidebi —quesho tantiashun Petedon: —¿Mitsimbo nide, Icbo? —capondash. Adoaquien Esus: —Nëbi mibi nidtiapimbo yacno nidebi. Yuecash ambo mibitsen nidendac —quepondash Esus. <sup>37</sup> Adsho tantiash Petedo: —¿Atotsi quetiadquo yec: “Nëbi ëbëdi nidtiapimbo mibi iquéc,” quepo mibi? Mibëd nidec dacuëdenquo ictsiabi. Mibi chieshënquidon: “Unës uanu,” mibi casho tantiash: “Ëbien natiad,” quetsiandabi —quepondash Petedo.

<sup>38</sup> Adsho tantiashien Esus: —“Ëbien natiad,” ¿quecta icpatsia? Padenquo mibi ictsiac. Cachina bënë cuëdanabi icnuc mibi chieshtouidendac. “Ëmbi

isacmaid Esus nec,” mibi quendac. Adashic padpidec adecbidi. Adashic padpidec adecbidi. Cachina bënë cuëdanabi icnuc mibi adendac —quepondash Esus. Adsho tantiashini Esusbëd icquido ëbitedi dacuëdcuededpondac.

## 14

### *Nuquin Papabëd tabadmendambi, quiaid*

<sup>1</sup> Ëbitedi dacuëdcuededsho isashien Esus: —Dacuëndenda. “Ëbi dayun uaquid nec,” quequin mimbi Nuquin Papa tantiacpadomboen ëbitsen tantiaquiota. <sup>2</sup> Mimbi tantiacpadquio Nuquin Papan shubu iquec. Quënë dadpenquioshë iquec. Tsucustiapimbo iquec. Adpenquio icsho mibi aden chienquio ictsiambi. Adquid tantiaquin: “Ëbi tantiaquido ëbëdi tabadmendambi,” quequin chiombi. <sup>3</sup> “Adquid iquec,” quiaish ëbia nidshun con Pa chiendambi. “Ëbi tantiaquido neque. Nuquibëdi tabadmenuna,” quequin chiendambi. Adashic ëbi yacno mibi buanuec choaindabi. <sup>4</sup> Ëbi nidan ëbi nidacno nidte mimbi tantiec —quepondash Esus.

<sup>5</sup> Adsho tantiashun Tomasëntsen: —¿Mitsimbo nide, Icbo? Tantiambo iccombi. Podqued tantienquio iquembique. Ëbi chui —caquien <sup>6</sup> Esus: —Nuquin Papa yacno nidte tantiamequidquio nebi. Nuquin Papan chiaiduidtsëqui chiec muesambo nebi. Adquid icquin ëbi tantiaquid Nuquin Papabëd tabadmendambi. Ëbi tantiesan Nuquin Papa tantiatiapimbo ictsiash. Ëbi tantiaquidënuidtsëqui Nuquin Papa tantiatsiash. <sup>7</sup> Ëbi caic: “Nuquin Papan Mado nec,” quequin mimbi Nuquin Papatsen tantiendac. Nëbi abipadquid ëbi icsho isun Nuquin Papambo isacbimboen mimbi tantiendac —quepondash Esus.

<sup>8</sup> Adshobien Uedipentsen: —Nuquin Papa ëbi isme, Icbo. Nuquin Papa iste bunebique. Aid isash bëdambo ictsiabi —caquien <sup>9</sup> aidtsen Esusën: —¿Tantienquioda ique, Uedipe? Yuec mibëdi tabadobi. ¿Mimbi isacmaidtabi nedi? ¿Mibi chianenquiodambi ictio? Nuquin Papapadquidquibidini nec. Ëbi adquid icsho isun: “‘Adquidquibidi Nuquin Papa iquec,’ quequin Nuquin Papatsen mimbi tantiendac,” quequin mibi chiombi. ¿Atotsi quequimbini: “Nuquin Papa ëbi isme,” cai? <sup>10</sup> “Nuquin Papapadquidquio nebi,” ëbi qesho tantiash: “Ai, abimbo caic,” ¿quenquioda icco? Ëmbembi chienquio iccombi. Con Pan chiaidquio chiequini nec. Adembidi ëmbembi nabanenquio iccombi. Ëbëd tëshnanenquio icquin con Pan namiaquimbi naoc. Ëmbembi nainquio iccombi. <sup>11</sup> “Con Papadquidquio nebi,” ëbi qesho tantiashun: “Ai, abimbo caic,” cata. Ëmbi chiaid tantiatiapimbo icquin ëmbi comapenen tantiaquin dadpen nabamboedquio tantiata. Aden ëmbi nabamboed tantiaquin: “Nuquin Papan chomiaidënuidtsëquien adotsiash,” quequin tantiata. <sup>12</sup> Tantia. Mibi chuinu. Ëmbi nacpadomboen ëbi tantiaquidontsen comapenen tantiaquin nabanendac. Ëmbi chuibanac daëdpactsëcshun ëbi tantiabentsëccosh. Con Pa yacno nidshun ëmbi chomiaidën con Mayanën namiac mibipadquidën ëbi chuibanac dadpenshun ëbi tantiabenendac. <sup>13</sup> Ëmbi chiacpadomboen naquidën: “Ëbi nashunta, Icbo,” qesho tantiashun ambi chiacpadomboen nashunendambi. “Nuquin Papa bëdamboshë iquec,” camenuen <sup>14</sup> ëbi tantiaquidën chiacpadomboen nashunendambi —quepondash Esus abëd icquido chiec.

### *Nuquin Papan Mayan tabadte chiaid*

<sup>15</sup> Adashic abëd icquido padpiden chiec Esus: —Ëbi abimbo tantiaquidën ëmbi chiacpadomboen natiadquio iquendac. <sup>16</sup> Adotiadquio icsho isun con

Pabéd icquin con Pa chiendambi naden. “Nuqui tantiaquido bédamboen tantiamenuen nuquin Mayan aidobéd tabadmenuna, Papa,” ëmbi cac Nuquin Papan con Mayan mibédi tabadmendac. <sup>17</sup> Adoac mibi nianenquio yec mibédi tëshnanenquio iquendac. Mibéd icquin ëbi chuiquin mibi abimbo tantiamendac. Aid isadenquio icsho ëbi tantiesabon aid tantiatiapimbo iquec. Mimbien aid tantiec. Con Pan ëbéd icmiaidquio nec. Ambi namiaid ëbi icsho aid tantiashumbimboen mimbi tantiec. Ëbi nidan choash mibédi tëshnanenquio yec tabadendac con Mayan. <sup>18</sup> ¿Shiadimpi mëyadacbitsec ic-nudambi mibi niampe? Padenquio. Nuquin Papan Mayan con Mayambi nec. Mibéd aid icnuc ëbéd yacximboequi con Mayan tantiadendac. <sup>19</sup> Nëbi ëbi nidacsho ëbi tantiesabon ëbi isenquio icnuc mimbi ëbi isendac uincuenacsho. Adec uincuenaid icquin con Mayan mibéd tabadmequin mibi unësacsho uincuemeshun ëbédi tabadmendambi. <sup>20</sup> Ëbi uincuenaid ushëmbi mimbi naden tantiendac. “Esusën Nuquin Papa tantiaquiec aidbéd tëshnanenquio icquin aidën chiacpadomboenuidi naindac. Adecbidi Esusbéd tantiananquiec aidbéd tëshnanenquio icquin aidën chiacpadomboen natiadquio yec tabadebi,” quequin mimbi tantiendac. <sup>21</sup> Ëmbi chiacpadomboen naquid ëbi tantiaquidquio nec. Ëbi tantiaquidquio mibi icsho con Pabëdtan mibi tantiaquioquin: “Adquio aton Papabéd Esus iquec,” camequin mibi bédamboen tantiamendambi —quepondash Esus.

<sup>22</sup> Adsho tantiashun Udas utsin abi bedmequidënpenquio: —“Nuquin Papa yacnuësh choash con matses chuiquidquio yanshun abitedi ismequin tantiamendac,” quequin Nuquin Papan chiaid nuquin tsusedpabon dada uapampic. Nuquin Papa yacnuësh choquid icquin ¿atotsieshun ëbiuidtsëqui tantieme, Icho? —caquien <sup>23</sup> Esus padpidec: —Ëbi tantiaquiduidtsëqui naden tantiamendambi. Ëbi tantiaquid ëmbi chiacpadomboen naquid nec. Aden nasho con Pabëdtan tantiaquioquin aidbédi con Mayan tabadmendambi. Adoac con Mayanën tantiamiac ëbéd iquec con Pabéd iquec quiacximboec tantiadendac. <sup>24</sup> Ëbi tantienquio icquidoen ëmbi chiaid niac-niacquido nendac. ¿Ëmbiuidtsëqui chiaidta adquidën niac-niacpadic? Mambi Nuquin Papan chiaidquio chuiboc. Aidën chiaidquio adquidën niac-niaquec —quepondash Esus abéd icquido chiec.

<sup>25</sup> Adashic padpidec Esus onquiondash. —Mibi bëdiactsëc tantiamequin mibéd icquin con Pan chiaid chuibanombi. <sup>26</sup> Con Pa yacno nidshun ëmbi: “Nuquin Mayan aidobédi tabadmenuna, Papa,” cac con Pan con Mayan matsesbéd tabadmendac. Adoac ëmbi naidbëdta ëmbi chiondaidtedimbo mibi bédamboen tantiamendac. <sup>27</sup> Con Pa yacno nidshun con Mayan mibédi tabadmequin dacuëdenquio icquid mibi icmendambi. Adoac dacuëdenquio yec bédamboec tabadta. Ëbi tantiesabo dacuëdacximboec dacuëdenda. Comapenec dacuëdtanec uinte paëdtanec aido tabadnubi mibi dacuëdenquio yec bédamboec tabadta. <sup>28</sup> “Nëbimbobini con Pa yacno nidendac. Adtanequic choaindabi,” quepobi mibi chiec. Ëbi adsho tantiash ëbi tantiaquidombo cuishonquetsiash. “Esus abi namequid aton Papabéd tabadec nidec,” quiash ëbi tantiec cuishonquetsiash. <sup>29</sup> Nidnumbi mibi chiec nebi. “Unësash uincuenendabi. Adashic con Pa yacno nidendabi,” quiobi. “Ëmbi chiacpadec ëbi adsho isun ma nëidon: ‘Esusën abimboshenda capondash. Ambi chiondacpadquid Nuquin Papan Madombo nec,’ quequin tantianu,” quiash adobi. <sup>30</sup> Nëbi ënquimbi chuinu. Ëbi tantiesabon icho Satanas ëbi unës uamenuec choec. Ambembi aidën ëbi unës uametiapimbo iquec. <sup>31</sup> Con Pan tantiacpadequini unësendac. Ëbi adec unëso isash: “ ‘Nuquin Papa tantiaquin

ambi chiacpadomboen naic abided ciudadec Esus unēsac,’ quequin ma matses abitedishun tantianu,” quiash adebi. Nēbimbobimbi naique. Nidec nidnu. Nid —quepondash Esus.

## 15

### *Shancuinbiecquid uba caid chiaid*

<sup>1</sup> —Nidec nidnu. Nid —quetanquimbi padpiden chuipondashi ompoacbimboen chuiquin. —¿Mitsipadquio shancuinbiecquid uba caid icpec? Mapictsēc ictsequi cuidi-cuidipambo yanquid. Adquidic shancuin bacuēbimboec didiquequid. Uba dadan aton cuidi canimequin bēdambo icmequid. Adomboembidi ēbi tantiaquido bēdambo icmendambi. Nuquin Papan uba icbobimboecquid nec. <sup>2</sup> Uba aton icbon cuidi utsiuc bacuēesa icsho pateshunepaid yoc. Adoacbimboen ēbi tantiauidtsēchoedon ambi icsamboen naid ēntiapimbo icsho con Pan ambi icsaido cuidacno nēnendac. Uba icbombidi bēdamboen bacuēmenuen dadpen cuidi icquid cuidi dadpen pateshun siaquid. Adomboembidi ēbi tantiaquido bēdamboshē icmenuen Nuquin Papan aidon icsamboen naid ēmetsiash. <sup>3</sup> Ēmbi chiacpadomboen naic mibi bēdambo iquec. Aden ēbi tantiasho Nuquin Papan mibi bēdamboen isec. <sup>4</sup> Ēbi adembidi tantiaquin ēmbi chiacpadomboen nata. Adsho isash mibi bēdamboen tabadmec mibēd iquendabi. Uba cuidi padquēdaid bacuētiapimbo iquendac. <sup>5</sup> Adecbidi ēbēdi tēshnanash matses bēdambo ictiapimbo iqueque. Ēbēd tēshnanenquio yec bēdamboec tabadta. Bēdamboec tabadquin mimbi utsibo ēbi tantiametsiac. <sup>6</sup> Uba icbon cuidi utsiuc bacuēesa icsho pateshun tsindoshon nēdēncapaid yoc. Adoacbimboen ēbi tantiesabo unēsacsho Nuquin Papan ambi icsaido cuidacno nēsecaindac —quepondash Esus.

<sup>7</sup> Adshumbic Esusēn padpiden chuipondash. —Ēbi tantiaquin ēmbi chiacpadomboen naquidēn: “Ēbi nashunta, Papa,” cac ambi chiacpadomboen Nuquin Papan nashuntsiash. <sup>8</sup> Nuquin Papan adoshonac: “Nuquin Papa bēdambo iquec,” mimbi catsiac. Adembidi utsibotsen: “Nuquin Papa bēdambo iquec,” camenuen bēdamboec tabadquin ēbi tantiameta. Mimbi adosho: “Ai, ēbi tantiaquidquio nec,” caindambi. <sup>9</sup> Con Pan ēbi tantiaquiacpadomboembi mibi tantiaquiembi. Adoaid icquin ēbitsen tantiaquioquin ēmbi chiacpadomboen nata. <sup>10</sup> Abi tantiaquioquin ambi chiacpadomboen nashobini con Pan tantiaquiec. Adembidi ēbi tantiaquidēn ēmbi chiacpadomboen nasho ēmbitsen aid tantiaquiendambi. <sup>11</sup> “Ēbi cuishonquiacpadquiecbidi ma ēbi tantiaquiec cuishonquequiono,” qeshun aden mibi chiembi —quepondash Esus abēd icquido chiec.

### *Tantiananta, quequin Esusēn chiaid*

<sup>12</sup> Adashic abēd icquido padpiden chiec Esus: —Ēmbi mibi tantiaquiacpadquiec tantiananta. <sup>13</sup> Nadquiec caimbi. “Min utsi cuesnu,” cashunac: “Ēbien natiad,” quiacbimboec tantiananta. Aden mibi tantiec ēbided ciudadec unēsendabi. <sup>14</sup> Ēmbi chiacpadomboen nasho mibi con utsi caimbi. <sup>15</sup> Ēmbi con yua caboedobi mibi con utsi caimbi. Icbon: “Tantia. Chuinu. Nadono. ¿Ada bēda icpec?” quequin aton yua chienquio icquin aton utsien aden chuipaid. Con Pan: “Ma abi tantiaquido chuinu,” caidtedi mibi chiombique. Mibi con utsi caimbi. <sup>16</sup> “Esusbēd iquec nidnu,” ¿quequina mimbembi tantiadionda? Ēmbien mibi: “Nuquibi icnu. Cho,” caondac. “Utsibo tantiamequin ma nēidon ēbi chuibenenu. Adoac utsibotsen ēbēd tabadtequid yanendac,” qeshun mibi cho caondambi. Aden ēmbi chiacpadomboen naquidēn Nuquin Papa chuiquin: “Min Mado Esus tantiaquid ēbi icsho ēmbi chiacpadomboen ēbi

nashunta, Papa,” mimbi cac mimbi chiacpadomboen Nuquin Papan mibi nashuntsiash. <sup>17</sup> Ëbi adsho tantiash ëmbi chiacpadquiec tantiananta — quepondash Esus.

### *Esus tantiaquido chieshënte chiaid*

<sup>18</sup> Adashic padpidec Esus onquepondash. —Ëbi tantienquo icquidon chieshënac: “Aden Esusba chieshë nondash,” quequin tantiata. <sup>19</sup> Ëbi tantiesabo icsho ëbi chieshë nquidon mibi bëdamboen istsiandac. Adquid iccondaidi ëmbi: “Cho,” cac ëbi tantiaquid mibi yanondac. Adac ëbi tantiaquid icsho mibitsen chieshë noaindac. <sup>20</sup> “Yuan icbon chiacpadomboen napaid yoc,” quequin ëmbi ¿chui boedta tantie? Aden ëmbi chiacpadomboen nasho ëbi chieshë nquidon mibitsen chieshë noaindac. Adembidi ëmbi chiaid tantiatiapimbo icquidën mimbi chiaidtsen tantiatiapimbo icoaindac. Padnuen ëmbi chiaid tantiaquidën mimbi chiaidtsen tantiendac. <sup>21</sup> Ëbi chieshë nquidombi ëbi chomiondaidquo tantiaquin ëbi chieshë nenquo ictsias. Ma ëbi chomiondaid Nuquin Papa tantienquo icquin aidon ëbi chieshëmpayoc. Adomboembidi ëbi tantiaquidotsen chieshë noaindac. <sup>22-23</sup> ¿Ëbi chieshë nquidon ëbiuidtsë quida chieshëmpadic? Ma ëbi chieshë nquin Nuquin Papatsen chieshëneyoc. Adquid icsamboshë iquec. Nuquin Papa yacnuësh choshon ambi chiaid ëmbi chiabi icnuc ëbi chieshë nquido ëbi chieshë nec icsainquo ictsenash. Nuquin Papa yacnuësh choshon mambi Nuquin Papan chiaidquo chuibamboc. Adnuc Nuquin Papan ëbi chieshë nquido: “Mibi icsamboshë iquec,” caindac. <sup>24</sup> Adembidi Nuquin Papa yacnuësh choshon ëmbi comapenen tantiaquin nabanquin ismiabi icnuc Nuquin Papan: “Con Mado chieshë nec mibi icsambo iquec,” cainquo ictsenosh. Utsibon nabanacmaidquo comapenen tantiaquin mambi nabamboc. Adosho isash ëbi chieshë nquido: “Icsapenquo iquebi,” quetiapimbo iquendac. Ëmbi nabansho isun ëbi chieshë nquin con Patsen chieshë nec. <sup>25</sup> “Aden matsesën ambembi ëbi chieshëmpac,” caimbi. Ëmbi aden chuite chuiquin Nuquin Papan nuquin tsusedpa dada uamepampid ëbi chieshë nquidon isbanaidi nec — quepondash Esus.

<sup>26</sup> Adashic padpidec: —Ëmbi con Pa yacno nidshun: “Nuquin Mayan ëbi tantiaquidobëd tabadmenuna, Papa,” cac: “Ai,” queshun Nuquin Papan chomiac mibëdi tabadquin abimbo chuiquin ëbi tantiamequiendac. <sup>27</sup> Adoac mibitsen ëbi chuibanendac. “Yuec aidbëd tabadondashun Esus tantiembi,” queshun mimbi ëbi chuibanendac. Aden mimbi chuisho ëbi chieshë nquidon mibitsen chieshë nendac. Adoac dacuëdenda.

## 16

<sup>1</sup> “Chieshtonoshe,” queshun mibi aden chiombi. Mibitsen chieshë nac dacuëdenda. Mibëd con Mayan tabadmembique. <sup>2</sup> Ëbi tantiaquido caquin: “Isenda. Esus tantiaquid neque. Nuquin Papan chiaid chuibante shubun puduedmenda,” caindac. Shubu utsi-utsieac yacnuësh adendac. Adomboembidi mibi chieshë nquin utsi-utsien cuesun secash: “Nuquin Papa tantiaquidquo icquin Esus tantiaquido cuesun secaombi,” quependac. <sup>3</sup> Aden Nuquin Papa ëbëdta tantienquo icquidon ëbi tantiaquidotsen chieshë nendac. <sup>4</sup> Mibi chieshë nac: “‘Ai, adenshenda Esusën chuipondash. Ëbi tantiaquido cuesun secaindac, quepondash,’ ma nëido quenu,” queshun nëbi mibi chiembi. “Ëbi icnuc ëbi tantiaquido cuesun secadenquo iquec. Ëbi nidambien aido cuesun secabenendac,” quequin tantiaquin ënden aden mibi chienquo iccondambi. “Nëbi nidebi,” queshun nëbi mibi chiembi — quepondash Esus.



### *Nuquin Papan Mayan chote chiaid*

<sup>5</sup> Adashic: —Nëbi ëbi chomiondaidbëd tabadec nidendabi —quepondash Esus. Adsho tantiash padequimbo tabadpondabi. Adec ëbi padequimbo tabadsho isash Esus padpidec onquepondash. —“¿Mitsimbo nide?” ¿quenzioda ique? <sup>6</sup> Ai, ëmbi chuiboed tantiac unësquoio icnuen mimbi ëbi chienquoio icchitec. <sup>7</sup> Ëbi nibëdnuc mibi bëdambo iquendac. Ëbi nidenquoio icnuc con Mayan mibi bëdamboen tantiamenuec choenquoio ictsiash. Nidshumbimbi mibëdi tabadmenuen chomendac. <sup>8</sup> Adoac matses ambi icsamboen naid tantiamequin ëbitsen tantiamendac. Adomboembidi Nuquin Papan cuidtetsen tantiamendac. <sup>9</sup> Aden Nuquin Papan Mayanën tantiamiac: “Esus tantienquoio yec icsambo icchitebi,” quendac matses. <sup>10</sup> Adembidi ëbi bëdamboshë icquid tantiamiac: “Nuquin Papan Madombo yec Esus bëdamboshë icquid nec. Aid abentsëqui tantiashoeni Nuquin Papan bëdamboen istsiash,” quendac matses. Ëbi isadenquoio yec con Pa yacno nidan con Mayanën tantiamiac matses adendac. <sup>11</sup> Adembidi Nuquin Papan cuidte tantiamiac: “Matses yuaquid Satanas ambi yuaido Esus tantienquoio icquidobëdta Nuquin Papan cuidendac,” quendac matses. Con Mayanën tantiamiac adec matses onquendac —quepondash Esus.

<sup>12</sup> Adashic abëd icquido chiec Esus: —Mibi dadpenquoio chuitiadquoio icquimbi nëbi dadpen chienquoio iquembi. Nëbi ëmbi chuisho mimbi tantiatapimbo iquec. <sup>13</sup> Nuquin Papan Mayan choshombien mibi abimbo chuiquin ëbi tantiamendac. Ambembi chienquoio icquin Nuquin Papan chiaiduidi chiendac. “Nadquoio iquendac. Adecbidi nadquid choendac,” quequin mibi dadpen tantiamendac. <sup>14</sup> Adembidi ëmbi naidbëdta ëmbi chiaidtedi tantiamequin: “Esus bëdamboshë iquec,” camendac. <sup>15</sup> ¿Ëbiuidtsëqui tantiamenuenda con Mayanën adopec? Padenquoio. Ëmbembi chiaid mambi chiambo yoc. Nuquin Papan chiacpadomboenuidi naquin ambi chiaiduidtsëquimbi chuibandenioc. “Con Mayanën ëbëdta con Pa tantiamendac,” quequin tantiec: “Ëmbi naidbëdta ëmbi chiaidtedi tantiamendac,” quiobi —quepondash Esus abëd icquido chiec.

### *Abi nidte Esusën chiaid*

<sup>16</sup> Adashic padpidec: —Nëbi isadenquoio yanebi. Adashic yuecpactsëc yash isadcuenendabi —quepondash Esus. —Nëbi unësash uincuenash padpidec isadebi —quequin tantiec adondash. <sup>17</sup> Adsho tantiashini ëbitedi: —¿Atotsi quepec? Tantiadenquoio yec onquepec. “Con Pa yacno nidash ëbi nibëdnuc mibi tabadendac,” ma quepaboc. ¿Atotsi chuitiadquoio yec: “Nëbi isadenquoio ictanec yuecpactsëc yash isadcuenendabi,” queposh? <sup>18</sup> ¿Atotsi quepec nec? —quepondabi Esusbëd icquidobëd onquec. Esus tantiamenquoio yec sho-shoshquetsëcquiec onquepondabi. <sup>19</sup> Adsho ambembi tantiash: —Ëbëd icquidon ëbi chuitiadquoio iquec —queshun Esusën: —“¿Atotsi chuitiadquoio yec nio?” quequin ëbi chuite mibi buneque. <sup>20</sup> Tantia. Mibi Chuinu. Ëbi unëso isash mibi sedenquenubi ëbi tantienquoio icquido cuishonquendac. Adec sedenqueboedobi mibitsen cuishonquianendac. <sup>21</sup> ¿Mitsipadquoio bacuë tishec chido icpec? Bacuë cuididiquenuc natiamboshë ichoedi bacuë tishash cuishonquepaid yoc. <sup>22</sup> Adecbidi nëbimbobi ëbi unëso isash mibi natiaquien-dac. Adboedi yuecpactsëcshun ëbi padpiden isash mibi cuishonquendac ënëdenquoio yec. <sup>23</sup> Adnubini con Pa yacno nidendac. Ëbi adnuc mibi bëdambo iquendac. Ëbi nidan: “Ëbi nashunta,” ëbi catiapimbo icquimbi Nuquin Papa mimbi chianendac. Ëbi tantiaquidën: “Min Mado Esus tantiaquiembique. Ëbi nashunta, Papa,” cac ëbi tantiaquin con Pan mibi nashunendac. <sup>24</sup> Aden

mimbi Nuquin Papa chianenquoio iccoc. Nēbi adomboen chianeta. “Min Mado Esus tantiaquid icsho ēbi nashunta, Papa,” quequin chianeta. Mimbi adoac mimbi chiacpadomboen mibi nashunquin Nuquin Papan mibi cuis-honcamendac —quepondash Esus abēd icquido chiec.

### *Esusēn abēd icquido ēnquimbi chiaid*

<sup>25</sup> Adashic abēd icquido padpiden chiec: —Ompoacbimboen dadpen chuibanombi. Yuecpactsēcshun: “Con Pa nadquoio iquec,” quequin mibi sebadēnquoio chiendambi —quepondash Esus. —Uincuenshun aden chierendambi —quequin tantiec adondash Esus. <sup>26</sup> Adashic padpidec: —Con Pa yacno ēbi nidan mimbi: “Min Mado Esus tantiaquid nebique. Ēbi nashunta, Papa,” quequin Nuquin Papa mimbibi chianendac. “Ēmbiuidtsēqui: ‘Ēbi tantiaquid nashunta, Papa,’ cac ēbiuidtsēqui tantiaquin Nuquin Papan mibi nashuntsiash,” ¿quectabi ique? Padenquoio. <sup>27</sup> Mibitsen tantiaquin Nuquin Papan mimbi chianiac mibi nashunendac. “Nuquin Papa yacnuēsh choquid Esus nec,” quequin ēbi tantiaquid mibi icsho con Pan mibitsen tantiaquiquin mibi nashunendac. <sup>28</sup> Matsesbēdi tabadec Nuquin Papa yacnuēsh chondash nēbi con Pa yacnobidi nidendabi —quepondash Esus.

<sup>29</sup> Adsho tantiashini ēbitedi: —Adquidshenda mibi nepec. Ma nēbi mimbi sebadēnquoio chieyoc. <sup>30</sup> Mibi: “Nēbi isadenquoio yanebi,” quioc. Adashic: “Yuecpactsēc yash isadcuenendabi,” mibi quesho tantiash mibi tantiamenquoio yec sho-shoshquetsēcquiec: “¿Atotsi quepec?” quecuededpobi. Mibi chuimetiadquoio iccobi. Ēmbi chiambobi ma mimbibi tantiapaboc. Comapenen tantiaquidquoio icquin ma mimbi abitedimbo tantiapayoc. Aden tantiaquid yec Nuquin Papa yacnuēsh choquid mibi nec —quepondabi ēbitedi. <sup>31</sup> Adsho tantiash Esus: —Ai, nēbi mimbi ēbi tantiaquiec. <sup>32</sup> Aden ēbi tantiaquidquobi ēbi chieshēnquin bedsho isanec mibi niquendac ēbi nianec. Mimbi niamēnubi con Pan ēbi nianenquoio iquendac. <sup>33</sup> “Ēbi nidan Nuquin Papan Mayan mibēd tabadendac. Ēbi tantiaquid Con Pan tantiaquiec,” quequin dadpen chuibanombi. “Ēbi tantiec dacuēdenquoio yec ma tabadnu,” queshun mibi aden chuibanombi. Ēmbi chiaid tantiashun chieshēmēnquido dacuēdēnenda. Satanasēn: “Icsamenu,” cac icsainquoio iccondabi. Aden Satanas yuametiapimbo icquid icquin mibi cudasquin yuametiapimbo iquebique. Dacuēdenda —quepondash Esus abēd icquido chiec.

## 17

### *Esusēn Nuquin Papa chiaid*

<sup>1</sup> —Dacuēdenda —queshumbic ēbi tantiamenuen abuc isquin Esusēn Nuquin Papa chuipondash. —Nuqui tantiactedi ēbi naimeta, Papa. Ēbi naimetanquin comapenen tantiaquin ēbi bēdambo icmeta. Aden mimbi bēdambo icmiac mibitsen bēdambo icmendambi, Papa. <sup>2</sup> Ēndenquimboshē mimbi ēbi chiondac naden chuiquin. “Nuqui matses uaidon abitedishun Icbo mibi nec, Mado,” quequin mimbi ēbi chiondac. Mimbi adonaid icquin mimbi tantiactedi matses nuquibēd tabadtequido icmendambi, Papa. <sup>3</sup> Matsesēn nadosho adoendambi. “Abipadquid utsi nibēdnuc Nuquin Papa iquec. Ambi chomiondaidquoio Esus nec,” quequin tantiasho nuquibēd tabadtequido icmendambi, Papa. <sup>4</sup> Mimbi chiacpadomboen naquin nēbimbobimbi nainec. Ēmbi adoacsho isash matses: “Ambi chomiaid tantiasho Nuquin Papan nuqui bēdamboen isec. Nuquin Papa bēdamboshē iquec,” quependac, Papa. <sup>5</sup> Nuqui tantiactedi ēmbi nainacsho mibi yacno

nidmeshun mibëdi ëbi tabadmeoata nuqui matses uabi tabadtenecpadembi. “Nuquibi abitedimbo namenuna,” ëbi cata, Papa —quepondash Esus Nuquin Papa chiec.

*Esusën abëd icquido Nuquin Papa chiaid*

<sup>6</sup> Adshumbic Esusën abëd icquido ëbitedi chuiquin aton Papa chuiopondash. —Mimbi tantiactedi mimbi ëbi tantiaquid icmiacsho mimbi bëdamboen iste chuibanombi. Aden mimbi chiaidquio chiac: “Ai, adotiadquio iquebi,” quiosh, Papa. <sup>7</sup> Adembidi aidon: “Nuquin Papan namiaidquio nec. Ambe-mbi nainquio iquec,” quequin ëbi tantiaposh. <sup>8</sup> Mimbi chiaid ëmbi chuisho tantiaashun mimbi comapenen tantiaquin nabamiaid nasho isun: “Ma Nuquin Papan chomiaidquio nepayoc,” caposhi ëbëd icquidon, Papa. <sup>9</sup> Ëbi tantienquio icquido mibi chienquio iquembi, Papa. Ëbi tantiaquidouditsëqui mibi chiec nebi. Mibi tantiaquido icsho mimbi tantiamiac ëbitsen tantiec aidon. <sup>10</sup> Adsho isun: “Nuqui tantiaquido nec,” caimbi, Papa. Aidon: “Mibi bëdambo iqueque. Con Icbo mibi canu. Mimbi chiacpadec bëdamboec tabadiadquio iquebi,” quequin bëdambo icmioshi, Papa. <sup>11</sup> Mibi bëdamboshë iqueque. Ëbi mibi yacno nidan ëbi tantiaquido dayun uata, Papa. Ëbi chieshënnquidon chieshtomenushe. Nëido bëdamboen dayun uata. Mimbi ëbi icmiacpadquidbidi comapenen tantiaquid mibi neque. Ma nuqui tantianan-quiacpadquiec ma ëbi tantiaquido tantiananu. Nëido bëdamboen dayun uata, Papa. <sup>12</sup> Aidobëd icquin mimbi chiaidquio bëdamboen chuibanquin chieshtomiambo iccombi. Aden bëdamboen dayun uaquin ëbi tantiaquido cudasënnquin Satanas yuamiambo iccombi. Udas abentsëquien Satanasën yuatsaccosh. Mimbi chiaid matsesën dada uapampicpadomboen ëbi bedmenuen Satanasën Udas yuaccosh. Adoac ëbi bedmequid yanash mimbi cuidtequid iquendac.

<sup>13</sup> Nëbi mibi yacno nidendabi, Papa. “Ëbi nidan dacuëdec ëbi tantiaquido chieshtonoshe,” queshun mibi otacquo chienquio iquembi. “Ëmbi abi dayun uate chuisho tantiaash ëbi yacpadec ma cuishonquenu,” quequin mibi otacquo chienquio iquembi, Papa. <sup>14</sup> Mimbi chiaidquio nëido chuibanombi. Adoac ëbi tantiaquido yansho ëbi chieshënnquidon nëidotsen chieshëmpec. Ëbi yacpadec mimbi chiaid niac-niacte bunenquio icshobidi nëido chieshënnquiec, Papa. <sup>15</sup> Aden tantiaash: “Ëbi tantienquio icquidobëdi ëbi tantiaquido tabadmenda,” ¿quectabi ique? Padenquio. “Ëbi tantiaquido chieshtomenda,” caimbi, Papa. Satanasën yuanushe. Bëdamboen dayun uaquin chieshtomenda, Papa. <sup>16</sup> Ëbi tantiesabo tabadacpadec tabadenquio icquin ëmbi nabocpadomboen natiadquio iqueque. <sup>17</sup> Mimbi chiaidquio pausunquioquin bëdamboen tabadme, Papa. <sup>18</sup> Mimbi ëbi: “Matses chiec nid,” caondacpadomboen aido: “Ëbi chuibeneta,” caindambi. Adoac nëidon ëbi chuibenendac, Papa. <sup>19</sup> Nëido tantiaquiec nëbimbobini mimbi chiacpadec ëbided cuidadec unësendac. “Adomboembidi ëbi tantiaquidon ma Nuquin Papan chiacpadomboen nanu,” quiaash ëbi tantiaquido min yuabombo icmenuec adebi, Papa —quepondash Esus aton Papa chiec.

*Esusën abi tantiaquid utsibo Nuquin Papa chiaid*

<sup>20</sup> Adashic padpiden Nuquin Papa chiec Esus: —Ëbëd icquido mibi chuishumbic nëbi aidobëdta ëbi tantiaquid utsibotsen mibi chuinu, Papa. Ëmbi chiaidbëdta ëmbi naidtedi ëbëd icquidon utsibo chuibanac aidotsen ëbi tantiaquido yanendac. Adec ëbi tantiaquido dadpenquio yanendac. Ëbi tantiaquidotedi tantiaquin mibi chiec nebi, Papa. <sup>21</sup> Nuqui tëshnanenquio

yacpadequi nuquibëd tëshnanenquio icquid icmeta, Papa. Nuqui tantiananquiapadec ëbi tantiaquidotedi shubu abentsëquën tabadac bimboec-nuc tantianameta, Papa. Adsho isash nuqui tantienquio icquido nadt-siash. “Esus tantiec bëdambo iquec. Aden Nuquin Papanuidtsëqui bëdambo icmetsiash. Nuquin Papan chomiaidquien Esus nechitec,” quetsiash. <sup>22</sup> “Mibëd ëbi tantiananquiapadquiec ma ëbi tantiaquido tantiananquiono. Ma chieshënanenquio icnu,” quequin mimbi ëbi namiacpadomboen ëbi tantiaquido namiombi, Papa. <sup>23</sup> Nuqui tëshnanenquio yacpadece aidobëd tëshnanenquio iquendabi. “Chieshënanenquio yec tantiananquiec ma bëdamboec tabadnu,” quec aidobëd tëshnanenquio iquendabi, Papa. Adec ëbi tantiaquido bëdamboec tantianansho isun matsesën naden tantiatsiash. “Ambi chiapadquid Nuquin Papan chomenëdaid icquin Esusën abi tantiaquido aden bëdamboen tabadmec. Ambi chomenëdaid aton Mado tantiaquiapadomboen Nuquin Papan aid tantiaquido tantiaquiec,” quequin matsesën tantiatsiash, Papa. <sup>24</sup> Mimbi ëbi tantiaquido icmiaido nuqui tabadac nombo tabadmeta. “Nuqui matses uabi icquin mimbi: ‘Ëmbi tantiaidquio mibi neque. Nuquibi nanuna, Mado,’ cac nuqui bëdamboshë yec tabadtenecpadequi nuqui tabadsho ma ëbi tantiaquidon isnu,” queshun mibi: “Nuqui yacno tabadmeta, Papa,” caimbi. <sup>25</sup> Icsaisambo mibi icsho icsambo icquidon mibi tantiatiapimbo icnubimbi mibi tantiaquiec. Mibi yacnuësh choquid icshobini ëbëd icquidon: “Ai, Nuquin Papa yacnuësh choquidien nec,” quequin tantiaposh, Papa. <sup>26</sup> Aden tantiamenuen yuec ëbëd icquidobëd tabadquin mimbi naid chuibanombi. Ëbi nidan ëmbi chomiaidën con Mayanën adembidi ëbëd icquido tantiamendac. “Mimbi ëbi tantiaquiapadomboen ma nuqui daëdi tantiaquiash ma tantiananquiono,” queshun con Mayan aidobëd tabadmendambi. Adoac ëbëd icac bimboec con Mayan tantiadendac, Papa —quepondash Esus Nuquin Papa chiec.

## 18

### *Esus bedmiaid*

(*Mat 26.47-56; Mad 14.43-50; Duc 22.47-53*)

<sup>1</sup> Aden Nuquin Papa yuen chianec Esus nidpondash. Ëbi chedobëd nidquin acte Sededon caid potiash tiedno cuëte odibos caid nitsinacno ëbitedi chiec tabadtenebocnombo chopondash. <sup>2</sup> Ambo tabadnubien Udas: — Ëbi abëd tabadtenebocno tiednoen nidchitash —quianec Esus bedmenuec <sup>3</sup> chopondash. Aden chieshëmënuquido chuiquid dapabo chuitanshun matses dadpen bëpondash nëidtedi. Nëidic con matses chuiquid dapabobëdtan padiseyobon namiaido sondado chedo. Nëidic con matses yuaquido Doma yacnocquido sondado dadpen. Nëidic aid sondado chuiquid. Aidedi Udasën bëpondash. Tabotebëdta cüeste sanambededtsëcquiec cho-chopondash. Utsibombic chështe.

<sup>4</sup> Adec cho-chosho isash bëquedbanec nidquin: —Ëbi unës uamec —quequin tantiaquin Esusën: —¿Atotsi quec ne? ¿Tsutsi nibëne? —cac <sup>5</sup> —Nasaded yacnuësh caniquid Esus bednuec nebi —quepondash sondado chuiquid. Adshun isac aidbëd Esus bedmequid Udas icpondash.

<sup>6</sup> Adshobien Esusën: —Në iquebi —capondash. Nuquin Papan padquidquibi icquin adoac dacuëdec: —Auchidi cuenu —quec uebudcuededpondash bednuequidotedi. <sup>7</sup> Adshobien padpiden Esusën: —¿Tsutsi nibëne? —cac: —Nasaded yacnuësh caniquid Esus bednuec nebi —queoasho tantiashun: <sup>8</sup> —“Në iquebi,” caombi. Ëbiuidtsëqui bedta. Ëbëd icquido bedenda —capondash Esusën. <sup>9</sup> —“Mimbi ëbi tantiaquid icmiaido

Satanas chieshtomiambo iccombi, Papa,” quequin ëmbi Nuquin Papa chuibocpadomboen nëido chieshtometiapimbo iquebi —quequin tantiec: —Nëid bedenda —quepondash Esus.

<sup>10</sup> Adnubien Petedon abi tsidiadaid chështe chictanquin chuiquid dapan yua abiucquio pateshunepondash. Aid yua Madco niondash. <sup>11</sup> Adosho isashien Esus: —Padi. Chën. Min chështe naued. Nuquin Papan chiacpadecec paëmbo icnuc unësendabi —quepondash Esus.

*Anasën shubuno Esus buanaid*  
(*Mat 26.57-58; Mad 14.53-54; Duc 22.54*)

<sup>12</sup> Adshobien sondado chedon Esus bedpondash. Aden bedshun: —Cuidmenun chuiquid dapa yacno mibi buanu —catanquin catanepondash. <sup>13-14</sup> Aden cataneshun buanquin con matses chuiquid dapambo Caipas caidën cucun shubunoba buanondash. Aid setambi chuiquid dapambo Caipas iccondash. Esus chieshë nec: —Nuquin matsestedi unës uamenquio icnuen Esused unës uamenuna —queboed Caipas niondash. Aton cucu chuiquid dapabidi niondash. Aidi Anas niondash. Anasën shubunoba Esus buampondash. Ashunquio Caipas ismenuen buampondash.

*Petedon: Ëmbi isacmaid Esus nec, quequin chiaid*  
(*Mat 26.69-70; Mad 14.66-68; Duc 22.55-57*)

<sup>15</sup> Esus buansho isun Petedobëdtan chinunondambi. Chinuntuidash nid-equi Caipasën shubuno choash daquënë uaidën puduednuesho tantiashun shëcuë isquid chidon puduedmiondashi. Ambi isondaic icsho aden puduedmiondashi. <sup>16</sup> Ëbi puduedmequin Petedo ambi isacmaid icsho puduedmenquio icpondash. Adsho istanquin: —Ëbëd icquid neque. Shëcneshun. Ma puduednu —capondambi. <sup>17</sup> Adoac puduedmeshun shëcuë isquid chidon: —¿Në bedboed Esusbëd icquidta mibi ne? —capondash Petedo chuiquin. Adoquien Petedo dacuëdec: —Padenquio —quepondash muequi. <sup>18</sup> Adnubien iquendoshon daquënë uacnoshon cuëte dëtsiadoshon sondado chedobëd anocquido yuabo cuëte cuëec tabadpondash. Adsho isashien Petedotsen cuëte cuënu ec nidpondash ëbi shubunquio puduednuc.

*Caipasën Esus chuimiai*  
(*Mat 26.59-66; Mad 14.55-64; Duc 22.66-71*)

<sup>19</sup> Adec ëbi puduednubien Caipasën Esus chuimepondash. —Mibëd icquid ¿tedtsi iquec? ¿Ëbëd icquido dëniaquecta icpec? Mibëd icquido ¿mitsipaden chuibano? —capondash. <sup>20</sup> Adoquien Esusën chuipondash. —¿Ompoquindambi chuibandio? Nuquin Papa tabadte shubu uashunaid daquënë uaidën puduedshun mambi chuibandeneboc. Nuquin Papan chiaid chuibante shubun-shubunquieci puduedcuenequin mambi chuibeneboc. Ompoquin chiambo iccombi. <sup>21</sup> Mimbic: “Icsamboen naosh,” caid ëbiuidtsëqui chuimenda. Ëbëd icboedotsen chuime. Ëmbi chiaid abitedi tantiashun aidombi mibi chuitsiashe. Aidotsen chuime —quepondash Esus.

<sup>22</sup> Adsho tantiashun: —¿Chuiquid dapada adopaid? —quetanquin sondado chuiquidën mëdanten bëcuespondash Esus. <sup>23</sup> Adoquien: —¿Icsamboendambi chuidio? ¿Atotsimbi icsa uaque? En chui. Mambi abimbo chuiboc. ¿Abimbo chuiquidta cuespaid? —quepondash Esus. <sup>24</sup> Adondash Esus Anasën abi cataniacchobi Caipasën shubuno bëac.

*Petedon: Ëmbi isacmaid Esus nec, quequin chuioaid*  
(*Mat 26.71-75; Mad 14.69-72; Duc 22.58-62*)

<sup>25</sup> Adnubien Petedo abi cuëte cuëec tsadsho abëdtan cuëte cuëec tabadquidon: —Esusbëd icquidien mibi nechitec —capondash. Adoquien

Petedo: —Padenquio. Mabi aibdëd icambo yoc —quepac caondash. <sup>26</sup> Adshobien chuiquid dapan yua utsin Petedon pateshuneboedën matsesën: —Esus bedacnobimbi mibi ischitoc —caquien <sup>27</sup> padpidec: —Padenquio. Mabi ano nidambo yoc. Ëmbi isacmaidquio ma Esus neyoc —quenubien Esusën chuiboedquio cachina bënë cuëdampac caondash.

*Pidato caidën shubuno Esus buanaid*  
(*Mat 27.1-2; Mad 15.1-5; Duc 23.1-5*)

<sup>28</sup> Adnubien Caipas aton chuiquid utsibobëd: —Nuquin matses yuaquido ancaquid Pidato caid ismenuembien Esus buantiad. Aid Esus unës uamenuembien natiad —quecuededpondash. Badiadnubi Pidaton shubuno Esus buampondash. Buanashic: —Matses utsin shubun puduedshun mishtemaid mishash Nuquin Papan matamiampid inchësh tantiec con matsesbëd pec tabadtiapimbo icchitomane —quiash Pidaton shubun puduedenquio icpondash. <sup>29</sup> Adnubien Pidaton aton shubunuësh puduentanquin Esus bëquido chuipondash. —¿Atotsi quequin nëid bëo? ¿Icsamboen naquidta nepec? —caquien <sup>30</sup> —¿Bëdambo icquidtambi mibi ismenuen bëdio? Con matses chuiquid dapa ictiadquio icquin icsamboen naoshe. Cuidquiota —quepondash chieshëmënuquido. <sup>31</sup> Adoquien Pidaton: —Mimbi cuidta. Min matsesën: “Icsamboshë icquid naden cuidquid yendac,” cacpadomboen nata —caquien: —Padi. Ëmbi cuidquin unës uacsho isash min matses chieshtonoshe. Min matsesën: “Con matsesënuidtsëqui unës uaquin cuidaquien bëdambo ictsiash,” queshun ëbitedi chieshënuushe —quepondash Esus chieshënuquido Pidatombo Esus unës uametiadquio yec. <sup>32</sup> Ënden abi chieshënuquidon bedabi icnuc: —Ëbi cuesten dectanquin unës uaindac —quequin Esusën chiacpadomboen namenuec adpondash.

<sup>33</sup> Adnubien aton shubun puduedtanquin Pidaton Esus chuimeoapondash. —Cho. Chuinu. ¿Min matses isadaidbo chuiquid dapada ne? —caquien <sup>34</sup> Esusën: —¿Mitsipadquid chuiquid cai? ¿Utsibon tantiacpadquidta cai? ¿Mibipadquidta cai? —capondash. <sup>35</sup> Adoquien Pidaton: —¿Isadaidbodabi nedi? Padenquio. Ëmbi tantiacpadquid caimbi. ¿Atotsieshun min matses chuiquid dapabon mibi bëosh? ¿Atotsi icsa uasho naosh? —caquien <sup>36</sup> Esusën Pidaton bëyuc chuiboed tantiaquin: —Mibipadquid chuiquid dapapenquio nebi. Nidaidën con yua sondado nibëdec. Nidaidënuësh mibipadquid icquin con yuabo ëbi bedquido cuesun siametsenombi. Aden ëbi bedenquio ictsenosh. Mibipadquidpenquio nebi. Abucshun chuiquid dapambo nebi —quepondash Esus.

<sup>37</sup> Adsho tantiashun Pidaton: —Chuiquid dapambo nebi ¿quecta ique? —caquien: —Ai, adquid nebi. Chuiquid dapambo icnuéc matsespondabi. Chuiquid icquin matses uaquid tantiamenuen abimbo chuibanombi. Adoac abimbo chuisho tantiate bunquidon ëbi tantiatsiandac —quepondash Esus.

<sup>38</sup> Adsho tantiash Pidato: —¿Tsuntsin matses uaquid quequin abimbo chuiPATSIASH? —quetanec puduenshun Esus chieshënuquido chuiOAPONDASH. —¿Icsambo icquidta Esus nedic? Ma icsapenquio icquid neyoc. <sup>39</sup> Nëid cuidtiapimbo icquin chuinu. Nuquin Papan matamiampid inchësh tantiate ushën min matses quënën nauedaid abentsëc cuemedeniøndambi. Adem-bidi abentsëc cuemembi. ¿Mitsicquidimbi cueme? ¿Nëid mibi chuiquid dapa Esustambi cuemepe? —caquien: <sup>40</sup> —Padenquio. Esus nainda. Utsibi cuemeta. Badabas caid cuemeta —quecuededpondash. Badabas caid Doma yacnocquido cuesun siaquin cuemete bunquidquio icnuc adcuededpondash Esus chieshënuquido Esus unës uamete bunquiec.

## 19

### *Esus cueshcaid*

(*Mat 27.27-31; Mad 15.16-20*)

<sup>1</sup> —Badabasquio cuemeta —quesho tantiatanquin Pidaton: —Në Esus cueshcanuen buan —capondash. Adoaquien buanshun sondadon canite cuëshë dēdectanquin nacnenaïd cueshcanten Esus comapenen cueshcapac caondash. <sup>2</sup> Cueshcatanquin pinchuc-pinchucpambo icquid mauete nacnenaïd Esus mauemepac caondash. Adotanquimbic chuiquid dapan dashcutebimboecquid umucquid dasiuintanquin: <sup>3</sup>—Adec dasiuidquid chuiquid dapambo nec —quequin sondadon Esus mamēnshumpac caondash. Aden mamēnshunquimbi: —Isadaïdbo matses chuiquid dapambo Esus neque. Is —quetanquin mēdanten bēcuesbanepac caondash. Adotanquin Pidato yacnobidi buanoapac caondash.

### *Esus unēs ua, quiaïd*

(*Mat 27.15-26; Mad 15.6-15; Duc 23.13-25*)

<sup>4</sup> Buanoacsho istanequien Pidato padpidec puduenoash Esus bëquido chiec: —Mimbi bëboed Esus icsapenquio iquec. Icsambo icquid icsho: “Unēs uata,” catsiambi badedi. Icsapenquio icquid icsho adotiapimbo iquebi. Padi. Cueshcaquin cuidombique —quepondash Pidato. Adnubien <sup>5</sup> Esus puduempondash. Pinchuc-pinchucpambo icquid mauemetanquin dashcute umucquid dasiuinac dasiuidpamboec puduenshobien Pidaton: —Is. Mimbi bëboed choeque —cac <sup>6</sup> chosho istanequien: —Cuesten dectanquin unēs uata. Cuesten dectanquin unēs uata —quecuededpondash Esus chieshēnquido comapenec cuēdec. Adoaquien Pidaton: —Mimbi cuesten dectanquin unēs uatan. Ęmbimbo adotiapimbo iquebi. Icsapenquio icquid icsho Esus unēs uatiapimbo iquebi —capondash Pidaton.

<sup>7</sup> Adoaquien Esus chieshēnquidon: —Con matsesēn: “Nuquin Papa muauaquid unēs uaquid yendac,” cacpadomboen natiadquio iquebi. Ęsusēn: “Nuquin Papan Madombo nebi,” quequin Nuquin Papa muauaoshe. Unēs uaquimbien ictiad —quepondash. <sup>8</sup>—“Nuquin Papan Madombo nebi,” quiosh —quesho tantiashien Pidato dacuēdquiec yampac caondash. <sup>9</sup> Adash aton shubun Esusbēdi puduedoashun Pidaton Esus chuiopondash. —¿Tsutsimbo ne? ¿Mitsiuešhquio chonda? —caqui Esusēn ēcbedenquio icpondash.

<sup>10</sup> Aden ēcbedenquio yac nēishashien Pidato: —¿Chuitiapimboda ique? ¿Tantienquioda ique? Ęm̄bi: “Cueme,” cac mibi cuemetsiash. Ęm̄bi: “Cuesten dectanquin unēs ua,” cac mibi adotsiashe. En chui —caquien Esus: <sup>11</sup> —¿Mibembida chuiquid yano? Nuquin Papan chuiquid icmiac mibi nec. Nuquin Papan chuiquid icmiabi adquid ictiapimbo mibi ictsiac. Chuiquidpenquio icquin mimbi ēbi cuesten dectanquin unēs uametiapimbo ictsiac. Ębi cuesten dectanquin unēs uamenuc mibi icsambo icnuc ēbi bëboedo chuiquid dapabo icsamboshē iquec —quepondash Esus.

<sup>12</sup> Adsho tantiashien Pidato: —Esus unēs uatiapimbo icchitebi. Cuemetiadquio iquebi —quetanquin padpiden Esus chieshēnquido chuitanoapondash. —Esus cuemenu —caquien: —Icsambo iquec. Min matses abitedimbo chuiquid dapambo Sesad caïd: “Ębentsēqui chuiquid dapambo nebi,” quiac caosh. Aid dēniaquec Esus chuiquid dapa icte bunquiec. Esus cuemequin mibi chuiquid dapambo mimbi nēishmeque. Esus cuesten dectanquin unēs ua —quecuededpondash. <sup>13</sup> Adsho tantiashun Esus puduemeoatanec cuēnote nacnenaïd abuc tsadunaïdēn cuidte chuinuc tsadten tsadtopondash Pidato.

Aid cuënote nacnenaid con onqueten Cabata capondash. <sup>14</sup> Nuquin Papan matamiampid inchësh tantiante ushë badiadash icnuc niondash. Aid tsadten tsadtoshon Pidaton: —Në mibi chuiquid dapa iquec —capondash iccuededquido chuiquin. <sup>15</sup> Adoaquien: —Cuesten dectanquin unës ua. Nëbimbobi buanshun cuesten dectanquin unës ua —quecuededpondash Esus chieshënquido. Adoaquien: —¿Mibi chuiquid dapadambi cuesten dectanquin unës uape? —Pidaton caquien Esus chieshënquido: —Mibi chuiquid dapambo Sesad caid aiduidtsëqui chuiquid dapa caimbique. Esus cuesten dectanquin unës ua —quecuededpondash Esus chieshënquido. —Nuquin Papa yacnuësh choshon nuqui yuaquido cuemepashun —queboedobi adondash abi yuaquidi chiequi.

<sup>16</sup> Adoaquien Esus chieshënquidon chiacpadomboen: —Esus cuesten dectanquin unës uatan —capondash Pidaton aton sondado chuiquin.

*Cuesten dectanquin Esus unës uaid  
(Mat 27.32-56; Mad 15.21-41; Duc 23.26-49)*

<sup>17</sup> Adoac buanquin: —Nëidën dectanu —qeshun sondadon cueste daëd napotiaid Esus chiadtomebidampondash. Abi dectantebi Esus chiadtomebidanec nidquimbi macuësh mapi canite caid yacno buampondash. Aid macuësh mapi canite cain con onqueten Cocata capondash. <sup>18</sup> Ambo nidshun aton dashcute dachictanquin bëchun shuin mëtoccaquinc tatoccaquinc catanquin cueste daëd napotiaid ambi bëboedëmbi Esus dectampondash. Icsambo icquid daëdpambo cuesten dectanaid uquë diadbudcuenec diadnuc Esusquio nënantanquio dectampondash.

<sup>19-20</sup> Adnubien Pidaton: —Nasaded yacnuësh caniquid yec Esus isadaidbo chuiquid dapa nec —quequin cueste pada uaidën dada uapac caondash. Aton matses Doma yacnocquidon onqueten dada uaquinc con onqueten dada uaquinc matses utsi Quidieco matsesën onqueten dada uaquinc catanquin Esus dectanaid cuesten dectampac caondash. —Ëmbi dada uaboed isash: “Isadaidbo chuiquid dapa icsho Esus cuidac,” ma abitedi quenu —qeshun Pidaton adopac caondash. Aden dada uashun dectanaid isashien Esus chieshënquido nëishquiopac caondash. —Shubu dadpen icquid Edusaden caid anoentsëqui Esus dectanaid icnuc matses utsin onquetenonquetenquien dada uaid matses dadpenshun isnushe —quiash <sup>21</sup> Pidato chiec nidpac caondash. —Icsamboen chuiquin ma mimbi dada uapac boc. ¿Con matses chuiquid dapada Esus nedic? Adquidpenquio nec. Utsi uain dada uata. “ ‘Isadaidbo matses chuiquid dapa nebi,’ quequid Esus nec,” quequin cueste cuëshë utsin dada uata —caquien <sup>22</sup> —Padi. Mambi ëmbi tantiaboedquio dada uaboc. Utsi uain dada uaoatiapimbo iquebi —quepac caondash Pidato.

<sup>23</sup> Adnubien Esus dectanquido sondado daëd-daëdquiec icpondash. Esusën dashcute 5ted icsho sondadon bedbanquin abentse-abentsen bedbededpondash abentsëc abi icnuc. Aid abucshun bedanquin abichobi daëdcaid tuscabi icquid niondash. <sup>24</sup> Adquid icsho isun: —Canchenquio icquin ¿tsundanquio bedequè? Isnuna —qeshun abi cuëmëdquidtedi dada uabanshun tëchun sandoshon cadotanequin dada uaidëmpi abia puduemiaid isun aid dashcute bedondash. Aidon nate Nuquin Papan tantiamiac con tsusedpan naden dada uapampic. “ ‘Abentse-abentsen con dashcute bedosh. Con dashcute utsi bednu, quequin dada uaidëmpi abia puduemiaid isnuen naosh,’ quependac,” quequin dada uapampic.

<sup>25</sup> Adnubien Esus dectanaid cueste tayun nëidtedi icpondash. Nëidic Esusën tita. Nëidic Esusën tita utsi. Nëidic Madia Codopasën chido. Nëidic Madia utsi



Mactada yacnuësh choquid. Aidedi chido icpondash. <sup>26</sup> Nē chido tabadnuc ambobi uquëctsēc tabadondabi. Adec ambi tantiaidquio ēbi icsho isun Esusēn aniba chuipondash. —Nēid con mado cata, tita. Ma mibi bēdamboen dayun uanu —capondash Esusēn. <sup>27</sup> Adshumbic ēbitsen chuiquin: —Con ta tita cata. Adshun bēdamboen ēbi dayun uashunta —cac con shubunobi buanondambi bēdamboen Esus dayun uashunuen.

<sup>28</sup> Adboshien unēsquionoshi Esus: —Con Pan chiacpadomboen nainembi. Matses tantiec ēbided cuidadec unēsebi —quequin tantiec con tsusedpan dada uaquin chuipampicpadec: —Acte bundobi —quepondash Esus. <sup>29</sup> Adsho tantiaishun matsun acte mucambo icquid anidquid shapushapupactsēcquidēn punshun cueste dēdectanshun abuc sananquin ēccuēscadonetsēcquin chishmepondash. <sup>30</sup> Adoac acte mucambo icquid chishtanequien: —Con Pan chiacpadomboen nainquiombi —quepondash. Adtanequi tēdquēdbudpondash Esus unēsequi.

### *Esus uinte masiaid*

<sup>31</sup> Adnubien Esus chieshēnquido: —Badiadash Nuquin Papan matamiampid inchēsh tantiate ushē iquec. Chonoadenquio icte ushē nec. Aidēn cuesten dectanquin unēs uaid chococac icsambo ictsiashe. Nēbimbobi chococamenu —queshun Pidato chuitampac caondash. —Baded nidte podquēnquin unēs uame. Inchēsheque —cac <sup>32</sup> Pidaton aden chiac sondadon nidte podquēntanondash. Esusbēdta dectanaid ēquē diadquidba nidte podquēnshumbic utsiuc diadquidtsen. <sup>33</sup> Adotanquin isquien Esus ēnden unēsac. Adshobien nidte podquēnenquio icpondash.

<sup>34</sup> Adotanquimbic: —Unēsabi icnushe —queshun: —Unēs uaquiobono —quetanquin sondadon cudan podo ansequin Esus uinte masepondash. Adoac nua intac chididiquiondash actebēdi. <sup>35</sup> —Adosho ēmbimbo isondambi —caimbi. —Ēmbi dada uaid isun ma Esus tantianu —queshun abimbo chuiquin dada uaombi nēid dada uaquin. <sup>36</sup> Nuquin Papan tantiamiac con tsusedpan: “Canite podquēnenquio iquendac,” quequin dada uapampicpadomboen canite podquēnenquio icpondash Esus. <sup>37</sup> Adembidi podo ansete dada uapampic. “Ambi podo anseboed isec tabadendac,” quequin dada uapampic.

### *Esus unēsacsho chococaid*

(*Mat 27.57-61; Mad 15.42-47; Duc 23.50-56*)

<sup>38</sup> Adnubien shubu dadpen icquid Adimateya yacnocquid Ose chopondash. Esus tantiaquid aid niondash. Esus chieshēnquido dacuēdēnquin: —Esus tantiaquid nebi —quequin utsibo chienquio icboedēmbi Pidato chuitampac caondash. —Esus chococanun buanendambi —cac: —Ai —cac Esus buampondash. <sup>39</sup> Aidbēdi Nicodemo inchēshēn Esusbēd onquiondaid nidpac caondash. Bēdambo nuadquid mida adoebēdta cabiunaid unēsaid dabiunte bēac caondash. Nuamboshē. Yuēmbo icnuc <sup>35</sup> quidostembi icnuc bēac caondash. <sup>40</sup> Adshumbien Osebēdtambi Esus nua dabiunquin uesquin dataniac caondash dashcuten. Adshumbic padpiden dabiunoaquin. Adshumbic padpiden dataneoaquin. Adshumbic padpiden dabiunoaquin. Adshumbic data-neoaquin. Chococanun con matsesēn adoquid. <sup>41-42</sup> Adashic: —Badiadash Nuquin Papan matamiampid inchēsh tantiate ushēn unēsaid chococac icsambo ictsiashe. Badedquio chococanu —queshun tied nēbi ictsēcquidēn Esus buampac caondash. Buanshumbic cuēnote dapa shēcūē uaid chucan matses chococabi icquidēn Esus nauedpac caondash. Shēcūēn nauedtanquin bētimpac caondash cuēnote dapambidi.

## 20

### *Esus uincuenaid*

(*Mat 28.1-10; Mad 16.1-8; Duc 24.1-12*)

<sup>1</sup> Esus chococan daëdec ushash badiadnuc dominco caid ushën ënden inchëshquio icnobi Mactada yacnocquid Madia chedo Esus chococacnuësh sedenquec nidpac caondash. Nidshun isquien shëcuë bëtinaid cuënote dapa bëcunepamboen shëcniac. <sup>2</sup> Cuënote dapa bëcunepamboen shëcniacsho istanec titinquianec choquin chuituidpondashi. —Esus padoen buanchitaccosh. ¿Mitsimbo buampash? —quepondash Madia Petedobëdta ëbi chuituidec.

<sup>3</sup> Adoaquini: —Istanu —quianec <sup>4</sup> titinquianec chococacno Petedobëdi nidpondac. Petedo nianec ëbia nidpondabi. <sup>5</sup> Adshumbimbi pudueden-quo icquin shëcuë anshuebudshun anispondac. Adshun isquien dashcute dataniaiduidtsëqui uec. <sup>6</sup> Aden ëmbi anisnubien Petedo choequi badedi shëcuën puduedpondash. Aidëntsen dashcute dataniaiduidtsëqui istuidondash. Esus nibëdondash. <sup>7</sup> Në dataniaid uenubi udictsëc dashcutempi bëpucaid bëdamboen shëbunaid uiondash. <sup>8</sup> Aid puduedsho istanec tsyuec puduedshun ëmbitsen isondambi. Adash: —Uincuenac. Nuquin Papan Madombobi nec —quepondabi Petedobëdtsëqui onquec. <sup>9</sup> —Nuquin Papan tantiamiac con tsusedpabon aden Esus uincuenta chuiquin dada uapampic —quequin tantienquo icboedi adondabi. <sup>10</sup> Aden istanec ëbi ushbocnobidi chiec choapondabi.

### *Esusën Madia Mactada yacnocquid ismiaid*

(*Mad 16.9-11*)

<sup>11</sup> Adnubien ëbi chuiuamboed Madia chococacnobidi isec nidoapac caondash. Nidash shëcuë cuëmano tsadec sedenquetuidpac caondash. Adec shëcuë cuëmano tsadec sedenquetanec shëcuë anshuebudshun isaquien <sup>12</sup> Nuquin Papan abi yacnoshon uaido mayan bëda daëd ushumbo icquid darsiuidquid Esus uebocno tabadpec. Esus nibëdec. Mapi icbocno abentsëc tsadnuc utsi taë icbocno tsadpac caondash. <sup>13</sup> Adshumbic aidën: —¿Atotsi quiash sedenque, champi? —caquien: —Con Icbo pado ¿midambo buanac? Istiadquo iquebi. ¿Mitsimbo buampashba? Unësquio iquec —quetanec <sup>14</sup> aucbidi nidnuec bidiadshun isquien Esusquio icpec. Utsi dansho <sup>15</sup> Esusëntsen: —¿Atotsi quiash sedenque, champi? ¿Tsutsi nibëne? —caquien Madian tied neshcaquid danquin: —¿Con Icbo padoda buano? ¿Mitsimbo buano? Èbi isme. Shëcuë utsin chococanun buanu —capac caondash Madian Esusquiobi chuiquimbi.

<sup>16</sup> Abi adoshobien Esusën: —Èbi nebi, Madia —cac bëisquotanequien: —Esus nec. Èbi chuiquidquo nec —quetanquin con onqueten cuënquin: —Dabi —capac caondash. Adotanquimbien Esus dayumbudpac caondash unësquio icsho. <sup>17</sup> Aden abi dayumbudshobien Esusën: —Èbi dayunenda. Padpidec nidenquo icte danquin ëbi dayunenda. Èmbi chuibocpadec con Pa yacno nidabi yuec-yuecpactsec tabadtanec nidebique. Èbëd icboedo ëmbi con utsibo caboedo ëmbi chuiboedquo chuitan. “‘Nuquin Papa yacno nidendabi,’ quiosh,” catan —quepac caondash Esus. <sup>18</sup> Adoaquien ëbi chiec Madia chopondash. —Nuquin Icbo Esus isombi. Uincuenaccosh. Ambi chuiboed chuinu. Tantia —quequin Esusën abi chiaidquo chuituidpondashi Madian Mactada yacnocquidën.

### *Uincuenshun Esusën abëd icquido ismiaid*

(*Mat 28.16-20; Mad 16.14-18; Duc 24.36-49*)

19 Madian aden chuituidboed inchëshbudtsëqui shubun tabadpondabi Esusbëd icboedobëdi. Esus chieshënquido dacuëdënquin umanucuësh utsi puduedtiapimbo icnuc bëdamboen bëtashash tabadnubien shëcuënuësh puduedenquio icboedi nuntanquiobi Esus isadcuempondash. Adtanequien: —Dacuëdenda —quepondash. 20 Adtanquin abi bëchun shuin mëtoccaid abi podo ansiäidbëdta ismiaquini cuishonquiampondac: —Nuquin Icho uincuenac —quiash. 21 Adec cuishonquesho isashien ambi chuibocpadebidi: —Dacuëdenda —quetanec: —Tantia. Mibi chuinu. Con Pan: “Matses chiec nid,” ëbi caondacpadomboembidi: “Ëbi chuibeneta,” mibi caimbi —quepondash Esus. 22 Adtanquin ëbi chedo dabushcabampondash. Dabushcabanashic: —Nuquin Papan Mayan mibëd tabadendac. 23 Mibëd icquin Nuquin Papan tantiaidquio tantiamequin Nuquin Papan Mayanën mibi utsibo chuibamendac. Adoac mimbi aden chuibanaido caic: “Nuquin Papan chiaid niaquec icsambo icboedi Esus tantiaquid yansho Nuquin Papan nëid bëdamboen isec,” quequin mimbi chiacpadomboen Nuquin Papan bëdamboen istsiash. Utsien: “Nuquin Papan chiaid niaquec icsauidequi icsho nëid Nuquin Papan bëdamboen istiapimbo iquec,” quequin mimbi chiacpadomboembidi Nuquin Papan bëdamboen istiapimbo ictsiash —quepondash Esus ëbi chedo chiec. Adtanequi isadenquio yanoaondash.

### *Esusën Tomas ismiaid*

24 Adec Esus isadenquio yanoanubien Esusbëd icboed utsi Tomas abi ushëmbi anin daëd tishaid chopondash. 25 Choshobi: —Esus isombi —cac: —¿Aidquiobida nepash? Utsien nechitash. Bëchun shuin mëtoccaid shëcuë isun aid shëcuë mëdanten bëmishquinc podo ansiäid bëmishquinc caquioshom-bimbi: “Ai, nuquin Icho uincuenac,” quequin tantiatsiac. Padambobi: “Con Icbobien niash,” quetiapimbo iquebi —quepondash Tomas. 26 Tomas adbon 7tedec ushash shubu nuntambidi tabadoapondabi. Tomas chedobëdi tabadondabi. Puduedtiapimbo icnuc padpiden bëtashoash tabadnubien shëcuë shëcniabi Esus isadcuenoapondash. Adashic: —Dacuëdenda —queoapondash. 27 Adtanequien: —Is con mëdante, Tomas. Shëcuë bëmishec cho. Në podo ansiäid iqueque. Aidtsen bëmishec cho. Adshun: “Uincuenabien icchitash,” queboedëmbi: “Uincuenaccosh,” quequin tantiata —caquien 28 mishenquio yec badedi: —Tso. Con Icbombo ma mibi neyoc. Nuquin Papapadquidquiobidi ma mibi neyoc —quepondash Tomas. 29 Adsho tantiashien Esus: —Ëbi isun: “Nuquin Papapadquidquiobidi mibi nec,” quequin mimbi ëbi tantiec. Utsibombien ëbi isabi: “Ai, Esus Nuquin Papapadquidquiobidien nec,” quequin ëbi tantiasho Nuquin Papan bëdambo icmendac —quepondash Esus Tomas chiec. Adtanec isadenquio yanoapondash.

30 Comapenen tantiaquidquio yec abembi uincuenash Esus adpondash. Ënden unësabi icquin adembidi comapenen tantiaquin nabampondash. Aden ambi comapenen tantiaquin nabanaidtedi uesquin chiambo iccombi. 31 Padi, aidtedi chiombi. —“Nuquin Papan chomiaidquio yec Nuquin Papan Madombobien Esus nec,” quequin aid tantiash ma Nuquin Papa yacno abëd tabadtequido icpanu —quequin aidtedi dada uaombi.

## 21

### *Chian cuëmanuësh Esus isadoaid*

1 Tantia. —Edusaden yacnuësh isadboshic chian Tibedias caid cuëmanuështsen Esus isadpondash —quequin mibi chuinu. 2 Esus uincuenash daëdec isadan con nidaid Cadidia caid yacno nidanepondabi. Nidaniash nëidtedi tabadpondabi. Nëidic Petedo. Nëidic Tomas anin abi

ushëmbi daëd tishaid ëmbi caboed. Nëidic Cana yacnocquid Natanaid. Nëidic ëbëdta tishaidquio. Nëidic ëbi. Nëidic Esusbëd icboed utsi daëd. Aidedi icpondabi. <sup>3</sup> Adnubien Petedo: —Ëmbi bedtenecpaden nëshaidën nuëcquid bedtanu —quepondash. Adshobimbi: —Nid. Nuquitedi nanu —capondac. Adash chian yacno nidash cano antabëdtoanec nënantan nidpondabi. Adshun nëshaid dapa nëneshun yuecshun cadoshon isac nibëdec. Adshumbic padpiden nëneoashun cadoshon isac nibëdoaic. Inchëshbudtsëc tauash nuëcquid bedambobi ambi badiadpondabi.

<sup>4</sup> Badiadquionobi acte cuëman masi dapan Esus nidsho istuidpondambi. Utsiembi dampondac. <sup>5</sup> Adshobini Esusën cuëmpondash. —Con utsibo ¿tedtsi bedo? —cac: —Padambo. Nibëdosh —capondambi. <sup>6</sup> Adsho tantiasun: —Mimbi nëniauc nënenquio icquin cano utsiuc nëshaid nëne. Adoac nuëcquid bedadec —cac ambi chiauc nëshaid nënetanquin: —Indono —cac nëshaid indotiapimbo yuëmboshë icpondash. Nuëcquid dadpen bedac.

<sup>7</sup> Adsho isumbimbi: —Ma Esus neyoc, Petedo. Nuquin Icbo nec —capondac. Adoquien aton tsitsumi icquiduidtsëqui icnuc abi dachiquidboed aton dashcute utsi dasiuidtanec acte nëpudunash Petedo tan-tanidec nidpondash Esus isnuec. <sup>8</sup> Èbien utsibobëd canombi tsyuec nidondac nëshaid shoyombanec. Cuëma anoentsëqui nuëcquid bedash 100 metedos cactionsësëc nidondabi. <sup>9</sup> Tsyuec choash pudundoshon isquien pambëdi nuëcquid cuëten shëadtsec. <sup>10</sup> Adnubien Esusën: —Mimbi bedboed daëdpactsëc beccho. Penu —cac <sup>11</sup> Petedo: —Ai, bedtanu —quianec nidash cano anidtoashon nëshaid cubu-cubuctsëcquio icquid indopondash. Acte cuëmano tsindoshon isac dadpenquioshë 153tedi nuëcquid icpondash. Nua-nuaic tsadquido icpondash. Nëshaid tësëdtiadsëcquio icnuc indondambi.

<sup>12-13</sup> Adshumbic ambi: —Pec cho —cac cho-choash tabadsho pamba menebantanquin nuëcquidtsen Esusën menebampondashi. Adoac: —¿Tsutsi ne? —quenquio icquin: —Esus nec. Comapenen tantiaquin nuëcquid nuqui bedmiosh —quequin tantiondambi ëbitedishun. <sup>14</sup> Adec uincuenash shubu nuntan tabadnuc daëdec isadondashic chian cuëmanuështsen isadoapondash Esus.

### *Esusën Petedo chiaid*

<sup>15</sup> Aden chian dapa cuëmanshun Esusbëdtan piondambi. Adshumbic Onas caidën mado Petedo Esusën chuipondash. —Tantia. Mibi chuinu, Petedo. Nëidon ëbi bëdiactsëc tantianuc ¿ada ëbi tantiaquie? —caquien: —Ai, mibi tantiembi. Aden ëmbi tantiaid mimbi tantiec —quepondash Petedo. Adsho tantiasun: —Ëbi tantiaquin con obecabimboecquido ëbi dayun uashunta —quepondash Esus. —Obeca icbon aton yua dayun uacbimboen ëbi tantiaquido ëbi dayun uashunquin ëmbi chiaidbëdta ëmbi naidtedi chuibanta —quequin tantiec adpondash. <sup>16</sup> Adshumbic padpiden: —¿Ada ëbi tantiaquie, Petedo? —cac: —Ai, mambi mibi tantieyoc —quesho tantiasunien padpidec: —Ëbi tantiaquin con obecabimboecquido ëbi dayun uashunta —queoapondash Esus. <sup>17</sup> Aden daëden chuishumbic padpiden Esusën: —¿Ada ëbi tantiaquie, Petedo? —cac shubiantiadtsëcquio yanondash Petedo. —Unës uabi icnuc: “Ëmbi isacmaid Esus nec,” quequin ëmbi chuiboctedembidi Esusën chiebi —quiash shubiantiadtsëcquio yanondash. Adashic: —Mibi con Icbo nec. Ma mimbi abitedimbo tantieyoc. “Petedon ëbi tantiaquie,” quequin ma mimbi tantieyoc —quepondash Petedo. Adsho tantiasun Esus padpidec: —Ëbi tantiaquin con obecabimboecquido ëbi dayun uashunta —queoapondash Esus.

<sup>18</sup> Adashic Petedobidi chuioaic: —Tantia. Utsien chuinu. Cania yec mibibi tsisiuidondac. Adanec mibi bunacno mibi nidtedniondac. Tsusiobudtsacshoen tsiumeshun utsibon ëquë mëdimbudcuentsëcshun mibi nidte bunacmanombo mibi buanendac —quepondash Esus. <sup>19</sup> —Aden mimbitsen Nuquin Papan chiacpadomboenuidi nabansho ëbi chieshënquidon mibi unës uaindac —quequin tantiec adpondash Esus. Adashic: —Ënenquio icquin ëbi tantiata —quetanquimbic: —Cho. Nidnu —cac ëbitedi puduanec nidondabi.

<sup>20</sup> Tsyuec nidshobini Petedon bidiadquin ispondash. Adshumbic: —Nëid Esusën tantiaidquio nec. Esus bedmiaid inchëshën Esus aton cachochtsëqui uesho aidën: “¿Tsutsi cao, Icbo?” capondash. <sup>21</sup> ¿Mitsipadec aid unëspatsiash? —queshun: —Ma nëid. ¿Mitsipadec unëspec? —capondash Petedon ëbi unëste Esus chuimequin. <sup>22</sup> Adoaquien Esus: —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadec unësenquio ictsiash. Adecbidi: “Ëbi choabi icnuc ma unëspanu,” ëbi quiacpadec unëstsiash. “Nadec unësendac,” quequin mibi chienquio iquembique. Ënenquio icquin ëbi tantiata —quepondash Esus.

<sup>23</sup> Adec: —Unësenquio ictsiash —Esus qesho tantiash ëbi caic: —Esusën tantiaidquio yec Uan unësenquio iquendac —quecuededpondash Esus tantiaquido. ¿Adenda Esusën chuidiondash? Ma padenquio iccondac. —Ëbi bunacpadequi aidi unësendac. “Ëbi Nuquin Papa yacnuësh choabi yacpadec ma unësenquio icnu,” ëbi quiacpadequien unësenquio ictsiash. “Adecbidi ëbi choabi icnuc ma unësnu,” ëbi quiacpadec unëstsiash —quequien iccondash.

<sup>24</sup> Aden Esusën nabanondaid ënquin chiombi. Ëmbi isondayidquio chuiquin abimbo chuiquin aidtedi dada uaombi. <sup>25</sup> Esusën naidtedimbo chuiquin dada uambo iccombi. Ëmbi tantiaidtedi naombi. Ambi naidtedimbo ambi chuibanaidtedimbo chuiquin dada uaquin dada uate dadpenquioshë naimbudnetsiambi. Padi. Aidtedi dada uaombi.

## ESUS CHUIBENEQUIDON NAID

### *Esus aton Papan abuc indote*

<sup>1-2</sup> Ducas nebi. Mibi Esus tantiamenu, quequin ënden dada uaondambi, Teyopido. Esusën tauain ismebanaid bedanquin abi abuc indoaid dënainquin dada uaondambi. Abuc nidnun Esusën ëbi chuibeneta quequin abëd icquido chuipanëdash aton Mayanën tantianubi. <sup>3</sup> Cuesten dectanac unësash uincuenshun: “Uincuenobique. Is,” quequin Esusën utsi-utsien ismebampänëdash ma abimbo iquec quequin tantiaquin ëbi chuibenepanueshun. Ushë abentsëc nidmequin utsi choaid abi choaqui usudnuc 40ted ushquin aden ismeben-ismebenequin Nuquin Papa yacno tabadaid iquec quequin Esusën chuided-chuidedpanëdash. <sup>4</sup> Aden ismequimbi Edusaden caid yacnoshon ambi ëbi chuibeneta caidobëdtan pec tabadquimbi Esusën nadopanëdash: —Edusaden yacno tabadquin ëmbi chianeboed, con Mayan, Nuquin Papan mibi menetequid caimbudta. <sup>5</sup> Acten mentoanquid Uan pado icpondash. Padnuen ëmbi chianeboed Nuquin Papan aton Mayan mibitedi menendac —quepanëdash Esus.

<sup>6</sup> Adshumbic, padpidec Esusbëd icquin abëd icquidon: —Yuen matses utsi-bon namiaido nuquin matses nec. ¿Nëbimbobida mibi nuquin matses chuiquid dapa icpeque? Tantianu. Chui —capanëdash Esus chuiquin. <sup>7</sup> Adoaquien: —Nuquin matses chuiquid icmete ushë choaid tantiesa mibi nec. Nuquin Papanuidtsëqui tantiacpadën adquid iquendac —quepanëdash Esus abëd icquido chiec. <sup>8</sup> Aden chuishumbic: —Aton Mayan Nuquin Papan meniac aidënquo tantiamequin pausunac ëbi chuibenequidquo mibi iquendac. Edusaden caid yacnoshomba mimbi ëbi chuibanendac. Adshumbic, nidaid Udeya caid yacnoshontsen ëbi mimbi chuibanendac. Adshumbic, nidaid Samadia caid yacnoshontsen, adembidi nidaid utsi-utsiec yacnoshontsen adembidi ëbi chuibanendac —quepanëdash Esus abëd icquido chiec.

<sup>9</sup> Aden chuibanquin Esusën nabanquin nainanec macuësh yacno choacsho aton Papan Esus abuc indopanëdash abëd icquidobëdtan abi tantiaquid utsi-bon isbedednubi. Aden isec tabadnubi abu ushun Esus bëtimpanëdash.

<sup>10</sup> Adec Esusbëd choboedo isec tabadnubien dashcute ushumbocquid dasiuidquid daëd choash tabadec: <sup>11</sup> —Nidaid Cadidia caid yacnoësh choquido, ¿atotsi quiash abuc isec tabadec ne? Abuc indosho mimbi isboed Esus abu ushun choec budsho mimbi isendac padpiden —quepanëdash ushumbocquid dasiuidquid abuc isbededquido chiec.

### *Matias Esus chuibeneta quequin iccuededquidon chiaid*

<sup>12</sup> Aden Esus abuc indosho isash abëd macuësh Odibos caid yacno choboedo Edusaden caid yacno nidoapanëdash. Chonoadtemaid ushë nec, quec aйдtiontsëqui capunëdash. Aido Edusaden yacno choash abuc quënë yacno abi tabadbocono dectatoash tabadoapanëdash. <sup>13</sup> Aid quënë nuntan Esusën ëbi chuibeneta caido nëidted icpanëdash: nëidic Petedo, utsibic Uan, utsibic Acobo, utsibic Andedes, utsibic Uedipe, utsibic Tomas, utsibic Badtodome, utsibic Mateyo, utsibic Adpeon mado Acobo cuëmëdquid, utsibic isadaidpembo namequin chuiquid bunesa, Simon cuëmëdquid, utsibic Acobo utsin mado Udas cuëmëdquid. Aidtedi Esusën ëbi chuibeneta caido aid quënë nuntan tabadnubi <sup>14</sup> utsibo Esusën tita yec Esus tantiaquid chido utsibotedi yec Esusën utsibo yec quec ambobidi iccuededquin Nuquin Papa chiec abentsëc onquiacbimboec onquecuededpanëdash.

<sup>15</sup> Adashic Esus tantiaquid 120ted iccuedednubi nēnantanquio nidtoshon Esusēn ēbi chuibeneta caid abentsēcshun Petedon naden chuipanēdash: <sup>16-17</sup> —Udas pado chuibanu. Tantiata. Esusbēd icquin piucquid dayun uaquid icquimbi Esus chieshēnquido Udasēn Esus bedmepondash. <sup>18</sup> Aden Esus bedmeshun ambi piucquid bedboed menequin aton tiedēmpi bedashic aid tied nantanuēsh tētaniadash pobidisquiash paēdec aton pucu tishidpac caondash. <sup>19</sup> Pucu tishidec intac chiuidaaid tied icsho tantiaquin Edusaden yacnocquidtedishun Aquedama cain aton onqueten cuēmbededpondash. <sup>20</sup> Adembidi ēndenquimboshē Udas pado tishabicnuc chuiquin Nuquin Papan Mayanēn tantiamiacpadomboen tsusedpa Dabid caidēn Udas cuidte tantiec cuēdēnte Sadmo caid naden dada uapampic:

“Ma adequi aton shubu mosadpanuna ma aibidi aton matses nibēdquid shubu icpanuna.”

Aden Udas pado cuidte chuiquin cuēdēnte Sadmo caid utsitsen naden Dabid Padon dada uaoapampic:

“Aidēn icsain nacpaden tanenquiocquin ma utsin bēdamboen napanuna,” quequin Dabid padon dada uapampic —quepanēdash Petedo. <sup>21</sup> Aden chiashic abi onquec: —Udas pado nibēdnuc Esus chuibeneta quequin abentsēc nuquitedishun chuinuna. Nēid quēnē nuntan nuquibēd capuquido dada dadpen iquec. Nuqui Esus chuibeneta caid nadquid ictiad. Chuinu. Tantiata. <sup>22</sup> Esus Uan padon acten mentosho isash niamēdenquio yec Esusbēd capucueneshun Esus indosho isquidquido icsho, Esus chuibeneta, quequin nuqui chuitiad. Adoac Esusēn ēbi chuibeneta caidobēdtan Esus uincuemiaid chuibantiad —quepanēdash Petedo iccuededquido chiec.

<sup>23</sup> Aden Petedon chuibanac daēd istuidash Petedobēd iccuededquido, Petedon chuibocpadquid nēid daēd iquec, quequin chuipanēdash aidon. Ambi istuidaaid abentsēc Ose cashun Badsabas cashumbic Ustus, quequin cuēnaid nepanēdash. Utsibic, Matias cuēmēdquid icpanēdash. Nēid daēd Petedon chuibocpadquid nec, quesho tantiashun: —Nēnantanquio tabadec cho —cac abi daēdi choash tabadsho isash <sup>24</sup> Nuquin Papa chiec nadec iccuededquido onquepanēdash: —Nēnantanquio chomeboed nēid daēd iqueque. Is, Papa. ¿Mitsicquidimbi Esus chuibeneta, cape? Ēbitedi tantiame, Papa. <sup>25</sup> Udas pado tauditiadpambo chian anēdēnquiacno nidboedēn nauidaaid namenu, quequin mimbi bēdamboen isaid abentsēc ēbi isme. Papa. Aden mimbi ismiac ma aidēntsen Esus chuibenepanuna —quepanēdash Nuquin Papa chiec. <sup>26</sup> Aden chuitanquimbic aid daēd abi cuēmēdquid abentse-abentsen dada uatempin dada uashumbic tēchun sandoshon cadotaniac dada uatempi abia pudue- naid istanquin, Matias cuēmēdquid nec, quequin isbededboshic, Esusēn ēbi chuibeneta caido onseted icboedi nēbi Matiasbēd doseted yanosh, quequin chuibededpanēdash nuntan iccuededquidtedishumbi.

## 2

### *Aton Mayan Esus tantiaquidtedi menebanaid*

<sup>1</sup> Adashic isadaidbon ambi aton tiedēn caniquid abia ēshēaid bedaid tanti- aid ushē chotsēc nubi Esus tantiaquidtedi shubunuēshi iccuededoapanēdash.

<sup>2</sup> Ambo iccuededquimbi badedquido shubu nuntan cunquequid dapa choec natiambo cunquiacbimboecsho abitedishun isbededpanēdash. <sup>3</sup> Aden aid isbedednubi cuēte dētsisidacimboecquid budec mais-maisec Nuquin Papan Mayan matsadtocuededpanēdash abi isquidtedi. <sup>4</sup> Nuquin Papan ma aidobēd tabadnushun aton Mayan Esus tantiaquidtedi menebanac matses utsi- utsiec onquetenquio onquecuededpanēdash ambi matsadtomiaidotedi.

<sup>5</sup> Aden Nuquin Papan aton Mayan menenubien isadaidbo utsibo Edusaden yacno cho-choash dadpen tabadpanēdash. Aido Esus tantiesabo yequi aton tsusedpabon chiampicpaden nanuec nidaid utsi-utsiec yacnoësh Edusaden yacno cho-chopanēdash. <sup>6</sup> Ambo cho-choash tabadnubi Nuquin Papan aton Mayan meniaid-meniaidquiec nēmbobi choquidon onqueten-onquetenquiec onquesho tantiash nēbi cho-choboedo utsi-utsiec: <sup>7</sup>—¡Padtec! Dacuēdanquiopaic. Ēbipadquiecshenda onquepec. ¿Onquequidotedi nidaid Caidia yacnocquidoda nepec? <sup>8</sup> ¿Mitsipaden con onquete bedash onquecued-edpec nec? <sup>9</sup> Ēbitedi nidaid utsi-utsiec yacnoësh cho-choquido nebi. Padtia yacnoësh choquido; utsibic, Media yacnoësh choquido; utsibic, Edan yacnoësh choquido; utsibic, Mesopotamia yacnoësh choquido; utsibic, Udeya yacnoësh choquido; utsibic, Capadosia yacnoësh choquido; utsibic, Ponto yacnoësh choquido; utsibic, Asia yacnoësh choquido; <sup>10-11</sup> utsibic, Pidiquia yacnoësh choquido; utsibic, Pampidia yacnoësh choquido; utsibic, Equipito yacnoësh choquido; utsibic, Dibia Sidene udictsēcuësh choquido; utsibic, shubu dadpen icquid Doma caid yacnoësh choquido; utsibic, acte nēnantan nidaid nacnēdquid Quideta caid yacnoësh choquido; utsibic, Adabia caid yacnoësh choquido. Isadaidbobēd isadaidbopadquio icnuequido Edusaden caid yacno tsusedpabon chiampicpaden nanuec cho-choboedo ēbitedi nebi. Ēbibimboec onquequidtedishun Nuquin Papan naid chuibanasho tantiambi. <sup>12</sup> ¿Mitsipaden tantiaquin oncamiaquien adec onquepec? —quepanēdash Edusaden yacno cho-choquid.

<sup>13</sup> Adnubien: —¿Bēdamboec onquepequida onquec? Paēmboquid cubudquin acshun tantienquiocquido nepanui —queoapanēdash utsibo.

#### *Iccuedquido Petedon chuibanaid*

<sup>14</sup> Adec onquesho tantiashun Esusēn ēbi chuibeneta caido cho-choquin Petedon nidtoshon tantiamenu quequin naden cho-choboedo comapenec onquequin chuipanēdash: —Mimbi icsamboen tantiaid chiembique. Tantiata. <sup>15</sup> Ushē abuctotsēcnubi ēbitedishun paēmboquid acamboccombi. <sup>16</sup> Utsin-utsinquec onqueten onquesho mimbi tantiaid Nuquin Papan ēndenquimboshē chiampicpadec onquec nebi. Tsusedpa Oedēmbi Nuquin Papan ma matsesbēd tabadnueshun aton Mayan menenun chiaid naden aidēn dada uampic:

<sup>17</sup> Nēid nidaid naimbudnubi

Con Mayan matses utsi-utsien menendambi.

Aidon madobobēdtan aidon champibontsen ēmbi yuecquio icshun nanun chiaid chuibanendac.

Adembidi caniabontsen ushqin ēmbi chiacpaden isendac.

Adembidi tsusiobontsen ushqin ēmbi chiacpaden isendac.

<sup>18</sup> Aden con Mayan meniac ambi tantiacpadomboembidi ēmbi chuiquin namiaidon dadan chidobēdtan

ēmbi yuecquio icshun nanun chiaidquiobidi chuibanaindac.

<sup>19</sup> Adembidi, con Mayanēn tantiamiac ēmbi yuecquio icshun nanun chiaid matsesēn chuibanubien abucuešh uinsadpamboctequid icnubi

nidaidēnshun ismete intacbimboectequidbēdtabi nēdēnquetequid cuēte pushudquidbimboectequid abembi pushudquidbēdta adquidtedi mibi ismendambi.

<sup>20</sup> Adquid icnuc badiadēn ushē chēnquenquiocnoc

inchēshacimboectequid inchēshēn ushē piu-piupambo yec intacbimboecsho mimbi isbedendac.

Ēmbi ismiaidtedi icambi matses cuidte ushē choendac.

<sup>21</sup> Ismequimbi con Icbombo nec ēbi caquidquio mēnchiquendambi,



quequin Nuquin Papan chuimiapaden Oedën dada uapampic.

<sup>22</sup> “Adembidi Nuquin Papan chomiaid chiembique. Tantiata, isadaidbo. Nasaded caid yacnoësh choquid, Esus, Nuquin Papan chomiaid icquin nada-tiambocquin nabanquin ismebansho mimbi isondac. <sup>23</sup> Aidi Nuquin Papan tantiampicpaden Esus bedshun mimbi isadaidpembo chuiquid menequin, Unës uata, cac cuesten dectanquin Esus unës uapanëdash. <sup>24</sup> Aden mimbi nac unësacsho icsaisa chococacno yuec ictiapimbo iquec, queshun Nuquin Papan Esus uincuemepanëdash. <sup>25</sup> Adembidi ëndenquimboshë tsusedpa Dabid padon Esus chuibanquin naden dada uapampic:

‘Con Icho abuc nidec bëyucanquid ëbëd tsadacimboecsho isec nebi.

Aidi con dayun tsadquid icsho isquin natiaic cametequid dacuëdënenquo iquendambi.

<sup>26-27</sup> Aid unësash uincuenta tantiec ëbitsen uincuenendabi, Papa, quec cuëdënec bëdambo iquebi.

<sup>28</sup> Nuquin Papa yacno tabadacpadec nidaidën tabadquin ismiac mibi yacno nidash mibëdi tabadec bëdamboshë iquebi mimbi camiaid iquendabi,’

quequin Esus tantiaquin Dabid padon dada uapampic.

<sup>29</sup> “Adomboen tantiaquin dada uash Dabid unësacsho chococapampid nëbi shëcuë iquec. <sup>30</sup> Dabid Nuquin Papan ambi yuecquo icshun nanun chiaid chuiquid icquin nadopampic. Yuecquimboshë yash mibi ëndenquimbo unësampid icnuc min tsyuecquid chuiquid dapabidi iquendac, quequin Nuquin Papan chiaid abimbo iquec, quequin tantiaquiopampic Dabid padon. <sup>31</sup> Aden Nuquin Papan nanun chiaid tantiaquin Esus uincuenta isacimboen dada uaqin, Nuquin Papan Chomiaid unësacsho chococacqui aton nami chodquenquo yec uincuenendac, quequin chuipampic Dabid padon. <sup>32</sup> Ai, Dabid padon chiampicpadembi Nuquin Papan Esus uincuemepanëdash. Aid uincuemiacsho isondaic icquin mibitedi chuibanec nebi. <sup>33</sup> Aid uincuenash Nuquin Papan dayunquo tabadendac nëbi. Ambo choacsho matses tantiaquin Nuquin Mayan ma aidbëd tabadneshun matses mimbi meneta, aton Papan cacpaden abi tantiaquidtedi menebanquiac onquete utsin-utsinquec onquesho nëbi mibitedishun tantiec. <sup>34</sup> Dabid padon nami chodquiash abuc nidambocpampic. Aden aton namibi abuc indote chienquiocquin Esus chuiquin Nuquin Papan yuecquo icshun nanun chiaid naden Dabid padon chuibampampic:

‘Nuquin Papa Icho Dapa icquin abipadquid icho cain: Nëbi ëbëdi tsadec cho.

<sup>35</sup> Mibi chieshënquido dëniacquidquo mibi icmenun nabono. Chiata,’ quequin Nuquin Papan nanun chiaid Dabid padon dada uapampic.

<sup>36</sup> “Aden tantiaquin Dabid padon chuipampid Esus mimbi cuesten dectanquin unës uaid uincuemequin matses icsaid bedshunash abided cuidadquid Nuquin Papan icmepondash. Adoac ëmbi chiaid abimbo iqueque. Esus tantiaquidquo icta, isadaidbo —quepanëdash Petedo.

<sup>37</sup> Aden Petedon chuisho tantiasch iccuededquido abi icsaid tantiec unësquo yec: —Esus tantianuequin ¿atotsi nuqui nape? —quepanëdash utsisic Petedobëdta Esusën ëbi chuibeneta caid utsibo chiec.

<sup>38</sup> Adoaquien Petedo: —Mibi icsaid ënshun, Esus con Icbombo nec, quequin abimbo tantiaquin acten mentometa ma ëbi icsaid Nuquin Papa bëpiscudnu queshun. Adoacsho aton Mayan mibi menendac. <sup>39</sup> Adembidi tantiasch isun min tsyuecquidtsen menendac. Adembidi nidaidtedi yacnocquidën tantiasch isun aton Mayan meneoaindac ambi chiampicpaden —quepanëdash Petedo Esus isquidquo.

<sup>40</sup> Aden chuibanequi: —Mimbi icsamboen tantiaid ënta. Aden ënash Esus tantiaquidquio icta —quequin chuibudquin Petedon ëmpanëdash.

<sup>41</sup> Aden chuisho tantiash, Tantiapiembi, quepanëdash utsi-utiec. Aid ushëmbi dadpenquioshë tedes midted Esus tantiaquid yampanëdash. Adquid icsho isun acten mentobampanëdash.

### *Esus tantiaquido iccuededaid*

<sup>42</sup> Adashic, Esus tantiembi, queboedo tantiabenabi iquec Esusën ëbi chuibeneta caidon Esus chuibansho tantiec tabadequi Nuquin Papa chiec onquedenepanëdash. <sup>43</sup> Adec tabadcuededsho isash: —¡Padtembo! Dacuëdampambo iquec —quec utsibo tabadpanëdash. Adnubien Esusën ëbi chuibeneta caidon nadatiambocquin nabampanëdash. <sup>44</sup> Adnubien Nuquin Papan aton Mayan meniaidtedi tabadcuenequi, Con na nec, quenquiocquin aton na cudasenquiocpanëdash. <sup>45</sup> Aton na menequin piucquid bedshun utsin na nibëdsho isun menepanëdash. <sup>46</sup> Adecbidi badiadquidën-badiadquidënquiec Nuquin Papa tabadte shubu uashunaid yacno nidash iccuededpanëdash. Adecbidi shubu utsi-utsiec yacno nidash iccuededquin Esus unësaid tantiaquin panëmpi cuësh-cuëshun peded-pededpanëdash. Adembidi bundoshon pebededoapanëdash. Adobanequi ëbi icsaid bedshunash Esus cuidadaid tantiec bëdambo iquebi, quec <sup>47</sup> Nuquin Papan naid chiec cuëdëncuededpanëdash. Adec tabadsho isash, Bëdambocquido nec, quec utsibotsen Esus tantiaquid yanash abi tantiaquid utsitedibëd iccuededpanëdash.

## 3

### *Caputiapimbo icquid bëdamiaid*

<sup>1</sup> Adnubien abi nidteniaccpadën ushë budec 3 yanuc Petedo Uambëd Nuquin Papa tabadte shubu uashunaid yacno Nuquin Papa chiec nidpanëdash. <sup>2</sup> Ambo nidnubien caputiapimbocquid aid shubu shëcuë Bëdaidquio caid yacno utsibon buampanëdash. Anin tishacchobi yec caputiapimbocquid icpanëdash. Aidi badiadquidën-badiadquidënquien buandenequin aid shëcuë cuëmano nanded-nandedac uequimbi cho-chosho isun: —¿Adabi piucquid menetsia? —cabampanëdash. <sup>3</sup> Ambo Petedobëd Uan chosho isquin: —¿Adabi piucquid menetsia? —capanëdash caputiapimbocquidën uequin.

<sup>4</sup> Adoaquien Uambëd nidtuidash nidquin Petedon: —Ëbi daëdi is —capanëdash caputiapimbocquid bëisquin. <sup>5</sup> Adoaquien, Ëbi menepashun, quequin abi daëdi isobien, <sup>6</sup> Petedon: —Piucquid con na nibëdec. Ëmbi tanti-aidën ëbi tantiamebocpaden naimbique. Nasaded yacno iccondaidën Esusën bëdamiacpadec bëdanash nidtoash nidec nid —capanëdash. <sup>7</sup> Aden chuiquin caputiapimbocquidën mëdante abiucquio bedtanquin Petedon nidtomiac badedquio nidtopanëdash caputiapimboedi. <sup>8</sup> Bëdambo yec nidtoash capupanëdash. Adec bëdanash Petedobëd Uan chedobëd capuashic Nuquin Papa tabadte shubu uashunaidën puduedash, Nuquin Papan bëdamioshi, quec pudundotan-pudundotanec: —Cuishon —quepanëdash. <sup>9</sup> Adec capusho isquidon nadobededpanëdash: <sup>10</sup> —Nuquin Papa tabadte shubu uashunaid shëcuë, Bëdaidquio caid yacno uetsequi, Piucquid ëbi menepashun, queboedi capueque. En is. ¡Adpaidie. Is! Tantiadempanboctequid nec —quequin isbededpanëdash.

<sup>11</sup> Adec capuequi Petedobēdta Uan mēdinec Sadomonēn tacpan quēnē uabicquid yacno puduednubien iccuededquid tsibanash anotsen tantiadempambo yec tabadoapanēdash. <sup>12</sup> Adec tabadsho isun Petedon naden chuibampanēdash: —¿Atotsi quiash padtec quequin ēbi daēdi comapenen bēise? ¿Ēbi daēdshun nacta nēid capupadic? ¿Ēbi bēdambocquid icquindambi nadio? Padenquio. Nuquin tsusedpabon Papa caidēn bēdamiaid nec. <sup>13</sup> Aidi Abadauan padon Papa caid nec. Aidbidi Isac padon Papa caid neoaic. Aidbidi Acoho padon Papa caid neoaic. Aidon Papa caidēmbi ambi nidaidēn chomiaid Esus nēbi aton Papabēd tabadoaic. Aton Papa yacno nidoabicsho Esus bedshun Pidato meniaquien, Nēid dada icsaisa neque. Nidmenu, quequin tantiaquin Pidaton chiaqui, Icsambocquid nec. Unēs uaquimbien ictiad, quequin mibitedishun chuipondac. <sup>14</sup> Icsaisa nec, quequin utsin isnubi Esus bunenquiocquin icsaquid cuidenquiocquin nidme, quequin mimbi chuipondac. <sup>15</sup> Abia uincuentequid mibi chuiquid dapa mimbi unēs uacshobien Nuquin Papan aidi uincuempondash. Aid uincuenacsho ēbitedishun isondambi. <sup>16</sup> Esusēn ēbi bēdamepec, quequin tantiash nēid taē icsacboedēn Esus tantiash capusho mibitedishun isec.

<sup>17</sup> “Utsibo, Nuquin Papan chomiaid nec, quequin tantienquiocquin mibi chuiquidobēdtan mimbi Esus unēs uamiondac. <sup>18</sup> Ēmbi matses chuiquid dapa icmenu caid matsesēn mēyanaid iquendac, quequin ambi chuimaidtedi Nuquin Papan dada uamiampicpaden mimbi naondac. <sup>19</sup> Nēbi mimbi icsamboen tantiaid ēnquin Nuquin Papa tantiata ma mibi icsaid bēpiscudpanuna; adecbidi ma abēdi tabadebi, quequin tantiec mibi bēdambo icpanuna; <sup>20</sup> adecbidi ma ambi chuiquid dapa icmiaid Esus mibi bedmenuen chomepanuna. <sup>21</sup> Nuquin Papan abitedi icsaisa icmete ushē choabicnuc ambi chiampicpadequi nēbi Esus abuc aton Papabēd tabadec. <sup>22</sup> Adembidi chuiquin Moisesēn dada uampid nad iqueque. Tantiata:

‘Chuiquid Dapa ēbipadquid ambi chuimiaid utsi yuecshun Nuquin Papan chomendac. Isadaidbobidi aid iquendac. Aid choshon chuibansho tantiashun bēdamboen nabanta.

<sup>23</sup> ‘Ambi chiaid tantiesa Nuquin Papan nēsecaindac,’ quequin Moisesēn dada uampic.

<sup>24</sup> “Adomboembidi Samuedēn chuibampampic. Adomboembidi Nuquin Papan chuimiaid utsibon chuibanoampic. <sup>25</sup> Nuquin Papan chuimiaidon tsyuecquido mibitedi nec. Tsusedpa Abadauanēn tsyuecquidobidi mibitedi neoaic. Aidon tsyuecquido icsho Nuquin Papan Abadauan chiampicpaden chuioaid mibitedi nec. Naden Abadauan Nuquin Papan chuipampic:

‘Mibi ēndenquimbo unēsampin aton matsesbēdta matses utsi-utsien min tsyuecquidēn bēdambo icmendac.’ <sup>26</sup> Nuquin Papan Abadauan chiampicpadec aton tsyuecquid choacsho mimbi unēs uapondac. Aidi Nuquin Papan uincuemiac ma isadaidbomba abi icsaid ēnsho ma ambi bēdambo icmiaid icpanuna —quepanēdash Petedobēd Uan.

## 4

### *Ambi naid Petedobēdta Uan isadaidbo tsusiobon chuibamiaid*

<sup>1</sup> Aden Petedobēdtan Uanēn chuibanubien isadaidbo tsusiobo chochopanēdash. Utsi-utsiec Nuquin Papa tabadte shubu uashunaid yacno cho-choquid bēdamboen tabadmequidquio icnubi utsi-utsiec saduseyobo icpanēdash. <sup>2</sup> Esus unēs uacsho Nuquin Papan uincuemiacpadembi matsesten unēsacsho uincuemioaindac, quequin Esus chuibenequidon

chuibanubi chopanēdash aido. <sup>3</sup> Choshon Petedo Uambēdta bedash: — Inchēsheque. Badiadshun nēidēn chiaid tantianush nidnu. Nid —quianec puduanquimbi Petedobēdta Uan quēnēn nauedmepanēdash isadaidbo tsusiobon. <sup>4</sup> Aid daēdi bedabicnuc Petedobēdtan Uanēn chuibansho tantiaquido Esus tantiaquid dada dadpen sinco midted yampanēdash.

<sup>5</sup> Adashic, badiadash isadaidbo chuiquido yec tsusio utsibo yec abi ancaquido yec quec Edusaden yacnoēsh iccuededpanēdash. <sup>6</sup> Nēidtedi icpanēdash: ancanquid dapa daēd Anasbēdi Caipas icpanēdash. Nēidic aton shubun icquido abipadquido: nēidic Uan, utsibic Adecandedo, aidtedi chochoash iccuededpanēdash. <sup>7</sup> Iccuededshumbic Petedobēdta Uan bēmeshun nēnantanquio nidtomesun: —¿Tsutsi chuiquin caputiapimbocquid bēdamio? —capanēdash tsusiobon.

<sup>8</sup> Adoaquien Petedo Nuquin Papan Mayanēn comapenen tantiamiac nadpanēdash: <sup>9</sup> —Caputiapimbocquid tantiaquin bēdamiaid isec ¿mitsipaden nao, quecta mibitedi tabadpe? Ancanquidbēdtabi chuiquid utsibo isadaidbo utsibo mibitedi chiembique. Tantiata. <sup>10</sup> Caputiapimbocquid Esuquidistu Nasaded yacno iccondaidēn bēdamiaid niosh. Mimbi unēs uacsho Nuquin Papan uincuemiaidēn nac nēid caputiapimbochoedi nēbi nidtoash capusho mimbi isec. <sup>11</sup> Aid bēdamequid mimbi tantienquio yaid Nuquin Papa yacno yuedanquidquo nec. <sup>12</sup> Nuquin Papa yacno yuedanquid utsi nibēdec. Nuquin Papa yacno tabadte bunec aid tantiaquid icta —quepanēdash Petedobēd Uan.

<sup>13</sup> Adec Petedobēd Uan dacuēdenquio yec comapenec onquesho tantiash tsusiobo: —Aid daēdi tsusiopenquio iquequi adecbidi Nuquin Papan chiampid tantiabenabicquid iquequi Esusbēd icquid aid daēd icquin ¿mitsipadomboen caputiapimbocquid bēdamepashba? —quec tantiadempambo yec tsusiobo tabadpanēdash. <sup>14</sup> Aden ambi bēdameboed aidbēdi icsho isash, Icsamboen mimbi naoc, quetiapimbo tsusiobo tabadpanēdash. <sup>15</sup> Adshun Petedo Uambēdta nidmiash, Tiantianu, quec onquecuededec tsusiobo: <sup>16</sup> —¿Mitsipadomboen aid daēd nuqui napeba? Nadatiambocquin nasho Edusaden yacnocquidtedishun isbededposh. Ad icnuc, Caputiapimbocquid bēdanambo iquec, ēbitedi quetiapimbo iquebi. <sup>17</sup> Dadpenshun tantianushe queshun, Esus padpiden chuibanoainda, quequin aid daēdi chuinuna —quecuededpanēdash tsusiobo. <sup>18</sup> Adshun Petedobēdta Uan chomeoashun: —Padpiden Esus chuibanoainda. Aidēn chiaid chuiquin tantiamenda —capanēdash tsusiobon.

<sup>19</sup> Adoaquien: —¿Mitsicquidēn chiaid ěmbi natequid icpec? ¿Nuquin Papan chiaid niacquindambi mimbi chiacpaden nadi? <sup>20</sup> Nuqui isboed nuqui tantiaboedbidi chuitequidquo iquendac —quepanēdash Petedo.

<sup>21-22</sup> Adoaquien: —Ěmbi chiacpaden nainquiocsho isun mibi daēdi mēyantsiambique. Baded nid cueschitomane —capanēdash tsusiobon. Abi tishaid seta 40ted icquid caputiapimbocho bēdamepanēdash. Aid Nuquin Papan bēdamiacsho isash utsibo cuēdēncuededpanēdash. Adsho tantiash Petedobēdta Uan mēyantiadquicboedi adotiapimbo yec tabadpanēdash tsusiobo.

*Isadaidbo tsusiobon chiaid Esus tantiaquidon chuioaid Nuquin Papa chiaid*

<sup>23</sup> Tsusiobon nidmiac nidash iccuededboconombo choash puduedshun tsusiobon chuiboed Petedobēdtan Uanēn chuioapanēdash. <sup>24</sup> Adoac abentsēc onquiacbimboen naden Nuquin Papa chuipanēdash: —Con Icbombo mibi nec.

Abubēdta nidaid acte chedo uashun aidēnquo icquidtedimbo mimbi uabampampic. <sup>25</sup> Adembidi ēdenquimboshē mimbi tantiacpaden min Mayanēn tantiamiac mimbi chuimiaid, Dabid padon naden dada uapampic:

“¿Atotsieshumbini ēbi dēniactiapimbo icquidombi isadaidpembo comapenec nēishash ēbi dēniacte buncuededpec? Adquiecbidi ¿Atotsi quiash ēmbi chomiaid icsamboen nanushbimboec isadaidbo onqueuidoapec?

<sup>26</sup> Ancanquidobēd chuiquid utsibo ēmbi chomiaid aton Icbobi mēyanuec iccuededec.”

<sup>27</sup> Ai, mimbi Dabid pado dada uamiampicpadembi ēnabi Edusaden yacno isadaidpembo ancaquid daēd Edodesbēd Ponsio Pidato icnubi isadaidbo chedo iccuededquin mimbi Chomiaid icsaisa Esus icsa uanuec onquecuededpondash. <sup>28</sup> Mimbi tantiampicpadembi unēs uapondash, Papa.

<sup>29</sup> Adquidēn Petedobēdta Uan chushcasha mimbi tantioc. Cuesambocquid ēbitedi icmequin mimbi chiaid ēbi chuibame, Papa. <sup>30</sup> Icsaisan Esusēn bēdamiacpaden nadatiambocquin naban, Icho —quepanēdash Esus tantiaquido Nuquin Papa caic.

<sup>31</sup> Adoac abi iccuededacno ishcuđpanēdash. Adec ishcuđnuc ambocquid Nuquin Papan Mayanēn comapenen pausunac dacuēdenquiocquin Nuquin Papan chiaid chuibampanēdash.

### *Abentsēc yacbimboec tabadaid*

<sup>32</sup> Aden chuibanequi abentsēc onquiacbimboec tabadec Esus tantiaquido, Con na nec, quenquo yec, Nuquin Papan na nec, quec tabadcuēnapanēdash.

<sup>33</sup> Adequi tabadcuēnequimbi dacuēdenquiocquin, Esuquidistu uincuenacsho isombi, quequin chuibenapanēdash. Adec Esus tantiaquido tabadsho utsibon bēdamboen isbededquin aidēn chuibansho bēdamboen tantiaapanēdash. <sup>34-35</sup> Adembidi nidaid icho utsin-utsinquien aton nidaid menequin piucquid bedshun Esus chuibenequido menapanēdash. Adembidi, shubu icho utsin-utsinquien aton shubu menequin piucquid bedshun meneapanēdash. Aden meniac aton na nibēdquid icsho isun Esus chuibenequidon menebanac bunenquo tabadpanēdash. <sup>36</sup> Adecbidi ambo acte nēnantanquo nidaid nacdēdquid shubu uaidēnshun Chipide caid yacnoshon tishaid Edusaden yacno choash Ose tabadpanēdash. Aidi, Bēdamboen mimbi naoque. Adobanta, quedenesho Bednabe cuēmpanēdash. <sup>37</sup> Aidēmbi aton nidaid menequin piucquid ambi bedaidtedimbo Esus chuibenequido meneapanēdash.

## 5

### *Ananiasbēd aton chido Sapida muaid*

<sup>1</sup> Adnubien dada utsi Ananias cuēmēdquid aton chido Sapidabēdtan aton nidaid menequin piucquid bedpanēdash. <sup>2</sup> Bedshun aton chidon isnubi musucbanshun ambi musucaid utsi dayun uash Esus chuibenequido yacno nidshun abitedi meniacbimboen menapanēdash Ananiasēn. <sup>3</sup> Adnubien, Piucquid abitedi meniacbimboen Ananiasēn mua uaposh, quequin Nuquin Papan Mayanēn tantiamiac naden Petedon Ananias chuipanēdash: —Satanasēn tantiamiaid icquin ¿mitsipaden tantiaquin Nuquin Papan Mayanēn isnubi mua uaquin ēbi menio? <sup>4</sup> ¿Min nidaid meniabi icnuc mitsanapenquioda nediosh? Mitsana niosh. Adecbidi, ¿aidi menequin piucquid bedaid mitsanapenquioda nediosh? Aidedi mitsana niosh. ¿Mitsipaden tantiaquin piucquid abitedi meniacbimboen meniano? Aden bēquin abimbo chienquiocquin Nuquin Papambobi mimbi mua uaboc <sup>5</sup> —Petedo qesho tantianec Ananias unēsequi uebudpanēdash. Adsho isash Esus tantiaquidtedi

dacuëdpanëdash. <sup>6</sup> Unë sacsho isun dashcute cuëshën dataneshun buanshun caniabon chococatampanëdash.

<sup>7</sup> Bënë chococambic ushë abuctoan unësboedën chido aton bënë unësaid tantienquo yec choapanëdash. <sup>8</sup> Choasho isumbien: —¿Ada min nidaid menequin nëidtedi piucquid bedo? —Petedo qesho tantiashien:

—Ai, aitedi bedombi —quepanëdash Sapida.

<sup>9</sup> Adoaquien Petedo: —¿Nuquin Papan Mayanën ëbi muasho tantiapec, quequin tantienquiocquina min bënëbëdtambi min piucquid abitedi meniachimboen meniano? Nëbi min bënë chococaboedon mibitsen buanendac —Petedo quenubic <sup>10</sup> Petedon tayumbi uebudec Sapida unësapanëdash. Aidtsen unësacsho buanshun aton bënëbëdtabi chococatampanëdash. <sup>11</sup> Adoac aid daëdi unësaid tantiash Esus tantiesatedi Esus tantiaquidobëd comapenec dacuëdcuededpanëdash.

### *Bë-bëaidtedi bëdanaid*

<sup>12</sup> Adashic Sadomonën tacpan caid yacnoësh Esus tantiaquido iccuedednubi Esus chuibenequidon nadatiambocquin nabampanëdash. <sup>13</sup> Adomboen nabansho isash Esus tantiesabo dacuëdec tacpan yacno chotiapimbo yequi: —Esus tantiaquido bëdamboshë iquec —quecuededpanëdash. <sup>14</sup> Adec tabadequi utsi-utsiec dadpen dadabëdi chido Esus tantiaquido yampanëdash. <sup>15</sup> Adec Esus tantiaquid yanshun, Daicsaido Petedon bëdamepec, quequin tantiaquin daicsaido bë-bëshun Petedo capuacno nambededpanëdash. <sup>16</sup> Adembidi dëuequidon Edusaden yacno daicsaid bë-bënubi mayan icsan mëyanaido bë-bëoapanëdash. Aden bë-bëaidtedi bëdampanëdash.

### *Esus chuibenequido tsusiobon quënë nauedmiaid*

<sup>17</sup> Adnubien isadaidbo ancaquidbëd tsusio dapa utsibo saduseyobo caid isec otacquo tabadboedi matses dadpen Esus chuibenequido yacno cho-chosho isash nëishcuededpanëdash. <sup>18</sup> Adec nëishcuededshun Esus chuibenequido bedmeshun quënë nauedmepanëdash. <sup>19</sup> Aid inchëshëmbi Nuquin Papan uaid mayan bëda choshon quënë shëcuë bëtashaid bëcadoquin abitedi puduemec: <sup>20</sup> —Mibi puduemiombique. Nuquin Papa tabadte shubu uashunaid yacno nidtan. Ambo puduedshun Esus tantiaquid uincuentequid chuibanoata —quepanëdash Nuquin Papan uaid mayan bëda.

<sup>21</sup> Badiadnuc Nuquin Papa tabadte shubu uashunaidën puduedshun Esus tantiaquid abi uincuentequid chuibanoaic tabadoapanëdash aitedi. Chuibanubien isadaidbo tsusio dapan abëd icquidobëdtambi tsusio utsi-botedi cho-chomeshun: —Esus chuibanquido bedtan —cac <sup>22</sup> quënë nauedaid puduenushe quequin isquido chuiquid nidshun isquien Esus chuibenequido nibëdec. <sup>23</sup> Adsho isash choaquin: —Quënë shëcuë bëdamboen bëtashquin quënë nauedaid puduenushe quequin isquido shëcuë cuëmano capusho isombi. Shëcuë bëcadoash puduedshun isaquien ënden puduenpuduenac —quepanëdash quënë nauedaid puduenushe quequin isquido chuiquid. <sup>24</sup> Aden chuisho tantiash isadaidbo tsusiobo: —¿Atodain nechitec? —quepanëdash Nuquin Papa tabadte shubu uashunaid isquido chuiquid chiec. <sup>25</sup> Adnubien dada utsi choshon: —Mimbi quënë nauedboedon Nuquin Papa tabadte shubu uashunaid yacnoshon chuibanoasho tantiombi. ¿Ada tantio? —capanëdash. <sup>26</sup> Adoaquien quënë nauedaid puduenushe quequin isquido chuiquid capitán caidën ambi namiaidobëdtan tantiec nidshun bedtanquin bëoapanëdash. Matsesën cuënoten ëbi se-senushe qeshun mëyanenquiocquin Esus chuibenequido bëoapanëdash.

<sup>27</sup> Aden bëquin Nuquin Papa tabadte shubu uashunaid nuntan tsusiobo iccuededacno yuedpanëdash. Bësho isash tsusio dapambo: <sup>28</sup> — Esus chuibenenda, quequin chiambocquidëmbimboen Esus chuibanquin Edusaden yacnocquidtedi mimbi tantiamabanoc. Adoquimbic, Esus unës uaid tsusiobon naid nec, quequin mimbi chuibanoc —quepanëdash tsusiobo. <sup>29</sup> Adsho Esus chuibenequido utsibon tantianubi Petedonuidi: — ¿Matsesën nata caidodabi nedi? Nuquin Papan nata caid icquin nabanembi. <sup>30</sup> Mimbi cuesten dectanquin unës uaondaid Esuquidistu Nuquin Papan padpiden uincuemepanëdash. Nuquin Papa caid tsusedpabon Papa caidquio nec. <sup>31</sup> Esus uincuemeshun aton dayunquio tsadmequin matses bëyucanquin Chuiquid abi yacno matses Puduedmequidquio icmepac. Aden nabanaid isadaidbo aidi abimbo tantiaquid icpashun ma abi icsaid Nuquin Papa bëpiscudpanuna. <sup>32</sup> Esuquidistun nabansho isbempondambi. Adembidi abi unësash uincuenacsho ispondambi. Nuquin Papan Mayan icsaisan Esuquidistu tantiaquidobëd icquidëmbi adomboen ëbitedi tantiameoaic — quepanëdash Petedo.

<sup>33</sup> Aden Petedon chuisho tantiash tsusiobo: —Icsambo iquec —quiash Esus chuibenequido cuesunete bumpanëdash. <sup>34</sup> Adnubien isadaidbo utsi padiseyobo, Nuquin Papan Moises dada uamiampid chuibanquin tantiamequid utsibon bëdamboen isaid, Camadied cuëmëdquidën: —Chiata. Bëboedtedi buantan —cac <sup>35</sup> buanambic: —Icsamboen nanushe qeshun bëdamboen tantiaquiota. Aido cuesunete mibi buneque. Cuesunenushe chiata. <sup>36</sup> Ëndenquio utsi Teyudas cuëmëdquid icpondash. Aidi tsusio dapa icnuequin chuisho tantiash dada dadpen 400ted abëdi capupanëdash. Teyudas cuesuniacsho isash abëd icboedtedi udi nidaniacsho padpiden isenquio icpanëdash. <sup>37</sup> Adashien matses tambanta caid ushëmbi utsi Udas cuëmëdquid Cadidia yacno icnëdaidbëd matses dadpen capupanëdash. Udashen cuesuniac abëd icnëdaidtedi padpidec choenquio yec adecbidi udimbo nidaneapanëdash. <sup>38</sup> Adec umanuc buamboedo chuiquid nibëdanaque. Aidbëd icboedö mishenda. Cuesunemenda. Aidën chuibanaidbëdtabi ambi naid matsesën naiduidtsëqui icnuc badedquio ënëdendac. <sup>39</sup> Aido Nuquin Papan namiac chuisho mimbi ëmetiapimbo iquendac. Nuquin Papa chieshënushe qeshun aido nidmeta.

<sup>40</sup> Aden Camadiedën chiac: —Adonona —qeshun: —Buamboedo bëoata —cac bëacsho cueshcanten cuesmepanëdash. Aden cuestanquin: —Esus chuibanoainquio yec nidtan —qeshun puduemepanëdash. <sup>41</sup> Puduemiatic Esus mëyanaid tantiec nidequi abi chuibansho mëyanaid yec bëdambo iquebi, quec tabadpanëdash. <sup>42</sup> Adshumbic badiadquidën-badiadquidënquien Nuquin Papa tabadte shubu uashunaid yacnoshon matses bëyucanquin chuiquid, Nuquin Papan bëdamboen isaidquio Esus nec, quequin chuibampanëdash aidon. Shubu utsi-utsiec yacno nidshun adomboembidi chuibenepanëdash.

## 6

### *Niante chidobo pete menebanquid icta caid*

<sup>1</sup> Adashic badiadquidën-badiadquidënquiec Esuquidistu tantiaquid dadpen dadpenquiec yanubi isadaidbo quidiecon onqueten onquequido comapenec onquec: —Niantebo menenquiocquin pete mimbi uesquin pepaboc — quepanëdash. <sup>2</sup> Adoaquien Esuquidistu tantiaquid utsibo abi yacno chochomiash Esus chuibenequido 12ted: —Niantebo pemebanuec Nuquin Papan chiaid chuibanquin ëntiapimbo iquebique. <sup>3</sup> Niantebo meneta canuen

nadquidquo istuidshun chuita. Nuquin Papan aton Mayan meniac tantiamic bēdamboec tabadsho mimbi bēdamboen isaidquo istuidta. Adquid 7ted istuidshun, Niante chidobo pete menebanquid icta, cata. <sup>4</sup> Aidedshun nianta pemebanubimbi Nuquin Papa chuido-chuidoendac. Adembidi Nuquin Papan chiaid chuibenendambi —quepanēdash Esus chuibenequido.

<sup>5</sup> Adoaquien: —Mimbi bēdamboen chioc —quepanēdash Esuquidistu tantiaquid utsibo. Aidēn chuibocpadembi aidtedi istuidpanēdash. Nēidic, Nuquin Papan Mayanēn pausunaid, ambi chiacpadomboen Nuquin Papan naindac, quequin tantiaquidquo Esteban cuēmēdquid; utsibic, Uedipe; utsibic, Pēdocodo; utsibic, Nicanod; utsibic, Timon; utsibic, Padmenas; utsibic, isadaidpembo yequi isadaidbo tanquid Antioquiya yacnoshon tishaid Nicodas cuēmēdquid. <sup>6</sup> Aidtedi istuidshun Esuquidistu tantiaquid utsibon aido bēdamboen isquin buanec Esus chuibenequido yacno choash puduedash tabadquin Nuquin Papa chiec onquequimbi dada 7tedi mamishquin, Nēidted bēdamboen nameta, Papa, quequin Esus chuibenequidon chuipanēdash.

<sup>7</sup> Adashic Edusaden yacnoshon Esus chuibenequidon Nuquin Papan chiaid chuiban-chuibansho tantiash utsi-utsiec Esuquidistu tantiaquid dadpen yampanēdash. Adecbidi isadaidbo tsusiobo dadpen bēdamboen tantiash Esuquidistu tantiaquido yampanēdash.

### *Esteban bedaid*

<sup>8</sup> Adnubien Nuquin Papan Mayan meniaidēnquo. ambi comapenen tantiamiaidēnquo, Estebanēn nadatiambocquin ismēbampanēdash. <sup>9</sup> Aden nadatiambocquin ismenuc bēdamboen tantiēnquo yec utsibo comapenec onquecuededpanēdash. Nēidic, Sidene yacnoēsh choquido; utsibic, Adecandedia caid yacnoēsh choquido; utsibic, Sidisia caid yacnoēsh choquido; utsibic, nidaid Asia caid yacnoēsh choquido aidtedi Edusaden yacno choash tabadec Estebambēd comapenec onquepanēdash. <sup>10</sup> Comapenec onquequin Esteban Nuquin Papan aton Mayan meniaid icscho aidēn comapenen tantiamiac onquesho dēniaquec utsibo onquetiapimbo icpanēdash. <sup>11</sup> Onquequin dēniactiapimbo icquin utsibo naden aidon chuipanēdash: —Tsusiobo naden chiec nidtan: Estebanēn nuquin tsusedpa Moises caidēn dada uampidbēdta Nuquin Papan chiampid chuca uain chuisho tantiombi, quequin muaquin chuita. Aden chiacsho mibi piucquid menembi —cac chiec nidpanēdash. <sup>12</sup> Aden chiac tsusiobobēd Moisesēn dada uapampid paquiacquidobēd isadaidbo utsibotedi nēishcuededshun Esteban bedshun tsusiobo iccuededacno buanquin yuedshun ismēpanēdash. <sup>13</sup> Ambo abi dēniactiapimbocquidon Esteban muaquin chuita caboedon naden chuibededpanēdash: —Nēid dada Nuquin Papa tabadte shubu uashunaidbēdta Nuquin Papan Moises dada uamepampid ēnenquiocquin muaquin chuibanec. <sup>14</sup> Naden Estebanēn chioshe. Tanta: Nasaded yacno iccondaidēn, Esuquidistu caidēn Nuquin Papa tabadte shubu uashunaid yuecshun chic-chiquendac. Adembidi nuquin tsusedpa Moises caidēn dada uampid naden nata quequin chiaid natiapimboctequid nec, quequin Estebanēn chuibanosh, quequin muaquin chuipanēdash Esteban dēniactiapimbocquidon chomiaidon. <sup>15</sup> Aden Estebanēn chiaid muaquin chuiquin naimbudquimbi tsusiobobēdtambi comapenen Esteban bēisquin Estebanēn bētantiate ushēbimboec ushumbo yec chēnquesho isbededpanēdash.

## 7

### *Estebanēn chuibanaid*



<sup>1</sup> Adec Estebanën bêtantiatie ushëbimboec chënquesho isec tsusio dapambo Esteban chuiquin: —¿Abimboda mimbi naid chuiposh? <sup>2</sup>—caquien yuecquio onquequin Estebanën naden chuipanëdash: —Chiembique. Tantiaquiota. Tsusedpa Abadauan nidaid Adan caid yacno nidabi yec nidaid Mesopotamia caid yacno tabadsho Nuquin Papan abi uëshëmbo yec dasiuidteniaid matesën istemaïd bëchomaoanquiec icquid Abadauan ismepampic. <sup>3</sup> Aden ismec nadec onquepampic: “Min utsitedi nianec nidaïd utsi yacno mibi ëmbi ismenu caid yacno nidta.” <sup>4</sup> Adsho tantiash Candeyabon nidaïd yacnoësh nidashic nidaïd Adan caid yacno choash Abadauan tabadpampic. Ambo tabadashien aton papa unësan Adan yacno nëbi nuqui tabadbocono Nuquin Papan nuquin tsusedpa Abadauan chomepampic. <sup>5</sup> Aden chomeshun Nuquin Papan naden Abadauan chuipampic: “Nëïd nidaïdën mibi capuacno mitsanapenquio nec. Yuecshun mibi menenun nanuna. Mimbi tishmi-ambochoedi min chidon tishaid abentsëc min madombo nëïd nidaïd menendambi. <sup>6</sup> Nëïd nidaïd bedabi yec mimbi tishmiaïdën tishmiaïd caidaïdo matses utsibon nidaïdën tabadendac. Ambo tabadshobi anocquidën aïdo yuashun seta dadpen 400ted matamequin mëyanendac. <sup>7</sup> Adoacsho aidotsen cuidquin mëyanoaindambi,” quepampic Nuquin Papa. Adashic abi Nuquin Papa onquec: “Min madon tishmiaïd caidaïdo abi mëyanacnoësh nidashic nëïd macuësh yacno choshon ëmbi chiacpadomboen nabanendac.” <sup>8</sup> Aden chuishumbic, Nidaïd menenun nanuna, quequin Nuquin Papan naden Abadauan chuiopampic: “Dada bacuëbëdta dada caniaïdtedi shui dëbid dëtemeta. Adobansho isun, Èmbi chiaïd bëdamboen naquidquïo aïdtedi nec, quequin ismendambi,” quepampic Nuquin Papa. Nuquin Papan chiaïd tantiashun Abadauanën ambia dëtemeshun dadatedi aïdëmbidi shui dëbid dëtemeoapampic. Adoshombic yuecquio icshun Abadauanën aton mado tishmeshun Isac cuënquin 7tedec ushun Isaquën shui dëbid dëtemeoapampic. Adoshombic adëmbidi Isaquën aton mado tishacsho Acobo cuënquin aïdtedecbidi ushun Isaquëntsen Acobon shui dëbid dëtemeoapampic. Adoshombic, canishun Acobon tishmiaïdo 12ted icpampic. Abentse-abentsen tishmeshun aïdtedecbidi ushun aton madon shui dëbid dëtemeoapampic. Adoaquien yuecash Acobon madotedi tsusiobudnepampic —quepanëdash Esteban isadaïdbo tantiamenu quequin chiec.

<sup>9</sup> Aden chiec abi onquec: —Aïd 12ted nuquin tsusedpabo icampic. Acobon mado, chido utsin tishaid, Ose icpampic. Aïdi aton papa cuda-saidquïo icsho isash nëishumbic aton utsibon bedshun piucquid bedquin matses utsi menepampic. Adoac Ose bedboedon Equipito yacno choshon piucquid bedoaquin Equipito yacnocquid Ose meneoapampic. <sup>10</sup> Adoac, Yuanu, qeshun natiamiaïd Ose icsho isun Nuquin Papan aïd dayun uaquin dacuëdenquïo icmequin comapenen tantiaquidquïo bëdamboen chuïquidquïo Ose Nuquin Papan icmepampic. Adquidquïo icsho isun Equipito yacnocquido ancaquidën Padaon caidën Equipito yacnocquido chuïquidquïo Ose icmepampic.

<sup>11</sup> “Yuecash Equipito yacnocquido chuïquid, Ose, icnubi nidaïd Equipito caid yacnocquidbëd nidaïd Canan caid yacnocquido natiambo buncuededpampic. Adnubi nidaïd Canan yacno nuquin tsusedpabo Isadaïdbon pete nibëdquiec yampampic. <sup>12</sup> Adshumbic, Equipito yacno quënë uashun dayun uaid pete iquec, qesho tantiashun Osen papan Acobon ambi tishmiaïdo nuquin tsusedpabo chuïquin: ‘Equipito yacno pete iquec, qesho tantiombique. Bedtan,’ cac Osen utsibo aton papan chiacpadec pete bedec nidaneppampic. <sup>13</sup> Adanec Acobon madotedi aton utsibo Equipito yacno choacsho isun, Min utsi nebi, quequin chienquiocpampic Osen. Aton utsibon

pete bedash abi yacno choashun ambi bedtamboed naimëdsho isun, Padpidemboen bedoatan, cac nidash Equipito yacno choacsho, Min utsi nebi, capampic Osen. Adoshon Equipito yacnocquido ancaquid Padaon yacno buanshun: ‘Con matses isadaidbo nec,’ Ose quesho tantienquiochoedëmbi Padaonën tantiabempampic. <sup>14</sup> Aton utsibo Padaon chuibanshumbic Osen aton utsibo chuiquin: ‘Nuquin pabëdta nuquin matses bedtan,’ capampic. Adoac bedoanec Equipito yacno choapampic. Abëd icquido 75ted icpampic. <sup>15</sup> Adashic, Equipito yacno yuec tabadashi tsusio budashi Acobo unëspampic. Auëshquiobidi nuquin tsusedpabo Acobon madotedi adecbidi unësoapampic. Unësaçsho Equipito yacno chococapampic. <sup>16</sup> Adashic, yuecquio yash Equipito yacnoësh nidquin unësaidon tishmiaid caidaidon aton mëdimbon canite buampampic. Canite buanshumbic Siquen caid yacno nidshun ëndenquimbo matses utsi, Amod caid, piucquid menequin tsusedpa Abadauanën tied bedshunëdacno chococapampic.

<sup>17</sup> Aden chuishumbic Estebanën nadopanëdash: —Equipito yacnoësh tsusedpabo nidabi icnuc Nuquin Papan, Nidaid menenun nanuna, quequin chuipampid ushë chote anoentsëc yanuc nuquin tsusedpabo dadpen yanec caidpampic. <sup>18</sup> Dadpen caidsho isun Equipito yacnocquido ancaquid utsin Ose pado tantienquio icpampic. <sup>19</sup> Aidëmbi mua uaqin chuiquin natiamequin nuquin tsusedpabon dada bacuë tishacsho bedtemaid nec, quequin nemepampic. <sup>20</sup> Adnubien dada bacuë Moises tishacsho Nuquin Papan, Aid bëdaidquio iquec, quequin ispampic. Aidi icucshun ushë abentsëc choaid nidmequin Equipito yacnocquido ismenquiocquin aton mado Moises anin ompopampic. <sup>21</sup> Ompoaqui Moises shubisho tantiashun tsitsan ambi danoshcaidën aton mado acte nantan anin nuntampampic. Aden nuntanambien Equipito yacnocquido ancaquidën champi nesec budquin tsitsanën Moises noadtsëcsho istuidshun bedash, Con mado caimbi, quepampic ancanquidën champi. <sup>22</sup> Bedtsac canitsequi aidën shubu nuntan tabadec Equipito yacnocquid matsesën naid mëquiadec aidën chiaid Moises paquiadpampic. Aden Equipito yacnocquidon naidtedi naquin aidën chiaidtedi Moisesën tantiabenquiopampic.

<sup>23</sup> “Adashic, Equipito yacnocquidobëd tabadquin abi tishaid seta 40ted matamiashic isadaidbon tishmiaido con matses isnu, quianec aton matses chonoadacno nidquin Moisesën istuidpampic. <sup>24</sup> Istuidnubi Equipito yacnocquid dada abentsëcshun isadaidbo dada abentsëc mëyanquin cuesunesho isun Equipito yacnocquid cuidnuequin Moisesën cuesuneoapampic. <sup>25</sup> Embi adoshu isun, Equipito yacnoësh nuqui bëyucanquin buanquid Moises nendac, quequin con matsesën tantiapatsiash, abibi quetsëcquieç nidnubi aton matsesën tantienquio icpampic. <sup>26</sup> Badiadash aton matses yacno padpidec nidquin aton matses daëd cuesnansho istuidshun, Emenu, abibi quec choquimbi: ‘¿Atotsi quec min matsesbëd cuesnane?’ Moisesën catuidpampic. <sup>27</sup> Adoaquien Moises cuëscatanec: ‘¿Embi nasho cuidquin ëbi chuiquid tsuntsin mibi icmioshe? Chui. Tantanu,’ quetanequi: <sup>28</sup> ‘¿Equipito yacnocquid mimbi cuesunebocpadenda ëbitsen cuesune?’ quepampic cuesnanquid Moises caic. <sup>29</sup> Aden chuisho tantiashien, Equipito yacnocquido ancaquidën tantianushe quianec dacuëdec Equipito yacnoësh Moises cuempampic. Adec cuenashi nidaid utsi Madian caid yacno nidash tabadpampic. Ambobi tabadquin chido bedshun dada bacuë daëd tishmepampic Moisesën.

<sup>30</sup> “Adashic, seta dadpen 40tedbidi matamec nidaid Madian caidën tabadec cuëtempuidquio yacno matses nibëdquieç yacno macuësh dapa Sinai caid anoentsëqui Moises chopampic. Ambobi tabadquimbi cuëtemp

nëdënquiacbimboecquid nënantanquio Nuquin Icbon Chomiaid tabadsho Moisesën ispampic. <sup>31</sup> Aid istanequien tantiadempamboctequid nepanushe. Isbono, quianec anoentsëqui Moises chosho Nuquin Icbon naden chuipampic: <sup>32</sup> ‘Min tsusedpa Abadauanën Papa cain cuënaid nebi; min tsusedpa utsin Isaquën Papa cain cuënaidbidi nebi; min tsusedpa utsin Acobon Papa cain cuënaidbidi nebi,’ quesho tantiash dacuëdec uëdëquec istiapimbo yec Moises nidtuidpampic. <sup>33</sup> Nidtuisho isec Nuquin Icho Moises chiec nadpampic: ‘Nëmbo ëbi icsapenquio icquid icnuc caputemaid nidaid iqueque. Min tapucudte chicshun tantiata. <sup>34</sup> Min matses ëbi cudasaido Equipito yacnocquidon mëyanac uëshquec shubiquiosho tantiashun aido Equipito yacnoshon buanta mibi canuec chobi. Nëbi Equipito yacno mibi nidmeoaimbi,’ quepampic Nuquin Icho Moises chiec.

<sup>35</sup> ‘Aden cuëtempa nëdënquiacbimboecquid nënantanquio icboedën Nuquin Papan Chomiaidën isadaidbo bëyucanquin buanquid icta cac: ‘¿Ëmbi naid icsho cuidquin ëbi chuiquid tsuntsin mibi icmioshe? Chui. Tantianu,’ abi caondaido bëyucanquin buanquid Moises icpampic. <sup>36</sup> Adquid Nuquin Papan icmiac Equipito yacnoshon aton matses bëyucanquin buanun Moisesën nadatiambocquin ismepampic. Adoshombic, isadaidbo buanquin Acte Piu yacnoshontsen nadatiambocquin ismeoapampic. Adoshombic, matses nibëdquiec yacno seta dadpen 40tedbidi matamec abi tabadcueniacnoshontsen nadatiambocquin nabanquin isadaidbo Moisesën ismeoapampic. <sup>37</sup> Aidëmbi naden chuipampic: ‘Yuecquio icshun ëbipadquid mimbi tishmiaidën tishmiaidon caidaid Nuquin Papan chuiquidquo icmendac,’ quequin Moisesën chuipampic. <sup>38</sup> Isadaidbo bëyucanquin chuiquid Moises matses nibëdacno isadaidbobëd macuësh dapa Sinai caid yacno choash Nuquin Papan chomiaidobëd Moises tabadpampic. Ashunquio Nuquin Papan abëdi tabadte tantiamenuequin cuënote pada-padambocquidën ambi naden nata quequin dada uaid Moises menepampic. <sup>39</sup> Aden aid dada uaid bedshun bëyucanquin chuisho tantiesa yanec nuquin tsusedpabo Moises bunenquio yec Equipito yacno nidoate bumpampic. <sup>40</sup> Adashic, Moises macuësh yacno yuecquio tabadnubi Moisesën utsimbo Adon cuëmëdquid aton matses utsibon naden chuibededpampic: ‘¿Moises nuqui Equipito yacnoshon bëyucanquin bëboed mitsi nidpash nec? Nibëdpequien iquec. ¿Atotsi quec nidpash? Nuquin Papan uacpadquiocnoc nacenata. Nacnenash bëyucanquin chuiquid aid iquendac,’ tsusedpabon cac <sup>41</sup> bacan bacuëbimboecnuc Adonën nacenpampic. Ambi nacenaid tantiaquin isadaidbon nidaidën capuquid yua cuesuneshun cuëdënëmbededpampic. <sup>42</sup> Adquid cuëdënësho tantiash isadaidbobëd ictiapimbo iquec Nuquin Papa, Padi. Adenda, quenquio icpampic. Adquido Nuquin Papan ëndenquimbo tantiaquin naden chuipampic: ‘Adomboen mimbi nacenaid tantiec tabad.’ Adembidi Nuquin Papan yuecquio icshun nanun chiaid isadaidbo chuiquin naden dada uamepampic:

‘¿Matses utsi nibëdquio yacnoshon seta dadpen 40ted matamequin ëbi tantiaquina nidaidën capuquid yua cuesuneshun pambid tauidenio? Padenquio.

<sup>43</sup> Ëmbi uaid badiadën ushë, ëbitedishun bëyucamembi, qeshun aidpadquid nacenashun Modoc cuënquin aton shubumpi nuntan namposh.

Aidbëdtabi uispa dapatsen ëbitedishun bëyucamembi, qeshun aidpadquidbidi nacenashun Dempan cuë nec danëshën sebudec shuebudshun, Mibi tantiaquid nebi, quequin adquid mimbi chuipoc.

Aden nasho isun ëmbi menenu caid nidaid yacno mibi nidmenquio icquin nidaid utsi, Babidonia caid udi mibitedi nidmeoaindami.’

Aden ambi chiaid niacquido isadaidbo tantienquio icquidobi Nuquin Papan chuipampic —quepanëdash Esteban isadaidbo chiec.

<sup>44</sup> Aden chiec yuec onquebudec: —Matses utsi nibëdacnombo nidanequin tsusedpabon Nuquin Papa tabadte chicbanshun buampampic. Aidëmbi Moises ismiacpadembi isadaidbon Nuquin Papa tabadte shubu uashumpampic.

<sup>45</sup> Adashic, tsusedpabo aid shubu uaquidotedi unësan ambi tishmiaidontsen aid shububidi adomboembidi chicbanshun buanoapampic. Adoshombic, isadaidpembo utsi-utsien cuemenu, quequin aidon nidaid yacno aid shubu chicbanaid bëshun bëyucanquid Osue cuëmëdquidbëdtan nuquin tsusedpabon aid nidaid nënantanquio shubu uaoampic. Aden aid shubu nacnenanubien isadaidbo chuiquid dapa nuquin tsusedpa Dabid yampampic. <sup>46</sup> Aidi Nuquin Papan bëdamboen isaidquio aid nidaidën tabadquin Nuquin Papa tabadte buantiapimbocquid shubu uashuntiadquiocquin shubu uate bë-bëmepampic. <sup>47</sup> Aid shubu uabi Dabid unësambic ambi tishmiaidën, Sadomon cuëmëdquidën, Nuquin Papa tabadte nainquin shubu uashumpampic. <sup>48</sup> Aden matsesën shubu uaidën Nuquin Papa tabadenquio iquec. Adembidi Nuquin Papan chuimianiaidën naden chuipampic:

<sup>49</sup> “Abutenquioibi con tsadte dapa iquec. Adecbidi nidaidtenquioibi ëmbi tincatequid nendac.

¿Adquid icnubidabi matsesën nidaidën shubu uashun tabadmepadic?  
¿Nidaidënuidi tsadpectabi tiboquendac?

<sup>50</sup> ¿Tauaquioquimbi abitedi uambodambi ictionda?”

quequin Nuquin Papan chuimiaiidën dada uapampic —quequin chiashic Esteban abi onquec: <sup>51</sup> —Pacuënëdacbimboen Nuquin Papan chiaid tantiash icsaquin ënesa mibitedi nec. Aton Mayanën tantiamenu cac tsusedpabotedishun chieshëmpampicpadembi mibitedishun chieshënoaic. <sup>52</sup> ¿Nuquin Papan ambi yuecquio icshun naden nanuna quequin chiaid ambi chuimiaiidtedi min tsusedpabon mëyanenquioda icpampic? Adembidi, Nuquin Papan chomiaid choendac, quequin chuiquido tsusedpabon cuesunepampic. Aidon nacpaden Nuquin Papan chomiaid mibitedishun unës uamiondac. <sup>53</sup> Nuquin Papan chiaid ambi uaidon mayan bëdabon meniaqui Nuquin Papa chieshënquido mibi nec —quepanëdash Esteban isadaidbo chuiquin ënec.

### *Esteban se-siaid*

<sup>54</sup> Adec Esteban onquesho tantiashun nëishënshun Esteban iccuededquidon chushcapanëdash. <sup>55</sup> Adoaquien Nuquin Papan Mayan meniaidquio icquin Estebanën abuc isquin Nuquin Papa uëshëmbo yec matsesën istiapimbo bëchomaoanquiec ictequid abichobi dasiuidteniaid chënquenubi Nuquin Papabëd tancandaëdquiec Esuquidistu nidtuidsho ispanëdash. <sup>56</sup> Aden isequi: —Abuc shëcuë uaid shëcniaye. Is. Umbo Esuquidistu, matsesondaid, Nuquin Papabëd tancandaëdquiec tsadsho isembi —quepanëdash Esteban.

<sup>57</sup> Adsho tantiash tsusiobo comapenec sidquianec pamumëdanec titinquen Esteban bedshun <sup>58</sup> cuënoten se-senuen shubu nibëdacno udi buampanëdash. Aden Esteban buanshun aton dashcute Saudo cuëmëdquidën taëno sampanëdash Esteban se-senuequidon. <sup>59</sup> Sanshun se-siaquic Estebanën Esuquidistu cuënquin naden chuipanëdash: —Ëbi yued, Icbo —quiashic, <sup>60</sup> danëshën sebudash comapenec nadec onquec: —Ëbi se-sequido icsaid cuidenquio yec bëpiscudta, Icbo —quepanëdash. Adec onquetanec Esteban unësapanëdash.

## 8

*Saudon Esus tantiaquido mëyanaid*

<sup>1</sup> Esteban se-senu caquien, Ai, adota, quiash isec uano Saudo tsadpanëdash. Esteban se-siaid ushëmbi Edusaden yacnoshon Saudon Esus tantiaquid utsi-utsien comapenen mëyanquin tauadopanëdash. Adosho isash Esus chuibenequido ambobi tabadnubien Esus tantiaquid utsibo nidanec uano-uanoec nidaid Udeya yacno utsi-utsiec choash tabadnubien Samadia caid yacno choash utsibo tabadoapanëdash. <sup>2</sup> Adnubien Nuquin Papan chiacpadomboen naquin Esteban chococaic comapenec sedenquec shubipanëdash. <sup>3</sup> Adnubien Saudon Esus tantiaquidtedi naimbudte bunquin shubu utsi-utsiec yacnoshon dadabëdtabi chido chedo bedmeshun quënën nauedmepanëdash.

*Samadia yacnoshon Esus chuibanaid*

<sup>4</sup> Adashic Edusaden yacnoësh nidanec shubu dadpen icquid utsi-utsiec yacno choshon abi tantiaquidon Esus chuibenepanëdash. <sup>5</sup> Adembidi niente chidobo aton na nibëdsho menequid, Uedipe cuëmëdquid nidaid Samadia caid yacno choshon adembidi Esus chuibanoapanëdash. <sup>6</sup> Aidën nadatiambocquin nabanquin Esus chuibansho ambocquido iccuededquin bëdamboen tantiapanëdash. <sup>7</sup> Aidëmbi nadatiambocquin nabanac mayan icsa dapudedaid icboedi mayan icsa sidquianec cuempanëdash. Adechidi canite icsaidbëdta caputiapimboquid dadpen bëdampanëdash. <sup>8</sup> Adsho isash Samadia yacnoquido, Bëdambo iquebi, quec tabadpanëdash.

<sup>9</sup> Adnubien Samadia yacno ënden chondaid, Nadatiambocquin nabanquid dapa nebi, quequin mayan icsan tantiamiacpaden Simon cuëmëdquidën nabampanëdash. <sup>10</sup> Adosho isash: “¡Eee! Abimboshenda caposh. Nëid dada Nuquin Papan ambi nadatiambocquin nabante tantiamiaid nec,” quequin anocquidobëdtan abi chuiquidon comapenen tantiapanëdash. <sup>11</sup> Aden yuen Simonën ismiac, Isnuequid dadpen badiadquidën-badiadquidënquiec abi yacno choash iccuededpanëdash. <sup>12</sup> Adnubien, Nuquin Papa yacno puduedmianquid Esus nec, quequin Uedipen chuibansho tantiaquid yampanëdash dadabëdi chido chedo. Adsho aidtedi acten mentomepanëdash. <sup>13</sup> Simontsen: —Esus tantiaquid nebi —quesho acten mentoquid Simon Uedipebëd capuquimbi Uedipen nadatiambocquin nabansho isun, Adopenshenda nabanc, quequin ispanëdash Simonën.

<sup>14</sup> Adashic yuecash Samadia yacnoquido Edusaden yacno nidash nadpanëdash: —Nuquin Papan chiaid Samadia yacnoquidon tantiabedec. Aden chuisho Esus chuibenequidon tantiashun Uambëdta Petedo Edusaden caid yacnoësh nidaid Samadia caid yacnoshon nidmepanëdash. <sup>15-16</sup> Adec aid daëd nidaneshun: —Esus tantiaquid acten mentoaidouidi nëidtedi nec —anocquido quesho tantiashun: —Nëidtedi min Mayan mene, Papa —quec onquequin <sup>17</sup> Petedobëdtan Uanën mëdanten Esus tantiaquido mamishbampanëdash. Aden mamishbanubi aidtedi Nuquin Papan aton Mayan menepanëdash.

<sup>18</sup> Aden Petedon nasho isash Simon: —Ma adquiec mëquiadneshun mibi piucquid menenu. <sup>19</sup> Mimbi matses mamishacpadembi ëmbi mamishaidtedi ma Nuquin Papan Mayan meniaid icpanuna —quepanëdash.

<sup>20</sup> Adoquien Petedo: —¿Piucquid menecta mibi mëquiadpe? Adoquin mimbi tantianuc tauiantiadpambo chian anëdënquiacno ma mibëdi min piucquid icpanu. <sup>21</sup> Mimbi Nuquin Papan chiaid icsamboen tantiaquin ëmbi nacpadomboen natiapimbo mibi iquendac. <sup>22</sup> Mimbi icsamboen tantiaid ënta.

Aden icsaid ěnsho isash Nuquin Papa mibi icsaid bĕpiscudendac. <sup>23</sup> Mayan icsan yua icquin tactau tishidaid mishaid mucambo yacpadec icsamboen mimbi muaquin chuibanaido icsaindac.

<sup>24</sup> Adoaquien: —Ēbi tauiantiadpambo chian anĕdĕnquequid nĕnenushe quiash mibi Uambĕd Nuquin Papa chiec bĕdamboec onquebudneta — quepanĕdash Simon.

<sup>25</sup> Adec Samadia yacno tabadquin Petedobĕdtan Uanĕn: Esus ispondambi, queded-quededquin Nuquin Papan chiaid chuibanashic Edusaden yacno nidquimbi utsi-utsiec yacnoshontsen chuioapanĕdash aidĕmbidi.

*Uedipe Etiopia caid yacnocquidbĕd icaid*

<sup>26</sup> Adoshombic, Samadia yacno Uedipe icsho Nuquin Papan uaid mayan bĕdan nadopanĕdash: —Nĕuĕshquio puduanec nidec Edusaden datambidanec acte dapa yacno shubu dadpen icquid Casa caid yacmi matses nibĕdacno podquedĕn nidash nidtuidtanec chotan.

<sup>27</sup> Adoac nidtoanec nidquimbi Nuquin Papan uaidĕn mayan bĕdan chui-bocno choquin Etiopia caid yacnoĕsh choquid Uedipen bĕquedtuippanĕdash. Ancanquid chido Candase cuĕmĕdquid aton na dayun uashunquid aid dada nepanĕdash. Aidi Edusaden yacno nidash tabadquin Nuquin Papa chianec

<sup>28</sup> padpidec Etiopia yacno nidequi aton nidaid cano cabayon nimbanubi antsadtoshon Nuquin Papan chiaid dada uamepampid isec onquequin chuibanec tsadpanĕdash. <sup>29</sup> Adnubien Nuquin Papan Mayanĕn: —Nidaid cano chinunta —cac <sup>30</sup> Uedipen titinquequin chinumpanĕdash.

Aden Etiopia yacnoĕsh choquid dada uaid isec onquesho isash: —ĴIsbanec onquequinda tantiaquie? —quepanĕdash Uedipe.

<sup>31</sup> Adoaquien: —Tantiamequid nibĕdnuc Ĵmitsipadentsimbi tantiape? Ēbĕdi antsadtoec cho —cac Uedipe abĕdi antsadtapanĕdash.

<sup>32</sup> Aidbĕdi antsadtoshon Etiopia yacnoĕsh choquid Nuquin Papan dada uamiampid isec onquesho Uedipen naden tantiapanĕdash:

“Obeca cuesunenuen nimbambocpadomboembidi mĕtaneshun nimbanoa-posh Nuquin Papan chomiaid unĕs uanuequin.

Adecbidi obeca bacuĕ abi datasnuequid icnuc cuĕdenquio yacpadec abi unĕs uanuequid icnuc cuĕdenquio icoaposh Nuquin Papan Chomiaid.

<sup>33</sup> Aidi Icsaisa icsho mĕyansho isec, Icsambocquidta neque. Isnu, quenquioc-posh aton matses.

Aidi chido inesa yec ambi tishmiaid nibĕdnuc ĴTsuntsin ambi naid chuipadic?”

<sup>34</sup> Aidtedtsĕqui abi isec onqueboed Uedipe ismeshun Etiopia yacnoĕsh choquidĕn: —Ēbi isec onqueboed Ĵmitsicquid chiequini onquepo? ĴAbibi chiadaidtabi isec onquepo? ĴUtsida chuibaneque? Ēbi chui. Tantanu —capanĕdash Etiopia yacnoĕsh choquidĕn Uedipe chuiquin.

<sup>35</sup> Adoaquien, Matsestedi icsaid bedshunash abided cuidadec Esus unĕsaid Nuquin Papa yacno puduedmianquid nec, quequin dada uapampidĕn chiec, quequin Etiopia yacnoĕsh choquid tantiamenuen chuibampanĕdash Uedipen.

<sup>36</sup> Adoanec nidquimbi Etiopia yacnoĕsh choquid Esus tantiaquid yanshun actempi istuidshun: —Actempi iqueque. Is. ĴAdabi mentoe? —capanĕdash.

<sup>37</sup> Adoaquien Uedipe: —Esus tantiaquidquio nebi, qesho mibi acten mentono —capanĕdash.

Adoaquien: —Nuquin Papan mado Esuquidistu nec, quequin aid tantiaquid nebi —qeshun Etiopia yacnoĕsh choquidĕn: <sup>38</sup>—Nidtuid —cac nidaid cano nidmequidĕn cabayo nidtuidmian acte budshun Etiopia yacnoĕsh

choquid Uedipen mentopanēdash. <sup>39</sup> Adashic, acte nantanuēsh abi daēdi dectatosho Nuquin Papan Mayanēn Uedipe buampanēdash. Adoac Uedipe padpiden isenquio yequi, Esus tantiec bēdambo iquebi, quec Etiopia yacno nidoapanēdash.

<sup>40</sup> Adnubien Uedipe Nuquin Papan Mayanēn nidaid utsi Asoto caid yacno buampanēdash. Ambo capucuenequin shubu dadpen icquid yacno-yacnomboen Esus chuibēec onquec choequi shubu dadpen icquid Sesadeya caid yacnotsen choapanēdash.

## 9

### *Saudon tantiate paucaid*

<sup>1</sup> Adnubien Edusaden yacnoēsh Esus tantiaquid utsi-utsiec nidanenubien Saudo Edusaden yacno tabadpanēdash. Ambo tabadec chushquec Esus tantiaquidtedi cunesunemetiadquio yec isadaidbo chuiquid dapabo yacno Saudo choash <sup>2</sup> shubu dadpen icquid yacno-yacnomboec nidshun Esus tantiaquido bedmeshun tanemeshun Edusaden yacno bēmete bunebi. Damasco caid yacnoshontsen adote bunebi. ¿Ada mimbi adota quequin dada uashun ēbi menetsia? Mimbi adota, quequin dada uaid bedshun Damasco yacno nidshun ismiac anocquido chuiquid adota queoatsiash, quequin Edusaden yacnoshon Isadaidbo chuiquido chuipanēdash Saudon.

<sup>3</sup> Aden chiac dada uaid bedash Edusaden yacnoēsh puduanec nidec Damasco anoentsēqui yanshobi abucuēsh bed-bedquequin Saudo dēcatepanēdash.

<sup>4</sup> Aden dēcatiac Saudo paēdash uestho isun naded abucuēsh onquec: —Saudo, ¿atotsieshun ēbi tantiaquido mimbi mēyampeba? Ēbitsen mēyantiadpambocquin mimbi aido mēyanec —quepanēdash.

<sup>5</sup> Adoaquien: —Icho, ¿Tsutsi mibi ne?

<sup>6</sup> Adoaquien: —Mimbi mēyanaid Esus nebi. Ēmbi chiaid chieshēnec mibi tabadeque. Nidtoash Damasco yacno nidtan. Anoshon ēmbi nata cacpadomboen anocquid mibi chuimembique. Nidtan.

<sup>7</sup> Adec abucuēsh onquenubi Saudobēd cho-choquido nidtuidshun tantiequi onquequid isenquio yec tabadtuidpanēdash. <sup>8</sup> Onquec ēnēdan nidtoash Saudo istiadquio iquequi bēshupanēdash. Adsho isun mēdinanquin Damasco yacno buampanēdash. <sup>9</sup> Adequi Damasco yacno choash 3tedec ushec isenquio yec buna mēmunquec Saudo tsadpanēdash.

<sup>10</sup> Adashic, Saudo puduedash tabadacno ēdibicstēc tabadquid Esus tantiaquid Ananias cuēmēdquid icpanēdash. Aid usho Esusēn: —Chuinu. Tanta —caquien:

—¿Atoda? Nēbi uebi, Icho —quepanēdash Ananias.

<sup>11</sup> Adoaquien: —Nidtoash podqued cuembocquid caid yacno nidtan. Ambo choash Udasēn shubun puduedshun shubu dadpen icquid Tadso caid yacnoshon tishaid Saudo cuēmēdquid Nuquin Papa chiec onquec tsadsho mimbi istuidendac. <sup>12</sup> Adec aid ushacimboec tsadsho mibi choshon aidi padpiden ismenuen mimbi mēdanten mamishac isoshe. Aidi istan —capanēdash Esusēn.

<sup>13</sup> Adoaquien: —Con matses dadpenshun Saudon naid icsa chuibansho tantiombi, Icho. Aidēmbi Edusaden yacnoshon mibi tantiaquido mēyamepac caoshe. <sup>14</sup> Aidbidi Edusaden yacnocquido chuiquid dapanquio dada uaid sananquin nēmbotsen mibi tantiaquido bedmeshun tanemenuc aidi chopac caosh —quepanēdash Ananias Esus chiec.

<sup>15</sup> Adoaquien: —Aidi ēbi chuibeneta caidquio icmeshun ēmbi bēdamboen isaid neque. Aid dacuēdēnenquio yec nidshun istanta. Aidēn isadaidbo abi

chuiquidobēdta isadaidpembo abi chuiquidobēdtabidi ēbi chuiben-chuibene capuendac. <sup>16</sup> Ēbi chuibenesho mibi mēyantequid iquendac, quequin Saudo tantiamembi —quepanēdash Esus.

<sup>17</sup> Adsho tantianec Ananias nidash Udasēn shubun puduedshun Saudo mamishec: —Con utsi, mibi podquedēn chosho chuiquidēn Nuquin Icbonquio, Esusēn mibi padpiden ismenuen Nuquin Papan Mayan mibi menenuembidi chomiaid nebi —quepanēdash Ananias Saudo chiec.

<sup>18</sup> Aden Ananiasēn chuinubi nuēcquid bitsibimboecquid ēshēnuēsh paēdnubi bēshuacboedēmbi, Saudon, bēdamboen ispanēdash. Aden isec capusho isun acten mentopanēdash. <sup>19</sup> Adecbidi Saudo penquio yec padishacboedi piash padpidec uidēncuenoapanēdash.

### *Damasco yacnoshon Saudon Esus chiaid*

<sup>20</sup> Adec uidēncuenash Saudo Esus tantiaquidobēd tabadpanēdash. Ambo tabadec Nuquin Papan chiaid chuibante shubu yacno nidshun: —Esuquidistu Nuquin Papan madombo nec —quequin chuipanēdash Saudon.

<sup>21</sup> Aden chuisho tantiash tantiadempambo yec tabadec: —¿Edusaden yacnoshon Esus tantiaquido mēyameboedida nec? ¿Adecbidi nēmbo choshon tanemeshun isadaidbo Edusaden yacnocquido chuiquid dapabo yacno buamenuc choabida ictic? —quepanēdash Damasco yacnocquido.

<sup>22</sup> Aden anocquidon tantianubi Nuquin Papan Mayanēn oncamiac Pabadon, Nuquin Papan Chomiaidquio Esuquidistu nec, quequin isadaidbo tantiamenuen Nuquin Papan chiampid Saudon comapenen chuided-chuidedpanēdash.

### *Isadaidbo Esus tantiesa abi cuesunete bunsho isash Saudo cuenaid*

<sup>23</sup> Adembidi yuec ushquin Saudon ēnenquiocquin chuibansho tantiash, Icsamboen chiec, quiash isadaidbo utsibo yec abi cuesunete bunsho isun tantiaquidēn chuisho Saudon tantiapanēdash. <sup>24</sup> Adnubien Saudo cuesunenuen shubu dadpen icquid abichobi tsicatequin daquēnē uaidēn shēcuē cuēmanoshon abi chieshēnquidon caimpanēdash Saudo puduensho bednu quequin. <sup>25</sup> Aden cainsho isun Saudo cuesunenushe queshun chiac inchēshēmbi onquenuiocquin tsitsan dapan Saudo antsaduntanquin tsicatiaid quēnē cachoc Saudo budmepanēdash.

<sup>26</sup> Budanec Saudo Edusaden yacno nidoash Esus tantiaquidobēd tabadnuesho isash, Saudon mua uaqin ēbi bednushe quiash dacuēdcuededpanēdash aido. <sup>27</sup> Adnubien, Saudobēd Esus tantiaquid utsitedi yacno choshon Bednaben yuedpanēdash. Aden yuedshun: —Saudon Damasco yacno nidquin Nuquin Icho ispac caosh. Nuquin Icho Saudobēd onquepac caosh. Adanec Damasco yacno choshon dacuēdenquiocquin Esus chuibampac caosh, quequin Saudon naid Bednaben chuibampanēdash.

<sup>28</sup> Aden Bednaben chuibanac Esus tantiaquido Saudo dacuēdenquiocnobi aidobēdi capuquin Saudon anoshombidi Esus chuibanoapanēdash.

<sup>29</sup> Ambo capuquin isadaidbo quidiecon onqueten onquequido istuidshun Saudon adembidi Esus chuibanacsho tantiashun aid cuesunenuquin aidontsen cainoapanēdash. <sup>30</sup> Aden Saudo cuesunenuen, cainec quesho tantiashun Sesadeya caid yacnoshon Esus tantiaquidon Saudo buanshun abi tishondacno Tadso caid yacno Saudouidtsēqui nidmepanēdash.

<sup>31</sup> Adashic Saudo nidmian cuesunenushe quenquio yec Esus tantiaquido nidaid Udeya caid yacnocquido yec nidaid Cadidia caid yacnocquido yec nidaid Samadia caid yacnocquido yec quec dacuēdenquio yec tabadpanēdash. Adec tabadquin, Nuquin Papan chiaid tantiabenu, quesho Nuquin Papan Mayanēn adomboembidi tantiamiac bēdamboec tabadpanēdash. Adec



tabadquin Esus chuisho tantiesa icboedi Esus tantiaquid dadpenquoio yampanēdash.

*Petedon Ananias Dodcastsen bēdamiaid*

<sup>32</sup> Adnubien, utsi-utsien isbidanec nidequi Dida caid yacnotsen Esus tantiaquid utsibo isec Petedo nidoapanēdash. <sup>33</sup> Ambo choshon dada, Eneyas cuēmēdquid, seta dadpen 8ted matamec canite tsasiaid Petedon istuidshun: <sup>34</sup>—Esusēn mibi bēdamiaque. Nidtochon min uete buanun nacnenta, Eneyas —Petedon cac Eneyas badedquoio nidtoash capupanēdash. <sup>35</sup> Eneyas capusho isash Dida yacnocquidobēdi nidaid Sadon caid yacnocquido Esus tantiaquid yampanēdash.

<sup>36</sup> Adnubien Dida uditsēc shubu dadpen icquid Ope caid yacnocquid, Esus tantiaquid utsi, chido, Tabita cuēnshumbi quidiecon onqueten Dodcas cain cuēnaid tabadpanēdash. Aidi bēdambocquid icquin badiadquidēnbadiadquidēnquien pete nibēdquido menedenepanēdash. Adembidi aton na nibēdquido Dodcasēn menedenepanēdash. <sup>37</sup> Aidi Petedo Dida yacno icnubi icsabudec unēso isun abēd icquidon dapanshun shubu abuc quēnē icquidēn nampanēdash. <sup>38</sup> Aden nanshun, Petedo Dida yacno tabadec, qesho tantiaashun aid chomenuequin dada daēd Petedo tabadacno nidmiac aid daēdi Petedo tabadacno choshon Dodcas unēsboed chuishun: —Nidtuidenquoio yec badedquoio ēbēdi cho —cac <sup>39</sup> abēdi badedquoio Ope yacno Petedo nidpanēdash. Adec nidec Ope yacno chosho isun abuc quēnē icquidēn puduedmepanēdash. Ambo puduedsho isun shubiquimbi niantebon Dodcasēn tuscaboed dashcute dadpen Petedo ismepanēdash.

<sup>40</sup> Adosho isun abitedi puduemiash danēshēn sebudash Nuquin Papa chiec onquetanec nidtochon unēsboed isquin: —Nidto, Dodcas —Petedon cac uincuenequi Petedo isec Dodcas badedi uētsēdtopanēdash. <sup>41</sup> Uētsēdtocho isun mēdinquin nidtomeshun niantebobēdta Esus tantiaquid utsibo cuēnquin chochomeshun uincuemboed ismepanēdash. <sup>42</sup> Aden Dodcas ismesho isash aton shubuno nidanequin Dodcas uincuenaid chiac Ope yacnocquido dadpen Esus tantiaquid yampanēdash. <sup>43</sup> Adnubien Petedo Ope yacnocquid nidaidēn capuquid bitsi uashun chodcashun nacnenquid Simombēd yuec Petedo tabadpanēdash.

## 10

*Petedo Codnedion chomiaid*

<sup>1</sup> Adnubien shubu dadpen icquid Sesadeya caid yacno Codnedio cuēmēdquid isadaidpembo nidaid Itadia caid yacnoēsh Sesadeya caid yacno choash tabadpanēdash. Aidi sondado dadpen 100tedi chuiquid icpanēdash.

<sup>2</sup> Aidi aton shubun icquidobēdi Nuquin Papa tantiaquid icquin isadaidbo aton na nibēdquid icsho isun menebanquid icpanēdash. Adecbidi Nuquin Papa chiec onquianedenepanēdash. <sup>3</sup> Adquid yec ushē budtsambi tedes yanuc Nuquin Papa chiec onquequimbi ushacbimboecquin Nuquin Papan uaid mayan bēda Codnedion ispanēdash. Nuquin Papan uaid mayan bēda choshon: —Codnedio —capanēdash.

<sup>4</sup> Adsho tantiaash dacuēdquin comapenen isec: —¿Atotsibi name, Icho? —quepanēdash Codnedio.

Adoquien: —Abi chiec mibi onquedenesho Nuquin Papan tantiec. Adem-bidi aton na nibēdquid tantiaquin menedenequid mibi icsho Nuquin Papan bēdamboen isaid mibi neque. Chuinu. Tantiata. <sup>5</sup> Nēbi Simon cuēnshumbi Petedo cuēnoaid ma bednu mimbi namiaido Ope yacno nidmetan. <sup>6</sup> Simon utsi nidaidēn capuquid bitsi uashun chodcashun nacnenquidbēd tabadec.

Aidën shubu acte cuëmambi iquec —quepanëdash Nuquin Papan uaid mayan bëda Codnedio chiec.

<sup>7</sup> Aden chianec Nuquin Papan uaid mayan bëda nidambi Codnedion aton yua daëdbëdta sondado abentsëc chomeshun <sup>8</sup> Nuquin Papan uaid mayan bëdan chuibocpaden Petedo bedmenuen ambi namiaido Codnedion nidmepanëdash.

*Petedon ushacimboec tsadquin isaid*

<sup>9</sup> Adashic, ushë cuembocnoc Ope anoentsëqui Codnedion nidmiaido chonobi Petedo Nuquin Papa chiec onquenuec shubu macano pada-padapambocquid yacno dectatopanëdash. <sup>10</sup> Adec dectatoash shubu icbon codocanubi Petedo bundoec ushacimboec tsadquimbic <sup>11</sup> abu posonianec abi yacmi dabidiete dapabiecquid bucun dënëshbudcuenaid budsho Petedon ispanëdash. <sup>12</sup> Aidënquoio ambi petequid ambi petemaid chedo nidaidën capuquid tacbidën capuquidbëd podochoquid chedo antabëdpanëdash. <sup>13</sup> Adnubien: —Nidtoson cuesuneshun pe, Petedo —capanëdash abucuësh onquequin.

<sup>14</sup> Adoaquien: —¿Abida cai? Ëmbi petemaid tauishun mibi shëdmetemaidquoio antabëdquid nec. Adquid piamboccombi, Icbo —quepanëdash Petedo.

<sup>15</sup> Adoaquien padpidec abucuësh onquec: —Nuquin Papan bëdambo icmi-aid icsambo iquec cainda —quepanëdash. <sup>16</sup> Adotanquimbic antabëdquid abuc buanshun adomboembidi abentsëc chotsëcnuc budmequin ademibidi Petedo chuishun abuc shëcuë uaid yacno badedquoio buanshun puduedmeoapanëdash.

<sup>17</sup> Adosho isash Petedo ambi isboed tantiec tsadnubi Codnedion chomiaido Simonën shubu istuidash shëcuë cuëmano choec nidtuidpanëdash. <sup>18</sup> Choec nidtuidash: —¿Nëmboda Simon Petedo tabadec? —quetuidpanëdash.

<sup>19</sup> Aden chuituidnubi ambi isboed tantiec Petedo tsadsho Nuquin Papan Mayanën: —Dada abentsëc chotsec choshon mibi nibë nec. <sup>20</sup> Ëmbi chomiaido neque. Budash cacuidenquoio yec aidobëdi nidtan —capanëdash.

<sup>21</sup> Aden chiac budshun Codnedion chomiaido isash: —Mimbi nibënaid nebi. ¿Atotsi quec cho? —quepanëdash Petedo.

<sup>22</sup> Adoaquien: —Codnedio cuëmëdquidën chomiaid nebi. Aidi sondado dadpen chuiquid bëdambocquidquoio nec. Adquid icquin Nuquin Papan chiacpaden nabansho isun isadaidbon bëdamboen isaidquoio nec. Aidi Nuquin Papan chomiaid mayan bëdan naden chuipac caosh. “Simon cuëshumbic Petedo cuënoaid bedmetan. Bëac chuibansho tantiata,” quequin Nuquin Papan uaid mayan bëdan ëbi chuiposh quequin Codnedion ëbitedi chuioposh —quepanëdash Codnedion chomiaido Petedo chiec.

<sup>23</sup> Adoaquien: —Pudued —quepanëdash Petedo.

Adashic badiadanec Codnedion chomiaidobëd Petedo nidsho isash Esuquidistu tantiaquid Ope yacnocquid utsin-utsinquien tsibanampanëdash.

<sup>24</sup> Adec nidanec Sesadeya caid yacno chopanëdash. Adnubien, Nëid ushëmbien chochitec, quequin tantiashun Codnedion aton shubun icquido abi isedquid chedo Petedon chuibansho tantiamenuen aton shubu nuntan iccuededmepanëdash. <sup>25</sup> Aden iccuededmiac tabadnubi utsibobëd choec Petedo chedo puduedsho isash, Mibi bëdambocquid icnubi adesa nebi, quequin Petedo ismec danëshën sebudec shuebudash Petedo bëisenquoio yec Codnedio uepanëdash.

<sup>26</sup> Adec uesho isash Petedo: —Mibipadquid nebique. Nidtotata —quepanëdash Codnedio caic.

<sup>27</sup> Adtanec Codnediobëd onquetanec quënë utsin puduedshun isadaidpembo dadpen Petedon istuidpanëdash. <sup>28</sup> Aden aido isec: —Isadaidbo nebi. Adquid yec isadaidpembobëd capuesa neyobi. Adecbidi min shubun puduedesa neyobi. Adesa icboedi Nuquin Papan, Matses utsibo ëmbi bëdamboen isaid icsambo iquec cainda, quequin ismequin ëbi tantiamiac <sup>29</sup> mimbi ëbi bedmiaido choacsho isash, Mibëd capuesa nebi, quenquio yec chobi. Adecbidi nëmbo choash isadaidpembon shubu nec. Nëmbo puduedtiapimbo iquebi, quenquio yec puduedobi. Nëbi Tantianu. Chui. ¿Atotsieshun ëbi chomio? —quepanëdash Petedo Codnedio chiec.

<sup>30</sup> Adoaquien Codnedio: —Abentsëc choec ushanec ushë budec tedes yanubi Nuquin Papa tantiec buna mëmunec con shubu nuntanuësh Nuquin Papa chiec onquec tsadobi. Adnubien dashcute shocosh bedbedquiacbimboec dasiuidquid ëbi yacmi Nuquin Papan budmiac onquec: <sup>31</sup> “Codnedio, mibi Nuquin Papa chiec onquesho Nuquin Papan tantiec. Adembidi aton na nibëdquido mimbi menebansho aidëmbi bëpiscudenquio icquin tantiec. <sup>32</sup> Nuquin Papa bëdamboen tantianuen Simon cashumbic Petedo caid Ope yacnocquidbëd tabadquid ma chono queshun mimbi namiaido nidmeta. Aidi Simon cuëmëdquid utsi nidaidën capuquid bitsi uashun chodcashun nacnenquidbëd tabadec. Aidën shubu acte cuëmambi iquec,” quec Nuquin Papan uaid mayan bëda onqueposh. <sup>33</sup> Aden chiac: “Petedo bedtan,” quequin ëmbi namiaido nidmiombi. Adoac bëdambocquid yec cacuidanenquio yec badedquio mibi choc. Adec mibi choacsho isash bëdambo iquebi. Nuquin Papan nuqui isnubi ambi mibi tantiamiacpaden chuibansho tantiec tabadnuna —quepanëdash Codnedio Petedo chiec.

#### *Codnedion shubu nuntanshun Petedon chuibanaid*

<sup>34</sup> Aden Codnedion chuiban cac Petedon naden chuipanëdash: —Matses utsi nec, quenquiocquin Nuquin Papan yuedaid matses utsi-utsiec nec, quequin nëbi abimbo tantiembi. <sup>35</sup> Nuquin Papan chiaid tantiashun matses utsin-utsinquien chieshënenquiocquin bëdamboen nabansho isun, Aidedi Nuquin Papan abi yacno yuedendac, quequin tantiembi. <sup>36</sup> Èndenquimboshë Nuquin Papan dada uamequin con tsusedpabo isadaidbon tishmiaido caidaido naden chuipampic: Esuquidistu abentsëqui matsestedi chuiquid icnubi utsibëd bëdamboec tabadendac. <sup>37</sup> Nidaid Cadidia yacnoshon Uan padon chuibanquin acten mentoaquien Esuquidistun ambi naid tauapondash. Mibitedishun aid tantiondac. <sup>38</sup> Ma abëd tabadnueshun Nuquin Papan aton Mayan meniac nadatiambocquin Esuquidistun nabampondash. Adquid icquin Esuquidistu shubu dadpen icquid Nasaded yacnoshon tishaid yec capuquin bëdamboen nabanquin abi chieshënquidën Satanas caidën mëyanaido Esuquidistun bëdamebampondash. Adosho mibitedishun isbampondac. <sup>39</sup> Isadaidbon nidaid, Udeya caid yacnoshon shubu dadpen icquid Edusaden yacnoshombidi Esuquidistun nabansho ispondambi. Aidi cuesten dectanquin isadaidbon unës uaqui <sup>40</sup> uincuenash, Uincuenobi, quequin Esuquidistun ismebempondashi. <sup>41</sup> Aidi uincuenashun matsestedi ismenquiocquin aidbëdtan peshun acquidotedictsëqui Esuquidistun ismepondashi. <sup>42</sup> Abëdi icshobi, Èbi chuibanquin matses icsaid cuidte chuibante ushë choec quequin chui, cac nebi. <sup>43</sup> Adembidi Nuquin Papan chuibanacpadombon dada uampidon Esuquidistu tantiaquin, Nuquin Papan chomiaid Quidistu nec, quequin chuiquin dada uampic. Aden chuiquin dada uampid abimbo tantiaquid icquin abi icsaid ënsho isash abi icsaid Nuquin Papa bëpiscudendac. Esuquidistu chuiquin aden dada uapampic —quepanëdash Petedo Codnedion shubun iccuededquido tantiamequin chiec.

*Isadaidpembo Nuquin Papan aton Mayan meniaid*

<sup>44</sup> Aden Petedon chuibanshobi abitedi tantiaquid icsho isun Nuquin Papan ma abëd tabadnueshun aton Mayan menepanëdash. <sup>45-46</sup> Aden meniac isadaidpembo nëbi Esuquidistu tantiaquido yanshun abi onquiacmaidënquo utsin onqueten onquequin Nuquin Papa chiec cuëdëmpanëdash. Adsho tantiash Petedobëd cho-choboedo isadaidbo aton tsusedpabon nacpaden shui dëbid dëtemequido: —¡Padtec! Tantiadempamboctequid nec. Isadaidpembotsen Nuquin Papan aton Mayan meniac —quepanëdash isadaidbo Petedobëd cho-choboedo.

<sup>47</sup> Adoaquien: —Nuquin Papan aton Mayan meniaido icquin Esuquidistu tantiaquido neque. ¿Adquid icsho acten mentoenda ictic? <sup>48</sup> Aid, acten mentometa —capanëdash Petedon.

Aden acten mentoaqui: —Nuquibi tabadnuna —cac Petedobëd cho-choboedo acten mentoaidobëd daëdpactsëc ushec tabadpanëdash.

**11***Isadaidbo Petedon ambi naid chiaid*

<sup>1</sup> Adnubien utsibo Sesadeya caid yacnoësh puduanec nidequi nidaid Udeya caid yacno choshon, Sesadeya caid yacnocquidon isadaidpembon Nuquin Papan chiaid bëdamboen tantiash Esuquidistu tantiaquido yanosh, quequin chuipanëdash. Anoshon chuibëtsenec Edusaden yacnotsen choshon adomboembidi chuiopanëdash. <sup>2</sup> Aden chuisho anocquidon Esuquidistu tantiaquid utsibon tantiash tsusedpabon chiacpadomboen shui dëbid dëtemequido yec Petedo nëmbo choacsho isun, Aidi ambi nabanaid chuimenu, quequin caimpanëdash. Aden cainubic Petedo choacsho isash <sup>3</sup> comapenec onquecuededec: —Isadaidpembo shui dëbid dëtemesabo icnuc aton shubun puduedtemiaidquo nec, quequin tsusedpabon chiaid niaquec aidon shubun puduedshun mimbi pepac caoc. ¿Midapaden tantiec puduedshun mimbi piaye? Chui. Tiantanu —quepanëdash Edusaden yacno tabadquido.

<sup>4</sup> Adoaquien Petedon nadopanëdash: —Aidobëd ëbi tabadboed chuibanu. Tantiata. <sup>5</sup> Ope yacnoësh Nuquin Papa chiec onquequin ushacbimboen naden ispombi. Abuc posonianec ëbi yacmi dabidiete dapabieccquid dënëshbudcuenaid budposh. <sup>6</sup> Aidënquo nidaidën capuquid tachidën capuquidbëd podochoquid chedo antabëdsho ispombi. Aidën antabëdquid nuqui petequidbëd nuqui petemaid icposh. <sup>7</sup> Adquid icsho isnubi: ‘Nidtochon cuesuneshun pe,’ caposhi. <sup>8</sup> Adsho tantiashun: ‘Aidtedi ëmbi petemaid tauiquin mibi shëdmetemaidquo nec. Adquid pesambo nebi, Icho,’ capombi. <sup>9</sup> Adoaquien abucuësh padpidec onquequin: ‘Nuquin Papan bëdambo icmiaid icsambo iquec cainda,’ caposhi. <sup>10</sup> Adomboembidi abentsëc chotsëcnuc tabëcaido abuc buanshun padpiden budmeshun adembidi chuishun buanshun abitedi abuc puduedmeaposh. <sup>11</sup> Abuc buanoabombic dada abentsëc chotsec Sesadeya caid yacnoësh choquido shubu shëcuë cuëmano nidtuidash nidpac caosh. <sup>12</sup> Aidtedi icnubi Nuquin Papan Mayan: ‘Aidobëdi cacuidenquo yec nidtan,’ qesho tantiash aidobëdi nidpobi. Aidobëd Ope yacnocquido dada 6ted Esuquidistu tantiaquido puduanec nidec Codnedion shubun ëbëdi puduedposh. <sup>13</sup> Puduedacsho isash Codnedio: ‘Nuquin Papan chomiaidën ambi uaid mayan bëdan naden chuiposhi: Simon cuënshumbic Petedo caid Ope yacno tabadeque. Aid bedmenuen mimbi namiaido nidmeta. <sup>14</sup> Aidëmbi mibëd icquidtedi Nuquin Papa yacno puduedmianquid chuibanendac, quequin Nuquin Papan uaid mayan bëdan chuiposhi,’ quequin Codnedion chuioaposhi.

<sup>15</sup> “Adoac Esuquidistu chiombi. Aden chuinubi aton Mayan ëbitedi Nuquin Papan meniacpadembi aidotsen meneoaposh. <sup>16</sup> Aden meniacsho isun Nuquin Icho Esuquidistun chiondaid ëmbembi tantiatsëcquiec tsadpobi. Nad icpondash: Uan padon acten mentopondashi. Nuquin Papan ambi aton Mayan meniaid mibi iquendac, quequin chuipondash Nuquin Icho Esuquidistun. <sup>17</sup> ¿Aden isadaidpembotsen Esuquidistu tantiaquid yansho Nuquin Papan aton Mayan aidotsen menesho, Padi. Menenda, caindambi icti? —quepanëdash Petedo shui dëbid dëtemequid utsibo chiec.

<sup>18</sup> Aden Petedon nainquin chuibanac tantiadempambo yec tabadec isadaidbo shui dëbid dëtemequido: —Isadaidpembo abi icsaid ënsho isun Nuquin Papan aidotsen abëd icquid icmeoapac —quepanëdash Nuquin Papan naid chiec.

*Antioquiya yacnoshomba Esus tantiaquido iccuededaid*

<sup>19</sup> Esteban cuënoten seshuniash: “Esuquidistu tantiaquido cuesunenu,” queshe tantiash ëbitsen cuesunenushe quianec Edusaden caid yacnoësh Esuquidistu tantiaquid utsi-utsiec nidanepanëdash. Nidequi nidaid Penisia caid yacno choash utsi-utiec tabadnubi utsi-utsiec acte nënantanquio nidaid nacnëdquid Chipide caid yacno choash tabadnubi utsi-utsiec shubu dadpen icquid Antioquiya caid yacno choash utsi-utsiec tabadquin aton matses isadaidbuidi Esuquidistu chuibanpanëdash. <sup>20</sup> Adshumbic, utsibo Chipide caid yacnoësh Antioquiya yacno cho-choquidobëdtan nidaid Sidene yacnoësh Antioquiya yacno cho-choquidon isadaidpembo Esuquidistu tantiamenuen chuibanpanëdash. <sup>21</sup> Aden chuibanu, queshe Nuquin Papan bëdamboen tantiamiac aidon chuibanaid tantiashun isadaidpembon: Èbi icsaid ënu, quequin ënash Esuquidistu tantiaquid dadpen yampanëdash.

<sup>22</sup> Adec isadaidpembo Esuquidistu tantiaquid dadpen yanosh, queshe tantiashun Esuquidistu tantiaquid utsibon Edusaden yacnocquidon Antioquiya yacno Bednabe nidmepanëdash. <sup>23</sup> Aidi Edusaden yacnoësh puduanec nidequi Antioquiya yacno choshon anocquido Esuquidistu tantiaquido Nuquin Papan bëdambo icmiaid icsho isash: —Cuishon. Bëdambo iquec. Adembi tantiaquin chieshenquiocquin Esuquidistu tantiata —quepanëdash Bednabe. <sup>24</sup> Bednabe bëdambocquid icsho Nuquin Papan aton Mayan meniac Esuquidistu bëdamboen tantiaquidquido icquin Esuquidistu chuibanac Esuquidistu tantiaquid utsi-utsiec dadpen yampanëdash.

<sup>25</sup> Adashic Antioquiya yacnoësh puduanec Saudo bednuec nidequi shubu dadpen icquid Tadso caid yacno choshon <sup>26</sup> Saudo istuidash Antioquiya yacno aidbëdi Bednabe choapanëdash. Ambo choash seta abentsëc matamec anocquid Esuquidistu tantiaquidobëd iccuededquin Esuquidistu chuibanquin aid daëdshun tantiamepanëdash. Aden chuiban-chuibanac Esuquidistu tantiaquid dadpen yansho isun, Quidistubo nec, quequin Antioquiya yacnoshomba Esuquidistu tantiesabon Esuquidistu tantiaquido cuëmpañdash.

<sup>27</sup> Bednabebëd Saudo Antioquiya yacno tabadnubien Edusaden yacnoësh Antioquiya yacno Nuquin Papan yuecquido icshun nanun chiaid chuiquido cho-chopanëdash. <sup>28</sup> Cho-choshon abentsëqui Accabo cuëmëdquid Nuquin Papan Mayanën oncamiac: —Yuec-yuecpactsëc yash nidaidtedi yacnocquidon pete nibëdendac —quepanëdash. Aden chiambic shubu dadpenquioshë icquid Doma yacnocquido ancaquid Quëdaudio cuëmëdquid icnubi pete nibëdquiec yampanëdash. <sup>29</sup> Adnubic, Udeya yacnocquidon pete nibëdec, queshe tantiashun Esuquidistu tantiaquidon Antioquiya yacnocquidon aton piucquid adquido menenuen ambi dayun uaidtedi Edusaden yacno buamepanëdash. <sup>30</sup> Esuquidistu tantiaquido Edusaden yacnocquido

chuiquido nēid piucquid menetanta ma pete bunquido menenueshun, quequin ambi dayun uaidtedi Bednabebēdta Saudo menequin Edusaden yacno buamepanēdash Antioquiya yacno tabadquin Esus tantiaquidon.

## 12

*Acobo cuesuniaidbēdta Petedo quēnēn nauedaid Nuquin Papan puduemaiad*

<sup>1</sup> Adnubien Edusaden caid yacno tabadquid domanobo ancaquid Edodes cuēmēdquidēmbi Esuquidistu tantiec iccuededquido utsi-utsien comapenen mēyanuequin bedmeshun quēnēn nauedmepanēdash. <sup>2</sup> Aido quēnēn nauedmeshun Esuquidistun ēbi chuibeneta caid abēd capucueboed Acobo cuēmēdquid chēshten cuesunemepanēdash. Acobon utsimbo Esuquidistun ēbi chuibeneta caid abēd capucueboed utsi Uan nepanēdash. <sup>3</sup> Adoac, Acobo cuesuniosh, qesho tantias isadaidbo utsibo, Esuquidistu tantiesabo: — Bēdamboen Edodesēn naosh —quepanēdash aido. Adec onqesho tantias Edodes: Isadaidbon pan bidisquesa tantiaid ushē choec, quequin Esuquidistun ēbi chuibeneta caid utsi, Petedo cuēmēdquid, bedmeshun quēnēn nauedmepanēdash. <sup>4</sup> Aden quēnēn nauedmeshun Petedo cuenushe qeshun sondado 4ted quēnē nuntan tabadmeshun pan nami uambocquid petequid tantiaid ushētedi naimēdambi ambi naid icsa Petedo chuimenuequin Edodesēn caimpanēdash. Adnubien quēnē nuntanshun Petedobēdta mētaniaid sondado daēd uenubi utsi daēdshun shēcuē ēctabēdquin Petedo isec tabadpanēdash. Aid isquidotedi badiadnuc puduedshun isanec ushē abuctotsan nidnubi utsibotsen 4tedbidi choshon isanec ushē cuembocnoc nidoanubi utsibotsen 4tedbidi choshon isanec ushē budtsan nidnubi utsibotsen 4tedbidi choshon isanec inchēshtsēcnubi badiadnuc isboedo choapanēdash. Adecbidi isboed utsibo inchēshēmbi padpiden isec choapanēdash. <sup>5</sup> Adnubien Esuquidistu tantiaquido iccuededash Nuquin Papa Petedo quēnēn nauedaid chiec yuec onquepanēdash.

<sup>6</sup> Adshumbic, Badiadshun Petedo bēmembī, quequin Edodesēn tantianubi aid inchēshēmbi Petedo bucun mētaniacchobi ushnubi <sup>7</sup> Nuquin Icbon chomīaid, ambi uaid mayan bēda, nibēdquioeboedi Petedon dayun choan quēnē nuntan comapenec chēnquepanēdash. Aidēn Petedon dayun choshon shictodo macuesquin: —Baded nidto —cac nidtonobi seccuduquec shocosh bucu mētaniaid mēchiquidpanēdash. <sup>8</sup> Adtanquimbien Nuquin Papan uaid mayan bēdan: —Chinēshēdtanec tapucudta —cac Petedo chinēshēdtanec tapucudpanēdash.

Adsho isash: —Min dashcute bēntsecquid dasiuidshun ēbi tsiban —quianec nidsho <sup>9</sup> Nuquin Papan uaid mayan bēda nidsho isacbimboecquin abimbo tantienquiocquin Petedon tsibanampanēdash. <sup>10</sup> Adec nidquimbī sondado abēdta mētaniaidēn tantienquio icnubi datanshun shēcuē isquid daēdshumbidi tantienquio icnubi aidotsen datanoashumbic umanuc puduenenubi shocosh shēcuē abembi shēcniadpanēdash. Adsho isash puduenash podqued abentsēcquidēn nidquimbic Nuquin Papan uaid mayan bēda abēd icboedi badedquio nidquin Petedo niampanēdash. <sup>11</sup> Abēd icboed nibēdnubien Petedo padpiden tantiaquie: —Edodesbēd isadaidbo, Esuquidistu tantiesabo, ēbi cuesunete bunsho isun Nuquin Papan ēbi puduemenuen ambi uaid mayan bēda chomiosh. Abimbo iccosh —quianec Petedo nidpanēdash. <sup>12</sup> Adec nidequi Nuquin Papan abi puduemeboed tantiequi Uan cashumbic Madcos caidēn titan shubu yacno Petedo chopanēdash. Aidēn tita Madia cuēmēdquid icpanēdash. Ambobi Esuquidistu tantiaquid dadpen iccuededec Nuquin Papa chiec onquepanēdash. <sup>13</sup> Adnubien choshon Petedon shēcuē toshcasho tantias chido yua Doda cuēmēdquid isnuec nidtopanēdash. <sup>14</sup> Aid

shubu shëcuë yacno choshon Petedon cuënsho tantiash bédamboshë iquequi shëcnenquio yec aucbidi titinquec: —Petedo shëcuë yacno choash nidec —quequin iccuededquido chuituidpanëdash.

<sup>15</sup> Adsho Nuquin Papa chiec iccuededquidon abimbo tantienquiocquin: —Muequi mibi nec. Aidida isplash neba —quepanëdash iccuededquido.

Adoquien: —Ma aidquiobi neboc. ¿Utsida neque? Mimbimbo mua quenun istan.

Caquien: —Petedo dayun uaqin isquid, Nuquin Papan uaid mayan bēda ischitashien nec —quepanëdash tantiesa.

<sup>16</sup> Adnubi padpiden Petedon tosh-toshcasha shëcnequin isash: —¡Tso! Abimbo caic —quecuededpanëdash.

<sup>17</sup> Adnubien mēdante uic-uiccaic Petedo: —Onquenquio yec tabadquin tantiata. Ēbi nashunquin Nuquin Icbon naboed chuibanu —quepanëdash Petedo abi quēnēn nauedacnoshon Nuquin Papan puduemaid chuibanec. Aden chias: —Ēbi puduemaid Esuquidistun utsi, Acobobēdta Esus tantiaquid utsibo chuitanta —quianec puduenanec utsi yacno Petedo nidpanëdash.

<sup>18</sup> Adashic, badiadnubi quēnē nuntan Petedobēd icboed sondadotedi: —¿Mitsimbo nuquibēdta mētaneboed icpec? Nibēdeque. Is —quec dacuēdpanëdash.

Adashic, Petedo nibēdec, quequin sondadon chiac <sup>19</sup> Edodesēn: —Nibēntan —cac nidshun sondadon istuidenquiocsho isun quēnē nuntanshun Petedo isquido ambi quēnēn tabadquin nabamboed chuimeshumbi aidotedi Edodesēn cuesunemepanëdash.

### *Edodes unēsaid*

Adashic, Edodes nidaid Udeya caid yacno abi tabadacnoēsh puduanec shubu dadpen icquid Sesadeya caid yacno choash tabadpanëdash.

<sup>20</sup> Sesadeya caid yacno anoentsëcbidi shubu dadpen icquid Tido caid icnubi aid yacnoēsh anoentsëqui shubu dadpen icquid utsi Sidon caid icpanëdash. Tido caid yacnocquidbēd Sidon caid yacnocquido Edodesbēd chushcananquido icboedi padenquio yanec tabadpanëdash. Adec chushcananenquio yec tabadquin, Sesadeya yacno Edodes choash tabadosh, qesho tantiash Edodesēn yua Bēdasto cuēmēdquidbēd onquenuc cho-chopanëdash. Chochoshon, Ēmbi pete nibēdsho isun Edodesēn menioshi. Nēbi aid chushcainquio iquembi, quiosh, quequin cho-choquidon chuituidpanëdash. Aden chiac adomboembidi Bēdaston Edodes chuioapanëdash. <sup>21</sup> Aden adomboembidi Bēdaston chuioasho tantiashun Edodesēn: —Ēmbi chiacpadēn chochoata, quiosh Edodes, quequin chuita —cac cho-choquido Bēdaston chuioapanëdash. Aden chiac Edodes onquesho tantianuec ambi chiacstedec ushash dashcute nac-nacquiocquid dasiuidash abembi onquenuc tsadten abuc tsadtoash onquec taēpanëdash. <sup>22</sup> Aid onquesho tantiash: —Nidaidēnshun tishaid onquaidpenquio nec. Abuc tabadquid nuquin papa caidien Edodes nechitec —quec iccuededquido comapenec cuēdcuededpanëdash. <sup>23</sup> Aden chuisho tantiash, Mimbi Nuquin Papa caidpenquio nebique. Aidi abia yampid abentsëcquiobi iqueque. Auidi tantiata, quequin chuitiadquidēmbi chienquio icsho tantiashun Nuquin Papan chomiaidēn ambi uaid mayan bēdan daicsa uac chichan dadpen yanec Edodes badedi unēsapanëdash.

<sup>24</sup> Adnubien Esuquidistu tantiaquidon ambi tantiaid Esus chuiban-chuibanac Esus tantiaquid utsi-utsiec dadpen yampanëdash.

<sup>25</sup> Adnubic Antioquiya yacnocquidon Esuquidistu tantiaquidon aton picquid ambi menenuen dayun uaid Bednabebēdta Saudo meniac buanec Edusaden yacno choshon anocquido Esuquidistu tantiaquido menetanashic

auëshquio puduanec Antioquiya yacno nidoapanëdash. Aidobëdi Uan cashumbic Madcos caid nidpanëdash.

## 13

### *Saudobëdtabi Bednabe nidmiaid*

<sup>1</sup> Adashic, Esuquidistu tantiaquid utsi-utsiec Nuquin Papan yuecquio icshun nanun chiaid chuiquido Antioquiya caid yacno tabadnubi Esuquidistu tantiamenuen chuibanquido tabadoapanëdash. Nëidic, Bednabe; utsibic, Simon, Dada Chëshë caid; utsibic, Sidene yacnoësh choquid, Dusio cuëmëdquid; utsibic, Cadidia yacnoësh choquid, tsusio dapa, Edodesën shubun icquid icboedi, Manain cuëmëdquid; utsibic, Saudo cuëmëdquid. <sup>2</sup> Aidedishun Esuquidistuidi tantianuen buna mëmunsho Nuquin Papan Mayanën: —Saudobëdtan Bednaben aid daëdshun ëmbi chuibocpaden ma napanuna —capanëdash. <sup>3</sup> Adoaquien, buna mëmunquin nainash Nuquin Papa chiec onqushun abëd icquid utsibon mëdanten Saudo Bednabebëdta mamishquin nadopanëdash: —Nidaid utsi-utsiec yacno nidshun Nuquin Papan chiacpaden Esuquidistu chuibenetan —capanëdash abëd icquidon.

### *Chipide yacnoshon Esuquidistu chuibanaid*

<sup>4-5</sup> Esus tantiaquidon mamishquin chiaquien Nuquin Papan Mayanën nidmiac Saudobëd Bednabe Antioquiya yacnoësh puduanec nidpanëdash. Aid daëd nidsho isash Uan cashumbic Madcos cain cuënaid nidpanëdash dada uate buanshunec. Aidedi nidanec acte cuëman shubu dadpen icquid Sedusia caid yacno choash cano antabëdtoanec acte nënantanquio nidaid nacdëdquid Chipide caid yacno nidtampanëdash. Chipide yacno choash nidequi shubu dadpen icquid Sadamina caid yacno choapanëdash. Adec choash tabadec aton matses isadaidbo iccuededacno choash puduedshun Nuquin Papan chiaid dada uamiampid Saudon Bednabebëdtan chuibanpanëdash. <sup>6</sup> Adoshombic, Sadamina yacnoësh nidquin chuibidanec Chipide cuëma utsiuc shubu dadpen icquid Pabos caid yacnotsen choash tabadoapanëdash. Ambo tabadquin isadaidbo Badesus istuidpanëdash Pabadobëd icquidon. Satanasën tantiamiaid icquin abimbo chiacbimboec, Nuquin Papan yuecquio icshun nanun chiaid chuiquidquio nebi, quequin muaquin chuipanëdash Badesusën. <sup>7</sup> Aidi Pabos yacnocquido tsusion shubun tabadpanëdash. Anocquido tsusio cobednadod caid Sedquio Paudo cuëmëdquid icpanëdash. Aidi tantiaquiono, quec tabadquin, Isedquido chosh, qesho tantias, Aidon chuibanaid tantianu, qeshun Saudobëdta Bednabe chomeshun tsusion yuedpanëdash. <sup>8</sup> Yuedac Pabadon Esuquidistu chuibanpanëdash. Saudo quequin isadaidbon cuënnubi Pabado quequin isadaidpembon cuëmpanëdash. Aden Pabadon Esuquidistu chuibansho tantiec tsusio tsadsho isun Badesusën tantiamenquiocnuen utsi uain chuoapanëdash. Ambi ompoaid ismianesa Badesus icsho Edimus cuëmpanëdash. <sup>9</sup> Aden utsi uain chuisho tantiaschun Nuquin Papan Mayanën tantiamiac Edimus bëisequi Pabado: <sup>10</sup> —Satanasën bacuë yec bëdamboen naidbëdta bëdamboen chiaid tantiesa mibi nec. Nuquin Papan namiaid nebi, quequin ompoaid ismenquiocquimbi Nuquin Papan chiaid utsi uaqin muaquin mimbi adenuidi chuibanegue. Tantia. <sup>11</sup> Nëbi con Icbon mibi mëyanquin bëshu uaindac. Ushë chënqesho mimbi yuen isenquio iquendac —quepanëdash Pabado Edimus chiec.

Aden chuibon Edimusën ëshë cuen-cuempambo yec inchëshbudacbimboec yanash: —¿Tsuntsimbini mëdinshun buampeba? —quequin nibëdacno mishquin uëmbampanëdash. <sup>12</sup> Aden Edimus bëshu uacsho isec: —Nuquin



Icbon chiaid abimbo iquec —quiash tsusio Sedquio Paudo cuëmédquid Esuquidistu tantiaquid yampanédash.

*Nidaid utsi, Pisidia caidën shubu dadpen icquid Antioquiya caid utsi yacno Bednabe Pabadobëdi choash tabadoaid*

<sup>13</sup> Adashic, Chipide yacnoësh puduanec nidaid Pampidia caid yacno Pabadobëd icquido canon potepanédash. Aden potiash nidaid Pampidia caid yacno choash Pabadobëd Bednabe pudundonobi Uan cashumbic Madcos caidbidi Edusaden yacno nidoaic cuëshëdpanédash. Adec Pabadobëd Bednabe pudundoanec nidquin shubu dadpen icquid Pedque caid <sup>14</sup> isbidanec nidaid Pisidia caid yacno shubu dadpen icquid Antioquiya yacno chopanédash. <sup>15</sup> Ambobi tabadequi chonoadtemaid ushën Nuquin Papan chiaid chuibante shubun puduedash tabadpanédash. Ambo tabadnubien Nuquin Papan Moises dada uamiampid isec onquequin chuibanshumbic Nuquin Papan yuecquio icshun nanun chianiaid dada uamepampidtsen isec onquequin nainambic tsusion: —Isedquido iqueque. Aid daëdi tabadacno nidshun, ¿Ëbitedi bëdambo icmenuen chuibanquin tantiametiadquio ada mibi icpe? cata —tsusion cac ambi namiaid nidshun tsusion chiacpaden Pabadobëdta Bednabe chuituidpanédash.

<sup>16</sup> Adoquien abi tsadacnoëshi nidtoashi Pabado: —Nuquin Papan naid mibi chiembique. Tantiaquiota. <sup>17</sup> Nidaid Equipito caid yacno nuquin tsusedpabo tabadshobi Nuquin Papan bëdamboen isec cudasquin ambi tishmiaid dadpen caidmepampic. Adoshombic, Nuquin Papan ambi nadatiambocquin naidënquio bëyucanquin tsusedpabon tishmiaidën tishmiaid caidaido Equipito yacnoshon buanubi <sup>18</sup> tsusedpabon Nuquin Papan chiaid chieshëmpampic. Adoquien matses nibëdacno seta dadpen 40ted matamec tabadquin, Nuquin Papan tsusedpabon ëbi chieshënaid cuidnu, quenquiocquin buampampic. <sup>19</sup> Aden buanquin nidaid Canan caid yacno buanshun anocquido isadaidpembo istuidmeshun matses utsibo utsi-utsiectsëcquiec 7tedi icquido naimbudmeshun aidon nidaidtedi nuquin tsusedpabo menebampampic. <sup>20</sup> Aden menebudquin dadpenquioshë seta 450ted matamequin ambobi tabadmepampic.

“Adashic, isadaidbo chuiquid utsi-utsien icmeshumbic Nuquin Papan ambi yuecquio icshun nanun chianiaid chuiquid Samued cuëmédquid tsusedpabo chuiquid icmepampic. <sup>21</sup> Aidi isadaidbo chuiquid icnubic, Matses utsibo ancaquidpadquid bunebi, quequin tantiashun seta dadpen 40ted matamec tabadquin Nuquin Papan Sis padon mado, Benaminën tsyuecquid Saudo cuëmédquid, isadaidbo ancaquid icmepampic. <sup>22</sup> Adashic, yuecash Saudo, con shënisio, Nuquin Papan chiaid tantesa uasho isun utsitsen Dabid cuëmédquid tsusedpabo ancaquid icmeoapampic. Aidi Nuquin Papan chiacpadomboen nabanquidquio icsho isash Nuquin Papa: ‘Dabid, Isain mado, ëbi bëdamboshë icmequid, ëbi bunacpaden nabanquidquio mibi nec,’ quepampic Nuquin Papa —quepanédash Pabado aton matses Antioquiya yacnocquido tantiamenuen chiec.

<sup>23</sup> Aden chiec abi onquec: —Dabidën tishmiaidën tishmiaid caidaid, Nuquin Papan chomiaid, Esuquidistu matses icsaid bedshunash abided cuidadash abi yacno isadaidbo puduedmequid Nuquin Papan icmepanédash. <sup>24</sup> Aidën nadatiambocquin nabanquin ambi nabanaid tauabicnuc Uan padon, acten mentoanquidën: ‘Mimbi tantiaid icsa ënshun acten mentome,’ capanédash. <sup>25</sup> Adec onquetanequic matses acten mentobudquin nainec: ‘¿Mitsipaden ëbi isquin cuëmpatsia? Nuquin Papan Chomiaid mimbi cainaidpen nebi. Mimbi cainaidquio choendac. Aidi

chosho isun: ¿Ëbi icsambocquid icscho atotsieshun mibi choec? quequin chuiquidquio Nuquin Papan icmioshi, caindami,’ quepanëdash Uan acten mentoanquid —quepanëdash Pabado.

<sup>26</sup> Aden Uan padon chiacpaden chuibanashic: —Abadauanën tishmi-aidën tishmiaid caidaido nuqui icscho nuquitedi icsaid bedshunash abided cuidadec Esuquidistu unëspanëdash. Adsho Nuquin Papan uincuemequin abi yacno nuquitedi puduedmequid icmequin ambi chiampicpaden napanëdash. <sup>27</sup> Padnuen, Aton madombo Nuquin Papan chomiaid Esus nec, quenquiocquin Edusaden yacnocquidobëd aton tsusio dapabo, Icsambocquid neque. Unës ua, quequin chuipanëdash. Aden chuiquin utsibëd iccuededte ushën-ushënquien abi isec onquiaid Nuquin Papan dada uamiampicpadembi aidon napanëdash. <sup>28</sup> Esuquidistu icsaid nibëdquidquio caiqui, Icsambocquid neque. Aid unës uatiadquidi mibi nec, quepanëdash Isadaidbo Pidato caic. <sup>29</sup> Adoquien Nuquin Papan dada uamiampicpaden nabanambien Esuquidistu cuesten dectanquin unës uacsho chicshun, Ëbi unësacsho nëidën ëbi nauedec, quequin ambi shëcuë uain nacnenaid chucanquio Osen Esus nauedpanëdash. <sup>30</sup> Adoacsho Nuquin Papan Esuquidistu uincuemiach <sup>31</sup> capusho Cadidia yacnoësh Edusaden yacno abëd capucuenboedon aidi isbempanëdash. Aden isun aidombi Esuquidistu chuibededec. Adembidi aid isboedobëdtambi abimbo chuibanquidquio nebi —quepanëdash Pabado.

<sup>32</sup> Aden chiashic: —Abi chiembique. Tantia. Nuquin Papan chometequid ambi chuipampid tsusedpabon isenquiocnobi <sup>33</sup> Nuquin Papan uincuemiachsho nuqui isondaid aidi nec. Aidi chuiquin Nuquin Papan dada uamiampid nad iqueque. Tantia. Chuinu.

‘Con madombo mibi nec.

Nëbi ëmbi uincuemiaqui ëmbi chiacdedi mimbi naimbudoc.

Adosho isun ëbipadquiocnoc chuiquid dapa mibi icmembi.’

Aden ëndenquimboshë aton mado tantiaquin Nuquin Papan chiampic.

<sup>34</sup> Adecbidi ambi uincuemetequid Esuquidistun nami chodquesa icpanëdash. Aid chuiquin dada uamiampid nad iqueque. Tantiata. Chuinu.

‘Dabid chiampicpadembi mibi icsaisa icscho ëmbi bëdamboen isaid mibi nec, mado,’

quequin Nuquin Papan dada uamepampic. <sup>35</sup> Ambi dada uamiampid utsi nad iquec:

‘Icsaisa icscho aton nami chodquesa icmenuna,’

quequin Nuquin Papan chiampic.

<sup>36</sup> “¿Aden dada uamequin Dabid pado chiecta onquepampic? Padenquio. Aidi Nuquin Papa bunacpadomboen naimbudquin nabanash Dabid unësacsho isun aton mëdimbon nami chodquiacno Dabid chococac aidën namitsen chodquepampic. <sup>37</sup> Nuquin Papan uincuemetequidën namien chodquesa icpanëdash. <sup>38</sup> Aidi icsainquiocquid yec ëbitedi icsaid bedshunash abided cuidadpanëdash. <sup>39</sup> Adoac abi tantiaquidquiotsen icsaisabidi Nuquin Papan isec. Nuquin Papan naden nata quequin dada uamiampidtedi mat-sesën natiapimbo iquec. Aden ambi chiacpaden natiapimbo yec, Nuquin Papan bëdamboen isaid nebi, quetiapimbo icboedëmbi, Matses icsaquid icscho cuidnushe quiash abided cuidadec Esus unëspanëdash, quequin tantiasho, Esuspadquid icsaisa Nuquin Papan nuqui isec. <sup>40</sup> Nuquin Papan chomiaid choec, quequin tsusedpabon tantienquio icampidpadquid iquenda. Aido chuiquin Nuquin Papan dada uamiampid nad iqueque. Tantia.

<sup>41</sup> ‘Ëmbi ëndenquimboshë dada uamiampicpadembi adquid chomembi.

Ëmbi chomiaid isquidon chiac mimbi tantienquio icpec.

Adquid yec, Tantiadempambo iquec, quec mamënshumënquid ëbëdi tabadti-apimbo iquendac.

Adquid icmane queshun tantiaquiota'  
—quepanëdash Pabado iccuededquido chiec.

<sup>42</sup> Aden chuibudashic Pabado Nuquin Papan chiaid chuibante shubu yacnoësh abëd choboedobëd puduenanec nidsho isash: —¿Iccuededte badiad utsi chonoc iccuededquin chuinuecta mibi choape? —quepanëdash iccuededquid utsibo Pabado chiec. <sup>43</sup> Aden chianec Pabadobëd Bednabe nidsho isun isadaidbo utsin-utsinquiembëdtan isadaidpembo isadaidbopadquid icnuequid utsin-utsinquien tsibanampanëdash. Aden abi tsibanansho isash: —Nuquin Papan bëdamboen isaid yec bëdamboec tabadta —quepanëdash Pabado Bednabebëd.

<sup>44</sup> Adashic, chonoadtemaid ushë icnuc Nuquin Papan chiaid tantianuec Antioquiya yacnocquid dadpen iccuededoapanëdash. <sup>45</sup> Dadpen iccuededsho isash isadaidbo tsusiobo: Ëmbi chuibansho tantianuec aidtedi choenquio iccosh, quequin tantiec nëishpanëdash. Adec nëishash: —Mimbi Nuquin Papan chiaid icsamboen chuibanec —quepanëdash Pabado caic.

<sup>46</sup> Adoaquien, dacuëdenquio yec Pabadobëd Bednabe: —Mibitedi con matses icsho, Nuquin Papan dada uamiampid chuibanu, queboedëmbi tantiesa icsho isun mibi chuibanenquio iquembi. Mibi tantiesa yec Nuquin Papabëd tabadte buneshabidi icnuc isadaidpembo Esuquidistu chuibanendambi. <sup>47</sup> Nuquin Icbon naden tantiamioshibique. Tantiä. Chuinu.

“Isadaidpembo ëmbi chiaid chuibanquid mibi icmembi ma nidaidtedi yacno ëbi tantiaquido ëbi yacno puduedquid ma icpanuna,” quequin chioshi —quepanëdash Pabado abi chieshënquido isadaidbo Nuquin Papan dada uamiampicpaden chiec.

<sup>48</sup> Adsho tantiash isadaidpembo: —¡Padtec! Nuquin Papan chiaid bëdamboshë iquec —quecuededpanëdash. Adoaquien, Nuquin Papan ëbëdi mibi tabadmendambi, quequin chiaid ambi tantiamiactedi Esuquidistu tantiaquid yampanëdash.

<sup>49</sup> Adec Esuquidistu tantiaquid yanash auëshquio dadpen nidequi nidaid dëuequid utsi-utsiec yacno choash tabadquin aidontsen Esuquidistu chuibanoapanëdash. <sup>50</sup> Adosho tantiash, Pabado icsambocquid nec, quequin isadaidbo tsusiobon Antioquiya yacnocquidon chidobobëdta anocquido chuiquid dapa nëishmeshun Pabadobëdta Bednabe mëyantankuin ashunquio nidmepanëdash. <sup>51</sup> Aden nidta cac puduanec nidtuidash, Esuquidistu ëmbi chuisho tantiesabo aido nec, quequin nidaid putu tasequequin ismiash nidanec shubu dadpen icquid Iconio caid yacno chopanëdash. <sup>52</sup> Pabadobëd Bednabe Antioquiya yacnoësh nidan Antioquiya yacnocquid Esuquidistu tantiaquido: —Bëdambo iquebi —quecuededpanëdash. Adembidi aidtedi aton Mayan Nuquin Papan menepanëdash.

## 14

### *Iconio yacno*

<sup>1</sup> Adashic, Pabadobëd icquido Iconio yacno choash tabadpanëdash. Ambo tabadec Nuquin Papan chiaid chuibante shubu yacno nidash puduedpanëdash. Ambo puduedshun Esuquidistu chuibanac isadaidbobëd isadaidpembo dadpen Esuquidistu tantiaquid yampanëdash. <sup>2</sup> Aido Esuquidistu tantiaquid yanubi isadaidbo utsibo Pabaton chuibanaid tantiatiapimbo icquin Esuquidistu tantiaquido muaquin chuiquin isadaidpembo utsibo nëishmepanëdash. <sup>3</sup> Aido nëishmiambi Iconio

yacno yuec tabadquin Pabadon Bednabebēdtan dacuēdenquiocquin Esuquidistu chuibampanēdash. Aden chuibansho isun Nuquin Papan ambi nadatiambocquin tantiadempamboctequid ismequid Pabadobēdta Bednabe icmepanēdash. <sup>4</sup> Aden icmiac aid daēdshun nadatiambocquin nasho isash, Isadaidbo tsusiobon chuibocpadec Pabadobēd Bednabe icsambocquid nec, utsi-utsiec quenubien, Ambi chiaid abimbo iquec, utsibo quepanēdash. <sup>5</sup> Aden chuishumbic, Pabadobēdta Bednabe cuestanquin cuēnoten se-senuequin Esus tantiesabo isadaidpembon aton tsusio dapabobēdtan cainubi adembidi isadaidbon aton tsusio dapabobēdtan cainoapanēdash. <sup>6-7</sup> Aden caimbededosh, quequin tantiaquidēn chiac cuenec nidequi nidaid Dicaonia caid yacno Pabadobēd Bednabe choash shubu dadpen icquid Disteda caid yacno choash tabadquin Pabadobēdtan Bednaben Esuquidistu chuibampanēdash. Adtanec auēshquio puduanec nidec shubu dadpen icquid Dedbe caid yacnotsen choash tabadquin adomboembidi Esuquidistu chuibampanēdash. Adtanec auēshquio puduanec nidshun dēuequiec shubu dadpen icquid utsi-utsiec yacnocquidotsen chuibampanēdash.

### *Disteda yacno*

<sup>8</sup> Disteda yacno tabadnubien anocquid taicsaidi anin tishaid caputi-apimbo icpanēdash. <sup>9</sup> Aidi Pabadon Esuquidistu chuibansho tantiec, Esuquidistun ēbi bēdamepatsiash, quec otacquio tsadpanēdash. Aden caputi-apimbocquidēn tantiapadomboen Nuquin Papan Pabadotsen tantiamiac <sup>10</sup> caputiapimbocquid comapenen bēisquin: —Nidto —Pabadon cac badedi nidtoash taicsaid bēdanash capupanēdash.

<sup>11</sup> Aden taicsaid bēdamiac capusho isash anocquido aton onqueten cuēdcuededquin: —Disteda yacnocquidon tantiaid matsesbimboec yanash abucuēsh budoshe. Nēid daēdi isec cho —capanēdash. <sup>12</sup> Adtanequi Bednabe otacquio tsadquid icsho isash ambi tantiaid abentsēc Upited icnuc Upited cain Bednabe cuēnquimbi Pabado chuiquidquio icsho isun ambi tantiaid utsi Medcudio icnuc Medcudio cain Pabado cuēmpanēdash Disteda yacnocquidon. <sup>13</sup> Aden cuēnsho tantiaishun baca bēnē daēd bēc: Mibi daēdi tantiaquido Disteda yacnocquido nec, quequin, Ismenu, quequin ambibi tantiacbimboecnuc nacnenaid Upited caid dayun uaquido baca cuesunenu, quepanēdash.

<sup>14</sup> Aden baca cuesunenuen bēsho isun abi dasiuidaid aton dashcute bēntsecquid shoyonquin cancheuidashic iccuededquidon nēnantanquio nidash Pabadobēd Bednabe comapenec nadpanēdash: <sup>15</sup> —Ēbi daēdi mibipadquid matsesquio nebi. Mimbi tantiacmaid nebique. Baca cuesunenda. Chiaid bēda mibitedi naden chuinuec chobi. Nuquin Papa caid abentsēcquiobi iquec. Aidēmbi abubēdta nidaid uashumbic aidēnquiocquidtedi uabanampidquio neque. Aiduidtsēqui tantiaquin ambi uaidbimboecnuc matsesēn nacnenaid tantiesa icta. <sup>16</sup> Ēndenquimbo Nuquin Papan, Adoenda, cainquiocnoc matsesēn ambi tantiapaden nabampampic. <sup>17</sup> Aden, Adoenda, cainquiocquimbi, Abitedishun icbo icquin bēdambocquid nebi, quequin ismequin ue secamedenequinc, cuēte bacuēmequinc, nuqui penun tiedēn nitsimbeniaid canimequinc caquin Nuquin Papan nac bēdamboen nuquitedi pebededec. Aden nabanquin Nuquin Papan, Bēdambo iquebi. Cuishon, camiaido nuquitedi nec —quepanēdash Pabadobēd Bednabe Disteda yacnocquido chiec. <sup>18</sup> Aden chuido-chuidoaqi baca cuesunenquio icpanēdash Disteda yacnocquidon.

<sup>19</sup> Adnubien Antioquiya caid yacnocquidobēd Iconio yacnocquido Disteda yacno cho-choshon, Pabado icsambocquid nec, quequin chiac Disteda caid

yacnoquido nëishcuededpanēdash. Adec nëishcuededshun Pabado cuēnoten se-siash, Unēsosh, qeshun nimbanquin buanshun shubu nibēdacno Pabado netampanēdash. <sup>20</sup> Ambo netanambic, Esuquidistu tantiaquido cho-choshon tsicatenubi Pabado nidtoash Esuquidistu tantiaquidobēd Disteda yacno choec shubun puduedpanēdash. Badiadash puduanec shubu dadpen icquid Dedbe caid yacno Pabadobēd Bednabe nidoapanēdash.

*Nidaid Sidia caid shubu dadpen icquid Antioquiya yacno choaid*

<sup>21</sup> Adec Dedbe yacno choash tabadquimbi Pabadobēdtan Bednaben chuibanac Esuquidistu tantiaquid dadpen yampanēdash. Auēshquio puduanec nidoaic padpidec Disteda caid yacno choash tabadquin, Dadpen tantiamequiono, quequin chuibampanēdash. <sup>22-24</sup> Aden chuibanshumbic: —Natiastianquid iquendac. Adquid icnuc Nuquin Papa yacno puduedash Esuquidistu tantiaquid yec ambo nuquitedi tabadendac, quec nēbi dayacquo yec tabad —capanēdash Pabadon. Adotanquin ambia Esus tantiaquid utsi-utsien Pabadobēdtan Bednaben: —Bēdamboec tabadquin ismequin Esuquidistu tantiaquid utsibo chuiban —capanēdash. Adotanec, ambi chuiboedobēd Pabado Bednabe chedo Nuquin Papauidi tantiec buna mēmunquin chiec onquepanēdash. Aden Nuquin Papa chuiquin naimbudquin, Nēmbocquid mibi tantiaquido bēdamboen dayun uata, Papa, quequin chianec Pabadobēd Bednabe chedo Disteda yacnoēsh nidoapanēdash. Adecbidi Iconio yacno choashun adomboembidi chuibanooapanēdash. Adecbidi Antioquiya yacno choashun adomboembidi chuibanooapanēdash. Antioquiya yacnoēsh puduanec nidec nidaid Pisidia caid datambētsenec nidaid Pampidia caid yacno choash nidec <sup>25</sup> shubu dadpen icquid Pedque caid yacno choash tabadquin Esuquidistu chuibanash shubu dadpen icquid Atadia caid yacnotsen chopanēdash. <sup>26</sup> Auēshquio cano antabēdtoanec nidec shubu dadpen icquid Antioquiya caid yacno, Nuquin Papan Mayanēn nidta, quequin chiondacnombo choapanēdash. <sup>27</sup> Ambo choash tabadquin anocquido Esuquidistu tantiaquid utsibobēd iccuededshun Nuquin Papan tantiamiacpaden abi capucueniacnoshon ambi nabanaidtedi Pabadobēdtan Bednaben chuibampanēdash. Isadaidpembo dadpen Esuquidistu tantiaquid yamposh, quequin chuipanēdash. <sup>28</sup> Adtanequi yuec Antioquiya yacno Esuquidistu tantiaquid utsibobēdi Pabado Bednabe chedo tabadpanēdash.

## 15

*Edusaden yacnoquido iccuededec tantianu quiaid*

<sup>1</sup> Pabadobēd Bednabe Antioquiya yacno choabicnubien nidaid Udeya caid yacnoēsh choquido Esuquidistu tantiaquid utsibo Antioquiya yacno choash tabadquin, Nuquin Papan naden nata quequin chiaid Moises dada uamiampicpaden shui dēbid dētemesa abi yacno Esuquidistun yuedtemaid nendac, quequin chuipanēdash. <sup>2</sup> Adnubic Pabadobēd Bednabe Antioquiya yacno choash tabadquin aidon chiaid tantiash: —Nuquin Papan aden chi-ambo iqueque. Aden chienda —quepanēdash.

Adsho comapenec cuēdquin chushcapanēdash. Adsho tantiashun abi chuiquidon, Edusaden yacno nidshun chushcanamboed chuitanta, quequin Pabadobēdta Bednabe chuishumbic Esuquidistu tantiaquid utsibo

chuioaquin aido nidmepanēdash. <sup>3</sup> Adoac Antioquiya yacnoēsh puduanec nidec nidaid Penisia caid yacno choash tabadquin, Isadaidpembotsen Esuquidistu tantiaquid yamposh, quequin chuipanēdash. Adsho tantiash: —Aid tantiec bēdambo iquebi —quepanēdash anocquid Esuquidistu tantiaquido. Adtanec auēshquio nidequi nidaid Samadia caid yacno choash tabadquin adomboembidi chiac adquiecbidi, Bēdambo iquebi, quepanēdash anocquido. <sup>4</sup> Auēshquio puduanec nidec Edusaden yacno choash tabadquin anoshontsen Nuquin Papan chiacpadec capuquin ambi nabanaidtedi Pabadobēdtan Bednaben chuibanapanēdash. <sup>5</sup> Aden chiac Esuquidistu tantiaquido, Nuquin Papan naden nata quequin chiaid tantiamequido: —Nuquin Papan naden nata quequin chiacpaden isadaidpembotsen shui dēbid dētemetiadquidi nec. Nuquin Papan naden nata quequin Moises dada uamiampid nabantiadquid neoaic —quepanēdash.

<sup>6</sup> Adoquien Esuquidistu ambia tantiaquido tsusiobobēd Esuquidistun ēbi chuibeneta caido: Tantiabono, quiash onquecuededpanēdash. <sup>7</sup> Adec yuec onquecuededdash nidtoash Petedo nadece onquepanēdash: —Chuinu. Tantiata. Ēnden Nuquin Papan naden chuipondashi: “Isadaidpembo Esuquidistu tantiaquid icmete bunebique. Aidotsen chuibanta,” quequin chuipondashi. Aden ēmbi chuioaquo mibitedishun tantiondac. <sup>8</sup> Ēmbi isadaidpembo Esuquidistu chiac abi tantiaquid aido yampondash. Matsesēn tantiaid tantiaquid icquin Nuquin Papan, Esuquidistu tantiaquid nec, quequin aton Mayan nuqui meniacpadembi isadaidpembo meneoapondash. <sup>9</sup> Utsibo nec, quenquiocquin aidotsen tantiamequin paucoapondash. <sup>10</sup> Aden Nuquin Papan nasho isun, ¿Atotsieshun Nuquin Papan naid icsambo iquec quiacpaden tsusedpabon natiapimboctequid nuquitsen natiapimboctequid isadaidpembon nabanta cate nuqui bumpe? <sup>11</sup> Padenquio icnuna. Matsestedi icsaquid icsho cuidnushe quiash abided cuidadac, quequin tantiaquie unēsash abēdi tabadendac, quequin nuqui tantiacpaden isadaidpembo Esuquidistu tantiaquido yanshun tantiec —quepanēdash Petedo.

<sup>12</sup> Aden Petedon chuiquin ēnambic Pabadotsen Nuquin Papan tantiamiac ambi nadatiambocquin naquin isadaidpembo ismebanaid chuipanēdash. Adembidi Bednaben chuiapanēdash. <sup>13</sup> Aid daēdshun chuibanquin nainan Esusēn utsi Acobo, Esus tantiaquido tsusio dapa, nadpanēdash: —Ēmbitsen chuinu. Tantiata. <sup>14</sup> Isadaidpembo tantiaquin aido Esus chuibanta, quequin Nuquin Papan chiacpaden Simon Petedon chiac isadaidpembo Esus tantiaquid yansho Nuquin Papan aidtedi nuquibēdta aton matses icmiac. <sup>15</sup> Adomboembidi Nuquin Papan chuimiaidēn dada uampid nad iqueque. Tantiata. Chuinu:

<sup>16</sup> “Isadaidbobēd yuec tabadenquiochoedi padpidec choash aidobēd icoaindabi.

Dabid padon tsyuecquido isadenquiochoedi isadcuenendac

<sup>17</sup> ma aton Icho matsestedishun istuidpanuna;

ma adembidi isadaidpembon ēmbi cuēnaidon aidbidi istuidpanuna,

<sup>18</sup> quec Nuquin Icho ambi ēnden tantiampicpadomboen chiaid nec”

—quiashic abi Acobo onquec: <sup>19</sup> —Nuquin Papan chiampid tantiaquin nuquin tsusedpabon naden nata quequin chiacpaden nata isadaidpembo cainquio ictiad. <sup>20</sup> Nēiduidtsēqui dada uaquin isadaidpembo chuibanuna nuquibi: Nuquin Papan uaidbimboecnuc nacnenaid tantiaquin pete sanaid penda; adembidi, min chiduidtsēqui chudta; adembidi, min bēnēuidtsēqui chudmeta; adembidi, Nēish tētaniaid intacchobi codocaid penda, quequin isadaidpembo chuibanuna. <sup>21</sup> Adec Moisesēn dada uaid iccuededquin isec

nuqui onquedenec. Aid icnuc, Adomboembidi nata, quequin isadaidpembo chuinuna —quepanēdash Acobo iccuededquido chiec.

<sup>22</sup> Adashic Esuquidistu tantiaquido iccuededec onquec enēdshun ěmbi dada uaid Antioquiya yacno buanuec Edusaden yacnocquid daēd nidta, quequin Pabadobēdta Bednabe nidmepanēdash. Abentsēc Udas cashumbic Badsabas cuēnaid; utsibic, Sidas cuēmēdquid. Aid daēdi Nuquin Papan chiaid comapenen tantiaquidquio icpanēdash. <sup>23</sup> Isadaidpembo chuiquin Edusaden yacnoshon Esuquidistu tantiaquidon naden dada uapanēdash:

“Esuquidistun ěbi chuibeneta caidobēdi ambia Esuquidistu tantiaquido Edusaden yacnocquido yec min utsibimboecquido nebi. Isadaidpembo Esuquidistu tantiaquido Antioquiya yacno tabadquidobēdta nidaid Sidia yacno tabadquido, nidaid utsi Sidisia yacno tabadquido chedo mibitedi chuiquin dada uaombique. Isec onqueta. <sup>24</sup> ěbēd icquido nēuēshquio nidash mibi yacno choash puduedshun, Isadaidbon naden nata quequin chiaid natiadquidi mibi nec, quequin mibi icsamboen chiosh, quequin utsibon chioshi. <sup>25</sup> Aden chuisho tantiashun nēmbocquidobēd iccuededec onquequin abentsēcshun tantiacimboen dada uaombi. Aidi nēmbocquid daēdi Pabado Bednabebēdta buantan, quequin chiemi. <sup>26</sup> Unēsmane, quenquio yec capucuenequin Esuquidistu chuibanquido Pabadobēd Bednabe nec. <sup>27</sup> Adquid aid daēd icsho isun aid chedobēdta Udas Sidas chedo mibi yacno nidmembi. Adoac ěmbi dada uacpaden ma mibitedi chuiopanuna abimbo iquec camenuen. <sup>28</sup> Nuquin Papan Mayanēn ěbitedi tantiamiacpaden isadaidbon naden nata quequin chiacpaden nata mibi caisa nebi. <sup>29</sup> Nēidtedtsēqui ěbitedishun nata caid nec: Nuquin Papan uaidbimboecnuc nacnenaid tantiaquin utsibon abi yacnoshon sanaid penda; adembidi, min chidoidtsēqui chudta; adembidi, min bēnēuidtsēqui chudmeta; adembidi, mimbi nēish cuesuniaid intacchobi codocashun penda. Adoac ěmbi chiacpaden nabanec mibi bēdambo icpec. Padi aйдtedtsēqui chiemi.”

<sup>30</sup> Aden dada uaquin nainshun ambi nidtan caboed meniac Antioquiya yacno nidoapanēdash. Antioquiya yacno choash puduedshun Esuquidistu tantiaquido Edusaden yacnocquidon dada uaid menepanēdash. <sup>31</sup> Aden meniac isbanash: —Mimbi bēboed dada uaid isash bēdambo iquebi —quepanēdash isadaidpembo Antioquiya yacnocquido.

<sup>32</sup> Adnubic Udasēn Nuquin Papan chiaid chuibanquin Esuquidistu tantiaquido Antioquiya yacno tabadquido bēdamboen tantiamepanēdash. Adomboembidi chuibanquin Sidasēn tantiameoapanēdash. <sup>33</sup> Aden dadpen ushquin chuibanshun: —Edusaden yacno nidoaibi —caquien:

—Ai, mibi nidsho isash unēsquio icquimbi mibi chomequido yacno nidtan, mibi caimbi —quepanēdash Esuquidistu tantiaquido Antioquiya yacno tabadquido. <sup>34</sup> Adec aido Edusaden yacno nidnubien <sup>35</sup> Pabadon Bednabe chedobēdtan Antioquiya yacno tabadquin Esuquidistu tantiaquid utsibo Nuquin Papan chiaid bēdamboen tantiamenuen chuibanpanēdash.

#### *Pabadobēd Bednabe cuēshēdaid*

<sup>36</sup> Adashic, yuecash Pabado Bednabe caic: —¿Midapadec nuqui capucuenequin Nuquin Papan chiaid chuibeneboedo tabadeque? Isec nuquibi nidnu. Nid —quepanēdash.

<sup>37</sup> Adoquien: —Ma Madcosbidi nidoanu. Chuita —quepanēdash Bednabe.

<sup>38</sup> Adoquien: —Chieshec aidi cuēshēdondashe. Padi. Nuqui daēdtsēqui nidnu. Nid —quepanēdash Pabado.

<sup>39</sup> Adoquien Bednabe aden tantienquio yec Pabadobēd comapenec onquiash Madcosbēd cano antabēdtoanec Chipide yacno nidoapanēdash.

<sup>40</sup> Adnubien Pabado Sidas abëd Edusaden yacnoësh choboed caic: —Nuquibi nidnuna —quepanëdash.

Adec aid daëd nidnuesho isash anocquid Esuquidistu tantiaquido: —Ma Nuquin Papan mibi daëd bëdamboen nidmequin ma mibi bëdamboen namepanuna —cac Pabadobëd Sidas nidpanëdash. <sup>41</sup> Adanec nidaid Sidia caid yacno choash capucuenequin Esuquidistu tantiaquido iccuededacno puduedshun bëdamboen tantiamenuen chuibampanëdash. Aden chuibeneshumbic nidaid Sidisia yacno choshon Esuquidistu tantiaquido shubu utsin-shubu utsin-quec iccuededacnomboec puduedcuenequin Pabadon chuibanoapanëdash.

## 16

### *Pabadobëd Timoteyo nidaid*

<sup>1</sup> Adec nidec shubu dadpen icquid Dedbe caid yacno choash tabadquin adomboembidi chuibanoash nidequi shubu dadpen icquid Disteda caid yacno Pabadobëd Sidas choapanëdash. Ambo Esuquidistu tantiaquid Timoteyo cuëmëdquid tabadpanëdash. Aidën tita isadaidbo Esuquidistu tantiaquid icnubi aidën papa isadaidpembo quidieco matses icpanëdash. <sup>2</sup> Timoteyo bëdambocquid nec, quequin Disteda yacnocquidon Pabado chuipanëdash. Adomboembidi shubu dadpen icquid Iconio yacnocquidon chuoapanëdash. <sup>3</sup> Aden dadpenshun chuisho tantiash Timoteyo buante bumpanëdash Pabado. Adec, Timoteyo buanu, qeshun ëbi capucueniacno isadaidbo dadpen iqueque. Aidon Timoteyo isash, Aidën papa quidieco matses icnuc aton madobidi isadaidpembo nec, aido quenushe qeshun Pabadon Timoteyon shui dëbid dëtemepanëdash. <sup>4</sup> Aden nashic nidec Esuquidistu tantiaquid utsibo yacno-yacnomboec choash puduedshun Esuquidistu tantiaquido Edusaden yacnocquidon dada uaqun chiaid Pabadon chuoapanëdash. <sup>5</sup> Adembidi Nuquin Papan chiaid chiac ënden Esuquidistu tantiaquidon tantiabenquiocnobi utsi dadpen Esus tantiaquid yanoapanëdash.

### *Ushquin Masedonia yacnocquid Pabadon isaid*

<sup>6</sup> Adanec nidaid Sidisia caid yacnoësh nidsho Nuquin Papan Mayanën: —Nidaid Asia caid yacno Esuquidistu chuibanuec nidenda —cac Pabadobëd icquido nidaid Pidiquia caidtsen datambidanec nidaid Cadasia caidbidi datambidanec <sup>7</sup> nidaid Misia caid yacno chopanëdash. Ambo choash nidaid Bitinia yacno nidnuesho, Ambo nidenda, quequin Nuquin Papan Mayanën aido tantiameoapanëdash. <sup>8</sup> Adoac nidaid Misia datambidanec shubu dadpen icquid Todoas caid yacno ëbi tabadacnobi chopondash. <sup>9</sup> Ambo choash tabadec inchëshnuc ushquin nidaid Masedonia caid yacnocquido Pabadon ispondash. Adec ushquin isquin nidaid Masedonia yacnocquido: —Ëbitedi Esuquidistu chuibanec cho —quec onquesho Pabadon tantiapondash. <sup>10</sup> Aden tantiash: —Nuquin Papan nidaid Masedonia caid yacnoshontsen Esuquidistu chuibanta caid nebique. Nacnenuna —Pabadon cac buanun nacnempondash. Esuquidistu tantiaquid yanash ëbitsen Pabadobëd nidpondabi.

### *Didia cuëmëdquid Esuquidistu tantiaquid yanaid*

<sup>11</sup> Adanec Todoas yacnoësh puduanec cano antabëdtoanec cuebi nidequi acte nënantanquio nidaid nacrëdquid Samotodasia caid yacno choash Pabadobëd icquido tabadtuidpondash. Badiadash auëshquio puduanec cano antabëdtoanec nidquimbi potebidanec nidaid Masedonia caid yacno ëbitedi chopondabi. Aid nidaidën acte cuëmambi shubu dadpen icquid Niapodis caid



yacno pudundoanec <sup>12</sup> nidequi shubu dadpenquo icquid Pidipos caid yacno domanobo dadpenquioshë tabadacno yuec ushec tabadpondash.

<sup>13</sup> Pidipos yacno tabadashic isadaidbo iccuededte badiadën Nuquin Papa chiec utsibo onquedeniacno istuidnuec puduanec shubu nibëdacno nidequi acte utsi cuëmambi choapondash. Ambo choshon iccuededquido chidobo istuidshun Esuquidistu Pabadon chuibampondash. <sup>14</sup> Pabadon chuibanacno chido Didia cuëmëdquid shubu dadpen icquid Tiatida caid yacnoësh choquid icpondash. Aidën piucquid bednuen dashcute cuëshaid umu-umumbocquid menebenepondash. Aidi Nuquin Papa tantiaquid icquin Pabadon chuibanubi Nuquin Icbon tantiamiac Esuquidistu tantiaquid Didia yampondash. <sup>15</sup> Aidbëd aton shubun icquido Esuquidistu tantiaquido yansho isun acten mentobampondash. Aido acten mentobanambic Didian: —Esuquidistu tantiaquid mibipadquid nebique. Con shubuno ushec cho —cac nidash Didian shubun puduedash Pabadobëd icquido tabadpondash.

### *Pabadobëdta Sidas quënën nauedaid*

<sup>16</sup> Adashic padpidec Nuquin Papa chiec onquedeniacno Pabadobëd icquido nidoasho chido yuaidën bëquedtuidpondash. Aidën mayan icsan tantiamiacpaden yuecash nad iquendac, quequin chuisho piucquid dadpen aid chido matsesën meniac aid chidon ambi bedaidtedi abi yuaquid meneopanëdash. <sup>17</sup> Pabadobëd icquido bëquedtuidshun tsibambëec choec aid chido: —Nëid dadatedi Nuquin Papan namiaidquio nec. Abi yacno puduedmianquid iquec, quequin chuibanquid nëid dadatedi nec —quec <sup>18</sup> badiadquidën badiadquidënquiec comapenec cuëdpondash.

Adec cuëdtonesho tantiate bunenquo yec amibidi bidiadquin mayan icsa dapuduedaid chido chuiquin comapenen Pabadon: —Esuquidistun nadatiambocquin naidënquo dapudenta —cac badedquio mayan icsa dapuduempondash. <sup>19</sup> Aden dapuduemiac chido bëdanacsho isun abi yuaquidon: —Nëbi nadquio iquendac, quequin chuitiapimbo nuquin yua iquec. Aden chienquiocquin piucquid bedtiapimbocquin nuqui meneoatiapimbo iquec, quequin tantiaash nëishun Pabadobëdta Sidas bedshun nimbanquin abi chuiquido yacno chido yuaquidon buampondash. Piucquid bednuequin aton na bëshun utsibon sambanaid anoentsëqui abi chuiquido icsho isun chido yuaquidon Pabadobëdta Sidas ambo buampondash. <sup>20-21</sup> Aden abi chuiquid tsadacno bëash: —Nëid dada daëd isadaidbo nec. Nëmbo choshon abi chuiquidon naden nata quequin chiaid chuibanec. Èbitedi domanobo icquin ambi chiaid ëbitedishun natemaid icnuc matsestedi chushquecuededosh —quepondash chido yuaquido abi chuiquido chiec. <sup>22</sup> Aden chuisho tantiaquidon chiac dadpen cho-choash iccuededquin Pabado bëquidon chi-acpadomboen aidontsen chuioac abi chuiquido: —Bëboedon dashcute chicshun cueshcaten cuesta —cac sondadon cuespondash. <sup>23</sup> Aden comapenen cuesmeshun buameshun quënën nauedmeshun ambi quënën nauedaid ista caid chuiquin Pidipos yacnocquido chuiquidon: —Puduenanec cuenushequeshun nëid daëdi bëdamboen isquiota —capondash. <sup>24</sup> Adsho tantiaashun ambi ista caidën Pabadobëdta Sidas nënantanquo quënën nauedquin tsadunshun cuate shëcuë uaidën tausunash puduentanquin quënë bëdamboen bëtashpanëdash.

<sup>25</sup> Aden bëtashash aton shubu dayunquiocquidën puduedambic inchëshpotsembo Pabadobëd Sidas Nuquin Papa chiec onquepanëdash. Adecbidi Nuquin Papan naid chiec cuëdëmpanëdash. Adec cuëdënsho utsibon tantianubi <sup>26</sup> comapenec nidaid ishcutnubi mëtaniaidtedi mëchiquidpanëdash. <sup>27</sup> Adnubien ista caid isec tsadboedi ushtanec isucunquin isac shëcuë

bētashaid ěnden shĕcniac. Adsho isash ista caid: —Quĕnĕn nauedaido puduen-puduempacnui —quetanec: —Chuiquid dapabon ěbi cuesunemetsiash —queshun siadnuequin chĕshte abi tsiusudaic chicsho <sup>28</sup> istanquin Pabadon: —Quĕnĕn nauedaidtedi nĕmbo iquebique. Seshuniadenda —quequin comapenen cuĕmpanĕdash.

<sup>29</sup> Adoaquien, seshuniadtsemboedĕn: —Tabote bec cho —cac ambi nami-aidĕn tabote bedtanquin meniac tabote bedshun sananec badedi quĕnĕn puduedash dacuĕdec uĕdĕquec Pabadobĕd Sidas tabadacno choash danĕshĕn sebudec shuebudpanĕdash. Mibi daĕdi bĕdamboquid icnubi adquidpenquio nebi, quequin tantiaquin ismepanĕdash. <sup>30</sup> Adsho isun Pabadon nidto-miaqui seshuniadtsemboed bĕyucanec nidquin aton shubun Pabadobĕdta Sidas yuedash: —¿Nuquin Icho yacno puduednush mitsipadequibi ěbi icsaid cuidadpeque? Chui. Tantianu —quepanĕdash seshuniadtsemboed.

<sup>31</sup> Adoaquien Pabado: —Mibibi cuidadtiapimbo iquec. Mibĕdta min shubun icquido icsaquid icsho cuidnushe quiash abided cuidadec unĕsash Esuquidistu aton Papa yacno puduedash abi tantiaquido yuedquid neque. Mibi icsaid ĕnash, Esuquidistu con Icho nec, quequin abimbo tantia <sup>32</sup> —queshumbic seshuniadtsemboedbĕd icquido Esus tantiamenuen Nuquin Icbon chiaid Pabadon chuipanĕdash.

<sup>33</sup> Adoaqui Pabadobĕdta Sidas cuesaid chiuĕ acten bĕpanshunquin nainacsho aton shubun icquido Esuquidistu tantiaquido yansho isun aidtedi Pabadobĕdtan Sidasĕn acten mentobampanĕdash. <sup>34</sup> Aden mentobanaqui aton shubun yuedshun pemepanĕdash. Adashic, Nuquin Papan chiaid abimbo tantiaquid yec ambi bĕdambo icmiaido seshuniadtsemboedbĕd icquido icpanĕdash.

<sup>35</sup> Adashic, badiadash Pidipos yacnocquido chuiquidon: —Nauedaid shubu yacno nidshun quĕnĕn nauedboed daĕd pudueme, quequin chui-tanta —cac quĕnĕ yacno nidshun ista caid adomboembidi chuiopanĕdash.

<sup>36</sup> Aden chiac ista caidĕn: —Quĕnĕn nauedboed daĕd pudueme, quequin chuiquid dapabon chiosh, quequin aidon chomiaidĕn chioshibique. Dacuĕdenquio yec nid —capanĕdash Pabadobĕdta Sidas chuiquin.

<sup>37</sup> Adoaquien Pabado: —Ĕmbi naid chuimenquiocquin ěbi daĕdi domanobo icsho utsibon isnubi cuesmeposhi. ¿Nĕbi puduemenuen utsibo isenquiocnobida ěbi daĕdi nidmepec? Padenquio caimbi. Ĕbi daĕdi puduemenuec ma chuiquid dapabo abibi chopanuna —quepanĕdash.

<sup>38</sup> Aden chiac puduenanec nidequi abi chuiquido yacno choshon, Mimbi quĕnĕn nauedmeboed daĕd domanobo nec, quequin chuisho tantiaquid dapabo comapenec dacuĕdcuededpanĕdash. <sup>39</sup> Adec dacuĕdec nidequi nauedaid shubuno choash: —Domanobo nec, quequin tantienquiocquin mibi quĕnĕn nauedmiombi —queshun puduemetanec: —Pidipos yacnoĕsh nidtan —capanĕdash Pabadobĕdta Sidas chuiquin. <sup>40</sup> Adoaquien, puduenanec nidequi Didian shubu yacno choash puduedshun Esuquidistu tantiaquido iccuededsho isun bĕdamboen tabadmenuequin Pabadon chuibanpanĕdash. Aido chuibidanec Pabadobĕd icquido nidoapanĕdash.

## 17

### *Tesadonica caid yacnocquido isadaidbo nĕishcuededaid*

<sup>1</sup> Pidipos yacnoĕsh puduanec nidequi Pabadobĕd icquido shubu dadpen icquid Ampipodis caid datambidanec shubu dadpen icquid Apodonia caidtsen datambidanec shubu dadpen icquid Tesadonica caid yacno choash, Nuquin Papan chiaid chuibante shubu iquec, qesho tantiaquid Tesadonica caid yacno

Pabadobēd icquido tabadpanēdash. <sup>2-3</sup> Ambo tabadec isadaidbo iccuededte badiadēn abi nidteniampadec Nuquin Papan chiaid chuibante shubu yacno choshon Pabadon Esus tantiamenuen Nuquin Papan ēnden chiampid chuibampanēdash. Nuqui icsaid bedshunash abided cuidadec Esuquidistu unēsaid ambi uincuemetequid Nuquin Papan Chomiaidquio nec. Aidi nuqui Quidistu caid neoaic, quequin chuipanēdash Pabadon. Sabado 3ted matamequin adomboen chuibampanēdash. <sup>4</sup> Aden chuibanaqui Esus tantiaquid utsi-utiec yampanēdash. Nēidic, isadaidbo utsi-utsiec; utsibic, Nuquin Papa tantiaquido quidieco matses dadpen; utsibic, anocquido chuiquid dapabon chido utsi-utsiec aido Esus tantiaquid yampanēdash.

<sup>5</sup> Aden Pabadon chuibanac Esus tantiaquid dadpen yansho isash isadaidbo utsibo nēishun utsibon piucquid bednuequin aton na sambanshun ismiacno nidshun tantiesabo, icsambocquid dadpen, iccuededmeshun aidotsen nēishmiac natia chushquecuededpanēdash. Adec chushquec nidequi Pabadobēdta Sidas bednuec Ason cuēmēdquidēn shubuno puduedec nidpanēdash. <sup>6</sup> Ambo choshon Pabadobēd Sidas nibēdsho isun Esuquidistu tantiaquido Asombēd icquido bedshun abi chuiquid dapabo yacno Pabado chieshēnquidon buanec abi chuiquid dapabo yacno choash: —Nidaid utsi-utsiec yacno capucuenequin chuitemaid chuibanquido nēmbo <sup>7</sup> choacsho Asonēn aid daēd yuedaccosh. Nuqui ancaquid Sesadēn chiaid niacquid ancanquid utsi Esus cuēmēdquid iquec, quequin chuibanec —quepanēdash Pabado chieshēnquido abi chuiquid chiec.

<sup>8</sup> Aden, Ancanquid utsi iquec, quequin Pabadobēdtan Sidasēn chiec, quesho tantiasch chuiquid dapabo iccuededquidobēd comapenec chushquecuededpanēdash. <sup>9</sup> Adtanec abi chuiquid Asombēd icquido caic: —Nēbi, ¿Atotsi tantiaquin Pabadobēdta Sidas yuedo? quequin mibi chuimetiapimbo iquembi. Yuecshun mibi chomeshun chuimembi. Ēmbi chuimiabi Tesadonica yacnoēsh nidenda. Ēmbi chiacpaden nanuequin piucquid ēbi mene —capanēdash Tesadonica yacnocquido chuiquid dapabon Asombēd icquido chuiquin. Adoquien piucquid meniac bedshun: —Min shubuno nidtan —cac nidanepanēdash Asombēd icquido.

### *Bedeya yacnotsen tabadaid*

<sup>10</sup> Adshumbic bednushe queshun aid inchēshēmbi Tesadonica yacnocquido Esuquidistu tantiaquidon Pabadobēdta Sidas shubu dadpen icquid Bedeya caid yacno nidmepanēdash. Aden nidmiac Bedeya yacno choash tabadec Nuquin Papan chiaid chuibante shubu yacno Pabado nidpanēdash. <sup>11</sup> Anoshontsen, Esus Nuquin Papan Chomiaid Quidistu nec, quequin tantiamenuen Nuquin Papan ēnden dada uamiampid Pabadon chuibanoasho tantiaschun bēdambocquid icquin, Abimbobida chuibanoshe. Isbono, quequin Nuquin Papan chiampid isban-isbampanēdash Bedeya yacnocquidon. <sup>12</sup> Aden isbanec, Abimbo caic, quiash Esuquidistu tantiaquid dadpen isadaidbobēd isadaidpembo Esuquidistu tantiaquido yampanēdash. Adecbidi isadaidpembo chuiquid dapabo quidieco matses utsi-utsiec aton chido chedobēd Esuquidistu tantiaquid yampanēdash.

<sup>13</sup> Adnubien, Bedeya yacnoshontsen Pabadon chuibanec, quesho tantiasch Tesadonica caid yacnocquido, isadaidbo, Asombēd icquido bedmeboedo, Bedeya yacno choshon anocquidotsen nēishmiac comapenec chushquecuededpanēdash. <sup>14</sup> Adsho tantiaschun Esuquidistu tantiaquidon Bedeya yacnocquidon acte dapa cuēmano Pabado nidmepanēdash. Adnubi Sidashēd Timoteyo nidenquio yec Bedeya yacno tabadnubien <sup>15</sup> Bedeya caid yacnoshon utsibon bēyucanquin Pabado buampanēdash. Aden buanec nidequi

shubu dadpen icquid Atenas caid yacno chopanēdash. Ambo choash abia bëyucanquido: —Ëbi chobocnobidi Bedeya yacno nidoaibi —quesho tantiashun Pabadon:

—Mibi yacno choash, Badedquio Atenas yacno chota, quiosh Pabado, quequin Sidasbēdta Timoteyo chuita —capanēdash. Aden Pabadon chiaquien Bedeya yacnocquido abi yacno nidoapanēdash.

*Atenas yacnotsen Pabado tabadaid*

<sup>16</sup> Abia bëyucanquido Bedeya yacno nidambi Atenas yacno Pabado tabadquin, Sidasbēd Timoteyo choec, qeshun cainec capuquimbi Atenas yacnocquidon nacnenaid isbampānēdash. Aidon Nuquin Papan uaidbimboecnuc nacnenaid dadpen tabēcaid papa cain cuēnaid ambi tantiaido icsho isash, Nuquin Papa Abentsēcquiobi iquec, quequin tantiesa Atenas yacnocquido nec, quequin tantiec Pabado unēsquio yampānēdash. <sup>17</sup> Adec unēsquio yec Nuquin Papan chiaid chuibante shubu yacno nidshun Esuquidistu tantiamenuen Nuquin Papan chiampid Pabadon chuibampānēdash. Adembidi anocquidon piucquid bednuen aton na sambanshun ismiacno nidshun adomboembidi Pabadon chuibanoapanēdash. Isadaidbobēd onquequin Esuquidistu Pabadon chuipānēdash. Adembidi isadaidpembobēd onquequin Esuquidistu chuoapanēdash. <sup>18</sup> Anoshon chuibansho tantiash epicudeyo cuēmēdquidēn chuinēdacpaden tantiaquido Pabadobēd onquepanēdash. Adembidi tantiash estoico cuēmēdquidēn chuinēdacpaden tantiaquido Pabadobēd onquepanēdash. Aido Pabadobēd onquequin Pabadon Esus chuisho tantienquio yec: —¿Atodain comapenec onquequin nēid dadan chuipash? —quepanēdash. Adnubien utsi: —Matses utsibon papa cain cuēnaid chuibanec nepanui —quepanēdash. Pabadon Esuquidistu unēsash uincuenaid chuisho tantiash adpanēdash. <sup>19-20</sup> Adec onqueshumbic, Utsin tantiaid tantianu, quec Adeyopaco caid yacno iccuedednuequidon bëyucanquin bëash Pabado: —Mimbi chiaid ëmbi tantiacmaid nec. ¿Midapadquidquio mimbi chuibanec? Tantianu. Chuiban —quepanēdash abi bëquido caic. <sup>21</sup> Abi bëquido Adeyopaco caid yacno nidash Atenas yacnocquido dadpen utsi-utsiec yacnoësh cho-choquido badiadquidēn-badiadquidēnquiec utsin-utsinquien ambi tantiacpaden chuibansho tantianuec iccuededpanēdash.

<sup>22</sup> Aden mimbi tantiacpaden chuibanta caquien nēnantanquio nidtoshon naden Pabadon chuibampānēdash: —Chuibanu. Tantiata. Mimbi papa cain cuēnaid mimbi tantiaid iquec, quequin tantiembi. <sup>23</sup> Capucuenequin mimbi tantiaidbimboecnuc nacnenaid dadpen isombi. Mimbi papa cain cuēnaid dadpen tabēcaid icnubi mimbi cuēnacmaid abentsēc iccosh. Aid mimbi cuēnacmaid icnuc abibimboecnuc nacnenaid nibēdosh. Aton shubumpiuidtsēqui iccosh. Mimbi cuēnacmaid mimbi tantiacmaid mibi chuibanu. Tantiata.

<sup>24</sup> “Ëmbi Nuquin Papa cain cuēnaid nidaidbēdtabi abu uashumbic aidēnquiocquidtedi uaquidquio nec. Abitedi uaquidquio yec abitedishun icbombo aidi nec. Aidi tabadmenuequin matsesēn shubu uashunaidēn tabadesa nec. <sup>25</sup> Aidi abitedishun Icho icnuc abitedi aton na nec. Adquid icsho, Con na mibi menenu, matsesēn aid catiapimbo iquec. Aidēn tantiacpadec ëbitedi nēmbobi tabadebi. Aidēn tantiacpadec ëbitedi tiboquebi. Aidēn tantiacpaden ëbitedishun bedbanoaimbi. <sup>26</sup> Aidëmbi bëyuc dada uampidēn tsyuecquido ëbitedi nec. Aid bëyuc dadan tsyuecquido dadpen yanash matses utsi-utsimboec dadpen iquec. Adquid yec nidaid utsi-utsiec yacno tabadquido nec. Nuquin Papan tantiacpadequi seta taēnuec ue yanendac. Adecbidi, inchēshtanec badiadoaic. Adecbidi, ushē nidash choaic.

<sup>27</sup> Aidëmbi naden tantiec: Matses tantiaquin abitedi uaquin nashundenembi. Aden ambi matses abi tantiaquin nabanaid isash matses, ¿Tsuntsin nabanaid nepec? queshun ëbi tantiaquin Icho ëbi capec, quequin tantiaquin Nuquin Papan nuqui nashunec. Aden nashunquin Nuquin Papan nadatiambocquin nabanaid nuqui ismedenec. <sup>28</sup> Aidën nac tiboquequid ëbitedi nebi. Aidën nac capuquidbidi ëbitedi nebi. Adembidi min matsesën dada uampid adomboen chiaid nad iqueque. Tantia. Chuinu: Nuquin Papan bacuëbo ëbitedi nebi, quequin min mëdimbon chuipanëdash.

<sup>29</sup> “Nuquin Papan bacuëbo ëbitedi iquec tiboquequid icquin matsesën nacnenaid tiboquesa papa cain cuënenquiocquid matses nec. <sup>30</sup> Ènden matsesën ambi nacnenaid aden cuënsho tantiaquin Nuquin Papa, Chën. Adoenda, quenquicboedi nëbi, Mimbi icsamboen tantiaid ënta, quequin chiec. <sup>31</sup> Matsesën naid chuibante ushë chonoc matses icsaidbëdta ambi bëdamboen naid chuibanquin Nuquin Papan chomeshun matses icmiaidën cuidbanendac. Ambi abipadquid matses icmiaid, Nuquin Papan matsesën naid chuibanquid icmenu caid unësacsho isun ambi chiampicpaden nanuequin Nuquin Papan uincuemepondash —quepanëdash Pabado Adeyopaco yacno iccuededquido Esus tantiamenuc.

<sup>32</sup> Adec aidi unësacsho Nuquin Papan uincuemepondash, quequin Pabadon chuisho tantiaquin utsi-utsiec mamënshumënuubi utsi-utsiec: —Aidën chuiboed padpiden tantianuna —quepanëdash. <sup>33</sup> Adoquien, Pabado Adeyopaco caid yacnoësh nidpanëdash. <sup>34</sup> Adec nidshun yuec ushquin chuisho tantianu quec Pabadobëd iccuededquin utsin-utsinquien padpiden-padpidemboen tantiabedepanëdash. Aden Pabadon chuibanac utsi-utsiec Esuquidistu tantiaquid yampanëdash: Nëidic, Dionisio cuëmëdquid Adeyopaco caid yacno iccuededquido chuiquid nepanëdash. Utsibic, chido Damadis cuëmëdquid adecbidi Esuquidistu tantiaquid yampanëdash. Aidobëd utsi-utsiec Esus tantiaquid yampanëdash.

## 18

### *Codinto yacno Pabado tabadaid*

<sup>1</sup> Adec Atenas caid yacno tabadash auëshquio puduanec nidec shubu dadpen icquid Codinto caid yacno Pabado chopanëdash. <sup>2</sup> Ambo isadaidbo Aquida cuëmëdquid nidaid Ponto caid yacnoshon tishaid Pabadon istuidpanëdash. Isadaidbotedi nidaid Itadia yacnoësh nidtan, ancanquidën cac aton chido Pidisida cuëmëdquidbëd Codinto yacno choash Aquida icpanëdash. <sup>3</sup> Nidaidën capuquid yua bitsi shubumpi nacnenquid abipadquid Aquidabëd aton chido icsho isun aidobëd tabadquin Pabadon shubumpi nacenpanëdash. <sup>4</sup> Codinto yacno tabadec aton matses isadaidbo iccuededte badiad icnuc Nuquin Papan chiaid chuibante shubuno nidshun, Esuquidistu Nuquin Papan madombo nec, quequin tantiamenuen Nuquin Papan chiaid dada uamiampid Pabadon chuibanpanëdash.

<sup>5</sup> Ambo tabadnubi Sidasbëd Timoteyo nidaid Masedonia yacnoësh choambic shubumpi nacnenquicquid isadaidbo Esuquidistu tantiamenuen Pabadon chuibanpanëdash. <sup>6</sup> Adsho, Aid tantiatipi, quequin isadaidbon Esuquidistu icsamboen chuisho tantiaquin abi daëd dasiuidaid bëntsecquid chicshun ishunc nec Pabado: —Esuquidistu mibitedi chiombi. Aid tantiesa yec unësash Nuquin Papa yacno puduedenquo mibitedi iquendac. Adquid Nuquin Papan cuidquin nësecatequid nendac. Nëbi padpiden mibi chienquo iquembi. Isadaidpembon tantiatiaquin, quequin aido chuibanembi —quepanëdash Pabado isadaidbo tantiesa chiec.

<sup>7</sup> Aden chiashic Nuquin Papan chiaid chuibante shubu yacnoësh pudue-nanec aid dayuntsëqui shubu icquidën Pabado puduedpanëdash. Aid shubu icbo Usto cuëmëdquid Nuquin Papa tantiaquid icpanëdash. <sup>8</sup> Uston shubunoshon Esuquidistu Pabadon chuibanac Quidispo cuëmëdquid Esuquidistu tantiaquid yampanëdash. Aidi Nuquin Papan chiaid chuibante shubun iccuededquido chuiquid dapa icpanëdash. Aidbëd aton shubun icquidtedi Esuquidistu tantiaquid yampanëdash. Adecbidi Codinto yacnoquid dadpen Esuquidistu tantiaquid yampanëdash. Adsho adquidtedi acten mentobampanëdash.

<sup>9-10</sup> Adashic, yuecash inchëshën Pabado usho Nuquin Papa: —Codinto yacnoquid dadpen Esuquidistu tantiaquid yanendac. Aden ëmbi chiac dacuëdenquiocquin comapenen chuideneta. Mibi dayun uaquidquio nebi. Aden dayun uasho ëbi tantiesabon mibi natiametiapimbo iquendac —quepanëdash Pabado caic. <sup>11</sup> Aden chiac Codinto caid yacno seta abentsëc matamiash ushë 6ted nidmec tabadquin Nuquin Papan chiaid Pabadon chuidonepanëdash.

<sup>12</sup> Adnubien nidaid Acaya caid yacnoquidon chushcaid chuisho tantishun matses icsambocsho cuidte chuiquid Cadion cuëmëdquid icnubi isadaidbon Pabado bedshun abi chushcaid Cadion chuinen buampanëdash. <sup>13</sup> Ambo bëquin puduedmiash: —Ancanquidën chiaid niacquin matsesën tantiatemaid nëid dadan chiosh —quepanëdash Pabado chieshënquido Cadion caic.

<sup>14</sup> Adoaquien Pabado onquetsenubi Cadiomba onquedopanëdash: —Tantiata, isadaidbo. Mibi chuïnu. Nëidën icsamboen nabanaid mibitedishun ëbi chuisho tantiatsiambi. <sup>15</sup> Aden chienquio yec, Nëidi mibi onquiaidbëdta min matsesën Nuquin Papa cain cuënaid icsamboen chuiquid nec, mibi quepec. Adecbidi, Mimbi natemaid chuiquidquio nëid dada nec, mibi queopec. Aden mimbi chuisho tantishun, Èbi chienda caimbi. Domanobo chuiquidën naden nata quequin chiaid niaquesa nëid nec, quequin isembi. Aden ëmbi isac mibi chushquiaid mibi chuiquid yacno nidshun chuitanta. <sup>16</sup> Aden chuishumbic Cadionën: —Aidtedi umanuc puduemeta —cac isadaidbo Pabado bëboedo Cadionën namiaidon puduemepanëdash. <sup>17</sup> Adoac pduenshumbic Nuquin Papan chiaid chuibante shubun iccuededquido chuiquid utsi Sostenes cuëmëdquid bedshun isadaidbon comapenen cuespanëdash. Adosho isun chiac Cadion, Icsamboen naic, quenquio yec otacquio tsadpanëdash.

<sup>18</sup> Adnubien Codinto caid yacno yuec tabadashic Esuquidistu tantiaquido nianec nidaid Sidia yacno nidoaic Pabado puduampanëdash. Abëdi Aquida aton chido chedobëd Codinto yacnoësh nidec shubu dadpen icquid Senquedeya caid yacno chopanëdash. Ambo tabadquin, Nuquin Papan ëbi dayun uaid cuidquin Edusaden yacno choshon piucquid menembi, quequin ismenuequin aton manëdaid Pabadon matasmepanëdash. <sup>19</sup> Ambo ushë abentsëc nidmec tabadash cano antabëdtoanec acte dapa potiash Epeso yacno choshon Aquida aton chido chedobëd, Nëmbobi tabadnu, quepanëdash. Adsho tantishun aid daëdi nianec Nuquin Papan chiaid chuibante shubu yacno nidshun isadaidbo Esuquidistu tantiamenuen Nuquin Papan chiaid chuibampanëdash Pabadon. <sup>20</sup> Aden chuibansho tantishun: —Adomboembidi chuibanuec ¿ada ëbëd yuec tabadtsia? —iccuededquidon caquien: —Nëbi padenquio iquebi. <sup>21</sup> Nuquin Papan shubu dadpen icquid Epeso caid yacno Esuquidistu chuibanuec nidoata cac choatsiabi —quianec auëshquio puduanec nidequi cano antabëdtopanëdash Pabado.

<sup>22</sup> Canon nidequi shubu dadpen icquid Sesadeya caid yacno choash Edu-saden yacno Esuquidistu tantiaquido iccuededacno nidshun isanec nidequi shubu dadpen icquid Antioquiya yacno Pabado choapanēdash. <sup>23</sup> Ambo choash yuec tabadashic padpidec puduanec, Esuquidistu tantiec iccuededquido tantiamequiono, quec nidequi nidaid Cadasia caid yacno choash tabadquin chuibanashic auēshquio nidequi nidaid Pidiquia caid yacno choash tabadquin Esuquidistu tantiec iccuededquid dadpen bēdamboen tantiamenuen chuibanoapanēdash Pabadon.

<sup>24</sup> Adnubien isadaidbo Apodos cuēmēdquid shubu dadpen icquid Adecandedia caid yacnoēsh Epeso yacno chopanēdash. Aidi dadpen tantiaquid yec Nuquin Papan chiampid tantiaquid nepanēdash. <sup>25</sup> Uan pado acten mentoanquid Esuquidistu chiec onquiaiduidi tantiaquin chuibanquid Apodos icpanēdash. <sup>26</sup> Aidi Nuquin Papan chiaid chuibante shubu yacno nidshun dacuēdenquiocquin ambi tantiaid chuibanpanēdash. Aden chuisho tantias, Ēbi yacno isec cho, queshun Aquidan aton shubu yacno buanshun Esuquidistu choaid ambi nadatiambocquin naidbēdtabi abi unēsash uincuenaid chuibanpanēdash Aquidabēdtan aton chidon Apodos tantiamequin.

<sup>27</sup> Aden Esuquidistu bēdamboen tantias Epeso yacno yuec tabadquin Esuquidistu Apodosēn chuibanpanēdash. Adec yuec tabadquin chuibanashic, Nidaid Acaya caid yacno nidnu, quepanēdash. Adec nidnuesho tantiasun, naden dada uashun Apodos menepanēdash Epeso yacnocquidon: Nēid dada uaid sananquid Apodos cuēmēdquid Esuquidistu tantiaquid nec. Ēmbi isaid neque. Yuedta, quequin dada uashun, Apodos Epeso yacnocquidon menepanēdash ma nidaid Acaya caid yacnocquido Esuquidistu tantiaquido Apodosēn menenu, queshun. Aden meniac puduanec nidec nidaid Acaya caid yacno choash puduedshun Esuquidistu tantiaquido bēdamboen tantiamenuen chuibanpanēdash. <sup>28</sup> Aden chuibanquimbic isadaidbo Esuquidistu tantiesabo icsho isun abēd onquequin, Esuquidistu Nuquin Papan Chomiaid nec, quequin Nuquin Papan chiampid Apodosēn chuibanpanēdash.

## 19

### *Epeso yacno Pabado abēd icquido tabadaid*

<sup>1</sup> Codinto yacno Apodos icnubi Pabado nidaid Pidiquia caid yacnoēsh puduanec podquedēn choec macuēsh dapa dectatocuētsenec shubu dadpen icquid Epeso caid yacno choapanēdash. Ambo choshon Esuquidistu tantiaquido istuidshun: <sup>2</sup> —¿Esuquidistu tantiaquido icshoda Nuquin Papan aton Mayan mibitedi menepanēdash? —capanēdash Pabadon.

Adoaquien: —Nuquin Papan Mayan iquec, quequin tantiamboccombi —quepanēdash Epeso yacnocquido.

<sup>3</sup> Adoaquien Pabado: —¿Atotsi canuen mibi acten mentobampanēdash? —quepanēdash.

Adoaquien: —Uan padon chiaid tantiaquid icsho acten mentondashi —quepanēdash Epeso yacnocquido Pabado chiec.

<sup>4</sup> Adoaquien: —Mibi icsaid ēnta, queshun abimbo tantiaquidtedi acten mentobanquin, Ēbi tsibanec choquid Esus tantiaquid icta, quequin Uan padon chuipanēdash —quepanēdash Pabado Epeso yacnocquido chiec.

<sup>5</sup> Aden chiac, Esuquidistu tantiaquid nebi, quequin Epeso yacnocquidon chuisho tantiasun padpiden acten mentomepanēdash. <sup>6-7</sup> Aden aidtedi acten mentoacsho mēdanten Pabadon mamishbanac aid doseted Nuquin Papan aton Mayan menepanēdash. Aden meniac abi onquiacmaidēnquio onquec Nuquin Papa chiec cuēdēmpanēdash Epeso yacnocquido.

<sup>8</sup> Adashic Nuquin Papan chiaid chuibante shubun puduedshun Pabadon Nuquin Papabëd tabadaid chuibampanëdash. Cuembo tantiamenuquin ushë choaid 3ted nidmequin badiadquidën-badiadquidënquien dacuëdenquiocquin Nuquin Papan chiaid Pabadon chuibampanëdash. <sup>9</sup> Aden chuisho tantiash pamumëdabcimboec tabadquin, Tantiatiapibi, quequin utsin-utsinquien chieshëmënquioquin Esuquidistu icsamboen chuipanëdash. Aden chiac Esuquidistu tantiaquidobëd Pabado, Nidnu, quianec Nuquin Papan chiaid chuibante shubu yacnoësh pduanec nidec Tidano cuëmëdquidën chuibante shubu yacno choshon adomboembidi tantiamenuen matsesbëd onquequin Nuquin Papan chiaid chuibampanëdash. <sup>10</sup> Seta daëd matamequin adomboembi chuibampanëdash Pabadon. Aden chuibansho tantiash nidaneshun chiac nidaid Asia caid yacnocquidon tantiapanëdash. Adoac isadaidbobëd isadaidpembo Esus tantiaquido yampanëdash. <sup>11</sup> Epeso yacno Pabado tabadsho Nuquin Papan nadatiambocquid icmiacsho <sup>12</sup> Pabadon dada cuëscashun dashcute cuëshë buanshun daicsaid mishbanac bëdampanëdash. Adembidi Pabadon dada cuëscabanaidën nënquid mishac bëdampanëdash. Adembidi pashuaidtsen pamishac bëdanoapanëdash. Adembidi mishac mayan icsa dapuduempanëdash.

<sup>13</sup> Adnubien mayan icsa dapuduemenuen Pabadon chiacpaden tanquin isadaidbo utsibon: —Esus Pabadon chuiboedënquio dapuduen —capanëdash. <sup>14</sup> Pabado tanuequido isadaidbo chuiquid Esqueba cuëmëdquidën mado 7ted icpanëdash. <sup>15</sup> Aden chiaquien mayan icsa: —Esus iquec, quequin ëmbi tantiaid aidi nec. Pabado iquec, quequin ëmbi tantiaidbidi aidi nec. ¿Mibitedi tsutsi neque? Tantuanu. Chui <sup>16</sup> —qeshun nebudquin dashcute ched-chedcapamboen mayan icsan cuesactaniaqui shubu nuntanuësh pduenanec cuempanëdash Esqueban mado. <sup>17</sup> Adec cuensho isquidon chiac Epeso yacnocquid isadaidbobëd isadaidpembo dacuëdcuededpanëdash. Adec dacuëdquin, Dacuëdampambo iquec. Esuquidistu bëdamvocquid nec, quequin tantiabededpanëdash. <sup>18</sup> Esuquidistu tantiesa icboedi Esuquidistu tantiaquid yanec dacuëdenquio yec Esuquidistu tantiaquido iccuededacno nidshun abi icsaid chuibampanëdash. <sup>19</sup> Adquid dadpenshun icsamenuen ambi ompoquin naid ismenquiocboedombi, Nëbi adquid ictiapibi, quequin cuëte dëtsiadotanquin ambi ompoquin tantiamiaid dada uatetedi tantianuen bedash utsitsen icsabudnushe qeshun abitedi tauipanëdash. Aden tauiboed menequin piucquid dadpen bedtsiandac, quepanëdash. <sup>20</sup> Aden abi icsaid dada uate tauisho isquidon chuibanac Esuquidistu tantiaquid dadpen yampanëdash.

<sup>21</sup> Adashien Pabado: —Edusaden yacno nidnuequin nidaid Masedonia caid yacnocquido isbidanquin nidaid Acaya caid yacnocquidotsen isbidanec nidec Edusaden yacno choash tabadashic shubu dadpen icquid Doma caid yacnotsen nidtiadquio iquebi —quepanëdash Pabado. <sup>22</sup> Aden chiash Asia caid yacno abi tabadquin Masedonia caid yacno abia Timoteyobëdta Edasto nidmepanëdash Pabadon.

<sup>23</sup> Aid daëdi nidan Epeso yacno tabadquin Esuquidistu Pabadon chuibanaquien tantiesabo nëishpanëdash. <sup>24</sup> Adquid Demetedio cuëmëdquid Diana caidbimboecnuc nacnemequid icpanëdash. Aidëmbi ambi nacnemiaid menequin piucquid dadpen bedbampanëdash. <sup>25</sup> Aden Esuquidistu tantianu quesa icquin ambi Dianabimboecnuc nacnenta caidobëdta abipadquid Diana nacnemequid utsibo iccuededmeshun Demetediton nadopanëdash: —Nuqui tantiaid Dianabimboecnuc nacnenshun menequin piucquid dadpen



nuqui bedbanec. <sup>26</sup> Aden nanubi nidaid utsi yacnoësh Pabado cuëmédquid nëmbo choshon utsi comapenen chuibanac Epeso yacnocquid dadpembédta nidaid Asia caid yacnocquid dadpeshun tantiec. Dianabimboecnuc nacnenaid tiboquesa iquec. Adquid matsesën tantiaid abimbo ictiapimbo iquec, quequin Pabado chiec. <sup>27</sup> Aden chiac matses dadpeshun tantiash Dianabimboecnuc nacnenquido icsambo iquec, quetsiash ëbitedi caic. Adecbidi, Dianabimboecnuc nacnenaidbéd abi tabadte shubu uashunaid icsambo iquec, queoapec. Adecbidi Dianabimboecnuc nacnenaid tiboquesa icsho matsesën tantienquio ictiadquidi nec, queoapec Pabado. Aden chiac nidaid Asia yacnocquidon dadpeshun Diana tantiaboedombi padenquio yampec. Aidëmbi tantienquio yanshun aidbimboecnuc nuqui nacnenaid bedenquio iquendac —quepanédash Demetedio.

<sup>28</sup> Aden chiac ambi chomeboedtedi, Piucquid ëbi menequin ëmbi nacnenaid matsesën padpiden bedenquio ictsiash, quec nëishash: —Epeso yacnocquidon tantiaid Diana bédambo iquec —quec comapenec cuëdcuededpanédash. <sup>29</sup> Adece comapenec cuëdcuededsho tantiash Epeso yacnocquid utsibo aidobéd cuëdcuededpanédash. Adece cuëdcuededquin nidaid Masedonia caid yacnoësh Pabado béd choboed Cayobédta Adistadico bedshun iccuededte shubu yacno cuëdcuededquidon buampanédash. <sup>30</sup> Aden aid daéd bedshun buansho isquidën chiac Pabado, Iccuededte shubu yacno nidnu, qesho tantiashun: —Padi. Ambo nidenda —capanédash Esuquidistu tantiaquidon. <sup>31</sup> Adembidi, anocquido chuiquid utsin-utsinquien Pabado chuioapanédash.

<sup>32</sup> Adnubien cuëdcuededquidon Cayobédta Adistadico bedshun buansho isash matses dadpen, ¿Atotsieshun aid daédi bëo? quequin tantienquio yec tabadpanédash. <sup>33</sup> Adnubien, Nuqui tantiacpadomboen chuitan, quequin isadaidbon Adeccandedo cuëmédquid nënantanquio tsicunepanédash. Aden tsicunequien nidtoash: —Tantia. Chuinu —quequin <sup>34</sup> daëdpactsëc chiec onquesho tantiash onqueboedi ënédash tabadnubi: —Isadaidbo aid nec —quesho tantiash: —Epeso yacnocquidon Diana cain ambi tantiaidbimboecnuc nacnenaid bédambo iquec —quec baded-badedquieque cuëdcuededpanédash.

<sup>35</sup> Adece cuëdcuededshobien Epeso yacnocquidon naden nata quequin chiaid dada uaquidën ënëdmenequin nadopanédash: —Epeso yacnocquidon tantiaata. Chuinu. Diana caidbimboecquid abucuësh paëdaidbimboecnuc nacnenaid nuqui comapenen tantiaidbédta abi tabadte isquido nuqui nec. Adquid Epeso yacnocquido nec, quequin nidaid utsi yacnocquidon tantiec. <sup>36</sup> Aden utsibon tantiec, quequin tantiaquin icsamboen nainda. <sup>37</sup> Dada daéd mimbi nëmbo bëboed Diana caidën shubun puduedambocosh. Adembidi ampiambo iccosh. Adecbidi, Diana caid chiec icsamboec onquenquiocosh. <sup>38</sup> Adenquio icnuc Demetediobéd icquido abi chushquiaid chuinec Epeso yacnocquidon naden nata quequin chiaid tantiaquid yacno nidshun <sup>39</sup> mimbi tantiacpaden chuita cuëdcuededenquiocquin. <sup>40</sup> Comapenec cuëdcuededec qesho tantiash ancanquid dapan Epeso yacnocquido bédamboen tabadmeta caid yacno nidshun chiac, Ancanquid dapan chiacpadec Epeso yacnocquido tabadenquio iqueque. Cuëdcuededquido chome, nuqui catsiash. Aden chomiace ¿atotsi nuqui chuipe? <sup>41</sup> Aidën nuqui chomenushe quiash min shubuno nidaneta —capanédash Epeso yacnocquidon naden nata quequin chiaid dada uaquidën. Aden chiac Demetediobéd iccuededquido nidanepanédash.

*Masedonia yacnocquido isbidanec nidequi Quedesia yacnocquido isbidanec nidaid*

<sup>1</sup> Natia cuëdcuededboedo nidanian Esuquidistu tantiaquido chomiash Pabado: —Nidaid Masedonia caid yacno nidoaibique. Bëdamboec tabadta —quianec Epeso yacnoësh puduanuc abëdi nidondabi. <sup>2</sup> Auëshquio puduanec nidquin nidaid Asia caid yacnocquid utsi-utsien chuibidanec nidaid Quedesia caid yacno choapondash Pabado. <sup>3</sup> Ambo choash ushë abentsëc chotsëcnuc nidmec tabadash: —Nidaid Sidia caid yacno nidnu —quepondash. Adsho tantiaashun: —Ambo nidacsho mibi cuesunenuequin isadaidbon cainec —cac nidaid Masedonia caid yacno Pabado nidoapondash. <sup>4</sup> Nidaid Masedonia caid yacno choash Pabado tabadnubien abëd capuquido bëyucanec nidaid Asia caid yacno nidpondash. Abëd capuquido nëidted icpondash. Nëidic, shubu dadpen icquid Bedeya yacnoësh choquid Sopated cuëmëdquid; utsibo shubu dadpen icquid Tesadonica yacnoësh choquido Adistadico cuëmëdquidbëd Secundo cuëmëdquid; utsibic, shubu dadpen icquid Dedbe caid yacnoësh choquid, Cayo cuëmëdquid; utsibobi, nidaid Asia yacnoësh choquido: nëidic, Timoteyo cuëmëdquid, utsibic Tiquico cuëmëdquid, utsibic Tedopimo cuëmëdquid. Aidedi icpondash. <sup>5</sup> Aidedi bëyucanec Asia yacno nidec shubu dadpen icquid Todoas caid yacno choash tabadquin Pabado caimpondash. <sup>6</sup> Aidedi nidpan nami uainquioctequid pete ushëtedi tantiec tabadanec Pabadobëd cano antabëdtoanec nidec 5tedec ushun bëyucamboed istuidpondash. Ambo shubu dadpen icquid Todoas caid yacno 7tedec ushec Pabadobëd icquido tabadoapondash.

*Eyutico unësacsho uincuemiaid*

<sup>7</sup> Todoas caid yacno tabadequi dominco ushën Esuquidistu tantiaquidobëd iccuededquin Pabadobëd icquidon Esuquidistu unës uate tantiaquin pan cuësh-cuëshun pebededpondash. Aden piashic Pabado, Badiadash nidebi, quiash yuec onquepondash inchëshpotsembo yantsëcquiec. <sup>8</sup> Aid onquiacno shubu abentsëquën tacpan uaid 3tedi icpondash. Abuc tacpan yacno dectatoash quënën tabadnubi tabote dadpen chënquepondash. <sup>9</sup> Pabado onquenubi nëbi caniaid, Eyutico cuëmëdquid, iste shëcuë yacno tsadec ushcasmash ushtotanec abucuësh paëdpondash. Adec paëdsho isash bud-budshun unësacsho isbedednubien <sup>10</sup> Pabadotsen budquin dayumbudec: —Unësboedi abi tibiquianeque. Shubicuededenda —quepondash. <sup>11</sup> Aden chiash abuc quënë yacno padpidec dectatoashun abitedishun pebededpondash. Aden piash tabadec Pabado utsibëd onquecuededpondash badiadbudtsëcquiec. Adec badiadbudbon Pabadobëd icquido shubu nuntanuësh puduem-puduenubien <sup>12</sup> paëdboed aton shubuno utsibobëd nidpondash bëdambo yec.

*Todoas yacnoësh puduanec Mideto yacno chote*

<sup>13</sup> Adashic Pabado: —Podquedën nidebique. Shubu dadpen icquid Ason caid yacno nidshun anoshon ëbi cainta —quianec nidpondash Pabado. Adanec aid nidnubi Todoas yacnoësh abëd capuquid utsibobëd puduanec nidequi cano antabëdtoanec Ason yacno nidoapondabi. <sup>14</sup> Adec nidequi Ason yacno choshon istuidac Pabado ëbëdi cano antabëdtoanquin potiash shubu dadpen icquid Mitidene caid yacno choapondash. <sup>15</sup> Auëshquio puduanec nidec badiadash acte nënantan nidaid nacnëdquid Quio caid datambidanec nidash badiadash acte nënantan nidaid nacnëdquid utsi Samos caid datambidanec shubu dadpen icquid Mideto caid yacno choapondash. <sup>16</sup> Ambo choash: —Edusaden yacno badedquio nidebi. Adec ambo

nidnuequin nidaid Asia caid yacno tabadenquiocquin shubu dadpen icquid Epeso caid datanembi. Isadaidbon chidon bëyuc tishampid dada bacuë unësmenquiocquin matante tantiaid ushë chonoc Edusaden yacnombo tabadebi quequin Epeso datanembi —quepondash Pabado.

*Epeso yacnocquido tsusiobo Pabadon chuibanaid*

<sup>17</sup> Adashic Mideto caid yacno tabadtuidshun Epeso yacnocquido Esuquidistu tantiaquido tsusiobo Pabadon chomepondash. <sup>18</sup> Aden chome-shun naden aido chuipondash: —Chiembique. Tantiata. Èbi ènden nidaid Asia caid yacno choash mibëd yuec tabadquin nabanaid mibitedishun istenepondac. <sup>19</sup> Isadaidbo utsibon Esuquidistu tantiesa icquin cuesunete bunquin mëyampondashi. Aden mëyanaqui Nuquin Icbon èbi chuibeneta cacpaden èbi bunaid tantienquiocquin ambi chiaid mibitedi chuibanondambi. Tantiesa icsho isash shubiquiondabi. <sup>20</sup> Esuquidistu mibitedi bëdamboen tantiamenuen matses dadpen iccuededacnoshon chuibanondambi. Adem-bidi shubu utsin-utsinquie puduedcuenequin chuibanondambi. <sup>21</sup> Nuquin Papan chiaid abimbo tantiaquin mibi icsaid ènshun aton Mado Esuquidistu tantiaquid icta, quequin isadaidbobëdta isadaidpembo chuibanondambi.

<sup>22</sup> “Aden chuibanshobi Nuquin Icbon Mayanën: Edusaden yacno nidta, quequin chuioposhi. Aden aidën chuibocpadequi nidebi. ¿Atotsi èbi capatsiash Edusaden yacnocquidon? quec dacuëdenquio yec nidebi. <sup>23</sup> Shubu dadpen yacnoshon-yacnoshonquien Nuquin Papan Mayanën èbi naden chuided-chuidedec: Mibi mëyanquid Edusaden yacno iquendac. Adecbidi mibi nauedte quënë iquendac, quequin chioshi. <sup>24</sup> Aden Nuquin Papan Mayanën chuisho tantiashi, Èbi cuesunepanundac, quenquio yec Edusaden yacno nidoaibi. Esuquidistun èbi chuibeneta cacpaden naimbudquin utsi-utsiec yacno nidshun Esuquidistu abimbo tantiaquid Nuquin Papabëd tabadte iquec, quequin chuibanembi.

<sup>25</sup> “Nëshunquio Nuquin Papan chiaid èmbi chuibansho mibitedishun tantiabonndaiddon nëuëshquio èbi nidacsho mimbi isoainquio iquendac. <sup>26</sup> Èmbi nëshunquio Esuquidistu mibitedi chuibanac, Esuquidistu chiambo iccoshi, quetiapimbo mibitedi iquendac. <sup>27</sup> Tantienquioctsiash, quenquiocquin Nuquin Papan tantiacpaden chuibanombi. <sup>28</sup> Aden chuibanash nëbi nidebi. Èbi nidan Esuquidistu tantiaquido nabanec tabadaid isbanta. ¿Nuquin Papan chiacpadectabi tabadeque? Isnu, quequin isbanta. Adem-bidi Esuquidistu tantiaquid utsibo bëdamboen isban icsamboen nabanec tabadnushe queshun. Nuquin Papan Mayanën aido isbanquin chuiquid mibi icmioshe. Adota. Aido Nuquin Papa yacno tabadmenuec Esuquidistu unëspanëdash. <sup>29</sup> Èbi nidan abimbo chiachimboen chuiquid Esuquidistu tantiaquido chuiquid icnuec choendac. <sup>30</sup> Adem-bidi mibëdi iccuededquin utsin-utsinquien Nuquin Papan chiaid abimbo chiachimboen muaquin chiendac. Esuquidistu tantiaquid chuiquidquio icnuequin adoendac. <sup>31</sup> Adquid Esuquidistu tantiec iccuededquido cuëshëdmequid neque. Ista. Adquid iquendac, quequin mibëdi tabadquin ènenquiocquin chuibanondambi. Adquid choec, quequin mibitedi chiec shubiondabi.

<sup>32</sup> “Bëdamboen chuibanombi, quequin tantiaquin mibi nianembi. Esuquidistu tantiaquid iquec, quequin ambi chiaid Nuquin Papan mibi tantiamendac. Aden tantiamequin mibi bëdambo icmeshun abëdi tabadmendac. <sup>33</sup> Mibëd tabadec, Min piucquid bec cho, quesa niondabi. Adecbidi, Min dashcute bec cho, quesa niondabi. <sup>34</sup> Èmbibi shubumpi nacnenshun menequin piucquid bedshun con na bedondambi. Adem-bidi nacnenshun

bedshun ëbëd capuquido menebanondambi. <sup>35</sup> Adembidi chonoadshun aton na bedshun natiapimbocquid meneta, quequin mibitedi ismebanondambi. Nuquin Icbo Esuquidistu nidaidën tabadec nadpanëdash: ‘Utsin natiapimbocsho menequid Nuquin Papan bëdambo iquebi camiaid nendac. Nabanenquio yec bedshumënquidquio icsho Nuquin Papan bëdambo iquebi camenquio iquendac,’ —quequin Esuquidistun chiacpaden Epeso yacnocquido tsusiobo chuipondash Pabadon.

<sup>36</sup> Aden chiashic Pabado Nuquin Papa chuineuc utsibobëd danëshën sebudcuededash onquecuededpondash. <sup>37</sup> Aden Nuquin Papa chiec onqueshumbic nidtocuededshun abitedishun Pabadon chuiboed tantiaquin Pabado dayumbededquin shubi uabededpondash. <sup>38</sup> Ëbi padpiden mimbi isoainquio iquendac, Pabado qesho tantiash shubicuededpondash. Adec shubiquin dayumbudash unësquio yec Epeso yacnocquido tsusiobo Pabadobëd cano yacno nidanepondash.

## 21

### *Edusaden yacno Pabado nidoaid*

<sup>1</sup> Epeso yacnocquido tsusiobo acte cuëman tabadnubi cano antabëdtoanec Pabadobëd capuquido nidquimbi cuebi potiash acte nënantan nidaid nacrëdquid Cos caid yacno choapondash. Badiadnuc auëshquio puduanec nidec acte nënantan nidaid nacrëdquid utsi Dodas caid yacnotsen choashic puduanec nidequi shubu dadpen icquid Patada caid yacno choapondash.

<sup>2</sup> Ambo choashic nidaid Penisia caid yacno cano dapa utsin nidnuequid istuidash antabëdtoanec Pabadobëd capuquido nidoapondash. <sup>3</sup> Adec nidquimbi acte nënantan nidaid nacrëdquid Chipide caid datambidanec nidaid utsi Sidia caid yacnotsen choash shubu dadpen icquid Tido caid yacno choapondash. Ambo choshon ambi ansandoshon bëaid icbo yacno buamepondash. <sup>4</sup> Aden buan-buanubi Esuquidistu tantiaquido yacno nidane puduedash 7tedec ushec Pabadobëd capuquido tabadpondash.

Ambo tabadnubi, Edusaden yacno Pabado cunesunenequid iquec, quequin Nuquin Papan Mayanën tantiamiac aidon, Edusaden yacno nidenda, quequin Pabado chuipondash. <sup>5</sup> Aden chiaqui cano icbo nidnuesho isash padpidec cano antabëdtoanec, Nidnu, quepondash Pabado. Aid nidnuesho isash Esuquidistu tantiaquido bënëbëdi aton chido aton bacuëbo chedo Pabadobëd acte cuëmano choash Nuquin Papa chiec onquecuededpondash.

<sup>6</sup> Adec Nuquin Papa chiec onqueshun, Nidec nid, cac Pabadobëd icquido cano antabëdtoanubien Tido yacnoësh acte cuëmano choboedo aton shubuno nidaneopondash.

<sup>7</sup> Adec cano antabëdtoanec auëshquio nidec shubu dadpen icquid Tode-maida yacno choash Pabadobëd capuquido tabadtuidpondash. <sup>8</sup> Adec anocquidobëd tabadec badiadash cano antabëdtoanec nidec Sesadeya caid yacno choash Uedipen shubun puduedpondash. Esuquidistu tantiaquidon chido nianta meneta caid utsi 6tedibëd Uedipe icpondash. <sup>9</sup> Aidën champibo 4tedi aton bënënen bedambocquidtedi icpondash. Aidon Nuquin Papan naden nanun chiaid tantiaquin chuibanquid icpondash.

<sup>10</sup> Adec Uedipebëd yuec tabadnubi Nuquin Papan naden nanun chiaid chuiquid utsi Accabo cuëmëdquid nidaid Udeya yacnoësh chopondash.

<sup>11</sup> Adec choshon Pabadon tsiute bedash tataniadash mëtaniadash Accabo nadpondash: —Nuquin Papan Mayanën naden ëbi chioshe. Tantiata. Chuinu. Ëmbi nabocpadomben isadaidbon Edusaden yacno tabadquidon nëid tsiute

icbo bedshun tataneshun mētaneshun buanshun, Unēs uata, quequin isadaidpembo menendac —quepondash Accabo Pabado chiec.

<sup>12</sup> Aden Accabon chuisho tantiash shubiquin Pabadobēd choboedon Uedipen shubun icquidobēdtan, Edusaden yacno nidenda, quequin Pabado chuoapondash. <sup>13</sup> Adoaquien: —¿Atotsi canuen shubiquin ěbi icsambo icme? Edusaden yacno nidshun Nuquin Icbo Esuquidistu chuibansho ěbi taneshun unēs uatsiash, quequin tantiaquin abi Esuquidistu chuibanuna —quepondash Pabado. <sup>14</sup> Adoaquien, Nidenda, caqui niacbidanec, Edusaden yacno nidebi, queoapondash Pabado.

Adec, Nidebi, qesho tantiashun: —Ma Nuquin Icbo bunacpadec nidpanuna —capondash.

<sup>15</sup> Aden chiashic Sesadeya yacnoēsh puduanec Edusaden yacno Pabadobēd capuquido nidoapondash. <sup>16</sup> Adec nidsho isash Sesadeya yacnocquid Esuquidistu tantiaquid utsi-utsiec Pabadobēd nidquin Menason cuēmēdquidēn shubu yacno buanac puduedpondash. Aid shubu icbo Chipide yacnoēsh choash Edusaden yacno tabadquid Esuquidistu tantiabenquidbidi nepondash.

### *Pabadon Acobo isaid*

<sup>17</sup> Adec Edusaden yacno choacsho Esuquidistu tantiaquidon Pabadobēd capuquidtedi Pabadobēdtabi yuedpondash. <sup>18</sup> Aden yuedac tabadash badiadash Acobo isec nidoapondash. Acobobēd Esuquidistu tantiaquido tsusiobotedi icpondash. <sup>19</sup> Adec nidec ambo puduedshun, Mibi isec chobi, quequin, Ěmbi Esuquidistu chuibanubi Nuquin Papan tantiamiac isadaidpembo dadpen Esuquidistu tantiaquido yanosh, quequin Pabadon chuipondash.

<sup>20</sup> Aden chuibanac Nuquin Papan naid bēdambo iquec, quiash Pabado caic nadpondash: —Nēmbo Esuquidistu tantiaquid isadaidbo dadpen iquec. Aido Nuquin Papan Moises dada uamiampid, Naden nata, quequin chiaid tantiaquido nec. <sup>21</sup> Adquidombo icquin, Min bacuēbon shui dēbid dētemenda, quequin isadaidpembo Pabadon chiec, qesho tantiash, Nuquin Papan, Naden nata, quequin chiaid niacmequid Pabado nec, quequin icsamboen tantiec aido tabadec. <sup>22</sup> Aden chiec tabadquin mibi nēmbo choaid tantiash mibi cuesunete buntsiash. Mibi cuesunete bumenuquo icmenuequin ¿Atotsi nuqui napeba? <sup>23</sup> Naden nac bēdambo ictsiashe. Tantia. Chuinu, Pabado. Nēmbo ěbēd icquido Nuquin Papauidi tantiec tabadnuequid daēd-daēdquiec iquec. <sup>24</sup> Nuquin Papan ěbi bēdamboen dayun uadenesho ismenu, quiash nidaid Quedesia yacnoēsh, Ěbi matas, qesho matasac mibi: “Edusaden yacno choash Nuquin Papa tabadte shubu uashunaid yacno nidash puduedshun shubu nacnuequid piucquid menembi,” quepondac. Nēbimbobi Edusaden yacno mibi choac. Nēid dadatedibēd Nuquin Papa tabadte shubu uashunaid yacno nidshun mimbi ěnden chiondacted piucquid meniac, Pabado icsambo iquec, quequin chuiboedombi, Nuquin Papan, Naden nata, quequin chiapaden naquidquio Pabado nec, quequin tantiatsiash. <sup>25</sup> Ěmbi isadaidpembo Esuquidistu tantiaquid utsibo dada uaquin naden chuioaombi: “Nuquin Papan, Naden nata, quequin chiaid dada uamiampid nēidtedictsēqui mimbi natequid nendac. Nēidic, Nuquin Papan uaidbimboecnuc nacnenaaid tantiaquidon pete sanaid penda; adembidi, min chiduidtsēqui chudta; adembidi chidon min bēnēuidi chudmeta; adembidi, nēish cuesaid intacchobi codocaid penda.” Aden dada uabanquin isadaidpembo chiombi —quepondash Acobo Pabado chiec.

<sup>26</sup> Aden chiaquien badiadash Nuquin Papa tabadte shubu uashunaid yacno dada 4tedbéd choash Pabado, Nēidted dadabēdtambi ěmbi Nuquin Papan chiac ted piucquid meniombi, quepondash Nuquin Papa tabadte shubu uashunaid yacnocquid chiec. Aden chianec nidoapondash.

### *Pabado bedaid*

<sup>27</sup> Adashic 7tedec ushquin naimbudnubi Pabado Nuquin Papa tabadte shubu uashunaid yacno nidoaic puduedash capusho nidaid Asia caid yacnoēsh choquidon isadaidbon ispondash. Aden isash Pabado bedmete bunec, Isadaidbo utsibo nēishmenu, quec: <sup>28</sup>—Isadaidbotedishun tantiata. Nēiděmbi Nuquin Papa tabadte shubu uashunaiděn puduedtemaid isadaidpembo yuedquin nēid shubu bēda icsa uameboed neque. Bednu. Uiděn uaic cho—quequin abimbo chiacbimboec onquecuededpondash. <sup>29</sup> Epeso yacnoēsh choquid isadaidpembo Tēdopimo Pabadobēd Nuquin Papa tabadte shubu uashunaid dayun capusho isash abimbo chiacbimboec onquecuededpondash.

<sup>30</sup> Aden chiac, Icsambocquid bednu, quianec titinguec cho-choshon Pabado bedshun nimbanquin umanuc buanac Nuquin Papa tabadte shubu uashunaid isquidon shěcuē bětashpondash. <sup>31</sup> Aden Pabado buanec, Cuesunenu, quec cuēdcuededsho tantiashun chuitanac <sup>32</sup> abi chuiquidbēd sondado cho-chosho isun Pabado cuesbededquin isadaidbon ěmpondash.

<sup>33</sup> Adec choshon sondado chuiquiděn bedtan cac Pabado bedshun shocosh bucun mětanemepondash. Aden mětanemiash: —¿Tsutsi nēid nepec? ¿Atotsi icsamboen naosh? —quepondash sondado chuiquid. <sup>34</sup> Adoaquien iccuededquid utsi-utsitsěcquien chiec onquecuedednubi utsi-utsitsěcquien utsi uain chiec cuēdcuededpondash. Adec dadpen cuēdcuededsho: —Tantiatiapibi ye. Quěněn nauedmenu. Buanec nid—quepondash sondado chuiquid sondado chiec. <sup>35</sup> Aden Pabado buanec nidec nauedte shubun dectatonobi cuēdcuededquidon tsucuscuededtsěcquien Pabado bednuesho isun Pabado abuc cadoanquin sondadon buampondash. <sup>36</sup> Aden cadoanquin buansho isash cuēdcuededquido: —Aidien cuesunetiad—quepondash sondado chuiquid chiec.

### *Ambi nabanaid iccuededquido Pabadon chiaid*

<sup>37</sup> Adec abi buanec shubun puduedtsenubi Pabado: —¿Ada ěbi onquesho tantiatsia? —quepondash Quidieco matsesěn onqueten Pabado sondado chuiquid chiec.

Adoaquien: —¿Quidieco matsesěn onqueten onquequidta mibi ne?  
<sup>38</sup> Chuiquid dapa icnuequin Equipito yacnocquid matses dadpen cuěte nibědacno buanaccondaidien nechitec, queshun mibi bedombi.  
<sup>39</sup> Adoaquien: —Isadaidbo nebi. Nidaid Sidisia caid shubu dadpen icquid Tadso caid yacnoshon tishaid yec con matses chuibante bunebique. ¿Adabi oncame? —quepondash Pabado.

<sup>40</sup> Adoaquien: —Ai, onqueta—capondash sondado chuiquiděn.

Adoac abuc dectatoten nidtoash nidec, Otacquio tabad, quequin ismequin Pabadon mědante uic-uiccapondash. Aden nasho isash isadaidbo otacquio tantiec tabadsho isash: —Ebedeyon, nuquin onqueten mibi chuinu—quec nadec Pabado onquedopondash:

## 22

<sup>1</sup>—Ěmbi naid mibitedi chiembique. Isadaidbo tsusiobobēdtan isadaidbo utsibon tantiata.

<sup>2</sup> Adec aton onqueten Pabado onquesho tantiash isadaidbo otacquio tantiec tabadpondash.

<sup>3</sup> Aden tantiec tabadsho isash Pabado: —Ëbibi Isadaidbo nidaid Sidisia caid yacnoshon shubu dadpen icquid Tadso caid yacnoshon tishaid nebi. Aden ashunquio tishaqui Edusaden yacno choash canipondabi. Adec nēmo Edusaden yacnoësh canidosho nuqui tantiamequid Camadiedën nuquin tsusedpabon naden nata quequin chiaid tantiamepondashi. Aidon naden nata quequin chiaid tantiaquin adomboembidi nadeniombi mibitedishun nacpadembi. <sup>4</sup> Aden nabanquin Esuquidistu tantiaquido Nuquin Papan chiaid niacquido nec, quequin dadabēdta aton chido chedo bedmeshun mëyamequin quënën nauedmeshun unēs uamepondambi. <sup>5</sup> Ëmbi adobanquin naondaaid tsusio dapatedishun tantiec. Adondash, quequin chuitiadquio icquin aidon chuitsiash. Adembidi Damasco yacno nidshun Esuquidistu tantiaquid anocquido bedmeshun Edusaden yacno bēmenu, qesho tantiashun Edusaden yacnocquido tsusiobon, Ai, adotan, quequin dada uaid bedondambi Damasco yacnocquid tsusiobo ismenuen.

<sup>6</sup> “Adash, ushē abuctoan Damasco caid anoentsēqui choshobi abucuësh shocosh tabote dapa bed-bedquiacbimboec chēnquequin dēcatepondashi. <sup>7</sup> Adec chēnquequin dēcatiac nidaidën paēdshun nadec abucuësh onquesho tantiapondambi. ‘¿Atotsieshun ëbi mëyane, Saudo? Ëbi chui. Tantuanu,’ capondashi.

<sup>8</sup> “Adoaquimbi: ‘¿Con Icbomboda mibi ne?’ capondac.

“Adoaquien: ‘Nasaded yacno iccondaaid mimbi mëyanaid Esus nebi,’ capondashi.

<sup>9</sup> “Adnubic ëbēd icquidon shocosh bed-bedquiacbimboec chēnquesho isequi con Icbon chuisho tantienquio yec tabadpondash.

<sup>10</sup> “Aden dēcatiac uequin ëmbentsēqui tantiec: ‘¿Atotsimbi nape, Icho?’ quepondabi.

“Adoaquien: ‘Nidtoash Damasco yacno nidtan. Anoshon ëmbi nata quequin chiaid utsin mibi chiendac,’ capondashi Nuquin Icbon. <sup>11</sup> Adoaquini nidtoquin shocosh bed-bedquiacbimboec chēnquequidën bēshuacsho isun ëbēd icquidon mëdinanquin Damasco yacno buampondashi.

<sup>12</sup> “Adec Damasco yacno choash bēshuash ëbi tsadnubi Ananias cuēmēdquid ëbi isec chopondash. Aidi isadaidbon naden nata quequin chiaid naquidquio icsho isadaidbo utsibon bēdamboen isaidquio icpondash. <sup>13</sup> Ëbi yacno choshon aidën: ‘Saudo, abuc is,’ cac cuedoquimbi Ananias ispondambi.

<sup>14</sup> “Adsho isash Ananias: ‘Nuquin tsusedpabon Papa cain cuēnaidën, Nuquin Papan ambi tantiacpaden nata quequin chuiquin mibi tantiamendac. Adembidi ambi chomiaid, Icsa Nibēdquid mibi ismendac. Aidën chuisho mimbi tantiendac. <sup>15</sup> Aden aid isquin tantiashun utsi-utsien dadpen mimbi isaidbēdta mimbi tantiaid mimbi chuibenendac,’ quequin <sup>16</sup> chuishumbic Ananiasën: ‘¿Atotsianuen cainec tsade? Esuquidistu tantiaquid icquin mibi icsaid chuita ma mimbi icsamboen tantiaid ma paucpanuna. mibi paucacimboben utsibo ismenuen acten mentometa,’ capondashi Ananiasën.

<sup>17</sup> “Adoaqui, Edusaden yacno nidoash Nuquin Papa tabadte shubu uashunaid yacno nidec puduedash Nuquin Papa chiec onquec ushacimboben tsadpondabi. <sup>18</sup> Adec tsadquimbi Nuquin Icho ëbi chiec onquesho isnubi nadpondash: Mimbi ëbi chuibansho tantienquiocquid yec nēmbocquido mibi cuesunete buntsiashe. Edusaden yacnoësh badedquio nidtan, quequin Nuquin Icbon chuipondashi.

<sup>19</sup> “Adoaquimbi: ‘Aidon isnubi mibi tantiaquid dadpen bedmeshun quënën nauedmiondambi. Adembidi, aidon isoanubi mibi tantiaquid utsi-utsien comapenen mëyamiondambi. <sup>20</sup> Adembidi, mibi chuibanquid Esteban

cuëmëdquid utsibon cuënoten se-sequin unës uanubi se-sequidon dashcute chicshun sanacno tsadquimbi, Unës uata, capondambi. Isadaidbo tsusiobon ambobidi icquin ëbi onquesho tantiapondash. ¿Adondacshobi cuesunependabi iquec? quepondabi Nuquin Icbo chiec.

<sup>21</sup> “Adoaquini Nuquin Icbon: ‘Isadaidpembo yacno mibi nidmembique. Nidtan,’ capondash —quepondash Pabado ambi nabanaid iccuededquido chiec.

### *Pabado cuestsenaïd*

<sup>22</sup> Pabadon ambi nabanaid chuibansho tantiec iccuededquido otacquio tabadboed, Isadaidpembo, quec Pabado onquesho tantiash: —Tantiatiapibi. Adec onquequid isadaidbo utsibëd tabadenquio ictiadquidi nec. Aid unës uata —quec cuëdcuededpondash iccuededquido.

<sup>23</sup> Adec cuëdcuededec aton dashcute bëntsecquid canchepamboec dachiquidshun nidaïd putu bedtanquin abuc secapondash Pabadon chuiboed tantiatemaïd nec, quequin ismequin. <sup>24</sup> Adnubien, Cuesunenushe shubu nuntan buanta, quequin sondado chuiquidën chiac Pabado nuntan sondadon buanacsho isash, ¿Atotsi nasho isash isadaidbo nëïd cuesunete bumpeba? Ambi naid icsa chuimenuen comapenen paëmbocnoc cuesta, quequin sondado chuiquidën chuipondash. <sup>25</sup> Adoaquien cuate nidtsinacno Pabado buanshun cuatebëdta tanenuen podon bedshun shoyonaqui Pabado: —¿Atotsi canumbini shoyonquin nai? ¿Domanobon nidaïdënshun tishaid icsho ëmbi naid chuimiabida ëbi cuese? —quepondash Pabado sondado chuiquid chiec.

<sup>26</sup> Adsho tantiash sondado chuiquid puduanec nidec abi chuiquid comandante caïd yacno choash: —¿Atotsi natseno? Bëboed: “Domanobon nidaïdënshun tishaid nebi,” quiosh —quepondash sondado chuiquid comandante chiec.

<sup>27</sup> Adoaquien Pabado yacno nidshun comandanten: —¿Domanobon nidaïdënshun tishaidta mibi nepe? —capondash Pabado chuiquin.

Adoaquien: —Ai, domanobon nidaïdënshun tishaidquio nebi —quepondash Pabado.

<sup>28</sup> Adoaquien: —Domanobon nidaïdënshun tishaidpenquio ëbi icsho, ¿ada adquid ëbi icmetsia? quequin piucquid meniondambi —quepondash comandante Pabado chiec.

Adoaquien: —Con tan tishaid yec domanobo nebi —quepondash Pabado comandante chiec.

<sup>29</sup> Aden Pabadon chuïsho tantiash ambi naid chuimenuen cuatesemboedo nidanepondash. Aden chuïsho tantiash Domanobobi Pabado shocosh bucun mëtanemechitombi, quequin tantiec comandante dacuëdpondash.

### *Isadaïdbo tsusiobo iccuededacno Pabado buanaïd*

<sup>30</sup> Adshumbic, badiadshun ambi mëtanemeboed chicmeshun isadaïdbo tsusiobo iccuededacno Pabado buamepondash. ¿Atotsi nasho isash isadaïdbo nëïd cuesunete bumpeque? Tantiabono, quequin comandanten Pabado buameshun isadaïdbo dadpen iccuededacno puduedmeshun nënantanquio Pabado nidtomepondash.

## 23

<sup>1</sup> Aden nidtomiaquien isadaïdbo tsusiouidi comapenen isec: —Utsibo, ëmbi naid chuibanu. Tantiata. Nuquin Papan isnubi ambi naden nata quequin chiaïd nabanquidquio icteniobi —quepondash Pabado.

<sup>2</sup> Aden chuïsho tantiashun: —Muaquin chieque. Eccues —Isadaïdbo tsusio dapan Ananiasën cac Pabadon dayunquio icquidën Pabado eccuespondash.



<sup>3</sup> Aden ëccuesaquien Pabado: —Mibi icsaid nibëdadbimboec mibibi tsadsho Nuquin Papan mibi ëccuesmendac. Nuquin Papan naden nata quequin chiaid tantiembi, quequimbi ëbi ëccuesmequin Nuquin Papan chiaid ma mimbi niacpaboc —quepondash Pabado isadaidbo tsusio dapa caic.

<sup>4</sup> Aden Pabadon chuisho tantiash aton dayunquiocquidquo: —¿Aden Nuquin Papan isadaidbo tsusio dapa icta caid chiash dacuëdenquioda ique? —quepondash.

<sup>5</sup> Adoaquien: —Ëmbi chuiboed Nuquin Papan isadaidbo tsusio dapa icta caid nec, quequin tantiamboccombi. Aidi Nuquin Papan isadaidbo tsusio dapa icta caidquo icscho ëmbi chuibocpaden chienquo ictsenombi. Mimbi abimbo chioc. Ëmbi mibi chuiquid icmiaid icsamboen chienda, quequin Nuquin Papan dada uamiampic —quepondash Pabado.

<sup>6</sup> Aden chuishumbic, iccuededquid utsi-utsiec saduseyobo icnubi utsi-utsiec padiseyobo iquec, quequin tantiash: —Tantia. Chuinu. Padiseyobo nebi. Ëbibi padiseyobon tishmiaid nebi. Adquid yec, Unësash uincuentequid iquec, quequin tantiaquid nebi. Aden tantiaquid icscho, Icsambocquid nec, quequin ëbi mimbi chiec —quepondash Pabado iccuededquido caic.

<sup>7</sup> Aden Pabadon chiaquien saduseyobo, Uinciente nibëdendac, quequin ëmbi tantiacpaden Pabadon tantienquo iquec, quec comapenec onquecuedednubi padiseyobo, Uinciente iquendac, quequin ëmbi tantiacpaden Pabadon tantiec, quec comapenec onquecuededpondash. <sup>8</sup> Unësash uincuentequid nibëdec, quec saduseyobo. Adecbidi, Nuquin Papan uaid mayan bëdabëd ambi uaid utsi mayan nibëdec, queoaic saduseyobo. Padiseyoboen, Uincuentequid iquec, quec. Adecbidi Nuquin Papan uaid mayan bëda, ambi uaid utsi mayambidi iquec, queoaic.

<sup>9</sup> Aden ambi tantiacpaden chuibanec comapenec onquec saduseyobobëd padiseyobo natiambo cuëdcuededpondash. Adec onquec cuëdcuedednubi padiseyobo, Nëid dada bëdambocquid nec. ¿Mayanën chioshi, queshodambi muc nec capadi? Adecbidi, ¿Nuquin Papan uaid mayan bëdan chioshi, queshodambi muc nec caopadi? Padenquo iquembi. Pabadon chuiboed abimbo iquec, quepondash padiseyobo saduseyobo caic. <sup>10</sup> Adec comapenec onquec natiambo chushcanansho tantiashun comandanten: —Podon shoyonquin canite dëchicnushë queshun mënchicshun shubu nuntan bëoata —cac sondadon Pabado mënchicpondash.

<sup>11</sup> Aden mënchicshun shubu nuntan sondadon yuedaquien Pabado ushash badiadash padpidec inchëshën Pabado ushnubi Nuquin Icho chopondash: —Mimbi Edusaden yacnoshon ëbi chuibanacpaden shubu dadpen icquid Doma caid yacnoshontsen mibi chuibamembique. Dacuëdenquo yec dayacquo icta —capondash Nuquin Icbon Pabado chuiquin.

### *Pabado cuesunenu quequin ompoquin cainaid*

<sup>12-13</sup> Adec Pabadobëd Nuquin Icho onquebombien badiadash isadaidbo 40ted Pabado cuesuniabi icquin buna mëmunembi, quequin abimbo chiembi, quepondash. <sup>14</sup> Aden nanu quiash isadaidbo tsusiobo yacno nidash: —Pabado cuesuniabi icquin buna mëmunembi, quequin muenquiocquin chuibanombi. <sup>15</sup> Ëbitedishun ompoquin Pabado cuesunenuquin cainubien mimbi comandante chuitanta caid naden chuimeta: Pabadon naid bëdamboen tantianuna. ¿Ada padpiden isadaidbo tsusiobo iccuededte shubuno bëmeoatsia? quequin chuitan Pabado bëmeoatsiashe. Aden Pabado sondadon bësho Pabado cuesunenuna —quepondash Pabado cuesunenuquido isadaidbo tsusiobo caic.

<sup>16</sup> Aden aidon chuishobien Pabadon piauquën tantiashun Pabado yacno nidshun chuioapondash aton piauquën.

<sup>17</sup> Adoaquien Pabadon sondado 100ted chuiquid cho, cata cac nidshun aton piauquën chiac Pabado yacno sondado chuiquid chopondash. Adec chosho isun: —Nëid con piac nec. Aidi comandante chuite buneque. Aid yacno buanta —Pabadon cac <sup>18</sup> buampondash.

Aden Pabadon piac comandante yacno buanash sondado 100ted chuiquid: —Quënën nauedboed Pabado cuëmëdquidën ëbi chomeshun: “Con piac comandante chuite buneque. Aid yacno buanta,” cac bëombi —quepondash sondado 100ted chuiquid comandante chiec.

<sup>19</sup> Aden chiaquien Pabadon piac mëdinanquin udictsëc buanash comandante: —¿Atotsi ëbi chuinuec chō? —quepondash comandante.

<sup>20</sup> Adoaquien Pabadon piac: —Badiadshun isadaidbon ambi namiaid mibi yacno chomec. Aden chomiach nëmbo choshon naden chiec: “¿Ada isadaidbo tsusiobo iccuededte shubuno Pabado mimbi bëoapatsia? Aidën naid chuiban-sho bëdamboen tantianuna,” quiosh cata, quequin chomioshi, quequin mibi chiendac isadaidbo tsusiobon chomiaid. <sup>21</sup> Isadaidbon muaquin chiendac. Con cu Pabado buamenuen mibi aden chiendac. Comandanten Pabado bëmetsiash, quequin tantiaquin Pabado con cu cuesunenuequin caineque. Nidmenda. Con cu cuesunenuequid: “Pabado cuesuniabi icquin buna mëmunembi,” quiosh. Con cu cuesunenuen nëbimbobi podqued cuëmanshun ompodshon cainec —quepondash Pabadon piac comandante chiec.

<sup>22</sup> Adoaquien comandanten: —Isadaidbon chiaid mimbi chuiboed utsi chienquio yec nidec nid —capondash Pabadon piac chuiquin. <sup>23</sup> Aden Pabadon piac nidmeshun sondado 100ted icquido chuiquid daëd chomiash comandante nadpondash: —Ënden inchëshan Sesadeya yacno ma mibëdi mimbi namiaid sondado 200ted nidnu mitsana buanuequin nacnenta cata. Adomboembidi, cabayo catsadquid 70ted icquido chuiquin nacnenta, quequin chuioata. Adomboembidi shocosh sianten senuequin sananquid 200ted icquido chuiquin mitsana nacnenta, quequin chuioata. <sup>24</sup> Adembidi Pabado bëd icquido cobednadod Pediques yacno buanun cabayo nacnenta —capondash comandanten sondado 100ted chuiquid daëd chuiquin.

<sup>25</sup> Aden chuishumbic naden comandanten dada uapondash Pediques cobednadod caid chuiquin: <sup>26</sup> “Quëdaudio Disias nebi. Chuiquid dapa cobednadod caid, Pediques, mibi bëdambocquid icsho chuinu. Pabado ëmbi bedboed mibi yacno buamenuen dada uaimbique. Ëmbi dada uaid isec onqueta. <sup>27</sup> Nadquio iccoshe. Tantia. Chuinu. Pabado isadaidbon bedshun cuesunetsensho isun, Aidi domanobo nec, quequin utsin chiacpaden tantiashun sondado dadpembëd choquin mënchiccombi. <sup>28</sup> Aden mënchicshumbic, ¿Atotsieshun Pabado cuesunete bumpec? quequin tantianuen isadaidbo tsusiobo iccuededacno Pabado buamiombi. <sup>29</sup> Ambo buameshun isadaidbon chuisho tantiapombi. Aton tsusedpabon naden nata quequin chiaid niacquid Pabado nec, quequin isadaidbo tsusiobon chuiposh. Adembidi, ambi nabanaid Pabadon chuisho tantiashun quënën nauedenquioctiadquidi nauedmepondash, quequin tantiashumbi quënën nauedmeoapombi. <sup>30</sup> Aden Pabado quënën nauedmeoashumbic, Podqued cuëmanshun Pabado cuesunenuequin isadaidbon cainec, qesho tantiashun badedquio mibi yacno buamiombi. Adembidi, Pabado icsambocquid nec, quequin aid cuesunenuequido mibi yacno nidmembi. Adoac ma ambibi Pabadon naid icsa mibi chuipanuna.”

Aden Pabado chuiquin dada uashun ambi dada uaid Pabado buanquid menequin: —Pabadobēdta nēid cobednadod Pediques menenuen buanta —capondash comandanten.

<sup>31</sup> Aden comandanten dada uashun meniac aidēn chiacpaden Pabado buanec sondado aid inchēshēmbi shubu dadpen icquid Antipatidis caid yacno chopondash. <sup>32</sup> Ambo choash badiadshun sondado cabayo catsadquidonuicquid Pabado buanec nidnubi sondado utsitedi auchidi nida-neapondash. <sup>33</sup> Adec Pabado buanec nidequi Sesadeya yacno choshon abi chuiquid comandanten Quēdaudio Disiasēn dada uaidbēdta Pabado Pediques menepondash cabayo catsadquidon. <sup>34</sup> Aden meniaquien dada uaid isbanash: —¿Mitsicquid nidaidēn icquid mibi ne? —capondash Pediquesēn Pabado chuimenuen.

Adoquien Pabado: —Nidaid Sidisia caid yacnoshon tishaid nebi —quepondash.

<sup>35</sup> Adoquien: —Mibi icsambocquid nec, quequin chuiquido isadaidbo choacsho mimbi nabanaid chuimembi —quepondash Pediques Pabado chiec. Aden chiec onqueshumbic ēnden chuiquid dapa Edodes cuēmēdquidēn, utsibo abi chushquiaid chuimiondaid shubuno Pediquesēn buamiac ashunquid Pabado nauedsho isun: —Puduenanec cuenushe ista —capondash sondado chuiquin.

## 24

### *Pediquesēn tantianubi Pabadon ambi naid chiaid*

<sup>1</sup> Adashic, 5tedec ushash isadaidbo tsusio dapa Ananiasbēd tsusio utsibo Pabado icsaid Pediques chuinuec Sesadeya caid yacno chopondash ambi tantiacpaden chuinuequid Tedtudo cuēmēdquid bēquin. <sup>2</sup> Aido chosho isun Pediquesēn Pabado chomiacsho isun isadaidbo tsusiobon tantiacpaden chuinuequidēn Tedtudon naden Pediques chuipondash: —Mibi chuinu. Tantia. Chuiquid bēdambocquid icquin mimbi bēdamboen nabanac isadaidbo bēdamboec tabadec. <sup>3</sup> Mimbi aden nabansho isun, Bēdambocquid mibi nec, quequin mibi chiembi. <sup>4</sup> Aden chuishun mibi chieshmenquiocnuequin isadaidbon chushcaboed badedquid chuinu. Tantiata.

<sup>5</sup> “Nēid mimbi bēmeboed Pabado caidbēd ictiapimbo iquebi. Nēid Nasaded yacno iccondaaid tantiaquido tsusio nec. Aidēmbi nidaidtedi yacno nidshun ambi tantiaid chuibanquin isadaidbo comapenen chushcamequin cuēdcuededmiac cuēshēd-cuēshēdposh. <sup>6</sup> Aidēmbi Nuquin Papa tabadte shubu uashunaidēn puduedtemaid matses puduedmesho isun Pabado bedpombi. Bedash Nuquin Papan naden nata quequin chiampicpadembi cuidte bumpobi. <sup>7</sup> Aden cuidnu quenubien comandante Disias cuēmēdquid choshon Pabado mēnchicanquin buamposh. <sup>8</sup> Pabadon ambi naid chuisho mimbibi tantiaishun, Isadaidbo tsusiobon abimbo chiosh. Icsambocquid nec, quequin mimbi chuioapatsiac —quepondash isadaidbo tsusiobon tantiacpaden chuinuequid Pabado icsambocquid nec, Pediques camenuc.

<sup>9</sup> Aden Tedtudon chuiquin nainan isadaidbotedi, Ai, Tedtudon chiacpadec iccosh, quequin chuibededpondash.

<sup>10</sup> Adsho tantiaishun, Onqueta, quequin mēdante uiccaquin Pediquesēn ismiac Pabado nadec onquepondash: —Chuiquid dapan tantiata. Ēmbitsen chuinu. Dadpen seta matamequin con matses isadaidbo abi chushquiaid tantiaishun mimbi bēdamboen tantiacpaden namedenioc. Adquid mibi nec, quequin tantiaquin, Ēmbi naid chuibanec bēdambo iquebi, quec dacuēdenquid yec onquebique. Tantiata. <sup>11</sup> Edusaden yacno choash ambobi 12tedec

ushobi. Ēbi anoshon isboedon, Abimbo iquec, quequin nēmbō choshon mibi chuitsiash. Edusaden yacno choash Nuquin Papa shubu uashunaidēn puduedec Nuquin Papa tantianuec choapobi. <sup>12</sup> Ambo puduedash ut-sibēd chushcananenuio yec tabadsho istuidash, Icsambocquid nec, queposh. Adembidi chuibanquin utsibo nēishmequin chushcamenuio iccombi. Pabado icsambocquid nec, quequido Pabado chiaid abimbo iquec, que-tiadquidi nec. <sup>13</sup> Ēmbi naid Tedtudon chuibamboed, Abimbo iquec, que-tiapimbo iquec tsusiobo. <sup>14</sup> Nēiduidtsēqui abimbo iqueque. Chuinu. Tanta. Nuquin tsusedpabo chuimiapaden Nuquin Papan chomiaid tantiesa isadaidbo tsusiobo icnubi aid tantiaquid nebi. Adembidi Nuquin Papan naden nata quequin chiaid dada uamiampid tantiaquin nabanquidquio nebi. <sup>15</sup> Adembidi, matses unēsacsho Nuquin Papan uincuemiab abi tantiaquid abēdi tabadnubi abi tantiesa chian anēdēnquequid nēsecaindac, quequin tantiembi isadaidbo tsusiobon tantiacpadembi. <sup>16</sup> Aden tantiaquin Nuquin Papan, Bēdamboen mimbi naoc, capashuni, quequin bēdamboen nabanec tabadec nebi. Adembidi, matstedishun, Bēdamboen mimbi naoc, capashuni, quequin adomboembidi bēdamboen nabanec tabadec nebi.

<sup>17</sup> “Adequi nidaid utsi-utsiec yacno capucuenec tabadcuenequin, Edusaden yacnocquid isadaidbo bunec tabadec, qesho tantiash piucquid menenuc choapobi. Adembidi, Nuquin Papan bēdamboen dayun uabenioshi, quequin piucquid menenuc choapobi. <sup>18</sup> Aden menenuc abi tabadte shubu uashunaidēn puduedash ēbentsēqui capusho ēbi chushcaboedon istuidposhi. Bēdamboec tabadsho istuidposhi. <sup>19</sup> Ēbi capusho istuidquido isadaidbo nidaid Asia caid yacnoēsh choquido niosh. Aido, Pabado icsamboec tabadsho isombi, quepac caosh. Ambi chiaid abimbo icnuc nēshuntsen adomboembidi chuitiadquidi nec. <sup>20</sup> Adembidi isadaidbo tsusiobon: ‘Padiseyobo yec bēdamboquid nec,’ quequin ēbi anoshon chiacpadembidi nēshuntsen adomboembidi chuioatiadquidi nechitec. <sup>21</sup> Anoshon nēiduidtsēqui chiec comapenec cuēdobi: ‘Unēsash uincuentequid iquec,’ quequin chuisho tantiashun, Icsambocquid nec, quequin isadaidbo tsusiobon ēbi mibi chiec caimbi —quepondash Pabado Pediques chiec.

<sup>22</sup> Aden Pabado chuisho tantiash Pediques tantiauidquid iquec: —Nēbi mimbi aidtedquio chuibancho tantiembi. Comandante Disias nēmbō choan mibi padpiden chuimembi —quepondash Pediques Pabado chiec. <sup>23</sup> Aden chuishumbic naden Pediquesēn sondado chuipondash: —Shubuno Pabado buanshun puduednushe qeshun ista. Abi menenucquid abi isnuequid chedo chosho isun yuedta —quepondash Pediques ambi Pabado ista caid chiec.

<sup>24</sup> Adashic, daēdpactsēc ushash Pediquesbēd aton chido, Dusidia cuēmēdquid chopondash. Aton chido isadaidbo icpondash. Adec aton chidobēdi choshon abi yacno Pediquesēn bēmiacsho ambi tantiaid Esuquidistu Pabado chuibanac Pediquesēn tantiauidpondash. <sup>25</sup> Aden chuibanquin Pediques Pabado nadopondash: Utsin abi utsibēd chushcananaid chuibanacsho Nuquin Papan chiacpaden aido nametiad, quequin chuipondash. Adembidi, Icsamane quequin Nuquin Papan chiacpadenuidi nabanta, quequin Pediques chuioapondash Pabado. Adembidi, Esuquidistu tantienquio icsho chian anēdēnquequid Nuquin Papan nēsecanushe quequin Esuquidistu tantiaata, quequin Pabado chuioapondash. Aden Pabado chuisho tantiash: —Padi. Ēmbi naid nibēdsho isun padpiden chuimenuen mibi bēmeoaimbique. Nēbi nidec nid —cac Pabado nidpondash. <sup>26</sup> Adshumbic, adembidi abi yacno Pabado

Pediquesën bëmeded-bëmededpondash. Nidtiadquoio icquin piucquid Pabado ñbi menetsiash, quequin tantiaquin Pabado bëmiash aibdëd Pediques onquepondash.

<sup>27</sup> Adashic, seta daëd matamiash Podzio Pesto cuëmëdquid cobednadod yampondash. Aidi cobednadod yanuc nidnuequin, Nidta, cainquiocquin Pediquesën Pabado shubu nuntan niampondash naden tantiaquin: Pabado shubun nauedshun ëmbi niansho isash, Bëdambocquid nec, quequin isadaidbon ñbi cain chuibededpec, quequin Pediquesën Pabado shubun nauedshun niampondash.

## 25

### *Pabado ambi naid Peston chuimiai*

<sup>1</sup> Pesto cobednadod yanash Sesadeya yacno choash 3tedec ushanec Edusaden yacno nidpondash. <sup>2</sup> Adec Pesto Edusaden yacno choash tabadsho isadaidbo tsusiobo, Pabado chushcaquido: <sup>3</sup> —¿Ëbitedi bëdambo icmenuequin Pabado Edusaden yacno ada bëmeoatsia? —quepondash Pesto chiec. Pabado bësho cuesunenuquidon cainshun cuesunepec, quequin tantiaquin isadaidbo tsusiobon aden Pesto chuipondash.

<sup>4</sup> Aden chuisho tantiash Pesto: —Sesadeya yacnoshon nauedaid Pabado iquec. Ambo nidebi. <sup>5</sup> Pabado icsamboen naosh, quec utsi-utsiec ëbëdi nidshun anoshon Pabado naid icsa ëbi chuita —quepondash isadaidbo tsusiobo caic.

<sup>6</sup> Adashic, 10tedec ushash Edusaden yacnoësh puduanec nidec Pesto Sesadeya yacno choash ushash badiadash matses chushquiaid tantiec tsadte dapan tsadtoshon Peston Pabado bëmepondash isadaidbo tabadnubi. <sup>7</sup> Aden bëmiacsho isash Pabado dëcatec isadaidbo Edusaden yacnoësh chobedo Pabado naid chiec abimbo chiacbimboec onquecuededpondash.

<sup>8</sup> Aden isadaidbon chiaquien: —Ëmbimbo isadaidbon naden nata quequin chiaid niacamboccombi. Adembidi, Nuquin Papa tabadte shubu uashunaid yacno nidash aid shubun puduedtemaid isadaidpembobëd puduedambocobi. Adembidi, empedadod Doma yacno tabadquid, Sesad cuëmëdquidën chiaid niacamboccombi —quepondash Pabado.

<sup>9</sup> Adoquien: —¿Edusaden yacno buanac anoshon adomboembidida isadaidbo tsusiobo chuioatsia? —quepondash Pesto Pabado chiec. ¿Edusaden yacno Pabado ada bëmeoatsia? quequin isadaidbon chiacpaden nanuec Pesto adpondash. <sup>10</sup> Adoquien Pabado: —Domanobo ancaquidën empedadod caidën, Sesad cuëmëdquidën, Mibi yacnocquido bëdamboen tabadmequid icta, caid icquin mimbimbo chushcananquid bëdamboen tabadmeta. Isadaidbo icsamboen tantiaquin nainquioccombi. Abimbo Pabado chiec, quequin mimbi tantiec. <sup>11</sup> Icsambocquidquoio iquec Pabado unës uame, qesho tantiash, Adoanenda, quenquioctsiabi. Isadaidbon abimbo chiacbimboen chuisho tantiash, Pabado buanshun cuidta, quetiapimbo mibi iquec. Isadaidbo yacno buanta, mibi quenuc, Empedadod ëmbi naid chuite bunebi, quequin dada uaindami —quepondash Pabado Pesto chiec.

<sup>12</sup> Aden Pabado chuisho tantiash Pesto udictsëc nidash abipadquidbëd onquiash choash: —Sesad ëmbi naid chuite bunebi, mibi qesho aid yacno mibi buamenuna —quepondash Pesto Pabado chiec.

### *¿Atotsimbi Pabado napatsia? quequin Peston Aquidipa caid*

<sup>13</sup> Adashic daëdpactsëc ushash ancanquid utsi Aquidipa cuëmëdquidbëd aton chuchu Bedenise cuëmëdquid Pesto isedec chopondash. Sesadeya yacnocquido cobednadod Pesto yanosh, quequin chiac aid isec chopondash.

<sup>14</sup> Adec isedec choash dadpen ushec tabadsho isash Pabado chiec Pesto nadpondash: —Pediquesën quënën nauedmiaid Pabado cuëmëdquid chuinu. Tantiata. Aidi abi iquec shubu nuntan. <sup>15</sup> Aid ambo icnubi Edusaden yacno nidobi. Ambo ëbi choacsho isun, Pabado icsambocquid neque. Aidi unës uata, quequin isadaidbo tsusiobon chuiposhi.

<sup>16</sup> “Adoaquien, Mibi abëdi chushquiaid Pabadontsen chiamoconoc unës uata quetiapimbo iquebi. Domanobon naden nata quequin chiacpadpenquiocquin adotiapimbo iquebi, quequin isadaidbo tsusiobo chiombi. <sup>17</sup> Aden chiac nëmbo choshon abi chushquiaid aidon chuisho tantiec tsadnuen Pabado bëmiombi. <sup>18</sup> Aden Pabado bëmiacsho ëmbi tantiacpaden abi chushcaquidon Pabaton naid chienquiocposh. <sup>19</sup> Ëmbi tantiaidpenquio Esuquidistu unësash uincuenaid Pabaton tantiaid icsambo iquec, quequin chuiposhi isadaidbo tsusiobon. <sup>20</sup> Aden ambi tantiaidquio bëdamboen tantienquio yec nadpobi Pabado caic. Min matsesën naden nata quequin chiac tantienquio iquembique. Edusaden yacno buamiac mimbi naid anoshon chiac bëdambo ictsiash, quequin chiombi. <sup>21</sup> Adoaquien: ‘Empedadod, Sesad yacno nidshun ëmbi naid chuitiadquio iquebi,’ queposh Pabado. Aden chiac quënë yacnoshon aid puduedmetiapimbo iccobi. Nëmbobi Pabado quënën tabadec —quepondash Pesto Pabado chiec Aquidipa tantiamenuquin.

<sup>22</sup> Adoaquien Aquidipa: —Ëbi aidën chuibansho tantiate bunebi —quepondash.

Adoaquien Pesto: —Badiadshun aidëmbi chuisho mimbi tantiendac —quepondash.

### *Aquidipa ambi naid Pabaton chiaid*

<sup>23</sup> Aden Peston chiaquien badiadash bëdaidquio dasiuidash Aquidipabëd aton chuchu choash iccuededte quënën puduedash sondado chuiquido chuiquid utsibobëd aid daëdi tabadpondash. Aido tabadsho isun Peston Pabado bëmepondash. <sup>24</sup> Bëmiac Pabado nënantanquio nidtonobi Pesto nadpondash: —Ancanquid Aquidipan mibëd iccuededquidon ëmbi bëmeboed mibitedishun isec. Aidi chuinu. Tantiata. Isadaidbon, Nëid dada icsambocquid neque. Unës uame, quequin chioshi. Ëbi Edusaden yacno choacsho isun adoposh. Adomboembidi nëshun Sesadeya yacnoshontsen aidombidi chuoaposhi. <sup>25</sup> Aden chuisho tantishun nëid ambi naid chuimeoapombi. Aden Pabaton chiaidtsen tantishun, Nëid unës uatiapimbo iquebi, quequin tantiapombi. Aden ëmbi tantianubi, Empedadod yacno nidshun ëmbi naid chuite bunebi, quequin Pabaton chuiposhi. Adoac Doma yacno aidi buamenuna. <sup>26</sup> Aden buamenuen ¿atotsimbi dada uaqin empedadod chuipatsia? quequin tantienquiocquin Pabado ambi naid chuimeoaimbi ma aden chiac mibitedishun tantiaoapanuna. Aden tantishun, Naden dada uata, mimbi cac dada uatsiambi. <sup>27</sup> Ambi icsamboen naid nibëdnuc Doma yacno buametiapimbo iquebi —quepondash Pesto ancanquid Aquidipabëd iccuededquido chiec.

## 26

<sup>1</sup> Aden Peston chiaquien: —Mibibi onquequin mimbi naid chui. Tantanu —quepondash Aquidipa Pabado caic.

<sup>2</sup> Adoaquien Pabado nadpondash: —Ancanquid dapa Aquidipa mibi tabadnubi isadaidbon ëbi chushcaid chuibanec bëdambo iquebi. <sup>3</sup> Isadaidbon naden nata quequin chiaidbëdta abi onquiaid mimbi tantiec. Aden tantiaquid mibi icsho ëmbi nabanaid ëmbi chuibansho tantiata. Chuinu.

<sup>4</sup> “Ëbi tishondacnoësh canidosho con matsesën isadaidbon istenepondashi. Nëbi caniquid iquec Edusaden yacno choash tabadsho adembidi aidon istenepondashi. <sup>5</sup> Ëbi padiseyobo icquin padiseyobon naden nata quequin chiaid niaquesa nebi. Padiseyobon, Pabado adquid nec, quequin chuitiadquidi nec. <sup>6</sup> Unësash uincuenta iqueque. Aid cainec tabad, quequin Nuquin Papan nuquin tsusedpabo chiampicpaden chuiquin dada uamiaid tantiaquid ëbi icsho isash, Icsambocquid nec, quec isadaidbo. <sup>7</sup> Nuquin tsusedpa Acobo isadaid caidën madobon tsyuecquidon, Unësacsho Nuquin Papan uincuemete iquendac, quequin chiaid tantiaquin caimbudec. Aidon cainacpaden cainembi, qesho, Icsambocquid nec, capebi isadaidbo tsusiobon. <sup>8</sup> Nuquin Papan nadatiambocquin uincuemete chiaid mimbi tantienquo icpe.

<sup>9</sup> “Ënden ëmbitsen tantiauidquin shubu dadpen icquid Nasaded yacno ictened, Esus cuëmëdquid tantiaquid icsambocquid nec, quequin unës uamembi, qeshun adobampondambi. <sup>10</sup> Edusaden yacnoshon adquid dadpen mëyamepondambi. Isadaidbo tsusiobon, Adota, cac ëmbibi Esus tantiaquid bédambocquid icsho bedshun quënën nauedmepondambi. Unës uanu, qesho tantiash, Ai, unës uatiadquo iqueque. Adota, quepondabi. <sup>11</sup> Nuquin Papan chiaid chuibante shubu utsi-utsiec yacno nidtednidtedondabi aid mëyamenuc. Esus, Nuquin Papan madopenquo nec, aid camenuen mëyamepondambi. Adembidi nidaid utsi yacnoshontsen adquid istuidshun mëyameoapondambi.

<sup>12</sup> “Adobanec isadaidbo tsusiobon, Adota, quequin dada uaid buanec nidaid Sidia caid shubu dadpen icquid Damasco caid yacno nidondabi. <sup>13</sup> Adec nidquimbi ushë cuembo yanec ushë comapenec chënquequidën ëbëd icquidobëdta ëbi dëcatesho isondambi. Abimbo iquec, quequin mibi chuinu. Ancanquid dapan tantiata. <sup>14</sup> Aidën dëcatiac ëbitedi nidaidën uebudcuedondabi. Adec uequimbi con matsesën onqueten ebedeyon onqueten abucuësh onquesho naden tantiondambi: Saudo, ¿atotsieshun ëbi tantiaquido mimbi mëyampe? Ëbitsen mëyantiadpambocquin mimbi aid mëyanec, quec onquequin chiondashi.

<sup>15</sup> “Adoaquimbi: ‘¿Tsutsi mibi ne, Icbo?’ caondac.

“Adoaquien, Mimbi mëyanaid Esus nebi. <sup>16</sup> Ëmbi namiaid mibi icmenuc chobi. Esus isombi, quequin ¿ëbi chuibeneta caid nëbi mibi yanec? Ëbi chuibenequin mimbi isaïdbëdta ëmbi yuecshun ismetequid chuibeneta. <sup>17</sup> Aden ëbi chuisho mibi cuesunete bunquid isadaidbobëd Isadaidpembobobëd icsho mibi mënchiquendambi. Adquid chuibanta, quequin mibi nidmembi. <sup>18</sup> Aden chuibanac utsin-utsinquien pashuac bimboe choedëmbi tantiendac. Icsambocquid nebi, quequin tantienquiochoedi, Icsaobique. Ëbi pauc, Papa, quependac adquid. Mayan icsan yua icboedi Nuquin Papan bacué iquendac. Adquid yanash abi icsaid paucac Nuquin Papan bédambo icmiaid ëbi tantiaquid utsibëd iquendac, quequin Esusën chuipondashi.

<sup>19</sup> “Aid abucuësh onquesho tantiashun chieshenquiocquin chuibenimbi caimbi, mibi chuiquin Aquidipa. <sup>20</sup> Damasco yacnoshomba chuibanondambi. Anoshomba chuibanshumbic Edusaden yacnoshontsen chuibanondambi. Anoshon chuibanshumbic nidaid Udeya caid shubu utsi-utsiec yacnoshontsen chuibanondambi. Isadaidboba chuibanombi. Isadaidpembotsen chuibanombi. Mibi icsaid ënquin Nuquin Papa abimbo tantiaquin ambi chiapaden nabanta, quequin chiombi. <sup>21</sup> Aden chuibanquid yec Nuquin Papa tabadte shubu uashunaid yacno puduedash capusho isun isadaidbon bedshun cuesunetsenoshi. <sup>22</sup> Padnuen ëbi

dayun uaquid Nuquin Papa icquin isadaidbon cuesunenushe queshun cudasëmposhi. Adoac nëid ushënquio mibëdtabi mimbi namiaido mibi chuibanec nebi, ancanquid Aquidipa. Moisesën, Nadquio iquendac, quequin dada uampicpaden chuiquid nebi. Nuquin Papan chuimiaid utsibon, Nadquio iquendac, quequin chiampicpaden chuiquidbidi nebi. Aidon chuipampid nadquio iqueque. Tantia. <sup>23</sup> Nuquin Papan Chomiaid, Quidistu, mëyanac unësash uincuenaid yec ëbi tantiaquid ëbëdi tabadendac, quequin aton matsesbëdta isadaidpembo Quidistun chiendac, quequin chiampicpadec chopanëdash —quepondash Pabado iccuededquido chiec.

<sup>24</sup> Adec Pabado onquesho tantias: —Min tantiate icsabudash mibi onquec. Mimbi tantiaid dadpen iquec tantienquio yec onquechitequien mibi nec —quepondash Pesto Pabado caic.

<sup>25</sup> Adoaquien Pabado: —Bëdamboen tantiec onquebi. Ëmbi chiaid abimbo iquec, caimbi mibi ancaquid Pesto. <sup>26</sup> Ancanquid Aquidipan ëmbi chuibamboed abimbo iquec quequin tantiec. Aden aidën tantiasho dacuëdenquiocquin aid chiembi. Ëmbi chuibamboed ompoenquiocquin isquidon chuisho aidëmbi tantiapondash. <sup>27</sup> Nuquin Papan ambi naden nanun chiaid dada uamiampidon chiaid chuisho mimbi tantioc —capondash Pabado Aquidipa chuiquin.

<sup>28</sup> Adoaquien Aquidipa: —¿Mimbi chuiboedtedtsëqui tantiashtabi Esuquidistu tantiaquid yampe? —quepondash Aquidipa Pabado chiec.

<sup>29</sup> Adoaquien Pabado: —Esuquidistu tantiaquid ëbipadquid mibëd iccuededquidtedibi Nuquin Papan icmepashun. Nëid ushënquio daëdpactsëc chiombi. Aidtedtsëqui chiac tantiatiapimbocsho isun yuen chuibantsiambi ma Esuquidistu tantiaquid mibitedi yanueshun. Padnuen ma mëtaniaid ëbipadquid ma mibitedi iquenquiocpanuna —quepondash Pabado.

<sup>30</sup> Aden Pabado chuibanaquien ancanquid Aquidipa nidtopondash. Nidtosho isash Pestobëd Bedenise iccuededquid utsibo chedo nidtocuededpondash. <sup>31</sup> Adec nidtocuededash puduenash onquecuededec: —Chuibamboed icsamboen nainquioccosh. Adoenquiocsho unës uainquioctiad. Adembidi ënden quënën nauedenquiocpatecnëdan —quepondash ancanquido.

<sup>32</sup> Aden chiash: —Empedadod chuite bunebi Pabado quiambocsho quënën nauedacnoshon aidi mimbi nidmetsenosh —quepondash Aquidipa Pesto chiec.

## 27

### *Doma yacno Pabado buanaid*

<sup>1</sup> Adashic, Nëbi mëtaniaido nidaid Itadia caid yacno buanac bëdambo iqueque. Pabadobëdta mëtaniaid utsibo buanta, quequin sondado 100ted chuiquid Peston chuipondash. Aid sondado 100ted chuiquid Udio cuëmëdquid icpondash. Domanobo ancaquid tantiec aid cuëmëdacpadec Aucustobo nebi quec sondado 100tedbëdi abi chuiquid abibi cuëmëdpondash.

<sup>2</sup> Aden buanta cac Pabadobëdta utsibo bedshun acte cuëmano buanshun cano dapa Adadamitio cain cuënaid istuidpondash. Aid cano dapa istuidashien, Icho, nidaid Asia caid cuëman shubu dadpen icquid utsi-utsiec yacno nidtuidebi, quequin chuisho tantias Pabadobëd antabëdtopondabi. Adec antabëdtosho isash puduampondash. Pabadobëd icquid utsi Adistadico icpondash. Aidi nidaid Masedonia caid shubu dadpen icquid Tesadonica caid yacnoësh choquid icpondash.

<sup>3</sup> Adec cano antabëdtoanec nidquin shubu dadpen icquid Sidon caid yacno buampondash. Ambo choash, Mitsana nibëdeque. Mibi yuedquid yacno



nid. Aidon mibi menetsiash, quequin Pabado bēdamboen tantiaquin sondado chuiquidēn, Udion, chuipondash. <sup>4</sup> Adshumbic Sidon caid yacnoēsh puduanec nidquin potesho cunquequidēn bēquedtuīdac ushē choacmi cuenadtanquin acte nēnantan nidaid nācnēdquid Chipide caid datampondash. <sup>5</sup> Adembi nidaid Sidisia caid ēquē datanash nidaid Pampidia caid ēquētsen datanec nidaid Disia caid yacno choash nidquin shubu dadpen icquid Mida caid yacnotsen canon buampondash. <sup>6</sup> Ambo choshombic sondado chuiquidēn cano utsin nidnuequin nibēnquin istuidpondash. Nidaid Equipito caid yacno shubu dadpen icquid Adecandedia caid yacnoēsh choboedi nidaid Itadia caid yacno buanu caid istuidpondash. Aden aid istuidshun Pabadobēd icquido aid canontsen antabēdtomepondash. <sup>7</sup> Adec Mida yacnoēsh puduanash nidquin potec dadpen ushacsho cunquequidēn cano bēquedtuīdpondash. Aden bēquedac bēdiactśēc nidquimbi shubu dadpen icquid Nido caid ēquēbitsen datambidanec acte nēnantan nidaid nācnēdquid Quideta caid yacno buanoapondash. Uquē cuēma utsiuc Sadmon caid icpondash. <sup>8</sup> Ushē choacmi Quideta yauc cuenadtanec choquin shubu dadpen icquid Buenos Puedtos caid yacno buampondash. Udictśēc shubu dadpen icquid Dasia caid iccondash.

<sup>9</sup> Cunquequidēn bēquedac yuenquio potiactanetsēcquien buampondash. Comapenec cunquequidēn nuqui bēquedendac, quequin tantiaquin Pabadon nadopondash: <sup>10</sup> —Chuinu. Tantiata. Nēuēshquio puduanquin potesho cunquequid dapan bēquedshun cano chic-chictsiash. Acten mentoadmane quequin potenquio iquembi, quequin chuita —capondash Pabadon sondado chuiquid chuiquin. <sup>11</sup> Aden Pabadon chiaqui sondado chuiquidēn niacbidanquin cano icbobēdtan cano nidmequidēn nidnu quequin chiaid tantiapondash. <sup>12</sup> Cunquequid dapa cunquenubi Buenos Puedtos yacno tabadec iquen uanquid dapanquio nuqui iquenendac, quiash shubu dadpen icquid Penise caid yacno nidnuna. Ambo choash nuqui tabadendac cunquequid dapa cunquenubi, quequin utsitedishun chuipondash.

### *Acte dapa potesho cunquequid dapanquio cano bēquedte*

<sup>13</sup> Nuqui iquenendac, quequin tantiaquin bēdiactśēc cunquesho isun abi bunacpaden nanuequin cano uidēn uate shocosh yuēmbocquid indoash puduanquin Quideta cuēma anoentsēqui buampondash. <sup>14</sup> Adec nidequi udictśēc yanshobi ushē cho-choaid ēquēctśēcshun Quideta caid nidaid mananucuēsh cunquequid dapa choquin bēquedtuīdquin <sup>15</sup> icbon cano nidmetiapimbocnobi cano buampondash. <sup>16</sup> Aden cunquequidēn buanaqui acte nēnantan nidaid nācnēdquid utsimpi Quēdauda caid ēquēbictśēc cuenadquimbi canompi cano dapan nēshun buanaid buanushe queshun anandopondash. <sup>17</sup> Aden canompi anandoshon cano dapa canchednushe queshun uidēn uaquin datanebanshumbic cano buante dashcute abi decante cuestebēdtabi imbudshun dashcute chicacsho cunquequidēn cano comapenen buampondash. <sup>18</sup> Aden cano cunquequid dapan buanubi badiadnuc acte natiambo tēccoasquesho isun ambi ansandoshon bēboed acte nēsiapondash. <sup>19</sup> Adshumbic 3tedec ushun bucu dēnēshun cano dashcute indotetedi nēsiaoapondash. <sup>20</sup> Aden nēsecanec nidquimbi inchēshēn ushēbēdta uispa abu chēshēn bētīnacsho isenquio iccondambi. Adembidi badiadēn ushē isenquio iccondambi. Dadpen ushquin aidtedi isenquioccondambi. Aidted isenquiocnobi acte comapenen tēccoascapondash. Ad icsho isash, Bēnudchitequien nuqui iquec, abitedimbo quecuededpondash.

21 Adequi nuqui iquec, qeshun buna mēmumbededequi abitedi nidanepondabi. Adec canon nidnubi Pabado nidtoash nadpondash: — Chuinu. Tantiata. Quideta caid yacnoësh puduanenda caombi. Adsho tantiaboshi tantienquo yec mibi puduampoc. Ēmbi chiacpaden nabanuc mimbi ansandoaidtedi abi ictsiandac. Adecbidi, Unësebi, quenquo nuqui ictsiandac. 22 Padnuen acte tēccoasquenubi nuquitedi unësenquo iqueque. Dacuēdenquo yec dayacquo icta. Canouidi canched-canchedendac. 23 Nuquin Papan namiaidquo nebi. Adquid icsho inchëshēn ambi uaidēn mayan bēdan ambi chomiaidēn naden chioishi: 24 “Ancanquid dapa, empedadod caid matses chushquiaid tantiec tsadte yacno mibi nidtoendac. Mibi ambo nidmequin canon mibēd icquidtedi acte yacnoshon mēnchiquembique. Dacuēdenquo yec tabad,” caposhi Nuquin Papan uaid mayan bēdan. 25 Aden aidēn chiac dayacquo icta. Nuquin Papa ambi chiacpaden nabanquid nec, quequin tantiemi. 26 Adembidi, acte tēccoasquequidēn nuqui acte nēnantan nidaid nacnēdquid cuēmano buanshun cano cancheshunendac, quequin tantiombi —quepondash Pabado canon antabēdtoaido chiec.

### *Cano canched-canchedaid*

27 Adashic, Buenos Puetos caid yacnoësh ēnden nidboshi 14tedec ushec acte Adidia caid yacnoshon cunquequidēn buampondash. Aden acte tēccoasquequin buanubi inchëshpotsembo yanuc, Cuēma anoentsēquien nuqui choendac, quequin cano nidmequidon tantiapondash. 28 Aden tantiaquin, ¿Tionda iqueque? Tanu, qeshun yuēmbocquid shocosh bucu dēdectanshun pumbudquin tampondash. Aden tanshun, Aidtiompenquo iquec, quequin chuipondash. 29 Nidaid cuēnote dapa cunquequidēn buanquin cano semenushe qeshun cano uidēn uate dapa yuēmbocquid tsitsumi tsidectanshun acte nēnequin uidēn uash ma badiadbono quiash tabadpondash. 30 Adec tabadnubi cano nidmequido cuenueshun dēbiate yacnoshontsen cano uidēn uate yuēmbocquid dēdectanuequin abimbo chiacbimboen canompi anandoboed nēnetsempondash. Cano dapa mentoadtsiash, qeshun cuenuequin adopondash. 31 Adec aido nidtsenubien Pabado: —Cuenuequido canompin nidnuc cano dapan nidquido nuqui mentoadendac —quepondash sondado chuiquid caic. 32 Aden Pabado chiaquien abi dectante bucutedi sēnac canompi nēpaēdpondash cuenuequido nidtiapimbo yec.

33 Adashic, badiadte anoentsēc yanubi Pabado nadpondash: —Catodtseted ushec, Mentoadtsiabi, quequin tantiaded-tantiadedtsēcquin mimbi piambococ. 34 Mibi mentoadenquo iqueque. Min manēdaid abentsēc paēdenquo iqueque. Penquiocboedi unēschiomane quenquiocquin peta —quepondash Pabado. 35 Aden chuishumbic utsitedi ismequin pan bedshun Nuquin Papa chuishun pan cuëshun Pabado pepondash. 36 Aden Pabado pesho isun, Nuquitsen penuna, qeshun abitedishun pebededpondash. 37 Cano antabēdtoquido 276ted icpondash. 38 Aidtedshun peshumbic, Cuēmano nidec, quequin ambi sandoaid utsitedi tiedēn caniquid ēshē acte nēsiapondash, Cano yuēmbo iquec, qeshun.

39 Adshumbic, badiadnuc ambi isacmaid nidaid istuidpondash. Acte cuidi-antanquid cuēmambi masi icsho isun ambo cano nidmenueshun 40 uidēn uaid tebanac acte nēpaēdpondash. Adembidi, cano dēbidiadmete bucutedi seccud-oashun cano dēbiateno buanquin dashcute shoyontanquimbi cadoapondash, Cunquequidēn acte daēd naccuēscananacno buampashuni, quequin. 41 Aden cano nidmenubi cano dēbiaten masi setuidec dēchiquidtiapimbo yec cano dapa

dëtoquepondash. Adec dëchiadash acte tëccoasquequidën cano dapa canche-canchequin tauapondash.

<sup>42</sup> Adsho isash sondado, Mëtaniaidtedi cuentsiashe. Cuesunenu, qesho <sup>43</sup> tantiash Pabado cuesunenushe qeshun: —¡Chën! —capondash sondado chuiquidën. Aden chuishumbic, Acten tantanec mëquiadquido tantanec nidanenubi <sup>44</sup> tantantiapimbocquido cano cuësh-cuëshëdaid bedbanash noadec tantanquido tsibanec nidta, quequin chuipondash sondado chuiquidën canon antabëdtoquido chuiquin. Aden ambi chiacpadquiec nidanec mentoadenquio yec abitedi nidaid yacno choash dectatocuededpondash abitedi.

## 28

### *Madta caid yacno Pabadobëd icquido choaid*

<sup>1</sup> Adec nidaid yacno choash dectatoneshun, Nëid acte nënantan nidaid nacrëdquid Madta caid nec, qesho tantiabededpondash. <sup>2</sup> Ambo tabadquidon abitedi bëdamboen yuedpondash. Iquen uampamboec ue sequenubi Madta caid yacno chosho isun cuëte dëtsiadoshon, Cuëc cho, quequin chuipondash. <sup>3</sup> Adnubic Pabadontsen cuëte tanunquiocquid bedtanquin tsindoquin masandopondash. Aden masandoaid nëdënquiacnoësh puduenquin nisin Pabado mëpepondash. <sup>4</sup> Aden mëpiash ëcchiquidenquio yec mëdiadsho isashien anocquido: —Nisin piaid cuesunianquid nepanui. Mentoadenquio yec actenuësh dectatoacsho nisin piac unëschitequien iquec. Abi icsaid cuidtequidien nechitec.

<sup>5</sup> Adec onquecuedednubien Pabadon comapenen uicac nisi cuëte dëtsiadoaidën nëpaëdpondash. Adnubien Pabado abi bëdambo icpondash. <sup>6</sup> Aden Pabadon uicac nisi paëdsho isun Pabadon mëdante mëbidisquetsiashe. Isnu, quequin isbededpondash. Aden tantiaquin yuen cainquin mëbidisquenquiocsho isash, Nisin mëpeboed utsibon papa cain cuënaid nepanui, quecuededpondash Madta caid yacnocquido.

<sup>7</sup> Madta caid yacnocquido tsusio dapan shubu anoentsëqui icpondash. Tsusio dapa Pudio cuëmëdquid icpondash. Aidëmbi aton shubu yacno canon choboedotedi yuedshun abentsëc chotsëcnuc ushquin ëbitedi bëdambo icmepondash. <sup>8</sup> Adnubien Pudion papa chumbo yec pieneç aton madon shubu nuntan uepondash. Adec Pudion papa uec qesho tantiash Pabado aid isec nidshun ashunquibi Nuquin Papa chuishumbic Pudion papa damishquin bëdamepondash Pabadon. <sup>9</sup> Pudion papa bëdanacsho isash Madta caid yacnocquido nënquidbëd daicsaid chedo cho-chopondash. Èbitsen bëdametsiashe, quiash cho-chosho aidotsen bëdamepondash Pabadon. <sup>10</sup> Adosho isun canon choquido bëdamboen tabadmepondash anocquidon. Nidnuesho tantiashun menëbampondash mitsana nibëdec quequin.

### *Doma yacno Pabado choash tabadaid*

<sup>11</sup> Adashic ushë 3ted nidmiash Madta caid yacnoësh puduampondash. Madta caid yacno choash cano icbo, Iquenoampamboec icnuc nëmbo tabadnuna, quiash tabadash: —Nidnu. Nid —quianec aton cano antabëdtosho isun Pabadobëd icquido sondado chuiquidën antabëdtomepondash. Aid cano shubu dadpen icquid Adecandedia caid yacnoësh chopondash. Cano icbon papa cain cuënaid daëd ambi tantiaidbimboecnuc cano dëdectanquin nacenaid icpondash. Ambi papa cain cuënaid abentsëc Castod icnuc utsi Podus icpondash. Adembidi aton cano cuëmpondash icbon. <sup>12</sup> Aidën puduanec nidequi acte nënantan nidaid nacrëdquid utsi yacno choash shubu

dadpen icquid Sidacusa caid yacno choash 3tedec ushquin tabadmepondash. <sup>13</sup> Ambo tabadash puduanquin aid acte nēnantan nidaid nacdēdquid cuēma anoentsēqui potequi nidaid Itadia caid cuēmano choashun shubu dadpen icquid Dequio caid yacno buampondash. Ambo choash ushash badiadash puduanec nidec cano tsitsumishun cunquequidēn buanac badiad utsin shubu dadpen icquid Puteyodi caid yacno chopondash. <sup>14</sup> Ambo choshon Pabadobēd icquidon Esuquidistu tantiaquid abi istuidacsho abitedi yuedpondash. Sietetedec ushec Esuquidistu tantiaquidobēd tabadashic auēshquio puduanec podquedēn nidequi shubu dadpenquio icquid Doma caid yacno chopondash Pabadobēd icquido. <sup>15</sup> Podqued Apio caidēn choec, quequin chuituidac Esuquidistu tantiaquid Doma yacnocquid utsi-utsiec Pabado bēquedec nidanepondash. Adecbidi Esuquidistu tantiaquid utsibo shubu dadpen icquid Tabednas Abentsēc chotsec quequin cuēnaid yacnocquido Pabado bēquedoaic nidaneopondash. Aido cho-chocho isashien, Ēbi dayacquio icmenuen nēidtedi mimbi chomioc, Papa, quec dayacquio iquebi, quiampondash Pabado. <sup>16</sup> Adec aido bēquedec choash auchidi nidec Pabadobēd Doma yacno choapondash. Doma yacno choacshobien Pabado quēnēn nauedenquiocquin shubun tabadmepondash sondado abentsēcshun abēd tabadquin isnubi.

### *Doma yacnoshon Pabadon Esuquidistu chuibante*

<sup>17</sup> Adec aton shubun tabadec 3tedec ushun isadaidbo tsusiobo chuinuequin, Aido chome, capondash. Aido chomiacsho isun Pabadon nadopondash: Chuinu. Tantiata. Nuquin matses icsamboen nainquioccombi. Adembidi nuquin tsusedpabon naden nata quequin chiaid niacambo iccombi. Adoenquiocshobi Edusaden yacnoshon nuquin matsesēn bedshun domanobo chuiquid meniondashi. <sup>18</sup> Aden meniac domanobo chuiquidēn, Mimbi naid chuiban, cac chuibanondambi. Aden chuibansho tantias, Unēs uainquiocquid mimbi naic, quepondash domanobo chuiquid ēbi caic. <sup>19</sup> Aden domanobo chuiquidēn tantianubi nuquin matses tsusiobon, Unēs uatiad, quequin chiac, Empedadod, Sesad yacno nidshun ěmbi naid chuite bunebi, quequin chuipondambi, Con matses icsambo iquec, quenquiocquin. <sup>20</sup> Ēmbi chuiboed mibi chuinuequin mibitedi chomiombi. Unēsash uincuenta nec, quequin tantiaquin nuquin matsesēn cainacpaden cainquid icsho mētaniaid nebi —quepondash Pabado isadaidbo tsusiobo chiec.

<sup>21</sup> Adoquien: —Nidaid Udeya caid yacnoshon mimbi naid chuiquin dada uaid bedamboccombi. Adembidi, Edusaden yacnoēsh choquido, Pabado icsambocquid nec, quequin chienquioccosh. <sup>22</sup> Padnueni mimbi tantiaid chuisho tantiate bunec. Utsi dadpen Quidistubo icsambocquid nec, quec —quepondash isadaidbo Doma yacnocquido tsusiobo Pabado caic.

<sup>23</sup> Aden Pabadon tantiaid tantianuec, Nēidted ushash padpidec choaindabi, quianec nidanepondash tsusiobo. Adec nidaniash ambi chiactedec ushash Pabado tabadacno choapondash isadaidbo tsusiobobēd utsibo dadpen. Adec cho-choash tabadsho isun: —Matses icsaquid icsho Nuquin Papan cuidnushe quiash abided ciudadec Esuquidistu unēspanēdash. Aid tantiaquid yec Nuquin Papabēd tabadendac, quequin Pabadon chuibampondash. Aido Esuquidistu tantiaquid icmenuequin Nuquin Papan ambi naden nata quequin chiaid Moises dada uamiampidbēdtabi Nuquin Papan naden nanun chiaid ambi utsibo dada uamiampid chuibampondash Pabadon. Ambi dada uamiampidēn chiaid Nuquin Papan madombo Esuquidistu nec, quequin badiadnubi chuiquin tauashun inchēshbudtsēqui chuiquin ěmpondash Pabadon.

<sup>24</sup> Aden chuibanac utsi-utsiec, Abimbo iquec, quenubi utsi-utsiec, Tantiati-apibi, quepondash. <sup>25</sup> Aden abentsëc tantiacbimboen tantiatiapimbo yec comapenec onquesho tantiashien Pabado nadpondash. —Nuquin Papan Mayanën Isayas dada uamequin nuquin tsusedpabo naden chuipampic:

<sup>26</sup> “Isadaidbo caid yacno nidshun naden chuita.

Mibitedishun tantiaded-tantiadedquimbi abimbo tantienquo iquendac; Adembidi Ęm̄bi nadatiambocquin nabanaid isted-istedquimbi abimbo isenquo iquendac.

<sup>27</sup> Bëdamboen tantiaboedobi nëbi min matses pamumëdadbimboec tabadec; pashuacbimboen tantiec tabadoaic; ushacbimboebidi tabadoaic.

Adec tabadenquiocquin ëm̄bi nabansho mimbi istsiac. Adembidi ëm̄bi chiaid mimbi tantiatsiac. Aden tantiashun mibi icsaid mimbi ëntsiac.

Adquiduidi ëm̄bi bëdambo icmiaid nendac.”

<sup>28</sup> Adesa mibi icnuc isadaidpembo Esuquidistu chuimembi. Aden aidi chuisho aidon tantiendac —quepondash Pabado <sup>29</sup> Nuquin Papan dada uamiampicpaden chuiquin isadaidbo Doma yacnocquido tantiamenuc. Aden chuisho tantiash isadaidbo nidanepondash.

<sup>30</sup> Adembidi seta daëd matamec tabadquin Pabadon Esuquidistu chuibampondash. Aton shubun tabadquin abi isedec choquidtedi Pabadon yuedpondash. <sup>31</sup> Utsi, Chën, quenquiocnobi dacuëdenquiocquin, Nuquin Papabëd tabadte iquec, quequin huibampondash. Adembidi Esuquidistu tantiamenuen chuibampondash Pabadon.

Padi. Esuquidistun, Ębi chuibeneta, caidon naid chuibanquin aidtedi dada uaombi, Teyopido.

## DOMA YACNOCQUIDON ISTE

### *Tauamboen chiaid*

<sup>1</sup> Esuquidistun yuambo Pabado nebi. Aidën: —Ëbi chuibeneta —caidquio nebi. Adembidi Nuquin Papantsen: —Con Mado chuibeneta —caidquio nebi. <sup>2</sup> Aton Mado tishabi icnuc Nuquin Papan: —Con Mado nadquid iquendac —quequin abi chuibanquido dada uamedenepampic ëndenquimboshë. <sup>3</sup> Aden Nuquin Papan chiampicpadquid chidon tishaid yec isadaidbo chuiquid dapa Dabid icpampidën tsyuecquid Esus nec. <sup>4</sup> Aid abipadquid icsaisa icsho Nuquin Papan: —Con Mado yec abitedishun Icho neque. Matses tantiamenu —quequin uincuemepac caondash. Aidquiobi Nuquin Icho Esuquidistu nec. <sup>5</sup> Aidën: —Pabadon chuibeniac isadaidpembon matses utsibontsen ma ëbi tantiaquin ëmbi chiacpadomboen nanu —quequin ambi naid chuibenequidquio Esusën icmepondashi. <sup>6</sup> Abi chuibanquid utsi mibi yacnoshon chuimequin Nuquin Papan mibitsen Esus tantiaquido icmiac. <sup>7</sup> Aden: —Unësquio iquec —quequin Nuquin Papan tantiaido mibi nec. Shubu dadpen icquid Doma yacnocquido Esus tantiec iccuededquido icsho mibitedi chuiquin dada uaic nebi. Nuquin Papa mibi chianembi. —Bëdamboen isquin min Mado Esuquidistubëdtan Doma yacnocquido bëdambo icmeta, Papa —quequin chianembi.

### *Doma yacnocquido iste Pabado bunaid*

<sup>8</sup> Tantia. Mibi chuinu. Esuquidistun tantiacpaden Nuquin Papa mibi chianembi. —Mibi bëdamboshë iquec, Papa. “ ‘Doma yacnocquido Esus tantiec tabadosh,’ quequin nidaid utsi-utsiec yacno chiac caosh,” quiosh. Mimbi nac aido bëdambo iquec, Papa —quequin Nuquin Papa chianembi. <sup>9</sup> Aden mibi bëshunenquio icquin Nuquin Papa chianembi. ¿Muectabi nepe? Padenquio. —Pabadon abimbo chiosh —quetsiash Nuquin Papa abi tantiaquidquio icquin ëmbi aton Madon naid chuibenenuc. <sup>10</sup> Nadembidi Nuquin Papa chianembi. —Doma yacnocquido instantiadquio iquebi. Mimbi nidmiac nëbi nidtsiabi, Papa —quequin chianembi. <sup>11</sup> Aden mibi instantiadquio iquebi. Mibëd icquin Nuquin Papan chiaid chuibantsiambi. —Nuquin Papan Mayanën tantiamiacpadomboen chieshtoenguio icquin Esus tantiaquionona —quequin mibi chuibantsiambi. <sup>12</sup> —“Chieshtoenguio icquin Esus tantianuna,” quec chuinanec bëdamboec tabadec aidobëd bëdambo ictsiabi —quiash mibi iste bunebi.

<sup>13</sup> Tantia, con utsibo. Mibi yacno ëbi nidtsemboed mimbi tantiabien icchiteque. Mibi chuinu. —Shubu dadpen icquid Doma yacnocquido istanu —queuid-queuidobi. —Nidnu —qeshobi Nuquin Papan nac nidenquio iccobi. —Ëmbi Esusën naid chuibanac matses utsibon dadpen-shun Esus tantiabenacpadomboen ma Doma yacnocquidon utsibontsen Esus tantianu —quiash mibi yacno nidtiadquio iquebi. <sup>14</sup> Esuquidistun chiacpadomboen ambi naid matses abitedi chuibantiadquio iquebi. —Dadpen tantiaquidobëdtabi tantienquio icquidotsen chuibenenu. Adembidi dada uaquidobëdtabi dada uainquio icquidotsen chuibenenu —quiash nebi. <sup>15</sup> Aden chuibenequi shubu dadpen icquid Doma yacno nidshun mibitsen Esusën naid chuibantiadquio iquebi.

<sup>16</sup> Esusën naid chuibenec bëdambo iquebi naden tantiash. —Nuquin Papan tantiacpadec matses cuidmenquio icnuec Esus abided cuidadec unësac caondash. Aid tantiasho Nuquin Papan matses cuidenquio iquec.

Abia chiaidon isadaidbon Esus tantiasho cuidenquo icquin isadaidpembo matses utsibontsen Esus tantiasho Nuquin Papan cuidenquo iquendac — quiash Esusën naid chuibenec bēdambo iquebi. <sup>17</sup> Esusën naid chuisho tantiash nuqui naden tantiec. —Nuquin Papan chiaid niac-niacboedombi Esus tantiasho Nuquin Papan nuqui bēdamboen isbenec ambi chiaid niac-niacacmaidbimboecnuc —quequin nuqui tantiapec. Adembidi chuiquin Nuquin Papan isadaidbo tsusedpa dada uamepampic. “ ‘Nuquin Papa ambi chiacpadomboen naquidquo nec,’ quequin abi tantiec tabadquid Nuquin Papan bēdamboen isec,” quequin dada uamepampic.

*Matses utsibo icsamboec tabadaid*

<sup>18</sup>—Abi tantiesa cuidquid Nuquin Papa nec —quequintsen nuqui tantiec. Ambi chiaid niac-niaquec icsamboecuidi tabadte bunquin matses dadpen-shun Nuquin Papan cuidte tantiatiapimbo iquec. <sup>19</sup> Abi tantiametequid ambi uaid isun Nuquin Papa tantiatiadquidi Nuquin Papa tantiate bunenquo matses icpec. —Adquidshenda Nuquin Papa nepec —matses camenuen Nuquin Papan abitedi uapampic. <sup>20</sup> Nidaid uaquinc cuēte uaquinc aben icquid uaquinc yua uaquinc matses uaquinc capampic Nuquin Papan. Aden Nuquin Papan uaid isash: —Nēid uaquidien nadquo icchitec. Nibēdantiapimbo icquidien nechitec. Abipadquid utsi nibēdnuc comapenen tantiaquin nabanquidquo yec abitedishun Ichoen nechitec —quetiadquidi adenquo matses iquec. Adquid Nuquin Papan cuidendac.

<sup>21</sup> Ambi uaid isash: —Nēid uaquid bēdambo iquec. Aidēmbien ēbi nashunchitec —quetiadquidi pamumēdadbimboecquin Nuquin Papa tantiatiapimbo matses iquec. <sup>22</sup> —Dadpen bēdamboen tantiembi —quequimbi tantienquo matsesën iquec. <sup>23</sup> Aden unēstiapimbo icquid Nuquin Papambo tantiatiapimbo icquimbi unēsquid-uidquo tantiaquin aidbimboecnuc nacenashun papa quequin chianec. Utsibon matsesbimboecnuc nacenashun: —Ēbi bēdamboen ista, papa —quequin ambi nacenaid chiec. Utsibombic aben icquid nidaidēn capuquidbimboecnuc nacenashun adembidi chiec. Utsibombic uicchun podochuquidbimboecnuc nacenashun adembidi chiec. Utsibombic aben icquid tacbidēn siuidquidbimboecnuc nacenashun adembidi ambi nacenaid chiec. Ēnden adquo matses yampicpadomboembidi nēbi adomboembidi matsesën naic.

<sup>24</sup> Adsho isash Nuquin Papa: —Ma bēdamboec tabadnu —queuidboedi icsamboecuidi matses tabadsho isash: —Ma ambi tantiacpadequi icsamboec tabadpanu —quiampampic. Adnēdambic nēbi abi bunacpadeq icsamboec tabadec utsin chido chudteuidi bunquieq dada. Adecbidi aton bēnēpenquo chudmeteuidi bunquieq chido. <sup>25</sup> —Abitedi uaquidquo Nuquin Papa nec —quequin abimbo tantiatiadquidombi Nuquin Papan uaidobi utsi-utsien chuiquin papa cabededpec. —Nuquin Papambobien bēdamboshē iquec —quequin ēnenquo icquin chuitiadquidi aidon padenquo icpec.

<sup>26</sup> Adsho isash: —Ma abi bunacpadeq icsamboec tabadpanu —quiampampic Nuquin Papa. Adnēdambic nēbi icsabudquieq dada bunenquo yequi chido daēdi dachudnanec. <sup>27</sup> Adecbidi chido bunenquo yequi dada daēdi chichudnante natia bunquieq. Aden ambi chiaid niac-niaquec icsamboec tabadsho Nuquin Papan cuidendac.

<sup>28</sup> Adeq abi tantiate bunenquo icsho isash: —Ma bēdamboec tabadnu —queuidboedi Nuquin Papa: —Ma abi icsate bunacpadequi tabadpanu —quiampampic. Adnēdambic nēbi pabiate shēcuē nibēdadbimboecquin Nuquin Papan chiaid niac-niaquec icsamboec tabadpec bēdambo ictiadquidobi.

<sup>29</sup> Nadquido icsamboec tabadquido nec. Nēidic aton chidopenquo

chudquido. Nēidic aton bēnēpenquoio chudmequido. Nēidic icsamboshē icquido. Nēidic aton na dadpen bedteuidi bunquido. Nēidic chieshquido. Nēidic matses utsibobimboec icte bunec chieshēmēnquido. Nēidic cuesunianquido. Nēidic chieshēmēnquido. Nēidic muaquido. Nēidic icsa uate bunquido. Nēidic utsibo icsaiduidi chuiquido. <sup>30</sup> Nēidic ambenquiobi chuishunquin chieshēnquin muauaquido. Nēidic Nuquin Papa chieshēnquido. Nēidic mamēnshumēnquido. Nēidic utsibo nashunenquoio icquin aton nauidi naquido. Nēidic: —Ēbiuidtsēqui bēdambo iquebi —quequido. Nēidic: —¿Icsaquin atotsimbi utsi nape? —quec icsate bunquido. Nēidic anibēdtan amēn chiaid niac-niacquido. <sup>31</sup> Nēidic piushbimboecquin Nuquin Papan chiaid tantienquoio icquido. Nēidic aton matses tantienquoio icquido. Nēidic nēishash baded nēish bēdanenquoio icquido. Nēidic utsibo bēdamboen istiapimbo icquido. Adquidtedi Nuquin Papan chiaid niac-niacquieci icsamboec tabadquid nendac. <sup>32</sup> —Abi icsaid ēntiapimbo icquido Nuquin Papan cuidquin chian anēdēnquiacno nēsecaindac —quequin tantiequi ēnēdenquoio yec icsaded-icsadedquieci. Utsibotsen icsasho isash cuishonquec. —Bēdambo iquec. Ēbipadquidquoio nec —quepec.

## 2

### *Matsesēn naid Nuquin Papan abimbo chuite*

<sup>1</sup> Aden icsamboec tabadaid ēmbi chuisho tantiashe: —Adquid icsamboshē iquec —¿quecta ique? —Aden naic aid icsaic —queboedi mibitsen adecbidi icsapec. —Icsaquidpenquoio nebi —quec mibi muaic. <sup>2</sup> Nuquin Papambien matsesēn naidtedi tantiaquid icquin: —Nēido icsambo iqueque. Icsano nidmenu —quequin abimbo chiendac. <sup>3</sup> —Matses utsibo icsambo iquec —queboedombi mimbitsen Nuquin Papan chiaid niac-niacpec. Adash: —Nuquin Papan nuqui cuidenquoio iquec —¿quecta ique? Mibitsen Nuquin Papan cuidendac. <sup>4</sup> Ambi uaido matses abitedi icsambo icsho isash unēsquoio icquin matses bēdamboen iste bunquin icsaidobi Nuquin Papan baded cuidenquoio iquec. —“Icsaboedi nēbi Nuquin Papan chiacpadec bēdamboec tabadtiadquid iquebi,” quequin ma matsesēn ēbi tantianu —queshun Nuquin Papan matses baded cuidenquoio iquec. Abi icsaid ēnenquoio icsho isun cuidendac. ¿Adsho tantiashta mibi nadpe? —Mua. Nuquin Papan ēbi cuidtiapimbo iquec. Ambi chiaid niaquesambo nebi —¿quecta ique? Adec onquec mibi muapec.

<sup>5</sup> —Nuquin Papan chiaid niacboedēmbi ēnta —caqui: —Padi. Ēmbi naiduidi naic bēdambo iquebi —quequin ēnenquoio icquin Nuquin Papan chiaid niac-niacbudec icsamboecuidi mibi tabadec. Aden mimbī Nuquin Papa cuidmendac. Nuquin Papan matsesēn naidtedi chuite ushēmbi mimbī icsamboen naidtedi chuishun Nuquin Papan mibi cuidendac. <sup>6</sup> Matsesēn naidtedi tantiaquin matses cuidendac. Bēdambo icquido abēdi tabadmequin icsaido icsano nidmendac Nuquin Papan. <sup>7</sup> Abi tantiec bēdambo icquido: —“Mibi bēdambo iquec,” mabi Nuquin Papan canu —quiash abēd tabadte bunec Nuquin Papan chiacpadec bēdamboec tabadec nec. Aido unēsacsho Nuquin Papan abēdi tabadmendac padpidec unēstiapimbo icnuc. <sup>8</sup> Icsaquidoen Nuquin Papan chiaid chiaqui tantiate bunenquoio icquin aton nauidi naic icsamboecuidi tabadsho Nuquin Papan comapenen cuidendac. <sup>9</sup> Adoac icsamboec tabadquido abitedi natiacuededec tabadendac. Shubiquiendac. Con matses isadaidbo Nuquin Papan chiaid ambia tantiampidi icsasho cuidquin matses utsibotsen icsasho Nuquin Papan cuidendac. <sup>10</sup> Abi tantiec bēdamboec tabadquido unēsacsho abi yacno tabadmeshun: —Nēid bēdamboec tabadquid niondash —quequin utsibo tantiamequin Nuquin Papan bēdambo icmendac.



Ambia Nuquin Papan chiaid tantiondaido Isadaidbo abi tantiaquid icsho abëdi tabadmequimbi matses utsibotsen abi tantiaquid icsho Nuquin Papan abëdi tabadmendac. <sup>11</sup> Icsamboec tabadquido icsano nidmequin bëdamboec tabadquido abëdi tabadmendac. —Isadaidbouditsëqui bëdamboen isembi —quenquio icquin adoendac.

<sup>12</sup> Nuquin Papan chiaid tantiacmaido matses utsibo icsamboec tabadsho Nuquin Papan cuidendac. Isadaidbo Nuquin Papan: —Naden nata —quequin chiaid tantiashi aidën chiaid niac-niaquec icsamboec tabadsho adembidi cuidendac. <sup>13</sup> Ambi: —Naden nata —quequin chiaid tantiashumbic adomboen naisa bëdamboen istiapimbo icquin ambi chiacpadec tabadquid Nuquin Papan bëdamboen istsiash. <sup>14</sup> ¿Ada Nuquin Papan chiaid tantiacmaidon matses utsibon bëdamboec tabadte tantienquio iccuededpec? Ma bëdamboec tabadte abentse-abentsen ambembi tantieyoc. Aden tantiaquin Nuquin Papan chiacpadomboen abentse-abentsen bëdamboen naic Nuquin Papan chiaid tantiashumbimboen. <sup>15</sup> Adec bëdamboec tabadec: —Bëdambo iquebi —quequin ambembi tantiec. Icsamboec tabadec: —Icsachitobi —quequin adembidi ambembi tantiec. <sup>16</sup> —Adec matses abitedi bëdamboec tabadte tantiequi adquiec tabadenquio iquec —qeshun Nuquin Papan chiacpadën Esuquidistun matses cuidendac. Matsesën otacquo tantiaidbëdta matsesën ompoquin naidtedi ambembi tantiashun Esusën matses cuidendac. Esus chuibanquin aden aidën cuidte chiombi.

### *Isadaidbon Nuquin Papan chiaid niac-niacaid*

<sup>17</sup> Tantia, con matses isadaidbo. Mibi chuinu. Mibi nadpec. —Isadaidbo nebi. Nuquin Papan ambi chiaid con tsusedpa Moises dada uamepampic. Aidën tsyuecquid icsho Nuquin Papan ëbi bëdamboen isec. Utsibon Nuquin Papa tantienquio icnubi Nuquin Papambo con matsesbëdtambi bëdamboen tantiembi. Bëdambo iquebi —mibi quepec. Adboedi mibi icsaic. <sup>18</sup> Nuquin matses tsusiobon chuibanac Nuquin Papan ambi chiaid Moises dada uamepampid mimbi tantiec. Nuquin Papan chiacpadec utsibo bëdamboec tabadsho isash: —Aido bëdamboec tabadec —queboedi mibi bëdamboec tabadenquio icpec. <sup>19</sup> Adecbidi: —Nuquin Papan chiaid tantiacmaido Nuquin Papan chiaidquio chuibanquid nebi. Paposhquiacbimboecnuc tantiamequidquio nebi —mibi quepec. Adboedi aidën chiaid niaquec mibi icsaic. <sup>20</sup> —Chuisho tantiabi icquido nëbi tantiabentsëcquidobëdta Nuquin Papan chiaid chuibanquid nebi. Abitedimbo tantiaquid icquin Nuquin Papan abimbo chiampidquio chuibanquid nebi —mibi quepec. <sup>21</sup> Adec: —Nuquin Papan chiaid niac-niaquenda —queboedëmbi aidën chiaid mimbi niac-niaquec. —Ampenda —queboedëmbi mimbitsen ampepec. <sup>22</sup> —Utsin chido chudenda —queboedëmbi utsin chido mimbitsen chudpec. Papa quequin matsesbimboecnuc matses utsibon nacnenaid isash: —Nuquin Papa tantienquio yec nëid nacnenquid icsambo iquec —queboedëmbi aidën nacnenaid tantiate shubun puduedshun mimbi ampepec. <sup>23</sup> —Nuquin Papan ambi chiaid con tsusedpa Moises dada uamepampid bedshun con matses isadaidbonuidtsëqui Nuquin Papa tantiec —queboedëmbi ambi chiaid niac-niaquec mibi icsamboec tabadec. <sup>24</sup> Adec mibi icsamboec tabadte chuiquin Nuquin Papan naden dada uamepampic. “Isadaidbo icsamboec tabadsho isun matses utsibon: ‘Ambi Nuquin Papa caidtsembien icsambo icchitec,’ capendac,” quequin dada uamepampicpadquiec mibi icsamboec tabadsho isun matses utsibon Nuquin Papa bëdamboen tantienquio iquec.

### *Nuquin Papa tantiaquidquio icte chiaid*

<sup>25</sup> —Nuquin Papan matses nebi —quequin Isadaidbon Nuquin Papan aton tsusedpa chiampicpadomboen aton bacuëbo shui dëbid dëteshun se-caic. Adonëdaid ambi chiaid niac-niaquenquo yec bëdamboec tabadsho Nuquin Papan bëdamboen istsiash. Isadaidbo utsibon ambi chiaid niac-niacsho Nuquin Papan bëdamboen istiapimbo iquec ambi con matses cac-maidobimboecnuc. <sup>26</sup> Nuquin Papan con matses cainquo icpampido matses utsiboen ambi chiacpadec bëdamboec tabadsho Nuquin Papan bëdamboen istsiash ambi: —Con matses nec —caidobimboecnuc. <sup>27</sup> Adec matses utsibo Nuquin Papan chiacpadec bëdamboec tabadsho isash isadaidbo nadedc chiadpec. —Matses utsibo bëdamboec tabadnubi Nuquin Papan Moises dada uamepampid isban-isbanshumbi isadaidbon Nuquin Papan chiaid niac-niacpec. Isadaidbo matses dadpen icsambo iquec —cadpec. <sup>28</sup> ¿Shui dëbid dëteshun secaquido isadaidbotedi Nuquin Papa tantiaquidomboda nedic? Padenquo. ¿Matses ismenuen Nuquin Papan chiacpadomboen nashumbic ompoquin icsamboen naquido Nuquin Papa tantiaquidquioda nedic? Padenquo. <sup>29</sup> ¿Ambi Moises dada uamepampiduidi ëmbimbo nanuequid Nuquin Papa tantiaquidquioda nedic? Padenquo. Nuquin Papa tantiaquidquien aton Mayanën tantiamiacpadec bëdamboec tabadec. Adquid: —Mibi bëdambo iquec. Con matses mibi canu —capec Nuquin Papan matsesën adoenuo icnubi.

### 3

#### *Nuquin Papan isadaidbo tantiec, quequin chiaid*

<sup>1</sup> Aden: —Abi tantiec bëdamboec tabadquid Nuquin Papan con matses catsiash —quequin ëmbi chuisho tantiash: —¿Isadaidbo yecta icsambo icpec? —¿quecta ique? —Padenquo iquec —caimbi. —¿Ada aido ambi con matses caido Nuquin Papan nashunac? —¿quecta ique? <sup>2</sup> Ai, aido nashunquiac. —Ëmbi chiaid dada uaid ma aidomba tantianu —quequin con matses isadaidbo tsusedpabo ambi chiaid Nuquin Papan dada uamepampic. <sup>3</sup> Aden dada uamiampid Nuquin Papan chiaid chuibanac con matses isadaidbo: —Nuquin Papan chiacpadomboen nanuna —queboedombi muaquin utsin-utsinquien nainquo icpampic. ¿Ada con matses isadaidbo utsi-utsiec muaquido icsho isun Nuquin Papan ambi chiacpadomboen nainquo icpatsiash? <sup>4</sup> Padenquo. Ma ambi chiacpadomboen naquidquo Nuquin Papa neyoc. Muesambo nec. Matses abitedimbo muaquidquo icnuc Nuquin Papain abimbo chuiquidquo nendac. Aden chuiquin Nuquin Papan con tsusedpa dada uamepampic.

“Nuquin Papa abimbo chuiquidquo nec.

‘Nëid bëdambo iquec. Nëid icsambo iquec, quequin Nuquin Papan abimbo chuibanendac, quequin ma matsesën tantianu,’ quequin

Nuquin Papan: ‘Mibi icsaoc,’ quequin ëbi chuiboed chiombi,”

quequin dada uapampic.

<sup>5</sup> Èbi adsho bëdamboen tantiata. Icsamboen tantienda. —Nuquin Papan chiaid niac-niaquec ëbi icsasho isash: “Adquidpenquo Nuquin Papa nec. Icsaisambo nec,” quetsiash con matses. Adec icsaquimbi ëmbi con matses Nuquin Papa bëdambo icte tantiameshobi Nuquin Papan ëbi cuidac icsambo ictsiash —quequin icsamboen tantienda. <sup>6</sup> Matsesën naid chiec Nuquin Papa muatiapimbo iquec. Abimbo chuibanendac. Icsaido chiec: —Mibi bëdambo iquec. Mibi cuidenquo iquembi —quetiapimbo Nuquin Papa iquec. Muesambo nec. <sup>7</sup> Nadembidi icsamboen tantienda. —Èbi muaquidquo icnubi: “Adquidpenquo Nuquin Papa nec. Bëdamboshë iquec. Muesambo

nec,” quetsiash con matses. Adec muaquimbi Nuquin Papa muainquo icte con matses tantiametsiambi. Aden ëmbi abi tantiameshobi Nuquin Papan ëbi cuidac icsambo ictsiash —quequin icsamboen tantienda. <sup>8</sup> Aden icsamboen chiec nuqui nadtsiac. —Nuquin Papa tantiamenuequi icsaquionona —nuqui quetsiac. ¿Adendambi chuidio? Padenquo. —Pabado chedo: “‘Nuquin Papa tantiamenuequi icsaquionona,’ quiosh,” quequin mibi muauaosh —quequin chuituidoshi. Ëbi muauaquido Nuquin Papan cuidchitoshon.

*Matses abitedi icsaquido nec, quiaid*

<sup>9</sup> Tanta, con matses. Mibi padpiden chuinu. ¿Atotsibi quio? ¿Ada tantio? ¿Utsibon Nuquin Papan chiaid niac-niacnubida nuquiuidi Nuquin Papan chiaid niac-niaquesa icpe? Padenquo. Nuquin Papan chiaid niaquesamboen nibëdec. Matses utsibo con matses isadaidbobëd abembi bëdamboec tabadtiapimbo iquec. Abitedimbo icsamboec tabadquido nec. Aden mibi chiombi. <sup>10</sup> Aden chuiquin Nuquin Papan dada uamepampic naden. “Nuquin Papan chiaid niaquesambo nibëdec.

Abitedimbo icsaquido nec.

<sup>11</sup> Nuquin Papa tantiaquin ambi chiapadomboenuidi naquidquio nibëdec.

Nuquin Papa tantiate bunquidquio nibëdec.

<sup>12</sup> Bënudshun podqued tantienquo yacimboen Nuquin Papa tantienquo icquin matses abitedishun ambi chiaid niac-niaquec.

Adsho isun Nuquin Papan: ‘Abitedimbo icsambo iquec,’ capec.

Ambi chiaid niaquesambo nibëdec.

Abitedimbo icsapec.

<sup>13</sup> Nadquio iquec. Nëid icsamboec chuishumënquido. Unësaid ënden chococacno shëdec: ‘Pisenac,’ quequin tantiacimboen adquido onquesho tantias: ‘Icsambo icquido nec,’ quequin matsesën tantiec.

Nëidic muaquido.

Nëidic nisin pequin icsa uacimboen icsa uate bunec icsamboec onquequido.

<sup>14</sup> Nëidic nëishash chieshëmëdec: ‘Unëschitoshon,’ quequin icsamboenuidi chuiquido.

<sup>15</sup> Nëidic intac mëyamec badedquio cuesunianquido.

<sup>16</sup> Nëidic abëd icquido natiamec chieshëmënquido.

<sup>17</sup> Adquidtedi cuesnante bunec bëdamboec tabadtiapimbo iquec.

<sup>18</sup> ‘Nuquin Papan cuidnushe,’ quenquo icquid Nuquin Papa tantiesabo nec,” quequin dada uamepampic.

<sup>19</sup> Aden ambi: —Abitedi icsambo iquec —quequin chiaid Nuquin Papan con matses isadaidboba tantiamenuen con tsusedpa dada uamepampic. Aden dada uamiampid tantiasun: —Icsaquidpenquo nebi —quequin isadaidbon Nuquin Papa chuitiapimbo iquec. —Icsaquido abitedi nec —quequin Nuquin Papan matses utsibo abitedibëdtabi isadaidbotsen chiac: —Abimbo chiec —quiash dacuëdec ëchedanenquo tabadendac matses abitedi.

<sup>20</sup> Aden ambi chiaid niaquesambo nibëdnuc: —Ambi chiaid niaquesa icsho Nuquin Papan nuqui bëdamboen isec —quequin nuqui abimbo chuitiapimbo iquec. Nuquin Papan chiaid isash: —Ambi chiaid niac-niaquec icsamboequien nuqui tabadchitec —quequin nuqui tantiapec.

*Nuquin Papa matses bëdamboen ismete chiaid*

<sup>21</sup> Aden ambi chiactedi natiapimbo yec matses icsasho isun Nuquin Papan abi matses bëdamboen ismete chuiquin isadaidbo tsusedpa Moisesbëdta tsusedpabo utsibo dada uamepampic ëndenquimbo. Aden ambi dada uamepampicpadomboen nëbi Nuquin Papan abi matses bëdamboen ismequid matsesmpac caondash. <sup>22</sup> Adoac Nuquin Papa abi tantiaquido

bëdamboen ismenuec Esuquidistu abided ciudadec unëspac caondash. Nëbi aidquio tantiasho Nuquin Papan matses bëdamboen isec. Isadaidbobëdtambi matses utsibontsen Esus tantiasho adoendac. <sup>23</sup> Adec matses abitedi Nuquin Papan chiaid niac-niaquec icsaquido yec Nuquin Papapadquid icsaisambo nibëdec. <sup>24</sup> Adquid bëdamboen istiapimbo icquin matses bëdamboen iste bunquin aton Mado Esuquidistu abided unës uamequin Nuquin Papan cuidpac caondash. Nëbi abided cuidadaid Esus tantiasho nuqui bëdamboen isec icsaisabimboecnuc. <sup>25</sup> —Icsaido cuidquid icquimbi nuqui cuidenquio icnuen Nuquin Papan nac —nuqui camenuen Nuquin Papan nuqui icsaid bedshumequin Esused unës uamequin cuidpac caondash. Esus tishabi icnuc Nuquin Papan abi tantiaquido cuidenquio icpampic: —Yuecshun con Madoded cuidendambi —quequin tantiaquin. <sup>26</sup> Nëbi adecbidi: —Icsaido cuidquid nebi —quequimbi Nuquin Papan ambi chiacpadec nuqui icsaid bedshunec abided cuidadaid Esus tantiasho adembidi nuqui bëdamboen isquin cuidenquio iquendac.

<sup>27</sup> Ëmbi aden chuisho tantiash: —Ambi chiacpadomboenuidi nasho Nuquin Papan bëdamboen isebe —quequin mimbi abimbo chuitiapimbo iquec. Matsesën Nuquin Papan chiacpadomboenuidi natiapimbo icsho bëdamboen istiapimbo icboedi nëbi Esus tantiasho Nuquin Papan nuqui bëdamboen isec. <sup>28</sup> Aden matsesën ambembi naquin Nuquin Papa bëdamboen ismetiapimbo iquec. Padnuen utsin: —Matsesash ëbi icsaid bedshunec abided cuidadaid tantiasho Nuquin Papan ëbi bëdamboen isec —quequin Esus tantiasho Nuquin Papan bëdamboen isec. <sup>29</sup> ¿Isadaidboudida Nuquin Papan bëdamboen ispatsiash? Padenquio. Matses utsibo isadaidpembobi Nuquin Papan bëdamboen istsiash. <sup>30</sup> Matses abitedi uaquid icquin ambi chiacpadomboen isadaidbon Esus tantiasho Nuquin Papan bëdamboen isec. Adembidi matses utsibon Esus tantiasho Nuquin Papan bëdamboen isec. <sup>31</sup> Adoaido: —Nuquin Papan chiaid niac-niaquec icsamboec tabadnuna —¿quecta icpec? Padenquio. Esus tantiaquido icquin Nuquin Papan chiacpadomboen natiadquio nuqui yanec.

## 4

### *Nuquin Papan Abadauan bëdamboen isaid*

<sup>1</sup> Tantia. Aden Nuquin Papan bëdamboen iste chuiquin isadaidbo tsusedpa Abadauan caid ënden icpampidtsen mibi chuinu. ¿Atotsieshun Nuquin Papan Abadauan bëdamboen isbempampic? <sup>2</sup> Bëdamboecuidi tabadsho Nuquin Papan bëdamboen isaid yec Abadauan: —Bëdamboecuidi tabadquin Nuquin Papa bëdamboen ismembi —quetsempampic. Abadauan bëdamboecuidi tabadambo. Adsho: —Bëdamboecuidi tabadsho Abadauan bëdamboen isembi —quenquio icpampic Nuquin Papa. <sup>3</sup> Nuquin Papan tantiamiac naden Abadauanën nampid chuiquin dada uapampic. “Nuquin Papan: ‘Min mado min chidon tishendac,’ cac: ‘Abimbo mimbi caic,’ Abadauan qesho: ‘Adquid bëdamboen isendambi,’ qeshun Nuquin Papan bëdamboen isbempampic icsaisabimboecnuc,” quequin chuipampic. <sup>4</sup> Matsesien adenquio iquec. —Ambi chiacpadomboen nasho icbon yua bëdamboen isquid —nuqui quepec. <sup>5</sup> Nuquin Papambien nadotsiash. Matses icsaboedi: —Bëdambo icquid icquin ambi chiacpadomboen Nuquin Papan naindac —quequin abi tantiasho Nuquin Papan bëdamboen isbentsiash icsaisabimboecnuc. <sup>6</sup> Adembidi Nuquin Papan tantiamiac ambi bëdamboen iste chuiquin con tsusedpa Dabidën dada uapampic naden.

7 “Ambi chiaid niac-niacboedëmbi: Bëdambo icquid icquin Nuquin Papan ambi chiacpadomboen naindac, quequin abi tantiasho Nuquin Papan ëbi bëdamboen isec ëbi icsaid bëpiscudacbimboen.

Icsaisabimboecnuc ëbi bëdamboen isquin ëbi cuidenquio iquendac,’ quiash matses bëdambo yec cuishonquec.

8 ‘Abi tantiaquid icsho isash ëbi icsaid bëpiscudash:

Ëmbi chiaid mimbi niac-niaccoque. Mibi cuidnu, Nuquin Papan ëbi cainquio iquendac,’ quiash matses bëdambo iquec,” quequin Dabidën chuipampic ëndenquimbo.

9 ¿Shui dëbid dëteshun secaido isadaidboudida Nuquin Papan bëdamboen ispec? Padenquio. Matses utsibotsen bëdamboen istsiash. Tantia. Ëmbi chuiboedbidi chuioanu. Abi tantiaquid icsho Nuquin Papan Abadauan bëdamboen isbempampic ambi chiaid niac-niacacmaidbimboecnuc. 10 ¿Ambi chiacpadomboen shui dëbid dëteshun secacshoda Nuquin Papan Abadauan bëdamboen isbempampic? Padenquio. Shui dëbid dëteshun secabi icsho Nuquin Papan Abadauan bëdamboen isbempampic. 11 Bëdamboen isbenshumbic: —Abadauan, ëmbi chiacpadomboen nabenta. “Nuquin Papan bëdamboen isaido nebi. Aid bëshunchitomane,” queshun min matses-tedi shui dëbid dëteshun secabanta —capampic Nuquin Papan. Adoac Abadauanën nabempampic. Aden shui dëbid dëtiacmaid icquin Abadauanën Nuquin Papa tantiacpadomboen nëbi shui dëbid dëtiacmaidon Esus tantiasho Nuquin Papan bëdamboen isendac ambi chiaid niac-niacacmaidbimboecnuc. 12 Abadauanën tsyuecquido isadaidbo Abadauambimboecquido Nuquin Papa tantiaquido abi iquec. —Shui dëbid dëtemenëdaid icsho Nuquin Papan bëdamboen isebe —quenquio icquin Nuquin Papabëdta Esus tantiasho isadaidbo Nuquin Papan bëdamboen isaido abi iquec.

### *Nuquin Papan Abadauan chiaid*

13 Ëndenquimboshë Nuquin Papan Abadauan naden chuipampic. —Abadauan, mibi nibëdanan yuecshun min tsyuecquid abentsëcshun utsibo bëdambo icmendac. Nidaid utsi-utsiec yacno tabadquido adoendac —quepampic Nuquin Papa. —Min tsyuecquid abentsëqui tantiasho matses bëdamboen isendambi —quequin otacquo tantiaquin Nuquin Papan adopampic. ¿Ambi chiacpadomboenuidi Abadauanën nashoda Nuquin Papan aden chuipampic? Padenquio. Nuquin Papan chiac: —Ai, abimbo caic —queshoen Abadauan bëdamboen isbenshun Nuquin Papan adopampic. 14 ¿Nëbi: —Moisesën chiaid niaquesa icsho Nuquin Papan bëdamboen isebe —quec muaquidoda Nuquin Papan bëdamboen ispadic? Padenquio. Adec muaquidobi bëdamboen isquin ambi Abadauan chiaid niactsiash. Adotiapimbo icquin ambi chiacpadomboen Abadauanën tsyuecquid tantiaquidoen bëdamboen isec. 15 —Moisesën chiaid niaquesambo nebi —queboedombi aidën chiaid niac-niacsho isun Nuquin Papan cuidendac. Ambi chiaid niaquesambo nibëdec. Nuquin Papan: —Bëdamboec tabadta —quequin chiaid nibëdnuc ambi aden chiaid matsesën niactiapimbo ictsiash. Ambi: —Bëdamboec tabadta —quequin chiaid abi iquec. Aid niaquesambo nibëdec.

16 Nuquin Papan naden Abadauan chuipampic. —Abadauan, ëmbi chuisho tantiasho: “Mimbi abimbo caic,” quesho mibi bëdamboen isquin min tsyuecquido bëdambo icmendambi —quequin chuipampic. Nëbi ambi chuipampicpadomboen naquín Esus tantiaquido Nuquin Papan bëdamboen isec. Nuquin Papan ambi chiaid dada uamepampidën Moisesën tsyuecquido

isadaidbon Esus tantiasho Nuquin Papan bēdamboen isec. Abadauanēn Nuquin Papa tantiacpadomboen matses utsibontsen Esus tantiasho adem-bidi bēdamboen isec. Esus tantiaquidtedishun papabimboecquid Abadauan nec. Ambi Nuquin Papa tantiacpadomboen nuqui tantiec. <sup>17</sup> Ambi aden Abadauan chiampid chuiquin Nuquin Papan isadaidbo tsusedpa naden dada uamepampic. “Mibi unēsān yuectaneshun min tsyuecquido nidaid utsi-utsiec yacno tabadquido icmendambi. Aton papabimboecquid mibi iquendac,” quepampic Nuquin Papa. Adoquien: —Abimbo mimbi caic —quequin Nuquin Papa Abadauanēn tantiapampic. —Comapenen tanti-aquin unēsaid uincuemequidquio icquin ambi chiacpadomboen ēbi bacuē tishmendac —quequin Abadauanēn Nuquin Papa tantiapampic. Nēbi ambi Nuquin Papa tantiacpadomboen Esus tantiaquido: —Nuquin papabimboec-quid Abadauan nec —quepec.

<sup>18</sup> Nuquin Papan: —Min tsyuecquido dadpenquio iquendac —cac: —¿Mitsipadoac aidtedi con tsyuecquido icpec? Ma con bacuēbo nibēdpayoc. Tsusiombo icquin bacuē tishmetiapimbo iquebi —queuidboedi Abadauan nadpampic. —Ai, abimbo mimbi caic —quepampic aton mado nibēdnubi. Adshun tsusioctšēcquio icquimbi aton mado tishmepampic. Nēbi aton tsyuec-quido dadpenquio iquec Nuquin Papan chiampicpadequi. <sup>19</sup> —Con seta dadpenquio 100tedi icnuc tsusiobudtsēcshun ěmbimbo bacuē tishmetiapimbo iquebi. Con chido ěndenquio machobudtsēccondaid icquin bacuē usundoti-apicšēcquio iquec —quequin tantiequi: —Nuquin Papan abimboen caosh —quepampic. <sup>20-21</sup> —Nuquin Papa mue nec —quenquio yec: —Nadatiambo icquid icquin ambi chiacpadomboen Nuquin Papan naic —queshun Nuquin Papa tantiatsēcboedēmbi aid tantiaquiopampic. Adshun: —Mibi bēdamboshē iquec, Papa —quequin Nuquin Papa chuipampic. <sup>22</sup> Adsho tantiashun Nuquin Papan bēdamboen isbempampic icsaisabimboecnuc.

<sup>23</sup> Aden Nuquin Papan ambi Abadauan bēdamboen isaid isadaidbo tsusedpa dada uamepampic. ¿Abadauanēn naiduidi tantiamenuenda aden dada uamepampic? <sup>24</sup> Padenquio. Nuquitsen Nuquin Papan ambi bēdamboen iste tantiamenuen aden dada uamepampic. Nuquin Icho Esusbēdta abi uincuemequid Nuquin Papa tantiasho nuquitsen bēdamboen isec. <sup>25</sup> Nuquin Papan tantiacpadec nuqui cuidmenquio icnuec nuqui icsaid bedshunec abided cuidadec Esus unēsānēdash. Aden Nuquin Papa abi tantiaquido bēdamboen ismenuec unēsash uincuempanēdash Esus.

## 5

### *Esus tantiaquido Nuquin Papan bēdamboen isaid*

<sup>1</sup> Aden Esus tantiasho Nuquin Papan bēdamboen isaido yec abi cuidte dacuēdēnenquio yec abēdi nuqui bēdamboec tantiananec. <sup>2</sup> Ěmbi chuiboc-paden abi tantiaquido nuqui cuidmenquio icnuec abided unēsquin Esusēn Nuquin Papa nuqui bēdamboen ismepec. Adoac nuqui nadpec. —Nuqui bēdamboen isquin unēsacsho nuqui abipadquid icsaisa icmequin Nuquin Papan abēdi nuqui tabadmendac —quec nuqui cuishonquec. <sup>3</sup> Nadectsen nuqui cuishonquec. —Esus tantiaquid icsho utsibon chieshēnaqui Esus tantiatsēcboedi chieshtoenquio icquin Esus tantiaquidquio yanebi —quectsen nuqui cuishonquec. <sup>4</sup> Aden chieshtoenquio icquin Esus tantiasho Nuquin Papan nuqui bēdambo capec. Adoac: —Esus tantiaquid icsho Nuquin Papan ēbi bēdambo icmec. Unēsacsho abi yacno ēbi tabadmendac ambi chiacpadomboen —quepec nuqui. <sup>5</sup> Adec: —Abi yacno ēbi tabadmendac —quequin Esus tantiaquid ¿ada Nuquin Papan cacumepec? Padenquio. Aton Mayan

nuquibéd icmiac paposhquiacbimboen nuqui naden tantiec. —Nuquin Papan ëbi bédamboen tantiaquin abi yacno ëbi puduedmendac —quequin nuqui tantiec.

<sup>6</sup> Aden matses tantiaquiec Nuquin Papan tantiacpadec Esus nadpanédash. Matses abitedi abembi bédamboec tabadtiapimbo icsho isun Nuquin Papan uesquin cuidtsenubi abi tantiaquido cuidmenquio icnuec abided ciudadec Esus unëspanédash. <sup>7</sup> ¿Ada adquid matses icpadic? Padenquio. ¿Cuesanquidën matses bédambo icquid caic: —Cuesnu —quesho tantiaashunda dadpenshun: —Aid cuesenda. Èbiquien cuesta —capatsiash? Padenquio. Bédamboshë icquid cuesmenquio icnuen: —Nëid cuesenda. Èbiquien cuesta —cachitembien ictsiash abentsëcshun. Icsambo icquid icshoen aden chienquio ictsiash. <sup>8</sup> Padnuen matses abitedi icsamboecuidi tabadnuc nuqui cuidmenquio icnuec Esuquidistu abided ciudadec unëspanédash. —Nuquin Papan ëbi tantiaquiec —matses camenuen Nuquin Papan aden Esus namepanédash.

<sup>9</sup> Nëbi abided cuidadaidquio Esus tantiaasho Nuquin Papan nuqui bédamboen isec icsaisabimboecnuc. Aden bédamboen isquin Nuquin Papan nuqui cuidtiapimbo iquendac. <sup>10</sup> Matsesën abi chieshënsho isun aido cuidte bunenquio icquin Nuquin Papan aton Madoded cuidpanédash. Aden aton Madoded cuidash nëish bédanshun Nuquin Papan aton Mado tantiaquid bédamboen isec. Nëbi Nuquin Papan uincuemenedaid icquin Esusën nuqui bédamboen tabadmec. <sup>11</sup> Adembidi aidën tantiamiacpadomboen nuqui: —Èbi cuidenquio icnuen aton Madoded cuidquid bédamboshë iquec —quequin Nuquin Papa tantiec nuqui cuishonquec.

*Adanën naidbëdta Esusën naid chiaid*

<sup>12</sup> Nuqui bédamboen ismequid Esus tishabi icnuc abia matses uaidën Adanëmba Nuquin Papan chiaid niac-niaquec icsasho cuidquin aidba Nuquin Papan unësquid icmepampic. Adembidi Adanën tsyuecquido matses abitedi Adan icsacpadechidi icsate tantiaquimbi Nuquin Papan unësquidoudquio matses icmepampic. <sup>13</sup> Nuquin Papan: —Adec icsainda —quequin ambi chiaid Moises dada uamiabi icnubi matses abitedi icsapampic. —Èmbi Moises chuimiaid mimbi niac-niaquec —Nuquin Papa quetiapimbo icnubi matses icsapampic. <sup>14</sup> Nuquin Papan chuiboedquiobi niaquec Adamba icsasho Nuquin Papan cuidac unësec taëpampic. Adan unësambic aidën nacpadomboen nabi icsa utsi naiqui matses abitedi icsasho adembidi unësquidoudquio Nuquin Papan icmepampic. —Naden nata —quequin Moises dada uamequin Nuquin Papan chiabi icnubi aidën chiaid niactiapimbo yec utsi naic icsashobi adopampic. Ambia Nuquin Papan chiaid niacampid Adampadquidpenquio Esuquidistu nec.

<sup>15</sup> Matses abentsëcshun Adanëmba Nuquin Papan chiaid niacsho cuidquin aidba unësquid icmeshun aton tsyuecquido matses unësquidoudquio Nuquin Papan icmepampic. Adecbidi Nuquin Papa matses bédamboen ismequid abentsëc iquec. Esusuidtsëqui abi tantiaquidotedi cuidmenquio icnuec abided ciudadec unëspac caondash. Nëbi aid tantiaasho Nuquin Papan nuqui bédamboen isec. <sup>16</sup> Adanën nachimboen Nuquin Papa matses bédamboen ismequidën nambo. Adan abentsëqui icsaquin Nuquin Papa cuidmiac abi unësacpadquiec matses abitedi unësquidombo yanac. Nuquin Papa bédamboen ismequidëmbien matses icsaid bedshunec abided ciudadquin Nuquin Papa abi tantiaquidotedi bédamboen ismec icsaisabimboecnuc. <sup>17</sup> Ambi chuiboedi niacquin Adanën Nuquin Papa cuidmiash unësquid yanacpadec matses unësquidoudquio iquec. Esuquidistunuidtsëqui nac Nuquin Papan matses bédamboen isendac. Nëbi aid tantiaasho Nuquin Papan nuqui bédamboen

isquin bēdamboec tabadquid icmendac. Adec bēdamboec tabadec unēsash Esusbēdtan Nuquin Papan namiacno bēdamboshē yacnombo nuqui tabadendac.

<sup>18</sup> Adec matses abentsēqui icsasho aidbēdta aton tsyuecquido matses abitedimbo cuidquin Nuquin Papan unēsquidoudquio icmepampic. Padnuen Nuquin Papan chiacpadec abentsēqui abided cuidadaidēn Nuquin Papa abi tantiaquido bēdamboen ismequin Nuquin Papa yacno tabadmendac. <sup>19</sup> Nuquin Papan chiaid niac-niaquec Adan icsaic taēambic aton tsyuecquido abitedimbo icsaquidoudquio yanac. Padnuen Nuquin Papan chiaid niaquesambo icquin Esusēn Nuquin Papa nuqui bēdamboen ismec. <sup>20</sup> ¿Matses bēdamboen isnuenda Nuquin Papan ambi: —Bēdamboec tabadta —quequin chiaid Moises dada uamepampic? Padenquio. Matses abi icsaid tantiamenuen ambi chiaid Moises dada uamepampic. Aden chiaid chuisho tantiash: —Icsaobi —quequin tantiaquin abided cuidadaid tantiasho Nuquin Papan matses bēdamboen isec. <sup>21</sup> Taēc matses icsasho cuidac unēsquidoudquio yanac. Adsho isun matses bēdamboen isnuen Nuquin Papan ambi chiaid niaquesambo Esused cuidac. Nēbi Nuquin Icbo Esuquidistu tantiasho Nuquin Papan nuqui bēdamboen isec icsaisabimboecnuc. Nuqui unēsacsho abēdi tabadmendac padpidec unēstiapimbo icnuc.

## 6

### *Esus tantiaquid bēdamboec tabadquid, quiaid*

<sup>1</sup> Nuquin Papan bēdamboen iste ěmbi chuisho tantiashun naden tantienda. —Icsaido cuidmenquio icnuec abided Esus ciudadec unēsapanēdash. Aid tantiasho Nuquin Papan bēdamboen isquin nuqui cuidtiapimbo iqueque. Aden bēdamboen isaqui icsaquionona —quequin tantienda. <sup>2</sup> Esus tantiaquido adesambo nec. Esus tantiec icsateuidi nuqui bunenquio yanec. <sup>3</sup> ¿Tantienquioda ique? Naden chuiquin mimbi acten mentomiac. —Ěbi cuidmenquio icnuec abided ciudadec unēsaid Esus tantiaquid nebique. Ambi chiacpadec tabadtiadquio iquebique. Utsibo ismenu —quequin mimbi acten mentomiac. Adec Esus unēsaid tantiequi icsaboedobi icsate bunenquio nuqui yanec. <sup>4</sup> Aden Esus abided ciudadec unēsaid tantiasho Nuquin Papan utsiacimboecnuc nuqui icmec. Esus unēsacsho comapenen tantiaquin Nuquin Papan uincuempac caondash. Adembidi comapenen tantiaquin Nuquin Papan utsiacimboecnuc nuqui icmec. Adoac icsateuidi bumboedobi adte bunenquio yanec Nuquin Papan chiacpadequi nuqui bēdamboec tabadcuenec.

<sup>5</sup> Adec abided ciudadec unēsaid tantiec icsate bunenquio yanquid yec Esus uincuemiabimboen comapenen tantiaquin Nuquin Papan utsiacimboecnuc icmiaidtsen nuqui nec. <sup>6-7</sup> Esus tantiabi yec icsaquido icboedi matses icsaid bedshunec Esus unēsaid tantiec nuqui icsate bunenquio yanec. Mētaniaid abibi mēnchiquidtiapimbo yacimboec matses abembi icsaic ěnēditiapimbo iquec. Adboedi Esus tantiec nuqui icsate bunenquio yanec.

<sup>8</sup> Adec Esus unēsaid tantiec icsainquio yanec nuqui nadpec. —Nuquin Papan uincuemiaidēn Esusēn nuqui bēdamboen tabadmec. Unēsacsho Nuquin Papa yacno abēdi nuqui tabadmendac —nuqui quepec. <sup>9</sup> Nuquin Papan uincuemiac Esus padpidec unēstiapimbo iquendac. Aton dada unēsquid icboedi unēstiapimbo icquid yanac. <sup>10</sup> Matses icsaido cuidmenquio icnuec abided abentsequi ciudadec Esus unēsac caondash padpidec unēsenuquio yec. Adsho uincuemiac Nuquin Papan chiacpadomboen nabanec aidbēd tēshnanenquio yec tabadec.

<sup>11</sup> Ěbi adsho tantiash nadta. —Ěbi cuidmenquio icnuec abided ciudadec unēsacsho uincuemiaid Esus ěbēdi iquec. Aid tantiec icsainquio yanebi. Ambi



nacpadec tabadtiadquio iquebi —queta. <sup>12</sup> Icsamboec tabadenquio icnuna. Nuqui icsate bunaid nainquio icnuna. <sup>13</sup> —Icsaquionona —quesho tantiash: —Padi —quenuna. Unësacimboen Nuquin Papa tantienguio ictenedëmbi uincuenacimboen Nuquin Papa nuqui tantiabenondaque. Ambi chiacpadec bëdamboequien tabadtiad. <sup>14</sup> —Nuquin Papan ambi: “Bëdamboec tabadta,” quequin chiaid Moises dada uamiactedi naquin ëmbimbo Nuquin Papa bëdamboen ismembi —quenquio icquin Esus tantiasho Nuquin Papan nuqui bëdamboen isec. Ambi bëdamboen isaido yec nuqui icsate bunenguio nuqui yanegue. Bëdamboec tabadnuna.

*¿Tsuntsin yuabo Esus tantiaquido icpec? quequin chiaid*

<sup>15</sup> —Aden Nuquin Papan nuqui bëdamboen isec —quequin ëmbi chuisho tantiashun naden icsamboen tantienda. —Nëbi abided cuidadaid Esus tantiasho ëbi bëdamboen isec. Èbi cuidtiapimbo iqueque. Ambi chiaid niacniaquec icsabudquionona —quequin tantienda. Esus tantiaquid adesambo nec. <sup>16</sup> ¿Tantienguioda ique? Icbon chiacpadomboen yuan naquid. Icsamequidën tantiacpadomboen icsamboen naquid aton yua nendac. Aidën yua icquin icsaid ëntiapimbo yec unësash icsano nidendac. Nuquin Papan yuain ambi chiacpadec bëdamboec tabadcuenendac. <sup>17</sup> Mibi adec tabadsho isun: —Esus chuibanac icsaid ëntiapimbo icboedi Esus tantiabenash Doma yacnocquido bëdamboec tabadcuenac. Aden namec mibi bëdambo iquec, Papa —quequin Nuquin Papa chiombi. <sup>18</sup> Satanasën yua icquin mimbimbo mibi icsaid ëntiapimbo icsho Nuquin Papan nac ambi chiacpadquiec mibi bëdamboec tabadcuenac.

<sup>19</sup> —Matses icquin: “Nuquin Papan chiaid tantiadenguio iquec,” canushe —quequin bëdamboen tantiamenuen mimbi tantiaid yuan naid mibi chiombi. Satanasën yua yec icsateuidi bunquiec mibi icsaded-icsadedondac. Adec icsamboshë iccondaidi nëbi Nuquin Papan chiacpadequien bëdamboec tabadtiad. <sup>20</sup> Satanasën yua yec icsaquiec Nuquin Papan chiacpadec bëdamboec tabadtiapimbo mibi iccondac. <sup>21</sup> ¿Ada bëdamboec tabadonda? Ma mibi chieshëmënquiec tabadteneyoc. —Èbi chieshëmënquiec tabadondaid tantiashun: “Mibi icsambo iquec,” ëbi canushe —queshun mimbi naonda ma mimbi chienquio iccondac. Icsaid ënabi yec unësash icsano mibi nidtsenac. Adecbidi icsaid ënenguio icquido unësash icsano nidendac. <sup>22</sup> Nëbi nuqui Esus tantiasho Nuquin Papan aton yuabo nuqui icmiac. Adoac icsaid ëntiapimbo icboedi nëbi nuqui bëdamboec tabadcuenec. Adquid unësacsho Nuquin Papan abëdi tabadmendac. <sup>23</sup> Icsaido cuidquin Nuquin Papan icsano nidmendac. Abided ciudadec unësaid Esuquidistu Nuquin Icho tantiasho Nuquin Papan nuqui bëdamboen isquin unësacsho abëdi tabadmendac.

## 7

*Bëdamboec tabadte chuinen chido bënëchoquid Pabadon chiaid*

<sup>1</sup> Con utsibobimboecquido mibi neque. Tantia. Padpiden mibi chuinu. Naden chiaid mimbi tantianëdac. —Nuquin Papan dada uamiac Moisesën chiampicpadomboen matsesën naquid. Unësun aidën chiaid natiapimbo iquec —quequin mimbi tantianëdac. <sup>2</sup> Nuquin Papan chiacpadomboen inaidën aton bënë nianesa. Dada utsi chudmesa chidon. Bënë unësambien niantè dada utsin bedadquid. <sup>3</sup> Bënë unësabi icnubi aton bënë nianquin dada utsi bedanec cuenacsho: —Icsambo iquec. Nuquin Papan cuidtequid nec —cabededtsiash. Bënë unësambien dada utsin bedadquid chido. Aden bedacsho Nuquin Papan: —Mibi cuidnu —cainquio ictsiash.

<sup>4</sup> Adecbidi ambi chiaid niac-niacsho Nuquin Papan cuidtsenaïdo nuqui iccondac. Adondaïdi abided cuidadec unësaïd Esus tantiasho Nuquin Papan: —Mibi cuidnu —nuqui cainquio iquendac. Aden Nuquin Papan uincuemeneðdaïden Esusen aton yua nuqui icmequin bëdamboec tabadquid icmenuen nuqui icsaïd bedshumpaneðdash. <sup>5</sup> Esus tantiabi yec nuqui bunacpadeçuidi nuqui icsapadenec. —Adenda —quequin Nuquin Papan chiaid tantiashi: —Adequi icsaquionona —quiash nuqui icsaquiodenec. Adquid yec unësaçsho icsano nidmequin Nuquin Papan nuqui cuidtseneðdash. <sup>6</sup> Esus tantiabi yec nuqui nadondac. —Moisesen chiacpadeç bëdamboec tabadsho Nuquin Papan nuqui bëdamboen istsiash. Ambi chiaid niac-niacsho nuqui cuidendac —quiondaïdi nëbi Esus tantiec nuqui adenquio iqueç. Nëbi Nuquin Papan Mayanen tantiamiacpadeç nuqui bëdamboec tabadeç.

*Icsaquid nebi, quequin Pabadon chiaid*

<sup>7</sup> —Nuquin Papan ambi chiaid Moises dada uamepampid icsambo iqueç —çquectabi iqueç? Icsapenquio iqueç. Nuquin Papan ambi chiaid Moises dada uamaïd isun: —Nuquin Papan chiaid niac-niaqueç icsachitobi —quequin nuqui tantiec. “Ûtsin na isash: ‘Con na adquid nibëdec,’ queç chieshëmënenda,” quequin Nuquin Papan Moises dada uamaïd isun: —Adeç icsachitobi —quequin tantiabenondambi. Nuquin Papan ambi chiaid Moises dada uamaïbi icnuc: —Nuquin Papan chiaid niac-niacchitombi —quequin tantienquiemi ictsenchitondac. <sup>8</sup> Utsin na isash: —Adquid con na nibëdec —quiash chieshëmëntsëçboedi Nuquin Papan: —Adenda —quequin chiaid tantiashi icsaquid yec utsin na comapenec bunquieç chieshëmënquiondabi. Nuquin Papan chiaid nibëdnuc: —Adeç icsachitobi —quequin tantienquio ictsenondambi. <sup>9</sup> Nuquin Papan chiaid tantiabi yec Nuquin Papan cuidte dacuëðenenquio yec: —Bëdambo iquebi —nuqui quedenec. Adshumbic Nuquin Papan ambi chiaid Moises dada uamiampid isash: —Nuquin Papan chiaid niac-niaqueç icsachitobi. <sup>10</sup> Adquid Nuquin Papan cuidendac —nuqui quianondac. —Ma bëdamboec tabadte tantianu —quequin ambi chiaid Nuquin Papan Moises dada uamiampic. Aid dada uaid isashi: —Bëdamboec tabadenquio iccobi. Icsachitobi. Adquid Nuquin Papan cuidendac —nuqui quianondac. <sup>11</sup> —Ambi chiacpadoomboenuidi nashobini Nuquin Papan bëdamboen isec —queç muadenedi Nuquin Papan chiaid abimbo tantiash: —Icsachitobi. Ambi chiaid niac-niacchitombi. Adquid Nuquin Papan icsano nidmequin cuidendac —nuqui quianondac. <sup>12</sup> Aden nuqui abimbo tantiamequid Nuquin Papan chiaid bëdambo iqueç. Icsaisambo icquin Nuquin Papan bëdamboen chuipampic.

<sup>13</sup> çNuquin Papan chiaid isbanashta matses Nuquin Papan cuidtequido yanactic? Padenquio. Matses Nuquin Papan cuidtequido yanambic Nuquin Papan ambi chiaid dada uamepampic. —Nëid isash: “Icsamboequini tabadchiteç,” ma matses quenu —queshun Nuquin Papan Moises dada uamepampic. Ambi chiaid niac-niacquido icquimbi ambi chiaid tantiash nuqui nadondac. —Icsamboequini tabadchiteç. Nuquin Papan nuqui bëdamboen istiapimboen icchiteç. Èbien cuidchiteç —nuqui quianondac. <sup>14</sup> Nuquin Papan Mayanen tantiamiacpadoomboen con tsusedpan Nuquin Papan chiaid dada uapampic. Adembidi aton Mayanen namiac Nuquin Papan chiacpadeç nuqui bëdamboec tabadtsiac. Aidën namaïbi mëtanaïd abibi mënchiquidtiapimbo yacimboen icsaquido icquin Nuquin Papan chiacpadoomboen natiapimbo nuqui iqueç. <sup>15</sup> —Nuquin Papan chiacpadoomboen nanu —queboedombi natiapimbo nuqui iqueç. Adecbidi: —Ûtsibo icsapadeç icsainquio iquendabi —queboedobi nuqui adeç icsachiteç. Adash:

—¿Atotsieshumbimbi adopoba? —quepec nuqui. <sup>16</sup> —Nuquin Papan chiaid bēdamboen icchitec. Aidēn chiaid niacte bunenquio iquebi —queboedēmbi aidēn chiaid niac-niaquec: —Bēdamboen chiaidimbi niac-niacchitec —quebi. <sup>17</sup> Bēdamboecuidi tabadtiadquidini icsaquid yec ēbembī icsadenechitec. <sup>18</sup> —Bēdamboec tabadnu —queboedi icsaquid yec ēbembī bēdamboec tabadtiapimbo iquebi. Icsaquidini nec. <sup>19</sup> —Bēdambo icte bunebi —queboedi ēbembī bēdamboec tabadtiapimbo iquebi. —Icsate bunenquio iquebi —queboedi ēbenquiobi icsaded-icsadedebi. <sup>20</sup> Icsate bunenquio icboedi icsaquid yec ēbembī bēdamboec tabadtiapimbo iquebi.

<sup>21</sup> —Adquid nebi. Nuquin Papan chiacpadec bēdamboec tabadtiadquidi badedquio icsaded-icsadedebi —quequin tantiembi. <sup>22</sup> —Nuquin Papan chiaid bēdambo iqueque. Ambi chiacpadec ēbembī bēdamboec tabadnu —queboedi <sup>23</sup> icsaquid yec ēbembī bēdamboec tabadtiapimbo iquebi. Mētaniaid abembī mēnchiquidtiapimbo yacimbōen ēmbī naid ēntiapimbo iquebi. —Nuquin Papan chiacpadec bēdamboec tabadnu —queboedi bēdamboec tabadtiapimboeni icchitec. <sup>24-25</sup> Adquid yec shubitiadquio icchitebi. Icsaquid yec: —¿Mitsipadequini bēdamboec tabadpeba? —queboedi: —Abi tantiasho Esuquidistumbini bēdamboen tabadmec —quianondabi. Adshun Nuquin Papanaden chiembi. —Ēbi bēdamboen tabadmequid Esus mimbi ēbi tantiamiac. Mibi bēdambo iquec, Papa —quequin Nuquin Papa chiembi.

## 8

### *Nuquin Papan Mayanēn namiaid*

<sup>1</sup> Aden matses bēdamboen tabadmequid Esuquidistu tantiasho: —Mibi icsambo iqueque. Cuidnu —cainquio iquendac Nuquin Papan. <sup>2</sup> Icsaquido yec bēdamboec tabadtiapimbo icsho Nuquin Papan cuidtequido icboedēmbi Esus tantiasho Nuquin Papan aton Mayan meniac aidēn tantiamiacpadec nuqui bēdamboec tabadanendac. <sup>3</sup> —Moisesēn chiacpadec bēdamboec tabadec unēsash Nuquin Papa yacno tabadebi —queboedi icsaquido yec abembī bēdamboec tabadtiapimbo matses iquec. Adsho isun matses bēdamboen iste bunquin Nuquin Papan aton Madombo Esus matsesmiac. Adoac Nuquin Papan tantiacpadec matses icsaid bedshunec abided cuidadec unēsapanēdash. <sup>4</sup> —Abided cuidadaid con Mado Esus tantiasho bēdamboen isquin con Mayan matses menendambi. Adoac aidēn tantiamiac ēmbi Moises chuimiampicpadec bēdamboec tabadendac. Matses abi icsate bunacpadec icsainquio yec bēdamboec tabadendac —queshun Nuquin Papan Esused cuidpac caondash.

<sup>5</sup> Adec Nuquin Papan Mayanēn tantiamiaid Esus tantiaquid Nuquin Papan tantiacpadec bēdamboec tabadte bunec. Padnuen icsaquid: —Ēbi bunaid nanu —quequin ambibi tantiacpadec icsaic. <sup>6</sup> Aden abi bunaidquio naic icsamboec tabadquid Nuquin Papan cuidendac. Padnuen Nuquin Papan Mayanēn tantiamiacpadec tabadquid Nuquin Papan cuidte dacuēdēnenquio yec bēdambo yec unēsash Nuquin Papa yacno tabadendac. <sup>7</sup> —Icsate bunquidēn ēbi chieshēnec. Ambi naiduidtsēqui naquin ēmbi chiacpadomboen natiapimbo iquec —queshun Nuquin Papan cuidendac. <sup>8</sup> Adquido chuiquin: —Mibi bēdambo iquec —catiapimbo Nuquin Papa iquec.

<sup>9</sup> Esus tantiaquidien adesa nec. Esus tantiasho Nuquin Papan aton Mayan nuqui meniac aidēn tantiamiacpadec nuqui bēdamboec tabadendac. Nuquin Papan aton Mayan meniacmaid Esus tantiesa nec. Nuquin Papan Mayan Esusēn Mayambidi nec. <sup>10</sup> Abided cuidadaid Esus tantiasho bēdamboen isquin Nuquin Papan aton Mayan meniaid yec abēd tabadtequido nuqui nec.

Icsaquido yec matses abitedi unēsquidombo icnubi Esus tantiaquid unēsacsho Nuquin Papan abēdi tabadmendac. <sup>11</sup> Esus uincuemequidēn Nuquin Papan ambi aton Mayan meniaido unēsacsho nuqui uincuemequin nuquin dada utsi uaindac. Aton Mayan nuquibēd tabadsho isun nuqui adoendac.

<sup>12</sup> ¿Ēbi adsho tantiashta Esus tantiaquid abi bunacpadequi icsapec? Padenquo. Bēdamboec tabadte bunec. <sup>13</sup> Utsiboen abi bunacpadec icsamboecuidi tabadec unēsacsho cuidquin Nuquin Papan icsano nidmendac. Nuquin Papan Mayanēn tantiamiacpadec tabadquin nuqui icsaid nuqui ěnec. Adash unēsash Nuquin Papa yacno nuqui tabadendac.

<sup>14</sup> Aden aton Mayanēn bēdamboec tabadmiaido Nuquin Papan: —Con mado nec. Con champi nec —capendac. <sup>15</sup> ¿Icho icsambo icquidēn yua dacuēdmiac bimboenda Nuquin Papan Mayanēn nuqui dacuēdmec? Padenquo. Nuqui bēdambo icmec. Aidēn tantiamiacpadomboen Nuquin Papauidsēqui papa nuqui capec. <sup>16</sup> Aden Nuquin Papan Mayanēn: —Nuquin Papan mado nec. Adecbidi aton champi nec —nuqui catsiash. Adoac: —Ai, Nuquin Papan mado nebi —dada quenubi chido: —Adecbidi Nuquin Papan champi nebi —quepec. <sup>17</sup> —Con mado nec. Con champi nec —queshun nēbi Nuquin Papan nuqui bēdamboen isquin unēsacsho abēdi tabadmequin nuqui bēdamboshē icmendac. Utsibon chieshēnac chieshtoenquo yec unēsacsho Nuquin Papan abēdi tabadmequin Esus bēdamboshē icmiac. Adembidi Esus tantiaquid icsho utsibon chieshēnaqui chieshtoenquo icquin Esus tantiequi unēsacsho Nuquin Papan abēdi tabadmequin nuqui bēdamboshē icmendac. Nuquin Papa yacnombo Esuquidistun natedi nuquin na nendac.

#### *Nuquin Papan bēdamboshē icmete chiaid*

<sup>18</sup> Adec Nuquin Papa yacno nuqui bēdamboshē icte tantiaquin nuqui nidaidēn natiaic tabadaiduidi ma nuqui tantiatipimbo iqueyoc. <sup>19</sup> Aden Nuquin Papan nuqui bēdamboshē icmete tantiec ambi uaid utsitedi nidaidēn icquidtedi aben icquidtedi: —Nēbimbobi bēdambo icmepashuni —queded-quededec tabadec. <sup>20</sup> Abia matses uaid Adan icsasho cuidquin ambi uaid nidaidēn icquidtedi Nuquin Papan unēsquiduidquo icmepampic aidon: —Padi —catiapimbo icnuc. <sup>21</sup> —Yuecshun ěmbi Esus tantiaquido uincuemequin aton dada utsi uacpadēn ěmbi uaido utsi nidaidēn icquidtedi chodquete icboedi utsi uain bēdamboshē icmendambi —quequin tantiaquimbi unēsquiduidquo icmepampic. Aden Nuquin Papan chiaid tantiaquin ambi uaidon nidaidēn icquidtedishun aton dada abi bēdambo icmete tantiaquin cainec tabadec. <sup>22</sup> Unēstiapimbo icte bunec unēsquid yec: —¿Tedecksicshun Nuquin Papan nuqui utsi uapeba? Nēbimbobi Nuquin Papan utsi uapashuni —queded-quededec Nuquin Papan uaidtedi. Bacuē tishquid bacuē paēmbo icnuc: —Badedquo tishmepashuni —quiacbimboec adpec. <sup>23</sup> Nuquin Papan meniaidēn aton Mayanēn tantiamiacpaden nuquitsen naden chiec. —Con dada utsi uaquin unēstiapimbo icquid icmepashuni. Ambi chiacpadomboen naquin: “Con mado neque. Con champi neque. Utsibo ismenu,” quequin nuquin dada utsi uaquin Nuquin Papan unēstiapimbo icquid icmendac —queded-quededquin nuquin dada utsi uate tantiaquin nuqui cainec. <sup>24-25</sup> —Esus tantiaquido unēsacsho Nuquin Papan nuquin dada utsi uaindac —quequin tantiaquin nuqui Esus tantiabenondac. Nuquin dada utsi uabi icnubi: —Nēbimbobi dada utsi uapashuni —nuqui queded-quededendac yuec. Nuquin Papan nuquin dada utsi uaquien nuqui adenquo iquendac.

<sup>26</sup> —Aden aton dada utsi uate tantiaquin yuen cainec chieshtonoshe —queshun Nuquin Papan Mayanēn nuquibēd icquin bēdamboen tantiamec. —¿Mitsipadembimbi Nuquin Papa chuipeba? —quec nuqui shubitiadquo

icsho isun Nuquin Papan Mayanën abi chiec. Unësquio icnuc onquenquio icquin chiec: —Mimbi tantiacpadomboen aid matses bēdambo icmeta, Papa —quequin Nuquin Papan Mayanën nuqui comapenen chuided-chuidedec. <sup>27</sup> Aden Nuquin Papan: —Ma Esus tantiaquido bēdambo icnu —quequin tantiaidbidi aton Mayanën onquenquio icquin chuisho Nuquin Papan tantiec. Otacquo tantiaidtedi tantiaquid icquin Nuquin Papan aden aton Mayanën chiaid tantiec.

### *Nuquin Papan nuqui bēdambo icmiaid*

<sup>28</sup> Aden tantiashun nuqui naden tantiec. Ambi tantiamiacpadomboen abi tantiaquido bēdambo icmete bunquin Nuquin Papan bēdamboen nashunec. Unësquio yec tabadsho aden naic. Natiambo icscho adembidi naic. Cuis-honquesho adembidi naic. <sup>29</sup> Ēndenquimboshē nidaid uabi yequi Nuquin Papa nadpampic. —Ēmbi tantiactedi ēbēdta con Mado tantiaquid icmequin Esuspadquo icnuc bēdambo icquid icmendambi. Aden abi tantiaquido aton utsibobimboecnuc icmendabi —quequin ambi tantiampicpadquo icnuc bēdambo icmenuen Nuquin Papan naic. <sup>30</sup> Ēndenquimboshē nidaid uabi yec: —Yuecshun naindambi —abi quiampicpadomboen Nuquin Papan nuqui Esus tantiamiac. Adoac nuqui cuidmenquo icnuc abided cuidadaid Esus tantiasho Nuquin Papan nuqui bēdamboen isec isaisabimboecnuc. Nuqui bēdamboen isquin nuqui bēdamboen tabadmec. Unēsacsho nuqui unēstiapimbo icquid icmeshun abēdi tabadmendac.

<sup>31</sup> ¿Embi aden chiaidtedi tantiashta Esus tantiaquido dacuēdpec? —Nuqui cudasquin Nuquin Papan nuqui bēdambo icmendac. Ēbi chieshēnquidēn: “Cuid,” cac Nuquin Papan ēbi cuidenquo ictsiash —quec nuqui dacuēdenquo iquec. <sup>32</sup> Nuquin Papan nuqui tantiaquiec. Aton Madombo cudasenquo icquimbi nuqui cuidenquo icnuen aton Madoded cuidquin unēs uamepanēdash. Adshumbic Esus tantiasho ēnenquo icquin bēdamboen isquin nēbi bēdambo icmequin unēsacsho abēdi tabadmecquin nuqui bēdamboshē icmendac. <sup>33</sup> ¿Nuquin Papan nuqui bēdamboen isquidēmbida nuqui cuidpec? Padenquo. ¿Utsibo nuqui caic: —Icsambo iquec —queshobida Nuquin Papan nuqui cuidpec? Padenquo. <sup>34</sup> ¿Esusēmbida nuqui cuidpec? Abi tantiaquido cuidmenquo icnuc abided cuidadec Esus unēsac caondash. Unēsacsho Nuquin Papan uincuemiac Nuquin Papa yacnoshon aidēmbi abi tantiaquido chianec. —Ēbi tantiaquido bēdamboen isquin cuidenda, Papa —quequin Nuquin Papa chianec tabadec. ¿Adquidēnquiobida nuqui icsano nidmequin cuidpec? Padenquo. <sup>35</sup> Nuqui bēdamboen isquin ēnenquo icquin Esusēn nuqui tantiaquiec. ¿Shubisho isunda Esusēn nuqui tantienquo icpec? Padenquo. ¿Dacuēdshoda Esusēn nuqui tantienquo icpec? Padenquo. Adembidi nuqui tantiaquiec. Utsibon chieshēnsho bēdamboen isquinc pete natia bunsho bēdamboen isquinc nuquin dashcute nibēdsho bēdamboen isquinc nuqui Esusēn caindac. —Ēbi acshunendac —quesho bēdamboen isquinc chieshēmēnquidon: —Cuesunenu —casha bēdamboen isquinc nuqui caindac Esusēn ēnenquo icquin. <sup>36</sup> Aden utsibon Esus tantiaquido chieshēntec chuiquin Nuquin Papan dada uamepampic naden.

“Mibi tantiasho ēbi: ‘Cuesunenu,’ caded-cadedec uimanēmēnquidon.

Aben icquidbimboecnuc: ‘Cuesunenu,’ caded-cadedebi, Papa,” quequin Nuquin Papan chiaid dada uapampic Esus tishabi icnuc.

<sup>37</sup> Aden utsibon nuqui chieshēnsho Esuquidistun nuqui bēdamboen tantiaquiec. Shubisho abi nuqui tantiamec. Adoac Esus tantiatsec shubiquimbi

chieshtoenquoio icquin nuqui Esus tantiaquieci yanendac. <sup>38-39</sup> Nuquin Papanantsen ënenquoio icquin nuqui tantiaquieci. Nuquin Icho Esus tantiasho Nuquin Papan nuqui bëdamboen isec. Unësaçsho nuqui bëdamboen tantiasish. Unësaçi içsho nuqui bëdamboen isec. ¿Nuquin Papan abi yacnoshon uaid mayan bëdan: —Aid tantienda —cashoda nuqui Nuquin Papan tantienquoio yampatsiasish? Padenquoio. Adembidi nuqui tantiaquiotsiasish. ¿Podobitsi icsabon icho Satanasën: —Aid tantienda —cacta Nuquin Papan nuqui chieshëmpatsiasish? Padenquoio. Adembidi nuqui tantiaquiotsiasish. Nëbi nuqui bëdamboen tantiec. Yuecshun adembidi nuqui bëdamboen tantiendac. Comapenen tantiaquidtedishun nuqui caic: —Aid tantienda —caqui adembidi Nuquin Papan nuqui tantiaquiotsiasish. Abuc nidacsho Nuquin Papan nuqui bëdamboen tantiasish. Nidaid uquëducquoio nidacsho adembidi nuqui bëdamboen tantiasish. Nuquin Papan uaid utsi abitedishun nuqui caic: —Aid tantienda —caqui adembidi Nuquin Papan nuqui bëdamboen tantiasish ënenquoio icquin.

## 9

### *Pabadon aton matses isadaidbo chiaid*

<sup>1-2</sup> Aden con matses isadaidbo tantiaquid Nuquin Papa nec. —Aden abi tantiaquidi con matsesën bëdamboen tantienquoio iquec —quiash shubitiadquoio iquebi. Muainquoio iquebi. Esus tantiaquid içsho Nuquin Papan Mayanën tantiamiaid icquin abimbo chiembique. Tantiata. <sup>3</sup> Con matses isadaidbo tantiec unësqüo yec tsadebi. Nuquin Papan: —Min matses abitedi cuidenquoio icnuen mibiuidtsëqui Esusbëd tabadmenquoio icquin icsano nidmequin cuidnu —capatecnëdani. Adoac: —Ai, con matses cuidenquoio icnuen ëbided cuid —quetsenondabi. <sup>4</sup> Con matses tsusedpa Acobo caid Nuquin Papan Isadaid caidën tsyuecquidotedi isadaidbo tantiaquin Nuquin Papan nadopampic. —Con matses mibi caimbique. Mibëdi tabadebique. Mibi ismenu —quequin con matses tabadacno abu ushu bëchamauanquieccquid chomequin ismepampic. Adashic nadpampic. —Ëmbi chiacpadec bëdamboec tabadsho mibi bëdamboen isquin bëdambo icmendambi. Mibi nianenquoio iquendambi —qeshun ambi: “Naden nata,” quequin chiaid Moises dada uamepampic. Adoac abi tabadte shubu uashunash Nuquin Papa tantiec isadaidbo tabadpampic. Adshumbic matses cuidmenquoio ictequid chuiquin: —Mibi bëdambo icmendambi —quequin Nuquin Papan con matses chuiampic ëndenquimboshë. <sup>5</sup> Abadauan chuiquinc Isac chuiquinc Acobo chuiquinc capampic. Ambi chiacpadomboen Isadaidbon chidon tishac Esuquidistu matsesac caondash. Nuquin Papapadquidquiobi yec abitedishun Icho yec matsesac caondashe. Esus chuiquin: —Nuquin Papa padquiobi yec mibi bëdamboshë iquec —canuna ënenquoio icquin.

<sup>6</sup> Ëmbi chiacpaden Esus tantienquoio içsho Nuquin Papan con matses dadpen bëdamboen istiapimbo iquec. ¿Aden tantiashtabi nadpe? —Nuquin Papa muapampic. Ambi chiacpadomboen nainquoio icquin con matses bëdamboen istiapimbo iquec —¿quectabi ique? Padenquoio. Nuquin Papan abimbo chuiampic. Isadaidbo dadpenshun Nuquin Papa bëdamboen tantienquoio iquec. Ambi tantiactedishun abi tantiasho ambi chiacpadomboen Nuquin Papan bëdamboen isec. <sup>7</sup> Ëndenquimboshë con tsusedpa Abadauanën mëdaidtedi adembidi Nuquin Papan bëdamboen isambo. Abadauanën mado abentsëqui Isac caic: —Aidën tsyuecquido ëmbi mibi cuënacpadomboen con matses caindami —quequin Nuquin Papan chuiampic. <sup>8</sup> ¿Abadauanën bacuëbotedishun tsyuecquidotedida Nuquin Papan con matses caido nepec?

Padenquo. Ambi chiacpadomboen Isaquën tsyuecquido Nuquin Papan con matses caido nec. <sup>9</sup> Naden Nuquin Papan Isac tishte chuipampic. “Ëmbi tantiacpadën choashun ëmbi namiac Sadan min chidon dada bacuë tishendac,” quepampic Nuquin Papa Abadauan chiec.

<sup>10</sup> Aden ambi: —Adoendambi —quequin chiacpadomboen naquidquo Nuquin Papa nec. Aden Nuquin Papan Isaquën bacuë abi ushëmbi daëd tishte chuipampic. Adnubien con tsusedpa Isaquën aton chido Debeca caid bedshun chudquin dada bacuë daëd usundomepampic Nuquin Papan chiacpadomboen. <sup>11-12</sup> Aid dada bacuë daëd tishabi icshobi Nuquin Papan ani naden chuipampic. “Ëmbi tantiacpadquid min madon utsimpi bëyucquidbimboecquid nendac,” quepampic. Aid daëd tishabi bëdamboec tabadiapimbo icnubi: —Tishacsho ëmbi tantiacpadembi tsyuec tishsaidëmpi abentsëqui bëdamboen isendambi —quequin tantiec adpampic Nuquin Papa. <sup>13</sup> Adembidi Isaquën mado chuiquin Nuquin Papan ambi chiaid dada uamepampic. “ ‘Acobouidtsëqui tantiaquioquin aton buchimpi Esau bëdiactsëc tantiatsendambi,’ quepampic Nuquin Papa,” quequin dada uamepampic.

<sup>14</sup> ¿Ëmbi aden chuisho tantiasht: —Nuquin Papa icsambo iquec —quecta mibi ique? Ma Nuquin Papa icsapenquo icquid neyoc. Icsaquido yec matses abitedi ambi cuidtequido icsho Nuquin Papan ambi tantiactedi bëdamboen isec. <sup>15</sup> Aden Nuquin Papan con tsusedpa Moises chuipampic.

“Embi tantiactedi matses bëdamboen isendambi.

Aidtedi cuidenquo iquendambi,”

quequin chuipampic. <sup>16</sup> ¿—Ëmbembi nasho Nuquin Papan bëdamboen istisash —quec matses bunacpadenda Nuquin Papan matses bëdamboen ispec? Padenquo. Ambi tantiactedishun abi tantiasht Nuquin Papan bëdamboen isendac. <sup>17</sup> Aden ambi tantiacpadomboen ambi naid Nuquin Papan Equipito yacnocquido chuiquid dapa padaon caid chuipampic. “ ‘Matses abitedishun ma nadono. Padaon caid icsasho Nuquin Papan cuidec. Nuquin Papa abitedishun Icho yec nadatiambo icquidquo nec, ma ëbi canu,’ quequin mibi chuiquid dapa icmiondambi. Mibi icsasho pacuënëdacobimboecnuc mibi icmembi,” quequin Nuquin Papan padaon chiaid Moisesën dada uapampic. <sup>18</sup> Aden ambi tantiacpadomboen utsi-utsien icsaido pacuënëdacobimboecnuc icmequin abi tantiamenquo iquec. Adembidi utsi-utsien bëdamboen isquin abi tantiamec.

<sup>19</sup> ¿Ëbi adsho tantiashta mibi nadpe? —¿Atotsieshun Nuquin Papan matses cuidpec? ¿Abitedishun Icho icquin Nuquin Papan namiacta matsesën nainquo icpadic? —¿quecta ique? <sup>20</sup> ¿Matses icquinda mimbi Nuquin Papa chushcapatsia? ¿Ambi uaido icquimbida nuqui nadope? —¿Atotsieshun ëbipadquid matses uao, Papa? —¿capenda nuqui ique? <sup>21</sup> ¿Ada abi nacnenquid matsun chushcapadic? Padenquo. Matsu nacnenquidën ambi tantiacpadomboen nacnenendac. —Nëid nidaid tëshë tēchu bëdambo icquid acte uetequid nacnenu. Nëid nidaid tëshë matsumpi icsactsëcquid opa acmete nacnenu —quequin matsu nacnenquid. Aden ambi tantiacpadomboen nidaid tëshun nacnenquid.

<sup>22</sup> Adembidi nuqui uaquid Nuquin Papan ambi tantiacpadomboen naindac. —Abitedishun Icbombo yec comapenen tantiaquidquo nebi. Adquid icquin icsaido cuidquid nebique. Ismenu —queboedëmbi ambi cuidtequido baded cuidenquo iquec. Ambi ëndenquimboshë tantiacpadomboen aido icsano nidmendac. <sup>23</sup> —Ma ëmbi bëdamboen isaidon naden tantianu. “Icsaisambo icquin matses bëdamboen iste bunquin Nuquin Papan icsaido

badedi cuidenquo iquec,” quequin ma tantianu —queshun icsaido badedi cuidenquo iquec. Ambi ëndenquimboshë tantiacpadomboen ambi bëdamboen isaido abëdi tabadmendac.

<sup>24</sup> Aden ambi tantiacpadomboen Esus tantiasho Nuquin Papan nuqui bëdamboen isec. Isadaidbon abi tantiasho bëdamboen isquinc isadaidpembo matses utsibon abi tantiasho bëdamboen isquinc nuqui caindac. <sup>25</sup> Ambi matses utsibotsen aden bëdamboen iste chuiquin Nuquin Papan con tsusedpa Oseyas caid dada uamepampic naden.

“Utsibo ëmbi con matses cacmaidobi con matses cabenendambi. Adembidi ëmbi bëdamboen tantiacmaidobi matses utsibo bëdamboen isbenendambi,”

quequin Nuquin Papan chiaid dada uashun <sup>26</sup> nadentsen dada uapampic.

“Matses utsibo ambi con matses cacmaidobi ambi tantiacpadën aido abentse-abentsen Nuquin Papan bëdamboen isendac.

Bëdamboen isquin: ‘Con mado nec. Con champi nec,’ caindac,”

quequin Nuquin Papan matses utsibo bëdamboen iste chuiquin dada uapampic.

<sup>27</sup> Ambi con matses caidombi abi tantiatipimbo icsho isash Nuquin Papa chushquiaid con tsusedpa Isayasën naden dada uapampic. “Masitedi dadpenquo caidnëdaido isadaidbo daëdpactsëcshun abi tantiasho bëdamboen isquin aitedtsëqui Nuquin Papan cuidenquo iquendac. <sup>28</sup> Ambi chiacpadomboen ambi tantiacpadën matses abi tantiesabotedi Nuquin Papan uesquin cuidendac isadaidbo yec matses utsibo yec quenuc,” quequin Isayasën dada uapampic. <sup>29</sup> Nuquin Papan chiaid padpiden dada uaqin isadaidbo cuidte Isayasën chuipampic naden.

“Shubu dadpen icquid Sodoma caid yacnocquidobëdta shubu dadpen icquid utsi Comoda caid yacnocquido Nuquin Papan uesquin cuidac aton tsyuecquido nibëdquiec iquendac.

Adembidi con matses Nuquin Papan uesquin cuidtsempanëdash.

Abitedishun Icho icquin con matses nibëdquiecnuc cuidtsempanëdash. Dadpen cuidquin daëdpactsëc cuidabi icpanëdash,”

quequin dada uapampic Isayasën.

### *Isadaidbo bëdamboen istiapimbo icte chiaid*

<sup>30</sup> Aden Isadaidbo dadpenshun abi tantienquo icsho Nuquin Papan bëdamboen istiapimbo iquec. Padnuen matses utsibo: —Mabi Nuquin Papan bëdamboen isnu. Ambi chiacpadec bëdamboec tabadnu —quesabobi: —Ëbi cuidmenquo icnuec abided ciudadec unësaid Esus bëdamboshë iquec —quesho Nuquin Papan bëdamboen isec icsaisabimboecnuc. <sup>31</sup> Isadaidboen: —Moisesën chiampiduidi ëmbembi nasho Nuquin Papan bëdamboen isebi —queboedombi nainquo icsho Nuquin Papan bëdamboen istiapimbo iquec.

<sup>32</sup> ¿Atotsieshun Nuquin Papan isadaidbo bëdamboen istiapimbo icpec? —Ambi chiacpadomboenuidi ëmbembi naquin Nuquin Papa bëdamboen ismembi —queboedombi adotiapimbo icquin Nuquin Papa bëdamboen ismequidquo Esus chieshë nec. Adsho Nuquin Papan bëdamboen istiapimbo iquec.

<sup>33</sup> Esus tishabi icnuc isadaidbon Esus chieshënte chuiquin Nuquin Papan con tsusedpa naden dada uamepampic.

“Buintad bëdambo icquid istuidash: ‘Nëidquo shubu uanun nitsinembi,’ quiacbimboen

Edusaden yacno ëbi bëdamboen ismequidquo isadaidbobëd tabadmen-dambi.

Adec tabadsho anocquidon chieshëndac.



Aid chieshēnquid nadquio iquendac. ‘Cuēte mabud iquec,’ quequin tantienquio yec nidec tocoshquetanec uebudac bimboec  
 ēbi bēdamboen ismequid tantienquio yec unēsash icsano nidendac.  
 Aid tantiaquido: ‘Nēid tantiasho Nuquin Papan abi yacno nuqui tabadmendac,’ quequid unēsacsho ēbi yacno tabadmendambi,”  
 quequin Nuquin Papan ambi chiaid dada uamepampic.

## 10

<sup>1</sup> Con matses isadaidbo tantiac unēsquio icnuc Nuquin Papa chianiombi. —Con matses isadaidbo abided cuidadaid Esus tantiameta, Papa. Esus tantiasho bēdamboen ista, Papa —quequin Nuquin Papa chianiombi. <sup>2</sup> Esus tantiabi ēmbi chuidenecpadomboen chiec: —Nuquin Papan chiacpadomboenuidi naquin Nuquin Papa bēdamboen ismembī —quetsēcboedombi con matsesēn Nuquin Papa bēdamboen ismete tantienquio iquec. <sup>3</sup> —Abided cuidadaid Esus tantiasho Nuquin Papan bēdamboen isebe —quetiadquidi icsamboen tantiec. —Nuquin Papan: “Bēdamboec tabadta,” quequin chiaid Moisesēn dada uactedi naquin Nuquin Papa bēdamboen ismembī —quequin icsamboen tantiaquin Nuquin Papan tantiacpadomboen nainquio icquin Esus tantienquio iquec. <sup>4</sup> Esusuidtsēqui Nuquin Papan: —Bēdamboec tabadta —quequin chiaid Moisesēn dada uactedi naquidquio nec. Adec icsaisa yec matses icsaid bedshunec abided ciudadec unēsac caondash. Nēbi Esus tantiasho Nuquin Papan matses bēdamboen isec icsaisabimboecnuc.

<sup>5</sup> Nuquin Papan chiaid dada uaquin Moisesēn chuipampic naden. “Ambi chiacpadomboenuidi naquid Nuquin Papan bēdamboen isquin abēdi tabadmetsiash,” quequin Nuquin Papan chiaid Moisesēn dada uapampic. <sup>6</sup> Aden ambi chiacpadomboenuidi natiadquidombi natiapimbo icsho Nuquin Papan matses bēdamboen istiapimbo icpanēdash. Nēbi abided cuidadaid Esus tantiasho nuqui bēdamboen isec. Adoac Esus tantiaquido nadenquio iquec. —Nuquin Papa yacno nidshun ¿tsuntsin Nuquin Papa nuqui bēdamboen ismepatsiashba? —quenquio nuqui iquec. —Esusquio Nuquin Papa bēdamboen ismequidquio nec —quequin nuqui tantiec. <sup>7</sup> Aden tantiec: —¿Tsuntsin Nuquin Papa bēdamboen ismequidquio uincuemepatsiashba? —quenquio nuqui iquec. —Abided ciudadec unēsacsho Esus uincuemiāc caondash —quequintsēn nuqui tantiec. <sup>8</sup> Aid tantiasho Nuquin Papan nuqui bēdamboen isec. Ambi bēdamboen iste chuiquin Nuquin Papan naden dada uamepampic. “Nuquin Papan chiaid chuisho tantiash: ‘Abimbo chiec. Aid tantiēmbi,’ qesho Nuquin Papan matses bēdamboen isendac,” quequin dada uamepampic. Nēbi Nuquin Papan chomiaid abided cuidadaid Esus tantiasho Nuquin Papan nuqui bēdamboen isec. Aden nuqui bēdamboen ismequid Esus chuibenēquid nebi. <sup>9</sup> —Nuquin Papan uincuemiaid Esus abitedishun Icho neque. Con Icho Esus canu —quequin chuisho Nuquin Papan nuqui bēdamboen isquin cuidenquio iquendac. <sup>10</sup> —Ēbi cuidmenquio icnuec abided cuidadaid Esus tantiēmbi —quequin otacquo tantiaquidēn: —Esus tantiaquid nebi —quequin utsibo abimbo chuisho bēdamboen isquin Nuquin Papan cuidenquio iquendac.

<sup>11</sup> Ambi chiaid Nuquin Papan dada uamiācpaden:  
 “Aid tantiec: ‘Nēid tantiasho Nuquin Papan abi yacno nuqui tabadmendac,’  
 quequid unēsacsho ēbi yacno tabadmendambi.”

<sup>12</sup> Isadaidbo yec matses utsibo yec quequido Esus tantiaquidtedi adendac. Aden abitedishun Icho icquin abi tantiaquidtedi Esusēn bēdambo icmendac. <sup>13</sup> Aden Esusēn nate chuiquin con tsusedpan Nuquin Papan chiaid dada uapampic. “ ‘Abitedishun Icbombo icsho mibi tantiaquid nebique.

Ëbi bēdamboen ista, Icbo, qesho bēdamboen isquin cuidenquo iquendac,” quequin dada uapampic.

<sup>14</sup> ¿Mitsipaden matsesēn Esus tantiabempec? ¿Esusēn naid chiabi yacta matsesēn tantiapēc? Padenquo. Esusēn naidquo chuibanaguien tantiendac. ¿Esusēn naid chuisho tantiash: —Mua —quequidta Esus tantiaguid nepadic? Padenquo. —Abimbo caic —qeshun: —Min Mado Esus tantiembique. Ëbi bēdamboen ista, Papa —quequidien Esus tantiaguid nec. <sup>15</sup> ¿Mitsipadoaidēn Esusēn naid chuibampec? ¿—Chuita —cacmaidēnda chuibampec? Padenquo. Nuquin Papan: —Con Mado chuibeneta —caidien Esusēn naid chuibanquid nendac. Aden chuibante chuiquin Nuquin Papan naden dada uamepampic. “Nuquin Papan matses bēdamboen iste chuibanquid chosho isash: ‘Bēdambo iquec,’ quec matses cuishonquendac,” quequin dada uamepampic.

### *Isadaidbo dadpeshun Esus tantienquo yaid*

<sup>16</sup> Adquidēn Esusēn naid chuibanac isadaidbo dadpeshun Esus tantienquo iquec. Daēdpactsēcshun tantiec. Abi tishabi icnuc aden abi tantiesabo Esusēn chuite Nuquin Papan con tsusedpa Isayas caid dada uamepampic naden. “Mimbi chiaidquo ěmbi chuibancho ĩtsuntsin tantiapēc, Papa? Daēdpactsēcshun: ‘Abimbo mimbi chiec. Mibi tantiaguin mimbi chiacpadomboen naimbi,’ ěbi caindac, Papa,” quequin Esusēn aton Papa chuite Isayasēn dada uapampic. <sup>17</sup> Aden Esusēn naid chuibancho tantiashun: —Abimbo caic —qeshun utsibon Esus tantiec.

<sup>18</sup> ¿Esusēn naid chuisho tantiabida con matses isadaidbon icpadic? Ma tantiapaboc. Nuquin Papan chiaid dada uampicpadomboen “nidaid utsi-utsiec yacno nidshun Nuquin Papan chomiaidēn naid chuibanquidēn chuibanendac.” Aden chuibancho ma con matsesēn tantiaboc. <sup>19</sup> Aden Nuquin Papan chiaid chuisho tantiash: —Tantiadenquo yec onquec —¿quepecta icnēdash con matses? Padenquo. Tantiashi abi bēdamboen tantiate bunenquo icsho isun matses utsibo bēdamboen isbente chuiquin Nuquin Papan ambi chiaid isadaidbo tsusedpa Moises dada uamepampic naden.

“Isadaidboudi ěmbi bēdamboen iste mimbi danubi ěmbi con matses cacmaidobi matses utsibo bēdamboen isbenendambi. ěmbi matses utsibo bēdamboen iso isash: ‘¿Atotsieshun Nuquin Papan matses utsibo bēdamboen ispec?

Icsambo iquec,’ quec mibi chushquendac.

Matses utsibobi ěbi tantiabi icquido ěbi tantiamendambi.

Aido bēdamboen isquin mibi nēishēmendambi,”

quequin Nuquin Papan Moises dada uamepampic. <sup>20</sup> Adembidi dacuēdenquo icquin Isayasēn Nuquin Papan matses utsibo bēdamboen iste dada uapampic.

“ ‘Nuquin Papa tantiatiadquo iquebi,’ quenquo icquidombi ěbi tantiabenosh.

‘¿Mitsipadembimbi Nuquin Papa bēdamboen ismepeba?’ quesabobi ěmbi bēdamboen iste tantiamiombi,”

quequin Isayasēn Nuquin Papan chiaid dada uapampic. <sup>21</sup> Isadaidbotsen chuiquin Nuquin Papan chiaidquibidi Isayasēn naden dada uapampic. “ ‘Mibi tantiac unēsquo iqueque. Ëbi bēdamboen tantiata,’ cadeniaqui: ‘Padi, mibi tantiatipimbo iquebi,’ quequin ěnenquo icquin ěmbi chiaid mimbi niac-niacpec,” quequin Nuquin Papan chiaid Isayasēn dada uapampic.

## 11

*Ambi chiactedi isadaidbo Nuquin Papan bēdamboen isaid*

<sup>1</sup> ¿Ambi chiaid niac-niacsho isadaidbotedida Nuquin Papan chieshëmpec? —Con matses catiapimbo iquebi —¿quecta iquec? Padenquio. Isadaidbombo nebi. Èndenquimboshë con tsusedpa Abadauan campidën baban tishmiad Benaminën tsyuecquidon tsyuecquid yec isadaidbombo nebi. Adquid icscho Nuquin Papan chieshënenquio iquebi. <sup>2</sup> Èndenquimboshë nidaid uabi icquimbi Nuquin Papan: —Con matses caindambi —quequin con matses isadaidbo tantiapampic. Adshun abitedi chieshënenquio iquec. ¿Ediasën chiampid tantienquioda ique? Aton matses isadaidbo nëishënshun Nuquin Papa naden chuipampic. <sup>3</sup> “Mimbi con matses caidotedi icsamboshë icquec, Papa. Mimbi chiaid chuibanquidobi cuesun secac. Papa quequin mibi menequin ismete cuënote nacnenaid uesquin chic-chicpac, Papa. Icsamboshë iquec. Èbiuidtsëqui bëdambo iquec. Mimbi chiaid chuibansho tantiashun ëbi cuesunetiadquio iquec, Papa,” quequin Ediasën Nuquin Papa chuipampic. <sup>4</sup> Adoac ¿mitsipadomboen Nuquin Papan chuipampic? “Èbi tantiaquido abi iquec. Èmbi namiacpadomboen isadaidbo dadpenshun 7000tedishun ëbi tantiec. Èbi tantiesabon papa quequin nacnenaid Bad caid tantienquio icquin ëbi tantiec,” quequin Nuquin Papan Edias chuipampic. <sup>5</sup> Adembidi nëbi con matses isadaidbon ambi tantiactedishun Esus tantiasho Nuquin Papan bëdamboen isec. <sup>6</sup> ¿Ambembida con matsesën Nuquin Papa bëdamboen ismepec? Padenquio. —Èmbi chiacpadomboenuidi nasho matses bëdamboen isembi —¿quecta icpec Nuquin Papa? Padenquio. Aden naquid nibëdsho bëdamboen istiapimbo icboedëmbi ambi tantiactedishun icsaboedon Esus tantiasho Nuquin Papan bëdamboen isendac.

<sup>7</sup> Isadaidbon ambi tantiactedishun Esus tantiasho Nuquin Papan bëdamboen isec. Isadaidbo utsiboen bëdamboen istiapimbo iquec. Aido: —Nuquin Papa bëdamboen ismete bunquin ambi chiacpadomboenuidi ëmbimbo nanu —queboedombi nainquio icscho Nuquin Papan bëdamboen istiapimbo iquec. Abi bëdamboen ismequidquio Esus chieshënsho Nuquin Papan pacuënëdacobimboecnuc isadaidbo icmepanëdash. <sup>8</sup> Aden ambi isadaidbo pacuënëdacobimboecnuc icmete chuiquin Nuquin Papan dada uamepampic naden.

“Nuquin Papan pacuënëdacobimboecnuc icmiac Nuquin Papan chiaid chiaqui tantiatiapimbo iquec,”

quequin dada uamepampic. <sup>9</sup> Adembidi ambi isadaidbo pacuënëdacobimboecnuc icmete chuiquin Nuquin Papan con tsusedpa Dabid naden dada uamepampic èndenquimboshë.

“ ‘Èbi bunaiduidi naic ëbibi bëdambo iquebi,’ quequidëmbi Nuquin Papa bëdamboen tantienquio iquec.

Adsho Nuquin Papan cuidpashun.

Cuidadnushi abimbo chiaid danec: ‘Èmbembi naic bëdambo iquebi,’ quendac. Adec abi tantienquio yec icsasho Nuquin Papan cuidpashun.

<sup>10</sup> Pacuënëdacobimboecnuc icmequin Nuquin Papan abimbo tantiamenquio icpashun.

Natiamequin shubimepashun,”

quequin Nuquin Papan chiaid Dabidën dada uapampic.

### *Nuquin Papan matses utsibo bëdamboen isbenaïd*

<sup>11</sup> ¿Aden pacuënëdacobimboecnuc icmiac Esus tantiatiapimbo icscho isadaidbo padpiden bëdamboen tantiametiapimboda Nuquin Papa icpec? Ambi tantiacpadomboen bëdamboen tantiamendac. Nëbi isadaidbo dadpen bëdamboen istiapimbo icquimbi matses bëdamboen iste bunquin Nuquin Papan matses

utsibo Esus tantiamequin bēdamboen isbenec. —Ĕmbi adosho isash isadaidbotsen ma nadnu. “Nuquin Papa bēdamboen ismete bunquiebique. Ĕmbitsen Esus tantianu,” ma quenu —queshun Nuquin Papan aden matses utsibo ambi bēdamboen iste tantiamiac. <sup>12</sup> Ambi chomiaid Esus tantienquo icsho isadaidbo dadpen bēdamboen istiapimbo icquimbi matses utsibon Esus tantiasho ambi con matses caido isadaidbobimboecnuc Nuquin Papan bēdamboen isbenec. Ambi tantiacpadēn ambi tantiamiacpadomboen isadaidbo dadpenshun Esus tantiabensho Nuquin Papan bēdamboen isendac. Adshumbic matses utsibobēdta isadaidbo Nuquin Papan bēdamboshē icmendac.

<sup>13</sup> Tantia, matses utsibo. Mibitsen chuinu. Nuquin Papan icmiacpadomboen matses utsibo Esusēn naid chuibenequidquo nebi. Ĕmbi chuibeneboed con matses isadaidbo chuibanombi naden. —Esusēn naid Ĕmbi chuibeniac matses utsibon Esus tantiabenosh. Adsho Nuquin Papan aido bēdamboen isbenosh —quequin con matses chiombi. <sup>14</sup> —Aden Nuquin Papan matses utsibo bēdamboen isaid Ĕmbi chuisho tantiash Nuquin Papa bēdamboen ismete bunquin Esus tantiatsiash. Adsho Nuquin Papan bēdamboen istsiash —queshun con matses aden chiombi. <sup>15</sup> Aden isadaidbon Esus chieshēnsho isun Nuquin Papan matses utsibo Esus tantiamequin bēdamboen isbenac. Ambi tantiacpadēmbi isadaidbontsen Esus tantiasho Nuquin Papan bēdamboen isbenendac. Isadaidbontsen Esus tantiabededsho isumbic Nuquin Papan matses unēsaidotedi uincuemendac. <sup>16</sup> Con tsusedpa Abadauan abi tantiaquidquo icsho Nuquin Papan bēdamboen isquin: —Con matses mibi caimbi. Adembidi min tsyuecquidotsen Ĕmbi chiacctedi con matses caindami —quequin ambi chiapadomboen isadaidbotedi Nuquin Papan con matses caindac. Ambi nitsinaid cuēte caniacsho: —Tapunuidtsēqui con na nec. Dada con napenquo nec —¿capenda icbon iquec? Padenquo. —Abichobi con na nec —caquid. Adembidi Nuquin Papan isadaidbotedi con matses caic. Caniec taēquid cuēte tapumbimboecquid abia con matses caid Abadauan nec. Cuēte cuidibimboecquido Nuquin Papan con matses caidobidi Abadauanēn tsyuecquido isadaidbo nec.

<sup>17</sup> Aden ambi con matses caidombi ambi chomiaid chieshēnsho cuēte cuidi utsi pobinun pateshuniacimboen Nuquin Papan isadaidbo dadpen bēdamboen istiapimbo iquec. Matses utsibo Esus tantiamequin cuēte dada utsi pobiacimboen aton matses icmequin Ĕbipadquid isadaidbo ambia Esus tantiaquidobēdta Nuquin Papan mibi bēdamboen isec. <sup>18</sup> Adoac icsamboec onquenda. —Isadaidbo dadpen bēdamboen isenquo icquin Nuquin Papan Ĕbien bēdamboen isec. Isadaidbo icsambo iquec. Ĕbien bēdambo iquec —quequin icsamboen chienda. Aden icsamboen chuitiadquo icquimbi nēid chiaidtsen tantiata. Cuēte tapunabi icnuc dada yec podo yec quec cuēte ictiapimbo ictsiandac. Adecbidi isadaidbo tsusedpa Abadauan abia tishabi icnuc aton tsyuecquido isadaidbo nibēdtsempampic. Isadaidbo nibēdnuc isadaidbon chidon Esus tishenquo ictsempañēdash. Ĕmbi aden chiac isadaidbo chiec icsamboec onquenda.

<sup>19</sup> ¿Ĕbi adsho tantiashta mibi nadpe? —Ambi con matses caido chieshēmēnsho isun cuēte cuidi pateshuniacimboen nēbi isadaidbo dadpen Nuquin Papan bēdamboen isenquo iquec. Ĕbipadquid matses utsiboen bēdamboen isbenac —¿quecta iquec? <sup>20</sup> Abimbo mimbi caic. ¿Atotsieshun Nuquin Papan isadaidbo bēdamboen istiapimbo icpec? Ambi chomiaid Esus tantienquo icsho Nuquin Papan aido bēdamboen istiapimbo iquec. Padnuen Esus tantiasho mibi bēdamboen isec. Adoac: —Ĕbi bēdambo icnubi isadaidbo icsambo iquec —quenda. —Esus tantienquo icsho isadaidbo

cuidacpadomboen ëbitsen Nuquin Papan cuidpanundac —quequin Nuquin Papa Esusbëdta tantiaquiota. <sup>21</sup> Ambi con matses caidon Esus tantienquo icsho Nuquin Papan bëdamboen istiapimbo iqueque. Adembidi matses utsibon Esus tantienquo icsho Nuquin Papan mibi bëdamboen istiapimbo iqueque. Esus tantiaquiota.

<sup>22</sup> Aden Esus tantiash nadec onqueta. —Esus tantiasho bëdamboen isquid yec Esus tantienquo icsho isun cuidquid Nuquin Papa nec —cata. Esus tantienquo icsho cuëte cuidi pateshuniacimboen cuidquin isadaidbo bëdamboen isenquo iqueque. —Esus tantienquo yansho adembidi ëbitsen cuidpanundac —qeshun chieshtoenquo icquin Esus tantiana. <sup>23</sup> —Padi, aid tantiatiapimbo iquebi —queboedombi isadaidbon Esus tantiabensho abëdi tabadmenuen Nuquin Papan bëdamboen isendac. Ambi cuëte cuidi pateshuneboedi abibidi pobioacimboen padpiden bëdamboen isendac. <sup>24</sup> Min matses abitedi Nuquin Papa tantiesabo icnëdash. Nëbien cuëte icsan cuidi pateshuniaid pobiacimboen Esus tantiamequin Nuquin Papan mibi bëdamboen isec. Adoac Esusbëdta Nuquin Papa mimbi bëdiactsëc tantiatsec. Con matses isadaidbo tsusedpabo Nuquin Papa tantiaquido dadpenquo icpampic. Nuquin Papan tantiamiac Esus chote chuiquin ënden dada uapampic. Ambi tantiacpadën ambi cuëte bëda cuidi peteshuniaid abibidi pobioacimboembi Esus tantiamequin Nuquin Papan con matses isadaidbo bëdamboen isendac. Adoac cuëshëd-uidboedombi Nuquin Papabëdta Esus bëdamboen tantiaquiendac.

*Ambi chiacpadën Nuquin Papan isadaidbotsen bëdamboen isoaid*

<sup>25</sup> Tantia. —“Isadaidbo icsambo iquec,” quequin chuinushe —qeshun mimbi tantiacmaid Nuquin Papan chiaid mibi chuinu. Nuquin Papan pacuënëdadbimboecnuc icmiac con matses dadpen Esus tantiate bunenquo iquec. Daëdpactsëcshun Esus tantiec. Nuquin Papan tantiatedishun matses utsibo dadpenshumba Esus tantiambic <sup>26</sup> paposhquiacimboen con matses isadaidbo dadpenshun Esus tantiendac. Aden tantiasho Nuquin Papan con matses bëdamboen isendac. Aden ambi isadaidbo bëdamboen iste chuiquin Nuquin Papan naden dada uamepampic.

“Icsambo icquidobi cuidmenquo icnuec Nuquin Papa yacnuësh choquid isadaidbon chidon tishaid iquendac.

Aidëmbi isadaidbo Nuquin Papa tantiaquid padpiden icmendac.

<sup>27</sup> ‘Aden ëmbi chiacpadomboen ëmbi chomiaid tantiasho abi icsaid bëpiscudquin isadaidbo bëdamboen isendambi,’ quependac Nuquin Papa,”

quequin ambi chiaid Nuquin Papan dada uamepampic.

<sup>28</sup> Nëbi Esus chieshënshe isadaidbo bëdamboen istiapimbo icquin Nuquin Papan matses utsibo mibi Esus tantiamiac. Ambi nëbi bëdamboen istiapimbo yaido isadaidbo unësqiocio icnuc Nuquin Papan tantiaquiec. —Ëmbi aton tsusedpabo chiampicpaden aido con matses caimbi —qeshun adoec.

<sup>29</sup> Aden ambibi chiampid niactiapimbo icquin con matses isadaidbotedi tantiaquin Nuquin Papan con matses caic. <sup>30</sup> Min matsesën isadaidpembon Nuquin Papa tantienquo yacimboen nëbi isadaidbon Nuquin Papa tantiamequid Esus tantienquo iquec. Aden Esus tantiatiapimbo icsho isun Nuquin Papan Esus tantiamequin matses utsibo bëdamboen isbenac. <sup>31</sup> Con matsesëmbien abided cuidadaid Esus chieshënquin Nuquin Papan chiaid niac-niacpec. Adoboedombi: —Abided cuidadaid Esus matses utsibon tantiacpadomboen tantianu —quequin Esus tantiabensho Nuquin Papan

aidotsen bēdamboen isendac. <sup>32</sup> Aden matses abitedishun ambi chiaid niacniacsho isun: —Abitedimbo icsaquiec —quequin matses bēdamboen istiapimbo icboedēmbi nēbi Esus tantiasho Nuquin Papan bēdamboen isendac isadaidbo yec matses utsibo abitedi yec quenuc.

<sup>33</sup> Aden Nuquin Papan bēdamboen iste chuisho tantiash nadnuna. Nuquin Papa bēdamboshē iquec. Abipadquid utsi nibēdec. Matsesēn naidtedi tantiaquidquio nec. Abitedimbo tantiaquid icquin ambi natiapimbo ictequid nibēdnuc bēdamboen naquidquio nec. ¿Ada adquid icsho Nuquin Papan naidtedi matsesēn tantiapadic? Padenquio. Ambi naidtedi matsesēn tantienquio iquec. <sup>34</sup> “¿Nuquin Papan otacquio tantiaidtedida matsesēn tantiapadic? Padenquio. ‘¿Mimbi tantienquio iquec. Ēmbi chiacpadomboen nata,’ quequinda matsesēn Nuquin Papa chuipadic? Padenquio. Ambi tantiacpadomboembien Nuquin Papan naindac.” <sup>35</sup> “¿Ada matsesēn Nuquin Papa menepadic? Padenquio. ‘Nē. Con na bedquin mitsana ēbi cuidquin mene, Papa’ ¿quequinda Nuquin Papa chuipadic? Padenquio. Matsesēn: ‘Con na nec,’ caidtedi Nuquin Papan na nendac.” <sup>36</sup> Abitedimbo uaquidquio yec abitedishun Icbombo Nuquin Papa nec. —Uesadec nibēdanushe —quequin abitedimbo isquidquio nec. Aton na abitedi nec. Adec abitedishun Icbombo icsho: —Nuquin Papa bēdamboshē iquec —canuna ēnenquio icquin.

## 12

### *Esus con Icho cain ambi chiacpadomboen naid*

<sup>1</sup> Con utsibobimboecquido mibi neque. Tantia. Mibi chuinu. Nuqui cuidmenquio icnuec abided cuidadaid Esus tantiasho Nuquin Papan nuqui bēdamboen isequc. Nuquin Papa bēdamboen tantiatadquio icquin nadonona. —Ēbi bunaid nainquio yec mibi bēdambo icmenuec mimbi chiacpadec bēdamboec tabadtiadquio iquebique. Min yuambo ēbi icme, Papa —quequin Nuquin Papa chuinuna. <sup>2</sup> Esus tantiesabon nacpadomboen nainquio icquin Nuquin Papan Mayanēn pausunacpadomboen Esus tantiaquin nuqui icsate bunaid ēnuna. Aden nuqui icsate bunaid ēnquin Nuquin Papa bunacpadec bēdamboec tabadquin nuqui tantiendac. Aden naic nuqui bēdambo iquendac.

<sup>3</sup> Tantia. Nuquin Papan tantiamiacpadomboen mibi chuinu. Nadenda. —Ēbiuidtsēqui bēdambo iquebi. Utsibo abitedi icsambo iquec —quenda. Nuquin Papan Mayanēn tantiamiacpadec mibibi datantiadec: —Adquid nebi —quequin abimbo chuita. <sup>4</sup> Nuquin Papan Mayanēn tantiamiacpadomboen naquid Esus tantiaquidēn. Adquid yec ¿ada Esus tantiaquido abitedi chuiquid dapa yampatsiash? Padenquio. ¿Mitsipadquio min dada icpec? ¿Abichobida bedantequid icpec? Padenquio. Mēdanteuidtsēquien bedantequid iquec. ¿Abichobida istequid icpec? Padenquio. Ēshēuidtsēquien istequid iquec. ¿Abichobida shēdtequid icpec? Padenquio. Dēbiateuidtsēquien shēdtequid iquec. <sup>5</sup> Min dada yacbimboec Esus tantiaquido iquec. Abentse-abentsec chuiquid dapa yanubi abentse-abentsec utsibo nashumbanequid yanec. Esus tantiaquidotedi yec bēdamboec tantiananquin nashunanquido yanec. <sup>6</sup> —Ma utsibo nashunu —queshun Nuquin Papan Mayanēn namiaid nec Esus tantiaquido. ¿Atotsi naquid Nuquin Papan Mayanēn mibi icmiac? Nuquin Papan ambi tantiaidquio oncamiaid iquendac. Adquid icquin Nuquin Papan Mayanēn tantiamiaiduidi chuibanta. <sup>7</sup> Utsibic: —Utsibo nashunquid icta —caid iquendac. Adquid icquin bēdamboen nashumbanta. Utsibic Nuquin Papan: —Ēmbi chiaid bēdamboen tantiashun chuibanta —caid iquendac. Adquid icquin Nuquin Papan chiaid tantiatsēcquido bēdamboen tantiameta.

<sup>8</sup> Utsibic: —Chieshtoenquoio icquin Esus tantiec bēdamboec tabadnuna — quequin bēdamboec tabadquin ismequid iquendac. Adquid Nuquin Papan icmiaid icquin Esus tantiaquido bēdamboec tabadte tantiameta. Utsibic aton na nibēdquido aton na menequid Nuquin Papan icmiaid iquendac. Adquid icquin cudasenquoio icquin menianeta. Utsibic: —Esus tantiaquido chuiquid dapa icta —caid iquendac. Adquid icquin Esusēn namiacpadomboen Esus tantiaquido bēdamboen nameta chieshenquoio icquin. Utsibic dada icsaido yec isedanquido yec aton shubu nibēdquido yec aton pete nibēdquido yec macho yec tsusioctšec yec quesho bēdamboen nashunquid iquendac. Adquid icquin Esusēn chiacpadomboen chieshtoenquoio icquin nashumbanta.

*Esus tantiaquidon nadoquid, quiaid*

<sup>9</sup> —Mibi tantiac unēsquoio iquec —quequin utsibo chuiquin abimbo chuinuna. Muainquoio icquin utsibo tantiaquionona. Chieshēmēnenquoio yec bēdamboec tabadnuna. Utsibon: —Icsanuna —caqui: —Padi —quiash icsainquoio yec bēdamboec tabadnuna. <sup>10</sup> —Ēbēdtan Esus tantiaquido con utsibobimboecquido nec —quiash bēdamboec tantiananuna. —Nēid con buchibimboecquid bēdambo iquec. Aidēn chuisho bēdamboen tantianuna —canuna nuquibēdtan Esus tantiaquido chuiquin. <sup>11</sup> Nuquin Papan chiacpadomboen naic chieshtoenda. Nuquin Papan Mayanēn tantiamiacpadec Esus tantiec chieshtoenquoio yec bēdamboec tabadnuna. <sup>12</sup> —Unēsacsho abi yacno Nuquin Papan ēbi tabadmendac —quec cuishonquenuna. Esus tantiaquido icsho utsibon chieshēnaqui chieshtoenquoio icquin Esus tantianuna. ¿Atotsi natiamiante utsi icpec? Adquid tantiec shubiquimbi chieshtoenquoio icquin Esus tantianuna. Baded-badedquien Nuquin Papa chian-chianuna. <sup>13</sup> Nuquibēdtan Esus tantiaquido aton na nibēdsho isun nuquin nabi menenuna. Isedanquido bēdamboen isnuna. Pemequinc nuquin shubun ushmequinc canuna. <sup>14</sup> Esus tantiaquido yec nuqui chieshēnquidobēdi chieshēnanenquoio icnuna. Chieshēnanenquoio icquin Nuquin Papa naden chuinuna. —Ēbi chieshēnquido bēdamboen tantiameta. Chiesh bēdameta, Papa —quequin Nuquin Papa chuinuna. <sup>15</sup> Utsi bēdambo yec cuishonquesho isash aidbēdi cuishonquenuna. Utsi unēsquoio icnuc shubisho isash aidbēdi shubinuna. <sup>16</sup> Cuesnanenquoio yec chieshēmēnenquoio yec bēdamboec tabadnuna. —Con nauidsēqui naimbi —quenquoio icquin utsibobēdtan bēdamboen nanuna. —Ēbiuidtsēqui bēdambo iquebi. Ēmbi tantiacpadomboenuidi naimbi. Utsibon chiaid natiapimbo iquebi —quenquoio yec bēdamboec tabadnuna. —Chuiquid dapabēduidsēqui onquequid nebi —quenquoio yec matses abitedibēd onquec bēdamboec tabadnuna.

<sup>17</sup> Chieshēnaqui cuidnanenda. —Ma utsibo: “Bēdamboec tabadquido nec,” quenu —quiash bēdamboecuidi tabadnuna. <sup>18</sup> Uimanēmēnquido icsho isun aid chuiquin: —Bēdamboequien tabadtiad —canuna. Adquidobēd chieshēnanenda. <sup>19</sup> Ēmbi tantiaido mibi neque. Tantia. Chuinu. Nuqui chieshēnquidobēdi cuidnanenquoio icnuna Nuquin Papan naden chiaid tantia. “Matses cuidnanac icsambo iquec. Ēbentsēcquiobini icsaido cuidquid nec,” quequin Nuquin Papan chiaid dada uapampic. <sup>20</sup> Nuqui chieshēnquidobēdi cuidnanenquoio icquin bēdamboen isnuna. “Pete bunsho pemequinc acte bunsho acmequinc canuna. Nuqui chieshēnquido: ‘Bēdambo icquidi chieshēnec icsachitobi,’ quiash ma nēish bēdanu,” quiash <sup>21</sup> adec cuidnanenquoio icquin nuqui chieshēnquido bēdamboen isnuna.

## 13

### *Chuiquid dapan chiacpadomboen Esus tantiaquidën naquid*

<sup>1</sup> Aton matses chuiquid dapan chiacpadomboen Esus tantiaquidën naquid. Adembidi aton nidaid pais caidën tabadquidotedi chuiquid dapabon chiacpadomboen naquid. —Nuquin Papan adquid chuiquid dapa icmiabi yac nibëdtsiash. Nuquin Papan chuiquid dapa icmiaidien aido nec —queshun aidon chiacpadomboen naquid Esus tantiaquidën. <sup>2</sup> Nuquin Papan chuiquid dapa icmiaidën chiaid niacquid Nuquin Papan chiaidbidi niacquid nec. Aden ambi chiaid niacacsho chuiquidon cuidquid. <sup>3</sup> Bëdamboec tabadquidon chuiquid dapan cuidte dacuëdëntiapimbo iquec. Adquido cuidenquo icquin ambi chiaid niacquid chuiquid dapan cuidquid. Chuiquid dapa cuidmetiapimbo yec bëdamboec tabadta. Adsho isun: —Mibi bëdamboec tabadec —catsiash chuiquid dapabon. <sup>4</sup> —Ma matses bëdamboec tabadnu —quequin Nuquin Papan chuiquid dapa icmiaidën mibi bëdamboen tabadmetiadquio iquec. Nuquin Papan icmiac icsambo icquido cuidquid nec. Adquid icnuc: —Icsasho chuiquid dapan ëbi cuidpanundac —quiash icsaquid dacuëdendac. <sup>5</sup> Ëbi adsho tantiashun chuiquid dapabon chiacpadomboen nanuna. —Cuidnushe —queshun adonona. —Pabiate cuembo icquin Nuquin Papan chiacpadomboen natiadquio iquebi —queshun adonona.

<sup>6</sup> Bëdamboen tabadmenuen Nuquin Papan chuiquid dapa icmiaidon: —Ëmbi chiacpadomboen nata —cac naquid Esus tantiaquidën. <sup>7</sup> Aden chuiquid dapan chiacpadomboen nanuna. Aid bëdamboen isnuna. Aidën: —Nata —cac nanuna chieshenquo icquin.

### *Utsibo tantiaquionona, quiaid*

<sup>8</sup> —Ëmbi nashumbocpadomboen ëbi cuidquin nashunenquo iquec —camenda. Abi nashunquidobëd cuidnanquid Esus tantiaquid. Esus tantiaquidbidi bëdamboec tantiananquid. Adec bëdamboec tantiananquin Nuquin Papan Moises chiampicpadomboen nuqui bëdamboen natsiac. <sup>9</sup> “Ambi naiduidtsëqui nainquo yec abibi datantiadac bimboec ma matses bëdamboec isnanu,” quequin Nuquin Papan Moises naden dada uamepampic. “Min chidopenquo chudenda. Adembidi min bënëpenquo chudmenda chidon. Cuesunenda. Ampenda. Utsin na isash: ‘Adquid con na nibëdosh,’ quec chieshëmë nec tabadenda,” quequin Nuquin Papan con tsusedpa Moises dada uamepampic. Aidën chiacpadomboen natiadquio icquin nuquibi datantiadac bimboen utsibotsen tantiaquionona. <sup>10</sup> Utsibo bëdamboen isquin aido icsa uatiapimbo nuqui ictsiac. Aden utsibo bëdamboen tantiasho Nuquin Papan: —Aden naic ëmbi Moises chiacpadec bëdamboec tabadec —caindac.

<sup>11</sup> —Nëbien abi tantiaquido abi yacno buanuec Esus chochitec —quequin Nuquin Papan chiacpadomboen nanuna. Ushac bimboen nainquo icboedi nëbi ushash isucunac bimboec dayacquio yec chieshtoenquo icquin Nuquin Papan chiacpadomboen nanuna. Esus tantiabenash: —Yuecashien Esus choec —quiondaidi: <sup>12</sup> —Nëbien Esus chochitec —quedonetsëc quec bëdamboec tabadnuna. —Satanasën yuanushe —queshun Esus tantiaquin nuqui icsaid ënshun bëdamboen nanuna. <sup>13</sup> Icsainquo yec: —Bëdambo iquebique. Ma isnu —quiash bëdamboec tabadnuna. Tantiadenuen actequid paëmbo icquid aquenquo icquinc utsin chido chudenquo icquinc utsin bënë chudmenquo icquinc chido utsi mëismenquo icquinc canuna. Adecbidi utsin na isash: —Con na adquid nibëdec —quiash chieshëmë nec tabadenquo icnuna. Adembidi utsin mibi bunaid nasho isash: —Aden ëbi namenquo icpec —quec chieshëmënenquo icnuna. Icsainquo yec



bëdamboec tabadnuna. <sup>14</sup>—Icsate bunchitebi. ¿Mitsipaden naiquini icsape? —  
quenquio yec Esus tantiaquiec abi tabadacpadquiec bëdamboec tabadnuna.  
Nuqui icsate bunaid ënquionona.

## 14

### *Esus tantiaquido utsibo bëdamboen isaid*

<sup>1</sup> Nuquibëdtan Esus tantiatsëcquidon nuqui nacpadomboen nainquio icsho  
bëdamboen isnuna. Ambi chiaidquio chuiquin Esus tantiaquidon natetedi  
Nuquin Papan uesquin chiabi iquec. —Naden nac bëdambo iquec. Naden  
nac icsambo iquec —quequin uesquin chiabi iquec. Aden Nuquin Papan  
chiacmaid chiec nuquibëdtan Esus tantiatsëcquido: —Ëmbi natemaid nec —  
queshobi: —Icsamboen chiec —cainquio icnuna. <sup>2</sup> Esus tantiaquidquio:  
—Pete abitedi pambidbëdta pesho Nuquin Papan nëishënenquio iquec —  
quenubien Esus tantiatsëcquid: —Padi. Pambid pesho isun Nuquin Papan  
nëishënushe. Esus tantiaquidën nitsinaid pequid. Pambid isuidquid —  
quepec. <sup>3</sup> Pambid pequidobëdtan pambid isuidquidombi Esus tantiasho  
Nuquin Papan aid daëdi bëdamboen isec. Padnuen pambidbëdta pete utsi  
abitedi pequidën pambid isuidquid mamënsnunac icsambo ictsiash. Adem-  
bidi pambid isuidquidën: —Pambid pequid icsambo iquec —cac icsambo  
ictsiash. <sup>4</sup> ¿Icbonpenquioda: —Yua icsambo iquec —capadic? Icbombien  
adoquid. Adembidi: —Mibi bëdambo iquec —caquid icbon. Nuquibëdtan  
Esus tantiaquid Nuquin Icbon yua icsho: —Ëmbi nacpadomboen nainquio  
yec mibi icsambo iquec —cainquio icnuna. —Nëid icsambo iquec. Nëid  
bëdambo iquec —quequin Nuquin Icho Esusën ambentsëqui abi tantiaquido  
chiendac. Aidën namiacpadomboen abi tantiaquidon bëdamboen naindac.

<sup>5</sup> Esus tantiaquido utsi-utsiec: —Aid badiadquidënuidtsëqui Esus tantiec  
cuëdënac bëdambo ictsiash —quenubien utsibo: —Badiadquidën badi-  
adquidënquiec Nuquin Papa Esusbëdta tantiec cuëdënebi —quecuededpec.  
Adquid daëd icsho Nuquin Papan nëishënenquio iquec. Esus tantiaquid ambi  
tantiacpadënquiobi cuëdënac bëdambo ictsiash. <sup>6</sup> Aden Esus tantiaquin nac  
bëdambo ictsiash. Adembidi Esus tantiaquin: —Mimbi pete uaid bëdambo  
iqueque. Aid penu, Papa —quequin pambid pequido iquendac. Utsibombic  
adembidi Nuquin Icho tantiaquin: —Mimbi pete uaid bëdambo iqueque. Aid  
penu —queshun utsi pequimbi pambid isuidquid iquendac.

<sup>7</sup> ¿Esus tantiaquid ambi naid-uidi naquidta nedic? Padenquio. ¿Ambi tanti-  
acpadën unësquidta nedic? Padenquio. <sup>8</sup> Nuquin Icho Esusën chiacpadom-  
boen natiadquio yec nuqui tabadec. Ambi tantiacpadën nuqui unësendac.  
Unësabi yec tabadec Esusën yuambo icboedi unësash adecbidi aton yuambo  
nuqui iquendac. <sup>9</sup> Adec Nuquin Icho icnuec abided cuidadec unësash Esus  
uincuempanëdash. Unësabi yec nuqui tabadnuc Nuquin Icbombo icboedi  
nuqui unësan adecbidi Nuquin Icbombo iquendac.

<sup>10</sup> —Adquid Nuquin Icho iquec —quesho ¿tantiashunda nuquibëdtan Esus  
tantiaquid mamënsnuntiad? Padenquio. ¿Nuquin Papan chiacmaid chiec: —  
Ëmbi nacpadomboenuidi nainquio yec icsambo iquec —quequina chushca-  
tiad? Padenquio. Nuquin Icho Esusbëdtan Nuquin Papanuidtsëqui matsesën  
naittedi chiendac. —Nëid bëdambo iquec. Utsi icsambo iquec —quequin  
chiendac matses abitedishun tantianubi. <sup>11</sup> Adote chuiquin Nuquin Papan  
ambi chiaid naden dada uamepampic.

“Tantia. Abimbo caimbique.

Naden matses abitedishun ëbi chiendac.

‘Abitedishun Icbombo mibi nec.

Bëdamboshë icquidquio mibi nec.

Abitedishun naid tantiaquid icquin mimbiuidtsëqui: Nëid icsambo iquec.

Nëidien bëdambo iquec, quequin abimbo chiendac, quequin matses abitedishun ëbi chiendac,”

quequin Nuquin Papan dada uamepampic. <sup>12</sup> Aden ambi cuidte ushën Nuquin Papan: —¿Enda? ¿Mitsipadec tabado? —cabanac nuquitedishun nuqui naidtedi chuibanendac.

*Utsibo icsamenquio icnuna, quiaid*

<sup>13</sup> Ëbi adsho tantiashun Nuquin Papan: —Adoenda —quequin chiacmaid nuqui tantiaid chienquio icnuna. —Ëmbimbo natemaid naic aido icsambo iquec —nuquibëdtan Esus tantiaquido cainquio icnuna. Adenquio icquin nadonona. —Ëmbi ambi natemaid nasho isash chieshtoshon Esus tantienquio yanushe. Ambi natemaid naquin ismenquio iquembi —queshun Esus tantiaquidtedi bëdamboen isnuna. <sup>14</sup> Nuquin Icho Esuquidistu tantiaquidquio icquin ëmbien naden tantiec. —Nëbi Nuquin Papan: “Petemaid nec,” caid nibëdec —quequin tantiembi. Ëbi adnubi utsibo: —Petemaidquio nec. Aid pec icsamane. Aid petiapimbo iquebi —queshumbi adquid pec: —Icsachitobi —quetsiash. <sup>15</sup> Adsho tantiashun aido bëdamboen tantiaquin ambi petemaid nuqui pemenquio ictsiac. Ambi petemaid pemequin mimbi aido tantienquio iquec. —Ëmbi petemaid piash icsachitobi —quequin Esus tantienquio yanushe. Ambi petemaid pemenda. —Nëid petemaid nec —quequido aidotsen tantiaquin cuidmenquio icnuec abided cuidadec Esus unësaque. Aido tantiata. <sup>16</sup> —Nuquin Papan chiaid niaquenquio icquin Esus tantiaquido utsibon: “Aden naic icsatsiash,” caid naimbi. Ëmbi tantiacpadomboen naimbi —queshun mimbi tantiacpadomboen naquin utsibo icsamboen chuimenda. —Is. Esus tantiaquid icsambo iqueque. Ëmbi natemaid naique —camenda. <sup>17</sup> ¿—Nadquid petemaid nec. Nadquid actemaid nec —quequin petebëdta acteuidi tantiecta Nuquin Papan chiacpadec Esus tantiaquido bëdamboec tabadpatsiash? Padenquio. Aton Mayan nuquibëdi tabadmiac chieshëmënenquio yec cuishonquec Esus tantiaquido bëdamboec tabadendac. <sup>18</sup> Adec Esuquidistun chiacpadec tabadsho isun Nuquin Papan: —Bëdambo iquec —caindac. Matsesëntsen: —Aido bëdambo iquec —caindac.

<sup>19</sup> Ëmbi chiacpadec chieshëmënenquio yec bëdamboec isnanuna. —Esus tantiec chieshtoenquio yec bëdamboec tabadnuna —quec chuinanuna. <sup>20</sup> —Nuquin Papan bëdamboen isaidon Nuquin Papa Esusbëdta tantienquio yanushe —queshun utsibon petemaid pequin aido chieshtomenda. Nuquin Papan: —Matsesën petemaid nec —caid nëbi nibëdnubi Esus tantiatsëcquidën petemaid pequin aid chieshtomec mibi icsatsiac. <sup>21</sup> —Ëbëdtan Esus tantiaquido icsamemane —queshun ambi petemaid pambid penquio icquinc ambi actemaid acte paëmbo icquid aquenquio icquinc ambi natemaid utsi nainquio icquinc cac bëdambo ictsiash. <sup>22</sup> Nuquin Papan: —Matsesën natemaid nec —cacmaid tantiaquin: —Ëmbimbo petequid nec. Ëmbimbo actequid nec. Ëmbimbo natequid nec. Aden nasho Nuquin Papan ëbi cuidenquio iquec —quequin mimbi tantiaid caic: —Natemaid nec —quequido naden chienda. —Ëmbi nacpadomboen nainquio yec mibi icsambo iquec —cainda. Adembidi aidon: —Ëmbi natemaid nec —caboed naquin ismenda. Chieshtonoshe. <sup>23</sup> Adquid ambi: —Aid pesho Nuquin Papan nëishëncहितembini ictsiash —caboed piash —Icsachitobi —quetsiash. Adsho Nuquin Papantsen: —Ai, adec icsaic —catsiash. —Aden naic icsachitequini ictsiac —nuqui caidtedi naic nuqui icsatsiac.

## 15

### *Nuqui bunaiduidi nainquio icnuna, quiaid*

<sup>1</sup> Esus tantiaquidēnquio Esus tantiatsēcquid chieshēnenquio icquid. — Natemaid nec — quequin Nuquin Papan chiabi icnubi Esus tantiatsēcquid: — Esus tantiaquin ěmbimbo natemaid nec — qesho tantiashun ambi natemaid naquin ismequin chieshtomenda. Aid tantiaquin ambi natemaid nainquio icquin nuqui bunaiduidi nainquio icnuna. <sup>2</sup> — Esus tantiatsēcboedēmbi ma Esus bēdamboen tantiabenquiono — quequin nuquibēdtan Esus tantiatsēcquidēn natemaid nainquio icnuna. — Aden naic mibi bēdambo iquec — camenuen ambi natemaid nainquio icnuna. <sup>3</sup> Esuquidistun ambi naiduidi nainquio icquin Nuquin Papan chiacpadomboenuidi naic abi chieshēnquido yacnobi chopanēdash. Esus tishabi icnuc Esusēn chuite chuiquin Nuquin Papan con tsusedpa naden dada uamepampic. “Mibi chieshēnacpadomboen chieshēnquin ěbi icsamboen chuishunec, Papa,” quequin Esusēn abi chuite Nuquin Papan dada uamepampic. <sup>4</sup> Aden con matses isadaidbobēdta matses utsibo abitedi bēdamboen tantiamenuen Nuquin Papan ambi chiaid dada uamedenepampic. — Nēid isban-isbanquin ěbēdta Esus ěnenquio icquin tantiec ma matses bēdamboec tabadnu. Adec bēdamboec tabadec: “Unēsash Esusbēdi Nuquin Papa yacno tabadendabi,” ma matses quenu — qeshun ambi chiaid dada uamepampic. <sup>5</sup> Aden matses chieshtoenquio icnuc bēdamboen tabadmequid Nuquin Papa mibi chianembi. — Chieshtoenquio icquin Esus tantiaquid icmequin dayacquio yacimboecnuc matses bēdamboen tabadmequid mibi nec, Papa. Adquid icquin Doma yacnocquidon Esus tantiasho bēdamboec isnanquid icmeta, Papa. <sup>6</sup> Mimbi adoac: “Nuquin Papa chuinuna,” cac aidon abitedishun: “Ai, adonona,” qeshun mibi naden chuitsiash, Papa. “Con Icho Esuquidistun Papa mibi nec. Mibi bēdamboshē iquec,” quequin mibi chuitsiash, Papa — quequin Nuquin Papa mibi chianembi.

### *Nuquin Papan matses utsibo Esus tantiamiaid*

<sup>7</sup> Tantia. Padpiden mibi chuinu. — Nuquin Papa bēdambo iquec — nuqui camenuen Esuquidistun nuqui bēdamboen isequē. Bēdamboec isnanuna. Isadaidbo yec isadaidpembo yec quec bēdamboec isnanuna. <sup>8</sup> Esuquidistu matses abitedi bēdambo icmenuec matsesbēd tabadpanēdash. Esus chote chuiquin Nuquin Papan dada uamepampicpadec isadaidbobēdi tabadquin Esusēn aido nashumpanēdash. — Nuquin Papan abimbo chuipampic — quequin tantiamenuen adopanēdash. <sup>9</sup> — “Icsaboedombi Esus tantiasho Nuquin Papan bēdamboen isquin cuidenquio iquec. Nuquin Papa bēdambo iquec,” ma isadaidpembo matses utsibo quenu — quecbidi Esus matsespanēdash. Aidēn abi chuite chuiquin Nuquin Papan naden dada uamepampic.

“Isadaidpembo matses utsibobēdtan mibi naden chiendambi.

‘Nuquin Papa bēdambo iquec,’ caindambi mibi.

Adecbidi mibi bēdamboen tantiec cuēdēnendabi,”

quequin Esusēn abi chuite Nuquin Papan dada uamepampic. <sup>10</sup> Nadembidi isadaidpembon matses utsibon abi tantiabente chuiquin Nuquin Papan con tsusedpa dada uamepampic.

“Matses utsibo isadaidpembo mibi chuinu.

Nuquin Papan con matses caidobēdi cuishonqueta.

‘Nuquin Papa bēdambo iquec,’ quec cuishonqueta,”

quequin Nuquin Papan chiaid dada uapampic. <sup>11</sup> Nuquin Papan chiaidbidi con tsusedpan padpiden naden dada uapampic.

“Isadaidpembo matses utsi abitedi mibi chuinu.

‘Nuquin Papa bēdambo iquec,’ cata.

‘Nuquin Papa bēdambo iquec,’ quec cuēdēncuededec tabadta,”

quequin dada uapampic. <sup>12</sup> Adembidi isadaidpembon matses utsibon Nuquin Papabēdta Esus tantiabente chuiquin Nuquin Papan con tsusedpa Isayas naden dada uamepampic.

“Dabidēn papa Isai caid ēnden unēsampidēn tsyuecquid yuecash iquendac.

Nidaid utsi-utsiec yacno tabadquidotedi chuiquid dapa icquin bēdamboen namendac.

Aid caic: ‘Nēidēn nuqui cuidmenquio iquendac,’ quependac isadaidpembon matses utsibo,”

quequin dada uapampic.

<sup>13</sup> Aden chiampid mibi nec. Nuquin Papa Esusbēdta tantiaquido icsho mibi Nuquin Papa chianembi. —Mibēdi matses tabadmequidquido mibi neque. Mibi tantiamequin Doma yacnocquido cuishoncameta, Papa. Adembidi dacuēdenquio icnuc bēdambo icmeta. Aden min Mayan aidobēdi tabadmequin: “Esus yacno Nuquin Papan nuqui tabadmendac,” cameta, Papa —quequin Nuquin Papa chianembi.

*Matses utsibo Esus chuibanquid nebi, quiaid*

<sup>14</sup> Con utsibo mibi caimbique. Tantia. Mibi chuinu. —Nuquin Papan Mayanēn tantiamiacpadec bēdamboec isanec bēdamboec tabadtiadquido icquidien nec. Aidēn tantiamiacpadomboen Nuquin Papan chiaid bēdamboen tantiec: “Nuquin Papan chiacpadec bēdamboec tabadnuna,” quec chuinanquidien nec —quequin mibi tantiombi. <sup>15</sup> Aden tantiash: —Nēishēnushe —quenquio icquin: —Bēdamboec tabadta —quequin chuiquin nēid dada uaimbi. Nuquin Papan: —Esus chuibeneta —caid icquin mimbi ēnden tantiaidbidi Esusēn naidquido bēdamboen mibi tantiamenuen dada uaimbi. <sup>16</sup> Nuquin Papan icmiacpadquid Esusēn naid chuibenequidquido nebi. Adquid icquin isadaidpembon matses utsibo Esus tantiaquido Nuquin Papan bēdamboen iste chuibeniombi. Adoac matses utsibon Esus tantiabensho isun aton Mayanēn bēdamboen tabadmesho: —Bēdambo iquec —caindac Nuquin Papan.

<sup>17</sup> Aden: —Esuquidistu bēdamboshē iquec —quequin matses utsibo dadpen Esusēn naid chuibeniombi. <sup>18-19</sup> Esuquidistun ēbi namiaiduidtsēqui mibi chiec nendabi. Aidēmbi namiac matses utsibo Esusbēdtan Nuquin Papan naid chuibenequimbi Nuquin Papan Mayanēn tantiamiacpadomboen comapenen tantiaquin nacnenquin ismebeniombi. Adosho isun Esus tantiabenshun dadpenshun Nuquin Papan chiacpadomboen natiadquido yanosh. Shubu dadpen icquid Edusaden yacnuēsh ēnapen nidash nidaid utsi Ididico caid yacno nidshun chuibeniombi. Ambo nidtanec choaobi Edusaden yacnobidi. <sup>20</sup> Esusēn naid chiacmanouidquido Esusēn naid chuibenetiadquido iquebi. Utsibon Esusēn naid chuibanacno nidtiapimbo iquebi. Esusēn naid chuisho tantiacmaido Esus chuite bunquiebi. <sup>21</sup> Aden nate chuiquin Nuquin Papan con tsusedpa naden dada uamepampic.

“Nuquin Papan chomiaidēn naid chuisho tantiacmaidon tantiabenendac.

Adshun paposhquiacbimboen bēdamboen tantiendac,”

quequin dada uamepampic. <sup>22</sup> —Aden Esusēn naid chiambo yacnoba chuibeneta —quequin Nuquin Papan chiacpadec mibi yacno nidabi iccobi. —Doma yacnocquidon Esusēn naid tantiash —quiash mibi yacno nidabi iccobi. Nēbi mibi yacno nidtiadquido iquebi.

*Mibi yacno nidtiadquido iquebi, quiaid*

<sup>23</sup>—Nēbi Ididico yacno Esusēn naid uesquin chuibeniac —quiash mibi yacnotsen nidtiadquio iquebi. Ēndenquimbo taēc mibi yacno nidte bunondaiddi seta dadpen matamiashic adi nēbi mibi iste bunquiebi. <sup>24</sup>Nidaid utsi Espania caid yacno nidquimbi mibi isbidanendambi. Doma yacno nidash mibēdi cuishonquendabi. Ambo yuec-yuecpamboec tabadash: —Nidnu —quesho: —Ai, nidec nid. Mibi podqued ismequid mibēdi nidendac —ēbi caindac mimbi. Aden tantiec mibi yacno isbidantiadquio iquebi. <sup>25</sup>Nēbini Edusaden yacnoba nidendac. Anocquido Esus tantiaquido utsibon meniaid menenuc nidendabi. <sup>26</sup>—Edusaden yacnocquido Esus tantiaquido utsi-utsiec aton piucquid nibēdeque. Nuquin nabi ma buanshunu. Menenuna —queshun Esus tantiaquido icquin Acaya yacnocquidobēdtambi Masedonia yacnocquidon: —Con na buanshun meneta —caposhi. <sup>27</sup>Aden ambi tantiacpaden nasho: —Bēdambo iquec —caombi. Edusaden yacnoshon Esusēn chiac isadaidbomba Esus tantiapanēdash. Adshumbic aidon chuibeniac matses utsibontsen Esus tantiapanēdash. Aden abi nashunquin chuiquido Edusaden yacnocquido caic: —“Piucquid nibēdec,” quiac caoshe. Menenuna —quesho: —Bēdambo iquec —caombi. <sup>28</sup>Aden piucquid bedshun: —Edusaden yacno buanec nid. Anoshon meneta —quequin meniac aid buanec nidendabi. Buanshun Edusaden yacnoshon Esus tantiaquido aton na nibēdquido menebanash nidaid utsi Espania yacno nidquin mibi isbidanendambi. <sup>29</sup>Mibēdi tabadquin ėmibi Esus tantiamequin chuīsho Esusēn nuqui bēdambo icmendac.

<sup>30</sup>Ēmibi tantiaidombo mibi neque. Tantia. Chuinu. Nuquin Icbo Esuquidistun aton Mayambēdtan tantiamiacpadec nuqui bēdamboec tantiananec. Ēbi tantiaquin Nuquin Papa chianeta. —Ēnenquio icquin Esus tantiamequin mimbi chiacpadomboen Pabado name, Papa. <sup>31</sup>Udeya yacno nidsho Esus chieshēnquidon Pabado cuesnushe. Bedmenda, Papa. Piucquid buanacsho Edusaden yacnocquido Esus tantiaquido bēdamboen bedmeta, Papa. “Matses utsibon isadaidpembon meniaid bedtemaid nec,” quequin bedenquio icnushe. Bēdamboen bedmeta, Papa —quequin Nuquin Papa chianeta. <sup>32</sup>Aden Nuquin Papan tantiamiacpadomboen naquin anoba istanec mibi yacnotsen nidendabi. Mibi istuidash cuishonquendabi. Nuqui bēdamboec tabadendac Esus tantiamenanec. <sup>33</sup>Aden mibi tantiaquin: —Nuqui dacuēdenquio icnuc bēdambo icmequid Nuquin Papa mibēd icpashun —caimbi.

## 16

### *Mibi unēsquio iquec, quequin chiaid*

<sup>1</sup> Nuquibēdtan Esus tantiaquid nuquin chuchubimboecquid Pebe caid neque. Mibi yacno mimbi isacmaid aid nidsho bēdamboen ista. Shubu dadpen icquid Senquedeya caid yacnoshon utsibo bēdamboen nashunquidquio nioshe. <sup>2</sup>Pebe bēdamboen ista. Utsibobēdta ėbitsen bēdamboen nashunoshe. —Nuquibēdtan Esus tantiaquid nec —queshun bēdamboen isquin aidēn: —Ēbi nashunta —cacpadomboen aid nashunta.

<sup>3</sup> Aquida caidbēdta aton chido Pidisida caid chuiquin: —Mibi caic: “Unēsquio iquec,” quiosh Pabado —cata. Aidon ėbēdtan Esusēn naid chuibeniondashe. <sup>4</sup> Aden Esusēn naid chuibenesho: —Cueschitomane. Aden chienda —Esus chieshēnquidon caqui aidon adembidi ėbēdtan Esusēn naid chuibeniondash. Adsho isun: —Mimbi bēdamboen naoc —caondambi. Adembidi aidon chiondaidon isadaidpembon chiondash. <sup>5</sup> Aquidan shubuno Esus tantiec cuēdēnec cho-choquidotsen chuita. —Mibi caic: “Unēsquio iquec,” quiosh Pabado —cata. Utsibic nidaid utsi Asia caid yacnoshon ambia Esus tantiabenondaidd ėmibi tantiaidquio Epeneto caidtsen

adembidi chuita. <sup>6</sup> Nēidtedi chuiquin: —“Mibi unēsquoio iquec,” quiosh Pabado —cabanta. Nēidic Madia caid mibi nashunquidquo. <sup>7</sup> Nēidic con matses isadaidbo Andedonico caid. Nēidic con matses Unias caid. Aidon ēbēdtambi Esusēn naid chuibenesho chieshēmēnquidon bedshun quēnēn nauedondash. Aidombien ambia Esus tantiabempac caondash ěmbi padabi icnubi. Adsho aidoba Esusēn: —Ēbi chuibeneta —cac chieshtoenquoio icquin Esus chuibenequido nec.

<sup>8</sup> Nēidteditsen chuiquin: —“Mibi unēsquoio iquec,” quiosh —cata. Nēidic Esus tantiaquid utsi Ampidias caid ěmbi tantiaidquoio. <sup>9</sup> Nēidic Esusēn naid chuiquid utsi Udbano caid. Nēidic ěmbi tantiaidquoio utsi Estaquis caid. <sup>10</sup> Nēidic Apedes caidtsen. Utsibon chieshēnaqui chieshtoenquoio icquin Esus tantiaquidquo nec. Nēidic Adistobudo caidēn shubun icquidotedi. Aidtedi: —Mibi caic: “Unēsquoio iquec,” quiosh Pabado —cabanta. <sup>11</sup> Nēidotsen adem-bidi chuita. Nēidic con matses utsi Edodion caid. Nēidic Nadsiso caidēn shubun icquido Esus tantiaquidtedi. <sup>12</sup> Nēidic chido Tidipena chedo Tidiposa caidbēdi. Aido Esus tantiec dayacquio icquin ambi chiacpadomboen nabanquido nec. Nēidic chido utsi Pedsida caid con chu icbobimboecquidquo. Aidtsen Esus tantiec dayacquio icquin ambi chiacpadomboen naquidquo nec. <sup>13</sup> Nēidic Dupo caid Nuquin Papan Esus tantiamiaidquoio. Nēidic aton tita con tabimboecquidquo. <sup>14</sup> Nēidic Asinquidito caid. Nēidic Pedeconte caid. Nēidic Edmes caid. Nēidic Patēdobas caid. Nēidic Edmas caid. Nēidic abēd icquido Esus tantiaquido. <sup>15</sup> Nēidic Pidodoco caid aton chido Udiabēdi. Nēidic Nedeyo caid aton chuchubēdi. Nēidic Odimpas caid. Nēidic abēd icquido Esus tantiaquido. Aidtedi chuiquin: —Mibi caic: “Unēsquoio iquec,” quiosh Pabado —cabanta.

<sup>16</sup> Esus tantiaquido yec bēdamboec isnanta. —Mibi tantiēmbi —cananta. Nēmbo icquido Esus tantiaquidtedi mibi caic: —Unēsquoio iquec —quiosh. <sup>17</sup> Ěmbi tantiaido mibi neque. Tantia. Mibi chuinu. ¿Ada mibēdtan Esus tantiaquido chieshēmequin cuēshēdmequido icpec? ¿Ada Nuquin Papan chiaid mimbi tantiaid chienquoio yec mibi icsamenuēc muaquido icpec? Adquidobēd onquec tabadenda. <sup>18</sup> Nuquin Icbo Esuquidistun chiacpadomboen nainquoio icquin ambi petequid-uidtsēqui aidon chieque. Aidon: —Mibi bēdambo iqueque. Ěmbi chiaid tantiata —quequin ambi chiacpadomboen namequin Esus tantiatsēcquid icsamec. <sup>19</sup> —Doma yacnocquido abi tantiec Esusēn chiacpadec bēdamboec tabadosh —quequin mimbi naid chuibenesho dadpēnshun tantiac caosh. Adsho tantiash bēdambo iquebi. Adecbidi Nuquin Papan chiaid tantiec bēdamboec ma mibi tabadpanuna. Utsin: —Icsaic cho —caqui: —Padi. Nuquin Papan chiaid niacmane —quiash aidbēdi icsainquoio icta. <sup>20</sup> Nuqui bēdamboen tabadmequid Nuquin Papa nec. Aidēmbi matses icsamequidquo Satanas chedo comapēnen cuidendac. Nēbi Satanasēn mibi icsametiadquoio icsho tantiashun: —Satanas yuamenquoio icnuen Nuquin Icbo Esusēn abibi tantiamequiopashun —mibi caimbi.

<sup>21</sup> Nēmbo icquidtedishun mibi tantiec. Mibi caic: —Unēsquoio iquec —quiosh Timoteyo ēbēdtan Esusēn naid chuibenequidquoio. Adembidi con matsesēn chiosh. Dusio caid yec Ason caid yec Sosipated caid yec quec adosh.

<sup>22</sup> Pabadon —Naden na —cac nēid dada uaquidquoio Tesio caid nebi. Esus tantiaquid icquin ěmbitsen mibi tantiēmbi. Padi. Aidtedtsēqui ěmbimbo tantiaquin chuishun Pabadon chiaidbidi dada uaoaimbi.

<sup>23</sup> Nēidteditsen mibi caic: —Unēsquoio iquec —quiosh. Nēidic Cayo caid. Aidēn shubun ushobi. Adnuc Esus tantiaquido iccuedednuec aton shubun pudued-puduedosh. Nēidic Edasto caid. Aid nēmbocquidon bedtequid bedbeneshun dayun uaquid nec. Nēidic nuquin utsibimboecquid Cuadto

caid. Aidedishun mibi aden tantiosh. <sup>24</sup> Doma yacnocquido mibi tantiaquin: —Nuquin Icho Esuquidistun bēdamboen isquin mibi bēdamboen tabadmepashun —caimbi.

<sup>25</sup> —Nuquin Papa bēdambo iquec —canuna. Esuquidistu chuibanquin ėmbi: —Aid tantiasho Nuquin Papan mibi bēdambo icmendac —quequin chiacpadomboen Esus tantiamequin Nuquin Papan mibi bēdamboen tabadmetiadquo iquec. Ĕndenquimboshĕ Esus tishabi icnuc matsesĕn Esus chote bēdamboen tantiambo icpampic. <sup>26</sup> Adnubien Nuquin Papan unĕsesambo icquin con tsusedpabo utsi-utsien Esus chote chuiquin dada uamepampic. Nĕbi: —Esusĕn naid chuisho tantiaquin ma nidaid utsi-utsiec yacno tabadquidon Esusĕn chiacpadomboen nanu —queshun Nuquin Papan Esusĕn naid chuibenequido icmiac. <sup>27</sup> Aden namec Nuquin Papa bēdambo iquec. Abipadquid utsi nibĕdec. Ambi natiapimbo ictequid nibĕdec. Abitedimbo tantiaquid nec. Nuqui cuidmenquo icnuec abided cuidadaid Esuquidistu tantiasho Nuquin Papan nuqui bēdamboen isequē. —Nuquin Papa bēdambo iquec —canuna ĕnenquo icquin. Padi. Aidedi chuiquin dada uaombi.

## CODINTO YACNOCQUIDON ISTE 1

### *Pabadon Codinto yacnocquidon iste dada uaid*

<sup>1</sup> Pabado nebi. Nuquin Papa bunacpadomboen Esuquidistun ëbi chuibeneguid icta cac nebi.

Esuquidistu tantiaquidbidi, Sostenes, nuqui con utsi caid ëbëd iquec.

<sup>2</sup> Aidbëd icquimbi Esuquidistu tantiec iccuededquido mibitedi chuiquin dada uaimbi. Matses icsaquid icsho cuidnushe quiash abided cuidadec Esuquidistu unëspanëdash quequin abimbo tantiaquid yec Nuquin Papan cuëmbanaido mibitedi nec quequin mibitedi chuiquin dada uaimbi. Nuquin Papan bëdambo icmenu caido mibitedi nec quequin dada uaimbi. Abi tantiaquid utsibobëd abi tantiaquid nuquitedi nec.

<sup>3</sup> Matses icsaquid icsho cuidnushe quiash abided cuidadec Esuquidistu unëspanëdash, quequin abimbo tantiasho isun Nuquin Papan bëdamboen isaidquio nuqui nec. Adquido yec utsibobëd bëdamboec ma tabadpanuna.

### *Mibi tantiaquin Nuquin Papa chuided-chuidedaid*

<sup>4</sup> Mibi tantiaquin Nuquin Papa naden chuided-chuidedembi. Matses icsaquid icsho cuidnushe quiash abided cuidadec Esuquidistu unësaid chuibanac abi tantiaquido Codinto yacnocquido yanacsho bëdamboequidbimboecnuc mimbi isec, quec bëdambo iquebi, Papa, quequin chuided-chuidedembi. <sup>5</sup> Aden Nuquin Papan bëdamboen isaido icquin ambi bëdamboen tantiamiaidobidi mibitedi nec. Matses icsaquid icsho cuidnushe quiash abided cuidadec Esuquidistu unësaid mibi Nuquin Papan tantiamiac nëbi mibitedi bëdamboec tabadquin Esuquidistu chuibanac.

<sup>6</sup> Esuquidistu tantiesabo iccondaiddi ëmbi Esuquidistun naid chuibanac tantiaquid mibitedi yanondac. Adquido yanash bëdamboec tabadquin ismequido mibitedi nec. <sup>7</sup> Adquido yec Esuquidistu choate caimbudec Nuquin Papan abi bëdamboec tabadaid tantiamiaibi iccoshi quetiapimbo mibitedi iquec. <sup>8</sup> Aden abi bëdamboec tabadaid tantiamequin Nuquin Papan mibitedi chieshenquo icmec ma Esuquidistupadquid icnu quequin mimbi caimbudacpadquio icpanuna aid padpidec choanuc. <sup>9</sup> Adquid mibitedi icmequin ambi Esuquidistubëd icquido icta caido ambi cuëmbanaido Nuquin Papan mibitedi icmiac. Adoshon mibi badedquio Esuquidistupadquid yanenquiocsho isun chieshebi, qesa Nuquin Papa icquin abi mibitedi bëdamboequid icmebanec.

### *Esuquidistu tantiaquid cuëshëdabimboec chushcananquido*

<sup>10</sup> Adembidi chuinu. Tantiata. Esuquidistu tantiaquid nebi quec Nuquin Papan bëdambo icmiaid ënacbimboec tabadenda. Adec tabadec Esuquidistu tantiaquid utsitedi tantiananec ma cuëshëdabimboec chushcananesa yampanuna. <sup>11</sup> Esuquidistu tantiaquido Codinto yacnocquido chushcananec quec. Chido, Quëdoen shubunoësh choquido nëmbo ëbi isec choshon aden chiec. <sup>12</sup> Mibi onquiaid chuinu. Tantiata. Pabadon tantiamiaid nebi, quec chushquiabimboec utsi-utsiec tabadnubien; Apodosën tantiamiaid nebi, quec chushquiabimboec utsi-utsiec tabadnubien; Petedon tantiamiaid nebi, quec chushquiabimboec utsi-utsiec tabadnubien; Esuquidistun tantiamiaid nebi, quec chushquiabimboec utsi-utsiec tabadec.

<sup>13</sup> ¿Esuquidistu tantiaquido cuëshëdmenuenda ëbipadquidon chuibandiondash? Padenquo. Naden chuinu. Tantiata. ¿Matses icsaquid icsho cuidnushe quiash ëbida cuidadec unëspanëda? Padenquo. Adembidi ¿Esuquidistu



tantiaquid nebi quequin ëbi mimbi chuishodambi mibitedi acten mento-  
bandionda? Padenquo. <sup>14</sup> Esuquidistu tantiaquid icsho Quidispobëdta  
Cayo aid daëdtsëqui naondambi quec tantiec tsadebi. <sup>15</sup> Utsi padenquo  
iccondambi ma Pabadon ëbi acten mentondacsho aid tantiaquid nebi,  
quetiapimbo ma mibitedi icpanuna. <sup>16</sup> Ai, Estepanasën shubun icquido-  
bidi acten mentondambi. ¿Utsidambi acten mentoponda? Padenquo ic-  
condambi. <sup>17</sup> Ëbi tantiaquido acten mentoban, Esuquidistun cainquo yaqui  
Matses icsaid bedshunec abided ciudadec Esuquidistu cuesten dectanac  
unëspanëdash quequin chuibeneta, Nuquin Papan cac aden chuibenec nebi.  
Ëmbibi tantiaid chienquiocquin ma matses icsaquid icsho cuidnushe quiash  
abided ciudadec Esuquidistu cuesten dectanac unëspanëdash quequin ma  
utsibontsen tantiapanu qeshun chuibenec nebi.

*Esuquidistu abitedi tantiaquidquo nadatiambocquin nabanquidquibidi*

<sup>18</sup> Nuquin Papabëd icquido icmenuc matses icsaquid icsho cuidnushe  
quiash abided ciudadec Esuquidistu unëspanëdash quequin chiac, ¿Adpecta  
iquec? quequin tantiesa yec Nuquin Papa yacno puduedtiapimbo iquec.  
Adec adquido onquenubi nuquien Nuquin Papa yacno puduedtequido  
yec Nuquin Papan nadatiambocquin nac matses icsaquid icsho cuidnushe  
quiash abided ciudadec Esuquidistu unëspanëdash quequin tantiec. <sup>19</sup> Abi  
yacno puduedtemaido chuiquin Nuquin Papan dada uamiampid nad iquec:  
“Comapenen tantiaquidon ambibi dadpen tantiaidtedi ëmendambi.  
Adquidon tantiatiapimbo yacpadembi natiamequin nabanendambi,”  
quequin Nuquin Papan dada uamiampid aidëmbi nëbi naid nec.

<sup>20</sup> Esuquidistu tantiesa ambibi tantiaidtedi naimëdan ¿mitsimbo adquido  
tabadpec? ¿Nidaid abubëd aidën icquidtedimbo mitsipadquidquo icpec?  
quequin isbanquin, Nadquo icpec, quequin comapenen adquidën tantiec.  
Aden tantiashic ambi tantiaid Nuquin Papan ëmiac ¿mitsimbo adquido tabad-  
pec? ¿Midaquidën bëdamboen tantieque? Adquidën tantiaid tantianu, quec  
onquecuededquid ¿mitsimbo tabadpec Nuquin Papan aidon tantiaid ëmiac?  
Adquidon dadpen tantiaquimbi matses icsaquid icsho cuidnushe quiash  
abided ciudadec Esuquidistu unëspanëdash, quequin utsin-utsinquien tanti-  
auidec. ¿Adsho isun Nuquin Papan abi yacnoda puduedmepadic? Padenquo  
iquec. <sup>21</sup> Nuquin Papan nadatiambocquin nac matses icsaquid cuidnushe  
quiash abided ciudadec Esuquidistu unëspanëdash quequin chuisho am-  
bibi dadpen tantiaquidon tantiauidec. Ëmbi tantiaidpenquo tantiatiapibi  
quequin tantiatiapimbo iquec. Adquido tantiatiapimbo icnubi ëbi yac-  
padquidon Esuquidistu chuibanac abi tantiaquid utsibo yanec. Nuquin Papa  
yacno puduedtequidtedi adquido nendac. <sup>22</sup> Adquidon aden tantianubi  
Nuquin Papan nadatiambocquin nabantequid iste bunquin isadaidbon tan-  
tiauidec. Quidieco matsesëmbien, Ëbi ënden tantiec papuedaid daëd uanu  
queboedëmbi Nuquin Papan chiaid tantiauidoaic. <sup>23</sup> Adec tabadnubi mat-  
ses icsaquid icsho cuidnushe quiash abided ciudadec Esuquidistu cuesten  
dectanac unëspanëdash, quequin ëbi yacpadquidon chuibanoaic. Adoquien,  
Nuquin Papan chomiaid nec, quequin isadaidbon cuesten dectanenquioct-  
senëdash, quequin tantienquo yec tabadec. Isadaidpembo, Esuquidistu  
mimbi chuiboed ëmbi tantiacpadpenquo iquec. Adoac mimbi Esus  
chuibanaid ëmbi ënden tantiaidbëdta daëd uatiapimbo iquebi quec tabadec.  
<sup>24</sup> Adquidon tantiauidnubi isadaidbo utsi-utsiec adecbidi isadaidpembo utsi-  
utsiec Nuquin Papan cuëmbanaido icquin naden tantiec: Nuquin Papan tanti-  
ampicpadquiequi matses icsaquid icsho cuidnushe quiash abided ciudadec

Esuquidistu cuesten dectanac unëspanëdash. Aidi matses icsaquid icsho cuidnushe quiash abided cuidtequid icmequin Nuquin Papan nadatiambocquin naid nendac, quequin nuqui tantiec. <sup>25</sup> Abitedi tantiaquidquio icquin ambi abentsëc tantiatsaid Nuquin Papan chiac dadpen tantiaquidën dëniactiapimbo iquec. Adecbidi, Nuquin Papan nadatiambocquin nainquiocquin bëdiactsëc natsëcnubi adomboen tantiaquin matsesën dëniactiapimbo iquec.

<sup>26</sup> Utsibo, ¿mitsipadquidquio mibi icponda? Nadquid mibi icpondaque. Chuinu. Tantia. Daëdpactsëc tantiatsëcquido mibi icpondac. Namequidpenquio mibi icpondac. Chuiquid dapan bacuëpenquio mibi dadpen icpondac. Adquid icsho Nuquin Papan mibitedi tantiaquin, Con bacuë caid nec, quequin mibi cuëmbanondash. <sup>27</sup> Ai, daëdpactsëc tantiatsëcquido Esuquidistu tantiaquido icsho Nuquin Papan cuëmbanaido mibitedi nec. Adquid ambi cuëmbanaido icnubi dadpen tantiaquid iquequi Esuquidistu tantiesa icsho Nuquin Papan cuëmbantemaid nebi quequin tantiec natiaic ma shubiquiopanuna. <sup>28</sup> Adembidi utsibon tantiauidtsaido Nuquin Papan cuëmbanaido neoaic. Adecbidi, ¿Ada matses utsi iqueque? Isnu quenquiocquin matsesën tantiambo yaid Nuquin Papan cuëmbantequid icnuc <sup>29</sup> ëmbi comapenen tantiaquin nabansho Nuquin Papan cuënoshi quequin matsesën chuitiapimbo iquec. <sup>30</sup> Nuquin Papan tantiamiac Esuquidistu tantiaquid mibitedi nec. Abipadquid Nuquin Papan Chomiaid Esuquidistu yec abi tantiaquidtedi Nuquin Papa bëdamboec tabadaid tantiamequid nendac. Aidi Nuquin Papan chomeshun matses icsaquid icsho cuidnushe quiash abided ciudadec unësaid isun Nuquin Papan cuidtiapimbo nuqui iquec. Icsaisa icsho Nuquin Papan aid bëdamboen isquin adomboembidi nuquitsen isoaic. Adecbidi, aidi abi yacno bëyucanec puduedash tsadacpadec adecbidi nuquitsen tabadoindac. <sup>31</sup> Aden nuqui tantiaquin Nuquin Papan dada uamiampicpaden, Èbibi bëdambo ictiapimbocquid icsho mimbi bëdambo icmiaid nebi, Icbo, quequin ëmbi naid chienquiocquin Esusën naidquio chuibanuna nuquitedi.

## 2

<sup>1</sup> Adembidi chuinu. Tantia. Mibi yacno nidshun dadpen tantiembi quenquiocquin daëdpactsëqui cuembo chuibanondambi. <sup>2</sup> Esuquidistubëdta abi cuesten dectanaid chuinu quequin aiduidi mibitedi chuibanondambi. <sup>3</sup> Codinto yacnocquido dacuëdampambo iquec quequin uëdëequimbi mibi chuibanondambi. <sup>4</sup> Èmbibi dadpen tantiacpadomboen chuibanenquioccombi. Nuquin Papan Mayanën tantiamiacpadomboen ëmbi chuibanubi aidëmbi nadatiambocquin mibitedi tantiamiondash <sup>5</sup> ma Pabaton tantiamiacpadomboen tantiamioshi, quetiapimbo mibitedi icpanuna.

### *Nuquin Papan Mayanën tantiamiaid*

<sup>6</sup> Nuquin Papan tantiamiac comapenen tantiaquin ëbi yacpadquidon chuibanoaic. Aden chuibeniac Nuquin Papan chiaid tantiabenec papuduedquidon bëdamboen tantiec. Aden Nuquin Papan ëbi yacpadquid tantiamiaido matsesën ambibi comapenen tantiacpaden chuibanesambo nuqui nec. Adembidi matses chuiquid dapabon comapenen tantiacpaden chuibanesambo ëbi yacpadquido nec. Matsesën dadpen tantiaid uesadendac. <sup>7</sup> Adnubien Nuquin Papan comapenen tantiaquin, Esuquidistu chuibeneta, quenquiocpampidëmbi nëbi, Chuibeneta, cac Esuquidistu ëbi yacpadquidon chuibanec. Ushë uabi tabadquin matses bëdambo icmequid con mado nendac, quequin Nuquin Papan tantiapampic. <sup>8</sup> Esuquidistu nuqui bëdambo icmetequid Nuquin Papan chomiacsho adquid nec quequin chuiquid dapabon tantienquiocpanëdash. Aidon, Nuquin Papan Chomiaid

Esuquidistu nec, quequin abimbo tantiaquin cuesten dectanenquo ictsenēdash. <sup>9</sup> Aidpadquid chuiquin Nuquin Papan ėndenquimboshē dada uamiampid nad iquec:

“Nuquin Papan abi tantiaquido ambi cuēmbanaido abi yacno tabadmenun nacnenaid bēda tantiesan istiapimbo iquec.

Adecbidi Nuquin Papa yacno nadquo ictsiash, quetiapimbo matses iquec.”

<sup>10</sup> Adnubien Nuquin Papan Mayanēn Nuquin Papan abi yacnoshon bēdamboec tabadte nacnenaid iquec quequin nuqui tantiamiac.

Nuquin Papapadquid aton Mayan icquin Nuquin Papa tabadacpadquiec tabadaid nuqui tantiamiaoic. <sup>11</sup> Matsesēn ambi tantiacpaden chiabi yac utsin tantienquo iquec. Adembidi Nuquin Papan ambi tantiacpaden chiambocnoc matsesēn tantiatiapimbo iquec. Abipadquid aton Mayanēnuidquo tantiec. <sup>12</sup> Con mayan ėbipadquidquo menenu quetiapimbo matses iquec. Nuquin Papambien abipadquid aton Mayan nuqui menec ma aidēnquo abi yacno bēdamboec tabadaid nuqui tantiamapanuna. <sup>13</sup> Aden aidēnquo tantiamiac adomboembidi ėbi yacpadquidon chuibanooic. Ĕmbibi tantiacpadpenquiocquin Nuquin Papan Mayanēn tantiamiacpadomben chuibanembi. Adomboembidi ėbi yacpadquidon chuibanooic. Aden Nuquin Papan chiaid chuibanac Nuquin Papan aton Mayan menaidon tantiaquiec. <sup>14</sup> Nuquin Papan abipadquid meniacmaidon aidēn chiaid tantiatiapimbo iquec. Aden Nuquin Papan Mayanēn chiaid tantiatiapimbo icquin Nuquin Papan matses bēdambo icmenu qeshun Esuquidistu chomiac matses icsaquid icsho cuidnushe quiash abided ciudadec cuesten dectanac unēspanēdash quequin aidon tantiatiapimbo icoaic. Ĕmbi tantiacpadomben Nuquin Papan chienquo iquec, quendac Nuquin Papan abipadquid meniacmaido. <sup>15</sup> Nuquin Papan Mayanēn tantiamiaidombien naden utsibo tabadaid tantiec. Matses bēdamboec tabadsho isun, Nuquin Papan Mayanēn tantiamiacpadec tabadquidquo nec, quequin nuqui tantiec. Adembidi utsi icsamboec tabadsho isun, Nuquin Papan Mayanēn tantiamiacmaid nec, quequin nuqui tantiec. Nuquin Papan Mayanēn Nuquin Papan chiaid tantiamiacmaidon nuqui naic tabadaid isash Nuquin Papan chiacpadquiec tabadquid nec quetiapimbo iquec adquid. Adecbidi Nuquin Papan chiacpadpenquo yec tabadquid nec quetiapimbo Nuquin Papan Mayanēn tantiamiacmaido iquec. <sup>16</sup> Nuquin Papan chuimiampid nad iquec:

“Nuquin Papa Abia Yampid yec abitedi tantiaquidquo nec.

¿Adquid Nuquin Papa icsho abi chuiquin

ismequid mitsicquid icpec? Adquid nibēdec.”

Nuquin Papan tantiacpadomben aton Mayanēn tantiamiaido icquin Esuquidistun tantiacpadomben nuqui tantianec.

### 3

*¿Esuquidistu tantiaquid utsi icsambo iquec, quecta ique?*

<sup>1</sup> Adembidi chuinu. Adembi tantiata. Mibi yacno tabadquin Nuquin Papan chiaid tantiabenabicquid mibitedi icsho daēdpactsēc chuibanondambi. Codinto yacnocquido bacuē uidēnabi yacbimboecquido nec qeshun Nuquin Papan chiaid daēdpactsēc mibitedi chuibanondambi. <sup>2</sup> ¿Nēbi tishaidēnda pambid pepec? Padenquo. Mibitedi adquidbimboecsho tantienquo icnushe qeshun Nuquin Papan chiaid daēdpactsēc chuibanondambi. Ĕnden iccondacpadquobi mibitedi adquibidi icoapec. <sup>3</sup> Esuquidistu tantiesayec tabadondacpadec mibi tabadoaic. ¿Esuquidistu tantiaquid utsi icsambo iquec, quecta ique? Nuquin Papan Mayanēn tantiamiacmaidpadquid yec

nëishec chushcananec mibi. <sup>4</sup> Pabadon tantiamiaid nebi, quec utsi-utsiec chushquenubien; Apodosën tantiamiaid nebi, quec chushqueoaic utsi. Adec chushquec Nuquin Papan Mayanën tantiamiabi yac bimboecquido mibitedi nec.

<sup>5</sup> ¿Mitsipadosho mimbi ëbi isponda? Adembidi, ¿Mitsipadosho mimbi Apodos isoaponda? ¿Embembidambi mibi chuibamponda? ¿Ambembida Apodosënsen chuibampanëdash? Padenquio. Tantia. Chuinu. Nuquin Papan chiacpadomboen Esuquidistu chuibenequid ëbi daëdi nebi. ¿Pabadon chuibanubi Nuquin Papan Esuquidistu tantiamiondashi quequina mibitedishun tantiape? Ai, ëmbi adobanubi Nuquin Papan Esuquidistu mibitedi tantiamiondash. <sup>6</sup> Tiedën caniquid ëshë siabi yac dëyuctiapimbo yac bimboecquid icquin Codinto yacnocquido Nuquin Papan chiaid dadpen tantiatiapimbo iquec, queshun matses icsaquid icsho cuidnushe quiash abided cuidadaid Esuquidistu nec quequin adquid chiaidba mibitedi chuibanondambi. Yuecash Apodostsen mibi yacno chopanëdash. Adec choshon tiedën caniquid dëyuctsash tanunquiocnoc canitiapimbo yac bimboecquido Codinto yacnocquido icnushe queshun Apodosën chuibanoapanëdash. <sup>7</sup> Tied nitsinshun taneshcain tiedën caniquid canimesa icbo nec. Adquibidi Nuquin Papan chiaid chuibanquid matses tantiamesa nec. Nuquin Papan tantiamec. <sup>8</sup> Tied icbon con tied nitsinsec cho cac nashunec. Aden nabanquin nainacsho icbon abi nitsinshunquid cuidec. Adembidi con tied taneshcaic cho cac nashunoaic. Adembidi abi neshcashunquid cuidoaic. <sup>9</sup> Nuquin Papan chiacpaden Esuquidistu chuibenequid Apodos nendac. Adembidi Nuquin Papan chiaid chuibenequidtedi nec. Adquid ëbipadquid icnubi Nuquin Papan tied bimboecquid mibitedi nec. Nuquin Papan shububimboecquidbidi mibitedi nec.

<sup>10</sup> Nuquin Papa tabadte shubu uashunun buintad teshun abia tabëcac bimboen Esuquidistuba chuibanondambi ma matsesën tantianueshun. Buintad tabëcac bimboen Esuquidistu ëmbi chuibanan utsibon adomboembidi aibidi chuibeneoaic. Bëdamboen chuibenenuequin ¿Nuquin Papan tantiacpadomboendambi chuibaneque? Tantanu, queshun Nuquin Papan chiaid isted-istedtiad ambi chuibeneta caidon. <sup>11</sup> Shubu uashunquidën shubu uidën uatequid nitsinan shubu uashunquid utsibo adomboen tabëcoanu quesa nec. Adquiecbidi Nuquin Papa tabadte uashunu queshun buintad tabëcac bimboen Esuquidistu ëmbi chuibanan adquid nec, quequin utsi chuibantiapimbo utsibon iquec. <sup>12</sup> Buintad tabëcaid tabadac bimboecquido icmenuequin Nuquin Papan chiaidquio abimbo chuibanoaic. Utsimbien abipenquiocnoc chuibanoaic. <sup>13</sup> Adashien yuecash Esuquidistu choanuc ¿Ëbi chuibanquidën ëmbi chiacpadomboenda naoshe? Nëdëncadoquin tanu, quependac. <sup>14</sup> Aden nëdëncaquin tanac Nuquin Papan chiaid bëdamboen chuiquidon chuibanac Esuquidistu tantiaquidombo yec buintad taidacmaid nidac bimboec abi nidendac. Adsho isun abi bëdamboen chuibanquido Nuquin Papan menetequid nendac. <sup>15</sup> Adomboembidi utsibon abipenquio icnuc chuibanac Esuquidistu tantiatiapimbocquido taidaid bescashun secac bimboen secatequid nendac. Adnubi abipenquio icnuc chuibanquido taidtsenac bimboec abentsëqui ambi chuibanaido nibëdnuc Nuquin Papa yacno puduedendac. Adquido Nuquin Papan menetemaïdo nendac.

<sup>16</sup> Esuquidistu tantiaquido Nuquin Papan Mayan tabadtequid nec. ¿Adquid iquec Nuquin Papa tabadtequidbidi nebi quequin tantiatiapimboda mibitedi icpe? <sup>17</sup> Ai, Nuquin Papa tabadtequidbidi mibitedi nec. Adquid icsho mibi icsabudmenuequido Nuquin Papan ënenquiocquin comapenen

cuidendac. Abi tabadtequid Nuquin Papan cuëmbanaido ambi bëdambo icmebanaidobidi nec. Esuquidistu tantiaquido Nuquin Papa tabadtequid nec caindac.

<sup>18</sup> Adec abi tabadte yequi Esuquidistu tantiesan tantiacpadquiec mibi tabadec. Adec tabadec, Esuquidistu tantiaquid nebi, quec mibibi mua uadec. Esuquidistu tantiaquidquio icnuec Esuquidistu tantiesan tantiacpadec tabadenquiocquin Nuquin Papan tantiacpadomboen tantiaquiota. <sup>19</sup> Esuquidistu tantiesan tantiacpadquiec tsadquidën ëbi yacno tabadte tantiatipimbo iquec, quequin Nuquin Papan tantiec. Aden tantiaquin ambi dada uamiampid nad iquec: “Ambibi comapenen tantiaquin nabanaid ënabi icnubi icbo unësendac.” <sup>20</sup> Adecbidi: “Adquidën tantiaidbidi ënëdtequid nec,” quequin Nuquin Papan tantiec. <sup>21</sup> Ad icnuc, Pabadon tantiamiaid nebi, quenda. Adecbidi, Apodosën tantiamiaid nebi, quenda. Abia Yampidën shubu abentsëquën tabadquid mibitedi icnuc aidën natedi mitsana nec. <sup>22</sup> Aidën bacuëbo icquin mibitedishun con utsi ëbi caic. Adembidi Apodosten mimbi adoaic. Adembidi Petedotsen mimbi con utsi caoaic. Nidaid abubëdta uashumbic aidënquiocquidtedimbo uabanquid yec aiteddishun icbo Nuquin Papa nec. Adecbidi aton bacuë mibitedi icnuc aiteddimbo mitsana nec. Esuquidistu uincuenacpadec uincuentequido mibitedi neoaindac. Nidaidën tabadec unëstequidbidi mibi nec. Nëid ushën mibi nidaidën tabadte ushë nec. Yuecash abuctsen mibi tabadendac. Abitedi Nuquin Icbon natedi nec. Aidën cuëmbanaido mibitedi icnuc aitedi mitsanabidi nec. <sup>23</sup> Mibitedishun icbo Esuquidistu nec. Esuquidistun icbo, Edoen, aton Papa nec.

## 4

### *Esuquidistu chuishunquido*

<sup>1</sup> Icbo Esuquidistu chuibenequid Pabado nec. Adquidbidi Pabado yacpadquidtedi nec, quequin mimbi tantiaata. Ënden Abia Yampidën Nuquin Papan Esuquidistu chuibeneta, quenquiocpampidëmbi nëbi aid chuibeneta cac chuibanec nebi. Adembidi Pabado yacpadquidon chuibenec, quequin mibitedishun tantiaata. <sup>2</sup> Nuquin Papan, Esuquidistu chuibeneta, cacpadomboen niaquenquiocquin ëbipadquidon chuibenetiad. <sup>3</sup> Nuquin Icbon, Ëbi chuibeneta, caid ëbi icnuc ¿Pabadon bëdamboenda chuipec? quequin tantianuna, ¿mimbi cactabi dacuëdpe? Padenquio. Adembidi, Nuquin Papan chiacpadomboen chiombi, quetiapimbo iquebi. <sup>4</sup> Ambi chiacpaden niaquenquio iccombi, quetiapimbocnobi abitedi isquidquio abitedi tantiaquidquio Nuquin Icbo icquin ëbi chuibanec bëdamboec tabadsho isun aidën chiendac. Adembidi ëbi chuibanec icsamboec tabadsho isun chiendac. <sup>5</sup> Icsamboen natsiash, quec tsadenda. Nuquin Icbo choashun icsambocquid cuidendac, quequin cainta. Aidëmbi choashun matses icsamboen ismec tabadaid abi ompoec tabadaidbëdta chuibanashun cuidendac. Adembidi, matsesën ëquëducshun tantiaid chuibanquin cuidendac. Adembidi, utsibo bëdamboec tabadaid chuibanquin chuioaindac, Bëdamboen mimbi naoc, quequin.

<sup>6</sup> Adembidi chuinu. Tantiata. Pabadopadquid Apodos nec, quequin ma mibitedishun tantianueshun chuibanombi. Aden tantianec, Pabadopadquid utsi nibëdec, quesa ma icpanuna. Adecbidi, Apodospadquid utsi nibëdec, quesa ma utsibotsen icpanuna. Nuquin Icbopadquid utsi nibëdec, quequin tantiec tabad. Adecbidi, Codinto yacnocquidopadquid utsi nibëdec, quenda. <sup>7</sup> ¿Mitsicquidën adquid mibi icmebampashba? ¿Abembida mibi adquid icpeba? Nuquin Icbon tantiamiac nabanash, ¿atotsi quiash, ëmbi tantiacpaden naombi, quepe mibi?

<sup>8</sup> Nuquin Papan chiaid dadpen tantiaquid nebi, quequin nua cubudquin peshun isuidacpadomboen ambi chiaid nēbi mibitedishun tantiauidpec. ¿Adpecta Nuquin Papan bēdambo icmiaido tabadpadic? Nuquin Papa yacno ēnden puduedac bimboec yash chuiquid dapa nebi, quiac bimboec mibitedi tabadpec mibi Esuquidistu chuibanquidtedi adec tabadtiapimbo icnubi. Mibitedibēd ēbi yacpadquido ēbi chedo ēnden chuiquid dapa yacpadquido icmiondac, Cuishon, quetsiabi. <sup>9</sup> Adecbidi, Bēdambo iquebi, quec mibi tabadnubi naden tantiec tsadebique. Tantia. Chuinu. Ēmbi chuibeneta caido unēseque. Is, Nuquin Papa quiac bimboecnuc ambi abi yacnoshon uaido mayan bēdabobēdtan matsestedishun isbededac bimboecquid nebi, quequin ēmbibi tantiec tsadebi aden isbededec aido tabadenquiocnobi. <sup>10</sup> Esuquidistu chuibenequidon chuibansho tantiauidash, Pabiate icsachitashien nec, quequin mamēnshumbededashic Codinto yacnocquidon ambibi tantiaquin chuibansho tantiaquidquio nec, quepec Esus tantiesabo. Adecbidi, utsibo dacuēdampambo iquec, quish uēdēequin Esuquidistu chuibenequidon Nuquin Papan chiaid chuibanubi cuesambo yac bimboen mibitedishun chuibampec. Esuquidistu tantiesan yuedaido mibitedi icnubien utsin yuedtemaid Esuquidistu chuibenequido nec. <sup>11</sup> Esuquidistu chuibenequid yequi pistsēc petsec abi bunec tsadebi. Adecbidi, acte acash bunec tsadquid nebi. Adecbidi dashcute icsactsēcquid dasiuidquid nebi. Adquiecbidi Esuquidistu chuibenequid utsibo iquec. Utsin mēyanded-mēyandedaid nebi. Quenenash iquenquio icquin capucuenequin Esuquidistu chuibenec nebi. <sup>12</sup> Con pete bednuequin shubumpi nacnenquidquio iquec chonoadsho isquin utsibon mamēnshunaid nebi. Aden mamēnshunubi chonoadebi. Adecbidi Pabado icsambocquid nec, quequin chiaqui aido cuidenquiocquin bēdamboen ista, Papa, quequin aido chiemi. Utsin mēyanaqui dayacquio yec cacuidanesa nebi. Adquidbidi Esuquidistu chuibenequid utsibo nec. <sup>13</sup> Adembidi, utsin ēbi mua uaquin chiaqui cuidnanenquiocquin bēdamboen chiemi. Adembidi ēmbi Esuquidistu chuibeniaqui icsactsēcquid nec, quequin ambi secanu caidbimboecnuc ēbi ispec. <sup>14</sup> Adecbidi, Bēdambo iquebi, quec mibitedi tabadnubi mēyamboc tsadebi. Adec ēbi tabadaid ēmbi chiac Codinto yacnocquido unēsquio yampec, quenquiocquin ēbi tabadaid mibitedi tantiamenuen dada uaombi. Pabadon chiaid abimbo iqueque. Bēdamboec tabadnuna mibi camenuen dada uaombi, con bacuēbo. Mibi tantiac unēsquio iquec. <sup>15</sup> Mibi chuibanquid utsi dadpen nēbi icnubi Esuquidistu ēmbia chiac mibitedi aid tantiaquid icpondac. Mibi chuibanquid utsibo min papa ictiapimbo iquec. Esuquidistu tantiaquid ēbia yanshun Esuquidistu chuibanac mibitedi Esuquidistu tantiaquido yampondac. Ēmbi chuibanacpaden chiaid tantiaquido con bacuēbo ēmbi caidtedi nec. Adquid mibitedi icnuc papa nebique. <sup>16</sup> Ēmbi nacpadomboen naic tabadta quequin mibitedi chiemi. <sup>17</sup> Mibi ēmbi nacpadquieci tabadte tantiamenuequin Timoteyo mibi yacno nidmembi. Aidi ēmbi chuibanac Esuquidistu tantiaquid icpondash. Adquid iccondacsho ēmbi con mado caid aidi nec. Aidi Esuquidistu tantiaquidquio icquin utsi-utsiec yacnoshon ēmbi chuibeniacpadomboen chuibanoaquin Timoteyon mibi padpiden tantiamendac. Esuquidistu tantiaquid utsibo iccuededacnoshon chuibanacpadomboen ismequin chuibanquid aaidbidi nec.

<sup>18</sup> Mibi utsi-utsiec Pabado choainquio iquec quequin abimbo tantiac bimboen chuibanec. <sup>19</sup> Aden adquidon chuinubi Nuquin Papa bunuc badedquio mibi yacno nidebique. Ista. Mibi yacno puduedshun abi onquiaid tantianu quenquiocquin abi naic tabadaid isnuna caindami. <sup>20</sup> Nuquin Papa

tantiaquido ambibi tantiacpadec onquesa nec. Nuquin Papan Mayanën tantiamiacpadec onquequid Esuquidistu tantiaquido nec. Adquid Icbon tantiamiacpadomboen nabanec tabadquid nec. <sup>21</sup> ¿Mibi yacno puduedshun atotsimbi adquid napeque? Chui. ¿Cuesnu quiacbimboendambi adquid comapenen chushcaquin tantiamepe? ¿Adenquiocquindambi ëbëd icquid nec quequin chuibanquin adquid tantiamepe?

## 5

### *Esuquidistu tantiaquid ambi chudtemaid chudquid cacumeta caid*

<sup>1</sup> Mibëd Esuquidistu tantiec iccuededquid abentsëc ambi chudtemaid chudquid iquec quequin chiec onquec. Aden naisa isadaidbo nec. Adembidi naisa isadaidpembo nec. Aton papa icbon chido, anin dauid, bedshun chudesa aido nec. Mibëd icquid abentsëc adquid iquec quec. <sup>2</sup> Adquid mibëdi icnuc, Bëdambo icmiaido nebi, quenquioctiadquidi mibitedi nec. Adquid icsaquid mibëd icsash unësquio icquimbi aidi cacumepatecnëdan. <sup>3</sup> Mibëd ictiapimbo yequi mibëd yacbimboecquin dada uaquin icsaquid cacumetiadquidi mibi nenëdac quequin chuibanombi. <sup>4</sup> Esuquidistu tantiaquid nuquitedi nec, quec mibitedi iccuededec Nuquin Icho Esuquidistun tantiamiacpadomboen Pabadon naden natsiash quequin <sup>5</sup> icsaquid nidme ma Satanasën mëyanac icsa bunesa yanacsho Nuquin Icho Esuquidistu choashun ma abi yacno yuedpanuna.

<sup>6</sup> Esuquidistun ënden bëdambocquid icmiaidtedi nebi, quenda. Icsaquid abentsëc mibëd tabadquin abi icsamboec tabadaid ismiac acte maisac bimboec mibitedi adquiobidi ictsiac. <sup>7</sup> Ënden mibitedi Esuquidistu tantiesabo yec icsaquin ismec maisaccondacpadec maismane qeshun icsaquid nidmeta. Ëbi cuidmenquiocnoec abided cuidadec Esuquidistu unëspanëdash, quiash aid icsaisa yacpadquiec tabadta. <sup>8</sup> Aden ambi naid tantiec icsaondacpadpenquo yec ma tabadpanuna. Aidquio tantiembi, quec abimbo tantiadonec ma tabadtenepanuna.

<sup>9</sup> Ambi chudtemaid chudquidbëd iccuededenda, quequin ënden dada uaondambi. <sup>10</sup> Esuquidistu tantiesabëd iccuededenda, quenquiocquin Esuquidistu tantiaquid adquid icsash iccuededenda, quequin dada uaondambi caimbi. Ambi chudtemaid chudquid Esuquidistu tantiesa dadpen iquec. Adecbidi, utsin na bunquin mua uain bedquid dadpen iquec. Adecbidi, matsesën Nuquin Papan uaidbimboecnuc nacnenaid tantiaquid Esuquidistu tantiesa dadpen iquec. ¿Adquido ismane quiash mitsimbo mibi tabadpe? Nuquin Papa yacno adquid nibëdec. Nuquin Papa yacno nidash icsaquid isenquo yec mibi tabadendac. <sup>11</sup> Esuquidistu tantiaquid nebi, quequid icsadenesho isash adquidbëd iccuededenda caimbi. Esuquidistu tantiaquid nebi, qeshun ambi chudtemaid chudquin ënesabëd iccuededenda. Adecbidi, muaquin bedbanquidbëd iccuededenda. Adecbidi, Esuquidistu tantiaquid nebi, qeshun matsesën Nuquin Papan uaidbimboecnuc nacnenaid tantiaquin ënesabëd iccuededenda. Adecbidi, Esuquidistu tantiaquid nebi, qeshun ambi tantiacpadpenquiocquidën chuisho mamënshumënquin ënesabëd iccuededenda. Adecbidi, Esuquidistu tantiaquid nebi, qeshun cuesanquin ampequin ënesabëd iccuededenda. Adecbidi, Esuquidistu tantiaquid nebi, quiash ëmbi chuibocpadquid icsaquidbëd iccuededenda. Adem-bidi aidobëdtan penda.

<sup>12</sup> ¿Esuquidistu tantiesa abi icsaid chuiquin cacumeta, quequindambi chuipe? Padenquo. Esuquidistu tantiaquid mibëd icquid icsadenequin ënenquiocsho isun Nuquin Papan chiaid comapenen tantiaquin mibi icsaid

ënta, quequin chui. <sup>13</sup> Nuquin Papambien Esuquidistu tantiesa icsaid chuiquin cuidendac. Mimbi Esuquidistu tantiaquid icsadenequid cacumeta.

## 6

### *Ëbi chushcananaid tantiaashun mimbi tantiacpaden chui caid*

<sup>1</sup> Esuquidistu tantiaquid daëd nëishash chushcananec, queoaic. Adquid chuinu. Tantia. Nëishash chushcananash Esuquidistu tantiesa yacno nidshun, Ëbi chushquiaid chuisho tantiaashun ¿midapaden mimbi chieque? Ëbi chui, quequin mimbi chuipec. ¿Atotsi quiash Esuquidistu tantiaquid yacno nidtiadquidi Esuquidistu tantiesa yacno nidshun mimbi adquid chui, cape? <sup>2</sup> Yucshun, ¿Midapaden mimbi Esuquidistu tantiesan naid chieque? Tantanu. Chui, abi tantiaquido Nuquin Papan caquien ¿nuqui chiacpaden aido Nuquin Papan cuidendac, quequin tantienquioda mimbi icpe? Yucshun tantiesan naid chiembi, queshun ¿Atotsieshun Esuquidistu tantiaquidbëd chushcananash tantiesa yacno nidshun mimbi chuibampe? <sup>3</sup> Yucshun, ¿Ëmbi uaido mayanën naid midapaden mimbi chieque? Tantanu. Chui, Nuquin Papan caquien ¿nuqui chiacpaden aido cuidendac, quequin tantienquioda mimbi icpe? <sup>4</sup> Adquidon naid ëmbi chiacpadomboen Nuquin Papan cuidendac, quequin tantiaquin ¿atotsieshun Esuquidistu tantiaquid daëd nëishash chushcanansho tantiaashun, Esuquidistu tantiesa yacno nidshun, Ëbi chushquiaid chiacsho mimbi tantiacpaden ëbi chui, mimbi capec? <sup>5</sup> ¿Esuquidistu tantiaquid utsibo nibëdpecta ictic? ¿Esuquidistu tantiaquidën icsamboen chuinushe queshunda Esuquidistu tantiesa yacno nidshun, Ëbi chushquiaid chiacsho mimbi tantiacpaden chui, mimbi capec? ¿Bëdamboec tabadaid Esuquidistu tantiaquid utsibon comapenen tantienquioctsiash, quequina mimbi tantiape? <sup>6</sup> Mibipadquid Esuquidistu tantiaquid utsibo yacno nidenquo yec mibipadquidpenquo Esuquidistu tantiesa yacno nidshun utsibëd chushcananaid mimbi chieque. Adenda.

<sup>7</sup> Ëbi chushcananaid ëbi daëdshun chiacsho tantiaashun mimbi tantiacpaden chui. Tantanu, quequid mibëd icnuc Nuquin Papan bëdambocquid icmiabicquid mibitedi nec. Esuquidistu tantiaquid utsin mibi icsamboen nasho isash ¿atotsi quiash nëishash chushcanampe? Adembidi, Esuquidistu tantiaquid utsin muaquin mitsana bedacsho isash ¿atotsi quiash nëishash chushcanampe? <sup>8</sup> Cuidnante bunec mibi adpec. Naden natiad. Ëbëd chushcananquid Esuquidistu tantiaquid nec, quec abi cuidte bunenquo yec abi yacno nidshun abi icsaboed tantiamequin Nuquin Papan chiaid chuiban.

<sup>9</sup> ¿Icsadenequin ënesa Nuquin Papa yacno puduedesa nec, quequin tantienquioda mimbi icpe? Esuquidistu tantiesabo tabadacpadquiec tabadec ic-sate bunquid yec Esus tantiaquid nebi quec mibibi mua uadenda. Ambi chudtemaid chudquin ënesa Nuquin Papa yacno yuedtemaid nendac. Adembidi, Nuquin Papan uaidbimboecnuc nacnenaid tantiaquin ënesa abi yacno yuedtemaido nendac. Adembidi, ambi inacmaid chudquido abi yacno yuedtemaido nendac. Adembidi, aton bënëpen chudmequin ënesa, adecbidi dada daëd chichudnanquin ënesa, adecbidi chido daëd dachudnanquin ënesa Nuquin Papa yacno yuedtemaido nendac. <sup>10</sup> Adembidi, ampequin ënesa Nuquin Papa yacno yuedtemaid nendac. Adembidi, muaquin utsin na bedquin ënesa, adembidi, ambi tantiacpadpenquiocquidën chuisho mamënshunquin ënesa, adembidi, cuesunianquin ampequin ënesa. Adquido Nuquin Papan ambi abucshun nacnenaidën tabadtemaido nendac. <sup>11</sup> Ënden mibi adquo iccondaidi nëbi utsi-utsiec padenquo icsho isash Nuquin Papa



mibi cuidenquo yec mibi icsaid bēpiscudac. Adembidi, Nuquin Papan mibitedi bēdambo icmebanuequin abipadquid aton Mayan mibitedi meniac. Aidi meneshun Esuquidistu icsapenquiocquid isacpaden Nuquin Papan mibitedi isoaic.

*Ĕmbi chudtemaid chudmane qeshun adquid isuidteneta quiaid*

<sup>12</sup> Ĕmbi natemaid naden nata caid nibēdec qeshun naic bēdambocquid ictiapimbo iquebi, quiash padenquo yec tsadebi. Aden nabanquin ėntiapimbo icmane quiash padenquo iquec tsadebi. <sup>13</sup> Matsesēn chebudaid pucuo yacno budash dada bēdambo icmianquid nec. Yuecash matsesēn dada chodquetequid nendac. Padnuen, ėbi tabadte ma icpanueshun Nuquin Papan matses uapampic. Abi tantiaquid abi tabadte iquec. Adecbidi adquidbēd Nuquin Papa iquec. Ad icnuc mimbi chudtemaid chudquid icta, quenquo Nuquin Papa icpampic. Ambi chudtemaid chudquid Nuquin Papa tabadte ictiapimbo iquec. Aden naquid chian anēdenquequid nēsecatequid nendac. <sup>14</sup> Nadatiambocquin Esuquidistu Nuquin Icho Nuquin Papan uincuemepanēdash. Aidēmbi nuquitsen abi tantiaquid icsho uincuemendac. <sup>15</sup> ¿Abi tantiaquid icquin, Esuquidistubēd daēdash tabadquid nebi, quequin tantienquioda mimbi icpe? Ai, aidbēdi daēdtequid nuqui nec. ¿Adquidbēd daēdashabi icsaquidbēd daēdoape? Padenquo iquebi. <sup>16</sup> ¿Dadpen chudmequid chudash daēdabimboecquid nec, quequin mibitedishun tantienquioda icpe? Aid daēdi dada abentsēc yacimboecquid nec, quequin Nuquin Papan dada uamiampid nec. <sup>17</sup> Nuquin Icbobēd daēdaidien Icbon tantiacpadquiec tabadquid nec.

<sup>18</sup> Ĕmbi inacmaid chudmane qeshun chido utsi isuidteneta. Padenquo yec icsaquidbēd daēdquid mibi iquendac. Ambi chudtemaid chudquid aton namibēd ėquēducuēsh daēdaid nec. Nami umanucuēsh icsaid namibēd daēdtiapimbo iquec. <sup>19</sup> Nuquin Papan Mayan tabadtequid Esuquidistu tantiaquido nec. ¿Nuquin Papan ėbēd tabadmiaid abipadquid nec, quequin tantienquioda mibitedishun icpe? Ĕbibi nuquin icbo nec, quetiapimbo matses iquec. Adecbidi, Con icbo nibēdec. Ĕmbi tantiacpaden naimbi, quetiapimbo mibi iquec. <sup>20</sup> Nuquin Icho cuesten dectanac matses icsaquid icsho cuidnushe quiash abided cuidadec unēsquid Nuquin Papan icmiac abi tantiaquid yec aidēn na mibitedi nec. Adoaidi ambi chiacpaden ismec bēdamboec tabadteneta.

## 7

*Dada chidobēdi daēdaid*

<sup>1</sup> Nēbi mimbi dada uaboed isombi. Aid isun ėmbi tantiacpaden chiembique. Tantiata. Chido inquid dadatedida ictiad quequin mimbi tantiapec. Padnuen, Chido bedenquo iquembi, qesho chido inta cainda caimbi mibi. <sup>2</sup> Esuquidistu tantiesa yec ambi chudtemaid chudquid Codinto yacno tabadquid utsibo dadpen iquec. Aidpadquid icmane quiash chido abentsēc inquid dada ictiad. Adecbidi dada abentsēcshun inaid chido ictiad. <sup>3</sup> Con chido ėmbi inaid nec, quequin auidi chudquid icta. Adecbidi con bēnē ėbi inquid nec, quequin auidi chudmequid chido nec. <sup>4</sup> Chidon dada daēdash aton bēnēn dadabidi nec. Adecbidi dadan dada chidon dadabidi nec. <sup>5</sup> Aid daēdi daēdabi yacimboec, Padi, quenda. Adboedi, Nuquin Papa chuinec nēidtedi ushquin padenquo nuqui iquec, qeshun ėnta. Aidtedec ushquin padenquiocshon, Ĕmbi yuen ėntiapimbocsho isun Satanasēn icsamenushe qeshun padpiden nata. <sup>6</sup> Ĕnta quenquo iquebi. Nēidtedi ushquin padenquo iquembi quiash mibi daēdi aidtedecuidi ushec ėnēdta

caimbi. <sup>7</sup> Padnuen, chido inesa ëbi yacpadec dadatedi icpashun. Dada utsi-utsiec Nuquin Papan icmiacpaden chido inquit icnubi utsi-utsiec chido inesa iquec.

<sup>8</sup> Chido inesa ëbi tabadacpadec dada utsitedi tabadec bédambo ictsiash. Adecbidi dadan inaidpen bédambo ictsiash chido. Dada bënua adecbidi bédambo ictsiash. <sup>9</sup> Adquid icquin isuidtiapimbo yec comapenec chudte bunquin chido inta. Adecbidi chido bënua dada isuidtiapimbo iquec dadan inaid icta.

<sup>10</sup> Daëdash niamënenda. Ëmbibi chienquiocquin Nuquin Icbon aden chuinëdacadembi chiembique. Tantia. <sup>11</sup> Min bënë nianash utsin inaid iquenda. Dadan inaid icnu quec mimbi niamboedën inaid icoata. Adembidi chido inquit min chido bunenquiocquin abi icsaid dada uashun ismequin nidmenda.

<sup>12</sup> Nëbi Nuquin Icbon naden chuiban cainquiocnobi ëmbia Esuquidistu tantiaquid icquin Esuquidistu tantiaquid utsibo ëmbi chuibocpadembi mibitedi chuoaimbique. Tantia. Dada aton chidobëdi Esuquidistu tantiesa icboedi aton bënë Esuquidistu tantiaquid yanuc aton chido padenquoio yec, Con bënë nianu, quenquoio ictsiash. Adquid icsho isash. Con chido icsambocquid nec, quenquoio yec abëdi tabadquid bënë. <sup>13</sup> Adecbidi chido utsi aton bënëbëd Esuquidistu tantiesa icboedi aton chido Esuquidistu tantiaquid yantsiash. Aden Esuquidistu tantias, Con bënë icsambocquid nec, quenquoio yec bënë nianec nidesa chido. <sup>14</sup> Esuquidistu tantiabi yec daëdacpadec aton chido Esuquidistu tantiaquid yanash aidbëd abentsëc yacbimboec tabadec bënë. Adec bédamboec tabadsho isun Nuquin Papan chido bédamboen tabadmequin bënëtsen bédambo icmebampec. Chido Esuquidistu tantiaquid icquin aton bënë padenquiocnobi aton bacuëbo tantiec, Icsambocquidën bacuëbo nec, utsibo quenushe quiash bënëbëd abentsëc yacbimboec tabadquid chido. Adecbidi dada Esuquidistu tantiaquid icquin aton chido padenquiocnobi adomboembidi aton bacuëbo tantiec aton chido Esuquidistu tantiesabëd tabadquid dada. Adec abentsëc yacbimboec tabadsho isun, Bédambocquidën bacuëbo nec, quequin utsibon ispec.

<sup>15</sup> Utsimbic ambi bedboedën aton chidon Esuquidistu tantiasho isun aton chido nidta catsiash. Adoaquien, Mibëd tabadte bunebique. Ëbi nidmenda, quetsiash chido bënë caic. Adoaqui, Nidec nid, cac cacuidenquoio yec nidquid chido. Chido utsibic aton bënë Esuquidistu tantiaquid yansho isash, Mibi nianu, quetsiash. Adoaquien, Mibi unësquoio iquec, quetsiash bënë. <sup>16</sup> Adnubien dadan nidta caid aton chido Esuquidistu tantiaquid yec bédambocquid icsho isash Esuquidistu tantiaquidtsen yantsiash bënë. ¿Adquid yantsiash, quequin tantienquioda mimbi icpe? Adecbidi, chidon nianu caid aton bënë bédambocquid icsho isash Esuquidistu tantiaquid chidotsen yantsiash. Adecbidi ¿Adquidtsen yantsiash, quequin tantienquioda mimbi icpe?

<sup>17</sup> Mibi Esuquidistu tantiaquid yanash Nuquin Papan tantiacpadec tabadnu quiash adequi tabadta. Adomboembidi Esuquidistu tantiec iccuededquid utsibo chuibanombi. <sup>18</sup> Esuquidistu tantiesa shui dëbid dëteshunaid yec Esuquidistu tantiaquid yanash ëbi shui dëbid dëteshunacmaidbimboecnuc nacnemenue quenquoio yec tabadta. Adecbidi, Esuquidistu tantiesa shui dëbid dëteshunacmaid yec Esuquidistu tantiaquid yanash shui dëbid dëtemenu quenda. <sup>19</sup> Shui dëbid dëteshunaidta nec, quenquoio yec Nuquin Papa tsadec. Adecbidi, Shui dëbid dëteshunacmaidta nec, quenquoio yec Nuquin Papa tsadec. Adquid nec quenquoio yec, Ëmbi

chiacpadomboen nadenequidta nec, quec Nuquin Papa tantiec tsadec. <sup>20-21</sup> Adec Nuquin Papa tantiec tsadnuc yua Esuquidistu tantiaquid yanash yuapen icnu quenquio yec tabad. Adecbidi, utsin yuapenquio yec utsin yua icnu quenquio yec tabadoa. <sup>22</sup> Yua Esuquidistu tantiesa icboedi Esuquidistu tantiaquid yansho isun, Yua nec, cainquio icquin Nuquin Icbon cuënendac. Adembidi, utsin yuapenquio Esuquidistu tantiesa icboedi Esuquidistu tantiaquid yanash Nuquin Icbon namiaidquio nendac. <sup>23</sup> Matses icsaquid icsho cuidnushe quiash abided ciudadec unësquid Esuquidistu Nuquin Papan icmiac aid tantiaquid iquec, Con icbo nec, quiash utsin yuaid iquenda. <sup>24</sup> Adembidi chuinu. Tantiata. Nuquin Papan mibi cuënucc matses yec Esuquidistu tantiaquid yanash, Èbèd tabadquid con Icho nec, quec matses yec bédamboec tabadta.

<sup>25</sup> Chido inesabèdta dadan inacmaid chuita quequin mimbi dada uaid isun aidotsen chiembi. Aido tantiaquin naden chuita Nuquin Icbon cainquio yaqui Nuquin Icbon èbi chuibeneta caid icquin naden mibitedi chiembique. Tantia. <sup>26</sup> Natiatequid icnuc Esuquidistu tantiaquid chido inesa yec adequi tabad. Adecbidi, dadan inacmaid yec adequi tabadta chido. <sup>27</sup> Chido inquit yec chido inesa icnu quenda. Adecbidi, chido inesa yec chido inu quenda. <sup>28</sup> Chido inesa icboedi chido inquit yanash Nuquin Papan chiaid niaquesa nec. Adecbidi, dadan inacmaid icboedi dadan inaid yanash Nuquin Papan chiaid niaquesa chido nec. Natiaic cametequid icnuc, ¿Mitsipadentsimbi con chidobèdta con bacuëbo bédambo icmepeba? quec chido inquit tabadec. Chido inesain aden tantienquio yec tabadec. Natiaic cametequid choec quec chido inesa yec adequi tabad. Adecbidi, dadan inacmaid yec adequi tabadta, quequin mibi chiembi ma natiamianquiec quenquio yec ma mibi tabadnueshun.

<sup>29</sup> Èmbi chuiboed mibi bédamboen tantiamembique. Tantia. Nidaidèn yuec tabadnu, quetiapimbo nuqui iquec. Nuquin Papa chieshènte ushè chonoc abi tantiaquid dadpen mëyansho isash Esuquidistu chote anoentsèqui yaneque. Abi yacno utsibo puduedtiapimbo icnushe qeshun min chido icnubi Nuquin Papa bunacpadomboen nabanec tabadta. <sup>30</sup> Adecbidi, unësquio yec shubiquimbi Nuquin Papa bunacpadomboen nabanec tabadta. Adecbidi, bédambo yequi Nuquin Papa bunacpadomboen nabanec tabadta. Adecbidi, mitsana icnubi aid tantienquio yec Nuquin Papa bunacpadomboen nabanec tabadta. <sup>31</sup> Yuecshun èmbi nidaidènshun bedaid Nuquin Papan èmendac, quequin tantiaquin ambi chiacpadomboen nabanec tabadta.

<sup>32</sup> Natiatequid nibèdpashun, qeshumbic natiamiantequid iquendac, quequin tantiembi. Aden tantiaquin chido inesa icta caombi. Chido inesa Esuquidistu tantiaquid icquin Nuquin Papan tantiacpadenuidi nanu qeshun aden nabanec tabadpec. <sup>33</sup> Chido inquidien, Nuquin Papan tantiacpadenuidi nanu quiash, ¿mitsipadentsimbi con chidobèdta con bacuëbo bédambo iquebi camepeba? quec tabadec. <sup>34</sup> Adquid Nuquin Papan tantiacpadenuidi nanu quetiapimbo iquec. Dadan inacmaidien Esuquidistu tantiaquid Nuquin Papan tantiacpadenuidi nanu quec adequi tabadpec. Dadan inaidien, Naden nashunacsho con bènèn bédamboen istsiashi, quec tabadec. <sup>35</sup> Aden mibi chuibanquimbi chido inesa chido bednu qesho, Chèn, caisa nebi. Nuquin Papan chiacpadomboen nabamboedèmbi utsi uain tantianushe qeshun èmbi tantiaid chuibanec nebi. Nuquin Papan tantiacpadomboen bédamboen tabadmenuequin aden tantiaquin chuibanec nebi.

<sup>36</sup> Adembidi, Min champi bednu queboed chudte bunec mëmuntiapimbo icsho isun, Inec cho, cata. Min champi imec icsatiapimbo mibi iquec. Adecbidi,

dadan inacmaid macho budsho isash, Bacuë tishtiapimbo yantsiash, quiash, Con champi inec cho, quiash icsatiapimbo adquid icoaic. <sup>37</sup> Adecbidi, min champi inu queboedi, Bedenquoio iquembi, quesho tantiashun menenda. Aden bedmenquoio yec mibi bēdambo icpec. <sup>38</sup> Con champi bedec cho, queshun bedmiash, Bēdambo iquebi, quenubi, Con champi dadan inacmaid iquec quec bēdamboshē utsi icpec.

<sup>39</sup> Dadan inaid icquin min bēnē nianenda. Min bēnē unēsān utsin inaid icnu quiash adta. Esuquidistu tantiesān inaid iquenda. <sup>40</sup> Bēnuā utsin inacmaid icnu quiash bēdamboshē iquec aid. Ēmbi tantiacpaden ēmbi chuiboed Nuquin Papan Mayanēn tantiamiacpaden chiaid nec.

## 8

### *Nuquin Papan uaidbimboecnuc nacnenaid tantiaquin pambid dasanaid*

<sup>1</sup> Nēbi Nuquin Papan uaidbimboecnuc nacnenaid tantiaquin pambid dasanaid chuininu naden chiembique. Tantiata. ¿Matsesēn nacnenaidta nuqui tantiaid ictic? Padenquoio. Aden tantiaquin ēmbi tantiacpadpenquoio icquid utsibo nec quequin mamēnshumpec. Aden tantiaquin mamēnshunquin utsi tantienquoio iquec. Utsien, Naden nabanquindambi utsibo bēdamboen tabadmepeba, quequin tantiaquidquoio nec. <sup>2</sup> Ēmbibi tantiēmbi quequid tantiabenabictsēcquid nec. <sup>3</sup> Nuquin Papa tantiaquidien Nuquin Papan tantiaidquoio nendac.

<sup>4</sup> Aden chuishun ¿Nuquin Papan uaidbimboecnuc matsesēn nacnenaid tantiaquin pambid dasanaidtambi pepe? quequin mimbi chuiquin dada uaboed isun chuinu. Tantiata. Nuquin Papan uaidbimboecnuc matsesēn nacnenaid nanac uec. Aden nanac uequid Nuquin Papa ictiapimbo iquec. Nuquin Papapadquid utsi nibēdquiec. <sup>5</sup> Nidaidēn samēdquid papa cain utsin cuēnaid dadpen iquec. Adembidi abuc samēdquid Papa cain utsin cuēnaid dadpen iquec. <sup>6</sup> Papa cain nuquin cuēnaidien Abia Yampidquoio nec. Adquid utsi Nuquin Papa cainquoio nuqui iquec. Aidi abitedimbo uabampampidquoio nec. Aidquoio tantiec nuqui tabadec. Adembidi Nuquin Icho cain cuēnaidquoio Esuquidistu nec. Aidēmbi aton Papabēdtan abitedimbo uabampampid nec. Aidi cuesten dectanac abided cuidadac nuqui cuidtiadquid icnubi Nuquin Papan cuēmbanaido yec ambi tantiaido nuqui nec.

<sup>7</sup> Adembidi aid abentsēqui nuqui tantiaidquoio icnubi Nuquin Papan uaidbimboecnuc matsesēn nacnenaid utsibon tantiaid iquec. Aden nacnenaid tantiaquin pambid dasanaid aidon pepec. Aden pēboedēmbi Esuquidistu tantiaquid yanshun nacnenaid tantiaquin pambid dasanaid ēmbi pesho isun, Icsaosh, Nuquin Papan canushe, queshun adquid petiapimbo yanebi. <sup>8</sup> Nuqui piaid Nuquin Papa tantiamianesa nec. Ad icnuc Nuquin Papan uaidbimboecnuc matsesēn nacnenaid tantiaquin pambid dasanaid penquiocsho isash, Aid bēdambocquid nec, quenquoio Nuquin Papa iquec. Adecbidi, nacnenaid tantiaquidēn dasanaid pesho isash, Aid bēdambocquid nec, quenquoio icoaic Nuquin Papa.

<sup>9</sup> Padnuen Nuquin Papan uaidbimboecnuc matsesēn nacnenaid tantiaquin pambid dasanaid ēmbi bedshun pesho isash, Esuquidistu comapenen tantiaquidēn tantiaid nacnenaid nec, Esuquidistu tantiabenabictsēcquid quenushe queshun padenquoio iquembi. <sup>10</sup> Aid pesho isash, Nacnenaid papa cain cuēnaid nepec, queshun, Aid tantiaquin ēmbitsen pambid dasanaid penu, quetsiash Esuquidistu tantiabenabictsēcquid. <sup>11</sup> Padnuen ēmbi piaid Nuquin Papa tantiamianesa nec quequin mimbi tantiec. Aden tantiaquin nacnenaid tantiaquin pambid dasanaid mimbi pec. Aden tantiaquin mimbi

penubi Esuquidistu tantiabenabictsëcquidën Nuquin Papa tantiamiantequid nacnenaid tantiaquin pambid dasanaid nec, quequin pec. Esuquidistu comapenen tantiaquid mibi icquimbi nacnenaid tantiaquidën dasanaid ëbi icsainquio ictequid nec quequin pequin Esuquidistu tantiabenabictsëcquido mimbi icsameyoc. Mimbi icsamiaido tantiec Esuquidistu unëspanëdash. <sup>12</sup> Ad icnuc Esuquidistu tantiabenabictsëcquid mimbi icsamequin Nuquin Icbon chiacpadomboen niacquid mibi neyoc. <sup>13</sup> Padnuen Esuquidistu tantiaquid utsibon icsamboen tantiaquin penushe queshun padpiden penquio iquembi ma icsainquio icpanu queshun.

## 9

### *Esuquidistu tantiaquidon natequid*

<sup>1</sup> Esuquidistu chuibeneta cacmaid Pabado nec quequidotsen chuinu. Tania. ¿Matsesën nata caidtabi nedi? Padenquio. Esuquidistun ëbi chuibeneta caid nebi. ¿Adquidida nepeba quecta mibi icpe? ¿Nuquin Icbon chiacpadomboen ëmbi chuibanac mibitedi abi tantiaquido yanenquioda ictionda? <sup>2</sup> Ai, ëmbi Esuquidistu chuibanac Esuquidistu tantiaquid mibitedi yanondac. Utsi-utsiec yacnocquid ëmbi chuibanacmaid icnubi, Ëmbi chuibanaido mibitedi nec, quequin tantiembi. Ëmbi chuibanac Esuquidistu tantiaquid mibitedi yanshun, Esuquidistun ëbi chuibeneta caidquio nebi, quequin Pabado chiaid abimbo iquec, quequin bëdamboen tantiaquidquio mibi nepec tantesa uainquiocquin.

<sup>3</sup> Aden ëmbi Esuquidistu chuibanac abi tantiaquid mibitedi icquimbi utsinutsinquien ëbi icsamboen chiec. Naden ëbi chieque. Tania. Pabado Bednabebëdtan chuibanasho pemenuoctiad, quequin chiec. Aden chiec onquequid ëmbibi tantiaquin naden aido chiembique. Tania. <sup>4</sup> ¿Esuquidistu chuibanec bundoenquiodabi icpe? <sup>5</sup> Adembidi, Esuquidistu chuibanec utsibo aton chido Esuquidistu tantiaquid buanec capucuenesho isash, Bëdambo iquec, mibi quec. Adembidi utsibon aton chido buanubi Petedon aton chido buansho isash bëdambo iquec quiashic Esuquidistu chuibanec ëbëd capuquimbi Bednaben aton chido buansho isash, Icsambo iquec, quec mibi. ¿Esuquidistu chuibanec ëbëd capuequi aton chido buante bunenquioda Bednabe icpadic? <sup>6</sup> Adembidi, ¿Mibi pemembique. Penuequin nabanenda, capenda Esuquidistu chuibenecquid utsibo mimbi ique? Bednabebëdta ëbi chiec, ¿Penun daëdshun shubumpi nacnentiad, quepecta mibi ique?

<sup>7</sup> Ad yenquio utsibo iqueque. Tania. Chuinu. ¿Sondado icquinda aton na buanshun pepec? Padenquio. Abi nashunquidombien pemeshun acmec. ¿Icbo abi nashunquid aton tiedën caniquid pemesada nepadic? Padenquio. Pemeshumbien acmepaid. ¿Baca shuma chinshun icbon aquenquioda icpadic? Acquimbien icbon icquid. <sup>8</sup> ¿Aden chuiquin ëmbibi tantiaidambi chuipo? Padenquio. Nuquin Papan Moises dada uamiampid ëmbi chiaid nec. <sup>9</sup> Nad iqueque. Tania. Chuinu: “Min tiedën caniquid ëshë chicnueshun min baca tsuc-tsucmequin dëpuquenda ma penu,” quequin Nuquin Papan chiaidquio nec. ¿Bacanuidi ma penu quequin Nuquin Papan chiaidta nepadic? Padenquio. <sup>10</sup> Matsesbëdtambi ma penu quequin Nuquin Papan chiaidquio nec. Adembidi ambi piaid tantiaquin nabanquido icbo nec. Penuequin tiedën caniquid icbon taneshcaic. Adembidi, penuequin ëshëacsho bedquid icbo nec. <sup>11</sup> Adembidi, ¿Nuquin Papan chiaid mibi paquiacquid yec pete bec cho quenquiotiadquidtabi nedi? <sup>12</sup> Mibi chuibanquid utsibo menebanquimbi ëbia mibi chuiquidquio icsho menetiadquidi menianenquio mibi icpoc. Aden ëbi menenquio yaqui ëmbi chiaid tantienquio icnushe quiash,

Bec cho, quetiapimbo iquebi mibi caic. Aden chuibanec bundoquiec capuecuenec nebi. <sup>13</sup> Nuquin Papa tabadte shubu uashunaid yacnoshon nashunquidën ashunquio peshun aquec. Adembidi ashunquio nashunquid utsibon matsesën Nuquin Papa menenun bëaid tauishun pambid tëshë bedshun peshun aquec. ¿Aden peshun acpec, quequin tantienquioda mimbi icpe? <sup>14</sup> Adomboembidi Esuquidistu chuibansho abi tantiaquidon yuedec, quequin Nuquin Papan chiaid nec.

<sup>15</sup> Èbi yuedtiadquidi nec, quequin tantiequi ¿adabi pemenun yuedpec? quesa nebi. Adembidi, Èmbi dada uaid buamiacsho isun èbi yuedtsiash, quequin dada uainquio iccombi. Bunquiec unësbudec mibi caic, Bec cho, quenquio iquendabi. <sup>16</sup> Èbibi Esuquidistu chuibenenu quenquioccobi. Ambi èbi chuibeneta cac Esuquidistu chuibenec nebi. Abi chiesha yanash unësquio ictsiabi. <sup>17</sup> Èmbibi, Esuquidistu chuibenu, quiash, Bec cho, quetsiandabi. Esuquidistun èbi chuibeneta caid yec ambi namiaidquio nebi. <sup>18</sup> Esuquidistu chuidenesho isash, ¿atotsi Pabadon bedpash, quepecta mibi ique? Naden Esuquidistu chuibenec nebique. Tantia. Bec cho, quenquiocquin Esuquidistu chuibenec nebi. Aden Esus chuibanac abi tantiaquid yansho isash bëdambo iquebi.

<sup>19</sup> Bec cho, quesa yec utsin yuacmaid nebi. Adquid yequi utsibo chuinuec nidanec shubu utsin puduedcuenequin aidon namiaidbimboecquin aidbëd tabadquin chuibanec nebi. Adec tabadquin èmbi chiac ma aidotsen Esuquidistu tantiaquido yampanuna. <sup>20</sup> Adecbidi, isadaidbo Esuquidistu chuibanuec aidobëd tabadquin mimbi natemaid èmbi natemaidpenquio nec, quenquiocquin ambi natemaid nainquio iquembi. Adquiec tabadquin èmbi chuibanac ma isadaidbotsen Esuquidistu tantiaquido yampanuna. <sup>21</sup> Adecbidi, isadaidpembo chuibanuec aido tabadacpadec abëdi tabadquin Esuquidistun chiapadec niaquenquio yec tabadec nebi. Èmbi adoac isadaidpembotsen ma Esuquidistu tantiaquido yampanuna. <sup>22</sup> Adecbidi, Esuquidistu tantiabenabictsëcquido chuibanuec èmbi tantiabenabi iccondacpaden bëyuc tauain chiaidquio tantiamenuen chuibanec nebi. Èmbi adoac ma aidotsen Esuquidistu tantiabenquidquio yampanuna. Adequi tabadquin Esuquidistu chuibanec nebi. Èmbi adoac utsibo ma Esuquidistu tantiaquidquio yampanuna. <sup>23</sup> Adec tabadequi ma èmbi Esuquidistu chuibeniac Esuquidistu tantiaquido yanash Nuquin Papa yacno nuquitedi tabadendac.

<sup>24</sup> Titinguecuededquido icnuc bëyuc abia titinguec choquid iquendac. Adquid icsho isun, Mibi badedquio titinguic, quequin titingueta quequidën titinguec abia choquid menendac. Adembidi, Nuquin Papan menete bëda iquec. Aid bednu, qeshun Icbon chiapadomboen nabanta, caimbi mibi. <sup>25</sup> Badedquio titinguenuequid bedte bunaid chodquetequid icnuc, Aid bednu, qeshun abi bëdiactsëc titincamete pete icsa actequid icsabëdta isuidec titinguenuequid iquec. Nuquien chodquetemaid bednuequin icsaid isuidec. <sup>26</sup> Utsien, Bednu, quenquio yec titinguec. Adembidi, Bednu, quenquio yec utsibëd mëdanten senanu quequin nibëdacnoshombi mëdanten seded-sededec. Aden tantiaquin naisa nebi. <sup>27</sup> Utsibon ma tantianu qeshun Esuquidistu chuibenias unësacsho Nuquin Papan menete bëda bedtiapimbo icmane quiash icsaid mëmunec tsadebi.

## 10

*Isadaidbon chieshampicpadec tabadenda quiaid*

1-2 Abi yacno abi tantiesa chosho puduedmenquoio icchitoshe quiash Nuquin Papan chiaid chieshënenquoio yec bëdamboec tabad, quequin tantiamenuen, Nadec nuquin tsusedpabo tabadpampic, quequin chiembique. Tantiata. Equipito yacnoshon ambi mënchicaidobëd Moises puduanec Nuquin Papan bëyucamiaid abu ushu tédion nidanequin tsusedpabon Acte Piu potepampic. <sup>3</sup> Adec nidaniash yuecash aitedi comapenec bundoacsho Nuquin Papan nadatiambocquin abucshun nebudaid tsusedpatedishun pebededpampic. <sup>4</sup> Adembidi acte bundoacsho isun cuënote cuesquin acte chomiaid acash, Èbi bëdambo icmequin Nuquin Papan ambi yuecshun chometequid Quidistubëdtan nadatiambocquin naid nec, quequin tsusedpabon utsin-utsinguien tantiabempampic. <sup>5</sup> Aden tantiabenubien abëd icquid utsibon padenquoio icpampic. Aden tantiesa Nuquin Papan nidaid Canan caid menenu caid yacno niduidequi unësbudnepampic adquidtedi.

<sup>6</sup> Tsusedpabo chieshampicpadquid icnushe queshun Nuquin Papan aido chuiquin dada uamepampic. <sup>7</sup> Ad icnuc tsusedpabon Nuquin Papan uaidbimboecnuc nacenashun papa cain tantiampicpaden tantienda. Naden Nuquin Papan aido chuipampic. Bacabimboecnuc ambibi nacenaid tantiaquin peshun acash baidacuededpampicpaden tantiaquin nainda. <sup>8</sup> Adembidi, tsusedpa utsibon ambi chudtemaid chudampicpaden chudenda. Aden nasho abi ushëmbi tsusedpabo dadpen 23,000ted Nuquin Papan cuesunemepampic. <sup>9</sup> Adecbidi, ¿Ambi chiaid niacshodabi Nuquin Papan cuidpeba? quiampicpadec adenda. Aden tantiaquido nisin pebededac unësbudnepampic. <sup>10</sup> Adecbidi, Equipito yacnoshon mënchicaido abi mënchicquid chieshec nadpampic. Equipito yacno iquec bëdambo iccondaidi nëmbo choash bunec capuebi. Anobidi tabadec nidebi, queded-quededsho ambi abi yacnoshon uaid mayan bëdabo Nuquin Papan budmiaidën aitedi cuesunepampic.

<sup>11</sup> Abi tsibanquido tantiamenuequin tsusedpabo tabadnëdaid icsa Nuquin Papan chuiquin dada uamepampid ëmbi chuiboed nec. <sup>12</sup> Tsusedpabo Nuquin Papa chieshënec icsapampicpadec icsamane quequin mibi tabadte tantiata. <sup>13</sup> Ènden tsusedpabo chieshëmete icpampid abi iquec. Adaid natiatquid icnuc chieshënushe queshun Nuquin Papan mibi tantiaquin uidën uac mibi icsainquoio yec chieshtoenquoio yec dayacquoio iquendac.

*Nuquin Icbo Esuquidistu unësaid tantiaquin acshumbic mayan icsa tantiaquin mimbi actiapimbo iquec quiaid*

<sup>14</sup> Nuquin Papan chiaid niacmane quiash, Nuquin Papan uaidbimboecnuc matsesën nacenaid tantianu, quenda. Dacuëdec cuenacbimboec aid nanacno nidenda. <sup>15</sup> Tantiabenquid icsho mibi chiec nebi. Pabadon chiaid abimbo iquec quequin tantiec aid nanacno nidenquoio yec Esuquidistu chuibansho tantiec iccuededteneta. <sup>16</sup> ¿Iccuededquin sicaid acnun Nuquin Papa chiec onqueshun acted-actedquin matses icsaquid icsho cuidnushe quiash abided cuidadec Esuquidistun intac chididiquiaid tantien icquinda nuqui acti? ¿Adembidi, pete cuësh-cuëshun Nuquin Papa chiec onqueshun aton dada mëyanaid tantien icquinda nuqui pedi? <sup>17</sup> Esuquidistubëd abentsëc yacbimboecquido nebi, quequin tantiaquin pete cuësh-cuëshun meniac abentsëcshun piachimboen abi tantiec iccuededquidon pebededec.

<sup>18</sup> Aden nuqui pebededachimboen isadaidbo icsaid cuidnuen nidaidën capuquidded cuesuniaid pambid tauiquin Nuquin Papan shëdtequid pambid bedshun cuesunequidbëdtan nidaidën capuquid icbon pepanëdash. <sup>19</sup> Aden ëmbi chiac ¿atotsi Pabado ëbi tantiamete bumpec, quepecta mibi ique? Mibi

naden tantiamembique. Tantia. ¿Nuquin Papan uaidbimboecnuc matsesën nacnenaïd tiboepecta iquec? Padenquo. <sup>20</sup> Adec adquid tiboquesa icnuc mayan icsa tantiaquin Esuquidistu tantiesan Nuquin Papan uaidbimboecnuc matsesën nacnenaïd yacnoshon pambid dasanec. Aden aid pambid penu, qeshun mayan icsabëd yacbimboecquid nebi, quequin pec. Adquidbëdtan penda. <sup>21</sup> Nuquin Icbo Esuquidistu unësaid tantiaquin acshun mayan icsa tantiaquin actiapimbo mibi iquec. Adembidi, Esuquidistu unësaid tantiaquin pete peshun mayan icsa tantiaquin pambid petiapimbo iquec. <sup>22</sup> ¿Aid tantiaquin acshun pequin Nuquin Papa nëishmenquioda mimbi icti? Ai, abitedi tantiaquidquo icquin abitedi isquidquo icquin Nuquin Papan mibi cuidendac.

*Ëmbi natemaid naden nata caid nibëdec, quiash nanueboedi Esuquidistu tantiaquid utsi icsamemane quiash nainquiocte chiaid*

<sup>23</sup> Nëid mishtemaid nec. Nëid petemaid nec. Nëid actemaid nec, quequin ëmbi chuitequid nibëdec, quiash Esuquidistu tantiaquid utsi icsamemane quiash nainquo yec tsadebi. Matsesën ambi nacnenaïd tantiaquin pambid dasanaïd ëmbi tantiacmaid nec, quiash pambid dasanaïd petiadquo iquequi Esuquidistu tantiabenabictsëcquidën, Nëid nacnenaïd nuquin papa caid nec, quequin penushe quiash penquo yec tsadebi. <sup>24</sup> Utsi tantienquiocquin nacnenaïd pambid dasanaïd piash bëdambo iquebi, quenda. Naden natiad. Matsesën nacnenaïd pambid dasanaïd ëmbi pesho isun utsibon icsamboen tantiatsiash, quequin penda.

<sup>25</sup> Aton na sambededacno nidshun pambid bednuequin, ¿Nuquin Papan uaidbimboecnuc matsesën nacnenaïd pambid dasanaïd bedaidta nec? quenquiocquin bedta. <sup>26</sup> Abu nidaidbëdta uashun aidënquo icquidtedi Nuquin Papan uampidquo nec. Aidtedimbo aton na nec. Nacnenaïd yacnoshon pambid sambededaid aton na nec. Aidën bacuëbo iquec aid pambid pequido mibi nec. <sup>27</sup> Aden tantiec Esuquidistu tantiesan, Pec cho, cac, Ai, quianec nidec puduedshun, Mimbi codocaid matsesën nacnenaïd tantiaquin pambid dasanaïd bedaidta nec, quenda. <sup>28</sup> Adnubien mibi puduedacno isedquid utsi Esuquidistu tantiabenabictsëcquid tsadquin, Matsesën nacnenaïd papa cain cuënaïd tantiaquin dasanaïd nëid pambid nec, cac aid pambid penda. <sup>29</sup> Ëmbi papa cain cuënaïd nec, quequin utsin tantianushe qeshun aid pambid penda. Matsesën nacnenaïd con pa nec, quequin cuënaïd tantiesa icquin ¿atotsieshumbimbi matsesën nacnenaïd tantiaquin pambid dasanaïd penquo iqueque? Chuinu. Tantia. <sup>30</sup> Nuquin Papa ëmbi tantiaidquo icnuc penun aidi chuïsho isash ¿atotsieshun matsesën nacnenaïd papa cain tantiaquin pepec utsibo quepec? <sup>31</sup> Edoen utsibo tantiamenuen bëdamboen nabanec tabadteneta. <sup>32</sup> Aden naic, Esuquidistu tantiaquid isadaïdbo isadaïdpembobëdta Esuquidistu bëdamboen tantiabemequiono, quec bëdamboec tabadta. <sup>33</sup> Naden naic ëbibi bëdambo iquebi, quenda. Naden ëmbi nabanuc ëbëdi utsi bëdambo ictsiash, quequin tantiata ma Nuquin Papa yacno puduedtequid utsibo yanu qeshun.

## 11

<sup>1</sup> Ambia tantiaquidën Esuquidistun icmiacpadquiec tabadec nebi. Adecbidi ëmbi chuiquin ismiacpadquiec tabadteneta mibitedi.

*Nuquin Papa tantiaquin iccuededquin naïd*

<sup>2</sup> Mimbïa tantianëdaïdquo mibi nec, quequin mimbi chiaïd tantiaquin nabanec nebi, quequin mimbi dada uashun bëmiaïd isash bëdambo iquebi.



Adembidi, Esuquidistu tantiabenēdaidon chuibanaid mimbi chiacpadom-boen tabadec, quequin mimbi dada uaid bēmiaidon chuibansho tantiash bēdambo iquebi.

<sup>3</sup> Mimbi natequid utsi chuinu. Tantiata. Abi tantiaquid chuiquid Esuquidistu nec. Adembidi chido chuiquid dada nec. Adembidi Esuquidistu chuiquid aton Papa, Nuquin Papa caid, Edoen nec. <sup>4</sup> Adquid Nuquin Papa nec, quequin, Aid chuinu, queshun aton mauete chicquid dadan. Aid chuinen mauet tabadquin, Ēbi chuiquidpenquo Esuquidistu nec, quiacimboen ismequid nec. Adembidi Nuquin Papan chiaid tantiamequin chuibanquidēn aton mauete chiquec. <sup>5</sup> Chidoen, Ēbi chuiquid Esus nec, quequin ismec mapucudash tsadec. Adec mapucudenquo yec tsadquin Esuquidistu tantiaquido iccuededacnoshon Nuquin Papa chienda chidon. Adembidi anoshon Nuquin Papan chiaid chuibanenquo ictiad. <sup>6</sup> Ēbi chuiquid nibēdec, quiacimboec tabadsho matasmetiad. Matasmiash ma mapucudpanu chido. <sup>7</sup> Nuquin Papa aton madobēd onquec: Nuquibimboecnuc matses uanuna, quiampicpaden dadaba uapampic. Nuquin Papabimboec icquid nebi, quiash tsadquid dada. Ēbi chuiquid Abia Yampid nec, quequin ismenuec aid chiec onquec mauete mauesa dada nec. <sup>8-9</sup> Dadaba Nuquin Papan uapampic. Dadabēd icquid uanuna queshun dadan shictodo chicshun chido uashun, Mibēd nashunanquid nec, quequin dada menepampic. <sup>10</sup> Adquid icmiac dada ēbi chuiquid nec, quequin nashunec chidon. Adsho isash Nuquin Icbon abi yacnoshon uaido, mayan bēdabo abi chuiquid chieshēnenquo yec Icbon chiacpadquiec tabadec. <sup>11</sup> Nēid chido nec. Nēid utsi dada nec, quenubi nashunanquid abi daēdi nec. <sup>12</sup> Dadan shictodo chicshun chido uapampic. Adecbidi chidon tishaid dada nec. Ambi tantiampicpaden Nuquin Papan naidtedi nec. <sup>13</sup> ¿Nuquin Papa chuinuec ēbi chuiquid nibēdeque. Matasadnu quiash chido bēdamboda icpadic? <sup>14</sup> Chido isadacpadec isadnu quec icsambo dada ictsiash. <sup>15</sup> Chido isadacpadec dada icsho isash, Chido nec, quetsiash. Dada isadacpadec chido isadenquo iquec. <sup>16</sup> Ēmbi chuiboed tantiash, Icsamboen chiosh, quetsiash. Adquid naden chuinu. Tantiata. ¿Ēmbentsēquidambi aden chie? Padenquo. Ēbipadquiocquin chuibenequidon adomboembidi chuibanec. Adembidi Esuquidistu tantiec iccuededquid utsibon tantiabedec.

### *Nuquin Icho unēsash uincuenaid tantiaded-tantiadedta quiaid*

<sup>17</sup> Adecbidi, Mimbi naidtedi bēdambo iquec, quetiapimbo iquebi. Adquid chuinu. Tantiata. Esuquidistu tantiabenquid utsibo icmenu, quenquo yec mibi iccuededec. <sup>18</sup> Abentsēc yacimboec iccuededesa Esuquidistu tantiaquido Codinto yacnocquido nec, quiosh. Adsho tantiash, Abimbo capec, quiobi. <sup>19</sup> Nēidtedi Ēmbi bēdamboen isaido nec. Utsitedi Ēmbi icsamboen isaido nec, quiash cuēshēdabimboec mibi tabadcuededec. ¿Adec tabadshoda Nuquin Papan mibi bēdamboen ispec? Padenquo. <sup>20</sup> Adec tabadquin Esuquidistu unēste tantienquiocquin utsin-utsinquien peshun acted-actedec. <sup>21</sup> Utsibo cainenquiocquin abia choquidon nua pebededec. Adoac utsibo choash bunec tabadnubi abia choquido paēmbocquid nua acash tantienquo yec tabadec. <sup>22</sup> ¿Min nuntan pete nibēdpecta iquec? Mitsana iquec. Adec mitsana min shubuno icnuc ¿Esuquidistu unēste tantiec utsibobēd iccuedednu, quenquiocquinda mibia choshon pebededpe? ¿Natiastianquiec pete nibēdchitec pete nibēdquid camenuenda mimbria pebedede? Aden pebededquido ¿atotsimbi chuipe? ¿Bēdamboen mimbi nabanec quepectabi ique? Padenquo. Aden naquin Esuquidistu unēsaid tantienquiocquin mimbi pec.

<sup>23</sup> Nuquin Icbon chiacpadomboen mibitedi chuibanondambique. Tantiata. Chuinu. Nēid inchēshēmbi ēbi chieshēnquido ēbēd icquidēn ēbi bedmendac, quequin Esuquidistun abi unēste tantiaquin nadopanēdash. Pete bedshun <sup>24</sup> Nuquin Papa chuishun cuēsh-cuēshun naden abēd icquido chuipanēdash: “Pete cuēshaid bedash matses icsaquid icsho cuidnushe quiash ēbided cuidadec unēste tantiaquin pebededta,” quepanēdash Esuquidistu. <sup>25</sup> Aden chuishumbic aid pebededsho isun pete utsi pebededquin nainshun adembidi dēshote bedshun sananquin naden Esuquidistun chuipanēdash: “Esuquidistu unēsquin ēbi chian anēdēnquiacno nēsecatequid icsho mēnchictequid Esuquidistu iquec, quequin tantiaquin sicaid acbededta. Sicaid acquin ēbi mēnchictequid iquec quequin tantiaquin acban.” <sup>26</sup> Aden Esuquidistun ismenēdacpadomboen pete cuēshēmpi pebededshumbic sicaid acbededta. Nuquin Icbo unēsaid tantiaded-tantiadedquin aid padpidec choabicnuc adobanta. <sup>27</sup> Abi unēste tantienquiocquin pete cuēshun peshun acquin Esuquidistun chiaid niacquid nec. <sup>28</sup> ¿Pete cuēshēmpi penun Esuquidistubēd tabadacpadquiectabi tabadpe? quequin mibi utsibēd tabadte tantiata. <sup>29</sup> Esuquidistu unēsaid tantienquiocquin peshun acquid Nuquin Papan cuidendac. <sup>30</sup> Aden adquidon peshun acac utsi-utsiec padishec; utsi-utiec daicsambo yanec; utsi dadpen ēnden unēsac. <sup>31</sup> ¿Adabi Nuquin Papan chiaid niaquenquio yec tsadpe? quequin tantiec tsad. Aden tantiec tsadshumbic, Icsaobi, Papa, qeshun mibi icsaid chuiban. Aden chuishun Esuquidistu unēsaid tantiaquin pete peshun sicaid acta. Aden mibi icsaid chuishun pesho isun Nuquin Papan mibi natiaic camenquio iquendac. <sup>32</sup> Adesa icsho Nuquin Papan natiaic camiaid mibi iquendac. Abi tantiesabēdta chian anēdēnquequid nēsecadenquio mibi icmenuen Nuquin Papan mibi natiaic camec ma ēmbi chiacpadomboen nabamenuequin. <sup>33</sup> Adembidi Esuquidistu unēsaid tantianuec iccuededquin utsibo choabi iquec quequin aido cainta. <sup>34</sup> Bundoshon min nuntanshun pe. Aden pesho isash, Icsamboen naique. Cuidnu, quetiapimbo Nuquin Papa iquec.

Padi. Esuquidistu unēsaid tantianuequin naden nata quequin chiombi. Mibi yacno nidash puduedshun ēmbi chuiboed daēd uain chiendambi.

## 12

### *Nuquin Papan Mayanēn tantiamiaid*

<sup>1</sup> Nuquin Papan Mayanēn tantiametequid chuinu. Tantiata. <sup>2</sup> Ēnden mibitedi Esuquidistu tantiesa yec Nuquin Papan uaidbimboecnuc ambi nacnenaid matsesēn ismec, Nēid papa cain cuēnaid nec, qesho tantiaquido mibitedi iccondac. <sup>3</sup> Adquid iccondaidi Esuquidistu tantiaquid mibi yanacsho naden chiambique. Tantia. Nuquin Papan Mayanēn tantiamiaido: Esus Nuquin Icbopenquio, Nuquin Papan Chomiacmaid nec, quetiapimbo adquido iquec. Adecbidi, Nuquin Papan Mayanēn tantiamiacmaido: Esuquidistu con Icbo nec, quetiapimbo icoaic.

<sup>4</sup> Nuquin Papan Mayanēn, Naden nata, quequin tantiametequid Esuquidistu tantiaquido iquec. Adec ambi tantiametequid dadpen icnubi aid abentsēcquiobi tantiamianquid Nuquin Papan Mayan nec. <sup>5</sup> Adecbidi, utsi nashunquido Esuquidistu tantiaquido icnubi utsi nashunquidon Icbo abentsēcquiobi Esuquidistu nec. <sup>6</sup> Adecbidi, nadatiambocquin nabanquid utsi-utsiec icnubi Nadatiambocquin namianequid abentsēcquiobi Nuquin Papa iquec.

<sup>7</sup> Esuquidistu tantiaquid utsibēd tantiananquin namenu, quequin aton Mayan Nuquin Papan nuqui menec. <sup>8</sup> Nuquin Papan Mayanēn tantiamiac

ambia comapenen tantiaquidquo icquin chuibanquid utsi-utsiec iquec. Nuquin Papan Mayanën tantiamiac ambi tantiaid chuibanquid utsi-utsiec iquec. <sup>9</sup> Nuquin Papan Mayanën tantiamiacpaden ëmbi chiacpadomboen Nuquin Papan naic, quequin tantiaquid utsi-utsiec iquec. Nuquin Papan Mayanën tantiamiac bédamequid utsi-utsiec iquec. <sup>10</sup> Nuquin Papan Mayanën tantiamiac nadatiambocquin nabanquid utsi-utsiec iquec. Nuquin Papan Mayanën tantiamiac Nuquin Papan nanun chuipampid tantiaquin chuibanquid utsi-utsiec iquec. Nuquin Papan Mayanën tantiamiac matses bédamboec tabadsho isash, Nuquin Papan Mayanën tantiamiaid nec, quequin tantiaquidquo utsi-utsiec iquec. Adembidi, utsi icsamboec tabadsho isun, Mayan icsan namiaid nec, quequin tantiaoaic. Nuquin Papan Mayanën tantiamiac nidaidën icquid onquiacmaidën onquequid utsi-utsiec iquec. Adembidi Nuquin Papan Mayanën tantiamiac nidaidën icquid onquiacmaidën onquesho tantiaquidën tantienquiocsho isun aidon onqueten chuibanquid utsi-utsiec iquec. <sup>11</sup> Aden Nuquin Papan Mayanën tantiamiac nabanquido nuquitedi nec. Ambi tantiacpaden abentse-abentsen Nuquin Papan Mayanën aden tantiamiec.

*Dada abentsëc yacpadquiec Esuquidistu tantiaquidtedi iquec*

<sup>12</sup> Uidënaid dadpen icnubi matsesën dada abentsëc iquec. Adquiobidi Esuquidistu tantiaquid dadpen icnubi ambi tantiaid abentsëcquiobi Esuquidistu iquec. <sup>13</sup> Ad icnuc isadaidbo yec isadaidpembo yec utsin yuaid yec utsin yuacmaid yec quec Esuquidistu tantiaquid iquec abi tantiaquido nuquitedi iquec. Adquid nuqui icsho Nuquin Papan aton Mayan meniaido nuqui nec.

<sup>14</sup> Matsesën dada abentsëqui icnubi uidënaid dadpen iquec. <sup>15</sup> ¿Médantepadquidpenquo yec matsesën dada uidënacmaidta taë icpec? Padenquo. Dada uidënaid taë iquec. <sup>16</sup> Adecbidi, ¿ëshëpadquidpenquo yec matsesën dada dëccuësquiacmaidta dëbiate icpec? Padenquo. Dëbiate dëccuësquequid iquec. <sup>17</sup> Matsesën dada ëshëuidpambo icquin ¿atontsin tantiapatsiash? Adecbidi, aton dada pabiateuidpambo icquin ¿atontsin shëdpatsiash? <sup>18</sup> Nuquin Papan tantiampicpadquiequi matsesën dada uidënaid nec. <sup>19</sup> Dëccuësquequid abentsëc icnuc dada nec quetiapimbo iquec. <sup>20</sup> Uidënaid dadpembëd dëccuësquequid dadpen icnuc matsesën nami abentsëqui iquec.

<sup>21</sup> Matsesën dada ad icnuc, ¿Médante bédambo icnubi ëshë padenquo iquec, quepecta mibi ique? Padenquo. <sup>22</sup> ¿Isadesa uidënaid uquëducquid nibëdnuc matsesën dada bédamboda icpatsiash? <sup>23</sup> Uidënaid uquëducquid ismenquiocquin ompoaidquo utsi nec. <sup>24</sup> Nami isaidquo ompodesa nec. Nuquin Papan tantiampicpadquiequi ompoaid nibëdnuc matses cuëdenquo yec unësec. <sup>25</sup> Ad icnuc, Icsambo icmianeque. Tësnu, quetiapimbo icbo iquec. Ompoaid ompodesa aidbëdi iquec bédambo yec nashunanquid aidtedi nec. <sup>26</sup> Abentsëc paëmbo iquec matsesën dada bédambo iquenquo iquec. Adquidtedi bédambo iquec matsesën dada abichobi paëpenquo iquec. Adecbidi, Esuquidistu tantiaquido abentsëc yacimboec iquec abentsëc icsacsho isash abitedi unësqiuo iquec. Abentsëc, Bédambo iquebi, quenuc aidbëd abitedi bédambo iquec.

<sup>27</sup> Adquidtedi matsesën dada abentsëc yacpadquiec Esuquidistu tantiaquidtedi aidën dada abentsëc yacimboecquid nuqui nec. Abi tabadtequid iquec. <sup>28</sup> Abi tabadtequid nadquid iqueque. Chuinu. Tantia. Ambi chiacpaden ambi ëbi chuibeneta caidoba iquec. Nuquin Papan chuipampid comapenen tantiaquin chuibanquid utsi iquec. Esuquidistu tantiaquid

icscho isun nadec tabad quequin chuibanquin ismequid utsi iquec. Nadatiambocquin nabanquid utsi iquec. Bédamequid utsi iquec. Utsi nashumbanquid utsi iquec. Esuquidistu tantiaquid iccuededquido namequid utsi iquec. Abi onquiacmaidën onquequid utsi iquec. Adquidtedi nuqui iquec abentsëc yachimboec nuqui tabadec. <sup>29</sup> ¿Esuquidistu tantiaquidtedida ambi ëbi chuibeneta caid icpadic? Padenquio. ¿Esuquidistu tantiaquidtedida Nuquin Papan chiampid comapenen tantiaquin chuibanquid icpadic? Padenquio. ¿Esuquidistu tantiaquidtedida, Nadec tabad, quequin ismequid icpadic? Padenquio. <sup>30</sup> Adecbidi, ¿Esuquidistu tantiaquidtedida bédamequid icpadic? Padenquio. ¿Esuquidistu tantiaquidtedida abi onquiacmaidën onquequid icpadic? Padenquio. ¿Utsi onquiacmaidën onquesho tantiaquidën tantienquiocsho isun aidon onqueten onquequin chuibanquidtedida icpadic? Padenquio. <sup>31</sup> Nuquin Papan Mayanën tantiamete utsi-utsiec icnuc, ¿Atotsibi icte bumpe? quequin tantiaquiota. Esuquidistu tantiaquid tantiabemenuequin ëmbi abia chuibambocpadquid icte bunquiota.

### *Utsi tantiaquidquio*

Ëmbi chuiboedtedi Esuquidistu tantiaquido Nuquin Papan Mayanën tantiamete bédambo iquec. Padnuen ambi tantiamequin bédamboshë icmetequid iqueque. Aid tantiaquidquidba chuiboshombic aid tantiaquidquio chuinu. Tantiata.

## 13

<sup>1</sup> Matses utsi-utsiecquid onquiacpadquiec anquiadquid, adecbidi Nuquin Papan abi yacnoshon uaid, mayan bēda onquiacpadquiec onquequid icquimbi utsi tantiesa icquin chuibansho abipenquio chuisho utsibon tantien-dac. <sup>2</sup> Utsibic, Nuquin Papan Mayanën tantiamiac chuibanquid adembidi Nuquin Papan chienquio icampid Nuquin Papan Mayanën tantiamiac tantiaquid aidi niosh. Aidëmbidi Nuquin Papa nadatiambocquin naquidquio nec, quequin tantiaquin, Mananuc macuësh dapa icboedi acte nantan nēnitsinoac, Papa, cacpadomboen nēnitsinoac nidquid isquid icquimbi utsi tantiesa icsho, Bédambocquid mibi nec, Nuquin Papan catiapimbo iquec. <sup>3</sup> Utsibic, aton na nibēdsho menequidquio niosh. Adembidi, Esuquidistu tantiesa nebi cata, cac padenquiocsho mëyanaid niosh. Adquid icquimbi utsi tantiesa icsho, Bédamboen mimbi naoc, Nuquin Papan catiapimbo iquec. <sup>4</sup> Padnuen Nuquin Papan Mayanën bédamboshë ictequid tantiamiaid nadquio iqueque. Chuinu. Tantia. Utsi tantiaquidquio utsi tantiamequionuec chushcanesa nec. Utsi tantiaquidquio nashundenequid nec. Utsi tantiaquidquio utsin na isash adquidquio con na bēpashun quesa nec. Utsi tantiaquidquio dēniacanquidquio yec dēniacanquidquio nebi abibi quesa nec. Utsi tantiaquidquio ëbentsëqui tantiaquidquio nebi quiacimboen nabanesa nec. <sup>5</sup> Utsi tantiaquidquio utsi icsamboen tantiaquin nabanesa nec. Utsi tantiaquidquio, Ëmbentsëqui tantiacpadomboenuidi utsitedishun nabantiad, quesa nec. Utsi tantiaquidquio badedquio nēishesa nec. Utsi tantiaquidquio abi icsamboen nasho cuidesa nec. <sup>6</sup> Utsi tantiaquidquio utsi icsambocsho isash, Unēsquio iquebi, quec tsadquid nec. Adecbidi, utsi bédambocsho isash, Bédambo iquebi quec tsadquid neoac. <sup>7</sup> Utsi tantiaquidquio utsi icsaid chienquio yec tabadquid nec. Utsi tantiaquidquio ambi nanaid nibēdsho isash ampiash badedquio quenquio yec ¿mitsimboembi nampoba? quec onquequid nec. Utsi tantiaquidquio utsi icsadenesho isun, Tantiamic Nuquin Papan chiacpadomboen natsiash, quequin chuibanendac. Aden

chuishun bēdamboen nasho isnuen cainquid nec. Mēyanaqui chieshenquio yec dayacquio yec tabadtenequid utsi tantiaquidquio nec.

<sup>8</sup> Utsi bēdamboen tantiaid ēnēdtiapimboctequid nec. Nuquin Papan chiaid chuibantsaidien ēnēdendac. Adecbidi, matses onquiaidtedi ēnēdendac. Adecbidi Nuquin Papan ambi uaidtedi ēmiac matsesēn isquin tantiaid ēnēdoaic. <sup>9</sup> Nabanaidtedi tantiabenabictsēcquidquio nuqui nec. Adecbidi Nuquin Papan chiampidtedi tantiabenabictsēcquidquio nuqui neoaic. <sup>10</sup> Nidaidēn tabadquin aidtedi tantiabenabictsēcquidquio nuqui icboedi Nuquin Papa yacno puduedash abitedi tantiaquidquio nuqui iquendac. <sup>11</sup> Bacuē yec bacuēmpi onquiacpadec onquepadenebi. Adembidi, bacuēmpin tantiabenabi yacpaden tantiapadenembi. Adquid icquin caniaidēn tantiacpadpenquiocquin tantiapadenembi. Adquid icboedi caniaish bacuēmpin tantiacpadpenquiocquin tantiabenondambi. <sup>12</sup> Nēbi isnanten bēisadquin Nuquin Papabimboecquid nuqui isec. Yuecshun abi yacno puduedshun aidquiobi Edoen Nuquin Papa nuqui bēistuidendac. Nēbi Nuquin Papa isenquiocquimbi ambi chiaid tantiatsembi. Ambi tantiacpaden yuecshun bēisquin nuqui tantiabenendac aid.

<sup>13</sup> Nidaid ēnēdnuc nēidtedi ēnēdtemaid iqueque. Chuinu. Tantia. Ambi chiacpaden nabanquidquio Nuquin Papa nec, quequin tantiaid ēnēdtemaid nec. Adecbidi Nuquin Papa yacnoēsh abipadquid bēdambocquidquio iquendabi, quequin cainquin tantiaid ēnēdtemaidquio nendac. Adecbidi, utsi tantiaid ēnēdtemaidquio neoaindac. Aidtedi ēnēdtemaid icnuc nidaidēn tabadquin, Utsi tantiembi, quequin ismiac utsi dadpen Esuquidistu tantiaquid yanash mibēdi Nuquin Papa yacno tabadendac. Adquid bēdamboshēcquid nec.

## 14

### *Mimbi chiaid chuibanquid ēbi icme, Papa, quaid*

<sup>1</sup> Utsi tantiaquid icta. Nuquin Papan Mayanēn adquid icmioshi, quequin ambi tantiamete utsi bunquiebique. Adec bunsho mimbi chiaid comapenen bēdamboen chuibanquid ēbi icme, Papa, quequin chuiban. <sup>2</sup> Aden tantiamiac tantiamenu queshun tantianuequidēn onqueten chuiban. Aton onqueten onquenquiocsho aidon tantienquio iquec. Padnuen onquiaidtedimbo Nuquin Papan tantieque. Aden nidaidēn icquid onquiacmaidēnquio Nuquin Papan Mayanēn tantiamiacpadec onquequin Nuquin Papa chiec onqueta. <sup>3</sup> Ma Esuquidistu utsibon tantiabenu, queshun Nuquin Papan chiaid chuibanec. Adembidi matses ma bēdamboec tabadnu queshun chuibanec. <sup>4</sup> Nuquin Papan Mayanēn tantiamiac nidaidēn icquid onquiacmaidēn onquequin onquequiduidtsēqui tantiabenquid yanec. Padnuen Nuquin Papan chiaid Nuquin Papan Mayanēn tantiamiac Esuquidistu tantiaquido ma Nuquin Papan chiaid tantiabenu queshun chuibanec. <sup>5</sup> Nuquin Papan Mayanēn tantiamiac nidaidēn icquid onquiacmaidēn Esuquidistu tantiaquidtedi onquepashun. Aden chuishumbic adec onquenquiocquin Nuquin Papan chiaid chuiban caimbi. Nuquin Papan chiaid comapenen tantiaquin chuibanac Nuquin Papan chiaid utsibon tantiabenendac. Padnuen nidaidēn icquid onquiacmaidēn chuibanac tantianuequidēn tantienquio iquendac. Aden tantienquiocsho isun abi daēdi onquiaid tantiaquin chuibanquid nibēdnuc nidaidēn icquid onquiacmaidēn chuibanenda caimbi.

<sup>6</sup> Adembidi chuinu. Utsibon tantia. ¿Mibi yacno choash puduedshun nidaidēn icquid onquiacpadec onquenquiocquin ēmbi chuibansho tantienquio yec, Bēdambo iquebi, quecta mibi tabadpe? Padenquio. Nuquin

Papan chiaid dada uamiampid min onqueten ëmbi chuibansho mimbi tantiabampec. Min onqueten chuibanenquoio yec ëbibi onquiacbimboecsho mimbi tantienquoio ictsiandac. <sup>7</sup> Shoncatempi abibi shoncadtiapimbo iquec. Adembidi, aid shoncaisan shoncasho tantiatiapimbo utsin iquec. Adembidi aid cuëdëmesan tentencate cuëdëmesho tantiash, Adomboen cuëdëmenquoio iccosh, quec. <sup>8</sup> Adembidi, utsibo yacno ma cuesnanu qeshun chomenuequin sondadon tantiabocpadpenquoio noc shoncac choenquoio iquec. <sup>9</sup> Adecbidi, utsi onquiacmaidën onquequin chuisho ¿mitsipaden tantiapatsiash? Utsibon tantienquoio iquec. Aden chuibanec nibëdacno onquiacbimboec onquepec. <sup>10</sup> Onquete utsi-utsiec dadpen iquec. Aton onqueten onquequin chuibansho matsesën tantiec. <sup>11</sup> Utsin onqueten chiac tantiatiapimbo yec, Onquequin chuibanquid con matsespenquoio nec, quequin tantiec. <sup>12</sup> Ad icnuc, Nuquin Papan Mayanën ëbi tantiamepc, qeshun, Esuquidistu tantiaquido ma tantiabenquido yampanu qeshun mimbi chiaid chuibanquidquoio ëbi icme, Papa, quequin Nuquin Papa chuita.

<sup>13</sup> Nidaidën icquid onquiacmaidën onquequid nebi, quequin tantiec. Adec onquequin chuibanquin iccuededquidon onquetenquoio ëmbi chuibod chuiboaquid icme, Papa, ma tantiapanu, quequin Nuquin Papa chuita. <sup>14</sup> Nuquin Papa chiec ëbi onquiacmaidën onquesho utsibon tantienquoio iquendac. <sup>15</sup> Aden abi onquiacmaidën onquequin utsibon tantienquoio icsho ¿mitsipadentsimbi tantiamepe? Naden naimbi. Iccuededquido onquiacmaidën onquequin Nuquin Papa chuishumbic tantiamenun iccuededquidon onqueten onquequin chuibanoanuna. Adecbidi, iccuededquid onquiacmaidën Nuquin Papan naid chiec cuëdëdashic tantiamenuec iccuededquidon onqueten cuëdënoanuna. Adembidi abi onquiacmaidën onquequin chuibanshun iccuededquidon onqueten chuibanoatiapimbo icquin abi onquiacmaidën onquequin chuibanenquoio iquembi. Adecbidi abi onquiacmaidën cuëdënenquoio iquebi. <sup>16</sup> Iccuededquido onquiacmaidën onquequin Nuquin Papa chuibanuc ¿mitsipadec, Ai, abimbo iquec, quepec aido? Aton onqueten onquequin Nuquin Papa chuibansho tantiash, Mibi bëdambo iquec, Papa, quequin chiendac. <sup>17</sup> Abi onquiacmaidën onquequin Nuquin Papan naboed chuibanac Esuquidistu tantiadonequidquoio mibëd iccuededquido yantiapimbo iquec.

<sup>18</sup> Ëbibi utsin-utsinquec onqueten onquequidquoio icnubi mibitedi adesa nec. Padnueni adec onquec bëdambo iquec, Papa, quequin chuidedchuidedembi. <sup>19</sup> Padnuen chuinuec Esuquidistu tantiaquido iccuededacno puduedash ma tantianu quiash aton onquete daëdpactsëc tantiash anquiadquid icquin aitedictsëqui chiendambi aido onquiacmaidën onquenquiocquimbi.

<sup>20</sup> Adembidi chuinu. Utsibon tantia. Bacuëbo tantiabenabictsëcquid yacpadquiec icsaid tantiesa icta. Ënden caniaidën tantiabenshun ismiacpaden bëdamboec tabadquin ismeta. <sup>21</sup> Nuquin Papan chiampid nad iqueque. Tantia: “Ëmbi chuiban cac aton matsesën chuibanac tantiate bunesa icquin niacquid isadaidbo niosh. Adshobimbi matses utsi yuamiac isadaidbo onquiacmaidën onquequin chiac tantiesa icquin ëmbi chiacpadomboen nate bunenquoio icoaposh,” quequin Nuquin Papan dada uamiampid nec.

<sup>22</sup> Adoaidi Nuquin Papan Mayanën tantiamiac abi onquiacmaidën onquequin chuibanquin Nuquin Papan chiaid tantiabenquid Esuquidistu tantiaquid icmetiapimbo iquec. Padnuen adec onquequin chuibansho tantiash, Nuquin Papan naid nec, quequin Esuquidistu tantiesa icboedi abi tantiaquid yantsiash. <sup>23</sup> Padnuen Esuquidistu tantiaquido iccuededacno Esuquidistu

tantiesa puduedshun abi onquiacmaidën abitedi onquecuededsho tantiash, Aidon tantiante icsabudpash, quepec. <sup>24</sup> Padnuen Esuquidistu tantiaquido iccuededacno Esuquidistu tantiesa puduedshun aton onqueten abentsëcshun-abentsëcshunquien Nuquin Papan chiaid chuibansho tantiash, Icsaobi. <sup>25</sup> Nëbi ëbi bëdambo icmequid Esuquidistu tantiante bunebi, qeshun abi icsaid ambi chienquiochoed Nuquin Papa chiashic, Nëmbo iccuededquidobëd mibi iquec, Papa, quequin chuibampec Esuquidistu tantiaquid yanshun.

*Abentsëcshun-abentsëcshunquien chuiban, quequin chiaid*

<sup>26</sup> Adembidi chuinu. Adembi tantiata. Esuquidistu tantiaquid iccuededec cuëdënu, utsi quenubien; Nuquin Papan chiaid tantiamequin chuinu, utsi quenubien; naden Nuquin Papan ismioshibique. Chuinu, utsi quenubien; mibi onquiacmaidënquo onquequin chuinu, utsi quenubien; mibi onquiacmaidën chuisho tantiombique. Min onqueten chuinu, utsi quetsish. <sup>27</sup> Aided, Chuinu, qesho ¿mitsicquid chuita nuqui cape? qeshun naden chiac bëdambo ictsiash. Chuinu. Tanta. Mibi onquiacmaidën onquequin chuinuequid daëd icnuc bëdambo ictsiash. Abentsëc chotsëcnuc adecbidi bëdambo ictsiash. Aided icquin abentsëcshun-abentsëcshunquien onquequin chuiban, cata. Aden abentsëcshun onquequin chuisho abi onquiaid tantiaquidën iccuededquidon onqueten chuibanta, cata. <sup>28</sup> Padnuen abi onquiaid tantiaquin chuibanuequid nibëdnuc, Tsadquin Nuquin Papauidi otacquiocquin chuita, cata.

<sup>29</sup> Adecbidi, Esuquidistu tantiaquido iccuededacno Nuquin Papan chiampid comapenen tantiaquin chuibanquid daëd icnuc bëdambo ictsiash. Abentsëc chotsëcnuc adecbidi bëdambo ictsiash. Aided icquin abentsëcshun chuibanubi, ¿Nuquin Papan Mayanën tantiamiacpadomboenda chuibanegue? Isnu, quequin chuibanuequid utsibon Nuquin Papan chiaid isban. Adembidi, utsin chuibanubi adomboembidi isbanoaic utsibon. <sup>30</sup> Abentsëcshun chuibanubi Nuquin Papan Mayanën tantiamiac utsi: Èmbitsen chuibanu, qesho tantiashun ma aidën chuibanu quiash ambia chuibanquid ënëd. <sup>31</sup> Adquidën iccuededquidtedi tantiamenuequin abentsëcshun-abentsëcshunquien chuibanta. Aden chuibansho tantiash ma chieshenquo yec bëdambo icpanu. <sup>32</sup> Nuquin Papan Mayanën tantiamiaid utsibëd bëdamboec tabadquid nec. <sup>33</sup> Nuquin Papan tantiamiacpadequi utsi onquenubi onquenquo utsibo tabadec. Onquenu, utsi quenuc, Ai, onqueta, qeshun onquenquiocquin cainec tabadec chuibanuequid utsibo. Esuquidistu tantiec iccuededquido utsi-utsiec yacnocquido adecbidi tabadquido nec.

<sup>34</sup> Esuquidistu tantiaquido iccuededacno otacquo tabadquid chido. Chuibanacnoësh onquenu, quenda chido. Nuquin Papan chiapadec ëbi chuiquid dada nec, quec chido. <sup>35</sup> Anoshon chiaid tantienquo yec tsadquin cainec shubuno nidash, Tantienquo iccombique. Nuqui tantiaboed ëbi chui, qesho tantiashun chiec aton bënën. Tantienquiocquin cainenquo iquec chido icsambo iquec. <sup>36</sup> ¿Mimbia Nuquin Papan chiaid chuibanquidoda ne? Padenquo. ¿Chuibanac Esuquidistu tantiaquido mibitedictsëquida yanondac? Padenquo. <sup>37</sup> Nuquin Papan chiaid chuibanquidquo nebi, mibi quenuc, Nuquin Papan tantiamiacpaden Pabadon chuibanquin dada uaid nec, mibitedi quepec. <sup>38</sup> Aden mimbi tantianubi, Pabadon dada uaosh, quenquo utsibo icpec. Aido Nuquin Papan tantiamiacmaido iquec. Adquid icsho isun, Pabadon dada uaid nec, quequin tantiamenu, quenda.

<sup>39</sup> Adembidi chuinu. Adembi tantiata. Nuquin Papan chuipampid comapenen tantiaquin chuibante bunquiota. Aden chuibanquid mibi icnuc utsi

onquiacmaidën onquequin chuinesho, Ai, cata. <sup>40</sup> Adecbidi, Nuquin Papan Mayanën tantiamiac chuibanuequid dadpen icnuc utsibo bēdamboen tantiamenuequin abentsēcshun-abentsēcshunquien chuibanta.

## 15

### *Esuquidistu uincuenaid*

<sup>1</sup> Adembidi chiembique. Tantia. Matses icsaquid icsho cuidnushe quiash abided ciudadec Esuquidistu unēsaid ěmbi chuibansho tantiash, Ai, abimbo iquec. Aid tantiambi, mibi quiampondac. Aden tantiadonec chieshenquoio yec mibitedi tabadec. <sup>2</sup> Aden, Aid tantiabenu, qesho Nuquin Papan mibitedi bēdambo icmenuequin tauapondash. Mibi chieshenquiocsho isun adquid icmeshun abi yacno mibi yuedendac. Padnuen, Esuquidistu tantiaquid nebi, quequin abipenquiocnoc chuiquid ambi bēdambo icmebanacmaid nec. Adecbidi, ambi yuednu cacmaidquio adquid nec.

<sup>3</sup> Utsin ěbi tantiamiacpaden mibi chuibanondambi. Adembidi chuinu. Tantia. Nuquin Papan chiapadomboen matses icsaquid icsho cuidnushe quiash abided ciudadec Esuquidistu unēsapanēdash. <sup>4</sup> Unēsacsho shěcuĕ nacenaidën nauedshun bĕtashacsho daĕdec ushtanquin ambi chiampicpaden Nuquin Papan uincuen uapanēdash. <sup>5</sup> Aden uincuemiach choquin, Uincuenobi, quequin Petedo Esuquidistun ismepanēdash. Adshumbic adembidi abĕd 12ted icquido ismeoapanēdash. <sup>6</sup> Adshumbic adembidi abi tantiaquid dadpen 500ted iccuededsho choquin, Uincuenobi, quequin Esuquidistun ismeoapanēdash. Aid uincuenacsho isquido dadpen abi tabadnubi utsi-utsiec padenquio iquec. <sup>7</sup> Aden aidtedi ismeshumbic aton utsi Santiacotsen Esuquidistun ismeoapanēdash. Adshumbic, ambi ěbi chuibeneta caidtedi ismeoapanēdash. <sup>8</sup> Aden aido ismequin nainshun yuecshun ěbitsen ismeoapon-dashi. Icsactsēcquiocquid nec, quenquiocquin ismebenondashi tsyuecquio. <sup>9</sup> Abi tantiaquid mĕyanquin cuesunemequidquio icboedi abi tantiaquid yanacsho Esuquidistun, ěbi chuibeneta, cainquioctiadquidĕmbi adquid icta caid nebi. <sup>10</sup> Esuquidistu tantiaquid yansho isun ěbi chieshaid cuidenquio yac Nuquin Papa bunacpadomboen Esuquidistu chuibenequid nebi. Adquid Nuquin Papan icmioshi, quequin chieshenquiocquin ma dadpenshun Esuquidistu tantianu quequin chuibenembi utsibon aden chuibenenquiocnobi. Ğĕmbentsĕquidambi chuibenedio? Aton Mayan Nuquin Papan meniac aidbĕd icquin chuibeniombi. <sup>11</sup> Adembidi, ěbi yacpadquidon Esuquidistu chuibanac utsitsen abi tantiaquido yampondash.

### *Matses unēsash uincuenaid*

<sup>12</sup> Adec Esuquidistu unēsash uincuenondash, quequin chuinubi Ğmitsipaden tantiec uincuenta nibĕdec quec utsi-utsiec onquepec? <sup>13</sup> Uincuenta nibĕdnuc Esuquidistu uincuenenquio ictsempanēdash. <sup>14</sup> Esuquidistu uincuentequid icmiamboconoc abi chuibanquid muambo ictsiandac. Esuquidistu tantiaquid nebi, quiaidbidi muambo ictsiandac. <sup>15</sup> Nuquin Papan naid chuibanquidtedi muaquidquio icoatsiandac. Aden tantienquiocquin ěbi yacpadquidon chuibanendac. Unēsash uincuentequid nibĕdnuc ěbitedishun Nuquin Papan Esuquidistu uincuen uapanēdash quequin chiaid abipenquio ictsiandac. Unēsash uincuenta nibĕdnuc Nuquin Papan uincuemiaid nibĕdtsiandac. <sup>16</sup> Unēsash uincuenta nibĕdnuc Esuquidistu uincuentiapimbo ictsempanēdash. <sup>17</sup> Aid uincuenambo icnuc matses icsaquid icsho cuidnushe



quiash abided cuidadquid Esuquidistu nec, cainquio mimbi ictsiandac. Mat-ses icsaquid icsho cuidnushe quiash cuidadquid nibëdtsiandac. <sup>18</sup> Aid uincuenambocnoc abia tantiaquido tsusedpabo Nuquin Papa yacno puduedti-apimbo ictsempañëdash. <sup>19</sup> Nidaidënuidi Esuquidistu tantiec tabadte icnuc abi tantiaquido Esuquidistun bedoanendac quequin caimbudaqui ambi tantiaid choenquio ictsiandac.

<sup>20</sup> Ëmbi chuiboedtedi adtiapimbo iquec. Esuquidistu Nuquin Papan uincuen uapanëdash, quequin chiaid abimbo iquendac caimbi. Nuquin Papan ambi abia uincuemaiid abi yacno puduedmequin ambi uincuemetequid dadpen iquendac, quequin chiaid abimbo iquec. <sup>21</sup> Unëstequid bëyuc dada yanampicpadec matsestedi adecbidi iquec. Adecbidi, unësash uincuentequid Esuquidistu yanacpadec abi tantiaquidtedi adquiobidi iquendac. <sup>22</sup> Bëyuc dada Adan caidën tsyuecquidtedi adecbidi unëstequido nec. Esuquidistun bëdambo icmiaid uincuentequido neoaic. <sup>23</sup> Esuquidistubimboecquid dadpen iquendac, quequin Nuquin Papan aidba uincuemiambien yuecshun Esuquidistu choashun abi tantiaquidtedi bedoanendac. <sup>24</sup> Aden bedoanquin abi tantiaquidtedi bëyucanec choquin Nuquin Papa Edoen caid ismequin, Nëidtedi min shubu abentsëquën tabadquido nec, quequin chiendac abi chieshënuquidtedi chën quetiapimbo. Aido ambi nebudacimboecquido iquendac. <sup>25</sup> Abi chieshënuquido utsitedibëd chuiquid icquin abi chieshëntiapimbocquid aido Esuquidistun icmebanendac. <sup>26</sup> Adoshombic ënquimbi unëstequid nibëdquidquio Esuquidistun icmeoaindac. <sup>27</sup> Adoacsho abitedi chuiquid Esuquidistu Nuquin Papan icmendac. Abi namiaidtedi utsitedi icnubi adquidpenquio aton Papa iquec. <sup>28</sup> Aden Esuquidistun namiaidombo abitedi icmeshumbic aton Madotsen Nuquin Papan namiaid iquendac. Adquid abitedi icnuc Edoen Nuquin Papa Chuiquid Dapa Abentsëcquiobi nendac.

<sup>29</sup> Unësash uincuentequid nibëdnuc, ¿atotsieshun, Ënden unësaid uincuenendac, quequin tantiembi quequin utsibon acten ambibi mentomepec? <sup>30</sup> Adecbidi unësash uincuentequid nibëdnuc ëbi unës uate utsibo comapenec buncuededsho isun ¿atotsieshun, Uincuentequid iquec, quequin ëbi yacpadquidon chuibampec? <sup>31</sup> Unësash uincuentequid iquec, quequin tantiembi. Aden tantiaquin Esuquidistu, Nuquin Icbo, ëmbi chuibanac Esuquidistu tantiaquido mibitedi yampondac, quequin tantiembi. Aden tantiaquin unësmene quenquiocquin Esuquidistu unësash uincuenta iquec, quequin chuibenec nebi. Aden badiadquidën-badiadquidënuquien chuibanubi ëbi unës uate utsibo bunec. <sup>32</sup> Uincuentequid nibëdnuc, ¿atotsi quenuequini Epeso yacnoshon, Uincuenta iquec, quequin chuibansho mëyanaqui chieshenquio yec dayacquo tsadpe? quetsiabi. Adecbidi uincuenta nibëdnuc: “Unësash nibëdquiec iquebi, quequin nua peshun aquembi,” quetsiabi. <sup>33</sup> Aden tantienquio iquembi. Adembidi tantienda. “Uincuenta nibëdec quequidbëd capuenda aidën tantiacpadec icmane quiash.” <sup>34</sup> Adquidpadquid icquin mimbi icsamboen tantiaid ënquin Nuquin Papan chiaidquio tantiata. Esuquidistu tantiec mibëd iccuededquid utsi-utsiec, Nuquin Papa nadatiambocquin uincuemianquidquio nec, quequin tantiesa nec. ¿Adquid mibëdi icnuc Nuquin Papan bëdambo icmiaido mibitedida icpe? Padenquio.

#### *Uincuemequin dada chuca meniaid*

<sup>35</sup> ¿Mitsipadec unësaid uincuempec? utsi quepec. Adecbidi, ¿mitsipadquid uincuentequidën dada icpec? utsi queopec. <sup>36</sup> Adquidën icsamboen

tantieque. Chuinu. Tantia. Mimbi tiedën chococaid tauibëd ëshë chococatequid napi dëyuctequidpadpenquo iquec. <sup>37</sup> Mimbi tiedën chococaid utsi-utsiec iquec. Adecbidi mimbi tiedën siaid utsi-utsiec iquec. Mimbi chococaid mimbi siaidbidi dëyuctequid utsi-utsiec iquec. <sup>38</sup> Nuquin Papan tantiampicpadec aton dada yanec. <sup>39</sup> Abipadquidpenquo ambi uaidtedi iquec. Abipadquidquo matsestedi iquec. Abipadquidquo nidaidën capuquidtedi iquec. Abipadquidquo podochoquidtedi icoaic. Abipadquidquo acten icquidtedi icoaic. <sup>40</sup> Abuc tabëcaid icnubi nidaidën icquid iquec. Abuc tabëcaid abipadquid chënquesho isec nidaidën icquid tabadec. <sup>41</sup> Badiadën ushë comapenquiec chënquenubi inchëshën ushë dauebudquo chënquec. Aid daëdi nua isadnubi uispa pistsëc isadoaic. Uispa utsi-utsiec iquec. Abi bedquec chënquetequid utsi-utsiecbidi iquec.

<sup>42</sup> Aidtedi ënëndendac. Adecbidi tishac matses unësacsho chococac nami chodquec. Adec nami chodquian Nuquin Papan tantiacpadec uincuentequidën dada chuca chodquesa nendac. <sup>43</sup> Tishac icsaquid matses iquec. Adsho uincuemequin ambi icsaisa icmiaid nendac. Nidaidënshun tishac chonoadec uimabudquid matses nec. Yucash unësacsho uincuemiac uimabudenquiocquin nabanendac. <sup>44</sup> Nidaidënshun tishac daicsambo yanash unësacsho uincuemequin dada chuca icmetequid nendac. Nidaidënshun tishac matsesën tantiacpadquid icboedi Nuquin Papan uincuemiac aidën tantiacpadquid iquendac.

Nidaidënshun tishac matsesën tantiacpadquid icboedi abuc buanac anocquidën tantiacpadquid iquendac. <sup>45</sup> Adembidi Nuquin Papan chuiquin dada uamiampid nad iquec: “Bëyuc matses Adan caid nacnenshun Nuquin Papan bushcac taëec tiboquequid yampampic.” Nuquin Papan tsyuec chomiaid Esuquidistu nec. Aid tantiaquid abipadquid Nuquin Papan menec. <sup>46</sup> Nuquin Papan matsesën tantiacpadquidba icmiac Esuquidistu tantiaquid icsho isun abipadquid meniac icbon tantiacpadquid yanec. <sup>47</sup> Bëyuc matses uanu, qeshun nidaid putu bedshun nacnenaïd nepampic. Bëyuc matses Adan caidën tsyuecquid Nuquin Papan abi yacnoshon budmiaïd nepanëdash. <sup>48</sup> Nidaid putu bedshun bëyuc matses nacnenshun nidaidën tabadquid icmepampic. Adquiecbidi abipadquid matsestedi yanac. Nuquin Papan abi yacnoshon Chomiaïd tantiaquidtedi aton Mayan menec. Aden meniac abipadquid aido iquendac. <sup>49</sup> Adecbidi bëyuc matses isadacbimboecquid nidaidën tabadquidtedi nec. Nuquin Papan abucshun chomiaïd isadacbimboecquid abëd icquido iquendac.

<sup>50</sup> Adembidi chuinu. Tantiata. Matsesën dada nami intacchoquid chodquetequid icnuc Nuquin Papan shubu abentsëquën tabadtiapimbo adquid iquec. Chodquequid chodquetemaid ictiapimbo iquec.

<sup>51</sup> Nuquin Papan chienquiocpampid chuinu. Tantia. Abi tantiaquid unësabicquidbëdta ënden abi tantiaquid tsusedpabo dada chuca Nuquin Papan menendac. <sup>52</sup> Ambi namiaïdën abucshun shoncanubi ëshë badedquid bëbedquiacbimboecnuc badedquid unësesambo Nuquin Papan abi tantiaquid icmendac. <sup>53</sup> Chodquetequid icboedi chodquesa yanendac. Unëstequid icboedi unësesa yanendac. <sup>54</sup> “Adquid icmiac unëstequid nibëdquiendac.

<sup>55</sup> Ad icnuc ¿mitsishunquo unëstequid istuidpec? Adembidi, ¿mitsishunquo unësmetequid istuidpec?”

<sup>56</sup> Icsaquid unëstequid nec. Nuquin Papan nadomboen nata quequin chiaïd niacquid icash unëstequid matses yanac. <sup>57</sup> Adquid nuqui icsho isun Nuquin Papan Nuquin Icho Esuquidistu chomeshun nuqui cuidenquiocquin

aidi icsaisa cuidquin nuqui bēdambo icmebanec. Adoac abi yacnoēsh icsaisa unēsambo nuqui iquendac. Aden Nuquin Papan naindac, quequin, Bēdamboquid mibi nec, Papa, quequin nuqui chuided-chuidedendac.

<sup>58</sup> Adembidi chuinu. Tantiata. Adenuidi tantiaquin utsi uaquin utsin chuisho tantienquo yec tabad. Adec tabadquin Nuquin Papan chiacpadomboen naban Esuquidistupadquid Nuquin Papan ēbi icmendac, quequin tantiaquin.

## 16

### *Utsibo menenun piucquid bedbanaid*

<sup>1</sup> Nuquin Papan bēdambo icmebanaid utsibo menenun mimbi piucquid bedbanaid chuiquin dada uaimbique. Isec onquecuededta. Nidaid Cadaisia caid yacnocquido Esuquidistu tantiaquido ēmbi chuibanacpadomboen mimbitsen nabanta. Naden Cadasia yacnocquido chiombi. <sup>2</sup> Abentsēcshun-abentsēcshunquien mimbi bedaid musucbudcuenshun dominco ushēn mimbi musucacted dayun uata. Aton na daēdpactsēc icquidēn daēdpactsēc dayun uanubi mitsana dadpen icquidēn dadpen dayun uata. Aden musucbudcuenshun mimbi dayun uaid icnuc ēbi choacsho isash, ¿Tedtsimbi menepeba? quenquo mibitedi iquendac. <sup>3</sup> Ēbi choshombic utsibo bēdamboen tantiaquin piucquid dayun uaidtedi mimbi menenun buantan caido isun, Ēmbi isaido neque. Yuedta, quequin dada uashun aido menembi ma buanueshun. Aden ēmbi meniac buanquin utsibo ismetuidpec. <sup>4</sup> Adecbidi ambo nidtiadquo iquebi, ēbi quenuc mimbi menenun buantan caido ēbēdi nidendac.

### *Utsi-utsien chuibanaid*

<sup>5</sup> Nidaid Masedonia caid yacno Esuquidistu tantiec iccuededquid utsi-utsiec yacno isedbēquimbi mibi isbētsenembi. <sup>6</sup> Aden isedbēequi mibi isedash tabadebi. Iquenoanquid chonobi mibēd tabadtsiabi. ¿Aid ēnēdan nidnu, qesho, adabi utsi yacno mimbi nidmepatsia? <sup>7</sup> Nēbi mibēdi yuec tabadtiapimbo iquebi, quiash mibi yacno nidenquo iquebi. Yuecash mibēdi yuec tabadnuec mibi yacno nidebi. Nuquin Papa bunuc adendabi. <sup>8</sup> Nēbi padenquo iquebi. Epeso yacnocquidobēd iquebi. Nuquin Papan abipadquid aton Mayan matses meniaid ushē tantiate choan nēuēshquo nidebi. <sup>9</sup> Nēmbō Nuquin Papan chiaid tantianu quequid dadpen iquec. Adsho comapenen Esuquidistu chuibanec nebi ma tantiapanueshun. Aden chuibansho tantiavidash utsibo ēbi chieshēnquido nēmbō iquec.

<sup>10</sup> Mibi yacno ēbi nidenquo icnubi Timoteyo mibi yacno nideque. Aid bēdamboen ista. Pabado yacpadquiocquid Nuquin Papan namiaidquiobidi Timoteyo nec, quec chieshesa icta. <sup>11</sup> Nuquin Papan namiaidquiobidi Timoteyo icsho, Ēbēd icquidta nec, quenquiocquin yuedta. Yuedac tabadash, Nidnu, qesho, Ai, nidec nid. Mibi nidsho isash unēsquo iquebi, quequin nidme ma ēbi yacno choanu. Utsibobēd Timoteyo choaic quequin cainec tsadebi.

<sup>12</sup> Nēbi nuqui con utsi caid Apodos mibi chuinu. Tantia. Codinto yacno Esuquidistu tantiec iccuededquido nuquin utsibobēdtan istanta, quequin Apodos comapenen chiombi. Adoac, Nēbi Codinto yacno nidte bunenquo iquebi, quiosh aid. Yuecash Codinto yacno nidec bēdambo ictsiash, quiash yuecash aidi mibi yacno nidendac.

<sup>13</sup> Icsamane quequin chieshenquiocquin Nuquin Papan chiaid tantiadoneta. Esuquidistu tantiabenquido yanta. Adecbidi, natiateguicquid icnuc chieshtoenquo yec dayacquio yec tabadteneta. <sup>14</sup> Adec tabadquin utsi bēdamboen tantiaquin nabanta.

<sup>15</sup> Adembidi chuinu. Tantia. Nidaid Acaya caid yacno Estepanasën shubun icquido abia Esuquidistu tantiaquido icpondash. Adquid yanshun, Esuquidistu tantiaquid utsibo nashumbanquido nuquibi iquendac, qeshun adobanec. <sup>16</sup> Aidon namiaido icta. Adembidi, comapenen nashumbanquidtedishun namiaido icta. <sup>17</sup> Codinto yacno Esuquidistu tantiec iccuededquidtedi ëbëdi ictiapimbocnobi mibi yacnoësh nëidtedi chosh. Estepanas yec Podtunato yec Acaico yec quec choash puduedsho isash bëdambo iquebi. <sup>18</sup> Mibitedi chuibanquin aidon unësquiocquidi bëdambo icmiosi. Mibi yacno padpidec nidash puduedshun chuibanquin adembidi mibitedi bëdambo icmendac aidon. Aido mibi yacno choacsho isun, Pabado chuibanquin mimbi bëdambo icmiacpaden nabanec tabadta, quequin chuiban.

*Esuquidistu tantiaquidon mibitedi tantiaquin chuibanaid*

<sup>19</sup> Codinto yacnocquid mibitedi tantiec tabadebi, quequin dada uaqin chuita, nidaid Asia caid yacno Esuquidistu tantiec iccuededquidon cac chiembi. Adembidi, Aquidan aton chido Pidisidabëdtan chui cac chuioaimbi. Adembidi, aidon shubun Esuquidistu tantiec iccuededquidotedishun chui cac adembidi chuioaimbi. <sup>20</sup> Aden utsibon chiaid chuishumbic, Esuquidistu tantiaquid utsibotedibëd bëdamboec tabadta, caimbi.

<sup>21</sup> Ëmbi chuibanac ëmbi chiaid utsin dada uashumboed nec. Nëshun bedanquin dënainquin dada uaimbique. Tantia.

<sup>22</sup> Nuquin Icbo tantiesa nëbimbobi ma Nuquin Papan comapenen cuidquin ma nësiatequid icpanuna. Adecbidi abi tantiaquido bednuec badedquio Esuquidistu chopashun, quec tsadebi.

<sup>23</sup> Ëbi icsaquid icsho cuidenquiocquin Nuquin Icbo Esuquidistuded Nuquin Papan cuidpanëdash, quequin tantiaquid nebi, quequin abimbo chuiquid ma ambi tantiacpadquid Nuquin Papan mibi icmepanuna.

<sup>24</sup> Esuquidistun shubun icquido nuquibi icsho ëmbi bëdamboen isaïdo mibitedi nec.

Padi aïdted dada uaombique. Isec onquecuededta.

## CODINTO YACNOCQUIDON ISTE 2

<sup>1</sup> Pabado nebi. Nuquin Papa bunacpadomboen Esuquidistun, Ēbi chuibeneta, caid nebi. Esuquidistu tantiaquidbidi Timoteyo nuqui con utsi caid ěběd iquec. Aid ěběd icnubi Esuquidistu tantiec Codinto yacnoěsh iccuededquidon mimbi iste dada uaimbi. Ĕmbi dada uaid mibitedishun isbanshun utsibo meneta ma isnueshun.

<sup>2</sup> Matses icsaquid icsho cuidnushe quiash abided ciudadec Esuquidistu uněspanědash, quequin tantiaquiosho isun Nuquin Papan bědamboen isaidquio nuqui nec. Adquido yec utsiboběd ma bědamboec tabadpanuna.

### *Bědambo icmianquidquio Nuquin Papa*

<sup>3</sup> Nuquin Papa nad iqueque. Tantia. Chuinu. Ĕbi uněsquio icsho isash bědambo icmianquidquio Nuquin Papa nec. Adquid icsho, Mibi bědambo iquec, quequin aidquio chuidonenuna. <sup>4</sup> Natiamiaid icsho tantiaquin chieshtomenquiocquin aiděmbi nuqui dayacquio icmec. Aden ěbi tantiaquin Nuquin Papan nac, quequin natiamiaid utsi icsho tantiaquin, Bědambo iquebi, camenuna nuqui. <sup>5</sup> Adembidi natiamiaid Esuquidistu icsho isun Nuquin Papan chieshtomenquiocnuen chuiquin dayacquio icmiacpadomboen Esuquidistu tantiaquid utsi tantiaquin chieshtomenquiocquin dayacquio nuqui icmendac. <sup>6</sup> Adembidi ěbipadquidobědtan Esuquidistu chuiban-sho utsibon měyanac natiamiaid icsho Nuquin Papan, Bědambo iquebi, cameposhi. Aden Pabado tantiaquin Nuquin Papan nashunosh, quequin chiac utsin ěbi měyansho isun adomboembidi chieshtomenquiocquin Nuquin Papan ěbi dayacquio icmec, quec tabadta. <sup>7</sup> Utsin měyanaid icquimbi Esuquidistu tantesa uainquio iquec, quequin mibi tantiec tsadebi. Ĕbi měyanacpaden mibi měnyansho isun Nuquin Papan bědambo icmiaid mibi iquendac.

<sup>8</sup> Nidaid Asia caid yacnoshon ěbi natameboed mimbi tantiamboen icchitec, quequin ěbi adoboed mibi chuibanu. Tantia. Dayactiapimbocnoc natiamioshi. Adoac, Uněsebi, quiobi. <sup>9</sup> Uněs uatiad, utsibo quesho tantia-ash, Ĕbibi měnchiquidtiapimbocquimbi matses uněsacsho uincuemequiděn ěbi měnchictsash, quequin tantiec tsadobi. <sup>10</sup> Ai, uněs uanu, cac natiapobi. Adsho Nuquin Papan měnchicaid nebi. Adembidi aiděmbi ěbi měnchictenec. Uněs uatsensho isun ěbi měnchicacpaden ěnenquiocquin napashun, quequin tantiec tsadebi. <sup>11</sup> Ĕbi tantiaquin mibitedishun chiac Nuquin Papan měnchicmiaid nebi. Aden mimbi chiac uněs uanu, quesho tantiaashun mimbi Pabado měnchiccoc. Mibi bědambocquid nec, Papa, quequin ma dadpeshun ambi naid chuipanuna.

### *Něbi mibi yacno nidenquio iquebi, quiaid*

<sup>12</sup> Bědamboec tabadquin ismequid nebi, quequin tantiec bědambo iquebi. Adaid chuinu. Tantia. Nuquin Papan ěbi tantiamiacpaden ismec utsiboběd bědamboec tabadobi. Adquiecbidi mibědi tabadobi. Matsesěn tantiamiacpadpenquio yec tabadobi. <sup>13</sup> Ma tantiamenueshun abimbo chuiquin mibi dada uashunec nebi. Ĕmbi dada uaid bedshun isec, Pabado bědamboec tabadec, quequin ěnenquiocquin tantiapashun mibitedishun. <sup>14</sup> Ĕběd Pabado bědamboec tabadosh, quequin tantiec bědambo iquebi, quec utsi-utsiec. Adecbidi, Codinto yacnocquido utsi-utsiec bědamboec tabadosh, quequin

utsibon chuisho tantiash bēdambo iquebi. Esuquidistu choanuc adqueiqui Codinto yacnocquido tabadpashun, quec tsadebi.

<sup>15</sup> Aden ēbi bēdamboec tabadaid tantiaquin Codinto yacnocquidon chiec, quequin tantiec, Aidoba istanu, quiobi. Aden istanac, Bēdambo iquebi, quepashun, caimbi mibi. <sup>16</sup> Mibi isbidanec nidaid Masedonia caid yacno nidashic padpiden mibi isbētsenec choaibi. Aden isbētsenembi, quesho tantiashun nidaid Udeya caid yacno mimbi ēbi nidmetsiac, quequin mibi chiombi. <sup>17</sup> ¿Uquēducshun, Nidenquo iquebi, quequin muaquindambi chuidio? Adenquiocquin chiombi.

<sup>18</sup> Ambi chiacpadomboen nabanquidquo Nuquin Papa nec. Aid chuinu. Tantia. Abimbo chuiquidquo yec utsi yantiapimbo iquec. Adquidquo icquin ambi, Esuquidistu chuibeneta, caidquo yec adomboen chuiquid nebi. Utsi uain chuinu, quesa nebi. <sup>19</sup> Ambi chiacpadomboen nabanquidquo Nuquin Papan Madombo, ěmbi chuibeniaid, Esuquidistu nec. Aidi Sidasēn chuibeniaidbidi nec. Aidi Timoteyon chuibeniaidbidi nec. Esuquidistu abimbo chuiquidquo yec utsi yantiapimbo iquec. Abi chuibenequidquo adquidbidi nec. <sup>20</sup> Con Madon naden naindac, quequin Nuquin Papan chiacpadomboen Esuquidistun ěnden nabanac. Aden abi nabanec. Ambi chiacpadomboen naquidquo Esuquidistu nec, quequin tantiaquin ambi naid ěbipadquidon chuibanec. Aden chuibanac abi tantiaquidquo yanash, Abimbo iquec. Esuquidistun ambi chiacpadomboen naindac, quec tantiec nuqui tabadec. <sup>21</sup> Nuquin Papan tantiamiac: Esuquidistu tantiaquid nebi, quiash, Tantesa nebi, quetiapimbo nuqui iquec. Adquid icmiac aton Madombo chuibanquid nuqui nendac. <sup>22</sup> Adembidi aton bacuē icmiaid nuqui nec. Adembidi aton Mayan Nuquin Papan meniaid nuqui nec. Ěbēd tabadquid aido nendac, quequin tantiamenuen Nuquin Papan aton Mayan meniac ma aidēmbi nuqui bēdambo icmepanueshun.

<sup>23</sup> Nuquin Papan tantianubi mibi yacno nidnu quiobi. Adashic, chushcachitomane quiash mibi yacno nidenquo iccobi. <sup>24</sup> Ěmbi Esuquidistu chuibanac abi tantiaquid dadpen iquec. Aidon icbopenquo nebi. Aidon icbopenquibidi Esuquidistu chuibanquid utsibo nec. Esuquidistu tantiec bēdambo iquebi ma quenu, quequin chuibenequidquo nebi. Esuquidistu tantiaquid nebi, abimbo quequin aid tantesa uainquo mimbi iquendac.

## 2

<sup>1</sup> Aden tantiaquin comapenen chuiquin unēsquo icmenushe quec mibi yacno nidenquo iquebi caombi. <sup>2</sup> Mibi unēsquo ěmbi icmiac ¿tsuntsin ēbi bēdambo icmepatsiash? ¿Ěmbi icsambo icmeboedēnda ēbi bēdambo icmepadac? Padenquo. <sup>3</sup> Aden tantiaquin mimbi iste dada uaombi ma ēbi bēdambo icmequid unēsquo icmetiapimbo iquebi, queshun. Bēdambo iquebi, quequin ēbi tantiec adquiobidi mibi icoatsiac, quequin tantiombi. <sup>4</sup> Unēsquo yec shubiquimbi mibi dada uashun, Meneta, caondambi. Unēsquo icmenu, quenquiocquin mibi comapenen tantiaquin dada uaondambi.

### *Abi icsaboed bēpiscudnueshun yued quiaid*

<sup>5</sup> Anocquidēn ēbi unēsquo icmedenequimbi adembidi comapenquiec unēsquo mibi icmeoaosh. Aidi mibi chiondambi. <sup>6</sup> Aidi mibi dadpenshun cacumiac abi icsaid ěnosh quec. <sup>7</sup> Adoacsho abi icsaid bēpiscudshun aidi yuedoquin bēdambo icme. Yuedenquo yac natiamianquiec unēstiadquo yantsiash. <sup>8</sup> Nuquibi iccuedednuna, quequin aid tantiaquin yued caimbi. <sup>9</sup> ¿Ěmbi chiacpadomboen nabanquidquioda neque? Isnu, quequin icsaquid cacumeta, quequin dada uaondambi. <sup>10</sup> Aden ěmbi dada uacpaden mimbi

cacumiac abi icsaid ênsho isun abi icsaid nibêdabimboec bēpiscudshun yued. Adsho tantiashun adomboembidi naimbi. Aidbēdi abentsēc yacbimboecquido yanosh, qesho tantiash abi icsaid bēpiscudebi Esuquidistun tantianubi. <sup>11</sup> Nuqui chieshēnquidēn Satanasēn aidi icsamensushe qeshun abi icsaid êmboed yuedta. Yuedenda, Satanasēn quequin tantiamiac onqesho tantienda.

*Nuquin Papan con Mayan meniaid adquid ēbēdi tabadtequid nec, quiaid*

<sup>12</sup> Esuquidistu chuibanuec shubu dadpen icquid Todoas caid yacno ēbi chonoc, Tiantanu, quec cho-choquid dadpen icpondash. <sup>13</sup> Adquid dadpen icnubi ēmbi con utsi caid, Tito, mibi yacnoēsh choabi icnuc ambo yuec tabadiapimbo iccobi. Adash, Bēquednu, quianec nidaid Masedonia caid yacno nidoapobi.

<sup>14</sup> Bēdambocquid mibi nec, Papa. Mimbi Esuquidistu tantiaquid ēbi yacpadquido icmeshun mimbi, Esuquidistu chuibeneta, caid ēbitedi nec. Ēmbi chuibanaid noadte bēdabimboecquid nec. Noadte bēda pushudec noadsho uano-uanoec tabadquidon shēdec. Adembidi, Esuquidistu ēbi yacpadquidon chuibenesho uano-uanoec tabadquidon tantiec. <sup>15-16</sup> Esuquidistu chuibanac noadte bēdan danoshquiaid shēdabimboen utsibon tantiec. Adembidi, Esuquidistun ēbi chuibeneta caido Icho isacimboen Nuquin Papan tantiec. Adomboembidi Esuquidistu chuibenequido utsibon isoaic. Aden isec Esuquidistu tantiaquid yanash ēnēdenquio yec abēd icquido aidtedi iquendac. Aden nuqui isquin Esuquidistu tantiesa icsho Nuquin Papan nēsiatequid iquendac. ¿Tsutsi Esuquidistupadquidquio icpec? Adquid nibēdec. Adesa icsho ambi, Ēbi chuibeneta, caidquio nebi. Adquid icquin chuibenenubi <sup>17</sup> piucquid bedte bunquin utsin-utsinquien Esuquidistu chuibanec. Adesa ēbipadquido iquec. Piucquid bednuequin ēbi yacpadquidon Esuquidistu chuibanenquio iquec. Nuquin Papan, Esuquidistu chuibeneta, cac aid chuibenec nebi Nuquin Papan tantianubi. Ambi namiaidquio nebi.

### 3

<sup>1</sup> ¿Pabado bēdamboec tabadquin Esuquidistu chuibenequid nec, mibi camenuendambi aden mibi chuibandio? Padenquio. Adembidi, ¿Utsi yacno nidnun bēdamboec tabadquin Esuquidistu Pabadon chuibanosh, quequin dada uata, ēmbi cac mimbi dada uaidtambi buampe? Padenquio. <sup>2</sup> Mibēdi tabadquin chuibanac Esuquidistu tantiaquid yansho isun Codinto yacnocquido mimbi chuibanaido nec, quequin chēshēten pinchuquēn tansiabimboecnuc paucudtiapimboen Nuquin Icbon tantiamiohi. Adembidi icamboec tabadboedi nēbi bēdamboec tabadsho isun Pabadon Esuquidistu chuibanaido Codinto yacnocquido nec, quequin adomboembidi tantiabededec utsibon. <sup>3</sup> ¿Abi tantiaquid icsho isun bēdamboec tabadmenuequin ambi cuēnote bedshun dada uampicpadquidta mibi meniondash? Padenquio. Esuquidistu tantiasho isun unēstiapimbocquid aton Mayan abipadquidquio mibitedi meniondash.

<sup>4</sup> Nuquin Papan tantiacpadomboen Esuquidistun, Ēbi chuibeneta, cac chuibanac Esuquidistu tantiaquid mibitedi yanacsho tantiec ēmbi chuibanaido aidtedi nec, quequin tantiembi. <sup>5</sup> Ēmbibi tantiacpaden chuibanesa nebi. Nuquin Papan tantiamiacpaden chuibanquid nebi, quequin tantiembi. <sup>6</sup> Ēmbibi Esuquidistu chuitiapimbo icsho Nuquin Papan Mayanēn tantiamiac Esuquidistu chuibenequidquio nebi. Ambi, Nadomboen nata, quequin dada uamiampicpadomboen chuibanta caidpenquio nebi. Ambi nadomboen nata, quequin dada uamiampidtedi

natiapimbo yec aibdēdi matses tabadtiapimbo iquec. Aton Mayan meniaidbēd tabadtequid nec.

*Abi tantiaquido bēdambo icmetequid aton Mayan*

<sup>7</sup> Nuquin Papan nadomboen nata quequin chiaid cuēnoten dada uacpaden nainquio yec matses abi yacno tabadtiapimbo iquec, quequin dada uampid meniac abi chēnquiacpadec Moisesēn bētantiate comapenec bēchomauanquiechēnqueboedi macuēsh budec bēdiambo chēnquesho isadaidbon bēistiapimbo icpampic. <sup>8</sup> Nēbi Esuquidistu tantiaquid bēdambo icmequid aton Mayan abipadquid meniaid ēnēdenquiocquidquio nec. <sup>9</sup> Ēmbi nadomboen nata quequin chiaid niacquid ēbēdi tabadtiapimbo iquec, quequin dada uaid Nuquin Papan meniac buanshun Moisesēn aton matses ēnēdenquiocnoc tabadmetiapimbo icambien matses icsaid bedshunash icsaisa abided cuidadec unēsash uincuenquidēn abi tantiaquido ēnēdtiapimbocnoc tabadmendac. <sup>10</sup> Nēbi Esuquidistu unēsaid tantiaquid ēnēdtiapimbocquid nec, quequin chiac ambi dada uaid meniampid ēnēdacbimboecquid nendac. <sup>11</sup> Ai, nadomboen nata quequin chiaid Moisesēn bedshun meniaid ēnēdtequid icnubi bēdambo icmiantequid Nuquin Papan chomiaid icsaisa ēnēdtiapimbo iquec.

<sup>12</sup> Aden tantiaquin, Esuquidistu nuqui tantiaid icsaisa yec ēnēdtiapimbocquid nec, quequin chuibenecquid nebi. <sup>13</sup> Moises Nuquin Papabēd onquec bēchomauanquiechboedi auēshquio nidec ushmaushmactsēcquio yanash matses ismenquiocnuec bēpucudpampic. Adesa icquin ompoenquiocquin utsibon ma tantianu, quequin Esuquidistu chuibenecquido nuqui nec. <sup>14</sup> Nuquin Papan dada uaid Moisesēn bēaid tantiate bunesa abēd icquido icpampic. Adquiobidi pamumēdacbimboec isadaidbo abi tabadec. Nuquin Papan cuēnoten dada uacpadquid isec onquec nēbi adquiobidi utsi-utsiec tabadec. Esuquidistu tantiesa yec adequi tabadec. Abi tantiaquid ambi paucshun tantiamiaido nendac. <sup>15</sup> Nadomboen nata quequin dada uaid Moises menepampid isec onquec pamumēdacbimboecquid isadaidbo utsi-utsiec iquec. <sup>16</sup> Esuquidistu tantiaquid icsho Nuquin Papan Mayanēn paucquin tantiamiaid nendac. <sup>17</sup> Nuquin Icho icsaisa icquin ēnden nadomboen nata quequin dada uapampicpaden naquidquio nec. Adquid Esuquidistu nec, quequin tantiaquin chuibenec nebi. <sup>18</sup> Paucac, Ēbi icsaid bedshunash Esuquidistuded cuidadpanēdash, quequin nuqui tantiec. Aidēnquiobi icsaisa icquin abipadquid nuqui meniac aton Mayanēn adquid nuqui icmebanec.

## 4

*Nuquin Papan nadatiambocquin nadenequin Esuquidistu chuibenemiaid*

<sup>1</sup> Aden Nuquin Papan nuqui tantiaquin, Esuquidistu chuibanta, caidquio icquin chieshenquiocquin aidi chuibanec nuqui nec. <sup>2</sup> Icsash ompodquid icboedi nēbi muesa icquin Nuquin Papan chiaid utsi uainquio yec nuqui bēdamboec tabadec. Nuquin Papan isec, quec adequi nuqui tabadec. Adec tabadec ēbipadquid utsi yansho isash Nuquin Papan chiaid tantiate utsibo bunquiopec. <sup>3</sup> Esuquidistu chuibansho utsin-utsinquien bēdamboen tantiatiapimbo iquec. Adquid Nuquin Papabēd tabadtiapimbocquid nec. <sup>4</sup> Nuquin Papapadquid Esuquidistu tantiaquid icnushe queshun icsamianuequidēn Satanasēn pamunacbimboen utsi-utsien tantiamenquio iquec. <sup>5</sup> Ēmbibi naid chiesha nebi. Matsesēn Icho Esuquidistu nec, quequin chuiquid nebi. Aid mibi tantiamenuen chuiquin mibi nashunquid nebi. <sup>6</sup> Abitedi uanuna,



queshun, “Inchëshquio icboedi uëshëmbo yanquiota,” capampic Nuquin Papan. Adomboembidi Nuquin Papan chiaid pamumëdacobimboen tantienquiochoedi Nuquin Papan paucquin tantiamiac Esuquidistu Nuquin Papan padquid nec, quequin nuqui tantiec.

<sup>7</sup> Aden tantiec abipadquid yanabicshobi Nuquin Papan nadatiambocquin nabanquin Esuquidistu chuibenequid icmiondashi. <sup>8</sup> Aden chuiban-sho mëyanaqui abi chuibenec nebi. Padpiden-padpidemboen natiamiaqui, ¿Atotsimbi napeba? qesho Nuquin Papan dayacquio icmedenebi. <sup>9</sup> Èbi chieshënquid dadpen icnubi èbi bëdambo icmequid aidi iquec. Comapenen cuestanec, Unësec, qeshun nianaqui abi Esuquidistu chuibenembi. <sup>10</sup> Esuquidistu mëyanquin unës uacpaden mëyanquin unës uatsen-unës uatsen-shobi dayacquio icmedenioshi. Adoacsho uincuenaidën dayacquio icmedeniaid nec, quequin utsibon isbededebi. <sup>11</sup> Adembi Esuquidistu chuiban-sho unës uatsiashi, quequin chuibenec nebi. Aid chuiban-sho unës uatsenaqui abipadquid unësesa yanebi, quec bëdamboec tabadebi. <sup>12</sup> Aden tantiaquin aid chuibanac abi tantiaquid yanash aidbëdi tabadec unësesa mibitedi yanendac. <sup>13</sup> Ambi chiacpadomboen Nuquin Papan naindac, quequin tantiaquin chiombi, quequin Nuquin Papan dada uamiampicpaden tantiaquin Esuquidistu chuibanec nebi. <sup>14</sup> Aden tantiaquin Nuquin Papan Esuquidistu uincuemiacpaden aidbëdi tabadmenuen mibitedibëdtabi ëbëd icquidtedi uincuemendac, quequin chiombi. <sup>15</sup> Aid tantiaquid ma mibi icpanueshun chuiban-sho mëyanaid nebi. Mëyanaqui utsi dadpen Esuquidistu tantiaquido ma yanu qeshun chuibenec nebi. Aden chiac abi tantiaquid icsho isun, Mimbi naidtedi bëdambo iquec, Papa, quequin ma Nuquin Papa utsibon chuipanuna.

<sup>16</sup> Aden tantiec dayactiapibi quenquo iquebi. Tsusio budquimbi badiadquidën-badiadquidënquien Esuquidistu tantiadonequidquo yanebi. <sup>17</sup> Natiamiantequid ënëdendac. Natiamiaid yashic Nuquin Papa yacno tabadec bëdamboshë iquendabi. Esuquidistupadquid icsaisa yec unësesa yanash ënëdtiapimbo iquendabi. <sup>18</sup> Aden tantiec, Èbi natiamiaid iquec, quiashic, Nuquin Papabëd tabadendabi, quequin comapenen tantiec tsadebi. Èmbi isaidtedi ënëdendac. Nuquin Papa yacnocquid ëmbi isacmaidtedibëd ënëdtemaid iquendabi.

## 5

### *Nuquin Papabëd tabadte iquendac quiaid*

<sup>1</sup> Con nami shënibudash unësash nibëdnuc Nuquin Papabëd tabadec nami chuca uaid iquendabi. Nami chuca uaid ënëdtemaid matsesën nacnenacmaid nec, quequin tantiembi. <sup>2</sup> U abucquo nidabi yec uëshquequid nebi. Adquiocsho nami chuca uaid ënden meniondac, Cuishon, quetsiabi. <sup>3</sup> Aden meniac ëbibimboec isadsho isendac, quec tsadebi. <sup>4</sup> Nami chodquequid icnuc uëshquec nuqui tabadec. Nami chuca uaid chodquesa menepashuni mabi unësesa icpanu quec nuqui tabadec. <sup>5</sup> Con Mado Esuquidistu tantiaquid ëbëd abuc tabadmenuen ëbipadquid unësesa icmenu, quequin Nuquin Papan aton Mayan menetequid nuqui nec.

<sup>6</sup> Aton Mayan meniaid iquec nami chodquetequid abi iquequi chieshenquo yec dayacquio yec nuqui tabadec. Adec tabadash abuc Nuquin Icbobëd tabadendabi, quequin nuqui tantiec. <sup>7</sup> Aton Mayan meniac nuqui isacmaid Esuquidistu cainec nuqui tabadec. Èmbi isaid ëmbi caintemaid nec. <sup>8</sup> Aden aid cainsho nami chodquesa badedquo menepashuni. Aden meniac Nuquin Icbobëd iquendabi, quequin nuqui tantiec. <sup>9</sup> Aden tantiec

nidaidën tabadequi Nuquin Papa bunacpadquiec tabadnuna. Abuc nidash tabadec abi bunacpadquiec tabadoaindabi, quequin tantiembi. <sup>10</sup> Adembidi abi tantiaquidtedishun naid ambi chuibante ushë chonoc Nuquin Icbon chuibanendac, quequin tantiembi. Utsi-utsien, Mimbi bëdamboen nabanoc, quequin chuibanendac abitedishun naid cuidquin.

*Ma utsibotsen abi tantiaquid icpanu quequin chuibanaid*

<sup>11</sup> Aden ambi tantiacpaden nabansho, Bëdamboen mimbi nabanoc, Nuquin Icbon ëbi caindac, quequin tantiaquin ma utsibotsen Esuquidistu tantiapanueshun mibi chuibenec nebi. Aid tantiaquin nabanec bëdamboec tabadsho Nuquin Papan tantiec. Ai, adec Pabado tabadsho ispombi, quequin adembidi mimbi chuipashun, quec tsadebi. <sup>12</sup> Aden tantiaquin, Mibi bëdambo iquec, ëbi camenuen mibi dada uashunenuio iquemi. Ëbi chienquiocquin, Bëdamboec tabadquin ismiacimboecquidën ëbi icsamboen chuisho aido chuita, quequin mibi dada uashunembi. <sup>13</sup> Aido, Pabaton tantiate icsabudosh quec. Adembidi, Nuquin Papan chiacpadomboen ëmbi nabansho isun muaquin aidon chuibanec. Adec muatsiash quenquiocquin ma Esuquidistu tantianu qeshun aid chuibenec nebi utsibon chuibenenuiocnobi. <sup>14</sup> Chian anëdënquequid icsambocquid nësianushe quiash matses icsaid bedshunash abided cuidadec icsaisa Esuquidistu unëspanëdash, quequin ma utsibon tantiapanueshun chuibenec nebi. <sup>15</sup> Ma ëmbi naid chiac ëbi tantiaquido ma ëbëdi icpanu, quiash unësash uincuempanëdash Esuquidistu.

<sup>16</sup> Adec unësash Esuquidistu uincuempanëdash, quequin matses unësash uincuenta iquec, quequin abi tantiaquidon tantiec. Ënden, matsesquio Esus nec, quiondaidi nëbi, Nuquin Papan Chomiaid yec matses tantiec unësash uincuempanëdash, quequin tantiembi. <sup>17</sup> Abi tantiaquid ambi tantiamiaid nec. Ënden matsesën tantiacpadquiec icboedi Esuquidistun tantiacpadquiec bëdamboec tabadec abi tantiaquidquio. <sup>18-19</sup> Nuquin Papan ëndenquimboshë tantiampicpaden Esuquidistun naid nec. Nuquin Papan chiaid niacquid nuqui icboedëmbi matses icsaid bedshunash abided cuidadec Esuquidistu unëspanëdash, quequin tantiaquin ma aidquio utsibon tantiapanu qeshun ambi naid nuqui chuibenec. <sup>20</sup> Nuquin Papan Esuquidistu chuibeneta cac nebi. Adquid icquin chiac abi tantiaquid yanash, Ëbi icsaid bedshunash Esuquidistuded cuidadpanëdash, quequin abëd icnuequin aid tantiaquiota. <sup>21</sup> Ambi cuidtiadquid nuqui icnubi Esuquidistu icsaisaded Nuquin Papan cuidpanëdash ma Esuquidistu ambi cuidaidpadquid tantiaquidtedi icsaisa yampanueshun.

## 6

<sup>1</sup> Matses bëdambo icmenu, quequin Nuquin Papan chiaid bëpiscudmane qeshun ambi tantiamiacpaden nabanec tabadta. <sup>2</sup> Nuquin Papan chiampid chuinu. Tantia.

“Mibi bëdambo icmete ushë chonoc cuënsho tantiombi. Tantesa icboedi nëid ushënquio mibi tantiamiombi.”

Aden Nuquin Papan chiampicpadomboen bëdamboen tantia. Nëbi Nuquin Papan bëdambo mibi icmenu cac, Ai, cata. Nëid ushënquio ambi aton bacuë icmete ushë nendac.

*Pabado natiamiaid*

<sup>3</sup> Icsamboec tabadquimbi Pabaton Esuquidistu chuibansho, Tantiatiapibi, utsibo quetiapimboen bëdamboec tabadec nebi. <sup>4</sup> Nuquin Papan chuimaid yec nadec tabadebi: Chieshenquio yec dayacquiocquin ambi chiaid chuibenec bëdamboec tabadec nebi. Natiamiaid yec adequi tabadebi. <sup>5</sup> Utsin

cuesaqui adequi bēdamboec tabadebi. Quēnēn nauedaqui adequi bēdamboec tabadebi. Nuquin Papan chiaid ěmbi chuibanac cuesnanubi padenquio yec bēdamboec tabadebi. Natia chonoadbudequi adequi bēdamboec tabadebi. Utsi tantiaquin nabanec natia ushcasequi adequi bēdamboec tabadebi. Bunqueic bēdamboec tabadebi. <sup>6</sup> Icsainquio yec bēdamboec tabadebi. Nuquin Papan chiaid tantesa uainquio yec bēdamboec tabadebi. Tantiatiapimbo yec utsibo tabadsho isun adembidi Nuquin Papan chiaid chuibenec nebi. Naden chiac tantiatsiash, queshun chuibenembi. Adembidi, Nashunquin chiac tantiatsiash, quequin adquid nashunembi. Nuquin Papan Mayanēn tantiamiaid yec bēdamboec tabadebi. Muainquiocquin utsi abimbo tantiec adecbidi tabadebi. <sup>7</sup> Abimbo chuibanec tabadebi. Nuquin Papan nadatiambocquin nac adequi bēdamboec tabadebi. Nuquin Papan chiacpadomboen nabanec nebi ma utsibon abi icsaid ěmpanueshun. <sup>8</sup> ěbi chiec: Pabado bēdambo iquec, quenubi adequi tabadebi. Utsin ěbi chuioaic: Pabado icsambo iquec, quenubi adequi bēdamboec tabadebi. ěbi icsamboen chuinubi adequi bēdamboec tabadebi. ěbi bēdamboen chuinubi adequi bēdamboec tabadebi. Muaquid nec, quenubi abimbo chuiquid nebi. <sup>9</sup> ěbi isquiděmbi, ěmbi isacmaid Pabado nec, caqui ěmbi chuibanesho tantiaboedo nec caimbi. ěbi unēs uate bunubi abi chuibanec capucuenembi. Mĕyanaqui unĕsabi yec nidebi. <sup>10</sup> Unĕsquio icmiaqui Esuquidistu tantiec bēdambo iquebi. Con na nibēdsho isun adembidi Esuquidistu chuibanec nebi ma Esuquidistu tantiec utsibo bēdambo icpanueshun. Con na nibēdsho isash Nuquin Papan bacuĕ yec aton natedi con na nec, quequin tantiec tsadebi.

<sup>11</sup> Chuitiapibi, quenquiocquin ěbi natiaboedtedi mibi chuibanombi. Mibi comapenen tantiaquin ěmbi nabanaid mibi chuibanombi. <sup>12</sup> Mibi tantiaquioquin chuibanquid ěbi icnubi ěbi tantiaquin chienquio mimbi iquec. <sup>13</sup> Pabaton con bacuĕbo caido nebi, quequin mimbi naid mimbi tantiaidbēdta ompoenquiocquin ěbi chuiban, caimbi mibi.

*Esuquidistu tantiesabēdtambi icsain nainda quiaid*

<sup>14</sup> Esuquidistu tantiesabēdtan icsamboen nainda. Adembidi, chido Esuquidistu tantiesa bedesa dadan. Adecbidi, Dada Esuquidistu tantiesa con champi imenu, qesa aton papa. ¿Nuquin Papan bēdambo icmiaidĕnda ambi chiaid niacquidbēdtan nabampadic? ¿Nuquin Papan Mayanēn tantiamiaidĕnda Icho chieshēnquidbēdtambi chieshĕmpadic? <sup>15</sup> ¿Esuquidistu Satanaspadquidta nedic? Padenquio. ¿Esuquidistu tantiaquid abi tantiesapadquidta nedic? Padenquio. <sup>16</sup> ¿Nuquin Papan ambi uaidbimboecnuc matsesēn nacenaid tantiaquidta aton Mayan Nuquin Papan meniaid icpadic? Padenquio. Abi tantiaquid aton Mayan menec. Nuquin Papan dada uamiampid dada uanu. Ista.

“Ēbēd icquidbēd iquendabi;

Aidbēdi capuebi;

Aton papa nebi;

Con matses adquido nec,

<sup>17</sup> Con matses icquin ěbi tantiesan ěmbi chiaid niacacpadomboen nainda.

Adecbidi aid icsacpadec tabadenda.

Adecbidi icsainquio yec tabad.

Adquid ěbēd iquec cho caindambi.

<sup>18</sup> Adquidon papa iquendabi;

Adquid ěmbi con madobēd con champi caid iquendac, quec Nuquin Papa.”

Abi tantiaquido nadatiambocquidĕn aden chiec.

## 7

<sup>1</sup> Naden nanuna, quequin Nuquin Papan chiac nuqui naid icsatedibëdtabi nuqui tantiaid icsatedi ënu, quequin Nuquin Papan chiacpadomboen nabanec tabadtenenuna.

*Unësquio icboedi mimbi naid tantiash bédamboshë iquebi quiaid*

<sup>2</sup> Adembidi, ëbëdtabi ëbipadquid tantiaquiota. Icsamboen nashunesa nebi. Adecbidi icsamianesa nebi. Adecbidi muaquin utsin na bedesa nebi. <sup>3</sup> Pabado tantienquio yec icsaobi mibi camenuen nëid chuiquin dada uainquio iccombi. Mibitedi tantiec tsadebi, quequin padpiden chiembi. Abimbo caimbi. Unësequi mibi bëshuntiapimbo iquendabi. <sup>4</sup> Mimbi chiacpadpenquiochoedëmbi naosh, quequin choquidën chioshi. Aden chuisho tantiashun, Nuquin Papan chiacpaden nabanquidquio nec, quequin mibi chiec nebi. Unësquio icboedi mimbi naid tantiash bédamboshë iquebi. Utsin natiamiaid icshobi bédambo iquebi, mimbi ëbi camioc.

<sup>5</sup> Nidaid Masedonia caid yacno choash quenentiapimbo iccobi. Esuquidistu tantiesan nac natiapobi. Esuquidistu tantiaquid icboedëmbi tantesa uatsiash, quec quenenuenquio iccobi. <sup>6</sup> Unësquio icsho ëbi tantiaquin Nuquin Papan Tito padpiden chomiosh ëbi bédambo icmeoanuen. <sup>7</sup> Choashun mimbi aid tantiaquin nabanaid Titon chioshi. Adembidi, ëbi iste mibi bunaid chioshi. Mimbi dada uaid isash unësquio icquin, Codinto yacnocquidon mimbi chiacpaden nabanosh, quequin Titon chioshi. Aden chiac bédamboshë yanobi ad yenquio icboedi.

<sup>8</sup> Mimbi dada uaid isash Codinto yacnocquido unësquio iccosh, qesho tantiash, Icsambo icchitobi, quenquio iquebi. Aden dada uaic icsambo iccobi, quetiapimbo yequi mibi unësquio yacpadequi unësquio iccobi. Yuec mibi ad yenquio iccoc. <sup>9</sup> Adecbidi nëbi bédambo iquebi. Èmbi mibi unësquio icmiac mibi icsaid ënquin Nuquin Papan chiacpaden nabanec, quec utsibo. Aden chuisho tantiaquin mibi unësquio icmequin mibi icsabudmiambo iccombi. Unësquio icmiaqui mibi bédambo yanoc. <sup>10</sup> Unësquio icmiac, Nuquin Papan chiaid niacombi, quiash unësquio icquin mibi icsaid mimbi ënac. Adsho isun Nuquin Papan ënëdtiapimbo noc aïdbëd mibi icmendac. Aden unësquio icmiaqui, Bédambo iquebi, mibi quendac. Adecbidi mibi icsacpadec icsainquio mibi icpendac. Padnuen Nuquin Papan chiacpaden niacquin ënesa abi natiamiaïduidi tantiec Nuquin Papa yacno puduedtiapimbo iquendac. <sup>11</sup> Padnuen mibi unësquio icmiac nëbi ambi chiaid comapenen tantiate bunec mibi. Aid padpiden tantiaquin, ¿atotsi quiashini icsao? quequin mimbi chuipoc. Nuquin Papan cuidnushe quequin mibi icsaid mimbi ënoc. Adembidi, Èbi padpiden bédamboen is, quequin Nuquin Papa mimbi chioc. Icsashun chienquiochoedëmbi nëbi cuembo bédamboen chuinu, quequin mimbi chuibanoc. Aden mibi icsaid ënacsho isun mibitedi icsaquin ëntiapimbo icquidën nacpaden naisa nec, quequin tantiembi. <sup>12</sup> Icsaquid ambi icsa uanaïdbëdtabi chuïnuen mibitedi dada uainquio iccombi. Abentsëc icsash abitedi unësquio iquec. Adquiecbidi ëbi unësquio icmete bunesa mibitedi nec, quequin Nuquin Papan tantiamiac adomboembidi mibitedishun tantiapec, quequin <sup>13</sup> ëmbi tantiacpaden naquin mimbi bédambo iquebi camiaid nebi.

Adembidi Tito yuedquin mimbi bédambo iquebi camiaïdbidi niosh. Èbi yuedenquioctsiash queboedi niosh. Yuedoshi, Tito qesho tantiash bédamboshë iquebi. <sup>14</sup> Mibi nidmembi, Tito, qeshun, Èbi yuedquin nashu-nacpadomboen Codinto yacnocquidon mibi yuedtsiash quequin chiombi. Aden chiac mibi yacno Tito choacsho ëmbi chuïbocpadomboen mimbi

nashunac. Aden tantiash, Abimbo chiombi, quepobi. Ĕmbi mibi muainquiocquin chuibanacpadec adquiobidi mibi nabanec tabadaid abimbo iccosh. Adomboembidi Titon mibi isbanosh. <sup>15</sup> Ĕbitedi chushcatsiash, quequin mibitedishun Tito yuedpanēdac. Aden yuedac, Naden nata, quiosh Pabado, cac cacuidanenquiocquin mimbi nabanoc, quec Tito. <sup>16</sup> Adoaidi ambia tantiaquid icquin Ĕmbi chiac mibitedishun nabanendac, quequin tantiembi. Aden tantiec bēdambo yec tsadebi.

## 8

### *Aton na nibēdquid icsho aton na dadpen icquid menequid*

<sup>1</sup> Nuquin Papan tantiamiac nidaid Masedonia caid yacnocquidon, Esuquidistu tantiec iccuededquidon, nēbi bēdamboen nabanec tabadaid chuinu. Tantia. <sup>2</sup> Natiamiaqui bēdambo iquebi quec aido tabadec. Adec tabadquin Esuquidistu tantiaquid utsibo tantiaquin menenuquin aton na daēdpactsēc musucshun dayun uaosh. <sup>3</sup> Ĕmbi, Meneta, cainquiocnobi aton na bedtequid naimbudtsēcquien menenuquin bedbanosh. <sup>4</sup> Esuquidistu tantiaquid utsibo, nidaid Udeya caid yacnocquido, aton na nibēdec natiaic, quequin chiac Masedonia caid yacnocquidon, Aido menenuna, quequin comapenen chuiposhi. <sup>5</sup> Mitsana daēdpactsēc icnuc utsibo mimbi menetiapimbo icpec, quequin chuinu quenubi Nuquin Icbon tantiamiac, Codinto yacnocquidon chiacpadomboen bedbanshun menenuna, quequin aidon chioshi. <sup>6</sup> Adomboen menenun bedbamposh. Adosho isun Tito nadombi. Mimbi Ĕnden nidaid Udeya caid yacnocquidon natiad chuibanac Nuquin Papan tantiamiacpadomboen menenueshun Codinto yacnocquidon tauain bedbanshun dayun uapondash. ¿Ambi chiactedta bedbanoshe? Isnu, qeshun istanta, quequin Tito chiombi. <sup>7</sup> Naden naquid Codinto yacnocquido nec, quequin mibi tantiembi. Nuquin Papan Mayanēn tantiamiaidquio yec comapenen Esuquidistu tantiaquido nec. Esuquidistu tantiaquin aid chuibanec. Nuquin Papan chiaid ambia tantiaquidquio Pabado nec, quequin tantiaquin, Naden nata, quequin Ĕmbi chiacpadomboen badedquio comapenen naquidquio mibi nec. Adembidi Ĕbi tantiaquin naquido nec. Adquid mibi nec, quequin, Natiamiaido menenuen bedbanquin dayun uaimbi, mibi quiacpadomboen nabanquiota, quequin mimbi iste dada uaimbi.

<sup>8</sup> Meneta, quenquio iquebi. Natiamiaido tantiaquin menenu, abi quiacpadenda Codinto yacnocquidon menebampashe. Isnu, quianec, Codinto yacno nidta, quequin Tito chiombi. <sup>9</sup> Nuquin Icho Esuquidistu abuc tabadec abitedishun Icho icboedi nuquitsen abuc abēdi tabadmenuec matsesash nidaidēn tabadnuc aton na nibēdpadenec. Aidēn matses tantiaquin nabanacpaden utsibo tantiaquin nabanta.

<sup>10</sup> Ĕmbi tantiacpaden mibi adembi chuinu. Tantia. Mibi bunacpadomboen, Menenun bedbanshun dayun uanuna, qeshun seta utsin mitsana bedbanshun dayun uaquin mimbi tauapondac. <sup>11</sup> ¿Aden nanuna, qeshun mimbi chiacted Ĕnquinda bedshun dayun uao? Padenquiocquin adota. <sup>12</sup> Mitsana daēdpactsēc icnuc daēdpactsēc musucshun menesho isash, Dadpen meneta, quenquio Nuquin Papa iquec.

<sup>13</sup> Aton na nibēdquid icsho, Natiacquin meneta, quenquio iquebi. Aton na nibēdquid icsho aton na dadpen icquidēn menec. <sup>14</sup> Mitsana dadpen icquid mimbi musucshun meniac aton na nibēdquid bēdambo iquebi, quepec. Aden meniac mibēdi aton na nibēdquid bēdambo iquendac. <sup>15</sup> Nuquin Papan dada uamiampid nad iquec. Chuinu. Tantia. Petequidēmpi Nuquin Papan mana caid meniaid chuiquin: “Shubun tabadquid dadpenshun aited-aitedquien

bedbanshun peshun napi uaid nibëdosh. Adecbidi, aton shubun daëdpactsëc tabadquidon aited bedbanshun peshun napi uaid nibëdosh.” Adec Nuquin Papan meniaidtedi bëdambo yampicpadec aton na dadpen icquidbëdi ambi meniaido bëdambo yampec.

### *Tito Codinto yacno nidte*

<sup>16</sup> Nëbi Tito mibi chuinu. Tantia. Èbi mibi tantiamiacpadomboen Nuquin Papan Titotsen mibi tantiamiac. Aden Titon mibi tantiasho isec, Mibi bëdambo iquec, Papa, quec tsadebi. <sup>17</sup> ¿Codinto yacno tsutsi nidpatsiash? quequin ëmbi chiac, Èbibi nidebi, quiosh Tito. <sup>18</sup> Tito mibi yacno nidnuesho tantiashun nuqui con utsi caid utsi Titobëdi nidta caombi. Aidi Esuquidistu chuibanquid nec, quequin utsibon chiec. Bëdambocquid nec. <sup>19</sup> Nidaid Masedonia caid yacnocquidon, Esuquidistu tantiec iccuededquidon ëmbi dayun uaid Pabadobëdtan buanec nid caidbidi Titobëd nidquid nec. <sup>20</sup> Aid daëd ëbëdi nidsho isash, Nuqui na buanquin ampetsiash, quetiapimbo utsibo iquec. <sup>21</sup> Nuquin Papan tantiamiacpaden aidobëdtambi bëdamboen Masedonia yacnocquidon dayun uaid buanshunquin mitsana bedbidanec Udeya yacno nidebi. Ampenquiocquin buanec ma quenueshun aidobëdtambi buanshunembi.

<sup>22</sup> Tsyuec nidebi, quequin utsibobëdta Tido mibi yacno nidmembi. Èmbi nata cac bëdamboen nabanquid aitedi nec. Mimbi chiacpadomboen nashunquido Codinto yacnocquido nec, quec aido mibi yacno nidec. <sup>23</sup> Mibi nashunquin ëbëdtambi Esuquidistu chuibanquid Tito nec. Aidbëdi Esuquidistu tantiaquid utsi nidec. Esuquidistu tantiec iccuededquidon nëuëshquio puduanec Codinto yacno nidta caboedi Titobëd nidec. <sup>24</sup> Naden mibi chuiquin aido chiombi: Abi yacno choacsho isun Codinto yacnocquidon mibi nashunendac. Èmbi chiacpadomboen nashumbanta ma mimbi nashumbanacsho aido nidmequidon Masedonia yacnocquidon tantiapanuna.

## 9

<sup>1</sup> Ènden Esuquidistu tantiaquid utsibo tantiaquin nashunta quequin ëmbi chiac, <sup>2</sup> Adonona, qeshun mitsana bedbanquin mimbi tauaondac. Adsho isun nidaid Masedonia yacnoësh Esuquidistu tantiec iccuededquido mimbi menuequin chuibocpadomboen chiombi. Abentsëcshun-abentsëcshunquien menebanquin dayun uanuna, quequin seta utsin mimbi chuibocpadomboen ëmbi chiac Masedonia yacnocquidotsen, Adomboembidi nabanembi, queaposh. <sup>3</sup> Aden aidon chuisho tantiashun nuqui con utsi caido mibi yacno nidmembi mimbi chiondacaden bedbanambo icnushe qeshun. <sup>4</sup> Nidaid Masedonia caid yacnoësh Esuquidistu tantiec iccuededquido ëbëdien tsyuec mibi yacno nidchitec. Aidobëdi mibi yacno choshon ëmbi chiacpaden mimbi bedbanambocsho isash, Abimbo chiacbimboen chuichitombi, quec natiaic bëpiutsiabi. Adquiecbidi mibi icoaic. <sup>5</sup> Adquio icnushe qeshun utsi-boba mibi yacno nidmembi. Aido mibi yacno choacsho mimbi chiondacted bedbanquin dayun uaid mimbi ismetsiac, Abimbo chiombi, quequin. Aido chonoc mimbi chiaacted bedbanquin dayun uambocboedëmbi nëbi mimbi bedbampec. Aden mimbibi bedbanquin mibi menete bunacteduidtsëqui mimbi menec. Utsimbic, Menetiapibi, queboedëmbi utsin, Bec cho, cac aton piucquid tantiec unëshquio icquin menetsiash. Aden tantiaquin menenda.

### *Nuquin Papan na dadpen bedmiaidën aton na nibëdquid menequid*

<sup>6</sup> Nuquin Papan chiaid chuinu. Adembi tantiata. Tied icbon daëdpactsëc nitsinac caniaish ëshëacsho aitedtsëcbidi bedpec; dadpen ambi nitsinac

caniash ëshëacsho dadpen bedpec. <sup>7</sup> Adquiobidi aton na icquid iqueque. Tantia. Chuinu. Nëidted menenuequin ambi chiated menequid. Ëmbi meniaid tantiash bëdambo iquebi, quepec adquid. Utsimbic, Menetiapibi, queboedëmbi utsin, Nëidted bec cho, cac menepec. Aden utsin chiated meniash, Bëdambo iquebi, quetiapimbocquin menec. <sup>8</sup> Mitsana menete bunquin mimbi chiated menesho isun Nuquin Papan uesadmenquiocquin mimbi bedmec ma utsi-utsien menebampanueshun. <sup>9</sup> Nuquin Papan dada uamiampid adomboembidi chiaid nad iquec:

“Nuquin Papan dadpen bedmiosi, quequin tantiaquin aton na nibëdquid utsi-utsien menebanec.

Aden menequid tantiaquin ënenquiocquin ambi naboed Nuquin Papan chuibanendac.”

<sup>10</sup> Ambi meniaido menequidën bëdambo icmec, quequin ambi chiacpadomboen Nuquin Papan matsesën na daëd uaindac. Adecbidi ambi uaid tiedën caniquid ëshë abentsëc siaid dadpen yanec. Matsesën petequid adquiecbidi dadpen yanoaic. Adecbidi utsi menequid mibi icsho isun Nuquin Papan mibi bedmedenec ma mimbi meniaido dadpen icpanueshun. Aden mimbi dadpen menebanac aidontsen ambi bedaïd musucshun utsi meneoapec.

<sup>11</sup> Aden mimbi meniac utsibotsen, Bëdambo iquebi, quec tabadec. Adec tabadquin mimbi meniaid tantiaquin, Nuquin Papa bëdambo iquec, quequin mimbi meniaidon chiendac.

<sup>12</sup> Nuquin Papa tantiaquid icquin aton na nibëdquid Esuquidistu tantiaquid dadpen icsho menebanquin mimbi bëdambo icmiaid dadpen iquendac. Adembidi, Nuquin Papa bëdamboshë iquec, quequin aidon chuibanendac.

<sup>13</sup> Meniacsho isash, Esuquidistu tantiaquid nebi, quequin abimbo chuiquidquo aid nec, quequin mimbi meniaidbëdtambi utsibon mibi chuibanendac. <sup>14</sup> Adquidquo nec, quequin utsibon mibi chiec. Mimbi tantiamiacpadomboen nabanquidquo Codinto yacnocquido nec. Aido bëdambo icme, Papa, quequin mimbi meniaidon adomboembidi chiendac. <sup>15</sup> Aden aidon chuinubi naden nuqui Nuquin Papa chiec. Mimbi chomiaid Esuquidistu ëbi bëdambo icmenuec ëbi icsaid bedshunash abided cuidadec unësash uincuempänëdash. Aidpadquid utsi nibëdec, Papa, quequin nuqui chiec.

## 10

### *Ëmbi dada uacpaden mibi yacno choshon adomboembidi nabanembi quiaid*

<sup>1</sup> Comapenec chushquenquiocquin matses bëdamboen tabadmenuequin chuibanquid Esuquidistu icpanëdash. Mibi yacno choshon Esuquidistupadquid icnuequin ëbi chieshëncquid bëdamboen tabadmenuequin chuibanendambi. Ëbi chieshëncquido nadec onquequin ëbi naden chiec, quec. Nuquibëd tabadquin dacuëdabimboecquin comapenen Pabadon chushcainquo iquec. Utsi yacno nidshun dada uaqun comapenen chushcaic, quiosh. Mibi chiec adosh. <sup>2</sup> Adsho tantiash mibi yacno choash tabadquin chushcante bunenquo icquimbi, Ambibi tantiacpaden nabanquid Pabado nec, quequido bëdamboen chuibanembi. <sup>3</sup> Esuquidistu tantiaquid yanshun icsaquidën tantiacpaden nabanesa nebi. <sup>4</sup> Mibi yacno choshon matsesën tantiacpadpenquiocquin Nuquin Papan tantiamiacpaden ëbi chieshëncquido Satanasën icsamboen tantiamiaido Nuquin Papan chiaid chuibanendambi.

<sup>5</sup> Satanasën tantiamiaidon Nuquin Papan chiacpadomboen niaquec. Utsibon Edoen Nuquin Papa caid nibëdec, queshun ëmbibi tantiacpaden naic bëdambo iquec, quequin tantiamiaido nec. Aden tantiaquid icsho isun ambi icsamboen tantiec pamumëdabimboe yaid ëmenu quequin Nuquin Papan

chiaid ëmbi chuibanubi abi pamumëdadbimboe yaid padpidec pausudtiapim-bocnoc paucbanshun ambi tantiacpaden Nuquin Papan pausunendac ma ambi chiacpadomboen namenuequin. <sup>6</sup> Aden chuibanashun Nuquin Papan chiacpadomboen utsin-utsinquien abi icsaid ënabicsho isun comapenen cuidendambi.

<sup>7</sup> Ambi isaiduidi tantiec utsi-utsiec onquec. Aido onquiaid chuinu. Tantia. Esuquidistu tantiaquid nebi, quequi, Pabado icsactsëcquio isadtsec, quepec aido. Aden chuiquido, Esuquidistu tantiaquid nebi, ëbi qesho tantiash, Muec nec, quetiapimbo iquec. <sup>8</sup> Abi tantiaquid ëbi yansho, Esuquidistun, Ëbi chuibeneta, cashumbic abi tantiaquido abi tantiadonequid icmenuequin chuibanquidbidi icmiondashi. Adquid icmiac ambi chiaid ëbi chieshënquido tantiamenuen chuibanubi aidon tantiaid icsa paucshun ambi tantiacpaden Nuquin Papan pausunendac. Adoacsho isash, Abi chuibanquid Esuquidistun icmioshi, quequin tantiec, Adesa nebi, quetiapimbo iquebi. Aden tantiaquin ëmbi chiacpaden naimbi mibi yacno choshon caimbi. <sup>9</sup> Adquid nebi, quequin, Dacuëdampambocquid Pabado nec camenuen dada uainquio iquembi. <sup>10</sup> Mibi aden dacuëdmenu, quenquio icnubi ëmbi dada uaondaïd bedshun isun naden utsin ëbi chiosh quec. Chuiquidën comapenen chushquequin chiacpadomboen Pabado dada uaic. Nëmbo choshon ambi dada uaquin chiacpaden chuitiapimbo icpec. Chichompibictsecsho ëbi isun, Chuiquidida nepec, quetsëcquin istsëccombi. Tantiatiapimbo noc chuibanondash, quequin aidon ëbi chiec. <sup>11</sup> Aden ëbi chiec onquequidën bëdamboen tantiata. Chuinu. Ëmbi dada uacpaden mibi yacno choshon adomboembidi nabanembi caimbi.

<sup>12</sup> ¿Esuquidistun, Ëbi chuibeneta, caid nebi, quepecta ëbi chieshënquido iquec? ¿Adenda Esuquidistun, Ëbi chuibeneta, caidënquio utsi icsamboen chuipec? ¿Esuquidistun, Ëbi chuibeneta, caid nebi, quequin abimbo chuiquidquio yec muaquin chuiquidpadquid nebi, quepectabi ique? Padenquio iquebi. Esuquidistun, Ëbi chuibeneta, caid nebi, quec muaid chuiquin abipadquid utsibëdtambi icsamboen nabanash, Nuqui bëdamboen naoc, cananec. Ambia icsamboen nabanquidën chuibanquin ismiac ambibi tantiacpaden nabanec abipadquid yanquidon. <sup>13</sup> Ëbien Nuquin Papan tantiamiacpaden chuibanquid nec. Ambi tantiamiacpaden mibitedi chuibanquid nebi. <sup>14</sup> Codinto yacno nidshun anouidi tabadquin Esuquidistu chuiban, Nuquin Papan cac mibëd tabadquin chuibanondambi. <sup>15</sup> Adembidi, Utsi yacno nid, Nuquin Papan cac nidshun utsibon chuibanondash. Aden aidon chuibanac anocquidotsen Esuquidistu tantiaquid yanondash. Aido Esuquidistu tantiaquid yansho isash ëmbi chuibanaido nec, quenquio iquebi. Mibëdi tabadquin ëmbi chuibanac aid tantiaquid mibitedi yanondac. Adsho isash Esuquidistu tantiadonequidquio yampashun, quec mibi tantiec tsadebi. <sup>16</sup> Esuquidistu ëmbi chuiban-chuibanac aid tantiadonequieci mibitedi tabadsho isash Esuquidistu utsin chuibanacmanombo chuibanoaic nidendabi caombi. <sup>17</sup> Aden Esuquidistu chuibanac, Ëbibi bëdambo ictiapimbocquid mimbi bëdambo icmiaïd nebi, Papa, quequin ma Nuquin Papa Esuquidistu tantiaquidtedishun chuipanuna. <sup>18</sup> Bëdamboen nabanombi, abibi qesho Nuquin Papan bëdamboen istiapimbo iquec. Ambi, Bëdamboen mimbi naoc, caiduidi ambi bëdamboen isaidquio nec.

## 11

*Pabado muesa icnubi muaquido*



<sup>1</sup> Nēbi ěmbi dada uaid isash, tantiesa onquiacbimboen mamēmenuequin Pabadon chiec, quenquiocpashun caimbi mibi. Aden tantiatsiash, quequin abi dada uaimbi. Nēid bedash ěmbi abia dada uaondaaid isec mibi onquiacpadec nēbi nēid mimbi iste dada uaid isec onqueta. <sup>2</sup> Nuquin Papan tantiamiacpadec mibitedi cudasquidquo nebi. Adec cudasquin aton champi utsin, Bednu, cashunac utsin, Bednu, cac Bedadenda, quequin amēn aton champi chiachimboen, Esuquidistun bednu caid yec icsamenuequidēn, Bednu, cac, Bedadenda, caimbi. Esuquidistu ěmbi chuibanaido mibitedi bedec choeque. <sup>3</sup> ěmbi chuibanac Esuquidistu tantiauidquimbi nisi bēdambo isadacbimboecquidēn muaquin chiac Eban Nuquin Papan chiaid tantesa uampicpaden mimbi Esuquidistu tantesa uatsiac, quec tsadebi. <sup>4</sup> Adec ěbi tsadnubi Codinto yacno choshon utsin Esuquidistu ěmbi chuiboed utsi uain chuisho badedquo tantiec aidon. Adembidi, Mayan utsi iquec, quesheo tantiash, ěbi mene, quec mibi. Adembidi, Mibi bēdambo icmequid Esus utsi iqueque. Aid tantiata, quequin ěmbi chiaid utsi uain chuisho, Abimbo iquec, quequin tantiec mimbi. Aden utsibon ěmbi chuiboed utsi uain chuisho tantiec, quesheo tantiash Esuquidistu tantesa uatsiash, quec tsadebi. <sup>5</sup> Esuquidistun ěbi chuibeneta cac Nuquin Papan tantiamiacpaden chuibenec nebi. Aden chuibenenubi mibi, Bēdamboenshē utsibon chuibanacpaden Pabadon chuibanenquo iquec, quesheo tantiash, Icsamboen chiombi, quetiapimbo iquebi. <sup>6</sup> Utsibon bēdamboenshē chiacpadec Pabado onquenquo iquec, mibi quenuc Esuquidistun, ěbi chuibeneta, quequin ambia tantiaquidēn tantiamiacpadomboen mibitedi chuibanombi bēdamboen tantiaquin.

<sup>7</sup> ¿Codinto yacnocquido ma Esuquidistun bēdambo icmepanueshun chuibanecui, Bec cho, quenquo yectabi icsape? <sup>8</sup> Mibi Esuquidistu chuibanu quiash Esuquidistu tantiec iccuededquid utsibon na ampiachimboec tabadobi. Aidon aton na meniaqui aido nashunenquo yec mibi yacno nidash tabadquin mibi nashunquin Esuquidistu chuibanondambi. <sup>9</sup> Adec mibi yacno tabadquin Esuquidistu chuibanec bunec tsadec, Bec cho, quenquo iccondabi. Nidaid Masedonia caid yacnoēsh choquidēmbini meniondash. Aden ěnden, Bec cho, mibi cainquo iccondacpadec nēbi adquiecbidi tsadebi. <sup>10</sup> Esuquidistun chuimiaidquo nebi. Adquid icquin adquid nebi quequin chiembi mibēdi nidaid Acaya caid yacnocquid utsitedi, Padi. Aden chienda, quetiapimbocnoc. <sup>11</sup> ¿Atotsi quiashini, Bec cho, quenquo icpe? ¿Mibi tantienquiocquindambi mibi, Bec cho, cainquo icpe? Mibi tantiec tsadebi. Codinto yacnocquido Pabadon tantiaid nec, quequin Nuquin Papan tantiec. <sup>12</sup> Aden mibi tantiaquin, Bec cho, cainquiocquin Esuquidistu chuibenec nebi mimbi bēdamboenshē chuibanquid caid: Pabado nabanec tabadacpadec tabadebi, quetiapimbo icnubi.

<sup>13</sup> Aido Esuquidistun ěbi chuibeneta caid nebi quec muaic. Adec muaquin mibi yuaic. Aidon abi tabadaid icsa ompoec. <sup>14</sup> Aido tantiamequin ismequid Satanas nec. Nuquin Papan abi yacnoshon uaid mayan bēda aidbēdi tabadquido icsaisa yacpadquid nebi, quequin abipenquiocnoc chuiquin ismequin tantiamiac <sup>15</sup> adquiecbidi ambi namiaidtedi bēdamboecquidbimboec capucuededec. Cuidte ushē chonoc aido icsaid Nuquin Papan comapenen cuidquin chiendac.

### *Pabadon abi mēyanaid chuibanaid*

<sup>16</sup> Adembidi chuinu. Tantia. ¿Mamēmenuequin tantiesa onquiacbimboendambi ěbi icaid chuibandio? ¿Utsin aden chuibansho tantianu, quepecta mibi

ictsia? Aden chuibanenquiocquin ëbi icaid chuibanuna, <sup>17</sup> Chuita, Nuquin Icbon cainquiocnobi. <sup>18</sup> Abi icaid utsin-utsinquien chuibanec, quequin tantiaquin adomboembidi ëbi icaid chuibanuna. <sup>19</sup> Bëdamboen tantiaquidquo nebi, qeshun mamëmenuequin ambembi chiacbimboen chuisho tantiec mimbi. <sup>20</sup> Ambembi chiacbimboec, Yuanu, qesho tantiash icsamboen tantiaquidbimboec mibi yuadte bumpec. Ambembi chiacbimboec, Bec cho, qesho icsamboen tantiaquidëmbimboen menebanec mimbi. Muaquin chuiquin mitsana bedshunaqui cacuidenquo yec tabadec mibi. Aden mitsana ambembi isash, Mibi chuiquid nebi, qesho tantiash, ¿Tsuntsin mibi adquid icmiosh? quenquiocquin aidën chiapaden nabanec mimbi. Aton yuabimboecnuc mibi mëyanaqui, Min yuapenquo nebi, quenquo iquec mibi. <sup>21</sup> Nuquin Papan yua icta cac, Padi, quetsiash, quequin aden mibi chuitiadquidëmbi chienquo iccondambi.

Mibi yuanuequidon ambembi abi icaid chuibanac. Adomboembidi Pabadon abi icaid chiec, Codinto yacnocquido quetsiash, quequin tantiaquin ëbi icaid chuibanu. Tantia. <sup>22</sup> ¿Mimbi bëdamboen chuiquid nec caid, Isadaidbo nebi, quepecta iquec? Adembidi, Ëbi isadaidbo nebi, caimbi. ¿Abadauanën tsyuecquid nebi, quepecta aido iquec? Adembidi, Ëbi Abadauanën tsyuecquid nebi, caimbi. <sup>23</sup> ¿Esuquidistu chuibanquid nebi, quepecta aido iquec? Ëbibi Esuquidistun ëbi chuibeneta caidquo nebi. Esuquidistu chuibanquid ëbi yacpadquid utsi nibëdec. ¿Mibi mamëshumenuequindambi aden chuipadi? Padenquo. ¿Ëbi yacpadquid utsida iqueque? Tantiata. Chuibanu. Utsi bëdiactsëc chonoadnuc comapenec chonoadobi. Adecbidi quënën nauedaid utsi icnubi quënën nauedteniaid nebi. Adecbidi utsi bëdiactsëc cuesaid icnuc yuen cuesto-cuestoaid nebi. Mëyanac unëstsenobi, utsi quenubi aden mëyanac unëstsen-unëstsemboedi nebi. <sup>24</sup> Isadaidbon cueshcanten 39ted tambanquin cacuestoniondashi. Yuecshun aidtedembidi. Yuecshun aidtedembidi. Yuecshun aidtedembidi. Yuecshun aidtedembidi yuenquo cacuestonioshi. <sup>25</sup> Adembidi cuënoten se-sioshi. Adecbidi cano dapa ëbi antsadnubi bincudec cano dapa mentoadosh. Yuecash adecbidi. Yuecash adecbidi. Adecbidi cano dapa abentsëc bidiadec mentoadan abentsëc ushec cano cuëshë bedash mentoadmane quiash noadpondabi. <sup>26</sup> Adecbidi quenenenquo yec capucuenequin Esuquidistu chuibeniombi. Adec utsi-utsiec yacno nidnubi acte mauanaid icposh. Adecbidi ampequid icposh. Adecbidi con matses isadaidbobi ëbi mëyante bumposh. Adecbidi isadaidpembo adquidbidi icposh. Matses dadpen yacno adquidbidi icposh. Unës uachitoshe, quenquo yec matses nibëdacno capucueniobi. Adecbidi acte dapan capucueniobi. Esuquidistu tantiaquid nebi, quequin abimbo chiacbimboen chuiquidën unës uachitoshe, quenquo yec capucueniobi. <sup>27</sup> Con na bednuec chonoadec uëshquiobi. Padpiden-padpidemboen ushenquo icquin chuibanombi. Piasec acte bunquin adembidi Esuquidistu chuibanombi. Iquenquimbi chuibanombi. Dashcute icsactsëcquid dasiuidquimbi chuibanombi. Yuedenquo yaqui adembidi chuibudombi. <sup>28</sup> Ëmbi chuiboed Esuquidistu tantiabenicquido icpec, quequin capucuenequin chuibeniombi. Utsi yacno nidshun, Ëmbi chuiboedo bëpiscudnushe qeshun mibitedi chuiquin dada uaombi. <sup>29</sup> Esuquidistu tantiaquid chieshec dayactiapimbo icpec. Adquidbidi iccobi, quequin tantiec tsadebi. Esuquidistu tantiaquid icsaosh, qesho tantiash unësquo yec, Nëbimbobi icsamianquid comapenen cuidta, Papa, quec tsadebi.

<sup>30</sup> Aided ëbi icaid icnuc chieshenquo yec ëbi dayacquio yaid chuibanombi.

Nëbi ëbi cuenondaïd chuïnu. Tantiã. <sup>31</sup> Abia Yampidën, Nuquin Icbo Esuquidistun Papan nabanaïd ënenquiocquin chuitequidquïo iquec. Aidën nabanaïd chuïbanec muesa Pabado nec, quequin ëbi cuenondaïd Nuquin Papan tantiec. <sup>32</sup> Ëbi cuenondaïd nad icpondashe. Chuïnu. Tantiãta. Damasco yacnocquido ancanquidën Adetas cuëmëdquidën Pabado Damasco yacnoësh puduensho bedta quequin shubu dadpen daquënë uaid dapa shëcuëtedi sondado ëtabëdmepondash. <sup>33</sup> Adec daquënë uaid shëcuë cuëmanquïo sondado tabadnubi bednushe queshun abuc daquënë uaid iste shëcuënshun tsitsan dapa antsadunshun daquënë uaid cachoc budmepondashi. Budmiac ancanquidën bedadtiapimbo yec cuempondabi.

## 12

### *Nuquin Papan Pabado ismiaïd*

<sup>1</sup> Ëbi icaid chuïbanquin ëmbi dada uaid isbanash, Esuquidistun ëbi chuïbeneta caidquïo Pabado nec, quequin Codinto yacnocquidon tantiãtsiash, quequin adobamboedtedi chuïbanquin dada uaombi. Ëbi icaid chuïbanquin ëmbi dada uaid isash, Abi natiamiaïd dadpen icpec, quetsiash, quenquiocquin dada uaombi. Adembidi Nuquin Papan ëbentsëqui ismiondaïd chuïnu. Tantiã. Nad iccondashe. <sup>2</sup> Ëndenquimbo seta 14ted matamequin Nuquin Papan bëdamboshë yacno indopondashi. Intacchobi abuc indopondashi, quetiãpimbo iquebi. Tantiënquïo iquëmbi. Adecbidi ëmbi tantiãteuidi indoac, quetiãpimbo icoaibi. Tsaudi, tantiënquïo iquëmbi. Nuquin Papambien tantiec. <sup>3</sup> Abuc bëdamboshë yacno indopondashi, quequin abimbo chiëmbi. <sup>4</sup> Abucshun utsi chuitëmaidquïo tantiãpondambi. Ëmbi tantiondaïd chuitiãpimbo icpebi. ¿Mitsipadentsimbi ëmbi abucshun tantiãboed con onqueten chuïpatsiãba? <sup>5</sup> Bëdambocquid icsho Nuquin Papan abi yacno indondashi, quetiãpimbo iquebi. Natiamiantequid dadpen icnuc ambo abuc nidabi yec bëdambocquid nebi, quetiãpimbo iquebi. <sup>6</sup> Abuc nidshun ëmbi isondaïd chuïbanquin dada uaid isash, Bëdambocquid Pabado nec, quequin tantianushe queshun padenquïo iquëmbi. Ëbi bëdamboec tabadsho isash, Pabado bëdamboec tabadec, quesho tantiãsh bëdambo ictsiãbi. Adecbidi chuïbansho tantiãsh, Abimbo chuïquidquïo Pabado nec, quesho tantiãsh adecbidi bëdambo ictsiãbi.

### *Satanasën natiamiaïd*

<sup>7</sup> Bëdambocquid yansho Nuquin Papan abuc indoshon ismiondashi, quequin Pabado chuïnushe queshun Satanasën chomiaïdën ëbi natiamëded-natiamëdedsho isash, Chën, quenquïo Nuquin Papa iquec. Satanasën chomiaïdën natiamiac pinchuquën siadaïd namïn nidaëdaïd chictiãpimbo yacbimboec con dada bëdanenquïo iquec. <sup>8</sup> Adec con dada bëdantiãpimbo icnubi, Ëbi natiamëquid cueme, Icbo, quequin chiondambi. Adshumbic, padpiden. Adshumbic padpiden adomboëmbidi chuided-chuidëdondambi. <sup>9</sup> Adoãquien, Padi. Bëdambocquid icmenuequin naid nec. Mibi dayacquïo icmëquid con Mayan mibëdi iquec, quequin Nuquin Icbon chiondashi. Adoãqui, Bëdanambo icsho Nuquin Icbon ëbi dayacquïo icmec quequin tantiec bëdambo iquebi, quec tsadëbi. <sup>10</sup> Aden tantiec con dada icsambo icnubi Esuquidistu chuïbenec capuebi. Ëbi icsamboen chuïquin mamënshunaqui adecbidi Esuquidistu chuïbenec capuebi. Utsin natiamiaqui adquiecbidi Esuquidistu chuïbenec capuebi. Utsin mëyanaqui adquiecbidi Esuquidistu chuïbenec capuebi. Adquid icnuc natiãpimbo icsho isun Nuquin Papan ëbi dayacquïo icmiã tsadtiãpimbocquin chuïbenec capuebi.

*Esuquidistu tantiabemenuen chuibanombi quiaid*

<sup>11</sup> Ēbi yacpadquid utsi nibēdec, quequin chienquioctiadquidi niobi. Esuquidistu chuibanquid utsibon chiaid tantiateguidquio iquec, qeshun mibēd icquidon ēbi icsamboen chiosh qesho tantiashun Pabado Esuquidistu chuibenequid nec, quenquio utsibo iccosh, qesho tantiashun ēbi icaid chuibanquin dada uaombi. Bēdamboen tantiacimboen chuibanquid dadpen iquec. Aidon icsactsēcquio isadtsec, quequin ēbi chiec onquenubi Esuquidistu chuibenequidquio nebi. <sup>12</sup> Natiamiaqui chieshenquiocquin Esuquidistu ěmbi chuibansho mibitedishun tantiapondac. Adembidi nadatiambocquin ěmbi nabansho mibitedishun isbededpondac. Adosho isun Esuquidistun ēbi chuibeneta caidquio Pabado nec, quequin chuitiadquidēmbi padenquio mimbi icpondac. <sup>13</sup> ¿Esuquidistu tantiec iccuededquido utsi tantiaguin nashunquimbi mibi padenquiodambi ictio? Utsibon meniaid niondabi. Mibēdi tabadec bunec, Bec cho, quenquio iccondabi. ¿Bec cho, qeshoda ēbi bēdamboen mimbi tantiatsemponda? <sup>14</sup> Ēnden mibēdi tabadondabi. Yuecash padpidec mibēdi tabadoapondabi. Nēbi padpidec mibi yacno nidendabi. Mibēdi tabadec adecbidi, Bec cho, quenquio iquendabi. Mitsana bunesa nebi. Esuquidistu tantaquidquio ma icpanu quequin mibēdi tabadquin chuibanendambi. Aton bacuēbo tantaquin amēn anibēdtan ambia tantaquid icquin tied uaic adembidi shubu uaic bacuēmpibon nabantiapimbo icnubi. <sup>15</sup> Adquibidi mibitedi tantiec Esuquidistubēd icquido yampec quec chonoadec tsusiobudquimbi chuibenendambi. ¿Ēmbi mibitedi comapenen tantiasho isunda mimbi ēbi tantienquio yampe? <sup>16</sup> Bec, cho, quenquio yec mibēdi tabadondabi. Adsho isash, ¿Piuquid bedenquio icpecta Pabado tabadash? Muaquin chuiquin bedpash icnui, quec mibi. <sup>17</sup> ¿Mitsipadentsimbi bedpa? ¿Ēmbi mibi yacno nidmiaidonda muaquin chuiquin mitsana bedpash? Padenquio. <sup>18</sup> Titobēdta utsi mibi yacno nidmiondambi. ¿Adoac mibi yacno choash tabadquin muaquin mitsana ampequinda ictiosh? Ma padenquio icboc. Aidbēdi abentsēc yacimboen tantaquidquio nebi. Aduidequi tabadquid ēbi daēdi nebi. <sup>19</sup> ¿Pabado ampesa nec mibi camenuendambi dada uaguin chuibampo? Padenquio. Esuquidistu tantaquid icquin mibi aid tantiabemenuen chuibanombi. Ēmbi chuibanaid abimbo iquec, quequin Nuquin Papan tantiec. <sup>20</sup> Mibi yacno choash ēbēdi abentsēc yacimboen tantienquio icnushe qeshun dada uaimbi. Comapenec chushcanansho istuidmane qeshun adembidi mimbi iste dada uaimbi. Mitsana nibēdnuc utsin na dadpen icsho isash chushcanansho tantiatuidmane qeshun mibi dada uashunembi. Utsi muaquin chuisho tantiamane qeshun adembidi dada uaimbi. Abipenquio chuisho tantiamane qeshun adembidi dada uaimbi. Bēdambo icquid ēbi icnubi utsi padenquio iquec qesho tantiamane qeshun adembidi dada uaimbi. Mimbi tantiacpadpenquiocquid icsho isash comapenec cuēdcuededsho tantiamane qeshun adembidi dada uaimbi. <sup>21</sup> Ai, mibi yacno choashun adquid icsho isun, Ēmbi Esuquidistu chuibanaido nec, quequin Nuquin Papa chuitiapimbo yec natiaic bēpiuacimboec tsadmane qeshun dada uaimbi. Icsadenequidēn abi icsaid ēnabi icsho isash aido unēsacimboecquid nec, quiash unēsquio icmane qeshun dada uaimbi. Aidon naid utsin istemaidquio nec. Ambibi ambi chudtemaid chudted-chudtedec icsambo yequi, Bēdamboquid nebi, quec muacuededec.

## 13

*Icsaid ěnesa chuiquin cuidendambi quiaid*

<sup>1</sup> Mibi yacno daëdec puduedashic padpidec puduedendabi. Choshon, Icsadenequid iquec, quequin daëdshun-daëdshunquien chuisho tantiendambi. Abentsëcshun: Icsaquid iquec, quequin chuisho tantiatiapimbo iquendabi. <sup>2</sup> Tauamboec puduedshun Esuquidistu chuibanac abi tantiaquido mibitedi yanondac. Padpidec puduedoashun icsadenequid icsho isun, Mibi icsaid ënta, cac padenquiocsho padpidec puduedoashun Nuquin Papan tantiamiacpadomboen mibi adquid utsibobëdta comapenen chuiquin cuidembi, quequin chiondambi utsitedishun tantianubi. <sup>3</sup> Esuquidistun tantiamiacpaden Pabadon dada uaid nec, quequin ¿mitsipadentsimbi tantiapae? quequid comapenec onquequin chuibanembique. Tantiaquiota, caimbi. Esuquidistun nadatiambocquin nacpaden ëmbi nasho mibitedishun ispondac. Aidën tantiamiac padpidec puduedshun adomboembidi mibi ismeoaimbi. <sup>4</sup> Aidi matsesash nadatiapenquio icquidbimboecsho isun cuesten dectampanëdash. Adoacsho Nuquin Papan uincuemiac unësesa yanquiopanëdash. Aid tantiaquidquio icquimbi ëmbibi nadatiambocquin nabantiapimbo icpebi. Abi chuiquid Nuquin Papan icmioshi. Aidëmbi ëbëdi icquin icsadenequid comapenen chuiquin naquidbidi ëbi icmeoaindac.

<sup>5</sup> Esuquidistu tantiaquid nebi, queshun ¿mitsipadentsimbi aid tantiapae? Adecbidi, ¿Ambi chiacpadectabi tabadpe? queshun tantiabono, quequin Nuquin Papan chiaid isbanta. Aden isbanshun, Ambi chiacpaden niacniacombi, queshun Esuquidistu ëbëd ictiapimbo iquec, quequin tantiata. Aid mibëd icnuc ambi chiaid niac-niaquenquio mimbi iquendac. <sup>6</sup> Adecbidi, Pabado Esuquidistun ëbi chuibeneta caidta neque. Isnu, quequidën ëbi nabanec tabadsho isun, Pabadon abimbo chiosh, capashuni mimbi. <sup>7</sup> Aden tantiaquin Codinto yacnocquido bëdamboen tabadmeta, Papa, quequin chuided-chuidedembi. ¿Mibi bëdamboec tabadsho isash, Pabadon chuibanaiado nec, quequin mibi isquidon chuitsiash, quequindambi Nuquin Papa chuided-chuidedpadi? Padenquio. Esuquidistun ëbi chuibeneta caid Pabado nec, quequin tantiesa utsi-utsiec icnubi, Nuquin Papan chiacpadomboen nabanquidquio Codinto yacnocquido nec, quequin utsibon chuisho tantiatiadquio iquebi. <sup>8</sup> Nuquin Papan chiaid abimbo iquec, quequin ambi chiaidquio chuibanquidquibidi nebi. Ambi chiaid utsi uain chiesa nebi. <sup>9</sup> Mibi bëdamboec tabadsho isash bëdambo iquebi, quec tsadtsiabi. Mibi comapenen chuitiapimbo iquebi. Codinto yacnocquido icsaisambo icmeta, quequin Nuquin Papa chuided-chuidedec nebi. <sup>10</sup> Aden mibi tantiec tsadquin mimbi iste dada uaimbi. Mibi yacno nidabicquin dada uaimbi ma puduedshun icsaquid nibëdsho isun comapenen chienquio icpanu quequin Esuquidistun tantiacpaden Nuquin Papan nua pausunaid ma icpanueshun chuibanec nebi. Mibi comapenen chuitiapimbo iquebi. <sup>11</sup> Nëbi ënquin dada uaimbi. Icsaisa icnu quec Nuquin Papan chiacpadec bëdamboec tabadta. Èmbi dada uain chiaid isquin adobanta. Abentsëc yacnimboen tantiaquin nabanec tabadteneta. Adec tabadsho isash tantianquidquio utsibëd bëdamboec tabadquidquio Nuquin Papa mibëdi iquendac. Aidënquio mibi adquidquibidi icmendac. <sup>12</sup> Èbi isec cho cananta. <sup>13</sup> Mibi tantiec tabadebi, quec nëmbo tabadquido Nuquin Papan bëdambo icmebanaido. <sup>14</sup> Nuquin Icho Esuquidistun bëdambo icmiaido nebi, quequin mibitedishun tantiaquiota. Adembidi, Nuquin Papan tantiaid nebi, quequin tantiaquiota. Adembidi aton Mayan ëbëd iquec, quequin tantiaquiota.

Padi. Aidtedi dada uaimbi.

## CADASIA YACNOCQUIDON ISTE

### *Pabadon tauamboen chiaid*

<sup>1</sup> Pabado nebi. Esus chuibenecquidquo nebi. Matsesën: —Adquid icta —¿caidtabi nedi? Padenquo. Esuquidistun: —Ëbi chuibeneta —caidquo nebi. Aid uincumenëdaid Nuquin Papantsen: —Con mado Esus chuibeneta —caidquo nebi. <sup>2</sup> Nidaid utsi Cadasia caidën tabadquidon Esus tantiaquidon mimbi iste dada uaic nebi. Mibi tantiac unësquo iquec. Adembidi tantiec nëmbo icquido Esus tantiaquidtedi: —Unësquo iquec —quiosh. <sup>3</sup> Mibi tantiaquin Nuquin Papa chianembi naden. —Min Mado Esuquidistubëdtan bëdamboen isquin Cadasia yacnocquido bëdambo icmeta, Papa —quequin Nuquin Papa chianembi. <sup>4</sup> Matses bëdambo icmequid Esus nec. —Ëbi tantiesabo tabadac bimboec icsamboec tabadboedëmbi ëbi tantiasho bëdamboec tabadquid icmendambi —quiash Nuquin Papan chiacpadec abi tantiaquido cuidmenquo icnuec abided ciudadec Esus unëspac caondash. <sup>5</sup> Aidën Papa tantiaquin: —Nuquin Papa bëdamboshë iquec —canuna ënenquo icquin.

### *Esusuidi tantienquo yanaid*

<sup>6</sup> —Esus tantienquo yanosh —quequin mimbi naid chuisho tantiasho shubitiadquo iccobi. ¿Ëbi chonobida badedquo Esus tantienquo yano? Nuquin Papan tantiamiac abided ciudadec unësaid Esus tantiec mibi tabadondac. Aden Nuquin Papa aton Mado Esusbëdta tantiaboedëmbi ¿nëbida Nuquin Papa tantienquo yano? Utsibon icsamboen chiaquien mimbi Esus tantienquo yanac. <sup>7</sup> ¿Aidon chiaidta bëdambo icpec? Aidon chiaid ma Nuquin Papan chiaidpenquo neyoc. Esusquo chienquo icquin muaquin chuisho tantiashun: —Abimboen cachitec —queshun mimbi Esus tantienquo yampac. <sup>8</sup> —Aton Mado Esusuidtsëqui tantiasho Nuquin Papan nuqui bëdamboen isec —quequin abimbo chiondambi. —Nuquin Papan chiaid abimbo chienquo icsho Nuquin Papan cuidpashuni —quequin aden abimbo chiondambi. Nuquin Papan abi yacnoshon uaid mayan bëdantsen muaquin chuisho tantiashun aidtsen: —Nuquin Papan cuidpashun —catsiambi. Utsibontsen muaquin chuisho tantiasho aidotsen: —Cuidpashun —quiobi. <sup>9</sup> Tantia. Adembidi mibi chuinu. Ëmbi chuibanac mimbi Esus tantiabenondac. Mimbi tantiondaid Esusquo chienquo icsho: —Nuquin Papan cuidpashun —caimbi mibi muauaquin chuiquido. <sup>10</sup> —¿Matsesën: “Mibi bëdambo iquec,” mabi canu —quequindambi aden chuibampadi? Padenquo. Nuquin Papan chiacpadomboen mambi natiadquo yoc. —Bëdambo iquec —Nuquin Papa camenuen mambi chuibampaboc. Matsesën chiacpadomboenuidi natiapimbo iquebi. Adenuidi naic Esuquidistun yuambo ictiapimbo ictsiabi.

### *Esusën chiaidquo chiec nebi, quiaid*

<sup>11</sup> Tantia, con utsibo. Mibitedi chuinu. —Esus tantiasho Nuquin Papan matses bëdamboen isbentsiash —quequin ëmbi chuiboed amben chiaidpenquo nec. <sup>12</sup> Matsesën chiabi Esuquidistun tantiamiac ambi chiaidquo chuibanombi.

<sup>13</sup> Tantia. Aden Esusën ëbi tantiamiondaid mibi chuinu. Con matses isadaidbon chiacpadomboenuidi natiadquo icquin Nuquin Papa tantiesabo danquin Esus tantiaquido comapenen chieshënquin cuesun secatiadquo

icpadenebi. Ęmbi adodened ěmbi chuisho mimbi tantiondac. <sup>14</sup> Nuquin Papa tantiatiadquo icquin con matsesĕn chiaid abitedimbo natiadquo ictenebi. Ębĕdta tishaidon caniabon bĕdiactsĕc natiadquo icnubi con tsusedpabon chiaiduidi natiadquo ictenebi. Adquid icquin Esus tantiaquido comapenen chieshĕndenembi. <sup>15</sup> Adshobini Nuquin Papan aton Mado Esus tantiamiondash. Ębi tishabi icnubi ěbi caic: —Con Mado Esus tantiameshun bĕdamboen isquin <sup>16</sup> Pabado: “Matses utsibo isadaidpembo con Mado Esus chuibeneta,” caindambi —quequin ambi chiacpadomboen Esus tantiamiondashi. Adoac: —Esusĕn chiaid ěbi chui —quequin matses chiambo iccondambi. <sup>17</sup> Shubu dadpen icquid Edusaden caid yacnocquido Esusbĕd icnĕdaido ambia Esus chuibanĕdaido chuitanambo iccondambi. Utsibo chienquo yec nidaid utsi Adabia caid yacno matses nibĕdacno badedquo nidtanondabi. Adashic yuec-yuecpambo ictanec auĕshquo choec shubu dadpen icquid Damasco caid yacnobidi choaondabi.

<sup>18</sup> Adashic ambo nidash seta abentsĕc chotsecnuc matametanece Edu-saden yacno Petedo isec nidtanondabi. Adec nidash 15tedec ushec aidbĕd tabadondabi. <sup>19</sup> Ambobi Nuquin Icbo Esusĕn utsi Acobo caid isondambi. Esusbĕd icnĕdaid utsi isambo iccondambi. Aid daĕdtsĕqui isondambi. Utsibo padambo. <sup>20</sup> Abimbo chuiquin nĕid dada uaic nebi. Ęmbi aden chuibansho tantiash: —Ai, abimbo caic —quec Nuquin Papa.

<sup>21</sup> Aden Edusaden yacno istanec choashic yuec-yuecpambo ictanec nidaid utsi Sidia caid yacno nidondabi. Auĕshquo nidshun nidaid utsi Sidisia caid yacno istanondambi. <sup>22</sup> Nidaid utsi Udeya caid yacno Esusbĕd icnĕdaido yacno yuec tabadambo iccondabi. Adsho anocquidon Esus tantiaquidon isabi iccondashi. <sup>23</sup> Ęmbi naid chuishouidi tantiapac caondash. —Nuquipadquid Esus tantiaquido cuesun secatiadquo icnĕdaidĕmbi Esus tantiabenshun Esusquo chuibeniosh —quequin ěmbi naid chuishouidi tantiapac caondash. <sup>24</sup> Aden ěmbi naid chuisho tantiash: —Nuquin Papan nac Pabado bĕdambo iquec. Adomboen Pabado tantiamec Nuquin Papa bĕdamboshĕ iquec —quepac caondash Udeya yacnocquido.

## 2

### *Edusaden yacno nidoaid*

<sup>1</sup> Yuecash seta 14ted matamiash Edusaden yacnobidi nidoaondabi. Ębĕdi Bednabe caid nidpondash. Titotsen buanondambi. <sup>2</sup> Adec Nuquin Papan tantiamiacpadece ambo nidshun Esus tantiaquido chuiquid dapabo caidoudtsĕqui cho-chomeshun ěmbi naboed chuibanondambi. —Ęmbi chiabi yac aidon: “Muequi neque. Pabadon chuisho tantienda,” canushe —queshun naden chiondambi. —Nuquin matsespenquo isadaidpembo matses utsibo Esusquo chuibeniombi. “Ęsusuidi tantiasho Nuquin Papan nuqui bĕdamboen istsiash,” quequin chuibeniombi. ¿Adembidida mimbi tantiape? —capondambi Esus tantiaquido chuiquid dapabo chuiquin. Ęmbi adoac: —Ai, adembidi tantiembi —quepondash aido. <sup>3</sup> Ębĕd icquid Tito caid isadaidpembo icshobi: —Shui dĕbid dĕteshune —cainquo iccondash chuiquid dapabon abi utsibon: —Adotiad —canubi. <sup>4</sup> Adec: —Shui dĕbidien dĕteshunetiad —quequido Esus tantiaquid damianquiec Esus tantiaquidombo tabadacno puduedpondash. —Esus tantiaquidon: “Ęsusuidtsĕqui tantiasho Nuquin Papan nuqui bĕdamboen isec,” quequin con tsusedpan chiaid niacsho tantianu —quiash ěbi yacno puduedpondash. Adec puduedshun tantiashic: —Mimbi icsamboen chiec. Nuquin tsusedpa Moisesĕn chiampidtedi nasho Nuquin Papan bĕdamboen istsiash —quepondash. <sup>5</sup> Adec aido: —Nuquin tsusedpan

chiampicpadomboenuidien nametiad —quesho: —Padi. Mimbi icsamboen chiec —quequin aidën chiacpadomboen nainquoio iccondambi. —Ma matses utsibon: “Esusënuidtsëqui Nuquin Papa ëbi bëdamboen ismec,” quequin ma Esusquoio tantianu —queshun nainquoio iccondambi.

<sup>6</sup> Aden Esus tantiaquido chuiquid dapa caidon Esus tantiaquidën natequid utsi chienquoio iccondashi. —Esus tantiabenacsho isun nuquin tsusedpan chiacpadomboentsen nameta —quequin chienquoio iccondashi. ¿Esusbëd icnëdaidën: —Moisesën chiaidtsen nameta —cactambi nametsemponda? Padenquoio ictsenondambi. ¿Atotsi Nuquin Papan aido capec? —Esusbëd iccondaidquoio neque. Bëdamboen isnu —¿capenda iquec? Padenquoio. <sup>7</sup> Naden Petedo chedon chiondashi. —Nuquin Papan chiacpadomboen mimbi matses utsibo isadaidpembo Esusën naid chuibeniac. Nuquin Papan chiacpadomboembidi Petedon nuquin matses isadaidbo Esusën naid chuibeniosh. Petedon nacpadomboen mimbi bëdamboen nac —capondashi. <sup>8</sup> —Nuquin Papan namiaid icquin Petedon nuquin matses isadaidbo dadpen Esus tantiamiosh. Adembidi Nuquin Papan namiaid icquin mimbitsen matses utsibo dadpen Esus tantiamiac <sup>9</sup> —queshun bëdamboen ispondashi. —Adembidi nanuna. Mimbi isadaidpembo Esusën naid chuibenenubi adembidi isadaidbombo chuibenendambi —quepondash. Adshumbic: —Esus tantiaquidquoio mibi nec —queshun chuiquid dapabon Bednabebëdta mëdimbampondashi. Nëidic Petedo. Nëidic Acobo. Nëidic Uan. Aidtedishun chuiquid dapabo icquin adondashi. <sup>10</sup> Nadentsen chuipondashi. —Aton na nibëdquido bëdamboen isnuna —capondashi. Adsho tantiash: —Ai, adonona —quepondabi. Adanec nidpondabi.

#### *Antioquiya yacnoshon Petedo chushcaid*

<sup>11</sup> Adash yuectaniash ëbi iccondacno shubu dadpen icquid Antioquiya caid yacno Petedo chopondash. Auëshquoio icsashobimbi bëisquoioquin chushcapondac. <sup>12</sup> Abëdtan Esus tantiaquido matses utsibon codocaid pec bëdamboec tabadboedi aton pete isuidanec aidobëd cuëshëdec Petedo ic-sapondash. Ambo choash Esus tantiaquido con matsesëmpenquoio codocaid pec bëdamboec tabadondash. Adnubien Acobon: —Ambo istan —cac con matses Moisesën chiampid tantiaquido cho-chopondash. Aido cho-chosho isash: —Moisesën chiampid niacquin matses utsin codocaid pesho chushcanushe —quec dacuëdquin isadaidpembon pete meniaid isuidampondash Petedon. Adec abëdtan Esus tantiaquido matses utsibobëd cuëshëdec ic-sapondash. <sup>13</sup> Adsho isash anocquido isadaidbotsen abëdtan Esus tantiaquido matses utsibobëd tabadenquoio yec cuëshëdpondash. Adsho isash ëbëd icquid Bednabetsen adecbidi cuëshëdec icsapondash. <sup>14</sup> Adec icsaquin Esusën chiacpadomboen nainquoio icshobimbi Petedo chushcapondac Esus tantiaquidtedishun tantianuc. —¿Ada mimbi bëdamboen naoque? Tantia. Chuinu. Isadaidbo tsusedpan chiaid matses utsibo mimbi namec. Isadaidbo icquimbi matses utsibon codocaid pec aidbëdi mibi bëdamboec tabadoc. Aidon piaid pec bëdamboec tabadboedi nëbi aidbëd mibi cuëshëdoc. Adsho isash mimbi nianaido: “Petedon matses isadaidbo tabadacbimboec tabadshouidien Nuquin Papan nuqui bëdamboen ischitotsiash,” quepec icsamboen chiec. Aden mimbi icsamboen tantiamëque. Tantia. ¿Atotsiequin mimbi naoque? —capondambi Petedo chushcain.

#### *Nuquin Papan bëdamboen iste chiaid*

<sup>15</sup> Naden con matses Petedo chiondambi. —“Moisesën chiampicpadomboen naisabo matses utsibo icsambo iquec,” quequin nuquin matses isadaidbon tantiec. Nuquien isadaidbon chidon tishacsho tsusion shui dëbid



dëteshun secanëdaido nec. <sup>16</sup> Adquid icquin: “Moisesën chiaiduidi naquin Nuquin Papa bëdamboen ismembi,” quedenedi nëbi nuqui utsien chiec. “‘Abided cuidadaid Esusënuidtsëqui Nuquin Papa ëbi bëdamboen ismec,’ quequin Esus tantiasho Nuquin Papan nuqui bëdamboen isec,” quequin nuqui tantiec. Adshun matses utsibobëdtambi nuqui Esus tantiaquiec. “Moisesën chiaid niaquesa nibëdsho isun Nuquin Papan matses abitedi bëdamboen istiapimbo iquec,” quequin tantiashun nuqui bëdamboen ismequid Esus nuqui tantiabenondac —quequin Petedo chiondambi.

<sup>17</sup> Adashic Petedobidi chui-oaic: —“Esusuidi tantiasho Nuquin Papan nuqui bëdamboen istsiash,” queshun Esus tantiabenondacsho nuquin matsesën icsambo capondashi. “Nuquin tsusedpan chiacpadomboen nainquio yec mibi icsambo iquec matses utsibobimboec,” capondashi nuquin matsesën. ¿Ada Esuquidistun matses icsambo icmepec? ¿Ambi chiacpadomboen naicta nuqui icsape? Padenquio. <sup>18</sup> “Nuquin tsusedpan chiampicpadomboen nashoen Nuquin Papan nuqui bëdamboen isec,” quequin nuquin matsesën chiaid nec. Esus tantiaquin aden chuitiapimbo yanondabi. Adec Esus tantiaquid icboedi: “Padpiden con tsusedpabon chiaiduidi naquin Nuquin Papa bëdamboen ismembi,” queshun abi bëdamboen ismequidquio Esus tantienquio yequini icsambo icchitotsiac. <sup>19</sup> Con tsusedpa Moisesën chiactedi natiadquio ictenebi. Adquid bëdamboen iste danquin abitedi natiadquio icquimbi abitedi nainquio iccondambi. Adshun: “Moisesën chiactedi ambembi matsesën natiapimbo iquec,” queshun ëmbimbo naid ënondambi. Nëbini Esus tantiec Nuquin Papan chiacpadec tabadec. <sup>20</sup> “Ambi con tsusedpa Moises chuimiactedi nashouidi Nuquin Papan nuqui bëdamboen istsiash,” quedenedi Esus tantiec adenquio yanondabi. Nëbi ëmbi tantiaidquio nainquio yec Esuquidistubëdi cuëshëdenquio yec bëdamboec tabadebi. “Ëbi tantiec ëbi cuidmenquio icnuec abided cuidadec unësac caondash,” quequin tantiashoeni Esusëmbi bëdamboec tabadquid icmec. <sup>21</sup> “Abided cuidadaid con Mado Esusuidi tantiasho matses bëdamboen isendambi,” quequin Nuquin Papan chuipanëdash. Aden Nuquin Papan chiaid niactiapimbo iquebi. Moisesën dada uapampid ambi chiaid niaquesa icsho Nuquin Papan bëdamboen istsenac. Ambi chiaid niaquesa nibëdec. Adquid Nuquin Papan chiaid niaquesa icnuc: “Matses cuidmenquio icnuec ëbided cuidadec unësnu,” queboedi Esus padenquio ictsempañëdash —capondambi Petedo chuiquin.

### 3

#### *Nuquin Papan aton Mayan tabadmiaid*

<sup>1</sup> Tantia. —Cadasia yacnocquido piushbimboecquin tantienquio yanosh —quequin chuisho tantiashun mibitedi chuinu. ¿Tsuntsin: —Tantienda —cac Esus tantienquio yano? —“Cuesten dectanac abided cuidadaid Esusënuidtsëqui Nuquin Papa nuqui bëdamboen ismec,” quequin Esus tantiasho Nuquin Papan nuqui cuidenquio iquec —quequin mibi chuibanondambi. ¿Esus tantiatiapimboda ique? <sup>2</sup> Mimbi tantiaid ëbi chui. Tantanu. ¿Atotsi quiash Nuquin Papan Mayan mibëdi tabadanondash? ¿Nuquin Papan ambi chiaid Moises dada uamepampid mimbi nabanuda mibëd tabadanondash? Padenquio. Ëmbi chiondaid Esusquio mimbi tantiabensho isashien mibëd tabadanondash. <sup>3</sup> ¿Pabiate shëcuë choquidida mibi nendac? Tantia. ¿Atotsieshun tantienquio ique? Mibëdi tabadquin Nuquin Papan Mayanën mibi bëdamboec tabadquid icmec. ¿Nëbi Esus tantienquio yanecta mibi bëdamboec tabadpatsia? Mibembi bëdamboec tabadtiapimboen mibi iquec. <sup>4</sup> ¿Aden Nuquin Papan aton Mayan mibëdi tabadmiaid icquimbida Esus tantienquio

yano? <sup>5</sup> Nuquin Papan aton Mayan mibëdi tabadmequin comapenen tanti-aquin nacnenquin mibi ismiondash. ¿Atotsieshun Nuquin Papan aton Mayan mibëdi tabadmec? ¿Con tsusedpa Moisesën chiampid nashoda Nuquin Papan aton Mayan mibëdi tabadmec? Padenquio. Ëmbi chiondaidquio Esusquio tantiasho Nuquin Papan aton Mayan mibëdi tabadmec.

### *Nuquin Papa tantiaquidquio Abadauan chiaid*

<sup>6</sup> ¿Tsutsi Nuquin Papa tantiaquidquio icpampic? Abadauan nepampic. Nuquin Papan chiac Abadauan: —Abimbo mimbi caic —quesho: —Adquid bëdamboen isembi —queshun Nuquin Papan bëdamboen isbempampic. <sup>7</sup> Adec Abadauan: —Nuquin Papan abimbo caic —quequin tantiapampicpadomboen nëbi matsesën Esus tantiasho Nuquin Papan bëdamboen isendac ambi Abadauan ispampicpadomboen. <sup>8</sup> —Esus tantiaquido iquendac —quequin naden Nuquin Papan Abadauan chuipampic ëndenquimbo. “Abadauan, mibi unësan yuecquimbo ictaneshun min tsyuecquid abentsëc tantiaquidtedi bëdambo icmendambi. Nidaid utsi-utsiec yacno tabadquidon min tsyuecquid abentsëc tantiasho bëdambo icmendambi,” quequin Nuquin Papan chiaid con tsusedpan dada uapampic. <sup>9</sup> Abi tantiaquidquio icsho ambi Abadauan bëdamboen isampicpadomboen nëbi aton Mado Esus tantiasho Nuquin Papan nuquitsen bëdamboen isec.

<sup>10</sup> Utsiboen Nuquin Papan cuidtequido nendac. —Moisesën chiampicpadomboenuidi nasho Nuquin Papan bëdamboen istsiashi —quequidëmbi abitedimbo nainquio icsho Nuquin Papan cuidendac. Aden ënden Nuquin Papan chiaid dada uapampic. “Ambi chiatedi nainquio icsho Nuquin Papan cuidendac,” quepampic. <sup>11</sup> —Ambembi Moisesën chiampicpadomboenuidi nasho matses bëdamboen isendambi —¿quecta icpanëdash Nuquin Papa? Padenquio. Ambi chiaid niacquidquidquio icsho bëdamboen istiapimbo icquin Nuquin Papan naden chuiquin dada uamepampic. “‘Nuquin Papa ambi chiacpadomboen naquidquio nec,’ quequin abi tantiec tabadquidien Nuquin Papan bëdamboen isec,” quequin dada uamepampic. <sup>12</sup> ¿Ëmbembi Moisesën chiatedimbo nanuequidta Nuquin Papambo tantiec tabadpec? Padenquio. “Moisesën chiatedi naquid Nuquin Papabëd tabadendac,” quequin chiampicpaden ambembi matsesën natiapimbo iquec. Natiapimbo icsho Nuquin Papan bëdamboen istiapimbo iquec.

<sup>13</sup> Aden Nuquin Papan matses abitedimbo bëdamboen istiapimbo icnuc Esuquidistu: —Ëbided cuidshun ëbi tantiaquido ma con Pan cuidenquio icnu —quiash abided ciudadec unëspac caondash cuesten dectanac. Aidquio chuiquin Nuquin Papan con tsusedpa dada uamepampic. “Cuesten dectanaid Nuquin Papan cuidaidquio nec,” quequin Nuquin Papan chiaid dada uapampic. <sup>14</sup> Adec matses utsi-utsien abi tantiaquido cuidmenquio icnuc abided ciudadec Esus unëspac caondash. Ëndenquimbo con tsusedpa Abadauan chiec: —Yuecshun bëdambo icmendambi —quequin Nuquin Papan chuipampicpadomboen abi tantiaquido bëdambo icmequin aidobëdi aton Mayan tabadmenuec Esus unëspac caondash.

### *Abadauamba chuishun Moisesen Nuquin Papan chiaid*

<sup>15</sup> Tanta, con utsibo. Mibitedi chuinu. Min matsesën nadoquid. —Naden naindambi —quequin dada uashun: —“Abimbo chiaidquio nec,” ma isquidon canu —queshun abi cuëmëdquidtsen dada uaquid. Aid dada uaid dada uaquidbëdtambi utsintsen utsi uatiapimbo icquid: —Chuiquidën cuidnushe —queshun. Adembidi ambi chiaid utsi uatiapimbo icquid icquin <sup>16</sup> Nuquin Papan: —Nadomboen naindambi —quequin Abadauan

chuiampic. —Mibi nibēdanan yuecquimbo ictaneshun min tsyuecquid abentsēcshun matses bēdambo icmendac —quepampic. —Min tsyuecquid abentsēc tantiaquidtedi bēdamboen isendambi —quequin tantiec adpampic. Esus caiqui: —Min tsyuecquid abentsēc —quec adpampic. —Min matses tsyuecquido dadpen —quenquo icpampic. <sup>17</sup> ¿Ada tantie? Ēndenquimboshē Nuquin Papan Abadauan chuiquin: —Min tsyuecquidēn matses bēdambo icmendac —capampic. Adshumbic yuecquio ictaneshun seta dadpenquo 430ted matameshun Moises utsitsen chuiquin Nuquin Papan dada uamepampic. Ambi Abadauan chiampid niaquenquo icquin Nuquin Papan ambi chiaid utsi Moises dada uamepampic. Muenquo icquin Abadauan chuiampic. <sup>18</sup> ¿—Ēmbi chiaid ěmbi Moises dada uamiacpadoemboen nashouidi mibi bēdamboen isembi —qeshunda Nuquin Papan Abadauan bēdamboen isbempampic? Padenquo. Moises tishabi icnuc ambi chiac: —Nuquin Papan abimbo caic —abi casho Nuquin Papan Abadauan bēdamboen isbempampic. Adashic: —Yuecshun min tsyuecquidēn matses bēdambo icmendac —quepampic. Aden ambi ěndenquimboshē chiampicpadoemboen nēbi matses bēdambo icmequin Esus tantiaquido Nuquin Papan bēdamboen isec.

<sup>19</sup> ¿Atotsieshun Nuquin Papan ambi chiaid Moises dada uamepampic? —Ēmbi chiaid isash: “Icsamboequien nuqui tabadchitec,” quequin ma matsesēn tantianu —qeshun Moises dada uamepampic. Nuquin Papan Abadauan chiampid Esuquidistu choabi icnuc adopampic. Nuquin Papan abi yacnoshon uaido mayan bēdabon Moises chuiuampampic. Adoac Moisesēn aton matses Nuquin Papan chiaid chuibampampic. <sup>20</sup> Nuquin Papanquo Abadauan chuiampic. Abadauan caic: —Chuitan —cainquo icquin Nuquin Papanquo Abadauan chuiampic.

#### *Matses abi icsaid tantiamete chiaid*

<sup>21</sup> Aden Nuquin Papan Abadauamba chuishumbic Moisesen chuiampic. ¿Ambi: —Min tsyuecquid tantiaquido bēdamboen isendambi —quequin Abadauan chiampid niacquinda Nuquin Papan Moises chuiampic? Padenquo. ¿Matses bēdamboen isnuenda Nuquin Papan ambi: —Naden nata —quequin chiaid Moises dada uamepampic? Padenquo. —Matses bēdamboen isnu —qeshun ambi chiaid Moises dada uameshun ambi chiaid niaquesa bēdamboen isun unēsacsho abēdi tabadmetsiash. —Ēmbi chiaid niaquesa nibēdendac —quequin tantiaquin ambi: —Naden nata —quequin chiaid Moises dada uamepampic. <sup>22</sup> —Ēmbi chiaid isun: “Nuquin Papan chiaid matses abitedishunquien niac-niacchitec. Mētaniac abembi mēnchiquidtiapimbo yachimboec abembi bēdambo ictiapimboen icchitec,” quequin ma matsesēn tantianu —qeshun Nuquin Papan Moises dada uamepampic. Adec matses abitedi icsamboec tabadsho bēdamboen istiapimbo icquimbi ambi Abadauan chiampicpadoemboen naquin Esuquidistu tantiaquiduidtsēqui Nuquin Papan bēdamboen isec.

<sup>23</sup> Esus choabi icnuc nadquo matses icpanēdash. Moisesēn chiacpadoemboenuidi natiadquidi abembi bēdamboec tabadtiapimbo icpanēdash. Mētaniac mēnchiquidtiapimbo yachimboec aidēn chiacpadece bēdamboec tabadtiapimbo icpanēdash. Nuquin Papan Esus tantiamiabi icnuc adquo matses icpanēdash. <sup>24</sup> Aden: —Ambi chiaid niaquec icsamboec tabadsho Nuquin Papan ēbi bēdamboen istiapimbo iquec. ¿Nuquin Papa bēdamboen ismequidta nibēdpeba? —nuqui camenuen ambi chiaid Moises dada uamepampic. Aden nuqui icsaid tantiameshun Esustsen tantiamiac: —Esus tantiaho Nuquin Papan nuqui bēdamboen isec icsaisabimboecnuc —nuqui quendac. <sup>25</sup> Aden

tantie: —Isadaidbo tsusedpan chiatedi nashouidi Nuquin Papan matses bēdamboen istsiash —quenquo nuqui iquec. —Esus tantiasho Nuquin Papan nuqui bēdamboen isquin bēdamboen tabadmec —quequin nuqui tantie.

### *Nuquin Papan con mado con champi caido*

<sup>26</sup> Aden Esus tantiasho Nuquin Papan: —Con mado mibi nec. Con champi mibi nec —nuqui capec. <sup>27</sup> Adec: —Esus tantiaquid nebi —quesho acten mentoaid yec Esuspadquo ictiadquo nuqui iquec. <sup>28</sup> Aden Esus tantiasho Nuquin Papan nuqui bēdamboen isec. Isadaidbo yec isadaidpembo yec matses yuaido yec matses yuapenquo yec dada yec chido yec quequin Esus tantiasho nuqui bēdamboen isec. —Matses utsibo bēdamboen istiapimbo iquebi —quenquo icquin matses utsibombi aton Mado Esus tantiasho Nuquin Papan bēdamboen isec. <sup>29</sup> Adembidi abi tantiasho ambi Abadauan bēdamboen isampicpadomboen Esus tantiasho Nuquin Papan nuqui bēdamboen isquin bēdambo icmec ambi Abadauan chiampicpadomboen. Adec Abadauanēn tsyuecquidobimboecquido nuqui nec.

## 4

### *Yuabimboecquid isadaidbo yaid*

<sup>1</sup> Tantia, con matses. Mibitsen chuinu. Aton na dadpen dayun uaquidēn nuquin matsesēn nadoquid. —Ēbi unēsān con madon con na abitedi bedendac. Bacuē icquimbi con madon con na abitedi bedtiapimbo iquec. Canishumbien con madon con na bedendac —quequin tantiaquidēn amēn aton mado aden chuiquid. Aton papa unēsān caniabi yec utsibon yuabimboec aton mado iquec. <sup>2</sup> Caniabi icquin utsibon chiapadomboen naindac aton madon. Adashic aton papan chiapadec canishun aton papan na bedash yuabimboechedi adquidpenquo yanendac. <sup>3</sup> Adquo yuabimboecquido con matses isadaidbo icpanēdash. Tsusedpabon yuabimboecquido icquin Nuquin Papan bēdamboen iste bēdamboen tantienquo icpanēdash. —Tsusedpabon chiapadomboen Nuquin Papan: “Naden nata,” quequin chiaiduidi nanu —quiashi abembi bēdamboec tabadtiapimbo icpanēdash. <sup>4</sup> Adnubien ambi ēndenquimbo tantiampicpadēn Nuquin Papan Esus chomepanēdash. Isadaidbon chidon tishaid icquin Nuquin Papan: —Naden nata —quequin chiaid naquidquo Esus nepanēdash. <sup>5</sup> Adec Nuquin Papan chiaid niaquesambo Esus icnubien ambi chiaid niacash matses abitedi Nuquin Papan cuidtequido nepanēdash. Adsho isash matses cuidmenquo icnuec abided cuidadec Esus unēsac caondash. Nēbi Esus tantiasho: —Con mado mibi nec. Con champi mibi nec —quequin Nuquin Papan nuqui bēdamboen isec.

<sup>6</sup> Adec: —Con bacuēbo nec —queshun Nuquin Papan nuquibēdi Esusēn Mayan tabadmec. Adoac bacuēn amē: —Ēbi, papa —cacbimboen Nuquin Papa nuqui chianec. <sup>7</sup> Esus tantiabi Moisesēn dada uapampiduidi namenuquido yuabimboecquido icboedi nēbi Esus tantiasho Nuquin Papan: —Con bacuēbo nec —nuqui capec. Aden nuqui bēdambo icmec ambi Abadauan chiampicpadomboembi.

### *¿Utsin yuameteda bumpe? quiaid*

<sup>8</sup> Tantia. Nēbi matses utsibo mibi chuioanu. Ēnden Nuquin Papambo tantiesa icquin matses uaquidpenquiobi utsi mimbi tantiapandac. Papa quequin mimbi tantianēdaidēn yuabo yec mētaniacimboecquido mibi icpanēdac. <sup>9</sup> Nēbi Nuquin Papa mimbi tantiabenondac. ¿Mimbembida adonda? Padenquo. Aidēmbi mibi tantiamepanēdash. Aidēn tantiamiaidombo icquin

¿atotsiequin aid tantienquoio yanoai? ¿Moisesën dada uapampiduidi namenuequido tanshoda Nuquin Papan mibi bēdamboen ispec? Padenquoio. Adquid mētaniacimboecquid nec. ¿Mētaniacimboecquid icoatiadquioda ique? <sup>10</sup> Aden Nuquin Papa tantienquoio icquin mimbi icsamboen chiec. —Aid badiadēn adenda. Aid inchēshēn ushēn adenda. Aid setambi adenuidtsēqui nanuna. Nuquin Papan cuidnushe —quequin mimbi icsamboen chiec. Mimbi chi-acpadomboen naquid Nuquin Papan bēdamboen iste danquin mimbi icsamboen chiec. <sup>11</sup> Mibi caic: —Adosh —quesho tantiash shubitiadquoio iquebi. —¿Ēmbi chiondaidonda Esus tantienquoio yampash? —quequin tantiac mibi unēsquoio iquec.

<sup>12</sup> Con utsibobimboecquido mibi neque. Tantia. Mibitedi chuinu. Isadaid-pembo yec mibi: —Moisesën chiampiduidi nanu —quenquoio yacimboec yanondabi. —Ēmbembi Moisesën chiampid naquin Nuquin Papa bēdamboen ismembī —quedenedi ēnēdondabi. Nēbi Esusuidi tantiaquid nebi. Adembidi Esusuidi tantiata.

Ēbi adsho tantiash chieshenda. Tauamboen ēmbi Esus chuisho mimbi ēbi chieshēnenquoio iccondac. <sup>13</sup> Mibi yacno tauamboec choshon daic-sabudtsēcshumbi mibi Esusēn naid chuibanondambi. <sup>14</sup> Istiapicpambo yec daicsabudacshobi mimbi ēbi cacumenquoio iccondac. Ēbi mibi yacno puduedsho isash mibi cuishonquiondac. Nuquin Papan abi yacnoshon uaid mayan bēda choacimboecnuc mibi cuishonquiondac. Nuquin Icho Esuquidistu choacimboecnubidi mibi adondac. <sup>15</sup> —Min ēshē chicshun ēbi mene —ēmbi cac mimbi ēbi menetsenondac. Aden ēbi mimbi tantiaquiondac. Adondaidi ¿atotsi quiash chieshcueno? <sup>16</sup> ¿Nēid abimbo chuiquindambi mibi chieshēmpe? Padenquoio iquembi. ¿Aden chuisho mimbidabi chieshēmpe?

<sup>17</sup> Ista. Esus chienquoio icquidon ambi chiacpadomboen mibi name-tiadquoio iqueque. ¿Mibi tantiaquoioquin bēdamboen namenuenda mibi chuipec? Padenquoio. Ēbi chieshēmenuembien ambi chiacpadomboen mibi nametiadquoio icchitec. Mibi abibi tantiamenuen naic. <sup>18</sup> Ēmbien mibi tantiaquin Nuquin Papan chiacpadomboen namenuen yuen chuibanondambi. Aden chuibanac mimbi ēmbi chiaidquoio tantiabenondac. Ēbēd icquimbi Esus bēdamboen tantiaboedombi ēbi nidtsēcñubi mimbi badedi utsi tantiac. <sup>19</sup> Aden mimbi naid tantiac mibi unēsquoio iquec. Anin bacuē tantiacimboen mibi tantiaquiembī. —Esubimboec icpashun. Aid tantiec ambi chiac-padec bēdamboec tabadpashun —quequin mibi tantiembī. <sup>20</sup> Mibēd icquin bēisquoioquin mibi chuitsiambi. Mibēd iquenquoio icquimbi mibi bēisquoioquin chiacimboen dada uaquin mibi naden chiembī. —¿Atotsieshun Esus tantienquoio yanoao? —caimbi.

### *Abadauanēn mado daēd chiaid*

<sup>21</sup> ¿—Moisesën chiacpadomboenuidi naquin Nuquin Papa bēdamboen ismembī —quequido icquinda mimbi Moisesën chiampid bēdamboen tantieque? Tantia. Mibi chuinu. <sup>22</sup> Naden chuiquin Moisesën dada uapampic. Abadauanēn madombo daēd icpampic. Aton chidon yuaid chido bedshun tishmiad abentsēc icnuc aton shanunquoio aton chidon tishaid abentsēcñubi icpampic. <sup>23</sup> Abadauanēn chudac badedquoio bacuē usundoshon chido yuaidēn aton mado tishpampic. Abadauanēn chidombo naido icsho: —Mimbi bacuē tishendac —quequin ambi chiacpadomboen Nuquin Papan naidopenquoio icmiac aton mado tishpampic. <sup>24-25</sup> Aidi Sada nepampic. Chido yuaid Acad nepampic. Aidēn tishaid yec aton mado yuabidi nepampic. Icbon chiacpadomboenuidi napampic. Yuaidēn madobimboecquido Moisesën dada uapampiduidi namenuequido nec. Adquiobidi Edusaden

yacnocquido iquec. Esus tantienquo yec Moisesën chiaiduidi tantiate bunquiec. Nidaid utsi Adabia caid yacno macuësh dapa Sinai caidënsun Nuquin Papan ambi chiaid Moises dada uamepampic. Aid macuësh matses utsin Acad capec. Aden tantiaquin: —Chido yuaid Acad caidën madobimboecquido Moisesën dada uapampiduidi namenuequido nec —caombi. <sup>26</sup> Edusaden caid utsi iquec. Nuquin Papa tabadacnombo Edusaden caopec. Ambo Esus tantiaquido yec nuquibi tabadendac. Yuaidën madobimboecquido Moisesën dada uapampiduidi namenuequidoen padenquo iquendac. <sup>27</sup> Nuquin Papan ambi chiaid dada uamepampicpadec Esus tantiaquido dadpenquo iquendac. Naden dada uamepampic.

“Tantia, chido. Naido icscho mibi chuinu.

Bacuë tishtiapimbo yequi bëdambo icta.

Bacuë paëmbo icnuc tishacmaid yequi cuishonqueta.

Bënë choquidën bacuë dadpen tishquidën bacuën tsyuecquido daëdpactsëc yanubi

Bacuë nibëdquidën min matses dadpenquioshë yanendac,”  
quequin ambi chiaid Nuquin Papan dada uamepampic.

<sup>28</sup> Tantia, con utsibo. Mibi chuinu. ¿Ada Nuquin Papan Abadauan chiampid tantie? —Min chido naido iccondaidën tishaid Isac cuëmëdquidën tsyuecquid tantiaquido bëdamboen isendambi —quequin Nuquin Papan Abadauan chuipampic. Abadauan chiacpadomboen aton Mado Esus tantiasho Nuquin Papan: —Con mado nec. Con champi nec —nuqui caindac. <sup>29</sup> Ènden Nuquin Papan naidopenquo icmiampidën mado chieshënquin chido yuaidën madon aton utsibi chieshëmpampic. Adembidi Nuquin Papan Mayanën tantiamiaido Esus tantiaquido Moisesën dada uapampiduidi namenuequidon chieshënendac. <sup>30</sup> Aden Abadauanën mado bëyucquidën aton utsi chieshënsho isun ¿atotsi Nuquin Papan Abadauan chuipampic? “Tantia, Abadauan. Mibi chuinu. Min chidon yuaid aton madobëdtabi cueme. Min mado utsi Sadan madon tsyuecquido dadpenquo caidmequin bëdamboen tabadmemb. Yuaidën madoembi padenquo iquendac,” quequin Nuquin Papan Abadauan chiaid dada uapampic Moisesën. <sup>31</sup> Sada caidën mado Isac caidpadquid yuapenquo nuqui nec. Esus tantiasho Nuquin Papan: —Con mado mibi nec. Con champi mibi nec —nuqui caic. —Esusënuidtsëqui Nuquin Papa ëbi bëdamboen ismec —quequin Esusquo tantiaquid yec: —Èmbembi Moisesën chiacctedi naquin Nuquin Papa bëdamboen ismemb. —quenquo icnuna.

## 5

### *Esus tantiasho Nuquin Papan bëdamboen iste chiaid*

<sup>1</sup> Aden: —Esusënuidtsëqui Nuquin Papa ëbi bëdamboen ismec —matses camenuec abided ciudadec Esus unëspac caondashe. Aidquo tantiata. Muaquidën: —Moisesën chiampicpaden nasho Nuquin Papan nuqui bëdamboen istsiashe. Aidën chiacpaden nanuna —quequin chuisho tantienda. Aden muaquin chiacpaden naic isadaidbo tsusedpan yuabimboec mibi yantsiaque.

<sup>2</sup> Mimbi isondaid Pabado nebique. Tantia. Mibitedi chuinu. Moisesën chiacctedi naquid Nuquin Papan bëdamboen iste danquin Esus tantienquo yanec muaquidën chiacpadec shui dëbid dëteshuniadacsho isun Esusën Nuquin Papa mibi bëdamboen ismetiapimbo ictsiashe. Adenda. <sup>3</sup> Aden Moisesën chiaid abentsëc natsëcshun aidën chiaid utsitedi nainquo icscho Nuquin Papan

mibi bēdamboen istiapimbo ictsiashe. Moisesēn dada uapampiduidi namenuquido tanenda. <sup>4</sup> Aido Esus tantiesabo nec. Aden abi bēdamboec ismianquid Esus tantienquio icsho Nuquin Papan aido bēdamboen istiapimbo iquec. <sup>5</sup> Esus tantiaquidoen Nuquin Papan Mayanēn tantiamiacpaden naden tantiec. —Esus tantiashouidi ambi chiaid niac-niacacmaidbimboecnuc bēdamboen isquin Nuquin Papan: “Mibi bēdambo iquec,” nuqui caindac —quequin nuqui tantiec. <sup>6</sup> Shui dēbid dēteshuniaidēn Esus tantiasho Nuquin Papan bēdamboen isec. Adembidi shui dēbid dētiacmaidontsen Esus tantiasho Nuquin Papan bēdamboen isoaic. Aden Esus tantiabenash: —Ambi chiacpadomboen Nuquin Papan matses tantiaquid ēbi icmendac —quequin aden utsibo tantiasho isun Nuquin Papan: —Adquid con Mado tantiaquid nec —caindac.

<sup>7</sup> —Bednu —quequin nadancacbimboen aiduidtsēqui tantiaquin mimbi Esusquio tantiondac. ¿Tsuntsin muaquin chiac Esus tantienquio mimbi yanoape? ¿Atotsiequin abimbo chiaid niacpe? <sup>8</sup> ¿Nuquin Papan nacta Esus tantienquio yano? Padenquio. Ma aidēmbi mibi Esus tantiametiadquio yoc. <sup>9</sup> Muaquido tantienda. Nadquio aid iquec. Tosho bedquid abentsēcshun bedmebanac abitedi toshoquecuededec. Adembidi muaquid abentsēcshun chiac matses dadpenshun abimbo tantienquio yantsiashe. Muaid tantienda. <sup>10</sup> —Nuquin Icbo Esusēn tantiamiac ēmbi chiacpadomboen Cadasia yacnocquidon tantiatsiash —quequin mibi chiec nebi. Mibi muaquin chuiquid Nuquin Papan cuidendac.

<sup>11</sup> —“Con tsusedpan chiacpaden shui dēbid dēteshuniaiduidtsēqui Nuquin Papan bēdamboen istsiash,” queposh Pabado —quequin ¿tsundanquieni muauapac caosh? ¿Adendambi chuidio? Aden ēmbi chuisho adembidi chuiquidon chieshēnenquio ictsenoshi. Esus chienquio icsho ēbi chieshēnenquio ictsenosh. Abi tantiaquid cuidmenquio icnuec abided cuidadec unēsaid Esusuidi chuisho mabi chieshēmpaboc. <sup>12</sup> Mibi muaquin chuiquido Moisesēn dada uapampiduidi namenuquido caic: —Auēshquio cuemepashun —caimbi.

### *Esus tantiaquido bēdamboec tabadte chiaid*

<sup>13</sup> —Ēbi cuidmenquio icnuec abided cuidadec unēsaid Esusquio tantiasho Nuquin Papan ēbi bēdamboen isec —camenuen Nuquin Papan mibi Esus tantiamiac. Adoac: —Esus tantiasho Nuquin Papan cuidtiapimbo iquebique. Ēbi icsate bunaid nanu —quenda. Nēbi Esus tantiaquin mibi icsate bunaid ēnquin mēmunta. Esus tantiaquido yec tantiananquiec nashunanta. <sup>14</sup> Adomboen Nuquin Papan Moises naden chuimiapadomboen mimbi natsiac. “Mibibi min dada datantiadacimboen utsibotsen bēdamboen tantiaquiota,” quequin Nuquin Papan ambi chiaid Moises dada uamepampic. <sup>15</sup> —Opa penantiadpambo yachimboec nēishnanash chushcananosh —quiosh mibi caic. Aden naic mibi icsacuededeque. Esus tantienquio mimbi yanegue. Bēdamboec tabadta.

### *Nuquin Papan Mayanēn bēdamboen tabadmete*

<sup>16</sup> Nuquin Papan Mayanēn tantiamiacpadomboen naic bēdamboec tabadta. Aden mibi icsate bunaid mimbi nainquio ictsiac. <sup>17</sup> Nuqui icsate bunaid naiqui Nuquin Papan Mayanēn tantiamiacpadec bēdamboec tabadtiapimbo nuqui ictsiac. Nuquin Papan Mayanēn tantiamiacpadomboen tantiaquin nuqui icsate bunaid ēnquin nuqui mēmuntsiac. <sup>18</sup> Nuquin Papan Mayanēn tantiamiacpadomboen tantiec: —Esusēnuidtsēqui Nuquin Papa ēbi bēdamboen ismec —queshun: —Moisesēn chiatedimbo naquin ēmbimbo Nuquin Papa bēdamboen ismembī —quequin tantienquio nuqui iquec.

<sup>19</sup> Nadquio icsateuiddi bunquid matses iqueque. Tantia. Chuinu. Nēidic aton chidopenquio chudquido. Nēidic aton bēnēpenquio chudmequido. Nēidic dada daēd chichudnanquido. Nēidic opabimboec chudnante bunquin matses ismequin adoquido. Nēidic tsienbēdta shui chuibudquin icsamete bunquido. <sup>20</sup> Nēidic Nuquin Papan chiaid niac-niacquin ambi matsesbimboecnuc nacnenaiddi papa caquido. Nēidic nēnēchoquido. Nēidic dauē icsa bedash icsa uanquido. Nēidic chieshēmēnquido. Nēidic chieshēmēnec chushcananquido. Nēidic cudasquido. Nēidic nēishēmēnquido. Nēidic ambi naiduidi naquido. Nēidic abitedi cuēsh-cuēshēdmianquido. Nēidic: —Utsin chiaid tantiatiapimbo iquebi. Ēmbentsēqui bēdamboen chiembi—quequido. <sup>21</sup> Nēidic utsin na natiambo bunec chieshēmēnquido. Nēidic tantiadenuen paēmbo icquid acquido. Inchēshēn ushenquio icquin adoquido. Adquidtedishun icsamboen naic. Adec abi icsaid ēntiapimbo yec unēsash Nuquin Papa yacno tabadtiapimbo iquec. Aden mibi chuibanondambi ēnden.

<sup>22</sup> Padnuen Nuquin Papan Mayanēn namiaid yec nadquiec tabadquid. Nuquin Papabēdta matses tantiaquiec tabadquid. Esus tantiec cuishonquec tabadquid. —Nuquin Papan ēbi bēdamboen isec —quec bēdambo yec dacuēdenquio yec tabadquid. Utsibon chieshēnaqui chieshēmēnenquio yec tabadquid. Nēishēmēnenquio yec tabadquid. Bēdamboen isquin utsibo nashunec tabadquid. Muainquio yec tabadquid Nuquin Papan namiaid.

<sup>23</sup> —Con naidi naimbi. Ēbiuidtsēqui bēdambo iquec —quenquio icquin utsibo bēdamboen tantiec tabadquid. Abi icsate bunaid ēnquin mēmunc tabadquid. Adquio yec Nuquin Papan Mayanēn namiaido Esus tantiaquido bēdamboec tabadtsiash. ¿Adec bēdamboec tabadsho isunda: —Adec tabadenda —quequin Nuquin Papan Moises dada uamepampic? Padenquio. —Icsamboec tabadenda —quequin icsamboec tabadquid chuipampic. Nuquin Papan Mayanēn tantiamiacpadec tabadquin aden chuipampid nuqui ni-aquenquio iquec. <sup>24</sup> Adoenquio icquin cuesten dectanac abided cuidadec unēsaid Esus tantiaquin nuqui icsate bunaid ēnquin nuqui mēmuntsiac. <sup>25</sup> Aden icsamboen nainquio yec bēdambo icnuna. Nuquin Papan Mayanēn Esus tantiamiaid icquin aidēn tantiamiacpadomboen nanuna.

<sup>26</sup> —Ēbiuidtsēqui bēdambo iquec —quenda. Adenquio yec nuqui chuiquid dēniacte bunenquio yec bēdamboec tabadnuna. —Ēbi bunacpaden ēbi namianenquien icchītec. Utsien namechitec —quec chieshēmēnec tabadenda. Nēishnanenquio yec bēdamboec tabadnuna.

## 6

### *Esus tantiaquido bēdamboec isnante chiaid*

<sup>1</sup> ¿Nuquin Papan Mayanēn tantiamiacpadomboen bēdamboen tantiaquidta icpec? Adquidēn abēdtan Esus tantiaquidēn icsamboen nasho isun: —Padi. Esus tantiaquid adesambo neque. Bēdamboec tabadta —caquid yendac. —Nēishec ēbitsen icsamane —queshun nēishenquio icquin aden chuiquid yendac. Abibi datantiadec: —Icsaquid nebi. Esus bēdamboen tantienquio yec adecbidi icsatsiabi —quequin tantiec: —Bēdamboec tabadta —quequid yendac. <sup>2</sup> Adec bēdamboec isnanc: —Bēdamboec tabadnuna —quec chuinanquiota. Adecbidi nashunanquiota. Aden naquin Nuquin Icho Esuquidistun chiacpadomboen mimbi natsiac.

<sup>3</sup> Utsien: —Utsibēd onquetiapimbo iquebi. Ēbiuidtsēqui bēdambo iquebi —quec abibi muauadquid icsambo iquec. <sup>4</sup> Adenquio yec mibibi datantiadta. —¿Nuquin Papan chiacpadectabi bēdamboec tabadpe? —quec mibibi datantiadta. Adashic: —Ai, Nuquin Papan chiacpadec tabadebi —quiash



adecbidi bēdambo icta. —Utsitedi icsambo icnubi ēbiuidtsēqui bēdambo iquebi —quenda. <sup>5</sup> ¿Mimbi utsibon naid chuibanshoda Nuquin Papan: —Mibi bēdambo iquec —capatsiash? Padenquoio. Mimbi bēdamboen naid isun: —Mibi bēdambo iquec —catsiash.

<sup>6</sup> Esus tantiaquidon nadoquid yendac. Nuquin Papan chiaid abi chuibanquid nashunquid yendac. <sup>7</sup> Piacbo sequidbimboec matses iquec. Tantienquoio icquidēn icbompin uestsaidi siac canienquoio ictsiash. Padnuen tantiaquidēn ēshē bēdaidquoio siac bēdamboec canitsiash. Tantienquoio icquidbimboec icsambo icquid iquec. Ambi icsamboen naid icbompin uestsaidbimboec iquec. Icsauidequi tabadec unēsash Nuquin Papa yacno nidtiapimbo iquec. Padnuen Esus tantiaquid ambi chiacpadomboen naic unēsash Nuquin Papa yacno nidendac. Ēbi adsho tantiash: —Icsaido Nuquin Papan cuidenquoio ictsiash —quec muaic tabadenda. Ambi chiacpadomboen mibi cuidendac. <sup>8</sup> Ambi chiaid niac-niaquec abi icsate bunaiduidi naquid cuidendac. Nuquin Papan Mayanēn tantiamiacpadomboen naquidien bēdamboec tabadec unēsash Nuquin Papa yacno tabadendac. <sup>9</sup> Ēmbi aden chuisho tantiash bēdamboec tabadta. Bēdamboec tabadec chieshtoenquoio icsho isun ambi tantiacpadēn Nuquin Papan abēdi nuqui tabadmendac. <sup>10</sup> Adec bēdamboec tabadquin utsibo bēdamboen isquin nashununa. Aden utsibo bēdiactsēc tantiec Esus tantiaquido yec tantiananquieci nashunanquionona. —Shubu abentsēquēn tabadquidobimboec Esus tantiaquido iquec —queshun adonona.

### *Pabadon ēnquimbi chiaid*

<sup>11</sup> Is. Nua-nua icnuc dada uaquin ēmbimbo ēnquimbi dada uanu. <sup>12</sup> Muaquin chuiquidon mibi con tsusedpan chiacpadomboenuidi nametiadquoio iqueque. Aidon chuisho tantienda. Con matses isadaidbo: —Mibi bēdambo iquec —camenuen mibi adometiadquoio iqueque. —Esusuidi chuisho con matsesēn chieshēnquin cuidnushe. Moisesēn chiacpadomboen namenu —quequin mibi shui dēbid dēteshunemetiadquoio icchitec. Aido muasho tantienda. <sup>13</sup> Aden mibi: —Adota —caquidombi Moisesēn chiactedi nainquien icchitec. Adquid yec: —Is. Bēdambo iquebique. Ēmbi chiacpadomboen nēidon naosh —quenuembien mibi shui dēbid dēteshunemetiadquoio icchitec. Aidon chiacpadomboen nainda. <sup>14</sup> Ēbien adtiapimbo iquec. Esus tantiesabimboec: —Ēbibi bēdambo iquebi —quetiapimbo iquebi. Esusuidtsēqui bēdambo iquec. Abi tantiaquid cuidmenquoio icnuec abided cuidadec unēsac caondash cuesten dectanac. —Aidquoio tantiec bēdambo iquebi —caimbi. Aden Esus tantiec: —Ēmbimbo Moisesēn chiactedi naquin Nuquin Papa bēdamboen ismembī —quec ēnēdondabi. Adecbidi Esus tantiec ēbi bunaid ēnash icsate bunenquoio iquebi. <sup>15</sup> —Moisesēn chiactedi naquiduidi Nuquin Papan bēdamboen istsiash —quetiapimbo iquebi. Shui dēbid dēteshuniaidēmbi Esus tantienquoio icsho Nuquin Papan cuidtsiash. Adembidi shui dēbid dētiacmaidēn Esus tantienquoio icshobidi cuidtsiash. Nuquin Papan Mayanēn chuca uaidien Esus tantiaquid Nuquin Papan bēdamboen isquin bēdamboen tabadmec. <sup>16</sup> Ēmbi aden chuisho tantiash: —Ai, abimbo mimbi caique. Adonona —quesho: —Aido Nuquin Papan bēdamboen isquin bēdambo icmepashun —caimbi. Adquido Nuquin Papan: —Con matsesquoio nec —caindac.

<sup>17</sup> —Abimbo chienquien icchitec —ēbi cainda. Esusēn chiaidquoio chiombi. Aidquoio tantiaquin ambi chiacpadomboen nabanta. Ēmbi Esusēn chiacpadomboen nasho isun chieshēnquin cuesaniondashi. Cuesonaid bish abi

iquec. <sup>18</sup> Tanta, con utsibo. Mibi Nuquin Papa chianembi naden. —  
Mimbi nabocpadomboen con Icbo Esuquidistubédtan Cadasia yacnocquido  
bédamboen ista, Papa —quequin Nuquin Papa chianembi. Padi. Aidedi  
chuiquin dada uaombi.

## EPESO YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun, Èbi chuibeneta, caid nebi. Adquidquio icquin mibitedi Nuquin Papan bédambocquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuededta.

<sup>2</sup> Aden Nuquin Papan bédambocquid icmenu caidombo icquin ma Nuquin Papan Nuquin Icho Esuquidistubédtan ènenquiocquin èbi bédamboen isec, quequin mibitedishun tantiapashun. Adembidi, Nuquin Papan bédambo icmenu caido yec abéd iquebi, quequin tantiapashun mibitedishun.

### *Nuquin Papan abéd abuc bédamboec tabadacpadquiocnoc icmiaid*

<sup>3</sup> Edoen, Nuquin Papa, Nuquin Icho Esuquidistun Papa bédambocquid nec. Esuquidistu adquidquibidi neoaic. Aid tantiaquid icsho abéd abuc bédamboec tabadacpadquidquio nuquitedi icmiac. Adoaid yec, Mibi bédambocquid nec, Papa, quequin chiec nuquitedi onquedenec. <sup>4</sup> Nidaid abubédta uabicquin aidènquiocquidtedi uabicquin, Nèidtedquio Esuquidistu tantiaquido icsho èmbi cuèmbanaido iquendac, quequin Nuquin Papan tantiampic. Ambi tantiampicpaden ma nuqui icsaisa icmepanuna. Aden nuqui tantiaquin <sup>5</sup> abi bunacpadomboen Nuquin Papan, Esuquidistu tantiaquido con bacuëbo icmendambi, quiampicpadomboen nèbi adobanec. <sup>6</sup> Esuquidistu tantiaquid nuqui icsho abéd icquid nuqui icmenuen Nuquin Papan abi yacpadquidquio icmabanec. Adoac, Bédambocquid mibi nec, Papa, quequin Nuquin Papa nuqui chuidenec. <sup>7</sup> Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten decanquin unès uapanédash. Adosho isash, Nèbi Esuquidistu tantiaquid èmbi bédamboen isaidquio nec. Mibi cuidenquio yec mibi icsaid bèpiscudobi, quec Nuquin Papa. <sup>8</sup> Naden nanuna, quequin ambi tantiampicpadomboen aton bacuë icmabanac abéd icquido nuqui nec. <sup>9</sup> Abi bunacpadomboen, Icsaquid cuidte bedshunash unèsquid con Mado Esuquidistu iquendac, quequin ambi matses tantiamenquio icpampid nèbi ambi cuèmbanaido Nuquin Papan tantiamabanec. <sup>10</sup> Adoaid iquec con mado abun icquido nidaid yacnocquidobéd chuiquid abentsèqui iquendac, quequin Nuquin Papan tantiampicpadquibi adquidquio icmenu caidquio Esuquidistu iquendac.

<sup>11</sup> Esuquidistu tantiaquid icsho isun ambi tantiampicpadomboen, Con bacuë icmiaido nec, quequin Nuquin Papan cuèmbanaido <sup>12</sup> abia tantiaquido nuqui bédamboec tabadsho isash, Nuquin Papa bédambo iquec, quequin chiec ma utsibo cuèdèmpanuna. <sup>13</sup> Mibi icsaid bedshunash abided cuidadec Esuquidistu unèsapanédash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. <sup>14</sup> Aidèmbi mibi bédambo icmiac Nuquin Papabéd tabadendac. Mibitedi bédamboec tabadsho isash Nuquin Papa bédambo iquec, quequin chiec ma utsibo cuèdèmpanuna.

### *Nuquin Papa chiec onquianiaid*

<sup>15</sup> ¿Bédamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abéd icte bunanec iccuededec, quequin chuisho tantiapombi. <sup>16</sup> Aden tantiashun mibitedi bèpiscudenquiocquin badiadquidèn-badiadquidènquien naden Nuquin

Papa chian-chianembi. <sup>17</sup> Esuquidistun Papa, icsaisambo, tantiaquidquo mibi cadoque. Mibi bēdamboen tantiaquid yacpadquiocnoc min bacuēbo Epeso yacnocquido min mayan icmeban, Papa. Adquido min Mayanēn icmiac mibi tantiadonequidombo ma icpanuna. <sup>18</sup> Adecbidi, Abuc ēbēdi mibi iquendac, quequin mimbi chiacpaden tantiamequin pausunac mibēd icnuequin cainquidombo Epeso yacnocquido ma icpanuna, Papa. Aidēn tantiamiac, Mibi yacno Esuquidistu tantiaquid utsibobēd bēdamboec tabadendabi, quequin Epeso yacnocquidon ma tantiapanuna, Papa. <sup>19</sup> Aden tantiamiac Nuquin Papan nadatiambocquin nabanquin Esus unēsacsho uincuemēdacaden ēbi uincuemendac. Adembidi nadatiambocquin nabanquin Esus tantiaquid ēbi icmiac. Adembidi ēbi bēdambocquid icmebanec, quequin ma Epeso yacnocquidon tantiaquiopanuna, Papa. <sup>20</sup> Esuquidistu unēs uacsho uincuemeshun mibi yacno aidi indoshon min dayunquio mimbi tsadumpanēdac, quequin tantiec Nuquin Papan nadatiambocquin naidquio nec, quequin adomboembidi ēbi indoapēc, quequin tantiacpadomboen ma Epeso yacnocquidon tantiapanuna, Papa. <sup>21</sup> Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibēdec, quequin Esuquidistu min dayunquio tsadunquin utsibo mimbi ismepanēdac, Adquid nebi, chuiquid utsi quetiapimboec. Nuquin Papan nadatiambocquin nac ēnenquiocquin abitedi chuiquidquo Esuquidistu iquendac, quequin Epeso yacnocquidon ma tantiaquiopanuna. <sup>22</sup> Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. <sup>23</sup> Ambi ēndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsēcquiobi Esuquidistu icquin abēd icquido nua pausunaido yec abi yacpadquio ictequid yec abentsēc yacbimboec abēdi nuqui tabadendac.

## 2

### *Nuquin Papan Esuquidistubēd icmiaido*

<sup>1</sup> Mibi icsaquid yec Nuquin Papabēd ictiapimbo iccondac. Adboedi nēbi aidēmbi ēnenquiocquin abēd icquido mibitedi icmiac. <sup>2</sup> Ēnden Nuquin Papa chieshēnquin mimbi tantiacpadomboen nabanondac. Adquid icsho Nuquin Papa chieshēnquid dapan Satanasēn yuaido mibi iccondac. Aidēn Nuquin Papan chiaid niacacpadomboen mibitedishun niacbededpondac. <sup>3</sup> Adquiduidquio yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobēdta Nuquin Papan cuidnu caido nuquitedi icpondac. <sup>4</sup> Adec cuidnu queboedēmbi nuqui tantiec unēsquiocquin Nuquin Papan comapenen nuquitedi tantiamēpondash. <sup>5</sup> Ambi cuidnu caido icsaquido yec abēd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abēd icquido Nuquin Papan nuquitedi icmiac. <sup>6</sup> Esuquidistu nuqui icsaid bedshunacsho abided cuidquin unēs uapanēdash. Unēsacsho isun uincuemeshun abi yacno Nuquin Papan indopanēdash. Adshun abi tantiaquidtedi abuc Esuquidistubēdta ambi indoac bimboecquido icsho Nuquin Papan nuqui bēdamboen isec. Adecbidi abuc Esuquidistubēd icquid nendabi, quequin tantiec nuqui tabadec. <sup>7</sup> Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubēd icquido nuqui icmec. Ma adquid icsho isash utsibo,

Nuquin Papan naid nec, ma quepanuna. <sup>8</sup> Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiembi, quetiapimbo nuqui icnubi, Mibi tantiamiombique. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. <sup>9</sup> Icsaquido icquin bëdamboen naic nuqui icsaid cuidadtiapimbo nuqui iquec. Bëdamboen naic cuidadpebi, quiash abi icsaquid yequi, Bëdambocquid nebi, quec tabadsho isun utsibon icsamboen tantianushe queshun Nuquin Papan icsaisa aton Madoded cuidpanëdash. <sup>10</sup> Nuquin Papan uaido nuqui nec. Aidëmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

*Esuquidistubëd abentsëc yac bimboecquido*

<sup>11</sup> Nuquin Papan, Cuidnu, quenquiocquin comapenen tantiamiaidquo mibitedi icquin mibi ënden tabadaid tantiata. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuënondash. Nuquin Papan matsesquio nebi, quequin shui dëbid dëtemequidquo isadaidbo nec. <sup>12</sup> Adquidquo isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan matses nebi, isadaidbo quiacpadec adtiapimbo mibitedi iccondac. Adecbidi, Ëbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquo yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. <sup>13</sup> Adec aid tantiesa yec icsaquid yec, Nuquin Papa yacno puduednu, quetiapimbochoedi, Matses icsaid bedshunash abided cuidadec Esuquidistu unëspanëdash, quequin tantiaquid icsho aidënquo abi yacno yuedendac. Nëbi aid tantiaquid yec abi tantiaquid utsibobëd abëdi tabadac bimboecsho Nuquin Papan nuqui bëdamboen isec.

<sup>14</sup> Isadaidpembo isash isadaidbo, Ëbëd icquidpenquo nec, quequin tantiec datamëncuenepondash. Adecbidi isadaidbo isash adquiecbidi isadaidpembo datamëncuenepondash. Adquido icboedi ëbi icsaid bedshunash Esuquidistu unëspanëdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamëncuenequo yec matses abentsëc yac bimboecquido yanac. <sup>15</sup> Esuquidistu matsesash nidaidën tabadquin isadaidbo icquin isadaidbon, Naden nata, quequin chiapadomboen utsitedishun natiapimbocnobi Esuquidistun uesquin nabampanëdash icsainquiocquin. Adec tabadquin naimbudsho icsaquid bimboecnuc unës uapanëdash. Aden unësmesho isec Nuquin Papa, Padi. Chën, quenquo icpanëdash. Ëbi yacno isadaidbo isadaidpembobëdtabi con madon yuedendac, quiash chën quenquo icpanëdash. Datamëncueneboedi aido Esuquidistu tantiaquid yanash datamënenquo yanac. <sup>16</sup> Naden nata, quequin chiaidtedi nuqui natiapimbocnoc nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. <sup>17</sup> Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësqin isadaidbo isadaidpembobëdta Nuquin Papan bëdamboen isaido icmeapanëdash. <sup>18</sup> Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuquid aton Mayan meniac. Aden meniac aidën tantiamiac,

Mimbi ëbi tantiec, quec Nuquin Papa chiec Esuquidistu tantiaquidombo onquedenec.

<sup>19</sup> Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid mibitedi iquec. <sup>20</sup> Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tantia. Esuquidistu abia yampid abi yacno yuedanquidquio yec abia nitsinaid cuate nidquidbimboecquid nec. Nuquin Papan chiaid chuibampampidobëd Esuquidistun ëbi chuibeneta caido shubu nitsinaidbimboecquid neoaic. <sup>21</sup> Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaidbimboecquido neoaic. Abi tabadte Icbopadquid icsaisa yampec. <sup>22</sup> Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

### 3

#### *Isadaidpembo Esuquidistu chuibenequid Pabado*

<sup>1</sup> Isadaidpembobëdi ma Nuquin Papa tabadte icnu quequin Esuquidistu chuibenesho quënën nauedaid icquin aidën chiacpadomboen mibi chuibanquidquio nebi. <sup>2</sup> Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. <sup>3</sup> Ëbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. <sup>4</sup> Ëmbi dada uaondaaid bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. <sup>5</sup> Ëndenquio Nuquin Papan Esuquidistu nidmembi, quequin chienquiocpampidëmbi nëbi ambi, Esuquidistu mattses tantiameta, caid aton Mayan nec. Adoac Nuquin Papan, Esuquidistu chuibeneta, caidtedi ambi naden nanuna, quequin chienquiocpampidëmbi aton Mayanën tantiamiac. <sup>6</sup> Ambi nëbi tantiamiaid nad iqueque. Tantia. Chuinu. Isadaidpembo Esuquidistu tantiaquido isadaidbo Esuquidistu tantiaquidobëd Nuquin Papa yacno ënëdenquio yec tabadtequido nendac.

<sup>7</sup> Nuquin Papan, Cuidnu, quenquiocquin nadatiambocquin ëbi ismi-aid yec ambi Esuquidistu chuibeneta caid ambi namiaid icsho ambi nadatiambocquin nabamiaidquio nebi. <sup>8</sup> Esuquidistu tantiabicquid utsi bëdiactsëc icsaquid icnubi comapenec icsaquidquio icsho Nuquin Papan Esuquidistu tantiaquid icmeshun Esus bëdambo yaidbëdtabi abëd tabadte bëdaidquio tantiamequiopondashi. Adembidi ambi, Esuquidistu chuibeneta, caidquio nebi. Adquid icquimbi Esuquidistun mattses bëdamboen tabadmenu, quequin tantiaid dadpen icnuc aidedi uesquin chuitiapimbo iquebi. Aidedi mattsesën bëdamboen tantiatiapimbo icoapec. <sup>9</sup> Èbëdtambi abitedi uampidquio Esuquidistu aid tantiaquido ëbi yacno yuedquid iquendac, quequin Nuquin Papan tantiamenquiochoedi nëbi mattses tantiamenuen Esuquidistu chuibeneta caidquio nebi. <sup>10</sup> Aden ëbipadquidon Esuquidistu chuibeniac icsaquid icboedi Esuquidistu tantiaquid dadpen yanac. Adsho isun aidedi Nuquin Papan Esuquidistubëd abentsëc yacnimboecquid abipadquid ambi tantiampicpadomboen icmebanec. Aden icmebansho isun abi yacno tabadquin namequidon tantienquiochoedëmbi nëbi tantiendac. Nuquin Papan, Yuecshun naden nanuna, quequin ambi bëdamboen tantiampicpadomboen nabanac nëbi abëd icquid dadpen iquec, quequin Nuquin Papan abi yacnoshon uaidon tantiec. <sup>11</sup> Mattses bëdambo icmetequid Esuquidistu iquendac, quequin ambi tantiampicpadomboen Nuquin Papan

Esuquidistu Nuquin Icho icmepanēdash. <sup>12</sup> Aton mado Esuquidistu ēbi icsaid bedshunash unēsash uincuenash Nuquin Papan dayunquio iquec, quequin tantiec dacuēdenquio yec Nuquin Papa chiec nuqui onquec. <sup>13</sup> Adecbidi, Esuquidistu chuibenesho bedshun Pabado quēnēn nauedac, quequin tantiec chieshenquiocquin Esuquidistu tantiata, Epeso yacnocquido mibi caimbi. Ēmbi chuibanac Esuquidistu tantiaquid yansho Nuquin Papan abēdi tabadmenuequin Nuquin Papan ambi, Bēdamboecquid icmenu, caid mibitedi neque. Chieshenda. Adembidi Pabado chiac ēbipadquid isadaidpembo utsi-utsiec dadpen Esuquidistu tantiaquid yampec, quequin tantiec tabadta.

*Epeso yacnocquido tantiec Nuquin Papa chiec Pabado onquiaid*

<sup>14-15</sup> Nuquin Papan isadaidpembo Esuquidistu chuibeneta cac, chuibenesho quēnēn nauedaid icquin ēmbi chiac Esuquidistu tantiaquid isadaidbobēd isadaidpembo Nuquin Papan matses yanash aton shubun icquido nec. Nuquin Papan cuēmbanaido nec, quequin tantiec danēshēn sebudash aid naden chiec onquebi. <sup>16</sup> Mibi icsaisa icquin mimbi tantiacpaden Epeso yacnocquido nua pausun, Papa, ma natiamiantequid icnuc Esuquidistu tantiesa yanenquiocpanuna. <sup>17</sup> Aden pausunac ma aido Esuquidistu tantiadonequidombo icpanuna. Aido mimbi tantiamiac ēnēdenquio yec utsibēd tantiananec tabadquid ma Epeso yacnocquido icpanuna. <sup>18</sup> Aden pausunac, Ēbi utsibobēdta comapenen tantiaquid Esuquidistu nec. Ambi bēyuc matses uaid tantiaquinc, aidēn tsyuecquid ēnden icpampido tantiaquinc, nēbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanēdash, quequin ma Epeso yacnocquidon tantiapanuna, Papa. Adembidi abuc bēdamboeshē yacno icboedēmbi matses icsaid bedshunacsho Nuquin Papan cuidpanēdash, quequin ma Epeso yacnocquidon tantiaquiopanuna, Papa. <sup>19</sup> Aden tantiaquidquio yec Esuquidistu unēsēdash, quequin tantiec papuduedash Esuquidistun matses tantiacpadquidquio Nuquin Papan ma mibitedi icmebampanuna.

<sup>20</sup> Nadquid Nuquin Papan ēbi icmetsiash, quequin nuqui tantiatiapimbocnobi nadatiambocquin nabanquin ambi tantiacpadomboen abi yapadquidquio nuqui icmebanendac. <sup>21</sup> Adoac ma abi tantiaquidon ēnenquiocquin Nuquin Papan Esuquidistubēdtan naid chuibampanuna. Ma aidon tsyuecquidontsen adembidi chuioapanuna. Ma nuquin tsyuecquidon tsyuecquidontsen adembidi chuioapanuna. Ambi uaid utsitedi naimēdec, quenubi ma adomboembidi Nuquin Papan Esuquidistubēdtan naid matsesēn chuibanoapanuna. Ai, ma ēnenquiocquin adopanuna.

## 4

*Abentsēc yacimboecquido Esuquidistu tantiaquido*

<sup>1</sup> Nuquin Papan isadaidpembo Esuquidistu chuibeneta cac chuibenesho bedshun quēnēn nauedaid icquin naden mibi chiembique. Tanta. Esuquidistu tantiaquido aton shubun icquido yec icbo bēdamboec tabadacpadquiec tabadteneta. <sup>2</sup> Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abēd onquequin abi icsaid ēmenuequin chuiban. <sup>3</sup> Nuquin Papan Mayanēn abi utsibēd bēdamboec tabadaid tantiamiacpadquiec Esuquidistu tantiaquid utsibobēd bēdamboec tabadteneta. <sup>4</sup> Esuquidistu tantiaquidtedi abentsēc yacimboecquid nec. Abentsēcquiobi mibitedi meniaid aton Mayan iquec. Adquiecbidi Nuquin Papa yacno nidash aidbēd tabadec abipadquid yec icsaisa iquendabi, quequin abuc

indotequid mimbi caintequid abentsëcquiobi iquec. <sup>5</sup> Abentsëcquiobi mibitedishun con Icho caid iquec. Abentsëcquiobi mibitedishun tantiaidquio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yac bimboecquid nec. <sup>6</sup> Abia yampid Nuquin Papa Esuquidistun Papambo abentsëcquiobi iquec. Abitedi uaquidquio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

<sup>7</sup> Esuquidistun ambi tantiacpadomboen abi tantiaquid abentse-abentsen pausunec. Aden pausunac aid tantiec tabadendac. <sup>8</sup> Èndenquio chiampicpadembi nëbi pausumbanec. Naden ènden chiampid neque. Tantia. Chuinu. “Nuquin Papan abucquio indoac, Èbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin ambi tantiacpadomboen pausumbanac,” quequin ènden chiampid nec. <sup>9</sup> “Abucquio indoac,” quequin ¿mitsipadomboen tantiampampiba? mibi quepec. Aidquio chuinu. Tantia. Esuquidistu abia yampid yec abucquio tabadboedi, Matses icsaid bedshunash ëbided cuidadnu, quianacsho nidaidënshun chidon tishpanëdash. <sup>10</sup> Aid nidaidënshun tishacsho unës uacsho uincuemequin Nuquin Papan aidquio abuc abi yacno indoshon abitedi chuiquidquio Esuquidistu icmepanëdash. Adquid icmiac ma ëbi tantiaquidobëd icpanueshun abipadquidquio aton Mayan aido menebanec. <sup>11</sup> Aden aid menebanac aidënquio Esuquidistu tantiaquido utsi-utsien nadquid icmeganec: Esuquidistu chuibenequid utsi-utsien icmeganquimbi, Nuquin Papan naden nanuna, quequin chiaid chuibanquid utsi-utsien icmeganoaic. Adquid icmeganquin utsi-utsien Esuquidistu chuibenequidon, Esuquidistu chuibanta, caidbidi aido icmeganquin utsi-utsien abëd iccuededquido isbanquin chuiquin tantiamequid icmeganoaic. <sup>12</sup> Bëdamboec tabadtenequido ëbi tantiaquidtedi icmeta, cac aidën tantiacpadomboen adquido icmeganac <sup>13</sup> ma shubu dapan icquid dadpen yanec abentsëc yac bimboec abi tantiadonequido icpanuna. Aden Nuquin Papan mado tantiadonec ambi uesquin pausunaidquio yec abipadquidquio iquec icsaisa iquendac.

<sup>14</sup> Ambi pausunaidquio icquin abimbo chiac bimboen utsibon chuisho tantiabenabicquidën badedquio tantiacpaden tantienquio nuqui iquendac. <sup>15</sup> Tantaranec abimbo chuinanquido Esuquidistu tantiadonequido icmiac chuiquid Esuquidistupadquid yanash abëdi abentsëc yac bimboecquid nuqui yanendac. <sup>16</sup> Èbi chuiquidquio Esuquidistu nec, quequin ambi chiacpadomboen nabanquidquio abi tantiaquidtedi yec abëdi abentsëc yac bimboecquid nuqui iquec. Esuquidistun pausunacpadomboen abentsëcshun-abentsëcshunquien nabanequi tantiananquieci abi tantiaquidtedi Esuquidistupadquidquio abëdi abentsëc yac bimboecquid yanendac.

#### *Esuquidistun nua pausunacpadquieci tabadteniaid*

<sup>17</sup> Esuquidistubëd abentsëc yac bimboecquid abi tantiaquidtedi iquendac, quiash, aidpadquid icnu, quec ènden icsamboec tabadnëdacadquieci tabadenda caimbi mibi. Esuquidistun ëbi chuibeneta caidquio icquin dada uaquin mibitedi aden chiembi. Esuquidistu tantiesan ambibi tantiacpadomboenuidi tantiec. Adecbidi ambibi tantiacpadomboen nabanec. <sup>18</sup> Pashuac bimboen tantienquio iquec. Nuquin Papabëd tabadte iquec, utsibo qesho tantiesa yec, Tantiatiapibi, quepec aido. <sup>19</sup> Icsaquid nebi, quequin badedquio chienquio aidon iquec. Adquid icsamianquidën yuaid yec,



Icsanu, quiacpadec tabadec. Adec icsasho utsin istemaid nec. <sup>20</sup> Adpenquo Esuquidistun tantiamequin pausunaid iquec. <sup>21</sup> Esuquidistu chuibansho Epeso yacnocquidon tantiaposh, quequin chuisho tantiapondambi. Mibi, Aid tantiaquid nebi, qesho tantiashun Esuquidistu chuibenequidon, Abëd icquid yec abipadquid yanebi quec adquiecbidi tabadteneta, quequin mibi chuipondash. <sup>22</sup> Adoac mimbi tantianëdacpadec tabadoainda. Mibi ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. <sup>23</sup> Mibi icsate bunaid ënta. <sup>24</sup> Adsho isun ma Esuquidistun tantiacpadomboen tantiapanu qeshun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacpadquieci bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. <sup>25</sup> Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta. <sup>26</sup> Nëishëc icsainda. Nëishash abi ushëmbi bëdanta. <sup>27</sup> Satanasën yuanushe quiash badedquo bëdanta. <sup>28</sup> Ampequid icboedi Esuquidistu tantiaquid yanshun ampanda. Adquid icboedi chonoadquin mitsana bedshun utsin na nibëdsho isun menequid icta.

<sup>29</sup> Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. <sup>30</sup> Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquo yampec. Aid unësquo icmenda. <sup>31</sup> Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquo yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. <sup>32</sup> Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquieci utsi icsaid bëpiscudoata.

## 5

<sup>1</sup> Nuquin Papan bacuëbo yec <sup>2</sup> tantiananec tabadteneta. Nuquin Papan chiampicpadquieci Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquo icsho isun Nuquin Papan bëdamboen isaidquo Esuquidistu icpanëdash.

<sup>3</sup> Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboeci iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. <sup>4</sup> Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboeci onquequid utsi uain chuiquin mamënshunesambo icta. <sup>5</sup> Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. <sup>6</sup> Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. <sup>7</sup> Adquidbëd icsainda.

<sup>8</sup> Ĕnden Esuquidistu tantiesa icquin inchēshquiocnoc isac bimboen tantienquo icboedi nēbi Esuquidistu tantiaquid mibitedi yansho ambi tantiamebaniaido icquin badiadnuc isucunac bimboen tantiaquiota. Aden tantiec Nuquin Papan bacuēbo yec Nuquin Papan tantiamiacpadquiec bēdamboec tabadteneta. <sup>9</sup> Esuquidistun ambi tantiacpadomboen pausunac abi yacpadquiec nuqui bēdamboec tabadtenendac. Adembidi aid yacpadomboen abimbo chuidenequid icta. <sup>10</sup> ¿Nadec tabadshodabi Nuquin Papan bēdamboen istiashe? Tanu, quequin adomboen nabanec tabadteneta. <sup>11</sup> Utsibēd icsainda. Utsi icsadenenubi mibi bēdamboec tabadtenesho isun abi icsaid utsin ēmpec. <sup>12</sup> Icsaquidēn ompoquin naid chuitemaid nec. <sup>13</sup> Adquidēn Esuquidistu tantiaquid bēdamboec tabadtenesho isun, Icsambocquid nebi, qeshun Esuquidistu tantiabempec. <sup>14</sup> Bēdamboec tabadquin ismedeniac icsambocboedēmbi bēdamboen tantiabentsiash. Esuquidistu tantiaquido chuiquin dada uaid nad iqueque. Tanta. Chuinu.

“Unēsac bimboen tantienquicboedi isucunshun tantiabenac bimboec bēdamboec tabadta.

Adquid icsho Esuquidistun mibi nua pausunendac.”

<sup>15</sup> Adec bēdamboec tabadnuc Esuquidistun tantiamiacmaid tabadacpader tabadenquo yec Esuquidistun tantiamiacpadquiec tabadteneta. <sup>16</sup> Icsaquid dadpen iqueque. Aidpadquid iquenda. Esuquidistun pausunaid mibitedi bēdamboec tabadtenesho isec ma Esuquidistu tantiesa icboedi abi tantiaquid yampanuna. <sup>17</sup> Mimbi icsamboen tantiacpaden nabanenda. ¿Atotsi mimbi ēbi namepatsia? quequin Nuquin Papa chui. Aden abi chuisho Nuquin Papan mibi tantiamiacpaden adobanta. <sup>18</sup> Icsachitomane quequin nua paēmbocquid aguenda. Aden aquec icsaindac. Icsate bunenquicquin Nuquin Papan Mayanēn tantiamiacpadomboen nua pausunaid icquin bēdamboen nabanta.

<sup>19</sup> Adec icsate bunenquicquin Esuquidistu tantiaquid utsibobēdtan Nuquin Papan chiaid chuiquinc, chuiquid dapa Dabidēn dada uampid sadmo caid utsi-utsien chuiquinc, cuēdēnte utsi chuiquinc cain chiec cuēdēnteneta. Adec cuēdēnquin Nuquin Icbon naid chuideneta. <sup>20</sup> Esuquidistu tantiaquid icsho Edoenēn Nuquin Papan bēdambo icmiaidtedi yec aidēn naid chiec onquedeneta.

### *Utsi tantiaquin nashunta quiaid*

<sup>21</sup> Esuquidistu con icbo nec, quequin ambi chiaid niacmane qeshun utsi tantiaquin nashunta.

<sup>22</sup> Adembidi Esuquidistun chiacpadomboen dadan inaidēn min bēnēn chiacpadomboen nabanta. <sup>23</sup> Adembidi abi tantiaquidtedi chuiquidquo Esuquidistu nec. Abi yacno indoshon ēnēdenquo yec icsainquicnoc tabadmendac. Adembidi aton chido chuiquidbidi aton bēnē nec. <sup>24</sup> Esuquidistun chiacpadomboen abi tantiaquidon nabanacpadomboen aton bēnēn chiaid naquidquo aton chido neoaic.

<sup>25</sup> Esuquidistu abuc tabadboedi abi abuc bēdamboec tabadtequid tantienquo yec unēs uanushe quenquo yec matses tantiec nidaidēnshun tishaid yec matses icsaid bedshunash abided cuidadec unēs panēdash. Abuc ēbēdi abentsēc yac bimboecnuc tabadmenu, quec unēs panēdash. <sup>26</sup> Adecbidi, Ĕbi tantiaquido icsaisa icmenu, quish abided cuidadec unēs panēdash. <sup>27</sup> Adecbidi, icsaid nibēdquid bēdaidquo abi tantiaquido icmeshun Nuquin Papa yacno yuedshun, Ĕmbi yuedboed min shubun ictequid nendac, quequin ismembi, quec Esus unēs panēdash. <sup>28</sup> Adomboembidi chido inquidēn abibi tantiadacpadomboen ma con chido tantiaquin, Bēdambocquid icmenu,

quequin nashundeniash ma aibdēdi bēdambocquid icsho Nuquin Papa yacno Esuquidistun yuedpanuna. Aton chido tantiaquid abibi tantiadquidbidi nec. Aibdēdi abentsēc yacimboecquid neoaic. <sup>29</sup> Abibi chieshēmēdesa dada nec. Bunquioquin peshun aquec. Adembidi iquenquin cuēte cuēc. Esuquidistun abi tantiaquido abēd icquido icsho aido tantiaquin nabanacimboen <sup>30</sup> dadan abēd icquid aton chido icsho aidi tantiaquin nashunquid. Dadaba uashun aidēn shictodobi chicshun chido uapampic. Adoshon dadan nami aton canitebēdta chido uashun daēd uac abentsēc yacimboec aid daēdi yanac. <sup>31</sup> Nuquin Papan ēnden dada uampid nad iqueque. Tantia. Chuinu. “Aibdēd icnu, queshun bedash aton papa aton titabēdta nianacimboec daēdash aton chidobēdi abentsēc yacimboec tabadtenec.” <sup>32</sup> Adec dada aton chidobēd daēdash abentsēc yacimboecnuc ambi icmiampicpadec Esuquidistu tantiaquido aton shubun icquido abentsēc yacimboec tabadendac, quequin chiec. <sup>33</sup> Nēbi adomboembidi chido inquid ambi inaidbēdta chuoaimbique. Tantiata. Mibibi tantiadacpadomboen min chido bēdamboen tantiata dadan. Con bēnē ēbi chuiquid nec, quequin aidēn chiaid tantiata chidon.

## 6

### *Bacuēbobēdta bacuēchoquid tantiamequin chuibanaid*

<sup>1</sup> Bacuēbon Esuquidistu tantiaquid icquin papan chiacpadomboen chieshenquiocquin nabanta. Titan chiacpadomboembidi chieshenquiocquin nabanoata. Aidon, Nata, quequin chiaid cacuidenquiocquin nata. <sup>2</sup> Nuquin Papan, Naden nata, quequin ambi chiaid cuēnoten dada uaid Moises meniampid abentsēc nad iqueque. Tantia. Chuinu: “Ēbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: <sup>3</sup> “Amēn anibēdtan chiacpadomboen naquid Nuquin Papan bēdambo iquebi camiaidquio iquendac. Adecbidi nidaidēn yuec tabadnuequin adobanta,” quepampic.

<sup>4</sup> Amēn anibēdtan con bacuēbo chieshmemane queshun bēdamboen chuiquin tantiamequin isme. Adembidi, aido pemeshun acme. Adembidi, Ēmbi chiacpadomboen ma nabampanueshun Nuquin Icbon chiaid tantiamenu, quequin adobanta.

### *Utsin yuaido yuaquidobidi tantiamequin chuibanaid*

<sup>5</sup> Yuan mimbi Esuquidistun chiacpadomboen nabanacpadomboembidi mibi yuaquidēn chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidēn chiacpadomboen nabanta. <sup>6</sup> Min icbon chuishun isnuc ambi chiacpadomboen bēdamboen mimbi nabanacpadomboembidi min icbon isenquiocnoc nabanoata. Esuquidistu con Icbo nec, quequin aidēn chiacpadomboen nanuna, quequin nidaidēnshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac. <sup>7</sup> Min Icbo Esuquidistun aton Papan chiacpadomboen chieshenquiocquin nacpadomboen nidaidēnshun min icbon chiacpadomboen chieshenquiocquin nabanta. <sup>8</sup> Bēdamboen nabanquido yuacmaidbēdta yuabo Nuquin Papan bēdamboen cuidquin menendac, quequin tantiaquin bēdamboen nabanta.

<sup>9</sup> Yuaquidon min yuabo chieshēnenquiocquin bēdamboen chuibanta. Mibi cuesnu, quenquiocquin ancata. Min Icbo abucquio tabadquid min yuabon Icbobidi nec. Aidēn abitedi isec: Nēidic yua icsho daēdpectsēc pausunembi.

Utsibic, abi yuaquid icsho nua pausunembi, quesa Nuquin Papa nec. Yuaquid isacpadomboen yua isec.

### *Satanas cuemetequid dasiuidaid*

<sup>10</sup> Nuquin Icbo nadatiambocquin nabanquid iquec, quiash aidënquo nua pausunaid icta. <sup>11</sup> Satanacacumetequid dasiuiu, quiash, Nuquin Papa mibi nua pausunesho, Ai, cata Satanasën mua uaquin bedchitoshe queshun. <sup>12</sup> Matses isadacpadpenquo nami intacbed isadesa Satanasbed icquido nec. Aidtedi Nuquin Papan abi tabadaid tédion tabadmec. Aido icsamianquido nec. Matses yuanuequid Satanacacumetequid nec. Nuquin Papan uaid tantiash bedambo mibi iquendac, quequin muaquin aidon chiec. <sup>13</sup> Aden muaquin chuiquid aidtedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiateguic ushë chonoc Satanacacumetequid mibi icsamenuec choacsho bedambocacumetequid mibi mibi nidtoash Esuquidistu tantiaquid yec nidendac. <sup>14</sup> Aid cacumetequid mibi mibi nidquid icnuec Nuquin Papan abimbo chuiquid nacneshëdambocacumetequid tabadteneta. Adembidi, Nuquin Papan abi bedamboec tabadtequid shictoncambocacumetequid tabadteneta. Adec tabadec mibi mibi nidtoash mibi nidendac. <sup>15</sup> Adecbidi, Esuquidistu tantiaquid ebëd icquid iquendac, quequin Nuquin Papan tantiamequin pausunaidën tapucudambocacumetequid adamboembidi chuibenequin Satanacacumetequid nidambocacumetequid mibi mibi nidendac. <sup>16</sup> Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquo dëcatemënquiash mibi mibi nidendac. Aden Nuquin Papan tantiamequin pausunaidënquo dëcatemënquiash Satanacacumetequid mibi tantiamenequin pian sedo-sedoambocacumetequid pausuntemaid yec mibi mibi nidendac. <sup>17</sup> Adecbidi, Esuquidistu tantiaquid embi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiambocacumetequid tantiec tabadteneta. Aden pausunac tabadquin Satanacacumetequid, Esuquidistu mibi bedec choenquo iquendac, quesho cacumetequid mibi mibi mibi enenquocquin, Esuquidistu choate cainembi, quequin mibi mibi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiacquid icquin mibi chuisho tantiash Satanacacumetequid cuenendac. <sup>18</sup> Adecbidi, Nuquin Papan chiaid aton Mayanën tantiamiacquid icquin utsibo tantiaquin baded-badedquic Nuquin Papa chiec onqueta. Satanacacumetequid icsamenusho quiash Esuquidistu tantiaquid utsibo Nuquin Papa chiec onquedeneta.

<sup>19</sup> Ebitsen tantiaquin Nuquin Papa chuioata. Dacuëdenquocquin Nuquin Papan tantiamiacpadomboen Esuquidistu abi yacno yuedanquidquid nec, quequin Pabado chuime, Papa, quequin ebitsen chuioa. <sup>20</sup> Esuquidistun chuibeneta caid icquin abi chuibenesho mëtaneshun quënën nauedaid nebi. Adoaid ebi icnuc mibi tantiacpaden chuibanquid Pabado icme, Papa, quequin chuioata.

### *Enquin chiaid*

<sup>21</sup> Nëbi ebëd icquid chiembique. Tanti. Tiquico mibi yacno nidec. Aidbidi Esuquidistu tantiaquid icsho nuqui con utsi caid nec. Nuquin Icbon chuimiacquidquid aidi nec. <sup>22</sup> Mibi yacno puduedshun embi naidtedi ebi tabadaidbedta mibi chuibanendac. Ebi mibi chuisho tantiash, Bedambo iquebi, quependac Epeso yacnocquido, quequin Tiquico mibi yacno nidmembi.

<sup>23</sup> Mibëd icquido Esuquidistu tantiaquid utsibobëd ma bëdamboec tabadpanuna caimbi mibitedi. Esuquidistun Nuquin Papabëdtan abi tantiamiantequidbëdta utsi tantiatequid pausunaid ma icpanuna caimbi mibitedi.

<sup>24</sup> Ënenquiocquin Nuquin Icbo tantiaquidtedi ma abipadquid icpanuna.

## PIDIPOS YACNOCQUIDON ISTE

### *Pabadon tauamboen chiaid*

<sup>1</sup> Esuquidistun yuambo Pabado nebi. Esusën yuabidi Timoteyo caidbëd iquebi. Aidbëd icquin shubu dadpen icquid Pidipos yacnocquido Esus tantiaquidtedi mibi chuiquin dada uaimbi. Mibi nashumbanquido chuiquinc mibi chuiquid dapabo chuiquinc utsibotedi chuiquinc caimbi. <sup>2</sup>—Con Icho Esusbëdtan Pidipos yacnocquido bëdamboen isquin bëdambo icmeta, Papa —quequin mibi Nuquin Papa chianembi.

### *Pabadon Nuquin Papa chianiaid*

<sup>3</sup> Nadembidi mibi tantiaquin Nuquin Papa chianembi. —Pidipos yacnocquido Esus tantiaquido mimbi bëdamboen namiaido nec. Aden namequid yec mibi bëdambo iquec, Papa —quequin chianembi. <sup>4</sup> Aden mibi tantiaquin Nuquin Papa chiec bëdambo yec cuishonquebi. <sup>5</sup> Ënden ëmbi chuibanac Esus tantiabenquin mimbi ëbi piucquid meniondac. —Esusën naid ma Pabadon matses utsibotsen chuibanu —queshun meniondashumbic nëbi adembidi ëbi menete mimbi bëmeoac. Aden mimbi bëmeoaid isash mibi tantiec cuishonquebi. <sup>6</sup> Nuquin Papan tantiamiac mimbi Esus tantiabenondac. Adembidi Esus tantiamequin Nuquin Papan mibi bëdamboen tabadmec. Esus padpidec chote ushën abëdi tabadmenuen Nuquin Papan adembidi mibi bëdamboen tabadmendac. Adembidi mibi tantiec cuishonquebi. <sup>7</sup> —Ëbëd tantiananquidombo nec —quiash adebi. Esus chuibenesho quënën nauedondashi. Aden quënën nauedacsho: —Mimbi icsamboen naid chiec cho —cac nidshun: —Abimbo chuibanombi —quequin chuiquid dapa chuideniondami. Aden chiac puduemenquio icquin abi quënën tsadunebi. Adquid icsho chieshënenquio icquin mimbi ëbi bëdamboen tantiec. Nuquin Papan ëbi icmiacpadquid chieshtoenuio icquid icquin mimbi ëbi adoec. Adsho mibitsen tantiembi. <sup>8</sup> Esusën matses tantiacpadomboen mibi tantiac unësquio iquec. Mibi istiadquio iquebi. Ëbi adsho tantiash Nuquin Papatsen: —Abimbo caic —quendac. <sup>9</sup> Aden mibi tantiaquin Nuquin Papa chianembi. —Aido bëdiactsëc tantianansho comapenen tantianamequio, Papa. Adembidi mibimbo tantiamequinc Esus tantiamequinc mimbi chiaid tantiamequinc cata. <sup>10</sup> Aden tantiamiac: “Nadec tabadec bëdambo ictsiabi. Adec tabadenquio yec icsambo ictsiabi,” quequin bëdamboen tantiendac, Papa. Aden tantiaquid yec chieshtoenuio icquin Esus tantiec bëdamboec tabadendac. Adsho abi chote ushën Esusën: “Icsambo icquid mibi nec,” catiapimbo iquendac. <sup>11</sup> Adec con Icho Esus tantiec bëdamboec tabadsho isun: “Bëdamboen tabadmec Nuquin Papa bëdambo iquec,” quetsiash utsibo, Papa —quequin Nuquin Papa chianembi mibi tantiaquin.

### *Utsibon Esus chuibeniaid*

<sup>12</sup> Quënën nauedac ëmbi Esus chuibenetiapimbo icnubi utsibon chuibeniac utsin-utsinquien Esus tantiabenac caosh. <sup>13</sup> Nëshun shubu dadpen icquid Doma yacnoshon: —Quënën nauedaid cuenushe —quequin ëbi isquido sondadon: —Esusën naid chuibanansho Pabado quënën nauedac —quequin tantiec. Aidon chiac nëmbo icquido utsitedishun adembidi tantiec. <sup>14</sup> Quënën nauedaqui dacuëdenquio iquebi. Ëbi adquio icnuc: —Pabadon nacpadomboen dacuëdenquio icquin Esusën naid chuibanembi —quepac caosh Esus

tantiaquido dadpen. Adshun dacuëdboedombi dacuëdenquio yanquin Nuquin Papan chiaidquio chuibeniac caosh.

<sup>15-16</sup> Aidon ëbi bëdamboen tantiaquin Esusën naid chuibenec. —Pabado tantiembi. Esusën naid chuibenesho bedshun quënën nauedac aidën natiapimbo icnuc ëmbiquien nanu —quequin ëbi bëdamboen tantiaquin Esusën naid chuibeniac caosh. Utsibombien ëbi chieshënquimbi Esusën naid chuibeniac caosh. —Quënën tsadunac ma Pabado mëyadbudchitono. <sup>17</sup> Aidën chuibantiapimbo icnuc ëmbiquien nanu. Aden ëmbentsëqui chuibanac dadpeshun tantiashun: “Mibi bëdambo iquec,” ëbi catsiash —quequin Esusquio tantienquio icquimbi Esusën naid chuibenec. <sup>18</sup> —Ëbi chieshënec —¿quiashtabi nëishpe? Padenquio. —Ëbi chieshënquidon ëbi bëdamboen tantiaquidobëdtambi Esusën naid chuibanac matses utsibo utsi-utsiec Esus tantiaquido yanec —quiash bëdambo yec cuishonquebi. Adecbidi cuishonquebi: <sup>19</sup> —Pidipos yacnocquidon Nuquin Papa ëbi chianiac caosh —quiash. —Mëyadsho Pabado chieshtomenda, Papa. Abi quënën nauedquidon puduemequin nidmeta, Papa —quequin mimbi chiacpadomboen namenuen Nuquin Papan Esuquidistun Mayan menequin cuesambo icmiac chieshtoenquio iquendabi. Adembidi aidën nac quënën tsadenquio iquendabi. <sup>20</sup> Ëmbi naondacpadomboen dacuëdenquio icquin Esusën naid chuibantiadquio iquebi. Chieshtotiapimbo iquebi. —Ma utsibon: “Esuquidistu bëdambo iquec,” canu —quiash aduidequi iquebi unësabi yec. Utsin: —Cuesunechitono —caqui adecbidi chieshtoenquio ictsiabi.

<sup>21</sup> Unësabi Esuquidistu tantiec bëdambo iquebi. Unësash Esusbëd tabadequic bëdamboshë ictsiabi. <sup>22</sup> ¿Mitsipadtebi bumpeba? ¿Unëstedabi bumpeba? ¿Unësenquio yec tsadtedabi bumpe? Unësabi icquin ëmbi Esusën naid chuibanac utsibon Esus tantiabentsiash. <sup>23</sup> Nuquin Papa yacno nidash Esus isec bëdamboshë ictsiabi. Esus iste bunquebi. <sup>24</sup> Aden tantiequi: —Unësabi yec Pidipos yacnocquido Esus tantiaquido Esus bëdamboen tantiamec ano nidtsiabi —quequin tantiec unëstiapimbo icoaibi. <sup>25</sup> Unësabi yec mibi yacno nidoatsiabi. Aden tantiec: —Nuquin Papan nëbi ëbi unës uamenquio iquec —queoaibi. Mibëd tabadquin Esusën naid bëdamboen chuibantsiambi. Adoac bëdiactsëc Esus tantiatsëcboedombi Esus tantiaquiec mibi bëdambo ictsiac. <sup>26</sup> Ëbi choacsho isash: —Pabado padpidec chomequid Esus bëdamboshë iquec —mibi quetsiac. Adec mibi cuishonquetsiac.

### *Chieshtoenda, quequin Pabaton chiaid*

<sup>27</sup> Ëbi ano nidtiapimbo icnuc Esusën chiacpadec chieshtoenquio yec bëdamboec tabadta. Quënën ëbi nauedboedën puduemiac mibi yacno nidshun mibi bëdamboec tabadsho isash: —Pidipos yacnocquidon ëmbi chiacpaden naic —quetsiandabi. Nëbi mibi yacno nidtiapimbo iquebi. Adnuc mibi istanquidon: —Chieshtoenquio icquin Esus tantiec cuëshëdenquio yec Pidipos yacnocquido bëdamboec tabadosh. <sup>28</sup> Esus chieshënquidon: “Esusën naid chienda. Cueschitomane,” caqui dacuëdenquio icquin Esusën naid adembi chuibanosh —quequin mimbi naid chuisho tantiash bëdambo ictsiabi. Adec cuesambo yec nuqui: —Nuquin Papan icmiacpadec dacuëdenquio iquebi. Ëbi dacuëdenquio icmequidën ambi chiacpadomboen ëbi chieshënquido unësacsho icsambo icquido cuidacno nidmendac. Ambi chiacpadec Esus tantiaquid yec unësashini Nuquin Papa yacno tabadendac —quequin nuqui tantiatsiac. <sup>29</sup> —Con Mado Esus tantiasho utsibon chieshëntsiandac —quequin Nuquin Papan tantiacpadomboen utsibon mibi chieshënendac. <sup>30</sup> Ëbi nacpadomboen mibi chieshënoaic. Mimbi isnuc ëbi

chieshë nondash. Adembidi ëbi chieshënoaic nëbi. Nëid dada uaid isquin: — Pabado padpiden chieshënoac — quequin mimbi tantiendac.

## 2

### *Utsi tantiec tabadta, quiaid*

<sup>1</sup> Tanta, con utsibo. Mibitedi chuinu. ¿Mitsipadquio Esus tantiaquido icpec? Esuquidistu tantiaquiec dayacquio yac bimboec iquec. Adecbidi Esusën tantiaido yec bëdambo icquido nec. Adecbidi Nuquin Papan aton Mayan abëd icmequin bëdamboec tabadquid icmiaidobidi nendac. Adoaido matses tantiaquidombo nec. <sup>2</sup>—Adquidbidi nebi — quec adquiecbidi bëdamboec tantianancuededta. Ëbi cuishoncamenuc adta. Abitedi: —Esusën chiacpadomboen nanuna — quecuededec chieshënanenquio yec bëdamboec tabadta. <sup>3</sup>Nadec onquec tabadenda. —Ëbiuidtsëqui bëdamboshë iquec. Con nauidsëqui nanu. Con nauidsëqui bednu — quec mibiuidtsëqui tantiadec tabadenda. — Ëbi bëdapabi icnuc utsibo bëdamboshë iquec. Aido nashuntiadquio iquebi — quec bëdamboec tabadta. <sup>4</sup> Mimbi tantiacpadomboenuidi nainquio icquin utsin tantiacpadomboentsen nata. Mitsanauidi tantienquio icquin utsibo nashuntetsen tantiata.

<sup>5</sup> Esuquidistun nacpadomboen naic mibi bëdamboshë ictsiac. Aidën chieshtoenuio icquin Nuquin Papan chiacpadomboenuidi napanëdash.

<sup>6</sup> Aton Papa Nuquin Papapadquidquio yec Esus abitedishun Icbombo nepanëdash.

Aton Papabëd yec bëdamboshë icboedi: —Padi icnuna. Nuquibi namec bëdambo iquebi — quenquio yec Nuquin Papan chiacpadomboen naic auëshquio chopanëdash.

<sup>7</sup> Adec aton Papan yuabimboecquid yanash ambi chiacpadec matsespanëdash chidon tishac.

<sup>8</sup> Adashic matses yec aton Papan chiacpadequi abided cuidadec unëspacaondash.

Matses icsamboshë icquido cuidac bimboen cuesten dectanquin icsaisambobi Esus unës uapac caondash.

<sup>9</sup> Aden ambi chiacpadomboenuidi Esusën nasho isun Nuquin Papan uincuemeshun abi yacno chomeoashun abëdi Esus tabadmepanëdash.

Aden abitedishun Icbombo icmeopanëdash.

<sup>10-11</sup> —“Nuquin Icbombo Esuquidistu bëdamboshë iquec,” ma abitedi quenu — qeshun aden Nuquin Papan abitedishun Icbombo Esus icmeopanëdash.

—Ëmbi ëbi yacnoshon uaido mayan bëdabo yec nidaidën tabadquido matses yec unësacsho uincuemiaido yec quequido: “Nuquin Icho Esuquidistu bëdamboshë iquec. Abi abitedishun Icho icmeoaquid Nuquin Papatsen bëdamboshë iquec,” ma quenu — qeshun adopanëdash.

### *Utsibo Esus tantiamete chiaid*

<sup>12</sup> Mibi tantiaquiembique. Tanta, con utsibo. Mibitedi chuinu. Esusën nacpadomboen mimbitsen bëdamboen nata. Ëbi mibëd icnuc mimbi nadeniondacadomboen ëbi nibëdnuc adembidi bëdamboen nata. —Nuquin Papa dacuëdampambo icquidën chiaid niacmane — quiash ambi chiacpadomboen naic aidbëdi tabadnush bëdamboec tabadta. <sup>13</sup> —Ma bëdamboec tabadnu — quequin Nuquin Papan ambi chiacpadec tabadte bumequin nuqui bëdamboen tabadmeque. Bëdamboec tabadta.



<sup>14</sup> Adec bēdamboec tabadec chushcananenda. Adecbidi: —Bēdamboen nanuna —cac chieshec tabadenda. <sup>15</sup>—Esus tantiaquido icsambo iquec —utsibo quenushe. Adenda. Nuquin Papan: —Con mado nec. Con champi nec —caido yec bēdamboec tabad. Matses dadpenquoio icsamboshē icnubi adequi bēdamboec tabad. Adec bēdamboec tabadquin icsambo icquido mimbi Esus bēdamboen tantiametsiac paposhquiacbimboecnuc. <sup>16</sup> Mimbi adoac utsin: —Esus tantiasho Nuquin Papan ēbi bēdamboen isec. Nēbi bēdambo yanec unēsashini aidbēd tabadendac —quequin tantiatsiash. Aden mimbi chuibanaido Esus tantiaquido yansho isash cuishonquetsiabi. Esuquidistu nidaidēn padpidec chote ushēn bēdambo ictsiabi. —Ēmbi chuibanondaido Pidipos yacnocquido ambi Esus tantiamiaidobēd choeque. Is —quec bēdambo ictsiabi. <sup>17</sup> —“Bēdambo mibi iquec,” Nuquin Papan mabi canu —queshun Esus tantiaquin mimbi bēdamboen nac. Utsibo nashunquin Esusēn naid chieshtoenquoio icquin mimbi chuibanac. Mimbi adoaid chuisho tantiashun: —Mibi unēs uanu —caquini bēdambo ictsiac. —Aido bēdambo iquec —queshun mibi tantiec bēdambo yec cuishonquetsiabi. <sup>18</sup> Ēbi unēs uaid chuisho tantiash adecbidi bēdambo icta. —Esus tantiec chieshtotiapimbo icsho Pabado unēs uac —quiash bēdambo icta.

### *Pabadon Timoteyo chiaid*

<sup>19</sup> Con madobimboecquid ēbēd icquid Timoteyo mibi yacno nidmetsiambi. —¿Midapadquiec Pidipos yacnocquido tabadeque? Istan, mado —quequin nidmetsiambi. Esuquidistun adembidi tantianuc adotsiambi. Adoac istanshun chuituidac bēdambo ictsiabi. <sup>20</sup> Timoteyopadquid utsi nibēdec. Aid abentsēcshumbi ēmbi nacpadomboen mibi tantiaquiec. <sup>21</sup> Utsibombien aton nauidsēqui tantiaquin Esuquidistun chiapadomboen natiapimbo iquec. <sup>22</sup> —Timoteyon bēdamboen naondash —quequin mimbi tantiec. Mimbi tantianubi ēbēdtan Esusēn naid chuibanondash con mado icbobimboecquin. Aid bēdambo iquec. <sup>23</sup> Adquid icsho mibi yacno: —Istan —catiadquio iquebi. Ēbi quēnēn nauedquido ēbi caic: —Unēs uanu —quesho tantiabono. Tantiashun: —Ēbi quēnēn nauedquidon chiaid Pidipos yacnocquido chuitan, Timoteyo —catsiandambi. <sup>24</sup> Ēbitsen nēbi mibi yacno nidtiadquio iquebi. Ēbi caic Nuquin Icho: —Ma nidnu —quenuc anobi nidtsiabi.

### *Epapadodito chiaid*

<sup>25</sup> Epapadodito con buchibimboecquid mimbi: —Pabado nashuntan —cac Pidipos yacnuēsh chonēdaid nēmbo iquec. Utsibon chieshēnubi dacuēdenquoio icquin ēbēdtan Esusēn naid chuibanondash. Adondaiddi nēbi: —Mibi iccondacno tabadec nid, buchi —caombi. <sup>26</sup> Aid mibi tantiec unēsquoio yec tsadposh. —Ēbi unēstsemboed con matses chuinuec Pidipos yacno nidaccosh —quiash mibi ismete bunquiec shubiantiadtsēcquoio tsadposh. Adsho isun: —Min shubuno nidec nid —caombi. <sup>27</sup> Adec unēstsenquiondash. Adshobien Nuquin Papan bēdamboen isquin bēdamepondash. Ēbitsen bēdambo icmenuen Nuquin Papan adopondash. Epapadodito unēsquoio icnuc ēbi shubiec tsadsho isash: —Aid unēsān unēsquoio icnuc Pabado mēyadnushe —queshun Nuquin Papan Epapadodito bēdamepondash. <sup>28</sup> Adoacsho mibi yacno aid badedquio nidmetiadquio iquebi. Aidbēd iquec mibi bēdambo ictsiac. Mibi yacno nidsho isash ēbitsen bēdambo ictsiabi. <sup>29</sup> Epapadodito nidacsho bēdamboen ista cuishonquequin. —Nuquin Icbon mibi bēdamiac. Aid bēdambo iquec. Mibitsen bēdambo iquec —quequin chuita matses dadpen tantiamenuen. Adquid Esus chuibanquido utsibo mibi yacno nidacsho adembidi bēdamboen

ista. <sup>30</sup> Esuquidistun chiacpadomboen naic ëbëdi tabadec Epapadodito chon-dash. Chieshëmënguïdo dadpen icnubi ëbi nashunec tabadec daicsabudash unëstsenondash. Chotiapimbo icquin mimbi: —Pabado nashuntan —cac choash nibëdantsenondashe. Mibi yacno nidacsho bëdamboen ista.

### 3

#### *Esusuidtsëqui tantiasho Nuquin Papan bëdamboen isaid*

<sup>1</sup> Nuquin Icbo Esus tantiec cuishonquenuna. Aduidequi icac bëdambo ictsi-ash. Tantia, con utsibo. —Tantienquïo yanushe —quequin ëmbi chiondaïd dada uaquin padpiden mibi chuiöanu. <sup>2</sup> Muaquïdon chuïsho tantienda. Aidon: —Shui dëbid dëteshun secaidouïdi Nuquin Papan bëdamboen istsi-ash —quequin chuïsho tantienda. Aden chiec icsa uanquïdombo neque. Uimanëmënguïdoen nechitec. <sup>3</sup> —Shui dëbid dëteshun secaid nec —¿queshunda Nuquin Papan nuqui bëdamboen ispec? Padenquïo. Aidon Esus tantienquïo icsho bëdamboen isenquïo icquin aton Mado Esus tantiaquïdoen Nuquin Pa-pan bëdamboen isec. Aton Mayanën tantiamiac: —Nuquin Icbo Esuquïdistu bëdamboshë iquec. Abided ciudadec unësaid tantiasho Nuquin Papan nuqui bëdamboen isec. Ëmbembi naquin Nuquin Papa bëdamboen ismetiapimbo iquebi —quequin nuqui tantiec. <sup>4</sup> Matsesën tsusedpan chiaïduïdi tanti-asho Nuquin Papan bëdamboen iste icnuc nadtsiabi. —Tsusedpan chiaïd utsibon daëdpactsëc nanuc ëmbimbo naquin dadpenquïo nabanombi. Aden ëmbimbo dadpenquïo nasho Nuquin Papan ëbi bëdamboen isec. Adembidi isadaïdbombo icsho ëbi bëdamboen isoaic —quetsiabi. Nëbi adtiapimbo iquebi. <sup>5</sup> Isadaïdbo nebi. Isadaïdbon chidon tishacsho sietetedec ushun Moisesën chiampicpadomboen shui dëbid dëteshunenëdaïdquïo nebi. Con matses tsusedpa Benamin yampid icnuc Ebedeyombo nebi. Isadaïdbo caimbidi Ebedeyo capec. Adquïd yec aidën onqueten onquequïd nebi. Moi-sesën chiampid namequïdquïo padiseyobo caïd niondabi. <sup>6</sup> Adquïd icquin icsambo icquïdo danquin Esus tantiaquïdo cuesun secatiadquïo iccondabi. Nuquin Papan chiacpadomboen natiadquïo iquequi adondabi. Moisesën chiampiduïdi nate bunquïondabi.

<sup>7</sup> Adquïd icquin Esus tantiabi: —Ëmbimbo naic bëdamboshë iquebi —quequin icsamboen tantiapondambi. Adondaïdi Esus tantiabenash: —Ëmbimbo naiquini icsambo iccoc. <sup>8</sup> Nëbi con Icbombo Esuquïdistu tantiec bëdambo iquebi —quequin tantiabenondambi. Aiduidtsëqui tantiatiadquïo icquin icsa secacimboen ëmbimbo naïd ënondambi. <sup>9</sup> Esus tantiäte bunquïebi. Adquïd yec: —Moisesën chiampicpadomboen ëmbimbo naiquini bëdambo iquec —quetiapimbo yanashic nadondabi. —Nuquin Papambien aton Mado Esuquïdistu tantiasho bëdamboen isquin ëbi bëdamboen tabadmec —quequin tantiabenondambi. <sup>10</sup> Aden tantiabenshun Esusuidtsëqui comapenen tan-tiatiadquïo iquebi. —Comapenen tantiaquin Nuquin Papan uïncuemiaïd icquin Esusën bëdamboen tabadmetsiashi —quec Esus tantiäte bunquïebi. —Nuquin Papan chiacpadomboenuïdi nasho mëyanac Esus unëzac caon-dash. Adembidi Nuquin Papan namiacpadomboen nasho mëyanac chiesh-totiapimbo ictsiabi. <sup>11</sup> Unësambo icsho Esusën bëdamboen tabadmetsiashi. Unëzacsho Nuquin Papan uïncuemetsiashi —quec adec Esus tantiäte bun-quïebi.

#### *Nuquin Papan chiacpadomboenuïdi nate bunaid*

<sup>12</sup> Tantia, con utsibo. Mibitedi chuïnu. —Nuquin Papan chiaïd ni-aquesambo nebi —¿quectabi ique? Padenquïo. Adquïo ictiadquïdi adquïo

yenquieni icchitec. —Bëdamboshë icmenuen Esuquidistun yuapondashi — quequin tantiec bëdamboshë icte bunquiebi. <sup>13</sup> Adec bëdambo yanabi yec: —Ëmbi naboed naic bëdamboshë iquebi —quenquo icquin Esusquo tantiaquin ambi chiacpadomboen natiadquo iquebi. <sup>14</sup> —Bednu —quequin bedteuidtsëqui tantiec titinquiacbimboen Esusquo tantiaquiec ambi chiacpadquiec bëdambo ictiadquo iquebi. —Adec tabadec unësacsho Nuquin Papan abi yacno ëbi tabadmec —quec bëdambo icte bunquiebi.

<sup>15</sup> Nuquin Papan chiacpadomboen natiadquo icquin ëmbi chuibocpadomboen mimi tantiatsiac. Utsien: —Padi. Pabadon chiaid abitedi nainquo icquin abentse-abentsen naindambi —quesho Nuquin Papan ambi tantiaid bëdamboen tantiametsiash. <sup>16</sup> Nëbi nuqui icbocpadquiec tantiananquiec bëdamboec tabadnuna.

<sup>17</sup> Ëbi yacpadquiec bëdamboec tabadta. Ëmbi chiacpadomboen utsibon nasho isun adomboembidi bëdamboen nata. <sup>18</sup> Ëmbi chuideniondacadomboen mibi padpiden chiemi shubiquimbi. Mibi yacno utsi-utsiec icsamboec tabadpec. —Abided ciudadec cuesten dectamëdaid Esus tantiaquid nebi —quetsëchoedi icsamboec tabadec. Adquido Esus tantiaquidpenquo nec. <sup>19</sup> Peteuidtsëqui tantiec icsambo yequi: —Bëdambo iquebi —quec tabadec. Nuquin Papa tantienquo icquin nidaidën icquiduidtsëqui tantiec. Unësash Nuquin Papa yacno nidtiapimbo yec icsambo icquido cuidacno nidendac. <sup>20</sup> Padnuen Nuquin Papan bëdamboen isaido yec aïdbëd tabadtequido nuqui nec. Abi yacno buanuec abucuësh Nuquin Icho Esuquidistu chosho isnuec nuqui tabadec. <sup>21</sup> Choshon aidëmbi nuquin dada chuca uaindac aton dada chuca uacpadomboen. Adoac unëstiapimbo icquiduidquo nuqui iquendac. Abitedishun Icbombo icquin ambi chiacpadomboen abitedi namequidquo icquin aden nuquin dada chuca uaindac.

## 4

### *Esus tantiec cuishonquiaid*

<sup>1</sup> Ëmbi aden chuisho tantiash Nuquin Icbon chiaid niaquenquo yec bëdamboec tabadta. Mibi tantiaquin mibi istiadquo iquebi. Mibi caic: —Ëmbi chuibanondaido Esus tantiabenash bëdambo ictiadquo iccondash —quec bëdambo iquebique. Adquiec chieshtoenquo icquin Esus tantiec bëdamboec tabadta.

<sup>2</sup> Tanta. Nëbi chido daëd Ebodia caid Sintique caïdbëdtatsen chuinu. Amicananenda. Esus tantiaquido yec: —Ai, Nuquin Icho Esusën tantiacpadomboembien natiad —quec tabadta. <sup>3</sup> Tanta, buchi. Èbëdtan Esus chuibanondaid icsho mibitsen chuinu. Aid chido daëd chuiquin: —Bëdamboec isnanta —cata. Utsibon chieshëmbi ëbëdtan aid daëdshun Esusën naid chuibeniondashe. Adembidi Quedemente caïdëntsen ëbëdtan chuibanondash. Adembidi utsibontsen. Adquidotedi Nuquin Papan: —Esusbëdta ëbi tantiaquido mibi neque. Èbëd tabadec cho —caindac.

<sup>4</sup> —Nuquin Icho Esus tantiaquiec bëdambo yec cuishonquenuna —caimbi. Esus tantiaquiec cuishonquenuna. <sup>5</sup> —Ma utsibo: “Esus tantiaquido chieshëmënenquo yec bëdambo iquec,” ma quenu —quiash bëdamboec tabadnuna. Nëbi Nuquin Icho Esus choeque.

<sup>6</sup> Adecbidi chishpiquiec tabadenda. —¿Atotsimbi napeba? ¿Atotsimbi pepeba? ¿Nëbida con matses unëspeba? —quequin uesquin tantienda. Padenquo icquin nuqui dacuëdquin tantiaidtedi Nuquin Papa chuinuna. —Ëbi nashunquin utsibotsen nashunta, Papa. Aden nashunec mibi bëdambo iquec, Papa —quequin Nuquin Papa chuinuna. <sup>7</sup> Aden nuqui chiac

aidëmbi nuqui bëdambo icmec dacuëdenquo icnuc. Adoac bëdambo icnuc utsibo: —¿Mitsipadec dacuëdenquo yampash? —quetsiash. Nuquitsen: —¿Mitsipadequini bëdambo yampo? —quetsiac. Adec: —Nuquin Papan ëbi nashunquidquo nec —quequin Nuquin Papa chianequin Esus tantiaquiec nuqui dacuëdenquo yec bëdamboec tabadtsiac.

*Bëdamboshë iquec, caiduidi tantiata, quiaid*

<sup>8</sup> Tantia, con utsibo. Nëidtsen chuinu. ¿Atotsi abimbo chiaid icpec? Adquid tantiata. ¿Atotsi bëdambo icpec? ¿Tsutsi bëdamboec tabadquid icpec? Adquidtsen tantiata. Aden: —Bëdambo iquec —caidtedi tantiata. <sup>9</sup> Adembidi ëmbi chuisho mimbi tantiondac. Aden ëmbi chiondaid tantiaquin ëmbi naondacpadomboen nata. Adsho isash mibi dacuëdenquo icmequid Nuquin Papa mibëd iquendac.

*Pidipos yacnocquidon bëmiaid*

<sup>10</sup> Nëbi mimbi bëmiaid bedash bëdambo iquebi. Ënden mimbi aden meniondashumbic yuectaneshun nëbi ëbi tantiaquin mimbi meneoaid bëacsho bedombi. —Nuquin Icbon tantiacpadomboen padpiden Pidipos yacnocquidon ëbi ma menenuequin piucquid bëmiac —quiash bëdambo iquebi. ¿Ëbi tantienquioda mimbi ictionda? Ëbi tantiaquin ënden bëmetiadquidi tsundan bëtiambo icnuc mibi nepanëdac. <sup>11</sup> —Con na nibëdeque. Beccho —¿quectabi ique? Padenquo. Adtiapimbo iquebi. Con na icnuc bëdambo ictsiabi. Con na nibëdnubi adecbidi bëdambo ictsiabi. <sup>12</sup> Con na dadpen icnuc bëdambo ictsiabi. Con na nibëdnubi adecbidi bëdambo ictsiabi. Con piucquid dadpen icnuc bëdambo ictsiabi. Con piucquid nibëdnubi adecbidi bëdambo ictsiabi. Peten cubudash adecbidi bëdambo ictsiabi. Buna natiambo icnubi adecbidi bëdambo ictsiabi. <sup>13</sup> ¿Ëbenquiodabi adti? Padenquo. Esusën namiaquini adquo iquec. Aidëmbi namiac ambi chiapadomboen naimbi. <sup>14</sup> Adnuc: —“Mëyadec,” quiosh —queshun mimbi ëbi ma menenuequin bëmiaid bëdambo iquec.

<sup>15</sup> Min nidaid Masedonia caid yacnuësh nidsho Esus tantiaquido shubu utsinquidon uanocquidon menenquo iccondashi. Adnubi tauamboen menequin mimbiuidtsëqui ëbi meniondac. Esus tantiabentsëcshun mimbi adondac. <sup>16</sup> Adoquini shubu dadpen icquid utsi Tesadonica caid yacno nidondac. Ambo yuec tabadnubien: —“Pabado aton na nibëdec,” quiosh —queshun mimbi piucquid bëmiaccondac. Yuectaneshun adembidi. Adshumbic padpiden. <sup>17</sup> —Mimbi bëmiaid bëdambo iqueque. Utsi beccho —¿quequindambi aden chuipe? Padenquo. —Pidipos yacnocquido Esus tantiaquido bëdambo iquec —Nuquin Papa camete bunquin: —Mimbi bëmiaid bëdambo iccosh —caimbi. <sup>18</sup> Utsi-utsien bedshumbeneshun mimbi bëmiaid Epapadoditon bëacsho bedondambi. Mimbi bëmiaidbëd daëdash ëbi bunaid dëniaquec con na dadpenquo yanac. —Mibi bëdambo iquec —Nuquin Papa camenuen mimbi bëmenëdac. Adsho isash Nuquin Papa: —Adquido bëdambo iquec —quependac. <sup>19</sup> Abitedishunquo Icho Nuquin Papa nec. Comapenen tantiaquin Esuquidistu tantiaquido bëdamboen isquin nashunquidquo nec. ¿Ada mitsana nibëdnuc mëyadac bimboec tabadpe? Adec mëyadsho isun Nuquin Papan mitsana icmendac. Unësquo icsho aidëmbi mibi bëdambo icmendac. Adecbidi: —Chieshtotiadquo icchitebi —quesho Nuquin Papan nac mibi chieshtoenquo iquendac. —Aid nibëdnuc unësebi —mimbi caid Nuquin Papan icmendac. <sup>20</sup> Ëbi adsho tantiashun: —Bëdamboshë mibi iquec, Papa —quequin Nuquin Papa chuinuna ënenquo icquin.

*Pabadon ënquimbi chiaid*

<sup>21</sup> Anocquido Esus tantiaquidtedi chuita naden. —Esus tantiaquido icquin Pabado chedon mibi tantiec —quequin chuiban. <sup>22</sup> Adembidi nēmbō Doma yacnoshon Esus tantiaquido abitedishun mibi tantiec. Chuiquid dapa Sesad caidēn shubun icquido Esus tantiaquido icquin adembidi mibi tantiec. <sup>23</sup> Mibi tantiaquin: —Con Icho Esuquidistubēdtan Pidipos yacnocquido bēdamboen isquin bēdambo icmeta, Papa —quequin Nuquin Papa chianembi. Padi. Aidedi chuiquin dada uaombi.

## CODOSAS YACNOCQUIDON ISTE

<sup>1</sup> Pabado nebi. Nuquin Papa bunacpadomboen Esuquidistun ëbi chuibeneta caid nebi. Timoteyo ëbëdi iquec. Esuquidistu tantiaquid icsho nuqui con utsi caid aidi nec. <sup>2</sup> Aidbëdtambi ënenquiocquin Esus tantiec Codosas yacno iccuededquido, Nuquin Papan cuënaido, Con utsibo nec, quequin mibitedi chuiquin dada uaimbique. Isec onqueta.

Esuquidistu tantiaquido icsho Nuquin Papan ëbi icsaid cuidenquiocquin ambi bëdambocquid icmebanaid nebi, quequin tantiec mibitedi Codosas yacnocquido adquiec ma mibi tabadpanuna. Adecbidi, Nuquin Papabëd icquido nebi, quequin tantiec ma tabadpanuna.

### *Nuquin Papa chuidoniaid*

<sup>3-4</sup> Nuquin Papa, Nuquin Icbo Esuquidistun Papa chiec nadec onquebi. Bëdambocquid icquin mibipadquiocnoc Codosas yacnocquido Esuquidistu tantiaquido bëdambocquido mimbi icmebanec, Papa. Utsibo Codosas yacnoësh choshon utsi-utsiec Esuquidistu tantiaquid yanosh. Adquid yanshun Esuquidistu tantiaquid utsibo bëdamboen tantiec, quequin chuisho tantiash bëdambo iquebi, Papa, quequin mibitedi tantiec Nuquin Papa chiec onquedenebi. <sup>5</sup> Esuquidistu Nuquin Papa yacno yuedanquid nec, quequin, Nuquin Papan chiaid abimbo iquec, quequin chuibanac abi tantiaquido mibitedi yanac. Adquid yanshun, Abi yacno Nuquin Papabëd bëdamboec tabadendabi, quequin aid ushë chote cainquidombo icquin Esuquidistu tantiaquid utsibo mibitedishun tantiec. <sup>6</sup> Ëbi icsaid cuidtiadtsëcquio Nuquin Papa icnubi utsibon Esuquidistu chuibanac abi tantiaquid ëbi yanacsho isash Nuquin Papa ëbi icsaid cuidenquio yec ënden bëpiscudac, quequin mibitedishun abimbo tantiashun mimbi bëdamboec tabadquin ismebanendac. Aden mibitedishun ismebanac utsin-utsinquien Esuquidistu tantiaquid yanshun abi bëdamboec tabadaid adembidi ismebanoaic. Adoac nidaid utsin-utsinquiec tabadquidon Esuquidistu tantiashun adomboembidi ismebanoaic. <sup>7</sup> Epapadasën Esuquidistu chuibanac Esuquidistu tantiaquid mibitedi yampondac. Codosas yacno nidtiapimbocquin ëmbi, Ambo nidshun Esuquidistu chuibanta, cac Epapadas nidondash. Aidi ëmbi chiacpadomboen ëbi nashunquidquio nec. <sup>8</sup> Adquid yec mibi yacno nidshun chuibanash choashun, Nuquin Papan Mayanën pausunac utsi tantiaquid Codosas yacnocquido nec, quequin Epapadasën chioshi.

<sup>9</sup> Aden Epapadasën chiac mibi tantiec baded-badedquiec Nuquin Papa chiec onquian-onquianebe. Mimbi tantiacpadomboen min Mayanën pausunacsho Codosas yacnocquido bëdamboen tantieme, Papa, quequin chian-chianembi. <sup>10</sup> Aden mibi bunacpaden mimbi tantiamiac Codosas yacnocquido, Esuquidistu tantiaquid nebi, quiash utsibo ismenuec bëdamboec tabadec. Adec Codosas yacnocquido tabadsho isash, Bëdambo iquebi, ma Esuquidistu quepanuna. Adec bëdamboec tabadquin nabanquidquio utsi iquendac. Adec tabadquido mibi tantiadonequido yanendac, Papa. <sup>11</sup> Adembidi mimbi dayacquio icmenu caid Codosas yacnocquido iquec natiatquid icnuc aido chieshenquio yec abi tantiec mibi nidendac. Aden chieshenquiocnoc mimbi nidmiac, Bëdambo iquebi, Papa, quec, Cuishon, quec aido mibi chiec onquedenendac, Papa. <sup>12</sup> Mimbi bëdambocquid icmebanac icsaquid nibëdacno mibi tantiaquid utsibobëd

mibēdi tabadendabi, Papa, quequin tantiec, Bēdambo iquebi, quec ma Codosas yacnocquido mibi chiec onquepanuna, Papa.

<sup>13</sup> Ēnden adquidpenquo yec Satanasēn yuaido yec, Nuquin Papa tantianu, quesa nuqui iccondac. Aidēn yuaido icsho Nuquin Papan nuqui mēnchicpondash. Aden nuqui mēnchicquin abi cudasaidquo aton Madombo Esuquidistu icsaisapadquid nuqui icmenuequin aidi Nuquin Papan nuqui tantiamēpondash. <sup>14</sup> Abipadquid icmenuec matses icsaid bedshunash abided cuidadec unēspaneḏdash. Adoacsho Esuquidistu tantiaquid icsho cuidenquo yec mibi icsaid bēpiscudendabi, quequin Nuquin Papan tantiampicpadquiequi bēpiscudendac.

*Abia yampidquo iquec abitedishun icbombo Esuquidistu nec quiaid*

<sup>15</sup> Nuquin Papa isadesa icnubi abipadquidquiobidi matsesash Esuquidistu nuqui isendac. Abitedi uabi yec Esuquidistu aton Papabēdtsēqui Abia Yampid icquin utsi abitedi ambi uaid nec. Ambi uaidtedi aton na nec. Aidon icbo Esuquidistu nec. <sup>16</sup> Nidaid abubēdtabi uashun aidēnquiocquidtedi uanu quequin ambi uaido nec. Matsesēn isaiddedi matsesēn isacmaidtedibēd Esuquidistun uampidquo nec. Mayantedi ambi uampidquiobidi nec. Mayan utsi-utsiec chuiquid nebi, quenubi utsi-utsiec utsin icbo nebi, quepec. Adecbidi matses queoaindac. Aidotedi Esuquidistun uaido nec. Aidotedishun icbo Esuquidistu nec. <sup>17</sup> Esuquidistu abia yampidquo iquec. Aidēmbi, Ēmbi uabanaido namebanu, quequin ambi chiapadomboen namebanec. <sup>18</sup> Nidaid utsi-utsiec yacnocquido abi tantiec iccuededquidtedi chuiquidquo Esuquidistu nec. Abitedi chuiquid icnu, quec Nuquin Papan Madombo Abia Yampid matsesash unēspaneḏdash. Adsho Nuquin Papan abia uincuemeshun abi tantiaquidtedi chuiquid abentsēcquiobi abipadquid icmepaneḏdash. <sup>19</sup> Utsi abipadquid ictiapimbo iquec. Aidēn nabanacpaden natiapimbo utsi iquec. Ēbipadquidquo con mado nec, quiash, Bēdambo iquebi, quec Nuquin Papa tsadec. <sup>20</sup> Aton Papapadquid icquin aton Papan tantiacpadomboen tantiaquid Esuquidistu nec. Adquid yec matses icsaid bedshunash ēbided cuidadec unēspebi, abi quiampicpaden matsesēn cuesten dectanac unēspaneḏdash. Adoacsho isun ambi bēdamboen istiapimbochoedi Esuquidistu tantiaquid yansho isun aidtedi Nuquin Papan bēdamboen isec.

<sup>21</sup> Ēnden Nuquin Papan matsespenquo mibitedi iccondac. Icsamboen tantiec icsaquid yec Nuquin Papa chieshēnquido mibitedi iccondac. <sup>22</sup> Adquid icboedi, Ēbi yacno yuednu queshun Esuquidistu tantiaquidotedi cuidenquo yec abi icsaid bēpiscudquin Esuquidistu icsaisapadquiocnoc aido isembi, quec Nuquin Papa tsadec. <sup>23</sup> Ēnenquiocquin Esuquidistu tantiaquid icsho abi yacno mibi yuedendac, quequin chuibansho mimbi tantiondac. Adenuidi ēnenquiocquin tantiata. Adomboen chuibenesho utsin-utsinquien tantiapondash. Esuquidistun, Aden chuibeneta, caid nebi.

*Esuquidistu tantiadoneta, quequin Pabaddon chuibanaid*

<sup>24</sup> Ēbi tantiaquid Nuquin Papan bēdamboen isendac. Aden isac, Ēbēd icquido iquendac, quequin Esuquidistun ambia chuibansho matsesēn mēyampaneḏdash. Adomboembidi Esuquidistu chuibansho mēyamposhi. Adoalui, Cuishon, quebi. Ēnden abi tantiaquid yanacsho isun, Ēbi chuibeneta, quequin chuishumbic, Ēbi chuibansho mibi mēyante dadpen iquendac, quequin Esuquidistun chuioapondashi. Aden aidēn chiondacpaden mēyanaid nebi. Ma abi tantiaquid dadpen yanu quequin chuibenembi ambi tantiactedi mēyante yanuc. <sup>25</sup> Ai, Nuquin Papan,

Esuquidistu ambi naidbēdta chuibeneta, caidquio nebi. Abi chuiquidquio nebi. <sup>26</sup> Nuquin Papan ambi tantiampicpaden chienquiochoed nēbi aid tantiamiac Esuquidistu tantiaquido yanec. <sup>27</sup> Aden Nuquin Papan isadaidbo utsi-utsien abia Esuquidistu tantiameshun isadaidpembotsen chuibeneta caid isadaidbo nec. Esuquidistu tantiaquido icsho isun, Con matses yec ēbi yacno ēbēdi tabadendac, quequin Nuquin Papan aton Mayan Esuquidistu tantiaquid menec, quequin isadaidpembotsen chuibeneta caid nebi.

<sup>28</sup> Aden ēbēdtan ēbipadquidon Esuquidistu chuibeniac Esuquidistu tantiaquid yansho isash, Esuquidistu tantiec bēdamboec tabadteneta, quequin Nuquin Papan chiacpadomboen chuibenec nebi ma abi yacno chosho adquidquio Nuquin Papan yuedpanu queshun. <sup>29</sup> Badiadquidēn-badiadquidēnquien aton Mayanēn nadatiambocquin nac natiatequid icnuc ma Esuquidistu tantiadonequido mibitedi icpanu, quequin dayacquiocquin chuibenec nebi.

## 2

<sup>1</sup> Aden dayacquiocquin Nuquin Papa chuiquin mibitedi tantiembi. Adembidi chuibanquin Daudiseya yacnocquido tantiembi. Adembidi utsi-utsiec yacno iccuededquido ēbi isacmaidobi Nuquin Papa chuiquin tantiembi. <sup>2-3</sup> Esuquidistu tantiadonequido ma yampanueshun dayacquiocquin chuibenec nebi. Abentsēc yacbimboec tantiananquidquio ma yampanueshun dayacquiocquin chuibenec nebi. Adquidquio yanshun utsin abimbo chuisho tantias, Abimbo chuiquid nec, quequin ma bēdamboen tantiapana. Adembidi, abimbo chiacbimboen chuisho tantias, Icsamboen chiec, quequin ma tantiaquiopana. Nuquin Papan tantiamenquiochoed Esuquidistu nec, quequin tantiamequin ambi comapenen tantiacpadomboen pausunaid ma mibitedi icpanueshun dayacquiocquin chuibenec nebi. <sup>4</sup> Comapenen tantiaquid icquin, Utsi tantiata, quequin Esuquidistupenquio chuisho ma tantienquio mibitedishun icpanu, quequin aden mibi tantiaquin chiec nebi. <sup>5</sup> Mibēd icte bunquiequi mibi yacno nidtiapimbo yequi mibitedi tantiec tsadtenebi. Adec tsadnubi, Esuquidistu tantiaquido yanshun ēnēdenquio yec iccuededquin aiduidtsēqui tantiadonec, quequin mibi yacnoēsh choquidon chuisho tantias bēdambo iquebi.

*Esuquidistu tantiaquid iquec utsin chiacpaden naic abuc nidendabi, quequin tantienda.*

<sup>6</sup> Adecbidi Esuquidistu tantiaquid yec abēd icquido iquec, Aidi con Icho nec, quec ambi chiacpadquiec tabadteneta. <sup>7</sup> Adec tabadquin cuēte tapun uquēducquiocquidēn cuēte uidēnash canidoacbimboen Esuquidistu tantiaquid icquin tantiadonequiota. Aden Esuquidistu chuiquin ēbipadquidon mibitedi chuipondash. Aid tantiadonequid icquin, Mibi tantiaquiec bēdambo iquebi, quequin baded-badedquien Esuquidistu chuidoneta. <sup>8</sup> Adembidi aid tantiadonequid icquin aid tantiesan ēndenquio ambembi chiec onquiampicpaden nēbi icquidēn adomboembidi chuisho Nuquin Papan chiacpadomboen chiesha nec, quequin tantiaquiota.

<sup>9</sup> Matsesash Nuquin Papapadquidquibidi Esuquidistu icpanēdash. <sup>10</sup> Esuquidistubēd icquid icsho Nuquin Papan mibi adembidi abipadquid icmebanec. Mayan chuiquidtedi chuiquidbidi mibēd icquid Esuquidistu nec. <sup>11</sup> Aidēn, Ēbēd icquid nec, quequin mimbi tantiaid icsa cuēte cuidi pateshuniacbimboen mibi ēmebanec. Chēshten tiacbimboen nainquiocquin bēdamboen tantiamequin aton Mayanēn mibi icsaid emendac. <sup>12</sup> Adembidi



Esuquidistu unēsacsho chococacimboecnuc abi tantiaquid paucnu quiacimboen acten mibitedi mentobanondash. Adembidi Nuquin Papan Esuquidistu uincumenēdacimboecnuc icsaisa icmenu, quequin acten mentotanquin mibitedi cadobampondash.

<sup>13</sup> Ęnden Nuquin Papan matsespenquio icquin mimbi tantiaid icsa icnuc unēsacimboec icquin Nuquin Papan ěnden, Naden nata, quequin chiaid tantienquiocquin niacquido mibitedi iccondac. Adquid icboedi Esuquidistu tantiaquid icsho isash, Con madobēd icquido nec, quec Nuquin Papa nuqui icsaidtedi bēpiscudac. <sup>14</sup> Ęnden, Matses icsaid bēpiscudnu, quenquiocquin, ěmbi naden nata quequin chiaid niacquid comapenen cuidnu, quequin Nuquin Papan dada uampid iquec, quequin Esuquidistun icsainquiocquin ambi chiaidtedi nabampanēdash. Adquid icshobi icsaquidbimboecnuc matsesēn unēs uaquin cuesten dectanac matses icsaidtedi bedshunash abibi cuidadec unēsapanēdash. Aid unēsō isun, Matses icsaid cuidosh, quequin abi tantiaquidquio icsaid ambi naden nata quequin dada uamiaid ucacimboen tantiec bēpiscudtenec Nuquin Papa. <sup>15</sup> Esuquidistuidi Nuquin Papan naden nata quequin chiaid niaquesa yec matses icsaid bedshunash abided cuidadec unēsash uincuenquin Nuquin Papan chiaid niacquido mayan icsabo dēniaquec Esuquidistu abitedi chuiquid yampanēdash. Aden dēniacshun, Nēidtedi ěbi tantiaquido chuiquid ictiapimbo iquec, quequin bedshun mētāneshun buanacimboen Nuquin Papa Esuquidistun ismepanēdash.

<sup>16</sup> Aden chuiquid utsitedi dēniacquid Esuquidistu nec, quequin tantiash, Nadquid peshun nadquid utsi acsho Nuquin Papan ěbi bēdamboen isec, quenda. Adembidi, Nēid ushēmbi abi tantiec iccuededsho isun Nuquin Papan ěbi bēdamboen isec, quenda. Adembidi, ushē chuca choaid usudsho isec cuēdēnsho Nuquin Papan ěbi bēdamboen isendac, quequin tantienda. Esuquidistuidi tantiaquidquio icsho Nuquin Papan ěbi bēdamboen isec, quequin tantiata. <sup>17</sup> Matses icsaquid yec ambi naidēnquio abembi bēdantiapimbo iquec, quequin tantiamenuquin Nuquin Papan ambi, Naden nata, quequin chiaid Moises menepampic. Ęmbi bēdamboen isaidquio matses bēdambo icmequid choendac, quequin tantiaquin ambi naden nata quequin chiaidba Moises menepampic. <sup>18</sup> Esuquidistun bēdambo icmiaid nebi, qeshun utsi icsamboen chiec onquesho tantienda. Ambibi chiec onquesho tantiashun Esuquidistu tantesa uaindac. Adquidbēd Esuquidistu ictiapimbo iquendac. Adquidēn, Mibi chuiquidpenquio nebi, qeshumbic ambia tantiaquidbimboecquin ambi tantiaid Nuquin Papan uaid mayan bēda mibi tantiamenuquin chuibansho tantienquiocquin nadota. ¿Tsuntsin mibi adquid icmepash? cata. Aden chiaquien, Ushquin adquid isombique. Chuinu. Tanta, quequin ambembi chiec onquesho tantienda. <sup>19</sup> Adquidēn Esuquidistu abi tantiaquidon icbombo nec, quequin tantienquio iquec. Adecbidi Nuquin Papan tantiacpadquiec Esuquidistu tantiaquid dadpen yanash aton utsibobēd tantiananec nashunanec aton icbopadquid yanec, quequin tantiesa adquid nendac.

<sup>20</sup> Tantanu. Ębi chui. ¿Atotsi quiash Esuquidistu tantiaquid yanash ěbi icsaid cuidnuec Esuquidistuded unēsash uincuenacimboec bēdamboec tabadebi, qeshumbic, <sup>21</sup> Nēid bedtemaid nec. Aid bedsho mayanēn mibi cuidendac, quequin utsi chuisho mimbi tantiape? Adembidi ¿atotsieshun mimbi tantiaid icsa unēsacsho chococabi yacimboen, Nēid petemaid nec. Aid pesho mibi cuidendac, qesho mimbi tantiape? Aden Esuquidistu tantienquio icquidēmbimboen, Nēid mishtemaid nec. Aid misho mibi cuidendac, qesho mimbi tantiapec. <sup>22</sup> Nadquid petemaid nec. Nadquid

mishtemaid nec, quequin matsesën ambibi chuiquin tantiamete nec. Ambi petemaidbëdi ambi mishtemaid ënëndendac. <sup>23</sup> Matsesën bëdamboen tantiacbimboen chiaid aidtedi nec. Nëid ëmbi tantiaid nec, qeshun aid bëdamboen ismenuen naden nanuna, quequin matsesën chiec. Aden ambibi tantiashun, Naden nata, quequin mibi chuitiapimbo iquebi, qeshumbic namenuequin comapenen adquidën chuibanec. Adecbidi, Damëyamëdsho ëmbi tantiaidën ëbi bëdamboen istsiash, quequin ambibi tantiash damëyamëdec. Adecdamëyamë-dashic abi bunaiduidi tantiaquin ambi inacmaid dadan isuidtiapimbo iquec. Adecbidi abi inesa chidon isuidtiapimbo iquec.

### 3

#### *Bëdamboec tabadaid chiaid*

<sup>1</sup> Esuquidistu tantiaquid yec abia uincuemenedac abuc nidash Nuquin Papa yacno icsate bunquid nibëdacno tabadacpadquiec tabadteneta. Adecdtabadec, Nuquin Papan dayunquio Esuquidistu tsadec bëdambo iquec, quequin abëd icte bunquin Esuquidistu tantiadonec tabadta. <sup>2</sup> Abuc abëdi ëbi icnuc aton na con na iquendac, quequin tantiaquin nidaidënshun bednu, quequinuidi tantienda. <sup>3</sup> Esuquidistu unësaid tantiaquin aidbëdtabi mibi icsaid chococashunacbimboec icsatiapimbo yec nidaidën tabadta. Adecbidi Esuquidistu uincuenash abuc Nuquin Papa yacno nidash, Ebi tantiaquidtedi bëdaidquio iquec. Aido ëbi cudasaidquio nec, quequin aidën dayun uaid nuqui nec. <sup>4</sup> Aidën padpidec choshon abi yacno buanac abipadquidquio bëdaidquio nuqui iquendac.

<sup>5</sup> Adecdabi yacnoësh abëdi bëdaidquio iquendabi, quequin mibi icsaidtedi cuesun secacbimboen ëmbanta. Ebi inacmaid chudnu, quenquiocquin ënta dadan. Adembidi, Ebi inesa chudmenu, quenquiocquin ënta chidon. Adembidi, Chudnu, quequinuidi tantiaid ënta dadan. Adembidi, Chudmenu, quequinuidi tantiaid ënta chidon. Adembidi mibi bunaid icsatedi ënta. Adembidi aton na daëdpactsëc icquidëmba ma bednu, quenquiocquin, Ebia bednu, quequin tantiaid ënta. Aden ënshun, aton na daëdpactsëc icquidëmba ma bednu, quequin tantiaquin abia bedmeta. Bednu, quequinuidi tantiaid Nuquin Papan uaidbimboecnuc matsesën ambibi nacenaid tantiacbimboecquid mibi bedte bunaid nendac. Mibi bunaiduidi tantiaquin mimbi Nuquin Papa tantiatiapimbo iquec. <sup>6</sup> Abi bunaid icsabëdta ambi tantiaid icsa ënesa icsho matsesën naid chuibante ushë choan adquidtedi Nuquin Papan comapenen cuidendac. <sup>7</sup> Adquid icboedi <sup>8</sup> nëbi adenquiocquin ënash bëdamboec tabadteneta. Adecbidi comapenec nëishboedi adenda. Adecbidi, cuesantiadquio yec nëishboedi adenda. Adembidi, utsi icsambo icmeboedëmbi adoenda. Adecbidi, utsi icsamboen chuiboedi adoenda. Adecbidi, tsienbëdta shui chedo chiec icsamboen tantiec onqueboedi adenda. <sup>9</sup> Adecbidi, mua uanamboedi ënëdta. Adquid icboedëmbi icsactsëcquid niacbimboen mibi icsaid ënta. <sup>10</sup> Min tantiate chuca uacbimboecnuc abi tantiadonequidquio icnuequin mibi tantiamequid tantiadetantiadetda. <sup>11</sup> Adquid Nuquin Papan icmiac Esuquidistu tantiaquid utsibo naden mimbi tantienquio iquendac. Nëid isadaidbo nec. Nëidic isadaidpemboc nec, quequin tantiesa mibi iquendac. Adecbidi, nëid shui dëbid dëtemequid nec. Nëid shui dëbid dëtemesa nec, quequin tantiesa mibi neoaic. Adecbidi, Nëid chotac nec. Nëidic mayu nec, quequin tantiesa mibi neoaic. Adecbidi, Nëid yua nec. Nëidic yuaquid nec, quequin tantiesa mibi neoaic. Adquid Esuquidistu tantiaquid icnuc abëd icquid aton matses nec. Abi tantiaquidtedi chuiquid dapa abentsëcquiobi Esuquidistu nec.

<sup>12</sup> Aden Nuquin Papan cuënaido yec ambi bédambocquid icmebanaidobi abi cudasaido yec ambi tantiamiaid nebi, quiash bédambocquid isadacimboec nadec tabadteneta. Utsibo natiamiaid icsho isun bédambo icmenuequin nashumbanta. Adecbidi, Mimbiana bedan bedembi, quequid icta. Adecbidi, Mibia nashunu, quequid icta. Utsi icsaid ëmenuec comapenec chushquenquiocquin bédamboen chuiban. Tantesa uasho isun ismeded-ismededta. <sup>13</sup> Mimbi nacpadomboen utsibon natiapimbocsho isun, Padi, quenquiocquin abi tantiameban. Adecbidi utsin mibi icsamboen nasho isash cuidnannenquo yec bëpiscudta. Nuquin Papa ëbi icsaid cuidenquo yec bëpiscudosh, quec adta. <sup>14</sup> Adec tabadtenec tantiananta. Adec tantiananec Esuquidistubëd abentsëc yacimboec icsaisa mibitedi yanendac.

<sup>15</sup> Adec Esuquidistubëd abentsëc yacimboecnuc icmiaid nebi, quequin tantiec bédamboec tabadtenenu, quec mibitedi tabadteneta. Adec tabadtenequin, Mibi bédambo iquec, Papa, quequin chuideneta. <sup>16</sup> Nuquin Papan Esuquidistu tantiadonemiaido icta. Adquido yec abi tantiaquid utsi-bobëd Esuquidistu chuinanec, Bédamboec tabadta, quec adquiecbidí tabadec ismenanta. Aden naic chuiquid dapa Dabidën dada uampid sadmo caidbëdta cuëdënte utsi Nuquin Papan mibi bédambo icmiaidbëdtabi ambi naid utsi chiec cuëdëncuedta. <sup>17</sup> Adec tabadquin Esuquidistu tantiaquid nebi, quequin Esuquidistun chiacpadomboen nabanta. Adecbidi, ambi chiaiduidi chiec tabadteneta. Adec tabadquin, Esuquidistun tantiamiaid yec bédambo iquebi, Papa, quequin Nuquin Papa chuideneta.

#### *Aton shubun icquidbëd tabadaid*

<sup>18</sup> Bédamboec tabadnu, qeshun nadota. Chidon min bënën chiacpadomboen nabanta. Esuquidistu tantiaquid icquin adobanta.

<sup>19</sup> Chido inquidën, Con bënëbëd tabadec bédambo iquebi, camenuen yacimboecquin aid chuiquin min chido namenda. Mibibi tantiadquinuidi min chido namenda.

<sup>20</sup> Bacuëbon, Esuquidistu tantiaquid icquin papan chiacpadomboen cacuidenquiocquin nabanta. Adembidi, titan chiacpadomboen nabanoata. Adosho isashien, Cuishon. Bédambo iquebi, quependac Nuquin Papa.

<sup>21</sup> Anibëdtan min bacuëbo menuec comapenen cuëdquin chieshmenda.

<sup>22</sup> Yuan mibi yuaquidën chiacpadomboen nabanta. Aidën aden chuishun isnuc adobanta. Aden chuishun min icbon isenquiocnoc adomboembidi nabanta. Aden nabansho mibi bédamboen isendac. Nuquin Icbo, Esuquidistu tantiaquid nebi, qeshun adobanta. <sup>23</sup> Con Icbo Esuquidistu nashunu, quiacimboen mibi yuaquidën chiacpadomboen chieshenquiocquin bédamboen nabanta. <sup>24</sup> Con Icbo Esuquidistun abi yacno ëbi nidacsho isun ëmbi bédamboen nabanaid cuidquin ambi ismiambo yaid menendabi, quequin tantiaquin adobanta. Nidaidënsnun abi nashunquid mibi neque. Adobanta. <sup>25</sup> Min icbon chiacpadomboen nata. Abi chieshënuquid icbon cuidendac. Adembidi Nuquin Papan Esuquidistu tantiaquid nebi, qesho abi chieshënesa menequin bédamboen cuidendac. Abi chieshënuquid menenquiocquin comapenen cuidendac. Adenuidi tantiaquin cuidendac.

## 4

<sup>1</sup> Yuanquidën, mimbi yuaido ambi nabanacpaden bédamboen menebanta. Abuc con Icbombo iquec, quequin tantiaquin mimbi yuaido bédamboen menebanta.

#### *Chuibanaid utsi*

<sup>2</sup> Esuquidistu tantiaquid utsibo natiatequidbëd abi icsaid iquec, quequin tantiec baded-badedquiec Nuquin Papa chiec onquedeneta. Aden chiec onquequin, Mimbi ëbi tantiaquin nabanaid tantiec bëdambo iquebi, Papa, quequin Nuquin Papa chuideneta. <sup>3</sup> Adecbidi ëbipadquid utsibobëdta ëbi tantiec Nuquin Papa chiec onqueta. Mimbi chienquiocnëdaid Esuquidistu tantiate bunquid dadpen ma icpanuna, Papa, quequin Nuquin Papa chuideneta. Esuquidistun, Ëbi chuibeneta, cac aid chuibenesho bedshun mëtaniaid nebi. <sup>4</sup> Pabado utsin onqueten onquesho cuembo chuime, Papa, ma aidontsen tantiapanu, quequin Nuquin Papa chuideneta. <sup>5</sup> Esuquidistu tantiesan ëbi tabadaid istenec, quequin tantiec bëdamboec tabadteneta. Adec tabadquin Esuquidistu tantiesatsen tantiamenuquin Esuquidistu chuideneta. <sup>6</sup> ¿Mitsicquid mimbi tantiaid icpec? quetsiash tantiesa. Adsho tantiashun mibi onquiaidbëd sa batambo iquec daëdabimboecnuc Esuquidistu mimbi tantiaid utsibo chuita ma aidon tantiapanu qeshun.

### *Abëd icquid chuibanaid*

<sup>7</sup> Nëbi ëbëd icquid utsi-utsien chuibanu. Tantiata. Mibi yacno nidshun Tiquicon ëbi tabadaid mibitedi chiendac. Aid Esuquidistu tantiaquidquo icsho ëmbi con utsi caid nec. Aidi Nuquin Icbo nashunquid neoaic. <sup>8</sup> Èbëd icquid utsibo naic tabadaid mibitedi tantiamenuquin aidi mibi yacno nidmimbi. Adoac mibi yacno nidash puduedshun ëbi naic tabadaidbëdtabi Nuquin Papan chiaid chuibanac mibitedi ëbi tantiec unësquiochoedi cuishon queta. <sup>9</sup> Onesimobëd Tiquico mibi yacno nidec. Onesimo nuqui con utsi caidbidi nec. Onesimo mibi yacnoshon tishaid nec. Aidi chieshenquiocquin ëbi nashunquid nec. Aid daëdshun ëbëd icquidon nabamboed mibitedi chuibanendac.

<sup>10</sup> Nëbi mibi yacno nidesa chuinu. Tantiata. Adistadico ëbëd icnuec abembi quënënauedadonda nec. Aidëmbi, Codosas yacnocquido tantiec tsadebi, quequin chuisho tantiashun dada uaimbi. Adomboembidi Madcosën chiec. Madcos Bednaben utsi nec. Aidi yuecash mibi yacno nidtsiash. Ambo chosho isun yuedta. <sup>11</sup> Esus cashumbic Ustus caidën, Codosas yacnocquido tantiec tsadebi, quequin chiacpadomboen dada uaimbi. Adistadico yec Madcos yec Ustus yec quec aidtedtsëqui isadaidbo nec. Aidon ëbëdtambi Esuquidistu chuibanquin ëbi bëdambo icmequido neoaic. <sup>12</sup> Epapadas mibi yacnoshon tishaid Esuquidistu chuibanquidquo nec. Aidëmbidi, Codosas yacnocquido con utsibo tantiec tsadebi, quequin chiacpadomboen dada uaimbi. Icsamenuquid icnuc mibi bunacpaden tantiadonemequin mimbi Codosas yacnocquido abi tabadme, Papa, quec badiadquidën-badiadquidënquiec Nuquin Papa chiec onquec Epapadas. <sup>13</sup> Aidi mibi Codosas yacnocquido yec Daudiseya yacnocquido yec Yedapodis yacnocquido yec quequin tantiec chieshenquo yec Esuquidistu tantiadonequidombo ma icpanu quiash mibitedi chiec onquedenec. <sup>14</sup> Adembidi Ducasën dauëchoquidën Demasbëdtan, Codosas yacnocquido tantiec tabadebi, quequin chiacpadomboen dada uaimbi.

<sup>15</sup> Codosas yacnocquidon nëid ëmbi dada uaid mibitedishun isun, Pabado mibitedi tantiec tsadec, quequin utsibo chuita. Adomboembidi Daudiseya yacnocquido chuioata. Adomboembidi chido Nimpas cuëmëdquidën shubun Esuquidistu tantiec iccuededquido chuioata. <sup>16</sup> Adembidi, nëid ëmbi dada uaid isec onquequin mibëd iccuededquido tantiameshun Daudiseya yacno iccuededquido tsusiobo menequin, Nëid Pabadon dada uaid isec onquequin mibëd iccuededquido tantiaméoa, quequin chui. Adembidi ëmbi Daudiseya

yacnocquido tantiaquin dada uaid bedshunshun isec onqueshun mibëd iccuededquido tantiameoata.

<sup>17</sup> Adembidi Adquipo naden chuita. Nuquin Icbon Esuquidistun chiac-padomboen naimbudta, quequin chuita.

<sup>18</sup> Mibitedi tantiaquin ëmbibi nëid dada uaombique. Ëbi tantiec nidti-apimbo yec Pabado quënën tsadeque. Aid puduemeta, Papa, quequin Nuquin Papa chiec onquedeneta. Nuquin Papan ma mibitedi bëdamboen ispanu, quec tsadebi.

Padi. Aidedi dada uaombi.

## TESADONICA YACNOCQUIDON ISTE 1

### *Pabadon tauamboen chiaid*

<sup>1</sup> Pabado nebi. Shubu dadpen icquid Tesadonica caid yacnocquido Nuquin Papabēdta Nuquin Icbo Esus tantiaquido mibi chuiquin dada uaic nebi. — Nuquin Papan Esuquidistubēdtan bēdamboen isquin bēdambo icmepashun — caimbi mibi. Ēbēd icquin Sidbano caidbēdtan Timoteyontsen: —Nuquin Papan adopashun —quequimbidi mibi tantiec. Sidbanobi Sidas caid nec.

### *Tesadonica yacnocquidon Esus tantiaid*

<sup>2</sup> Naden mibi Nuquin Papa chianembi. —Tesadonica yacnocquido bēdamboen namequid yec mibi bēdamboshē iquec, Papa. <sup>3</sup> “Aidon Esus tantiaquin ambi chiacpadomboen matses tantiaquin nashumbanosh. ‘Abi yacno abi tantiaquido buanuec Nuquin Icbo Esuquidistu padpidec choec,’ quequin chieshtoenquo icquin Esusēn naid chuibanosh,” quetuidposh Timoteyo. Ma adembi aidon napanuna, Papa —quequin mibi Nuquin Papa chianembi. <sup>4</sup> Con utsibobimboecquido mibi neque. Tantia. Mibitedi chuinu. Mibi tantiaquin ambi tantiacpadomboen Nuquin Papan mibi Esus tantiamenēdash naden. <sup>5</sup> Ambembi chiaid chienquo icquin Esusēn naid mibi chuibanondambi. Aden chuibanac Nuquin Papan Mayanēn tantiamiacpadomboen: —Abimbo caic —qeshun mimbi Esus tantiabonondac. Adembi Esus tantiamenuc Sidbanochedobēd bēdamboec ēbi tabadsho isun: —Adquid abimbo chuiquid nendac —quequin mimbi ēmbi chuisho tantiondac. <sup>6</sup> Aden Nuquin Papan Esus tantiamiaido yec ēbi Nuquin Icbo yacpadec chieshtoenquo icsho isash mibitsen chieshtoenquo iccondac. Ēmbi Nuquin Papan chiaid chuibanac Nuquin Papan Mayanēn namiacpadec cuishonquequin mimbi Esus tantiondac utsibon: —Padi. Chēn —quequin comapenen chieshēnquionobi. <sup>7</sup> Adec mibi bēdamboec tabadaid chuisho tantiaash min nidaidēn icquido Masedonia yacnocquido Esus tantiaquido mibi yacpadquiec tabadtiadquo icpac caosh. Adembidi tantiaash nēid nidaid Acaya caid yacno tabadquidotsen adtiadquo icpac caosh. <sup>8</sup> ¿Anocquidonuidida mibi Esus tantiec bēdamboec tabadaid tantiapash? Padenquo. Mimbi chieshtoenquo icquin Esusēn naid chuibanac nidaid utsi-utsiec yacno tabadquidon tantiac caosh. Adashic aido mibi caic: —Nuquin Papa tantiaquidombo nec —quecuededac caosh. Aden mimbi naid chuisho tantiaashun: —Tantiaash —qeshun nēmbi icquido mimbi naid chienquo iccombi. <sup>9</sup> Mimbi naid naden chuisho tantiombi. —Pabado chedon Esus chuibansho tantiaash: “Nuquin Papapadquid utsi nibēdec,” qeshun Nuquin Papabēdta Esus tantiabonac caosh. Adshun ambi papa quequin nacnenaid aidon tantienquo yanac caosh. Aden Nuquin Papan chiacpadomboen natiadquo yanac caosh —quequin chioishi. <sup>10</sup> Adashic: —Adquid yec Nuquin Papa yacnuēsh aton mado Esus nidaidēn padpidec chosho istiadquo iquec. “Ēbi cuidmenquo icnuec abided ciudadec unēsacsho Nuquin Papan uincuemiaid Esus choec,” qeshun aid istiadquo iquec —quequin mimbi naid chioishi.

## 2

### *Pabadon bēdamboen chuibanondaid*

<sup>1</sup> Mibi yacnoshon tauamboen ēmbi chuibanac Esus tantiaquid yanshun mibitsen utsibo Esus chuibanondac. <sup>2</sup> Shubu dadpen icquid Pidipos caid yacnoshon quēnēn nauedac ēbi mēyadec tsadboedi puduemeshun nidmiac

mibi yacno nidshun Esusën naid mibi chuibanondambi. Utsibo dadpenshun chieshënubi Nuquin Papan namiacpadomboen cuesambo icquin mibi Esus chuibanondambi. <sup>3</sup> ¿Ëmbi naidquio namenuendambi adodionda? Padenquio. ¿Ëbi tantiamenuendambi chuibandionda? Mambi padenquio iccondac. ¿Ambembi chiaidtambi mibi chuibandionda? <sup>4</sup> Mambi mibi abimbo chuibampondac. Matsesën naidtedi tantiaquidënquio Nuquin Papan: —Aidën abimbo chuibantsiashe. Con Mado Esusën naid chuibenequid icmenu —caidquio nebi. Adquid yec matses: —Mibi bëdambo iquec —cameteuidi bunenquio iquebi. Nuquin Papa: —Mibi bëdambo iquec —camenuembimbi ambi chiacpadomboen naic. <sup>5</sup> Ëmbi tantiacpadomboen mibi namenuc: —Mibi bëdambo iquec —quenquio iccondabi. Min piucquid bednuen muaquin chiambo iccondambi. Nuquin Papan isnubi abimbo chiondambi. <sup>6</sup> ¿—Pabado bëdambo iquec —matses camenuendambi chuibandionda? Mibi adometiapimbo icquin utsibotsen adometiapimbo iccondabi. Esusën naid tantiamenuembimbi bëdamboen chuibanondac.

<sup>7</sup> —Ëbi chuibeneta —Esuquidistun caidquio nebi. Adoaid icquin tsusio dapan chiacbimboen: —Nata —quequin ¿ancabudquindambi mibi chuibandionda? Mambi padenquio iccondac. Anin bacuë nëishmenquio icquin bëdamboen namiacbimboembimbi nëishmenquio icquin mibi chuibanondac. <sup>8</sup> Mibi tantiaquioquin chieshtoenquio icquin Esusën naid chuibanec yec mibëd tabadondabi. Aden naic tabadec bëdambo iccondabi. <sup>9</sup> ¿Ada tantie, con utsibo? Aden Esusën naid chuibanquin nidaidën capuquid yua bitsibi tuscaquin shubumpi nacnendeniondambi. Mibi caic: —Ëbi menianiac aton piucquid naimëdnushe —quiash con piucquid bednuec chonoadteniondabi. Mimbi isnubi adondabi.

<sup>10</sup> Mibëd yec Nuquin Papan chiaid niaquenquio yec bëdamboec tabadondabi. Utsibo: —Pabado chedo icsambo icquido nec —quetiapimbo icnuc aduidequi tabadondabi. Adshobini mimbi ispondac. Adembidi Nuquin Papan ispanëdashi. <sup>11</sup> Amën aton mado: —Naden na —quequin nëishmenquio icquin chiacbimboen mibi abentse-abentsen bëdamboen chuibanquin <sup>12</sup> mibi bëdambo icmepondambi. —Nuquin Papan: “Icsatiapimbo icquid icmequin ëbëdi tabadmendambi,” quequin Esus tantiamiaido mibi nec. Adquid Nuquin Papan chiacpadec bëdamboec tabadquid neque. Ambi chiaid niaquenquio yec bëdamboec tabadnuna —mibitedi cadeniondambi.

<sup>13</sup> Aden Nuquin Papan chiaidquio chuibanac: —¿Ambembida chuidiosh? Nuquin Papan chiaidquio ma Pabaton chuiboc —mibi quianondac. Aden Nuquin Papan chiaidquio tantiaish Esus tantiaquido yanash aidquiobidi chuisho tantiaish mibi bëdambo yanec. Mibi adaid tantiaquin Nuquin Papa chianembi naden. —Tesadonica yacnocquido aden bëdamboen tabadmequid yec mibi bëdamboshë iquec, Papa —quequin Nuquin Papa chianembi. <sup>14</sup> Nidaid Udeya caid yacnocquido yacpadquiec chieshtoenquio icquin mimbi Esus tantiec. Udeya yacnoshon Esus tantiaquido aton matses isadaidbon cuestiadquio icquin chieshënac chieshtoenquio iccondash. Adomboembidi aid matses mibi yacno tabadquin chieshënac mibi chieshtoenquio iccondac. <sup>15</sup> Isadaidbombidi Nuquin Papan chiaid chuibanquido cuesun secapampic. Adembidi Nuquin Icho Esus unës uapac caondash. Adomboembidi chieshënquin mibi yacnoshon cuemepondashi. Aden Nuquin Papa chieshënquinc matses abitedi chieshënquinc caquin <sup>16</sup> isadaidbon matses utsi isadaidpembo ëbi chuimetiapimbo icpondash. —Esus tantiaisho Nuquin Papan bëdamboen isquin mibi cuidenquio iquendac —quequin ëmbi chuisho: —Padi. Aid chienda. Cueschitomane —capondashi. Aden ambi chiaid

ënenquo icquin niac-niacsho Nuquin Papan aido cuidquiendac.

### *Pabado istante bunaid*

<sup>17</sup> ¿Mibi yacnoshon aden chieshëmëñquidon cuemiac mibi tantienquo-dambi ictionda? Mibi unësquo icnuc mibi istantiadquo iccondabi. <sup>18</sup> Adec: —Padpiden istanu —quesho Satanasën nac padenquo iccondabi. Padpidec: —Nidnu —quesho adembidi. Padpidec: —Nidnu —quesho Satanasën nacbidi padenquo iccondabi. Nëbi adecbidi mibi istantiadquo iquebi. <sup>19</sup> Nuquin Icbo Esuquidistu choan aibdëd tabadquin ¿tsutsimbi ispatsia? ¿Tsutsi isashini cuishonquepatsia? ¿Tsutsi isumbimbi: —Is. Ëmbi chuibanac Esus tantiabenondaido neque —capatsia? Mibibimbi caic. <sup>20</sup> —Esus tantiec bëdamboec tabadosh —quesho tantiash mibi tantiec cuishonquebi. Adembidi mimbi naid isun: —Mimbi bëdamboen naondac. Mimbi chuibanac ëbi tantiabenondash —ëbi caindac Nuquin Icbon.

## 3

### *Istan, quequin Timoteyo chiaid*

<sup>1</sup> Aden mibi tantiec: —“¿Mitsipadec tabadpec?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. Adshumbic shubu dadpen icquid Atenas caid yacno tabadec ëbëd icquid utsi Sidbano chuiquin: —Timoteyo nidan nuquiuidtsëqui icnuna —caondambi. <sup>2</sup> Ëmbi: —Nid —caonaid Timoteyo Esus tantiaquid yec nuquin utsi nec. Ëbëdtan Esus chuibenequidquo nec. Adquid icsho nadopondambi. —Tesadonica yacno nidshun Esus bëdamboen chuibantan. Adembidi: “Esus tantiec chieshtoenquo yec nadquiec tabadquid nendac,” quequin bëdamboec tabadquin ismetan, Timoteyo. <sup>3</sup> Aton matsesën comapenen chieshënac chieshtoshon Esus tantienquo yanushe. Chuitan —caondambi. Aden chieshënte mibi chiondambi. —Nuquin Papan tantiacpadomboen Esus tantiaquid chieshëndac —quequin mibi chiondambi. <sup>4</sup> Aden mibëd icquin chuideniondambi. Adsho ëmbi chiapadomboen nuqui chieshëndash. <sup>5</sup> —“Ëbi nidan chieshënac ¿adecbidida Tesadonica yacnocquido chieshtoenquo icpatsiashba?” quequinuidtsëqui tantiec tsadtiapimbo iquebique. Istan —caondambi Timoteyo chuiquin. —“Icsamequin tanu,” quequidën Satanasën namiac chieshtoshon Esus tantienquo yanushe. Istan. ¿Ada ëmbi Esus chuibanondaido bëdamboec tabadeque? —caondambi Timoteyo chuiquin.

### *Timoteyon chuituidaid*

<sup>6</sup> Adoac mibi yacno istanec choquin Timoteyon mimbi naid chuituidoshi naden. —Esus tantiaquid yequi tantianquidquo yamposh —quequin chuiposh Timoteyon. Adashic: —“Pabado chedo bëdambo iccondash. Aido padpiden istiadquo iquebi,” quiosh Tesadonica yacnocquido —queposh Timoteyo. Adembidi mibi istantiadquo iquebi. <sup>7</sup> Timoteyon chuiboed tantiash bëdambo yanobi. Nëmbo icquidon chieshënac shubiantiadtsëcquo iccobi. Adboedi mibi caic: —Chieshtoenquo icquin Esus tantiosh —quesho tantiash bëdambo yanobi. <sup>8</sup> Mimbi aden naid tantiash dayacquo yacbimboec iquebi. <sup>9</sup> Aden tantiashun Nuquin Papa chianembi naden. —“Tesadonica yacnocquido bëdambo iccosh,” quesho tantiash cuishonquebi, Papa. Mimbiuidtsëqui namiac chieshtoenquo iquec. Aden namec mibi bëdamboshë iquec, Papa. <sup>10</sup> Aido istiadquo iquebi. Mimbi chiaid bëdiactsëc tantiasho aido bëd tabadquin bëdamboen chuibantsiambique. Ëbi ano nidmeta, Papa —quequin Nuquin Papa chianembi.



11 —Nuquin Icbo Esusbëdtan Nuquin Papan nëbimbobi ambo nidmepashuni —caimbi. 12 Adec mibëd ictiadquio icquin Nuquin Papa mibi chianembi. —Ëmbi aido tantiaquiacpadomboen utsibobëd tantianameta, Papa. Bëdiactsëc tantianantsëcboedobi comapenec tantianamequiota, Papa. Adembidi utsibotsen bëdamboen ismeta. 13 Aden bëdamboec tabadquid icmeta, Papa. Mimbi adoac chieshtoenquio yec bëdamboec tabadtsiash. Adsho mimbi mibi yacnoshon uaido mayan bëdabobëd nidaidën padpidec choshon con Icbo Esusën: “Tesadonica yacnocquido icsambo iquec,” catiapimbo ictsiash. Adembidi: “Icsambo iqueque. Cuidnuna,” catiapimbo mimbi ictsiac, Papa —quequin Nuquin Papa chianembi mibi chuiquin.

## 4

### *Chidobëd bëdamboec tabadte chiaid*

1 Tanta, con utsibo. Chiaid utsitsen mibi chuinu. —“Bëdambo mibi iquec,” Nuquin Papa camenuc bëdamboec tabadta —quequin ëmbi chiondacadquieci tabadta. Nuquin Icbo Esus tantiaquieci adta. —Bëdamboec tabadosh —quesho tantiasun: —Adquiequi tabadta —caimbi mibi. 2 Nuquin Icbo Esusën namiac aidën chiaidquio mibi chuibanondambique. Aid tantiaquieci bëdamboec tabadta. 3 Nuquin Papan tantiamiacpadquieci tabadquidën nadquid yendac. Utsin chido chudenquio icquin aton chidouidtsëqui chudquid yendac. Adembidi chidon dada utsi chudmenquio icquin aton bënëuidtsëqui chudmequid yendac. 4 Adec Nuquin Papan chiaid niaquenquio yec abi bunaid mëmunec dada ambi inaidquio aton chidouidtsëqui chudec aidbëd bëdamboec tabadsho: —Bëdambo iquec —catsiash Nuquin Papan. 5 Nuquin Papa tantiesabimboec tabadenda. Esus tantiesambien comapenec tsien bunquin aton chidopenquio chudendac. Adembidi Nuquin Papa tantiesaci icquin chidon utsin shui bunquin aton bënëpenquio chudmendac. Adec tabadenda. 6 Bënë nidan aton chido abentsëqui uequid istuidshun chudenda. Adoquid Nuquin Papan cuidendac ëmbi chiondacadpadomboen. 7 —Opabimboec chudnanec ma icsamboec tabadnu —¿quequinda Nuquin Papan Esus tantiaquido nuqui icmediac? Padenquio. —Ma bëdamboec tabadnu —quequimbien Esus tantiaquido nuqui icmiaque. Bëdamboec tabadnuna. 8 Aden chuiquin aton Mayan nuqui menequidën Nuquin Papan chiaid chieci nebi. Aden ëmbi chuiboed niacquin Nuquin Papan chiaidquio mimbi niactsiac.

### *Adecbidi tantiananquiota, quequin chiaid*

9 —Bëdamboec tantiananta —quequin padpiden chienquio iquembi. Nuquin Papan tantiamiac Esus tantiaquido yec mibi tantiananec. 10 Min nidaid Masedonia caidën tabadquido Esus tantiaquido utsibotedi mimbi tantieci. Mibi yacpadquiecbidi tantiananquioquin utsibotsen tantiaquiota. 11 Ëmbi chiondacadquieci chieshëmënenquio yec bëdamboec tabadta. Utsi icsaiduidi chienquio yec bëdamboec tabad. Chieshenquio yec dayacquio yec chonoadta. 12 Adash bunenquio mibi ictsiac. —Con na nacnenambo iccombique. Mitsana beccho —mibi quenquio ictsiac. Mibi adquio icsho isash Esus tantiesabo: —Esus tantiaquido bëdamboec tabadec —quetsiash.

### *Esusën abi yacno abi tantiaquido buante chiaid*

13 Tanta, con utsibo. —“Esusën abi tantiaquido uincuemendac,” quequin chuisho mimbi tantiabi icnushe —quesun mibi bëdamboen chuinu. Esus tantiesabo: —Ëmbi tantiaidquio padpidec isadenquio iquec —quec yuecquio shubiabimboec shubienda. —Ëbipadquid Esus tantiaquid Nuquin Papa

yacno istuidendambi —quec ma yuecquio shubianenquio icnueshun Esusën uincuemete mibi chuinu. <sup>14</sup>—Unës uaqui Esus uincuenacpadebidi nuquitsen uincuenendac. Esus tantiaquido unësacsho uincuemeshun Nuquin Papan abi yacno aton Mado Esus buamendac —quequin nuqui tantiec. <sup>15</sup>Tantia. Nuquin Icbo Esusën chiaidquio mibi chuinu. Nuquin Icbo Esus nidaidën padpidec chonoc aid istuidec Esus tantiaquido unësabi icquido abia nidenquio iquendac. <sup>16</sup>Padenquio icnubien Nuquin Papa yacnuësh choec Nuquin Icbo Esusba nua cuëdtuidendac. Adnubien Nuquin Papan abi yacnoshon uaido mayan bédabo chuiquid dapatsen nua cuëdtuidoaindac. Adnubien Nuquin Papan chiacpadomboen utsin nua shoncatuidendac. Adnubien Esusën abi tantiaquido unësaidotedi abia aton dada chuca uauin uincuemendac. <sup>17</sup>Adoaquien aidobëdi Esus tantiaquido unësabi icquido tsidadash aidotedi abuctoendac Nuquin Papabëd tabadec nidec. Abitedi abuctoquimbi abi bëquedec Esus chosho istuidendac. Adash Esusbëd Nuquin Papa yacno nidash anobi nuqui quenenendac. <sup>18</sup>Ëbi adsho tantiashun nadota. Aton matses unësaid tantiec shubiquido bédambo icmenuen ëmbi chuiboed chuita.

## 5

### *Esus chote chiaid*

<sup>1</sup> Tantia, con utsibo. Mibi chuinu. —Nëidtedec ushash Esus padpidec choec —quequin chuitiapimbo iquebi. Adembidi: —Nëidted seta matamiash choec —quequin dada uatiapimbo iquebi. Tantienuio iquembi. Naden mibi chiondambi. <sup>2</sup>—“Nëid inchëshëmbi ampequid choec,” quequin tantiatiapimbo yacnimboec: “Aid ushën Nuquin Icbo choec,” quequin tantiatiapimbo icnuc Esus choaindac —quequin mibi chiondambi. <sup>3</sup> Esus tantienquio yequi matses dadpen: —Cuesnanenquio yec nuqui bédamboec tabadec —queshobien ambi: —Ëbi cuidendac —cacmaidënquio padpidec choshon cuidquindac. ¿Mitsipadquio chido bacuë usunquid icpec? —Aid ushënquio tishembi —quequin tantiatiapimbo yequi badedquio nëncuenec. Adecbidi ambi: —Choec —cacmaid Esus badedquio chosho abi tantiesabon cuenëntiapimbo iquendac. <sup>4</sup> ¿Esus chonoda nuqui dacuëdpe? ¿Esus tantiesaboda nuqui nedi? Esus tantiaquidoen nuqui nec. Adquid yec: —Nëbien Esus chochitec —quec bédamboec nuqui tabadnubi Esus chonoc nuqui dacuëdenquio iquendac. <sup>5</sup> ¿Pacuënëdabimboecquidoda nuqui nedi? Padenquio. Pabiate paposhquiacbimboecnuc Esus bédamboen tantiamiaido yec bédamboec tabadquido ma nuqui neyoc. Adecbidi bédamboec tabadnuna. <sup>6</sup> Ushquin pabiaten tantienquio yacnimboen utsibon Nuquin Icbo Esus tantienquio iquec. Adec tabadenquio icnuna. —Esus tantienquio icmane —queshun nuqui icsate bunaid nainquio icquin mëmununa. Nuquin Icbo chosho istiadquio yec bédamboec tabadnuna. <sup>7</sup> Esus tantiesaboen inchëshën ushquin tantienquio yacnimboec iquec. Adquiecbidi tantiadenuen acte paëmbo icquid acquido nec. <sup>8</sup> Adquidpenquio yec Esus tantiaquido yec bédamboec tabadnuna. Nuqui icsate bunaid nainquio icquin mëmununa. Sondado: —Shocosh tsasimbo icquid shictonquenu. Sicsenushe —quiacbimboec icnuna. Satanasën Esus tantiamenquio icnushe. Esus tantiaquioquin matsestsens tantiaquionona. Adecbidi sondado: —Masenushe. Shocosh tsasimbo icquid mauete mauenu —quiacbimboecbidi icnuna. Satanasën icsamboen tantiamequin chieshtomenushe. —Esus

tantiasho cuidenquo icquin Nuquin Papan abi yacno ëbi tabadmendac — quequin bëdamboen tantianuna. <sup>9</sup> ¿Cuidnuenda Nuquin Papan nuqui Esus tantiamediac? Padenquo. Abëdi tabadmenuen Nuquin Icho Esuquidistu nuqui tantiamiac. <sup>10</sup> Aidi abi tantiaquid cuidmenquo icnuec abided cuidadec unësac caondash. Aidën padpidec choshon abi tantiaquidotedi buanshun abëdi tabadmendac. Unësaid uincuemiaidobëdta unësabi icquidotedi adoendac. <sup>11</sup> Ëbi adsho tantiashun mimbi nabocpadomboembidi Esus tantiec bëdambo icnuec ëmbi chuiboed chuinanquiota. Adecbidi bëdamboec tabadec: —Adequi tabadnuna —cananta.

### *Bëdamboec tabadte Pabadon chiaid*

<sup>12</sup> Esus mibi chuibanquido bëdamboen ista. —Nuquin Icbon chiacpadomboen chieshtoenquo icquin nuqui chuiquidën nuqui bëdamboen chuibanec —quequin aido bëdamboen tantiata. Mibi nashunquidombo neque. Aidon: —Nuquin Papan chiaid niaquenquo yec bëdamboec tabadnuna —quequin chuisho bëdamboen tantiata. <sup>13</sup> —Nuquin Papan chiaid bëdamboen tantiaquidombo nec —quequin bëdamboen ista. Adec chieshëmënenquo yec bëdamboec tabadta. <sup>14</sup> Mibëd icquido naden chuiban. Chieshquid icsho: —Mibitsen chonoadta —cata. Dacuëdsho: —Dacuëdenda —cata. Esus bëdiactsëc tantiatsëcsho bëdamboen chuiquin Esus tantiamequiota. Dada padishquo icsho nashunta. Aden nëishenquo icquin abitedi bëdamboen ista. <sup>15</sup> Utsin chieshënac cuidnanenquo yec bëdamboec tabadta. Mibëdtan Esus tantiaquidobëd bëdamboec isnanquin utsibotsen bëdamboen ista.

<sup>16</sup> Aden Esus tantiec ënëdenquo yec cuishonquianeta. <sup>17</sup> Adembidi Nuquin Papa chianequin: —Ëmbi chiacpadomboen ëbi nashunquin utsibotsen nashunta, Papa, —quequin chianeta. <sup>18</sup> ¿Mimbi chiacpadomboen Nuquin Papan nasho isunuidida mimbi: —Nuquin Papa bëdambo iquec —cape? Nadoac bëdambo ictsiash. Bëdamboec tabadquin: —Mibi bëdamboshë iquec, Papa, —cac bëdambo ictsiash. Daicsabudshumbic adembidi nac bëdambo ictsiash. Paëmbo icnubi adembidi. Mitsana icnuc adembidi. Mitsana nibëdnubi adembidi. Utsibon chieshënaqui adembidi: —Mibi bëdamboshë iquec, Papa —cac bëdambo ictsiash. Aden Nuquin Papan: —Ma Esus tantiaquidon adono —quequin tantiacpaden mimbi natsiac. <sup>19</sup> Nuquin Papan Mayanën Nuquin Papan chiaid tantiamiac pamumëdadbimboec tabadenda. <sup>20</sup> Aden Nuquin Papan Mayanën tantiamiac utsibontsen chuisho: —Mue nec —badedquo cainda. Chuishoba tantiata. —Nuquin Papan chiaidquo chuinu —quesho mamënshunenda. <sup>21</sup> Adenquo icquin: —¿Nuquin Papan chiaidquibida chuibanec? Tantiabono —cata. Aden tantiashun Nuquin Papan chiaidquo isbanta. Aden isbanquin abimbo chuisho tantiashun: —Ai, Nuquin Papan chiaidquo chiec —queshun aidën chuisho bëdamboen tantiata. <sup>22</sup> Adembidi Nuquin Papan chiaid isbanquin icsamboen chuisho tantiashun: —Nuquin Papan chiaidpenquo chiec —queshun aidën chuisho tantienda. Aidën chiacpadomboen nainda.

<sup>23</sup> Mibi Nuquin Papa chianembi. —Mates bëdambo icmequid icquin mimbi chiacpadomboen aido name, Papa. Mimbi chiaidquo bëdamboen tantiamequin bëdamboen tabadme, Papa. Mimbi adoac bëdamboec tabadnuc choashun con Icho Esusën: “Aido bëdambo iquec,” catsiash, Papa —quequin Nuquin Papa chianembi mibi. <sup>24</sup> Nuquin Papa nuqui Esus tantiamequid muesambo nec. Adquid icquin ambi chiacpadomboen nuqui chieshtomenquo iquendac. <sup>25</sup> Nuquin Papa ëbi chianeta. —Abëd icquidobëdta Pabado bëdamboen nameta, Papa —quequin Nuquin Papa chianeta. <sup>26</sup> Ambocquido

Esus tantiaquidotedi chuiquin: —Pabado chedon nuqui tantiaquiec —  
quequin chuiban. <sup>27</sup> Nuquin Icbon tantiacpaden chuiquin dada uaom-  
bique. Embi dada uaboed nēid isquin ambocquido Esus tantiaquidotedi  
chuiban. <sup>28</sup> —Nuquin Icbo Esuquidistun bēdamboen ispashun —quequin  
mibi tantiemi. Padi. Aidedi dada uaombi.

## TESADONICA YACNOCQUIDON ISTE 2

### *Pabado tauamboen chiaid*

<sup>1-2</sup> Pabado nebi. Tesadonica yacnocquido Nuquin Papabēdta Nuquin Icho Esus tantiaquido mibi chuoquin dada uaimbi. —Nuquin Papan Esuquidistubēdtan bēdamboen isquin bēdambo icmepashun —caimbi mibi. Ēbēd icquin Sidbanobēdtan Timoteyon: —Nuquin Papan adopashun —quequimbidi mibi tantiec.

### *Nuquin Papan Esusbēdtan matses cuidte chiaid*

<sup>3</sup> —Esus tantiaquidēn: “Aden naic mibi bēdamboshē iquec, Papa,” quequin Nuquin Papa chianequid —quequin tantiaquin mibi Nuquin Papa chianembi naden. —“Esus bēdiactšēc tantiatsēchoedombi nēbi Esus tantiabededosh,” quiosh, Papa. “Adecbidi bēdiactšēc tantianamboedi nēbi comapenec tantiananosh,” quiosh. Aden aido bēdambo icmec mibi bēdamboshē iquec, Papa —quequin chianembi mibi. <sup>4</sup> Mimbi aden bēdamboen naid Esus tantiaquido utsibo chuibeniombi. —Dadpeshun chieshēnaqui chieshtoenquo icquin Tesadonica yacnocquidon Esus tantiec —quequin shubu utsin shubu utsinquien chuibeniombi.

<sup>5</sup> Adec chieshtoenquo icquid icquin nuqui naden tantiec. —Ēbi chieshtomenquo icquid abitedishun naid tantiaquidquo nec. Adquid icquin icsambo icquido cuidquin bēdambo icquido Nuquin Papan bēdamboen isec —quequin nuqui tantiec. Adec chieshtoenquo icquin Esus tantiasho Nuquin Papan: —Adquido ěmbi namiacnombo chomeshun ěbēdi tabadmendambi —nuqui caindac. <sup>6</sup> Nuqui chieshēnquidon naidtsen tantiaquid icquin Nuquin Papan aido cuidendac. <sup>7</sup> Aden nuqui chieshēnquido cuidquin aidon nuqui natiamiaid nuqui bēpiscudmendac. Abi yacnuēsh mayan bēdabo ambi comapenen tantiaquin namiaidobēd choshon Nuquin Icho Esusēn adoendac. <sup>8</sup> —Icsaisambo yec matses cuidquid nebi —quequin tantiamenuc bēchamauanquiec choshon Nuquin Papa tantiesabo cuidendac. —“Nuquin Icho Esus tantiasho Nuquin Papan mibi bēdamboen istsiash,” quequin chuisho tantiatipimbo iquebi —quequin abi tantienquo icsho Esusēn cuidendac. <sup>9</sup> Cacumiacbimboen abi yacno puduedmenquo icquin ambi icsambo icquido cuidacno nidmendac cuentiapimbo icnuc. Adoac Esus abitedishun Icho yec bēdamboshē isadsho isec tabadtiapimbo iquendac. <sup>10</sup> Aden ambi icsaido cuidte ushēmbi Esus chosho abi tantiaquido: —Ēbi cuidmenquo icnuec abided cuidadaid Nuquin Icho bēdamboshē iquec —quequin aton Icho isec tabadendac. Ēmbi Esus chuibanac aid tantiabenondaido icquin mimbitsen Esus chosho isendac.

<sup>11</sup> —Aidbēdtambi Esus isendambi —quequin mibi Nuquin Papa chianembi naden. —Mimbi Esus tantiamiaido Tesadonica yacnocquido bēdamboen tabadme, Papa. Aido: “Esus tantiaquin ambi chiacpadomboen natiadquo iquebi,” quesho ambi chiacpadomboen name, Papa. Comapenen tantiaquidquo mibi neque. Adota, Papa. <sup>12</sup> Aden mimbi con Icho Esuquidistubēdtan bēdambo icmiac Esus tantiec bēdamboec tabadtsiash, Papa. Adec bēdamboec tabadsho isash utsibo mibi caic: “Abi tantiaquid icsho Esusbēdtan Nuquin Papan aden bēdamboen tabadmec. Aton Icho Esuquidistubēd Nuquin Papa bēdamboshē iquec,” quependac utsibo, Papa —quequin Nuquin Papa chianembi mibi tantiaquin.

## 2

### *Icsamboshë icquidba chote chiaid*

<sup>1</sup> Tanta, con utsibo. Mibitedi chuinu. —Abi yacno tabadmenuen buanuec Nuquin Papa yacnuësh Nuquin Icbo Esus ënden choac —quesho tantiash <sup>2</sup> dacuëdtanenda. Mibi yacnoshon ¿tsuntsin adec muaquin chuiposh? Aidon: —Tantia. Nuquin Papan Mayanën tantiamiacpadomboen chuinu. Nuquin Icbo Esus ënden choac —quec muapash. Ambembi chiaidien chuichitash. —Naden Pabadon chiaid iquec —quequin ëmbi dada uaidbimboecquid isquimbien chuichitash. <sup>3</sup> Adec muaid tantiash: —Abimboen cachitosh —quenda. ¿Nuquin Icbobada chopadic? Padenquo. Utsibain choendac. —Nuquin Papa caidën chiaid tantiatiapimbo iquebi —quec matses icsamboec tabadnubien Nuquin Papa chieshënquidquo icsamboshë icquidba choash matses dadpenquo chuiquid dapa iquendac. Aid Nuquin Papan cuidtequidquo nendac. Aidba choabi icnuc Esus choenquo iquendac. Icsamboshë icquidbain choendac. <sup>4</sup> Aid chuiquid dapa yanashic Nuquin Papa dëniacte bunquiec Nuquin Papa tabadte shubu uashunaidën puduedshun: —“Comapenen tantiaquin ëbi nashunquidquo nec,” quequin mimbi Nuquin Papa caid nibëdeque. Ebiuidtsëqui tantiata —caindac matses abitedi chuiquin.

<sup>5</sup> Aden mibi chuideniondambi. ¿Tantienquioda ique? <sup>6</sup> Nuquin Papan tantiapadënquo chomenuen uidënuac icsamboshë icquid nëbi choenquo iquec. Nuquin Papan tantiapadënquo choendac. Eëmbi chiondacadquid abi chomenquo icquid mimbi tantiec. <sup>7</sup> Nëbi isadenquo icquidën Satanasën namiac matsesën Nuquin Papan chiaid niac-niacbededec. Padnuen icsamboshë icquid choabi iquec. Aid chomenquo icquid nidabi icnubi icsamboshë icquid chuiquid dapa yantiapimbo iquendac. Abi chomenquo icquid nidmiambien <sup>8</sup> icsamboshë icquid matses chuiquid dapa iquendac. Adnubien Nuquin Icbo Esusën: —Eëbien matsesën Icbombo nec —quequin matses abitedi tantiamenuec choshon icsamboshë icquid: —Unësta —caquinuidtsëqui unës uashunendac.

<sup>9</sup> Adec Esus choabi icnuc icsamboshë icquid chuiquid dapa yanendac. Adquid yanshumbic Satanasën tantiamiacpadomboen comapenen tantiaquin dadpenquo nabanquin ismendac. —Comapenen tantiaquidquo nebique. Istac —quequin ambembi chiaid tantiamenuen aden nadatiambo icquin nabanquin ismendac. <sup>10</sup> Adec icsauidequi tabadquid yec comapenec muasho tantiash: —Abimbo caic —quependac Esus tantiesabo Nuquin Papan cuidtequido yec. Aidon Esus chuibenequidën Nuquin Papa yacno tabadte abimbo chuisho pamumëdadbimboen tantiatiapimbo icquin ambembi chiaiduidtsëqui tantiendac. <sup>11</sup> Aden ambi chiaid niac-niacuidequi icsho Nuquin Papan: —Abi bunaidquo ambembi chiaidquo chuisho ma tantiapanuna —quequin namiac: —Mue nec —quequin tantienquo iquendac. Utsi muasho tantiash badedi: —Abimbo chiec —quetsiash tantienquo yec. <sup>12</sup> Aden ambi chiaidquo tantiatiapimbo icquin aid niac-niaquec icsateuidi bunsho Nuquin Papan cuidquiendac.

### *Nuquin Papan tantiamiaid*

<sup>13</sup> Nuquin Icbon mibi tantiaquiec. Eëndenquimboshë matses uabi Nuquin Papa nuqui caic: —Eëbi yacno tabadmenuen Esus tantiamequin aido bëdambo icmendambi —quepampic. Adshumbic aidën chiapadomboen aton Mayanën namiac Nuquin Papan chiaidquo tantiash Esus tantiec mibi bëdamboec tabadcuenondac. —Adquiobidi iccosh —quesho tantiashun Nuquin Papa chianembi naden. —Aden aido bëdamboen namequid yec mibi

bédamboshë iquec, Papa —quequin chianembi mibi tantiaquin. <sup>14</sup> Nuquin Papan chiaidquio ëmbi chuibanac mimbi Esus tantiabenondac. Abi yacnoshon Nuquin Icho Esuquidistupadquio bédamboshë icmenuen aden Nuquin Papan mibi Esus tantiamiac. <sup>15</sup> Ëbi adsho tantiashun ëmbi chiondacadomboen chieshtoenquio icquin Esus tantiata. Ëmbi mibi bëisquin chiondaidbëdta ëmbi dada uaquin abimbo chiondaid bëpiscudenda.

<sup>16</sup> Nuquin Icho Esuquidistubëdtan Nuquin Papan nuqui tantiaquin bédamboen isec. Adembidi: —Nuquin Papa yacno Esusbëd iquendabi —quequin tantiamequin dayacquio yacimboecnuc nuqui icmec. <sup>17</sup> Adquid icsho chianembi naden. —Tesadonica yacnocquido chieshtomenquio icquin Esus tantiamequin bédamboec tabadquid icme, Papa. Adembidi bédamboec chuinanquid icmequin nashunanquid icme, Papa —quequin Nuquin Papa chianembi mibi tantiaquin.

### 3

#### *Nuquin Papa ëbi chianeta, quiaid*

<sup>1</sup> Tanta, con utsibo. Mibi chuinu. Nuquin Papa ëbi chianeta. —Nidaid utsi-utsiec yacno nidmeshun Pabado chedo matses dadpenquio Esusën naid bédamboen chuibame, Papa. Mimbi bédamboen chuimiac ëmbi Esus tantibenondacadomboen utsibon dadpenshun Esus tantiabentsiash, Papa. <sup>2</sup> Aden Esus chuibansho isun Esus tantiesabo chieshëmënquidon: “Pabado cueschitono,” casho cuesmenda, Papa —quequin Nuquin Papa ëbi chianeta. <sup>3</sup> Nuquin Icho bédambo iquec. Muesambo icquin ambi chiacpadomboen nuqui bédamboen dayun uaindac. —Ëbi tantienquio yanushe —queshun nuqui chieshtomenquio icquin Satanas nuqui yuametiapimbo iquendac. <sup>4</sup> —Aden Nuquin Icbon bédambo icmiac ëmbi chiacpadomboen naboedi adembidi Tesadonica yacnocquidon naindac —quequin tantiombi. <sup>5</sup> Aden mibi tantiaquin naden Nuquin Papa chianembi: —Con Icho Esuquidistun tantiamiacpaden: “Nuquin Papan ëbi tantiaquiec,” quequin Tesadonica yacnocquido tantiameta, Papa. Esusën chieshtoenquio icquin nacpadomboembidi aido chieshtoenquio icquid icmeta, Papa —quequin Nuquin Papa chianembi.

#### *Esus tantiaquido uspuenquio icquid*

<sup>6</sup> Tanta, con utsibo. Nuquin Icho Esuquidistun: —Ëbi chuibeneta —caidquio icquin mibi chuinu. Esus tantiaquido utsi-utsiec ëmbi mibi chiondaid niac-niaquec chieshuidequi icsho isash aidbëd chieshec tabadenda. <sup>7</sup> —“Ëbëd iquec Pabado dayacquio iccondacpadquiec chieshenquio yequien tabadtiad,” quiosh—quiosh mibi caic. Abimbo mimbi cac. Mibëd yec dayacquio iccondabi. Chieshenquio yec chonoadteniondabi. <sup>8</sup> Mimbi pete meniac ¿con piucquid mibi menenquiodambi ictionda? Bedquin mambi mibi menianepondac. —Ëbi meniac aton na naimëdnushe —quiash con piucquid bednuec chonoadteniondabi. <sup>9</sup> —Esus tantiaquidon abi chuibanquid menenquio icquid —¿quectabi ique? Padenquio. Esusën naid chuibanquid ambi chuibanaidon meniaquien bédambo ictsiash. —Chieshenquio icquin ëmbi nacnensho isun ma adembidi Tesadonica yacnocquidontsen nanu—quiashini chonoadteniondac. <sup>10</sup> Mibëd tabadquin naden chiondambi. —Aton na nacnenenquio yec chieshuidequi icsho pemenquio icquid —quequin chiondambi.

<sup>11</sup> Mibi caic: —Utsi-utsiec chieshuidequi tabadosh. Utsi icsaiduidquio chiec tabadosh —quetuidosh. <sup>12</sup> Uspun tantia. Nuquin Icho Esuquidistun chiaid mibi chuinu. Chieshuidequi tabadenda. Mitsanabi penuec chonoadta. <sup>13</sup> Nuquin Papan chiapadomboen naic chieshtoenda. Chieshtoenuo icquin bēdamboen-uidi nata. <sup>14</sup> Nēid dada uaquin ěmbi chiaid niacsho ista. Adec icsasho isash: —“Icsamboen naombi,” quequin ma tantiabenu —quiash abēduidi iquenda. <sup>15</sup> Aid chieshēnenquio yequi adta. Mibipadquid Esus tantiaquid icsho naden chui. —Esus tantiaquid adesa ye. Padi. Bēdamboequien tabadtiad —quequin chuita.

*Pabadon ěnquin chiaid*

<sup>16</sup> Mibi tantiaquin Nuquin Papa chianembi naden. —Bēdambo icmianquidquio icquin Con Icbonquio ma aido dacuēdenquio icquid icmepanuna, Papa. Aidobēd ma Esus tēshēdenquio icpanuna, Papa —quequin Nuquin Papa chianembi. <sup>17</sup> —Ista. Ěmbimbo dada uaid nēid neque —quequin ěmbi nēidtedpactsēc dada uaid isun: —Pabadon chiaidquio nec —quequin mimbi tantiendac. <sup>18</sup> —Nuquin Icho Esuquidistun bēdamboen ispashun —caimbi mibi. Padi. Aidtedi dada uaombi.



## TIMOTEYON ISTE 1

### *Tauamboen chiaid*

<sup>1</sup> Pabado nebi. Nuquin Papa yacno yuedanquidën Esuquidistun: —Ëbi chuibeneta —caidquio nebi. Aton Mado tantiasho nuqui bëdamboen isquidën Nuquin Papan: —Con Mado Esus chuibeneta —caidquio nebi. <sup>2</sup> Ëmbi chiondac Esus tantiabenash con mado icbobimboecquid mibi neque. Mimbi iste nëid dada uanu. Mibi tantiec: —Nuquin Papan aton Mado Nuquin Icbo Esuquidistubëdtan con mado bëdamboen isquin bëdambo icmepashun —quiobi.

### *Chiaid utsi chienda, quequin chiaid*

<sup>3</sup> Tantia. Mibi chuinu, mado. Nidaid utsi Masedonia caid yacno nidquin ëmbi chuibidanondacpadquiec Epeso yacno icta. Mibi yacnocquidon: —Nuquin Papan chiaidquio chuinu —queboedombi aidquio chienquio icsho naden chuita. —Nuquin Papan chiaid chuiquimbi chiaid utsibëdta nact-susuaquin Nuquin Papan chiaid chienda —cata. <sup>4</sup> Nadembidi chuibanta. —Tsusedpabon ambembi chiampiduidi chiec tabadenda. Adembidi utsibon: “Nuquin matsesën mado nepampic. Aidën bababic nadec cuëmëdpampic. Aidën tsyuecquidoudtsëqui bëdambo iquec,” quequin dadpenquio ambembi chuibampac caosh. Aden chiaiduidi tantiec tabadenda —cata. —¿Adenuidi chuiquinda mimbi Nuquin Papan chiaidquio bëdamboen tantiamepe? Adenuidi chuiquin mimbi Esus tantiamenquio iquec. Aden mimbi ambembi chiaid chuisho tantiash: “Mimbi icsamboen chiec. Ëmbimboen bëdamboen chiec,” quec mibëdi chushcananeque. Nuquin Papan chiaidquien chuitiad —cata. Nuquin Papan chiaid bëdamboen chienquio icquido aden chuita. <sup>5</sup> Adshumbic aidobidi naden chuita. —“Matses ma bëdamboec tantiananu,” quequin Nuquin Papan chiaidquio chuita. Adoac bëdamboen tantiashun Esus tantiec bëdamboec tabadec matses bëdamboec tantianantsiash —cata, mado. <sup>6</sup> Mimbi aden chiacpadomboen nainquio icquidoen Nuquin Papan chiaid bëdamboen tantienquio yec abembi onquec. <sup>7</sup> Adquidon: —Nuquin Papan ambi chiaid Moises dada uamepampid bëdamboen tantiembi. Moisesën chiampicpadomboen namenuc aid chuibanquid icte bunebi —queboedombi Nuquin Papan chiaid bëdamboen tantienquio icquin icsamboen chiec.

<sup>8</sup> —“Naden nata,” quequin Nuquin Papan chiaid Moisesën dada uapampid icsambo iquec —¿quequindambi chie? Padenquio. Ma aidi bëdambo iqueyoc. —Nëid tantiashun ma abi icsaid ënu —queshun aid abimbo chiac bëdambo ictsiash. <sup>9</sup> ¿Bëdambo icquid chuiquinda Nuquin Papan Moises dada uamepampic? Padenquio. Icsambo icquido chuiquimbien adopampic nadquido chuiquin. Nëidic Nuquin Papan chiaid niac-niacquido. Nëidic aton chuiquidën chiaid niac-niacquido. Nëidic Nuquin Papa tantiesabo. Nëidic Nuquin Papa mamënsunquido. Nëidic anibi cunesunquido. Nëidic amëbi cunesunquido. Nëidic cunesunquido. <sup>10</sup> Nëidic aton chidopenquio chudquido. Nëidic aton bënëpenquio chudmequido chido. Nëidic aton chido bunenquio yec dada daëd chichudnanquido. Nëidic matses utsi bedshun yuaquido. Nëidic muaquido. Nëidic Nuquin Papan chiaid niac-niacquido utsibotedi. Adquid matses icsambo icquido chuiquin Nuquin Papan chiaid Moisesën dada uapampic. <sup>11</sup> Adembidi Esus chuibenequidon: —Adquid icsambo iquec —quequin chiec. Bëdamboshë icquin Nuquin Papan aden Esus chuibenequido chuimec. Esus chuibenequidbidi icquin adembidi chiembi.

*Nuquin Icbon Pabado bēdamboen isbenaid*

<sup>12</sup> Tantia, mado. Mibi chuinu. Nuquin Icho Esuquidistun: —Pabadon ēbi bēdamboen chuibantsiash —quequin tantiashun: —Ēbi chuibenequid icta, Pabado —queshun ēbi bēdamboen namec. Adoaid icquin: —Ēbi namequid yec mibi bēdamboshē iquec, Icho —quequin Nuquin Icho Esus chianembi. <sup>13</sup> Ēnden adenquio iccondabi. Nuquin Papan Madopenquio danquin Esus icsamboen chuishunondambi. Abi tantiaquido chieshēnquin cuesun secate bunondabi. —Aton Mado Esus tantiasho Nuquin Papan ēbi bēdamboen istsiash —quenquio icquin adopondambi. Adshobini: —Pabadon abimbo tantiabi iquec —queshun Nuquin Icbon cuidenquio icpanēdash. <sup>14</sup> Adec icsambo icquid icsho Nuquin Icbon tantiamiac: —Abi tantiasho ēbi bēdamboen isbentsiash —quequin Esusquio tantiabenondambi. Esus tantiaquin matses-  
tsen tantiaquiembi.

<sup>15</sup> Tantia, mado. Naden chiaid bēdambo iqueque. —Icsambo ichoedēn abi tantiasho cuidmenquio icnuec Esus matsesac caondash —quequin chiaid bēdambo iquec. Ēbībic icsamboshē icpondabi. Utsibon Nuquin Papan chiaid bēdiactšec niac-niacnubi ěmbimbo comapenen niac-niaccondambi. <sup>16</sup> Adec ēbi yuec icsambo icsho Nuquin Icho Esusēn baded cuidenquio icquin abibi tantiamequin bēdamboen isbempondashi. —Pabado bēdamboen isaid chiac utsibo: “Pabado icsambo ichoedi Nuquin Papan bēdamboen isbenac. Adem-  
bidi Esus tantiasho Nuquin Papan ěbitsen bēdamboen isendac,” quequin ēbi tantiendac. Adquid unēsacsho ēbi yacno tabadmendambi —queshun abi tantiamequin Esusēn bēdamboen isbempondashi. <sup>17</sup> Aden tantiaquin nadoembi. —Nuquin Papa ambiuidtsēqui abitedi namequid yec abitedishun Icbombo nec. Unēstiapimbo icquid nec. Isadenquio icquid nec. Adquid abentsēcquiobi icnuc abipadquid utsi nibēdec. Adquid icsho abitedishun: “Mibi bēdamboshē iquec, Papa,” capashun ěnenquio icquin —caimbi.

*Matsesēn mibi chiondacadombota, quiaid*

<sup>18</sup> Mibi con mado icbobimboecquid neque. Ēmbi chiacpadomboen Nuquin Papan chiaidquio chuibanta, mado. Ēnden mibi Esus chuibanquid yanabi icnuc Nuquin Papan oncamiac nuquibēdtan Esus tantiaquidēn mimbi chuibante chuipondash. —Esus bēdamboen chuibanquin Timoteyon Esus tantiaquido bēdamboen namendac —quequin mimbi chuibante chuipondash. Aidēn chiacpadomboen chieshtoenquio icquin Nuquin Papan chiaidquio chuibanta. <sup>19</sup> Aden Nuquin Papan chiaid niaquenquio icquin Esus tantiaquieci bēdamboec tabadta. Utsiboen adenquio iquec. Icsamboec tabadquin Nuquin Papan chiaidquio niac-niacquin Esus tantienquio yanosh. <sup>20</sup> Adecandedo caidbēdtan Imeneyo caidēn aden Esus tantienquio yanosh. Aid daēdshun Nuquin Papa muauaquin icsamboen chuisho nadopombi. —Adquid Satanasēn natiambo icmepashun —queshun: —Esus tantiaquido cho-choacno choenda —capombi. —“Nuquin Papa muauachitombi. Icsambo icchitebi,” quequin ma tantianu —queshun adopombi.

## 2

*Nuquin Papa bēdamboen chianete chiaid*

<sup>1</sup> Tantia. Utsibotedi chuinu. Matses abitedi tantiaquin Nuquin Papa chianenuna. —Matses abitedi min Mado Esusbēdta mibi bēdamboen tantiamequin bēdamboen ista, Papa. Matses nashunquidquio yec mibi bēdamboshē iquec, Papa —quequin Nuquin Papa chianenuna. <sup>2</sup> Adembidi Nuquin Papa chuiquin: —Chuiquid dapambo pedesidente caidtedibēdta chuiquid dapa

utsibotedi bēdamboen tantiameta, Papa. Adoac aidon bēdamboen namiac cuesun secananenquo yec matses abitedi bēdamboec tabadtsiash. Adnubi abi chieshēnquido nibēdnuc Esus tantiaquido abi tantiec bēdambo ictsiash, Papa —quequin Nuquin Papa chianenuna. <sup>3</sup>—Con matses Esus tantiameta, Papa —quequin nuqui aden chianesho tantias: —Bēdamboen chiec. Ēbi bunaidquo chiec —quendac Nuquin Papa nuqui cuidenquo icquin abēd tabadmequid. <sup>4</sup> Matses abitedimbo cuidenquo icnuen matses bēdamboen iste bunquid yec: —Ma ěmbi chiaid tantiasun abided cuidadec unēsaid ma tantiapanu —quec Nuquin Papa. <sup>5</sup> Nuquin Papan chiaidquo tantiasun nuqui naden tantiec. —Nuquin Papa matses uaquid abentsēqui icnuc abipadquid utsi nibēdquiec. Abēd icboedi matsesun: “Nuquin Papapadquid icquin aid tantiamequid nebi,” quequin aton Madon matses chuipanēdash. Adecbidi aton Papa matses bēdamboen ismequid yampanēdash Esus. Aid abentsēqui Nuquin Papa bēdamboen ismequid nec. <sup>6</sup> Abi tantiaquid cuidmenquo icnuec abided cuidadec unēsac caondash —quequin chiaidquo nuqui tantiec. Nēbien Nuquin Papan tantiacpadomboen matsesēn aden chiaidquo chuiben-chuibenec. <sup>7</sup> Adomboembidi Esus chuibenequidquo nebi. —Matses utsibo isadaidpembo ěbi chuibeneta —Esusēn caonaid nebi. Adoaid icquin: —Ma Esus tantianu —quequin Nuquin Papan chiaidquo chuibenec nebi. Abimbo caimbi. Adquid nebi.

#### *Esus tantiec cuēdēnacnoshon nate chiaid*

<sup>8</sup> Tantia. Dadatedi chuinu. Cuēdēnacno puduedshun Nuquin Papa chuinuec bēdamboequien tabadtiad. Nēish bēdanash chieshēnanenquo icquimbien Nuquin Papa chuitiad. <sup>9</sup> Chidobotsen chuinu. Esus tantiec Esus tantiaquido cuēdēnacno nidnuec: —Mabi isnu —quequin tantienquo yec bēdamboec dasiuidta. Bēdamboec tabadquid dasiuidachimboec dasiuidta. Chido chishpidabimboec dasiuidenda. —Mabi isnu —quenquo yec Esusquo tantianuec Esus tantiaquido cuēdēnacno puduedta. <sup>10</sup> —Mabi isnu —quequin tantienquo yec: —Nuquin Papa tantiaquidquo nebi —quec utsibo nashumbanec bēdamboec tabadta.

<sup>11</sup> Esus tantiaquido cuēdēnacnoshon dadan Nuquin Papan chiaid chuiban-sho tantiaquid chidon. —Aidēn chiapadomboen natiapimbo iquebi —quequin tantienquo yec bēdamboen tantiec otacquo tabadquid chido. <sup>12</sup> Esus tantiaquido cuēdēnacno puduedshun dada chuibanesa chidon. Adem-bidi dada ancaisa chidon. —Otaquien tabadquid chido —caimbi. <sup>13</sup> Dada Adan caidba Nuquin Papan matses uapampic. Adshumbic aton chido Eba caidtsen. <sup>14</sup> Aden dadabēdta chido nacnenacsho isumbien Satanasēn: —Icsamequin tanu —qeshun muauac icsaquin chidomba Nuquin Papan chiaid niapampic. Adan padabi. Aden tantiaquin: —Dadan chido chuibanquid —caimbi. <sup>15</sup> Adec abia icsasho isun Nuquin Papan cuidac paēmo icnuc bacuē tishquid chido abitedi nec. Nēbi Esus tantiaquid yanash ambi tishaido bēdamboen namequid nendac. Esusēn chiapadomboen natiadquo icquin matses tantiaquid nendac. Nuquin Papan chiaid niaquenquo icquid nendac. Aton bēnēuidtsēqui chudmequid yendac Esus tantiaquid chidon. Adquid Nuquin Papan bēdamboen isquin abēdi tabadmendac.

### 3

#### *Esus chuibanquid chiaid*

<sup>1</sup> Tantia. Utsitsen mibi chuinu. —Esus chuibanquid ictiadquo iquebi —quesho: —Bēdamboen nate mibi bunec —cata. <sup>2</sup> —Nuquin Papan

chiaid chuibanquid nadquien ictiad —quequin anocquido chuita. — Bëdamboec tabadquid nec —utsibon caidquio Nuquin Papan chiaid chuibanquid nendac. Adquid chido abentsëc inquid nendac. Abi bunaid ënshun mëmunquidquio nendac. —Bëdamboen tantiaquidquio nec —utsibon caidquio nendac. Isedanquido bëdamboen isquid Nuquin Papan chiaid chuibanquidën. Nuquin Papan chiaid bëdamboen tantiamequin chuibanquid nendac. <sup>3</sup> Tantiadenuen acte paëmbo icquid aquenquio icquid nendac. Badedquio nëishenquio icquid nendac. Uimanëmënenquio icquid nendac. Chushcananteuidi bunenquio icquid Nuquin Papan chiaid chuibanquid. Piucquid bedteuidi bunenquio icquid nendac. <sup>4</sup> Aidën chiacpadomboen aton chidon aton bacuëbobëdtan naquid. Chieshenquio icquin aton papan chiacpadomboen naquid aton bacuëbon. <sup>5</sup> ¿Ambi chiacpadomboen aton chidobëdta aton bacuëbo bëdamboen namenquio icquinda Esus tantiaquido bëdamboen namepatsiash? Padenquio ictsiash. <sup>6</sup> Ènden Esus tantiabenondaid chuiquin: —Èbi chuibanquid icta. Èbi bëdamboen chuiquin ëbi bëdamboen nameta — Esus tantiaquidon cac bëdambo ictsiash. Nëbimbo Esus tantiabenquid aden chienda. Chuibanquid icmiac adquidën Nuquin Papan chiaid badedquio niactsiashe. Satanasbimboec: —Èbiuidtsëqui bëdamboshë iquebi —quetsiashe. Adquid: —Èbi chuibanquid icta —cainda. <sup>7</sup> Ènden Esus tantiabenondaid mibi chuibanquid icmenun Esus tantiesabon: —Bëdambo icquid nec —casho tantiata. —Icsambo icquid nec —caid chuibanquid icmenda. Adquid chuibanquid icmiac icsasho Esus tantiesabon mamëns Huntsiashe. Adquid Satanasën badedi yuatsiashe. —Icsambo icquid nec —caid: —Èbi chuibanquid icta —cainda.

### *Esus tantiaquido nashunquid chiaid*

<sup>8</sup> Tantia. Esus tantiaquido nashunquidtsen chuinu. —Nuqui chuibanquidën chiacpadomboen ëbitedi nashunquid icta —quequin nadquid chuita. Utsibon: —Bëdambo icquid nec —caidquio nendac. Muesambo nendac. Tantiadenuen acte paëmbo icquid aquenquio icquid Esus tantiaquido nashunquidën. Piucquid bunquin ampenquio icquid nendac. <sup>9</sup> Nuquin Papan chiaid bëdamboen tantiaquinc Esus tantiaquinc caic bëdamboec tabadquid Esus tantiaquido nashunquid. Adquid bëdambo ictsiash. <sup>10</sup> Esus tantiaquido nashunquid icmenun: —¿Bëdambo icquidida nëid nec? —quequin chuimiactsiash: —Ai, bëdambo icquid nec —abitedi qesho tantiashun: —Esus tantiaquido nashunquid icta —cac bëdambo ictsiash. <sup>11</sup> Adquidën chido: —Bëdambo icquid nec —utsibon caidquio nendac. Utsi icsaiduidi chienquio yec bëdamboec tabadquid adquidën chido. Tantiadenuen acte paëmbo icquid aquenquio icquid aton chidon. Ampenquio yec bëdamboec tabadquid. Adquidquio Esus tantiaquido nashunquidën chido bëdambo ictsiash. <sup>12</sup> Esus tantiaquido nashunquidën chido abentsëqui inquid. Ambi chiacpadomboen aton chidon naquid. Adembidi aton bacuëbon. <sup>13</sup> Abi nashunquidën Esus tantiaquido bëdamboen nashunsho isun utsibon bëdamboen isendac. Adoaidën dayacquio icquin abi utsibo nashumbanquin dacuëdenquio icquin Esuquidistu tantiamendac. —Esus tantiaquido nashunquid adquidquio iquendac —quequin ënquin chiombi.

<sup>14</sup> Tantia. Utsi mibi chuinu. Mibi yacno nëbi nidtiadquio iquebi. — Nidenquio icmane —qeshun nëid dada uaic nebi. <sup>15</sup> Èbi mibi yacno badedquio nidabi icnuc: —“Esus tantiaquidon nadoquid,” quequin Pabado chiacpadomboen nanuna —cata. ¿Tsutsi tantiaquido nuqui nepe? Unëstiapimbo icquid Nuquin Papambo nec. Aid tantiaquido yec shubu

abentsëquën tabadquidobimboec nuqui iquec. Adquid icquin Nuquin Papan chiaidquio tantiaquin nuqui Esus chuibenec. <sup>16</sup> Ëndenquio abi bëdamboen ismequid ambi tantiamiabi icnëdaidi nëbi Nuquin Papan tantiamiaid Esus bëdamboshë iquec.

Aid Nuquin Papan matsesmepanëdash.

Nuquin Papan Mayanën: “Nuquin Papapadquidquio icsaisambo Esus nec,” quequin tantiamec.

Matsesën unës uaqui uincuenaid yec Nuquin Papan abi yacnoshon uaido mayan bëdabon isaidquio Esus nec.

Abi chuibenequidën nidaid utsi-utsiec yacno nidshun chuibeniac utsin-utsinquien Esus tantiabenac caosh.

Aidquiobi Nuquin Papan abuc nidmeshun abëdi tabadmeoapanëdash.

## 4

### *Utsibon icsamboen chiaid*

<sup>1</sup> Tanta, mado. Nuquin Papan Mayanën tantiamiaid mibi chuinu. — Esus chote nëbi icnuc abi tantiaquidon utsin-utsinquien Esus tantienquio yanendac. Satanasën yuabo podobitsi icsabon muaquin pausunac matsesën chuisho tantiashun Esus tantienquio yanendac —quequin Nuquin Papan Mayanën abimbo tantiamioshi. <sup>2</sup> Aden muaquidon: —Abimbo caimbi — quequin bëdambo icquid damianquien aden muaquin chiendac. —Nuquin Papan cuidnushe —quequin tantienquio iquendac. <sup>3</sup> Adquidon naden chien-dac. —Dadan chido bedenda. Chidon dada bedmenda. Padenquio yec tabadta —quequin icsamboen chiendac. Adembidi: —Aidquio petemaid neque. Penda —quequin pete abentse-abentsen chiendac aid pete bëdambo icnubi. ¿Atotsi quequin Nuquin Papan pete uapampic? —Ëmbi chiaidquio bëdamboen tantiashun Esus tantiaquidon: “Nuquin Papan pete uaid bëdambo iquec,” quequin ma penu —quequin Nuquin Papan pete uampic. <sup>4-5</sup> Aidën pete uaidtedi bëdamboshë iquec. —Ëmbi pete uaid bëdambo iqueque. Ma penu —queshun Nuquin Papan pete icmiaid ma petequid neyoc. —Mimbi pete uaid bëdambo iquec, Papa —queshun pete isuidenquio icquin penuna.

### *Esus chuibanquid icquin bëdamboen nata, quiaid*

<sup>6</sup> Esus tantiaquido ëmbi chuibocpadomboen chuibanquin mimbi bëdamboen natsiac, mado. Bacuëctscsho min matsesën Nuquin Papan chiaidquio mibi chuibanëdash. Aidën chiaid tantiaquid icquin Esusën chiacpadomboen nate bunquin ëmbi chiacpadomboen mimbi chuibantsiac. <sup>7</sup> Con tsusedpabon ambembi chiampidbëdta nëbi matsesën adembidi ambembi chiaid tantienda. Nuquin Papan chiaidquio niactiapimbo yec bëdambo icte bunquiota. <sup>8</sup> Aton dada uidënquio icmenuec titinquetanequid nuquin matses nec. Esus tantiaquido bëdambo icnuec ¿mitsipadquio icpec? Nuquin Papa tantiaquieci ambi chiaid niaquenquio yec bëdamboec tabadquid nec. Adquid unësash Nuquin Papa yacno nidash bëdamboshë icquid iquendac. <sup>9</sup> Ëbi adsho tantiash: —Abimboen caic —queta. <sup>10</sup> Adec: —Abi yacno abëdi tabadendabi —quequin Nuquin Papan chiacpadomboen ënenquio icquin nanuna. —Esus tantiaquid unësacsho cuidenquio icquin unëstiapimbo icquidën Nuquin Papan abëdi tabadmendac —quec chieshtoenquio yec bëdamboec tabadnuna.

<sup>11</sup> Ëmbi chuiboed chuibanta, mado. —Nuquin Papan chiacpadomboen nanuna —quequin chuibanta. <sup>12</sup> Mibi nëbi caniaid neque. Bëdamboec tabadta, mado. Ënden caniaidën: —Nëbi caniaid icquin Nuquin Papan chiaid mimbi tantienquio iquec —canushe. Bëdamboec tabadta. —Esus tantiaquido

utsibotsen ma ëbi yacpadec bédamboec tabadnu —quiash adta. Bédamboen chuibanquinc matses tantiaquinc Esus tantiaquinc Nuquin Papan chiaid niaquenquo icquinc caic bédamboec tabadta.

<sup>13</sup> Ëbi ano nidabi icnuc Nuquin Papan chiaid adenuidi chuibanta. —Nuquin Papan chiacpadec bédamboec tabadnuna —quequin Nuquin Papan chiaid isbanquin matses chuibanta. Aden bédamboen tantiameta. <sup>14</sup> Ënden mibi mamishquin chiondaid ¿ada tantie? Ënden Esus tantiaquido icquin tsusio dapabon mibi mamishbededondash. Adshobien Nuquin Papan aido mimbi chuibante chuimepondash. Adoac: —Nuquin Papan chiaid bédamboen chuibanquid Timoteyo iquendac —quequin chuipondash. Chieshtoenquo yec adquid icta, mado. <sup>15</sup> Ëmbi dada uaquin chuiboedtedi isbanshun ënenquo icquin ëmbi chiacpadomboen bédamboen nabanta, mado. —Ëmbi adosho isun ma ëmbi chuibanaidon: “Nuquin Papan chiaid chuibanquidquo yanosh,” ma ëbi canu —queshun bédamboen chuibanta, mado. <sup>16</sup> —Nuquin Papan chiaid niacmane —quec mibibi bédamboec tantiadta, mado. —¿Adabi bédamboec tabadpeba? ¿Adambi Nuquin Papan chiaidquo muainquo icquin chuibampoba? —quec mibibi tantiadta. Bédamboec tabadquin Nuquin Papan chiaidquo ënenquo icquin chuibanta. Aden Nuquin Papan chiacpadomboen naic aidbéd mibi tabadendac. Mimbi chuibanaidobidi adoaindac.

## 5

### *Esus chuibanquidën bédamboen chuite*

<sup>1</sup> Nuquin Papan chiaid chuibanquid icquin dada ënden caniaid chushcainda, mado. —Esus tantiaquidën nadoquid yendac —quequin bédamboen chui: —Con pabimboecquid nec —quequin. Nëbi caniquid: —Con utsibimboecquid nec —quequin adembidi bédamboen chuiban, mado. <sup>2</sup> —Con tabimboecquid nec —queshun macho bédamboen chuiban. Chido machobudabi icquidtedi chibibimboecnuc isquin: —Nëid chudtiadquo icchitebi —quenquo icquin Nuquin Papan chiaidquo chuibanta, mado.

### *Chido niantembo chiaid*

<sup>3</sup> Tanta, mado. Esus tantiaquidon abëdtan Esus tantiaquid icsho nianten nashunte chuinu. Nianten aton matses nibédquid: —¿Tsuentsimbini nashumpatsiashba? —quequid Esus tantiaquidon nashunquid. <sup>4</sup> ¿Ada nianten tishaido icpec? Aidëmbi ani nashuntsiash. ¿Ada aton baba icpec? Aidëmbi aton chichi nashuntsiash. Aidëmbidi aton shanuachotsen nashuntsiash. —Ëbi nashundened neque. Nëid nashunu —queshun nashuntsiash. Aden ambi chiacpadomboen nasho isash: —Bédamboen naic —quetsiash Nuquin Papa. <sup>5</sup> Padnuc aton matses nibédquidënquo nianten Nuquin Papa chianequid: —Nuquin Papan ëbi nashuntsiash —queshun. —Mimbi ëbi tantiaquieque. Ëbi nashunta, Papa —quequin Nuquin Papa chianequid nianten icsho abëdtan Esus tantiaquidon nashunquid. <sup>6</sup> Nianten utsimbien ambi tantiaiduidi naic. Petebëdta acteuide tantiaquin abi bunaiduidi naic. Adquidën unësacimbocquin Nuquin Papa tantienquo iquec. Adquid Esus tantiaquidon nashunenquo icquid. <sup>7</sup> Ëmbi aden nianten nashunte chuiboed Esus tantiaquido utsibotsen chuita, mado. —Aton matses nibédquid nianten nashunenquo icsho: “Esus tantiaquido icsambo iquec,” utsibon canushe —queshun chuita. <sup>8</sup> Aton shubun icquidotsen Esus tantiaquidon nashunquid. Abëd icquido menenquo yec pemenuo yec quec nashumënenquo icquid icsamboshë iquec. Esus tantiesabo icsambo icnubi: —Esus tantiaquid nebi

—queboedi Nuquin Papan chiaid niac-niaquec aton matses nashunenquio icquid icsamboshë iquec.

<sup>9</sup>—Nëidtedi chido Esus tantiaquido nashunquidombo iquec —quequin abi cuëmëdquid abi cuëmëdquidquien mimbi dada uaondac. Nadquid chido: —Esus tantiaquido nashunquid icta —cata. Seta dadpenquio 60ted matamec machobudaidquio. Aton bënëuidtsëqui chudmedenedquio. <sup>10</sup>—Matses nashunquid nec —utsibon caid. Bacuë bëdamboen caniuadened machon. Isedanquido bëdamboen isquid. Esus tantiaquido nashundenequid. Matses daicsabudacsho nashunquid. Adec bëdamboec tabadquid: —Esus tantiaquido nashunquid icta —cata.

<sup>11-12</sup> Utsi niante machobudabi icquid: —Adquid icta —cainda. —Esusuidtsëqui tantiaquin abi tantiaquido nashunembi —queboedëmbi dada bunquin ambi chuiboedi niacbidansho isun utsibon: —Icsambo icquid nec —catsiashe. <sup>13</sup> Adquid shubu utsin shubu utsinquien isedbenisedbenec uspumbo yanash onqueteuidtsëqui buntsiash. Utsibo icsaiduidi chuibenequidquio ictsiash. <sup>14</sup>—Adquid niante machobudabi icquid dadan bedac bëdambo ictsiash —caimbi. Adoac bacuë tishoatsiash. Adshun codocaquinc sicaquinc daëdcaquinc catsiash. Adec bëdamboec tabadsho: —Icsambo icquid nec —Esus tantiesabon catiapimbo ictsiash. <sup>15</sup> Adquid niante machobudabi icquidën utsin-utsinquien Esus tantienquio yanshun Satanasën tantiamiapadomboen nac caosh. <sup>16</sup> Niantebëd icquid utsi ¿ada Esus tantiaquid chido icpec? Aidëmbi niante nashunac bëdambo ictsiash. —Ëmbi nëid nashumbanuc niante utsi aton matses nibëdquidquio Esus tantiaquido utsibon nashuntsiash —queshun abëd icquidën nashunac bëdambo ictsiash.

### *Esus tantiaquido chuibanquid chiaid*

<sup>17</sup> Tanta, mado. Esus tantiaquidon abi chuibanquid nashuntetsen mibi chuinu. ¿Ada Esus chuibanquidën bëdamboen naosh? Adquidën Nuquin Papan chiaid bëdamboen tantiamequinc Esus bëdamboen chuibanquinc casho ambi chuibanaidon bëdamboen isquin nashunquid. —Ma penu —queshun menequid. <sup>18</sup> Adembidi chuiquin Nuquin Papan ambi chiaid dada uamepampic. “‘Penushe,’ qeshun adosbitsecquid bitsi secamenuen manemiaid baca bënë utsibon dënëshquid. ‘Adec chonoadquidën ma penu,’ qeshun isadaidbon dënëshesa,” quequin Nuquin Papan dada uamepampic. Nadembidi Nuquin Papan chiaid dada uapampic. “‘Naic cho. Mibi bëdamboen cuidquin menenu,’ cac chonoadsho abi chonoa uaquidën menequid,” quequin Nuquin Papan chuipampic. Adembidi Esus tantiaquidon abi chuibanquid nashunquid.

<sup>19</sup> Padnuc Esus chuibanquid caic: —Nuquin Papan chiaid niac-niacsho isombi —quequin matses abentsëcshun chuisho: —Abimboen cachitec —cainda. Daëdshun chuisho: —Abimboen cachitec —cata. Adembidi abentsë chotsecquin chuisho tantiata. <sup>20</sup> Esus chuibanquidën Nuquin Papan chiaid niacacsho: —Mibi icsaoc. Padi icnuna —cata. Esus tantiaquido dadpenshun tantianubi adota. —Aden chuisho tantiash dacuëdec: “Ëbitsen adembidi chushcapanundac,” qeshun ma utsibon Nuquin Papan chiaid niaquenquio icnu —queshun chushcata. <sup>21</sup> Esuquidistubëdtan Nuquin Papan nuqui isec. Adembidi Nuquin Papan abi yacnoshon uaido mayan bëdabon nuqui isequë. Ëmbi chuibocpadomboen nata. Min matsesën mimbi tantiaidënquiobi Nuquin Papan chiaid niacacsho adembidi chushcata. Shubu utsinquidon Nuquin Papan chiaid niacacsho adembidi. —Con matses ëmbi tantiaidquio neque. Chushcainquio iquembi —cainda.

<sup>22</sup> Nuquin Papan chiaid chuibanquid icmenuen nuqui naondacpadomboen badedquio mamishenda. Ambi naid yuen isquioshon ambi chiaid yuen tantiaquioshon: —Bëdambo icquid nec —quequioshon nata. —Esus chuibanquid icta —mimbi badedquio caboedën Nuquin Papan chiaid badedquio niacsho isash: —Ambi: “Adquid icta,” caidbëd Timoteyo icsamboshë iquec —utsibo quenushe. —Ëbëdtan chuibanquid icta —badedquio cainda. <sup>23</sup>—Daicsabudteniaccosh. “Pucu paëmbo yan-yanebi,” quiosh —quiosh mibi caic, mado. Acteuidi acashien mibi niaque. Actequid utsi paëmbo icquid pistëc ac ma pucu bëdanuequin. <sup>24</sup>Tantia. Mibi padpiden chuinu. —Ëbëdtan namembi —canuen matsesën naid bëdamboen tantiaata. Utsi aton matses ismec icsasho: —Icsambo icquid nec —badedi catsiash aton matsesën. Utsibic ismenquio yec icsasho: —Icsambo icquid nec —quequin badedquio tantienquio icquin yuecshun istuidshumbi adotsiash. <sup>25</sup>Utsien ismequin bëdamboen nasho: —Bëdambo icquid nec —badedi catsiash aton matsesën. Utsimbic ismenquio icquin bëdamboen nabansho: —Bëdambo icquid nec —quequin badedquio tantienquio icquin yuecshun istuidshun adembidi tantiatsiash. Ëbi adsho tantiashun: —Nuquin Papan chiaid chuibanquid icta —badedquio cainda.

## 6

### *Matses yuaido chiaid*

<sup>1</sup> Matses yuabo Esus tantiaquido icsho naden chuita. —Min icbo Esus tantiesa icsho bëdamboen isquin ambi chiacpadomboen nashunta. “Pabadon chiaid icsambo iquec. Ambi Nuquin Papa caidtsen icsambo iquec,” quequin icsamboen chuinushe. Min icbon chiacpadomboen nata —quequin yuabo chuita. <sup>2</sup>Utsibi chuiquin: —Min icbo Esus tantiaquidbidi icsho: “Ëbipadquidi nec. Ambi chiacpadomboen natiapimbo iquebi,” cainda. “Ëbipadquid icsho aid tantiaquin con icbon chiacpadomboen nanu,” quequin min icbo bëdamboen nashunta —quequin yuabo chuita. Ëmbi chuiboedtedi Esus tantiaquido chuiban. —Adota —quequin chuibanta, mado.

### *Piucquid bunquin utsibon ambembi chiaid*

<sup>3</sup> Mimbi: —Nuquin Papan chiaid niaquenquio yec bëdamboec tabadnuna —quequin Nuquin Icbon chiaidquio chuisho: —Aden chuisho tantiatipimbo iquebi —quequin ambembi chiaid chuiquid icsambo iquec. Adquidën chuisho tantienda, mado. <sup>4</sup>Aden icsamboen tantiaquidën: —Ëmbi chiaiduidtsëqui bëdambo iquec —quequin icsamboen chuibanendac. —Mimbi icsamboen chuinuc ëmbimbo bëdamboen chiec —quec chushcanantiadquio iquendac. Abembi onqueteuidi bunendac. Adquid yuec onquesho tantiash: —Utsi onquetiapimbo icnuc abentsëqui onquebudec —quec utsibo nëishendac. Adquidbëd chushcananec muauananec icsamboec tantiashunanendac. <sup>5</sup>Pabiate shëcuë nibëdacbimboen Nuquin Papan chiaidquio bëdamboen tantienquio yec chushcananendac. Nuquin Papan chiaid chuibanquidën piucquid dadpen bedte danec chuibanquidbidi ictiadquio iquendac.

<sup>6</sup> Nuquien Nuquin Papa tantiaquiec bëdamboec tabadec nuquin na dadpen bedte bunenquio yec bëdambo ictsiac. <sup>7</sup>Tishac chucactsëcnuc nuquin na nibëdpanëdash. Adembidi unësqin nuquin na nuqui buantiapimbo iquec. <sup>8</sup>Nuquin pete dashcutebëd icnuc utsi bunenquio yec bëdambo nuqui ictsiac. <sup>9</sup>Piucquid dadpen bedshun dadpen dayun uate bunquido Esus tantiauidtsash badedi chieshtotsiash. Abi bunaiduidquio bednuen



mēmunenquo icquin icsamboen nabantsiash. Aden Nuquin Papan chiaid niac-niacquin icsamboen naic quenenash adenuidi naic unēsash icsambo icquido cuidacno nidendac. <sup>10</sup> Adec piucquid natiambo bunquido aid bednuec baded-badedquiec icsadenendac. Adquido: —Esus tantiembi —queboedobi padenquo yanash: —Esus tantienquo yanchitombi —quec natiaic tabadendac.

### *Bēdamboec tabad, quiaid*

<sup>11</sup> Mibi Nuquin Papa tantiaquidquo neque. Piucquid bedteuidi bunenquo yec bēdamboec tabadte bunquiota, mado. Nuquin Papan chiaid ni-aquenquo yec chieshtoenquo icquin Esus tantiata. Matsesten tantiec nēishēmēnenquo yec bēdamboec tabadta. <sup>12</sup> Utsibon chieshēnaqui chieshtoenquo icquin Esus tantiaquiec bēdambo icta. Unēsash Nuquin Papabēd tabadnuec adta. —Con Mado Esus tantiaquiec unēsacsho ēbēdi tabadmendambi —queshun Nuquin Papan Esus tantiamiac mimbi Esus tantiabempondac. Adshumbic: —Nuquin Papan Mado Esus tantiaquiembi —quequin matses dadpen mimbi tantiamiondaque. Adembidi aid tantiaquiec bēdamboec tabadta. <sup>13</sup> Abitedi uampidēn Nuquin Papan nuqui isequē. —Adquid nebi —quequin ancanquid dapa Ponsio Pidato chiec dacuēdenquo icnēdaidēn Nuquin Icho Esuquidistuntsen nuqui isequē. <sup>14</sup> Esus tantiaquin chieshtoenquo icquin aidēn naidquo chuibanta. Nuquin Icho Esuquidistu choabi icnuc ēmbi chuiboed niaquenquo yec bēdamboec tabadta. —Esus tantiaquido icsambo iquec —utsibo quetiapimbo icnuc adta. <sup>15</sup> Nuquin Papan tantiacpadēnquo aid ushēmbi Esuquidistu nidaidēn padpidec choendac. ¿Esus chomequid mitsipadquo icpec? Icsaisambo yec bēdamboshē icquid nec. Aid abentsēcquiobi abitedishun Icbombo nec. Aidēmbi chuiquid utsibo abitedi namendac. Aidquo chuiquid utsin dēniactiapimbo iquendac. <sup>16</sup> Aid abentsēqui unēstiapimbo icquid nec. Bēchamauanquiecsho istiapimbo yec utsibo tabadec. Aidi matsesēn istiapimbo icquid nec. Adquid icsho: —Mibiuidtsēqui abitedishun Icho yec mibi bēdamboshē iquec, Papa —quequin Nuquin Papa chianenuna ēnenquo icquin.

### *Aton na dadpen dayun uaquido chiaid*

<sup>17</sup> Aton na dadpen dayun uaquido naden chuita, mado. —“Con na dadpenquioshē icnuc ēbiuidtsēqui bēdambo iquebi,” quenda. Nibēdantiapimbo icquid danquin mimbi dayun uaiduidtsēqui tantienda. Nuquin Papambo tantiaquiota. Aidēmbi matses bēdambo icmenuen aton na bedmec —cata. <sup>18</sup> Adquidobidi chuiquin: —Bēdamboec tabadquin utsibo nashumbanquiota. Adembidi cudasenquo icquin mitsana utsibo menianeta. <sup>19</sup> “Mimbi bēdamboen naoque. Ēbēdi tabadmequin mibi bēdambo icmendambi,” Nuquin Papa camenuen adota. Adash unēsacsho Nuquin Papan abēdi mibi tabadmendac padpidec unēstiapimbo icnuc —quequin aton na dadpen dayun uaquido chuita.

### *Pabadon ēnquin chiaid*

<sup>20</sup> Ēmbi chuiboedquiobidi adembidi bēdamboen chuibanta, mado. Nuquin Papan chiaid chienquo yec abembi onquesho tantienda. —Bēdamboen tantiaquin abimbo caimbi —quequidobi muasho tantienda. Adquidobēd chushcananenda. <sup>21</sup> Aden icsamboen chuisho tantiashun: —Abimbo caic —quequin utsin-utsinquien Esus tantienquo yanondashe. Adquido tantienda. Chieshtoenquo icquin Esusquo chuibanta. —Nuquin Papan con mado bēdamboen ispashun —quequin mibi tantiembi. Padi. Aidtedi chuiquin dada uaombi.

## TIMOTEYON ISTE 2

### *Tauamboen Timoteyo chiaid*

<sup>1</sup> Pabado nebi. Nuquin Papan tantiacpadomboen Esuquidistun: — Ëbi chuibeneta —caidquo nebi. —Ambi chiampicpadomboen aton Mado Esuquidistu tantiaquid unësacsho Nuquin Papan abëdi tabadmendac — quequin Esus chuibenequidquo nebi. <sup>2</sup> Con mado icbobimboecquid mibi neque. Mibi chuiquin nëid dada uanu, Timoteyo. —Nuquin Papan aton Mado Nuquin Icbo Esuquidistubëdtan bëdamboen isquin bëdambo icmepashun —quequin mibi tantiambi.

### *Chieshtoenquo icquin Esus chuiban, quiaid*

<sup>3</sup> Con tsusedpabon nacpadomboen Nuquin Papauidi tantiaquin ambi chiacpadomboen natiadquo iquebi. Adquid icquin Nuquin Papa mibi chianembi. —Mibi tantiaquid Timoteyo bëdambo iquec, Papa. Adquo icmec mibi bëdamboshë iquec. Adquiouidi icmeta, Papa —quequin Nuquin Papa chianembi. <sup>4</sup> —Ëbi nidnu —quesho tantiash mibi shubiondaid tantiec mibi iste bunquiebi, mado. Ambo nidash mibi isec cuishonquetsiabi. <sup>5</sup> Naden mibi tantiambi. —Aton chichi Doida caidën ani Eunisebëdtan aid daëdshumba Esus tantiabenquiacpadomboen Timoteyonsen nëbi Esus tantiaquiec — quequin mibi tantiambi. <sup>6</sup> Adquid icsho mimbi tantiondaid padpiden mibi chuinu. —Min Mayan nëidbëd tabadmequin cuesambo icmequin Esus chuibame, Papa —quequin mibi mamishquin Nuquin Papa chiondambi. Adoac aton Mayan mibëd tabadmiac. Adoaid icquin dacuëdenquo icquin Esus chuibanta, mado. <sup>7</sup> ¿Nuquin Papan aton Mayan nuquibëd icmiacta nuqui natia dacuëdpe? Padenquo. Comapenen tantiaquid yec nuquibëd icquin nuqui cuesambo icmec. Adembidi Nuquin Papan Mayanën tantiamiac nuqui matses bëdamboen tantiec. Adembidi nuqui icsate bunaid namenquo icquin mëmunquidquo icnuc nuqui bëdambo icmec.

<sup>8</sup> —Adoaid nebi —queshun dacuëdenquo icquin Nuquin Icbo Esus chuibanta. Adembidi dacuëdenquo icquin: —Pabado tantiaquiambi —cata. —Quënën nauedtsaid Pabado tantiatipi —quenda. Utsibon cuestiadquo icquin chieshënaqui Nuquin Papan namiacpadech chieshtoenquo icquin Esus chuibanuna. <sup>9</sup> Nuquin Papan: —Bëdamboec tabadquid icmequin con Mado Esus tantiamembi —caido icquin adonona. ¿Nuqui bëdamboecuidi tabadshoda Nuquin Papan nuqui bëdamboen isbempondash? Padenquo. Ëndenquimboshë nidaidbëdta matses uabi Nuquin Papan: —Ëmbi chiaid niac-niaquec icsambo icboedëmbi con Mado Esus tantiasho cuidenquo iquendambi —quequin ambi chuipampicpadomboen nuqui Esus tantiamiac. <sup>10</sup> Aden ambi chuipampid tantiamiabi icshumbic nëbi Esuquidistu matsesmeshun matses tantiamiac. Adoac: —Abi tantiaquid unësacsho icsaido cuidacno nidmenquo icquin unëstiapimbo icquid icmequin Nuquin Papa yacno abëdi Esuquidistun tabadmendac —quequin nuqui tantiec. <sup>11</sup> Aden tantiaquin Esus chuibenequidquo nebi. —Ëbi chuibeneta —Esusën caondaic yec Nuquin Papabëdta Esus tantiamequidquo nebi. <sup>12</sup> Aden chuibeneshobini chieshënquin quënën nauedondash. Adoaiqui chieshtotiapimbo icquin Esus tantiambi. —Ëmbi tantiaidquo comapenen tantiaquin nabanquidquo Esus nec. Adquid icquin: “Ëbi tantienquo yanushe,” qeshun abi tantiamequin ëbi chieshtomenquo iquendac.

Nidaidën choabi icquin Esusën ëbi chieshtoenquoio icquid icmendac — quec dacuëdenquoio iquebi. <sup>13</sup> Tantia, mado. Mibi chuinu. Ëmbi abimbo chiondaidquoio chuiban: —Nuquin Papan chiaidquoio nec —queshun. Esuquidistu tantiaquinc matses tantiaquinc caquin adenuidi chuibanta, mado. <sup>14</sup> Nuquin Papan Mayan nuquibëd iqueque. Aidën namiac ëmbi chiondacpadomboen Nuquin Papan chiaidquoio chuiquin Esus chuibanta, mado.

### *Onesipodo chiaid*

<sup>15</sup> Ëmbi: —Cho —cac choenquoio icboed mimbi tantiac, mado. Nidaid utsi Asia caid yacnocquido dadpen adec choenquoio iccosh. Edemoquenes caid choenquoio iccosh. Adecbidi Piquedo caid chedo. <sup>16</sup> Onesipodo caidën nëbi bëdamboen isposhi. Ëbi quënën nauedacsho dacuëdenquoio icquin isuanisuanquin bëdambo icmioshi. Adsho isun: —Aton shubun icquidobëdta aid bëdamboen ista, Papa —quequin Nuquin Papa chianembi. <sup>17</sup> Aidëmbi nëmbo shubu dadpen icquid Doma caid yacno choboshon: —¿Mitsimbo Pabado icpec? —quequin yuen nibëmbenequin istuidpondashi. <sup>18</sup> Mimbi isnubi Epeso yacnoshon aidëmbidi baded-badedquien nashundeniondashi. Adsho tantiashun: —Nidaidën padpidec choshon Nuquin Icbon Onesipodo bëdamboen ispashun —caimbi.

## 2

### *Chieshtoenquoio icquin chuiban, quiaid*

<sup>1</sup> Chieshtoenquoio icquin Esus chuibanta, mado. —Esuquidistun ëbi bëdamboen isec. Aidën bëdambo icmiac dayacquio icquin naimbi —queshun chieshtoenquoio icquin Esus chuibanta. <sup>2</sup> Matses dadpenshun tantianuc ëmbi chuibansho mimbi tantiondac. Ëmbi aden chiondaid utsibotsen chuiban. Adshun mimbi chuiboedo abentse-abentsen chuita. —Nëidën chieshtoenquoio icquin Esus chuibantsiash —queshun: —Mimbisen chuiban —cata, mado. <sup>3</sup> Sondado bëdambo icquidën nachimboen chieshtoenquoio icquin bëdamboen nabanuna. Matsesën chieshënubi Esuquidistun chiacpadomboenuidi nanuna chieshtoenquoio icquin. <sup>4</sup> Sondadon: —Mibi bëdambo iquec —camenuen aton chuiquid dapan chiacpadomboenuidi naquid. Ambi tantiaid nainquoio icquinc utsibon chiacpadomboen nainquoio icquinc caquin aton chuiquid dapan chiacpadomboenuidi naquidquoio sondado nec. Adomboembidi Nuquin Icbon chiacpadomboenuidi nanuna, mado. <sup>5</sup> Ma nuquin matses titinquequidquoio. ¿Mitsipadquoio icpec? Aton uidën tanec aton matsesën chiaction abia titinquec chosho: —Bëdamboec titinquiosh —queshun mauete menequid. Ambi chiaction titinquiabi icsho mauete menenquoio icquid. Adembidi: —Mimbi bëdamboen naoc —Nuquin Icbo camenuen ambi chiacpadomboen chieshtoenquoio icquin nabanuna, mado. <sup>6</sup> Ma nuquin matses tied uaquidquoio. ¿Mitsipadquoio icpec? Chonoadquidënquoio dayacquio icquin aton tied uashun ambi nitsinaid pequid. Adembidi Esus chuibanquid icquin dayacquio icquin Esus chuiban-chuibanuna ënenquoio icquin. Adoac utsibon Esus tantiabentsiash. <sup>7</sup> Aden ëmbi chuiboed tantiata. Adsho Nuquin Icbon mibi bëdamboen tantiametsiash.

### *Esuquidistu tantiata, quiaid*

<sup>8</sup> Utsibon chieshënubi Esus tantiata, mado. Aidi matsesash isadaidbo tsusedpa Daidën tsyuecquid nepanëdash. Nuquin Papan uincuemenedaidquoio yec abi iquec. Aidquoio tantiaquiota. Aid chuibenequidquoio nebi. <sup>9</sup> Aden chuisho chieshënquin bedshun icsambo

icquid uidën uacbimboen shocosh nacnenaidën mëtaniac mëyadebi. ¿Ëbi aden uidën uacbimboenda Nuquin Papan chiaid uidën uapadic? Padenquoio. Ëmbi chuibenetiapimbo icnuc Nuquin Papan chiaid chuibanquido utsibon adembidi chuibenendac. <sup>10</sup> Adnubi: —Aden Nuquin Papan ambi tantiactedi Esuquidistu tantiamendac. Aid tantiaquido unësacsho cuidenquoio icquin abëdi tabadmendac —quec chieshtoenquoio iccobi quënën nauedondaid yequi. <sup>11</sup> Naden abimbo chiaidquido tantiaash chieshtoenquoio iccobi.

—Abi bunaid ënshun Nuquin Icbon chiacpadoemboen naquid chieshëmënquidën unës uacsho Nuquin Icbon abi yacno abëdi tabadmendac.

<sup>12</sup> Utsibon chieshënaqui chieshtoenquoio icquin Esus tantiec unësash abi yacno nidendac. Nidacsho chuiquid icmiac utsibo namendac.

“Esus tantiatiapimbo iquebi,” quequidobic: “Ëmbi tantiacmado neque. Nëid nuquibëdi tabadmenquien ictiad, Papa,” quequin Esusën Nuquin Papa chiendac.

<sup>13</sup> Aden abi tantiesabon ambi chiaid niac-niacsho isun Nuquin Icho Esusën ambi chiacpadoemboen naquidquido icquin icsaido cuidendac.

Adembidi ambi chiacpadoemboen abi tantiaquido bëdambo icmendac —quequin chiaid tantiaashun ambi chiacpadoemboen naquin Esusën naid chuibanuna chieshtoenquoio icquin.

### *Nuquin Papan chiaid isbanta, quiaid*

<sup>14</sup> Ëmbi dada uaquin chuiboed mibëd icquido naden chuibanta, mado. —Nuquin Icbon nuqui isnubi Esusquio chienquoio yec ambembi chiaid chiec mibi chushcananqueque. Adenda. Adec chushcanansho tantiaash matses icsambo yanec. Padi —cata, mado. <sup>15</sup> —Mibi bëdambo iquec —Nuquin Papa camenuen bëdamboen nata. —Dacuëdtiapimbo iquebique. Ëmbi naid ma Nuquin Papan isnu —queshun adota. Ambi chiaid bëdamboen isbanshun chieshtoenquoio icquin Nuquin Papan chiaidquido chuibanta, mado. <sup>16</sup> Ambembi chiaid chuiquidobëd onquec tabadenda. Adec onquequido icsambo icboedi buëdanquiec Nuquin Papan chiaid niac-niaquec icsamboshë yanec. <sup>17</sup> Tosho bedacximboec adquidën chiaid tantiaquido dadpen yanec. Adquidën chuisho tantienda. Aden chuiquid Imeneyo caid nec. Adquidbidi Pideto caid nec. <sup>18</sup> Aidon Nuquin Papan chiaidquido chienquoio icquin muaquin chiec. —Esus tantiaquido unësabi icquido nëbimbobi uincuenacximboec icpec. Unësacsho aton dada chuca uaquin uincuenquoio iquendac —quequin muaquin chuisho tantiaashun utsibon Nuquin Icbon chiaid tantienquoio yanac. <sup>19</sup> Aidon Esus tantiabien icchitash. Nuquin Papan Esus tantiamiac ënenquoio icquin Esus tantiatsempanëdash. Padnuc Esus tantiaquidombo dadpen iquec. Adquido chuiquin ambi dada uamepampicpadoemboen: “ ‘Ëbi tantiaquidombo nec,’ quequin Nuquin Icbon tantiec.” Adnuc Esus tantiaquidën: —Con Icho Esus nec —queshun ambi icsamboen naid ënendac.

<sup>20</sup> Esus tantiaquido nadquido iquec. Shubu dapan tsitsan tabëcaid tabadacximboecquid nec. Tsitsan abentse-abentsec icsactsëcquio icnubi utsi-utsiec bëdambo iquec. Icsactsëcquidën icsa secanun sandoquid yendac. Bëdambo icquidën di nandoquid yendac. Adecbidi Nuquin Papan shubun tabadtequido iquec. Utsi-utsiec Nuquin Papan chiaid natiadquido yec Esus tantiaquidquido icnubi utsi-utsiec abi icsaid ënabi: —Esus tantianu —quetsëcquid iquec. <sup>21</sup> Esus tantiaquidquido ictiadquido yec: —Muaid

chuisho tantiatiapimbo icquin nēbi Nuquin Icbon chiacpadomboen natiadquo iquebi —quiash Nuquin Icbon yuambo yantsiash. Adsho Nuquin Icbon bēdamboen nametsiash.

<sup>22</sup> Caniabon mēmunenquo icquin abi bunacpadomboen naquid tanenda, mado. Adenquo yec bēdamboec tabadte bunquiota. Nuquin Papan chiaid niacte bunenquo yec: —Nuquin Icbo Esus nec —quequidobēdtan chieshtoenquo icquin Esus tantiata. Matsetsen tantiec bēdamboec isnanec bēdamboec tabadta. <sup>23</sup> Mibi yacnoshon ambembi chuiquidon: —Mimbi icsamboen tantiec —canuen: —¿Mitsipaden mimbi tantiape? —cac chienda. Adquidēn chuisho tantiash matses chushcananondashe. Aidēn chiac chienda. <sup>24</sup> Nuquin Papan chiaid chuibanquid chushcananenquo icquid nendac. Chieshēmēnenquo icquin aton matses bēdamboen isquid nendac. Adembidi nēishēnenquo icquin Nuquin Papan chiaid tantiamequid nendac. Utsibon chieshēnaqui chieshēnanenquo icquid nendac. <sup>25</sup> Esus tantiesabon: —Mimbi Nuquin Papan chiaid chuisho tantiatiapimbo iquebi —cac adembi nēishenquo icquin Nuquin Papan chiaidquo chuibanendac. —Nuquin Papan ambi chiaidquo tantiamiac: “Icsamboen naombi,” quequin ma Esus tantiesan tantiabenu —quequin aden chuibanendac. <sup>26</sup> —Aden Nuquin Papan ambi chiaidquo tantiamiac Esus tantienquo icboedēmbi Esus tantiabenshun abi yuaquidēn Satanasēn namiaid ēnendac. Aden Nuquin Papan chiacpadomboen naindac —queshun chieshtoenquo icquin Nuquin Papan chiaidquo chuibanendac abi chuibanquidēn.

### 3

#### *Icsambo icquido iquendac, quiaid*

<sup>1</sup> Tanta, mado. Mibi chuinu. Esus padpidec choabi icnuc matses dadpenquioshē icsamboshē iquendac. <sup>2</sup> Nadquido iquendac. Nēidic utsi tantiatiapimbo yec abiuidtsēqui datantiadquido. Nēidic piucquid bedte comapenec bunquidombo. Nēidic: —Is. Ēmbimbo naiduidi bēdambo iqueque —quequido. Nēidic utsibo chieshēnec icsamboec onquequido. Nēidic amēn chiaid niacniacquido. Nēidic anin chiaid niacniacquido. Nēidic aton na nashunaqui nashumēnenquo icquido. Nēidic Nuquin Papan chiaid niacniacquidombo. <sup>3</sup> Nēidic aton matses tantiesabo. Nēidic chiesh bēdanesabo. Nēidic muauanquido. Nēidic abi icsate bunaid ēnenquo icquido. Nēidic cuesanquido. Nēidic bēdambo icquid chieshēnquido. <sup>4</sup> Nēidic bēdambo icquid damianquiashic cunesunianquido. Nēidic bēdamboen tantienquo yec badedi icsa uanquido. Nēidic: —Ēbiuidtsēqui bēdambo iquec —quec abibi tantiadquido. Nēidic ambi naiduidi bunquin Nuquin Papa tantiesabo. <sup>5</sup> Nēidic: —Nuquin Papa tantiaquid nebi —quec muaquin aidēn chiaid niacniacquido. Adquidtedi icsambo icquido nec. —Adquidbēduidi onquec tabadenda —caimbi.

<sup>6</sup> Adquidon mibi yacnoshon shubu utsin shubu utsinquien isben-isbenac caosh. Adash chiduidquo icnubi shubun puduedshun ambembi chiaid chuibanac caosh. Aden chuisho tantiashun: —Padi —catiadquidi chidon: —Mimbi chiaid tantianu —quequin badedquo tantiac caosh. Nuquin Papan chiaid niacash adecbidi icsate bunquiec tabadac caosh aid chidobo. <sup>7</sup> Aden icsambo icquidēn ambembi chuidenesho tantianeshun Nuquin Papan chiaidquo tantiatiapimbo icpac caosh aid chidobo. <sup>8-9</sup> Aid chidobo chiec muaquido icsambo icpampidobimboec iquec. Icsambo icpampid abentsēc Canes cuēmēdnubi utsi Mambades cuēmēdpampic. Isadaidbo tsusedpa Moisesēn Nuquin Papan chiaidquo chuisho tantiashun aidon: —Mue nec.

Ëmbimbo comapenen tantiaquin ismenu —queboedombi bëdiactsëc tantiaquin nacnenuidpampic. Adsho isun: —Abimbo cainquoio iccosh. Muachitosh —capampic matsesën. Adembidi chido chiec muaquidon icsate bunquin ambi chiaid chuitiapimbo icscho Nuquin Papan bëdamboen istiapimbo iquec. Adembidi aidon muaquin chuisho tantiashun matses dadpenshun: —Muequi nec —capendac.

*Nuquin Papan chiaid isbanec bëdamboec tabadte*

<sup>10</sup> Ëbien muaquidpenquoio nec. Ëmbi naid ma mimbi tantieyoc. —Ma Esus tantianu —quequin Esusën naid chuibanec bëdamboec tabadondabi. Esus tantiaquidquoio icquin matses tantiaquin Esusën naid chuibeniondambi. Chieshënaqui chieshtoenquoio icquin adembi chuibeniondambi. <sup>11</sup> Ëmbi aden chuibansho isun chieshënondashi. Shubu dadpen icquid Antioquiya caid yacnoshon ëbi: —Cuesnu —casha Nuquin Icbon nac padenquoio icpondash. Adshumbic shubu dadpen icquid utsi Iconio caid yacnoshontsen adembidi. Adshobini shubu dadpen icquid utsi Disteda caid yacnoshonquoio bedshun cuënoten se-sequin unës uatsempondash. Adsho Nuquin Icbon nac unësenquoio iccondabi. <sup>12</sup> Ëbipadquido Esus tantiaquidotedi bëdamboec tabadtiaquidquoio icscho adembidi utsibon comapenen chieshënenadac. <sup>13</sup> Padnuen chieshëmënquidobëd bëdambo icquid damianquieci muaquido bëdiactsëc icsambo icboedi muauananquieci buëdanquieci icsamboshë yanendac.

<sup>14</sup> Mibi adquidpenquoio nec, mado. —Ëmbi isondaïdon bëdambo icquidon abimbo chuibanondashi —quec Nuquin Papan chiaid niaquenquoio yec bëdamboec tabadta, mado. <sup>15</sup> Ënden bacuëmpi icquin Nuquin Papan chiaidquoio min matsesën chuibansho mimbi tantianëdac. Adshun: —Aton Mado Esus tantiaquid unësacsho abëdi Nuquin Papan tabadmendac —quequin mimbi tantiabenëdac. Aden Nuquin Papan bëdamboen iste tantiametombo Nuquin Papan chiaid nendac. <sup>16</sup> Nuquin Papan chiaid aton Mayanën tantiamiac matsesën dada uapampic. Aidën chiaid abitedimbo bëdamboshë iquec. Aid isec onquequin: —Nuquin Papan chiacpadec bëdamboec tabadnuna. Esus tantiaquido yec icsainquien ictiad —quequin abi chuibanquidën chuibanec. Adembidi: —Esus tantiaquido adesa. Padi. Bëdamboembien natiad —quequin chuibanec. <sup>17</sup> Nuquin Papan: —Ëmbi chiaidquoio tantiashun Esus tantiaquinc matses nashunquinc caic Esus tantiaquido ma bëdamboec tabadnu —quequin ambi chiaidquoio dada uamepampic.

## 4

*Nuquin Papan chiaid chuisho tantienquoio yaid*

<sup>1</sup> Nuquin Papabëdtan Esuquidistun mibi isequë. Bëdamboen nata. Esusën nidaidën padpidec choshon abitedishun Icbombo icquin unësaido uincuemiaido unësabi icquidobëdta chiendac. —Nëid ëbi tantiaquid ëbëdi tabadmembï. Nëid ëbi tantiesa cuidembi —quequin chiendac. <sup>2</sup> Aidën chiacpadomboen naquin Nuquin Papan chiaidquoio chuibanta, mado. Matsesën tantiatiaquidquoio icnuc adota. Tantiatiapimbo icnubi adembi chuibanta. Esus tantiaquido icsasho isun: —Esus tantiaquido adesambo neque. Bëdamboembien natiad —quequin nëishëmënenquoio icquin chuïta, mado. Utsibo bëdamboec tabadsho: —Mibi bëdamboec tabadoc. Aduidequi tabadta —quequin chieshtoenquoio icquin chuïta. Bëdiactsëc tantiatsëcquido: —Esus tantiaquidon nadoquid —quequin chuibanta, mado. <sup>3</sup> —Yuecshun Nuquin Papan chiaidquoio matses dadpenshun tantiatiapimbo iquendac —queshun nata, mado. Aden tantiatiapimbo icquidën Nuquin Papan chiaidpenquoio chuisho tantiash: —Mimbi

ëbi bunaidquio chuisho tantianu. Ëbi chiec cho —quequin muaquid utsi-  
utsien abi yacno puduedmendac. <sup>4</sup> Pamumëdabimboecquin Nuquin Papan  
chiaid tantienquio icquin tsusedpabon ambembi chiampiduidi tantiendac.  
<sup>5</sup> Aidën nacpadomboen nainda, mado. Nuquin Papan chiaidquio bëdamboen  
tantiaquid yec bëdamboec tabadta. Adsho utsibon chieshënaqui chieshtoen-  
quio icquin Esusquio tantiata, mado. Adembidi Nuquin Papan bëdamboen  
iste Esus tantiesabo chuibanta. —Esus chuibanquidën nadoquid —caidtedi  
nabanta, mado.

<sup>6</sup> —Ëbi unës uan ëmbi nacpadomboen: “Adota,” mibi caquid nibëdtsiash  
—qeshun mibi aden chiec nebi. Nëbi Nuquin Papan tantiacpadën  
chieshëmënquidon ëbi unës uaic. <sup>7</sup> Utsibon chieshënubi ënenquio icquin Esusën  
naid chuibeniombi. —Ëbi bunaid bednu —quec comapenec titinquiacbim-  
boen dayacquio icquin Nuquin Papan chiaidtedi naombi. Chieshtoenquio ic-  
quin Esus tantiaquidquio nebi. Adshobini nëbi unës uaic. <sup>8</sup> Unës uacshobini  
matsesën naid abitedimbo tantiaquidën Nuquin Icbon: —Ëbi tantiaquin  
ëmbi chiapadomboenuidi naic mibi bëdambo iccoque. Nuquin Papa yacno  
ëbëdi tabadmequin mibi bëdamboshë icmendambi —caindac. Abi chote  
ushën choshon aden Nuquin Icbon ëbi chiendac. Adembidi abi chosho iste  
bunquidotedi abi tantiaquido Nuquin Icbon abëdi tabadmendac.

### *Timoteyo: Cho, caid*

<sup>9</sup> Nëbimbobi ëbi isec cho, mado. <sup>10</sup> Utsibo nidanebon ëbentsëqui tsade-  
bique. Demas caid aton na bedteuidi bunec ëbi nianec shubu dadpen icquid  
Tesadonica caid yacno nidosh. Quedesente caidic nidaid utsi Cadasia caid  
yacno nidosh. Titobic nidaid utsi Damasia caid yacno nidosh. Aidtedi  
nidanebon <sup>11</sup> Ducas abentsëqui ëbëd iquec. Madcos bedbëtsenec cho, mado.  
Ëbëdtan aidëmbi nëshunquio Esus chuibantsiashe. <sup>12</sup> Tiquico caid Epeso  
yacno mibi yacno nidmiombi. <sup>13</sup> Shubu dadpen icquid Todoas caid yacno  
Cadpo cuëmëdquidën shubun con na niamëdacondashe. Con dashcute ëmbi  
dada uaidbëdta bedbëtsenec cho, mado. —Abitedi buantiapimbo iquebi —  
qeshun nëish yua bitsi nacnenaid dada uaiduidtsëqui bëta.

<sup>14</sup> Shocosh nacnenquidën Adecandedo caidën comapenen chieshënondashi.  
Aid Nuquin Papan cuidendac, mado. <sup>15</sup> Nuquin Papan chiaid ëmbi chuisho  
tantiatiapimbo icquin icsamboen chuishunondashibique. Choquin aid  
isenda: —Ëbitsen icsamboen chuishunushe —qeshun. <sup>16</sup> Ënden tauam-  
boen bedshun: —Quënën nauednu —cac cuidte chuiquid dapa ëmbentsëqui  
chuibampondambi. —¿Mitsipadosho isun ëbi bedo? Icsamboen nambo  
iccombi —capondambi. —Ëbëd icboedon dadpenshun: “Bëdambo icquid  
nec,” quequin ëmbi naid chuibanac ëbi quënën nauedquidon ëbi nidmet-  
siash —qeshun ëbëd icboedo: —Chiec cho —caqui choenquio iccondash.  
Aden ëbi cacuidondaïdo tantiaquin: —Nuquin Papan aïdo cuidenquio  
icpashun —caimbi. <sup>17</sup> Nuquin Icbombini nianenquio iccondash. —  
Isadaïdpembo matses utsibo ma ëmbi naid chuibenenu —quequin cue-  
sambo icmepondashi. Adondaïd icshobini chieshëmënquidon: —Cuesnu —  
cabededpondash. Nuquin Icbon nac aid matsesën unës uainquio icpondashi.  
<sup>18</sup> Padpiden chieshëmënquidon ëbi caic: —Ma mëyanac chieshtoshon Esus  
tantienquio yanu —casha Nuquin Icbon nac chieshtoenquio ictsiabi. —  
Nuquin Icbombidi abi yacno ambi matses dadpen namiacno abëdi ëbi tabad-  
mendac —qeshun: —“Nuquin Icho bëdamboshë iquec,” canuna ënenquio  
icquin —caimbi.

<sup>19</sup> Mibi yacnocquido: —Mibi caic: “Unësquio iquec,” quiosh Pabado — quequin chuiban, mado. Nëidic Aquida caid. Nëidic aton chido Pidisida caid. Nëidic Onesipodo caid chedo. Aidedi aden chuiban. <sup>20</sup> Mimbi isondaic Edasto caid shubu dadpen icquid Codinto yacno tëshëdondash ëbi chonoc. Utsibic Tëdopimo caid aton dada icsabudacsho shubu dadpen icquid Mideto caid yacno nianondambi. <sup>21</sup> Ue tsasi iquenuanquid taënushe. Baded cho, mado. Doma yacnocquido nëmbo icquidon: —“Timoteyo unësquio iquec,” quequin dada ua —caposhi. Nëidic Eyobudo caid. Nëidic Pudente caid. Nëidic Dino caid. Nëidic Quëdaudia caid. Nëidic Esus tantiaquido nëmbo icquido utsibotedi. Aidedi adosh. <sup>22</sup> —Nuquin Icho Esusën abëd icquin con mado bëdamboen ispashun —quequin mibi tantiembi. Padi. Aidedi chuiquin dada uaombi, mado.



## TITON ISTE

<sup>1</sup> Pabado nebi. Nuquin Papan chiacpaden chuibenequid nebi. Adem-bidi Esuquidistun, Ēbi chuibeneta, caidbidi nebi. Aden chuibanac Nuquin Papan cuēnaido Esuquidistu tantiadonequidquo ma icpanuna. Adquid iquec ma bēdamboec tabadpanuna. <sup>2</sup> Muesa Nuquin Papa nec. Adquid icquin, Ēmbi ėnden chiampicpadomboen ėnenquiocquin Esuquidistu tantaquido ėbēdi tabadendac, quequin ma aidon tantiapanueshun adomboen chiaid chuiquidquo Esuquidistun icmiondashi. <sup>3</sup> Ambi tantiampicpadēn ambi chuipampid Esuquidistu tantiamenuequin aidēn chuibeneta caid nebi.

<sup>4</sup> Ēmbi chuibanac Esuquidistu tantiaquid mibi yampondac, Tito. Adquid yanshun Esuquidistubēd icquid nebi, quequin ėmbi tantiacpaden mimbi tantiec. Aden tantiaquid con madobimboecquid mibi icsho ismenuequin dada uaimbique. Isec onqueta.

Esuquidistu tantiaquid icsho isash ėbi icsaid cuidenquo yec Nuquin Papa bēpiscudac, quequin ma ėnenquiocquin mimbi tantiapanuna. Adecbidi Nuquin Papabēd tabadendabi, quequin tantiapanuna, Tito.

### *Quideta yacno nidshun Titon natequid*

<sup>5</sup> Ēmbi nauidboed mimbi naimenu, quequin mibi Quideta yacno nianombi ma mimbi ambi tantiaid icsa chiac ma Quideta yacnocquidon ėmpanuna. Adem-bidi, shubu dadpen icquid uano-uanoecquid yacno nidshun ėmbi chiacpadomboen Esuquidistu tantiadonequid istuidshun Esuquidistu tantiaquid utsibo isbanquin bēdamboen tabadmenuequin chuiquid icta, quequin adquiduidquo chuita, Tito. <sup>6</sup> Mimbi Esuquidistu tantiaquid utsibo isbanquin bēdamboen tabadmequin chuiquid icta caid nadquo ictiad, Tito. Bēdamboec tabadquid ictiad. Adecbidi chido abentsēc inquid ictiad. Aton bacuēbotedi Esuquidistu tantiaquidobidi ictiad. Adquidēn bacuēbo icquin bēdamboec tabadquin aton papan chiaidbēdta aton titan chiaid chieshenquiocquin nabantiad. <sup>7</sup> Aidi utsibēd bēdamboec tabadquin, Nuquibi nanuna, qeshun utsibēd onquenquiocquin ambibi tantiacpadomboenuidi nabanesa ictiad. Adecbidi badedquo nēishesa ictiad. Adecbidi paēmbocquid nua aquesa ictiad. Adecbidi cuesnante bunesa ictiad. Adecbidi muaquin bedesa ictiad. <sup>8</sup> Adecbidi Esuquidistu tantiaquid utsibo yuedquid ictiad. Adecbidi utsibobēd bēdamboec tabadte bunquid ictiad. Adecbidi utsi bēdamboec tabadsho tantiash, Cuishon, quec tabadquid ictiad. Adecbidi bēdamboen tantiaquin, Naden naic icsatsiabi, qeshun naisa ictiad. Adecbidi, Naden naic bēdamboecquid yantsiabi, qeshun adomboen naquidquo ictiad. Adecbidi abimbo chuiquidquo ictiad. Adecbidi, Nuquin Papan icsaisa icmebanaid nebi, quequin tantiec, Icsanu, quenquiocquin Nuquin Papan chiacpadomboen nabanquid ictiad. Adquid nec, quequin utsibon chuisho tantiashun adquid Esuquidistu tantiaquid utsibo isbanquin bēdamboen tabadmequin chuiquidquo icta, quequin chuita, Tito. <sup>9</sup> Aden utsibo isbanquin bēdamboen tabadmenuequin chuiquid icta, cashun nēid aido chuita. Nuquin Papan chiaid chuca uainquiocquin bēdamboen chuiban. Aden mimbi chuisho tantiash ma utsibo bēdamboec tabadpanuna. Adem-bidi Nuquin Papan chiaid chuca uaquidēn chuibansho Nuquin Papan chiacpadomboen abimbo chuiban. Aden mimbi chiac, Icsamboen chiombi, quetsiash, quequin mimbi utsibo chuiquid icta caido chuioata, Tito.

<sup>10</sup> Quidetabo nad iqueque. Chuinu. Tantia. Abi chuiquidën chiapaden naisa Quidetabo dadpen iquec. Abimbo chiosh, camenuquin abimbo chiachimboec aido onquec. Dadpenshun isadaidbon nacpadomboen nanuequin, Shui dëbid dëtemeta, quequin Quidetabon chiec. <sup>11</sup> Adquidon shubu utsin-utsinquec puduedshun ambi tantiaid icsa chuibanac utsin-utsinquien tantiash cuëshëdec. Adembidi bedte bunquin adquidon muaquin chuibanec. Adquid tantiamenuen Nuquin Papan chiaid bëdamboen chuibanquin ambi muaquin chiaid ëmeta, Tito. <sup>12</sup> Quidetabon matses ënden icnëdaid abentsëcshun naden aton matses chuipanëdash. “Quidetabo muaic chuinanquidombo nec. Aben icquid yuatemaïdbimboec uimanëmënuquido nec. Chonoadenquiocquin nua peshun nua actenequido neoaic,” quequin Quidetabo ënden icnëdaïdën chuipanëdash. <sup>13</sup> Abimbo chuiquidënuquo aden chuipanëdash. Aden chuipanëdash, quequin muaquin chuiquid ambi icsamboen tantiaid tantiamequin comapenen chuiban ma Esuquidistu abimbo tantiaquid adquid yampanueshun. <sup>14</sup> Aden mimbi chuibanac Esuquidistu tantiaquid yanash isadaidbon Nuquin Papan chiaid utsi uain chiampicpaden chuïsho tantiesa ma icpanuna. Aden mimbi chuibanac abimbo chuiquidën chiachimboen niacquidon chuïsho ma tantiesa icpanuna. <sup>15</sup> Nuquin Papan Esuquidistu tantiamiaïdën icbon chiaid bëdamboen isoaic. Adomboembidi ambi uabanaïd isec. Adash abitedi bëdambo iquec, quec tsadec. Ambi tantiaid icsambocquid icnuc Esuquidistu tantienquiocquin, Nëid mishtemaïd nec. Nëid utsi petemaïd nec. Nëid utsi actemaïd nec, quequin chuibanquidën chiaid tantiec. Aden tantiec aton tantiate icsabudec, Icsaobi, quequin tantienquio iquec. <sup>16</sup> Nuquin Papa tantiembi, qeshumbic Nuquin Papan chiapadomboen niacquin tantiesa nebi, quiachimboec tabadsho utsibon adquid isec. Nuquin Papan chiaid niacquid adquid nec. Nuquin Papan icsamboen isaidquio adquid neoaic. Naid bëda natiapimbo icquid neoaic, Tito.

## 2

### *Esuquidistu tantiec iccuededquido tantiametequid*

<sup>1</sup> Icsateuidi bunquid icnubi mimbi Esuquidistu tantiaquido abi tantiadonequidquio icmenuequin chuibanquin tantiamete. <sup>2</sup> Mimbi paëmbocquid nua aquenquio icteniaccpadomboen Esuquidistu tantiaquid tsusiobo chuibanquin tantiamete. Adembidi, Mibi bëdambocquid nec, utsibo camenu, quec bëdamboec tabadtenequin tsusiobo ismequin tantiamete. Adembidi, Naden naic icsatsiabi, qeshun mimbi nainquio yacpadomboen mimbi bëdamboen tantiaid aido chuibanquin tantiamete. Adembidi, Naden naic bëdambocquid yantsiabi, qeshun adomboembidi naquid nebi, quequin tsusiobo chuibanquin tantiamete. Adembidi mimbia Esuquidistu tantiadoniaccpadomboen pausunaïd icquin ma adquiobidi tsusiobotsen yampanueshun tantiamequin chuibanta. Adembidi, Esuquidistu tantiec utsibobëd tantiananec mibi tabadteniacpadomboen chuibanquin tantiamete. Adecbidi, natiatequid iquendac, quequin Esuquidistu tantesa uainquiocquin abi choate mimbi caimbudaccpadomboen chuïquin tantiameteoata, Tito.

<sup>3</sup> Adembidi, Esuquidistu tantiaquid ënden machoaido tantiamenuquin chuiban. Nuquin Papan bëdambocquid icmiaïd nebi, quec bëdamboec mibi tabadteniacpadomboen tantiamequin chuïoa. Adembidi, utsi icsamboen chuiquid iquenda, quequin chuibanquin tantiamete. Adembidi, mimbi paëmbocquid nua aquenquio yacpadomboen chuïquin tantiamete. Mimbi bëdamboen nabanaid nëbi machocuenaido ismequin tantiamete, quequin

enden machoaido chui, Tito. <sup>4</sup> Aden chiac enden machoaidon aton bënë aton bacuëbo chedobëd abi tabadaid tantiamenuequin nëbi machocuenaido bëdamboen ismepec. <sup>5</sup> Adembidi aidën bëdamboen tantiaquin, Naden naic icsatsiabi, qeshun nainquo iquéc. Naden naic bëdambo ictsiabi, quequin naquid, quequin enden machoaidon nëbi machocuenaido chuibanquin tantiameoapéc. Adembidi, Mibi inesa chudmenquo yec tabadta, quequin enden machoaidon nëbi machocuenaido chuiquin tantiameoapéc. Adembidi, aton shubun tabadquin ambi nabanacpadomboen ismequin aidon nëbi machocuenaido tantiameoapéc. Adembidi, utsibo bëdamboen tantiaquin ambi nashunacpadomboen ismequin enden machoaidon nëbi machocuenaido tantiameoaic. Adembidi, aton bënë chiacpadomboen nabanquin nëbi machocuenaido ismequin tantiameoaic. Aden enden machoaidon abi ismiacpadomboen nëbi machocuenaidon naic tabadsho isash, Nuquin Papan chiacpadomboen naic tabadec chidobo, quequin utsibon ispec.

<sup>6</sup> Adembidi, caniabo chuibanquin tantiamé, Tito. Naden naic icsatsiabi, quequin nainquo iquëmbi, quequin mimbi bëdamboen tantiacpadomboen caniabo tantiamequin chuioa. Adembidi, Naden naic bëdambo mibi icpec, quequin mimbi bëdamboen tantiacpadomboen aido tantiamequin chuioa. <sup>7</sup> Bëdamboec tabadaid tantiamequin ismenu, quec mibibi bëdamboec tabadteneta. Mibibi icsainquiocquin ismequin tantiamé. Adembidi mamënenquiocquin bëdamboen chuiquin tantiamé. <sup>8</sup> Adec mibibi bëdamboec tabadtenequin ismequin Nuquin Papan chiaid abimbo mimbi chuibanac Esuquidistu tantiesa mibi chëshënkuid mibi icsamboen chuitiapimbo yec tabadendac.

<sup>9</sup> Adembidi yuabo chuiquin, Bëdambo iquebi, min icbo camenuequin ambi chiaidtedi chëshenquiocquin nabanta, quequin tantiaméta, Tito. <sup>10</sup> Adembidi, min icbon na ampenquiocquin bëdamboen dayun uaqin nashunquin min icbo ismética, quequin yuabo tantiamé. Aden Esuquidistu tanquin nabansho isun min icbo: Con yua Esuquidistu tantiaquid yec bëdamboeshë yanac. Con yua bëdambo icmekuidën chiaid tantianu, quendac icbo.

<sup>11</sup> Nuquin Papan matses abëd icmenuequin matses icsaid bedshuntequid Esuquidistu icmenuequin chomepanëdash. <sup>12</sup> Aden chomiác nidaidën tabadquin utsibo tantiaquin Nuquin Papan chiacpadomboen naquin ismiác adomboembidi naic bëdamboec tabadquid. Nuquin Papan bëdamboen tantiamiác bëdamboen tantiasho, Aidën bëdambo icmiác icquin naden naic bëdambo icpec, quequin naquid. Adembidi, Naden naic icsatsiabi, quequin nainquo icquin Nuquin Papan tantiamiácpadomboen naic nuqui tabadtenec. Adomboembidi Quidetabo Esuquidistu tantiaquido chuiquin tantiamé, Tito. <sup>13</sup> Nuquin Papapadquid con Icbo Esuquidistu choaic, quequin caimbudéc bëdamboec tabadebi, quequin chuiquin tantiaméoa.

<sup>14</sup> Nuqui cainaid: Ëmbi con utsibo caid ëbipadquid iquendac, quiash nuqui icsaid bedshunash abided cuidadec unëspanëdash. Adacsho aid tantiaquidquo yec bëdamboec tabadquid nec, quequin chuiquin tantiamé, Tito. <sup>15</sup> Ëmbi chuiboedtedi chuibanquin tantiamé. Mimbía tantiaquid icquin, Ëmbi chiacpadomboen nabanec tabadteneta, quequin Quidetabo chuioata. Mimbí chiacpadomboen nainquiocsho isun cuembo chuioata. Adecbidi, utsibon mibi icsamboen chuitiapimbocon bëdamboec tabadteneta.

### 3

*Utsi tantiaquin nabantequid*

<sup>1</sup> Esuquidistu tantiaquidtedi bēpiscudmenquiocnuequin naden chuibanta, Tito. Min tsusiobon bēdamboen chiaid naquimbi adembidi mibi chuiquid utsibon bēdamboen chiaid chieshenquiocquin naban. Adembidi, utsibo tantiaquin nashunta, quequin Quideta yacnocquido chui. <sup>2</sup> Adembidi, Utsi muaquin chienda, quequin chuioata. Adecbidi, Utsibobēd tantiananec bēdamboec tabad, quequin chuioa. Adembidi, Mimbi naiduidi tantienquiocquin nabanta, quequin chuioa.

<sup>3</sup> Ēnden Esuquidistu tantiesa nuqui iccondac. Adquid icquin Nuquin Papan chiacpadomboen nainquio nuqui iccondac. Adquid icquin nuqui bunacpaden nabanec nuqui icsaded-icsadedondac. Utsibobēd icsamboec nuqui cuidnampondac. Adembidi, utsin bēdamboen isaid icsho isash nuqui nēishpondac. Adecbidi utsibobēd nēishash nuqui chushcanampondac. <sup>4</sup> Adquid nuqui icnuc matses tantiec abēd icquid icmenuec nuqui icsaid bedshunash abided cuidadec Esuquidistu chopanēdash. <sup>5-6</sup> Adec choash cuidadsho isun Nuquin Papan Esuquidistu nuqui tantiamiac. Adoac abi tantiaquid icsho isun adquidtedi Esuquidistun aton Mayan meniac. Adoac, Bēdamboen nasho abi yacno tabadmendac, quenquio yec nuqui tabadec. Aidēnquio nuqui icsate bunaid tantiamequioquin nuqui ěmec. <sup>7</sup> Adec aton Mayan nuquibēd icsho isun, Bēdambocquid nec. Aidtedi ěbēdi tabadendac, quequin Nuquin Papan tantiec. <sup>8</sup> Ēmbi chuita, quequin chiaidtedi abimbo iquec, Tito. Aden tantiaquin Quideta yacnocquido chuiban Esuquidistu tantiaquid icquin ma adomboen nabanec bēdamboec tabadpanuna. Ēmbi chiacpadomboen Esuquidistu tantiaquidtedishun nadenec utsibobēd bēdamboec tabadquid nec, quequin chuita.

<sup>9</sup> Adec tabadec min tsusedpabo chiec utsibēd nēishnanash icsamboec onquenda, quequin Quidetabo chuita, Tito. Adembidi, aton tsusedpabon naden nata quequin chuinēdaid chuiquin chushcanu qesho adembidi adenda, cata. Aden chiaid Nuquin Papa yacno mibi puduedmetemaid nec, quequin chuita. <sup>10</sup> Adec onquequin Esuquidistu tantiaquido cuēshēdmenuequin chuibanquid icsho bēdamboen tantiamenuequin chuiban. Aden chiaqui niacbidanquin adomboembidi aidēn chuioasho tantiaashun aidi comapenen chuibanquin tantiamēoa. Aden chiaqui padpiden niacbidanquin adomboembidi chuioasho tantiaashun cacumeta, Tito. <sup>11</sup> Adquid ambi icsamboen tantiacpadecuidi tabadquid neque. Adota. Mimbi chiaqui adecuidi tabadquid Nuquin Papa yacno nidtiapimbo yec abibi cuidadtequid nendac.

### *Utsibo chuiquin chiaid*

<sup>12</sup> Nēbi utsibo chuinu. Tantia. Adtemas Tiquico chedo ěbēdi iquec. Abentsēqui Quideta yacno nidmembī. Aid mibi yacno choambien mimbi tantiamedonequin chuibanquin naimbudnu quiash Nicopodis yacno nidoata, Tito. Ue dapa sequenuc Nicopodis yacno tabadnu, quianec nidendabi. <sup>13</sup> Matses icsasho cuidte chuiquid, Senas mibi isbidanec Apodosbēd udi nidec. Aid daēdi mibi yacno chosho yued. Nidnu, qesho aton na nibēdsho isun menequin bēdamboen nidme. <sup>14</sup> Peshun acnu, quequin Esuquidistu tantiaquidēn chonoadquin nabanquid. Utsi nashunquin adomboembidi nabanec tabadquid. Aden nabanec tabadsho isash utsibo Esuquidistu tantiaquidquibidi yanendac.

<sup>15</sup> Mibi tantiec tabadebi, quequin Tito chuita, ěbēd icquidon cacpadomboen dada uaimbi. Adembidi mibēd icquido Esuquidistu tantiaquido tantiec ěbēd icquido tabadoaic.

Esuquidistun, Bëdambo iquebi, camiaido ma mibitedi icpanuna. Padi.  
Aided chiombi, Tito.

## PIDEMONËN ISTE

<sup>1</sup> Pabado nebi. Esuquidistun ëbi chuibeneta cac chuibansho quënën nauedaid nebi. Ëbëdi Timoteyo iquec. Aidi Esuquidistu tantiaquid icsho nuqui con utsi caid nec.

Ëbi yuedquid Esuquidistu chuibanquidquio mibi neque. Ëmbi dada uaid isec onqueta, Pidemon. <sup>2</sup> Mibëd icquid, Apia, Esuquidistu tantiaquidquio icsho nuqui con chu caid nec. Adquipo mibëd icquidbidi nuqui con utsi caidbidi nec. Sondadon matses icsambocsho cacumiacbimboen Esuquidistu tantiaquid icsamenuequid cacumequid Adquipo nec. Aido min shubun Esuquidistu tantiec iccuededquido iqueque. Ëmbi dada uaid bedash isec onquequin aido chuioata, Pidemon. <sup>3</sup> Esuquidistu tantiaquido icsho Nuquin Papan ëbi icsaid cuidenquiocquin ambi bëdambo icmebanaid nebi, quequin mibitedishun ma tantiapanuna. Adecbidi, Nuquin Papabëd icquido nebi, quequin ambi tantiamiaidquio ma icpanuna.

### *Nuquin Papa chiec onquiaid*

<sup>4-5</sup> Pidemon Nuquin Icho tantiaquidquio nec. Adquid icquin Esuquidistu tantiaquid utsibo tantiaquin nashunquid nec, quequin utsibon chuisho tantias, Pidemon tantiec bëdambo iquebi, Papa, quequin Nuquin Papa chiec onquebudebi, Pidemon. <sup>6</sup> Aden mibi tantiaquin Pidemon ambi tantiaid Esuquidistu chuibanquid icme. Aden aidën chuibansho mimbi Esuquidistu bëdamboen tantiamiac Esuquidistu tantiaquid utsibo ma Pidemonën bëdamboen tantiapanuna, Papa, quequin Nuquin Papa chiec onquebudebi.

<sup>7</sup> Aden ëmbi Nuquin Papa chuibudacpadomboen mimbi naic. Pidemonën Esuquidistu tantiaquid utsibo tantiaquin nashunec, qesho tantias bëdambo iquebi, Pidemon.

### *Onesimo tantiaquin chuidoniaid*

<sup>8</sup> Esuquidistun ëbi chuibeneta caid icquin aid chuibanac abi tantiaquid mibi icpondac, Pidemon. Adquid icquin Esuquidistu tantiaquid utsibo tantiaquin mimbi nashunacpadomboen ëmbi nidmiaidtsen bëdamboen tantiaquin nashunta, quequin mibi chuitiadquio icquimbi padenquio iquembi. <sup>9</sup> Tantiananquid nuquibi icquin aden chienquio iquembi. Tsusio budobi. Adquid icquin Esuquidistu chuibansho padpiden quënën nauedoshi. <sup>10</sup> Quënën nauedaid icquin ëmbi Esuquidistu chuibanac aid tantiaquidbidi Onesimo yanosh. Adquid yansho ëmbi con mado caid nec. Adquid yanash ¿Onesimo mibi yacno nidacsho ada ëbi bëdamboen tantiaquin mimbi nashunondacpaden aidi bëdamboen tantiaquin nashunoatsia? Pidemon. <sup>11</sup> Ënden min yua icquin mimbi chiacpadomboen mibi nashunquio iccondaidëmbi nëbi Esuquidistu tantiaquid yanshumbini nëshunquio bëdamboen nashunec. Mibi yacno nidshun adomboembidi Onesimon mibi nashunoaindac.

<sup>12</sup> Aidi mibi yacno nidmeoaimbi. Con dayunquio icquid nidmenu, quiash aid tantiec unësquio tsadebi, Pidemon. <sup>13</sup> Esuquidistu chuibansho quënën nauedshun tataniac caputiapimbocsho mimbi ëbi nashuntiapimbo iquec. Adec mibi nashumëntiapimbocnobi Onesimombini nashunosh, qeshun nidmetiapimbocquimbi mibi yacno nidmembi. <sup>14</sup> Onesimo ëbëdi tabadmenuequin chuita, mibi catiapimbo iquebi. Mimbibi aden chiac bëdambo ictsiash. <sup>15</sup> Yuecash cuëshedenquio yec Pidemombëd Onesimo tabadoaindac, quequin

Nuquin Papan tantiondacadquieci mibi yacnoësh cuenëdaid mibi yacno nidash Onesimo tabadtsiash. <sup>16</sup> Onesimo min yua iccondaid Esuquidistu tantiaquid yansho mimbi con utsi caid aidi nendac. Ëbëd icquin natiapimbocsho aidën nashunebi. Mibi yacno nidshun mimbi chuisho Esuquidistu tantiaquid icquin chieshenquiocquin bëdamboen mibi nashunendac.

<sup>17</sup> Pabado ëbëd isedanquid nec, qeshun mimbi ëbi yuedondacpaden Onesimo yuedta, Pidemon. <sup>18</sup> Con na utsibëdtabi con na bedtequid Onesimon bedaccondash, quequin mimbi chiactedi mibi meneoaimbi. <sup>19</sup> Aidtedi meneoaimbi, quequin ëmbibi dada uaimbique. Isec onquequin tantiaquiota. Ëmbi Esuquidistu chuibanac abi tantiaquid yanshun Onesimon bedaidtedi daëd uaquin ëbi nashunquin cuidtiadquidi mibi nec, Pidemon. <sup>20</sup> ¿Aden ëbi nashunuequinda mimbi Onesimo ëbibimboecsho bëdamboen tantiaquin nashumpatsia? Aden mimbi aid nashunuc bëdambo ictsiabi. <sup>21</sup> Ëmbi chiactedi daëd uaquin mimbi natsiac, quequin tantiec tsadebi, Pidemon.

<sup>22</sup> Nëidtsen chuinu. Tantia. Ëmbi tantienquiocnoc Pabado chonoshe qeshun abi ushondaïd nacnenueshun nacnenta, Pidemon. Mibi ëbi tantiec Nuquin Papa chiec onquiacpadomboen badedquio Nuquin Papan mibëd icmepashuni.

### *Utsibo chuinu quiaid*

<sup>23</sup> Esuquidistu tantiaquid utsibo ëbëdi iquec. Aidon chiaïd chuinu. Tantia. Epapadas, abembi ëbëd icnuec quënën nauedadondaïdën: Mibëd icquidotedi tantiec tsadebi, quequin Pidemon chuita, cac adomboen dada uaimbi, Pidemon. <sup>24</sup> Madcos yec Adistadico yec Demas yec Ducas yec quec ëbëd icquido iquec. Aidombidi: Mibëd icquido tantiec tabadebi, quequin Pidemon chuita, cac dada uaoaimbi. Aidtedishun ëmbi Esuquidistu chuibanacpadomboen chuibanoaquido nec.

<sup>25</sup> Nuquin Icho Esuquidistun mibitedi bëdambocquid icmëbanacpadquieci ma tabadoapanuna, Pidemon.

Padi. Aidted dada uaombique. Isec onqueta.

## EBEDEYON ISADAIDBON ISTE

### *Abi yacnoshon ambi uaidon Icbombo Esuquidistu nendac*

<sup>1</sup> Ēndenquimboshē Nuquin Papan ěmbi chiacpadomboen chuibanta cac adomboembidi abĕd icquido tsusedpabon chuibanoapampic. Abentsĕc chuimeshun yuecshun ambi chiaid utsi tsusedpa utsitsen chuimeoapampic. Adoshombic yuecquiocshon ambi chiaid utsitsen tsusedpa utsitsen chuimeoapampic. Adembidi ambi abi yacnoshon uaid mayan bĕda budmiac aidĕn chiacpadomboen tsusedpabon chuioapampic. Adembidi nadatiambocquin uabanquin ismequin chiac adomboembidi chuioapampic. <sup>2</sup> Nĕbi tsyuecquio Nuquin Papan chiacpadomboen abipadquiocquidĕmbi aton Madon chuibanec. Aidi Nuquin Papan ambi uaido con icbo camiaidquio nec. Nidaid abubĕdta uashun aidĕnquiocquidtedi aton Papabĕdtan uabanampidquio aton Madombo nec. <sup>3</sup> Aidi, aton Papa bĕdaidquio yampidpadquidquibidi aton Mado neoaic. Aton Papa yacpadquiocquin ismequid yec ambi nadomboen natiad, quequin nadatiambocquin ambi tantiacpadquiequi nidaid abubĕd aidĕnquiocquidtedi adquiouidi iquec. Aidi aton Papan chiaid niaquesambo yec matses icsaid bedshunash abided ciudadec unĕsash, Ēmbi bĕdambocquid icmebanaido matses nendac, quequin tantiashic abuc nidoash Nuquin Papabĕd tabadoapanĕdash aidquiobi. <sup>4</sup> Ad icnuc ambi abi yacnoshon uaido abipadquid nibĕdec. Aidon con Icbombo caidquio nec. <sup>5</sup> ¿Ambi abi yacnoshon uaid mayan bĕda isec:

“Con mado mibi nec.

Ēbi min papa nendac, quepecta Nuquin Papa iquec? Padenquio.

Adecbidi:

¿Nĕidĕn Papa nebi.

Adecbidi: Con mado nec, quepecta Nuquin Papa iquec aido caic? Padenquio.”

<sup>6</sup> Abĕd Abiambo Yampidi nidaidĕn tabadash choasho isun Nuquin Papan ismequin:

“Nĕid con Madombo Abentsĕqui nec. Aidquio tantiec con Icbo nec, quec cuishon quec, ambi naid chiec cuĕdĕn, cac aden ambi abi yacnoshon uaido mayan bĕdabo chuibanec cuĕdĕncuededendac.”

<sup>7</sup> Ambi abi yacnoshon uaido mayan bĕdabo naden Nuquin Papan chiec:

“Ēmbi chiacpadequi cunquequid yanec.

Adecbidi, ěmbi chiacpadequi cuĕte nĕdĕnquedote iquendac.”

<sup>8</sup> Padnuen ambi uacmaid abipadquid aton Madombo utsi uatiapimbo iquec. Adquidquio icsho Nuquin Papan naden chiec:

“Ēnenquiocquin ĕbĕdtan Chuiquid Abentsĕcquio mibi iquendac.

Adecbidi namequid bĕdaidquio mibi iquendac.

<sup>9</sup> Ēbipadquid iquec bĕdamboec tabadquin nabante bunquidquio mibi nec.

Adquid yec icsamboec tabadquin nabante bunesambobidi mibi nec.

Adquid yec ĕbi yacpadquidquio Icbo Abentsĕcquiobi mibi nec. Mibĕd icquido adquid nibĕdec.

Mibi abentsĕqui adquidquio iquec. Adquid iquec, Bĕdambo iquebi, quec mibi cuishon quendac.”

<sup>10</sup> Adembidi Nuquin Papan naden aton Mado chuioaic,



“Tauamboen nidaid abubēdta uashun aidēnquiocquidtedi mimbi uabampampic.

Aidtedishun icbombo mibi nec.

<sup>11-12</sup> Aidtedi enēdendac.

Mibien nibēdantiapimbo yec abi tabadendac.

Aidtedi dashcute shēnibudaid niacbimboen chuca uaindac.

Mibien Abiambo Yampid yec abi enēdesa mibi iquendac.

<sup>13</sup> Nēbi cainec ebēdquio tabadec cho.

Mibi chieshēnquidtedi nibēdquio icmenun nabono. Chiata,”

quequin Nuquin Papan chiampic. ¿Ambi abi yacnoshon uaido mayan bēda aden chuipampidta nepadic? Padenquio. Esuquidistu aden chuipampic.

<sup>14</sup> Ambi abi yacnoshon uaido mayan bēdabo Nuquin Papan, Ebēd tabadtequidombo nashunta, caido nec.

## 2

### *Ambi chiaid tantiesa icchitomane, queshun tantiadonequiota caid*

<sup>1</sup> Adec abitedishun Icbombo aton Mado icnuc ambi chiaid chieshēnchitomane queshun tantiadonequieci tabadnuna. <sup>2</sup> Ēndenquimboshē ambi, Naden nata, quequin chiaid ambi abi yacnoshon uaido mayan bēdabo chuimiapadomboenuidi naisa icsho isun Nuquin Papan cuidpampic. ¿Aden ēndenquimboshē ambi chiaid chieshēnquid ambi cuidpampicpaden <sup>3</sup> nēbi icquidtsen ambi chiaid chieshēnsho isun cuidenquioda icpadic? Ambi chiaid niacquid ambi cuidtiadquidi icnubi aton Madoded cuidpanēdash. Adoac, Ēbi yacno Yuedanquid nebi, quequin aton Madonquio Esusēmba chiambic adomboembidi abi tantiaquidontsen chuioapondashi. Aden Esusēn chiaid tantiaquidon chuibanubien, <sup>4</sup> Ēmbi chiaidquio chuibanoopec, quequin ismenuequin aton Mayanēn Nuquin Papabēd icquidēn tantiamebanacpadomboen nadatiambocquin utsi-utsien bēdamebanquinc, mayan icsa dapuedmequinc, unēsaid uincuemequinc caquin adquidēn-adquidēnquien nabededpanēdash.

### *Matses icnu quiash Esuquidistu matsespanēdash*

<sup>5</sup> Adembidi chuinu. Tantiata. Abi yacno Esuquidistu tantiaquido choash tabadsho isun, Nēido ēbi yacnoshon ēmbi uaido mayan bēdabo mibi chuiquid nec, quenquio Nuquin Papa iquendac. <sup>6</sup> Ēndenquimbo aden tantiaquin dada uaquin naden Nuquin Papa chiec Dabid pado onquepampic:

“Tantiaquiono. Ēbi chui, Papa. ¿Atotsieshun matses mimbi uaid pistscquio icsho mimbi comapenen tantiatequid aido icpec? Papa.

Adembidi, ¿Atotsieshun Adanēn tsyuecquido mimbi nashumpe? Papa.

<sup>7</sup> Nēbi chuitan mimbi cac mibi yacnoshon uaid mayan bēdan adomboembidi chuioac matsesēn nabanec.

Yuecquiocshon mibipadquid matses mimbi icmendac.

<sup>8</sup> Adquid icmeshun mimbi uaidtedishun icbombobidi aid mimbi icmendac,” quequin abimbo chiampid nec. Nēbi abitedishun icbo matses mimbi icmiambo iquec. <sup>9</sup> Utsien Nuquin Papapadquidquio yequi matsesun Nuquin Papan tantiamiacpaden ambi abi yacnoshon uaido mayan bēdabon chiac nabamboedi nēbi aton Papabēd tsadec abitedishun Icbombo yanac. Aidi Nuquin Papan chiapadomboen nanuec nidaidēnshun tishac matsesash matses tantiec matses icsaid bedshunash abided cuidadec unēsash abitedishun Icbombo yampanēdash.

<sup>10</sup> Nuquin Papa abitedi uaquidquio icnuc ambi tantiacpadec iquec. Adquid icquin ambi, Matses icsaisa icmeshun con bacuë icmembi, quequin tantiacpaden ëbi yacno abi tantiaquid yuedquid con Madombo iquendac, quequin ambi chiampicpadquiequi aton Mado matsespanëdash. Aidi matses yec natiamianquiequi icsaisa yec unësash uincuenash bëyucanec abi yacno dectatonepanëdash ma Nuquin Papan, Matses con bacuë icmembi, quequin tantiaido ëbi tsibanec dectatonepanu quiash. <sup>11</sup> Matses bëdambo icmequid Esuquidistun Papa ambi bëdambo icmebantequidon Papabidi nendac. Aton Papa Abentsëqui icnuc Esuquidistu Nuquin Papa yacno choash, Con utsibonec, quependac <sup>12</sup> aton Papa chiec:

“Mibi chuiquin con utsibonec tantiamenu, Papa.

Aidobëd tabadquimbi mibi chuinu. Tantia, Papa, quependac.”

<sup>13</sup> Adembidi chuioaic:

“Mibi tantiaquin mimbi chiampicpadomboen nabanash choaobi, Papa.

Ëbi tsibantequid mimbi bëdaidquio icmiaidquio bëec choaobi, quequin mibi chiendambi, Papa,”

quequin matsesabi yec abuc tabadquin Esuquidistun chuipampic.

<sup>14</sup> Matses namibëd intacchoquid yec unëstequid icsho mënchicquid icnu quiash Esuquidistu matsesash unëstequid yampanëdash. Ma matses mayan icsan dacuëdmequin dëcatemëntiapimbo yampanu quiash matsesash unëstequid yampanëdash <sup>15</sup> ma mayan icsan ambi dacuëdmiaido ambi yuaido icboedi matses ëmbi mënchictequid ma icpanuna. <sup>16</sup> Ëmbi uaido mayan bëdabo unëstequid icsho mënchicnu, quenquio yec matsesash Esuquidistu unësapanëdash. Abadauanën tsyuecquido mënchicnu, quiash matsespanëdash. <sup>17</sup> Aden ambi chiacpaden nanuec matsespadquid yampanëdash. Adec matsesash matses nënacpadquieci nëmpanëdash. Abi bundoacpadquieci bundopanëdash. Abi natiacpadquieci natiantequid icpanëdash. Mayan icsan icsamenuequin tanaidbidi icpanëdash. Matses yanash icsaisa yec matses icsaid bedshunash abided cuidadec unësapanëdash matses Nuquin Papan bëdamboen istequid icmenuc. Adecbidi, Matses icsaisa yanabi yec chuibanec Nuquin Papabëd onquetiapimbo iquec, quec matses chuibanec Nuquin Papabëd aidi onquec. <sup>18</sup> Matsesacsho mayan icsan: Nuquin Papan chiaid niacmenu, quequin tanac niaquesa Esus icpanëdash. Adquid icquin nuquitsen mayan icsan: Nuquin Papan chiaid niacmenu, cac, Chieshnushe ëbi dayacquio icmec cho, cac badedquio choquin chieshesa nuqui icmendac.

### 3

#### *Abi yacno yuedanquidquio icquin Moises dëniacquid Esuquidistu*

<sup>1</sup> Adec matses icsaid bedshunash abided cuidadaid Esuquidistu tantiaquido aton shubun icquido nec. Adquid icquin Nuquin Papan, Ëbi chuibeneta, cashumbic adembidi ambi matses chuibanec ëbëd onquequid dapa icoata caid Esuquidistu nec, quequin aidquio tantiaquionona.

<sup>2</sup> Nuquin Papan chiacpadomboen chieshenquiocquin naquido Nuquin Papan shubun icquido abi tantiaquido iquendac, quequin Moisesën chuidedchuidedampicpaden Esuquidistun adomboembidi chuibampanëdash. <sup>3</sup> Aidi Abiambo Yampid yec, Ëbi tantiaquido con shubun icquido nendac, Esuquidistu quiacpadec adecbidi adtiapimbo Moises icoapampic. <sup>4</sup> Nëidted con shubun ëbëdi tabadendac, quequid shubu icbo nec. Aden Nuquin Papan chiacpadomboen aton shubun icquido bëdambocquid icmequid Esuquidistu nec. <sup>5</sup> Nuquin Papan shubun icquid ambi namiaidquio Moises icquin Nuquin Papan: Matses con shubun icquido icmequid iquendac, quequin

min matses chuita, cacpadomboen chiquid Moises icpampic. <sup>6</sup> Esuquidistu Nuquin Papan Madombo yampidquio aton Papan shubun icquid icquin aton Papan Moises chuimiampicpaden aton shubun icquido icmepanëdash. Aidën shubun icquid nebi, qeshun chieshenquiocquin cainquidquio aton shubun icquidquio nuqui nendac.

### *Chieshenda*

<sup>7</sup> Aton shubun tabadnuequid naden Nuquin Papan Mayanën ambi chiaid mibi bëdamboen tantiamenuen chieque. Tantiata:

“Nëbimbobi Nuquin Papan chiaid chieshënenquio yec tabadta.

<sup>8</sup> Equipito yacnoësh cuëte nibëdacno capuquin tsusedpabon, ¿Nuquibëdida Nuquin Papa iqueque? Tantiabono, qeshun ambi chiaid chieshëmpampicpaden chieshënenda.

<sup>9</sup> Cuëte nibëdacno seta 40ted matamec capucuenequin tsusedpabon Nuquin Papan nadatiambocquin naded-nadedsho isquimbi

¿Ambi chiaid niacshoda Nuquin Papan ëbi cuidpeba?

Isbono, quiacpadquiec tsusedpabo icsamboec tabadpampic.

<sup>10</sup> Adec tabadsho isash nëishpondabi.

Ëmbi chiaid chieshënec ambibi tantiacpadequi icsadenepampic.

<sup>11</sup> Adquid icsho isun chushcain: Ëmbi abitedi uabanquin nainash ëbi tabadacno aidtedi puduedmenquio iquembi, quequin chiacpadomboen naindambi. Abimbo caimbi,”

quequin Nuquin Papan isadaidbo chiampid nec.

<sup>12</sup> Abiambo Yampid Nuquin Papa abi iquec, quequin tantiasch cuëshëdchitomane qeshun tantiadonequiota. <sup>13</sup> Nuquin Papan

chiacpadquiec tabadnuna, quec badiadquidën-badiadquidënquiec chuinanec onqueta ma adoac icsamianquidën chiac Nuquin Papan chiaid chieshënenquiocpanuna. <sup>14</sup> Esusbëd icquid nebi, quiondacadpaden tantiadenequin caimbudec aton matses yec Esus yacno nidanetequidquio mibi nendac. <sup>15</sup> Nuquin Papan chiampid utsitsen chuinu. Tantia:

“Nëbimbobi Nuquin Papan chiaid tantesa uampicpaden tantesa uainda.”

<sup>16</sup> ¿Tsuntsin Nuquin Papan chiaid tantiaschun chieshëmpampic? ¿Equipito yacnoshon bëyucanquin Moisesën buanaido Nuquin Papan chiaid tantiasch chieshquido yanenquioda icpampic? <sup>17</sup> ¿Tsutsibidi seta 40ted matamec

chiesho isash Nuquin Papa aidtedbidi seta matamec nëishted-nëishtedpampic? Adoac ¿Cuëte nibëdacnoësh icsaquidtedi unësbudnenquioda icpampic?

<sup>18</sup> ¿Abitedi uabanquin nainash ëbi tabadacno puduedmenquio iquembi, quequin tsutsi Nuquin Papan chuipampic? ¿Ambi chiaid chieshënnquid Nuquin Papan chienquioda icpampic? <sup>19</sup> Ai, tsusedpabon Nuquin Papan

chiaid tantiasch, Bëdambo iqueque. Adonona, queboedombi, Nuqui nabocpadomboen nanuna, quequin ambi chiaid chieshënsho Nuquin Papan abi yacno puduedmetiapimbo icpampic.

## 4

### *Ëbi yacno puduedash ëbëd tabadtequid quiaid*

<sup>1</sup> Ëbi yacno puduedash ëbëd tabadtequid iquendac, quequin Nuquin Papan chiampicpadomboen nëbimbobi chuioaique. Abi yacno abëdi ic-tiapimbo icchitomane quequin Esuquidistu tantiadonequionona. <sup>2</sup> Ëbi

yacno puduedash tabadtequid iquendac, quequin ëndenquimboshë Nuquin Papan nuquin tsusedpabo chiampicpadomboen nëbi nuqui chuioaic. Aden ëndenquimbo chuisho tantiasch, Nuquin Papan chiaid abimbo iquec, quiasch

tantienquo yanash, Aid cainu, quetiapimbo tsusedpabo utsi-utsiec yampampic. <sup>3</sup> Ambi chiaid tantiaquidomboen nēbi aidbēdi tabadec.

“Ēnden yampidon tantienquiocsho isash, Abitedi uabanquin nainash ēbi tabadacno chotiapimbo aido iquendac,”

quequin chushcaquin Nuquin Papan aden chuipampic. Tauamboec ambi tantiacpadomboen abitedi uabanquin nainash Nuquin Papa quenenash tabadpampic. <sup>4</sup> Abi tabadaid chuiquin Nuquin Papan naden dada uamiampique. Tantia: “Seistedec ushquin abitedi uabanash badiad utsin ēnash tabadpobi.” <sup>5</sup> Ashumbic nadentsen dada uamiampic:

“Ēbi ēnash tabadacno ēmbi chiaid chieshēnquido chotiapimbo iquendac,” quequin chuipampic.

<sup>6</sup> Aden chuimiatic ēndenquimboshē ambi chiaid tantiesa icquin niac-niacquec Nuquin Papabēd tabadtiapimbo icpampid icnubi ambi chiacpadomboen naquin cainpampidobēd nēbi nidaid utsi-utsiec icquido Nuquin Papabēd tabadtequid nendac. <sup>7</sup> Ambi tantiacpadēn Nuquin Papan chuimiapaden Dabid padon:

“Icsachitomane qeshun Nuquin Papan chiaid tantiaquiota,”

quequin dada uapampic. <sup>8</sup> Chuiquid dapa Dabid tishambocnoc Equipito yacnoēsh nidaid Canan yacno abi chuiquid dapa Osuebēd isadaidbo chochopampic. Capuec ēnēdash nidaid Canan yacno cho-choash isadaidbo ēnēdenquo yec tabadte icnuc, Ēbi yacno ēnēdenquo yec tabadte iquendac, quequin Canan yacno choash tabadquidon tsyuecquid Dabid pado Nuquin Papan chuimenquo ictsenampic. <sup>9</sup> Aden Dabid pado chuimiatic tantiahi abi tantiadonequidombo Nuquin Papabēd tabadquido nendac. <sup>10</sup> Aden uabanquin nainash Nuquin Papa tabadacpadec ambi bēdambo icmenuequin tantiactedi nabanquin nainash aidbēdi tabadendac. <sup>11</sup> Nuquin Papabēd tabadnuequin ambi tantiacpadec icnuen nainu, qeshun Esuquidistu tantiaquionona. Nuquin Papan chiaid tantiesa yanash tsusedpabo puduedenquiocpampicpadec icmane qeshun adonona.

<sup>12</sup> Nuquin Papan chiaid ambia chuipampidquo abi iquec. Nadatiambocquin tantiamete ambi chiaid nec. Shocosh siante abiuc daēdi cuēnumbocquidēn siaid uquēduc sēnquin nami icsaid isendac. Adomboembidi Nuquin Papan chiaid chiac papuduedquin matsesēn tantiaidtedi uquēduc sēnaid isachimboecnuc abi icsaid tantiamendac. Ambi, Naden nanuna, quequin chiabi yaidtedi abi bunquin ambi chiabi yaidtedibidi matses tantiamequin naden: Mimbi tantiaid icsa nēid icnubi mimbi tantiaid utsi bēdambo iquec. Adecbidi, mibi bunaid icsa nēid icnubi mibi bunaid utsi bēdambo iquec, quequin tantiamebanshun mimbi tantiaid icsa mibi bunaid icsabēdtabi ēnta, quequin Nuquin Papan chiaidēnquo mibi tantiamendac. <sup>13</sup> Abitedi isquidquo Nuquin Papa nec. Adquid icquin matses ompodtiapimbocnoc isendac. Adembidi, Ēmbi chiacpadomboenda matsesēn nabanoshe. Tantiānu, qeshun, abi yacno tabadnuequin cainquido bēisquioquin ambi nabanaidtedi chuimendac.

#### *Matses chuibanec Nuquin Papabēd onquequid dapa Esuquidistu*

<sup>14</sup> Adec Nuquin Papa abitedi isquidquo icnubi icsambocquid icquin ambe-mbi matsesēn aid chuitiapimbocsho isun abi tantiaquido chuibanec Nuquin Papabēd onquequid dapa ēnden abi yacno dectatonēdaid Esuquidistu nec. Aidi Nuquin Papan Madombo nec, quequin tantiesa yanchitomane qeshun aidquo tantiaquionona. <sup>15</sup> Matses chuibanec Nuquin Papabēd onquequid dapa matses yequi natiamiacmaidbimboec tsadpondash, quetiapimbo nuqui iquec. Matsesacsho mayan icsan, Nuquin Papan chiaid niacmenu, cac

niaquenquo Esuquidistun icpanëdash. <sup>16</sup> Adquid nuqui chuibanec Nuquin Papabëd onquequid dapa iquec, quequin tantiec dacuëdenquo yec abi yacno ënden Esuquidistubëd puduedquidëmbimboen Nuquin Papa ëmbitsen chuinuna. Icsashun Nuquin Papa chiac, Con mado Esus mibi icsaid bedshunash abided cuidadpanëdash, quequin tantiec mibi icsaid bëpiscudobi, quequin mibi tantiamec. Adembidi mibi natiamiaid abi chuisho Nuquin Papan Mayanën mibi chieshmenquiocquin dayacquio icmendac.

## 5

<sup>1</sup> Ëndenquimbo Nuquin Papan, Min matses chuibanec ëbëd onquequid dapa icta, caid isadaidbo utsi-utsiec icpampic. Adquid Nuquin Papan icmiac, Con matses icsapash icnui, queshun nidaidën capuquid yua cuesunedequin taudenepampic. Adembidi, Mibi bëdambo iquec, Papa, quequin ismequin, Nëid menenu, cac Nuquin Papan naden nata cain chiacpadomboen naquin aton matsesën bëaido cuesuneshun taudenepampic. <sup>2</sup> Aton matses chuibanec Nuquin Papabëd onquequid dapan aton matses icsasho isun, Con matsesbëdi icsaquid nebi, quequin <sup>3</sup> nidaidën capuquid yua utsi-utsien cuesunedenepampic.

<sup>4</sup> Aidi, Con matses chuibanec Nuquin Papabëd onquequid dapa icnu, quenquo icpampic. Nuquin Papambi, Min matses chuibanec ëbëd onquequid dapa icta, caid nepampic. Min matses chuibanec ëbëd onquequid dapa icta, Nuquin Papan abia caid Adon cuëmëdquid icpampic. Aidi unësan abi tsibanquid-abi tsibanquidquien Nuquin Papan, Min matses chuibanec ëbëd onquequid dapa icta, caid icpampic. <sup>5</sup> Adembidi Nuquin Papan, Matses chuibanec ëbëd onquequid dapa icta, caid Esuquidistu iquec. Èbibi adquid icnu, quenquo Esuquidistu icpanëdash. Aton Papambien: “Mibi con Madombo neque.

Con shubun icquido mimbi icmiaido chuibanec ëbëd onquequid dapa icta,” capampic aton Papan Esuquidistu chuiquin. Adembidi Esuquidistu chuiocquin aton Papanquo:

“Matsesash icsaisa yec min utsibo icsaid bedshunash cuidadec unësash uin-cuenash matses chuibanec ëbëd onquequid dapa icta,”

capampic. <sup>6</sup> Ambi chiaid utsi nad icpampic:

“Matses chuibanec ëbëd onquequid dapa Medquisedec yampidpadquid mibi nendac.

Adquid yec ënëdenquioctequidquid mibi nendac.”

<sup>7</sup> Adec, Con Pan chiampicpadquid icnu, quiash matsesacsho unës uaquin mëyante nendabi, quequin tantiec shubiec nadpanëdash. Matses icsaid bedshunash cuidadquid ëbi icmenda, quetiapimbo iquebi, Papa. Matses icsaid bedshunash cuidadquid iquendabi. Mimbi chiacpadomboen natiadquid iquebi, Papa, quequin yuen chuidonepanëdash Esuquidistun. Aden abi chuisho aton Papan adquidquo icmepanëdash. <sup>8</sup> Nuquin Papan Madombo iquequi matsesacsho mëyanac Nuquin Papan chiacpadomboen tantiabempanëdash. <sup>9</sup> Aden tantiabenash matses icsaid bedshunash abided cuidadash Nuquin Papa yacno Yuedanquid yanquiopanëdash. <sup>10</sup> Adoacsho isun, Nëbi matses chuibanec ëbëd onquequid dapa Medquisedecpadquid icta, cain Nuquin Papan Esus chuipampic.

### *Nuquin Papan chiaid ënden tantiaboedi tantiesa yanenda*

<sup>11</sup> Ambia matses chuibanec Nuquin Papabëd onquequid dapa Medquisedec nepampic. Aid chuiquin tantiamete dadpen iquec. Aidedi chuitiadquiocquin mibi eme uacsho ¿mitsipadomboentsimbi chuibanquin mibi

tantiamepe? <sup>12</sup> Mibia utsin tantiamiaid icquin ënden tantiabempatecnëdan mibitedishun. Adembidi mimbi abia tantiaid utsibo tantiamepatecnëdan. Bacuën shuma chishquin tantiacpaden tantiaquid icquin Nuquin Papan chiaid tantiatiapimbo mimbi icpec. <sup>13</sup> Shuma chishquid bacuëmpi, Bëdamboen nata, quequin chiaid tantiesa nec. <sup>14</sup> Pete pequidëmbien, Nadomboen nata, quequin ismiac adomboembidi isbanec mëquiadquidën icsa uainquiocquin nabanec. Adomboembidi Nuquin Papan chiaid tantiamiac tantiabenquidquio yanshun adomboen nabandenec. Adquid yanshun utsin, Naden nata, caqui, Aden naic Nuquin Papapadquid yampebi, quequin nabanquid. Utsin, Naden nata, caqui, Aden naic icsatsiabi, qeshun nainquio iquendac.

## 6

<sup>1</sup> Aden Esus chuiquin abia tantiamiaid bëdamboen tantiashun abipadquid icnuequin abi chuiquin tantiamiaid utsi tantiaquionona. Abia tantiamiaid nad iqueque. Tantiä. Chuinu. Esus tantiaquid icta. Adquid icquin icsaid ënta. Adembidi, Nuquin Papan chiaid tantiaquidquio icta. <sup>2</sup> Adembidi, Esus tantiaquin acten mentometa. Adembidi, Nuquin Papan abi tantiaquid aton Mayan menenuequin mëdanten mamishaid icta. Adembidi, Abi tantiaquid unësash uincuenta iquec, quequin tantiaquidquio icta. Adembidi, Abi tantiesa cuidtequid iquendac, quequin tantiec bëdamboec tabadteneta. <sup>3</sup> Aidedi mimbi tantioc. Aidedi tantiaquioshon, Adembidi ambi tantiamiaid utsitedi tantianuna, quequin tantiaquin nabanta. <sup>4</sup> Aden Esuquidistu tantiasho isun aton Mayan Nuquin Papan meniaid icboedi <sup>5</sup> Nuquin Papan chiacpadomboen nadatiambocquin nabamboed, <sup>6</sup> Esus matsesquio yec icsamboquid nepanëdash, quiash, Esus cuesten dectan, quequidbimboecquid icsho Nuquin Papan aid isendac. Aidën oncain Esus mamëshunec. Aden Esus tantienquio yanacsho bëdamboen tantiamenuen chuiquin, Icsaobique. Ebi icsaid ënu, cametiapimbo Nuquin Papan iquendac.

<sup>7</sup> Baded-badedquiec ue sequequin nidaid pachi uaidën tiedën caniquid caniacsho taneshcaquidën petequid nendac. Adecbidi Esuquidistu chuibanac abi tantiaquiosho Icbon yuedaido iquendac. <sup>8</sup> Echobëd cana shëta chedo ëshë idash dadpen yanushe qeshun nëdëncatequid nendac. Adecbidi icsamboen chiaid tantiaquid uquë nësiatequid nendac.

<sup>9</sup> Aden mibi chuiquimbi, Nuquin Papan nësiatemaïd mibi nec, quequin tantiembi. Esuquidistu tantiaquid yec abi tantiaquid utsibobëd tantiananec bëdamboec tabadquin ismequid nec, quequin mibi chuiquin utsibon chioshi. <sup>10</sup> Adoac abi tantiaquid utsibo tantiaquin mimbi nashundeniaid Nuquin Papan bëpiscudenquiocquin tantiec. <sup>11</sup> Adecbidi utsibobëd tantiananec mibi bëdamboec tabadpashun. Adec tabadash abi yacno puduedsho, Bëdamboen mimbi nabanoc, Nuquin Papan mibi caindac. <sup>12</sup> Aden nabanec chieshenquiocquin Nuquin Papan chiaid tantiaquioquin tsusedpabomba caimbudec unësash Nuquin Papa yacno puduedampicpadec Esuquidistu tantiaquioquin ënenquiocquin caimbudequi ma Nuquin Papa yacno puduedpanuna.

### *Naden nanu quec Nuquin Papa muatiapimbo iquec*

<sup>13</sup> Eëdenquimboshë Abadauan bëdamboec tabadsho isun ambia tantiaquidquio abi yampidquiobidi icquin, Eëmbibi tantiacpadomboen nanuna. Abimbo caimbi, quequin Nuquin Papan naden chuipampic: <sup>14</sup> “Mimbi tishmiaidën tsyuecquido dadpen iquendac, qeshun ëmbi chiacpadomboen nabanquin mibi, Bëdambo iquebi, camembi,” quequin Nuquin Papan

Abadauan chuipampic. <sup>15</sup> Aden chuisho tantiashun caimbudquin tishti-  
apimbocquidëmbi Abadauanën chidon aton mado tishpampic.

<sup>16</sup> Abimbo caimbi, quequin abitedi tantiaquidënquoio Nuquin Papan chiac  
utsi, Muenec, quetiapimbo iquendac. <sup>17</sup> Adembidi, Èbi yacno tabadte  
iquendac, quequin ënden yampidën Nuquin Papan chiaid chuca uatiapimbo  
iquebi, quequin Esuquidistu tantiaquido tantiamenuen abimbo caimbi,  
quequin chuipanëdash. <sup>18</sup> Adec Nuquin Papa muatiapimbo icquin ambi chi-  
acpadomboen naquidquoio Nuquin Papa nec. Adembidi, Èbi yacno tabadte  
iquec, quequin chiaid chuca uatiapimbo iquec. Adquid Nuquin Papa ic-  
nuc abi yacno ëbi puduedmequid Esus iquec, quequin caimbudquid nuqui  
nendac. <sup>19</sup> Aden caimbudquin, Ènden Nuquin Papa yacno puduedshun ëbi  
yuedquid iquec, quequin nuqui tantiec. <sup>20</sup> Nuqui caintequid Esuquidistu  
ënden Nuquin Papa yacno bëyucanec abi tantiaquido chuibanec Nuquin  
Papabëd onquenuec puduedash Medquisedecpadquid yampanëdash.

## 7

### *Medquisedec matses chuibanec Nuquin Papabëd onquequid dapa*

<sup>1</sup> Medquisedec nad icpampic, Saden yacnocquido chuiquid dapa  
nepampic. Ambi Saden cain cuënaidi yuecshun Edusaden cain cuënoapampic.  
Aidbidi Nuquin Papan, Matses chuibanec ëbëd onquequid dapa icta, caid  
nepampic. Adquid icquin aton mado bedboedo tsibanshun cuesuniash  
Abadauan chosho bëquedshun, Nuquin Papan bëdamboen isaidquoio mibi  
nec, quequin Medquisedequën Abadauan chuipampic. <sup>2</sup> Adsho tantiash,  
Nuquin Papan con mado bedmiaid nebi, quequin ambi cuesuneboedën na  
ambi bedboed musuctanquin abi chuibanec Nuquin Papa chiec onquequid  
dapa Medquisedec Abadauanën menepampic. Bëdamboen tabadmequid  
icsho Medquisedec cuëmpampic. Adembidi, Saden yacnocquido chuiquid  
dapa icquin bëdamboen tabadmequid icsho Medquisedec cuëmpampic. <sup>3</sup> Aidi  
aton papabëd aton tita nibëdquid nec. Nëid ushën tishaid nebi, quetiapimbo  
aid iquec. Abi unëste ushë adquiobidi iquec. Nuquin Papan Madombo  
aben icquidpadquid Medquisedec nec. Matses chuibanec Nuquin Papabëd  
onquequid dapa yanash adquiduidquoio iquec. Utsi yantiapimbo iquec.

<sup>4</sup> Aidi ëbi chuibanec Nuquin Papabëd onquequid dapa nec, quequin  
ismequin ambi bedaid aton na musuctanquin Abadauanën Medquisedec  
menepampic. <sup>5</sup> Yuecquiocshon Nuquin Papan: Min matses chuibanec  
ëbëd onquequid dapa icta, caid mibi icquin min utsibon aton na  
musucaid bedshunta, quequin Debi chuipampic. Adoac adquid Debi icash  
unësan aton tsyuecquid abentse-abentsec icpampic. Debi Abadauanën  
tsyuecquid yec aton utsibonquoio aton na musucaid bedquid icpampic.  
<sup>6</sup> Medquisedequëmbien tsyuecquidpenquoio icquimbi Debin tsusedpa  
Abadauanën na musucaid bedshun, Nuquin Papan bëdamboen isaidquoio  
mibi nec, quequin Abadauan chuipampic. <sup>7</sup> Bëdambo mibi icmenu, quequin  
Nuquin Papan chiaid ambia chuiquid Medquisedec icpampic. <sup>8</sup> Yuecshun  
ambia chuibanec Nuquin Papabëd onquequid dapapadquiocquin  
aton matsesën na musucaid bedquid Debi unëspampic. Adecbidi aton  
tsyuecquido unëspampic. Padnuen Abadauanën na musucaid bedquid  
Medquisedec unësesa yampampic. <sup>9</sup> Adquid icsho Debin buchisio Abadauan  
caidën, Con tsyuecquid dadpen iquendac, quequin tantiaquin, Con  
na musucshun menenu, qeshun Medquisedec menepampic. <sup>10</sup> Aton  
tsyuecquid tishambocnobi Debin buchisio Abadauan caidën Medquisedec  
bëqueduidshun menepampic.

*Medquisedec yampidpadquid Esuquidistu*

<sup>11</sup> Abadauanën tsyuecquido Debipadquidon Nuquin Papan nadomboen nata quequin chiaid nadenequin aton matses bédambocquid icmian Medquisedecpadquid choenquio ictsempampic. <sup>12</sup> Debipadquidon aden nadeneshun aton matses icsaisa icmetiapimbo ican Medquisedecpadquid matses chuibanec Nuquin Papabéd onquequid dapa yampanédash. Debipadquidën Nuquin Papan nadomboen nata cain ëndenquimbo chiaid nadenepampic. Nèbi Nuquin Papan chiaid utsi naquid Medquisedecpadquid Esuquidistu nec. <sup>13</sup> Aidpadquid icquin Nuquin Papa nidaidën tabadte shubu uashunaidën puduedshun nambocpanédash. <sup>14</sup> Aton tita Uda cuëmédquidën tsyuecquid icnuc matsesash Udan tsyuecquid Nuquin Icbo Esuquidistu nec. Adquid icquin Debipadquidën nadeniampicpaden natiapimbo Esuquidistu icpanédash. Adembidi ambi tantiaiduidi chiec Moises, Udan tsyuecquid Debipadquid nec, quenquio icpampic. <sup>15</sup> Medquisedecpadquid matses chuibanec Nuquin Papabéd onquequid dapa Esuquidistu yanan nadomboen nata quequin chiaid utsi iquendac, quequin nuqui tantiec. <sup>16</sup> Aton matses chuibanec Nuquin Papabéd onquequid Debi unësan Debin tsyuecquid aton matses chuibanec Nuquin Papabéd onquequid icpampic. Adquidpenquio Esuquidistu yampanédash. Matsesash icsaisa yec unësash uincuempanédash. Adec uincuenquid yec unëstiapimbo iquec matses chuibanec Nuquin Papabéd onquequid dapa yanquiopanédash. <sup>17</sup> Aid chuiquin Nuquin Papan nadopampic:

“Ënenquiocquin matses chuibanec Nuquin Papabéd onquequid dapa Medquisedecpadquid mibi nendac,”  
quequin chuipampic.

<sup>18</sup> Aden chiambien matses chuibanec Nuquin Papabéd onquequid dapa Debipadquidon Nuquin Papa nidaidën tabadte shubu uashunaidën puduedshun ënden nadomboen nata cain chiapadomboen nadenequin aton matses icsaisa icmetiapimbo icpampic. <sup>19</sup> Adoaid Nuquin Papa yacno puduedtemaid matses icpampic. Nèbien bëyucanec puduedash Nuquin Papa yacno abi tantiaquido chuibanec Nuquin Papabéd onquec tabadec, quequin abi yacno yuedte caimbudec nidaidën Nuquin Papabéd tabadac bimboec nuqui tabadec.

<sup>20</sup> Abimbo caimbi. ¿Matses chuibanec Nuquin Papabéd onquenu quec puduedquid ënëdenquiocnoc mibi icmendambi, Mado, quenquioda Nuquin Papa icpampic? Ai, aden chuipampic. Aden Debi chienquiocquin aton madouidtsëqui chuipampic. Debi unësan aton tsyuecquid aton matses chuibanec Nuquin Papabéd onquequid dapa icpampic. <sup>21</sup> Nèbi Nuquin Papan aton Madombo caic:

“Icbo icquin matses chuibanec ëbi chiec puduedoata, mado, quequin abimbo chiembi.

Aden chuiquin chuca uainquio iquembi.

Ëndenquio yampid yec ëbi yacno utsi puduedmenush ëbi chiec puduedash ënëdenquio yec tabadquid mibi nec, quequin abimbo chiembi,”

quequin chiampicpadec aton Madombo adquid yanquiopanédash. <sup>22</sup> Adquid yec matses icsaid bedshunash abided cuidadash abi tantiaquido yuedec bëyucanquid Esuquidistu nec. Debibéd aton tsyuecquid adecbidi adquid ictiapimbo iquec.

<sup>23</sup> Debi adecbidi aton tsyuecquido unëstequidquio iquec yuen chuibanec Nuquin Papabéd onquequid dapa ictiapimbo iquec. <sup>24</sup> Esusien abi yacno chuibanec bëyucanec puduedash ënëdenquio yec Nuquin Papabéd onquequid



dapa nendac. Adquid utsi nibēdendac. <sup>25</sup> Adec Nuquin Papa yacno ēnēdenquio yec tabadquin abi tantiaquido chuibanec aton Papabēd onquedenenuc abi tantiaquido Nuquin Papa yacno ambi yuedtequid iquec abipadquid icsaisa yec tabadendac.

<sup>26</sup> Adec aidi abi yacno yuedanquid, icsa nibēdquid, icsa uatiapimbocquid, icsa nibēdquiec yacno tabadquid yec abi tantiaquido chuibanec Nuquin Papabēd onquequid dapa yampanēdash. <sup>27</sup> Debipadquidpenquio yec, Matses icsaquid neque. Nuquin Papan chiampicpaden baded-badedquien nidaidēn capuquid yua cuesunenu, quenquio icpanēdash Esuquidistu. Matses icsaid bedshunash abided unēsapanēdash padpidec unēsenquio icnush. <sup>28</sup> Debibēdi abipadquid icsaquid icsho, Min matses chuibanec Nuquin Papabēd onquequid dapa aid icmeta, Nuquin Papan cac Moisesēn Debi adquid icmepampic. Nēbi Medquisedecpadquidien Bēdambocquid icpampid ēbēd onquec ēbi yacno Puduedquid Abentsēcquiobi mibi iquendac. Abimbo caimbi, quequin Nuquin Papan chiampidquio Esuquidistu nendac.

## 8

### *Matses chuibanec Nuquin Papabēd onquec abi yacno puduedquid*

<sup>1-2</sup> Adec Esuquidistu abi tantiaquido chuibanec Nuquin Papabēd onquequid dapa Nuquin Papa tabadacnombobi puduedoash aton Papa Abiambo Yampidbēdquio onquec tabadec. Debipadquidoen aton matses chuibanec nidaidēnshun Nuquin Papa tabadte shubu uashunaidēn puduedash auēshquio Nuquin Papabēd onquepanēdash.

<sup>3</sup> Con matsesbēdi icsaposh icmanendac, queshun aid shubun puduednu queshun umanucshun nidaidēn capuquid yua aidon cuesunepampic. Adem-bidi Nuquin Papa tantiaquin menenuequin aton matsesēn bē-bēaid bedshun nadenepampic. Esusien Nuquin Papa yacno puduedoanush, Ēbi icsaid ēbibi cuidadnu, quenquio yec matses icsaid bedshunash abided cuidadpanēdash. <sup>4</sup> Aidi unēsabi yec nidaidēn tabadnuc Moisesēn chiacpadec Debipadquid matses chuibanec Nuquin Papa chiec onquequid icpanēdash. Adquid icnuc nidaidēnuēsh matses chuibanec Nuquin Papabēd onquequid dapa ictiapimbo Esuquidistu icpanēdash. <sup>5</sup> Nidaidēn tabadquin Nuquin Papa tabadte shubu uashunaidēn puduedshun Debipadquidēn nashumpampic. Ēndenquimbo Nuquin Papan shubu naden icchitec, quequin abi tabadte shubu uanu, qesho tantiashun: “Macuēsh yacnoshon chuibocpadomboen shubu uame,” Nuquin Papan cac Moisesēn chuioapampic. Aden chiac Nuquin Papa tabadte shubu uashumpampic. <sup>6</sup> Adnubien yuecash Nuquin Papa tabadacnombo aton Madombo abi tantiaquido chuibanec Nuquin Papabēd onquec puduedpanēdash. Aidi abi tantiaquido yuedquid nec. Aid ambo puduedabicnuc ambi naden nata cain chiaid Nuquin Papan Moises meniampicpadomboen naquin aton matses chuibanec Debipadquid Nuquin Papabēd onquec abi yacnombo yuedanquid ictiapimbo icpampic. Esuquidistuen Nuquin Papabēd abia yampid bēyucanec abi yacnombo nidoash abi tantiaquido chuibanec Nuquin Papabēd onquequid yec yuedanquidquio nec.

<sup>7</sup> Ēndenquimbo nadomboen nata cain chiacpadomboen nadenequi matses icsaisa yanuc naden nata cain chiaid utsi Nuquin Papan chienquio ictsempanēdash. <sup>8</sup> Nadomboen nata caqui ambi chiacpadomboen nadenequi matses icsaisa yantiapimbo icsho isash:

“Yuecash ěmbi chiaid utsi iquendac.

Aid isadaidbo chiendambi. Aidbidi Udan tsyuecquido chiendambi.

<sup>9</sup> Aidën tsusedpabo Equipito yacnoshon bëyucamequin  
ëmbi chiacpadpenquiocnoc chiaid utsi iquendac.

Ëmbi abia naden nata cain chiaid Isadaidbon chieshënsho  
utsibon natiacquin mëyansho isun isadaidbo mënchicamboccondambi.

<sup>10</sup> Ënden chiaid adquoio icnuc:

Nëbi ëbëd tabadmetequid chiaid nendac, quequin isadaidbo chiembi.

Ëmbi nadomboen nata cain chiaid isadaidbo pausunendambi tantiate bun-  
quionoc.

Aden tantiamiash aton Papa iquendabi.

Adecbidi adquidquoio con matses iquendac.

<sup>11</sup> Adoaid Nuquin Papa tantiaquid icta, quesa iquendac.

Abitedi ëbi tantiaquidquoio iquendac.

Nëidtedishun ëbi tantierendac:

Nëidic, bacuëbo; nëidic, caniabo; nëidic, tsusiobo aidtedshun.

<sup>12</sup> Aido icsaidtedi padpiden tantienquoio yec bëpiscudendabi,”

quequin Nuquin Papan chiaid utsi nendac. <sup>13</sup> Chiaid utsi nec, quequin ënden  
abia nadomboen nata cain chiaid ënëndendac.

## 9

### *Nuquin Papa tabadte shubu uashunaidën puduedshun naid*

<sup>1</sup> Nuquin Papan ambi, Ëbi ismequin nadomboen nata cain chiaid dadpen  
dada uameshun isadaidbo menepampic. Nuquin Papan naden ëbi tabadte  
shubu uashun cacpadomboen abi nidaidën tabadte shubu uashumpampic.

<sup>2</sup> Nuquin Papa tabadte shubu uashunaid nitsinaid anquënë uaid daëd ic-  
pampic. Baded-badedquieq puduedte anquënë uaidën tabote dectantebëd  
pan sante cuate nacnenaid icpampic. Icsaisa anquënë uaid nec caid niosh.

<sup>3</sup> Aid nuntambidi bitsipambocquid daëdcashun dectanëdaid shëcuë anquënë  
uaid dayun uequid Isaisa Bëdaidquoio cain chianiaidquoio niosh. <sup>4</sup> Aid nuntan  
bëdambo noadquid sandoshon tauite shocosh icpampic. Ambobidi cuate  
dabitacaid shocosh icpampic. Aid cuesten sauedaid mana caid isadaidbon  
piampid dayun uaid icpampic. Aid sauedaid utsi Adonën cuate tiaid  
dëyucaid icoapampic. Aid sauedaid utsi cuënote pada uashun Nuquin Papan  
nadomboen nata quequin dada uaid icpampic. <sup>5</sup> Aid sauedte matincash  
tabadquid ambi abi yacnoshon uaid mayan bëdamboquidbimboecnuc nacne-  
naid daëd icpampic. Aid daëd Nuquin Papa icsaisambo bëchomauanquieq  
nac-nacquio ismiantequid icpampic. Nidaidën capuquid cuesuniaidën intac  
daseccaid isun Nuquin Papan matses cuidenquioctsiash, quequin aidën  
podon dëcatequin dectanaid diadpampic. Aid Icsaisa Bëdaidquoio anquënë uaid  
sanaittedi chiombi.

<sup>6</sup> Aden shubu uashun aidën icquidtedi nambanash icsaisa anquënë uaidën  
baded-badedquieq puduedquidon Nuquin Papan Moises chiacpadomboen  
uesquin nabampampic. <sup>7</sup> Padnuen Isaisa Bëdaidquoio anquënë uaidën setan-  
setanquieq matses chuibanec Nuquin Papabëd onquequid dapa pudued-  
pampic. Baded-badedquieq puduedtemaid aid nec. Ëmbi con mat-  
sesbëdtan Nuquin Papan chiaid niacpash icmanendac, quequin nidaidën  
capuquid yua cuesuneshun intac bedshun buanec nuntan bitsipambocnoc  
daëdcashun dectanëdaid shëcuë anquënë uaid dayun uequid Icsaisa Bëdaidquoio  
caidën puduedquid abentsëqui nepanëdash. Unësaidën intac buanenquoio  
yec puduedtemaid aid anquënë uaid nec. <sup>8</sup> Adec aid anquënë uaidën  
puduedquid isadaidbo abentsëqui icnubi Nuquin Papa yacno aton matses  
puduedte nibëdec, quequin Nuquin Papan Mayanën tantiamete nendac.

<sup>9</sup> Adembidi, baded-badedquien nidaidën capuquid yua cunesunedenec, Ëbibi bédambocquid nec, quetiapimbo icpampic. Adembidi aton matses icsaisa icmetiapimbo icoapampic. <sup>10</sup> Adecbidi, Nëidic petequid nec. Nëidic actequid nec. Nëid nanush mëpamëdtequid nec, quequin chiacpadomboen nabanquin icsaisa icmetemaidbidi nendac. quequin Nuquin Papan Mayanën nuqui tantiamec.

*Esuquidistu abided unësec intac chiuidaid*

<sup>11</sup> Ambi chiaid utsi tantiamenuec ambi uacmaid yec abipadquid Esuquidistu Nuquin Papabëd tabadboedi nidaidën budash matsesash icsaisa yec matses icsaid bedshunash abided cuidadec unësash Nuquin Papa yacno matses chuibanec aton Papabëd onquequin chuiquid dapa iquec abi yacno Yuedanquid yampanëdash. <sup>12</sup> Nidaidën capuquid yua cunesuneshun intac bedshun buanec Nuquin Papa yacno puduedenquio Esuquidistu icpanëdash. Aidi abia yampidi icsaisa matses icsaid bedshunash abided cuidadec unësacsho cudan siac aton intac chiuidash Nuquin Papa yacnombo puduedoapanëdash. <sup>13</sup> Aidi matses icsaid bedshunash abided cuidadabicnuc nidaidënshun natemaid nasho matses cuëshëdmepanëdash. Adoac utsibëd ictiapimbocsho isun nidaidën capuquid yua cunesuneshun aidën intacbëdta sisapuc daëd uashun daseccac icsaisa icmiabi yequi aton shubun puduedoapanëdash. <sup>14</sup> Abia abëd yampid unësesa aton Mayambëd iquec Esuquidistu icsaisambo yec, Matses icsaid bedshunash ëbided cuidadebi, Papa, quianec unësacsho siac aton intac chiuidacsho isun uincuemaidën nuqui pauquec ma Nuquin Papan chiacpadomboen nate bunquidquio nuqui icpanueshun. <sup>15</sup> Adoaidi Nuquin Papan chiaid utsi chuiquin tantiamequid Esuquidistu icpanëdash. Ënden matses yampid icsaidbëdtabi nëbi matses icsaid bedshunash abided cuidadec unëspanëdash ëbi tantiaquido ëbëdi tabadmenu quiash.

<sup>16</sup> Adnubien abi unëste tantiec, Ëbi unësan ëmbi chiacpadomboen con na abitedi menebanta, matses quepec. Aden chuiquid unëso isun ambi chiacpadomboen menebanec. <sup>17</sup> Aden chuiquid unësabi icnuc ambi chiacpadomboen utsibon menetiapimbo iquec. Icbon na abi iquec. Aid unësan aidën na icboedi utsin na yanec. <sup>18</sup> Adembidi ambi nadomboen nata cain chiaid Moises menequin, Ëmbi chiaidtedi nadenesho isun ëmbi chiacnombo mibi buanemi, quequin Nuquin Papan chuipampic. Aden menequin chiac Moisesën nadopampic. <sup>19</sup> Nuquin Papan chuibocpaden chuishun nidaidën capuquid yua cunesuneshun intac bedshun actebëdta daëd uain cacushun cuëte shubi madquënaid podo mësequiabicquid bedshun sedquid piu uaid potaneshun daëd uaboed nënaneshun Nuquin Papan chiaid dada uaidbëdta matses daseccabampampic: <sup>20</sup> “Nëid Nuquin Papan chuibocpaden mimbi natequidquio nec,” quequin ismequin Moisesëmba abitedi daseccabampampic. <sup>21</sup> Adoshombic Nuquin Papa tabadte shubu uashunaidbëdta aidën tabëcaidtedi daseccabampampic. <sup>22</sup> Cuesunaidën intac daseccatequid nec. Shubu chedo cuesunaidën intaquën daseccabicquid mishtemaid nec. Adecbidi cuesunaidën intac chiuidenquiocnoc matses icsaid Nuquin Papa bëpiscudenquio iquendac.

<sup>23</sup> Nuquin Papa yacnombo puduednush icsaisa unësendac, quequin ismenuen matses chuibanec Nuquin Papabëd onquec nidaidën capuquid yua cunesuneshun intac bedshun buanec Nuquin Papa nidaidën tabadte shubu uashunaidën puduedpampic. <sup>24</sup> Esuquidistu matses icsaid bedshunash abided cuidadec unësash nidaidënshun Nuquin Papa tabadtebimboecnuc shubu uashunaid yacno puduedenquio icpanëdash. Abi tabadacnombo abi tantiaquido chuibanec aton Papabëd onquec puduedash abi tabadec.

<sup>25</sup> Ambo puduedash, Matses icsaid bedshunash ëbided padpidec cuidadnu, quenquo yec tabadec. Nidaidënshun setan-setanquien Nuquin Papa tabadte shubu uashunaidën puduedquin aton intacpenquo bedshun daseccadenec. <sup>26</sup> Matses icsaid bedshunash abided ciudadec unësambo yec Nuquin Papa yacno puduedoash padpidec nidaid yacno choash unësash abuc Esuquidistu puduedoatsiandac. Adenquo iquec matsesash abi unëste ushënquiobi matses icsaid bedshunash abided ciudadpanëdash nëid nidaid naimëdbudte anoentsëqui icnuc. <sup>27</sup> Nidaidën icquid unëste ushë abentsëc iquec. Unësacsho ambi naid Nuquin Papan chuitequid ushë choendac. <sup>28</sup> Adecbidi matses icsaid bedshunash abided ciudadec Esus unëste ushë abentsëc icpanëdash. Matses icsaid bedshunash cuidadoanu, quenquo yec aidquo padpidemboec choendac. Abi cainquido abi yacno puduedmenuec choindac.

## 10

### *Abided ciudadec unëste abentsëquënquiobi*

<sup>1</sup> Setan-setanquien nidaidën capuquid yua cunesuneshun intac bedshun buanec puduedsho isun matses icsaid bedshunash abided unësash abi tantiaquido chuinec bëyucanec Nuquin Papa yacnoësh yuedanquidquo choec, quequin nuquin tsusedpabon tantiabempampic. Nidaidën capuquid yua cunesuneshun intac buanquid aton matses icsaisa icmetiapimbo yec Nuquin Papa yacnombo abëd onquetiapimbo icpanëdash. <sup>2</sup> Aidënquo daseccaquin matses icsaisa icmiac nidaidën capuquid yua padpiden cunesunquo ictsempampic. Adecbidi, Icsambocquid nebi, quenquo matses ictsiandac. <sup>3</sup> Aton matses isaisa icmetiapimbocquin setan-setanquien nidaidën capuquid yuaded cunesunepanëdash. <sup>4</sup> Adshun yuan intac bedshun daseccaidën matses icsaisa icmetiapimbo iquec.

<sup>5</sup> Adoquien Esuquidistu nidaidënshun tishac canish onquec:

“Nidaidën capuquid yua cunesunenubi ëmbi chiacpadomboen matsesën natiapimbo iquec qeshun yua cunesunete bunenquo mibi iquec, Papa. Matsesën tishtequid mimbi icmiqidquo nebi, Papa.

<sup>6</sup> Adecbidi nidaidën capuquid abichobi tauideniac matses abi icsambo iquec, quiash, Padi. Adoenda, mibi quec, Papa.

<sup>7</sup> Adsho isun mimbi chuiquin dada uamiampicpadomboen naimbi, Papa.”

<sup>8</sup> Mimbi dada uamiampicpadomboen matses chuiquidën nabanquimbi aton matsesbëd bëdamboec tabadenquiocsho isash, Padi. Aid nainquiocquin ënta, quequin mimbi matses chuinec <sup>9</sup> mimbi ënden nadomboen nata cain chiaid naimbi, Papa, quiash matses icsaid bedshunash abided ciudadec unësun Nuquin Papan ënden chiaid ëmepanëdash. Aden ëmian nëbi Nuquin Papan chiaid utsi iquec. <sup>10</sup> Aden Nuquin Papa bunacpadomboen nash unëstiapimbo yanshun abi unëste ushënquo abi tantiaquid paucpanëdash.

<sup>11</sup> Aden matses icsaid paucpec, quetiapimbocnoc badiadquiën-badiadquidënquien nidaidën capuquid yua cunesuneshun intac bedshun daseccaquin icbo icsaidbëdta utsibo icsaid pauctiapimbo iquendac.

<sup>12</sup> Esuquidistuen abided unësash abi tantiaquido icsaid pauctequid abentsëquiobi iquec aton Papabëdi ënëdtiapimbo yec abitedishun icbombo iquec. <sup>13</sup> Ambobi tabadquimbi abi chieshënquido ambi chiacpadomboen naquidquo icmete ushë cainec. <sup>14</sup> Abided unëste ushënquo abi tantiaquid ambi icsaisa icmiad abëd cuëshëdesambo yampanëdash.

<sup>15</sup> Adembidi Nuquin Papan Mayanën Nuquin Papan chiaid utsi naden chiec:

<sup>16</sup> “Nëbi ëbëd tabadmenun chiaid utsi nendac, quequin chiendambi.

Aidi aton pabiaten puduedmendambi paucudenquiocnoc.

Adembidi ěmbi chiacpadomboen nate bunquidquio icmendambi, quec  
Icbo.”

<sup>17</sup> Adshumbic Nuquin Papan chiaid utsi abi chiec aton Mayan:

“Abi icsaidtedi padpiden tantianu quenquio yec bĕpiscudendabi, queoaic  
Icbo,”

quequin chuipanĕdash aton Mayanĕn. <sup>18</sup> Adec abi icsaid bĕpiscudash nidaidĕn  
capuquid yua cuesuneta quenquio Nuquin Papa iquec.

### *Nuquin Papa yacno puduedte cainta*

<sup>19</sup> Adoaidi Esuquidistu unĕsacsho isun cudan siac aton intac chiuidan,  
Ambi paucaid nebi, quec dacuĕdenquio yec Nuquin Papan shubu icsaisa  
caid yacnombo puduedte ushĕ nuqui cainendac. <sup>20</sup> Matsesash abided  
cuidadec unĕsash Nuquin Papa yacno puduedoash tabadquid Esuquidistu  
nec. <sup>21</sup> Ambo nidash Nuquin Papabĕd onquequin aton shubun icquido nuqui  
Esuquidistun chuibanubi, <sup>22</sup> Ambi paucaid ambi dapanachimboecquidbidi  
nebi, quequin tantiaquin abi yacno choacximboen nidaidĕnshun Nuquin  
Papa chiec onquec tabadnuna. <sup>23</sup> Nuquin Papa ambi chiacpadomboen  
naquidquio nec, quequin abi tantiaquid yec abi yacno puduedebi, quequin  
caimbudnuna. <sup>24</sup> Aden tantiaquin abi tantiaquid utsibobĕd tantiananec  
bĕdamboec tabadquin nashununa. <sup>25</sup> Aden nabanec abi tantiaquid utsi-  
bobĕd iccuededtiapimbo iquebi, utsi-utsiec quiacpadec adenquio icnuna.  
Adec iccuededec, Nuquin Papan chiacpadquiec bĕdamboec tabadnuna, quec  
chuinanta. Niacquid dadpen icsho isash, Matsesĕn naid chuibanquin cuidte  
ushĕ badedquio choec, quiash baded-badedquiec chuinenta bĕdamboec  
tabadte bunec.

<sup>26</sup> Ĕbi icsaid bedshunash abided cuidadec Esuquidistu unĕspanĕdash, que-  
quin tantiash icsaded-icsadedquid iquec, Adquidquio Esus nec, quetiapimbo  
iquec. <sup>27</sup> Aid cuidte ushĕ chonoc nĕishun comapenen chushcaindac Nuquin  
Papan abi chieshĕnquido nibĕdamequin. <sup>28</sup> Nadomboen nata cain Moisesĕn  
chiaid niacsho isun daĕdshun chiac niacquid unĕsmiampic. <sup>29</sup> Nuquin Papan  
abia naden nata cain chiaid niactenequid adomboen cuidnushe quiash ĕbi  
icsaid bedshunash abided cuidadec Esuquidistu unĕspanĕdash, queboedi,  
Ĕmbi tantiaboed Nuquin Papan Madopenquio matsesquio ĕbipadquid ic-  
sacsho cuesuniac, quequin chieshĕnsho ĕcomapenen Nuquin Papan cuiden-  
quioda icpadic? Adquid Nuquin Papan Mayanĕn bĕdambocquid icmenu  
quequin chiaid chieshĕnquid nec. <sup>30</sup> Nuquin Papan: “Ĕmbimbo ĕmbi chiaid  
chieshĕnquid cuidendambi,” quequin chiaid nec, quequin nuqui tantiec.  
Adembidi: “Abi tantiaquid icboedĕmbi tantienquio yansho cuidquidquio  
Nuquin Icbo iquendac. <sup>31</sup> Abi cuidantequid dacuĕdampambo iquec,” quequin  
Nuquin Papan chiaid nec.

<sup>32</sup> Esuquidistu tantiaquid yanash mibi bĕdamboec tabadondacpaden  
tantiamec chuinenteneta. Esuquidistu tantiabenacchuca icsho  
chieshĕmĕnquidon mĕyanaqui, Esuquidistu tantiaquid nebi, quec dayacquio  
yec bĕdamboec mibi tabadteniondac. <sup>33</sup> Dadpen tabadnubi, ĕmbi  
tantiaid Esus nec, qesho mibi utsibon mamĕnshunondash. Adembidi  
aidon natiambocquin mĕyanac. Adomboembidi Esuquidistu tantiaquid  
utsi mĕyansho isun, Aidbĕd icquid nebi, quequin ismequin mimbi  
nashundenepondac. <sup>34</sup> Esuquidistu tantiaquid utsi quĕnĕn nauedaic  
icsho isash abĕdi tabadachimboec natiambianquiec unĕsquio yec mibi  
tabadpondac. Adecbidi mibi chieshĕnquidĕn mitsana bedacsho isash Nuquin

Papan ëbi menetequid ampetiapimbo iquec, quequin tantiec, Bëdambo iquebi, quec mibi tabadpondac.

<sup>35</sup> Adoaidi Nuquin Papan bacuë yec bëdambo iquebi, quiash dacuëdenquio yec bëdamboen nabanec mibi ënden dayacquio iccondacpadquiec adquiecbidi tabadteneta. Adquid Nuquin Papa yacno puduedquid nendac.

<sup>36</sup> Utsin mëyanaqui Nuquin Papan chiaid chieshenquiocquin tantiadeneta. Adec tabadquin Nuquin Papa bunacpadomboen nabanash abi yacno tabadendac. <sup>37</sup> Nuquin Papan chiaid nadquio iquec:

“Chiata. Nëbien mimbi cainaid mibi mënchictequid choendac.

<sup>38</sup> Adsho tantiec ambi pauctequid abi cainec tabadec nec.

Abi cainuidquido ambi puduedmetemaid nec.

Adquid, Cho, catiapimbo iquebi,”

quec Nuquin Papa. <sup>39</sup> Aid cainuidash utsi tabadnubi abi choate nuqui cainec. Abi cainesa abi yacno puduedmenquiocquin Nuquin Papan chian anëdënquequid nësiatequid nendac. Nuquien abi cainquid yec Nuquin Papa yacno puduedtequid nec.

## 11

### *Nad iquendac, quequin tantiaquin cainquid*

<sup>1</sup> Esuquidistu tantiaquidtedi con shubun icquido nec, quequin Nuquin Papan chiaid tantiaquin abi yacno tabadendabi, quequin abëd icte ushë nuqui cainendac. Aden cainquin, Con icbo ëmbi isacmaid nec, quequin aid isbenacimboen ëmbi tantiaid nec, quec tabadquidquio nebi. <sup>2</sup> Adembidi tantiec tsusedpabo tabadsho isun, Bëdamboen mimbi tantiec, capampic Nuquin Papan aido chuiquin.

<sup>3</sup> Adembidi Nuquin Papan: “Abubëdi nidaid yanquiota,” cashumbic: “Aidënquiocquidtedi yanquiota,” cac ambi tantiacpadquiequi yampampic, quequin nuqui tantiec. Aden tantiec ëmbi nëbi isaidtedi nibëdnuc ¿mitsipadomboentsi aidtedi icmebampampiba? quenquio nuqui iquec. Nuquin Papan: “Yanquiota,” quequin tantiacpadquiequi abitedimbo yampampic.

<sup>4</sup> Adembidi, Mibi tantiaquin mibi bunacpadomboen nidaidën capuquid con yua cuesuneshun tauinu, quequin chuishun Abedën naid Nuquin Papan bëdamboen isaidquio icpampic. Aton utsin Cain caidën aden tantienquiocsho Nuquin Papan icsamboen isaid icpampic. Adosho isun Cainën aton utsimbo cunesuniambien Abedën Nuquin Papa tantiaquin naid chianetequidquio abi iquec.

<sup>5</sup> Adnubien adecbidi abi tantiaquidquio Enoc icsho isun Nuquin Papan buanac unësesa icpampic. Bëdambocquid nec, quequin Nuquin Papan buanacsho nibënquin Enoc istuidambocpampic. <sup>6</sup> Abi tantiesa icsho isashien, Èmbi bëdamboen isaidquio nec, quetiapimbo Nuquin Papa iquec, quequin tantiaid aid tantiaquid icsho, Abi yacno puduemetequid nebi, quequin tantiaquid ambi bëdamboen isaidquio nec.

<sup>7</sup> Adnubien adembidi Nuquin Papa tantiaquin Noe caidën, Nuquin Papan chiacpadomboen nanuna, queshun, Èbëd icquid unës uanushe queshun, Con utsibo Nuquin Papan chiaid tantiesa yec unëstequid iquendac, quequin tantiaquin Noen cano dapa nacnempampic. Abi tantiaquin aden nasho Nuquin Papan bëdamboen isaidquio aidquio icpampic.

<sup>8</sup> Adnubien adembidi, Nidaid utsi mibi menembique. Nidtan, Nuquin Papan cac abi capuacmanombo Abadauan nidpampic. <sup>9</sup> Adembidi Nuquin Papa tantiec abi capuacmanombo choash, Con nidaid iquendac,

quiash yuedacmaidbimboec quenenenquo yec daëdcaid shubumpi buan-buanequi aid nidaidën tabadpampic. Adecbidi aton mado Isactsen aid shububidi buanash tabadoapampic. Adecbidi Isaquën mado Acobotsen tabadoapampic. <sup>10</sup> Nuquin Papa yacno ambi tantiampicpadomboen shubu uaidën tabadendabi, quequin cainec quenenenquo yec nidaidën Abadauan tabatnenpampic.

<sup>11</sup> Adembidi Abadauanën Nuquin Papa tantiaquin aton chido Sada machobudash bacuë tishtiapimbocquid icnubi, Nuquin Papan chiacpadquiec con mado iquendac, quequin tantiacpadomboen Abadauanën chidon machobudquioshon aton mado tishpampic. <sup>12</sup> Adoac Abadauan tsusiobudaidënquo tsyuecquid dadpen uispatedi yampampic. Masitedbidi yanoapampic.

<sup>13</sup> Aden Nuquin Papan aid nidaid ëbi menendac, quequin tantiec chieshenquo yec Abadauan ambi isacmanombo choash, Con nidaid nendac, quequi Nuquin Papan meniabicnuc quenenash tabadenquo yec nidequi unëspampic. Adomboembidi tantiequi aton madobo unësbudnepampic. Adomboembidi tantiequi aton baba ado unësbudnepampic. Adomboembidi tantiequi aidon tsyuecquido unësbudnepampic. <sup>14</sup> Nuquin Papa tantiaquid yec Nuquin Papabëd tabadendabi, quiash nidaidën quenenenquo yec aidtedi tabadpampic. <sup>15</sup> Ëbi tishondacnombo tantiec unësquo iquebique. Ambo nidoaibi, quiash nidtsempampic. <sup>16</sup> Adenquo yec, Nuquin Papa yacno tabadendabi, qesho tantiaash, Con matses nec. Adecbidi aton Papa nebi, quequin chuishun abi yacno abëd tabadte shubu uapampic Nuquin Papan.

<sup>17-18</sup> Mimbi tishmiadën tsyuecquid dadpen iquendac, quequin Nuquin Papan chiaid abimbo iquec, quequin Abadauanën tantiaquiopampic. Aden tantiaasho isun, Ëmbi chiaid tantiaquidquioda Abadauan neque. Isnu, qeshun, Min mado abentsëc Isac caid cuesuneshun ëbi tantiaquin tauita, Nuquin Papan cac Nuquin Papan chiaid niacmane qeshun Abadauanën tauinuequin aton mado setsempampic. <sup>19</sup> Aden nanuequin, Nuquin Papan con mado uincuemendac, quequin tantiaquin aton mado setsenshumbic Nuquin Papan istuidmiad, obeca bënëded seshun tauipampic aton mado uincuen uaidbimboecquid icnuc.

<sup>20</sup> Adnubien adembidi Nuquin Papan chiaid tantiaquin Isaquën aton mado abi ushëmbi tishaid daëd Acobobëdta Esau Nuquin Papan ambi chiacpadomboen nanun bëdambo icmete chiaid chuioapampic.

<sup>21</sup> Adnubien adembidi Nuquin Papa tantiaquin tsusio budash unësbudquimbi aton cuate bedash shuebudshun, Nuquin Papa bëdambo iquec, quequin Nuquin Papan ambi chiacpadomboen nanun bëdambo icmete chiaid aton baba Osen bacuë daëd Acobon chuioapampic.

<sup>22</sup> Adnubien adembidi Osen Equipito yacno tabadec unësnun, Nuquin Papan nidaid menenun nabono, quequin chiaid tantiequi unësebique. Mibitedi: Aid nidaid yacno nidnu, qeshun con canite buanta, quequin chuioapampic Osen.

<sup>23</sup> Adnubien adembidi Nuquin Papan bëdambo icmiad con mado nec, quequin tantiaquin aton mado Moises tishun aton titan aton papabëdtambi ompopampic. Equipito yacnocquid ancanquidën: Isadaidbon chidon dada bacuë tisho cuesuneta, quequin chiaid niacquin dacuëdenquiocquin aton mado adopampic.

<sup>24</sup> Adnubien adembidi Nuquin Papa tantiec Moises caniacsho, Ancanquidën champin mado mibi nec, caqui chieshë nec, Aidën madopenquo nebi,

queoapampic. <sup>25</sup> Ancanquid Nuquin Papa tantiesa nec. Con matses isadaidboen Nuquin Papa tantiaquido nec. Adquid icscho aidobëdtabi ancanquidën mëyanaid iquendabi, quianec Moises cuëshëdpampic. <sup>26</sup> Yuecshun Nuquin Papa yacno yuedac bëdambo iquendabi, quequin tantiaquin Equipito yacnocquidon shubun yuedshun meniaid isuidec, Natiaic icsatiapimbo iquebi, quiash tabadquin Moisesën caimpampic. <sup>27</sup> Adembidi tantiaquin, Equipito yacnoësh ëbi nidsho isash nëishun ancanquidën con matses nidmenquio icpec, quenquio yec Nuquin Papa isacbimboec Moises tabadtenepampic. <sup>28</sup> Yuecash Equipito yacno choashun adembidi tantiaquin, Bëyuec tishaid unësmetequid ëmbi ëbi yacnoshon uaid mayan bëda ëmbi budmiaid min shubu datamenuen ëmbi chiacpadomboen nabanta, Nuquin Papan cac ambi chiacpadomboen naquidquio Moisesba icpampic. Ambi chiacpadomboen nabanquin nidaidën capuquid yua cunesuneshun shëcuë cuëmano abiuc daëdi abucbëdta intaquën ëcnoshcashun nami shuishun pan bidisquesabëdta pepampic. Adoacsho isun Nuquin Papan budmiaidën datampampic.

<sup>29</sup> Adnubien adembidi Nuquin Papa tantiec Equipito yacnoësh puduanec nidquin Acte Piu potec nidquid podqued nibëdboedi tanunquiocquidën uesadmiaidën isadaidbon potepampic. Aden isadaidbon potenubi abëdtambi potenuec abi chieshënquido Equipito yacnocquido actë chomiaidën mentoadbudnepampic.

<sup>30</sup> Adnubien adembidi Nuquin Papa tantiec ambi chiacpadec matses utsi dadpen tabadacno Edico caid dacuenadtanepampic. Siete yacno cuëscain tambanec dacuenadtanec shubu dadpen daquënë uain tsasi uaid sec uebudpampic.

<sup>31</sup> Adnubien adembidi Nuquin Papa tantiaquin Edico yacnocquido cunesunenun isquido isadaidbo chosho isun, Nuquin Papan matsesbo nec. Aido ëmbi yuedac ëbëd icquido cunesunenquiocpec, qeshun dadpen chudmequidën, Daba caidën, isadaidbo aton shubun yuedquin ompopampic. Adoac nidoash aton matses utsibobëd abia choquido choash Dababëd icquido cunesunianenquiocpampic Nuquin Papa tantienquio yec chiesho Daban matses utsibo cunesunequimbi.

<sup>32</sup> Adecbidi Nuquin Papa tantiaquid dadpen icpampic. Nëidic Edeon, utsibic Badac, utsibic Sanson, utsibic Ecte, utsibic Dabid, utsibic Samued, utsibic Nuquin Papan nadomboen nanun nabono quequin chiaid chuibanquidtedi adquidtedi icpampic. Utsi dadpenshun Nuquin Papan chiacpadomboen naïndac, quequin cainquido icpampic. Abitedi chuitiapimbo iquebi. <sup>33</sup> Aido utsin-utsinquien: Abi ancaidobëdtabi ancanquid Nuquin Papa tantiesa nec, qeshun cunesunepampic. Adembidi, Mibi bëdambo icmenu, quequin Nuquin Papan chiaid tantiaquin cainec adquidquio icpampic. Adquid icscho isun, Pemenu, qeshun bëdi nibëdquid deon caid tabadacno buanshun nebudpampic. Adosho isun piantiapimbo noc Nuquin Papan quiuëccac deonën penquiocpampic. <sup>34</sup> Utsin-utsinquien adembidi Nuquin Papa tantiaquid icscho, Nëdëncashun tauinu, cac taboadaidën pichiquenquiocquid icpampic. Adembidi tantiec utsi-utsiec chështen senuesho isun mënchicquin cuemepampic. Adembidi tantiequi dayacquioctiapimbochoedi dayacquiocquid icpampic. Adembidi Nuquin Papa tantiaquin matses utsibon sondado cunesnanuequid choacsho cuemepampic. <sup>35</sup> Adembidi utsin Nuquin Papa tantiaquin nianten bacuë unësboed uincuemetanquin ani menepampic. Adembidi tantiec tsadsho isun Nuquin Papa tantiesa nebi, camenuequin shoyombededtsëcquien cunesuniaqui, Nuquin Papan chiaid tantesa uainquio yec Nuquin Papa yacno nidebi, quiash unëspampic. <sup>36</sup> Utsi-utsien shocosh bucun mëtaneshun quënë nauedacsho isun mamënsnunquimbi cueshcanten



cuesaqui Nuquin Papabéd tabadte tantiec dacuēdenquoio yec tsadpampic. <sup>37</sup> Adembidi utsitsen cuēnoten seshunepampic. Adembidi utsitsen sēnten nacsēnshunepampic. Adembidi utsitsen nidaidēn capuquid bitsi nacnenaiddasiuidpampic. Aton na nibēdnubi mēyanaqui Nuquin Papa tantiaquidquoio yec aidtedi tabadpampic. <sup>38</sup> Nuquin Papa chieshēnquid ēbēd tabadtemaido nec, quequin tantiec adpampic. Adoac quenentiapimbo yec uano tabadnubien nidaid shēcuē uaidēn utsi tabadpampic.

<sup>39</sup> Aidtedishun, Ēbi yacno mibi chuibanec ēbēd onquequid bēyucanec yuedanquid iquendac, quequin Nuquin Papan chiaid tantiaquin cainec aidtedi unēsbudnepampic. <sup>40</sup> Aidtedi icnubi abi icsaid bedshunash abided cuidadec unēsash uincuenash abi yacno nidoash Yuedanquid Abentsēcquiobi Esuquidistu yanabi icpampic adboedēmbi ma nuqui nēbi icquidobēdta yuedpanuna.

## 12

### *Aton bacuē Nuquin Papan dayacmenuequin namiaid*

<sup>1</sup> Aden Nuquin Papa tantiec chieshesa dadpen icpampic, quequin dada uasho isun ēbi chieshtometequid utsi ēbi icsaidbēdtabi nainquiocquin ēnuna. Adembidi dayacquiocquin Nuquin Papan chiacpadomboen nabanec tabadnuna. <sup>2</sup> Esuquidistu, abitedishun icbombo abia yampidquoio ēbi chuibanec Nuquin Papabéd onquec bēyucanec abi yacno puduedash yuedanquid nec, quequin tantiaquin aid isacbimboen adonona. Aidi, Ēbi yacno matses yuednu, quiash aton Papabéd tabadteneboedi matsesash icsambocquidbimboecnuc cuستن dectanac chieshenquoio yec unēsacsho uincuen uaid yanash aton Papabēdi Icbombo iquec. Aidquoio tantiec isacbimboec nidaidēn nuquibi tabadnuna. <sup>3</sup> Abi chieshēnquidēn natiacquin mēyanaqui chieshenquiocquid Esuquidistu icpanēdash, quequin aid tantiec ma chieshtoenquoio icpanuna.

<sup>4</sup> Ēbi icsaid padpiden nainquoio icnu, queshumbi natiatequid icnuc mimbi ēnambo iccoc. <sup>5</sup> ¿Con bacuē cain Nuquin Papan mibi dayacquoio icmenuequin chiaid bēpiscudecta icco? Nad iqueque. Tantia: “Abuido, min Icbon dayacquoio icmenuequin chiaid cacuidenda. Adecbidi ambi natiamianquiopec camiaid icash chieshenda.

<sup>6</sup> Ambi matiamianquiopec camiaid dayacquoio icmenuequin nametequid con bacuēbo nec.” quequin Nuquin Papan chiampid nec.

<sup>7</sup> Natiatequid mibi dayacquoio icmetequid nendac. ¿Ēbi cudasaidquoio con mado dayacquoio icmenuequin namebanesa nebi, quecta aton papa icpadic? Padenquoio. Ambi: Con bacuē nec, caid natiatequid icnuc, Dayacquoio icmenu, quequin ancaquin chono uaic. <sup>8</sup> Natiatequid icnuc ambi dayacquoio icmenu quequin namiaidpenquoio yec, ambi, Con bacuē nec, caidpenquoio mibi nec. <sup>9</sup> Ēnden dayacquoio icmenu quequin mibi ancaquidēn mibi tishmequidēn chiacpadomboen natiatequid icnuc naquidquoio mibi icpondac. Nēbi Nuquin Papan dayacquoio icmenu quequin chiacpadomboen natiatequid icnuc naquidquoio icnuna abēdi tabadnuen. <sup>10</sup> Abi tishmequidēn ambibi tantiacpaden dayacquoio icmenu quequin aton bacuē yuen nametiapimbo iquec unēsendac. Padnuen Nuquin Papan abipadquid icsaisa icmenu quequin natiaquionoc nuqui namendac. <sup>11</sup> Adoac nuqui natiaquieci tabadec. Adoaidi yuecash nuqui bēdamboec tabadendac. Adecbidi natiatequid icnuc dacuēdēnesa nuqui yanec. Adecbidi Nuquin Papabéd icquid nebi, quequin tantiaquidquoio yec natiatequid dacuēdēnesa nuqui yanec.

<sup>12</sup> Aden tantiec dayacquio ictiapimbochoedi: Abipadquid iquendabi, quiash dayacquio yec tabadta. <sup>13</sup> Adenuidi naic tabadquin utsibo isme ma dayacquio ictiapimbocquin niaquec cuëshēdte bumboedi bēdambo yampuna.

<sup>14</sup> Aden naic tabadec utsibobēd bēdamboec tabadnu, quiash adec tabadta. Adecbidi Nuquin Papa icsaisa yacpadquiec nuquibi icnuna, quiash aid tantiec tabadec isnanec chuinanec adquid yanta. Adoesa Icbobēd tabadtiapimbocquid nendac. <sup>15</sup> Nuquin Papan bēdambo iquebi camiaid icboedi chiesho isun, Mimbi icsamboec tabadeque. Mibi icsamboec tabadquin ismiac utsibo icsabudtsiashe. Bēdamboec tabad, quequin chuiban. <sup>16</sup> ¿Ada aton chidopenquo chudquid icpec? Adecbidi, ¿Ada adembidi aton bēnēpenquo chudmequid icpec? quequin isnuequin adquid istuidshun Nuquin Papan chiaid chuiquin bēdamboen tabadmeta. Adembidi, Esaupadquid icnushe queshun ¿ada Nuquin Papan bēdamboen tantiaid chieshēnquin isuidquid icpec? queshun Nuquin Papan chiaid chuiban. Natia bundoshon aton utsi Acobon codocaid isun bednun Esaun: Unēsnnun tsusio icquin con pan bēdamboen tantiaid chuisho mimbi tantiaata, quequin aton papan bēdambo icmenu quequin chiaid chieshquin Esaun tantienquiocpampic. <sup>17</sup> Yucshun, Aton utsi Acobo aton papan chuibanosh, quesho tantiash shubiquin, Mimbi bēdamboen tantiaid ēbitsen chui, papa, cac chuitiapimbocquidēmbi, Ēnden nibēdquiocnoc uesquin min utsi chiombi, quequin Esau chuipampic aton papan.

<sup>18</sup> Adembidi, Nuquin Papan nadatiambocquin uabanaid tsusedpabon isampicpadomboen mimbi isabiccoc. Macuësh Sinai caid yacno choshon aidon isbenampid nēid iquec: natia nēdēnquedote; utsibic, inchëshac bimboec isadquid; utsibic, cunquequid dapabimboec isadquid; <sup>19</sup> utsibic, shocosh shoncaten shoncac bimboec onquenuc pabiate paēmbošē icpampic. Adec onquesho tantiashun, Papa, mibi onquesho tantiac dacuēdampambo iqueque. Mibi chuitequid Moises icme, capampic. <sup>20</sup> Adec macuësh yacnombo icquin: “Ēmbi nadatiambocquin uabanaid ismenubi macuësh yacno anoentsēqui choenda. Adecbidi matses adecbidi nidaidēn capuquid. Anoentsēqui choquid cuēnoten setequid nendac,” quequin chuipampic Nuquin Papan. <sup>21</sup> Aden Nuquin Papan nadatiambocquin uabansho isash: “Dacuēdampambo iquec, quiash, Dacuēdebi,” queoapampic Moises tsen uēdēquec.

<sup>22</sup> Mibien dacuēdenquo yec Macuësh Sion cashumbic Edusaden Chuca Bēdamboquid caid Nuquin Papa ēnēdesambo tabadacno choac bimboec mibi tabadec caimbi. Aid nuntan Nuquin Papan abi yacnoshon ambi uaid mayan bēdabo tambantiapimbo yec dadpenquioshē tabadec. Aido, ēmbi nashunaidtedi, Esus tantiaquid chotequid iquec, quiash bēdambo iquebi, quec cuēdēdonec tabadendac. <sup>23</sup> Abi tantiaquidtedi Nuquin Papan bacuē icbo yacpadquiec aton shubu abentsēquēnuēshi Icbobēd onquec ēnden mibi taēpoc. Aidi mimbi naid cuidquid ambi chiacpadomboen nadenequid mibi unēsesa icsaisabidi icmequid Nuquin Papa nec. Aidbēd ēnden tabadac bimboec abēdi onquec mibi taēpoc. <sup>24</sup> Abēd icquin Nuquin Papan ambi ēnden chiaid ēmeshun ambi nēbi chuioaid, mibi chuibanec aton Papabēd onquec bēyucanec yuedanquid Esuquidistubēd ēnden mibi onquepoc. Mibi icsaid bedshunash abided ciudadec unēsō isun cudan siac intac chiuidnēdaid tantiec aidbēdi mibi onquepoc. Abedēn nidaidēn capuquid yua cuesuniampicpadquidēn intac chiuidec unēsaid tantiec Icbobēd mibi onquetiapimbo iquec.

<sup>25</sup> Nuquin Papan chiaid niacchitomane quequin isquiota. Macuësh Sinai yacno choquid Nuquin Papan ēnden chiaid chuiquid tantiate bunesa

cuidpampic. ¿Adembidi ambi nēbi chiaid abi yacno yuedanquid aton Madombo Esuquidistu tantiesa Nuquin Papan comapenen cuidenquioda icpadic? <sup>26</sup> Ēnden Macuēsh Sinai yacno Nuquin Papan chiacnoshonquio nidaid ishcumpampic. Nēbien: “Padpidemboen nidaidbēdta abu ēnēdmenuen ishcunoaindami,” quec Nuquin Papa. <sup>27</sup> Aden chuiquin ambi uaidtedi ēnēdmenuen padpidemboen ishcunoaindac abi yacno choaidtedi icsaisa icmiaido yec ēnēdtiapimbo iccuedednuc.

<sup>28</sup> Adoaidi Nuquin Papabēd abi tantiaquido ambi bēdambo icmiaido yec abēd tabadte ēntiapimbocon Nuquin Papan nadatiambocquin nabanaid tantiec cuēdēdonec tabadta. <sup>29</sup> Nadatiambocquid Icsaisabidi icquin aidēmbi, Esuquidistu tantiata, quequin nēbi chiaid tantiesa chian anēdēnquequid nēsecaindac.

## 13

### *Nadomboen nata cain chiaid*

<sup>1</sup> Esuquidistu tantiaquid yec aid tantiaquidtedi con utsibo nec, quiash tantiananec nashunanta. <sup>2</sup> Adembidi Nuquin Papa yacnoēsh choquid abi tantiaquido nashuntequid ambi uaido mayan bēdabo chosho yuedampic-paden mimbi isacmaidquio Esus tantiaquid chosho yuedta. <sup>3</sup> Adembidi quēnēn nauedaid iquec utsi iste buntsiabi, qeshun quēnēn nauedaid istan-istanta. Adecbidi buntsiabi, qeshun menetan-menetanta. Adembidi utsin mēyanaid tantiec shubioata.

<sup>4</sup> Adec tabadec con chidopenquio chudnu qesa iquec chido utsi isuidquid icta. Adesa icsho Nuquin Papan mibi cuidendac. <sup>5</sup> Adecbidi, piucquid con na bedtequid dadpen bednu, quec bunquiduidi iquenda. Adesa iquec: Con na icnuc bēdambo iquebi, quec tabadta. Adec tabadquid Nuquin Papan ēnden dada uamiampid naden chiec:

“Mibēdi iquebi.

Nianenquiocquin mibi dayun uanuna.”

<sup>6</sup> Adsho tantiash:

“Con Icbombo ēbēdi iquendac.

Aidēmbi ēbi cudasquin dēcatiac chieshēmēnquid dacuēdēnenquio iquembi,” nuqui quendac. <sup>7</sup> Adembidi nidaidēn icquid mibi chuiquid dapabo Nuquin Papan chiaid mibi tantiamenuquin chuiquido bēshunenda. Aido Esus tantesa uainquio yec bēdamboec tabadpanēdash. Aido tanec bēdamboec tabadoata. <sup>8</sup> Con Icbombo Esuquidistu nec. Abia Yampidquio yec nēbi adquiobidi iquec. Aidi ēnēdtiapimbo yec abi tabadec.

<sup>9</sup> Adquid Esus icnuc Nuquin Papa chieshēnquidēn chuisho tantiesa icta. Aidēn naden chiec, Nēid petequid icnubi nēid utsi petemaid nec, quequin chiec. Mimbi piaidēn mibi bēdambo icmetiapimbo iquec. Padnuen matses icsaid bedshunash abided cuidadquidēn, Nuquin Papan madonquio paucaid iquebi, quequin tantiaquidquio icsho isun Icbobēd tabadmequin ambi bēdambo icmiaidquio nendac. <sup>10</sup> Matses icsaid bedshunash abided cuidadash uincuenash abi tantiaquidbēd ēnēdenquio yec tabadquid Esuquidistu nec. Adec tabadquid Esuquidistu icnubi, Matses icsapash, qeshun nidaidēn capuquid yua cuesuneshun nibēdquiocnoc tauiaidēnquio matses Nuquin Papabēd tabadmetiapimbo iquec. Adembidi aidēnquio nuqui icsaisa icmetiapimbo iquec.

<sup>11</sup> Isadaidbo icsapash, qeshun nidaidēn capuquid yua cuesuneshun aidēn intac bedshun, Nēid intac Icsaisa Bēdaidquio anquēnē uaid nuntan buanshun daseccacsho isun abi yacno puduedachimboecsho Nuquin Papan isadaidbo isec, qeshun nuntan buanshun daseccapampic. Adnubien

matses nibëdacno nami buanshun uesquin tauipampic. <sup>12</sup> Adembidi matses tabadenquo yacno Esus buanshun dectanac unësacsho siac aton intac chididiepanëdash nuqui icsaisa icmenuec. <sup>13</sup> Adoaidi abi tantiaquid yec abëd icquid nebi, quequin ënden chiampicpaden nainquiocsho isun isadaidbo Esuquidistu tantiesan cacumiaqui chieshenquo yec tabadta. <sup>14</sup> Adquid iquec nidaidën yuec tabadesa icquimbien Edusaden Chuca caid Nuquin Papa ënëdtiapimbocquidbëd tabadaid cainquidquo nuqui nendac.

<sup>15</sup> Matses icsaid bedshunash abided cuidadquid Esus Nuquin Papan icmiac, quequin tantiaquin, Mibi bëdambo iquec, quequin Nuquin Papa chuidenenuna. <sup>16</sup> Adodenequin utsibobëd tantiananquin nashunquin aton na nibëdquid menequid icta. Adsho isash, Con mado yec con champi yec quec bëdamboec tabadquid nec, quiash bëdambo iquebi, quependac Nuquin Papa.

<sup>17</sup> Ambia Esus tantiashun chuiquidon chiacpaden nabanta. Nuquin Papan, Ëbi tantiaquid utsibo isbanta caid icquin aido Nuquin Papan, Icsambo iquec, canushe queshun isted-istedec. Aidon chiacpadomboen naquin ma aido bëdambo iquebi camepanuna. ¿Chieshecta mibi bëdambo icpe? Padenquo.

<sup>18</sup> Chieshenquiocquin ëbëd icquid Nuquin Papa chui. Bëdamboen nabanec tabadteniobi. Adequi tabadebi utsibo: Icsambocquid nec, quetiapimbocnoc. <sup>19</sup> Adembidi ëbi tantiaquin Nuquin Papa chuidoneta. Mimbibi adonoc badedquo mibëd iquendabi.

<sup>20</sup> Adembidi utsibëd bëdamboen tabadmequid Nuquin Papan aton Mado matsesacsho utsibon unës uashun siacsho isun uincuemiatic bëyucanec abuc puduedoash abitedishun Icbombo nec. Abi tantiaquido chuinen yuedquid aidi Nuquin Papan icmepanëdash. <sup>21</sup> Adquid Esus icmeshun ambi tantiacpadomboen ma Nuquin Papan mibi icmepanuna. Adoac, Ëbi puduedmenuen Nuquin Papan naid nec, quequin ënenquiocquin chuiquid ma icpanuna.

<sup>22</sup> Mibi tantiamenuen ëmbi dada uaquin chiaid daëdpactsëcquo icsho bëdamboen isec onquequin tantiadoneta.

<sup>23</sup> Nëbi utsi chiembique. Tantia. Timoteyo quënën nauedboedi nëbi puduemiatic aid badedquo nëmbo choan aidbëdi mibi yacno nidendabi.

<sup>24</sup> Mibëd icquid Esus tantiaquid utsibobëdta mibi chuiquidtedi tantiec tsadebi quequin Pabadon dada uaosh, quequin chuita. Adecbidi ëbitsen tsadebi quequin chuoata, queoapec nëuësh Itadia yacno tabadquido.

<sup>25</sup> Nuquin Papan bëdambo icmiaid ma mibitedi icpanuna. Padi. Aidedi dada uaombi.

## SANTIACON DADA UAID

<sup>1</sup> Santiacon nebi. Nuquin Papan namiaidquio, Nuquin Icho Esuquidistun namiaidquiobidi nebi. Adquid yec Esus tantiaquido uano nidaniash tabadquido mibi tantiec tsadebi. Aden tantiaquin dada uaimbique. Isec onqueta.

### *Natiametequid*

<sup>2</sup> Utsibo, mibi u tabadnuc mibi nënaid, mibi bundoaid, utsin mibi mëyanaid, mibi natiametequid utsi-utsiec iquendac. Adaid icnuc, chonoadbudec cuis-hon quec, Chieshenquiocquin nainembi, quiacpadquiec adecbidi tabadoata.

<sup>3</sup> Adaid icnuc, ¿Ëbi tantiaquidquioda neque? Isnu, quequin, Nuquin Papan ëbi dayacquio icmec, quequin tantiec adecbidi tabadoata. <sup>4</sup> Aden tantiec tabadsho isun bëdamboec tabadte uesquin tantiabenquidquio mibi icmendac ma Esuquidistupadquid yampanueshun.

<sup>5</sup> Mimbi tantienquio yaid Nuquin Papa chuita. Aden chiaquien, Ma tantianu, queshun mibi nua pausunec Nuquin Papan. Icsambocquid mibi neque. Padi quenquiocquin mibi pausunec. <sup>6</sup> Ëbi tantieme, queboedi, ëbi tantiamenquiocpec quequin tantienda. Ëbi tantiemepec queboedi padenquio yanec cuëshëdec capuidequi yampec. <sup>7</sup> Adquid Nuquin Icho pausuntiapimbo icpec. <sup>8</sup> Adquid, Nuquin Papan ëbi tantieme, queboedi capuidequi icquidbimboec icpec.

<sup>9</sup> Shubu abentsëquën tabadacpadquiec tabadquid icta. Adec tabadec mitsana daëdpactsëc icquid yec, Con na daëdpactsëc iquec, quequin mitsanauidi tantienquiocquin naden tantiata. Nuquin Papan bacuë nebi. Abëdi cuëshëdenquio yec tabadebi, quequin aiduidtsëqui tantiec tabadteneta.

<sup>10</sup> Aton na dadpen icquidombien aton na bëdiactsec tantiaquin naden tantiendac: Con na nëidic chodquec; utsibic chiuidec. Adecbidi con nami shënbudequi Nuquin Papan bacuë nebi. Abëdi cuëshëdenquio yec tabadebi quequin tantiec tabadta. <sup>11</sup> Tanunquiocquidën tiedën caniquid unësec podotididiquec. Bëdamboeboedi nibëdquiec. Adquiecbidi icho aton nabi bedbanequi aton nami shënbudequi unësec. Icho ichoedi icho ictiapimbo yanec. Adec icho ictiapimbo yanebi, quequin mitsana comapenen tantienda.

<sup>12</sup> Adecbidi natiaic shubitequid icnuc Nuquin Papan chiaid niaquenquio yec dayacquio yec tabadquid Nuquin Papan bëdambo icmiaid nendac. Adquiecbidi, Ëmbi chiaid niaquenquio yec mibi tabadsho isembi. Ëbëd icquid mibi neque. Pudued. Nëuëshquio mibi unëstiapimbo iquec, quendac Nuquin Papa. <sup>13</sup> Mibibi icsash, Nuquin Papan namiac nebi, quenda. Nuquin Papa Icsapenquiocquid nec. Aidi icsa uantiapimbo iquec. Icsa uanesa nec. <sup>14</sup> Nidaidën tabadquidien icsate bunec abibi icsaic. Adecbidi ambibi tantiacpadecc icsaoaic. <sup>15</sup> Icsamane quequin tantienquio yec unësacsho abi yacno puduedmenquiocquin Nuquin Papan uquë nësecaindac adquid.

<sup>16</sup> Utsibo, Nuquin Papan chiaid chieshënesa nebi, quec mibibi mua uadenda. <sup>17</sup> Nuquin Papan pausunaid bëdambouidi iquec. Utsi uaqin namiantiapimbo iquec. Adenuidi namec. Adquiouidi Nuquin Papa iquec. <sup>18</sup> Ëmbi chiaid tantiaquidquio icsho con bacuë nec, caimbi, quequin Nuquin Papan tantiampampic. Aden tantiaquin Nuquin Papan abi chuidonequidquio aton Mado Esus nidaidën budmepadenec. Adec budash nidaidën capusho isash abëd ichoedo abi tantiaquido nuquitedi nec. Adquid icsho ambi bëyuc bacuë

icmiaido, con nabo cain, Nuquin Papan cuëmbanoshi. Aden ambi bëyuc bacuë uaido icquin chuibanac ma tantiaquidquio dadpen yampanuna.

*Nuquin Papan chiaid tantiaquin nabanta quiaid*

<sup>19</sup> Nëid bëdamboen tantiata. Chuinu. Nuquin Papan chiaid bëdamboen tantiaquid icta. Ambi chiaid bëdamboen tantienquiocquin aid badedquio chienda. Adecbidi badedquio nëishenda. <sup>20</sup> Badedquio nëishquidën Nuquin Papan chiacpadquiec bëdamboec tabadaid ismesa nec. Adquid, Bëdamboen mimbi naoc, Nuquin Papan catiapimbo iquec. <sup>21</sup> Bëdamboec tabadesa icquin mimbi icsamboen tantiacpaden naid ënquiota. Aden ënu quiash, Icsaobique. Mimbi chiaid tantiaquiono. Èbi pausun, quequin Nuquin Papa chui. Aden chuisho Nuquin Papan mibi pausunec. Ambi pausunaid iquec aton Mado Esuspadquio yec cuëshëdenquio yec abëdi mibi iquendac.

<sup>22</sup> Nuquin Papan chiaid tantiashun nainquio yequi Nuquin Papan chiaid bëdambo iquec, quec mibibi mua uadenda. Nuquin Papan chiaid tantiabocpadomboen nabanta. <sup>23</sup> Nuquin Papan chiaid tantiashun naisa isnanten <sup>24</sup> bëisadash bëpiscudacimboec bëpiscudendac. <sup>25</sup> Padnuen Nuquin Papan nëbi chuiboed utsin comapenen tantiaded-tantiadedec. Aden tantiashun, Con Mado Esuquidistu tantiaquid con bacuë caimbi, quequin Nuquin Icbon chiacpadomboen nabanec tantesa uainquiocquid adquid nendac. Aden tantiaquin nabanquid Nuquin Papan bëdambo icmendac. <sup>26</sup> Padnuen, Nuquin Papan chiaid tantiaquid nebi, queboedi ana bëdamboen oncamesa abibi onquequid nec. Adquid, Esus tantiaquid nebi, quequin ambibi tantiaquin icsamboen chuiquid nec. Abipenquio chuiquid nec. Adquidbidi bëdamboec tabadaid ismesa nec. <sup>27</sup> Nuquin Papan chiaid tantiaquid nebi, quequin utsi tantiaquin nashuntiad. Menampibo caniabictsëcquid chonoadsho isun nashuntiad. Natiaic camiaid icsho isun adembidi nashunoatiad. Adembidi shiadimpi machoabictsëcquido tantiaquin nashunoatiad. Adembidi niante machobo utsin bedabi samëdquido tantiaquin nashunoatiad. Aden naquid Esus tantiesan nabanacpaden naisa nendac. Adquid icsho isash, Èmbi chiaid tantiaquin naquidquio nec. Con Madopadquidquio icsaisa nec, quendac Nuquin Papa.

## 2

*Nëid bëdambo iquec. Nëidien icsambo iquec, quesa icta quiaid*

<sup>1</sup> Utsibo, Nuquin Icho Esuquidistu Bëdaidquio nec. Aid tantiaquid mibi nec. Adquid icquin, Nëid bëdambo iquec. Nëidien icsambo iquec, quenquiocquin icsamboen nainquiocta. <sup>2</sup> Mibi iccuededacno Esus tantiaquid mimbi isacmaid choec. Abentsëc bëdaidquio dasiuidash nac-nacquiocquid mësiuidquid puduednubien utsi icsactsëcquiocquid dasiuidtsash puduedec. Aid daëd chosho isun ¿mitsipadentsi mimbi tantiapatsia? <sup>3</sup> Bëdaidquio dasiuidquid isun naden mimbi tantiatsiac: Bëdambocquid nec. Aton na dadpen icquid nec, quiacimboen, Tsusion dayunquio tsadec cho, quequin mimbi aidi tsadumpec. Adshumbic, icsactsëcquiocquid dasiuidquid isun, Aton nain nibëdchitec, quiacimboen uano tsad mimbi caoapec. <sup>4</sup> ¿Nëid icsambocquid nec. Nëidien bëdambocquid nec, quiacimboen Esus tantiaquid utsibo mimbi tsadunenquioda ictio? ¿Aton na tantiaquin adoenquioda ictio? Aden naquin bëdamboen tantiaquin naisa mibi neyoc.

<sup>5</sup> Nuquin Papan chiaid tantiesabimboecquin mimbi naid nec. Mimbi, Icsambocquid nec, quequin tantiaquin uano tsad caid tsadbudash nadpec: Icsambocquid nec, quequin ëbi isec, quequin tantiec aidi tsadpec. Aidbidi

Nuquin Papan tantiaid nec. Aidi Esus tantiaquid yec abi yacno puduedtequid iquendac. <sup>6</sup> Aidi bacuëbimboecnuc mimbi uano tsadumpec. ¿Utsibic tsusio dapabimboecnuc mimbi dayunquio tsadumbocpadquidën utsinutsinquien chono uashun mibi daëdpactsëc menenquioda ictiosh? ¿Adquidon mua uain chuiquin mibi utsi-utsien quënën nauedmenquioda ictiosh? <sup>7</sup> ¿Adoanquidën baded-badedquien Esus quec onquequin mamënshunenquioda ictiosh?

<sup>8</sup> Nuquin Papan chiaid nad iquec: “Utsin naden ëbi nashuntiadquio iquec quequin, mimbi tantiacpadomboen nashunta.” Nuquin Papan chiacpadomboen tantiaquin nashunquidquio iquec mibi bëdambo icpec. <sup>9</sup> Nëid bëdambo iquec. Nëidien icsambo iquec, quiacbimboen naquid icnuc Nuquin Papan chiaid niacquid mibi iquec. <sup>10</sup> Nuquin Papan chiaid utsi-utsien nabanquid icquimbi ambi chiaid utsi niacquid mibi icoapec. <sup>11</sup> “Mimbi inacmaid chudenda,” quequin Nuquin Papan chiaid nec. “Utsi cuesunenda,” quequin ambi chiaid utsi nec. Min chidouidi chudquid icquimbi utsi cuesunequid mibi iquec Nuquin Papan chiaid niacquid mibi nepec.

<sup>12</sup> Mibi tantiaquin mibi icsaid pauquec Esuquidistuded icsambocquidbimboec yec unëspanëdash. Aid tantiaquid icsho Esusën paucaid mibi nec. Adquid yec Icbon mibi tantiaquin nabanacpadomboen utsi tantiaquin nabanec bëdamboec tabadta. <sup>13</sup> Esuquidistu tantiaquid utsi icsambocquid nec quesa icta. Ëbi icsaid Esuquidistun paucac. Adomboembidi abi tantiaquid utsi icsaidbidi paucac quequin bëdamboen naban. Icsambocquid nec quiacbimboen icsamboen nabansho isun Nuquin Papan adomboembidi mibi chuiquin cuidoaindac. Ëbëdta Esuquidistun paucaid nec quequin utsi tantiaquin nashumënquid icquin icsambocquid nec quiacbimboen icsamboen nashuntiapimbocquid mibi nec.

### *Esus tantiaquid nebi quequin ambi tantiacpadomboen nabanquin isme quiaid*

<sup>14</sup> Utsibo, Nuquin Papan bacuë nebi, queshun ¿Icbon chiaid nainquiocquinda utsi bëdambo mimbi icmepadi? Padenquio. <sup>15</sup> Esus tantiaquid abi dasiuidtebëd pete nibëdquid, Bec cho, quesho <sup>16</sup> menenquiocquin, Nidec nid. Dashcute bedash dasiuidta. Adembidi pete bedshun codocashun peta, ¿mimbi cacta bëdambo icpadic? Padenquio. <sup>17</sup> Adembidi, Nuquin Papan bacuë nebi, queshun Icbon chiacpadomboen naisa Icbon bëdambo icmiaidpenquio nec. Nuquin Papan bacuë nebi, queshun naisa Nuquin Papa yacno puduedtiapimbo icoaic.

<sup>18</sup> Adnubien, Esus tantiaquid nebi, quec onqueuidequi tabadquid icnubi, Esus tantiaquid nebi, quec onquenquiocquin Icbon chiacpadomboen nabanquidquio iquec. ¿Mitsipaden aid daëdshun tantiacpadomboen mimbi tantieque? Chui. Tantianu, quequin mimbi chuitsiac.

Adoqui, Esus tantiaquid nebi, quequimbi Nuquin Icbon chiacpadomboen naisa naden chuitsiambi. ¿Nuquin Icbon chiacpadomboen nainquiocquin mitsipaden mimbi tantiaid mimbi tantiamepe? quetsiabi adquid chiec. Mimbi ambi chiacpadomboen nainquiocquin ismetiapimbocnobi, Esus tantiaquid nebi, quequin chienquiocquimbi Esusën chiacpadomboen naquin mibi ismembi, caimbi. <sup>19</sup> Nuquin Papa Abentsëcquiobi iquec, quequin mimbi tantiec. Aden tantiaid bëdambo iquec. Adembidi, Nuquin Papa Abentsëcquiobi iquec, quequin mayan icsatedishun tantiaoaic. Aden tantiaquin niacquido yec uëdëquec.

<sup>20</sup> Icsamboen mimbi tantieque. Tantia. Chuinu. Nuquin Papa Abentsëcquiobi iquec, qeshun Icbon chiacpadomboen naisa yec, Icbo tantiaquid nebi, quetiapimbo iquec. <sup>21</sup> Nuquin Papa tantiembi, qeshun ambi chiacpadomboen naquidquio icpampid chuinu. Tantia. ¿Abadauan ëbi tantiaquidquioda neque? Tantianu, qeshun, Min mado abentsëc mibi cudasaidquio ëbi tantiaquin cunesuneshun tauita, cac Abadauanën Nuquin Papan chiaid niacmane qeshun tauinuequin aton mado abentsëc setsempampic. Chështempi sanandosho isun, Padi. Chën. Ëmbi chiacpaden nanuesho mibi bëdambo iquec, quequin mibi bëdamboen isembi, ¿quequin chienquioda Nuquin Papan icpampic? <sup>22</sup> Abadauan Nuquin Papan chiaid cacuidenquio yec, Con Icbo Nuquin Papa nec, quec abi onquiacpaden ismepampic. <sup>23</sup> “Mimbi tishmiaidën tishmiaid dadpenquioshë iquendac,” quequin chiondashumbic Nuquin Papan yuecshun adembidi: “Min mado abentsëc cunesuneshun tauita,” quequin chuioaqui, Nuquin Papa abimbo chuiquidquio nec, qeshun ambi chiaid niacchitomane quequin, Abadauanën aton mado abentsëc setsempampic. Adosho isashien Nuquin Papa, “Ëbi tantiaquin naquidquio Abadauan nec. Adquid con matsesquio aidi nec. Aden aidi tantiaquin ëmbi yuecquiocshon nanuequin tantiaid Abadauan chiembi,” quepampic Nuquin Papa.

<sup>24</sup> Nuquin Papan bacuë nebi, qeshun ambi chiaid naquidquio Nuquin Papa tantiaquidquio nec. Nuquin Papan bacuë nebi, qeshun ambi chiaid naisa niacquid nec. <sup>25</sup> Adashic, Nuquin Papan chiaid tantiashun naquid utsi icpampic. Aidi isadaidbon chidopenquio, Daba cuëmëdquid, dada dadpen chudmequid icpampic. Isadaidbon Icbo nadatiambocquid nec, qesho tantiashien, Adquid abu nidaidbëdta aidënquiocquid Icbobidi nec, quequin Daban tantiapampic. Aden tantiaquin Daban matses cunesunenuquido isadaidbo abia puduedquin isquid chosho, Nadatiambocquidën matses nec, qeshun abi yacnouidtsëqui Daban puduedmepampic aton matses ismenquiocquin. Aden puduedmequin nadomboen tantiapampic. Abi puduedmequidbëd icquido cunesunenquiocpec, quequin Nuquin Papan tantiamiacpadomboen omposhon podqued utsin nidmepampic. Aden nidmiac yuecash isadaidbo dadpen cho-chonobi abia choamboedën chuibocpadquiobi Dababëd icquido cunesunianenquio yec isadaidbobëd icquidobimboec isec tabadpampic. <sup>26</sup> Nuquin Papa tantiaquid Daba yanshun bëdamboen nasho isun mënchicaid Nuquin Papan con matses caidbëd tabadpampic. Padnuen, Esus tantiaquid nebi, qeshun Icbon chiacpadomboen naisa cuëshëdacbimboec tabadec.

### 3

#### *Anan icsamboen chiec onquiaid icsa ënta quiaid*

<sup>1</sup> Utsibo, Nuquin Papan chiaid chuibanquid dadpen iquenquioctiad. Nuquin Papan chiaid tantiamenu, quequin ambi chiaidpenquiocnoc chuibanquid abi yacno chosho isun Nuquin Papan comapenen cuidendac. <sup>2</sup> Chuibanquidtedishun chua-chuatsëquien chuibantsec. Nuquin Papan chiaid cuembo chuibanquid yec icsaisa yanec adquid. Bëdamboec tabadaid uesquin tantiaquin ismequidquio adquid nendac.

<sup>3</sup> Cabayo anëshquin dëchëdëdcash uidën uash tsadquin nidmec. Aden uidën uaquin bidiacmec. <sup>4</sup> Adembidi uncaten cano dapa tsibidiacoaic. Cunquequidën comapenen bëcunetiadquiocnobi adembidi icbon nidmec. <sup>5</sup> Cabayo canobidi nua icnuc abi bidiacmete aniaactsëc iquec. Adechidi icbo nua icnuc aton ana aniaactsëc iquec. Aniaactsëcquidi oncamequin icbon ambi



naid dadpen comapenen chuibanec. Adembidi oncamequin onquiaid icsa chuibanec. Nēdēnquiaid dētsisidash badedquo nidacbimboec onquiaid icsa badedquo nidoaic. <sup>6</sup> Ana onquiaid icsa chuibanacpaden nabanec adecbidi icsabudquiec icbo. Adquid mayan icsan yua iquec adequi icsate bunec.

<sup>7</sup> Nidaidēn capuquid podochoquidbidi matsesēn yuampicpaden abi yuaid iquec. Yua quenenash cuenenquiocquid. <sup>8</sup> Ad yenquo ana iquec. Quenenquo yec ana onquebudec. Onquiaid icsa adecbidi ēnēdtiapimbo iquec. Ana onquiaid icsa tantiabanec adecbidi icsabudquiec tabadendac.

<sup>9</sup> Nuquin Icho bēdambo iquec, queshumbic ana icbon, Nuquin Icbon uaid matses icsambo iquec, quequin chuibanoaic. <sup>10</sup> Ana shēcuēn utsi bēdamboen chuishumbic utsi icsamboen chuioaic. Aden nuqui chienquo ictiad. <sup>11</sup> ¿Acte batapenquiocquid choaidēnuēsh batambocquidta chopadic? Padenquo. <sup>12</sup> Adecbidi ¿cuēte bacuē batambocquidēn ēshē bēchi chopecta dēyuctic? Padenquo. Adecbidi, ¿Isitodo dataniadaidēn bacuē batambo yecta dēyucpadic? Padenquo. Aidi adesa yacpadquiec Esus tantiaquidēn ana shēcuēn utsi bēdamboen chuishun utsi icsamboen chiesia ictiad.

*¿Tsutsi Nuquin Papan chiaid tantiabenquidquo icpec? quiaid*

<sup>13</sup> ¿Tsutsi Nuquin Papan chiaid tantiabenquidquo icpec? Adquid yec comapenen Esus tantiaquid nebi, quenquiocquimbi bēdamboec tabadquin ismequid utsi-utsien ma icmebampanuna. <sup>14</sup> Utsin tantiamenushe queshun ēmbia chiacpadomboen ma napanu quesa icta. Nuquin Papan chiacpadomboen nabanquin ismequid icta. <sup>15</sup> Adembidi, utsin dēniacnushe queshun namenun chuinuequid Nuquin Papan tantiacpadomboen pausunacmaid nec. Adquid mayan icsan tantiacpadomboen pausunaid nec. <sup>16</sup> Aden aidēn icsamboen tantiacpadomboen abēd icquidon adomboembidi tantiec. Aden tantiec, Utsi dēniacnu, quiash utsi-utsiec dēniacnuequido dadpen yanec. Adquid dadpen icnuc chuiquid dapa tantiate bunesa icpec. Cuesnante bunquiec. Ad icnuc icsateuidi bunquid yampec. <sup>17</sup> Nuquin Papan tantiacpadomboen pausunaid ad yenquo iquec. Ambi tantiacpadomboen pausunaid yec utsibēd bēdamboec tabadquid iquendac. Adembidi utsi tantiaquin nashunquidquo icoaindac. Adembidi ēbēdtan nabanec cho cac nabanendac. Adembidi, Icsambocquid nec, quenquiocquin bēdamboen nabanquin ismendac. Adembidi, Esus tantiaquid nebi, abi quiacpadomboen bēdamboen naic. Adecbidi utsibo chiec muaisa nendac. <sup>18</sup> Ambia tantiaquid utsibēd bēdamboec tabadquin ismiac adecbidi utsibēd bēdamboec tabadquid dadpen yanendac.

## 4

*Ēbi nua pausun, quequin chiasch Nuquin Papan dayunquo tsadta quiaid*

<sup>1</sup> ¿Atotsi quiash Esus tantiaquido cuididianante buncuededpec? Mibi icsate bunacpadequi mibi cuididianante bunec. Aiduidquo tantiabudequi mibi chushcanancuededec. <sup>2</sup> Nēid bunebi, queboedēmbi bedtiapimbo yanquin mimbi cuesunec. Adecbidi, Utsi dēniacnu, quiash chushcananec. Mimbi naiduidi naquin Nuquin Papan tantiacpaden naisa mibi nec. <sup>3</sup> Aden naisa icquin Nuquin Papan chiaid niacmane quenquiocquin aidi mimbi chiec. Adec icsanueshun chuisho Nuquin Papan mibi menetiapimbo iquec.

<sup>4</sup> Mimbi inaiduidi chudenquo yacpadquiequi Nuquin Icbouidi tantienquo yec Esus tantiesan icsate bunquin nacpadomboen mimbi nadenec. Adquid yec Nuquin Papa chieshēnquid nec. <sup>5</sup> Adenquiocquin Esus tantiaquo isun aton Mayan Nuquin Papan Esus tantiaquidtedi meniac bēdamboec tabadec. ¿Atotsieshun Esus tantiaquid aidi menepec quepecta mibi ique?

Nad iqueque. Tantia. Chuinu. Con bacuë nec, quequin aton Mayan Nuquin Papan Esus tantiaquido menec. Aden tantiaquin meniac, ¿Esuquidistu tantiaquido cudasquin dëcatenquioda aidën icpec? <sup>6</sup> Aidëmbi abi chieshenquo yacpaden tantiamabanac icsamane quiash chieshenquo yec bëdamboec tabadta. Nuquin Papan dada uamiampid nad iqueque. Tantiata: “Nuquin Papan chiaid niacquin ambibi naid nasho isun pausuntiapimbo Nuquin Papa iquec. Icsaobi. Èmbibi bëdamboen tantiatiapimbo iquebique. Èbi tantiam, Papa, qesho Nuquin Papan nua pausunac aton icbo chieshënenquiocquid iquendac adquid.”

<sup>7</sup> Aden Nuquin Papan chiaid icnuc, Icsaobique. Mibia Yampidën ëbi nua pausun, Papa, quequin chiash Nuquin Papan dayunquo tsadacimbocquin ambi chiaid tantiata. Nuquin Papa chieshënuquid mayan icsan yuadenda. Adquidën yuatiapimbo iquebique. Nuquin Papan chiaidquo nabanu, qeshun nabanuc mayan icsa cuenendac. <sup>8</sup> Aton dayunquo tsadquidbimbocquidbëd tabadquidquo Nuquin Papa nec. Icsash uano tsadquid icboedi bëchishash acten dapanudacimbocquen mimbi tantiaid icsa ënta. Adash, Tantiad bëda pausumenu, quiash Nuquin Papan dayunquo tsadacimbocquin chieshenquiocquin ambi chiaiduidi tantiadeneta. <sup>9</sup> Aden tantiec tsadboedi, Èmbibi tantiembi, quec Nuquin Papa chieshënuquidën dayunquo uano tsadashic, Con Icho tantiec unësquo iquebi, quiash shubiec mamënenquo yec tsadta. Mibibi uano tsadquid yash unësacimboc icboedi choec isadcuenacimboc Nuquin Papan dayunquo tsadacimboc yec chieshenquo yec bëdamboec tsadoata. <sup>10</sup> Uano icboedi choash, Èbibi icsaobi. Nëbi icsate bunenquo iquebi. Mimbi chiacpadtiadquo iquebi, Papa, quequin chui. Aden mimbi chuisho tantiash, Puduedash nëmbo ëbëd tsadacimboc mibi yanoaic, quependac Nuquin Papa.

<sup>11</sup> Utsibo, Esus tantiaquidtedi min utsibimbocquid nec. Mibëd icquid icsamboec chuinanenquo yacpadquiec Esus tantiaquid utsibëd icsamboec chuinanenda. Esus tantiaquid icsamboec chuinanquid Nuquin Papan chiaid niacquid nec. Aden chuiquid Nuquin Papan chiaid icsambo iquec quiacimbocquid nec. <sup>12</sup> Nuquin Papa Chuiquid Dapa Abentsëcquiobi iquec. Ambi chiacpaden naquidquo nec. Nuquin Papa abitedi Isquidquo Abentsëcquiobi nec. Aden isquin: Nëid icsambocquid nec. Nëidien bëdambocquid nec, quequin Chuiquidquo abentsëcquiobi aidi neoaic. Adquid icquin ambi chiaid nabanquid abëdi tabadmec. Ambi chiaid niacquidien abëdi tabadmenquiocquin uguë nësecaindac. Nuquin Papan ambi chiacpadombocquen naquidbëdtabi ambi chiacpadombocquen naisa isquidquo icquin ambi isacpaden cuidendac. ¿Adquidbidida mibi ne? Padenquo. Adquidpenquo icquin ¿atotsieshun, Icsambocquid nec, quequin mimbi chuipe?

### *Ma badiadshun nanun chiaid tantiesa neyoc, quequin chiaid*

<sup>13</sup> Tantiadquidquo nebi, quiash, Piucquid bednuc seta abentsëc matamec chonoadec nidebi, quequid chuinu. Tantia. <sup>14</sup> Ma adquid badiadshun nanun chiaid tantiesa mibi neyoc. ¿Tetsi seta matamec mibi tabadpe? Badiadbudnuc cuen-cuempambo yash badedquo nidacimboc matses nidaidën tabadash adecbidi mibi nibëdanendac. <sup>15</sup> Naden nanu quenquiocquin nadembien tantiatiad: Nuquin Papa bunaid icnuc badiadash isedec nidebi, quetiad. Adecbidi, Nuquin Papa bunaid icnuc badiadshun tied neshcaimbi, quetiad. <sup>16</sup> Aden chienquiocquimbi mibi utsi dëniaquec onquiaid mimbi chiec. Aden chiec icsaic. <sup>17</sup> Nuquin Papan chiaid tantiembi, qeshun adombocquen natiadquidi naisa iquec icsaic.

## 5

*Na dadpen bedbanquin dayun uaquido chiaid*

<sup>1</sup> Nēbi aton na dadpen bedbanquin dayun uaquido chiembique. Tantiata. Mibi unēsun mimbi bedbanquin daēd uaid mimbi tantiaidquio buantiapimbo mibi iquendac. Aden mimbi bedbanquin daēd uaiduidtsēqui icsho isun Nuquin Papan mibi cuidendac. Adquid nebi, quequin tantiaish shubita. <sup>2</sup> Unēsosh, quequin chiac mimbi dadpen dayun uaid nibēnquin isac ēnden chodquiac. Adembidi mimbi bēdaidquio dectanaid capishton ēnden piac. <sup>3</sup> Min shocosh piucquid ēnden chiuidac. Adecbidi min piucquid utsi ēnden tiadac. Adenuidi tantiaquin bedbanquid unēsacsho abi yacno yuedquin, Bēdamboen mimbi naoc, quetiapimbo Nuquin Papa iquendac. Tanunēnquio shubu nēdēnquiash nibēdacpadquiec mimbi bedbanaid nibēdquiendac. Adenuidi tantiaquin, Esus ēbi bedec chonoshe queshun ¿Nuquin Papa yacno puduedmenun tsutsimbi Esuquidistu chuibampe? quequin tantienquiocquin mitsana dadpen bedbanshun mimbi dayun uaoc. <sup>4</sup> Adembidi mimbi icsamboen naid utsi iqueque. Tantia. Min tied uaquido mimbi chono uaboedo bunec sidquec. Aidi mimbi menenquio yaid Esuquidistu tantiaquido Nuquin Papan tantiaido nec. Adembidi, Con tiedēn caniquidtsen dayun uanu, quequin mimbi bedmiaido uēshquec bunec sidquesho Nuquin Papan, Nadatiambocquid Abentsēcshun tantiec. <sup>5</sup> Aido bunec sidquenubi chonoadenquiocquin nua pec mibi tsadec. Adec tsadquin min nami bunaiduidi tantiaquin mimbi bedbanoaic. Nua pec cubudacimboen mibi bunaiduidi bedbanquin dadpen dayun uaquido mibi nec. Aden nabanquin bēdamboec tabadaid ismesa mibi nec. Adec tabadec unēsash abi yacno mibentsēqui chosho Esuquidistu tantiamambocquid nec, quequin Nuquin Papan mibi isendac. Aden isquin mimbi chono uaido mimbi cuidacpadomboen aidēmbi mibi cuidendac. <sup>6</sup> Mimbi chiaid mimbi chono uaidon niaquenquiocquin nabanacshobi, Icsamboen mimbi naoc, quequin daēdpactsēc mimbi menebampoc. Aden nabanec mimbi cuesuniacimboec bunquiec chonoadequi unēsposh.

*Ma Nuquin Icho chono quiash chieshesa icta quiaid*

<sup>7</sup> Nēbi utsibon chono uaido chuinu. Tantiata. Nuquin Icho choec quequin tantiec chieshenquio yec tabadta. Nitsinash ma caninu quianec pec nidash cainec icbo tabadec. <sup>8</sup> Adembidi, Nuquin Icho ēbi bednuec choec, quec bēdamboec tabadquin caimbudta. <sup>9</sup> Adec tabadquin Esus choate cainec Esuquidistu tantiaquid utsibobēd chieshēnanenda. Adec utsibobēd bēdamboec tabadsho isun abitedi tantiaquidēnquio Chuiquid Dapan mibi menequin bēdamboen cuidendac. Adesain menenquiocquin cuidendac. Adembidi, Nēidēn bēdamboen naosh. Nēidēmbien icsamboen naosh, quequin ēbi Chuiquidēnquio chiendac, quec chieshenquio yec bēdamboec tabadta.

<sup>10</sup> Utsibo, natiatequid icnuc Nuquin Papan chiaid ambi chuimiaido chieshenquiocpampic. Aidquio chuibanu. Tantia. <sup>11</sup> Natiaid icnuc chieshenquiocsho isun Nuquin Papan bēdambo icmendac, quequin nuqui tantiondaid nendac. Natiaic cametequid icnuc Nuquin Papa chieshēnenquiocquid Obo icpampic. Aton na dadpen icboedi icsatequid utsi-utsiectsēcquiecquidēn uesac nibēdquiocsho isash, Con nabēd con nabo nibēdnuc Nuquin Papa bēdambo iquec, quec chieshenquiocpampic Obo. Adquid icsho isun daēd uaquin Nuquin Papan meneoapampic. Matses tantiaquin naquidquio Nuquin Papa nec, quequin <sup>12</sup> abimbo chuiquidquio icta. Utsin: ¿Ada naden natsia? cac, Ai, quiacpadomboen nabanta. Adembidi, Padenquio, quiacpaden nabanoata. Mua uanec onquequid Nuquin Papan cuidendac.

*Nëidic bëdampec quequin abimbo tantianuc quiaid*

<sup>13</sup> ¿Natiambo icsatequid icnuc dayactiapimbo icquidta icpec? Adquidënquo Nuquin Papa chuitiad. ¿Bëdambo iquebi, quec tsadquidta icpec? Adquid Nuquin Papan naid chiec cuëdëntiad. <sup>14-15</sup> ¿Aton dada icsabudquidta icpec? Adquidën ambia Esus tantiaquido chuiquin, Nuquin Papa ëbi chiec cho, cattiad. Adsho tantiash choshon icsabudquid tantiaquin anoshonuidi Nuquin Papa chuidoneta. Aden chuidoneshun cuëte bacuë ënë chinshun dashunquinquin, Mimbi utsibo bëdamenëdacpadomboen mimbi tantiacpaden nëidtsen bëdame, Icho, quequin chuita. Aden Nuquin Papa chuinin mibi icsaid icnuc, Icsaobi, quequin mimbi naid Nuquin Papa chui. Adembidi dada icsabudaic chuiquin, Mibi icsaid icnuc Nuquin Papa chui ma mibi paucnu, quequin chuita. Aden ambi naid icsa chiacsho paucacpaden ma aton dada bëdamepanuna. <sup>16</sup> Abi icsaid uesquin Nuquin Papa chiash bëdamboec tabadendac. Adquidën chiac dada icsambocquid Nuquin Papan bëdamendac.

<sup>17</sup> Edias nuquibimboecquid matses icpampic. Nuquin Papan nua pausunac Nuquin Papan tantiacpadomboen Ediasën tantiapampic. Adquid icquin, Ue secamenda, Papa, cac adecbidi seta 3ted matamiash seta utsi choabicnuc ue sequenquo icpampic. <sup>18</sup> Adembidi, aidëmbi yuecshun, Ue secame, Papa, cac ue sequenuc tiedën caniquid canipampic.

<sup>19</sup> Esus tantiaquidën Nuquin Papan chiacpadomboen nabamboedi adoesa utsi-utsiec yantsiash. Adsho isun Nuquin Papan chiaid tantiamequin ambi icsamboen tantiaid chuibanac Nuquin Papabëd yacimboec icoaindac.

<sup>20</sup> Aden mimbi chiac chieshenquo yec tabadsho isun Nuquin Papan uquë nësiatiapimbo adquid iquendac. Adecbidi abi icsaid bëpiscudoaic Nuquin Papa. Padi. Mibi tantiaquin aiteded dada uaombi.

## PETEDON DADA UAID 1

### *Petedon tauamboen chiaid*

<sup>1</sup> Petedo nebi. Abëd icquid icsho Esuquidistun: —Ëbi chuibeneta —caidquo nebi. Esus tantiaquidtedishun mimbi iste dada uanu. Isadaidbo icsho nuquin nidaidënsnun ënden cuemenëdac mais-maisacchobi yec nidaid utsi-utsiec yacno mibi tabadec. Utsi-utsiec nidaid Ponto caid yacno tabadec. Utsi-utsiec nidaid Cadasia caid yacno tabadec. Utsi-utsiec nidaid Capadosia caid yacno tabadec. Utsi-utsiec nidaid Asia caid yacno tabadec. Utsi-utsiec nidaid Bitinia caid yacno tabadec. Aidtedi nidaid yacno tabadquidon iste nëid dada uaic nebi. <sup>2</sup> Ëndenquo Nuquin Papa: —Ëmbi tantiactedi matses ëbëdta Esus tantiamendambi —quepampic. Nëbi ambi tantiacpadomboen aton Mayanën Esus tantiamequin nuqui bëdamboec tabadte bumec. Adoac: —Icsambo icquid cuidmenquo icnuec abided cuidadaid Esus tantiasho Nuquin Papan ëbi bëdamboen isec. Aidën chiacpadomboen natiadquo iquebi —quequin Esus tantiec nuqui bëdamboec tabadec. Aden tantiaquin Nuquin Papa chianembi naden. —Ënenquo icquin aido bëdamboen ista, Papa. Adem-bidi dacuëdenquo icnuc bëdambo icmeta, Papa —quequin Nuquin Papa mibi chianembi.

### *Esus tantiaquid Nuquin Papa yacno tabadte chiaid*

<sup>3</sup> —Nuquin Icho Esuquidistun Papa Nuquin Papa bëdamboshë iquec —canuna naden tantiaquin. Icsaquido cuidte bunenquo icquin utsiacim-boecnuc nuqui icmenuen Nuquin Papan abided cuidadaid Esus nuqui tantiamiondash. Adoac nuqui naden tantiec. —Esuquidistu chococac uincuenash padpidec unëstiapimbo iquendac. Adembidi nuqui unëscasho uincuemeshun Nuquin Papan abi yacno nuqui tabadmendac padpidec unëstiapimbo icnuc. <sup>4</sup> Ambi chiampicpadomboen bëdamboshë yacno Esusbëdquo ëbi tabadmendac. Unëstequid nibëdec icsabudtequid nibëdec chod-quetequid nibëdec quiacnombo Esusbëdquo nuqui tabadmendac —quequin nuqui tantiec. <sup>5</sup> Aden Esus tantiaquid icsho isash: —Con Mado Esus tantienquo yanushe —quiash nadatiambo icquin nabanquid yec Nuquin Papa nuqui cudasec. —Esus chote ushën ëbi yacno tabadmendambi —quec Nuquin Papa nuqui cudasec.

<sup>6</sup> Ëmbi aden chuisho tantias mibi cuishonquendac. Esus tantiesabon chieshënac shubiantiadtsëcquo yec natiaboedi mibi bëdambo yanendac. —Nuquin Papabëd tabadec quenenendabi —quec yuec nuqui shubienquo iquendac. <sup>7</sup> Nuqui cudasquid yec ¿atotsi quiash Nuquin Papa: —Padi. Chën. Esus tantiaquido natiamenda —queboedi adenquo icted-ictedpec? Matsu nacnenquidën: —Ma tsasinu —quequin ambi nacnenaid tauiec. Adembidi Esus tantiaquid chieshtoenquo icquid icmete Nuquin Papa comapenec bunec. Matsu nacnenquidën: —¿Bëdambo icquidida neque? Isnu —quetanquin matsu tauiec. Adembidi: —¿Esus tantiaquidquibida neque? Isnu —quequin: —Natiamenda —cainquo iquec Nuquin Papan. Aden natiamiaqui chieshtoenquo icquid icsho Esuquidistun padpidec choshon: —Mibi bëdambo iquec. Ëbëdi tabadec cho —quequin utsibo tantiamequin chuishun abi yacno buanendac.

<sup>8</sup> Aden mimbi isacmaidi Esus mimbi tantiaquiec. —Nëbi isadenquo icquidi Nuquin Papan Madombo Esus ëbi bednuec choendac —quec mibi

cuishonquianec. <sup>9</sup> —Abi tantiasho icsano nidmenquio icquin Esusën abi yacno ëbi yuedendac —quec Esus tantiec mibi cuishonquianec.

### *Esus chote tsusedpabon chiampid*

<sup>10</sup> Ëndenquimboshë Nuquin Papan tantiamiac isadaidbo tsusedpabon Nuquin Papan chiaid chuiquidon Esusën matses cuidmenquio icte dada uapampic. Esusën nate abitedi tantienquio icquin daëdpactsëc tanti-aquin: —¿Mitsipadquid Nuquin Papan chomepeba? —queded-quededquin chuiampic nuquin tsusedpabo isadaidbon. <sup>11</sup> Aidobëd icquin Esuquidistun Mayanën tantiamiac Esus chote abentse-abentsen chuiampic. —Matsesën chieshënquin cuستن dectanac matses cuidmenquio icnuec abided cuidadec unësendac. Adec unësacsho uincuemiac padpidec abitedishun Icho icoaindac —quequin Esus chote chuiampic. —¿Tsutsi chopec? ¿Teductsi yash chopec? —quequin abitedi tantiatiadquio icquimbi daëdpactsëc isadaidbo tsusedpabon tantiapampic. <sup>12</sup> Naden Nuquin Papan tantiamepampic. —Mibi nibëdanan ëmbi chuiboed ëmbi matsesmiacsho utsibon isendac —quequin tantiamiac Esusën nate chuiampic. Aden chiampicpadomboen Esusën naondash. Nuquin Papan Mayanën tantiacpadomboen aid chuibenequidon aidën naid mibi chiac caondash. Aden Esusën naid Nuquin Papan abi yacnoshon uaido mayan bëdabontsen tantiatiadquio icquimbi abitedi tantienquio iquec.

### *Bëdamboec tabadte tantiamiaid*

<sup>13</sup> Ëmbi chuiboed Esus tantiaquido icquin paposhquiacbimboen Esusuidi tantianuna. Nuqui icsate bunacpadec icsainquio yec bëdamboec tabadnuna. —Abi yacno tabadmenuen Esuquidistun abi tantiaquido beduanendac —quequin tantianuna ënenquio icquin. <sup>14</sup> Ambi: —Con mado nec. Con champi nec —caido icquin Nuquin Papan chiacpadomboen nanuna. Ënden Nuquin Papan chiaid tantiabi mibi bunaid naic mibi icsanëdacpadec icsainda. <sup>15</sup> Mibi Esus tantiamequid icsaisambo Nuquin Papa neque. Ambi chiaid niaquenquio yec bëdamboec tabadnuna. <sup>16</sup> Nuquin Papan ambi chiaid naden dada uamepampic. “ ‘Nuquin Papa icsaisambo nec,’ quiash icsaisa ictiadquio yec bëdamboec tabad,” quequin Nuquin Papan ambi chiaid dada uamepampicpadec bëdamboec tabadnuna.

<sup>17</sup> Papa quequin nuqui chianeboed Nuquin Papa matsesën naidtedi chuiquid nendac. —Nëid ëbi tantiesa neque. Icsano nidmenu. Nëid ëbi tantiaquid neque. Èbëdi tabadmenu —quequin matses abitedi chiendac. —Abëdi tabadmenquio icnushe —quiash Nuquin Papabëd icte bunec bëdamboec tabadnuna. <sup>18</sup> Nuquin tsusedpabon chiaiduidi naquin Nuquin Papa tantienquio nuqui icpondac. Aden Satanasën yuaido icsho Nuquin Papan nuqui bëdamboen istiapimbo icpanëdash. Adshun Satanas nuqui bedshunuen ¿piucquidida Nuquin Papan menepanëdash? Padenquio. Adquid icsabudtequid menenquio icquin <sup>19</sup> aton Mado Esus icsaisambo icsho matsesmepanëdash. Aden matsesmiacsho chieshëmënguidën cuستن dectanac Esus aton intac chididiquec abided cuidadec unëspondash. Nëbi aton Mado Esus tantiaquido bëdamboen isquin Nuquin Papan Satanas bedshunec. Aden Nuquin Papan bedshunaid yec bëdamboec tabadnuna. <sup>20</sup> Ëndenquimboshë abitedi uabi Nuquin Papa nadpampic. —Èmbi tantiacpadën yuecash matsesash matses cuidmenquio icnuec mibided cuidadec unësta, Mado —quepampic. Aden ambi chiampicpadomboen badedquio namenquio icboedëmbi nëbi nameshun Esus tantiasho mibi bëdamboen isec. <sup>21</sup> Abi tantiasho Esusëmbi Nuquin Papatsen nuqui tantiamec. Adoac nuqui naden tantiec. —Esus

unēsacsho uincuemeshun abēdi tabadmequin abitedishun Icbombo Nuquin Papan icmeoapanēdash. Ambi chiacpadomboen naquidquio Nuquin Papa nec. Ēbi unēsacsho uincuemeshun abi yacno ēbi tabadmendac —quequin Nuquin Papatsen nuqui tantiec.

*Esus tantiaquido tantiananquiotē chiaid*

<sup>22</sup> Nuquin Papan chiacpadomboen naic bēdambo yanshun mibēdtan Esus tantiaquido utsibo mimbi tantiec. Adecbidi muenquio yec tantiananquionona. <sup>23</sup> Esus tantiamequin Nuquin Papan chuca uaido nuqui neque. Adquid yec tantiananquionona. Nuqui chuca uaquid Nuquin Papa nibēdantiapimbo icquid icnuc ambi chiaid bēnudtiapimbo iquec. Aidēn chiaid tantiashun mimbi Ēsus tantiabempanēdac. <sup>24</sup> Ambi chiaid bēnudtiapimbo icte Nuquin Papan nuquin tsusedpa dada uamepampic naden chuiquin.

“Uasimbimboec unēsquid matses nec.

Cuēte bacuēec bēdamboshē isadboedi badedquio chodquequid nec. Adecbidi matses: ‘Con nabēdi bēdamboshē iquebi,’ queboedi badedquio unēsquid nec.

<sup>25</sup> Nuquin Papain nibēdantiapimbo icquid nec. Adnuc ambi chiaid bēnudtiapimbo iquec,”  
quequin abimbo chuipampic. Aidēn chiaidquio mibi chiac caondash.

## 2

*Nuquin Papan chiaid iste bunquionona, quiaid*

<sup>1</sup> Aden Nuquin Papan chiaid tantiash chieshēmēnec tabadenda. Utsi muauaında. —Esus tantiaquid nebi —quiashi icsamboec tabadenda. Utsin na isash: —Adquid con na nibēdec —quec chieshēmēnec tabadenda. Utsibo chieshēnec icsamboec onquenda. <sup>2</sup> Adenquio yec Nuquin Papan chiaid iste bunquionona. Tishac chucactsēc bacuēmpi shuma chishte bunquiabimboec Nuquin Papan chiaid iste bunquionona. —Bēdiactsēc tantiaboedi aid isban-isbanquin Nuquin Papan chiacpadomboen natiadquio yantsiabi —qeshun Nuquin Papan chiaid isbanuna. <sup>3</sup> —Esus tantiec bēdambo iquebi —qeshun Nuquin Papan chiaid isbanuna.

*Buintadbimboecquid Esus nec, quiaid*

<sup>4</sup> Nuqui tantiaid nadquio iquec. Shubu uanun buintadquio nacsitsinuen istuidshun: —Nēid bēdambo iqueque. Nēidquio naimbi —quiabimboen Nuquin Papan: —Ēmbi tantiaidquio yec mibi bēdambo iqueque. Ēmbi chiacpadomboen mibi namenu —capanēdash Esus. Adoaidi matses dadpenshunquio Esus chieshēnondash. Padnuen nuqui: —Nuquin Papa yacno puduedmianquid bēdambo iquec —quequin nuqui Esus tantiabempondac. <sup>5</sup> Aden Esus tantiaquido icsho isun Nuquin Papan aton shubun icquidobimboecnuc nuqui icmec. Adoac: —Con matses Esus tantiate, Papa —quequin Nuquin Papa chianequid nuqui yanec. —Nuquin Papa bēdamboshē iqueque. Ambi chiacpadomboenuidi natiadquio iquebi —quec bēdamboec tabadquidtsen nuqui yanec. Adsho isash: —Bēdambo iquec —quependac Nuquin Papa nuqui caic. <sup>6</sup> Aden aton Mado Esus tantiate chuiquin Nuquin Papan dada uamepampic naden.

“Buintad bēdambo icquid istuidash: ‘Nēidquio shubu uanun nitsinembi,’  
quiabimboen

Edusaden yacno ēbi bēdamboen ismequidquio isadaidbobēd tabadmendambi.

Aid caic: ‘Nēid tantiasho Nuquin Papan abi yacno nuqui tabadmendac,’  
quequin abi tantiaquido unēsacsho ēbi yacno tabadmendambi,”

quequin Nuquin Papan ambi chiaid dada uamepampic. <sup>7</sup> Aid tantiec: —Bëdamboshë iquec —quependac Esus tantiaquido. Utsibombien Esus chieshë nec. Ëndenquimbo Esus choabi icnuc aidën nate chuiquin Nuquin Papan dada uamepampic naden.

“Buintad bëdambo icquid istuidashi: ‘Nëidquio shubu uanun nitsinembi,’ quetiadquidi isuidac bimboen Nuquin Papan namiaid chieshë nac. Aden buintad isuidaidsin bedshun shubu uanun nitsinac bimboen Nuquin Papan tantiamiac padomboen utsibon ambi namiaid tantiosh,” quequin Nuquin Papan dada uamepampic. <sup>8</sup> Adshumbic Esus chieshëntetsen dada uamepampic naden chuiquin.

“Nuquin Papan abipadquidquio Edusaden yacno isadaid bobëd tabadmiacsho ambocquidon chieshë nendac.

Aid chieshë nquid nadquio iquendac. ‘Cuëte mabud iquec,’ quequin tantienquio yec nidec tocoshquetanec uebudac bimboec

ëbi bëdamboen ismequid tantienquio yec unësash icsano nidendac,” quequin Nuquin Papan ambi chiaid dada uamepampic. Aden Nuquin Papan chiaid tantiatipimbo icquin Esustsen tantiatipimbo iquec. —Adquid icsano nidmendambi —quequin Nuquin Papan tantiac padec Esus tantiesabo yec unësash icsano nidendac.

#### *Nuquin Papan matses nuqui nec, quequin chiaid*

<sup>9</sup> Esus tantiesabo dadpen icnubi Nuquin Papan Esus tantiamiaido nuqui nec. Icsambo iccondaids nuqui Esus tantiamepondash paposhqui ac bimboec nuc. Adoac: —Nuquin Papa bëdamboshë iquec. Ambi chiac padomboenuidi natiadquio iquebi —quec bëdamboec tabadquid nuqui yanec. Adembidi: —Con matses Esus tantiameta, Papa —quequin Nuquin Papa chianequid nuqui nendac. Adecbidi: —Nuquin Papa bëdambo iquec —quequin utsibo chuibanquid nuqui nendac. <sup>10</sup> Ënden abi tantiesabo icscho Nuquin Papan mibi bëdamboen isti apimbo icquin: —Con matses mibi nec —mibi catiapimbo icpanëdash. Nëbi Esus tantiascho Nuquin Papan mibi bëdamboen isquin: —Con matses mibi nec —mibi caindac.

#### *Bëdamboec tabadte chiaid*

<sup>11</sup> Ëmbi tantiaido mibi neque. Tantia. Mibi chuinu. —Nuquin Papa yacno tabadendabi —quiash Esus tantiesa icsate bunac padec icsainda. —Esus tantienquio yamane —quiash bëdamboec tabadta. <sup>12</sup> Esus tantiesabobëdi bëdamboec tabadnuna. —Ma aidontsen Esus tantianu —quiash adnuna. Adec mibi bëdamboec tabadsho isun mibi chieshë nquid icsamboen chuishumboedombi Esus tantiabenshun Nuquin Papa naden chiendac. —Mimbi namiaido bëdamboec tabadsho isun Esus tantiabenombi. Mibi bëdambo iquec, Papa —quendac.

<sup>13</sup> Bëdamboec tabadnuna. —Con Icho Esus matsesën chieshë nushe —queshun matses chuiquid dapatedishun chiac padomboen nanuna. Nuquin nidaids tabadquido abitedi chuiquid dapa pedesidente caidën chiac padomboen nanuna. <sup>14</sup> Aidën: —Mibitsen matses chuiquid icta —caidon chiac padomboentsen nanuna. Matses icsasho isun cuidquid neque. Adecbidi bëdamboec tabadsho isun: —Bëdambo icquid nec —caquid neque. Aidën chiac padomboen nanuna. <sup>15</sup> Aden Nuquin Papan chiac padomboen naic bëdamboec tabadsho isun: —Icsamboec tabadquid nec —mibi caboedobi adti apimbo yantsiash. Aden piushbimboecquin tantienquio icquin icsamboen chuiboedombi ambi icsamboen chiaid ëntsiash.

<sup>16</sup> Satanasën yuaido icscho Esusën bedshunaid yec nëbi icsambo icquidën yuapenquio yec bëdamboec tabadnuna. Icsanuec: —Utsin yuapenquio yec



ëbi bunaiduidi naimbi —quenda. Nuquin Papan yuambo yec bēdamboec tabadnuna. <sup>17</sup> Matses abitedi bēdamboen isnuna. Esus tantiaquido icquin nuquibēdtan Esus tantiaquido utsitedi tantiaquionona. Dacuēdampambo Nuquin Papa icsho tantiash bēdamboec tabadnuna. Chuiquid dapambo pedesidente caid bēdamboen isquin aidēn chiacpadomboen nabanuna.

### *Yuabo chiaid*

<sup>18</sup> Tanta, yuabo. Esus tantiaquido icsho mibi chuinu. Min icbon chiacpadomboen nata. Min icbo bēdambo icquid icnuc adota. Min icbo dacuēdampambo icquid ancanquidquio icnubi adembidi nata. <sup>19</sup> Adec Nuquin Papa tantiaquid yec bēdambo icsho cuesaqui chieshēmēnenquio icsho: —Aid yua bēdambo iquec —quequin Nuquin Papan mibi bēdamboen istiashe. Min icbon chiacpadomboen nata. <sup>20</sup> ¿Icsamboec tabadquid cuesac chieshēmēnenquio icquidta Nuquin Papan: —Aid yua bēdambo iquec —capatsiash? Padenquio. Nuquin Papan chiacpadquiec bēdamboec tabadquidi cuesaqui chieshtoenquio icsho: —Aid yua bēdambo iquec —Nuquin Papan catsiashe. Bēdambo icta.

### *Chieshtoenquio yec Esus unēsaid*

<sup>21</sup> —Chieshēnaqui chieshtotiadquio iquebi —¿quecta ique? Tanta. Mibi chuinu. —Con Mado Esusbimboec ma icnu. Chieshēnaqui ma chieshtoenquio icnu —queshun Nuquin Papan nuqui Esus tantiaquid icmepondash. Esus nadondash. Nuquin Papa nuqui cuidmenquio icnuec abided ciudadec mēyadec unēspondash. <sup>22</sup> Nuquin Papan dada uamepampicpadquio “muesambo yec icsaisambo icpondash.” <sup>23</sup> Adquid icsho abi chieshēnquidon mamēnshunaqui Esusēn chushcainquio icpondash. Aidon matonbudnetanquin buanshun cuستن dectanac: —Mibitsen cuidendambi —cainquio icpondash. Adenquio yec nadpondash. —Nuquin Papan matsēsēn naidtedi tantiaquid icquin bēdambo icquid abēdi tabadmequin icsambo icquid cuidquin icsano nidmendac —quiash chieshēmēnenquio icpondash. <sup>24</sup> Adash: —Ēbi tantiaquid ma icsaid ucudacbimboec bēdamboec tabadnu —quiash nuqui icsaid bedshunec abided ciudadec unēspondash. Adec aton Madoded ciudadec unēsacsho isash nēish bēdanshun Nuquin Papan aton Mado tantiaquido bēdamboen isec. <sup>25</sup> Yuan icbo cuenēnacbimboen Nuquin Icbo nuqui tantienquio icpondac. Adoboedi nēbi: —Con Icbon ēbi bēdamboen dayun uaqin ēbi bēdamboen namendac —queshun nuqui Esus tantieque. Bēdamboen nanuna.

## 3

### *Bēnēbēdta chido chiaid*

<sup>1-2</sup> Tanta, chidobo. Bēnēchoquid icsho mibi chuinu. Esus tantiaquid icquin min bēnēn chiacpadomboen nata. —Esus tantiec ēbi bēdamboec tabadsho isun Nuquin Papan chiaid tantienquio icboedēmbi con bēnēn Esus tantiabentsiash. “Mimbisen Esus tantiabenta,” quequin ēmbi chiambobi Esus tantiabentsiash —queshun min bēnēn chiacpadomboen nata. <sup>3</sup> Bēdamboec tabadquid ictiadquio icquin casēdu payuteuidi tantienda. Adem-bidi dashcute bēdambo icquid dasiuidteuidi tantienda. —“Bēdambo isadec. Mibi bēdambo iquec,” mabi canu —quiash nacnemēdteuidi tantienda. <sup>4</sup> —Bēdambo mibi iquec —camenuc bēdamboec tabadta. Nēishēmēnenquio icquin bēdamboen nabanta. Chieshenquio icquin min bēnēn chiacpadomboen naquid icta. Mibi adquio icsho isash: —Mibi bēdambo iquec —quendac

Nuquin Papa. <sup>5</sup> Ĕndenquimbo isadaidbo tsusedpan chido Nuquin Papa tantiaquid yec adquio icpampic. Aton bĕnĕn chiacpadomboen naic bĕdambo icpampic. <sup>6</sup>—Con bĕnĕ con icbobimboec iquec—quequin aton bĕnĕ Abadauan caidĕn chiacpadomboen Sada caidĕn napampic. Esus tantiaquid icsho mamĕnshunaqui min bĕnĕ dacuĕdĕnenquio icquin aidĕn chiacpadomboen naic bĕdamboec tabadec Sadapadquio mibi ictsiac. Adquid bĕdambo iquec. <sup>7</sup> Tantia. Bĕnĕtsen chuinu. Abia uimabudquid icsho min chido bĕdamboen ista. Mibĕdtan Esus tantiaquid yec Nuquin Papa yacno mibĕdi tabadtequid neque. Min chido bĕdamboen ista. —Ĕbi bĕdamboen ista, Papa—quequin mimbi chiaid Nuquin Papan tantienquio icnushe. Min chido bĕdamboen ista.

*Bĕdamboec tabad, quequin chiaid*

<sup>8</sup> Nĕbi Esus tantiaquido abitedi chuinu. Tantia. —Nuquin Papan chiacpadomboen nanuna—quiash bĕdamboec isnanuna. Cuishonquequidbĕd cuishonquec shubiquidbĕd shubinuna. Adec tantiananquionona. —Ĕmbi naiduidi naimbi—quenquio icquin utsibon chiaidtsen nanuna. <sup>9</sup> Mibi chieshĕnaqui cuidnanenda. Mibi chieshĕnquin icsamboen chuishunaqui cuidnanec icsamboec chuishunanenda. Adenquio icquin Nuquin Papa chianeta. —Ĕbi chieshĕnquid bĕdamboen isquin bĕdamboen tabadme, Papa—quequin Nuquin Papa chianeta. —Ĕmbi bĕdamboen isaidon ma aton matses utsibo bĕdamboen isnu—queshun Nuquin Papan nuqui Esus tantiaquido icmiaye. Bĕdamboec tabadnuna. <sup>10</sup> Adec bĕdamboec tabadte chuiquin Nuquin Papan dada uamepampic naden.

“Bĕdamboec tabadte bunquidĕn nadoendac.

Adonante bunenquio icquidĕmbi utsibo muauainquio iquendac.

Chieshĕnquin utsibo icsamboen chienquio iquendac.

<sup>11</sup> Icsamboec tabadboedi bĕdamboec tabadendac. Utsibo chieshĕnansho isash: ‘Padi. Chieshĕnanenda,’ quendac.

<sup>12</sup> Adec bĕdamboec tabadsho Nuquin Papan bĕdamboen isendac.

Aden bĕdamboen isaidon: ‘Ĕmbi chuisho tantia. Ĕbi bĕdamboen ista, Papa,’ quequin abi chuisho Nuquin Papan tantiendac.

Icsamboec tabadshoen bĕdamboen istiapimbo iquendac,” quequin Nuquin Papan dada uamepampic.

*Cuesaqi dacuĕdenda, quequin chiaid*

<sup>13</sup> ĴBĕdamboec tabadshoda bĕdambo icquidĕn badedquio mibi cuespatsiash? Padenquio ictsiash. <sup>14</sup> Bĕdamboec tabadsho isun icsambo icquidĕn cuesacsho mibi Nuquin Papan bĕdamboen istsiashe. Mibi chieshĕnquido dacuĕdĕnenda. <sup>15</sup> Dacuĕdĕnenquio icquin: —Con Icbo Esuquidistu nec—quequin ambi chiacpadomboen nanuna. Aden mimbi Esus tantianuc utsibo: —ĴAtotsieshun Esus tantie? —quesho: —“Abided cuidadec unĕsaid Esus tantiasho Nuquin Papan ĕbi bĕdamboen isquin unĕsacsho abi yacno ĕbi tabadmendac,” qeshun Esus tantiembi—quequin Esus tantiesabo chuibanuna.

<sup>16</sup> Aden nĕishĕmĕnenquio icquin Esusĕn naid chuibanuna. Aden bĕdamboen chuinec Esus tantiaquiec bĕdamboec tabadnuna. —Ĕbi bĕdamboec tabadsho isash ĕbi chieshĕnquin muauaquid: “Bĕdambo icquidi muauachitombi. Ic-sachitobi,” ma quenu—quiash bĕdamboec tabadnuna. <sup>17</sup> —Ĕbi tantiaquid utsibon chieshĕnendac—quequin Nuquin Papan tantiacpadomboen Nuquin Papa tantiaquido utsi-utsien utsibon chieshĕnendac. Bĕdamboec tabadquid icsho utsibon chieshĕnaqui nuqui chieshtoenquio icsho isash: —Mibi bĕdambo iquec—quetsiash Nuquin Papa nuqui caic. Ĭcsambo icsho quĕnĕn nauedaidi nĕishenquio icsho: —Mibi bĕdambo iquec—cainquio ictsiash Nuquin Papan.

*Esus unēsaid tantia, quiaid*

<sup>18</sup> Chieshēnaqui Esusbimboec chieshtoenquo yec bēdamboec tabadnuna. Aid icsaisambo yequi nuqui icsaid bedshunec abided ciudadec unēspondash. Aden Nuquin Papa abi tantiaquido bēdamboen ismenuec abentsecquiobi unēspondash padpidec unēsenquo icnuec. Aton dada unēsambi aton tantiate unēsabi icpanēdash. <sup>19</sup> Adec aton dada unēsambi aton tantiate icnuc ēndenquimboshē Noe caidēn matses abi tantiesabo icsho Nuquin Papan cuidquin unēs uampido uidēn uashun quēnēn sauedampicno Esus nidpanēdash. Ambo nidshun Nuquin Papan cuidpampido Esusēn ambi naboed chuibampanēdash. <sup>20</sup> Naden Nuquin Papan aido cuidquin unēs uapampic. Ēndenquimboshē aton matsesbēd tabadec Noe bēdambo icnubi aton matses icsamboshē icpampic. Adnubien Nuquin Papan: —Matses icsaquido abitedi uesquin unēs uanuen nidaid abitedi acte mabudadmembique. Baded cano dapa nacnen —quequin Nuquin Papan Noe caid chuiampic. Adoac badedquo cano dapa nacnemēdenquo yacpadembi Nuquin Papan badedi cuidenquo icpampic: —Ma abi icsaid ēnshun ēbi tantianu —qeshun. Adnubien cano dapa nacnentanec Noe chedo 8tedpactsēc cano dapa antabēdtopampic. Adnubien aido antabēdtoaid cano dapa acten bedtoac nuadtopampic. Utsiboen acte mabudadmiaidēn mentoadbudnepampic. Noe abi tantiaquidquo icsho Nuquin Papan cuidenquo icpampic.

<sup>21</sup> Adembidi Esus tantiasho nuqui cuidenquo iquec. —“Esus tantiaquid nebi,” quequin utsibo ismequin acten mentomembi —qeshun nuqui acten mentomec. ¿Bēchish ucquinda nuqui adodi? Padenquo. Nuquin Papa naden chuiquin: —Esus tantiaquin icsaid ucacbimboen mimbi chiacpadomboen natiadquo iquebi, Papa —quequin nuqui adoec. Aden abi tantiasho Nuquin Papan uincuemenēdaidēn Esuquidistun nuqui cuidmenquo iquec. <sup>22</sup> Aidi uincuenash Nuquin Papa yacno nidash aidbēdi tsadoaic abitedishun Icbombo yanoac. Abitedimbo chuiquid dapa icquin ambi chiacpadomboen abitedi namendac. Nuquin Papan abi yacnoshon uaido mayan bēdabo bēdamboen namequimbic Satanas aton yuabo mayan icsabobēdta Esusēn cuidendac.

**4***Bēdamboec tabadnuna, quiaid*

<sup>1</sup> Nuquin Papan tantiacpadomboen nasho utsibon chieshēnquin mēyanaqui Esus chieshtoenquo icpondash. Adembidi chieshēmēnquidēn chieshēnaqui adecbidi chieshtoenda. Abided ciudadec unēsaid Esus tantiaquin nuqui icsaid nuqui ēnendac. <sup>2</sup> Aden nuqui tantiacpadomboen nainquo icquin Nuquin Papan chiacpadomboen natiadquo nuqui iquendac. <sup>3</sup> Nuquin Papa tantiesabon nacpadomboen Nuquin Papan chiaid mimbi yuen niacniacpondac. Utsin chido chudquinc utsin bēnē chudmequinc tantiadenuen acte paēmbo icquid acquinc: —Nēid papa canu —quequin matsesbimboecnuc nacnenquinc mimbi capondac. Adec icsateuidi bunec mēmuntiapimbo mibi icpondac. Adquid iccondaidi nēbi bēdamboec tabadta. <sup>4</sup> Adec bēdamboec tabadsho isun mibēd icsaondaidēn: —¿Atotsieshun nuqui naondacpadomboen nainquo ique? Mimbi Nuquin Papa caid nibēdec —quequin mibi icsamboen chuiquin mibi mamēnshunendac. <sup>5</sup> Aden mibi mamēnshunquid Nuquin Papan cuidendac. Cuidnumbi matsesēn naidtedi tantiaquid icquin Nuquin Papan: —¿Mitsipaden nao? ¿Ada bēdamboec tabado? —cac ēnden unēsaidobēdtan unēsabi icquidotedishun ambi naidtedi uesquin

chiendac. <sup>6</sup> Aden abëdi tabadmete tantiaquin Nuquin Papan namiac Esus chuibenequidon chuibenepondash. Adoac Esus tantiaquido yanash Nuquin Papan Adan cuidquin unësquid icmiacpadec unësquid yec unësashic Nuquin Papabëd tabadendac padpidec unësenquoio yec.

*Utsibo nashununa, quiaid*

<sup>7</sup> Tantia. Mibitedi chuinu. Nuquin Papan cuidte nëbi iqueque. Esus tantiec nuqui icsate bunaid ënash mëmunec bëdamboec tabadnuna. — Ma ëmbi abi chianesho Nuquin Papan bëdamboen tantianu —quiash adta. <sup>8</sup> —Tantiananquido chieshënanec cuidnante bunenquoio iquec —quiash ënëdenquoio yec tantiananquionona. <sup>9</sup> Nuquibëdtan Esus tantiaquido isedec chosho bëdamboen isnuna. Shubu utsinquido ënapenuësh chosho adembidi chieshënenquoio icquin min shubun yued. <sup>10</sup> Nuquin Papan tantiamiacpadomboen nuquibëdtan Esus tantiaquido nashuntiad. Esus tantiaquidquo icmenuen chieshenquoio icquin nanuna. <sup>11</sup> ¿Ada Nuquin Papan Esusën naid chuibanquid mibi icmiac? Adquid icquin Nuquin Papan chiaidquo chuibanquiota. ¿Ada Nuquin Papan mibëdtan Esus tantiaquido nashunquid mibi icmiac? Adquid icmiac: —Nuquin Papan namiacpadomboen matses nashunembi —quequin Esus tantiaquido nashunta. —“Ëbi nashunquid bëdamboen namequid Nuquin Papa bëdamboshë iquec,” ma ëmbi nashunaido quenu —queshun utsibo nashununa. —Abitedishun icbombo yec Nuquin Papa bëdamboshë iquec —canuna ënenquoio icquin.

*Chieshënaqui chieshtoenquoio icte chiaid*

<sup>12</sup> Ëmbi tantiaido mibi neque. Tantia. —¿Atotsieshun matsesën ëbi chieshëmpeba? —¿quecta ique? ¿Mibentsëquida chieshëndic? Ma Esus tantiaquido dadpenquoio chieshëmpayoc. <sup>13</sup> —Chieshënquin Esuquidistu comapenen mëyanacimboen Esus tantiesabon ëbitsen mëyanosh. Esus tantiaquid icshoeni adochitosh —quiash Esus tantiec bëdambo icnuna. —Utsibon chieshënaidi abi tantiaquid ambi namiacno buanuec Nuquin Icbo Esus choec —quiash abi chote ushën cuishonquenush adnuna. <sup>14</sup> —Esuquidistu tantiaquid nec —queshun chieshëmënnquidon natiamiaid mibi bëdambo iquendac. Nuquin Papan Mayan mibëd tabadquin Nuquin Papa yacno tabadte mibi tantiamequin mibi bëdambo icmendac. <sup>15</sup> Utsibo icsasho abi chuiquidën natiamequin cuidquid. Cuesunianquid yec ampequid yec chieshëmënnquin icsamboen chuishunquid yec quec icsasho chuiquidën cuidsho isun: — Bëdambo iquec —catsiambi. Adec icsainda. <sup>16</sup> Esus tantiaquid icsho utsibon chieshënac dacuëdenda. Adec dacuëdenquoio icquin: —Nuquin Papa bëdamboshë iquec. Aton Mado Esus tantiaquid icmiac bëdambo iquebi —quequin ënenquoio icquin Esus tantianuna. <sup>17</sup> —Nuquin Papan cuidte ushë nëbi icnuc ambi con matses caido Esus tantiaquido chieshëmënnquidon natiamendac —quiacpaden nëbi tauaquin mibi natiamec. Adsho isun: — Chieshëmënnquidën chieshënac ëmbi tantiacpadomboen abi icsaid ëntsiash —queshun Nuquin Papan: —Natiamenda —cainquoio iquec. Aden abi tantiaquido icsaid ëmete bunquin nashun ¿bëdiactsëcta abi tantiesabo cuidpec? <sup>18</sup> Naden chuiquin Nuquin Papan dada uamepampic. “Aden chieshëndeniac natiambo yan-yanequi unësash Nuquin Papabëd abi tantiaquido tabadendac. Nuqui adnuc ¿bëdiactsëcta ambi chiaid niac-niacquido Nuquin Papan cuidpec? Padenquoio. Comapenen cuidendac,” quequin dada uamepampic. <sup>19</sup> Nuquin Papan tantiacpadec mëyadec Esus tantiaquid ma nadpanuna. — Ëbi uaquidën Nuquin Papan ambi chiacpadomboen ëbi bëdamboen namec. Aid tantiec bëdambo iquebi —quiash ma bëdamboec tabadpanuna.

## 5

*Esus tantiaquido chuibanquid Petedon chiaid*

<sup>1</sup> Tanta. Esus tantiaquido chuibanquido icsho mibi chuinu. Mibipadquid Esus tantiaquido chuibanquid nebi. Paëmboshë icmequin Esuquidistu unës uasho isondambi. Aidën padpidec nidaidën choshon abi yacno buanuen nuqui beduanegue. Tanta. <sup>2</sup> Icbo yua cudasacimboec mibëd icquido Esus tantiaquido cudasta. —Esus tantienquo yanushe —queshun: —Nuquin Papan chiaid niaquenquo yec bëdamboec tabad —quequin chuibanta. —Esus tantiaquido chuibanquid icta —cac: —“Padi,” quetiadquo icquimbi naimbi —quenquo icquin: —Aden Esus tantiaquido nashumbantsiambi —quec Esus tantiaquido chuibanquidquo icta. —Piucquid dadpen bednun nanu —quenquo icquin Nuquin Papan chiacpadomboen natiadquo yec Esus tantiaquido chuibanquid icta. <sup>3</sup> —Nëidtedi Esus tantiaquido bëdamboen name —caidtedi bëdamboen isequi chushcanenda. Adenquo yec: —Ëbi yacpadec ma tabadnu —quec bëdamboec tabad. <sup>4</sup> Aden Esus tantiaquido chuibanquidën bëdamboen namesho isun Nuquin Icbon nidaidën padpidec choshon utsibo ismequin: —Nëid bëdambo icquid nec —queshun chuibanquid ambi namiaidobëdta abi yacno buanendac.

*Esus tantiaquidon nate utsi chiaid*

<sup>5</sup> Tanta, caniabo. Mibitsen chuinu. Mibi chuiquid dapabon chiaid niaquenquo icquin aidën chiacpadomboen nata. Aidtedtsëqui caniabo chuishumbic mibi yacnocquidotedi chuinu. —Ëbiuidtsëqui bëdambo iquebi. Ëmbimbo naiduidi naimbi —quenquo icquin utsin nacpadomboentsen nata. Aden chuiquin Nuquin Papan ambi chiaid naden dada uamepampic. “Nuquin Papa tantienquo icquin aton matses utsibo tantienquo icquin ambi naiduidtsëqui nasho: ‘Adquid icsambo iquec,’ catsiash Nuquin Papan.

Utsimbien Nuquin Papa tantiaquin utsibon naidtsen nasho Nuquin Papan bëdamboen isquin bëdambo icmec,”

quequin Nuquin Papan ambi chiaid dada uamepampic. <sup>6</sup> Aden Nuquin Papan chiacpadomboen nabanuna. Nadatiambo icquid yec abitedishun Icbombo Nuquin Papa neque. Utsibon chieshënaqui chieshtoenquo icnuna. Adec chieshtoenquo icsho ambi tantiacpadën utsibo ismequin: —Ëbi tantiaquidquo mibi neque. Ëbëdi tabadec cho —nuqui caindac Nuquin Papan.

<sup>7</sup> Aidën nuqui tantieque. —¿Atotsimbi pepeba? ¿Ëbida cuespeba? ¿Con matsesta unëspeba? —quequin nuqui dacuëdaidtedi Nuquin Papa chuinuna.

<sup>8</sup> Nuqui icsate bunacpadec icsainquo icquin Esusuidi tantianuna. Esus tantiaquido icsho Satanasën nuqui chieshënquiec. Esus bedshunuen nuqui icsametiadquo icquin bëdin nëish nibënacimboen ambi icsametequid Satanasën ënenquo icquin nibëbeneque. <sup>9</sup> Ista. Icsamenda. Chieshtomenda. —Satanasën icsamechitoshe —queshun Nuquin Papan chiaid niacniaquenquo icquin Esus tantiaquionona. —Ëbi chieshënacpadomboen Esus tantiaquid utsibo nidaid utsi-utsiec yacno tabadquido utsibon chieshënac caosh —queshun chieshtoenquo icquin Esus tantianuna. <sup>10</sup> Aden utsibon chieshënaido yec yuec-yuecpactsëc nuqui tabadec. Adshobien abi yacno buanquin nuqui bëdambo icmequidën Nuquin Papan Satanas nuqui icsa uamenquo iquendac. Adembidi Nuquin Papan nuqui bëdamboen isquid icquin dayacquio yacimboecnuc chieshtoenquo icquid nuqui icmendac.

<sup>11</sup> Ëmbi aden chuisho tantiashun: —Mibi bëdamboshë iquec, Papa. Mimbi

tantiacpadomboen abitedi mimbi namendac. Abitedishun Icbombo mibi nec, Papa —Nuquin Papa canuna ënenquoio icquin.

*Petedon ënquimbi chiaid.*

<sup>12</sup> Esus tantiaquidquo Sidas caid nëidtedtsëqui ëmbi dada uaboed mibi yacno buamembi. —Esusquo isondambi. Aid tantiasho Nuquin Papan matses bëdamboen isbenendac —quequin abimbo mibi chiombique. Chieshtoenquoio icquin Esus tantianuna. <sup>13</sup> Nuquin Papan tantiamiac nuquibëdtan Esus tantiaquido ëmbi Babidonia caid yacnocquidon: —Aido unësquoio iquec —mibi caosh. Babidonia caidbidi Doma caic. Con madobimboecquid Madcosën —Aido unësquoio iquec —mibi caosh. <sup>14</sup>—Ëbëdtan Esus tantiaquido nec —quiash: —Mibi unësquoio iquec —cananuna. —Ma Nuquin Papan mibi Esus tantiaquidotedi bëdambo icmepanu —quequin Nuquin Papa chianembi. Padi. Aidedi chuiquin dada uaombi.

## PETEDON DADA UAID 2

### *Tauamboen chiaid*

<sup>1</sup> Petedo Simon caid nebi. Abëd icquid yec aton yuambo icsho Esuquidistun: —Ëmbi naid chuibeneta —caidquio nebi. Ëbëdtan Esus tantiaquido mibi neque. Mimbi iste dada uanu. Abi tantiaquido cuidmenquio icnuec abided cuidadaid Esus tantiasho Nuquin Papan bëdamboen isaido nuqui nec.

<sup>2</sup> Ëbëdtan Esus tantiaquido icsho mibi tantiaquin Nuquin Papa chianembi naden. —Aidon Esus tantiatsëcsho mibëdta Esus tantiamequin bëdambo icme, Papa. Aido bëdamboen isquiota, Papa —quequin Nuquin Papa chianembi.

### *Nuquin Papan bëdambo icmete chiaid*

<sup>3</sup> Comapenen tantiaquid icquin Nuquin Papan namiac aidën chiaid niacniacte bunenquio yec Esus tantiaquido bëdamboec tabadec unësash Nuquin Papa yacno tabadendac. Abipadquid utsi nibëdnuc bëdamboshë icquid icquin Nuquin Papan Esus tantiamiaido nuqui nec. <sup>4</sup> Abipadquidquio Esusën chiondacadpadomboen abi tantiaquidobëdta Nuquin Papan aton Mayan tabadmequin bëdambo icmec. Aden abipadquio icnuc bëdambo icmiac icsate bunenquio yanec nuqui bëdamboec tabadec. Utsibo icsateuidi bunec icsaquionobi nuqui bëdamboec tabadendac.

<sup>5</sup> Aden Nuquin Papan Esus tantiamiaido yec dayacquio yacbimboec ënëdenquio yec bëdamboec tabadnuna. Adechidi Nuquin Papan chiaidquio tantiec tabadnuna. <sup>6</sup> Aden Nuquin Papan chiaidquio tantiec nuqui icsate bunacpadec icsainquio icquin mëmununa. Aden mëmunquid yec nuqui chieshënbëdëdi chieshënanenquio yec chieshtoenquio icquin Esus tantianuna. Nuquin Papatsen tantiec bëdamboec tabadnuna. <sup>7</sup> Aden Nuquin Papabëdta Esus tantiaquido yec nashunanquionona. Adec nashunanquioquin Esus tantiesabo tantianuna. <sup>8</sup> Ëmbi chuiboedtedi nabanquin chieshtoenquio icquin adenuidi nanuna. Aden naquin Esus bëdiactsëc tantiatsëcboedëmbi chieshtoenquio icquin nuqui Esus tantiaquiotsiac. <sup>9</sup> Ëmbi chuibocpadomboen naisa pamumëdacbimboec iquec. Adquidon: —Aton Mado Esus tantiasho icsaid ucudacbimboecnuc Nuquin Papan nuqui bëdamboen isec —queboedombi bëpiscudquin tantienquio yanec.

<sup>10</sup> Ëbëdtan Esus tantiaquido mibi neque. Tantia. Mibitedi chuinu. Ëmbi aden chuisho tantiasch chieshtoenquio icquin Esus tantiec bëdamboec tabadnuna. Adec tabadquin naden nuqui tantiendac. —Ëndenquimboshë ëbi tishabi icnuc ëbi caic: “Esus tantiamendambi,” quequin ambi chiampicpadomboen Nuquin Papan nëbi tantiamiac Esus tantiabenombi —quequin nuqui tantiendac. Aden tantiec Esus tantienquio icquid nuqui yanenquio ictsiac. <sup>11</sup> Adec bëdamboec tabadash unësacsho: —Ëbi tantiaquid mibi neque. Ëbëdi tabadec cho —queshun ambi namiacno abëdi tabadmequin Nuquin Icho Esuquidistun nuqui bëdambo icmendac padpidec unësenquio icnuc. <sup>12</sup> Ëmbi aden chuiboedtedi mimbi tantiondac. Aden tantiabosh Esus tantiec mibi bëdamboec tabadcuenondac. Aden mimbi tantiondaidi mibi chuided-chuidedendambi. <sup>13</sup> —Nëbi unësendabi —queboedi ëbi unësabi yacpadembi mibi chuided-chuidedendambi. <sup>14</sup> —Adënuquio mibi unësendac —quequin Nuquin Icho Esuquidistun chiapadën nëbi unësebi. <sup>15</sup> —Ëbi unësan ëmbi chiondaid ma bëpiscudenquio icnu —queshun mibi chuiquin dada uanu.

### *Nuquin Papan Esus chiaid*

<sup>16</sup> ¿Muaquindambi mibi Esus chuidionda? Padenquoio. —Nadatiambo icquin nabanquin Esusën ismedenepondash. Adquid yec abuc nidnush: “Padpidec nidaidën choaindabi,” quepondash Esus —¿quectabi muadionda? Padenquoio. Ëmbimbo isondaicquio mambi mibi chiondac. —Nëid con Madombo nec —quequin Nuquin Papan ismiac Esus isondambi. <sup>17-18</sup> Nadquoio iccondash. Macuësh dapan dectatoash Esus bëchamauanqueic iccondash. Adnubien Nuquin Papan: —Con Madombo nec. Ëmbi tantiaicquio yec bëdamboshë iquec. Nëid isec bëdambo iquebi —quequin abucshun dacuëdampamboecnuc chuipondash.

<sup>19</sup> ¿Ëmbentsëquidambi Esus chuibanquin nape? Padenquoio. Ëndenquimboshë Esus chote tantiamequin Nuquin Papan isadaidbo tsusedpabo dada uamepampic. Pacuënëdadbimboen utsibon tantienquoio icnubi paposhquiabimboecnuc Esus chote tantiamenuen dada uamepampic. Aden Nuquin Papan chiaid isec onquequin bëdamboen tantianuna: —Muaquidon chuisho tantiamane —queshun. —Abitedishun Icbombo nebi —quequin ismenuec padpidec Esus choabi yacpadembi Nuquin Papan chiaid bëdamboen tantianuna. <sup>20</sup> —Nuquin Papan nadoendac —quequin ¿ambembi chiaidta nuquin tsusedpabon dada uapampic? Padenquoio. <sup>21</sup> Ambembi chiaid dada uainquoio icquin Nuquin Papan chiaicquio dada uapampic. Nuquin Papan Mayanën tantiamiac abimbo chuipampic.

## 2

### *Muaquido iquendac, quequin chiaid*

<sup>1</sup> Nuquin Papan chiaicquio isadaidbo tsusedpabon chuinubien utsibo: —Nuquin Papan nadoendac —quec muapampic. Nëbi adquidbidi iquendac. Mibi yacno puduedash ambembi chiaid chiec muasho tantishun: —Mibi muequi nec —badedquoio cainquoio mimbi iquendac. —Abided ciudadec unësaid Esus tantiaquid nebi —queboedi: —Ësusën chiacpadomboen natiapimbo iquebi. Adshobi Nuquin Papan ëbi cuidenquoio ictsiash —quequin muaquin chiendac. Adquid Nuquin Papan icsambo icquido cuidacno nidmequin cuidendac. <sup>2</sup> Aden muaquidën chuisho tantishun Esus tantiauidtsëcboedombi dadpenshun aidën chiaid tantiendac. Adashic Nuquin Papan chiaid niac-niaquec muaquido tabadadbimboec padpidec icsamboec tabadoaindac. Adsho isun: —Esus tantiaquidobi icsambo iqueque. Is —caindac utsibon. <sup>3</sup> Muaquido tantienda. Aidon piucquid comapenec bunquin ambembi chiaicquio mibi chiec. ¿Muasho tantienquioda Nuquin Papan icpec? ¿Ada Nuquin Papa ushpec? Muasho tantishun aido cuidendac. —Adquid icsano nidmequin cuidendambi —quequin ambi ëndenquimboshë tantiapampicpadomboen comapenen Nuquin Papan cuidendac.

<sup>4</sup> Ambi chiaid niac-niacsho icsano nidmequin cuidquid Nuquin Papa nendac. Ëndenquimboshë nidaid uabi icnuc ambi abi yacnoshon uaido mayan utsin-utsinquien: —Ëmbiquen abitedi namenu —quequin ambi chiaid niac-niacsho isun Nuquin Papan icsamboshë yacno nidmequin cuidpampic. —Chian anëdënquiacno nësecanumbi nabono —queshun aden tauamboen Satanas chedo cuidpampic. <sup>5</sup> Adshumbic yuecquoio ictanquin matses abitedishun ambi chiaid niac-niacsho isun nidaid abichobi mabudadmequin Nuquin Papan matses uesquin unës uapampic. Noeuidtsëqui padambo icpampic. —Bëdamboec tabadnuna —quequin Nuquin Papan chiaid chuibanquid icsho Noe chedo 8tedpactsëc Nuquin Papan cuidenquoio icpampic. <sup>6</sup> Adshumbic yuecquoio ictanquin matses utsibon Nuquin Papan chiaid niac-niacsho cuidquin nëdëncapampic. Shubu dadpen icquid nëid daëd icpampic.



Nëidic Sodoma caid. Nëidic Comoda caid. Ambo tabadquido aton shububëdi abucuësh taboadampamboec paëdquidën pichiquepampic matses nibëdquio yec. —Aden icsambo icquido cuidquid nebi —quequin Nuquin Papan adopampic. <sup>7-8</sup> Sodoma caid yacnocquid abentsëqui Dod caid pichiquenquio icnuc Nuquin Papan cuemepampic. Bëdambo icquid yec: —Nuquin Papan chiaid niac-niaquec nëmbo icquido icsamboecuidi tabadec —quec shubieci tsadsho cuemetsaidi pichiquiambo ictsampic. <sup>9</sup> Aden abi tantiaquido daëd Noebëdta Dod Nuquin Papan cuidambo icpampic. Adembidi nëbi abi tantiaquido cuidenquio icquid Nuquin Papa nendac. Utsibon chieshënaidi abi tantiaquido bëdambo icmequid nendac. Icsambo icquido cuidquid icquimbi matses cuidte ushë choabi icnuc nëbi tauaquin icsambo icquido Nuquin Papan cuidendac.

<sup>10</sup> Muaquido nadquio icsho Nuquin Papan cuidendac. Abi bunaiduidi naic icsaic. Adembidi pabiate shëcuë nibëdadbimboen abi chuiquid dapan chiaid niac-niacquinc Nuquin Papan chiaid niac-niacquinc caic. —Con nauidsëqui bunebi —qeshun ambi naiduidtsëqui naic. Dacuëdtiadquidi dacuëdenquio icquin Esus tantiaquido chuiquid dapa caic: —¿Bëdamboen namequidta nedic? —quequin icsamboen chuishunec. <sup>11</sup> Padnuen Nuquin Papan abi yacnoshon uaido mayan bëdabon adec muaquido chuishuntiapimbo iquec. Muaquido bëdiactsëc tantiaquido icnubi comapenen tantiaquido icquin mayan bëdabon Nuquin Papa naden chienquio iquec. —Aido baded cuid, Papa —cainquio iquec. —Ambi cuidte ambentsëqui tantiaquid Nuquin Papa nec —qeshun adoenquio iquec. <sup>12</sup> Padnuen ëmbi chuiboedo muaquidon Nuquin Papambo tantienquio icquin Nuquin Papa muauaquin chuibanec. Adec icsamboec tabadsho Nuquin Papan cuidendac. ¿Ada bëdi cuidnushe quepadic? Padenquio. Adembidi abi cuidte tantienquio icsho Nuquin Papan cuidendac.

<sup>13</sup> Nuquin Papan chiaid niac-niacmequin muaquidon utsibo icsamesho Nuquin Papan cuidendac. Icsateuidi bunquieci inchëshën icsash badiadëntsen icsaic: —Bëdambo iquebi —quec adquido cuishonquec. Esus tantiaquin penuec mibi cho-choacno mibëd tabadec muaquidotsen chopac caosh. —Esus tantiaquidbidi nebi —quiash mibëd tabadec aid icsasho isash: —Esus tantiaquid abitedi icsaic —quependac utsibo. <sup>14</sup> Muaquido utsin chido mëismec tabadec. Nuquin Papan chiaid niac-niaquec icsaic ënëdenquio iquec. Adquid icquin Esus tantiatsëcquido icsamec. Utsin chido chudquinc muaquin piucquid dadpen bedquinc caic abi bunaidquio naic icsaic. <sup>15</sup> Nuquin Papan chiaid niac-niaquec icsateuidi bunquieci. Èndenquimboshë matses utsi Beyod caidën mado Badan caid Nuquin Papan chiaid chuiquid yequi piucquid dadpen bunec Nuquin Papan chiaid niactiadquio icpampic. <sup>16</sup> Adnubien abi catsadaid cabayobitsecquid asno caid matsesbimboec onquiampampic. Ambi chiaidquio chuimequin Nuquin Papan oncamiac: —¿Atotsieshun icsamboen nai? —cac aton icbo icsanuec niduidboedi: —Aucbidi nidnu —quepampic. Adquio muaquido iquec. Piucquid comapenec bunec Nuquin Papan chiaid niactiadquio iquec.

<sup>17</sup> —Mibi bëdambo icmete chuinu —quequin muaquidon chuisho tantiash: —Ai, mimbi chiapadte bunebi —queuidtsiash matses. Uispa dadpen icboedi badiadnuc abu chëshën bëtinacsho isash: —Tanunquien badiadec —queuidadbimboec: —Ambi chiapadquio bëdambo icnu —queuidtsiash matses. Adec muasho tantiash: —Adquid chian anëdënquiacno nësecaindami —quendac Nuquin Papa. <sup>18</sup> Adec muaquido abembi onqueuidequi onquec. Utsin chiaid tantienquio icquin ambi tantiaiduidi chieci naden. —Mibi bunacpadec mibitsen icsata —cac Esus tantiatsëcquin Nuquin Pa-

pan chiaid nauidtsēcquimbi abi icsaid ěnuidboedi padpidemboec icsaquiec. <sup>19</sup> Muaquidon: —Nuqui bunaiduidi nanuna. Adec nuqui bědambo ictsiac —quequin chuibanec. Adboedi abi icsaid ambembi ěntiapimbo yec icsamboshě iquec. Adec icsamianquiděn chiacpadomboen naic matses icsaquid nendac. Adecbidi ambi naiduidi naic icsaquid matses nendac. <sup>20</sup> Nuqui cuidmenquio icquid Esuquidistu tantiatsēcquin abi icsaid ěnuidboedi padpiden Nuquin Papan chiaid niac-niaquec icsamboshě muaquido yanec. <sup>21</sup> Ęnden Esus chiondac: —Ai, aid tantiembi —quetsěcondaidi aden Esus tantienquio yanec icsamboshě yansho isun: —“Esus tantiembi,” quenquio icpatecnědan —caimbi. <sup>22</sup> Adquid chuipanědash naden. —Ambi ucbudaid opan chequid. Opa nesmiaqui nidaiděn nocoshquec padpidec běchishoaquid —quepanědash. Adecbidi Esus tantiauidtsēcquido icsaid ěnuidboedi muaquid padpidemboec icsadenechitequien iquec.

### 3

#### —Esus chote chiaid

<sup>1</sup> Tantia. Ęmbi tantiaido mibi neque. —Pabiate cuembo icquin Nuquin Papan chiaid tantiaquiec bědamboec tabad —quequin mibi chuiquin dada uaondambi. Adomboembidi mibi chuiquin něid dada uanu. <sup>2</sup> Esus chote chuiquin Nuquin Papan isadaidbo tsusedpabo dada uamepampid ĵada tantie? Adomboembidi nuqui cuidmenquio icquiděn Nuquin Icbo Esusěn chuibanondash. Aiděn chiondaid aběd ictened utsin mibi chuinědash. Aden chiaid tantiata. Aidbidi chuinu. <sup>3</sup> Esus nidaiděn padpidec choabi icnuc Esus tantiesabon abi icsate bunaiduidi naquin Esus maměnshunendac. <sup>4</sup> —“Utsi uanuec padpidec nidaiděn choaindabi,” ĵquenědaidta chopec? Ma choenquio icpayoc. “Něbi Esus choec,” quenededi con mědimbo abitedi uněsbudniac. Esus choambobi —quependac Esus tantiesabo. Nadembidi chiendac. —Taěec nidaid yanubi matses nidaiděn tabadpampic. Adecbidi aton tsyuecquido tabadpampic. Něbi adecbidi matses nidaiděn tabadec. Ębi nibědnuc adiquendac. Utsi uanuec Esus choenquio iquec —quependac Esus tantiesabo. <sup>5</sup> ĵAbimboda capec? Aden chuiquin Nuquin Papan chiaid tantienquio iquec. Ęndenquimboshě ambi uaidtedi nibědnuc: —Ad icta —quequin Nuquin Papan chiac abu yec acte yec nidaid yec quiampampic. Acteuidpambo icboedi nidaid něnantan yampampic. Aden Nuquin Papan abitedi uapampic. <sup>6</sup> Aden abitedi uambic yuecquio ictaniash matses icsambo icsho isun ambi chiacpadomboen ue dapa chomeshun nidaid mabudadmequin aid matses Nuquin Papan uesquin uněs uapampic. <sup>7</sup> Aden ambi chiacpadomboen Nuquin Papan naindac. Ambi icsambo icquido cuidte ushěn abu nidaidbědta něděncaindac. Adembidi matses Esus tantiesabo cuidendac.

<sup>8</sup> Ęmbi aden chiac: —ĵTedectsiash Esus chopeba? —ĵquecta ique? Tantia. Mibi chuinu. Ambi tantiacpaděmbi Nuquin Papan Esus chomendac. Naden Nuquin Papan tantiec. —Dadpen seta icquid iquequi seta abentsěcbimboecquid nec. Adecbidi seta abentsěqui icquidquio iquequi dadpen seta icquidbimboecquid nec —quequin Nuquin Papan tantiec. <sup>9</sup> —Ęndenquio: “Padpidec choendabi,” quenědaidi Nuquin Icbo Esus choenquien icchitec —quenubien Nuquin Papan: —Chiata. Cuidte bunenquio iquebique. Utsibontsen Esus tantiaishun ěmbi chiaid niac-niacboedi ěnushe. Isbono. Ęnacsho icsamboshě yacno nidmenquio ictsiambi —queshun Nuquin Papan Esus chomiabi iquec.

<sup>10</sup> Adnubien matses: —Nëbi choec —quenquo icnuc Esus badedquo choendac. —¿Nëid ushëmbi ampequidën con na ampec —quequinda tantiapec? Padenquo. Adembidi: —Nëbi choec —quequin tantienquo icnubi Esus choendac. Choshon acquimboen toncac abitedi nibëdanendac. Uispa yec inchëshën ushë yec badiadën ushë yec queboedi nibëdquiecnuc nëdëncaindac. Nidaid abichobimbo nëdënquenuc aidën icquidtedi nëdënquendac nibëdquo yec. <sup>11</sup> —Nuquin Icbon nac adquidtedi nëdënquendac —quiash Esus tantiec bëdamboequien tabadtiad. <sup>12-13</sup> Esus chobon Nuquin Papan cuidquin ambi uaidtedi nëdëncaindac. Abu yec uispa yec inchëshën ushë yec badiadën ushë yec queboedi nëdëncaindac nibëdquiecnuc. Adshumbic ambi chiacpadomboen abu chuca nacnenquinc nidaid chuca nacnenquinc caindac. Adoshombic ambi chuca nacnenaidën bëdambo icquidquidquo nuqui tabadmendac. Ëmbi aden chuisho tantiaash: —Ma Nuquin Papan Esus chomenu —quequin utsibo tantiamequin Esusën naid chuibanec bëdamboec tabadnuna.

<sup>14</sup> Ëmbi tantiaido mibi neque. Tantia. —Choshon abi yacno Esusën nuqui tabadmendac —quec chieshtoenquo yec bëdamboec tabadnuna. Choshon Esusën: —Mibi icsambo iquec —cainquo icnuc Nuquin Papan chiaid niaquenquo yec bëdamboec tabadnuna. <sup>15</sup> Adec tabadquimbi ëmbi chuiboed tantiaashun naden tantia. —“Utsitsen ma Esus tantiaquid yanu. Aden Esus tantiaasho aid cuidenquo ictsiami,” qeshun Nuquin Papan Nuquin Icho chomiabi iquec —quequin tantiec tabadta. Adembidi mibi chuiquin nuquin buchibimboecquidën Pabadon dada uapaccondash. Nuquin Papan tantiamiac bëdamboen chiaccondash. <sup>16</sup> Ëmbi chuiboedbidi chuiquin dada uadenepaccondash. —Pabadon dada uaid abentse-abentsec badedquo tantiaquenquo iquec —qeshun utsibon aidën chiacpadomboen chienquien icchitosh. Nuquin Papan chiaid niac-niactiadquo icquidon Pabadon chiaidquo tantienquo icquin icsamboen chiosh cashnadcashnadachitsëcquiecnuc. Nuquin Papan chiaidquo nuquin tsusedpabon dada uapampidtsen isbanshun adembidi tantienquo icquin icsamboen chiec. Adquido Nuquin Papan cuidendac.

<sup>17</sup> Ëmbi tantiaido mibi neque. Tantia. Chuinu. —Abimbo tantienquo icquin Nuquin Papan chiaid niac-niacquidon muauaic —ëbi qesho tantiaashun: —Esus tantienquo yamane. Muasho tantiatipimbo iquebi —quequin ënenquo icquin Esus tantianuna. <sup>18</sup> —Abi tantiaquid cuidmenquo icnuc abided cuidadec Esus unëspondash. Aid tantiaasho Nuquin Papan nuqui bëdamboen isec —quequin Esus bëdiactsëc tantiatsëcshun comapenen Esus tantiaquionona. Adshumbic: —Nuquin Icho Esuquidistu bëdamboshë iquec —canuna ënenquo icquin. Padi. Aidtedi chuiquin dada uaombi.

## UANËN DADA UAIÐËMPI 1

### *Nuquin Papabëd ënëdenquoio yec tabadte chianiaidquoio*

<sup>1</sup> Abia Yampidënquoio matsesun Esuquidistun chuibansho ëbëd icquidobëdtan tantiapadenembi. Aidi ëbëd icquidobëdtan ispadenembi. Aidi ëbëd icquidobëdtan mishpadenembi. Aidi Nuquin Papabëd ënëdenquoio yec tabadte chianiaidquoio nec. Aidquoio chuiquin dada uaid nëid nendac. Aidquoio tantiaquido icquin bëdamboen ista. <sup>2</sup> Aid, abuc Nuquin Papabëd ënëdenquoio yec tabadboedi nidaidënuësh matses icnuec chopanëdash. Choshon abipadquoio yec Nuquin Papabëd ënëdenquoio yec tabadte ismequin chianiaidquoio ëbëd icquidobëdtan isteneshun chuibanec nebi. <sup>3</sup> Aidi ëbëd icquidobëdtan ispadened adembidi ëbëd icquidobëdtan tantiapadened chuibanec nebi ma mibitedishun tantiash shubu abentsëquën tabadac bimboec ma tabadpanu qeshun. Nuquin Papa tantiaquid icquin aton Madombo Esuquidistu tantiec Nuquin Icbobëd shubu abentsëquën tabadac padec nuqui bëdamboec tabadendac. <sup>4</sup> Esuquidistu tantiaquidtedi shubu abentsëquën tabadac bimboecquido nec, quequin chuiquin dada uaimbi ma aid tantiash, Cuishon. Bëdambo iquebi, quiacpadec ma mibitedi tabadpanueshun.

### *Nuquin Papa Bëdambocquid Abentsëcquiobi nec quiaid*

<sup>5</sup> Esuquidistun Nuquin Papa chuibansho nuqui tantiondac padomboen chuoaimbique. Tantiata. Nuquin Papa Bëdambocquid Abentsëcquiobi nec. Icsapenquiocquid aidi nec. <sup>6</sup> Adquid icnuc, Nuquin Papan shubun icquid nebi, queboedi ambi chiaid niacquin abipenquoio chuiquid nuqui nendac. <sup>7</sup> Nuquin Papan chiacpadomboen nabanquidquoio iquec abi tantiaquid ut-sibobëd shubu abentsëquën tabadac bimboecquid nuqui nendac. Adquid nuqui icmenuc nuqui icsaid bedshunash abided cuidadec Nuquin Papan Mado Esuquidistu unëspondash. Aid unësnëdaidënquoio nuqui icsaidtedi paucbantequid nendac.

<sup>8</sup> Icsaisa nebi, quequi mua uadquin abipenquoio chuiquid nendac. <sup>9</sup> Icsaobique. Ëbi pauc, Papa, qesho tantiashun, Con mado unëso isun abi tantiaquid icsaid bëpiscudnu, quequin ambi chiacpadomboen niaquenquiocquin Nuquin Papan nuqui paucoaindac. Naden Nuquin Papan naindac: Matses icsaid ëmbi paucaid padpiden tantiamenu, quenquiocquin icsaisa nuqui icmendac. <sup>10</sup> “Matses icsaisa nibëdquiec”, quequin Nuquin Papan dada uamiampid icnubi, Icsaisa nebi, quequin chiec, Muaquid Nuquin Papa nec, quiac bimboec adquid onquepec. Aden chuiquid Nuquin Papan pausntemaid nendac. Adquid Esuquidistu tantiesa nec.

## 2

<sup>1</sup> Ma icsainquoio icnu qeshun con nabo quequin adembi mimbi iste dada uaimbique. Isec onqueta. Icsaobi, quiash cuenenda. Abi tantiaquid icsasho isun Esuquidistun Nuquin Papa chiendac. Ëbi tantiaquid paucoata, quequin Nuquin Papan chiaid niaquesa icquin aton Madonquoio Esuquidistun nuqui icsasho aden chiendac. <sup>2</sup> Aidi matsestedi icsaid bedshunash abided cuidadec unëspondash.

<sup>3</sup> Ambi chiacpadomboen nabanquin Esuquidistu tantiaquid nebi, qeshun nuqui tantiendac. <sup>4</sup> Esuquidistu tantiaquid nebi, qeshun Icbon chiacpadomboen nainquiocquin abipenquoio chiendac adquidën.

<sup>5</sup> Ambi chiacpadomboen nabansho isun abi tantiamiantequid Nuquin Papan nua pausunendac. Aden pausunaidën, Aidbëd icquid nebi, quequin nuqui tantiendac. <sup>6</sup> Aden pausunac Nuquin Papan Madonquio bëdamboec tabadquin nabanacpadomboen naimbi, quec nidaidën bëdamboec tabad.

<sup>7</sup> Naden nata, quequin chiaid chuca chienquiocquin mimbi tauamboen tantiondaid mibi chuiquin dada uaimbi. <sup>8</sup> Mimbi tauamboen tantiondaid Esuquidistun, Naden nata, quequin chiaid chuca nendac. Nidaidën capuquin utsi tantiaquin nabanquin Esuquidistun ismiondashi. Adembidi Esuquidistupadquiocquin utsin ismiac mibi Esuquidistu tantiesa icboedi nëbi abipadquiocquin utsi tantiaquin nabante mimbitsen ismiac Esuquidistu tantiaquid utsi dadpen yanendac. Aidobidi aidën pausunac tantiananec tabadquin nabanec nec. Chieshëmëñquid icboedi aidën pausunac tantianquidquio yanec.

<sup>9</sup> Esuquidistu tantiaquid nebi, queshun abi tantiaquid utsi chieshënec Nuquin Papan tantiacpadomboen pausunacmaid adquid nec. <sup>10</sup> Esuquidistu tantiaquid utsi con utsibo nec, quequin tantianquidien Icbon pausunaid nendac. Adquid icsate bunenquio yec bëdamboec tabadquin ismequid nendac. <sup>11</sup> Esuquidistu tantiaquid utsi chieshënquid Nuquin Icbon pausunacmaid nec. Inchëshquio icnuc capuacimboecquid adquid nec. Mayan icsan yua icquin ambi natiadquio yaid tantiesa nec.

<sup>12-14</sup> Esuquidistu tantiaquid icsho Nuquin Papan cuidenquiocquin mibi icsaid paucac. Nuquin Papa Abia Yampidquio tantiaquidquio mibi nec. Ambi paucaid tsyuecquid utsi-utsiec icsho ëmbi con nabo caidtedi chuiquin dada uaid nëid nec. Abia Yampidënquio Esuquidistun chiac abi tantiaquido utsi-utsiec dadpen yanondash. Adquido chuiquin tsusiobo quequin ëmbi dada uaid nëid nec. Ëmbi tsusiobo caid ambia tantiaquidën ismiac caniabobimboecquin comapenen tantiaquin tantesa uainquiocquido utsi-utsiec iquec. Aden comapenen tantiec mayan icsan yua icboedi nëbi Nuquin Papan chiaid tantiabentsëcquido yanash nëbi Nuquin Papan chiacpadomboen nate bunquido mibi nendac. Adec bunquido mayan icsan yua ictiapimbo icquido mibi nendac. Adquid ëmbi caniabo caidtedi ëmbi chuiquin dada uaid nëid nec. Ëmbi dada uaid mibitedishun tantiatequidquio neque. Isec onqueta.

### *Icsate bunesa icta, quequin chiaid*

<sup>15</sup> Mayan icsan yuadenda. Icsate bunesa icta. Mayan icsa bunquid Nuquin Papapadquiocte bunesa nec. <sup>16</sup> Abia Yampidquio Nuquin Papa nec. Adquidpenquio mayan icsa nec. Aid Nuquin Papa chieshënquid nec. Adquid icquin Nuquin Papan chiaid mua uaqin chuiquin chuca uaic naden: Icsamane quenquiocquin icsaquin nanu quequin adota. Adecbidi icsamane quenquiocquin utsi icsasho isun ëmbitsen nanu quequin adoata. Dadpen bednu quequin utsi dëniacnueshun adota. Adec icsamane quenquiocnoc mayan icsan Nuquin Papan chiaid matses chieshëmec. <sup>17</sup> Mayan icsan tantiaid ënëdendac. Aidën tantiacpadomboen tantiaquid icbobëd Nuquin Papa yacno tabadiapimbo iquec. Nuquin Papan chiacpadomboen naquidien ënëdenquio yec Icbobëd tabadendac.

### *Esuquidistu chieshënquid dadpen choendac, quequin chiaid*

<sup>18</sup> Adembi chiembique. Ëmbi con nabo caidon tantiaata. Nëbi nëid nidaid naimbudec. Adecbidi Esuquidistu chieshënquid dadpen choendac, quequin chiondacadquiec ënden cho-choac. Dadpen cho-choacsho isun, Nëbi nëid nidaid naimbudendac, quequin nuqui tantiendac. <sup>19</sup> Esuquidistu

chieshënquid nuquibëd iccuededboedi ënden nidanepac. Nuquin Papan shubu abentsëquën tabadacpadpenquiocquid Esuquidistu chieshënquid iquec nidaniac. Nidaniacsho isun, Esuquidistu tantiesa iquec nuquibëd shubu abentsëquën tabadacpadpenquio icquido niosh, quequin nuqui tantiendac.

<sup>20</sup> Esuquidistu chieshënesa mibi nendac. Nuquin Papan aton Mayan meniac abimbo chiaid tantiaquid mibi nendac. <sup>21</sup> Nuquin Papan chiaid abimbo iquec quequin tantiaquid icsho mibi chuiquin dada uaic nebi. Nuquin Papan chiaid tantiesa mibi icsho chuiquin dada uainquio ictsiambi. Abimbo chuiquid muatiapimbocquid nec, quequin mimbi tantiendac. <sup>22</sup> ¿Tsutsi muaquid nepec? ¿quepecta mibi ique? Nuquin Papan Madombo nidaidënsun chidon tishac matesash aton Papan chuimiaidquo nec, quesa muaquid nendac. Adquid Esuquidistu chieshënquid nendac. Abentsëcquidquiobi Nuquin Papa nec, quesabidi adquid neoaic. Esuquidistu Nuquin Papan Madombo nec, quesabidi adquid neoaic. <sup>23</sup> Nuquin Papan Madombo Esuquidistu nec, quesa Nuquin Papa tantiesabidi nec. Nuquin Papan Madombo Esuquidistu nec, quequin chiec Nuquin Papan tantiaid papuduedaid Nuquin Papa tantiaquid nendac.

<sup>24</sup> Tauamboen chiampid tantiadonec tantesa uainquiocquid yanta. Mimbi tauaquin tantiadoniaid tantesa uainquio yec Nuquin Papan Mado Esuquidistubëd shubu abentsëquën tabadac bimboecquido mibi iquendac.

<sup>25</sup> Èbëd shubu abentsëquën nidaidën tabadac bimboecquido ëbëd abuc ënëdenquo yec tabadte iquendac, quequin Esuquidistun chiaid nendac.

<sup>26</sup> Esuquidistu tantiaquid mibi icsho Nuquin Papan chiaid niacmenuequid iquec, quequin chuioaimbique. Tantiata. <sup>27</sup> Nuquin Icbo Esuquidistun tantiamiaid icquin utsi uain chuisho tantiesa icta. Esuquidistun ambi tantiaid pausunac ambi chiaid tantiaquidquo mibi nendac. Ambi pausunaid iquec, Mibi utsi tantiamenu, cac, Padi. Esuquidistun chiaid tantiaquidquo nebi. Esuquidistun abimbo chiaid tantiash bëdambo iquebi, mibi quendac. Aden Esuquidistun tantiamiaidquo yec abëd cuëshëdesa icnuec adequi tabadta.

### *Nuquin Papan chiaid tantiaquid ambi bacuë icmiaid*

<sup>28</sup> Adembidi con nabo quequin mibi chuioaimbique. Adembi tantia. Esuquidistun chiaid tantiadonequieq tabadteneta. Adec tabadquin Esuquidistu choasho isash cuenenquo yec, Èbi, ambi paucaid, bednuec choec, quependac mibi. Abëdi nidebi, quequin caindonec tabadta. <sup>29</sup> Nuquin Papa bëdamboecquid nec, quequin tantiaquin nuqui Nuquin Papan chiacpadomboen naquin, Ambi con bacuë caidquo nebi, quequin nuqui tantiendac.

## 3

<sup>1</sup> Matses tantiaquin naquidquo Nuquin Papa nec. Ma ëmbi unësquiocquin comapenen tantiaido ëbëdi tabadpanueshun con bacuëbo caimbi, quequin Nuquin Papan icsaisanquo tantiapampic. Aden chiampid abimbo iquec. Ambi con bacuë caido nuqui nec. Ambi con bacuë caidpenquo Nuquin Papa tantiesa yec aton Mado Esuquidistu tantiesabidi nec. Adecbidi Esuquidistu tantiaquid tantiesabidi nendac adquido. <sup>2</sup> Nuquin Papan comapenen tantiaido mibi nec. Adquid icsho adembi mibi chuinu. Tantiata. Nëbi Nuquin Papan con bacuë caido nuqui nec. Aden ambi con bacuë caid icsho, Nadquidquo mibi icmendambi, ¿ada Nuquin Papa capec? Padenquo. Esuquidistupadquiocquin nabanquid Nuquin Papan nuqui icmec, quequin nuqui tantiadonetequidquo nendac. Esuquidistu nuqui bedec chosho isash, Nëbi aidpadquidquo Nuquin Papan nuqui icmendac, quequin tantiambi,

nuqui quendac. <sup>3</sup> Aid choabicnuc, Abipadquid iquendabi, quequin caindonequido nëbi Esuquidistu icsainquio yec tabadacpadquiec tabadte bunquid nuqui nendac.

<sup>4</sup> Nuquin Papan naded bëdamboec tabadta, quequin chiaid niacquid abibi icsaquid nendac. <sup>5</sup> Adnubien, Esuquidistu abuc tabadboedi nidaidëshun chidôn tishac matsesun nuqui icsaid bedshunash abided cuidadec unëspanëdash, quequin nuqui tantiendac. Icsapenquiocquid Esuquidistu nec. <sup>6</sup> Icbopadquidquio icnu quiash Esuquidistubëd tabadac bimboecquid icsadenesa nec. Icsadenequid, Nuquin Papan Esuquidistu tantiamiohi, quetiapimbo iquec. Esuquidistu tantiesa adquio iquec.

<sup>7</sup> Con nabo, tantesa uamane qeshun muaquin chuibanaid tantiesa icta. Esuquidistu bëdamboec tabadacpadquiec tabadquid icsaisa nec. <sup>8</sup> Abia icsadenequid mayan icsa nec. Aidën yua adquiechidi icsadenendac. Mayan icsan yua matses icsho isash Nuquin Papan chiaid tantiaquidquio iquec Esuquidistu nidaidën choash matses icsaid bedshunash abided cuidadec unëspanëdash ma abi tantiaquid yec mayan icsan yua icboedi aidën yuadtiapimbo yampanuna. <sup>9</sup> Nuquin Papan con bacuë caido icsadenesa nec. Ambi con bacuë caido Nuquin Papapadquidquio yec icsadenetiapimbocquid nendac. <sup>10</sup> Mayan icsan yua Nuquin Papan chiacpadomboen naisa nec. Utsi tantiesa adquid nec. Nuquin Papan chiacpadomboen naquid Icbon bacuë nec. Icbon bacuë yec utsi tantiaquidquio nendac.

#### *Esuquidistu tantiaquido tantiananaid*

<sup>11</sup> Esuquidistu tantiaquid utsibo tantiaquiota, quequin chiaid nuqui abia tantiondaid nendac. <sup>12</sup> Aton utsimbo chieshënquid Cain icpampidpadquid iquenda. Mayan icsan yua icquin aton utsi cuesunepampic. Aden cuesuniaidën aton utsi Abedën abi tantiaquin nadenesho Nuquin Papan aid bëdamboen isnubi Cainën ambibi tantiacpaden nadenesho Nuquin Papan bëdamboen istiapimbo icpampic. Aden isac Cainën aton utsimbo Abed chieshënquin cuesunepampic. <sup>13</sup> Cainën aton utsimbo chieshënacpadomboen Nuquin Papa tantiesan Nuquin Papan con bacuë caidtedi chieshënoaic. Nuquin Papa tantiesan mibi chieshënsho isash, ¿Adquidshenda mibi nepec? quenda. Nuquin Papan chiaid tantiesabimboec adenda. <sup>14</sup> Esuquidistu tantiaquid tantienquiocboedi Esuquidistu tantiaquid yanash abi tantiaquid utsibo tantiaquidquio nuqui nendac. Aden abi tantiaquid utsibo tantiaquid icquin, Nuquin Papabëd tabadquidbimboecquid nebi, quequin nuqui tantiendac. Aton utsibo tantiesa cuëshëdacbimboecquid nec. <sup>15</sup> Aton utsibo chieshënquid, Con utsi cuesunenu, quiac bimboecquid nec. Adquid Nuquin Papabëd tabadtemaid nendac, quequin nuqui tantiendac.

<sup>16</sup> Matses tantiaquin nashunquidquio Esuquidistu icpondash. Nuqui tantiec, ma ëbëd ënëdenquio yec tabadpanu quiash unësmene, quenquio yec nuqui icsaquido icsho cuidnushe quiash abided cuidadec unëspandash. Abi tantiaquid icquin abi tantiaquid utsibo tantiaquin nashunec unësmene quenquio yec nuqui tabadendac. <sup>17</sup> ¿Aton nachoquid icnuc Esuquidistu tantiaquid utsin na nibëdquiocsho isec, Con utsi menenquio iquembi, quequid Nuquin Papapadquiocquin tantiaquidta nepec? Adquid Nuquin Papan chiaid pausunacmaid nec. Nuquin Papapadquiocquin nashunu quesa adquid nec. <sup>18</sup> Embi con nabo caid, Utsi tantiec bëdamboec tabadquidquio nebi, quec onquequinuidi tantiec tabadenda. Utsi tantiembi, quequin mimbi chiacpadomboen nabanquin ismeta. <sup>19</sup> Aden mimbi chiacpadomboen nabansho isun Nuquin Papan tantiamiac dacuëdenquio yec Nuquin Papa chuinu quiash abi yacno puduedquidbimboecquin nuqui chuided-chuidedec. <sup>20</sup> Utsien

Nuquin Papan chiacpadomboen abentse-abentsen naquid, Nuquin Papa dacuëdampambo iquec. ¿Abi chuisho adabi tantiapatsiash? quequin tantiec tsadendac adquid. Adec tsadsho isun Nuquin Papan nadopec: Con Mado tantiaquid ëmbi paucaid, ëmbi con bacuë caid mibi nec. Mimbi chuisho tantianuna. Muesa nebique. Dacuëdenquiocquin ëbi chuita, quependac Nuquin Papa adquid caic.

<sup>21</sup> Nuquin Papa tantiaquido, adembi mibi chiembique. Tantiata. Nuquin Papan chiacpadomboen naquidënquio Nuquin Papa bëisquidëmbimboen, Ëbi menepec, quequin dacuëdenquiocquin chianendac. <sup>22</sup> Nuquin Papan ambi chiacpadomboen nabansho isun ambi tantiacpadomboen tantiamendac. Aden tantiamiac ambi tantiacpadomboen abi chuisho Nuquin Papan nuqui bëdamboen isquin menendac. <sup>23</sup> Naden tantiata, quequin Nuquin Papan chiaid nad iquec: Abëd Abia Yampidquio, Esuquidistu, nidaidënshun chidon tishac matsesaid Nuquin Papan chomiaid aton Madombo nec quequin nuqui tantiaidquio nendac. Adembidi Esuquidistun chiacpadec abi tantiaquid ut-sibobëd tantiananendac. <sup>24</sup> Aden ambi chiacpadomboen naquidbëd Nuquin Papa iquec. Adquiduidquio Nuquin Papabëd ictequid nec. Abibimboecquid Nuquin Papan aton Mayan meniac ëbëd tabadquin tantiamiac, Nuquin Papabëd icquid nebi, quequin nuqui tantiendac.

## 4

*¿Nuquin Papan chiaidquiobida chuibanoshe? Isnu, qeshun Nuquin Papan chiaidquio isteneta quiaid*

<sup>1</sup> Utsibo, Nuquin Papa chieshënquidën chuimiaido dadpen iqueque. Aidën chuimiaidën chuisho tantiashun, ¿Nuquin Papan chiaidquiobida chuibanoshe? Isnu qeshun Nuquin Papan chuiquin dada uamiaidquio isteneta. ¿Adquiobida iqueque? Isnu, qeshun isteneta. <sup>2</sup> Nuquin Papan pausunaidën naden chiendac: Nidaidënshun chidon tishac matse-said Nuquin Papan chomiaid aton Madombo nec, quequin chuibanendac. <sup>3</sup> Nuquin Papa chieshënquidën chuimiaidën naden chiendac: Nuquin Papan chomiacmaid Esus niondash. Aid aton madopenquio nec, quequin chiendac. Aden chuiquid Esuquidistu chieshënquid nec. “Ëmbi chomiaid chieshënquid choec,” quequin Nuquin Papan chiampid mimbi tantiec. Aden chuiquid ënden dadpen cho-choac.

<sup>4</sup> Con nabo quequin Nuquin Papan aton Mayan meniac aidënquio tantiamiac Esuquidistu chieshënquidon chuisho, Tiantianu, quesa mibi nendac. Nuquin Papan meniaidën tantiamiac Nuquin Papan chiaid chiac dëniacacpadquiec mibi chieshënquid cuenendac. <sup>5</sup> Esuquidistu chieshënquido Nuquin Papan chiacpadomboen naisa nec. Ambi tantiacpadenuidi chuibanec. Aden chuisho tantiesa Esuquidistu tantiaquid nec. <sup>6</sup> Aidën chuisho tantiesa nuqui nec. Nuquin Papan con bacuë caid nuqui nec. Adoac ambi tantiamiacpaden nuqui chuibansho Nuquin Papa tantiabenquid utsibon tantiendac. Adsho isun Nuquin Papan tantiamiaid aido nec, quequin nuqui tantiendac. Nuquin Papa tantiesain Esuquidistu chuibansho, Tiantianu, quesa iquendac. Adsho isun, Abipenquio chuiquidën yua nec, quequin nuqui tantiendac.

*Nuquin Papan ismiac adecbidi tantiananquidquio ma nuquitedi icoapanuna quiaid*

<sup>7</sup> Utsibo, Nuquin Papa tantiaquido adembi mibi chiembique. Adembi tantiata. Nuquin Papan ambia utsi tantiaquin nabanquin ismiac adecbidi nuqui abi tantiaquidobëd tantiananquin ma nabanoapanuna. Utsi tantiaquidquio



Nuquin Papan bacuë nendac. Adquid Nuquin Papa tantiaquidquio nec. <sup>8</sup> Utsi tantiaquidquio Nuquin Papa nec. Adquid icnuc utsi tantiesha yec, Nuquin Papa tantiembi, quetiapimbo iquec. <sup>9</sup> Matses tantiaquin Nuquin Papan aton Mado Abentsëcquiobi Esuquidistu matsesmiac matses icsaid bedshunash abided cuidadec unëspondash. Adoac abi tantiaquido abëdi ënëdenquio yec tabadendac. <sup>10</sup> Aden Nuquin Papan matses tantiaquin naid dëniactiapimbo nuqui iquendac. Aidëmbien nuqui tantiabudquin aton Mado Abentsëcquiobi nidaidën chomiac nuqui icsaquido icsho cuidmenquiocnoec abided cuidadec unëspondash. <sup>11</sup> Nuquin Papa comapenen tantiaquidquio icquin Nuquin Icbopadquiocquin Esuquidistu tantiaquid utsi tantiaquio-tiad. <sup>12</sup> Nuquin Papa matsesën istiapimbocquid iquec. Abi tantiaquid utsi tantiaquiocsho isash Nuquin Papa nuquibëd tabadec. Aden aton Mayan meniac aidën tantiamiac Nuquin Papapadquiocquin nuqui tantiaquiendac.

<sup>13</sup> Aton Mayan meniac ambi tantiamiaidquio yec Nuquin Papa ëbëd iquec, nuqui quendac. <sup>14</sup> Nuquin Papan Madomboen nuqui isaidquio icpadenec. Aden isboshon uquë nësiatiadquido nuqui icsho mënchicquid Nuquin Papan chomiaid chosh, quequin nuqui chian-chianec.

<sup>15</sup> Esuquidistu Nuquin Papan Madombo nec, quequin tantiaquidquio Nuquin Papan pausunquin aton Mayan meniaid nec. <sup>16</sup> Aden aid meniaid icquin, Ambi tantiaid nebi, quequin nuqui chuidonec.

Nuquin Papan matses tantiacpadomboen utsi tantiaquid Icbobëd icquidquio nendac. Adecbidi Icbo abëd icquidquio nendac. <sup>17</sup> Nëid uquë nësecatequid nec; nëid ëbëd icquid nec, quequin Nuquin Papan chuibante ushë chonoc, Abëd icquid nebi, quec dacuëdenquio yec Nuquin Papa tantiaquid aton Madopadquiocquid Nuquin Papa yacno puduedendac. <sup>18</sup> Nuquin Papan tantiaid dacuëdenquio iquendac. Ambi tantiamiaid dacuëdesa nec. Abi tantiesha, Ebi icsaquid icsho cuidtsiash, quec dacuëdendac. Aidi utsi tantiesha yec dacuëdec.

<sup>19</sup> Nuquin Papa Ambia Tantiaquid icquin ismiac tantiananquidombo nuqui nendac. <sup>20</sup> Eëmbi isacmaidquio Nuquin Papa icsho, Aid tantiaquid nebi, quequin Esuquidistu tantiaquid utsi ambi isteniaid chieshënquid iquec muaquid nendac. Ambi isteniaid chieshënquid iquec ambi isacmaidquio Nuquin Papa chieshënquid nendac. <sup>21</sup> Nuquin Papan chiaid nad iqueque. Tantiata. Nuquin Papa tantiaquid nebi, quequin Nuquin Papa tantiaquid utsibo tantiatiad.

## 5

### *Nuquin Papan Madombo abimbo tantiaquid*

<sup>1</sup> Nuquin Papan Madombo aton Papabëd abuc icboedi nidaidën chomiac matsesaid Esuquidistu nec, quequin tantiaquid Nuquin Papan con bacuë caid nendac. Ambi con bacuë caidënquio Nuquin Papa tantiendac. Adem-bidi Nuquin Papan con bacuë caid utsibo nuqui tantiendac. <sup>2</sup> Ambi con bacuë caidën Nuquin Papa tantiaquin ambi chiacpadomboen naquidquio icquin ambi con bacuë caido nuqui tantiendac. <sup>3</sup> Aden tantiaquin Nuquin Papan, Naden nata, cac nabanendac. Ambi, Naden nata, quequin chiaid natiamiantemaid nec. <sup>4</sup> Aden Nuquin Papan con bacuë caid icquin ambi chiacpadomboen nabanec tabadquin dëniacacimboen icsamenuequid nuqui cuemendac. Adembidi Abia Yampid nidaidënsun chidon tishac matsesash tabadec aton Papabëd cuëshëdesa Esuquidistu nec, quequin tantiaquid nuqui icnuc icsamenuequid cuenendac. <sup>5</sup> Esuquidistu Nuquin Papan Madombo

Yampid nec, quequin tantiaquidënquo ismiac icsamenuequid cuenendac. Ai, icsamenuequidën yuadesa Esuquidistu tantiaquidquo nendac.

<sup>6</sup> Esuquidistu Nuquin Papan Madombo nec, quequin abimbo chiaid iqueque. Tantiata. Chuinu. Nuquin Papan chomiaid nidaidënshun chidon tishac matsesash capusho acten mentoacsho: “Ëmbi bëdamboen tanti-aidquo mibi nec. Mibi isash bëdambo iquebi, Mado,” quequin Esuquidistu chuipondash Nuquin Papan. Adashic, yuec-yuecpambo yacsho cuesten dectanac diadec unësec aton Papa chiec: “Ëbi yuedta, Papa,” quiash Esuquidistu unësacsho nacsiaic aton intac chididiquepondash. Adashic, Nuquin Papa abimbo chuiquidpadquidquo icquin aton Mayanën tantiamiac, Esuquidistu Nuquin Papan Madombo nec, quequin tantiaquin chiendac nuqui.

<sup>7</sup> Nuquin Papa yec aton Mado yec aton Mayan yec quequin abucshun aitedishun abentsëc yacbimboecquin Esuquidistu Nuquin Papan nidmiac chosho nidaidënshun tishac matsesaid nec, quequin chuided-chuidedec.

<sup>8</sup> Adecbidi nidaidënuësh Esuquidistu matsesacsho isun, Nuquin Papan Madombo nec, quequin ismenuec aton Mayan abucuësh budash aidbëd icpondash. Adembidi yuecshun ambi chiacpadomboen acten mentomiasho, Con madombo nec, quequin chuioapondash. Adembidi yuecshun ambi chiacpadec unëso isun, Con madombo nec, quequin inchëshacbimboecnuc icmequin Nuquin Papan nadatiambocquin ismebampondash. <sup>9</sup> Aden ismiac isondaidën naden chiec. Aton Mayan budsho isombi. Adembidi Esuquidistu acten mentosho isombi. Adembidi, Unëso isombi, quequin isondaidën chiec. Aden chuinubi Nuquin Papanquo, Con madombo nec, quequin ambia Esuquidistu chuiquidquo icsho tantiadonetequidquo nuqui nendac.

<sup>10</sup> Adembidi Nuquin Papan Mayanën tantiamiac, Esuquidistu Nuquin Papan Madombo nec, quequin tantiaquin adomboembidi chuioapec nuqui. Esuquidistu Nuquin Papan madopenquo nec, quequid, Nuquin Papa muaquid nec, quiacimboen chuiquid nendac. <sup>11</sup> Con Madombo, Esuquidistu nec, quequin Nuquin Papan chiaid tantiaquidquo abi yacno nidash abëdi ënëdenquo yec tabadendac. Matses icsaid bedshunash abided cuidadec aton Mado unëspanëdash, quequin tantiaquid Nuquin Papa yacno tabadtequid nuqui nendac. <sup>12</sup> Esuquidistu tantiaquid ënëdenquo yec Nuquin Papa yacno tabadendac. Aid tantiesa aidbëd tabadtiapimbo iquendac.

### *Ma tantiaquidquo mibi icpanuequin chiaid*

<sup>13</sup> Nuquin Papan Madombo Esuquidistu nec, quequin tantiaquid, Icbobëd ënëdenquo yec tabadtequid nendac, quequin ma tantiaquidquo mibi icpanuequin mibi chuiquin dada uaimbi. <sup>14</sup> Adec abëd ictequid icquin ambi tantiamiacpaden chuisho, Nuquin Papan tantiec, quequin nuqui tantiendac.

<sup>15</sup> Abitedi tantiaquidquo icquin ambi tantiacpadomboen tantiamiac nuqui chuisho Nuquin Papan menendac.

<sup>16</sup> Esuquidistu tantiaquid nebi, queboedi icsasho isun, Cuëshëdnushe queshun aid bëdamboen tabadme, Papa, quequin chiacpaden Nuquin Papan naindac. Utsien, Esuquidistu tantiaquid nebi, queboedi, Icsaquionona, quiacpadec tabadsho isun, Cuëshëdnushe queshun aid bëdamboen tabadme, Papa, cainda. Nuquin Papan chiaid tantiate bunesa aid nec. <sup>17</sup> Nuquin Papan chiaid niaquec icsaic. Padnuen, Nuquin Papan bacuë nebi, queboedi icsash, Icsaquid nebi. Padpidec icsatiapimbo iquebi, quequin chuisho tantiashun Nuquin Papan padpiden paucoaindac. Aid cuëshëdenquo yec Nuquin Papan bëd tabadendac.

<sup>18</sup> Nuquin Papan con bacuë caid iquec icsadenesa nec, quequin nuqui tantiendac. Nuquin Papan chiaid niacmane quiash icsate bunesa nebi,

quiacpaden nanuesho tantiamequin pausunendac. Adoac Nuquin Papa chieshënquidën adquido yuadtiapimbo iquendac. <sup>19</sup> Esuquidistu tantiec Nuquin Papan con bacuë caid nebi, quequin nuqui tantiec. Adesa Nuquin Papa chieshënquidën yua nec, quequin nuqui tantiec. <sup>20</sup> Nuquin Papan Madombo abuc abèd icboedëmbi nidaidënshun Nuquin Papa chuibanquin tantiamiac. Aidën aton Mayan abi tantiaquid meniac, Nuquin Papa Abentsëcquiobi iquec, quequin nuqui tantiendac. Aidbëdquiocquid nuqui nendac. Aton Madombo aton Papabimboecquid nec. Aid tantiec aidbëd ënëdenquio yec nuqui tabadendac, quequin nuqui tantiendac.

<sup>21</sup> Con nabo, Nuquin Papabëdtactsëqui aton Madombo Esuquidistu tanti-  
aquid icta. Utsin nacnenaïd ismequin, Nuquin Papa neque. Nëïd tanti-  
aquiota, cac tantienda. Esuquidistu nebi, qesho adembidi tantienda.

Nëbi padi. Aïted chiombi.

## UANËN DADA UAIÐËMPI 2

### *Nuquin Papan chiaid abimbo iquec, quequid tantiaid*

<sup>1</sup> Ëmbia Esuquidistu tantiondaidquio Uan nebi. Nëid chido Esuquidistu tantiaquid nendac, quequin Nuquin Papan tantiapadquieic icquin mibëd Nuquin Papan chiaid tantieic iccuededquidobëdta mibi chuiquin dada uaimbique. Isec onqueta. Nuquin Papan chiaid abimbo iquec, quiosh, quequin mibi utsin chuisho tantiash mibitedi tantieic tsadebi. ¿Ëbentsëquidabi mibitedi tantieic tsadpe? Padenquio. Aden chuisho tantiash utsibotsen adecbidi mibi tantieic tabadoaic. <sup>2</sup> Nuquin Papan chiaid abimbo iquec, quequin ënenquiocquin nuqui tantiendac.

<sup>3</sup> Uquë nësiatiadquido nuqui icscho isash abëdi ënëdenquio yec nuqui tabadmenuec nuqui icsaid bedshunash abided cuidadec Esuquidistu unëspondash. Adembidi ambi chiaid tantiaquido utsibobëdta bëdamboen tabadmiaido nuqui nendac. Nuquin Papabëdta aton Mado Esuquidistun adquid icmiac, Ambi chiaid abimbo iquec, quequin tantieic utsibobëd tantiananquidquio nuqui nendac.

<sup>4</sup> Mimbi chiac utsi-utsieic Nuquin Papan chiacpadomboen nabanec tabadsho isash bëdambo iquebi. <sup>5</sup> Naden nata, quequin chiaid utsipenquio nëid dada uaid nendac. Esuquidistu tantiaquidtedi nuquibi tantiananuna. <sup>6</sup> Esuquidistu tantiaquid utsibëd tantiananquin Nuquin Papan chiacpadomboen nabanquido nendac. “Ëbi tantiaquidtedi tantiananta,” quequin Nuquin Papan chiampid mimbi tauamboen tantiondaid nendac. Mimbi tantiapadquieic ma tabadpanuna.

### *Muaquin chuiquid*

<sup>7</sup> Muaquin chuiquid dadpen capueque. Adquidën chiaid tantiesa icta. Esus Nuquin Papan chomiacmaid matsesquio niosh, quequin adquidën chien-dac. Adquid muaquin chuibanec Esuquidistu chieshënquid nec. <sup>8</sup> Adquidën chuisho tantiamane qeshun chieshenquiocquin Esuquidistu tantiaquiota. Nuquin Papa yacno nidshun ambi meniaidtedi bedembi, qeshun Icbon chiacpadomboen nadeneta. <sup>9</sup> Esuquidistu Nuquin Papan Madombo nec, quequin tantiembi, queboedëmbi, Ambi chiaid tantianu, quenquiocquin tantesa uatsëcquid nendac. Adquid Nuquin Papabëd tabadachimboec ictiapimbo iquendac. Esuquidistu Nuquin Papan Madombo nec, quequin tantiaquidquio Nuquin Papan Madobëd tabadachimboec tabadendac. <sup>10</sup> Esuquidistu Nuquin Papan Madombo nec, quequin chiesha chosho isun yuedenda. Adembidi, Bëdambo icta, quequin adquid chienda. <sup>11</sup> Adquid yuedquid ambi yuedaidbëdta muaquin chuiquin ismequid nendac.

### *Ënquin chiaid*

<sup>12</sup> Dadpen dada uatiadquio icquimbi mibi yacno nidtiadquio icquin daëdpactsëc dada uaombi. Mibi yacno nidash mibëdi onquebi.

<sup>13</sup> Mibitedi tantieic tsadebi, quequin chuita quiosh ëbëd Nuquin Papan chiaid tantieic iccuededquido. Adembidi dada uaimbi.

Padi. Aidtedi dada uaombi.

## UANËN DADA UAIÐËMPI 3

### *Cayon naid chuiquin utsibon chiaid*

<sup>1</sup> Ëmbia Esuquidistu tantiondaidquio Uan nebi. Esuquidistun chuinëdaid abimbo iquec, quequin tantiaquid mibi icsho mibi tantiaquin dada uaimbique. Isec onqueta, Cayo.

<sup>2</sup> Mimbi Nuquin Papan chiaid tantiacpadquiec min nami bëdambo icpashun. Adembidi Nuquin Papan chiacpadec tabadquin ismiac ma utsibobëd bëdamboec tabadpanuna. <sup>3</sup> Mibëd icquidon nëmbo choshon naden chioshi. Esuquidistun chiacpadomboen nabanec tabadquid Cayo nec, quequin chuibanoshi. Aden chiaid tantiabosh, Bëdambo iquebi, quec tsadebi. <sup>4</sup> Mimbi chuibanac Esuquidistu tantiaquin muainquocquin utsibon chuoiaic, quequin chuisho tantiash bëdambo iquebi, quec tsadebi. Ëmbi con mado caidën bëdamboen naid chuisho tantiash bëdambo iquebi.

<sup>5</sup> Mimbi yuedaidon naden chioshi, Cayo. Esuquidistu tantiaquid utsibo chosho isun yuedshun Cayon nashunec. Esuquidistun chiaid tantiaquid utsibo ambi isacmaid chosho isun adembidi yuedshun aido Cayon nashunec, quequin chioshi. <sup>6</sup> Mimbi yuedshun nashunaid utsi-utsiec nëmbo choshon mimbi abi tantiaquin nashunaid nëmbocquido Esuquidistu tantiec iccuededquidobëdta chuibanoshi. Bëdamboen mimbi naic. Adembidi nabanquin adquid mibëdi tabadash, Nidnu, qesho meneta ma buanueshun. Aido Nuquin Papan con bacuë caido ambi chuimaidquio nec. <sup>7</sup> Aido isadaidpembo chuinuac nidshun adquid yacno choshon Esuquidistu tantiesa nec quec ëbi yued quetiapimbo iquebi quec Esuquidistu tantiaquid mibi icsho isash, Ëbipadquid nec, quish mibi yacno puduedendac. <sup>8</sup> Esuquidistun chiaid tantiaquid icquin Esuquidistu tantiaquid ambi chuimaido yuedtiad. Adoquin aidobëdtambi Esuquidistun nacpadomboen ismendac.

### *Diotedepesën icsamboen naid*

<sup>9</sup> Mibëd iccuededquido aden chuiquin dada uaondambi. Aden ëmbi dada uaid bedash: “Ëmbentsëqui namembi,” quec Diotedepes chieshondash. Aidi ëbëd icquidon chiaid tantiate bunesa nec. <sup>10</sup> Mibi yacno choshon Diotedepesën muaquin chiaid mibëd iccuededquido chiendambi. Aidi Esuquidistu tantiaquid utsibo yuedesa nec. Utsi: “Yuedmenu”, qesho tantiash: “Padi. Yuedenda,” quec yuedmianesa Diotedepes nec. Adembidi, Yuedmenu, quequido cuëshëdmequid aidi nec.

### *Demetedio caid bëdambocquid nec, quequin chiaid*

<sup>11</sup> Aidën nacpadec icsainda, caimbi mibi. Nuquin Papan Icsaisanquio chiacpadomboen naquid aidën con bacuë caid nec. Icsaquidën nacpadomboen naquid Nuquin Papan chiaid tantienquio yec tabadquid nendac. <sup>12</sup> Utsien Demetedio caid bëdambocquid nec, quequin utsibon chiec. Abimbo chiec. Aidi Nuquin Papan chiacpadomboen nabanec tabadquidquio nec, quequin ëbëd icquidobëdtan chuoaimbi. Uanën chiaid abimbo iquec, quequin mibitedishun tantiendac.

### *Ënquin chiaid*

<sup>13</sup> Dadpen dada uatiadquiocquimbi daëdpactsëc dada uaombi. <sup>14</sup> Daëdec ushtanquin mimbi isplashuni. Mibi yacno nidash mibëdi onquendabi.

<sup>15</sup> Esuquidistun chiaid tantiaquid utsibëd bëdamboec ma mibi tabadpanuna. “Mibi tantiec tsadebi, Cayo, quequin dada uata”, Esuquidistu tantiaquid utsibon nëmbocquidon chiac adembidi chuioaquin dada uaimbi. Esuquidistun chiaid tantiaquid anocquido adembidi chuibanoata.

Padi. Aided dada uaombi.

## UDASËN DADA UAID

### *Tauamboen chiaid*

<sup>1</sup> Santiacon utsi Udas nebi. Esuquidistun yuambo nebi. Esus tantiaquidon mimbi iste dada uanu. Mibi tantiaquioquin Nuquin Papan mibi Esus tantiamiac. Adoac aid tantiashe isash: —Ëbi tantienquo yanushe —quiash Esus mibi cudasec. <sup>2</sup> —Aido bëdamboen isquin bëdambo icme, Papa —quequin Nuquin Papa chianembi mibi tantiaquin.

### *Muaquido iquendac, quequin chiaid*

<sup>3</sup> Ëmbi tantiaido mibi neque. Tantia. Nuqui cuidmenquo icnuec Esus abided ciudadec unësaid tantiateuidi mibi chuitiadquo iccobi. Adnuc: —Esus tantiaquido iccuededacno muaquido puduedosh —quesho tantia-boshon aid mibi chuinu. Mibi yacnoshon ambenquiobi chuisho: —Mua. Esusën chiaidpenquo mimbi chiec. Aid tantiatipimbo iquebi —cata. Nuquin Papan tantiacpadomboen Esusën abëd icquido chuibanëdaid nuqui tantiaid neque. Utsi tantienda. <sup>4</sup> Esus tantiaquido mimbi danubi mibi icsamenuc mibi yacno muaquido puduedac caosh. Ambi ëdenquo tantiacpadomboen Nuquin Papan icsano nidmetequido aido neque. Muasho tantienda. —Nuquin Papan bëdamboen isaido icsauidequi icshe nuqui cuidtiapimbo iquec. Chido chishpidambo yec dada cuididimbo yec quec icsashobi nuqui bëdamboen isec —quec comapenec muaique. Muasho tantienda. Esuquidistu Nuquin Icho abentsëcshun chiaid niac-niaquec icsaique.

<sup>5</sup> Adquid Nuquin Papan comapenen cuidendac. Tantia. Nuquin Papan cuidampid mimbi tantianëdaid mibi chuinu. Equipito yacnoshon unësmenuen ancanquidën icsamboen chonoa uasho isun ashunquo Nuquin Papan con matses isadaidbo tsusedpabo puduamepampic. Adoac yuectanquin puduamiamdombi ambi chiaid niac-niacsho isun Nuquin Papan uesquin unës uapampic. <sup>6</sup> Adembidi utsibotsen cuidpampic. Abëd icpampido ambi abi yacnoshon uaido mayan chedo abëdtan namequido icboedobi Nuquin Papan chiaid niac-niacte buncuenash Nuquin Papabëd icte bunenquo yampampic. Adec Satanas chedo abëd icte bunenquo icshe isun puduentiapimbo yacno icsamboshë yacno Nuquin Papan nidmepampic. —¿Ada mibi bëdambo icti? Mibi icsamboshë iqueque. Mibi cuidnu —quetequid ushën padpiden uesquin cuidnumbi adopampic. <sup>7</sup> Adembidi shubu dadpen yacnocquido cuidpampic. Shubu dadpen icquid Sodoma caid yacnoshon dadan aton chidopenquo chudnubi adembidi chidon aton bënëpenquo chudmepampic. Dada aton dada utsibëdi chichudnanquidquo icpampic. Shubu dadpen icquid Comoda caid yacnocquido adecbidi icsapampic. Shubu utsi-utsiec uanocquido adecbidi icsamboecuidi tabadpampic. Adsho isun cuidquin Nuquin Papan nëdëncapampic nibëdquiecnuc. Aido cuidampid tantiaquin: —Adembidi icsamboec tabadquido abitedi cuidquin Nuquin Papan chian anëdëncuicacno nësecaindac —quequin nuqui tantiec.

### *Muaquido icsaid*

<sup>8</sup> Cuidte tantienquo yec adecbidi muaquido icsamboecuidi tabadec. Aton dada utsibëdi chichudnanquido nec. Abi chuiquid dapabon chiaid niac-niacquinc Nuquin Papan chiaid niac-niacquinc caindac. Adembidi Nuquin Papan abi yacnoshon uaido mayan bëdabo caic: —¿Nadatiambo icquidta nedic? —quequin muauaic. <sup>9</sup> Mayan bëdabo chuiquid dapa Miqued caidën

adotiapimbo icpampic. Aidi Moises unësacsho isash: —Chococanu —quesho podobitsi icsabon icbon Satanasën: —Ëmbiquen bednu —catuidpampic. Adoac: —Icsano nidta —cainquo icpampic Miquedën. Adenquo icquin: —Nuquin Papambien mibi cuidec —capampic Miqued caidën mayan bédabo namequid dapa icquin. <sup>10</sup> Muaquidombien ambi tantienquo yaid icsamboen chuishunec. ¿Ada bēdi cuidnushe quepadic? Adembidi abi cuidte tantienquo icquin ambi tantiaiduidi naic tabadsho Nuquin Papan cuidendac.

<sup>11</sup> Cain caidbimboecquid muaquido nec. Nuquin Papan chiaid niacniacquin abi bunaid naiqui icsaic. Badan caidën piucquid bednuen Nuquin Papan chiaid niactiadquo yampampic. Adembidi piucquid bednuen muaquidon ambenquiobi chiec. Code caidën abi chuiquid dapan chiaid niac-niacpampic. Adembidi abi chuiquid dapan chiaid muaquidon niac-niaquec. Adsho Nuquin Papan comapenen cuidendac. <sup>12</sup> Muaquido icsambo iquec. Mibi icsametiadquien icchitec. Esus tantiaquidon pebededacno puduedshun mibēdtambi muaquidon piac caosh. —Esus tantiaquidquo nebi —quiash puduedash dacuēdenquo yec icsaiqui tabadec. —Esus tantiaquido chuibanquid nebi —¿quec muaquidonda Nuquin Papan chiaid chuipadic? Padenquo. Ambi naiduidi naquin ambembi chiaid chiac matses nadquo iquec. Uispa dadpen icboedi badiadnuc abu chēshën bētīnacsho isash: —Tanunquien badiadec —queuidac bimboec matses iquec. Pete ambi nitsinaid unësacsho istuidash: —Pete nitsinuidombi —quiācbimboec muaquidon chuisho tantiaquido: —Bēdamboen chiaid tantianu —queuidendac. <sup>13</sup> Acte tēccuasquequidën cuēmano nushan uaqin icsa uācbimboen icsaquin muaquidon mibitsen icsamec. Abi capuaid tantienquo yequi: —Ëbi capuaid tantiaquidquo nebique. Isec cho —queboedi bēnudtaniācbimboen: —Nuquin Papan chiaid tantiamequidquo nebi —queboedēmbi tantiamenquo iquec. Adec muasho cuidquin Nuquin Papan puđuentiapimbo yacno icsamboshē yacno nidmendac.

<sup>14</sup> Adquido con tsusedpa Enoc caidën chuipampic. Abia matses uaid Adanën madon baban tishmiaidën baba Enoc nepampic. Naden chuipampic. “Nuquin Papan abi yacnoshon uaid mayan bédabo dadpenquioshē Nuquin Icbobēd choendac. <sup>15</sup> ‘¿Ada mibi bēdambo icti? Icsambo icquid yec mibi icsauidequi iccoc. Mibi cuidnu,’ quequin matses icsambo icquido cuidnuec Nuquin Icho choendac. Nuquin Papa icsamboen chuishunquinc Nuquin Papan chiaid niac-niacquinc caquido cuidnuec choendac,” quepampic Enoc Esus matses cuidnuec chote chiec. <sup>16</sup> Aidën cuidtequido muaquido abi chuiquid dapabon chiaid cacuidec: —Icsambo iquec. Adtiapibi —quec chieshēmēnec tabadec. Abi bunacpadecuidi icsaquiēc. —Ëmbentsēqui bēdamboen naic —queuidequi iquec. —Ëmbi tantiacpadomboen ma nanu —quiash matses chiec: —Ëmbi tantiaidquido mibi nec —quec muaic.

### *Esus tantiaquionona, quiaid*

<sup>17</sup> Ëmbi tantiaido mibi neque. Tantia. Esusbēd iccondaidon chiaid mibi chuinu. <sup>18</sup> Nadpondash. “Esus padpidec choabi icnuc Nuquin Papan chiācpadec bēdamboec tabadsho Esus tantiesabon mamēnshunendac. Nuquin Papan chiaid niac-niaquec abi bunacpadec icsaquiendac,” quepondash. <sup>19</sup> Adquido muaquido iquec. Aton padi yec icsaiqui chieshēmēnquin mibi cuēsh-cuēshēdmec. Nuquin Papan aton Mayan aidobēd tabadmenquo iquec.



<sup>20</sup> Adquid icsacpadec icsainquo icquin Esus tantiatsëchoedëmbi Nuquin Papan chiaid isban-isbanquin ënenquo icquin Esusbëdta Nuquin Papa tantianuna. Nuquin Papan Mayanën tantiamicpadomboen Nuquin Papa chianenuna. <sup>21</sup> —Abi tantiasho bëdamboen isquin abi yacno Esusën nuqui tabadmendac —queshun Esus chosho isnuen cainquin aidbëdta Nuquin Papa tantianuna. —Nuquin Papan ëbi tantiec —quequin ambi chiacpadomboen utsibo tantianuna. <sup>22</sup> Adshumbic Nuquin Papan chiaid tantiatsëcquido bëdamboen isnuna. Adquidon muaquidon chuisho tantiash: —¿Abimbobida capeba? —quesho tantiashun nëishenquo icquin Nuquin Papan chiaidquo tantiamenuna. <sup>23</sup> Bacuëmpi cuëten pichiquetsensho: —Baded bed. Taidnushe —quiacbimboen —Icsano nidmequin Nuquin Papan cuidnushe —queshun utsibo Esus tantiamenuna. Icsaquidotsen bëdamboen isnuna. Esus tantiamenuen aido bëdamboen isec: —Ëbitsen icsamane —quiash aido icsacpadec icsainda. <sup>24</sup> Nuquin Papa bëdamboshë iquec. Aid tantiasho nuqui icsamenquo iquendac. Adshumbic: —Icsambo mibi iquec —utsibo quetiapimbo icnuc bëdambo icmeshun bëdamboshë yacno abëdi nuqui tabadmendac. Adoac nuqui cuishonquendac. <sup>25</sup> Aden tantiaquin nadonona. —Abipadquid utsi nibëdnuc abentsëcquiobi Nuquin Papa iquec. Nuquin Icho Esusded cuidshun abi tantiaquido cuidenquo icquid nec. Abitedishun Icbombo Nuquin Papa nec. Nadatiambo icquin nabanquidquo nec. Abitedi chuiquid dapambo yec abitedi namequidquo nec. Bëdamboshë iquec —canuna ënenquo icquin. Esus tantiaquido icquin adonona. Padi. Aidedi chuiquin dada uaombi.

## ESUSËN UAN ISMIAID

### *Nëidba chuiquin Uanën dada uaid*

<sup>1</sup> Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. <sup>2</sup> Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. <sup>3</sup> Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

### *Esus tantiaquidon iste dada uaid*

<sup>4</sup> Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. <sup>5</sup> Aton Mado Esuquidistu Nuquin Papan bëdamboen iste tantiamequidquido nec. Abia aton dada unëstiapimbo icquid icmequin uincuemiaidquido nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquido yec nuqui icsaid bedshunuec abided cuidadec unëspondash. <sup>6</sup> Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquido nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin. <sup>7</sup> Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaaidquido chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

<sup>8</sup> Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquido nebi. Nidaid uabi yec ictenedi nebi. Nëbi adquid yec nibëdantiapimbo icquidquido nebi. Adquid yec abitedishun Icbombo nebi —queposh Nuquin Papa. Aidquio tantianuna.

### *Dacuëdampamboecnuc Esusën ismiaid*

<sup>9</sup> Esusbëd ictened Uan nebi. Mibëdtan Esus tantiaquid yec min utsi bimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacbimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi.

Adondac Pacmos caidën abi tsadec nebi. <sup>10</sup> Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacbimboec comapenec onquesho tantiapombi. Ushenquio icquimbi ushquin isacbimboen tantiombi. <sup>11</sup> Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

<sup>12</sup> Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaidquio neposh. <sup>13</sup> Aid nënantanquio Esusquio icposh. Con matses isadaidbo chuiquid dapabimboec dasiuidac-cosh. Dashcute ënapen icquid abitiombi datonquiac-cosh. Abi shicton-quete bëshpiu-bëshpiuctsëcquid nuacquid dapambo icposh. <sup>14</sup> —Icsaisambo nec —camenuec aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquio nec —camenuec cuëte isquidbimboec aton ëshë isquid-isquidquio icposh. <sup>15</sup> —Utsin: “Ëmbiquen abitedi namenu,” catiapimbo icnuc abitedimbo namequid nec —camenuec shocosh piu nacnenaidbimboec nac-nacquio aton taë icposh. —Nuquin Papapadquidquio nec —camenuec acte chododoquiabimboec comapenec onqueposh. <sup>16</sup> Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquio nec —camenuec adposh. Aton bëtantete ushëbimboec bëchamauanquiecposh. —Bëdambo icquidquio nec —camenuec ad icposh.

<sup>17</sup> Dacuëdampamboecsho istanequini Esusën dayumbi uebudpaccoc unësaniacbimboec padishec. Adshobini Esusën camishquin bëdameposh. —Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi. <sup>18</sup> Adquid yequi matsesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

<sup>19</sup> Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuiboedbëdta ëmbi ismeboedtsen chuiquin dada uabanta. <sup>20</sup> Tanta. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi —quequin aden ismeposhi Esusën.

## 2

### *Epeso yacnocquido Esusën chiaid*

<sup>1</sup> Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Ëbi tantiaquido

chuiبانquidën Icho yec ëbi tantiaquidobëd iquebi —quequin aden ismeposhi. Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. <sup>2</sup> Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Ëbi tantiaquido icsamenuen chiec: ‘Esusën namiaidquo yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc. <sup>3</sup> Adembidi utsibon chieshënaqui chieshtoenquo icquin Nuquin Papan chiaidbëdta ëmbi naid mimbi chuibano.

<sup>4</sup> Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquo icquin mimbi utsibotsen tantiaquiopadenec. Adodenedëmbi pacuënëdabimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec. <sup>5</sup> Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ queshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquo icshoembi mibi yacnoshon ëmbi chiaid mibi chuiبانquid nibëdmendac. Adnuc ëbi tantiec cuëdënuec mibi pudued-puduedenquo ictsandac. <sup>6</sup> Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. <sup>7</sup> Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquo icquin ëbi tantiasho Nuquin Papa yacno ëbëdi tabadmendambi. Tauamboen mattses uashun Nuquin Papan aid dada tsadacno tied bëdamboshë yacno tied nënantan icquid cuëte mattses unëstiapimbo icquid icmete icmepampic. Aid cuëte bacuë meniabimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusën chuiposhi.

### *Esmidina yacnocquido Esusën chiaid*

<sup>8</sup> Adshumbic Esusën padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmëmqidon unës uacsho chococaqui uincuempaccondash. Adondaaid yec unësaid uincuemequidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu. <sup>9</sup> Ëbi tantiaquido icsho utsibon chieshënac mimbi dayun uaid nibëdquiendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmëmqidon mibi icsamboen chuishumboedtsen tantiembi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con mattses caido yequi Nuquin Papan yuapenquo yec Satanasën yuaboen nec. <sup>10</sup> Aido tantiash: ‘Ashibi mëyampatsiashe,’ quec dacuëdenda. Satanasën: ‘¿Ada Esus tantiaquido chieshtoenquo ictsiashe? Tanu,’ quequin namiacpadomboen chieshëmëmqidon mibi utsi-utsien quënën nauedbanendac. Adoac daëdpactsëc ushec mibi mëyadendac. Puduenabi yec chieshtoenda. Chieshëmëmqidon: ‘Esus tantiaquido icsho mibi cunesunenu,’ caqui chieshtoenda. Aidon cunesuniacsho mibi Nuquin Papa yacno puduedmeshun ëbëdi

tabadmendambi. <sup>11</sup> Nēbi ēbi tantiaquido utsibotsen chuinu. Ēmbi Esmidina yacnocquido chuibocpadomboen con Mayanēn mibitsen tantiametsiashe. Pabiate cuembo icquin ēmbi chiaid tantiata. Chieshtoenquo icquin ēbi tantiasho isun icsaido cuidquiacno nēsecainquo iquendambi,” quequin ēmbi chuiboed dada uata —quequin chuiposhi Esusën.

#### *Pedcamo yacnocquido Esusën chiaid*

<sup>12</sup> Adoshombic ana shēcuēnuēsh chēshte cuēnumboshē icquid cueshqueboedēn Esusën naden chuioaposhi. —Pedcamo yacnocquidon ēbi tantiaquidon iste ēmbi naden chuiboed dada uata. “Tantia, Pedcamo yacnocquido. Mibitedi chuinu. <sup>13</sup> Mibi yacno Satanasën yuabo dadpen icnuc ēbi tantiec mibi chieshtoenquo iquec. Ēnden Satanasën namiac mibi yacnoshon chieshēmēnquidon con yua Antipas caid cuesunepondash. Aidēn chieshtoenquo icquin ēmbi naid chuibansho cuesuniacsho isumbic adembidi chieshtoenquo icquin mimbi ēbi tantiaquiopondac. Aden mimbi bēdamboen naid tantiēmbi.

<sup>14</sup> Adondaaid tantiaquin mibi icsaidtsen chuinu. Mibi cuēdēncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ēndenquimboshē matses utsibo chuiquid dapa Badac caidēn: ‘Isadaidbo aquec cho,’ cac comapenen tantiaquidēn Badan caidēn isadaidbo Nuquin Papan chiaid niacmenuequin chuitampampic. Aidēn chiacpadomboen Badac caidēn matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquo tantiamenuen ambi papa quequin dasamboed nēish pichicaid pebededacno buampampic. Aden Nuquin Papan chiaid niac-niacmec icsamianquido mibēd iquec. Aido cuemepatecnēdan mimbi. <sup>15</sup> Adec nicadaitabo caido ēbi tantiate shubun puduedash mibēdi cuēdēncuededec icsamiente bumpec.

<sup>16</sup> Aidon chiaid tantienda. Ēmbi chiaid mibi niac-niacmenushē. Aidobēd tabadenda. Mibi cuēdēncuededacno chomenda. Ēmbi chuiboed niacbidansho isun con ana shēcuēnuēsh cueshqueboedēn chēshten cuesacbimboen mibi cuidtsiambique. <sup>17</sup> Nēbi ēbi tantiaquido utsibotsen chuinu. Ēmbi Pedcamo yacnocquido chuibocpadomboembidi con Mayanēn mibitsen tantiametsiashe. Pabiate cuembo icquin ēmbi chuiboed tantiata. Chieshtoenquo icquin ēbi tantiasho bēdambo icmendambi. Nuquin Papan isadaidbo mana caid pemedenequin dayun uacpadomboen mibi bēdamboen tabadmendambi. Adshumbic: ‘Ēmbi tantiaidquo yec ēbi yacno puduedtequid nec,’ qeshun cuēnote ushu menendambi. Abi cuēmēdquid icnubi utsi uain cuēnquin aid cuēnoten dada uatanquin menendambi. ‘Ēmbi meneboedēnuidtsēqui ma isnu,’ quequin adoendambi,” quequin ēmbi Pedcamo yacnocquido chuiboed dada uata —quequin chuiposhi Esusën.

#### *Tiatida yacnocquido Esusën chiaid*

<sup>18</sup> Adoshombic aidēmbidi padpiden chuioaposhi. Cuēte isquidbimboec aton ēshē isquid-isquidquo yequi aton taē shocosh piubimboec naccapambo icposh. —Icsaisambo yec Nuquin Papan Madombo nec. Adquid yec abitedishun naid tantiaquidquo icquin matses cuidquidquo nec —camenuec adquo isadquidēn naden chuiposhi. —Tiatida yacnocquidon ēbi tantiaquidon iste ēmbi naden chuiboed dada uata. <sup>19</sup> “Tantia, Tiatida yacnocquido. Mibitedi chuinu. Mimbi naid abitedi tantiēmbi. Ēbi tantiaquin mimbi utsibotsen bēdamboen tantiec. ‘Aton Papabēdtan Esusën bēdamboenshē natsiash,’ quequin chieshtoenquo icquin mimbi ēbi tantiec. Adquid icquin ēbi tantiamenuen utsibo nashunquido mibi nec. Ēbi tantiesabon: ‘Padi. Esus

tantienda,' caqui mimbi chieshtoenquo icquin ëbi tantiapec. Tauamboen ëbi tantiaquin daëdpactsëc naondaïdi nëbi ëbi tantiaquioshon ëmbi chiacpadomboen mimbi dadpen naic.

<sup>20</sup> Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquo yec mibitedi icsaic. Mimbi cacumiabi mibi iccuededacno isadaïdbo tsusedpan chido Esabed caïdbimboecquid chido icsamboshë icquid muanuec puduedposh. Puduedshumbic: 'Nuquin Papan chiaïd chuiquid nebique. Tantia. Chuïnu,' quequin abi bunaiduidquo chuïbanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquo utsibon papa caïd tantiabededacno puduedposh. Adshumbic aidon papa quequin dasamboed nëish pichicaïd pec tabadcuuededquimbi aton chidopenquo chudbededposh.

<sup>21</sup> Adsho isun aid chido: 'Ma abi icsaïd ënu,' queshun badedquo cuidenquo iccombi. Adoboqui abi icsaïd ënte bunenquo iccosh. <sup>22</sup> Adec abi icsaïd ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambi chiacpadomboen naquido adembidi mëyadquionoc cuidendambi. Aidon ambi naïd ënshoembi cuidenquo ictsiaç.

<sup>23</sup> Aid chido cuidquoquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquiendambi. Ëmbi adosho isun ëbi tantiaquidtedishun: 'Matsesën otacquo tantiaïd tantiaquidquo Esus nec. Adquid icquin abi icsaïd ënenquo icquido cuidquin abi tantiaquido bëdambo icmendac,' quequin tantiatsiaç.

<sup>24</sup> Tantia. Ambocquido ëbi tantiaquidombotsen chuïnu. Aden Satanasën chuïmiaïdën chuïsho: 'Aden chuïsho tantiatiapimbo iquebi,' mimbi capoc. Aden bëdamboen nasho isun utsi chienquo iquembi. <sup>25</sup> Nëiduidtsëqui chuïnu. Mimbi bëdamboen nabocpadomboen chieshtoenquo icquin ëbi tantiaç. Ëbi choabi yacpadembi adota. <sup>26</sup> Choshombimbi chieshtoenquo icquin ëmbi chiacpadomboen naquidombo ëbëdtan chuïquid dapabo icmendac. Adoac ëbëdtan matses utsibo abitedi namendac. <sup>27</sup> Aden Nuquin Papan aïdo ëbëdta chuïquid dapa icmiacsho utsibon: 'Dëniacquin ëmbiquen nanu,' catiapimbo iquendac. Ëbi chieshënquido: 'Esus dëniacquin ëmbiquen matses namenu,' quesho tantiashun matsu nacnenquidën ambi nacnenaïd icsambo icsho isun pos-posacbimboen cuidquiendambi. <sup>28</sup> Badiadte anoentsëc uispa dapa choded-chodedbocpadquiec ënëdenquo yec ëbi tantiaquidobëd iquendabi.

<sup>29</sup> Ëbi tantiaquido utsibotsen chuïnu. Ëmbi Tiatida yacnocquido chuïbocpadomboen Nuquin Papan Mayanën mibitsen pausuntsiashe. Pabiate cuembo icquin tantiaç. Chieshtoenquo icquin ëbi tantiasho adembidi bëdambo icmendambi," quequin ëmbi chuïboed dada uata —quequin chuïposhi Esusën.

### 3

#### *Sadis yacnocquido Esusën chiaïd*

<sup>1</sup> Adoshombic Nuquin Papan Mayan abi tantiaquidobëd tabadmequidquo icquin Esusën padpiden chuïposhi. —Abi tantiaquido chuïbanquid namequid nec —camenuen uispa 7tedi sananquin ismeboedën naden chuïposhi. —Sadis yacnocquidon ëbi tantiaquidon iste ëmbi naden chuïboed dada uata. "Tantia, Sadis yacnocquido. Mibitedi chuïnu. Mimbi naïdtedi tantiembi. Bëdamboec tabadquido danquin utsibon: 'Bëdambo icquido nec,' mibi canubi ëmbien adotiapimbo iquec. Mibi bëdapenquo iquec. Unësacbimboen mimbi ëbi bëdamboen tantienquo iquec. <sup>2</sup> Isucunacbimboen ëbi padpiden tantiaquiota. Nuquin Papan chiacpadomboen mimbi nauïdtsëccoque. Mimbi ëbi

tantienquo iqueque. ‘Nuquin Papan chiacpadquiec bēdamboec tabadnuna. Esus tantiaquionona,’ cananta. <sup>3</sup> Mimbi ēbi tantiabenondacpadomboen ēbi tantiaquiota. Bēpiscudenda. Nēbi mibi icsaid ēnshun ēmbi chiacpadomboen naoata. Isucunenquo yacbimboen ēbi tantienquo icshoembi mibi cuidendac. ‘Ampequid choec,’ quequin tantienquo yacbimboen ēmbi cuidte tantienquo icsho mibi cuidtsiambique. Ēbi tantiaquiota.

<sup>4</sup> Mibi yacno icsaquido dadpen tabadnubi utsi-utsiec daēdpactsēc ambi naid icsa ucuadacimboec icsainquo yec bēdamboec tabadec. Adec bēchish ucuadacimboec abi icsaid ēnash bēdamboec tabadsho isun ēbēdi tabadmequin icsaisa icmendambi. <sup>5</sup> Ēbi tantiaquido utsibotsen chuinu. Ēmbi chuibocpadquidēn chieshtoenquo icquin ēbi tantiasho adembidi bēdamboen isun Nuquin Papa yacno ēbēdi tabadmequin icsaisa icmendambi. Aido cuēmēdquid cuēmēdquidquien Nuquin Papa chuibanendambi. ‘Aido ēbi tantiaquidotedi neque. Nuquibēd tabadmenuna,’ quequin adoendambi Nuquin Papan abi yacnoshon uaido mayan bēdabontsen tantianuc. Aden dada uaid ucudenquo yacbimboen bēshunenquo icquin ēbēdi tabadtequido abitedi tantiembi. <sup>6</sup> Ēmbi Sadis yacnocquido chuiboed Nuquin Papan Mayanēn mibitsen tantiametsiashe. Pabiate cuembo icquin bēdamboen tantiata. Chieshtoenquo icquin ēbi tantiasho adembidi bēdambo icmendambi,” quequin ēmbi chuiboed dada uata —quequin Esusën chuiposhi.

#### *Pidadepia yacnocquido Esusën chiaid*

<sup>7</sup> Adoshombic icsaisambo icquin ambi chiacpadomboen naquidēnquo Esusën padpiden chuiposhi. Con tsusedpa Dabid yampicpadquid matses namequidquo yec ambentsēqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidēn naden chuiposhi. —Pidadepia yacnocquidon ēbi tantiaquidon iste ēmbi naden chuiboed dada uata. <sup>8</sup> “Tantia, Pidadepia yacnocquido. Mibitedi chuinu. Mimbi naid tantiembi. Mibi yacno ēbi tantiaquido daēdpactsēc iquec. Adquid yec: ‘¿Ada nuquitedictsēqui chieshtoenquo icpatsiaba?’ quededquededtsēcquien mimbi ēbi tantiaquioc. Chieshēnaqui: ‘Esus tantiatiapimbo iquebi,’ quenquo mibi iccoc. Adec chieshtoenquo icsho isun ēmbi namiac ēmbi naid mimbi chuiban-chuibanendac utsibon ēmetiapimbo icquin. <sup>9</sup> Aden isadaidbon mibi ēmetiadquo iquec. Aido: ‘Con matses isadaidboudtsēqui Nuquin Papan bēdamboen isendac,’ quec muaboedo Satanasën yuabo niosh. Ēmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac. <sup>10</sup> Ēmbi chiacpadec chieshtoenquo icquin ēbi tantiasho isash mibi cudasendabi. ‘¿Ada Esus tantienquo yantsiashe? Tanu,’ queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquo icquid icmendambi.

<sup>11</sup> Tantia. Nēbi choendabi. Utsibon chieshēnaqui mibi icbocpadquiec chieshtoenquo yec bēdamboec tabadta. ‘Ēbi adenquo icsho isun Esusën abi yacno puduedmenquo ictsiashi,’ quiash bēdamboec tabadta. <sup>12</sup> Aden chieshtoenquo icquin ēbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacbimboecnuc con shubun icquido mibi icmendambi auēshquo cuentiapimbo icnuc. ¿Mitsipaden icbon: ‘Con na nec,’ quequin abi cuēmēdquid dada uaquin ismepec? Adembidi abitedi ismequin: ‘Con Pabēdtan con matses nec,’ mibi caindambi. ‘Nuquin Papa yacno ēbi tabadaid Edusaden chuca caid abucuēsh budtequid yacno tabadtequidombo nec,’ mibi caindambi. Nuquin Papan

abitedishun Icbombo icmiac ebëdtambi chuiquid mibi icmendambi. <sup>13</sup> Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuibod dada uata —quequin Esusën chuiposhi.

### *Daudiseya yacnocquido Esusën chiaid*

<sup>14</sup> Adoshombic abitedishun naid tantiaquin abimbo chuiquidënquo Esusën padpiden chuioposhi. Nidaibëdta abitedi uaquidënquo abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuibod dada uata. “Tantia, Daudiseya yacnocquido. Mibitedi chuinu. <sup>15</sup> Mimbi naid tantiambi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopen-dactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Dayacquio yacbimboen ëbi tantiaquiopashun,’ caimbi mibi. <sup>16</sup> Mibi adec chieshtonoc ëbitsen chieshtotiadquo iquebi. ‘Cacumiabimboen Nuquin Papa yacno ebëdi mibi tabadmenquo iquendambi,’ mibi catiadquo icchitebi. <sup>17</sup> ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bëdambo iquebi,’ mibi quepoc. ‘Esus tantienquo yec Nuquin Papabëd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiuatiadquo iquebi. Bëchish ucabi yacbimboen mibi icsaid ënabi icsho mibi bëdamboen istiapimbo iquebi. Pacuënëdabimboen ëbi tantienquo mimbi iquec. <sup>18</sup> Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucabimboen mibi icsaid ënta. Adsho icsaisabimboecnuc mibi bëdamboen isquin ebëdi tabadtequid icmetsiambique. Pacuënëdaid paposhquiabimboecnuc ëmbi naid mibi bëdamboen tantiamet-siambique. Ëbi tantiata.

<sup>19</sup> Ëmbi tantiaido bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiabimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta. <sup>20</sup> Mibi tantiaquiambique. ‘Ëbi tantiata,’ ëmbi cac mibi: ‘Ai,’ qesho tantiash mibëd iquendabi. Pec tabadec bëisnaniabimboec mibëd iquendabi. <sup>21</sup> Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ebëdi tabadmequin ebëdtan chuiquid icmendambi. <sup>22</sup> Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuibod dada uata —quequin chuiposhi Esusën.

## 4

### *Nuquin Papa Uanën isaid*

<sup>1</sup> Asia yacnocquido Esusën ëmbudquin chuibon abuc ispombi. Adshun isquien shëcuë shëcniabimboec isadpec. Adnubien chuibocpadquiec shon-cachimboec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.



<sup>2</sup> Adoac Nuquin Papan Mayanën tantiamiac ambo nidacbimboen ispombi. Ushquin isacbimboembimbi caindac. Adshun isquien Nuquin Papambo chuiquid dapan tsadte dapanquo tsadpec. <sup>3</sup>—Chuiquid dapa abentsëcquiobi nec. Bëdamboshë iquec —camenuc matses bunaidquo casëdubimboec naccquo yec piumbo yec bëdamboshë isadposh. Abi tsadaid nënantanquo uenquebudpamboec uen podquedbipamboec umu-umupambo icposh. —Bëdamboshë icquidquo nec —camenuc adquo icposh. <sup>4</sup> Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquo dasiuidcuededposh. Chuiquid dapan mauetembo shocosh naccnaidquo maecuededposh. <sup>5</sup> Adnubien Nuquin Papa yacnuësh abubimboec bed-bedquetanenubien abu tesquianiachimboec cuëdtoposh. —Abitedishun Icbombo nec —camenuc adec cuëdposh. Nuquin Papan bëntsiaucquo tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuc aden ismeposhi. <sup>6</sup> Bëntsiaucbidi actepenquo chian dapa acte-actetsëcquo isadposh.

Nuquin Papa tsadaid anoen daëdtsëcquo abi dacuenadec aben icquidbimboecquid 4tedi icposh. Dadano chedobi ëshë ictsëcquiec icposh. Utsi tanenquo. Abimbouidquo istequidquo icposh. Cachoc icnubi tachiduc adquiobidi icposh. <sup>7</sup> Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. <sup>8</sup> Icho-icboec aton podo uicchunën podobimboec 6tedi icposh. Podonotsen adquiobidi ëshëuidquo isadposh. Podo ananquo adquiobidi icposh. Aidonquiobi ënenquo icquin Nuquin Papa chuiposh nadec cuëdënquin.

—Icsaisambo yec bëdamboshë icquidquo mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquo mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquo nec

—quec badiadquidën badiadquidënquiec cuëdënashic inchëshëntsen cuëdëdeneposh.

<sup>9</sup> Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsias, Papa —Nuquin Papa cadonenubi <sup>10</sup> tsusiobo 24ted icquido ambo tabadquido danëshën tinquebudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbic aidontsen Nuquin Papa chuiposh nadec cuëdënquin.

<sup>11</sup> —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibëdec.

Nadatiambo icquidquo mibi nec.

Comapenen tantiaquidquo icquin mimbi abitedimbo uapampic.

Mimbi tantiacpadomboen mibiuidtsëcquiobi abitedi uapampic.

Adoac mimbi tantiacpadequi mimbi uaido nibëdanabi yec abi iquec.

—quec tsusiobo cuëdëncuededposh.

## 5

*Nuquin Papan chiacpadomboen namequid Esus isadaid*

<sup>1</sup> Adshun isquien Nuquin Papan abiucshun ambi chiaid dada uaid sanampec. Abiuc daëdi dada uaid bidicabanquin: —Istemaïdën isnushe —queshun 7ted icnuc bitaccatempin bitaccabanaïd neposh. <sup>2</sup> Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. <sup>3</sup> Adoaquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaïdën tabadquidotedi. Nëidic unësaidotedi. Aïdtedi dada uaid bedshun bitaccaid chicbanquin istequid nibëdposh. <sup>4</sup> Adsho isashini unësquio icnuc shubipoc: —Aïd dada uaid bedshun chicbanquin chuibanquid nibëdec —quiash. <sup>5</sup> Adshobini anocquid tsusion: —Otac. Shubienda. Ënëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaïdquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aïdëmbi chieshtoenquio icquin Nuquin Papan chiacpadomboenuïdi naquidquio icquin aid dada uaid bedshun namendac —caposhi.

<sup>6</sup> Adoac isquien isadaïdbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunuec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi ëshëcquido dacuenadec tabadnuc abi uquëcstëc tsusiobouïdquio dacuenadec tabadposh. Padnuc obecabimboecquid yec aton pais 7tedi icnuc aton ëshëmba aïdtedquio-bidi icposh. —Abitedishun Icbombo yec utsin dëniacadiapimbo icquid Esusquio nec —camenuc aden pais ismeposhi. Adembidi: —Aton Mayambidi Nuquin Papan Mayan yec nidaïd utsi-utsiec yacno matses abitedi yacno nidmiaïd icnuc ompodëmëdtiapimbo icquid Esus nec —camenuc ëshë 7tedi ismeposhi ushquin isacbimboecnuc. <sup>7</sup> Adshumbic obecabimboec isadboedën Esusën Nuquin Papan abiucshunquio sananaïd dada uaid bedposh. <sup>8</sup> Bedsho istanequien dadanobi ëshëcquidobëd tsusiobo 24ted icquido Esus ismec danëshën tinquebudcuededposh. —Bëdamboshë icquidquio mibi nec —quiash adcuededposh. Tsusiobon icbo-icboen tentencate sananquimbi utsiucshun shocoshëmpi bëdambo nuadnuc tauitempi sanamposh. —Ëmbi ten-tencamequin Nuquin Papa cuishoncamiacbimboec Esus tantiaquido cuëdënaïd iquec —quequin aden ten-tencate sananquin ismeposhi. Adembidi: —Nëshun tauiac nëid pushudquid Nuquin Papa yacno nidacbimboec Esus tantiaquidon chianaïd iquec —quequin bëdambo nuadnuc tauitempi sananquin ismeposhi. <sup>9</sup> Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquio icnuec mibided cuidadec unësondaïdquio mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid

chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bédamboen isendac.

<sup>10</sup> Adoac min yuabo yanshun Nuquin Papa yacno mibëdi tabadquin: “Mibi bédamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

<sup>11</sup> Adnubien abi yacnoshon Nuquin Papan uaido mayan bédabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidouidquio dacuenadec tabadposh. Abi uquëctsc dacuenadec tsusiobouidquio tabadposh. Aid uquëctsc dacuenadequic mayan bédabouidquio tabadposh. <sup>12</sup> Adec tabadec mayan bédabo abitedimbo cuëdëncuededposh naden chiec.

—Isadaidbon obeca bacuëded cuidacbimboec matses icsaid bedshunuec abided cuidadec Esus unëspondash.

Esusquio bédamboshë icquidquio nec.

Adquid icsho: “Abitedishun Icho icquin Nuquin Papan chiacpadomboen namequidquio mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bédamboshë iquec. Mibi tantiaquiembi,” abitedishun capashun

—quec cuëdëncuededposh mayan bédabo Esus tantiec.

<sup>13</sup> Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquio Nuquin Papa bédamboshë iquec.

Obece bacuëbimboecquid abided cuidadec unësaid Esustsen bédamboshë iquec,” canuna, ënenquio icquin.

“Abiuidtsëqui Nuquin Icho nec. Utsi adquid ictiapimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquio icquin

—quec cuëdëncuededposh abitedimbo.

<sup>14</sup> Adsho tantias dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icho bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

## 6

### *Bitaccaid chicaid chiaid*

<sup>1</sup> Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacbimboec comapenec cuëdquin: —Cho —caposh.

<sup>2</sup> Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquio mibi nec —quetanquin chuiquid dapan mauetombo mauemeposh. Adoac adecbidi abi chieshënquido cuesun secanuec nidposh.

<sup>3</sup> Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac <sup>4</sup> cabayo piumbo icquid catsadec dada choposh. —Matses cuesun secananenquo icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —qeshun chështe dapa matses siante dapa meneposh. Adomboen Nuquin Papan matses cuidte tantiameposhi.

<sup>5</sup> Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. <sup>6</sup> Adnubien dadanobi ëshëcquido dacuenadec tabadnuc nënantanshunquo Nuquin Papan cabayo chëshëmbo icquid catsadquid chuiposh. —Piucquid dadpenquo meniac aton yuë daëdpactsëc nuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquo icquin nata —quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

<sup>7</sup> Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac <sup>8</sup> cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

<sup>9</sup> Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquo icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. <sup>10</sup> Adoaido icquin comapenec cuëdquin Nuquin Papa chuidoneposh. —Abitedishun Icbombo icquin mimbi tantiacpadomboen namequidquo mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedectsicshun mimbi cuidpe? —caquin chuidoneposh. <sup>11</sup> Adoquien: —Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin Papan: —Ëbëdi tabadmequin icsaisa mibi icmembi —qeshun abitiombi dasiuidbudte ushumbo icquid dasiimbamposh.

<sup>12</sup> Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquo icposh. Inchëshën ushëbic intacimboec piumboshë isadposh. <sup>13</sup> Uispabic natiambo cunquenuc cuëte bacuë tididiquiacimboec nidaidën tididieposh. <sup>14</sup> Abubic dashcute bidiquiacimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh. <sup>15</sup> Adsho isashien Esus tantiesabo abitedimbo: —Ashibi cuidpec —quetanec

ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh. <sup>16</sup> Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adem-bidi abided ciudadec unësaid Esusëntsen cuidnushe. <sup>17</sup> Aidon ambi tantiac-padënquiobini nëbimbobi cuidchitec. Padtembo. ¿Tsutsi cuidenquio icpatsi-ashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

## 7

### *Isadaidbo Nuquin Papa tantiaquidombo bësaid*

<sup>1</sup> Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidën uaquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —qeshun adoposh. <sup>2</sup> Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. <sup>3</sup> —Chiata. “Nidaid yec acte yec cuëte yec quenuc icsa uanushe,” qeshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidën.

<sup>4</sup> Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. <sup>5</sup> Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. <sup>6</sup> Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. <sup>7</sup> Nëidic Acobon madobidi Simeyon caidën matses tsyuecquido aidtedquiobidi. Nëidic Acobon madobidi Debi caidën matses tsyuecquido aidtedquiobidi. Nëidic Acobon madobidi Isacad caidën matses tsyuecquido aidtedquiobidi. <sup>8</sup> Nëidic Acobon madobidi Sabadon caidën matses tsyuecquido aidtedquiobidi. Nëidic Acobon madobidi Ose caidën matses tsyuecquido aidtedquiobidi. Nëidic Acobon madobidi Benamin caidën matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bëdan. Aden Nuquin Papabëdta Esus tantiaquido dadpenquioshë ismeposhi. — Adquido iquendac —quequin adoposhi.

### *Esus tantiaquido Nuquin Papa yacno tabadaid*

<sup>9</sup> Aden Nuquin Papa tantiaquido bëseboedo 144,000tedi tambanquin ismeboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshë tabadpec. Tambantiapimbo yactedi iquiec.

Nëidic nidaid utsi-utsiec yacno tabadquido. Nëidic matses utsibo. Nëidic matsesquio. Aidedi Esus tantiaquido neposh. Nuquin Papa Esusbëd tabadacnombo tabadposh. Abëdi tabadmequin Nuquin Papan icsaisa icmi-aido yec ushumbo icquid dasiuidcuededposh. Con matsesën chuiquid dapa ismiacbimboen: —Nuquin Papa bëdamboshë iqueque. Ismenu —quequin niste podobiecquid sananquin uic-uiccaposh. <sup>10</sup> Aido comapenec cuëdëncuededposh.

—Abitedishun Icho icquin Nuquin Papan ambi tantiacpadomboen isadaidbon obeca bacuëded cuidacbimboen aton Mado Esusede cuidpanëdash.

Adoac nuqui icsaid bedshunuec abided ciudadec unëspondash Esus.

Aid tantiasho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

<sup>11</sup> Adsho tantiash ambo tabadquido mayan bëdabotedi danëshën tinguëbudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëtsëc dacuenadec dadanobi ëshëcquido 4tedi icquiduidquio tabadposh. Abi uquëtsëc dacuenadec tsusiobo 24tedi icquiduidquio tabadnuc abi uquëtsëc dacuenadequic mayan bëdabouidquio tabadposh. <sup>12</sup> Aid mayan bëdabotedi danëshën tinguëbudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquio icnuc ambi tantiacmaid utsi nibëdec.

Aiduidtsëqui bëdamboen tantiaquidquio nec.

Aidën nashunac bëdamboshë iquebi.

Nadatiambo icquid nec. Abitedishun Icbombo nec.

“Esusbëd Nuquin Papa bëdamboshë iquec,” canuna

—quecuededposh mayan bëdabotedi.

<sup>13</sup> Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuëshquio aido chosh? —cac: <sup>14</sup> —Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “¿Ada chieshtoenquio ictsiashë? Tanu,” qeshun natiamboshë icmiac Esus tantiec chieshtoenquio ictenedo nec. Adec chieshtoenquio icsho isun Satanasën tantiacpadomboen chieshëmëncuidon unës uapondash. Abided ciudadec unësaid Esus tantiaquido icsho icsaisa icmi-aido yec dashcute ushumbo icquid dasiuidcuededposh. <sup>15</sup> Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bëdamboen dayun uaic. <sup>16-17</sup> Isadaidbo matsesën nëish yua obeca dadpen dayun uacpaden abided ciudadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante

nibëdquieci iquendac. Unësquio icmiant nibëdquieci iquendac. Bacuë shubisho anin bëucquin bëdambo icmiacimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

## 8

### *Dada uaid bitaccaid nainquin chicaid*

<sup>1</sup> Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpactsëc otacquo tantiec tabadposh. <sup>2</sup> Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. <sup>3</sup> Adnubien mayan bëda utsi ambobidi choposh. Choash bëdambo nuadquid tauinuequin shocosh nacenaid tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: —Nëid tauiac pushudquid Nuquin Papa yacno nidacimboec Esus tantiaquidon chianiaid iquec —quequin bëdambo nuadquid sanshun tauite nacenaid dapan tauiposh bëdambo nuadnuc. <sup>4</sup> Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshënquido cuidendac —quequin aden ismeposhi. <sup>5</sup> Adshumbic aid mayan bëdan tauite dapan samëdquid cuëte dëtsisadaid isquidquio icquid bedshun shocoshëmpin sandoposh. Aden sandotanquimbic shocoshëmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiacbimboec cuëdtoposh. Adnubien nidaid abichobi saca-sacaquemboec uëdëqueposh. —“Nuquin Papan ëbi chieshënquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

### *Shoncate shoncaquin ismiaid*

<sup>6</sup> Matses tabadacno cuëte dëtsisadaid isquidquio icquid masiabudnubien shoncate bedboedon mayan bëdabon shoncanuen sanamposh. <sup>7</sup> Adshumbic abentsëcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuëte dëtsisadaid isquidquio icquid yec intac yec quenuc chomeposh ue dapa choacimboec-nuc. Aden chomiaidën nidaid nuamboshë tauidposh. Cuëte dadpenquioshë tauidposh. Uasin dadpenquioshë pichiqueposh.

<sup>8</sup> Adnubien mayan bëda utsin shoncaposh 5tedishun shoncabi icnuc. Shoncanubien macuësh dpatembi icquid nëdënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. <sup>9</sup> Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

<sup>10</sup> Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdën-nëdënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh. <sup>11</sup> Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

<sup>12</sup> Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoquien bëdambo chënqueboedi bëdiactsëcquio chënquiantsëccosh.

<sup>13</sup> —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. — Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

## 9

### *Mayan bëda utsin shoncanuc isaid*

<sup>1</sup> Adnubien chiqui dapan chiacpadomboen mayan bëda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bëda badedquio budash matses yacno choposh. Adsho isun Nuquin Papan chiacpadomboen bëtashte chictempï meneposh. Podobitsi icsabo uidën uacno nidaid shëcuë uquëduccio icquid bëtashte chichte neposh. <sup>2</sup> Aid chictempin chicaquien uquëduccuësh tied nëdënquedoacbipamboec pushudtoposh. Abuc inchëshquio pushudquid icnuc ushë isadenquio icposh. <sup>3</sup> Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh. <sup>4</sup> Adsho isun aido chuiposh. Aton petembo caic: —Nuquin Papan tantiacpadomboen tiedën caniquidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Èsus tantiesabo bësiadabi icquidoudquio sebudneta —quequin chuiposh. <sup>5</sup> Adshumbic: —Unësnuc seshun secainda. Inchëshën ushë 5tedi nidmequin chichunën siacbimboecnuc sebudneta —cac tsectsebiecquidën sebudnequin ismeposhi. <sup>6</sup> Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

<sup>7</sup> Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetebimboecquid mauecuededposh. Matsesën bëtantetembobi bëisadposh. <sup>8</sup> Chidon tëbucshumbimboec isadposh. Bëdin shëtabimboec aton shëta icposh. <sup>9</sup> Bëntsiac shicdiadquid cudaste shocosh nacenaidbimboec sictsasimbo icposh. Aid abi maisi cuensho tantiac tied nëdënquiabimboec comapenec cuëdposh. <sup>10</sup> Aid tsectsebiecquid chishpichoquid yec chichumbimboec sianquidquio neposh. Inchëshën ushë 5tedi nidmequin adquidën dadpenshun natiamboshë icnuc matses sebudneposh. <sup>11</sup> Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abandon caposh. Quidieco matsesën onqueten apoyon caposh.

<sup>12</sup> —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

### *Chiqui dapan chuiboed utsi*

<sup>13</sup> Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiac tsadunaid yacnuëshquio onquedosho tantiombi. <sup>14</sup> Adec onquequidën nëbi shoncaboed chuiposh. —Acte dapa Eupëdates caid



yacnoshon matses cuidquido mayan bédabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan — caquien chuitamposh. <sup>15</sup> Aden chuitanac aid mayan bédabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac — quequin tantiacpadomboen adoposh. <sup>16</sup> Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

<sup>17</sup> Ęmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh. Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadacimboec asupede caid icsamboshë nuadposh. <sup>18</sup> Adshumbien ana shëcuënuësh choaidën matses dadpenquioshë cuesun secabudneposh. <sup>19</sup> Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

<sup>20</sup> Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ęntiadquidi abi icsaquioposh. Nuquin Papa tantienquio icquin podobitsi icsabo tantiaquin ëntiapimbo icposh. Adembidi ambibi nacnenaaid ambi papa caid ënenquio icquin tantiaposh. Utsibon shocosh nacnenaaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacnenauidi tantiaposh. <sup>21</sup> Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ębi icsaid ënu —quetiadquidobi adenquio icposh.

## 10

### *Mayan bédan dada uaidëmpi pemiaid*

<sup>1</sup> Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquio Nuquin Papa yacnuëshquio budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacpamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiabipamboec isquid-isquidpambo nidte icposh. <sup>2</sup> Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiucshun chian dapa mad caid nëtıncaquimbi taë opiocshon mananuc tincaposh. Ęnapenquioshë icquid niosh. <sup>3</sup> Adashien bëdi noshquiacimboec nuamboshë cuëdtoposh. Adec cuëdquin chiac abu 7tedec cuëdtonequin ëchedtoneposh Nuquin Papan chiaid chuiquin. <sup>4</sup> Aden abu cuëdquin ëchedtonesho tantiashun: —Abu cuëdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuëdquin chiaidtedi

dada uainda. Padi. Utsibo chuiquin dada uainda —caposhi. Adoac dada uainquo iccombi.

<sup>5</sup> Adnubien mayan bëda tsiembudcuenshun chian dapa nëtıncaquin utsi-ucshun mananuc tincaboedën ambibi podo abiucquo cadoposh. —Nuquin Papan isnubi abimbo chuiquidquo nebi —quequin tantiamenuen aden ambibi podo abiucquo cadoposh. <sup>6</sup> Adotanquin chuiposhi. —Tantia. Mibi chuinu. ¿Ttsutsi nidaid uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun aidën icquidtedi uapampic. Aden abitedi uaquidën chiaidquo chuinu. Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. <sup>7</sup> Èbi padquid mayan bëda utsin shoncate sanamboedën: “Nëbi nainquin shoncanu,” cac-padënquo Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

<sup>8</sup> Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: <sup>9</sup> —Dada uaid beccho —capombi. Adoquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanacimboec Nuquin Papan cuidte tantias shubitiadquo mibi yanendac —quequin tantiamenuen aden chuiposhi.

<sup>10</sup> Adoac aid bedshun chiash adquo yanobi. <sup>11</sup> Adquo yansho isun mayan bëdabo chuiquid dapan chuioaposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bëdabo chuiquid dapan.

## 11

### *Nuquin Papan namiaidon daëdshun naid*

<sup>1</sup> —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioaposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bëdambo nuadnuc tauinuequin nacnenaaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. <sup>2</sup> Shubu nuntanquo tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” queshun aid shubu daquënë uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquo icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. <sup>3</sup> Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquo chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquo iquebi,” quequin icsambo icquid abi icsaid

ëmenuc dashcute icsactsëcquidquio dasiuidendac —quequin Nuquin Papan chuiposhi.

<sup>4</sup> Adshobini mayan bëdan chuioaposh. —Aido Nuquin Papan oncamiaid daëd isadaidbo matses tsusedpan chuipampid nendac. “Nuquin Papan bëntsiauc cuëte odibos caid nitsinaid daëd bëdambo icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. <sup>5</sup> Aden abi chuibansho abi chieshënquidën: “Mibi cuesunenu,” caqui cuesuniadenquio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacimboen abi cuesunenuequidotedi unës uaindac. Nuquin Papan cuidte tantiamenuen adoendac. <sup>6</sup> Adembidi Nuquin Papan cuidte tantiamenuen Nuquin Papan Mayanën namiaidquio icquin comapenen tantiaquin ismebanendac. Aden ismequin nac abi nidabi yacpadequi ue choenquio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

<sup>7</sup> Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cuesun secaindac. Satanasën namiacpadomboen adoendac. <sup>8</sup> Edusaden yacnoshon cuesun secashun chococainquio iquendac. “Ma cuesun secaid ischitono,” qeshun chococainquio icquin podqued ansanendac. Nuquin Icho Esus cuesten dectanacnoshonquio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac. <sup>9-10</sup> Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquio iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac —quequin chuiposhi mayan bëdan.

<sup>11</sup> Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. <sup>12</sup> Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. <sup>13</sup> Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. <sup>14</sup> Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

### *Nainquin shoncaquin Uan ismiaid*

<sup>15</sup> Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icho nec

—quec cuëdëncuededposh. <sup>16</sup> Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bëdamboshë iquec —quequin ismec danëshën tinquebudcuededposh. <sup>17</sup> Adtanequi nadec cuëdëncuededposh.

—Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën catiapimbo mibi iquec.

Nadatiambo icquid icquin mimbentsëqui matses abitedimbo mimbi namendac.

<sup>18</sup> Nidaid utsi-utsiec yacno tabadquidon abi chuiquidobëdtan mibi chieshëndenedec.

Mimbi uaidtedi icsa uadenec.

Adsho mimbi tantiacpadënquio nëbi mimbi cuidendac.

Matses abitedi uincuemetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo mibi yacno mibëdi mimbi tabadmendac.

Chuiquid dapambobëdta chuiquidpenquio mibi tantiaquidotedi bëdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacbimboen.

<sup>19</sup> Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. —Ëndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ëbi ismenubien bed-bedquetanec abu teshquianiabimboec nua cuëdtoneposh. Nidaid saca-sacaquemboec uëdëqueposh. Ue dapa nuamboshë choacbimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

## 12

### *Chidobëdta nisibimboecquid dapa ismiaid*

<sup>1</sup> Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacimboec bëchamauanquiecsho ispombi. Inchëshën ushë tincash tsadposh. Uispa 12tedi nacnenaid mauete maueposh. <sup>2</sup> Bacuë nua usunec tishiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. <sup>3</sup> Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuededposh. Satanas niosh. <sup>4</sup> Adshombic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsi-utsien yuapampic. Aden yuash aton yuabobëdi nidaidën choshon matsesten icsamete bunquiec —camenuen

aden ismeposhi. Adshumbic chidon tishacsho bacuë penuen aiduidi bëisquin cainuidposh. <sup>5</sup> Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. <sup>6</sup> Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquo seta abentsë chotsecnuc matamequin. —Aden Esus tantiaquido Nuquin Papan dayun uaindac —camenuen aden ismeposhi.

<sup>7</sup> Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqued caid. Aidtedi ispombi. Adnubien Satanas nadposh. —Aton yuabo mayan bëdabo cuemiash Nuquin Papa dëniaquec ëbimbo abitedishun icho yantsiabi —quiash nicantiadquio icposh. Satanas chedo nidaidën nidmiabi icnuc neposh. <sup>8</sup> Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidënquo icquido yec niadenquo icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh. <sup>9</sup> Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquiec.

<sup>10</sup> Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi dëniacnuequido dëniacmenquo icposh.

Nuquin Papa chieshënquidquio icquin abi tantiaquido chieshënquin icsamboen chuishunquid nec.

“¿Esus tantiaquido bëdambo icquidoda nedic? Ëmbi natiamiac aido chieshtot-siash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided ciudadec unësaidbëdi dëniacadiapimbo yec abitedishun Icbombo nec

—queposh Nuquin Papa yacnuësh cuëdec. <sup>11</sup> Adashic padpidec auëshbidi:

—Nëbi ëmbi isac Satanasën Esus tantiaquido chieshtometiapimbo icposh.

Satanasën: “Chieshtomenu,” caqui:

“Padi. Esusën yuambo nebi,” quec chieshtoenquo icposh.

Cuidmenquo icnuec abided ciudadec unësaid Esus tantiec chieshtoenquo icposh.

Adsho abi chieshënquidon matsesën: “Padi. Esus tantienda. Cueschitomane,” caqui

chieshtoenquo icquin adenuidi Esus tantiasho cuesun secameposh Satanasën aton yua icmiambobi.

<sup>12</sup> Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonquenuna.

Ëbitedi cuishonquenuc nidaidën tabadquido matses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquiec Satanas chieshëmënquiec tabadec.

Mibi icsamete bunquieci. “Nëbi Nuquin Papan ëbi cuidquieque. Abi tantiaquido yuashunchitono,” quec mibi icsamete bunquin mibi nati-  
ambo icmendac.

Adoac natiaic mibi tabadendac

—queposh Nuquin Papa yacnuësh cuëdec. Aden tantiameposhi.

<sup>13</sup> Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. — Nuquin Papa yacnoshon nicachitoshi —queshun chieshënquin nisibimboecquid Satanasën aid chido nadancaposh. <sup>14</sup> Adnubien Nuquin Papan chiqui dapan podobiecquid meniac bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh. <sup>15</sup> Adnubien nisibimboecquidën: —Aid chido unës uachitono —quequin ambibi ana shëcuëshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec. <sup>16</sup> Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. <sup>17-18</sup> Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chi-  
acpadomboen chieshtoenquio icquin bëdamboen naquido Esus tantiaquido caimbi.

## 13

### *Bëdibimboecquid dapa ismiaid*

<sup>1</sup> Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquieci. Èbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh. <sup>2</sup> Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbucchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi. <sup>3</sup> Adshumbic padpiden ismeposhi. Adoac aid bëdi dapabimboecquid acte uquëducuësh choboedën mapi abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh. <sup>4</sup> Adshumbic: —Èbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —queshun abi chuiquid dapa acte uquëducuësh choboedtsen tantiaquioposh. <sup>5</sup> Aden matsesën tantiaid icquin Satanasën tantiamiacpadomboen Nuquin Papa chieshënquieci: — Nuquin Papa caid nibëdquieci. Èbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë

42tedi nidmeposh seta abentsë chotsecnuc matamequin. <sup>6</sup> Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. <sup>7</sup> Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isacbimboecnuc ismeposhi. <sup>8</sup> Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

<sup>9</sup> Pabiate cuembo icquin bëdamboen tantia. Esus tantiaquido icsho mibi chuinu. <sup>10</sup> Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantias mimbi nacpadequi chieshtoenquio icta. Chieshtoenquio icquin Esus tantiaquin ambi chiacpadomboenuidi nabanta.

*Nidaid shëcuënuësh choboedtsen ismiaid*

<sup>11</sup> Adshumbic padpiden ismeposhi. Adoac aben icquidbimboecquid utsisen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. <sup>12</sup> Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. <sup>13</sup> Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. <sup>14</sup> Aden Satanasën namiacpadomboen comapenen tantiaquin ismiac matses dadpenshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papan tantienquio icquin. Abi chuiquid tantiamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh. <sup>15</sup> Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoquien nacnemboedquiobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. <sup>16</sup> Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquio dada uaquin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquio. Aidtedi matses dadpenquioshë dada uaquin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquio mësiadmeposh. —Acte uquëducuësh choboedën ëbi chuiquid dapan yuabo nec —queshun nameposh. <sup>17</sup> Adshumbic nidaid shëcuënuësh choboedën chuiposh. —Adec

ëmbi chiacpadec siadambo icquido piucquidbêdta mitsana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. <sup>18</sup> ¿Ada ëmbi chuiboed tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacbimboecnuc aden ismeposhi.

## 14

### *Nuquin Papan cudasënaido ismiaid*

<sup>1</sup> Adoshombic padpiden ismiac abided ciudadec unësaid Esusquio macuësh dapa Sion caid mananënquio tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën —quequin cudasquin Nuquin Papan abi cuëmëdquidbêdta Esus cuëmëdquid dada uaquin bësemiaido niosh. —Adec Esus tantiaquido abëdi tabadendac —quequin aden ismeposhi. <sup>2</sup> Adnubien Nuquin Papa yacnuësh ¿midapadpamboec cuëdtoposh? Acte nua chododoquiachipamboequien niacbiposh. Abu tesquianiachipamboequien nechitosh. Ten-tencate dapa dadpen icbo-icboen sananquin ten-tencacchipamboec comapenec cuëdëncuededposh. <sup>3</sup> Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobêdten dadanobi ëshëcquido 4tedi icquidën ambobidi tabadquin tantianuc adcuededposh. Abi icsaid bedshunuec abided ciudadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. <sup>4</sup> Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbêdta tantiatiapimbo icnubi aidombien tantiaquiopanëdash. Abided ciudadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabêdta Esus cuishoncamequidombo niosh. <sup>5</sup> Chieshtoenquio icquin Esus tantiec muesabo icpanëdash. —Adquido iquendac —quequin ushquin isacbimboecnuc aden ismeposhi.

### *Mayan bëda utsi 3tedshun chiaid*

<sup>6</sup> Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacimboec abuc cuensho ispombi. Bënudtiapimbo icquid Nuquin Papan chiaidquio matses chuinuec niosh nëidtedi. Nëidic matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh. <sup>7</sup> Abuc cuenquimbi chuibemposh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bëdamboshë iquec. Abipadquid utsi nibëdquio iquec,” quequin tantiata. Nëbi ambi chiaid niac-niacquido cuidquieque. Aidquio tantiata —quequin chuibemposh abuc cuenquimbi.

<sup>8</sup> Adnubien mayan bëda utsi abuc cuenoaposh. Cuenquimbi naden chuibenaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquio icquin icsamequioposh. Aduidequi icsho ëdenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.



<sup>9</sup> Adnubien mayan bëda utsitsen abuc cuenoaposh. Aidëntsen chuibenoaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnuc nacnenaïd tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaïdën chiapadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatipimbo icsho Nuquin Papan cuidquien-dac. <sup>10</sup> Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacro chian anëdënquiacno nësecain adoendac. Abided ciudadec unësaid Esusënquio mayan bëdabobëdtan isnubi adoendac. <sup>11</sup> Ènenquio icquin adoendac. Aden Nuquin Papa chieshënquidquio tantiec siadaïdo Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac ènenquio icquin —quequin chuibemposh mayan bëdan. Aden ismeposhi.

<sup>12</sup> Èmbi chuiboad tantiaishun mimbi nabocpadomboembi chieshtoenquio icquin Esus tantiaquin ambi chiapadomboenuidi nabanta. Utsibon chieshënquin: —Padi. Esus tantienda. Cueschitomane —caqui adenuidi ènenquio icquin Nuquin Papabëdta Esus tantiaquiota.

<sup>13</sup> Adnubi Nuquin Papa yacnuësh comapenec onquequin chuioaposhi. —Naden chuiquin dada uata. Chieshëmënquidon: “Esus tantiec,” qeshun cuesun secaïdo Esus tantiaquido cuishonquendac —quequin chuiposhi. Adnubien Nuquin Papan Mayanëntsen: —Ai, abimbo caosh. Esus tantiaquido natiaic tabadtenedobi unësash bëdamboshë iquendac shubitiapimbo yacro tabadec. Ambi chiapadquiec bëdamboec tabadec unësacsho Nuquin Papan aden bëdamboshë icmendac —quequin chuiposhi.

#### *Intac nua icnuc Nuquin Papan cuidtequid chiaïd*

<sup>14</sup> Adoshombic padpiden ismiac abu ushunquio Esus tsadsho ispombi. —Abitedishun Icbombo nebi —quec chuiquid dapan mauetempo shocosh nacnenaïd maueshun chështebimboecquid sanamposh. <sup>15</sup> Adnubien mayan bëda utsin abi yacnuësh choquin comapenec onquequin Nuquin Papan chuiboad Esus chuituidposh. —Nëbi nidaidën icquid sinaïd butebanquin sando. Nuquin Papan tantiacpadën nëbimbobi nata <sup>16</sup> —caquien chështebimboecquidën sinaïd butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacro Esusën buanendac —camenuen aden ismeposhi.

<sup>17</sup> Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. <sup>18</sup> Adec chështebimboecquid sanampamboec choshobien mayan bëda utsin matses tabadacro cuëte dëtsisadaïd isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caïd nidaidën caniquid chështebimboecquidën mëtebanquin sandoshon buanshun uba tish-tishten sando <sup>19-20</sup> —caquien uba caïd mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ènë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacro cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ènapenquio quidometedos 300ted cactiombi cuësquec

nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshënquido cuidendac —quequin ismeposhi.

## 15

### *Nuquin Papan cuidtequid 7tedbidi nabanaid*

<sup>1</sup> Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bédabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bédanendac —quequin tantiaquin ispombi.

<sup>2</sup> Nuquin Papa yacnobidi chian dapa icposh. Actepenquio yec actectesëcquio isadposh. —Nuquin Papa icsaquido cuidquidquio nec —camenuec tied nédënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën: —Yuanu —cauidaido niosh. Chuiquid dapa icsamboshë icquidbimboecnuc nacnenaaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuëdëmec cuëdëncuededposh. <sup>3</sup> Nuquin Papan namiaid Moises: —Nuquin Papan nac ëbi chieshënquidon ëbi cuesun secainquio icposh —quec cuëdëmpampicpadec cuëdëncuededposh. Nuquin Papa bédamboen ismenuec abided cuidadec unësaidquio Esus aton Papabëdta tantiec cuëdëncuededposh naden chiec.

—Nadatiambo icquin nabanquidquio mibi nec, Papa.

Abitedimbo uaquidquio yec abitedishun Icbombo mibi nec, Papa.

Matsesën naid abitedi tantiaquidquio abimbo chuiquidquio mibi nec, Papa.

Mimbi naid bédambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

<sup>4</sup> Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bédambo icquido mimbi bédamboen isendac.

Adsho isun nidaid utsi-utsiec yacno tabadquidon matses abitedishun: “Mibi bédambo iquec. Con Icbombo mibi nec,” caindac

—quec cuëdëncuededposh Esus tantiaquido.

<sup>5</sup> Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi. <sup>6</sup> Auëshquio Nuquin Papan chiacpadec ëmbi isboedo mayan bédabo 7tedi cho-choposh. Matses icsaquido cuidquido niosh aido. —Nuquin Papan yuabombo nec —camenuec dashcute nac-nacquio icquid dasiuidcuededash dashcute bëshpiu-bëshpiumbo icquid shictonquecuededposh. <sup>7</sup> Adsho isun Nuquin Papabëd icquid dadanobi ëshëcquid abentsëcshun maspanëmpi shocosh piu nacnenaaid icho-icboen menebamposh. Unëstiapimbo icquidën Nuquin Papan nëishënquioshon cuidte cushtoaid maspanëmpi niosh. <sup>8</sup> Adnubien Nuquin Papa tabadaid nuntanuësh pushud-pushudpambo icposh. Adec dacuëdampamboecsho isash Nuquin Papa chuinuec puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin

cuidendac utsibon: “Chën,” cadiapimbo icquin —camenuen aden ismeposhi.

## 16

### *Maspanëmpin cushtoaid*

<sup>1</sup> Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiinquin matses uesquin cuidta —quequin chuiposh Nuquin Papan.

<sup>2</sup> Adoaquien abentsëcshun ambi bedboed maspanëmpin cushtoaid nidaidënsnun chiuimposh. Adnubien ëmbi isboed acte uguëducuësh choboed chuiquid dapa icsamboshë icquidën yuaidotedi natiambo yec chiuëchiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

<sup>3</sup> Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacipamboecnuc intacuac. Intacuidpambo icnuc acten icquidtedi unësbudneposh.

<sup>4</sup> Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. <sup>5</sup> Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

<sup>6</sup> “Ëmbi chiaid chuibanquidobëdta ëbi tantiaquido nua intac icnuc chieshëmënsquidon cuesun secabudnepondash,” queshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

<sup>7</sup> Aden acte dayun uaquidën chuisho tantiash Nuquin Papa tantiaquin nëish pichicate dapa yacnuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tantiaquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi —queposh mayan bëda utsi.

<sup>8</sup> Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses badedbadedquiec ushën pichiebudneposh. <sup>9</sup> Adec pichiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna —quetiadquidëmbi chieshënquin abi cuidquidquio Nuquin Papambo chushcabededposh.

<sup>10</sup> Adnubien utsintsen ambi bedboed maspanëmpin cushtoaid chiuimbenequin acte uguëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquio icposh. Adsho isash matses abitedi natiambo

dacuëdcuededposh. <sup>11</sup> Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna —quetiadquidëmbi: —Natiambo chiuëmianec Nuquin Papa icsambo iquec —queshun Nuquin Papa chushcabededposh.

<sup>12</sup> Adnubien utsintsen ambi bedboed maspanëmpin cushtoaid acte dapa Eupëdates caid nëchiuimposh. Adoquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

<sup>13</sup> Adec aid matses cho-choabi icnuc ushë choacmishun chochometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidedi chosho isombi. <sup>14</sup> Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. —Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

<sup>15</sup> Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yachimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

<sup>16</sup> Adnubimbi coqueshbimboecquid podobitsi icsabon namiac matses ut-sibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

<sup>17</sup> Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. —Padi. Nëbi ëmbi tantiacpadombon ënquimbi cuidec —queposh. <sup>18</sup> Adnubien abu bedbedquetanepamboec abu tesquianenuc natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh. <sup>19</sup> Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: —Anocquido icsamboshë icquido nec —quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh. <sup>20</sup> Nidaid uëdëquenubi chian dapa mad caid yacno acte nënantan nidaid icquid abitedimbo nibëdambudneposh. Adecbidi macuësh abitedi nibëdambudneposh. <sup>21</sup> Abucuëshquio ue dapa choacbimboec ue tsasi nuacquid dapa quidos 50 icnuc yuë tanaid dadpenquio paëdbudnequimbi matses tish-tishbudneposh. Aden ue tsasi dapan mëyansho isun padenquio ictiadquidëmbi matsesën Nuquin

Papa chushcabededposh. —Nuqui icsaid ënshun Esus tantianuna —quetiadquidëmbi chushcabededposh. —Adquido iquendac —quequin ushquin isac bimboecnuc aden ismeposhi.

## 17

### *Chido chishpidabimboecquid ismiaid*

<sup>1</sup> Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquo icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. <sup>2</sup> Aido icsamboshë iquec. Matses utsi-utsien abi chuiquid dapabobëdta uisma uanten danoshcac bimboen Nuquin Papambo tantiamenquo icquin ambi chiaid niac-niacmequioposh. Aido cuidsho isec cho —queposh.

<sup>3</sup> Adshumbic ushquin isac bimboecnuc ismeposhi. Nuquin Papan Mayanën tantiamiac masiuidquo yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquo iquec —quequin uesquin dada uapaidquo icposh. Aton mapi sietetedi icnuc aton pais 10tedi icposh. —Mimbi isboed acte uguëducuësh choboed chuiquid icsamboshë icquidquo nec —quequin aden aben icquid ismeposhi. <sup>4</sup> Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaïd chedo cuënotempi nac-nacquo icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquo icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcac bimboen: “Nuquin Papa caid nibëdquiec,” quequin tantiamequin matses utsibo dadpenquo icsamequiendac —camenuen aden ismeposhi. <sup>5</sup> Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh. <sup>6</sup> Aid chido paëmbo icquid acac bimboec Esus tantiaquidon intac acash tantiadenquo yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquibi.

<sup>7</sup> Adbudquioshobini aid mayan bëdan: —“Tantiadenquo iquec,” ¿quecta ique? Tantia. Chido chishpidabëdta abi catsadaïd aben icquid chuïnu.

<sup>8</sup> Mimbi isboed aben icquid icsamboshë icquid ictenedi nëbi nibëdec. Yueshun Satanasën abi tabadacnoshon padpiden chomendac. Adoacsho yueshun Nuquin Papan chian anëdënquiacno nësecaindac. Aden cuidabi Satanasën chomebocsho isun Nuquin Papa tantiesabon: “Comapenen tantiaquidien nechitec. Matses nibëdanëdaïd uincuenashien choachitosh. Aidi tantianu,” caindac. Matses uabi icquin Nuquin Papan: “Ëbi tantiaquido iquendac,” cacmaidonquo adoendac —queposh mayan bëda.

<sup>9</sup> Adshumbic padpiden chuïposhi. —Tantia. Ëmbi chuïboed bëdamboen tantiamenuen chuïnu. Naden tantiamenuen aben icquidën mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. <sup>10</sup> Aid chuiquid dapabo 5tedi nibëdnubi utsi abi iquec. Nëbi aidën aton matses

namec. Utsitsen choendac. Choshon aton matses nametantsequi badedquio nibëdanendac. <sup>11</sup> Nibëdanëdaidi choashic ëmbi ismeboed acte uquëducuësh choeboed chuiquid dapa icsamboshë icquidquio iquendac. Aidën ëmbi chuiboedo chuiquid dapabo 7tedishun namiac bimboen aton matses icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

<sup>12</sup> Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choeboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. <sup>13</sup> Nibëdanabi icquin aidon acte uquëducuësh choeboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” qeshun aden icsamboshë icquid abi chuiquid dapa icmendac. <sup>14</sup> Aden Esus chieshënuquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënuquin cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

<sup>15</sup> Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. <sup>16</sup> Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënuendac. Aden chieshënuquin cuesun secatanquin shububëdtabi nëdëncaindac nibëdquiecnuc. <sup>17</sup> “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choeboed chedo chuiquid dapabo icmendac. <sup>18</sup> “Matses utsi-utsien chuiquid dapabo aton matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

## 18

### *Nuquin Papan Babidonia caid yacnocquido cuidaid*

<sup>1</sup> Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamuanquiecposh. <sup>2</sup> Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac. <sup>3</sup> Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenuquio icquin ic-samequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenuquio icposh. Adsho Nuquin Papan cuidquiendac —quequin mayan bëdabon chuiposhi. <sup>4</sup> Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi. <sup>5</sup> Nuquin Papa yacnoshombidi utsin

chuiposh. —Ënëdenquo yec icsauidequi icsho isun ambi tantiacpadomboen Nuquin Papan cuidquiendac. <sup>6</sup> Babidonia caid yacnocquidon mattses utsibo dadpenquo icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. <sup>7</sup> Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquo bedash: “Aidtedi dayun uaic bëdambo iquebi,” quepec Nuquin Papan cuidte tantienquo yequi. Adsho tantiaashun: “Natiambo icnuc comapenen cuidquiopashun,” caimbi. Otacquo tantiec: “Nuquin mattses yuabo dadpen icnuc nuqui bëdamboec tabadec. Chido niante bënë unësaid mëyadac bimboec mëyadtia pimbo nuqui iquendac,” quechitequien iquec Babidonia caid yacnocquido Nuquin Papa tantiatia pimbo yec. <sup>8</sup> Adsho ambi: “Nëbi ëbi cuidec,” cacmaidënquo cuidendac. Nuquin Papanquo abitedishun Icbombo icquin comapenen tantiaquin nacnenquidquo icquin badedquo cuidquiendac. Aden dadpenquo unës uabudniacsho isash natiambo sedenquecuededendac. Aton pete nibëdquiecnuc natia bunendac. Aton shububëdi dadpenquo nëdënquendac —queposh mayan bëda.

<sup>9</sup> Adashic abi onquec: —Adec Babidonia yacnuësh nëdënquec pushudtonesho isash: “Aidon namiacpadomboen Nuquin Papa tantienquo icquin con na dadpen bedtenembi,” quequin chuiquid dapabon nadambocain sedencabededendac. <sup>10</sup> “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton mattses aton yuabobëdi dadpenquo icpadenec. Ambi dayun uaid dadpenquo icpadenec. Mattses utsibo dadpen namepadenec. Aido tantiac unësquimboshë iquec. Badedquo uesquin cuidquiopac,” quec sedenquecuededendac Babidonia caid yacnocquido tantiec —queposh mayan bëda.

<sup>11</sup> Adashic abi onquec: —Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac. <sup>12</sup> Aidobidi: “Nadquid Babidonia caid yacnocquido menequin piucquid dadpen bedtenembi. Nëdic shocosh piu. Nëdic shocoshquo. Nëdic casëdubimboecquid cuënote bëdambo icquid. Nëdic dashcute bëdambo icquid. Nëdic dashcute piumbo icquid. Nëdic dashcute umumbo icquid. Nëdic sëntebimboecquid nacnenaid. Nëdic aben icquid edepanten shëta nacnenaid. Nëdic cuëte utsi bëdaidquo nacnenaid. Nëdic shocosh utsi nacnenaid. Nëdic cuënote nac-nacquo icquid nacnenaid. Piucquid dadpen menequin adquidtedi Babidonia caid yacnocquidon bedpadenec. <sup>13</sup> Utsitsen dadpen bedpadenec. Nëdic batambo icquid sabimboecquid. Nëdic bëdambo nuadte. Nëdic bëdambo nuadec danoshquete. Nëdic acte paëmbo icquid. Nëdic bëchi. Nëdic pan nacnentequid. Nëdic nëish yua baca caid. Nëdic nëish yua utsi obeca caid. Nëdic nëish yua cabayo caid. Nëdic mattses antsadsho cabayon nimbanquin buante. Nëdic ambi chonoa uatequido mattses ambi ampequin bedaido dadpen. Babidonia caid yacnocquidon aidtedi dadpenquo bedtenesho aton piucquid dadpen bedpadenembi,” quependac nidaid utsi-utsiec yacno tabadquido —queposh mayan bëda.

<sup>14</sup> Adashic abi onquec: —Abi piucquid menedenedën dayun uaid nibëdanesho isash: “Aid mattses bunaidquo ambi dayun uaid pete nibëdquiec. Ambi dayun uaid dashcute bëdambo icquidbëd aton na utsi dadpen abitedi nibëdquiec,” <sup>15</sup> quiash natiambo dacuëdec uanoshon isec tabadec sedenquecuededendac abi piucquid menedenedo tantiec. <sup>16</sup> “Aid mattses

tantiac unësquimboshë iquec. Matses dadpen yuaquin matses dadpen namepadenec. Aton matses dashcute bēdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casēdubimboecquid shocosh piu nacnenaid payudenec. Utsibic casēdubimboecquid utsi payuec mēsiuidtenec. Adec: ‘Con na dadpenquio icnuc bēdamboec tabadebi,’ quepadenec Babidonia caid yacnocquido. <sup>17</sup> Adsho isun Nuquin Papan abi ushēmbi cuidquiac ambi dayun uaidbēd aid matses badedquio nibēdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nēidic cano dapa dancha icbo. Nēidic dancha icbobēd nidquido aton yuabo. Nēidic icbo piucquid meniash dancha antabēdtoquido. Nēidic nuēcquid bedshun piucquid bednuen menequido. Aidtedi uanoshon isec sedenquecuededendac. <sup>18</sup> Nēdēnquec pushudtonesho uanoshon isash: “Adquido utsi nibēdec,” <sup>19</sup> quiash natiaquiec sedenquecuededendac. Adec shubiec: “Ēbipadquid dancha icbon bēaidtedi bedshun piucquid dadpen menedenedo tantiac unësquimboshë iquec. Is. Cuidquiac badedquio nibēdanaque,” quec sedenquecuededendac —queposh mayan bēda.

<sup>20</sup> Adashic mayan bēdabidi: —Ēbien cuishonquendac. “Nuquin Papa yacno tabadquidotsen ēbēdi cuishonque,” quequin chiendambi. Esus tantiaquido chuiquinc Esusbēd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshēnquin natiamicpadomboen mibi chieshēnquido Nuquin Papan uesquin cuidquioshe,” quequin chiendambi —queposh mayan bēda.

<sup>21</sup> Adnubien mayan bēda utsin uidēnquio icquidēnquio nidaid moco nuacquid dapa yuēmboshë icquid cadotanquin acquimboen acte nēnebidanquimbi chuiposh. —Ēmbi acquimboen nēnebocpadomboen Nuquin Papan Babidonia caid yacnocquido uesquin cuidquiendac nibēdquiecnuc. <sup>22</sup> Adoac aido ictenecnombo nadimbo iquendac. Ten-tencate ten-tencainquio iquendac. Utsibobic cuēdēnenquio iquendac. Utsibombic shoncate shoncainquio iquendac. Cuēte chēshun nacnenenquio iquendac. Piacho macuesenquio iquendac. Nadimboshë iquendac. <sup>23</sup> Tabote taboadaid nibēdendac. Dada aton chido ambi nēbi bedaidbēdi mamēnenquio iquendac. Nibēdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac. <sup>24</sup> Nuquin Papan cuidabi icnuc aden icsamequin Babidonia caid yacnocquidon Nuquin Papa chieshēnquin ambi chiaid chuibanquidobēdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bēda.

## 19

### *Chieshēnquido cuidacsho isash cuishonquiaid*

<sup>1</sup> Aden mayan bēdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuēshquio Esus tantiaquido dadpenquioshē comapenec cuēdēncuededposh.

—Nuquin Papa bēdamboshë iquec.

Aiduidtsēqui matses abitedishun Icbombo nec.

Aton Mado abided ciudadec unēsaid tantiasho matses bēdamboen isec.



<sup>2</sup> Muesambo icquin ambi chiacpadomboen naquidquo nec.  
 Abi tantiesabo ënëdenquo yec icsauidequi icscho cuidquidquo nec.  
 Adquid icquin: “Icsamboshë iquec,” quequin matses utsibo icsamequido  
 Babidonia caid yacnocquido cuidquioposh.

Nuquipadquid Esus tantiaquido cuesun secacsho isun cuidquioposh  
 —quec cuëdëncuededposh.

<sup>3</sup> Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncuquin Babidonia caid yacnocquido  
 uesquin cuidquioshe

—quec cuëdëncuededposh Esus tantiaquido dadpenquioshë.

<sup>4</sup> Adsho tantiash Nuquin Papa chuiquid dapan tsadten tsadnuc abi dacue-  
 nadecec tabadquido: —Nuquin Papa Nuquin Icbo nec —quequin ismenuec  
 danëshën tinquebudcuededposh. Adec tinquebudcuededequi: —Abimbo  
 caic. Nuquin Papa bëdambo iquec —quecuededposh dadanobi ëshëcquido  
 4tedi icquido tsusiobo 24tedi icquidobëdi. <sup>5</sup> Adashic auëshquiobidi abentsëc  
 cuëdëncuededposh.

—Nuquin Papa matses uaquidquo yec bëdamboshë iquec, canuna.

Nuquibi abi tantiaquidtedishun: “Nuquin Papa bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa  
 bëdambo iquec,” canuna

—queposh.

*Esusën abi tantiaquido beduante chiaid*

<sup>6</sup> Adsho tantiash abu tesquiianiacbimboec acte nua chododoquiacbimboec  
 Nuquin Papa yacnocquido dadpenquo cuëdëncuededposh.

—Abi chieshëncuquin Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

<sup>7</sup> Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanacimboen abided ciudadec unësaid  
 Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nac-  
 nemëdquiacbimboec:

“Nëbien con Icbo chochitec,”

quiash Esus tantiaquido bëdamboec tabadec.

<sup>8</sup> Abi tantiasho Nuquin Papan bëdamboen isaïdo yec abi icsaïd ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinacim-  
 boen abitedi icsaïsa icmendac

—quec comapenec cuëdëncuededposh.

<sup>9</sup> Adnubi mayan bëdan chuioaposhi. —Ëmbi chuibocpadomboen dada  
 uata. “Isadaïdbo aton chido bedquin aton matses cho-chomiash pemec  
 bëdamboec tabadquid. Adembidi abi tantiaquido Esusën: ‘Cho,’ cac abi yacno  
 nidaniash cuishonquequiec tabadendac,” quequin dada uata. Abimbo  
 caimbi. Nuquin Papan chiaïdquid chiec nebi —queposh mayan bëda.

<sup>10</sup> Adsho tantiashini Nuquin Icbo danec ismenuec danëshën tinquebuid-  
 poc. Adshobini: —Ëbi aden ismenda. Nuquin Papauïdtsëqui aden ismeta.  
 Mibipadquid Nuquin Papan yuabidi nebique. Nuquin Papan Mayanën Esus  
 tantiamequin Nuquin Papan chiaïd dada uamepampic. Aidëmbidi namiac

mibipadquidobëd Esusën yua nebique. Èbi aden ismenda —queposh mayan bëda.

*Cabayo ushu catsadquid bëdamboshë icquid*

<sup>11</sup> Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëdtiapimbo icquid yec ambi chiapadomboen naquidquio Esusquio nec —quequin tantiombi. Ambi chiapadomboen icsaido cuidquidquio icquin icsaido cuesun secanuec niosh. <sup>12</sup> —Matsesën ompodëmëdtiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenquio icposh. Utsibon tantiatiapimbo icnuc ambentsëqui tantiate niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bëdada uadaid ismeposhi. <sup>13</sup> Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquio nec —camenuc aden ismeposhi. <sup>14</sup> Esus bëyuc nidnuc abi tsibanec abi tantiaquidobëd mayan bëdabo cabayo ushucquidquidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh. <sup>15</sup> Abi bëyucquid ana shëcuënuëshquio chështe cuënumbo icquid cueshqueposh. —Ambi chiapadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiapadomboen naquin shancuinbimboecquid uba caid nua ënë icnuc tish-tishacbimboen nua intac icnuc cuesun secaindac. <sup>16</sup> Aton dashcute bëntse icquidën abi cuëmëdquid utsi dada uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

<sup>17</sup> Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho. <sup>18</sup> Èmbi chiapadec cho-choshon matsesën nami mimbi nua tëpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquio. Nëidic bacuëbo. Nëidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

<sup>19</sup> Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui <sup>20</sup> cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncami-aidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiapadomboen matses namequidquio niosh. Adec muaquin abi chuiquid dapabimboecnuc nacnemequidtsen

niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh. <sup>21</sup> Adshumbic Esusën ana shëcuënuësh chështe cuënumbo icquid cueshquequidën: —Ëbi chieshënquidotedi unësta —caquien cho-choboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

## 20

### *Satanas uidën uaid*

<sup>1</sup> Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh. <sup>2</sup> Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh. <sup>3</sup> Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh pduentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. —Aden seta 1000tedi matamiabi icquin abi uidën uactedembi matses muauaquin icsametiapimbo iquec —queshun chicten bidiacquid uidën uaquioposh. Aden ismeposhi.

<sup>4</sup> Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbëdtambi matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choeboed chuiquid dapabëdta abibimboecnuc nacnenaid tantiapimbo icquido neposh. Adecbidi: —Aidën yua nebi —quec aid chuiquid icsamboshë icquid cuëmëdquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiac tabadposh. <sup>5</sup> Unësaidotedi uincuemiambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. <sup>6</sup> Adnubien tauaquin uincuemiaido bëdambo yec cuishonqueposh: —Padpidec unëstiapimbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

### *Satanasquio chian anëdënquequid nëniaid*

<sup>7</sup> Adshumbic aidtedquio seta 1000tedi matameshun uidën uaid chicquin Satanas cuemendac. <sup>8</sup> Adoaquien matses icsamenuec muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

<sup>9</sup> Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid budmequin uesquin pichicaindac. <sup>10</sup> Adshumbic aido icsa uamequidtsen Satanasquio

bedshun acte uquëducuësh chondaïd chuiquid icsamboshë icquidbëdta nidaid shëcuënuësh chondaïd ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

### *Icsambo icquido cuidte chiaïd*

<sup>11</sup> Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec. <sup>12</sup> Nuquin Papa yacno unësaïdo uincuemiaïdo abitedimbo tabadposh. Adnubien bëshunenquio icquin dada uaten dada uabanacimboen Nuquin Papan abitedi tantiaquid icquin matsesën naidtedi abimbo chuïbamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuïbamposh. <sup>13</sup> Unësaïdo abitedi icposh. Utsi-utsiec unësaïsho chian dapa mad caïd nëniaïdo uincuemiaïdo nïosh. Utsi-utsiec nidaidën chococaid uincuemiaïdo nïosh. Adsho aidon naidtedi Nuquin Papan chuïbamposh. <sup>14-15</sup> Adshumbic Esus tantiesabo icsho documento nibëdquidbimboecsho abi yacno tabadmenquio icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquidoudquio icposh. —Adquid iquendac —quequin aden ismeposhi.

## 21

### *Nuquin Papabëd tabadaïdquio*

<sup>1</sup> —Esus tantiesabo chian anëdënquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaïdtsen chucambo icposh. Abubëdi nidaid shëni nibëdnuc utsi chucambo icquiduidquio icposh. Ënden iccondaïd chian dapa mad caïdtsen nibëdposh. <sup>2</sup> Adnubien Esusbëdi Nuquin Papa tabadaïdquio abichobi Edusaden chuca caïd abucuësh budposh. Chido nëbi bedboedën aton bënë cuishoncamiacimboec cuishoncamiandquid yec bëdamboshë icposh. <sup>3</sup> Adnubien Nuquin Papa tsadacnuëshquio comapenec cuëdposh naden chiec. —“Con matses nec,” quïash nëbi Nuquin Papa matsesbëdi tabadendac cuëshëdenquio yec. Adsho isun aton yuabo icquin matses abitedishun: “Nuquin Icbombo nuqui tantiaïdquio nec,” caïndac. <sup>4</sup> Ambo Nuquin Papan abitedi chuca uacnombo aïdbëdi tabadec matses shubitiapimbo iquendac bëun ucachimboec. Nidaïd shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

<sup>5</sup> Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindami bëdamboshë icnuc —queposh Nuquin Papa Esusbëdi. Adshumbic ëbi chuïposh. —Ëmbi aden chuïboed dada uata. Ëmbi muesambo icquin abimbo chiaïd nec —queposh Nuquin Papa Esusbëdi.

<sup>6</sup> Adashic Nuquin Papa padpidec onquec: —Ëmbi chuïboctedimbo nainquin naindami utsibon: “Padi,” catiapimbo icnuc. Ëndenquimboshë nidaid

uabi ictenedi nebi. Nèbi adquid yec nibèdantiapimbo icquid nebi. Adquid yec abitedishun Icbombo icquin èmbi tauaidtedi nainendambi. Adquid icquin acte bunac bimboec èbèd tabadte bunquidon con Mado Esus tantia sho èbèdi tabadmendambi. <sup>7</sup> Satanasën: “Chieshtomenu,” cauidaido Esusbèdta èbi chieshtoenquo icquin tantiaquido èbèdi tabadmendambi bèdamboshè yacnombo. Èbi papa casho: “Ai, con mado mibi nec. Con champi mibi nec,” caindambi. <sup>8</sup> Adshumbic utsibo chian dapa anèdènquequid icsamboshè nuadquid nèsecaindambi. Nèidtedi icsamboshè icquido adoendambi. Nèidic èbi bèdiactsèc tantiauidtsèchoedobi chieshèmènquidon: “Cuesnu,” cac chieshtoash tantiesa yanoaido. Nèidic Esus tantiesabo abitedi. Nèidic icsamianquido. Nèidic chieshèmènec cuesunianquido. Nèidic dada aton dada utsibèdi chichudnanquido. Nèidic aton chidopenquo chudquido. Nèidic aton bènèpenquo chudmequido. Nèidic nènèchoquidobèdtabi cuète podon unès uante bunquido. Nèidic ambi nacnenaaidi papa caquin tantiaquido. Nèidic muauanquido. Aidtedi chian dapa anèdènquequid nèsecaindambi —queposh Nuquin Papa.

### *Abi tantiaquido Esusbèd icte chiaid*

<sup>9</sup> Adnubien mayan bèdan Nuquin Papan matses cuidte cushtoaid chiuimboed abentsèc choshon chuoaposhi. —Isec cho. Chido nèbi bedboedèn aton bènè cuishoncamiac bimboen abided ciudadec unèsaid Esus cuishoncamequido tabadaid mibi ismenu. Cho —caposhi Esus tantiaquido ismenuen. <sup>10</sup> Adshumbic Nuquin Papan Mayanèn tantiamiac ushquin isac bimboen isombi. Mayan bèdan èbi buanquin ispombi. Aden buanshun macuèsh dapa mananènquo tsadumposhi. Adoac anoshon isquien abucuèsh Nuquin Papa abi tantiaquidobèd abi tabadaid abichobi shubu dadpen icquid budposh. Aid tabadaid Edusaden chuca caposh. <sup>11</sup> Aid tabadaidquido aid shubutedi Nuquin Papa tabadaid yec abi yacpadquo abichobi bèchamauanquiecposh. Casèdu bèdambo icquid bimboec isquid-isquidquido isadposh. <sup>12</sup> Shubu abitedi nènantan icnuc abichobi daquènè uaid icposh. Abucquo icnuc daquènè uaid niosh. Daquènè uaid puduedte shècuè 12tedi icposh. Aid shècuè icbo-icboen isquid yec mayan bèdabo 12tedbidi icposh. Aid shècuè bètashte 12tedbidi icposh. Aid bètashten Acobon mado cuèmèdquid 12tedbidi dada uabampaccosh naden. Bètashten Acobon mado Ose cuèmèdquid dada uatanquin bètashte utsin Acobon mado utsi Uda cuèmèdquid dada uatanquimbic adenuidi bètashten bètashtenquien Acobon mado cuèmèdquid cuèmèdquidquien dada uabampaccosh. <sup>13</sup> Aid daquènè uaid puduedte shècuè ushè choauc 3tedi icposh. Ushè nibèdauc nocte yauc aidtedbidi shècuè icoaposh. Ushè nibèdaucbidi sud yauc aidtedbidi shècuè icposh. Ushè budauc aidtedbidi shècuè icposh. <sup>14</sup> Ambo tauaquin daquènè uadoquin nidaid cuènote nuamboshè icquid dapa 12tedi bedshun Esusbèd icquido èbitedi cuèmèdquid 12tedi aid cuènote dapan abentse-abentsen dada uabampaccosh naden. Cuènoten èbi cuèmèdquid Uan dada uatanquin cuènote utsin Petedo cuèmèdquid dada uapaccosh. Adenuidi cuènoten cuènotenquien Esusbèd icquido cuèmèdquid cuèmèdquidquien dada uabampaccosh. Adoshombic nidaid uèdèshcabanshun tauaquin sandoshon cuènote utsi tsindoaaid aid daquènè uaid niosh. — Esus tishabi icnuc Nuquin Papa tantiapampidobèdi Esus tantiaquido Nuquin Papa yacno Esusbèdi tabadendac —quequin tantiamenuen Acobon mado cuèmèdquidotedi dada uaidbèdta Esusbèd icquido cuèmèdquid dada uaid aden ismeposhi.

<sup>15</sup> Adshumbic èbi chuiboedèn mayan bèdan shocosh bèdaidquido nacnenaaid tambante sanamposh. —Nuquin Papa tabadacno tambanquin

daquënë uaidbëdtabi puduedte shëcuëtedi tambanten tambanu —queposh. <sup>16</sup> Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. <sup>17</sup> Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

<sup>18</sup> Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenauidquio yec nac-nacquio icposh. <sup>19</sup> Aid daquënë uaquin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. <sup>20</sup> Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. <sup>21</sup> Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu uaid nuacquid dapambo abichobi-abichobien nacnenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-actectsëcquio icnuc mabiunaid icposh. —Esusbëd Nuquin Papa tabadacnombo bëdambo icquiduidquio iquendac —camenuen aden ismeposhi.

<sup>22</sup> Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac. <sup>23</sup> Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquieccquid icquin ambo ushëmbouidi icmendac. Inchëshaid tantiadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi. <sup>24</sup> Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenene tabadcuenash: —Esusbëd Nuquin Papa abitedishun Icbombo nec. Abipadquid utsi nibëdec —quendac. <sup>25</sup> Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bëtashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac. <sup>26</sup> Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi. <sup>27</sup> Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin

Papa yacno adquio bēdamboshēuidquio iquendac —quequin aden ismeposhi mayan bēdan.

## 22

### *Nuquin Papa yacno acte ismiaid*

<sup>1</sup> Adshumbic aid mayan bēdan padpiden ismeoaposhi. Adoac Nuquin Papa abided cuidadec unēsaid aton Madobēdquio tsadte dapan tabadacnuēsh matses unēstiapimbo icmetequid acte bēdambo icquid nushan nibēdquidquio chēuēdsho ispombi. <sup>2</sup> Nuquin Papa yacnuēshquio choec chēuēdec ambo tabadquido Esus tantiaquido tabadaid shubu nēnantanquio chēuēdposh. Aid cuēmambi matses unēstiapimbo icmetequid cuētetsen icposh. Baded-badedquie bacuēquidquio niosh. Inchēshēn ushē choan-choanquie bad-edquio bacuēquid niosh. Aid cuēte podo nidaid utsi-utsiec yacno tabadquido bēdambo icmetequid niosh. —Aton Mado abided cuidadec unēsaid tantiaquido abēdi tabadmequin Nuquin Papan unēstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abēdi tabadmequin Nuquin Papan daicsabudtiapimbo icquid icmendac —camenuen cuēte aton podobēdta ismeposhi. <sup>3</sup> Aden abitedi bēdambo icmiac cuidtequido nibēdquio iquendac. Icsambo icquido nibēdnuc Nuquin Papa aton Mado Esusbēd tabadacnoshon aid daēdi tantiaquie Esus tantiaquido tabadendac. <sup>4</sup> Adec: —Con bacuēbo nec —quequin Nuquin Papan abi cuēmēdquid dada uaquin bēsaiadon Nuquin Papambo bēisquie tabadendac. —Nidaidēn tabadec bēdamboec tabadquido Nuquin Papabēd tabadec abipadquio bēdamboshē yanendac —camenuen aden ismeposhi. <sup>5</sup> Ambo bēdambouidquio yec inchēshenquio iquendac. Nuquin Papa bēchamauanquiequidēmbi ushēmbouidquio iquendac inchēshaid tantiadenquio yec. —Aden abi tantiaquido bēdamboen isquin ēnenquio icquin bēdamboshē icmendac. Chuiquid dapabo icmiac Esusbēdtambi ēnenquio icquin namendac —quequin ismeposhi.

<sup>6</sup> Adshumbic mayan bēdan chuioposhi. —Tantia. Mibi chuinu. Nuquin Papan Mayanēn tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanēn namiaid icquin abimbo chuiquin mibi dadpen ismebanombi. “Nēbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bēda.

### *Esus chote chiaid*

<sup>7</sup> Adnubini Esusēnquio naden chuiposh. —Chieshtoenquio icquin ēbi tantiaata. Nēbimbobi nidaidēn choec budebique. Nēid dada uaid isquin ēbi tantiaquiota. Adsho mibi bēdambo icmendambi —caposhi Esusēn.

<sup>8</sup> Uan nebi. Abimbo chuiquin nēid dada uaombi. Aden mayan bēdan chuibanquin ismeposhi. Aden ēnquimbi ismiaquini: —Nuquin Papapadquidien nechitec —quetanec danēshēn tinqeбудuidpoc ēbi ismequid mayan bēda ismenuec. <sup>9</sup> Adshobini: —Padi. Aden ēbi ismenda. Mibipadquid Nuquin Papan yuabidi nebique. Ēndenquimboshē Nuquin Papan tantiamiac min tsusedpabo isadaidbon ambi chiaidquio dada uapampic. Nēbi ēmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidtsēqui tantiaquin aden ismeta —caposhi mayan bēdan.

<sup>10</sup> Adashic padpidec: —Ēmbi chuibamboedbēdta ēmbi ismeboedtedi chuiquin dada uata. “Nēid dada uaid isec onquequin ma Esus tantiaquidon

tantianu. Nëbi adquid yanushe. Chieshtoenquo icquin Esus tantiec ma tabadnu,” queshun dada uata. <sup>11</sup> Nëbimbobi Esus chonoc Esus tantiesabo badedquo bëdamboec tabadcuentiapimbo iquendac. Abi icsaid badedquo ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

<sup>12</sup> Adnubini Esusën chuoaposh. —Chieshtoenquo icquin ëbi tantia-ata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi. <sup>13</sup> Nuquin Papan padquidquo nebi. Ëmbi tantiacmaid nibëdnuc abitedi comapenen tantiaquidquo nebi. Nidaid uabi yec ictenedi nëbi adquidquo yec nibëdantiapimbo icquid nebi. Adquid yec abitedishun Icbombo nebi.

<sup>14</sup> Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen. <sup>15</sup> Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquo chudquido. Nëidic aton bënëpenquo chudmequido. Nëidic cuesanquido. Nëidic papa quequin ambi nacnenaidi tantiaquido. Nëidic abi bunaiduidquo naic muauanquido. Aidedi Nuquin Papa yacno puduedtiapimbo iquendac.

<sup>16</sup> Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac matsesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquo nebi. Utsin: “Dëniacnu,” cadtiapimbo icquid nebi. Adquid icquin matses abitedimbo namendambi —quequin chuiposhi Esusën.

<sup>17</sup> Adsho tantiashun Nuquin Papan Mayanën tantiamiacpadomboen chuiquin: —Nëbimbobi Esus chonoshe. Aidquo tantiabenta —caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: —Nëbimbobi chonoshe. Aidquo tantianuna —cac bëdambo ictsiash. Adsho tantiash Esus tantiesabo acte bunacbimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

<sup>18</sup> Tantia. Ëmbi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ëbi ismeboedtedi dada uaombi. Ëmbi dada uaboed tsitënquin ambembi chiaid dada uainda. Ëmbi chuibocpadomboen Nuquin Papan mibi cuidtsiashe. <sup>19</sup> Adembidi ëmbi dada uaboed utsi uainquo icquin abimbo chuita. Ëmbi chuibocpadomboen Nuquin Papan mibi unëstiapimbo icquid icmenquo ictsiash. Adembidi bëdamboshë yacno abëdi mibi tabadmenquo ictsiash.

<sup>20</sup> —Ma aidedi tantianu —quequin Esusën chiacpadomboen mayan bëdan aidedi ismeposhi. Ëmbi chuibocpadomboen Esusën: —Nëbimbobini choendac —caposhi. Adsho tantiashun: —Ai, nëbimbobi chota —capombi.

<sup>21</sup> Mibitedi Esus tantiaquidotedi tantiaquin: —Ambi nabocpadomboen Nuquin Icho Esusën bëdamboen isquin bëdambo icmepashun —caimbi. Padi. Aidedi chuiquin dada uaombi.